


Topẽ vĩ rá



New Testament in Kaingang (BR:kgp:Kaingang)

Topẽ vĩ rá

New Testament in Kaingang (BR:kgp:Kaingang)

copyright © 2011 Wycliffe Bible Translators, Inc.

Language: Kaingang

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kaingang

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-04

PDF generated using Haiola and XeLaTeX on 18 Apr 2025 from source files dated 29 Jan 2022

16af52c8-0e45-5e91-b36c-cd314d36d7fc

Contents

MATEUS	1
MARCOS	84
LUCAS	129
JOÃO	219
HAN KÂMÊ	278
ROMA	351
1 CORINTO	388
2 CORINTO	423
GALÁCIA	444
ÉFESO	457
FILIPOS	469
COLOSSOS	477
1 TESSALÔNICA	485
2 TESSALÔNICA	493
1 TIMÓTEO	497
2 TIMÓTEO	507
TITO	514
FILEMOM	518
HEBREU	520
TIAGO	547
1 PEDRO	557
2 PEDRO	567
1 JOÃO	573
2 JOÃO	581
3 JOÃO	582
JUDAS	584
NÉN VENH KE	587

MATEUS TỸ RÁ

*Jesus jóg'jóg ve ag
(Lc 3.23-28)*

¹ Jesus Cristo jóg'jóg ve ag rán ke vĕ. Jesus Cristo vỹ tỹ Davi krĕ'krĕ nĩ, kỹ Davi vỹ tỹ Abraão krĕ'krĕ nĩ.

² Abraão vỹ Isaque han. Kỹ Isaque vỹ Jacó han. Kỹ Jacó vỹ Judá han, ti mré ke ag ke gé.

³ Kỹ Judá vỹ Peres han. Zera ti ke gé. Ā prũ tỹ Tamar fi ki tóg ag hyn han, Judá ti. Kỹ Peres vỹ Esrom han. Kỹ Esrom vỹ Arão han.

⁴ Kỹ Arão vỹ Aminadabe han. Kỹ Aminadabe vỹ Nasom han. Kỹ Nasom vỹ Salmom han.

⁵ Kỹ Salmom vỹ Boaz han, ā prũ tỹ Raabe fi ki. Kỹ Boaz vỹ Obede han, ā prũ tỹ Rute fi ki. Kỹ Obede vỹ Jessé han.

⁶ Kỹ Jessé vỹ pã'i mág tỹ Davi ěn han.

Kỹ pã'i mág tỹ Davi vỹ Salomão han, ā prũ ěn fi ki, ũ tỹ Urias prũ ja nĩ ěn fi ki.

⁷ Kỹ Salomão vỹ Roboão han. Kỹ Roboão vỹ Abias han. Kỹ Abias vỹ Asa han.

⁸ Kỹ Asa vỹ Josafá han. Kỹ Josafá vỹ Jorão han. Kỹ Jorão vỹ Uzias han.

⁹ Kỹ Uzias vỹ Jotão han. Kỹ Jotão vỹ Acáz han. Kỹ Acáz vỹ Ezequias han.

¹⁰ Kỹ Ezequias vỹ Manassés han. Kỹ Manassés vỹ Amom han. Kỹ Amom vỹ Josias han.

¹¹ Kỹ Josias vỹ Jeconias han, ti jāvỹ ag ke gé. Israel ag tỹ

cidade Babilônia ra mũ ěn kã tóg ag hyn han, Israel ag tỹ sigse kỹ mũ ěn kã.

¹² Ag tỹ cidade ěn tá vỹnvỹn ke kar kỹ Jeconias vỹ Salatiel han. Kỹ Salatiel vỹ Zorobabel han.

¹³ Kỹ Zorobabel vỹ Abiúde han. Kỹ Abiúde vỹ Eliaquim han. Kỹ Eliaquim vỹ Azor han.

¹⁴ Kỹ Azor vỹ Sadoque han. Kỹ Sadoque vỹ Aquim han. Kỹ Aquim vỹ Eliúde han.

¹⁵ Kỹ Eliúde vỹ Eleazar han. Kỹ Eleazar vỹ Matã han. Kỹ Matã vỹ Jacó han.

¹⁶ Kỹ Jacó vỹ José han, Maria fi mén ěn ti. Maria ěn fi ki Jesus tóg mur ja nĩ, hã vỹ: Cristo, he mũ.

¹⁷ Hã kỹ ag tóg 14 (ke) nỹtĩ, Abraão krĕ'krĕ ag, Davi mré nĩgrén kỹ. Kỹ Davi krĕ'krĕ ag tóg 14 (ke) nỹtĩ gé, ag tỹ ag sigse kỹ nỹtĩ tá ag nĩgrén kỹ, ag tỹ cidade tỹ Babilônia tá sigse kỹ nỹtĩ tá ag nĩgrén kỹ. Tag pãte ag krĕ'krĕ vỹ 14 (ke) nỹtĩ gé, Cristo mré nĩgrén kỹ. Cristo jóg'jóg ve ag hã vĕ.

*Jesus Cristo mur
(Lc 2.1-7)*

¹⁸ Jesus Cristo mur vỹ ge nĩ, ha mẽ. Ti mỹnh fi vỹ tỹ José prũnh ke fi nĩ, hã ra fag tóg ver jagnĕ mré nỹ ja tũ nĩ. ěn kã fi tóg kufy nĩ ha. Topĕ kuprĩg tỹ fi mỹ gĩr han jan hã vĕ.

¹⁹ Kỹ José tóg mĕg mũ sir, fi tỹ kufy nĩ ti, kỹ tóg ti mỹ e ti. Ũn jykré kuryj vĕ mỹr, José ti, hã kỹ tóg fi mỹ'ág han sór tũ nĩ, kỹ tóg fi to vĩ tũ nĩ sir. Hã ra tóg fi pin kỹ fi mỹ: “kỹ inh

hÿn ã tÿ prÿ nÿnh ke tÿ nÿ ha.” he sór mÿ sir.

²⁰ Ti tÿ ver fi tovãnh to jykren ký Topê tÿ jênê jafã tóg ti mÿ vênh ven mÿ sir, ti vênh péti ký. Ký tóg ti mÿ: “José,” he mÿ. “Tÿ ã Davi krê'krê ag kã ù nÿ,” he tóg. “Maria fi to jykren kónãnh tÿg nÿ. Jatun mÿ fi tÿ prÿg nÿ, fi tovãnh tÿg nÿ. Û tÿ pijé', fi kósin ti. Topê kuprÿg tÿ fi mÿ han ja vē.

²¹ Ti mur ký tóg gré nÿnh mÿ, ha vemní. Ký ti mÿ: Jesus, hemní. ã povo krenkren han jé tóg ke mÿ, ag tÿ Topê vÿ mranh mÿ ra,” he tóg, José mÿ, Topê tÿ jênê jafã ti.

²² Hã ra Topê vÿ vãsÿ ã vÿ tó ti ù mÿ tag tó ja nÿ, ha mẽ.

²³ “Ûn mén ja tÿ fi vÿ kufy nÿnh mÿ,” he ja tóg nÿ. “Fi kósin fi ki mur ken ký ag tóg ti to: Emanuel, henh ke mÿ,” he ja tóg nÿ, Topê vÿ tÿ rán ký nÿ ki. Emanuel to ke vē, hã vÿ: “Topê vÿ ãg ki rÿr há han mÿ,” he mÿ, ãg vÿ ki, hã vÿ: Emanuel, he mÿ. José vÿ Topê vÿ tag ve ja nÿ.

²⁴ Ký José tóg rÿr mÿ sir, ti vênh péti kar ký. Ký tóg Topê tÿ jênê jafã ãn vÿ ki króm mÿ sir. Vênh prÿg han tóg mÿ, Maria fi mré.

²⁵ Hã ra tóg ver fi mré nÿ tÿ nÿgtÿ. Kejên fi tóg ã kósin vég mÿ. Ký José tóg ti jÿjin ký ti mÿ: Jesus, he mÿ. Fi tÿ ti ve kar ký tóg vãhã fi mré nÿ mÿ sir.

2

Pã'i ag tÿ Jesus venh kãmÿ

¹ Fi tÿ Jesus ve ãn kã fag tóg cidade tÿ Belém tá nÿtÿ, ga tÿ Judéia tá. Herodes vÿ tÿ pã'i tÿ rei nÿ, fi tÿ ti ve ja ãn kurã ki. Ký kejên ù ag tóg Jerusalém tá junjun mÿ. Kuvar há tá ag tóg kãmÿ ja nÿ, rã jur ja tá, ãjag jamã tá. Ûn estudo mág han mÿ ag vē, krÿg to ag tóg estudar he mág han tÿ.

² Ag tÿ Jerusalém tá junjun ký ag tóg sir: “ù tÿ ùri mur mÿ vÿ tÿ Israel ag pã'i mág nÿnh mÿ,” he mÿ. “Ti kri ãg krÿg vé, ãg tÿ ãg jamã tá nÿtÿn ký, rã jur ja tá nÿtÿn ký. ãg tÿ ti venh kãmÿ vē, ãg tÿ ti mÿ nén ù há vin sór vē. ãg hÿn hẽ tá ti venh ke mÿ?” he ag tóg, ù tÿ kuvar há tá kãmÿ mÿ ãn ag.

³ Ag vÿ tag vÿ pã'i tÿ Herodes mÿ e tÿ, ký tóg krÿ kufy nÿ sir. Jerusalém tá ke kar ag mÿ tóg e tÿ gé.

⁴ Ký Herodes tóg Topê tÿ ki rÿr tÿ to pã'i ag jé prêr mÿ sir, Topê vÿ to professor ag ke gé. Ký tóg ag mÿ: “Cristo hÿn hẽ tá mur ke mÿ nẽji?” he mÿ.

⁵ Ký ag tóg ti mÿ: “Belém tá ke nẽji, ga tÿ Judéia tá,” he mÿ. “Topê vÿ tó tÿ ù vÿ vãsÿ ti to tag rán ja nÿ, ha mẽ,” he ag tóg.

⁶ “Sÿ ti nÿ, cidade tÿ Belém ti, ga tÿ Judéia tá, he ja tóg nÿ. Ti sÿ nÿ ra tóg cidade mág ag kar kãfór kar nÿ, pã'i mág ãn tÿ tá mur kenh ke tigrÿn. Pã'i mág ãn vÿ tÿ ãg povo tÿ Israel kri pã'i mág jênh ke mÿ, ù tÿ Belém tá mur ke mÿ ãn ti, he ja tóg nÿ, Topê vÿ tÿ rán ký nÿ ki,” he ag tóg, professor ag, Herodes mÿ. “Hã ký tóg Belém tá mur ke mÿ, Cristo

ti," he ag tóg, professor ag.

⁷ Kĩ Herodes tóg vènh péju kĩa fóg èn ag mré vèmén mũ sir, ù tỹ krĩg to estudo mág han mũ èn ag mré. Kĩ tóg ag mỹ: "kurã tỹ hẽ ki ãjag krĩg èn ve vén?" he mũ.

⁸ Ag tỹ ti mỹ kurã tó kĩa tóg Belém ra ag jègnèg mũ sir. "Ãjag tỹ tá junjun kĩa ti jãvãnh nĩ," he tóg. "Vènh kar ki ti jèmèmnĩ. Ajag tỹ ti ve kĩa inh mỹ tónh kãmũmnĩ. Kĩa sóg ti venh tĩg sór mũ gé, sỹ ti mỹ nèn ù há nĩm jé," he tóg, Herodes ti.

⁹ Ag tỹ pã'i èn vĩ mẽ kar kĩa ag tóg mũ mũ sir, Belém ra. Ag mũ èn ki ag tóg krĩg èn ve mãn mũ gé sir, ag tỹ rã jur ja tá krĩg vég mũ èn. Krĩg èn vỹ ag jo tĩ mũ. Ag tỹ Belém tá junjun kĩa krĩg tóg ùn sĩ nĩgja kri hã sa nĩ sir.

¹⁰ Ag tỹ krĩg èn ve kĩa ag fe tóg mrin ke mũ sir.

¹¹ Ìn kãra ge kĩa ag tóg ùn sĩ ti vég mũ, ti mỹnh fi ke gé. Kĩa ag tóg ti krēm grĩnhgrĩnh ke mũ, ti mỹ: "tỹ ã Topè kósin nĩ," he jé. Kĩa ag tóg sir ti mỹ ajag tũ ti vin mũ, ouro ti, ka jènjo tỹ incenso ti ke gé, èg tỹ ti pũn kĩa ger há han jafã èn, kar kĩa ka tỹ mirra jènjo ke gé, èg tỹ ti pũn kĩa ger há han jafã ù vè gé.

¹² Hã ra Topè tóg, ag vènh péti ki (tóg) ag mỹ: "Herodes mỹ tó tũg nĩ," he mũ sir. Hã kĩa ag tóg èpry ù jagma mũ mũ, èmĩn ù jagma mũ kĩa ag tóg ajag jamã ra vỹnvỹn ke mũ sir, rã jur ja ra.

José fag tỹ vènh pigju

¹³ Ag mũ kar kĩa José tóg kejèn Topè tỹ jènè jafã vég mũ, ti vènh péti kĩa. Kĩa Topè tỹ jènè jafã tóg ti mỹ: "nĩ ra," he mũ. "Ûn sĩ va tĩg, ga tỹ Egito ra, ti mỹnh fi mré. Herodes vỹ ùn sĩ tag tén sór mũ. Hã kĩa vènh péju kĩa Egito ra tĩg. Kejèn sóg ã mỹ: ha vỹn ké, henh ke mũ. Egito tá inh vĩ jãvãnh nĩ," he tóg, Topè tỹ jènè jafã ti, José mỹ. Ti vènh péti kĩa tóg ti mỹ ke mũ.

¹⁴ Kĩa José tóg kuty èn kã jègnè kĩa fag tatĩn tĩ mũ sir, ga tỹ Egito ra, vènh péju jé.

¹⁵ Tá tóg nĩ nĩ. Herodes tỹ kejèn ter kĩa tóg tá vỹn ke mũ. Hã ra ti tĩg ja tag vỹ rán kĩa nĩ gé. Vãsỹ Topè tóg ã vĩ tó tĩ ù mỹ: "tag rán ra," he ja nĩ, hã vỹ: "ga tỹ Egito ra sóg vènh vĩ jènè, inh kósin tỹ tá vỹn ke jé," he mũ.

Herodes tỹ gĩr ag kygrèn

¹⁶ Hã ra Herodes tóg fagrĩnh mỹ fóg èn ag jãvãnh ja nĩ, ùn estudo mág han mũ èn ag. Vãhã tóg: "ag tỹ inh mỹ tó tũg hỹn," he mũ. Kĩa ti fe tóg gỹm ke mũ sir. Kĩa tóg ã pã'i ag mỹ: "ha mũ jèg, Belém ra," he mũ. "Tá gĩr ag kygrèn kãn nĩ, ùn gré ag, ùn kri prỹg tỹ 2 anos tá krỹg tũ èn ag," he tóg, ag mỹ. Ag mỹ tóg 2 anos tó, fóg ag tỹ ti mỹ: "1 ano kãfór ti nĩ ha, èg tỹ ti kri krĩg ve ja ti," hen kĩa. Kĩa polícia ag tóg gĩr ag kãgtén mũ mũ sir.

¹⁷ Hã ra tag tóg rán kĩa nĩ gé. Vãsỹ Topè vĩ tó tĩ tóg tag rán ja nĩgtĩ, ti jiji hã vỹ: Jeremias, he mũ. Èn tóg tag rán ja nĩ, ha mẽ:

18 “cidade tỹ Ramá tá ãg tóg vẽn kygfỹ mẽg mũ, vẽnýrénh mág ke gé. Raquel fi vỹ vẽnýrénh mũ, fi krẽ ag jé. Ag tỹ fi mỹ: fỹ tũg nĩ, he mũ ra fi tóg vẽnýrénh mũ. Fi krẽ ag vỹ tũ' he kãn, hã kỹ fi tóg fỹ mũ, vẽnýrénh mũ,” he ja tóg nĩ, Jeremias ti. Hã ra tóg tag ri ke nĩ, polícia ag tỹ gĩr ag kygrẽn mũ ti.

José fag tỹ Egito tá vỹn ke

19 Kejẽn Herodes ẽn vỹ ter mũ gé sir, pã'i ti. Kỹ Topẽ tỹ jẽnẽ jafã vỹ José mỹ vẽn ven mũ, ti vẽnh péti kỹ. Ga tỹ Egito tá tóg ti mỹ venh ven mũ. Tá fag tóg nỹtĩ nĩ, ga tỹ Egito tá. Tá tóg ti mỹ vẽn ven mũ, José mỹ, Topẽ tỹ jẽnẽ jafã ti.

20 Kỹ tóg ti mỹ: “nĩ ra,” he mũ. “Gĩr va tĩg, ti mỹnh fi pére tĩg gé, ga tỹ Israel ra. Ủ tỹ fi kósin tén sór mũ ẽn vỹ hur ter,” he tóg, Topẽ tỹ jẽnẽ jafã ti, José mỹ.

21 Kỹ tóg jẽnẽ kỹ tĩ mũ sir. Gĩr va tóg tĩ mũ, ti mỹnh fi pére tóg tĩ mũ gé. Kỹ fag tóg Israel ag ga ra mũ mũ sir.

22 Tá jun kỹ tóg pã'i mág tãg jyjy jẽmẽg mũ, José ti. Hã ra tóg tỹ Arquelau nĩ. Ti panh tỹ Herodes ri kén tóg tỹ pã'i tỹ rei nĩ, ga tỹ Judéia tá. Kỹ tóg ti kamẽg mũ. Kỹ Topẽ tóg ti vẽnh péti kỹ ti mỹ: “ga tỹ Judéia tá nĩ mãn sór tũg,” he mũ. Kỹ tóg tĩg mãn kỹ ga tỹ Galiléia ra tĩ mũ sir.

23 Kỹ tóg cidade tỹ Nazaré tá jamãn mũ sir. Hã ra tóg rán kỹ nĩ gé, Nazaré ti. Vãsỹ Topẽ vĩ tó tĩ ủ tóg tag rán ja nĩ gé, kỹ tóg: “ti to ag tóg: Nazaré tá ke

vẽ, henh ke mũ,” he ja tóg nĩ, Topẽ vĩ tỹ rán kỹ nĩ ki, Jesus to. Hã ra tóg ge nĩ.

3

João Batista tỹ ag jyvẽn
(Mc 1.1-8; Lc 3.1-18; Jo 1.19-28)

1 Kejẽn João tóg ẽmã tũg ja ra tĩ mũ, ga tỹ Judéia tá ga kórég ra. João Batista ẽn vẽn. Ga kórég tá jẽ kỹ tóg ag jyvẽn mũ sir.

2 “Ajag jykre tovãnh nĩ, ủ tỹ kanhkã tá nĩ ẽn tỹ tỹ ajag pã'i nĩ jé,” he tóg, João ti.

3 João ẽn to tóg tag rán ja nĩ, vãsỹ Topẽ vĩ tó tĩ ẽn ti, Isaías he mũ ẽn, ha mẽ. “Êmã tũg ja tá tóg jẽnh ke mũ, ga kórég tá,” he ja tóg nĩ. “Tá tóg ag mỹ jamã hár(a) ke mũ sir. “Êg Senhor kãtĩg ke jo vẽnh jãnhkrigkrig nĩ,” he jé tóg ke mũ. “Êpry kurég ajag tóg tĩ, ẽmĩn kurynh ajag tóg tĩ gé, ajag pã'i mág jun ken kỹ. Kỹ tag ri ke han nĩ, ajag jykre pãno togvãnh nĩ, ẽg Senhor kãtĩg ken jo,” he jé tóg ke mũ,” he ja tóg nĩ, Isaías ti, João to.

4 Jo João ẽn kur tóg tỹ cavalo pãnĩ sór kyki tỹ há nĩ. Nén ủ fár tỹ tóg vẽnógfĩn ja han tĩ gé. Ópã hã ko ti tĩ, mỹg mré hã, João ti.

5 Kỹ ag tóg ti tá junjun kãn mũ sir, cidade tỹ Jerusalém tá kãmũ kỹ, ga tỹ Judéia kar tá kãmũ kỹ, goj tỹ Jordão tá ke kar ag ke gé. João tá ag tóg junjun kãn mũ sir.

6 Kỹ tóg ag kygpég mũ sir, goj tỹ Jordão ki, ag tỹ: “Topẽ vĩ mranh ja sóg nĩgtĩ,” hen kỹ.

⁷ Kĩ ù tỹ Fariseu he mũ ag vỹ ti tá junjun mũ gé sir, ù tỹ Saduceu he mũ ag ke gé, pã'i ag. Ón kĩ ag tóg ti to kãmũ mũ, ti tỹ ag kygpe jé. Kĩ tóg ag jyvẽn tar han mũ sir, João ti. “Pỹn ri ke ãjag tóg nỹtĩ, ãjag jykre pãno tâvĩ nĩn kĩ,” he tóg ag mỹ. “Û nỹ ãjag mỹ: “Topẽ jũ venh ke tũ ãjag nĩ,” he tĩ?”

⁸ ãjag jykre si tovãnh nĩ, ãjag tỹ ti jũ ve jãvãnh tĩn kĩ. Vẽnh jykre há han nĩ, ãg tỹ ãjag jykre tãg hã ve jé.

⁹ Hã ra ãjag tóg jagnẽ mỹ: “Abraão vỹ tỹ ãg jóg'jóg ve nĩ, kĩ Topẽ hỹn tóg ãg to jũnh ke tũ nĩ, ãg tỹ tỹ Abraão krẽ'krẽ nỹtĩn tugrĩn,” he tĩ. Ke tũ vẽ hã ra. ãjag jykre kórég ãn to ãjag tóg jagtar ke mũ, ha vemnĩ. Topẽ vỹ Abraão krẽ'krẽ hyn han ki kanhró nĩ, pó tag tỹ mỹr, ti tỹ Abraão krẽ'krẽ ve sór kĩ, Topẽ ti.

¹⁰ Hã ra tóg ãjag tỹ tũ' henh ke mũ, ãjag tỹ ãjag jykre kórég tovãnh tũ nĩn kĩ. ãg tỹ ka gỹn ri ke tóg nĩ. Ti kanẽn vãnh kĩ ãg tóg ti gỹn tĩ, ti tỹ pĩ han jé. Ri ke han jé tóg ke mũ, Topẽ ti, ãjag tỹ vẽnh jykre há han sór tũ nĩn kĩ. Kĩ tóg pĩ ki ãjag vãm ke mũ, Topẽ ti,” he tóg ag mỹ, João ti, Fariseu ag mỹ, Saduceu ag mỹ ke gé.

¹¹ Kĩ João tóg vẽnh kar mỹ: “goj hã tỹ sóg ãjag kygpég tĩ, ãjag tỹ ãjag jykre tovãnh kĩ,” he mũ. “Inh nón tóg kãtĩg mũ hã ra, Cristo ti. Inh kãfór ti nĩ. Tỹ sóg ti camarada nĩ jãvãnh nĩ, sỹ tỹ ti krẽm ke pẽ jẽn kĩ. ãg camarada ag vỹ ãg pẽn né gé mũgtĩ, ãg pẽn to ró ti. Sỹ ti

mỹ gé tĩg ke vẽ vẽ, hã ra sóg tỹ ti krẽm ke pẽ nĩ, ti tỹ inh kãfór nĩn kĩ. ãn hã tóg Topẽ kuprĩg tỹ ãjag jagrẽ han ke mũ. Kĩ tóg tỹ pĩ nĩ ve nĩ. Ti tỹ ãjag kygpenh ken hã vẽ,” he tóg, João ti, Jesus to.

¹² “Ti kãtĩg vỹ ãg tỹ rãgró rẽn ri ke nĩ. Ti rẽn kar kĩ ãg tóg ti fár pũn tĩ. Ti kanẽn hã vin han ãg tóg tĩ. Cristo kãtĩg ken kĩ tóg ge nĩnh mũ. Ti to há nỹtĩ ag mỹ tóg: “ha kãmũ jãg,” henh ke mũ. Ti to há nỹtĩ tũ ag vãm jé tóg ke mũ, pĩ ki, hã ra tóg nhyn kenh ke tũ pẽ nĩ,” he tóg, João ti.

*João tỹ Jesus kypé
(Mc 1.9-11; Lc 3.21-22)*

¹³ ãn kã kejẽn Jesus tóg João tá jun mũ gé sir, goj tỹ Jordão tá. Ga tỹ Galiléia tá tóg kãtĩ mũ. Kĩ tóg João mỹ: “ha inh kypé gé,” he mũ sir.

¹⁴ Hã ra tóg João mỹ e tĩ, kĩ tóg ti mỹ: “ã hã tỹ inh kypenh ke vẽ vẽ,” he mũ. “Inh mỹ tóg e tĩ, ã tỹ inh mỹ: ha inh kypé, henh kĩ,” he tóg mũ, João ti, Jesus mỹ.

¹⁵ Hã ra Jesus tóg ti mỹ: “hỹ,” he mũ. Hã ra tóg isỹ vẽnh jykre kuryj han kãn há tĩ,” he tóg, João mỹ. Kĩ tóg ti kypég mũ sir.

¹⁶ Ti tỹ Jesus kype kar kĩ ag tóg goj kãtã kãpa mũ sir. Kĩ Jesus tóg kanhkã nor nĩ ãn vég mũ, ha mẽ, kĩ tóg Topẽ kuprĩg kãtère ãn vég mũ. Sórag ri ke tóg nĩ, ti kãtère ti. Jesus kri tóg kãtère mũ.

¹⁷ Kĩ vẽnh vỹ tóg mẽ há tĩ, kanhkã tá, kĩ tóg: “inh kósĩn pir vãgtĩ,” he mũ. “Inh fe pẽ

věgtĩ,” he tóg, ũ tỹ kanhkã tá vĩ mũ ti.

4

Japo tỹ Jesus krĩn kónãn sór (Mc 1.12-13; Lc 4.1-13)

¹ Kĩ Topě kuprĩg vỹ Jesus mỹ: “ĕmã tũgja ra tũg,” he mũ. Kĩ tóg tĩ mũ. ĕmã tũgja tá nĩn kĩ Japo vỹ ti tỹ ã jóg vĩ mranh han sór mũ, hã ra Jesus tóg ke jãvãnh nĩ.

² Kurã tỹ 40 (ke) han tóg, ĕmã tũgja tá nĩn ki. Kĩ tóg jěg tũ nĩ, kurã tỹ 40 (ke) ĕn ki, kuty mré ke gé. Kar kĩ tóg sir kókĩr mũ, vễjẽn tũ nĩn kĩ.

³ Kĩ Japo tóg ti to kãtĩ mũ sir, ũ tỹ ĕg tỹ Topě vĩ mranh han sór mũ ĕn ti. Kĩ tóg Jesus mỹ: “Topě kósĩn vỹ tỹ ã nĩ,” he mũ. “Á tỹ tỹ Topě kósĩn nĩn kĩ póg tag tỹ ĕmĩ han, ã tỹ kon jé,” he tóg ti mỹ, Nén-Kórég ti, Jesus mỹ.

⁴ Kĩ Jesus tóg ti mỹ: “hã ra tag tóg rãn kĩ nĩ, ha mẽ,” he mũ. “ĕg pi(jé) ĕmĩ tãvĩ jamẽn kĩ rĩnrĩr mũgtĩ, hã ra ĕg tóg Topě vĩ hã jamẽn kĩ rĩnrĩr mũgtĩ, he tóg, Topě vĩ tỹ rãn kĩ nĩ ki. Kĩ tóg isỹ ti vĩ mranh jãvãnh tĩ, ĕmĩ to,” he tóg, Jesus ti, Nén-Kórég mỹ.

⁵ Kĩ Japo vỹ ti pére tĩ mũ, Jerusalém ra, cidade mág ĕn ra. Tá ag tóg Topě jo ĩn kri nỹtĩnh mũ mũ. Hã ra kãgnó tóg tá nĩ, Topě jo ĩn mã tá.

⁶ Kĩ Japo tóg Jesus mỹ: “ã hã ne tóg tỹ Topě kósĩn nĩ!,” he mũ. “Ha kema ki hũm,” he tóg. “Topě vĩ ki tag tóg rãn kĩ nĩ, hã vỹ: ã tỹ jěgně jafã ag mỹ tóg tónh mũ, Topě ti, kĩ ag tóg ã jy

nĩgãn mũ, he mũ. Kĩ ã tóg rỹj ke tũ nĩ. Á pẽn vỹ rỹj ke tũ nĩ, ag tỹ ã ki rĩr kĩ, he tóg, Topě vĩ tỹ rãn kĩ nĩ ki. Kĩ ki kema hũm,” he tóg, Japo ti. “Rỹj ke tũ ã nĩ ã tỹ tỹ Topě kósĩn nĩn kĩ,” he tóg, Nén-Kórég ti, Jesus mỹ.

⁷ Kĩ Jesus tóg ti mỹ: “kỹ tag vỹ rãn kĩ nĩ gé, ha mẽ,” he mũ. “Topě mỹ: ã mỹ ã tỹ tóg ja ĕn han mũ vỹ? he tũg nĩ, he tóg mũ gé, Topě vĩ tỹ rãn kĩ nĩ ki. Hã kĩ sóg ti tỹ ĩnh mỹ nén to: “han ra,” he mũ ĕn hã han tĩ, kĩ sóg hũm ke tũ nĩ,” he tóg, Jesus ti, Nén-Kórég mỹ.

⁸ Kĩ Japo tóg ti mré tĩg mãn mũ. Pãnónh těj ra ag tóg mũ mũ sir. Kĩ Japo tóg ti mỹ ga kar ven kãn mũ, ga kri mũ kar ag ke gé. Ti sĩnvĩ kar ĕn ven tóg ti mỹ.

⁹ Kĩ tóg ti mỹ ke mũ. “Isũ vễ, tag kar ti,” he tóg. “Hã ra sóg ã mỹ tovãnh kãn sór mũ, ã tỹ ã jakrĩ tỹ krỹ' hen kĩ, ĩnh krēm, ĩnh mỹ: Topě vỹ tỹ ã nĩ, he jé,” he tóg, Nén-Kórég ti, Jesus mỹ.

¹⁰ Kĩ Jesus tóg ti mỹ: “ha tĩg, Satanás,” he mũ. “ĕg pã'i tỹ Topě hã krēm ĕg tóg ĕg jakrĩ tỹ krỹ' he tĩ, ti hã to ĕg tóg: Topě vễ, he tĩ, hã kĩ tóg rãn kĩ nĩ, Topě vĩ tỹ rãn kĩ nĩ ki,” he tóg, Jesus ti, Nén-Kórég mỹ.

¹¹ Kĩ Japo vỹ tóg sir tĩ mũ, ti tovãnh kĩ. Kĩ Topě tỹ jěgně jafã ag tóg sir ti tá junjun mũ, Jesus ki rĩr jé. Á jóg vĩ mranh ja tũ tóg nĩ.

Jesus tỹ Galilėia tá Topě vĩ tóg

(Mc 1.14-15; Lc 4.14-15)

¹² Kejẽn ag tóg João ség mũ sir, kĩ Jesus tóg mễg mũ, ag tỹ

ti se ti. Kÿ tóg ga tÿ Galiléia ra tĩ mũ, vênh pèju jé.

¹³ Cidade tÿ Nazaré tá kãkutê kÿ tóg cidade tÿ Cafarnaum ra tĩ mũ, tá nĩ jé, goj nig tá, Zebulom ag jamã tá, Naftali ag jamã tá.

¹⁴ Hã ra tag tóg rán kÿ nĩ gé. Vãsÿ Topê vĩ to tĩ tóg tag rán ja nĩ, Isaías ti, kÿ tóg:

¹⁵ “Zebulom ag jamã tá ti nĩnh mũ, Naftali ag jamã tá, goj nig tá, goj tÿ Jordão mã tá. Fóg ag jamã tá ti nĩnh mũ, Israel tũ ag jamã tá, ù tÿ Topê ki kagtĩg ag jamã tá, goj nig tÿ Galiléia fyr ki.

¹⁶ Tá ag tóg Topê ki kagtĩg nÿtĩ, hã kÿ tóg tá ag kri kuty ri ke nĩ. Ti tÿ tá jun kÿ tóg ag kri kurãg ên ri ke han mũ, ag kanhrãn kÿ. Ag kãgter ke vè vè, hã ra tóg ag kanhrãn mũ ag krenkren jé,” he tóg, Topê vĩ rán ki. Kÿ tóg ge nĩ, Jesus tÿ tá nĩnh kÿ.

¹⁷ Ga ên tá nĩ kÿ tóg ag jyvèn mũ, kÿ tóg ag mÿ: “ãjag jykre si tovãnh ra,” he mũ, “ãjag tÿ ùri ù tÿ kanhkã tá nĩ ên tÿ tÿ êg pã'i nĩ ve jé,” he tóg, Jesus ti. Ti tÿ ù tÿ ki kagtĩg ag mÿ Topê vĩ tón hã vè.

Jesus tÿ ã mré mũ tĩ ag jé prêr

(Mc 1.16-20; Lc 5.1-11)

¹⁸ Kÿ tóg kejèn goj nig tÿ Galiléia ên fyr jagma tĩ mũ. Kÿ tóg tá ùn régre ag vég mũ. Û vĩ tÿ Simão nĩ, ag tÿ ù to: Pedro, he mũ tag ti. Kÿ ti jãvy vĩ tÿ André nĩ. Kur tÿ pirã kugmĩ jafã tÿ ag tóg goj kãki fón mũ, pirã kugmĩ jé. Ag rãnhraj vè, pirã kugmĩ tĩ ag vè.

¹⁹ Kÿ Jesus tóg ag ve kÿ (tóg) ag to tĩ mũ sir. Kÿ tóg ag mré vĩ mũ. “Inh mré kãmũjêg,” he tóg mũ ag mÿ. “Pirã kugmĩ há ãjag nÿtĩ. ãjag kanhrãn jé sóg ke mũ, ãjag tÿ êprã ke ag tÿ inh ki ge han jé,” he tóg ag mÿ, Jesus ti.

²⁰ Kÿ ag tóg vèsÿmér ãjag tÿ nén tovãnh kÿ mũ mũ, ti mré, Pedro ti, André ti ke gé.

²¹ Kÿ ag tóg mũ mũ, goj fyr jagma. Ag mũ sĩ han mũ ra Jesus tóg ùn régre ù ag ve mãn mũ gé. Tÿ ti Tiago nĩ, Zebedeu kósin, kÿ ti jãvy vĩ tÿ João nĩ gé. Canoa kãki ag nÿtĩ, kur tÿ pirã kugmĩ jafã ki ag tóg han nÿtĩ nĩ. Ag panh vĩ ag mré nĩ nĩ. Kÿ Jesus tóg ag jé prêr mũ sir.

²² Kÿ ag tóg vèsÿmér (ag tóg) ãjag tÿ nén tovãnh kÿ ti to kãmũ mũ, canoa tovãnh kÿ, ãjag panh ti tovãnh kÿ ke gé. Jesus mré ag tóg mũ mũ, Tiago ti, ti jãvy tÿ João ti ke gé.

*Jesus tÿ ag tÿ há' he
(Lc 6.17-19)*

²³ Kÿ Jesus tóg ga tÿ Galiléia kar mĩ tĩ mũ sir, ag mré. Judeu ag vênh kanhrãn jafã krêm tóg ag kanhrãn mũ. Ag mÿ tóg Topê vĩ sér to mũ, ù tÿ kanhkã tá nĩ tÿ tÿ êg pã'i nĩ tĩ. Ûn kagyga kar ag hyn han tóg, fag kar ke gé, gĩr kar ke gé.

²⁴ Hã kÿ ti kãme tóg vênh kar kri rũm mũ sir, ga tÿ Síria tá ke kar kri. Kÿ ag tóg sir ùn kagyga ag tatĩn kãmũ mũ, ti to, vênh kaga vènhmÿ han mũ ag mré hã, kÿ tóg ag tÿ há' he kãn mũ sir. Vênh jagrê kórég ag pan kãn tóg mũ gé. Û tÿ ter

tĩ han mũ ag tỹ hághá' he tóg mũ gé, ùn grĩngrĩn kỹ nỹtĩ ag tỹ ke gé, fag kar tỹ ke gé.

²⁵ Hã kỹ ùn tỹ hên ri ke ag tóg ti mré mũ mũ sir. Û ag tóg ga tỹ Galiléia tá kãmũ mũ, kỹ ù ag tóg cidade tỹ Decápolis tá kãmũ mũ gé, cidade tỹ Jerusalém tá ke gé, ga tỹ Judéia tá ke gé, goj tỹ Jordão mã tá ke gé.

5

*Jesus tỹ ag kanhrãn
(Lc 6.20-23)*

¹ Û e ag tỹ Jesus venh kãmũ kỹ tóg ag mré pãnónh ra tãpry mũ. Tá tóg nĩ mũ, kỹ ti mré mũ tĩ ag tóg ti mré nĩgnĩ mũ, ti rã hã.

² Kỹ tóg sir ag kanhrãn mũ, ag mỹ kãmén kỹ. Kỹ tóg ag mỹ tag tó mũ, ha mẽ.

³ “Topẽ vỹ ãjag ve há han mũ, ãjag tỹ: kórég inh nĩ, hen kỹ. Sỹ Topẽ kuprĩg tỹ jagrên kỹ nĩ tũ nĩ ra sóg tỹ ùn kórég nĩnh mũ vễ, hemnĩ. Kỹ Topẽ vỹ ãjag ve há han mũ. Kỹ ãjag tóg ti tỹ tỹ ẽg pã'i nĩ venh ke mũ, kanhkã tá,” he tóg, Jesus ti.

⁴ “Topẽ vỹ ãjag ve há han mũ, ãjag fỹn kỹ. Kỹ tóg ãjag fỹ ẽn tỹ tũ' henh ke mũ,” he tóg.

⁵ “Topẽ vỹ ãjag ve há han mũ, ãjag tỹ vễnh kar mỹ komêr hã vĩn kỹ. Kỹ ãjag tóg ga kar kri tỹ pã'i nỹtĩnh ke mũ, ùn mág pẽ,” he tóg.

⁶ “Topẽ vỹ ãjag ve há han mũ, ãjag tỹ vễnh jykre kuryj ve sór nỹtĩn kỹ, ti tỹ ãjag mỹ ãjag kókĩr ri ke tĩn kỹ, ãjag tỹ vễnh jykre kuryj ve sór nĩn kỹ.

Kỹ ãjag tóg venh ke mũ,” he tóg.

⁷ “Topẽ vỹ ãjag ve há han mũ, ãjag tỹ jagnẽ jagãgtãn kỹ. Kỹ Topẽ vỹ ãjag jagãgtãn ke mũ gé,” he tóg.

⁸ “Topẽ vỹ ãjag ve há han mũ, ãjag jãnhkri nỹtĩn kỹ. Kỹ ãjag tóg Topẽ venh mũ, ãjag jãnhkri nỹtĩn kỹ,” he tóg.

⁹ “Topẽ vỹ ãjag ve há han mũ, ãjag tỹ jagnẽ krĩ tỹ kãnhvy' hen kỹ. Kỹ Topẽ tóg ãjag to: “inh krẽ ag vễ,” henh ke mũ, ãjag tỹ jagnẽ krĩ tỹ kãnhvy' hen kỹ,” he tóg.

¹⁰ “Topẽ vỹ ãjag ve há han mũ, ag tỹ vễnh jykre kuryj to ãjag vóg kónãn mũ ra. Topẽ vỹ tỹ kanhkã tá ãjag pã'i nĩnh mũ, ag tỹ ti tugrĩn ãjag vóg kónãn mũ ra,” he tóg.

¹¹ “Topẽ vỹ ãjag ve há han mũ, ag tỹ isugrĩn ãjag mỹ vĩ kónãn mũ ra, ag tỹ ãjag vóg kónãn mũ ra. Ag tỹ ón kỹ ãjag to vĩ vĩ he kỹ tóg há tĩ, ag tỹ ón kỹ ãjag jykre pãno tó mũ ra, isugrĩn.

¹² Mỹ sér nỹtĩmnĩ, ãjag fe tỹ há' hemnĩ, ag tỹ ón kỹ ãjag kato vĩn kỹ. Kanhkã tá ãjag tóg nén kar há venh ke mũ, vễnh kato. Ge ja ag tóg nĩgtĩ vãsỹ, Topẽ vỹ tó tĩ ag mỹ, ãjag jo ke ag mỹ. Ag ri kén ãjag tóg tag venh ke mũ,” he tóg, Jesus ti.

*Sa to comparação
(Mc 9.50; Lc 14.34-35)*

¹³ “Sa ri ke ãjag nỹtĩ, ãjag tỹ ga kri mũn kỹ. Sa kãhór nĩn kỹ ẽg tóg ti tỹ sa há han mãn ki kagtĩg nỹtĩ. Kórég ti nĩgtĩ, ti kãhór nĩn kỹ. Kỹ ẽg tóg ti vãm

tĩ sir, kÿ tóg tũ' he tĩ sir," he tóg, Jesus ti. Ti tÿ ěg tÿ ti jykre tovãnh ke tũ kãmén hã vĕ.

Jĕngrĕ kãme

(Mc 4.21-23; Lc 8.16-17)

14 "Ga kri mũn kÿ ājag tóg jĕngrĕ ri ke nÿtĩ, ājag tÿ vĕnh jykre há han kÿ, ag tÿ ājag ki ve jé, Topĕ jykre há ti. Cidade mág vÿ ve há tĩgtĩ, kuvar há tá jĕ kÿ, ti tÿ pãnónh kri nÿn kÿ. Ti pí(jé) vĕnh péju kÿ nÿ'.

15 Ri ke ti nĩ, néj gru ti. ěg tÿ ti grug kÿ ěg pí(jé) lata krĕm ti fĕg tí'. Ti fĕg jafã kri ěg tóg ti fĕg tí. Kÿ vĕnh kar tóg ěn vég tí sir, ĩn kãtá nÿtĩ kar ěn ti.

16 Gemnĩ, néj gru ri ke nÿtĩmĩ. Topĕ jykre han nĩ, vĕnh kar tÿ ājag ki ve jé, ājag jykre há ti. Hã kÿ ag tóg ěg jóg tÿ Topĕ mÿ vĩ há han mũ, ěg jóg tÿ kanhkã tá nĩ ěn mÿ," he tóg, Jesus ti.

Topĕ tÿ Moisés mÿ vĕnh jykre nĩv

17 "Ājag hÿn iso: ti hã ne tóg Moisés tÿ ěg mÿ nén tó ja tÿ tũ' he sór mũ', he mũ, ti hã ne tóg Topĕ jykre ěn tÿ tũ' he sór mũ', he ājag hÿn tí. Vãsÿ Topĕ vĩ tó tí ag vÿ ěg mÿ tó ja nĩgtĩ, Topĕ jykre ěn ti, hã ra tóg tÿ tũ' he sór mũ', he ājag hÿn tí iso. Hã tũ vĕ. Sÿ ki króm kãn sór vĕ, Moisés tÿ nén tó ja ěn ki, sÿ ki króm kÿ sóg tÿ ājag kanhrãnrãn kãn ke mũ," he tóg.

18 "Topĕ vÿ ģ jykre ěn tÿ tũ' henh ke tũ nĩ, ha mẽ. Ga tÿ ver kanhkã mré nÿn kÿ tóg ģ jykre tÿ tũ' henh ke tũ nĩ, ga tÿ ver tũ' he tũ nĩn kÿ. Sÿ ki króm

kãn ke vĕ, kÿ tóg ki krov kãn kÿ nÿnh mũ, Topĕ jykre kar ti mÿr, ha mẽ," he tóg.

19 "Kÿ ājag tÿ tÿ tũ' he sór kÿ tóg kórég nÿ, ājag tÿ ti vĩ pir tÿ tũ' he sór kÿ. Ājag tÿ ti vĩ pir to ũ mÿ: han tũg nĩ, hen kÿ ājag tóg tÿ ũn kãsir nÿtĩnh mũ, vĕnh kar krĕm, kanhkã ki. Ājag tÿ hã ra han kãn kÿ ājag tóg tÿ ũn mág nÿtĩnh mũ, ājag tÿ vĕnh kar mÿ: "ki króm kãn sórmnĩ," hen kÿ. Kÿ ājag tóg tÿ ũn mág nÿtĩnh mũ, kanhkã tá," he tóg, Jesus ti.

20 "Fariseu ag ri ke nÿtĩ sór tũg nĩ. Topĕ vĩ to professor ag ri ke nÿtĩ sór tũg nĩ gé. Ón kÿ ag tóg Topĕ vĩ ki króm tí, hã ra ag tóg ki króm há han tũ nĩgtĩ. Ag jykre pí(jé) kuryj nÿ'. Ājag tÿ kanhkã ve sór nÿtĩn kÿ vĕnh jykre kuryj han nĩ," he tóg, Jesus ti.

Ĕg tÿ jagnĕ to há nÿtĩnh ke to vĕnh jykre

21 "Topĕ tÿ vãsÿ ěg si ag jyvĕn mẽ ājag huri, hã vÿ: ũ tén tũg nĩ, he mũ. Ā tÿ ũ tén kÿ ag tóg ģ senh ke mũ, ģ tÿ ti mré ter jé, he ja tóg nĩ, Topĕ vĩ tÿ rán kÿ nĩ ki.

22 Sÿ ũri ājag jyvĕn hã vĕ, ha mẽ. Ā régre to ģ fe tÿ gÿm ke tũg nĩ. Ā tÿ ģ régre to ģ fe tÿ gÿm ke kÿ tóg ģ tÿ ti tén ri ke nĩ. Kÿ tóg inh mÿ há tĩnh mũ, ag tÿ tag to ģ se kÿ. Kÿ ģ régre mÿ vĩ kónãn tũg nĩ gé. Ā tÿ ģ régre mÿ vĩ kónãn kÿ tóg inh mÿ há tĩnh mũ, ag tÿ tag to pã'i mág mÿ ģ ven kÿ. Kÿ ģ régre mÿ fĕfĕn tũg nĩ gé. Ā tÿ ģ

régre mý féfén ký ã tóg nũgme ki kutẽnh ke mũ, inferno ki, pĩ ên ki,” he tóg, Jesus ti.

²³ “Tag to jykrén nĩ, ã tỹ Topẽ mý nén ù pũn sór ký. Topẽ jo ìn krẽm. Æ tỹ tá jẽn ký ã régre kar mĩ êkrén nĩ. “Û mý iso jykrén kónãn tũ nĩ vỹ?” he jé ã tóg ke mũ. “Inh mý ù jũ han tũ nĩ vỹ?” he jé ã tóg ke mũ.

²⁴ Û tỹ ã to jykrén kónãn ký ti venh tĩg nĩ ver, Topẽ mý nén ù pũn tovãnh nĩ ver. Æ régre ên mý: “inh mý vẽn pãte fón nĩ,” hemnĩ ver. Kar ký Topẽ mý nén ù pũn sórmnĩ sir, ã tỹ ã régre mré vĩ kar ký,” he tóg, Jesus ti.

²⁵ “Kejẽn ã tóg ã mré ke ù mý név(e) jẽ, ký tóg pã'i ag mý ã kãmén tĩg ke mũ. Ti tỹ pã'i ag mý tónh tĩg ke mũ ên ti to hã ti mré vĩmnĩ, ti mý: “kajãm jé sóg ke mũ,” hemnĩ. Ke tũ nĩ (mũ) ra pã'i vỹ ã jykre pãno venh ke mũ, ký tóg polícia mý: “ti se ra,” henh ke mũ sir, ký tóg sir ã senh mũ.

²⁶ Ha mẽ, ki hã sóg tó mũ. Tá ã kãnhmar kãkutẽ mãn ke tũ nĩ. Æ tỹ kajãm kãn kar ã tóg kãkutẽ mãn mũ, tá, hẽn ri ke mũn,” he tóg, Jesus ti.

Æ prũ tũ fi mré nỹ tũ to vẽnh jykre

²⁷ “Topẽ tỹ ã si ag jyvẽn ù tag mẽ ãjag huri, ke gé, hã vỹ: “ã prũ tũ fi mré nỹ tũg nĩ,” he mũ.

²⁸ Sỹ ùri ãjag jyvẽn hã vẽn, ha mẽ: ã tỹ ùn týtá ù fi ki vẽn'ĩ ký tóg ã tỹ fi mré nỹ sỹ han ên ri ke nĩ sir, ã tỹ fi ki vẽn'ĩ mũ ti. Æ tỹ ùn týtá ù fi mrẽ nũr sór ký

tóg ã tỹ fi mrẽ nũr ri ke nĩ sir, ã tỹ fi to én mũ ti. Ke tũg nĩ.

²⁹ Æ tỹ nén ù ki vẽn'ĩ tugrĩn Topẽ vĩ mranh ký ã kanẽ tỹ nám kemnĩ, ã tỹ ki vẽn'ĩ jagy han mãn tũ nĩ jé. Æ kyvó nĩn ký tóg jagy tĩ gé vẽn vẽn. Æ tỹ hã ra nũgme ki kutẽ ký tóg jagy kãfór nĩ. Jagy pẽ ti nĩ, ã tỹ inferno ki kutẽ ti. Ký tag hã ve sór tũg nĩ.

³⁰ Æ tỹ ã nĩgé tỹ nén ù kórég han ký ã nĩgnó kym nĩ, ã tỹ ke mãn tũ nĩ jé. Æ nĩgnó pir nĩn ký tóg jagy tĩ gé. Æ tỹ hã ra nũgme ki kutẽ ký tóg jagy kãfór nĩ sir, ký tag hã kamẽg nĩ,” he tóg, Jesus ti.

Æ prũ fón tũ to vẽnh jykre (Mt 19.9; Mc 10.11-12; Lc 16.18)

³¹ “Tope tỹ ã si ag jyvẽn ù hã vỹ nỹ gé, hã vỹ: “ã tỹ ã prũ fi fón sór nĩn ký tóg há tũ nỹ,” he mũ. “Æ tỹ ge ra fi fón sór nĩn ký fi mý vẽn rãn ký nĩm nĩ, fi tỹ vẽn rãn ma tĩg jé,” he ja tóg nĩ.

³² Sỹ ùri ãjag jyvẽn hã vẽn, ha mẽ: ãjag prũ fón tũg nĩ. Æ tỹ fi fón ký fi tỹ ù mré nỹ mãn ký fi tóg ã tugrĩn Topẽ vĩ mranh mũ sir, ã tỹ tỹ fi mén pẽ ra. Fi tỹ ã jãvo vẽn sóg ki ù mré nỹ ja nĩn ký tóg há sĩ nỹ, ã tỹ fi mý: ha tĩg, hen ký. Ký fi mén tỹ fi fón ký fi tỹ prũg sór tũg nĩ gé. Æ prũ tũ fi vẽn, fi mén tỹ fi fón ja nĩn ký,” he tóg, Jesus ti.

Jagnẽ to ón ke tũ to vẽnh jykre

³³ “Vãsỹ Topẽ tỹ ã si ag jyvẽn ù tag mẽ ãjag tóg huri ke gé, hã vỹ: “jagnẽ mý ón tũg nĩ,”

he mũ. “*Ā tỹ ũ mỹ: Topẽ vỹ ki kanhró nĩ, hen kỹ ti mỹ ón sór tũg nĩ. Kỹ hã han nĩ gé, Ā tỹ Topẽ mỹ: tag hã han jé sóg ke mũ, hen kỹ. Ón kỹ vĩ tũg nĩ,*” he ja tóg nĩ, ěg si ag mỹ, Topẽ ti.

³⁴ Sỹ ũri Ājag jyvẽn hã vẽ, ha mẽ: “*Topẽ vỹ ki kanhró nĩ,*” he sór tũg nĩ, ón kỹ. “*Ū tỹ kanhkã tá nĩ ěn vỹ ki kanhró nĩ,*” he sór tũg nĩ gé, ón kỹ. Topẽ nĩgia vẽ, kanhkã tá, kỹ ón kỹ tag tó sór tũg nĩ.

³⁵ Kỹ: “*ũ tỹ ga kri ke ěn vỹ ki kanhró nĩ,*” he tũg nĩ gé. Topẽ tũ vẽ, ga ti, hã kỹ ón kỹ tag tó sór tũg nĩ. Kỹ: “*ũ tỹ Jerusalém tá ke ag ki rĩr tĩ ěn vỹ ki kanhró nĩ,*” he tũg nĩ gé. Ěg pã'i mág tũ vẽ mỹr, Jerusalém ti, hã kỹ ón kỹ tag tó sór tũg nĩ.

³⁶ Kỹ: “*ũ tỹ inh krĩ han mũ ěn vỹ ki kanhró nĩ,*” he tũg nĩ gé. *Ā tỹ Ā gãnh kuprig sór mũ ra Ā tóg Ā tỹ nén tỹ Ā gãnh kuprig ke mũ ěn ki kagtĩg nĩ, Ā tỹ Ā gãnh sán sór mũ ra Ā tóg Ā tỹ nén tỹ sán ke mũ ěn ki kagtĩg nĩ gé. Hã kỹ ón kỹ tag tó sór tũg nĩ gé.*

³⁷ Ki hã tómnĩ, jagnẽ mỹ, ón sór tũg nĩ. Ón kỹ Topẽ jiji tó sór tũg nĩ gé. *Ū tỹ Ā mỹ ki hã tó kỹ: hỹ, hemnĩ. Ti tỹ ki hã ke tũ nĩn kỹ: vó, hemnĩ gé. Ā tỹ han ke nĩn kỹ: hej, hemnĩ. Ā tỹ han ke tũ nĩn kỹ: nejé, hemnĩ. Ki hã tómnĩ, jagnẽ mỹ. Ā tỹ ón sór kỹ Ā tóg Nén-Kórég jykre hã han ke mũ. Ke tũg nĩ,*” he tóg, Jesus ti.

Ěg tỹ vẽnh kajãm ke tũ to

vẽnh jykre

(Lc 6.29-30)

³⁸ “*Topẽ tỹ ěg si ag jyvẽn ũ tag mẽ Ājag huri, hã vỹ: “ũ tỹ Ā kanẽ pir ki tãnh kỹ vẽnh kato ti kanẽ pir ũ ki tãnh nĩ gé,*” he ja tóg nĩ. “*Ū tỹ Ā jã pir ki tãnh kỹ mranh kỹ vẽnh kato ti jã pir ki tãnh kỹ mranh nĩ gé. Pãtén tũg nĩ,*” he ja tóg nĩ, Topẽ ti.

³⁹ Sỹ ũri Ājag jyvẽn mũn hã vẽ, ha mẽ: *ũ tỹ Ā vóg mũ ra ti vóg tũg nĩ. Ti tỹ Ā jamẽ ki tãnh kỹ ti mỹ Ā jamẽ ũ ti ven nĩ, ti tỹ Ā mỹ ki tãnh jé gé.*

⁴⁰ Ti tỹ Ā palitó măn sór kỹ ti mỹ Ā camisa mré nĩm nĩ gé.

⁴¹ Ti tỹ Ā mỹ: “*mũ nỹ, tag tá, kakó ja tá inh fón nĩ,*” hen kỹ ti mré tũg nĩ, hã ra ti mỹ: “*kór há tá inh Ā fón tũg mũ ha,*” hemnĩ.

⁴² Ti tỹ Ā mỹ nén ũ to: “*inh mỹ nĩm,*” hen kỹ ti mỹ nĩm nĩ. Ti tỹ Ā mỹ: “*inh mỹ prestar hemnĩ,*” hen kỹ ti mỹ: *vó, he tũg nĩ,*” he tóg, Jesus ti.

Ěg tỹ ěg kato vãsãn mũ ag tó há nỹtĩnh ke

(Lc 6.27-28, 32-36)

⁴³ “*Topẽ tỹ ěg si ag jyvẽn ũ mẽ Ājag huri, hã vỹ: “Ā mré ke ag to há nĩmnĩ, kỹ ũ tỹ Ā kato vãsãnsãn mũ ag to jũ nĩmnĩ gé,*” he ja tóg nĩ, Topẽ ti.

⁴⁴ Isỹ ũri Ājag jyvẽn hã vẽ, ha mẽ: *ũ tỹ Ājag kato vãsãnsãn mũ ag to há nỹtĩmnĩ, ũ tỹ Ājag vóg kónãn mũ ag to Topẽ mré vĩmnĩ.*

⁴⁵ Hã ki Ājag tóg tỹ Topẽ krẽ nỹtĩ, ti ri ke han kỹ, Ājag jóg tỹ kanhkã tá nĩ ěn ri ke han kỹ. Ti hã ne tóg rã han', ti tỹ vẽnh kar kri jẽngrẽg kỹ san jé,

ũn jykre kuryj ag kri, ũn jykre pãno ag kri ke gé. Ta han ti ke gé, ti tỹ vënh kar há han jé, ũn jykre kuryj ag, ũn jykre pãno ag ke gé. Ver tóg vënh kar to há nĩ, Topê ti,” he tóg, Jesus ti.

46 “Ājag mré ke ũ ag tóg ājag to há nỹtĩ. Ājag tỹ tag ag hã to há nỹtĩn kỹ tóg tỹ nén ũ tũ tĩ ver. Ũn jykre kórég ag vỹ ge nỹtĩgtĩ gé, governo mỹ jãnkamy mǎg tĩ ag. Ũ tỹ ājag to há nỹtĩ ag hã to ag tóg há nỹtĩ, vënh kato. Há ti nĩ, hã ra tóg tỹ nén ũ tũ nĩ ver.

47 Kỹ ājag tỹ ājag mré ke ag hã mỹ: ā mỹ há? hen kỹ tóg tỹ nén ũ tũ nĩ gé ver. Ũ tỹ Topê vĩ ki kagtĩg ag vỹ ge nỹtĩgtĩ gé. Ājag mré ke ag hã mỹ ag tóg: ā mỹ há? he tĩ gé, hã ra tóg tỹ nén ũ tũ nĩ ver.

48 Hã kỹ vënh kar to vënh jykre kuryj han kỹ nỹtĩmnĩ, ũ tỹ ājag kato vãsãnsãn mũ ag mré hã, ěg jóg tỹ kanhkã tá nĩ ěn ri ke han nĩ. Ti hã ne tóg vënh kar to vënh jykre kuryj han kỹ nĩ nĩ!. Ti ri ke han nĩ,” he tóg, Jesus ti.

6

Ēg tỹ ũ jagãgtãn ke to vënh jykre

1 “Kỹ ājag tỹ Topê jykre han sór kỹ ũ tỹ vënh jykre pãno han mũ ag jykre ri ke han tũg nĩ. Ón kỹ ag tóg vënh kar rĩnve Topê jykre han sór tĩ, vënh kar tỹ ag ve jé, ag tỹ Topê jykre han mũ ěn ti. Kar kỹ ag tóg hã ra hã tũ han tĩ sir. Kỹ ag ri ke han tũg nĩ, ke tũ nĩ (mũ) ra ěg jóg tỹ kanhkã tá nĩ ěn vỹ tóg

ājag mỹ ven ke tũ nĩ, ājag tỹ ěg jóg jykre han mũ ěn kaja ti,” he tóg.

2 “Hã kỹ ājag tỹ ũn jagãgtar ag jagãgtãn kỹ ũ mỹ: “ag jagãgtãn inh tĩ,” he tũg nĩ. Ũ tỹ vënh jykre régre han mũ ag jykre ri ke han tũg nĩ. Ag tỹ ón kỹ ũ jagãgtãn kỹ ag tóg ěpny jagma mũ kỹ (ag tóg) vënh kar mỹ: “ag jagãgtãn inh tĩ,” he tĩ. Ēg vënh kanhrãn jafã jo ĩn krēm ag tóg tag tó tĩ gé. Ag tỹ ěprã ke ag tỹ ag mỹ vĩ há han ve sór vë, hã jé ag tóg ón kỹ ũn jagtar ag jagãgtãn tĩ. Ag ganho hã vë, ěprã ke ag tỹ ag mỹ vënh vĩ há tó mũ ěn ti. Kanhkã tá ag ganho ũ ve mãn ke tũ nĩ ha. Ājag mỹ sóg ki hã tó mũ, ha mẽ,” he tóg, Jesus ti.

3 “Ag ri ke han tũg nĩ. Ũn jagtar ag jagãgtãn nĩ. Ũ mỹ tó tũg nĩ, ājag tỹ ũn jagãgtãn mũ ěn ti, ājag mré ke fag mỹ tó tũg nĩ gé.

4 Kỹ ājag tỹ ag jagãgtãn kỹ ěg jóg tỹ kanhkã tá nĩ ěn tóg ājag vëg mũ sir, kỹ tóg ājag mỹ nĩm ke mũ sir, ājag ganho ti. Ēg tỹ vënh vatánh tá nén han mũ ěn ve kãn tóg tĩ (mỹr), Topê ti,” he tóg, Jesus ti.

Ēg tỹ Topê mré vëmén to vënh jykre

(Lc 11.2-4)

5 “Kỹ ājag tỹ Topê mré vëmén kỹ ũ tỹ vënh jykre régre han mũ ěn ag jykre ri ke han tũg nĩ gé. Ag tỹ ón kỹ Topê mré vĩ kỹ ag tóg ěg vënh kanhrãn jafã jo ĩn kãki jëgĩë kỹ nỹtĩ, ke tũ nĩ kỹ ěmĩn kri, ĩn to hã. Kỹ vënh kar vỹ ag tỹ

Topě mré vī mū tag vég mū sir. Kanhkā tá ag tóg ganho ũ ve mǎn ke tū nī ha. Ājag mý sóg ki hǎ tó mū, ha mē.

⁶ Ag jāvo ājag tỹ Topě mré vēmén kỹ ājag ĩn kǎra gemnī. Kỹ jānkā nífénh nī. Kỹ tá Topě mré vīmni sir, ěg jóg mré, ěg tỹ ũn vég tū ěn mré. Kỹ tóg kanhkā tá ājag mý nīm ke mū, ājag ganho ti. Ěg tỹ vėnh vatánh tá nén han mū ěn vég tóg tĩ (mýr), Topě ti,” he tóg, Jesus ti.

⁷ “Ājag tỹ ti mré vēmén kỹ fagrĩnh mý ti mré vēmén mág han tũg nī. Ũ tỹ Topě vī ki kagtũg ag ri ke han tũg nī. Ājag jānjān kỹ ag tóg ón kỹ vī mág han tĩ. “Ěg tỹ vī mág han kỹ ti hỹn ěg vī mēg mū,” he ag tóg tĩ, ón kỹ.

⁸ Ag ri ke han tũg nī. Ěg jóg vỹ nén kar ki kanhró nī, ājag tỹ ti mý tó tū ra tóg ki kanhró nī,” he tóg.

⁹ “Ājag tỹ Topě mré vī kỹ tag tómnī, ha mē:

“Ěg jóg mág, kanhkā tá ģ tóg nī nī.

Ā jiji tó ěg tóg tĩ, kỹ vėnh kar jé ģ tỹ tỹ ũn mág nī vé.

¹⁰ Ěg jé kǎnhmar ģ tỹ tỹ ěg pǎ'i nī vé.

Vėnh kar jé ģ tỹ nén to jykrén mū ěn han sór, ga tá ke kar, ag jé kanhkā tá ke kar ag ri ke han.

¹¹ Ěg mý ũri ěg jėn ti nīm, ěg tỹ kurǎ kar ki ko tĩ ěn.

¹² Kỹ ěg mý vėnh pǎte fón nī, ěg tỹ ģ vī mranh ja ti.

Hǎ jé ěg tóg ěg tỹ jagnė to jũ tỹ jagnė mý vėnh pǎte fón ke mū gé.

¹³ Kỹ ěg tỹ ģ vī mranh sór kỹ ěg kren han nī, ěg tỹn mranh tū nī jé.

Nén-Kórég jo ěg vemnī.

Ā hǎ ne tóg tar nī'.

Ā hǎ ne tóg mág nī inhhǎ'.

Ā jykre tóg tũ' henh ke tū nī,” hemnī, Topě mý,” he tóg, Jesus ti.

¹⁴ “Hỹ, ge ti nī,” he tóg. “Ũ tỹ ājag to jũ kỹ ti mý vėnh pǎte fón nī. Ũ tỹ ājag mý vī kónǎn kỹ ti mý vėnh pǎte fón nī gé. Ājag tỹ gen kỹ ěg jóg vỹ ājag mý vėnh pǎte fón ke mū gé.

¹⁵ Ājag tỹ tag han tū nĩn kỹ, kỹ ěg jóg tóg ājag mý vėnh pǎte fón ke tū nī gé, ājag tỹ ti vī mranh ja ti,” he tóg, Jesus ti.

Ěg vǎkre to vėnh jykre

¹⁶ “Kỹ ājag vǎkre kỹ fe ũ nýtĩ tũg nī, ājag tỹ Topě mý há nýtĩ jé jėg tũ nýtĩn kỹ. Vǎkre ki ũ tỹ vėnh jykre régre han mū ag jykre ri ke han tũg nī. Ag tỹ ón kỹ vǎkre kỹ ag tóg fe ũ nýtĩnh mū sir, vėnh kar tỹ ag vǎkre ve jé. Ag ganho hǎ vė. Kanhkā tá ag tóg ganho ũ vėnh ke tū nī ha. Ājag mý sóg ki hǎ tó mū, ha mē.

¹⁷ Ājag vǎkre kỹ ājag gǎnh tǎg nī, ājag jamė kupemni, festa han nýtĩ ve nĩmnī, ājag vǎkren kỹ.

¹⁸ Hǎ kỹ ag tóg vég tū nī, ājag vǎkrég mū ti. Ěg jóg hǎ ne vég mū inhhǎ', ěg tỹ ũn vég tū ěn hǎ vỹ vég mū. Kỹ tóg kanhkā tá ājag mý nīm ke mū, ājag ganho ti. Ěg tỹ vėnh

vatánh tá nén han mũ vég tóg tĩ (mỹr), Topê tĩ,” he tóg, Jesus ti.

*Ēg rico to vėnh jykre
(Lc 12.33-34)*

19 “Ga kri mũn kỹ ricon ke to vāsān sór tũg nĩ. Ga vỹ ājag tỹ nén kar ti konh ke mũ, ājag tỹ rico hā to vāsān mũ ra. Kỹ ājag jānkamy vỹ vėso jāgfanh ke mũ gé sir, ti e nỹtĩn kỹ. Kỹ ag tóg pigju kỹ ma mũnh ke mũ gé sir, ājag tỹ nén ti, ti e nỹtĩn kỹ.

20 Ājag tỹ inhhā kanhkā tá tũ mág pė nỹtĩn kỹ tóg inhhā ājag mỹ há tĩnh mũ. Tá ti pi(jé) tỹ ga nĩ', ājag tũ ti, tá ti pi(jé) vėso jāgfanh mũ'. Tá ag pi(jé) pėju kỹ ma mũnh mũ'. Hā kỹ tá ājag tũ vin han sórmnĩ.

21 Ājag tỹ ga kri tỹ nén ũ mág nỹtĩn kỹ ājag tóg ga kri mũ mág sór mũ. Ājag tỹ hā ra kanhkā tá tỹ nén ũ mág nỹtĩn kỹ ājag tóg kanhkā ra mũ sór mũ, kỹ tag hā ne há nĩ',” he tóg, Jesus ti.

*Ēg kanē tỹ ěg mỹ kurā han
(Lc 11.34-36)*

22 “Ēg kanē tỹ ěg vég tĩ. Kỹ tóg tỹ ěg mỹ kurā ri ke nĩ, ěg kanē ti, ti há nĩn kỹ. Tỹ ěg tóg kurā ve há han tĩ, ěg kanē há nĩn kỹ.

23 Ēg kanē kórég nỹtĩn kỹ tóg ěg mỹ kuty tĩnh mũ. Kỹ tóg ěg mỹ kurā vég tĩ ěn mỹ (tóg) kuty nĩ sir, kỹ kuty tag vỹ kuty kar káfór nĩ. Ge ti nĩ, ěg jykre kórég nĩn kỹ. Ēg kanē kórég ri ke vė sir, ěg jykre kórég ti,” he tóg, Jesus ti.

*Ēg tỹ ga kri rico to vāsān sór
ke tũ
(Lc 16.13; 12.22-31)*

24 “Ā jagrė régre nĩn kỹ tóg vėnhmỹ tĩ. Ā tỹ Topê hā tỹ jagrė nĩn kỹ jānkamy tĩn ěn tỹ jagrė nĩ sór tũg nĩ. Ā tỹ jānkamy e ve sór kỹ ti hā mũ ěkrén kỹ ti hā vỹ tỹ ā jagrė nĩnh mũ. Kỹ ěg tóg Topê tỹ ěg mỹ nén tó mũ ěn to jykrén há han tũ nĩgtĩ. Ā tỹ Topê to há nĩn kỹ ā tóg sir ga kri rico to vāsān sór ke tũ nĩ. Ā tỹ ga kri rico nĩ sór kỹ ā tóg Topê mũ ěkrég tũ nĩ, hā vemnĩ,” he tóg, Jesus ti.

25 “Hā kỹ sóg ājag mỹ tó mũ. Ājag tỹ nén ve sór mág mũ to krĩ kufy han tũg nĩ. “Inh hỹn ũri ne konh mũ', inh hỹn ne tunh mũ'?” he tũg nĩ. Topê tỹ ěg han ja vė mỹr, ěg tỹ ga kri mũ jé. Hā kỹ tóg ěg mỹ ěg jėn ki rĩr mũ gé sir, ěg kur ki ke gé, Topê ti.

26 Sėsĩ to jykrén nĩ. Ag mỹ ěkrān tĩ? Vó. Ag mỹ pājó krēm vin tĩ? Vó, ke tũ ag tóg nĩgtĩ. Ge ra ěg jóg tỹ kanhkā tá nĩ ěn tóg ag ki rĩr nĩ nĩ. Ājag mỹ jėsĩ káfór tũ nỹtĩ', Topê mỹ'? Vó, sėsĩ káfór ājag tóg nỹtĩ.

27 Topê tỹ ěg kã ũ jé prēr kỹ ěg tóg ter ke mũ, ěg ter sór tũ ra. Ter jé ěg tóg ke mũ gé, ěg tỹ to krĩ kufy han mũ ra. Ēg krĩ kufy ěn pi(jé) ěg kren han mũ'.

28 Kỹ kur to krĩ kufy han tũg nĩ gé. Ka fej hā to jykrén nĩ. Jatun mỹ tóg mog tĩ. Rānhrāj tũ tóg nĩgtĩ, kur han tũ tóg nĩgtĩ.

29 Hã ra tóg sînvĩ nýtĩ, ka fej ti. Kÿ pã'i mág tÿ Salomão kur tóg ri ke tũ nĩgtĩ, ti sînvĩ ra, vênh kar kur sînvĩ kãfór ti nĩ, Salomão kur ti. Hã ra tóg ka fej sînvĩ ri ke tũ nĩ. Ki hã sóg tó mũ mÿr.

30 Topê hã ne ka fej sînvĩ han, tÿ tóg kur sînvĩ ri ke nĩ, ka fej ti. Hã ra tóg kãnhmar kãgter tĩ, ka fej ti, ti sînvĩ ra. Ūri tóg há nýtĩ. Kÿ tóg vaj kÿ kógungun kÿ pÿr mũ sir, re mré. Hã kÿ Topê tóg ãjag ki rĩr kãfór han mũ, ãjag kur mré hã. Hã kÿ Topê ki ge kÿ nýtĩmnĩ, ti vĩ kri fi kÿ.

31 Krĩ kufy han tũg nĩ. “Inh hÿn ne konh mũ’? Inh hÿn ne kron mũ’? Inh hÿn ne tunh mũ’?” he tũg nĩ.

32 Ū tÿ Topê vĩ ki kagtũg ag vÿ tag to jykrén mág tĩ, hã ra ãg jóg tÿ Topê vÿ ãg vég tĩ, ãg tÿ nén ve sór mág mũ ti. Kÿ to krĩ kufy han tũg nĩ. Ti hã ne ãg vég mũ, ãg jóg tÿ Topê ti.

33 Topê tÿ tÿ ãg pã'i nĩ ãn hã ve sórmnĩ. Kÿ tag hã to vãsãn nĩ. Ti jykre kuryj tag hã to vãsãn nĩ. Kÿ tóg ãjag mÿ ãjag tÿ nén ve sór mág mũ ãn tÿ ãjag mÿ vin ke mũ sir.

34 Hã kÿ ãjag tÿ vaj kÿ nén venh ke to krĩ kufy han tũg nĩ. Vaj kÿ ãjag tóg venh ke mũ, kÿ ãjag tóg to jykrén ke mũ sir. Ūri ãjag tÿ nén tÿ ũri vég mũ hã to jykrén há han nĩ. ãjag tÿ ũri nén ũ jagy vég mũ vÿ há nĩ, kÿ ãjag tÿ vaj kÿ nén venh ke to jykrén tũg nĩ, ũri,” he tóg, Jesus ti.

7

Ĕg tÿ ũ to jykrén kónãn ke tũ (Lc 6.37-38, 41-42)

1 “Ã régre to jykrén kónãn tũg nĩ, ti jykre kórég ra. Kÿ Topê vÿ ã to jykrén kónãn ke tũ nĩ gé.

2 Ā tÿ ũ to jykrén mũ ãn ri ke han jé tóg ke mũ, Topê ti, ã mÿ. Ā tÿ ũ mÿ kãmun mũ ri ke han jé tóg ke mũ, ã mÿ, Topê ti.

3 Jykre kórég mág ã tóg nĩ gé, hã ra ã régre jykre pãno sĩ ãn ne ã mÿ kórég nÿ’.

4 Kÿ ã hã ne tóg ã régre mÿ: ã jykre kórég kurynh jé sóg ke mũ, he mũ’, ã tÿ ã jykre pãno tãvĩ ãn kurynh jãvãnh (hã) ra’.

5 Ke tũg nĩ. Ke tũ nĩ (mũ) ra ã tóg jykre régre nýtĩ. Ā jykre kurynh vén nĩ. Kar kÿ ã tóg sir ã régre jykre kurynh há han mũ,” he tóg, Jesus ti.

6 “Hã ra cachorro jykre ri ke ag mÿ Topê jykre sînvĩ tó tũg nĩ. Porco jykre ri ke ag mÿ Topê jykre sînvĩ ãn tó tũg nĩ gé. Jykre kavéj ag nýtĩ, hã kÿ ag tóg Topê jykre to é henh ke mũ. Ti tÿ tũ’ he sór ag tóg tĩ, ti sãn kÿ, Topê jykre sînvĩ ãn ti. Kar kÿ ag tóg sir ã mré vênh génh sór mũ gé, ha vemnĩ, ã tÿ ag mÿ Topê jykre sînvĩ ãn tó kÿ,” he tóg, Jesus ti.

Topê tÿ tÿ ũn vĩ há nĩ (Lc 11.9-13)

7 “Topê mÿ nén kar to vĩmnĩ, kÿ tóg ãjag mÿ han mũ. Ājag tÿ ti mÿ nén ũ to vĩ mũ ãn jãvãnh nĩ, kÿ ãjag tóg venh ke mũ. Ti mré vĩ kÿ ãg tÿ ti jãnkã tÿ tórón tórón ke ãn ri ke han nĩ. Kÿ tóg

ājag mý nón ri ke han mũ sir, ti tỹ ājag mý ājag tỹ nén to vĩ mũ ên han kỹ.

⁸ Hỹ, hã vễ. Ājag tỹ ti mý nén (ũ) to vĩn kỹ tóg ājag mý han mũ sir. Ājag tỹ ti jãvãnh kỹ ājag tóg ti venh mũ sir. Ājag tỹ êg tỹ jãnkã tỹ tórón tórón ke ri ke han kỹ tóg ājag mý nón ri ke han mũ sir," he tóg.

⁹ "Kejẽn ājag kósín tóg ājag mý êmĩ to vĩ mũ. Kỹ ājag pi(jé) ti mý pó nĩm ke mũ'. Ti mý ājag tóg êmĩ hã nĩm ke mũ.

¹⁰ Ājag kósín tỹ ājag mý pirã to vĩn kỹ, kỹ ājag pi(jé) ti mý pỹn nĩm ke mũ'. Pirã hã nĩm jé ājag tóg ke mũ.

¹¹ Jykre pãno ājag nỹtĩ. Ge ra ājag tóg ājag krẽ mý nén ũ há vin tĩ. Ge ti nĩ gé, ājag tỹ Topẽ mý nén ũ to vĩn kỹ. Nén ũ há hã nĩm jé tóg ke mũ. Hã ra tóg ājag kãfór han tĩ, êg jóg tỹ kanhkã tá nĩ ti. Ājag tỹ ti mý nén (ũ) to vĩn kỹ tóg ājag mý nén ũ há tãvĩ han tĩ mỹr," he tóg.

¹² "Ājag tỹ ājag mré ke ũ to: "ti tỹ êg mý tag han há tóg tĩ vễ," he mũ ra êg hã tóg ti mý han ke mũ. Moisés tỹ êg jyvẽn hã vễ, Topẽ vĩ tó tĩ ag tỹ êg jyvẽn hã vễ," he tóg, Jesus ti.

*Jãnkã régre
(Lc 13.24)*

¹³ "Ũ tỹ inh ki rã mũ vĩ tỹ jãnkã sĩ fĩn rãm ke ri ke nĩ. Jãnkã sĩ fĩn rãm jé êg tóg vãsãn tĩ. Ri ke ti nĩ, ũ tỹ inh ki rãnh ke mũ ti. Jãnkã mág vĩ nĩ gé. Hã ra ũ tỹ fĩn rãm ke mũ ag vĩ kãgter pẽ han ke mũ. Ājag tỹ jãnkã mág ên fĩn rãm sór kỹ

tóg ver jagy tũ nĩ, fĩn rãm há tóg tĩ. Kỹ nũgme to êpry jagma tĩg, pĩ to êmĩn jagma tĩg pi(jé) jagy tĩ', ti mág pẽ nĩn kỹ. Hã kỹ ũ tỹ hẽn ri ke ag vĩ jagma mũ mũ. Kar kỹ ag tóg kãgter pẽ han mũ sir, pĩ ki vár kỹ.

¹⁴ Ag jãvo jãnkã sĩ ên fĩn rãm nĩ, ājag tỹ rĩr krỹg ja tũ ve jé. Sĩ ti nĩ, kanhkã to êpry ti, kanhkã to êmĩn ti. Ũn pipir ag vĩ jagma mũnh mũ. Á sĩ san kỹ tóg vég tũ sag tĩ, hã kỹ ũ tỹ jagma mũnh ke mũ ag vĩ pipir nỹtĩ," he tóg, Jesus ti.

*Ón kỹ Topẽ vĩ tó tĩ ag
(Lc 6.43-44)*

¹⁵ "Ón kỹ Topẽ vĩ tó tĩ ên ag vĩ kri fig tũg nĩ. Há nỹtĩ ve ag tóg nỹtĩ, hã ra ag tóg ājag kókén sór nỹtĩ. Ājag kókén sór to ag tóg mĩg jũ ên ri ke nỹtĩ, mỹr, ha mẽ.

¹⁶ Ājag tỹ ag jykre tugnỹm kỹ ājag tóg ag tỹ Topẽ vĩ mranh mũ ên ki kanhró nỹtĩ. Ha vé, vãnh tỹ jóhó ki êg tóg uva vég tũ nĩgtĩ mỹr. Kỹ êg tóg sónh ki pẽnva vég tũ nĩgtĩ gé.

¹⁷ Ka vĩ ge nỹgtĩ. Ti há nĩn kỹ tóg kanẽ há han tĩ, kỹ êg tóg ko tĩ. Ti kórég nĩn kỹ tóg kanẽ kórég han tĩ, kỹ êg pi(jé) ko tĩ'.

¹⁸ Ka há vĩ kanẽn kónãn ki kagtĩg nĩ, kỹ ka kórég vĩ kanẽ há han ki kagtĩg nĩ gé.

¹⁹ Kỹ êg tóg ka kórég ên gỹn tĩ, tỹ êg pĩ han tĩ. Ka tỹ kanẽ há han vãnh ên tỹ êg pĩnh ti.

²⁰ Ge ti nĩgtĩ, ón kỹ Topẽ vĩ tó tĩ ag tỹ. Ag tỹ Topẽ vĩ mrynhmranh kỹ ag tóg ón kỹ Topẽ vĩ tó tĩ. Ag tỹ nén han

mũ ki ěg tóg ag jykre kórég vég mũ,” he tóg, Jesus ti.

*Ěg tỹ Topě vĩ ki króm ke
(Lc 13.25-27)*

21 “Věnh kar tóg iso: “pã'i vễ, pã'i vễ,” he tĩ. Hã ra ù ag tóg Topě tỹ nén tó mũ ěn han vãnh nỹtĩgtĩ. Hã kỹ ag tóg Topě tỹ tỹ ěg pã'i mág nĩ venh ke tũ nĩ. Ũ tỹ inh jóg vĩ han mũ ěn ag hã vỹ Topě tỹ tỹ ěg pã'i nĩ venh ke mũ.

22 Kurã ěn kã, isỹ vễnh kar jykre tugnỹm ke kurã ěn kã ag tóg inh mỹ tag tónh mũ, ha mẽ. “Senhor, Senhor, ã jykre tó ěg mỹr,” he jé ag tóg ke mũ. “Ã jykre hã ki ěkrén kỹ ěg tóg ěg tỹ nén han vãnh han ja nỹgtĩ mỹr. Ã jykre hã tỹ ěg tóg vễnh jagrě kórég pan mỹr,” he jé ag tóg ke mũ, inh mỹ.

23 Hã ra sóg ag mỹ: “ãjag pi(jé) tỹ inh mré ke nỹtĩ,” henh ke mũ. “Ãjag ki kagtĩg sóg nĩ mỹr. Ha mũ jěg. Jykre kórég ãjag tóg nỹtĩ,” he jé sóg ke mũ, ù tỹ inh panh vĩ han vãnh ag mỹ,” he tóg, Jesus ti.

*Ĩn nũna gunh gunh kãme
(Lc 6.47-49)*

24 “Ha mẽ, inh vĩ mẽg ãjag tóg nỹtĩ,” he tóg. “Ãjag tỹ inh vĩ ki króm kỹ ãjag tóg sir ùn há ri ke nỹtĩ. ĩn han ken kỹ tóg to jykren mũ. To jykren há nĩn kỹ tóg ga kũm kỹ pãró kri ĩn nũna ka fěg mũ sir.

25 Kỹ vãhã ta tóg kutě mũ, kỹ goj vỹ var mũ sir. Kóho jũ vỹ kãtĩ mũ, ĩn to, hã ra tóg kutě tũ nĩ sir, ĩn ti. Pãró kri tóg nỹtĩ, ti nũna ti, hã kỹ tóg kutě

tũ nĩ. Ge ti nĩ, ãjag tỹ inh vĩ kri fi kỹ.

26 ãjag tỹ inh vĩ mẽg mũ ra ki króm tũ nĩn kỹ ãjag tóg ùn jykre kórég ri ke nỹtĩ. ĩn han ken kỹ tóg to jykren kónãn mũ, kỹ tóg ga tỹ rỹnhřj hã ki ka fěg mũ, krĩg mỹ, ĩn nũna ti.

27 Kỹ ta tóg kutě mũ, kỹ goj vỹ var mũ sir. Kóho jũ vỹ kãtĩ mũ gé, ĩn to, kỹ ĩn tóg vom ke tere kỹ kutě mũ sir. Mráj kãn tóg mũ sir, ĩn ti. Ge ti nĩ, ãjag tỹ inh vĩ kri fig tũ nĩn kỹ,” he tóg, Jesus ti.

Jesus vĩ tỹ vễnh kar vĩ kãfór nĩ

28 Hã ki Jesus tóg krỹg he mũ sir, ag kanhrãn ki. Kỹ tóg vễnh kar mỹ e tĩ sir, ti vĩ ti.

29 Ti vĩ tóg vễnh kar vĩ kãfór nĩ, Topě vĩ to professor ag vĩ kãfór ti nĩ, kỹ tóg pã'i vĩ kãfór pẽ nĩ gé, ti vĩ ti. Hã kỹ tóg ki hã tó mũ. Kỹ tóg ag mỹ e tĩ sir.

8

Jesus tỹ ùn kaga kren vãnh tỹ há' he

(Mc 1.40-45; Lc 5.12-16)

1 Jesus tỹ ag mỹ tó kãn kỹ tóg pãnónh ěn to tere mũ sir. Kỹ ùn e ěn ag tóg ti nón mũ mũ sir.

2 Kỹ vãhã ù tóg ti tá jun mũ. Vễnh kaga kren vãnh han kỹ tóg nĩ, vễnh kaga tỹ lepra he mũ ěn, ù tỹ tá jun mũ ti. Kỹ tóg ti krēm grĩnh ke kỹ ã jakrĩ tỹ jě nĩ, kỹ tóg ti mỹ: “Senhor,” he mũ. “Ã mỹ isỹ há' he sór tũ nĩ? ã hã tóg isỹ há henh mũ, ã tỹ isỹ há' he sór kỹ,” he tóg ti mỹ.

³ Kÿ Jesus tóg ti mÿ: “hej,” he mÿ. “To há sóg nĩ, há' he ja há ã tóg nĩ,” he tóg ti mÿ, Jesus ti. Kÿ tóg ti kaga kren vãnh ên tÿ kren han mÿ vêsÿmér. Jãnhkri tóg nĩ, ti fár ti.

⁴ Kÿ Jesus tóg ti mÿ: “ker ù mÿ tó hê', ã han tag ti,” he mÿ. “Ha tÿg, Topê tũ ki rĩr tĩ to. Ti hã mÿ tómnĩ. Kÿ ti mÿ nén ù nĩm nĩ, ti tÿ Topê mÿ pũn jé, Moisés tÿ vãsÿ êg mÿ nén tó ja ên ti. Hã tigrĩn vãnh kar vÿ ã tÿ há' he mÿ tag ki kanhrãn mÿ,” he tóg ti mÿ, Jesus ti. Kÿ tóg tĩ mÿ, há' hen kÿ.

Jesus tÿ pã'i mág camarada tÿ há' he

(Lc 7.1-10)

⁵ Kÿ Jesus tóg kejên cidade tÿ Cafarnaum tá jun mÿ. Kÿ fóg tÿ capitão tóg ti venh kãtĩ mÿ, ti mÿ nén ù to vĩ jé.

⁶ Kÿ tóg ti mÿ: “Senhor,” he mÿ. “Inh camarada tóg nÿ nĩ, inh ãn tá. Kãnhgrĩn kãn kÿ tóg nÿ nĩ, hã ra tóg kaga jagy nÿ,” he tóg ti mÿ, capitão ti, Jesus mÿ.

⁷ Kÿ Jesus tóg ti mÿ: “kÿ inh hÿn tóg ti venh tÿg ha, ã mré, sÿ ã mÿ ti han jé,” he mÿ.

⁸ Hã ra capitão tóg Jesus mÿ ke mãn mÿ. “Ã mÿn hÿn jagy nĩ, ã tÿ inh ãn kãki sãn ke ti, isÿ tÿ fóg nĩn kÿ,” he tóg ti mÿ. “Ã vĩ pir ki inh camarada vÿ há' henh mÿ. ã vĩ hã tÿ ã tóg ti tÿ há' henh ke mÿ,” he tóg, capitão ti.

⁹ “Ha vé, tÿ sóg pã'i krêm ke nĩ gé, kÿ soldado ag tóg tÿ inh krêm ke nÿtĩ gé. Hã kÿ sóg pã'i jykre ki kanhró nĩ. Isÿ

soldado ù mÿ: kutĩg, hen kÿ tóg tĩ mÿ. Sÿ ti mÿ: kunĩg, hen kÿ tóg kãtĩ mÿ gé. Isÿ inh camarada mÿ: tag han ra, hen kÿ tóg han mÿ. Inh vĩ tÿ sóg ag jêgnêg tĩ. Hã kÿ sóg ki kanhró nĩ. ã vĩ tÿ ã tóg inh camarada tÿ há' he há nĩ,” he tóg, capitão ti, Jesus mÿ.

¹⁰ Kÿ tóg Jesus mÿ e tĩ, ti vĩ tag ti. Kÿ tóg ã mré mÿ ag mÿ: “ha mẽ, Israel ag vÿ ti ri ke tũ nÿtĩ,” he mÿ. “Ki kanhró tóg nĩ (mÿr), kÿ tóg inh ki rã kÿ jê. Ge ve ja tũ sóg nĩ,” he tóg.

¹¹ “Ha vé, ù tÿ hên ri ke ag vÿ kãmũnh ke mÿ, rã jur ja tá ag kãmũnh mÿ, rã pur ja tá ke gé. Abraão mré ag tóg ù tÿ kanhkã tá nĩ ên tÿ tÿ êg pã'i nĩ venh ke mÿ, Isaque mré, Jacó mré ke gé, Topê tóg ag ki rĩr ke mÿ.

¹² Ag jãvo Israel krê'krê ag tóg kuty ki vár ke mÿ. Ag tÿ ù tÿ kanhkã tá nĩ ên tÿ tÿ êg pã'i nĩ venh ke vê vê, hã ra ag tóg venh ke tũ nĩ. Kÿ ag tóg vêsÿrénh ke mÿ, ãjag jã tÿ ag gágán ke mÿ, tÿ gangan ke mÿ, vêsô jũn kÿ,” he tóg, Jesus ti. ã mré nÿtĩ ag mÿ tóg ke mÿ.

¹³ Kÿ tóg capitão mÿ: “ha tÿg ge,” he mÿ. “Inh ki rã kÿ ã tóg jê nĩ, hã kÿ ã tóg venh ke mÿ sir, ã tÿ nén ve sór mÿ ti. ã camarada tÿ inh hur há' hê,” he tóg, Jesus ti, capitão mÿ. Kÿ tóg tĩ mÿ sir. Hã ra ti camarada tóg há' he mÿ. Hora ên ki tóg há' he mÿ, Jesus tÿ hora ki tó mÿ ên ki.

Jesus tÿ ùn kagyga ag tÿ hághá' he

(Mc 1.29-34; Lc 4.38-41)

14 Kÿ Jesus tóg sir Pedro ãn kãra rã mũ. Kÿ tóg ti prũ fi mÿnh fi vég mũ. Kaga fi tóg nÿ nĩ, rÿg kÿ.

15 Kÿ tóg fi nĩgẽ mẽg mũ sir. Kÿ fi rÿg ẽn tóg tũ' he mũ sir. Kÿ fi tóg nĩ kÿ ag ki rĩr mũ sir.

16 Kuty ẽn kã ag tóg ãn jagrẽ kórég ag tatĩn kãmũ mũ ti to. Kÿ tóg ag mÿ vĩ mũ, kÿ ag tóg pa kãn mũ sir, vẽnħ jagrẽ kórég ag. Ûn kagyga ag hyn han tóg mũ gé sir, Jesus ti.

17 Hã ra tag tóg rán kÿ nĩ gé. Vãsÿ Topẽ vĩ tó tĩ tÿ Isaiás vĩ tag rán ja nĩ, ha mẽ: “Ëg kaga nÿtĩn kÿ tóg ẽg han, kÿ ẽg tóg há' he kãn mũ, ti tÿ ẽg jagfy jagtar tugrĩn,” he ja tóg nĩ, Isaiás ti. Hã ra tóg ge nĩ.

Û tÿ Jesus mré mũ sór mũ ag
(Lc 9.57-62)

18 Kejẽn ag tóg Jesus pẽnĩn e nÿtĩ, kÿ Jesus tóg ag ve kÿ: “mũ jé ha,” he mũ, ã mré mũ tĩ ag mÿ. “Goj kafã ù ra ẽg mũnh mũ,” he tóg.

19 Ag mũnh ke to hã Topẽ vĩ to professor ù tóg ti mré vẽnħ kãtĩ mũ. “Senhor,” he tóg. “Sÿ ã mré tÿg há tóg tĩ. ã tÿ hẽ ra tÿg kÿ sóg ã mré tĩ mũ,” he tóg.

20 Hã ra Jesus tóg ti mÿ: “hã ra tóg jagy tĩ,” he mũ. “Ïn tũ sóg nĩ,” he tóg. “Mĩg vĩ kré nÿtĩgtĩ. Sẽsĩ vĩ jagfe nÿtĩgtĩ gé. Ag jãvo isÿ hẽ tá nÿr ke tóg tũ tĩ. Tÿ sóg ẽprã ke fi kósin nĩ,” he tóg, Jesus ti.

21 Kÿ Jesus mré tĩ ù tóg Jesus mÿ vĩ mũ gé. “ã mré sóg tĩ mũ, hã ra sóg ver inh panh tÿ ga

ki ti fón sór mũ,” he tóg, Jesus mÿ.

22 Kÿ Jesus tóg ti mÿ: “vó,” he mũ. “Ti kénħ tĩ tÿg,” he tóg. “Inh mré kãtÿg,” he tóg. “Inh ki ge tũ ag vĩ ã panh ti kej han mũnh mũ. ã tÿ inhhã inh mré kãtÿg há tóg tĩ,” he tóg, Jesus ti.

23 Kÿ tóg sir canoa kãki rã mũ. Kÿ ti mré mũ tĩ ag tóg ti mré ki ge mũ gé sir, goj kafã ù ra mũ jé.

Jesus tÿ kóho jũ tÿ tũ' he
(Mc 4.35-41; Lc 8.22-25)

24 Ag tÿ goj kãmĩ mũ (hã) ra kóho jũ tóg sir krog he mũ, ha mẽ. Kÿ goj tóg canoa kãki krém krém ke mũ, ti fãn sór tóg mũ. Hã ra Jesus tóg nÿr kÿ nÿ nĩ.

25 Kÿ ag tóg ti rĩn kÿ ti mÿ: “Senhor,” he mũ. “Ëg kren han nĩ,” he ag tóg. “Ëg kãgter ha mẽ tóg tĩ,” he ag tóg.

26 Kÿ Jesus tóg ag mÿ: “ã jag tÿ neje mũmẽgmẽg nẽ?” he mũ. “ã jag mÿ inh ki ge há han tũ?” he tóg. Kÿ tóg nĩ kÿ jẽgnẽ mũ sir, kÿ tóg goj mÿ vĩ mũ sir, kóho mÿ. Kÿ tóg tũ' he mũ sir. Katy' he tóg mũ, katy tãvĩ tóg tĩ mÿr, ha mẽ.

27 Kÿ tóg vẽnħ kar mÿ e tĩ. “Ti jykre tóg ẽg mÿ e tĩ,” he ag tóg mũ. “Kóho tóg ti vĩ han, goj ti ke gé,” he ag tóg.

Jesus tÿ vẽnħ jagrẽ kórég pan

(Mc 5.1-20; Lc 8.26-39)

28 Kÿ tóg goj fĩn rãm kÿ nig kafã ù tá jun mũ sir, Gadara tá, Jesus ti, ti mré mũ tĩ ag ke gé. Kÿ ùn rėgre ag tóg ti kato tẽgtẽ mũ, ùn jagrẽ kórég ag.

Vēnh kej tá ag tóg kāmũ mũ. Ag jamã vễ, vễnh kej ti. Jũ mẽ ag tóg nỹĩ, kỹ ù ag tóg hên ra mũ vãnh nỹĩ, ag kamêg kỹ.

²⁹ Jesus kato ag tóg kāmũ mũ, ùn jagrê kórég ên ag. Ti ve kỹ ag tóg sir prêr mũ, ha mẽ. “!..Ă hỹn ẽg tỹ hẽ ri kenh mũ ha, Topê kósin!..!” he ag tóg mũ. “!..Ă mỹ ẽg vóg kónãn sór mũ ha, ẽg kurã to hã..!” he ag tóg. Jesus mỹ.

³⁰ Hã ra porco tóg ki e nỹĩ. Kakó tá ag tóg jêg nỹĩ.

³¹ Kỹ Nén-Kórég ag tóg Jesus mỹ: “ã tỹ ẽg pan kỹ ã tỹ porco to ẽg jêgnênh há tóg tĩ,” he mũ.

³² Kỹ tóg ag mỹ: “hej,” he mũ. “Ha mũ jêg ge,” he tóg. Kỹ ag tóg ên ag togvãnh kỹ porco ki ge mũ sir, Nén-Kórég ag. Kỹ vãnhã porco ag tóg rãn ki re kãn mũ sir, goj nig ki ag tóg vár kãn mũ. Nãgnãr kãn ag tóg mũ sir, tũ' he ag tóg mũ sir, porco ên ag, mỹr, ha mẽ.

³³ Kỹ porco ki rĩr tĩ ag tóg pétê kãn mũ sir, cidade ra, kamêg kỹ. Tá ag tóg kãmén kãn mũ. Nén-Kórég tỹ jagrê ja ên ag tó ag tóg mũ sir, Jesus tỹ ag pan ên ti.

³⁴ Kỹ vãnhã cidade tá ke kar ag tóg sir Jesus venh kãmũ mũ. Kãmũ kãn ag tóg mũ. Kỹ ag tóg tá junjun kỹ (ag tóg) Jesus mỹ to vĩ mũ, ti tỹ tá kutê jé, ti tỹ ag rã hã nĩ tũ nĩ jé, hã kỹ tóg tĩ mũ.

9

Jesus tỹ ùn kãnhrĩn kỹ nỹ tỹ há' he
(Mc 2.1-12; Lc 5.17-26)

¹ Kỹ Jesus tóg canoa ki rã kỹ goj nig kafã ù ra tĩg mãn mũ. Kỹ tóg ã jamã tá jun mũ.

² Ti tỹ ã jamã tá jun kỹ vãnhã ag tóg ti mỹ ù vyn kỹ junjun mũ, ùn kónhrĩn kỹ nỹ ên, ha mẽ. Ă cama kri tóg nỹ nĩ. Kỹ Jesus tóg ag tỹ ti ki ge mũ vég mũ sir. Hã kỹ tóg ùn kãnhrĩ mỹ: “inh kósin!,” he mũ. “Ă fe tỹ há' hé. Ă tỹ Topê vĩ mranh ja ên tỹ tũ' hen hã vễ ha,” he tóg, ti mỹ, ùn kónhrĩ mỹ.

³ Hã ra Topê vĩ to professor ag vỹ tá nỹĩ gé. Ti vĩ mẽ kỹ ag tóg to jykrén mũ. “Topê to vĩ kónãn tóg mũ mỹr. Vêsỹ tóg Topê han mũ mỹr,” he ag tóg mũ, Jesus to, ti tỹ ti mỹ: “ã tỹ Topê vĩ mranh ja ên tỹ tũ' hen hã vễ,” hen kỹ. Kỹ tóg ag mỹ tỹ ù nỹ, ti jykre ti.

⁴ Hã ra Jesus tóg ki kanhró nĩ, ag tỹ nén to jykrén mũn ki. Kỹ tóg ag mỹ: “ãjag ne tog nén ù vễnhmỹ to jykrén mũ!,” he mũ.

⁵ “Ne nỹ ãjag mỹ vễnhmỹ nỹ?” he tóg. “Ùn tĩg vãnh tag mỹ sóg: “ã tỹ Topê vĩ mranh ja ên tỹ tũ' hen hã vễ ha,” he mũ mỹr. Kỹn mỹ ãjag mỹ vễnhmỹ?” he tóg. “Sỹ ti mỹ: “nĩ ra, tĩg ra,” henh ke vễ gé. Kỹn mỹ ãjag mỹ vễnhmỹ ke gé?” he tóg.

⁶ “Hã ra isỹ ãjag mỹ inh jykre ven sór vễ. Tỹ sóg ẽprã ke fi kósin nĩ. Tá sóg krỹg ke mũ, Topê vĩ mranh tỹ vễnh pãte fón ke tá, ùn kãnhrĩ tag mỹ. Sỹ tá krỹg mũ ven jé sóg ke mũ, ãjag mỹ,” he tóg.

Hã kỹ tóg ùn kónhrĩ mỹ: “nĩ ra, jêg ra, ã kur gé (g) tĩg ra, ã

in ra,” he mũ.

⁷ Kĩ tóg vym ke nĩ mũ, kũ tóg sir jëgnë kũ tĩ mũ. Ā ĩn ra tóg tĩ mũ (mÿr) sir, ha mẽ.

⁸ Kĩ vënh kar ag tóg vég mũ. Kĩ tóg ag mÿ e tãvĩ tĩ. Topë mÿ ag tóg vĩ há han mũ, ti tÿ Jesus mÿ vënh jykre há nĩm kũ. Ēg mré ke vë mÿr, Jesus ti, ëprã ke, hã ra Topë tóg ti tar han, hã kũ tóg ti tÿ há' he mũ.

*Jesus tÿ Mateus mré vĩ
(Mc 2.13-17; Lc 5.27-32)*

⁹ Kĩ Jesus tóg ã jamã tá kã kutë kũ tĩ mũ sir. Kĩ tóg Mateus vég mũ sir. Governo mÿ tóg jãnkamy mäg tĩ, imposto kaja ti, kũ tóg ã rãnrãj han kũ nĩ nĩ. Kĩ Jesus tóg ti mÿ: “inh mré kãtig,” he mũ, Mateus mÿ. Kĩ tóg jëgnë kũ ti mré tĩ mũ sir.

¹⁰ Kĩ tóg kejën ti mré jëg mũ, Jesus ti. Kĩ ù tÿ hën ri ke ag tóg tá vënh mãn mũ, ti ĩn krëm, governo mÿ jãnkamy mäg tĩ ag, Topë vĩ mranh tĩ ag. Jesus mré ag tóg jëgiëg mũ, Jesus mré mũ tĩ ag mré ke gé.

¹¹ Kĩ Fariseu ag tóg vég mũ. Kĩ ag tóg ti mré mũ tĩ ag mÿ vĩ mũ. “Ājag pã'i ne tóg ag mré jëg mũ', governo mÿ jãnkamy mäg tĩ ag mré. Topë vĩ mranh tĩ ag mré hã tóg jëg mũ',” he ag tóg, Fariseu ag, Jesus mré mũ tĩ ag mÿ.

¹² Hã ra Jesus tóg mëg mũ, ag vĩ ti. Kĩ tóg ag mÿ kãmén mũ, ha mẽ. “Ûn kagyga tũ ag vÿ médico venh mũ tũ nĩgtĩ,” he tóg. “Hã ra ùn kagyga ag hã vÿ ti venh mũ tĩ,” he tóg.

¹³ “Ha vé, tag to jykrén, Topë vĩ tag to, ha mẽ. “Ājag tÿ jagnë jagãgtãn kũ tóg inh mÿ há tĩ inhhã,” he tóg, Topë ti. “Ājag tÿ inh mÿ nén ù pũn kãfór tóg nĩ, ãjag tÿ jagnë jagãgtãn mũ ti,” he tóg, Topë ti. Hã kũ jagnë jagãgtãn nĩ, ag to vĩ tũg nĩ,” he tóg, Jesus ti. “Inh pi(jé) ù tÿ vënh jykre kuryj han mũ ag mÿ: “ãjag jykre tovãnh nĩ,” he sór tĩ'. Û tÿ Topë vĩ mranh ja nĩ ën ag hã mÿ sóg: “ãjag jykre kórég tovãnh nĩ,” he sór tĩ. Hã jé sóg ãjag mÿ vënh ven,” he tóg, Jesus ti.

*Jesus tÿ ëg vãkre kãmén
(Mc 2.18-22; Lc 5.33-39)*

¹⁴ Kĩ João mré mũ tĩ ag tóg ti tá junjun mũ sir, Jesus tá. Kĩ ag tóg ti ki jëmëg mũ. “Ēg hã ne tóg vãkrég tĩ', Fariseu mré ke ag ke gé. Ēg jãvo ã mré mũ tĩ ag tóg vãkre vãnh nÿtĩgtĩ. Hë ri ke jé?” he ag tóg, Jesus mÿ, João mré mũ tĩ ag.

¹⁵ Kĩ Jesus tóg ag mÿ: “hÿ,” he mũ. “Vënh kyprüg to kãmũ ag pi(jé) vãkrég tĩ',” he tóg. “Festa vë mÿr, vënh prügprüg ti, kũ ti mré ke ag tóg ùn prüg mũ ën venh kãmũ tĩ. Hã ra sóg ùn prüg mũ ën ri ke nĩ, hã kũ tóg inh mré mũ tĩ ag mÿ sér tĩ ver,” he tóg. “Vãhã tóg jun mũ, inh kurã ti. Kĩ hã ag tóg inh pére mũnh mũ. Ēn kã hã ag tóg ãjag vãkrenh ke venh mũ, kurã ën kã, inh mré mũ tĩ ag,” he tóg, Jesus ti.

¹⁶ “Tĩ si fag pi(jé) vãfe kygnej tũ tÿ kur si jar ki hyn han tĩ ja nÿtĩgtĩ'. Ûn kygnej tũ

tỹ ki hyn han mũ ra tóg jaran kenh mũ. Kỹ kur si jar ẽn tóg mág mũ. Ûn kygnej hã tỹ fag tóg ki han han tĩ, kỹ tóg jaran ke tũ nĩ,” he tóg, Jesus ti. Ti tỹ ã jykre tãg tón hã vễ, hã ra tóg kur kygnej ja tũ ri ke nĩ.

17 Kỹ tóg ag mỹ: “kỹ vinho vỹ ge nĩgtĩ gé,” he mũ gé. “Ëg pi(jé) vinho kajãg mũ tỹ ti fár si tỹ sacco ki kujêg tí'. Ke tũ nĩ (mũ) ra tóg kunãnh kỹ jaran ke mũ, kógnãj kỹ. Kỹ vinho ẽn tóg tũ' he mũ, sacco ke gé. Vinho kajã tỹ ti fár tãg tỹ ki kujêh ke vễ mỹr',” he tóg, Jesus ti. Ti tỹ ã jykre tãg tó vễ, hã ra tóg vinho kajãg mũ ri ke nĩ gé.

Jesus tỹ ùn kagyga fag tỹ há' he

(Mc 5.21-43; Lc 8.40-56)

18 Ti tỹ ver ag mré vễmên kỹ pã'i ù tóg tá jun mũ, ha mẽ. Ti krêm tóg grĩnh ke mũ. Kỹ tóg ti mỹ: “ha vé,” he mũ. “Inh kósin fi tóg ter ke mũ. Fi venh kãtĩg. ã tỹ ã nĩgé tỹ fi mẽ kỹ fi fe tóg mrin kenh ke mũ, ha vemnĩ,” he tóg, pã'i ti, Jesus mỹ.

19 Kỹ Jesus tóg jêgnê kỹ ti mré tí mũ sir. Jesus mré mũ ti ag vỹ ti mré mũ mũ gé sir.

20 Ti tỹ ti mré tĩg mũ ra ù fi tóg ti tá jun mũ, ùn kaga ù fi. Kyvénh krỹg ja tũ han kỹ fi tóg nĩ, prỹg tỹ 12 (ke) ki. Jesus vatánh tá fi tóg ti kur mễg mũ sir, ti kur mráj ki.

21 “Sỹ hễn ri ke mũn ti kur mẽ kỹ inh hỹn han mũ,” he fi tóg, to jykren kỹ. Hã kỹ fi tóg ti kur mẽnh kãtĩ mũ.

22 Hã ra Jesus tóg vĩrĩn ke kỹ fi vég mũ. Kỹ tóg fi mỹ: “inh kósin',” he mũ. “Kamêg tũg nĩ,”

he tóg mũ. “ã tỹ inh ki rã hã kỹ ã tóg há' he mũ,” he tóg. Kỹ fi tóg há' he mũ sir vễsỹmér, ha mẽ.

23 Kỹ tóg tĩg mãn mũ, Jesus ti. Kỹ ag tóg pã'i ẽn ãn tá jun jun mũ sir. Kỹ tóg tá fór nĩ, ùn kygfỹ mũ fag tỹ, ag tỹ êg jênky tỹ vãykr ẽn kynkyn tí ag tỹ ke gé, ti kósin fi ter kỹ. Kỹ Jesus tóg fag vég mũ.

24 Kỹ tóg: “ha mũ jêg,” he mũ. “Gĩr sĩ fi vỹ ter tũ nĩ. Nũr fi nỹ nĩ,” he tóg. Hã ra fag tóg ti nyg mũ.

25 Hã ra tóg fag pan kãn mũ sir. Kỹ tóg gĩr fi nĩgé kãgmĩg mũ sir. Kỹ fi tóg nĩ mũ sir.

26 Kỹ tag kãme tóg vễnh kar kri rũm ke mũ, ga ẽn kar mĩ hã, Jesus tỹ fi rĩn mãn mũ ti.

Jesus tỹ ùn kyvó ag tỹ êvãnh há hyn han

27 Kỹ Jesus tóg tá kãkutê mũ sir. Kỹ ùn kyvó régre ag tóg ti nón mũ mũ. Ti nón mũ kỹ ag tóg ti jé prêr mũ: “!..Davi kósin'..!” he ag tóg. “!..Ëg jagãgtãn ra..!” he ag tóg, prênprêr kỹ.

28 Kỹ Jesus tóg ãn kãra rã mũ sir. Kỹ ùn kyvó ẽn ag tóg ti nón ge mũ gé sir, ãn kãra. Kỹ Jesus tóg ag mỹ: “inh mỹ ãjag mỹ ãjag hyn han há nĩ?” he mũ. Kỹ ag tóg ti mỹ: “hỹ,” he mũ.

29 Kỹ Jesus tóg ag kanê mễg mũ sir, ã nĩgé tỹ. Kỹ tóg ag mỹ: “ãjag tỹ inh ki ge kỹ nỹtĩn kỹ ãjag tóg há' henh mũ,” he mũ.

30 Kỹ ag kanê tóg mrin ke mũ sir. Êvãnh há' he ag tóg mũ. Kỹ Jesus tóg ag mỹ vỹ tar

han mũ. “Ker ù mỷ tó hê,” he tóg ag mỷ.

³¹ Hã ra ag tóg mũ kỹ (ag tóg) vênh kar mỷ tugtó mũ. Kỹ ti kãme ên tóg vênh kar kri rùm ke mũ sir.

Jesus tỹ ùn vĩ vãnh vĩn

³² Kỹ ag mũ kỹ ù tóg ti tá jun mũ gé, ùn jagrê kórég. Ti jagrê tóg ti vĩ vãnh han.

³³ Kỹ Jesus tóg ti jagrê kórég kutêm mũ sir. Ti tỹ ti kutêm kỹ tóg sir vĩ há han mũ sir, ùn vĩ vãnh ja ên ti. Kỹ tóg vênh kar mỷ e tí. “Ge ve ja tũ êg tóg nỹtĩ, êg povo tỹ Israel kãmĩ,” he ag tóg mũ.

³⁴ Hã ra Fariseu ag tóg mễg mũ. Kỹ ag tóg ón kỹ Jesus to vĩ kónãn mũ. “Vênh jagrê kórég pan há tóg nỹtĩ. Hã ra tóg vênh jagrê kórég ag pã'i jykre tỹ ag pan tĩ nĩ, ti tỹ tỹ Japo mré ke nĩn kỹ,” he ag tóg, ón kỹ, Fariseu ag. Ag tỹ Jesus to ón hã vê.

Jesus mỷ ùn jagtar ag

³⁵ Kỹ Jesus tóg cidade kar mĩ tí mũ, êmã kar ên mĩ. Êg vênh kanhrãn jafã krêm tóg ag kanhrãn tí. Ag mỷ tóg ù tỹ kanhkã tá nĩ ên tỹ tỹ êg pã'i nĩ ên tó tí sir. Kỹ tóg ùn kagyga ag hyn han tí gé sir.

³⁶ Vênh e ên tóg ti mỷ jagãgtar nỹtĩ. Û tỹ ag ki rĩr há han ke tóg tũ tĩgtĩ, jo ag tóg vênh ki rĩr há han ki kagtĩg nỹtĩ gé. Ti tỹ ag ve kỹ tóg carneiro tỹ mễg mĩ êkrég mũ sir. Û tỹ carneiro tỹ mễg ki rĩr tũ nĩn kỹ ag tóg véké mũgtĩ. Tag ri ke ag tóg nỹtĩ, Jesus mỷ, ùn e ên ag.

³⁷ Kỹ tóg ã mré mũ tí ag mỷ: “sỹ ag ve kỹ sóg êg jakré mĩ êkrég tí,” he mũ. “Tĩ e nĩn kỹ êg tóg kejẽn kre kãn tũ nỹgtĩ, êg pir nỹtĩn kỹ. Ge ti nỹgtĩ. Ûn e ag tóg inh ki ge to há nỹtĩ, hã ra tóg ver ù tỹ ag mỷ tónh ke tóg tũ tí,” he tóg, Jesus ti.

³⁸ “Hã kỹ Topê mré vĩ, ti tỹ ù jêgnê jé, ag tỹ ag mỷ ti vĩ tó jé,” he tóg, Jesus ti, ã mré mũ tí ag mỷ.

10

Jesus tỹ apóstolo ag kuprêg mũ

(Mc 3.13-16; Lc 6.12-16)

¹ Kỹ Jesus tóg ùn tỹ 12 (ke) ag jé prêr mũ sir, ti mré mũ tí ên ag jé. Kỹ tóg ag mỷ vênh jykre nĩm mũ, ag tỹ vênh jagrê kórég pan jé, ag tỹ ùn kagyga ag hyn han jé ke gé. Vênh kaga kar tỹ ag tóg hê ri ke mũ sir, ti tỹ ag mỷ tag to vênh jykre nĩm kỹ.

² Û tỹ 12 (ke) ag jijin hã vê, ha mẽ, Jesus tỹ ùn vin mũ ag jygjyn hã vê, ha mẽ. Ûn ve vỹ tỹ Simão nĩ, kỹ ti jiji ù hã vỹ: Pedro, he mũ. Kar kỹ ti jãvy vỹ nĩ gé, hã vỹ: André, he mũ, Tiago ke gé, Zebedeu kósın tag ti, ti jãvy tỹ João ke gé,

³ Filipe ke gé, Bartolomeu ke gé, Tomás ke gé, Mateus ke gé, governo mỷ jãnkamy mǎg tĩ tag ti, Tiago ù ke gé, Alfeu kósın tag ti, Tadeu ke gé,

⁴ Simão ke gé, ag tỹ ù to: Zelote, he mũ tag ti, kar kỹ Judas Iscariotes ke gé, Jesus vatánh tá pã'i ag mỷ ti kãmén ke tag ti.

*Jesus tỳ apóstolo ag jěgně
(Mc 6.7-13; Lc 9.1-6)*

5 Ěn ag jěgněg tóg mŭ sir, Jesus ti, ag tỳ věnh kar mŷ Topě kāmén jé. Ū tỳ 12 (ke) ěn ag jěgněg tóg mŭ, Jesus tỳ ũn kuprěg ja ěn ag. Kŷ tóg ag mŷ: “ver fóg ag mŷ inh kāmén mŭ tŭg nĩ, kanhgág ag mŷ kāmén tŭg nĩ gé ver,” he mŭ. “Kŷ Samaria tá ke ag jamā ki ge tŭg nĩ gé,” he tóg.

6 “Israel ag tǎvĩ mŷ tómnĩ inhhā. Topě mŷ ag tóg tỳ carneiro vǎfor ri ke nŷtĩ, kŷ ag hā mŷ tómnĩ ver,” he tóg.

7 “Ājag tỳ ag mŷ tó kŷ tag tómnĩ, ha mē. Ū tỳ kanhkā tá nĩ ěn tỳ tỳ ājag pā'i nĩnh ke vė ũri, hemnĩ, ag mŷ.

8 Ūn kagyga ag hyn han nĩ gé. Ūn kǎgter mŭ ag rĩnrĩn mǎn nĩ. Ūn kaga kren vǎnh ěn kren han nĩ. Věnh jagrě kórég ag pan nĩ. Ājag mŷ sóg ge ra inh jykre nĩm mŭ, kŷ ge ra ag mŷ han nĩ gé. Ag mŷ: inh mŷ kajām, he tŭg nĩ.

9 Kŷ jǎnkamy ma mŭ tŭg nĩ, jǎnkamy mág, jǎnkamy sĩ ke gé.

10 Kŷ saco ma mŭ tŭg nĩ gé, bolso ěn. Kur tỳ věnh kri rĩnh tŭg nĩ, pěn né ũ gé mŭ tŭg nĩ gé, pěn to ró ěn. Kŷ vǎtó vyn tŭg nĩ gé, kǎtó ti. Inh rǎnhraj han ājag tóg mŭ. Kŷ ag tóg to ājag jěn ke mŭ, věnh kato, ha vemnĩ,” he tóg, Jesus ti.

11 “Kŷ ājag tóg kejěn ěmā ũ tá junjun ke mŭ. Tá ũn jykre há jǎvǎnh nĩ. Kŷ ěn ĩn ra gemnĩ. Ěn ĩn krēm ājag tỳ kurā ki kǎ panh ke ěn tá krŷg nĩ.

12 Kŷ ĩn ěn krēm nŷtĩ fag mŷ: “Topě jé ājag ki rĩr, kŷ ājag jé jatun mŷ nŷtĩ nĩ,” hemnĩ.

13 Fag tỳ ājag mŷ vĩ há han kŷ fag tóg jatun mŷ nŷtĩ. Fag tỳ ājag mŷ vĩ há han tŭ nĩn kŷ fag tóg jatun mŷ nŷtĩ tŭ nĩ. Fag javo ājag tóg jatun mŷ nŷtĩ.

14 Kejěn ũ tóg ājag mŷ: “kǎge jěg ra,” henh ke tŭ nĩ, ěmā ũ tá. Kŷ tá kǎpamnĩ, ag tỳ ājag vĩ mē jǎvǎnh nŷtĩn kŷ. Tá kǎpa kŷ ājag pěn hā kykŭnh nĩ. Kŷ ag tóg ki kanhró nŷtĩ, Topě tỳ ag to kórég nĩ ti.

15 Ha mē, ki hā sóg tó mŭ. Kurā tỳ ěgno ki, isŷ věnh kar jykre tugnŷm ke kurā ěn ki ag tóg jagǎgtar nŷtĩnh mŭ sir, ag tỳ ājag vĩ mē jǎvǎnh nŷtĩn kŷ. Cidade tỳ Sodoma tá ke ag tóg jykre pǎno nŷtĩ ja nĩgtĩ, cidade tỳ Gomorra tá ke ag ke gé. Kŷ ag tóg jagǎgtar nŷtĩnh mŭ gé, kurā ěn kǎ. Hā ra ũn tỳ ājag vĩ mē jǎvǎnh ěn ag tóg ag jagǎgtar kǎfór han ke mŭ (mŷr), ha mē,” he tóg, Jesus ti.

Ag tỳ Jesus tugerĩn ěg to jŭnh ke

(Mc 13.9-13; Lc 21.12-17; 12.11-12)

16 “Carneiro vŷ věnh jy nĩgǎn han ki kagtŭg nŷtĩ, mĩg tỳ ag mǎn sór nĩn kŷ. Carneiro ri ke ājag nŷtĩ, hā ra sóg ājag jěgněg mŭ, ũ tỳ mĩg ri ke ag to, kŷ Topě hā tóg ājag jy nĩgǎn ke mŭ sir. Hā kŷ věnh ki rĩr há han nĩ. Pŷn jykre han nĩ. Vǎjig ti tĩ, pŷn ti, kŷ ěg tóg kǎnhmar ti tỳ hě ri ke tŭ nĩgtĩ. Pŷn ri ke han nĩ. Kŷ sórǎg jykre han nĩ gé. Jŭ vǎnh pě ti nĩ, nén ũ

věnhmỹ han tũ ti nĩ. Kĩ sórãg ri ke han nĩ gé.

¹⁷ Êprã ke ag tóg ãjag vóg kónãn ke mũ, isugrĩn. ãjag pã'i ag mẽ ag tóg ãjag kãmén ke mũ, ag tỹ ãjag vóg kónãn jé. ãjag vėnh kanhrãnrãn jafã krēm ag tóg ãjag mrãnrãn ke mũ. Hã kỹ vėnh ki rĩr há han nĩ.

¹⁸ Fóg tỹ pã'i mág mẽ ag tóg ãjag ven ke mũ, pã'i mág ù ag mẽ ke gé. Isugrĩn ãjag tóg vėnh jagtar tag venh ke mũ, ãjag tỹ ag mẽ inh vĩ ti tó jé, fóg ag kar mẽ ke gé, kanhgág ag mẽ ke gé.

¹⁹ Pã'i ag tỹ ãjag jé ke kỹ to jykren tũg nĩ, ãjag tỹ ag mẽ nén tónh ke mũ ěn ti to. Topẽ kuprĩg hã ne ãjag krĩn ke mũ', kỹ ãjag tóg ti tỹ ãjag mẽ nén tó mũ ěn hã tónh ke mũ, hora ěn kã.

²⁰ Hã kỹ ãjag tỹ tó tũ vė sir. Ęg jóg kuprĩg tỹ ãjag tỹ vėmėn hã vė," he tóg.

²¹ "Hã ra ù ag tóg ãjag mré pafa mũ fag kãmén ke mũ, pã'i ag mẽ, ag tỹ fag kãgtén jé. Kỹ ù ag tóg ãjag krē kãmén ke mũ gé. Kỹ ù ag tóg ãjag han mũ fag kãmén ke mũ gé, pã'i ag mẽ, ag tỹ fag kãgtén jé, mẽr, ha mẽ.

²² Vėnh kar vĩ ãjag to jũ kỹ ãjag vóg sór nỹtĩ, isugrĩn. Hã ra ù tỹ isovãnh tũ ěn hã krenkren ke mũ, kurã tỹ ěgno ki," he tóg, Jesus ti.

²³ "Ag tỹ cidade ù tá ãjag vóg kónãn kỹ, kỹ cidade ù ra pėtėmĩ. Ki hã sóg tó mũ, ha mẽ. Israel ag cidade fĩn rãm kãn ke tũ ãjag nĩ, kurã ěn kã.

Sĩ ti nĩ, ag tỹ ãjag vóg kónãn ke kurã ti. Kãtĩg jé sóg ke mũ, ag tỹ ge kỹ ãjag vóg kỹ, mẽr, ha mẽ. Tỹ sóg ěprã ke fi kósin nĩ, mẽr, ha mẽ.

²⁴ Aluno pi(jé) ã professor kãfór nĩ'. Ûn camarada pi(jé) ã patrão kãfór nĩ'.

²⁵ Aluno tỹ ã professor ri ke nĩn kỹ tóg há tĩ. Ûn camarada tỹ ã patrão ri ke nĩn kỹ tóg há tĩ gé. Iso ag tóg: Belzebu, he ja nĩgtĩ, inh kato vãsãnsãn mũ ag, hã vĩ: Japo, he mũ, hã vĩ: Belzebu, he mũ. Tỹ sóg ãjag professor ri ke nĩ, ãjag patrão ri ke. Ag tỹ iso: Japo, hen kỹ ag tóg ãjag to vĩ kónãn ke mũ gé, ha vemnĩ, ãjag tỹ inh jykre hã han ti kỹ," he tóg, Jesus ti.

*Ęg tỹ Topẽ hã kamėg ke
(Lc 12.2-7)*

²⁶ "Ge ra ag kamėg tũg nĩ, pã'i ag. Ęg tỹ pėju kỹ nén han mũ tóg vėnh ven kãn ke mũ, ěg tỹ vėnh kar vatánh tá nén to jykren mũ tóg vėnh ven kãn ke mũ.

²⁷ Isỹ vėnh kar vatánh tá ãjag mẽ nén tó mũ tag tỹ vėnh kar mẽ tó kãn nĩ. Isỹ koměr hã ãjag mẽ nén tó mũ tag tỹ vėnh kar mẽ jamã há ra tómnĩ.

²⁸ Mũmėg tũg nĩ, ag kamėg tũg nĩ, pã'i ag. Ęg tén há ag nỹtĩ, hã ra ag tóg nũgme ki ěg vãm ke kagtĩg nỹtĩ, pã'i ag. Ûn pir kamėg nĩ, hã vĩ: Topẽ, he mũ. Ti hã ne ěg tén kar kỹ nũgme ki ěg vãm ki kanhró nĩ', inferno ki, kỹ ti hã kamėg nĩ.

²⁹ Ha vé. Sėsĩ vender he ag tĩ, jãnkamy to, kỹ ag tóg ùn rėgre to jãnkamy pir mãgtĩ. Hã

ra Topê tóg jēsī ag ki rīr tūgtī. Ti tỹ: “hej,” hen kỹ ěg tóg ag pin tĩ, ke tũ nĩn kỹ ěg tóg ag krenkren ti.

³⁰ Hã ki Topê tóg ag ki rīr tūgtī, sēsī ag ki. Ěg ki rīr tóg tĩ gé, Topê ti. Ěg tỹ nén vég mũ kar ki kanhró tóg nĩ. Hã kỹ tóg ěg gãnh kar nĩgrén ja nĩ gé, Topê ti.

³¹ Hã kỹ pã'i ag kamĕg tũg nĩ. Jēsī kãfór ãjag tóg nỹtĩ, Topê mỹ. Ājag kãmĩ ũn pir tóg sēsī e kãfór nĩ, ti mỹ,” he tóg, Jesus ti.

*Ěg tỹ Jesus kãmén ke
(Lc 12.8-9)*

³² “Hã kỹ inh kãmén nĩ, ěprã ke ag mỹ. Ājag tỹ ag kamĕg tũ nĩn kỹ ag mỹ inh kãmén kỹ sóg inh jóg tỹ kanhkã tá nĩ ěn mỹ ãjag kãmén ke mũ gé, kurã ěn kã.

³³ Ājag tỹ hã ra inh kãmén tũ nĩn kỹ sóg inh jóg tỹ kanhkã tá nĩ ěn mỹ ãjag kãmén ke tũ nĩ gé, kurã ěn kã, ãjag tỹ iso: “ti ki kagtũg sóg nĩ,” hen kỹ,” he tóg, Jesus ti.

*Ěg tỹ ěg jykre finh ke
(Lc 12.51-53; 14.26-27)*

³⁴ “Ājag hỹn iso: “vĕnh kar tỹ jagnĕ to há han jé tóg ke mũ,” he tĩ. Hã tũ vĕ, ũ tỹ hĕn ri ke tỹ jagnĕ to jũ han jé sóg ke mũ, ha vemnĩ.

³⁵ Hã kỹ ũ tóg ã panh kato tĕnh mũ, kỹ ũ fi tóg ã mỹnh fi kato tĕnh mũ gé. Kỹ ũ fi tóg ã má fi kato tĕnh mũ gé, mỹr, ha mĕ.

³⁶ Ti mré ke ag vỹ tỹ ti kato vãsãnsãn mũ ag nỹtĩnh mũ, kỹ

fi mré ke fag tóg fi kato vãsãn ke mũ gé, ha mĕ.

³⁷ Iso há kãfor nỹtĩmnĩ, ãjag han mũ fag kri, ke tũ nĩ (mũ) ra ãjag tóg inh mỹ há tũ nỹtĩ. Iso há kãfór nỹtĩmnĩ, ãjag krĕ kri, ke tũ nĩ (mũ) ra ãjag tóg inh mỹ há tũ nỹtĩ.

³⁸ Isỹ inh cruz va tĩg ri ke han nĩ gé, isỹ tá ter ke ti, hã vỹ: iser ěn ri ke han sór mũ, he mũ. Ke tũ nĩ (mũ) ra ãjag tóg inh mỹ há tũ nỹtĩ.

³⁹ Ājag tỹ iser ri ke han sór tũ nỹtĩn kỹ ãjag tóg nũgme ki kutĕnh mũ, ãjag tỹ ãjag jykre tovãnh sór tũ nỹtĩn kỹ. Ājag tỹ isugrĩn kãgter sór kỹ ãjag tóg rīr krỹg ja tũ ěn venh ke mũ, ãjag tỹ ãjag jykre tovãnh kỹ,” he tóg, Jesus ti.

*Topê tỹ ěg mỹ nén ũ há tónh ke
(Mc 9.41)*

⁴⁰ “Ũ tỹ ãjag mỹ: hej, hen kỹ tóg inh mỹ: hej, he mũ gé sir, kỹ tóg inh ki rã mũ sir. Ti tỹ inh ki rã kỹ tóg ũ tỹ inh jĕnĕg mũ ěn ki rã mũ gé sir, hã vỹ: Topê, he mũ.

⁴¹ Ũ tóg Topê vĩ tó tĩ ag mỹ: “ha kãrã,” he tĩ, ag tỹ Topê vĩ tó tĩ tugrĩn. Ti tỹ ag mỹ vĩ há han kỹ tóg Topê mỹ há nĩ sir. Kỹ tóg kejĕn ti mỹ nén ũ há tónh ke mũ, Topê ti, ũ tỹ ti vĩ tó tĩ ag mỹ: “ha kãrã,” he mũ ěn mỹ. Ũ tóg ũn jykre kuryj ag mỹ: “ha kãrã,” he tĩ, ag jykre kuryj nỹtĩ tugrĩn. Ěn mỹ tóg nén ũ há tónh ke mũ gé, Topê ti.

⁴² Ũ tóg kejĕn ũn sĩ mỹ nén ũ nĩm tĩ, goj hĕn ri ke mũn. Ũn sĩ

tỹ inh ki rã nĩ tũgrĩn tóg ti mỹ nén ũ nĩm tĩ. Ēn mỹ tóg nén ũ há tónh ke mũ gé, Topê ti. Ti pí(jé) to nén ũ há venh ke tũ nĩ,” he tóg, Jesus ti.

11

João Batista tỹ Jesus ki jẽmẽ (Lc 7.18-35)

¹ Jesus tỹ ã mré mũ tĩ ag mỹ tó kãn kỹ tóg tá kãkutẽ mũ sir, ũ tỹ 12 (ke) ag mré. Kỹ tóg cidade kar mũ tĩ mũ sir, vẽn kar kanhrãn kỹ, ag mỹ Topê vĩ tón kỹ.

² Kỹ kejẽn João tóg ti kãme mẽg mũ. Se kỹ tóg nĩ nĩ, João ti, hã ra tóg Jesus tỹ nén han mũ mẽg mũ sir. Kỹ tóg Jesus mỹ vẽn vĩ jẽnẽg mũ, ã mré mũ tĩ ag tỹ, João ti.

³ Kỹ tóg Jesus mỹ: “ã hã mỹ?” he mũ. “Ēg tỹ ũn jãvãnh mũ mỹ tỹ ã nĩ?” Topê tỹ ũn jẽnẽg mũ hã mỹ tỹ ã nĩ?” he tóg. “Ēg mỹ ũ jãvãnh mãn ke tũ nĩ ha’, ã pãte?” he tóg, João Batista ti, Jesus mỹ.

⁴ Kỹ Jesus tóg ti mỹ vẽn vĩ jẽnẽg mũ gé sir. “Ha João mỹ ãjag tỹ nén vég mũ tag ti tómnĩ, ãjag tỹ nén mẽg mũ tag ti, ha mẽ,” he tóg.

⁵ “Tag han inh tĩ, ha mẽ: ũn kyvó ag vĩ isũgrĩn ěvãnh há nỹtĩ. ũn kãnhgrĩ ag vĩ mũ há han mũ, ũ tỹ vẽn kaga kren vãn han mũ ěn ag krenkren han inh tĩ, lepra han mũ ag. ũn kutu ag vĩ ěmẽ há nỹtĩ ha, ũn kãgter mũ ag vĩ rĩnrĩr mãn nỹtĩ. ũn jagãgtar ag vĩ Topê vĩ mẽg tĩ, ũ tỹ kanhkã tá nĩ ěn tỹ tỹ ěg pã’i nĩnh ke to.

⁶ Kỹ tóg ti tỹ iso jykrén kónãn tũ nĩn kỹ há’ he mũ. Kỹ Topê tóg ti ve há han mũ. Tag tómnĩ, João mỹ,” he tóg, Jesus ti.

⁷ Kỹ ag tóg sir mũ mũ, João mỹ tó jé, ti mré mũ tĩ ag.

Ag mũn kỹ Jesus tóg vẽn e ag mỹ João kãmén mũ. “Ājag tỹ ěmã tũg ja ra mũn kỹ, ti ve jé, kỹ ti jykre hỹn ne ri ke nĩ, ãjag mỹ?” he tóg. “Kejẽn kãka tóg goj jagma krã tỹ man man ke tĩ. João jykre mỹ ãjag mỹ tag ri ke tũ nĩ? Hỹ, ri ke tũ ti nĩ.

⁸ Kỹ ti jykre hỹn ne ri ke nĩ, ãjag mỹ? Ti mỹ ãjag mỹ ũn kur sĩnvĩ ag jykre ri ke nĩ? Vó, ũn kur sĩnvĩ ag vĩ cidade mág tá nỹtĩ, pã’i mág ĩn krẽm.

⁹ Kỹ ti jykre hỹn ne ri ke nĩ, ãjag mỹ? Ti jykre mỹ ãjag mỹ Topê vĩ tó tĩ jykre ri ke nĩ? Hỹ, Topê vĩ tó tĩ vẽn mỹr. Hã ra tóg Topê vĩ tó tĩ ag kãfór kar nĩ, João ti.

¹⁰ Topê vĩ João jẽnẽ, ti tỹ ijo tĩg jé. Hã kỹ tag tóg ti to rãn kỹ nĩ, Topê vĩ ki, ha mẽ. “Ha vé, ã jo sóg ũ jẽnẽnh mũ, ti tỹ vẽn kar jykre tỹ há’ hen jé, ã tĩg ken jo,” he ja tóg nĩ, Topê ti, João to, iso ke gé,” he tóg, Jesus ti. “Ag jyvẽn jé tóg ke mũ, kỹ tóg ěpřy kure ri ke nĩ, ěmĩn kuryñh ri ke,” he ja tóg nĩ, Topê vĩ tỹ rãn kỹ nĩ ki, João to.

¹¹ Ki hã sóg tó mũ, hã kỹ sóg ke mũ, ha mẽ. Ēpřã ke ag kãfór kar ti nĩ, João ti, Topê vĩ tón ki. ũ tỹ ga kri mũ ag kãfór kar ti nĩ. Hã ra ũ tỹ hẽn ri ke ag tóg ũ tỹ kanhkã tá nĩ ěn tỹ tỹ ěg pã’i nĩnh ke ěn venh ke

mũ. Ag tỹ venh ke mũ (hã) ra ag tóg kãsir nỹtĩnh mũ. Ûn kãsir ên ag tỹ êgno pẽ ên tóg João kãfór nĩnh mũ, hã ra,” he tóg, Jesus ti.

¹² “João Batista kãtĩg kar kỹ êg tóg vãsãn kỹ (êg tóg) ù tỹ kanhkã tá nĩ ên tỹ tỹ êg pã'i nĩ venh ke mũ. Êg vãsãn kỹ êg tóg venh ke mũ.

¹³ Topẽ vĩ tó tĩ ag kar vỹ Topẽ vĩ tó ja nĩgtĩ. Kỹ tóg rãn kỹ nĩ gé, Topẽ tỹ êg jyvẽn mũ ti. Kỹ João tóg tó ja nĩ, ag nón.

¹⁴ João vỹ Elias ri ke nĩ. Tag to jykrén. Rãn kỹ tóg nĩ, Topẽ vĩ tỹ rãn kỹ nĩ ki, Elias kãtĩg mãn ke ti, Cristo kãtĩg ken jo. Ti hã vễ, João hã vễ, Elias kãtĩg mãn ên ti.

¹⁵ Û nĩgrêg nỹtĩ tỹ tỹ jẽmẽ jé, to jykrén jé,” he tóg, Jesus ti.

¹⁶ “Ûri ke ag vỹ ge nỹtĩ gé, ha mẽ. Gĩr ag ri ke ag tóg nỹtĩ. Gĩr ag vỹ jagnẽ mré kanhinnhir mũgtĩ. Kỹ ag tóg ãjag mré ke ag jé prêr tĩgtĩ, “mũ nỹ, kanhinnhir jé,” hen kỹ. Kỹ ag tóg kejẽn jũgiũ tĩ.

¹⁷ “Ãjag mũ êg tóg vãkyn, kanhinnhir kỹ, hã ra ãjag ne vẽnh gringrén jãvãnh nỹtĩ,” he ag tóg tĩ, gĩr ag, jagnẽ mũ. “Ãjag vẽnh gringrén jãvãnh nỹtĩnh kỹ êg tóg vêsỹrénh mũ sir, êg kanhinnhir kỹ, hã ra ãjag tóg êg mré fỹ jãvãnh nỹtĩ gé,” he ag tóg tĩ gé, ón kỹ jagnẽ to jũ kỹ, gĩr ag.

¹⁸ Gĩr tag ag ri ke ãjag nỹtĩ, João to, iso ke gé. João vỹ vãkre ja nĩgtĩ, jẽn mág tũ, kron tũ. Kỹ ãjag tóg ti to: “jagrẽ kórég ti nĩ,” he ja nĩgtĩ, ti vãkre to.

¹⁹ Ti jãvo sóg vãkrég tũ nĩgtĩ, jẽg sóg nĩgtĩ, kron sóg nĩgtĩ, kỹ ãjag tóg iso: “ti hã ne jẽn mág nĩgtĩ’, ti hã ne kronkron nĩgtĩ’, ti hã ne governo mũ jãnkamy mãg tĩ ag to há nĩgtĩ’, ti hã ne Topẽ vĩ mranh tĩ ag hã to há nĩgtĩ’,” he ãjag tóg sir, iso, êprã ke fi kósin to. Kỹ João jykre tóg ãjag mũ kórég nỹ, ti vãkre to. Jãvo inh jykre tóg ãjag mũ kórég nỹ gé, inh vãkrég tũ to. Hã ra êg tỹ ù jykre tugnỹm kỹ êg tóg ti jykre há ên ki kanhró nỹtĩ sir. Kỹ tóg tỹ Topẽ krẽ nĩ sir, ùn jykre há ti, kỹ êg tóg ti ki Topẽ jykre ki kanhró nỹtĩ sir,” he tóg, Jesus ti. Ti tỹ ag mũ João kãmén hã vễ.

Jesus tỹ cidade ù tá ke ag mũ vĩ kónãn
(Lc 10.13-15)

²⁰ Kỹ Jesus tóg cidade tá ke ag mũ vĩ kónãn mũ sir. Cidade tỹ hẽn ri ke ki tóg êg tỹ nén han vãn hyn han ja nĩgtĩ, milagre ti, hã ra ag tóg ãjag jykre tovãnh sór ja tũ nĩgtĩ, ti ki ag tóg ge sór ja tũ nĩgtĩ. Hã kỹ tóg sir ag to vĩ kónãn ja nĩ, ha mẽ.

²¹ “Sỹ cidade tỹ Corazim ki ke ag mũ tag tó sór mũ, ha mẽ,” he tóg. “Kórég ve jé ãjag tóg ke mũ,” he tóg. “Sỹ cidade tỹ Betsaida ki ke ag mũ tag tó sór mũ, ha mẽ,” he tóg. “Kórég ve jé ãjag tóg ke mũ gé,” he tóg. “Milagre tỹ hẽn ri ke hyn han isóg ãjag mũ, hã ra ãjag tóg ãjag jykre tovãnh sór tũ nĩgtĩ,” he tóg. “Cidade tỹ Tiro tá, cidade tỹ Sidom tá sóg êg tỹ nén han vãn ên hyn han ja tũ nĩ. Sỹ tá milagre ên hyn han mũ ra ag tóg ãjag jykre tovãnh mũ vễ,

vāsỹ,” he tóg. “Kygfỹ ag mũ vễ, ãjag mỹ e tĩn kỹ, ag jykre pãno ên, sỹ ag mỹ tó (hã) ra. Ag jãvo ãjag tóg tovãnh sór tũ nĩ, to jykrén sór tũ nĩ,” he tóg.

22 “Tiro tá ke ag vỹ vễsỹrénh ke mũ, kurã tỹ êgno ên ki, Sidom tá ke ag ke gé, ag jykre pãno to. Hã ra ãjag tóg ag vễsỹrénh kãfór han ke mũ, ha vemnĩ, ãjag tỹ inh vég mũ ra inh ki ge sór ja tũ nĩn kỹ. Ki hã sóg tó mũ,” he tóg, Jesus ti.

23 “Sỹ cidade tỹ Cafarnaum ki ke ag mỹ tag tó sór mũ, ha mẽ,” he tóg. “Uri tóg ver ãjag mỹ sér tĩ,” he tóg. “Ãjag tỹ kanhkã jykre vég nỹtĩ ra ãjag tóg to jykrén tũ nĩ, hã kỹ ãjag tóg nũgme ki vár ke kãn mũ. Cidade tỹ Sodoma tá ke ag vỹ ãjag jykre pãno to kãgter. Ag tỹ sỹ ãjag mỹ nén han mũ vég mũ ra ag vãsỹ to jykrén mũ vễ, kỹ ag kãgter ke tũ nĩ vễ. Kỹ êg tỹ ùri ag jamã ve vễ vễ.

24 Kurã tỹ êgno ki ag tóg vễsỹrénh ke mũ, Sodoma tá ke ag. Hã ra ãjag tóg ag vễsỹrénh kãfór han ke mũ, sỹ vênh kar jykre tugnỹm ke kurã ên kã, ãjag tỹ inh vég mũ ra inh ki ge sór tũ nỹtĩn kỹ,” he tóg, Jesus ti.

Jesus tỹ êg krĩ tỹ kãnhvy' henh ke

(Lc 10.21-22)

25 Kỹ Jesus tóg tag tó mũ gé, ha mẽ. “Jóg,” he tóg. “Tỹ ã tóg kanhkã tãn ag kãfór kar nĩ, kar ã tóg tỹ êprã ke ag kãfór kar nĩ gé,” he tóg. “Inh mỹ tóg há tĩ, ã tỹ nén han mũ ti. Û tỹ: “ki kanhró mág inh nĩ,” he mũ ag mỹ ã tóg ã jykre ven ja tũ

nĩ. Ag mỹ ã tóg kãmén ja tũ nĩ. Û tỹ gĩr ri ke ki kagtĩg ag hã mỹ ã tóg ven ja nĩ, ã jykre ti,” he tóg.

26 “Hỹ, hã vễ. ã tỹ nén to jykrén mũn hã vễ, hã kỹ ã tóg ag hã mỹ ã jykre ti nĩm. Hã ra tóg há tãvĩ nĩ, jóg’,” he tóg, Jesus ti.

27 Kỹ tóg ag mỹ: “inh jóg tóg inh mỹ tovãnh kãn, ã tỹ nén han ja kar ti,” he mũ. “Kỹ ù pi(jé) ti kósin ki kanhró nĩ'. Inh jóg hã ne inh ki kanhró nĩ'. Kỹ ù pi(jé) inh jóg ki kanhró nĩ gé'. Inh hã ne ti ki kanhró nĩ', isỹ tỹ ti kósin nĩn kỹ. Hã ra sóg ãjag mỹ ti kãmén jé kãtĩ mũ, inh jóg ti. Isỹ tag to ùn kuprêg mũ ag hã mỹ sóg ti kãmén tĩ, inh jóg ti,” he tóg.

28 “Ãjag jagãgtar nỹtĩn kỹ, ãjag tỹ Topê vĩ ki króm ki kagtĩg nỹtĩ tugrĩn jagtar nỹtĩn kỹ iso kãmũ jêg. Nén ù tỹ ãjag mỹ jagy tĩn kỹ iso kãmũ jêg. ãjag krĩ tỹ sóg kãnhvy' henh mũ mỹr, ha mẽ,” he tóg.

29 “Inh mré kãmũ jêg. ãjag kanhrãn jé sóg ke mũ. Komêr hã sóg vĩ tĩ. Inh pi(jé) vễsỹ ùn mág han tĩ', vĩ tar han vãnh sóg nĩgtĩ. ãjag tỹ iso kãmũ kỹ ãjag krĩ tóg há' henh mũ, ha vemnĩ. Kuprã' he jé tóg ke mũ, ãjag krĩ ti, ha vemnĩ,” he tóg.

30 “Inh jykre pi(jé) kufy nĩ', ãjag mỹ'. Isỹ ãjag mỹ nén tó mũ pi(jé) han kórég nĩ',” he tóg, Jesus ti.

12

Jesus tỹ vênhkãn ke kurã to

pã'i

(Mc 2.23-28; Lc 6.1-5)

¹ Kejëñ Jesus tóg trigo jo ep̃y mĩ tĩ mũ, ti mré mũ tĩ ag tóg ti mré mũ mũ. Vēnhkán ke kurã ki ke vē, hã ra ag tóg kókĩñkĩr mũ, vējëñ vég tũ nĩn k̃y. Hã k̃y ag tóg trigo mó ěn t̃y kam ke k̃y ko mũ sir.

² K̃y Fariseu ag tóg ag vég mũ. K̃y ag tóg Jesus m̃y vĩ mũ. “Ha vé,” he ag tóg mũ ti m̃y. “Ā mré mũ tĩ ag ne tóg ājag t̃y nén han ke tũ han mũ ha', vēnhkán ke kurã ki'. Vēnh rãñhrãj vē m̃ỹr, ag t̃y trigo t̃y kam ke ti,” he ag tóg, Jesus, m̃y.

³ Hã ra Jesus tóg ag m̃y: “vó,” he mũ. “Davi t̃y nén han mũ to jykrén nĩ,” he tóg. “Ti kókĩr nĩn k̃y tóg ã t̃y nén han ke tũ han gé, ti mré mũ tĩ ag mré, hã ra Topẽ pi(jé) ti to jũ mũ', ti t̃y ã t̃y nén han ke tũ han mũ ra.

⁴ Tag han ja ti nĩ, ha mẽ. Topẽ jo ĩn kãra rã k̃y tóg tá Topẽ jamĩ ěn kó, t̃y ã t̃y konh ke tũ ra. K̃y tóg ã mré mũ tĩ ag m̃y vin gé, Topẽ jamĩ ěn. Topẽ tũ ki rĩr tĩ ag t̃y konh ke ja vē vē, Topẽ jamĩ ěn, hã ra tóg ko ja nĩ, ti t̃y t̃y Topẽ tũ ki rĩr tĩ tũ ra, Davi ti. Hã k̃y tóg rán k̃y nĩ, Topẽ vĩ t̃y rán k̃y nĩ ki,” he tóg, Jesus ti.

⁵ “K̃y Topẽ tũ ki rĩr tĩ ag jykre to jykrén nĩ gé. T̃y vēnhkán ke kurã ra ag tóg rãñhrãj mũgtĩ, Topẽ jo ĩn krēm, hã ra ag tóg Topẽ tũ ki rĩr tĩ. Hã k̃y ag tóg t̃y vēnhkán ke kurã ra ki vēnhkán tũ nĩgtĩ gé, ge ra ag jykre tóg há nĩ,

Topẽ m̃y. Hã k̃y tóg rán k̃y nĩ gé, Topẽ vĩ t̃y rán k̃y nĩ ki.

⁶ Ha mẽ, Topẽ jo ĩn ṽy t̃y Topẽ tũ nĩ. K̃y ag tóg ti tũ ki rĩr tĩ, t̃y vēnhkán ke kurã ra. Hã ra sóg Topẽ jo ĩn kãfór nĩ, Topẽ m̃y. Hã k̃y inh mré mũ tĩ ag tóg Topẽ m̃y há ñỹtĩ, ag t̃y vēnhkán ke kurã ki vēnhkán tũ ra,” he tóg, Jesus ti.

⁷ “K̃y Topẽ vĩ tag to jykrén nĩ gé, ha mẽ. “Ājag t̃y jagnẽ jagãgtãñ k̃y tóg inh m̃y há tĩ,” he ja tóg nĩ. Topẽ ti. “K̃y tag tóg inh m̃y ājag t̃y inh m̃y nén ũ pũn kãfór nĩ, ājag t̃y jagnẽ jagãgtãñ tag ti,” he ja tóg nĩ. Topẽ ti. Ājag t̃y tag to jykrén mũ ra ājag tóg inh mré ke ag to jũnh ke tũ nĩ vē. Ag kókĩr vē m̃ỹr. Nén ũ kórég han ja tũ ag tóg nĩ,” he tóg, Jesus ti.

⁸ “Hã ra sóg t̃y vēnhkán ke kurã to pã'i nĩ. T̃y sóg ěprã ke fi kósin nĩ” he tóg, Jesus ti, Fariseu ag m̃y.

Jesus t̃y ũn nĩgé tóg t̃y há' he (Mc 3.1-6; Lc 6.6-11)

⁹ K̃y tóg ěmã ěn tá kutẽ k̃y ěmã ũ ra tĩ mũ, k̃y tóg ěg vēnh kanhrãñ jafã kãra rã mũ sir.

¹⁰ Tã ũ tóg nĩ nĩ, ti nĩgé tóg tóg ja nĩ. K̃y ag tóg Jesus m̃y: “m̃y há ñỹ ṽy, ěg t̃y vēnhkán ke kurã ki ũ kygtãg ke ti?” he mũ. Hã ra ag tóg pã'i ag m̃y: “vēnhkán ke kurã ki tóg Topẽ vĩ mranh tĩ, ũ kygtãg k̃y,” he sór mũ. Hã k̃y ag tóg ti ki jēmẽg mũ. Ag m̃y tóg t̃y vēnh rãñhrãj nĩ, ũ kygtãg ti. Vēnhkán ke kurã ki ěg ñỹji ũ kygtãg ke tũ nĩ.

¹¹ Hã ra Jesus tóg ag m̃y: “ājag mẽg t̃y vēnhkán ke kurã

ki kãgnó ki kutē kÿ, ãjag mÿ ti kunũnh ke tũ nĩ, tÿ vẽnkhán ke kurã nĩn kÿ?" he mũ. "Ti kunũnh jé ãjag tóg ke mũ. Kÿ to jykrén nĩ.

12 Ēg mré ke vÿ ěg mĕg kãfór nĩ," he tóg. "Kÿ tóg há nĩ, ěg tÿ ěg mré ke kÿgtãg kÿ, tÿ vẽnkhán ke kurã ra," he tóg.

13 Kÿ tóg ùn nĩgé tóg ěn mÿ: "ã nĩgé tÿ krÿg' hé," he mũ. Kÿ tóg tÿ krÿg' he mũ sir. Hã ra tóg há' he mũ. Ti nĩgé há ěn hã ri ke tóg nĩ, ti nĩgé kórég ja ti.

14 Kÿ Fariseu ag tóg jũgũ kÿ pa mũ sir, ãn ěn ki. "Ēg hÿn hē ri kenh mũ, ti tén jé?" he ag tóg mũ, Jesus to.

15 Hã ra Jesus tóg ki kanhró nĩ, ag tÿ ti tén sór mũ ti. Kÿ tóg sir tá kãkutē mũ, ěmã ù ra tĩg jé.

Isaías tÿ Jesus kãmén ja

Ti tĩg kÿ ùn tÿ hēn ri ke ag tóg ti nón mũ mũ sir, ùn kagyga ag ke gé, fag ke gé. Kÿ tóg ag tÿ há' he kãn mũ sir, fag tÿ ke gé, Jesus ti.

16 Kÿ tóg ag mÿ: "ker isÿ ãjag tÿ há' he kãmén hē'," he mũ.

17 Hã ra tóg rán kÿ nĩ gé, ti tÿ ag tÿ há' he mũ tag ti. Isaías ti, ù tÿ vãsÿ Topē vĩ rán tĩ ěn hã vÿ Jesus to tag rán ja nĩ, ti tÿ Topē vĩ tó kÿ.

18 Topē vĩ tag tó ja ti nĩ, ha mē: "ha vé, sÿ ùn kuprĕg mũ ěn," he tóg, Topē ti," he ja tóg nĩ, Isaías ti. "Inh camarada ri ke ti nĩ, ti tÿ isÿ nén tó mũ ěn ki króm há han kÿ. Inh fe pē vēgtĩ, sÿ ti ve kÿ tóg inh mÿ sér tĩ. Ti hã mÿ sóg inh kuprĩg jĕnĕnh mũ, kÿ tóg inh vĩ tónh

mũ sir. Fóg ag mÿ tóg tónh mũ, kanhgág ag mÿ ke gé, isÿ ag jykre tugnÿm ke ti," he tóg, Topē ti," he ja tóg nĩ, Isaías ti.

19 "Vĩ jũ han ke tũ ti nĩ, jũ kÿ vĩ tar han ke tũ ti nĩ gé. Re tá ag tóg ti vĩ mĕnh ke tũ nĩ gé. Komĕr hã tóg vĩnh mũ," he tóg, Topē ti.

20 "Ēprã ke ag tÿ inh vĩ mranh kÿ ag tóg vãn tÿ ã tÿ tóg' he kÿ kam ke ěn ri ke nÿtĩ. Hã ra ti pi(jé) ag tÿ kam ke kãn ke mũ', isÿ ù to: inh fe, he mũ ěn ti. Néj gru tÿ nhyn ke sór ri ke ag nÿtĩ gé. Ti pi(jé) ag tÿ nhyn kenh ke mũ', hã ra'. Ag mÿ tóg vĩ há han ke mũ. Tag kar kÿ sóg kejĕn vĕnh kar jykre tugnÿm ke mũ.

21 Ēn kã ù tÿ ti ki ge kÿ nÿtĩ ag hã vÿ krenkren ke mũ, fóg ag mré hã, kanhgág ag mré hã," he tóg, Topē ti," he ja tóg nĩ, Isaías ti, Jesus to. Hã ra tóg ge nÿgtĩ.

Jesus tÿ Japo jykre tó (Mc 3.20-30; Lc 11.14-23)

22 Kejĕn ag tóg Jesus to ù pére kãmũ mũ, ùn kyvó. Vĩ vãn tóg nĩ gé. Hã ra tóg jagrĕ kórég nĩ gé, hã kÿ tóg ge nĩgtĩ. Kÿ Jesus tóg ti tÿ há' he mũ sir. Kÿ tóg vĩ há' he mũ sir. Ve há' he tóg mũ gé sir.

23 Kÿ tóg vĕnh kar mÿ e tãvĩ tĩ. Kÿ ag tóg jagnĕ mÿ: "Davi kósín ěn tũ mÿ'?" he mũ sir, Jesus to. "Û tÿ vãsÿ rán kÿ nĩ ěn tũ mÿ'?" he ag tóg mũ. Ag mÿ tóg ti hã nĩ ve nĩ.

24 Kÿ Fariseu ag tóg mĕg mũ sir, Jesus tÿ ti tÿ há' he mũ ti. Hã ra ag tóg Jesus to: "jagrĕ

kórég ti nĩ,” he mũ. “Nén-Kórég ag pã'i tỹ ti jagrẽ nĩ, Belzebu ên tỹ,” he ag tóg mũ. “Hã kỹ tóg Nén-Kórég ag pan tĩ, hã kỹ tóg ag jagrẽ kórég ag pan tĩ. Nén-Kórég ag pã'i jykre tỹ tóg ag pan tĩ,” he ag tóg, Fariseu ag.

²⁵ Hã ra Jesus tóg ki kanhró nĩ, ag tỹ nén to jykrén mũn ki. Kỹ tóg ag mỹ: “pã'i pir krẽm ke ag tỹ jagnẽ kato tẽgtẽn kỹ ag tóg jagnẽ kãgtén kãn ke mũ,” he mũ. “Êmã pir ki ke ag tỹ jagnẽ kato tẽgtẽ kỹ, ãn pir krẽm ke fag tỹ jagnẽ kato tẽgtẽ kỹ fag tóg vênh kãpãm kỹ nỹtĩnh mũ, kỹ fag tóg jagnẽ kãgtén kãn ke mũ.

²⁶ Ge ti nĩ gé, Nén-Kórég ag. Nén-Kórég tỹ Nén-Kórég ù kutẽm kỹ tóg Nén-Kórég ag tỹ jagnẽ kato tẽgtẽ han mũ sir. Kỹ ag tóg jagnẽ tỹ tũ' henh ke mũ gé, Satanás ag.

²⁷ “Belzebu tỹ tóg Nén-Kórég ag pan tĩ,” he ãjag tóg tĩ iso. Jãvo ãjag mré ke ag hỹn vênh jykre tỹ ne tỹ vênh jagrẽ kórég ag pan tĩ? Ag mỹ Nén-Kórég ag jykre ki ag pan mũ gé', Topẽ jykre ki mỹ vó? Topẽ jykre ki ag tóg ag pan tĩ. ãjag tỹ tag to jykrén kỹ ãjag tóg ãnh jykre há ki kanhrãn ke mũ vẽ,” he tóg ag mỹ, Jesus ti.

²⁸ “Topẽ kuprĩg jykre tỹ sóg Japo ag pan tĩ mỹr. Topẽ kuprĩg tỹ Japo ag pan kãn kỹ Topẽ tóg tỹ ãg pã'i nĩ vẽ mỹr. Tag to jykrén nĩ,” he tóg, Jesus ti.

²⁹ mãn sór kỹ, ti ãn tá, kỹ ãg tóg ti se vén tĩ, ke tũ nĩ (mũ) ra tóg ã tũ ki rĩr ke mũ, kỹ ãg

tóg ti tũ mãn tỹ hẽ ri kenh ke tũ nĩgtĩ, ti tar nĩn kỹ. ãg tỹ ti se kar kỹ ãg tóg ti tũ mæg mũ sir,” he tóg. “Ge ti nĩgtĩ, sỹ nén han mũ ti. Tar ti nĩ, Japo ti. Hã ra sóg hur ti sé, hã kỹ sóg ti tũ ag kygvãn ke mũ sir. Ag jagrẽ kórég pan sóg mũ sir,” he tóg, Jesus ti.

³⁰ “ãjag tỹ tỹ ãnh mré ke tũ nỹtĩn kỹ ãjag tóg ãnh kato tẽgtẽ mũ. ãjag tỹ ãnh mré ãprã ke ag tỹ Topẽ to kãmũ han tũ nĩn kỹ ãjag tóg ag kãmũ kamẽg mũ,” he tóg.

³¹ “Hã kỹ sóg ãjag mỹ tó mũ. ãjag tỹ Topẽ vĩ mranh mũ ra tóg ãjag mỹ vênh pãte fón sór mũ, Topẽ ti. ãjag tỹ Topẽ to vĩ kónãn mũ ra tóg ãjag mỹ vênh pãte fón sór mũ gé. ãjag tỹ hã ra Topẽ kuprĩg to: “Japo tỹ ãg jagrẽ vẽ,” hen kỹ tóg ãjag mỹ vênh pãte fón mãn ke tũ nĩ ha sir, Topẽ ti,” he tóg, Jesus ti.

³² “ãjag tỹ iso vĩ kónãn mũ. ãjag tỹ hã ra Topẽ kuprĩg to vĩ kónãn kỹ tóg ãjag mỹ vênh pãte fón mãn ke tũ nĩ ha. ãjag tỹ ga kri mũn kỹ tóg ãjag mỹ vênh pãte fón mãn ke tũ nĩ, Topẽ ti, ãjag ter kar kỹ tóg ãjag mỹ vênh pãte fón mãn ke tũ nĩ gé,” he tóg, Jesus ti.

Ka to comparação (Lc 6.43-45)

³³ “ãg tỹ ka kanẽ ko há krãn kỹ ti kanẽ vỹ ko há nĩ, ãg tỹ ka kanẽ ko vãn krãn kỹ ti kanẽ vỹ ko kórég nĩ gé. ãg tỹ ti kanẽ ve kỹ ãg tóg: “ũn kanẽ ko vãn ja vẽ,” henh ke mũ. Ge ti nĩgtĩ, ãg jykre ti. ãn jykre há tóg há

nĩ, ùn jykre kórég tóg kórég nĩ gé.

³⁴ Pÿn ri ke ājag nÿtĩ. Kórég tãvĩ ājag nÿtĩ, hã ra ājag tóg ón kÿ nén ù há tó sór tĩ. Ēg jĕnky ki tóg kutĕ tĩ, ěg tÿ nén to jykrén mũ ti. Ēg jykre kórég tãvĩ nĩn kÿ ěg tóg nén ù kórég tãvĩ tó tĩ. Hã kÿ ājag pi(jé) tó há han tĩ'.

³⁵ Ùn jykre há vÿ nén ù há kar to jykrén tĩ, kÿ tóg ěg mÿ tó há han tĩ gé sir, Ùn jykre kórég vÿ nén ù kórég kar to jykrén tĩ, kÿ tóg ěg mÿ tó kónãn tĩ gé sir," he tóg, Jesus ti.

³⁶ "Ki hã sóg tó mũ ājag mÿ, hã kÿ sóg ke mũ kurã tÿ ěgno ki, sÿ vĕnh kar jykre tugnÿm ke kurã ěn ki sóg ājag vĩ tugnÿm ke mũ. Kÿ ājag tÿ ón kÿ vĩ ja nĩn kÿ sóg ěn venh ke mũ gé. Ājag tÿ nén tó ja kar tugnÿm jé sóg ke mũ, ha vemnĩ," he tóg, Jesus ti.

³⁷ "Ājag tÿ vĩ há han ja nĩn kÿ ājag tóg inh mÿ há nÿtĩ gé. Ājag tÿ vĩ kórég han ja nĩn kÿ ājag tóg inh mÿ kórég nÿtĩ. Kÿ ā kato tĕ mũ ag mÿ Topĕ jykre tón hã vĕ.

*Ag tÿ milagre ve sór
(Mc 8.11-12; Lc 11.29-32)*

³⁸ Kÿ Topĕ vĩ to professor ù ag tóg Fariseu ù ag mré Jesus mÿ: "Senhor," he mũ. "Ēg tÿ ā tÿ milagre han venh há tóg tĩ," he ag tóg mũ, Jesus mÿ.

³⁹ Kÿ Jesus tóg ag mÿ: "kórég ājag nÿtĩ," he mũ. "Topĕ ki ge sór vãnh ājag tóg nÿtĩ," he tóg. "Ājag tÿ milagre ve sór mũ tag venh ke tũ ājag tóg tóg nĩ. Nén pir hã ve jé ājag tóg

ke mũ, hã vÿ: Jonas tÿ nén ve ja ěn ri ke, he mũ, vãsÿ Topĕ vĩ tó tĩ ěn tÿ nén ve ja ěn ri ke.

⁴⁰ Jonas ěn vÿ goj tãn nug kãkã nĩ ja nĩ, kurã tãgtũ ki, kuty tãgtũ ki ke gé. Tag ri ke ve jé sóg ke mũ gé. Ga krĕm sóg nÿnh mũ, kurã tãgtũ ki, kuty tãgtũ ki ke gé. Tÿ sóg ěprã ke fi kósin nĩ," he tóg, Jesus ti.

⁴¹ "Kÿ Nínive tá ke ag vÿ ājag kato vĩnh ke mũ sir, kurã tÿ ěgno ki, ha vemnĩ. Ag tÿ Jonas vĩ mĕ kÿ ag tóg ājag jykre kórég tovãnh, Nínive tá ke ag. Tÿ sóg Jonas kãfór nĩ, hã ra ājag tóg ājag jykre kórég tovãnh sór tũ nĩ, sÿ Nínive tá ke ag jãvo ājag mÿ tó mũ ra. Hã kÿ ag tóg ājag jykre kórég tónh ke mũ, kurã ěn kã, ha vemnĩ.

⁴² Kÿ pã'i mág ěn fi, pã'i tÿ rainha ěn fi, ù tÿ kanhkã fyn ja tá kãtig ja ěn fi vÿ nĩnh ke mũ gé, kurã tÿ ěgno kã. Ājag mré fi tóg jĕnh ke mũ, kÿ fi tóg ājag to vĩ kónãn ke mũ gé. Kanhkã fyn ja tá fi tóg kãtig ja nĩ, vãsÿ, fi tÿ Salomão vĩ mĕ jé. Salomão kãfór vÿ tÿ inh nĩ, hã ra ājag tóg inh vĩ jĕmĕ jãvãnh nÿtĩ," he tóg, Jesus ti.

*Vĕnh jagrĕ kórég jykre
(Mc 11.24-26)*

⁴³ "Kejĕn sóg vĕnh jagrĕ kórég ù kutĕm mũ. Kÿ sóg ga kórég mĩ tĩ mũ, ti jagrĕ ěn ti. Goj venh ke tũ tóg nĩ tá. Vĕnhkán ke tũ tóg nĩ gé, ti tÿ hĕ ri ken kÿ vĕnhkán ke tũ tĩn kÿ.

⁴⁴ Kÿ tóg vãhã to jykrén mũ sir. "Inh hÿn ěn ra tĩg mãn ha,

sỹ ù tá kãkutẽ ja ên ra. Inh mỹ tóg tỹ ìn ri ke ja nĩ. Kỹ inh hỹn tóg ti kãra rã mãn ha,” he tóg mũ sir, ti jagrẽ ja ên ti. Kỹ tóg ti venh tĩ mũ sir. Hã ra tóg sir krĩ há nĩ, kỹ tóg ti mỹ ìn há ri ke nĩ sir, in prur, ìn kuprã, ìn sĩnvĩ ri ke.

⁴⁵ Kỹ tóg Nén-Kórég tỹ 7 (ke) ag mỹ tónh tĩ mũ sir. “Ha kãmũ jêg he tóg mũ sir. Hã ra ag jykre pãno tóg ti jykre pãno kãfór nĩ. Kỹ ag kar tóg ù ên kãge mũ, tỹ ag ti jagrẽ nỹtĩ, isỹ ùn mỹ ti jagrẽ pir kutẽm ja ên ti. Hã kỹ to, kórég tãvĩ nĩ sir. Ti jagrẽ pir kutẽm inh nĩ vễ, hã ra tỹ 8 (ke) ag tóg sir tỹ ti jagrẽ nỹtĩ, ti tỹ inh ki rã tũ nĩn kỹ. Ajag mỹ tóg ge nĩnh mũ, kurã tỹ êgno ki. Ủri ajag jykre vỹ pãno nỹ. Hã ra kurã ên ki tóg sir pãno kãfór nỹnh mũ. Kỹ ajag tóg sir to jagtar tãvĩ nỹtĩnh mũ,” he tóg, Jesus ti.

*Jesus mré ke pẽ fag
(Mc 3.31-35; Lc 8.19-21)*

⁴⁶ Ti tỹ ver tỹ vēmén kỹ ti mỹnh fi tóg tá jun mũ sir, ti jãvy ag mré. Ti mỹ fag tóg vễnh vỹ jẽnẽg mũ, fag tỹ ti mré vēmén jé.

⁴⁷ Kỹ ù tóg ti mỹ tónh kãtĩ mũ. “Ã mỹnh fi vỹ re tá jẽ, ã jãvy ag mré. Fag tỹ ã mré vēmén ke nẽji,” he tóg, Jesus mỹ.

⁴⁸ Kỹ tóg ù tỹ ti mỹ tó mũ ên mỹ: “inh mỹnh fi mỹ inh ve sór mũ', inh jãvy ag mré?” he mũ. “Inh mỹnh pẽ fi pijé', inh jãvy pẽ ag pijé',” he tóg.

⁴⁹ Kỹ tóg ti mỹ ã mré mũ tĩ ag ven mũ sir, ã nĩgẽ tỹ. Kỹ tóg

ti mỹ: “inh mỹnh pẽ fi hã vễ, inh jãvy pẽ ag hã vễ,” he mũ, ã mré mũ tĩ ag to.

⁵⁰ “Ủ tỹ inh panh tỹ kanhkã tá nĩ ên vỹ ki króm mũ vỹ tỹ inh jãvy pẽ ag nỹtĩnh mũ, inh ve pẽ fag ke ge, inh mỹnh pẽ fi ke gé,” he tóg, Jesus ti.

13

*Nén fy to comparação
(Mc 4.1-9; Lc 8.4-8)*

¹ Kurã ên kã Jesus tóg ìn tá kãkutẽ mũ, kỹ tóg goj nig ra tĩ mũ. Tá tóg nĩ nĩ sir.

² Kỹ ù tỹ hẽn ri ke ag vỹ tá vễnh mãn mũ sir, ti rã hã, kỹ tóg canoa kãkã nĩ mũ sir, jo ùn e ên ag tóg nig fyr tá nỹtĩ.

³ Kỹ tóg ag kanhrãn mũ sir. Ag mỹ tóg comparación tỹ hẽn ri ke hyn han mũ. Kỹ tóg ag mỹ: “ủ tỹ Topẽ vỹ tó mũ vỹ ge nỹtĩnh mũ, ha mẽ,” he mũ. “Kejẽn ù tóg nén ù fy vãvãm tĩ mũ,” he tóg.

⁴ “Ti tỹ vãvãm kỹ ti fy ù tóg ãpry kri, ãmĩn kri kutẽ mũ, kỹ sêsĩ tóg ti ko mũ sir.

⁵ Ti fy ù tóg pãró kri kutẽ mũ, ga e tũ ki. Kỹ tóg kãnhmar mur mũ vễ, ga sĩ ên ki.

⁶ Hã ra rã tóg ã tỹ êg nĩno kã sa kỹ (tóg) ti pũn mũ. Ti jãre han tũ nĩn kỹ tóg tóg mũ.

⁷ Ti fy ù tóg sỏnh kãki kutẽ mũ, kỹ sỏnh tóg ti mré mur mũ, kỹ tóg ti kri rũm mũ. Kỹ tóg tũ' he mũ sir.

⁸ Ti fy ù tóg ga há kri kutẽ mũ, kỹ tóg mur há han mũ, mog há han tóg mũ, kanẽ há han tóg mũ gé. Ủ tóg kanẽ tỹ 100 (ke) han, jo ù vỹ tóg kanẽ

tỹ 60 (ke) han, jo ù vỹ tóg kaně tỹ 30 (ke) han.

⁹ Ûn nĩgrěg nỹtĩ tỹ tỹ jěmě je,” he tóg, Jesus ti.

*Êg tỹ comparação to věnh kanhrăn ke
(Mc 4.10-12; Lc 8.9-10)*

¹⁰ Kỹ ti mré mũ tĩ ag tóg ti to kãmũ mũ, kỹ ag tóg ti mỹ: “ã tỹ ne tó ně?” he mũ.

¹¹ Kỹ Jesus tóg ag mỹ: “ãjag hã ne ù tỹ kanhkã tá nĩ ên tỹ tỹ ěg pã'i nĩ ên ki kanhró nỹtĩnh mũ,” he mũ, “ũ tỹ inh jo nén tó ja tũ ên ti,” he tóg mũ. “Hã ra ùn e ên ag vỹ ki kanhrăn kãn ke tũ nĩ,” he tóg.

¹² “Hã kỹ tóg ge nĩ. Û tỹ nén to jykrén há han kỹ tóg ù to jykrén mãn', ù to jykrén mãn' he mũ. Koměr hã tóg to jykrén kãn ke mũ. Û tỹ nén to jykrén tũ nĩn kỹ tóg ti mỹ tũ' he mũ, ti tỹ to jykrén sĩ han kỹ.

¹³ Hã kỹ sóg ùn e ên ag mỹ comparação han mũ, ag tỹ mē há han sór tũ nỹtĩn kỹ. Kỹ ag tóg ón kỹ mēg mũ ra ki kagtĩg nỹtĩ, to jykrén tũ ag nỹtĩ sir.

¹⁴ Hã ra tóg rán kỹ nĩ gé. Isaías tỹ vãsỹ Topě vĩ tó kỹ tóg tag tó ja nĩ, ha mē. “Mē jé ãjag tóg ke mũ ón kỹ, hã ra ãjag tóg to jykrén tũ nĩnh mũ, kỹ ãjag tóg ki kagtĩg nỹtĩnh mũ.

¹⁵ Povo tag ag vỹ krĩ tũ nỹtĩ, nĩgrěg kutu ag tóg nỹtĩ gé, kaně kyvó ag tóg nỹtĩ gé, ag tỹ nén ù ve sór tũ nỹtĩn kỹ, ag tỹ jěmě sór tũ nỹtĩn kỹ, ag tỹ to jykrén sór tũ nỹtĩn kỹ ke gé. Hã kỹ ag tóg inh ki ge sór tũ nỹtĩ gé, kỹ sóg ag tỹ há' henh

ke tũ nĩ gé,” he ja tóg nĩ, Isaías ti, povo tag to,” he tóg, Jesus ti.

¹⁶ “Ag jãvo ãjag hã vỹ nĩgrěg há nỹtĩ, hã kỹ ãjag tóg ag jãvo jěmě há han mũ.

¹⁷ Ha mē, ù tỹ hěn ri ke ag vỹ inh ve sór e ja nĩgtĩ, vãsỹ, ãjag tỹ ùri vég mũ tag ti. Hã ra ag tóg inh kãtĩg ke jo kãgter. Topě vĩ tó tĩ ag vē. Jykre kuryj ag nỹtĩ ja nĩ, hã kỹ ag tóg ãjag tỹ nén vég mũ tag ve sór e ja nĩgtĩ. Hã ra ag tóg ve ja tũ nĩgtĩ, mē ja tũ ag nĩgtĩ, ãjag tỹ ùri nén mēg mũ ti. Ag tỹ vég tũ ra ag tóg kãgter. ãjag hã ne mēg mũ', inhhã',” he tóg, Jesus ti. Ti mré mũ tĩ ag mỹ tóg ke mũ.

*Jesus tỹ nén fy to comparación kãmén
(Mc 4.13-20; Lc 8.11-15)*

¹⁸ “Kỹ sóg ãjag mỹ kãmén mũ, nén fy kaně tag ti, ha mē.

¹⁹ Û tóg kejěn ón kỹ Topě vĩ mēg mũ, ti tỹ tỹ ěg pã'i nĩ ti. Hã ra tóg to jykrén tũ nĩ, ã tỹ ón kỹ mên kỹ. Kỹ Nén-Kórég vỹ ti mỹ tỹ tũ' he mũ sir, ti tỹ mē ja ti tỹ. Kã jatu tóg nĩ sir. Êpyr kri, ěmĩn kri kutě mũ ên hã vē.

²⁰ Kỹ ti fy ù tóg pãró kri kutě mũ. Û vē gé. Topě vĩ mēg tóg mũ gé. Kỹ tóg kãnhmar: “hej,” he mũ sir. Ti mỹ tóg sér ti.

²¹ Hã ra tóg tỹ nén kré jãre tũ ri ke nĩ mỹr. Kỹ tóg tĩg sĩ han mũ, Topě mré. Nén ù jagy kutě kỹ tóg Topě tovãnh mũ sir, ù tỹ Topě vĩ tigrĩn ti kato tē kỹ. Kãnhmar tóg tovãnh mũ.

²² Ti fy ù tóg sónh kãki kutě mũ. Û vē gé. Topě vĩ mēg tóg mũ gé. Hã ra tóg ã rãnhřã hã

mĩ êkrég mũ sir. Nén kar to én tóg mũ sir, ón kỹ rico nĩ sór jé. Hã kỹ Topê vĩ tóg ti mỹ katy tĩ sir. Kỹ tóg han tũ nĩ sir, kanê ti.

²³ Ti fy ù tóg ga há kri kutê mũ. Û vê gé. Topê vĩ mễg tóg mũ gé. Mễ kỹ tóg to jykren mũ sir. Kỹ tóg kanê han mũ sir. Kỹ ù vĩ tóg kanê tỹ 100 (ke) han, jo ù vĩ tóg kanê tỹ 60 (ke) han, jo ù vĩ tóg kanê tỹ 30 (ke) han," he tóg, Jesus ti.

Vãnh to comparação

²⁴ Kỹ tóg comparação ù han kỹ: "Nén-Kórég tỹ inh rãnrhãj kókén sór mũ vĩ ge nỹnh mũ, ha mẽ," he mũ. Kỹ tóg: "ù tỹ kanhkã tá nĩ ên tỹ tỹ êg pã'i nĩ vĩ ge nĩ, ha mẽ," he mũ. "Kejên ù tóg nén fy vãvãm mũ, ti japỹ tá, tỹ ti jakré nỹ jé.

²⁵ Kỹ tóg nũr tĩ mũ, ti camarada ag ke gé. Kỹ ti kato tẽ mũ ên tóg kutyg kỹ ra tĩ mũ, ti japỹ ên ra, kỹ tóg vãnh fy vãvãm mũ, trigo fy ên kãmĩ. Kỹ tóg tĩ mũ sir, vãnh fy ên vãvãm kar kỹ.

²⁶ Kỹ trigo tóg mur mũ, mog tóg mũ, kanê han tóg mũ sir. Hã ra vãnh tóg ti mré mur mũ gé.

²⁷ Kỹ ti camarada ag tóg ãjag patrão mỹ tónh mũ mũ. "Trigo fy vãvãm êg tóg mũ vễ, hã ra vãnh tóg ti mré mur mũ. Ne nê hỹn?" he ag tóg ti mỹ.

²⁸ Kỹ tóg ag mỹ: "êg kato tẽ mũ ên rãnrhãj hã vễ," he mũ. "Ên hã ne isũ kókég'," he tóg. Kỹ ag tóg ti mỹ: "kỹ êg mỹ vãnh ên kunũnh ke tũ nĩ?" he mũ.

²⁹ Kỹ tóg ag mỹ: "hỹ," he mũ. "Ãjag tỹ vãnh ù kunũnh kỹ tóg ãjag tỹ ti pẽn ù kunũnh ha mẽ tĩ, vãnh mré. Kỹ kunũnh tũg nĩ.

³⁰ Vãnh hỹn tóg trigo mré mog mũ gé. Kỹ êg tỹ kre kỹ sóg ù tỹ krég mũ mỹ tónh ke mũ. "Vãnh kre vén nĩ," he jé sóg ke mũ. "Ti kre kar kỹ ti tógfĩ, êg tỹ ti pũn jé. Kar kỹ ãjag tóg trigo krenh ke mũ, sỹ pãjó krêm vin han jé," he jé sóg ke mũ," he tóg, ag patrão ti," he tóg, Jesus ti. Ti tỹ ù tỹ ón kỹ Topê ki ge kỹ nỹtĩ ên ag tó jan hã vễ.

Mostarda fy to comparação

(Mc 4.30-32; Lc 13.18-19)

³¹ Kỹ tóg ag mỹ nén ù tó mũ gé sir. "Û tỹ kanhkã tá nĩ tỹ tỹ êg pã'i nĩ vĩ ge nĩnh mũ, ha mẽ," he tóg. "Ka tỹ mostarda fy ri ke tóg nĩ. Ti krãn êg tóg tĩ, êg japỹ ki, ka tỹ mostarda fy ti.

³² Kãsir ti nỹtĩ, ti fy ti. Û fy vĩ ti sĩ ri ke tũ nĩ. Ti krãn kar kỹ tóg mog mũ. Kỹ tóg êgóho ag kãfór nĩ. Pê mág ti nỹtĩ, hã kỹ sêsĩ ag vĩ kri krêg tĩ, ti pẽ kri," he tóg, Jesus ti. Ti tỹ êg tỹ ti vĩ tó vén kar kỹ vẽn kar kri rũm ke mũ kãmén hã vễ.

Fermento to comparação

(Lc 13.20-21)

³³ Kỹ tóg ag mỹ comparación ù tó mũ gé sir, kỹ tóg: "Topê tỹ tỹ êg pã'i nĩ vĩ tag ri ke nĩnh mũ, ha mẽ," he mũ. "Ûn tỹtá fag tóg pão han tĩ. Pão han jé fag tóg pão jêgia jafã tỹ fermento ên tỹ farĩnh mré jêgĩag tĩ. Fermento sĩ ên tỹ pão

kar ãn tóg sn ke kn ti,” he tg, Jesus ti. Ti v t vnh kar kri rm ke kmn h v.

Jesus t comparao t ãg kanhrn
(Mc 4.33-34)

³⁴ Comparao t ge han tg ti, Jesus ti, vnh kar m. “Top t t ãg pi nnh ke m v ge nnh m,” he tvi han tg ti ag m.

³⁵ H ra tg rn k n g, Jesus t comparao han ke m ti. Vs Top v t ti ã tg Jesus kmn k tag t ja n ti to, ha m. “Comparao han j sg ke m. Inh jo t ja t ãn t j sg ke m. Û v tag m ja t n ver, s tnh ke m tag,” he ja tg n, Top v t ti ãn, Jesus to. H ra tg h t ti, Jesus ti.

Jesus t vnh to comparao kmn

³⁶ Ag m kmn kn kar Jesus tg vnh e ãn r k ãn kra r m. K ti mr m ti ag tg ti to km m, ti ki jm j. “g m ã t ag m kmn ja ãn ti t mn n, ã t ag m trigo mr vnh t ja ãn ti. g t ver to jykrn t tg ti,” he ag tg m, Jesus m.

³⁷ K tg ag m kmn m. “pr ke fi ksin v trigo fy vvm m. Inh h v,” he tg m.

³⁸ “Ga h to sg: p, he m. K trigo ãn v Top kr ag ri ke nti, k vnh v Nn-Krg kr ag ri ke nti.

³⁹ Û t ag han m v t Japo ti n, Nn-Krg ãn kr ag. Ti colher ke kur h v: kur t

gno, he m. Û t trigo colher ke m ag v t Top t jgn jaf ag nti.

⁴⁰ Kur t ãgno ki ag tg ãg t vnh pn ãn ri ke han ke m, Japo t ag t.

⁴¹ pr ke fi ksin ãn, inh h v is jgn jaf ãn ag jgnnh ke m sir, k ag tg ã t vnh jykre pno han m kar ag gnh kn ke m, ã t ã ag m: “ha jatun m Top v mranh,” he m kar ag ke g.

⁴² Ag gnh k ag tg p gru mg ãn ki ag vm ke m sir. T ag tg vsrnh tvi han t. jag j t ag tg gyngyn henh ke m, gangan ke j ag tg ke m, j k, vsrnh k ke g.

⁴³ K ãn jykre kuryj ag v h p ntnh m, snvi, kkov, r gru ri ke, ag t jag jg t ntnh ken k sir, ag t ã t kanhk t n ãn t t ãg pi n ven k. Ûn ngrg nti t t jm j,” he tg, Jesus ti.

p ki jnkamy to comparao

⁴⁴ “K ãg t ã t kanhk t t ãg pi n venh ke v tag ri ke n g, ha m. Û t ã patro jap t jnkamy ne kunnh k pju mn k nm ri ke tg n. Ti pju mn k tg ã t nn kar fn kn m sir, ti kaja to p ãn vyn j sir. p ãn vyn kar k jnkamy ãn v t ti t n sir,” he tg, Jesus ti. Ti t ãg m ãg t ti ki r sr k ãg t fn kn tn h v.

Prola to comparao

⁴⁵ “g t ã t kanhk t ãn ãn t t ãg pi n venh ke v tag ri ke n g, ha m,” he

tóg mũ gé. “Negociante ù tóg jãnka han jafã tỹ negociar he tĩ, pérola tỹ. Hã kỹ tóg ùn há kuprêg tĩgtĩ.

⁴⁶ Kejên tóg ùn há pẽ ù vég mũ sir, ùn kaja e. Kỹ tóg ã tũ vãm kãn mũ sir, ã tỹ ùn sĩnvĩ pẽ ên kajãm jé, ti tỹ tỹ tũ nĩ jé,” he tóg, Jesus ti. Ti tỹ êg mũ êg tỹ ti ki rã sór kỹ êg tũ vãm kãn tó mãn hã vê gé.

Rede to comparação

⁴⁷ “Êg tỹ ù tỹ kanhkã tá nĩ ên tỹ tỹ êg pã'i nĩ venh ke to comparação vê gé, ha mẽ,” he tóg mũ gé. “Rede ri ke tóg nĩ, êg tỹ tỹ pirã kugmĩ jafã ên. Ti fig êg tóg tĩ, goj kãkã, êg tỹ pirã kugmĩ jé, kãkofár ke gé.

⁴⁸ Ki ti fón kar kỹ êg tóg nỹgnỹn mũ sir, goj ki êg tóg pirã mré kãkofár gég tĩ. Génh kỹ êg tóg ùn mág ag hã kuprêg tĩ, ma mũ jé. Ùn kãsir ên togvãnh êg tóg tĩ.

⁴⁹ Ge ti nĩgtĩ, kurã tỹ êgno ki. Topẽ tỹ jêgnê jafã ag tóg ùn jykre kuryj ag kuprêg ke mũ, Topẽ mũ.

⁵⁰ Ùn jykre pãno ag vãvãm jé ag tóg ke mũ, pĩ gru mág ên ki. Tá ag vêsỹrénh vê sir. Ájag jã tỹ ag tóg gyngyn henh ke mũ, tỹ ag gangan kej ke mũ, jũ kỹ, vêsỹrénh kỹ,” he tóg, Jesus ti. Ti tỹ ag mũ êg tỹ ti ki rã sór jé kãmén hã vê.

Êg panh to comparação

⁵¹ Kỹ tóg ã mré mũ tĩ ag mũ: “ãjag mũ tag to jykren kãn mũ, sỹ ãjag mũ nén kãmén mũ tag tĩ?” he mũ. Kỹ ag tóg ti mũ: “hỹ,” he mũ sir.

⁵² Kỹ tóg ag mũ: “kỹ tóg há tĩ,” he mũ. “Û tỹ Topẽ vĩ to professor ên, ti tỹ kanhkã tá nĩ ên jykre ki rãn kỹ tóg ge nĩ, ha mẽ,” he tóg. “Êg panh ri ke tóg nĩ, ti tỹ tỹ nén ù mág nĩn kỹ. Êg panh tóg kejên êg mũ ã tỹ nén sĩnvĩ ven tĩ, ti tỹ ùri mág mũ ti, ti tỹ vãsỹ mãn ja ên ke gé,” he tóg, Jesus ti. Ti tỹ êg mũ êg tỹ Topẽ vĩ ki kanhrãn ke tó vê. Êg tỹ to estudo han kỹ êg tóg vãsỹ rán kỹ nĩ ên tónh ke mũ, kỹ êg tóg ù tỹ ùri tó mũ tag tónh ke mũ gé. Jesus tỹ tag to êg mũ comparação han hã vê.

Jesus tỹ Nazaré ra vỹn ke (Mc 6.1-6; Lc 4.16-30)

⁵³ Ag mũ kãmén kãn kar kỹ tóg tá kãkutê mũ sir.

⁵⁴ Kỹ tóg ã jamã ra tĩ mũ sir. Tá jun kỹ tóg êg vênh kanhrãn jafã ki ag kanhrãn mũ. Kỹ tóg ag mũ e tĩ, ti vĩ ti. Kỹ ag tóg ti to vĩ kónãn mũ. “Hên tán hỹn ki kanhrãn, vênh jykre tag ki? Û nỹ hỹn ti kanhrãn, ti tỹ nén han vãn tag hyn han jé?” he ag tóg ti to.

⁵⁵ “Ìn han tĩ ên kósin vê mũr,” he ag tóg. “Ti mỹnh fi vỹ tỹ Maria fi nĩ, kỹ ti jãvy ag vỹ ki nỹtĩ, Tiago, José, Simão, Judas.

⁵⁶ Kỹ ti ve fag vỹ tag ki nỹtĩ gé, êg mré. Ti tỹ ne jé êg kãfór nĩ sór nê hỹn?” he ag tóg mũ sir, Jesus to.

⁵⁷ Kỹ tóg ag mũ tỹ ù nỹ. Kỹ Jesus tóg ag mũ: “êmã ù tá ke ag tóg Topẽ vĩ tó tĩ to é he tũ nĩgtĩ mũr,” he mũ. “Ti jamã tá ke ag tóg ti to é he tĩ jãvo, ti

mré ke ag, ti kanhkã ag,” he tóg.

⁵⁸ Kÿ tóg tá milagre e hyn han tũ nĩ. Ûn kaga nÿtĩ pir ag tÿ há' he tóg, ùn e tÿ há' he tũ ti nĩ, ag tÿ ti ki ge jãvãnh nÿtĩn kÿ.

14

João Batista ter

(Mc 6.14-29; Lc 9.7-9)

¹ Kÿ kejën pã'i mág tÿ governador tÿ Herodes vÿ mēg mũ, Jesus kãme ti.

² Kÿ tóg ã camarada ag mÿ: “João Batista vë hÿn, ãjag tÿ inh mÿ ù tó mũ ti,” he mũ. “Ti hÿn tóg rĩr mãn, sÿ ti tén kar kÿ, hã kÿ tóg milagre tÿ hēn ri ke hyn han tũgtĩ,” he tóg, Herodes ti, ã camarada ag mÿ, Jesus to.

³ Herodes vÿ João se ja nĩ, vëse ja kãki tóg ti fón ja nĩ, Herodias fi tugnĩn. Ti jãvy tÿ Filipe prũ fi ja vë, hã ra tóg fi kunũnh kÿ fi tÿ prũg mũ, Herodes ti. Kÿ João tóg ti mÿ.

⁴ “ã hã ne tóg ã mrë ke prũ fi tÿ prũg mũ,” he ja nĩ. “Fi ki ã tóg Topë vĩ mranh mũ,” he tóg, João ti, Herodes mÿ.

⁵ Kÿ Herodes tóg ti tén sór mũ, hã ra tóg vënh kar kamēg mũ. Vënh kar tóg João to: “Topë vĩ tó tĩ ù vë,” he tĩ. Kÿ Herodes vÿ ag kamēg mũ.

⁶ Hã ra tóg kejën Herodes mur ja kurã tá krÿg mũ. Kÿ festa ên kã Herodias fi kósín fi vÿ ag jo vënh grén mũ sir, ti mré jēg mũ ag jo. Kÿ tóg Herodes mÿ sĩnvĩ tĩ.

⁷ Kÿ tóg fi mÿ: “ã tÿ nén to vĩ kar nĩm jé sóg ke mũ ã mÿ, sÿ ke há vë,” he mũ, Herodes ti.

⁸ Kÿ fi tóg ã mÿnh fi mÿ ke mũ. Kÿ fi mÿnh fi tóg fi krĩn mũ, fi tÿ João krĩ to vĩ jé. Kÿ fi tóg to vĩ mũ sir. “Inh mÿ ùri João Batista krĩ tÿ pénky kãkã nĩm,” he fi tóg mũ, Herodes mÿ.

⁹ Kÿ tóg ti mÿ e tĩ sir, ti tÿ ti tén jé. Hã ra tóg fi mÿ: “sÿ ke há vë,” he ja nĩ, kÿ ti mré jēg mũ ag vÿ mē kãn ja nĩ. Kÿ tóg fi mÿ: “hej,” he mũ sir.

¹⁰ Kÿ tóg soldado jēnēg mũ sir, ti tÿ João krĩ kym jé. Hã ra João tóg vëse ja kãkã nĩ nĩ.

¹¹ Kÿ tóg ti krĩ kym mũ sir. Pénky kãkã nĩm kÿ tóg fi mÿ nĩm mũ, tátãg fi mÿ, ti krĩ ti. Kÿ fi tóg fi mÿnh fi mÿ ma tĩ mũ.

¹² Kÿ ti mré mũ tĩ ag tóg mē kÿ ti vyn kãmũ mũ, vënh kej tá ti fón jé. Ti fón kar kÿ ag tóg Jesus mÿ tónh kãmũ mũ.

Jesus tÿ ùn e jën

(Mc 6.30-44; Lc 9.10-17; Jo 6.1-14)

¹³ Jesus tÿ João ter mē kÿ tóg tá kãkutē mũ, canoa kãmĩ. Kÿ tóg êmã tũg ja ra tĩ mũ sir, ã pir mÿ nĩ jé. Hã ra vënh e ên tóg ti tũg mēg mũ. Kÿ ag tóg ti nón mũ mũ, ãjag pën kã, êmã kar tá kãmũ kÿ.

¹⁴ Kÿ Jesus tóg kafã ù tá vag ke mũ, kÿ tóg tá ùn e ên ag vég mũ sir, ti nón kãmũ mũ ag. Kÿ ag tóg ti mÿ jagãgtar nÿtĩ. Ag jagãgtãn kÿ tóg ùn kagyga ag tÿ há' he mũ sir.

¹⁵ Ti tÿ ùn e tÿ hághá' hen kÿ tóg rãké nÿ sir, ti tÿ ag

kanhrân ki. Kÿ ti mré mũ tĩ ag tóg ti mÿ tó jé kãmũ mũ. “Rãké ti nÿ ha,” he ag tóg mũ, ti mÿ. “Tag mũ tóg êmã tũ tĩ. Kÿ tóg ã tÿ ag jêgnênh há tĩ, ag tÿ êmã ù ra mũ jé, vễjên comrar he jé,” he ag tóg mũ, Jesus mÿ.

16 Hã ra Jesus tóg ag mÿ: “ha inhã ag jên, kÿ ag tóg hê ra mũnh ke tũ nĩ.” he mũ.

17 Kÿ ag tóg ti mÿ: “hã ra tóg tũ tĩ, vễjên tĩ,” he mũ. “Pão tÿ 5 (ke) vÿ ki nÿtĩ, pirã régre ke gé,” he ag tóg.

18 Kÿ tóg ag mÿ: “inh mÿ ma kãmũ jêg ge,” he mũ.

19 Kÿ tóg ùn e ên ag mÿ tó mũ, ag tÿ re tá nĩgnĩ kÿ nÿtĩ jé. Kÿ tóg pão tÿ 5 (ke) ên mæg mũ, pirã régre ên ke gé. Kÿ tóg kanhkã ki êvãnh mũ sir, vễjên ên to tóg Topê mré vĩ mũ sir. Kÿ tóg pão kénh kÿ ã mré mũ tĩ ag mÿ vin mũ sir, ag tÿ vễnh ken jé sir, ùn e ên ag mÿ.

20 Kÿ vễnh kar tóg ko kãn kÿ funfór mũ sir. Hã ra tóg kén mũ. Kêj tÿ 12 (ke) fãn ag tóg mũ, ti ke tÿ.

21 Pão ko mũ ên ag tóg tÿ mil tÿ 5 (ke) nÿtĩ, ùn tÿtã mré tó tũ, fag krê mré tó tũ, hã ra fag tóg tá e nÿtĩ gé mÿr, ha mẽ.

*Jesus tÿ goj kri tĩg
(Mc 6.45-52; Jo 6.15-21)*

22 Kÿ tóg ã mré mũ tĩ ag mÿ tó mũ, ag tÿ canoa kãmĩ mũ jé, ag tÿ ti jo kafã ù ra mũ jé. “Isÿ ver ùn e tag ag mÿ: ha mũjêg, henh ke vễ,” he tóg ag mÿ.

23 Kÿ tóg ùn e ag mÿ: “ha mũjêg,” he mũ sir. Kÿ tóg pãnónh to tãpry mũ, Topê mré vĩ jé. ã pir mÿ tóg tá nĩ nĩ. Kÿ

tóg kutyg mũ sir. Hã ra Jesus tóg pãnónh tá nĩ nĩ.

24 Kÿ canoa tóg nig kãmĩ tĩ mũ sir, kafã ù ra. Nig fyr tóg kór gy nĩ sir, kuvar gy ti nĩ ha. Kÿ goj tóg krém krém ke sa nĩ, kÿ tóg ag kutãn kÿ nĩ nĩ, goj ti. Kãka vÿ ag kato tễ mũ, hã kÿ ag tóg mũ kónãn mũ.

25 Kÿ kurã ke ra Jesus tóg ag to kãtĩ mũ, goj kri tĩg kÿ, ã pên kã.

26 Kÿ ti mré mũ tĩ ag tóg ti vэг mũ, ti tÿ goj kri tĩg kÿ, kÿ ag fe tóg jÿrũn ke mũ. “Vễnh kuprĩg vễ,” he ag tóg mũ. Kamêg kÿ ag tóg vễkrênkrêr mũ sir.

27 Hã ra Jesus tóg ag mré vêmén mũ sir. “Kamêg tũg nĩ, inh hã vễ,” he tóg. “Jÿrũn ke tũg nĩ,” he tóg.

28 Kÿ Pedro tóg ti mÿ: “ã hã mÿ?” he mũ. “Kÿ inh mÿ tó, isÿ ã to tĩg jé, goj kri tĩg kÿ,” he tóg, Pedro ti, Jesus mÿ.

29 Kÿ Jesus tóg ti mÿ: “kunĩg ge,” he mũ. Kÿ Pedro tóg canoa ki kutê kÿ goj kri tĩ mũ sir, Jesus to.

30 Goj kri tĩg kÿ tóg vãhã kãka ki êvãnh mũ, kÿ tóg kamêg mũ sir. Kamêg kÿ tóg goj ki pun ke mũ. Kÿ tóg prêr mũ. “Senhor, inh kren han nĩ,” he tóg mũ, prêr kÿ.

31 Kÿ Jesus tóg vễsÿmêr ti kãgmĩg mũ. Kÿ tóg ti mÿ: “inh ki rã há han tũ ã tóg nĩ, vÿ,” he mũ. “Ã hã ne tóg: inh mÿ tá jun mũ vÿ? he mũ, hã kÿ ã tóg ki pun ke kren mũ,” he tóg, Jesus ti, Pedro mÿ.

32 Kÿ ag tóg canoa kãki ge mũ sir. Ag tÿ ki ge kÿ kãka tóg

tũ' he mũ, kóho ěn.

³³ Kĩ tóg ag mĩ há tĩ, canoa kãki nĩtĩ ag mĩ. Kĩ ag tóg Jesus ki ge há han kĩ ti mĩ vĩ há han mũ sir. “Topẽ kósin vĩ tỹ ã nĩ, mĩr,” he ag tóg mũ sir ti mĩ.

*Jesus tỹ Genesaré tá jun
(Mc 6.53-56)*

³⁴ Kĩ ag tóg kafã ũ tá junjun kĩ (ag tóg) vag ke mũ sir, ěmã tỹ Genesaré tá.

³⁵ Tá ke ag tóg ãjag tỹ Jesus ve kĩ ti ki kanhrãn mũ. Kĩ ag tóg ti to vĕnh vĩ jĕnĕg mũ sir, vĕnh kar mĩ, ga kar ěn mũ hã. Kĩ ag tóg ũn kagyga ag tatĩ kãmũ mũ, Jesus to.

³⁶ Kĩ ag tóg Jesus mĩ to vĩ mũ, ag tỹ hĕn ri ke mũn ti kur mráj mĕ jé. Kĩ ag tóg há' há' he kãn mũ sir, ag tỹ ti kur mĕn kỹ.

15

*Judeu ag jykre si
(Mc 7.1-13)*

¹ Kĩ kejĕn Fariseu ũ ag tóg Jerusálĕm tá junjun mũ, Jesus tá, Topẽ vĩ to professor ag mré hã. Jesus mĩ ag tóg vĩ mũ.

² “Ă mré mũ tĩ ag ne tóg ěg jykre si mranh tĩ,” he ag tóg. “Ěg jykre si ki ěg tóg nĩgpég tĩ, ěg jĕn ke jo, hã ra ag tóg nĩgpég tũ ra jĕg tĩ,” he ag tóg.

³ Kĩ Jesus tóg ag mĩ: “ãjag hã vĩ Topẽ vĩ mranh tĩ, ãjag tỹ ãjag jykre si han kỹ,” he mũ.

⁴ “Topẽ tỹ ěg mĩ tón hã vĕ, ha mĕ: “ã mĩnh fi mré ã panh kamĕg nĩ, fag jagãgtãn nĩ,” he ja tóg nĩ. Kĩ tóg tag tóg gé, ha mĕ: “ũ tỹ ã han mũ fag mĩ

vĩ kónãn mũ ěn tén jé ã tóg ke mũ,” he ja tóg nĩ gé, Topẽ ti.

⁵ Ti jãvo ãjag tóg tag tóg tĩ, ha mĕ: “ã panh mĩ nĕn ũ nĩm tũg nĩ, ã mĩnh fi mĩ nĕn ũ nĩm tũg nĩ, ã tỹ fag mĩ: “sỹ ãjag mĩ nĕn ũ nĩm ke vĕ vĕ, hã ra sóg Topẽ mĩ nĩm sór mũ,” hen kỹ. Ũ tỹ tag han kỹ tóg há tĩ,” he ãjag tóg tĩ.

⁶ Hã kỹ ãjag tóg Topẽ vĩ tỹ tũ' he tĩ, ãjag tỹ ãjag jykre si hã han kỹ,” he tóg, Jesus ti.

⁷ “Krĩ régre ãjag nĩtĩ, ha mĕ. Hã kỹ Isaías vĩ ãjag to vĩ ja nĩgtĩ, ti tỹ tag tóg ký, ha mĕ.

⁸ “Povo tag vĩ ãjag nũnĕ hã tỹ inh mĩ vĩ há han tĩ, hã ra ag jykre pi(jé) tỹ inh jykre nỹ’,” he ja tóg nĩ.

⁹ “Fagrĩnh mĩ ag tóg iso grĩnh ke tĩ, hã ra ag tóg ěprã ke ag jykre to: Topẽ tỹ tón hã vĕ, he tĩ,” he ja tóg nĩgtĩ, Isaías ti,” he tóg, Jesus ti. “Ki hã tóg ja tóg nĩ, ãjag to, ãjag krĩ régre nĩtĩn kỹ,” he tóg, Jesus ti.

*Ne tỹ ěg kavĕnh
(Mc 7.14-23)*

¹⁰ Kĩ tóg vĕnh kar jé prĕr mũ sir, ag tỹ ti rã hã nĩtĩ jé, ti vĩ jĕmĕ há han jé. Kĩ tóg ag mĩ: “ha mĕ, sỹ nĕn tóg mũ ti, kỹ to jykrĕn nĩ gé,” he mũ.

¹¹ “Ěg jĕn pi(jé) ěg kavĕnh tĩ,” he tóg. “Ěg jĕnky kã ra ěg tóg rãg tĩ, vĕjĕn ti. Nĕn ũ tỹ ěg ki kãpa hã vĩ ěg kavĕnh tĩ, ha mĕ,” he tóg.

¹² Kĩ ti mré mũ tĩ ag ti to kãmũ kỹ ti mĩ: “ha mĕ,” he mũ. “Fariseu ag vĩ ã to jũ nĩtĩ, ã tỹ ag mĩ: vĕjĕn pi(jé) ěg

kavénh tĩ', hen kÿ," he ag tóg ti mÿ.

13 Kÿ tóg ag mÿ: "Ëg jóg mág tÿ nén krân ja tũ vãm kÿ nĩ kãn ke vë, Ëg jóg tÿ kanhkã tá nĩ tÿ nén krân ja tũ ên ti," he mũ. "Ag pi(jé) tÿ Topê krê nÿtĩ', Fariseu ên ag, hã kÿ tóg ag vãm ke mũ," he tóg.

14 "Hã kÿ ag to jykrén tũg nĩ. Ûn kyvó ag mÿ ag tóg: "sÿ ã jãmĩ tũg ke vë," he tĩ, hã ra ag tóg ti kóm kyvó nÿtĩ gé, kÿ ùn kyvó tÿ ùn kyvó jãmĩ tũg kÿ ag tóg kãgnó ki vár ke mũ, ha vemnĩ," he tóg, Jesus ti. Ag tÿ nũgme ki vár to ken hã vë, hã vÿ: kãgnó ki vár ke mũ, he mũ.

15 Kÿ Pedro tóg ti mÿ: "Ëg mÿ kãmén há han nĩ, ã vĩ tag," he mũ.

16 Kÿ Jesus tóg ti mÿ: "kÿ ãjag mÿ ver ki kanhrân tũ nÿtĩ'?" he mũ.

17 "Mÿ ãjag tÿ to jykrén tũ tĩ'?" he tóg. "Ha vé, Ëg tÿ Ëg jën tÿ Ëg jënky kãra rãg kÿ tóg Ëg nug kãra rã mũ, kar Ëg tóg gón mũ sir.

18 Nén ù tÿ Ëg ki kãpa vÿ tÿ Ëg jykre nĩ, hã kÿ tóg Ëg kavénh tĩ.

19 Nén ù tÿ Ëg ki kãpa hã vë, ha mē: jykrén kónãn, ù tén, ã prũ tũ fi mré nÿ, ã mén tũ mré nÿ, ùn mén tũ fag to én, nén ù péju, ù to ón, ù to vĩ kónãn.

20 Nén ù tÿ Ëg ki kãpa hã vë, Ëg kavénh tũn hã vë. Ëg tÿ nĩgpég tũ ra jën kÿ ti pi(jé) Ëg kavénh tĩ'," he tóg, Jesus ti.

Canaã tá ke fi tÿ Jesus mré vēmén
(Mc 7.24-30)

21 Kÿ Jesus tóg tá kutē kÿ (tóg) ga ù ra tĩ mũ, cidade tÿ Tiro ra, cidade tÿ Sidom ra.

22 Ti tÿ tá jun kÿ ù fi tóg ti venh kãtĩ mũ. Ga tÿ Canaã tá ke fi vë. Kÿ fi tóg Jesus tá jun mũ, kÿ fi tóg prēr mũ. "¡..Senhor, Davi kósin..!" he fi tóg. "¡..Inh jagãgtãn ra..!" he fi tóg. "¡..Inh kósin fi vÿ jagrē kórég tâvĩ nĩ, ã tÿ inh mÿ ti kutēm há tóg te..!" he fi tóg, prēr kÿ.

23 Hã ra Jesus tóg fi mÿ vĩ tũ nĩ. Kÿ ti mré mũ tĩ ag tóg ti to kãmũ kÿ ti mÿ: "ã mÿ fi ve sór tũ nĩ, fi tÿ kar kÿ ã ãn ra tũg jé?" he mũ. "Ëg nón fi tóg Ëg jé prēr mũ, kÿ tóg Ëg mÿ e tĩ," he ag tóg, Jesus mÿ.

24 Hã ra tóg ag mÿ: "vó," he mũ. "Topê vÿ inh jënē, sÿ Israel ag tÿ há' he jé inhhã, ù tÿ Israel kãmĩ Topê vĩ mranh mũ ag tÿ," he tóg, Jesus ti. Hã ra fi tóg tÿ fóg nĩ, hã kÿ tóg fi ve sór tũ nĩ.

25 Kÿ fi tóg ti tá jun mũ sir. Ti krēm fi tóg grĩnh ke mũ. Kÿ fi tóg ti mÿ: "Senhor," he mũ. "Ã mÿ inh jagãgtãn ke tũ?" he fi tóg.

26 Hã ra Jesus tóg fi mÿ: "há tũ tóg nĩ, ã tÿ nén to vĩ mũ ti," he mũ. "Ëg krê jamĩ vÿ tÿ Ëg krê tũ nĩ, kÿ Ëg tóg cachorro mÿ fón vãnħ nĩgtĩ, Ëg krê jamĩ ti," he tóg, Jesus ti.

27 Kÿ fi tóg ti mÿ: "hÿ," he mũ. "Hã ra cachorro sĩ ag tóg ěmĩ mru ên ko tĩ, mesa krēm," he fi tóg, Jesus mÿ. "Hã kÿ inh kósin fi tÿ há' hemnĩ, Ëg tÿ tÿ cachorro ên ri ke nÿtĩ kÿ," he fi tóg, Jesus mÿ.

28 Kĩ tóg ùn týtá ěn fi mý: “inh ki rã tãvĩ han ja ã tóg nĩ,” he mũ. “Hã kĩ sóg ã mý han mũ, ã tỹ inh mý nèn to vĩ mũ tag,” he tóg fi mý. Ti tỹ tag tó kĩ fi kósin fi tóg há' he mũ, hora ěn kã.

Jesus tỹ ùn e ag tỹ há' he

29 Kĩ Jesus tóg cidade tá kãkutẽ kĩ (tóg) goj nig fyr jagma tĩ mũ, nig tỹ Galilêia ěn fyr jagma. Kĩ tóg pãnónh to tãpny mũ, kĩ tóg ni mũ.

30 Kĩ ùn tỹ hẽn ri ke ag vĩ junjun mũ, ùn kagyga ag ke gé, ùn kãnhgrĩ ag ke gé, ùn tĩg vãnh ag ke gé, ùn kaga ù ag ke gé. Ti ki ag tóg junjun mũ, kĩ tóg ag tỹ hághá' he kãn mũ.

31 Kĩ tóg vãnh kar ěn mý e tĩ, ag tỹ tag ven kĩ. Ûn vĩ vãnh ag tóg vĩ há nýtĩ, ùn kónhgrĩ ag tóg mũ há nýtĩ, ùn kyvó ag tóg ěvãnh há nýtĩ. Kĩ ag tóg Topẽ mý vĩ há han mũ sir, Israel ag.

*Jesus tỹ ùn e ù jẽn mãn
(Mc 8.1-10)*

32 Kĩ Jesus tóg ã mré mũ tĩ ag jé prêr mũ. Kĩ tóg ag mý: “inh mý ag tóg jagãgtar nýtĩ, ùn e tag ag,” he mũ. “Kurã tãgtũ han ag tóg mũ ěg mré. Hã ra ag tóg vễjẽn ve ja tũ nĩgtĩ. Kĩ tóg sỹ ag jęg tũ ra ag jẽgnẽ jãvãnh tĩ, ag jamã ra. Ag mũn kĩ ù ag hỹn kãgter ke mũ, kókĩnkĩr kĩ,” he tóg.

33 Kĩ ti mré mũ tĩ ag tóg ti mý: “ki ti ěmã tũ nĩ, ki ti ga kórég nĩ,” he mũ. “Ěg hỹn hẽ tá vễjẽn venh mũ, ěg tỹ ùn e tag ag jẽn jé?” he ag tóg ti mý.

34 Kĩ Jesus tóg ag mý: “ẽmĩ tỹ hẽ ri ke nỹ ki nýtĩ ge?” he

mũ. Kĩ ag tóg: “ũ tỹ 7 (ke) vễ, kãkufár pipir ke gé,” he mũ.

35 Kĩ tóg ùn e ag mý tó, ag tỹ nĩgnĩ kĩ nýtĩ jé, ga kri.

36 Kĩ tóg ěmĩ tỹ 7 (ke) mãg mũ, pirã mré, kĩ tóg to Topẽ mré vĩ mũ. Kĩ tóg vãnh kãkénh mũ, ěmĩ ti. Kĩ tóg ã mré mũ tĩ ag mý vin mũ, ag tỹ vãnh kar mý kã vãnh ken jé. Kĩ ag tóg kã vãnh ken mũ mũ.

37 Kĩ ag tóg ko kãn mũ, funfór ag tóg mũ, hã ra tóg kén mũ. Kre tỹ 7 (ke) ěn fãn tóg mũ sir, ěmĩ kén ti, Jesus mré mũ tĩ ag tỹ génh kĩ.

38 Û tỹ ko mũ ag vĩ ù tỹ 4 mil (ke) nýtĩ, ag tãvĩ, ùn týtá mré tó tũ, ag krê mré tó tũ. Hã ra fag tóg tá e nýtĩ gé.

39 Kĩ Jesus tóg ag jẽgnẽg mũ sir, ag jamã ra. Kĩ tóg canoa ki rã mũ sir, ěmã tỹ Magadã tá ga ra tĩg jé, ã mré mũ tĩ ag mré.

16

*Ag tỹ Jesus mý milagre to vĩ
(Mc 8.11-13; Lc 12.54-56)*

1 Kĩ Fariseu ù ag tóg Jesus tá junjun mũ, Saduceu ag mré hã. Ag tỹ ón kĩ ti ki jẽmẽ sór vễ, ag tỹ kar ti kato vĩ jé. Kĩ ag tóg ti mý milagre to vĩ mũ. Ag tỹ ti jykre to: “Topẽ jykre mý vỹ?” he sór vễ.

2 Hã ra Jesus tóg ag mý: “ta to jykrén há ãjag nýtĩ, ěmé to ke gé,” he mũ. “Rãkãnh kĩ ãjag tóg kãnhkã ki ěvãnh tĩ. Rãren kĩ ãjag tóg: “ẽmãn ke vễ,” he tĩ.

3 Kĩ kusã ki ãjag tóg kãnhkã ki ěvãnh tĩ gé. Kãnhkã pũr kĩ ãjag tóg sir: “ta vỹ kutẽnh mũ, kãnhkã vỹ pũr mũ,” he tĩ. Tó

há han ãjag tóg tĩ, rãre ve ký, kanhkã pũr ven ký ke gé. Hã ra ãjag tóg inh ki kagtĩg nýtĩ, ãjag tỹ sỹ nén han mũ vég mũ ra. Hã ký ãjag tóg: “Topẽ jykre mỹ vỹ?” he tĩ.

⁴ Kórég ãjag nýtĩ, ãjag tỹ Topẽ ki ge jãvãnh nýtĩn ký. Ūri ke kar vỹ ãjag ri ke kórég nýtĩ. Milagre venh ke tũ ãjag tóg nĩ. Vãsỹ Topẽ vĩ tó tĩ ũ tóg nĩgtĩ, hã vỹ: Jonas, he mũ. Jonas tỹ nén ve ja ri ke hã ve jé ãjag tóg ke mũ, ũri,” he tóg, Jesus tĩ. Ký tóg ag ré ký tĩ mũ sir.

*Fermento to comparação ũ
(Mc 8.14-21)*

⁵ Ký tóg ã mré mũ tĩ ag mré tĩ mũ, goj nig kafã ũ ra. Ag tỹ kafã ũ tá junjun ký ag tóg emĩ to jykrén mũ sir, Jesus mré mũ tĩ ag. Kã jatun ký ag tóg nýtĩ ja nĩ, ký tóg tũ tĩ sir, emĩ tĩ.

⁶ Ký Jesus tóg ag kanhrãn mũ. “Fariseu ag tỹ fermento há(r) kamẽg nĩ, Saduceu ag tỹ fermento há(r) ke gé,” he tóg mũ, Jesus tĩ.

⁷ Ký ag tóg jagnẽ mré vĩ mũ sir, Jesus vĩ tag to. “Ti tỹ êg tỹ pão mãg tũ ên tó hỹn,” he ag tóg mũ, jagnẽ mỹ.

⁸ Hã ra Jesus tóg ki kanhró nĩ, ag tỹ nén tó mũn ki. Ký tóg ag mỹ tó mãn mũ. “Inh ki ge há han tũ ãjag tóg nĩ ver,” he tóg. “Hã ký ãjag tóg jagnẽ mỹ: pão tũ, he mũ.

⁹ Ver tóg ãjag tỹ to jykrén tũ tĩ'. Pão tỹ 5 (ke) ên mũ êkrén nĩ. Ū tỹ mil tỹ 5 (ke) ag tóg ko kãn, hã ra tóg kén, ag kar tỹ ko mũ ra. Ti ke hỹn kěj tỹ hẽ ri ke

fãn?” he tóg. Ký ag tóg ti mỹ tó mũ sir.

¹⁰ Ký tóg ag mỹ: “jo pão tỹ 7 (ke) ên ti. Ū tỹ mil tỹ 4 (ke) ag vỹ kó, hã ra tóg kén, ag kar tỹ ko mũ ra. Ti ke hỹn kěj tỹ hẽ ri ke fãn?” he tóg. Ký ag tóg ti mỹ tó mũ gé sir.

¹¹ Ký tóg ag mỹ: “ký inh vĩ to jykrén nĩ,” he mũ. “Pão tó tũ sóg nĩ. Fermento pẽ tó tũ sóg nĩ. To jykrén há han nĩ, ha mẽ. Fariseu ag tỹ fermento há(r) kamẽg nĩ, Saduceu ag tỹ fermento há(r) kamẽg nĩ gé, he sóg mũ ãjag mỹ,” he tóg, Jesus tĩ.

¹² Ký ag tóg to jykrén há han mũ sir vãhã. Ti tỹ fermento pẽ tó pijé'. Ti tỹ Fariseu ag jykre tó ja vẽ, Saduceu ag jykre ke gé. Ag jykre hã to tóg: “ên kamẽg nĩ,” he ja nĩ, Jesus tĩ.

*Pedro tỹ Jesus kãmén
(Mc 8.27-30; Lc 9.18-21)*

¹³ Ký Jesus tóg cidade tỹ Cesaréia Filipe tá ga ra tĩ mũ, ti mré mũ tĩ ag mré. Ký tóg ag mỹ: “tỹ sóg êprã ke fi kósin nĩ,” he mũ. “Kỹ ag iso hẽ ri ke tĩ?” he tóg mũ, ag mỹ.

¹⁴ Ký ag tóg ti mỹ. “ũ ag tóg ã to: João Batista vẽ, he tĩ,” he mũ. “Jãvo ũ ag tóg: Elias vẽ, he tĩ, ã to. Jãvo ũ ag tóg: Jeremias vẽ, he tĩ gé, jãvo ũ ag tóg: Topẽ vĩ tó tĩ ũ vẽ, he tĩ gé, ã to,” he ag tóg, Jesus mỹ.

¹⁵ Ký tóg ag mỹ: “ag jãvo ãjag hẽ ri ke tĩ, iso?” he mũ.

¹⁶ Ký Simão Pedro tóg ti mỹ: “tỹ ã Cristo nĩ,” he mũ. “Topẽ kósin vỹ tỹ ã nĩ. Topẽ vỹ rĩr nĩ,

kỹ ã hã vỹ tỹ ti kósin nĩ,” he tóg, Pedro ti, Jesus mỹ.

17 Kỹ Jesus tóg ti mỹ: “Simão,” he mũ, “João kósin,” he tóg. “Ëprã ke tỹ ã mỹ tó pijé,” he tóg. “Inh jóg tỹ kanhkã tá nĩ ên tỹ ã mỹ tó vễ, isỹ tỹ ti kósin nĩ ti. Hã kỹ tóg ã ve há han mũ, Topê ti,” he tóg, Pedro mỹ.

18 “Ha mẽ, tỹ ã Pedro nĩ, hã vỹ: pó, he mũ. Pãró tag kri sóg isũ han mũ, tỹ ãn ri ke ên, hã vỹ: ã tỹ ag mỹ inh vỹ tó tigrĩn ag tóg inh ki genh ke mũ, he mũ. Kỹ ù tỹ inh ki ge kỹ nỹtĩ ag vỹ tỹ igreja ri ke nỹtĩ. Ag fãr tỹ tũ' he mũ ra ag tóg rĩnrĩr mãn ke mũ. Tũ' henh ke tũ ag nĩ.

19 Ëprã ke ag vỹ kanhkã ra mũnh mũ, ã vỹ ki. Jãnkã ri ke ti nĩ, kanhkã ra ge jafã ti, kỹ sóg ã hã mỹ ti nón jafã ti fig mũ sir, ti chave ti. Kỹ ã tỹ ù mỹ: “kanhkã ra tĩg ke tũ ã tóg nĩ,” hen kỹ tóg ra tĩg ke tũ nĩ. Kỹ ã tỹ ù mỹ: “kanhkã ra ã tóg tĩg ke mũ,” hen kỹ tóg ra tĩg ke mũ,” he tóg, Jesus ti, Pedro mỹ.

20 Kỹ tóg ã mré mũ tĩ ag mỹ tó mũ, ag tỹ ti kãmén tũ nĩ jé ver. “Ker ù mỹ sỹ tỹ Cristo nĩ tó hẽ” he tóg mũ ag mỹ.

*Jesus tỹ ã ter ke tó vén
(Mc 8.31-9.1; Lc 9.22-27)*

21 Kỹ tóg ag mỹ ã jagtar ke kãmén nĩ nĩ. ã mré mũ tĩ ag mỹ tóg komêr hã tó mũ. “Kãnhmar sóg Jerusalém ra tĩg mũ ha,” he tóg mũ. “Tá sóg hã ra jagtar ke mũ. Kófa ag vỹ iso kórég nỹtĩnh mũ, ha vemnĩ, Topê tũ ki rĩr tĩ to pã'i ag, Topê

vỹ to professor ag ke gé. Ag tỹ isén ke vễ, kỹ sỹ kurã tãgtũ ki rĩr mãn ke vễ,” he tóg, Jesus ti.

22 Kỹ Pedro tóg ti pin kỹ ti mré vỹ mũ, ti tỹ tag to jykrén tũ nĩ jé. “Senhor,” he tóg, “Topê jé ã jy nĩgãn, ã tỹ ã jagtar ke tag vég tũ nĩ jé,” he tóg, Pedro ti, Jesus mỹ.

23 Hã ra Jesus tóg vễsỹjãm êvãnh kỹ ti mỹ vỹ tar han mũ sir, ti to jũ kỹ. “Kutĩg, Satanás,” he tóg, Pedro mỹ. “Isỹ Topê vỹ mranh han sór ã tóg mũ,” he tóg. “ã pi(jé) Topê jykre tó mũ'. Ëprã ke jykre vễ, ã tỹ inh mỹ nén tó mũ tag ti,” he tóg, Jesus ti, Pedro mỹ.

24 Kỹ tóg ã mré mũ tĩ ag mỹ vỹ mãn mũ. “ãjag tỹ inh mré kãmũ kỹ tóg há tĩnh mũ,” he tóg. “Kỹ ãjag jykre tovãnh nĩ, ãjag tỹ isũ tãvĩ hã han jé. Ha vé, ag tỹ inh cruz tỹ inh kri fi kỹ sóg tĩg ke mũ, ag tỹ to isa kỹ isén jé, ha vemnĩ. Vẽnh nenh ke tũ sóg nĩ. Isỹ tag han ri ke han nĩ, ãjag tỹ inh mré mũ sór nỹtĩn kỹ,” he tóg.

25 “ãjag tỹ ãjag jykre hã han kỹ ãjag tỹ nũgme ki vár ke vễ. Jãvo ãjag tỹ isugrĩn ãjag jykre tovãnh kỹ ãjag krenkren ke vễ, ãjag kãgter ke mũ (hã) ra.

26 Hên ri ke mũn ãjag hỹn mundo ki nén ù kar ganhar henh ke mũ, hã ra ãjag kuprĩg vỹ vãfor ke mũ. Kỹ tóg kórég nỹ. Ëg tỹ ne tỹ Ëg kuprĩg kajãm ke tóg tũ tĩ, Ëg tỹ ti ve mãn jé,” he tóg.

27 “Tỹ sóg Ëprã ke fi kósin nĩ. Kãtĩg mãn jé sóg ke mũ, kanhkã tá, isỹ jẽgnê jafã ag

mré, inh jóg tỹ isỹ ũn mág han ti kỹ. Kỹ sóg vėnh kar mỹ ājag tỹ nén han ja kaja ěn ven ke mũ.

²⁸ Ha vé, ki hã sóg tó mũ. Ājag kãmĩ ũ ag tóg Topě tỹ tỹ ěg pã'i nĩ venh ke mũ, ājag ter ke to hã, tag ki ěg mré nỹtĩ ũ ag. Ęprã ke fi kósin ěn ve jé ag tóg ke mũ, ti tỹ tỹ pã'i nĩ ti. Inh hã vē," he tóg, Jesus ti.

17

Jesus tỹ Moisés mré Elias mré vėmėn
(Mc 9.2-13; Lc 9.28-36)

¹ Kar kurã tỹ 6 (ke) tũg kỹ Jesus tóg ag mỹ: "mũ nỹ, vyr mỹ," he mũ. Pedro mỹ tóg ke mũ. Tiago mỹ ke gé, ti jāvy tỹ João mỹ ke gé. Ag hã mré tóg tĩ mũ, pãnónh ra.

² Kỹ tóg ag jo vėnh ve ũ han mũ sir, kỹ ti kakã tóg kókov nĩ. Rã ri ke tóg nĩ, ti kakã ti. Ti kur vỹ kóprėj nĩ gé, jėngrė ri ke.

³ Kỹ vãhã Moisés tóg ag mỹ vėnh ven mũ sir, Elias ti ke gé. Jesus mré ag tóg vėmėn mũ.

⁴ Kỹ Pedro tóg Jesus mỹ: "Senhor," he mũ. "Tag ki tóg sér tĩ," he tóg. "Ęg mỹ pãjó tãgtũ han mũ', ģ mỹ', Moisés mỹ', Elias mỹ ke gé'?" he tóg, Pedro ti, Jesus mỹ.

⁵ Pedro tỹ ver vėmėn mũ ra kanhkã góg kókov tóg ag kri rũm ke mũ. Kỹ vėnh vĩ tóg mẽ há' he mũ, kanhkã góg kãtã, kỹ tóg: "inh kósin pir hã vē," he mũ. "Ti vĩ jėmė ra," he tóg, Topě ti.

⁶ Kỹ Jesus mré mũ tĩ ag tóg mẽg mũ, kỹ tóg ag mỹ e tĩ. Ag

mỹ e tĩn kỹ ag tóg mũg ke mũ sir.

⁷ Kỹ Jesus tóg ag to kãtĩg kỹ ag mẽg mũ sir, ģ nĩgé tỹ, kỹ tóg ag mỹ: "nĩgnĩ ra," he mũ. "Mũmėg tũg nĩ," he tóg mũ.

⁸ Kỹ ag tóg mĩ ěvãnh mũ, hã ra ag tóg Jesus hã vėg mũ. Ti mré vėmėn mũ ag ve mãn tũ ag tóg nĩ, kanhkã tá kãmũ ěn ag.

⁹ Kỹ ag tóg pãnónh tá kãre mũ sir. Ag mũn kỹ Jesus tóg ag mỹ: "ker ũ mỹ tó hė'," he mũ. "Ājag tỹ ũri nén vėg mũ tag tó tũg nĩ ver," he tóg. "Sỹ iser ja tá vỹn ke kar hã kãmėn nĩ," he tóg, Jesus ti.

¹⁰ Kỹ ti mré mũ tĩ ag tóg ti mỹ: "hã ra Topě vĩ to profesor ag tóg Elias tó tĩ," he mũ. "Kãtĩg jé tóg ke mũ nėji, Cristo kãtĩg ke to hã, Elias ti. Hã mỹ'?" he ag tóg mũ, Jesus mỹ.

¹¹ Kỹ tóg ag mỹ: "hỹ," he mũ. "Kãtĩg jé tóg ke mũ mỹr, nén kar han mãn jé, Elias ti.

¹² Ha mẽ, kãtĩg ti huri. Hã ra ag tóg ti ki kagtĩg ja nỹtĩgtĩ. Hã kỹ ag tóg ti vóg kónãn ja nĩgtĩ, ag tỹ ti vóg kónãn sór kỹ. Hã kỹ ěprã ke fi kósin ěn tóg, inh hã tóg ag tugrĩn jagtar ke mũ gé, ag tỹ inh vóg kónãn ken kỹ," he tóg, Jesus ti.

¹³ Kỹ ag tóg vãhã ti tỹ nén tó mũ to jykrėn mũ, ti mré mũ tĩ ag. "João Batista to ke ja vē, ěg kygpég tĩ ěn to ke ja vē, hã vỹ: Elias, he mũ, ti tỹ Elias ěn ri ke ja nĩn kỹ," he ag tóg mũ sir, Jesus mré mũ tĩ ag.

Jesus tỹ kyrũ tỹ há' he
(Mc 9.14-29; Lc 9.37-43a)

14 Kÿ ag tóg vënh e ãn tá junjun mũ sir. Kÿ ù tóg Jesus to kãtĩ mũ, ag kãmĩ ù. Tĩ krêm tóg grĩnh ke mũ, ã jakrĩ tÿ, kÿ tóg ti mÿ:

15 “Senhor,” he mũ. “Inh kósın jagãgtãn nĩ,” he tóg. “Ter tĩ tóg nĩgtĩ, to tóg jagtar tãvĩn tĩ. Kejën tóg pĩ ki kutẽ tĩ, ter tĩ ãn han kÿ, kejën tóg goj ki kutẽ tĩ,” he tóg.

16 “Kÿ sóg ã mré mũ tĩ ag mÿ ti ven ja nĩgtĩ, ag tÿ ti tÿ há' he jé, hã ra ag tóg ti tÿ hẽ ri ke tũ nĩ,” he tóg, Jesus mÿ.

17 Kÿ Jesus tóg ti mÿ: “ãjag ne tóg inh ki rã há han tũ nĩgtĩ,” he mũ. “Jykre pãno ãjag tóg nÿtĩ,” he tóg. “Kysã tÿ hẽn ri ke ki inh hÿn ãjag mré tĩnh ke mũ? Kysã tÿ hẽn ri ke ki inh hÿn ãjag to fe tĩnh mũ?” he tóg. “Inh mÿ ti pére kãtĩg,” he tóg, Jesus ti, ti panh mÿ.

18 Ag tÿ ti mré kãmũ kÿ Jesus tóg ti jagrẽ mÿ vĩ jũ han mũ sir, ti tÿ ti tovãnh jé. Kÿ tóg vësÿmér ti ki kãkutẽ mũ sir, kÿ tóg há' he mũ vãhã, kyrũ ti.

19 Kÿ Jesus mré mũ tĩ ag tóg ti ki jëmẽ sór mũ. Vyr mÿ ag tóg Jesus mÿ: “ẽg ne tóg ti tÿ há' he ja tũ nĩ,” he mũ. “Hẽ ri ken kÿ hÿn?” he ag tóg mũ, Jesus mÿ.

20 Kÿ tóg ag mÿ: “ãjag tÿ inh ki ge tũ nÿtĩ tugnĩn ke vë, ãjag tÿ inh vĩ kri fig tũ tugrĩn ke vë,” he mũ. “Ha mẽ, ãjag tÿ inh ki ge sĩ han kÿ nÿtĩ ra ãjag tóg pãnónh tag mÿ: “ha tag ra tĩg,” he há nÿtĩnh mũ vë. ãjag tÿ pãnónh mré vĩ kÿ tóg tĩg ke mũ vë, ha mẽ, ãjag tÿ inh ki ge sĩ nÿtĩ ra. Ka tÿ mostarda fy

vÿ sĩ tãvĩ nĩ. ãjag tÿ inh ki ge sĩ nÿtĩ ra, ka tÿ mostarda fy sĩ ãn ri ke nÿtĩ ra tóg há tĩnh mũ vë. Kÿ ãjag tóg pãnónh tĩn há nÿtĩnh mũ vë. Nén kar han há ãjag nÿtĩnh mũ vë, ãjag tÿ inh ki ge kÿ nÿtĩ ra.

21 Hã ra vënh jagrẽ kórég tÿ ge kutẽm tóg jagy nĩ. Topẽ mré ẽg tóg vĩnh ke mũ, kÿ ẽg tóg ti mré vĩ kÿ vãkrenh ke mũ gé, nén ù ko tũ jé ẽg tóg ke mũ, kÿ tóg vãhã kutẽnh mũ, vënh jagrẽ kórég tÿ ge ti,” he tóg, Jesus ti.

*Jesus tÿ ã ter ke tó mãn
(Mc 9.30-32; Lc 9.43b-45)*

22 Tag kar kÿ ag tóg ga tÿ Galilêia tá nÿtĩ. Kÿ Jesus tóg ag mÿ: “ẽprã ke fi kósın vÿ jagtar nĩnh mũ. Inh hã vë,” he mãn mũ. “Ëprã ke ag vÿ ãjag tÿ isÿ nén han sór mũ ãn han ke mũ.

23 Ag tÿ isén ke vë. Ag tÿ isén kar kÿ sóg hã ra rĩr mãn mũ, kurã tãgtũ tũg kÿ,” he tóg, Jesus ti. Ag tÿ ti vĩ tag mẽ kÿ tóg ag mÿ e tãvĩ tĩ sir. Fe kaj ag tóg mũ sir, ti mré mũ tĩ ag.

Jesus tÿ imposto kajãm

24 Kÿ ag tóg mũ mãn kÿ (ag tóg) cidade tÿ Cafarnaum tá junjun mũ sir. Kÿ imposto kaja mãg tĩ ag tóg Pedro mÿ vĩ mũ, Topẽ jo ãn jé imposto mãg tĩ ag. Imposto ãn kaja hã vÿ: jãnkamy régre, he mũ. Pedro mÿ ag tóg: “ãjag Senhor mÿ kajãm tũ nĩgtĩ?” he mũ.

25 Kÿ tóg ag mÿ: “vó, kajãm ti tĩ,” he mũ. Kÿ tóg ã ãn tá jun mũ sir, Pedro ti. Kÿ Jesus tóg ti mÿ vĩ mũ, imposto to, hã ra Pedro tóg ti mÿ nén ù tó ja tũ nĩ ver. Kÿ Jesus tóg ti mÿ:

“Simão’,” he mũ. “Pã'i ag mÿ ã mÿ: “ha imposto kajãm,” he ja tũ nĩ?” he tóg, Jesus ti. “Tag to jykrén, ha mẽ. Ag mÿ ãjag krẽ mÿ: “kajãm nĩ,” henh ke mũ', ãjag mré ke tũ ag mÿ, vó?” he tóg, Jesus ti, Pedro mÿ.

²⁶ Kÿ Pedro tóg ti mÿ: “ãjag mré ke tũ ag mÿ ag tóg: “kajãm nĩ,” he tĩ,” he mũ. Kÿ Jesus tóg ti mÿ: “hÿ, hã vẽ,” he mũ. “Kÿ ag krẽ hÿn kajãm ke tũ nĩ vẽ.

²⁷ Hã ra ag tóg ãg to jykrén kónãn sór mũ, ãg tÿ kajãm tũ to, ãg tÿ tÿ Topẽ mré ke nÿtĩ ra. Ag tÿ ãg to jykrén kónãn sór kÿ ãg hÿn tóg kajãm ke mũ, Topẽ jo ãn jé imposto ãn, ãg tÿ tÿ Topẽ krẽ nÿtĩ ra, Israel krẽ ke gé. Hã kÿ pirã sygsam tũg, nig ãn tá. Sygsam kÿ jẽ kÿ ã tóg pirã kãgmĩnh mũ. ã tÿ ãn kãgmĩ vén mũ ãn jẽnky tugnÿm nĩ. Jãnkamy vÿ kãkã nĩ, ti jẽnky kãkã, ã tÿ ãg jo kajãm jé, ã jo, ijo ke gé,” he tóg, Jesus ti. Kÿ Pedro tóg tĩ mũ sir. Jãnkamy vég tóg mũ sir. Kÿ tóg tÿ imposto kajãm tĩ mũ, Pedro ti.

18

Û tÿ ãg kãfór nĩ

(Mc 9.33-37; Lc 9.46-48)

¹ Kejẽn Jesus mré mũ tĩ ag tóg ti mÿ vĩ mũ, kÿ ag tóg: “kejẽn ãg tóg Topẽ tÿ tÿ ãg pã'i nĩ venh ke mũ,” he mũ. “Ëg tÿ ti ve kÿ ã tÿ hẽ nÿ hÿn ãg kãfór kar nĩ?” he ag tóg, Jesus mÿ.

² Kÿ Jesus tóg gĩr ã jé prẽr mũ, kÿ tóg ag kuju kã ti fẽg mũ, gĩr ti.

³ Kÿ tóg ag mÿ tag tó mũ, ha mẽ. “Gĩr ri ke han nĩ, ãjag tÿ Topẽ tÿ tÿ ãg pã'i nĩ ve sór kÿ, ke tũ nĩ (mũ) ra ãjag tóg venh ke tũ nĩ. Hã kÿ ãjag jykre tovãnh nĩ, gĩr jykre han jé,” he tóg.

⁴ “Gĩr pi(jé) ãn sanh kãfór sór nĩ. Kÿ ti ri ke han nĩ. Jagnẽ kãfór nĩ sór tũg nĩ. “Ûn sĩ vÿ tÿ inh nĩ, gĩr ri ke vÿ tÿ inh nĩ,” hemnĩ, ãjag tÿ kar kÿ tÿ ãn mág kãfór kar nÿtĩ jé, Topẽ tÿ tÿ ãg pã'i nĩn kÿ,” he tóg.

⁵ “ãjag hã vÿ tÿ inh mré ke nÿtĩ. ãjag tÿ inh mré ke nÿtĩn tugnĩn gĩr tÿ ge jẽ'ÿn nĩ, to há nÿtĩmnĩ, isugrĩn. ãjag tÿ isugrĩn ã tÿ ge to há nÿtĩn kÿ ãjag tóg iso há nÿtĩ gé,” he tóg, Jesus ti.

Inferno ki kutẽ mũ vÿ jagy pẽ nĩ

(Mc 9.42-48; Lc 17.1-2)

⁶ “Ûn sĩ tag tóg inh ki rã kÿ jẽ. Kejẽn ã tóg ãn sĩ tÿ inh vĩ mranh han sór mũ. Ën jykre vÿ kórég tãvĩ nĩ. Ën hã mÿ tóg há nÿnh mũ vẽ, ã tÿ pó mág tÿ ti nunh to sa kÿ goj nig ki ti fón jé, ti tÿ goj ki ter jé. Jagy tãvĩ tóg tĩ, ã tÿ gĩr tÿ isovãnh han kÿ,” he tóg, Jesus ti.

⁷ “Topẽ vÿ ag ve kónãn pẽ han ke mũ, ag tÿ ã tÿ iso há nÿtĩ ag krĩn kónãn kÿ. Ag tÿ ag krĩn kónãn kÿ tóg ag tÿ inh vĩ mranh ha mẽ tĩ. Û tÿ hẽn ri ke ag tóg ag krĩn kónãn tĩ. Hã ra ag tóg to jagãgtar tãvĩ han ke mũ gé. Topẽ vÿ ag ve kónãn pẽ han ke mũ, ag tÿ ã krĩn kónãn kÿ,” he tóg, Jesus ti.

8 “Ă tỹ n n   v g k  Top  v  mranh k    n gn  kym n ,   tỹ ke m n t g j . Ă tỹ h  k  t  t g k  Top  v  mranh k    p n kym n ,   tỹ ke m n t g j . Jagy ti n ,   n gn  pir ti,   t g v nh ti ke g . Ă tỹ n gn  r gre ra n gme ki kut  k  t g jagy k f r n ,   tỹ p n r gre ra inferno ki kut n k , p  nhyr v nh  n ki kut n k  m r. Ă tỹ r r kr g ja t  venh ke t g h  ra h  t ,” he t g.

9 “Ă tỹ n n   ki v i k  Top  v  mranh k    kan    nam n ,   tỹ ke m n t g j . Jagy ti n ,   kyv  ti. Ă tỹ kan  r gre ra n gme ki kut  k  t g jagy k f r n ,   tỹ inferno ki kut n k ,   tỹ p  nhyr v nh  n ki kut n k . Ă tỹ r r kr g ja t   n ve k  t g h  ra h  t ,” he t g, Jesus ti.

*Carneiro v for to com-
para o*

(Lc 15.3-7)

10 “H  k  g r to   he t g n .   tỹ ag ki r r m  ag v  kanhk  t  n t , m r, ha m . Top  tỹ j n  jaf    ag v ,   tỹ g r ag ki r r m  ag. Inh j g mr  ag t g n t , ti v g ag t g n t ,   tỹ g r ag ki r r m  ag. H  k  g r ag to   he t g n .

11 Tỹ s g  pr  ke fi k sin n .  n v gfor m   n ag krenkren han h  j  s g jun ja n , m r, ha m ,” he t g, Jesus ti.

12 “Tag to jykr n n .   t g carneiro tỹ 100 (ke) tỹ m g n . Kej n ti m g pir t g v for ja n . K  t g  n pir  n kan n t  m  sir, ti j v nh t  t g m  sir. Ti m g e  n t g p n nh t  n t .

Ag r  k  t g t  m  sir,  n v for m   n j v nh j ,  n pir  n ti.

13 K  t g ti v g m  sir. K  t g ti m  s r p  t  sir, ha m . Ti m g e  n t g ti m  h  n t ,   tỹ 99 (ke)  n. H  ra ti tỹ  n pir  n ve m n k  t g ti m  h  t v  n  sir,  n e  n tỹ ti m  h  n t  k f r. K  ti fe t g mrin ke m .

14 H  k  t g Top  m  k r g n ,  n s  pir v for k , ti kren t  n n k , g r s  pir m r. Top  pi(j ) tag to h  n , inh j g tỹ kanhk  t  n  ti,” he t g, Jesus ti.

 g mr  ke   tỹ Top  v  mranh

15 “Kej n   r gre v  Top  v  mranh m . K  ti venh t g n ,   tỹ ti mr  v m n j , to. Vyrm  ti mr  v m n v n n . H n ri ke m n t g   v  j m nh m , k    t g ti kren han m  sir,   r gre ti.

16 Ti tỹ   v  j m  s r t  n n k    m : inh mr  ti jyv n t g, hemn ,  n pir m , ke t  n  k   n r gre ag m . K  ti mr  v m n m n n , ag r nve, ag tỹ   tỹ ti mr  v  m  j .

17 Ti tỹ  jag v  m  s r t  n n k  v nh kar m  t mn  sir, inh mr  ke kar ag m . Ti tỹ v nh kar v  m  s r t  n n k  ti mr  v  m n t g n  sir. “Top  v  ki kagt g ti n , f g k r g ag ri ke ti n ,” hemn  ti to. “Top  v  mranh s r ti m , governo m  j nkamy m g t  ag ri ke,” hemn  ti to.

18 Ki h  s g t  m , h  k  s g  jag m  ke m , ha m .  jag tỹ tag ki   m : “kanhk  venh ke t    t g n ,” hen k  t g venh ke t  n .  jag tỹ   m : “kanhk 

ve jé ã tóg ke mũ,” hen kÿ tóg venh ke mũ,” he tóg, Jesus ti.

19 “Ha mẽ, sÿ ãjag mÿ nén tónh ke mũ ti. Kejën ãjag kãmĩ ùn régre ag tóg nén ù to jykrén, ag tÿ Topê mÿ nén to vĩ jé. Kÿ ag tóg ti mÿ nén to vĩ mũ sir. Tÿ ag êprã ke nÿtĩ, hã ra ag tóg Topê mÿ nén ù to vĩ mũ. Kÿ inh jóg tÿ kanhkã tá nĩ tóg ag mÿ han ke mũ, ag tÿ nén to vĩ mũ ên ti,” he tóg.

20 “Kejën ãjag kãmĩ ùn régre ag vÿ iso vēmên tĩ, kejën ùn tãgtũ ag. Inh jiji tó jé ag tóg vênhmãn kÿ nÿtĩ. Kÿ sóg ag mré nĩ nĩ sir, ag tÿ inh vég tũ ra. Hã kÿ Topê tóg ag mÿ han ke mũ, ag tÿ ti mÿ nén to vĩ mũ ti,” he tóg, Jesus ti.

*Û camarada kórég to com-
paração*

21 Kÿ Pedro tóg ti to kãtĩg kÿ ti mÿ: “Senhor,” he mũ. “Kejën inh régre tóg vênh jykre pãno han ja nĩ. Kÿ inh mÿ ti mÿ vênh pãte fón e han mũ? Vênh pãte fón tÿ hẽ ri ke nÿ hÿn há nĩnh mũ? Ke tÿ 7 (ke) mÿ há nĩ?” he tóg, Pedro ti, Jesus mÿ.

22 Kÿ Jesus tóg ti mÿ: “vó,” he mũ. “Vênh pãte fón tÿ 7 (ke) vÿ pir nĩ,” he tóg. “Vênh pãte fón tÿ 70 tÿ 7 (ke) vÿ pãgsĩ nĩ,” he tóg.

23 “Ha vé, ù tÿ kanhkã tá nĩ ên tÿ tÿ êg pã'i nĩ to com-paração ù vê, sÿ tónh ke tag, ha mẽ. Pã'i mág ri ke ti nĩ. Camarada e ti nĩ, pã'i mág ên ti. Kÿ tóg kejën ag tũ ve sór mũ, ag tÿ ti mÿ név(e) ti.

24 Kÿ tóg vég mũ. Hã ra ti camarada ù tóg ti mÿ név(e)

mág jẽ, hã vÿ: 10 mil (ke), he mũ.

25 Hã ra ti tÿ ne tÿ kajãm ke tóg tũ tĩ, kÿ ti patrão vÿ ti fón sór mũ, jãnkamy to, ti prũ fi ke gé, ti krẽ ke gé, ti tũ kar mÿr, ti tÿ ã kaja to ã név(e) kajãm jé.

26 Hã ra tóg ti mÿ jagy tĩ, kÿ tóg ti krẽm grĩnh ke kÿ ã jakrĩ tÿ jẽ mũ. Ti krẽm grĩnh ke kÿ tóg ti mÿ: “Senhor,” he mũ. “Ver isovãnh sĩ han, kajãm jé sóg (ke) mũ vãhã,” he tóg.

27 Kÿ ti patrão tóg ti jagãgtãn mũ sir, ã camarada ti, kÿ tóg ti tovãnh mũ. Ti mÿ tóg ti név(e) tÿ tũ' he mũ. “Ha tũg, jatun mÿ,” he tóg mũ sir.

28 Kÿ ti camarada ên tóg ti mũ sir. Kÿ tóg ã mré camarada ù vég mũ sir. Ti ki tóg név(e) sĩ jẽ, cruzeiro pir mÿr. Kÿ tóg ti mäg mũ sir. Ti nunh kã tóg ti kãgũg mũ, kÿ tóg ti mÿ: “inh mÿ kajãm, ã név(e) ti,” he mũ, ùn név(e) mág ja ên ti, ù tÿ ã mÿ név(e) sĩ ên mÿ.

29 Kÿ tóg ti krẽm grĩnh ke kÿ ã jakrĩ tÿ jẽ mũ. Kÿ tóg ti mÿ: “ver isovãnh, vãhã sóg kajãm kãn ke mũ ha,” he mũ.

30 Hã ra tóg mẽ jãvãnh nĩ. Kÿ tóg vese jafã kãtã ti fón mũ sir, ti tÿ ti mÿ kajãm jé, ti név(e) ti.

31 Hã ra ti mré camarada ù ag vÿ vég mũ, kÿ tóg ag mÿ e tĩ. Kÿ ag tóg ãjag patrão mÿ tó kãn mũ sir, ti tÿ nén han mũ ti.

32 Kÿ ti patrão tóg ti jé prẽr mũ sir. Kÿ tóg ti to jũ mũ. “Jykre kórég pẽ han ã,” he tóg. “Ã név(e) mág tÿ sóg tũ' he vê, ã tÿ inh mÿ to vĩn kÿ.

³³ Kÿ ã tÿ ã mré camarada ên jagãgtãn ke vë vë, isÿ ã jagãgtãn ri ke,” he tóg.

³⁴ Kÿ tóg ti to jũ mág han mũ sir, ti patrão ti. Kÿ tóg ti ség mũ. Ag mÿ tóg: “ha ti vóg kónãn,” he mũ gé, ti tÿ ã patrão mÿ kajãm kãn jé, ti név(e) mág ên ti,” he tóg, Jesus ti.

³⁵ “Hã han jé tóg ke mũ, inh jóg tÿ kanhkã tá nĩ ti, ãjag tÿ ãjag régre ag mÿ vënh pãte fón pë han sór tũ nĩn kÿ, ag tÿ kygnë ja ti,” he tóg, Jesus ti.

19

*Ëg tÿ ãg prũ fón ke tũ
(Mc 10.1-12)*

¹ Kÿ Jesus tóg tó kãn ja nĩ, ti tÿ ag mÿ nén tó sór mũ ti. Kÿ tóg Galiléia tá kãkutë kÿ goj tÿ Jordão mãra tĩ mũ sir. Israel ag jamã ù vë gé.

² Kÿ ùn e ag tóg ti nón mũ mũ. Kÿ tóg tá ag kygtãg kãn mũ sir.

³ Kÿ Fariseu ag tóg ti tá jun-jun mũ gé sir. Ag tÿ ón kÿ ti vëme mẽ sór vë, vënh prũ ke fón to. Kÿ ag tóg ti mÿ: “mÿ ãg tÿ nén ù ù to ãg prũ fag fón jé há nĩ?” he mũ.

⁴⁻⁵ Kÿ tóg ag mÿ kãmén mũ. “Topë vĩ rá ki vemnĩ,” he tóg. “Tá tóg rán kÿ nĩ, Topë tÿ nén han mũ ti. Ti tÿ nén kar han ve ki tóg ti mré fi han. Hã kÿ tóg tag tó mũ, ha mẽ. “Hã kÿ ùn gré tóg ã prũ fi to ã panh ré kÿ tĩnh mũ, ã mÿnh fi ré kÿ ke gé. ã prũ fi mré tóg tĩnh mũ. Fi mré tóg tÿ ùn pir nĩ sir, ã prũ fi mré,” he tóg, Topë ti.

⁶ Hã kÿ fag tóg tÿ ùn pir nÿtĩ. Fag pi(jé) tÿ ùn régre nÿtĩ'. Hã

kÿ fag tÿ vënh kãpãm tũg nĩ. Topë tÿ fag tÿ ùn pir han vë mÿr,” he tóg, Jesus ti.

⁷ Kÿ ag tóg ti mÿ ke mãn mũ. “Hã ra Moisés tóg ãg mÿ: “fi mÿ vënh rá nĩm kar kÿ fi fón nĩ,” he ja nĩ. Ti tÿ ne jé ãg mÿ tag tó ja në?” he ag tóg mũ, Jesus mÿ.

⁸ Kÿ tóg ag mÿ: “hÿ,” he mũ. “Tag tó ja ti nĩ, ãjag mÿ, ãjag tÿ vënh kanhrãn sór tũ nÿtĩn kÿ, há kÿ tóg ãjag mÿ: ha fi fón ge, he ja nĩ. Hã ra Topë tóg tag han ja tũ nĩ, ti tÿ nén kar han ve ki.

⁹ Hã kÿ sóg ãjag mÿ ke mũ. ãjag tÿ ãjag prũ fi fón kÿ ù fi tÿ prũg mãn kÿ ãjag prũ tũ fi vë sir, ha mẽ. ãjag tÿ fi tÿ ù mré nÿ tugrĩn fi fón kÿ tag há ne pãgsĩ nÿ,” he tóg, Jesus ti.

¹⁰ Kÿ ti mré mũ tĩ ag mÿ tóg e tĩ, ti vĩ tag, há kÿ ag tóg ti mÿ: “ge nĩn kÿ tóg tÿ ù nÿ, ãg prũg kÿ,” he mũ. “Ëg tÿ ãg prũ fi fón sór mũ ra fi fón tũ nĩn kÿ tóg vënhmÿ nÿ, kÿ ãg hÿn prũg sór tũ nĩ,” he ag tóg.

¹¹ Kÿ tóg ag mÿ: “ùn pipir ag tóg tag han ke mũ,” he mũ. “Topë tóg ù ag mÿ: ha prũg tũg, henh ke mũ, ên ag há vÿ prũg ke tũ nĩ,” he tóg.

¹² “Û ag tóg kurĩ nÿtĩ, ag mur mũ kã. Kÿ ù ag tóg kurĩ nÿtĩ gé, ag tÿ ag grãfy kym kÿ. Kÿ ù ag tóg kurĩ ri ke nÿtĩ gé, ag tÿ Topë to jykrén kÿ, ag tÿ ù tÿ kanhkã tá nĩ ên tugrĩn prũg sór tũ nÿtĩn kÿ. Û tÿ to jykrén mũ ên jé to jykrén,” he tóg, Jesus ti.

Jesus tÿ gÿr ag to há nÿ

(Mc 10.13-16; Lc 18.15-17)

13 Kÿ fag tóg gÿr tatÿ kãmũ mũ, ti tÿ ã nÿgé tÿ ag mẽ jé, ti tÿ ag to Topẽ mré vÿ jé. Hã ra Jesus mré mũ tÿ ag tóg fag to jũ mũ, ù tÿ ag tatÿ kãmũ mũ fag to.

14 Hã ra Jesus tóg ag mÿ: “vÿ tũg nÿ, gÿr ag mÿ,” he mũ, “gÿr ag tÿ iso kãmũ kamẽg tũg nÿ,” he tóg. “Û tÿ ge hã vÿ ù tÿ kanhkã tá nÿ ên tÿ tÿ pã'i nÿ ên krêm nÿtÿ nÿ,” he tóg.

15 Kÿ tóg ag mẽgmẽ kãn mũ sir, ã nÿgé tÿ. Ag mẽgmẽ kãn kÿ tóg tá kãkutẽ mũ sir.

Kyrũ rico kãme

(Mc 10.17-31; Lc 18.18-30)

16 Kÿ vãhã ù tóg ti tá jun mũ sir. Kÿ tóg ti mÿ: “Senhor,” he mũ. “Hã ã tóg jẽ,” he tóg. “Sÿ inh rÿr krÿg ja tũ venh há tóg tÿ. Ti ve jé inh hÿn vẽn jykre há tÿ hẽ ri ke han ke mũ?” he tóg.

17 Kÿ Jesus tóg ti mÿ: “ã tÿ ne jé inh ki vẽn jykre há jẽmẽ sór nẽ?” he mũ. “Ûn pir tóg há nÿ, ha mẽ. Ti tÿ ãg jyvẽn ên ki króm nÿ, ã tÿ rÿr krÿg ja tũ ve sór kÿ,” he tóg.

18 Kÿ tóg ti mÿ: “ti tÿ ãg jyvẽn tÿ hẽ ri ke nẽ?” he mũ. Kÿ Jesus tóg ti mÿ: “ti tÿ ãg jyvẽn tag hã vẽ, ha mẽ: ù tén tũg nÿ, ã prũ tũ fi mré nÿ tũg nÿ, nén ù péju(g) tũg nÿ, ù to ón tũg nÿ,

19 ã nÿ mré ã jóg kamẽg nÿ, ã régre ki rÿr há han nÿ, ã tÿ vẽn ki rÿr há ri ke han nÿ, ã régre ki,” he tóg, Jesus ti.

20 Kÿ kyrũ tóg ti mÿ: “tag kar ki sóg króm tÿ,” he mũ. “Kÿ

ne nÿ hÿn ver inh mÿ tũ tÿ?” he tóg.

21 Kÿ Jesus tóg ti mÿ: “ã tÿ vẽn jykre há han sór kÿ tag han nÿ, ha mẽ,” he mũ. “Ã tũ kar vãm tÿg. Kÿ ùn jagãgtar ag mÿ vin, jãnkamy ti, kÿ ã tóg kanhkã tá tũ mág nÿ sir. Kar kãtÿg nÿ, ã tÿ inh mré tÿg jé,” he tóg, Jesus ti.

22 Kyrũ ên tÿ ti vÿ tag mẽ kÿ tóg fe kaj han kÿ tÿ mũ sir. Ti tũ vÿ e nÿtÿ, hã kÿ tóg ti mÿ vẽn mÿ tÿ.

23 Kÿ Jesus tóg ã mré mũ tÿ ag mÿ kãmén mũ sir. “Sÿ ke há vẽ, hã kÿ sóg ke mũ. Jagy ti nÿ, ùn rico tÿ ù tÿ kanhkã tá nÿ ên tÿ tÿ ãg pã'i nÿ venh ke ti,” he tóg.

24 “Hã kÿ sóg ãjag mÿ ke mãn mũ. Cavalo pãnÿ sór vÿ préj nor fÿn kutẽ tũ nÿ mÿr,” he tóg. “Ti tÿ fÿn kutẽ há nÿ ra tóg ver jagy tÿ vẽ, ùn rico tÿ ù tÿ kanhkã tá nÿ ên tÿ tÿ ãg pã'i nÿ venh ke ti,” he tóg, Jesus ti.

25 Kÿ tóg ti mré mũ tÿ ag mÿ e tÿ, ti vÿ tag. Kÿ ag kanẽ tóg jur mũ. “Kÿ ù hÿn kren ke tũ nÿ,” he ag tóg.

26 Kÿ Jesus tóg ag ki êvãnh mũ, kÿ tóg ag mÿ: “ẽprã ke ag vÿ vêsóg ki tá jun ke tũ nÿ,” he mũ. “Topẽ hã tóg ãjag tÿ tá jun han ki kanhró nÿ, ti tÿ nén ù kar tÿ hẽ ri ken há nÿn kÿ,” he tóg, Jesus ti.

27 Kÿ Pedro tóg ti mÿ: “ha vé,” he mũ. “Nén kar ré kÿ ãg mũ mũ, ã mré. Tag to ãg hÿn ne venh ke mũ?” he tóg.

28 Kÿ Jesus tóg ag mÿ: “sÿ ke há vẽ, hã kÿ sóg tó mũ,” he mũ. “Inh mré ãjag tóg mũ

mũ. Tỹ sóg ěprã ke fi kósín nĩ. Kejĕn sóg inh nĩgja kri nĩnh mũ, isỹ vĕnh kar jykre tugnyĩm jé. Sĩnvĩ inh nĩnh mũ, kurã ěn kã. Nén kar han mãn jé sóg ke mũ, kurã ěn kã. Kỹ ģag tóg ģag nĩgja kri nĩgnĩg kỹ nỹtĩnh mũ gé, nĩgja tỹ 12 (ke) kri, ģag tỹ povo tỹ Israel kar jykre tugnyĩm jé, povo tỹ 12 (ke) tag ag jykre,” he tóg.

²⁹ “Jó ũ tóg isugrĩn ã jamã ré kỹ tĩ mũ, ã kãke, ã jãvy, ã ve, ã panh, ã mỹnh, ã japỹ ré kỹ tóg tĩ mũ, inh jykre tigrĩn. Ēn vỹ tóg vĕnh kato ã tỹ ěprã ré kỹ tĩgja ěn e ri ke venh ke mũ, tag ki, ěprã. Kỹ tóg rĩr krỹgja tũ ěn venh ke mũ gé,” he tóg.

³⁰ “Jãvo tag ki ũn mág ũ ag kãsir nỹtĩnh ke vĕ, tá tere kỹ, kỹ tag ki ũn kãsir ũ ag tỹ tỹ ũn mág nỹtĩnh ke vĕ, tá tỹ pã'i nĩnh ke vĕ,” he tóg, Jesus ti. Ti tỹ ag mỹ kanhkã jykre tó vĕ.

20

Uva ki rãnrãj tĩ ag to comparação

¹ Kỹ Jesus tóg ag mỹ: “ũ tỹ kanhkã tá nĩ ěn tỹ tỹ ěg pã'i nĩ vỹ ge nĩ, ha mĕ,” he mũ, to comparação han kỹ. “Patrão ri ke tóg nĩ. Kusã ki tóg tĩ mũ, 6 horas ki, camarada ag jãvãnh jé, ag tỹ ti jakré ki rĩr jé.

² Kỹ tóg ũ ag vég mũ sir. Ag mré tóg vĕnh rãnrãj kaja to jykren mũ, hã vỹ: jãnkamy pir, he mũ, por dia kaja ti. Kỹ tóg ag mỹ: “ha ki rĩr mũjĕg,” he mũ sir.

³ Kỹ ag tóg mũ mũ. Hora tãgtũ tũg kỹ, 9 horas ki tóg tũg mãn mũ, ũ ag jãvãnh jé gé. Kỹ

tóg ũ ag vég mũ gé sir. Véké ag tóg ěmã kaju tá nỹtĩ, rãnrãj tũ kỹ.

⁴ Kỹ tóg ag mỹ: “inh mỹ inh jakré ki rĩr mũjĕg,” he mũ gé. “Kajãm jé sóg ke mũ, ti kaja tỹ,” he tóg.

⁵ Kỹ ag tóg mũ mũ.

Hora tãgtũ ũ tũg kỹ, meio dia ki tóg ũ ag jãvãnh tĩg mãn mũ, 3 horas ki tóg tĩg mãn mũ gé. Ag ve kỹ tóg ag mỹ ke mũ gé, kỹ ag tóg mũ mũ gé, ti jakré ki rĩr jé.

⁶ Vãhã tóg rãkãnh mũ sir. 5 horas ki tĩg mãn kỹ tóg ũ ag vég mũ gé, véké jĕgĩ kỹ nỹtĩ ag. Kỹ tóg ag mỹ: “ģag tỹ ne jé rãnrãj tũ nĩ nĕ?” he mũ. “Kurã kar ki ģag tóg ki nỹtĩ, rãnrãj tũ nỹtĩ ra,” he tóg ag mỹ.

⁷ Kỹ ag tóg ti mỹ: “hã ra ũ tóg ěg mỹ: ha inh rãnrãj han, he ja tũ nĩ,” he mũ. Kỹ tóg ag mỹ: “ha inh jakré ki rĩr mũjĕg ge,” he mũ sir. Kỹ ag tóg mũ mũ gé.

⁸ Kutu kỹ ag patrão tóg ã tũ ki rĩr tĩ ěn mỹ: “ha ag jé prĕr,” he mũ, 6 horas da tarde ki. “Ag mỹ ti kaja ti nĩm,” he tóg. “Ũn tỹ rãkãnh kỹ kãmũ mũ ag mỹ nĩm vĕn, kar kỹ ũ tỹ kusã ki kãmũ mũ ag mỹ nĩm rĕn,” he tóg ti mỹ. Kỹ tóg ke mũ, ti tũ ki rĩr tĩ ti.

⁹ Kỹ ũ tỹ rãkãnh kỹ junjun mũ ag vỹ ģag kaja ti mãn mũ, hã vỹ: jãnkamy pir, he mũ. Ag rãnrãj sĩ ra ag tóg por dia kaja vég mũ sir.

¹⁰ Kỹ ũ tỹ kusã ki rãnrãj mũ ag tóg to jykren mũ. “Ti hỹn ěg mỹ ti kaja kãfór han ke mũ, ěg

tỹ kurã kar ki rãnrãj kỹ,” he ag tóg mũ, to jykrén kỹ. Hã ra tóg ag mỹ jãnkamy pir ên nĩm mũ gé sir, por dia kaja ên.

11 Ag tỹ jãnkamy ên mãn kỹ ag tóg ti to jũ mũ, ãjag patrão to.

12 Kỹ ag tóg ti mỹ vĩ mũ. “Tag ag vĩ hora pir ki rãnrãj, jãvo ã tóg ag mỹ êg kaja ri ke han. Kurã kar ki êg tóg rãnrãj mỹr, to êg ron, ti rỹ jagy ra êg tóg to krónh ke ja tũ nĩ,” he ag tóg, ãjag patrão mỹ.

13 Kỹ tóg ag kãmĩ ù mỹ ke mũ, ag patrão ti. “Sỹ ã ki kygnê pijé,” he tóg. “Inh mré ã tóg jãnkamy pir to jykrén ja nĩ, há kỹ sóg ã mỹ nĩm mũ, jãnkamy pir ti.

14 Kỹ ã tũ mãn kỹ tĩg. Hã ra sóg ag mỹ nĩm sór mũ gé, sỹ ã mỹ nĩm ja ên ri ke.

15 Isũ vễ mỹr, jãnkamy ti, kỹ sóg sỹ tỹ nén han sór mũ ên han mũ. “Ã mỹ jũ’, isỹ ag mỹ vĩ há han to?” he tóg ti mỹ, patrão ti.

16 Hã kỹ êgno tá kãmũ ag vĩ ùn kãmũ vén mũ ag ri ke nỹtĩnh mũ, tãpry kỹ, jãvo ùn kãmũ vén mũ ag vĩ êgno tá kãmũ mũ ag ri ke nỹtĩnh mũ gé,” he tóg, Jesus ti.

Jesus tỹ ã ter ke tó mãn

(Mc 10.32-34; Lc 18.31-34)

17 Kỹ Jesus tóg Jerusalém ra tĩg sór mũ. Kỹ tóg vỹrmỹ ù tỹ 12 (ke) ên ag mré vēmén mũ. Ag tỹ ã mré êpry jagma mũn kỹ tóg ag mré vēmén mũ, ag tỹ êmĩn jagma mũn kỹ.

18 “Ha vé,” he tóg. “Jerusalém ra êg tóg mũ mũ,” he tóg. “Êprã ke fi kósin ên vĩ

jagtar ke mũ. Inh hã vễ. Topê tũ ki rĩr tĩ to pã’i ag tóg ãjag tỹ isỹ nén han sór mũ ên han ke mũ, Topê vĩ to professor ag ke gé. Ag tỹ iso: “ter jé tóg ke mũ,” henh ke vễ.

19 Kỹ ag tóg fóg ag mỹ inh fêg ke mũ sir, ên ag tỹ iso é he jé, ag tỹ inh mrãnrãn jé, ag tỹ ka to isa jé. Kurã tãgtũ ki sóg hã ra rĩr mãn ke mũ,” he tóg, Jesus ti.

Ûn régre ag tỹ tỹ ùn mág nỹtĩ sór
(Mc 10.35-45)

20 Kỹ Zebedeu krê ag mỹnh fi tóg Jesus venh kãtĩ mũ, fi krê ag mré. Ti krêm fi tóg mũg ke mũ, fi tỹ ti mỹ nén (ũ) to vĩ sór kỹ.

21 Kỹ tóg fi mỹ: “ã tỹ ne to vĩ sór nê?” he mũ. Kỹ fi tóg ti mỹ: “kejên ã tóg tỹ pã’i nĩnh mũ,” he mũ. “Kỹ inh krê tag ag tỹ ã rã hã nỹtĩnh há tóg tĩ, ù tỹ ã pêgja tá nĩ jé, kỹ ù tỹ ã jakãnh tá nĩ jé,” he fi tóg, ti mỹ.

22 Kỹ Jesus tóg ag mỹ: “ãjag tỹ nén to vĩ mũ ki kagtĩg ãjag tóg nỹtĩ,” he mũ. “Jagy ti nỹ. ãjag mỹ inh ri kén jagtar sór mũ? ãjag mỹ tovãnh ke tũ nĩ?” he tóg. Kỹ ag tóg ti mỹ: “hỹ,” he mũ. “Tovãnh ke tũ êg nĩ,” he ag tóg, ti mỹ.

23 Kỹ tóg ag mỹ: “hỹ, jagãgtar jé ãjag tóg ke mũ, inh ri kén,” he mũ. “Hã ra isũ tũ vễ, sỹ ãjag mỹ: hej, he ti,” he tóg. “Ha inh pêgja tá nĩ, henh ke tũ sóg nĩ. Ha inh jakãnh tá nĩ, henh ke tũ sóg nĩ gé, isũ tũ vễ. Topê tỹ ùn mỹ: ha ti rã hã nỹtĩ, henh ke mũ ên ag hã tỹ

inh rã hã nýtĩnh ke vễ,” he tóg, Jesus ti.

²⁴ Hã ra ù tỹ 10 (ke) ag tóg mễg mũ, ùn régre ag tỹ Jesus mỹ tag to vĩ ja ti. Kỹ ag tóg ag to jũ mũ.

²⁵ Hã ra Jesus tóg ag jé prěr kãn mũ, kỹ tóg ag mỹ: “fóg ag pã'i ag jykre ki kanhró ãjag tóg nýtĩ,” he mũ. “Vẻnh kar jẻgnẻg ag tóg tĩ mỹr, kỹ ag mág ag tóg vẻnh kar mỹ: gemnĩ, ge tũg nĩ, he tĩ, vĩ tar han kỹ,” he tóg.

²⁶ “Ag ri ke han tũg nĩ. ãjag mỹ tỹ ùn mág nýtĩ sór mũ?” Kỹ tỹ jagnẻ camarada ri ke nýtĩmnĩ, jagnẻ tũ ki rĩr kỹ.

²⁷ ãjag mỹ tỹ pã'i nýtĩ sór mũ? Kỹ tỹ jagnẻ krẻm ke nýtĩmnĩ, tỹ ùn kãsir nýtĩmnĩ.

²⁸ Hã kỹ sóg camarada tũ nĩ gé. Sỹ tỹ camarada nĩ jẻ sóg kãtĩg, sỹ ãjag ki rĩr jẻ. Tỹ sóg ẻprã ke fi kósin nĩ. Hã kỹ sóg vẻnh kar jagfy ter ke mũ, sỹ ag krenkren han jẻ,” he tóg, Jesus ti.

Jesus tỹ ùn kyvó ag tỹ há' he (Mc 10.46-52; Lc 18.35-43)

²⁹ Hã ki ag tóg Jerusalẻm ra mũ mũ. Kejẻn ag tóg cidade tỹ Jericó fĩn rãm kỹ ag tóg tá pa mũ, hã ra ù tỹ hẻn ri ke ag tóg Jesus nón mũ mũ.

³⁰ ẻpry ẻn tá, ẻmĩn ẻn tá ùn kyvó ag tóg nẻgnẻ kỹ nýtĩ nĩ, ùn régre ag. Vẻhã ag tóg Jesus tỹ jagma tẻg mễg mũ. Kỹ ag tóg ti jẻ prẻr mũ. “!..Senhor..!” he ag tóg. “!..Davi kósin', ẻg jagẻgtãn ra..!” he ag tóg.

³¹ Kỹ ag tóg ag to jũgũ mũ, ti nón mũ ù ag. “Mẻ kã nýtĩ,”

he ag tóg mũ. Hã ra ag tóg prẻr mẫn', prẻr mẫn' he mũ, jamã hár(a). “!..Senhor, Davi kósin', ẻg jagẻgtãn ra..!” he ag tóg mũ.

³² Kỹ Jesus tóg krẻg he mũ, kỹ tóg ag jẻ prẻr mũ. Kỹ tóg ag mỹ: “ne to ãjag vĩ, sỹ ãjag mỹ han jẻ?” he mũ.

³³ Kỹ ag tóg ti mỹ: “ẻg tỹ ẻvẻnh há tóg tĩ,” he mũ.

³⁴ Kỹ Jesus tóg ag jagẻgtãn mũ sir. Ag kanẻ mẻgmẻg tóg mũ sir. Kỹ ag tóg ẻvẻnh há han mũ sir. Ti nón ag tóg mũ mũ sir.

21

Jesus tỹ Jerusalẻm tá jun (Mc 11.1-11; Lc 19.28-40; Jo 12.12-19)

¹ Ag mũn kỹ ag tóg Jerusalẻm kakó tá junjun mũ, ẻmã tỹ Betfagẻ tá, krẻ tỹ Oliveiras tá. Kỹ Jesus tóg ã mrẻ mũ tĩ régre ag jẻgnẻg mũ, ẻmã ẻn ra.

² Kỹ tóg ag mỹ: “ẻmã ẻn ra mũjẻg, ẻg jo ẻmã nẻ ẻn ra,” he mũ. “Tá ãjag tóg burrica fi venh mũ. Se kỹ fi jẻ. Fi kósin vĩ fi mrẻ jẻ nẻ. ẻn fi kavẻn kỹ fi pẻre kãmũmnĩ.

³ Hẻn ri ke mũn ag tóg ãjag mỹ vĩ sór mũ, fi to. Kỹ ag mỹ: “ẻg Senhor vĩ fi ve sỹ han sór mũ. Kãnhmẻr tóg fi jẻnẻ mẫn mũ,” hemnẻ,” he tóg, Jesus ti.

⁴ Hã ra tóg rỏn kỹ nẻ gé, tag. Topẻ vĩ tó tĩ tóg tag rỏn ja nẻ, ha mẽ.

⁵ “Sião tá ke fag mỹ tag tỏmnẻ, ha mẽ. Hã vé, ã pã'i tỹ rei tóg ã ki jun ke mũ, hemnẻ. Vẻnh kar to tóg fe há nẻ, jũ

vãnh nĩn kÿ, ã Senhor ti. Burrica kri tóg nĩ nĩ, fi kósin kri, ěg tu tĩ ěn fi kósin kri mÿr,” he tóg, Topẽ vĩ tÿ rán kÿ nĩ ki. Hã ra tóg ge nĩ.

⁶ Kÿ ti mré mũ tĩ ag tóg mũ mũ, burrica fi mãn jé.

⁷ Fi pére ag tóg kãmũ mũ, fi kósin mré. Kÿ ag tóg ãjag kur tÿ kri vãm mũ, kÿ tóg kri nĩ mũ.

⁸ Kÿ vẽnhe ěn ag tóg ãjag kur tÿ ěpry kri kugjén mũ, ěmĩn kri. Kÿ ũ ag tóg ka féj kre kÿ ěpry kri vãvãm mũ sir. Ag tÿ ti jamĩn sĩnvĩ han sórvẽ.

⁹ Kÿ ũ ag tóg ti jamĩ mũ mũ, jo ũ ag ti nón mũ mũ. Ěn ag tóg prẽnprěr mũ sir. “!..Viva, Davi kósin..!” he ag tóg mũ. “!..Sér tóg tĩ, pã'i vÿ ěg tá jun, ěg Senhor mág tÿ ti jẽnẽn kÿ..! !..Topẽ tá tóg kãtĩg, ũ tÿ kynhmÿ nĩ ěn tá, viva..!” he ag tóg, prẽnprěr kÿ.

¹⁰ Hã ki ag tóg Jerusalém tá junjun mũ. Kÿ tá ke kar ag vÿ ti venh kãmũ mũ. Ag mÿ tóg e tĩ, kÿ ag tóg ti to: “ũ nẽ?” he mũ.

¹¹ Kÿ ti mré kãmũ mũ ag vÿ ag mÿ: “Topẽ vĩ tó tĩ ěn vẽ,” he mũ. “Jesus vẽ, Nazaré tá ke ěn vẽ, Galiléia tá ke ěn,” he ag tóg mũ sir.

Jesus tÿ Topẽ jo ĩn krẽm ag pan

(Mc 11.15-19; Lc 19.45-48; Jo 2.13-22)

¹² Kÿ Jesus tóg Topẽ jo ĩn kãra rã mũ. Kÿ tóg tá ke ag pan kãn mũ sir, nẽn vender he tĩ ag, nẽn comprar he tĩ ag ke gé. Topẽ jo ĩn krẽm ag tóg negociar he tĩ, jãnkamy trocar he ag tóg tĩ gé. Ag tÿ nẽn

kri vin jafã tÿ tóg vyryn ke mũ sir. Sórvãg vender he tĩ ag nĩgnĩ jafã tÿ tóg vyryn ke mũ gé sir.

¹³ Ag mÿ tóg: “Topẽ vĩ rá to jykrén nĩ,” he mũ. “Tag vÿ rán kÿ nĩ, ha mẽ. “Inh ĩn jiji vÿ tÿ Topẽ mré vĩ jafã nĩ,” he tóg, Topẽ vĩ rá ki. Hã ra ãjag tóg Topẽ mré vĩ jafã tag krẽm nẽn kar pigju(g) mũgtĩ, kÿ tóg bandido ag jamã ri ke nĩ sir,” he tóg, Jesus ti. Ag pan kÿ tóg ke mũ, Jesus ti.

¹⁴ Kÿ ũn kyvó ag tóg ti to junjun mũ sir, ũn kónhgrĩ ag ke gé, ti tÿ Topẽ jo ĩn krẽm jẽn kÿ. Kÿ tóg ag tÿ há' he kãn mũ sir.

¹⁵ Hã ra Topẽ tũ ki rĩr tĩ ag tóg tá nÿtĩ, Topẽ vĩ to professor ag ke gé. Ti tÿ ag tÿ há' he vég ag tóg mũ. Gĩr ag vĩ mẽg ag tóg mũ gé. Topẽ jo ĩn krẽm ag tóg nÿtĩ, gĩr ag, kÿ ag tóg Jesus mÿ prẽnprěr mũ. “!..Viva, Davi kósin..!” he ag tóg mũ, prẽnprěr kÿ. Kÿ pã'i ag tóg jũgũ mũ, Jesus to.

¹⁶ Hã kÿ ag tóg ti mÿ vĩ mũ. “Ã mÿ ag prẽnprěr mẽg tũ?” he ag tóg. Kÿ Jesus tóg ag mÿ: “vó,” he mũ. “Hã ra Topẽ vĩ rá to jykrén nĩ,” he tóg. “Ũn kãsir ag vÿ iso vĩ há han tĩ,” he tóg, Topẽ vĩ ki. “Ũn pafa mũ ag vÿ inh mÿ vĩ há pẽ han tĩ. Á hã ne tag han', ũn kãsir ag tÿ inh mÿ vĩ há han jé,” he tóg, Topẽ mÿ, Topẽ vĩ tÿ rán kÿ nĩ ki,” he tóg, Jesus ti.

¹⁷ Tag tó kÿ tóg ag ré kÿ tĩ mũ sir. Cidade tá tóg kãkutẽ mũ, ěmã tÿ Betfagé ra tĩg jé. Tá tóg sir nũr mũ.

*Ka tỹ figueira tóg
(Mc 11.12-14, 20-24)*

18 Tỹ vaj kỹ kusã ki tóg cidade ra tĩg mãn mũ. ã tĩg kỹ tóg kókĩr mũ.

19 Kỹ tóg ka tỹ figueira vég mũ sir, kỹ tóg ra tĩ mũ, ti kanẽ ko jé. Hã ra tóg kanẽ tũ nĩ. Fěj tãvĩ tóg jẽ, kỹ tóg ti mỹ vĩ mũ. “Kanẽ han mãn ke tũ ã nĩ ha,” he tóg mũ. Kỹ tóg tóg mũ sir vėsỹmér, ka ti.

20 Kỹ ti mré mũ tĩ ag tóg vég mũ sir, ti tóg mũ ti. Kỹ tóg ag mỹ e tĩ. “Vėsỹmér tóg tóg ja nĩ,” he ag tóg. “Ti hẽ ri ké?” he ag tóg.

21 Kỹ Jesus tóg ag mỹ kãmén mũ sir. “Ki hã sóg tó mũ, hã kỹ sóg ke mũ,” he tóg. “Inh ri ke han jé ãjag tóg ke mũ. Isỹ ka tỹ figueira mỹ: “tóg ra,” hen kỹ tóg tóg ja nĩ. Inh vĩ tag ri ke han jé ãjag tóg ke mũ, ãjag tỹ inh ki ge há han kỹ. Hã ra to: “Topẽ mỹ inh vĩ mẽg mũ vỹ?” he tũg nĩ. “Hỹ mỹ vỹ?” he tũg nĩ. Kỹ ãjag tỹ kejẽn pãnónh mỹ: ha kutẽ, goj nig ki, hen kỹ tóg kutẽ mũ, ãjag tỹ ti kutẽnh ke to: “hỹ mỹ vỹ?” he tũ nĩn kỹ.

22 Kỹ ãjag tỹ Topẽ mỹ nén ù to vĩn kỹ to: “han jé tóg ke mũ,” hemnĩ. Kỹ tóg ãjag mỹ han mũ, ãjag tỹ ti mỹ nén to vĩ mũ ên ti,” he tóg, Jesus ti.

Jesus tỹ ù tỹ ã jẽnẽg mũ tó tũg

(Mc 11.27-33; Lc 20.1-8)

23 Kỹ tóg cidade tá jun kỹ (tóg) Topẽ jo ĩn kãra rã mãn mũ sir. Kỹ Topẽ tũ ki rĩr tĩ to pã'i ag vỹ ti to kãmũ mũ, kófa ag mré hã. Ag tỹ ti ki jẽmẽ sór

vẽ, hã kỹ ag tóg ti mỹ: “ũ nỹ ã mỹ: tag han nĩ, hé?” he mũ. “Û nỹ ã jẽnẽ?” he ag tóg mũ, Jesus mỹ.

24 Kỹ Jesus tóg ag mỹ: “ãjag ki sóg jẽmẽnh ke mũ gé, vẽn kato,” he mũ. “ãjag tỹ inh mỹ tó há han kỹ sóg ãjag mỹ ù tỹ inh jẽnẽg mũ tónh ke mũ gé,” he tóg.

25 “João vỹ ag kygpég tĩ ja nĩgtĩ. Kỹ ti mỹ kanhkã tá vẽn jykre han ja nĩgtĩ, êprã vẽn jykre vó? Û nỹ ti jẽnẽ?” he tóg, Jesus ti.

Kỹ ag tóg ti vĩ to jykrén mũ jagnẽ mré. “Ëg tỹ ti mỹ: Topẽ tỹ ti jẽnẽ ja vẽ, hen kỹ tóg êg mỹ: kỹ ãjag tỹ ne jé ti vĩ kri fig tũ nĩ nẽ? henh ke mũ.

26 Ëg tỹ hã ra ti mỹ: êprã ke jykre ja vẽ, hen kỹ êg tóg vẽn kar kato tẽ mũ sir. Ag kar vỹ João to: Topẽ vĩ tó tĩ pẽ ja vẽ, he tĩ. Kỹ êg tóg ag kamẽg mũ, vẽn e ên,” he ag tóg mũ, jagnẽ mỹ, pã'i ag.

27 To jykrén kỹ ag tóg Jesus mỹ: “êg pi(jé) João jykre ki kanhró nỹtĩ,” he mũ. Ón kỹ ag tóg ke mũ. Kỹ tóg ag mỹ: “kỹ sóg ãjag mỹ tónh ke tũ nĩ gé, ù tỹ inh jẽnẽg mũ ti,” he mũ. ã kato tẽ mũ ag mỹ tóg ke mũ, Jesus ti.

Ûn krẽ régre to comparação

28 Kỹ tóg ag kanhrãn kỹ ag mỹ: “tag to jykrén nĩ, ha mẽ,” he mũ sir. “Û tóg kósin régre nĩ. Kejẽn tóg ùn sanh to tĩg kỹ ti mỹ: “inh kósin,” he mũ. “Ûri inh jakré tugnỹgnỹm tĩg,” he tóg.

29 Kÿ tóg ã panh ti mÿ: “vó,” he mÿ. Kar kÿ tóg to jykrén mǎn kÿ (tóg) tĩ mÿ sir, êpÿ ra.

30 Kÿ ti panh tóg ti jǎvy mÿ ke mÿ gé sir. “Ûri inh jakré tugnygnÿm tÿg,” he tóg mÿ gé. Kÿ ti jǎvy tóg: “hej,” he mÿ, ã panh ti mÿ. Hǎ ra tóg tĩ tũ nĩ.

31 Kÿ ù tÿ hē nÿ ti panh vĩ ki króm hÿn?” he tóg, Jesus ti. Kÿ ag tóg ti mÿ: “Ûn sanh ti,” he mÿ. Kÿ Jesus tóg ag mÿ: “hÿ, hǎ vē,” he mÿ. “Hǎ kÿ sóg ãjag mÿ ke mÿ. Û tÿ governo mÿ jǎnkamy mǎg tĩ ù ag vÿ Topē vĩ mranh, hǎ ra ag tóg to jykrén mǎn kÿ (ag tóg) ãjag jykre tovǎnh. Kÿ ùn mén e ù fag vÿ ãjag jykre kórég tovǎnh gé. Hǎ kÿ ag tóg Topē tÿ tÿ êg pǎ'i nĩ venh ke mÿ, fag ke gé. Ti kósin sanh ri ke ag hǎ vē. Ag jǎvo ãjag tóg kanhkǎ venh ke tũ nĩ, ãjag tÿ ón kÿ Topē mÿ: “hej,” he mÿ ra.

32 João vÿ ãjag mÿ Topē vĩ tó ja nĩgtĩ, ãjag tÿ ti jykre kuryj jagma mÿ jé. Hǎ ra ãjag tóg ti vĩ kri nĩm ja tũ nĩ. ãjag jǎvo ù tÿ governo mÿ jǎnkamy mǎg tĩ ag vÿ ti vĩ kri fi ja nĩ, ùn mén e fag ke gé. Tag ve ãjag mÿr. Ge ra ãjag tóg ãjag jykre tovǎnh tũ nĩ, João vĩ kri nĩm tũ ãjag nĩ,” he tóg, Jesus ti.

Ûn camarada kórég ag to comparação

(Mc 12.1-12; Lc 20.9-19)

33 Kÿ Jesus tóg ag mÿ: “sÿ ãjag mÿ ãjag tÿ Topē tovǎnh to comparação han mǎn ke vē, ha mē,” he mÿ. “Kejēn ù tóg nĩgtĩ. Uva krǎn tóg nĩgtĩ, nén kanē tÿ vinho han jafǎ ên. Æ

jakré tag to tóg rón mÿ. Kÿ tóg kÿm kÿ uva jēgmĩ jafǎ han mÿ. Kÿ tóg ki pǎjó han mÿ gé. Kÿ tóg ù tÿ ki rĩr tĩ ag mÿ tovǎnh mÿ, ag tÿ ti mré ti kanē vēnh kǎpǎm jé. Kÿ tóg tĩ mÿ, ga ù ra.

34 Ti kanēn kÿ tóg ã camarada ag jēgnēg mÿ, ag tÿ ag mÿ ti tũ vin jé, uva kanē ti.

35 Hǎ ra ag tóg ag vóg kónǎn mÿ sir, ti camarada ag. Û mrǎnmrǎn ag tóg mÿ, ù tén ag tóg mÿ, ù pin ag tóg mÿ, pó tÿ.

36 Kÿ tóg ag mÿ ã camarada ù ag jēgnē mǎn mÿ gé sir, ùn e ag sir, hǎ ra ag tóg ag vóg kónǎn kǎn mÿ.

37 Vǎhǎ tóg ag mÿ ã kósin jēnēg mÿ. “Ag hÿn ti kamēg mÿ, inh kósin ti,” he tóg, hǎ kÿ tóg ti jēnēg mÿ.

38 Kÿ ag tóg ti vég mÿ, ti kósin ti. Kÿ ag tóg jagnē mÿ: “kejēn êkré tag vÿ tÿ ti tũ nĩnh ke mÿ,” he mÿ. “Mÿ nÿ, ti tén jé, ti tũ tag tÿ tÿ êg tũ nÿnh jé,” he ag tóg mÿ, patrǎo kósin to.

39 Kÿ ag tóg ti kǎgmĩg mÿ sir. Ró pǎte ag tóg ti kutēm kÿ (ag tóg) ti tén mÿ sir.

40 Kejēn ag patrǎo vÿ kǎtĩg ke mÿ, ù tÿ nén krǎn ja ên. Kÿn hÿn hē ri kenh mÿ, ã camarada ag tÿ?” he tóg, Jesus ti.

41 Kÿ ù tÿ ti vĩ mēg mÿ ag tóg ti mÿ: “vēnh jykre pǎno han ag tóg mÿ mÿr, uva ki rĩr tĩ ag,” he mÿ. “Ag kǎgtén jé tóg ke mÿ, jũ kÿ, ag patrǎo ti, kÿ tóg uva kré ên tÿ ù mÿ tovǎnh ke mÿ, ag tÿ ti mré vēnh kǎpǎm jé, ti kanē ti,” he ag tóg ti mÿ. Û tÿ ti vĩ mēg mÿ ag tóg ke mÿ, Jesus mÿ.

42 Kÿ tóg ag mÿ: “hÿ,” he mÿ. “Kÿ Topê vÿ rá tag to jykrén nÿ gé, ha mē: pó tÿ ãn han jafã fón ag tóg, pó tÿ ãn han tí ag. Ag mÿ tóg kórég ja nÿ, pó ãn ti. Hã ra Topê tóg pó ãn hã tÿ ãn nÿna han mÿ. Ëg Senhor mág tÿ há vë mÿr, hã kÿ tóg ãg mÿ e tí, ãg tÿ ve kÿ,” he ja tóg nÿ, Topê vÿ rá ki,” he tóg, Jesus ti, vëso pó tÿ comparação ã han kÿ.

43 “Hã kÿ sóg ãjag mÿ ke mÿ. ãjag tÿ Topê tÿ tÿ ãg pã'i nÿ venh ke vë vë, hã ra ãjag tóg venh ke tÿ nÿ. Û ag vÿ venh ke mÿ, povo ã ag, ag tÿ ãnh vÿ kri fi kÿ,” he tóg.

44 “Û tÿ hën ri ke ag vÿ pó tag kri vár ke mÿ, kÿ ag tóg kri vár kÿ tÿ' henh ke mÿ. Kÿ pó tag vÿ ã tÿ hën ri ke ag kri kutënh ke mÿ gé, kÿ tóg ag tÿ námnam ke kãn mÿ, ag kri kutë kÿ,” he tóg, Jesus ti. Ti tÿ ag tÿ ti ki rá tÿ tugrÿn nÿgme ki vár ke tón hã vë.

45 Kÿ ag tóg mēg mÿ sir, Jesus vÿ ti. Topê tÿ ki rÿr tí to pã'i ag vÿ mēg mÿ, Fariseu ag ke gé. Mē kÿ ag tóg vãhã to jykrén mÿ sir. “Ëg hã to tóg uva ki rÿr tí kórég ag to comparação tag han ja nÿ,” he ag tóg mÿ sir, ki kanhrãn kÿ.

46 Hã kÿ ag tóg ti se sór mÿ. Hã ra ag tóg vënh e ãn kamēg mÿ. “Topê vÿ tó tí pë vë,” he ag tóg, Jesus to, vënh e ãn, hã kÿ pã'i ag tóg povo ãn ag kamēg kÿ ti ség tÿ nÿ ver.

22

*Vënh prÿg to comparação
(Lc 14.15-24)*

1 Kÿ Jesus tóg ag mÿ comparação ã han mãn mÿ sir.

2 “Û tÿ kanhkã tá nÿ ãn tÿ tÿ ãg pã'i nÿ vÿ ge nÿ, ha mē,” he tóg. “Tÿ tóg pã'i mág ri ke nÿ. Ti kósin prÿg ken kÿ tóg to festa mág han sór mÿ, pã'i mág ti.

3 Hã kÿ tóg ã camarada ag jëgnëg mÿ, ag tÿ ti tÿ ãn mÿ to ja ag mÿ: “ha kãmÿ jëg, festa kon jé,” he jé. Hã ra ag tóg kãmÿ jãvãnh nÿtÿ.

4 Kÿ tóg ag mÿ ã camarada ã ag jëgnë mãn mÿ. “Ag mÿ: “kãn ãnh huri, vëjën ti, he ti, ãg patrão ti,” hemnÿ,” he tóg. “Boi kãgtén ãnh huri, boi tãgy ãn mré hã. Nén kar vÿ kynkar kÿ nÿtÿ. Kãmÿ jëg ra, ãnh festa to, he ti, ãg patrão ti,” hemnÿ ag mÿ,” he tóg, pã'i mág ti, ã camarada ag mÿ. Kÿ ag tóg mÿ mÿ.

5 Hã ra ag tóg kãmÿ sór tÿ nÿ, kÿ ag tóg ti camarada ag to é he mÿ. Û tóg ã japÿ ra tí mÿ, ã tóg ã negócio nón tí mÿ.

6 Û ag tóg hã ra ti camarada ag kugmÿ kÿ (ag tóg) ag vóg kónãn mÿ gé sir, ag kãtén ag tóg mÿ sir.

7 Kÿ pã'i mág tóg ag to jÿ mÿ. Kÿ tóg ã krēm pã'i ag jëgnë kÿ ag kãgtén mÿ gé sir, ã tÿ ti camarada kãgtén ja ãn ag. Ag ãn kugprÿg ag tóg mÿ sir.

8 Kÿ tóg ã camrada ag mÿ: “ãnh festa vÿ kar kÿ nÿ ha,” he mÿ. “Hã ra ag tóg kãmÿ jãvãnh nÿtÿ, isÿ ãn mÿ vënh vÿ jënë ja ag, ag kórég nÿtÿn kÿ.

9 Ha mÿjëg, ëpÿ ra, ãmÿn vënh kãpóv (ja) ra ke gé. ãjag

tỹ ù ve kỹ ti mỹ: “ha festa venh kãtĩg,” hemnĩ, he tóg, pã'i mág ti, ã camarada ag mỹ.

10 Kỹ ag tóg mũ mũ. Ājag tỹ ěpy tá ù ve kỹ ag tóg ag mỹ ke mũ. Vẽnh kar mỹ ag tóg tóg mũ sir, ùn jykre há ag mỹ, ùn jykre kórég ag mỹ ke gé. Hã kỹ tóg fór mũ sir, clube ti.

11 Kỹ pã'i mág tóg kãrã mũ sir, ag vigve jé, ù tỹ festa to kãmũ ag. Kỹ ù tóg tá jẽ nĩ, hã ra tóg festa to kur tu tũ nĩ.

12 Kỹ tóg ti mỹ: “festa to kur tu tũ ã tóg nĩ, vỹ,” he mũ. “Ā hã ne tóg kur kórég tu sór mũ', inh festa ki',” he tóg, ti mỹ. Hã ra tóg vĩ tũ nĩ sir.

13 Kỹ pã'i mág tóg ã camarada ag mỹ: “ha ti mrĩnh, ti pẽn, ti nĩgẽ, ha ti fón, re tá,” he mũ. Re tán kuty nĩ. Tá ag tóg jagtar tĩ. Ājag jã tỹ ag tóg gyngyn ke tĩ sir, gangan ke ag tóg tĩ sir, vẽso jũgũ kỹ.

14 Ge ti nĩ. Û tỹ hẽn ri ke jé sóg prẽr tĩ, hã ra ti pipir nỹtĩ, ùn kuprẽg kỹ nỹtĩ ag,” he tóg, Jesus ti. Ti tỹ ěg tỹ kanhkã tá festa venh ke tón hã vẽ.

*Ag tỹ imposto to ti ki jẽmẽ
(Mc 12.13-17; Lc 20.20-26)*

15 Kỹ Fariseu ag tóg jagnẽ mré Jesus to jykren mũ sir. Ag tỹ ti vĩ to ti se sór vẽ. Hã kỹ ag tóg: “ti vĩ tỹ hẽ to ěg hỹn ti senh mũ?” he mũ.

16 Tag to jykren kỹ ag tóg sir Jesus mỹ Ājag mré ke ù ag jẽgnẽg mũ, Herodes mré ke ù ag mré hã, ag tỹ ón kỹ ti ki jẽmẽ jé, ag tỹ ti vĩ to ti se jé. Ēn ag tỹ Jesus tá junjun kỹ ag tóg ti mỹ: “Senhor,” he mũ. “Ā

jykre kuryj nĩn ki kanhró ěg tóg nỹtĩ,” he ag tóg. “Hã kỹ ã tóg Topẽ to ěmĩn ki ěg kanhrãn há han tĩ. Vẽnh jykre pir hã han ã tóg tĩ. Û tỹ vẽn jykre há hã han ve nĩ mũ ra ã tóg ti jykre ki kanhró kar nĩ,” he ag tóg mũ, ón kỹ, Jesus mỹ.

17 “Hã kỹ, ěg mỹ ã tỹ nén to jykren mũ tómnĩ. Mỹ ha nỹ', ěg tỹ pã'i mág tỹ imperador mỹ jãnkamy ěn nĩm ti', imposto kajãm jé'? Ēg mỹ hỹn nĩm mũ', vó mỹ vó?” he ag tóg mũ, ón kỹ ti ki jẽmẽn kỹ.

18 Hã ra Jesus tóg ag jykre pãno ki kanhró nĩ. Hã kỹ tóg ag mỹ: “Ājag ne tóg ón kỹ inh ki jẽmẽ sór mũ'.” he mũ. “Jykre régre Ājag nỹtĩ mỹr,” he tóg.

19 “Inh mỹ jãnkamy jun, imposto kajãm jafã ěn ti,” he tóg. Kỹ ag tóg ti mỹ ù jun mũ sir, jãnkamy ti.

20 Kỹ tóg ag mỹ: “ũ jiji nỹ kã nĩ, ù kãgrá nỹ kã nĩ?” he mũ.

21 Kỹ ag tóg ti mỹ: “pã'i mág tỹ imperador kãgrá vẽ,” he mũ. Kỹ tóg ag mỹ: “kỹ pã'i mág mỹ ti tũ nĩm nĩ, hã ra Topẽ mỹ ti tũ nĩm nĩ gé,” he mũ sir.

22 Ag tỹ ti vĩ mẽ kỹ ti jykre tóg ag mỹ e tĩ sir. Kỹ ag tóg ti tovãnh kỹ mũ mũ sir.

*Ēg tỹ ěg ter ja tá vỹn kenh ke
(Mc 12.28-34; Lc 10.25-28)*

23 Kỹ kejẽn Saduceu ag tóg Jesus tá junjun mũ gé, kurã ěn kã. Ag tỹ ón kỹ ti ki jẽmẽ sór vẽ gé. Hã ra Saduceu ag tóg: “ěg ter ja tá ěg vỹnvỹn kenh ke tũ nĩ,” he tĩ. “Rĩr mãn ke tũ ěg tóg

nĩ,” he ag tóg tĩ. Ęn ag vỹ ón kỹ Jesus ki jẽmẽ sór mũ gé.

²⁴ “Senhor,” he ag tóg mũ gé. “Moisés tỹ ěg mỹ vẽn h jykre nĩm kỹ tóg ěg mỹ: “ã régre tỹ ã krẽ tũ ra ter kỹ ã tỹ ti prũ fi tỹ prũg ke vẽ,” he mũ. “Ă tỹ ã régre mỹ ã krẽ han ke vẽ, fi ki,” he ja tóg nĩgtĩ, Moisés ti,” he ag tóg mũ, Saduceu ag, Jesus mỹ.

²⁵ “Kỹ ù tỹ jagnẽ mré pafa ja tỹ 7 (ke) vỹ nỹtĩgtĩ. Ag kãke tóg prũg mũ, hã ra tóg ã kósin tũ ra ter mũ. Kỹ ti jãvy tóg fi tỹ prũg mũ sir. Hã ra tóg ã kósin tũ ra ter mũ gé. Kỹ ti jãvy ù tóg fi tỹ prũg mũ gé sir.

²⁶ Hã ra tóg ã kósin tũ ra ter mũ gé, ti jãvy ù ke gé, hã ki ag kar vỹ kósin tũ ra kãgter kãn mũ sir.

²⁷ Kỹ vãhã ag kar prũ fi tóg ter mũ gé sir.

²⁸ Kỹ fag kãgter ja tá rĩnrĩr mãn kỹ fi hỹn mén tỹ 7 (ke) nĩnh mũ vẽ. Ag kar vỹ fi tỹ prũg ja nĩ mỹr. Hã kỹ tóg vẽnhmỹ nỹ, ag tỹ: rĩr mãn jé ěg tóg ke mũ, hen kỹ,” he ag tóg, Saduceu ag, Jesus mỹ.

²⁹ Hã ra Jesus tóg ag mỹ: “kygnẽ ãjag huri,” he mũ. “Ăjag pi(jé) Topẽ vỹ tỹ rán kỹ nĩ ki kanhró nỹtĩ”, ãjag pi(jé) Topẽ jykre ki kanhró nỹtĩ,” he tóg.

³⁰ “Ęg rĩnrĩr mãn kỹ ěg tóg prũg mãn ke tũ nĩ sir, kỹ ěg mén mãn ke tũ nĩ gé. Topẽ tỹ jẽgnẽ jafã ri ke ěg nỹtĩ, kanhkã tá,” he tóg.

³¹ “Kỹ Topẽ vỹ rá ù to jykren nĩ, ti tỹ ěg ter ja tá vỹn ke tó ti.

Topẽ hã ne tỹ vẽnén ja nĩ mỹr, hã kỹ tóg tag tó ja nĩ, ha mẽ.

³² “Abraão vỹ iso: Topẽ, he tĩ, Isaque ke gé, Jacó ke gé,” he ja tóg nĩ, Topẽ ti. Kãgter ag huri, Abraão, Isaque, Jacó. Hã ra Topẽ tóg: “tỹ inh ag Topẽ nĩ,” he ja nĩgtĩ, ag ter kar kỹ. Hã kỹ ag tóg rĩnrĩr nỹtĩ, Topẽ tỹ ùn rĩnrĩr nỹtĩ ag hã kri ke nĩn kỹ,” he tóg, Jesus ti.

³³ Kỹ ag tóg ti vỹ mẽg mũ sir, kỹ ti jykre tóg ag mỹ e pẽ tĩ, ti vỹ ti.

Topẽ tỹ ěg jyvẽn kãfór

(Mc 12.28-34; Lc 10.25-28)

³⁴ Kỹ Fariseu ag tóg mẽg mũ, Jesus tỹ Saduceu ag mỹ vỹ há han ja ti. Ti tỹ ag mỹ vỹ há han kỹ ag tỹ ti mỹ hẽ ri ken kỹ kafãn ke tóg tũ tĩ sir. Hã mẽg ag tóg mũ, Fariseu ag. Kỹ ag tóg Jesus to vẽnhmãn mũ sir.

³⁵ Kỹ ag kã ù tóg ti mré vỹ mũ. Topẽ vỹ to professor vẽ, ù tỹ Jesus mré vỹ mũ ti. Kỹ tóg Jesus mỹ:

³⁶ “Senhor,” he mũ. “Topẽ tỹ ěg jyvẽn tỹ hẽ nỹ hỹn ti tỹ ěg jyvẽn kar kãfór nỹnh mũ?” he tóg mũ sir.

³⁷ Kỹ Jesus tóg ti mỹ: “Topẽ to, ěg jóg mág to há távĩ nỹtĩmĩ, ti ki ge há han nĩ, ti to jykre pir nỹtĩmĩ,” he mũ.

³⁸ “Topẽ tỹ ěg jyvẽn kãfór kar hã vẽ.

³⁹ Kỹ ti tỹ ěg jyvẽn ù tóg hã ri ke nĩ gé, hã vỹ: ãjag régre ki rĩr nỹtĩmĩ, ãjag tỹ vẽn ki rĩr há han ri ke, he mũ,” he tóg.

⁴⁰ “Vẽn jyvẽn tag vỹ vẽn jyvẽn kar kãfór nỹtĩ. Régre ti nỹtĩ, Topẽ tỹ ěg jyvẽn kãfór nỹtĩ ti. Ęg tỹ tag ki króm kỹ

ĕg tóg Topĕ jykre ki króm kãn mũ. Ti tỹ ĕg jyvĕn mũ han kãn ĕg tóg mũ, Topĕ vĩ tó tĩ tỹ ĕg jyvĕn mũ mré hã, ĕg tỹ tag ki króm kỹ,” he tóg, Jesus ti.

Cristo tỹ tỹ Davi kósin nĩ
(Mc 12.35-37; Lc 20.41-44)

⁴¹ Hã ra Fariseu ag vỹ vĕnh mãn kỹ nỹtĩ, kỹ Jesus tóg ag ki jĕmĕ sór mũ gé sir.

⁴² Kỹ tóg ag mỹ: “Cristo to ãjag hĕ ri ke tĩ?” he mũ. “Ũ kósin nĕ hỹn, Cristo ti?” he tóg, Jesus ti. Kỹ ag tóg ti mỹ: “Davi kósin vĕ,” he mũ.

⁴³ Kỹ tóg ag mỹ: “hã ra Davi tóg ti to: inh Senhor, he ja nĩ,” he mũ. “Topĕ kuprĩg tỹ ti krĩn kỹ tóg tag tó ja nĩ, ha mĕ:

⁴⁴ “ĕg jóg tỹ Topĕ vỹ inh Senhor mỹ: “nĩ ra ver, inh pĕgja tá,” he mũ, “sỹ ã kato vãsãnsãn mũ ag tỹ ã krĕm vin ke vĕ, kỹ ag sigse vĕ sir. Tag jãvãnh nĩ ver,” he tóg mũ, Topĕ ti, inh Senhor mỹ,” he ja tóg nĩgtĩ, Davi ti,” he tóg mũ, Jesus ti.

⁴⁵ “Hã kỹ Davi tóg Cristo to: “inh Senhor,” he ja nĩ. Ti tỹ tỹ ti kósin nĩ ra ti kósin mỹ tỹ ti kri ke nĩnh mũ vĕ?” he tóg, Jesus ti. Ti tỹ Fariseu ag ki jĕmĕg mũn hã vĕ.

⁴⁶ Hã ra ag tỹ ti mỹ ne tónh ke tóg tũ tĩ, ag tỹ ti vĩ kafãn sór mũ ra. Vãhã ag tóg ti ki jĕmĕ sór mãn tũ nĩ. Ti kamĕg ag tóg mũ, hã kỹ ag tóg ti ki jĕmĕ sór mãn tũ nĩ.

23

Ón kỹ Topĕ vĩ to professor ag jykre

(Mc 12.38-39; Lc 11.43-46; 20.45-46)

¹ Kỹ Jesus tóg vĕnh kar kanhrãn mũ sir, ti mré mũ tĩ ag mré hã. Kỹ tóg ag mỹ:

² “Moisés vỹ ĕg jóg ag kanhrãn ja nĩgtĩ,” he mũ. “Ti nón Topĕ vĩ to professor ag tóg ĕg kanhrãn sór mũ, Fariseu ag ke gé,” he tóg.

³ “Ag tỹ ãjag mỹ nén tó mũ ĕn ki króm nĩ. Ag vĩ kri fimnĩ. Ag tỹ nén han mũ ri ke han tũg nĩ jãvo, ag jykre kórég ĕn han tũg nĩ. ãjag kanhrãn há han ag tóg tĩ, hã ra ag tóg ki króm sór tũ nĩgtĩ, ãjag vĩ há ĕn ki.

⁴ ãjag mỹ ag tóg vĕnh jykre kufy vin tĩ, hã ra ag hã tóg han sór tũ nĩgtĩ, vĕnh jykre kufy ĕn ti.

⁵ Ag tỹ nén ũ há han kỹ ag tóg tỹ ũn mág nỹtĩ sór mũ sir, vĕnh kar tỹ ag vigve jé. Ag tỹ Topĕ mré vĩ jé ag tóg ti vĩ rá tỹ ãjag nĩgĕ tógfĩg tĩ, ãjag kakã ke gé. Vĕsógfĩn ja tãpér tỹ ag tóg vĕsógfĩg tĩ. Topĕ jykre han jé ag tóg kur tóv mág tu tĩ gé.

⁶ Festa ki ag tóg jĕn vĕn sór tĩ. Vĕnh kanhrãn jafã krĕm ag tóg vĕnh kãpov kỹ nỹtĩ.

⁷ Cidade kuju ki vĕnh kar tóg ag mỹ: “ã mỹ há?” he tĩ, kỹ tóg ag mỹ sér tĩ. Kỹ ag tóg ag to: “Senhor,” he tĩ gé, kỹ tóg ag mỹ sér tĩ.

⁸ Ag jãvo jagnĕ mỹ: “Senhor,” he sór tũg nĩ, kỹ ag tỹ ãjag mỹ: “Senhor,” he mũ ra ag mỹ: “inh pi(jé) tỹ ũn mág nĩ,” hemnĩ. Ũn pir vỹ tỹ ãjag kri ke nĩ, hã vỹ: Topĕ, he mũ, jó ãjag tóg tỹ jagnĕ mré ke nỹtĩ.

⁹ Kỹ ũ mỹ: “ĕg jóg,” he tũg

nĩ gé, ěprã. Ûn pir vỹ tỹ ãjag jóg nĩ, hã vỹ: Topě, he mũ, kanhkã tá nĩ ěn ti.

¹⁰ Kỹ ù tỹ ãjag mỹ: “ěg kri tỹ ùn mág nĩmnĩ,” he kỹ ag mỹ: “vó, kenh ke tũ inh nĩ,” hemnĩ gé. Ûn pir vỹ ãjag kri tỹ ùn mág nĩ, hã vỹ: Cristo, he mũ.

¹¹ ãjag kãmĩ ùn mág ag jé ãjag ki rĩr há han, ãjag camarada tỹ ãjag ki rĩr há han tĩ ěn ri ke.

¹² ãjag tỹ tag ki vēsỹ tỹ ùn mág han sór nỹtĩn kỹ ãjag tóg tá térenh ke mũ, ha vemnĩ. ãjag tỹ hã ra: “tỹ inh ùn sĩ nĩ,” hen kỹ ãjag tóg tá jãprynh ke mũ, tỹ ùn mág ãjag nỹtĩnh mũ, ha vemnĩ,” he tóg, Jesus ti.

Topě vĩ to professor ag jag-tar ke

(Mc 12.40; Lc 11.39-42, 52; 20.47)

¹³ “Ón kỹ Topě vĩ to professor,” he tóg. “Fariseu,” he tóg. “Jykre régre ãjag nỹtĩ,” he tóg. “Topě vỹ ãjag ve kónãn,” he tóg. “Û ag tóg ù tỹ kanhkã tá nĩ ěn tỹ tỹ ěg pã'i nĩ ve sór nỹtĩ, hã ra ãjag tóg ag mỹ kanhkã ti nenh tĩ. Ag jãvo ãjag tóg ve sór tũ nĩgtĩ. ãjag tỹ kanhkã ve sór tũ nĩn kỹ ãjag tóg ù ag mỹ nenh tĩ gé, ag tỹ vég tũ nĩ jé, ãjag ri ke,” he tóg, Jesus ti.

¹⁴ “Ón kỹ Topě vĩ to professor,” he tóg. “Fariseu,” he tóg. “Jykre régre ãjag nỹtĩ,” he tóg. “Topě vỹ ãjag ve kónãn,” he tóg. “ãjag ne tóg ùn mén ter ja fag tũ mãn kãn tĩ'. Kar kỹ ãjag tóg ón kỹ Topě mré vĩ téj han mũgtĩ, ěg tỹ ãjag to: “há ag nỹtĩ,” he jé. Hã kỹ Topě vỹ ãjag

vóg kónãn kãfór han ke mũ,” he tóg, Jesus ti.

¹⁵ “Ón kỹ Topě vĩ to professor,” he tóg. “Fariseu,” he tóg. “Jykre régre ãjag nỹtĩ,” he tóg. “Topě vỹ ãjag ve kónãn,” he tóg. “ãjag ne tóg kuvar há ra mũ tĩ', ga mũ, goj mũ ke gé, ãjag tỹ ù tỹ Israel ag jykre han sór mũ ù jãvãnh jé. Hã jé ãjag tóg mũ mág han tĩ. Kỹ ãjag tỹ ù ven kỹ ãjag tóg ti tỹ Japo krě han mũ sir, ti tỹ ón kỹ Topě vĩ mẽ jé, ãjag ri kén, ti tỹ nũgme ki kutě jé, inferno ěn ki. Kỹ ti jykre pãno vỹ ãjag jykre pãno kãfór nỹ sir,” he tóg, Jesus ti.

¹⁶ “Topě vỹ ãjag ve kónãn mỹr,” he tóg. “Kývó ãjag nỹtĩ, hã ra ãjag tóg ù tỹ ki kagtĩg ag tatĩn mũ sór mũ. Hã kỹ ãjag tóg kygněg tĩ. Kỹ ãjag tóg ag kanhrãn kónãn tĩ. “ěg tỹ ón kỹ: tag han jé sóg ke mũ, he sór kỹ ěg tóg: “Topě jo ĩn krēm nĩ ěn vỹ ki kanhró nĩ,” henh ke mũ,” he ãjag tóg tĩ. “ěg tỹ hã ra: Topě jo ĩn krēm ouro tãn ěn vỹ ki kanhró nĩ, hen kỹ ěg tóg ón ke tũ nĩ,” he ãjag tóg tĩ gé.

¹⁷ Věnhmỹ ti nĩ, ãjag vĩ tag. Krĩ tũ ãjag tóg nỹtĩ, kývó ãjag tóg nỹtĩ. Ouro mỹ Topě jo ĩn kãfór nĩ? Vó'. Ouro vỹ tỹ Topě tũ nĩ, ti tỹ Topě jo ĩn krēm nĩn kỹ. Hã kỹ tóg tỹ Topě tũ kar nĩ sir, ouro ti, ti jo ĩn ti ke gé. Ón kỹ: “Topě hã vỹ ki kanhró nĩ,” he tũg nĩ,” he tóg, Jesus ti.

¹⁸ “ãjag vĩ věnhmỹ ù vỹ nĩ gé. “Ón kỹ ěg tóg: ěg tỹ mesa kri ùn mỹ nén ù pũn mũ ěn vỹ ki kanhró nĩ, henh ke mũ,” he

ājag tóg tĩ gé. “Ēg tỹ hã ra: ěg tỹ ũn mỹ ěg měg pũn tĩ ěn vỹ ki kanhró nĩ, hen kỹ ěg ón ke tũ nĩ,” he ājag tóg tĩ gé.

19 Vĕnhmỹ ti nĩ gé, ājag vĩ tag ti. Kyvó ājag nỹtĩ mỹr. Ēg tỹ Topĕ mỹ ěg měg pũn mũ mỹ mesa kãfór nĩ? Vó! Topĕ jo ĩn krĕm mesa kri ěg tóg ěg měg ti pũn tĩ, hã kỹ tóg Topĕ mỹ há tĩ, ěg měg ti, ěg tỹ ti jo ĩn tá ti mỹ mesa kri ti pũn tugrĩn.

20 Ājag tỹ Topĕ jo ĩn krĕm mesa tón kỹ, kỹ ājag tóg ěg tỹ ěg měg tỹ mesa ěn kri pũn mũ ěn tó tĩ gé.

21 Ājag tỹ Topĕ jo ĩn tón kỹ, kỹ ājag tóg Topĕ ti tó tĩ gé.

22 Ājag tỹ kanhkã tón kỹ, kỹ ājag tóg Topĕ nĩgia tó tĩ gé, kỹ ājag tóg Topĕ ti tó tĩ gé sir. Nén ũ pir vĕ, ti kar ti. Hã kỹ ón kỹ: Topĕ há vỹ ki kanhró nĩ,” he tũg nĩ,” he tóg, Jesus ti.

23 “Ón kỹ Topĕ vĩ to professor,” he tóg. “Fariseu,” he tóg. “Krĩ régre ājag nỹtĩ, kỹ Topĕ vỹ ājag ve kónãn,” he tóg. “Ón kỹ ājag tóg Topĕ mỹ ājag jakré ki dízimo vin tĩ. Ājag jakré tỹ hortelã tỹ 10 (ke) nỹtĩn kỹ ājag tóg Topĕ mỹ ũn pir nĩm tĩ, ājag jakré tỹ erva doce tỹ ke gé, ājag jakré tỹ cominho tỹ ke gé. Há ti nĩnh mũ vĕ. Hã ra ājag tóg ti tỹ ěg jyvĕn mũ ěn han tũ nĩgtĩ. Vĕnh jykre kuryj han tũ ājag tóg nĩgtĩ. Ũn jagãgtar ag jagãgtãn tũ ājag tóg nĩgtĩ. Topĕ vĩ kri fig tũ ājag tóg nĩgtĩ. Ājag tỹ ti vĩ ki króm tag tóg inh mỹ há nĩnh mũ vĕ, ha mě. Ājag tỹ ti tỹ ěg jyvĕn ki króm mré hã ājag

jakré ki dízimo vin (hã) ra tóg inh mỹ há nĩnh mũ vĕ, ha mě. Hã ra ājag tóg ki króm sór tũ nĩgtĩ.

24 Kyvó ājag nỹtĩ, hã ra ājag tóg ag tatĩn mũ sór nỹtĩ. Topĕ vĩ ũ ki króm sór ājag tóg tĩ, ti tỹ Topĕ mỹ tỹ nén ũ sĩ (hã) ra, kỹ ājag tóg ti vĩ ũ mrynhmranh tĩ, ti tỹ Topĕ mỹ kórég pĕ (hã) ra. Kỹ tóg goj ki ka ri ke nĩ. Ājag tỹ ka gón tũ nĩ jé ājag tóg kur ki kujĕg tĩ, kỹ tóg pan tĩ, goj ti. Hã ra ājag tóg cavalo tỹ goj ki ter mũ ra (ājag tóg) goj kórég ěn kron tĩ,” he tóg, Jesus ti.

25 “Ón kỹ Topĕ vĩ to professor,” he tóg. “Fariseu,” he tóg. “Krĩ régre ājag nỹtĩ, kỹ Topĕ vỹ ājag ve kónãn,” he tóg. “Copo venja kupég ājag tóg tĩ, pĕnky venja, hã ra ti kãtã tóg kavĕj nĩ. Kỹ ājag vỹ ge nỹgtĩ gé. Jykre há nĩ ve ājag tóg nỹgtĩ gé, hã ra ājag tóg vĕnh jykre pãno han tĩ, hã vỹ: jãnkamy to ag lograr he tĩ, he mũ, ājag prũ tũ fag mré nỹ tĩ, he mũ gé.

26 Kyvó ājag nỹtĩ, ājag tỹ tỹ Fariseu nỹtĩ ra. Ājag jykre pãno tovãnh nĩ, ājag jãnhkri nỹtĩ jé. Kỹ vãhã vĕnh kar vỹ ājag jykre há vég mũ,” he tóg, Jesus ti.

27 “Ón kỹ Topĕ vĩ to professor,” he tóg. “Fariseu,” he tóg. “Krĩ régre ājag nỹtĩ, kỹ Topĕ vỹ ājag ve kónãn,” he tóg. “Vĕnh kej sĩnvĩ ri ke ājag nỹtĩ. Sĩnvĩ nĩ ve ti nĩ, vĕnh kej ti, ěg tỹ pó tỹ kri tam kỹ, kar tinta tỹ pó to tĩn kỹ. Ti sĩnvĩ nĩ ve nĩ ra ti kãtã tóg kórég nĩ. Vĕser vỹ

krēm nỹ nĩ, vēser vag mũ ti, ti kuka.

²⁸ Tag ri ke ājag nỹtĩ. Há nĩ ve ājag nỹtĩ. Jykre kuryj nĩ ve ājag nỹtĩ, hã ra ājag kátá tóg kórég nĩ, ājag jykre régre nỹtĩn kỹ, ājag tỹ Topě vĩ ki króm sór tũ nỹtĩn kỹ mỹr, ha mẽ,” he tóg, Jesus ti.

Ůn jykre régre ag jagāgtar ke (Lc 11.47-51)

²⁹ “Ón kỹ Topě vĩ to profesor’,” he tóg. “Fariseu’,” he tóg. “Krĩ régre ājag nỹtĩ, kỹ Topě vỹ ājag ve kónān,” he tóg. “Ājag jóg'jóg ag vỹ Topě vĩ tó tĩ ag kãgtén ja nĩgtĩ. Jãvo ājag tóg ag kej sĩnvĩ han tĩ, ũn jykre kuryj han ja ag kej ti.

³⁰ Kỹ ājag tóg ag to: “ĕg tỹ ĕg jóg'jóg ag mré ga kri mũ hã ra ĕg tóg ag kãgtén ke tũ nĩ vē,” he ti. “Ag mré ĕg ag vóg ke tũ nĩ vē,” he ājag tóg tĩ, ón kỹ.

³¹ Hã ki ājag tóg ājag jóg'jóg ag tó tĩ. “ĕg jóg'jóg ag vỹ ag kãgtén, Topě vĩ tó tĩ ag,” he ājag tóg tĩ. “Ů tỹ ag kãgtén mũ ag krě'krě vỹ tỹ ĕg nỹtĩ,” he ājag tóg tĩ.

³² Kuri ājag jóg'jóg ag ri ke han nĩ, kuri ājag jóg'jóg ag tỹ ũn kãgtén ja tũ ĕn ag kãgtén nĩ, ājag tỹ tỹ ājag jóg'jóg ag krě'krě nỹtĩn kỹ,” he tóg, Jesus ti.

³³ “Pỹn ri ke ājag nỹtĩ, mĩg ri ke ājag nỹtĩ. Ājag pi(jé) nũgme ki vár ke tũ nĩnh ke mũ', inferno ki',” he tóg.

³⁴ “Hã kỹ sóg ājag mỹ Topě vĩ tó tĩ ag jěgněnh ke mũ, vēnh vĩ há tó mũ ag, Topě vĩ rán tĩ ag. Ag jěgně jé sóg ke mũ, ag tỹ ājag jyvěnh jé. Kỹ ājag tóg

ag kãgtén ke mũ gé, ha vemnĩ. Ka to ājag tóg ag sanh ke mũ. Ag mrãnmrãn jé ājag tóg ke mũ, ājag tỹ vēnh kanhrãn jafã krēm. Cidade kar ki ājag tóg ag nón mũnh mũ, ājag tỹ ag vóg kónān jé.

³⁵ Hã kỹ tóg ājag tỹ ũn jykre kuryj kar kãgtén mũ ri ke nĩ. Ůn tỹ hěnh ri ke ag kãgtén ag tóg huri, ĕprã ke ag, hã ra tóg ājag tỹ ag kãgtén kãn ri ke nĩ sir, Abel, Abel nón ke ag mré hã, Zacarias ĕn mré hã, Baraquias kósin ĕn. ĕn tỹ ājag tóg Topě jo ĩn jo ti tén ja nĩ, Topě mỹ nén ũ pũn jafã ĕn tá ājag tóg ti tén ja nĩ, Zacarias ĕn.

³⁶ Ājag mỹ sóg tó mũ, ha mẽ. Ājag hã to ti jũnh ke mũ, Topě ti, ājag jóg'jóg ag tỹ ag kãgtén tugrĩn, ājag tỹ ag kãgtén tugrĩn ke gé,” he tóg, Jesus ti.

Jesus tỹ Jerusalém tá ke ag to há nĩ (Lc 13.34-35)

³⁷ Kỹ tóg Jerusalém ki ke ag to vēmén mũ. Fe kaj han tóg, ag to, kỹ tóg: “Jerusalém tá ke ag mỹ sóg tag tó sór mũ, ha mẽ,” he mũ. “Topě vĩ tó tĩ ag kãgtén ag tóg tĩ. Topě tỹ ag mỹ ũn jěgněg tĩ ag pin ag tóg tĩ, pó tỹ, ag tỹ ag kãgtén jé. Isỹ ag vēnh mãn há tóg tĩ vē, isỹ ag ki rĩr jé, Jerusalém tá ke ag, hã kỹ sóg ag jé prěr tỹ hěnh ri ke han mũ. Garĩnh fi jykre ri ke han sór isóg mũ vē, ag mỹ. Garĩnh fi vỹ Ā krě kri jě nĩ, fi tỹ ag vēsỹrénh tũ nĩ jé ke vē. ĕn ri ke han sór sóg mũ vē, hã ra ag tóg ke jãvãnh nỹtĩ.

³⁸ Hã kÿ ag tóg ag jamã pũn kãn ke mũ, kÿ vãpũr vẽ sir. Û vỹ kãnmar tá nĩg mãn ke tũ nĩ ha, ag tỹ cidade kókén ja tá.

³⁹ Hã kÿ sóg ag mÿ ke mũ. Inh ve mãn ke tũ ag nĩ ha (mÿr). Kejën ag tóg iso: “Topẽ tỹ ti jẽnẽ ja vẽ,” henh ke mũ. “Topẽ vỹ ti ve há han, ti tỹ ti jiji tó kãtĩg kÿ,” he jé ag tóg ke mũ iso, kejën. Ên kã ag tóg inh ve mãn ke mũ,” he tóg, Jesus ti.

24

Topẽ jo ãn kókén kÿ nĩnh ke (Mc 13.1-2; Lc 21.5-6)

¹ Kÿ Jesus tóg Topẽ jo ãn tá kãkutẽ kÿ tĩ mũ sir. Kÿ ti mré mũ tĩ ag tóg ti tá junjun mũ, kÿ ag tóg ti mÿ Topẽ jo ãn ên ag venven mũ sir.

² Kÿ Jesus tóg ag mÿ: “ãjag mÿ pó tỹ ãn mág tag ag vigvæg mũ?” he mũ. “Kejën pó tóg jagnẽ kri nÿtĩ mãn ke tũ nĩ ha. Ag tỹ gũm ke kãn ke vẽ. Ki hã sóg tó mũ,” he tóg, Jesus ti.

Ëg jagtar ke

(Mc 13.3-13; Lc 21.7-19)

³ Kar kÿ tóg krĩ tỹ Oliveiras ra tĩ mũ sir. Ti tỹ tá nĩ kÿ ti mré mũ tĩ ag tóg vyr mÿ ti ki jêmẽnh kãmũ mũ. Kÿ ag tóg ti mÿ: “Ëg mÿ ti kurã ti tó,” he mũ. “Ëg tỹ ne ve kÿ ãg ti kurã ki kanhró nÿtĩnh mũ, ã kãtĩg mãn ke kurã ên ti, nén kar tũg ke kurã ên ti?” he ag tóg ti mÿ.

⁴ Kÿ tóg ag mÿ: “ker ù ãjag lograr hé hẽ!,” he mũ.

⁵ “Cristo vỹ tỹ inh nĩ,” he jé ag tóg ke mũ, inh jyjy tó kÿ. Û tỹ hên ri ke ag tóg tag tónh ke

mũ, kÿ ù tỹ hên ri ke ag tóg ag vĩ kri nĩm ke mũ.

⁶ Vẽnh génh to vême mẽ jé ãjag tóg ke mũ, tag ki vẽnh génh to, kuvar há tá vẽnh génh to ke gé. To jũrũn ke tũg nĩ, hã ra. Vẽnh génh enh ke vẽ. Hã ra kurã tỹ ãgno to hã ke vẽ ver.

⁷ Nação ag tỹ jagnẽ kato tẽgtẽnh ke vẽ, pã'i krêm ke ag tỹ pã'i ù krêm ke ag to jũnh ke vẽ. Kÿ ga tỹ ragra ke tỹ hên ri ke han ke vẽ, ãmã tỹ hên ri ke ki. Vẽnh tỹ tũ' henh ke vẽ gé.

⁸ Hã ra ãjag jagãgtar ke vẽnh ven vén vẽ ver,” he tóg, Jesus ti.

⁹ “Kar kÿ ãjag jagtar ke mũ, ãjag tỹ inh ki ge kÿ nÿtĩ tigrĩn. ãjag vóg kónãn jé ag tóg ke mũ, ãjag kãgtén jé ag tóg ke mũ gé. Nação kar vỹ ãjag to vĩ kónãn ke mũ gé, ãjag tỹ inh jiji tó tigrĩn.

¹⁰ Kÿ ù tỹ hên ri ke ag vỹ isogvãnh ke mũ sir, ên kã. ãjag mré ke fag tó jé ag tóg ke mũ, inh kato vãsãnsãn mũ ag mÿ, kÿ ag tóg jagnẽ to vĩ kónãn tãvĩ han ke mũ gé.

¹¹ Ón kÿ inh vĩ tó tĩ ag vỹ junjun ke mũ gé, kÿ ag tóg ùn e krĩnkrĩn ke mũ sir, ag tỹ isogvãnh jé.

¹² Kÿ vẽnh kar vỹ vẽnh jykre pãno to há nÿtĩnh mũ, hã kÿ ù tỹ ón kÿ iso há sĩ nÿtĩ ên ag tóg isogvãnh ke mũ gé, ùn e ag.

¹³ Hã ra ù tỹ isovãnh tũ pẽ ên ag tóg krenkren ke mũ.

¹⁴ Kÿ nação kar vỹ vẽnh vĩ sér mẽnh mũ, ga kar mĩ hã, kÿ ag tóg Topẽ tỹ tỹ ãg pã'i nĩnh ke ên mẽnh mũ ha. Ag tỹ mẽ kãn kÿ kurã tỹ ãgno vẽ sir,” he

tóg, Jesus ti.

Ēg jagāgtar mág pē ti
(Mc 13.14-23; Lc 21.20-24)

15 “Kejēn ājag tóg vāhā sir ājag tỹ nén (ũ) kamēg tĩ ēn venh ke mũ, ēg kavénh mũ ēn ti,” he tóg. “Topē vĩ tó tĩ tỹ Daniel vỹ ti tó ja nĩgtĩ. Topē jo ĩn tá tóg jēnh mũ, ēg kavénh mũ ēn ti,” he tóg, Jesus ti. (Ū tỹ vēnh rá tag to ke mũ ēn jé ki kanhró nĩ.)

16 Ājag tỹ ti ve ký ga tỹ Judéia ki ke kar ag jé vēnh pigjunh mũjēg, pānónh ra, fag mré hā.

17 Ū tỹ re tá nĩ ēn jé kāra rā tũg nĩ, ti ĩn ki, ti tũ mǎn jé.

18 Ký ũ tỹ ā japỹ tá jē ēn jé vỹn ke tũg nĩ gé, ti kur mǎn jé.

19 Ūn kufy fag jagtar mág ke vē, kurā ēn kā, ũ tỹ gĩr pygfām mũ fag ke gé.

20 Topē mré vĩmnĩ, ti tỹ kusa kā vēnh ven tũ nĩ jé, ti tỹ vēnhkán ke kurā kā vēnh ven tũ nĩ jé.

21 Jagtar mág tỹ ge han ja tũ ēg tóg nỹtĩ, Topē tỹ mundo han jǎn ki. Ký ēg ge han mǎn ke tũ nĩ gé, kar ký.

22 Ēg tỹ kurā ki jagtar ke mũ ēn vỹ e nỹtĩnh mũ vē, hā ra tóg térem ký nỹtĩ nĩ, Topē tỹ ũn kuprēg ja ēn ag tigrĩn. Ti tỹ térem tũ nĩ (mũ) ra ũ vỹ kren ke tũ nĩ vē, ag jagtar mág ēn to,” he tóg, Jesus ti.

23 “Ēn kā ũ tỹ ājag mỹ: Cristo vỹ tag kā jē nĩ, he mũ ra kri nĩm tũg nĩ, ag tỹ: tātá ti jē nĩ, he mũ ra.

24 Ón ký Cristo ag vỹ vēnh venven ke mũ, ón ký Topē vĩ tó tĩ ag ke gé. Ēg tỹ nén han

vānh hyn han jé ag tóg ke mũ, milagre tỹ hēn ri ke ti, ón ký Cristo ēn ag. Ag tỹ vēnh kar krĩn kónān sór vē, ag tỹ kygnē jé, Topē tỹ ũn kuprēg ja ēn ag mré hā, hēn ri ke mũn.

25 Ājag mỹ sóg tó kǎn mũ, ti kutēnh ke to hā,” he tóg, Jesus ti.

26 “Kejēn ag tóg ājag mỹ: ěmā kórég tá tóg jē, Cristo ti, henh ke mũ. Ra ti venh mũ tũg. Ag tỹ ājag mỹ: ĩn kátá tóg nĩ nĩ, he mũ ra kri fi tũg nĩ.

27 ĩnh kǎtĩg mǎn ke vỹ ta tỹ kóm kóm ke ri ke nĩ. Ti tỹ kóm kóm ke ký ēg tóg nén kar vég tĩ, rǎ jur ja tá, rǎ pur ja tá ke gé. ĩnh kǎtĩg mǎn ke vỹ ri ke nĩnh mũ. Tỹ sóg ěprā ke fi kósin nĩ,” he tóg, Jesus ti.

28 “Nén ũ ter nỹgja ri ke ti nĩ gé. Hā tá tóg vēnh mǎn tĩ, jǎtā ti. Tag ri ke ti nĩnh mũ, ĩnh kǎtĩg mǎn ke ti,” he tóg, Jesus ti.

Topē kósin kǎtĩg mǎn ke
(Mc 13.24-27; Lc 21.25-28)

29 “Jagtar ēn kar ký rǎ vỹ nhyr ke mũ, ký kysā vỹ jēngrē he mǎn ke tũ nĩ gé. Krĩg vỹ vár ke mũ gé, kanhkā krēm. Ēg tỹ kanhkā tá nén vég tũ kar ēn vỹ ragra ke kǎn mũ gé.

30 Ký vāhā ěprā ke fi kósin vỹ vēnh ven ke mũ, kanhkā tá. Ký ga kri mũ kar ag vỹ kygfỹ kǎn ke mũ sir, povo kar ti, ag tỹ ĩnh kǎtĩg ven ký. Kanhkā góg kǎmĩ sóg térenh ke mũ. Ký sóg tar pē nĩnh mũ, ha vemnĩ, ký ĩnh ve vỹ kókov pē nĩnh mũ gé.

31 Ký sóg isỹ jēgnē jafā ag jēgnēnh mũ, ag tỹ ténténtén

kynkyn jé, kÿ ag tóg isÿ ùn kuprêg mÿ ag jé prênprêr kân ke mÿ sir, ga kar mÿ hã, kanhkã fyr mÿ hã,” he tóg, Jesus ti.

Ka tÿ figueira to comparação

(Mc 13.28-31; Lc 21.29-33)

³² “Ka tÿ figueira to ki kanhrân nÿ, to comparação han kÿ. Ka tÿ figueira pë tánh kÿ, ti féj tãg han kÿ tóg kakó tÿ sir, êkré tygtánh kurã ti.

³³ Ri ke ti nÿ, ãjag tÿ inh kâtÿg mãn ke kurã ki kanhró nÿtÿnh ke mÿ ti. ãjag tÿ isÿ ãjag mÿ nén tó mÿ tag ve kÿ tóg sir kakó tÿnh ha, kakó tãvÿ tóg tÿnh ha, inh kâtÿg mãn ke ti, ên kã.

³⁴ Sÿ ke há vë, hã kÿ sóg tag tó mÿ, ha mē: ùri ùn rÿnrÿr mÿ ag tÿ nén kar ên venh ke vë, ag kãgter ke to hã.

³⁵ Kanhkã vÿ tÿ' henh ke mÿ, ga ti ke gé. Jávo inh vÿ tÿ tÿ' henh ke tÿ nÿ,” he tóg, Jesus ti.

Jesus kâtÿg mãn ke kurã

(Mc 13.32-37; Lc 17.26-30, 34-36)

³⁶ “Hã ra ù pi(jé) isÿ kurã ki kâtÿg mãn ke mÿ ki kanhró nÿ', hora ki ke gé. Topê tÿ jëgnê jafã ag pi(jé) ki kanhró nÿtÿ'. Inh pi(jé) ki kanhró nÿ gé. Êg jóg mág hã vÿ ã pin kÿ ki kanhró nÿ, kurã kã nén kutênh ke mÿ ên ki.

³⁷ Inh kâtÿg mãn ke kurã vÿ Noé tÿ ga mÿ tÿg ja ên ri ke nÿnh mÿ.

³⁸ Ta kutê to hã ag tóg jën ja nÿgtÿ, kron ja nÿgtÿ, jagnê tÿ prÿg ja nÿgtÿ, jagnê tÿ mén ja nÿgtÿ, Noé mré ke ag. Ên kã

kejën Noé tóg barco tÿ ñn kãra rã mÿ.

³⁹ Hã ra tóg ag mÿ tÿ nén ù tÿ tÿ, ti tÿ barco kãra rã mÿ ti. Kejën ta tóg kutê mÿ, kÿ goj tóg var mÿ sir. Kÿ ag tóg kãgter kân mÿ sir vãhã. Ge ti nÿnh mÿ, êprã ke fi kósin kâtÿg mãn kÿ, inh kâtÿg mãn kÿ mÿr.

⁴⁰ Ên kã ùn régre ag vÿ ãjag japy ki rãnrãj ke mÿ. Inh kâtÿg mãn kÿ sóg ùn pir jé prêr ke mÿ, jávo ti régre vÿ tá jën mÿ sir.

⁴¹ ùn régre fag vÿ êgtynyn nÿtÿnh mÿ, jagnê mré, kurã ên kã. Kÿ sóg ùn pir fi jé prêr ke mÿ, jávo fi régre fi vÿ tá jën mÿ gé sir.

⁴² Vênh ki êmêmnÿ, nÿr tÿ ri ke han nÿ. Inh kâtÿg ke hora ki kagtÿg ãjag tóg nÿtÿ. ãjag Senhor vÿ tÿ inh nÿ,” he tóg.

⁴³ “Kÿ tag to jykrén nÿ, ha mē. Êg pi(jé) ù tÿ êg tÿ nén péju sór mÿ kâtÿg ke ki kanhró nÿtÿ'. Êg tÿ ti kâtÿg ke tÿ hora ki kanhró nÿtÿ ra êg tóg to êg tÿ nén ki rÿr mÿ vë, kÿ ù pi(jé) êg ñn kãra rãnh ke mÿ vë'. Hã ra êg tóg ki kagtÿg nÿtÿ.

⁴⁴ Ge ti nÿ, inh kâtÿg mãn ke ti. Ha vënh kân, ha vënh ki êmê. Êprã ke fi kósin vÿ kâtÿg ke mÿ, ãjag tÿ inh kâtÿg ke to jykrén tÿ ra,” he tóg, Jesus ti.

Ûn camarada ag to comparação

(Lc 12.41-48)

⁴⁵ Kÿ tóg ag mÿ ã kâtÿg mãn ke tó mãn mÿ. “Kejën patrão ù tóg hê ra tÿg sór mÿ,” he tóg. “Kÿ tóg ã camarada ag kã ù tÿ pã'i han mÿ, ti tÿ ti jo ã

mré camarada ag ki rĩr jé. Ũ tỹ ã rãnrãj ki rĩr há han tĩ ěn kuprẽg tóg mũ, ti tỹ ag mũ vỹjẽn ven jé, vỹjẽn ke horan ki.

⁴⁶ Ti tỹ ag ki rĩr há han kỹ ti patrão vỹ ti mũ vĩ há han ke mũ, ti kãtĩg mãn ken kã.

⁴⁷ Ti tỹ pã'i han jé tóg ke mũ, ti tỹ ti tũ ki rĩr kãn jé sir. Ki hã sóg tó mũ, ha mẽ.

⁴⁸ Kejẽn ti camarada ũ tóg hã ra jykre pãno nĩ. Kỹ tóg tag to jykrén mũ. “Ĕg patrão vỹ kãtĩg vãnh han mũ,” he tóg mũ sir, ũn jykre pãno ěn.

⁴⁹ Kỹ tóg ã mré camarada ag vóg kónãn mũ sir, ag mrãnmrãn kỹ. Kỹ tóg ũn kronkron tĩ ag mré kron mũ gé sir, jẽn mág han tóg mũ gé sir.

⁵⁰ Kỹ ti patrão vỹ ti kãnhmỹ kãtĩg ke mũ sir, ti tỹ ti kãtĩg ke kurã ki kagtĩg nĩn kỹ, ti horan ke gé, ũn jykre kórég ěn ti.

⁵¹ Ā kãtĩg kỹ tóg ti kapãn ri ke han ke mũ sir, kỹ tóg ti fón ke mũ gé sir, ũn jykre régre ag mré. Tá ag tóg jagtar ke mũ, ãjag jã tỹ ag tóg gyngyn ke mũ, tỹ ag tóg gangan ke mũ, jũ kỹ, ũn jykre kórég ěn ag,” he tóg, Jesus ti. Ti tỹ ũ tỹ ti rãnrãj han kónãn mũ kãmén hã vẽ.

25

*Tátãg tỹ 10 (ke) fag to com-
paração*

¹ Kỹ Jesus tóg ag mũ ã kãtĩg mãn ke ěn kãmén mãn mũ, kỹ tóg ag mũ: “ěn kã ũ tỹ kanhkã tá nĩ ěn tỹ tỹ ěg pã'i nĩnh ke vỹ ge nĩnh mũ, ha mẽ,” he mũ.

“Tátãg fag ri ke ti nĩnh mũ. Ũ

tỹ 10 (ke) fag vỹ nỹtĩ, tátãg fag. Vẽnh kyprũg ve jé fag tóg lampião vyn kỹ mũ mũ, ũn prũg mũ ěn kato.

² Fag tỹ 5 (ke) fag vỹ jykre kórég nỹtĩ, jãvo ũ fag vỹ jykre há nỹtĩ, ũ tỹ 5 (ke) ũ fag.

³ Kỹ ũn jykre kórég fag vỹ vyrmỹ azeite ma mũ ja tũ nĩ, hã ra tóg sĩn kỹ lampião kãkã nĩ nĩ.

⁴ Fag jãvo ũn jykre há fag vỹ azeite ma mũ mũ, vyrmỹ.

⁵ Hã ra tóg kãtĩg vãnh han mũ, ũn prũg mũ ti. Kỹ tóg kejẽn fag nũgnũr há tĩ sir, ti jun tũg ki, kỹ fag tóg nũgnũr kãn mũ sir.

⁶ Meia noite ki vẽnh vĩ tóg mẽ há tĩ, kỹ tóg: “!..nĩgnĩ ra..!” he mũ. “!..Ũn prũg mũ vỹ kãteg..!” he tóg. “!..Ha ti venh kãmũ jeg..!” he tóg.

⁷ Kỹ tátãg ěn fag vỹ nĩgnĩg kỹ fag lampião gruggrug mũ sir.

⁸ Kỹ ũn jykre kórég fag vỹ ũn jykre há fag mũ azeite to vĩ mũ. “Ĕg mũ ãjag azeite vẽnh kãpãm. Nhyn ke ti nỹtĩ ha, ěg lampião ti,” he fag tóg mũ.

⁹ Hã ra ũn jykre há fag tóg fag mũ: “vó!,” he mũ. “Ĕg tỹ ãjag mũ vẽnh kãpãm kỹ tóg ěg mũ kã kyn ke mũ gé, ãjag ri kén. Negócio ra mũjẽg, ãjag tỹ azeite ven jé,” he fag tóg mũ.

¹⁰ Kỹ fag tóg mũ mũ. Fag gunja tá tóg jun mũ sir, ũn prũg mũ ti. Kỹ fag tóg ti mré mũ mũ sir, ũn lampião gru nỹtĩ fag. Vẽnh kyprũg ve jé fag tóg mũ mũ, kỹ ag tóg jãnkã ti nĩfẽnũ mũ sir, ũn jykre kórég fag jy.

¹¹ Kỹ vãhã tátãg ũ fag vỹ tá

junjun mũ gé sir, kÿ fag tóg ti mÿ: “Senhor', Senhor',” he mũ sir. “Ëg mÿ nón,” he fag tóg.

12 Hã ra tóg fag mÿ: “ãjag ki kagtÿg sóg nĩ, mÿr, ha mẽ,” he mũ,” he tóg, Jesus ti.

13 “Hã kÿ sóg ãjag mÿ: vënh ki rÿr, nÿr tũ ri ke han kÿ, he mũ. Kãtÿg jé sóg ke mũ. Hã ra ãjag tóg inh kãtÿg ke kurã ki kagtÿg nÿtĩ, inh hora ki ke gé. Hã kÿ inh jãvãnh to krónh ke tũg nĩ,” he tóg, Jesus ti.

Û camarada ag to comparação

(Lc 19.11-27)

14 Kÿ Jesus tóg: “inh kãtÿg mãn ke vÿ tag ri ke nÿnh mũ gé, ha mẽ,” he mũ. “Kejën ù tóg ga ù venh tÿg sór mũ, kÿ tóg ã camarada ag jé prër mũ, ti tÿ ag mÿ ã tÿ nén kar vënh kãpãm jé, ã jãnkamy kar.

15 Û mÿ tóg jãnkamy kãmur tÿ 5 (ke) vin mũ, ù mÿ tóg ti kãmur régre vin mũ, ù mÿ tóg ti kãmur pir nĩm mũ. Ûn krĩ há ãn mÿ tóg ti kãmur e vin mũ, ùn krĩ pãgsĩ ãn mÿ tóg ti kãmur pir nĩm mũ.

16 Kÿ ù tÿ ti kãmur tÿ 5 (ke) mãg mũ ãn vÿ tĩ mũ. Jãnkamy ãn tÿ rãnrãj mág han kÿ tóg kejën ù tÿ 5 (ke) ù mãg mũ, kÿ ti tũ vÿ tÿ ti kãmur tÿ 10 (ke) nÿtĩ sir.

17 Kÿ ù tÿ ti kãmur régre mãg mũ ãn vÿ tÿ rãnrãj mũ gé. Ti kãmur régre ù mãg tóg mũ sir, ã rãnrãj to, kÿ tóg tÿ 4 (ke) nÿtĩ.

18 Ag jãvo ù tÿ ti kãmur pir mãg mũ ãn vÿ ã tũ nég tĩ mũ

sir. Æ patrão tÿ ti mÿ jãnkamy nĩm ãn nég tóg mũ, mÿr, ha mẽ.

19 Kejën ag patrão vÿ vÿn ke mũ sir, si há tĩ kÿ.

20 Kÿ ti camarada tóg ti venh kãtĩ mũ, ù tÿ ti kãmur tÿ 5 (ke) mãn ja ãn ti. Kÿ tóg ti mÿ ù tÿ 5 (ke) ù ãn ven mũ sir, ti ganho ti, kÿ tóg ã patrão mÿ: “ù tÿ 5 (ke) vin ã tóg inh mÿ,” he mũ, “hã ra sóg tÿ rãnrãj kÿ ù tÿ 5 (ke) ù mãn ja nĩ,” he tóg.

21 Kÿ ti patrão tóg ti mÿ: “jykre há ã tóg nĩ,” he mũ. “Æ tũ ki rÿr há han ã tóg nĩ mÿr. Nén sĩ ki rÿr há han ja ã tóg nÿgtĩ, kÿ sóg ã mÿ nén ù e vin sór mũ, ã tÿ ki rÿr jé. Æ patrão fe tÿ mrin ke ã mÿr. Hã inh mré kãtÿg,” he tóg, ti patrão ti.

22 Kÿ ti camarada ù tóg jun mũ gé, ù tÿ ti kãmur régre mãn ja ãn ti. Kÿ tóg ti mÿ: “inh mÿ ã tóg ti kãmur régre vin ja nĩ,” he mũ. “Tÿ rãnrãj kÿ sóg ùn régre ù mã. Hã vë ha,” he tóg.

23 Kÿ ti patrão tóg ti mÿ: “jykre há ã tóg nĩ,” he mũ gé. “Æ tũ ki rÿr há han ã tóg nĩ mÿr. Nén sĩ ki rÿr há han ja ã tóg nÿgtĩ, kÿ sóg ã mÿ nén ù e vin sór mũ, ã tÿ ki rÿr jé. Æ patrão fe tÿ mrin ke ã mÿr. Hã inh mré kãtÿg,” he tóg, ti patrão ti.

24 Kÿ ti camarada ù tóg jun mũ gé sir, ù tÿ ti kãmur pir mãn ja ãn ti. Kÿ tóg ti mÿ: “Senhor',” he mũ. “Vĩ tar han ã tóg tÿgtĩ, ki kanhró sóg nĩ. Æ tÿ nén krãn ja tũ ãn mãg ã tóg tÿgtĩ, ã tÿ ti fy vãm tũ ra ã tóg ti kanë ve sór tÿgtĩ.

25 Hã kÿ sóg mũmëg kÿ ti kãmur né. Æ tũ ti hã vë ha,” he

tóg, ti patrão mÿ.

²⁶ Kÿ ti patrão tóg ti mÿ: “jykre kórég ã tóg nÿ,” he mÿ. “Á tú ki rÿr kónãn ã tóg nÿ mÿr. Inh mÿ isÿ nén krãn ja tú mäg tÿgtÿ? Inh mÿ isÿ nén ù fy vãm tú ra ti kanẽ ve sór tÿgtÿ? Hã ki kanhró ã mÿ nÿ?”

²⁷ Á tÿ ne jé inh jãnkamy tÿ banco ki rãnrãj tÿ ag mÿ vin ja tú nÿ nẽ? Kÿ sÿ ti juro ven kÿ sóg isÿ kãfór mãn ke vë vë.

²⁸ Ti tú ma ra,” he tóg mÿ sir, polícia ag mÿ. “Inh camarada ù mÿ nÿm, sÿ ti mÿ nÿm ja ên ti. Û tÿ ti kãmur tÿ 10 (ke) mäg mÿ ên mÿ nÿm, ti kãmur pir tÿ, sÿ ùn jykre kórég tag mÿ nén nÿm ja ên ti,” he tóg, ag patrão ti, polícia ag mÿ,” he tóg, Jesus ti.

²⁹ “Ge ti nÿ. Ûn tú mág vÿ mãn mãn mÿ, kÿ tóg ti mÿ tú' henh ke tú pë nÿ. Ûn tú tú ên tú sÿ mãn jé ag tóg ke mÿ, kÿ tóg tÿ tú tú nÿ sir,” he tóg, patrão ti.

³⁰ “Kÿ inh camarada kórég tag fón, kutyg ja ên kãkã. Tá ag tóg jagtar tÿ, ãjag jã tÿ ag gyngyn ke tÿ, vëso jÿ kÿ,” he tóg, patrão ti,” he tóg, Jesus ti, ã tÿ ã kãtÿg mãn ke kãmén kÿ.

Jesus tÿ vënh kar jykre tugnÿm ke

³¹ Kÿ Jesus tóg ag mÿ: “ẽprã ke fi kósín ên kãtÿg mãn kÿn ge nÿnh mÿ, ha mẽ,” he mÿ. “Inh kãtÿg mãn kÿ sóg tar pë kãtÿ mÿ, sÿnvÿ. Isÿ jëgnë jafã ag vÿ inh mré kãmũnh ke mÿ. Kÿ sóg inh nÿgja kri nÿnh ke mÿ sir, kÿ inh jykre tar vÿ vënh ven ke mÿ.

³² Kÿ ẽprã ke kar vÿ inh jo vënh mãn kãn ke mÿ sir. Kÿ sóg vënh kar vënh kãpãm ke mÿ sir, ha mẽ. Carneiro mré cabrito ki rÿr tÿ ên vÿ kejën ã mëg vënh kãpãm tÿ. Carneiro ag tÿ tóg vÿrmÿ vin tÿ, cabrito ag tÿ ke gé.

³³ Kÿ tóg carneiro ag tÿ ã pëgja tá vin tÿ, jó tóg cabrito ag tÿ ã jakãnh tá vin tÿ. Tag ri ke han jé sóg ke mÿ.

³⁴ Tÿ sóg vënh kar kri pã'i mág nÿnh mÿ, kurã ên kã. Kÿ sóg inh pëgja tá nÿtÿnh ke mÿ ag mÿ: “ha inh mré kãmũ jëg,” henh ke mÿ. “Inh panh vÿ ãjag to vÿ há han mÿ mÿr. Topë tÿ ga tãg mré kanhkã tãg venh kãmũ jëg. Topë tÿ ga han kurã ên kã tóg ãjag hã kuprëg ja nÿ, ãjag tÿ ti tÿ ga tãg mré kanhkã tãg tag ve jé.

³⁵ Kejën sóg kókÿr nÿ ja nÿgtÿ, kÿ ãjag tóg inh jën. Isÿ kron há nÿn kÿ ãjag tóg inh mÿ goj jun. Isÿ ãjag ïn tá jun kÿ ãjag tóg inh mÿ: “ha kãrã, ëg mré nÿ,” he ja nÿgtÿ gé.

³⁶ Inh kur tú nÿn kÿ ãjag tóg inh mÿ kur vin. Inh kaga nÿn kÿ ãjag tóg inh venh kãmũ ja nÿgtÿ. Ise kÿ jë kÿ ãjag tóg inh venh kãmũ ja nÿgtÿ gé,” he jé sóg ke mÿ ag mÿ,” he tóg.

³⁷ “Kÿ ùn jykre kuryj tag ag vÿ inh mÿ: “Senhor,” henh ke mÿ. “Ëg hẽ kã ã kókÿr vé, ëg tÿ ã mÿ vëjën ven jé? Ëg hẽ kã ã kron há tÿ vé, ëg tÿ ã mÿ goj ven jé?”

³⁸ Á hẽ kã ëg ïn tá jun, ëg tÿ ã mÿ: “ha kãrã,” he jé? Ëg hẽ kã ã kur tú vé, ëg tÿ ã mÿ kur vin jé?

39 Ëg hẽ kã ã kaga vé, ãg hẽ kã ã se vé, ãg tỹ ã venh kãmũ jé? Ki kagtĩg ãg nỹti," he jé ag tóg ke mũ, inh mỹ.

40 Kỹ sóg ag mỹ: "ũn jagãgtar ag jagãgtãn ja ãjag tóg nĩgtĩ, inh mré ke ag, hã ra tóg ãjag tỹ inh jagãgtãn ri ke nĩ, ãjag tỹ ag jagãgtãn ja ti, ki hã sóg tó mũ," he jé sóg ke mũ, isỹ tỹ pã'i mág nĩn kỹ," he tóg, Jesus ti.

41 "Kỹ sóg inh jakãnh tá nỹti ag mỹ: "ha mũjẽg, tãra," henh ke mũ gé. "Inh panh vỹ ãjag mỹ vĩ kónãnh. Pĩ nhyr vãnħ ra mũjẽg. Nén-Kórég mỹ tóg kar kỹ nĩ, pĩ nhyr vãnħ ãn ti, Nén-Kórég tỹ jẽgnẽ jafã ag mỹ tóg kar kỹ nĩ gé. Ën ra mũjẽg.

42 Inh kókĩr ra ãjag pi(jé) inh mỹ vỹjẽn ven'. Isỹ kron há ra ãjag pi(jé) inh mỹ goj jun'.

43 Isỹ ãjag ĩn tá jun mũ ra ãjag pi(jé) inh mỹ: "ha kãrã," he ja nĩgtĩ'. Isỹ kur tũ ra ãjag pi(jé) inh mỹ ũ vin'. Inh kaga nỹ ra, ise kỹ jẽ ra ãjag pi(jé) inh venh kãmũ ja nĩgtĩ'," he jé sóg ke mũ," he tóg.

44 "Kỹ ag tóg inh mỹ kenh ke mũ gé. "Senhor'," he jé ag tóg ke mũ gé. "Ëg hẽ kã ã kókĩr vé, ã kron ha ti? ã hẽ kã ãg ĩn tá jun'? Ëg hẽ kã ã kur tũ vé', ã kaga ti', ã se ti', ãg tỹ ã ki rĩr jé? Ki kagtĩg ãg nỹti," he jé ag tóg ke mũ gé.

45 Kỹ sóg ag mỹ: "ũn jagãgtar ag jagãgtãn ja tũ ãjag tóg nĩgtĩ," henh ke mũ, "hã kỹ tóg ãjag tỹ inh jagãgtãn tũ ri ke nĩ, ki hã sóg tó mũ, mỹr, ha mẽ," he jé sóg ke mũ.

46 Kỹ ag tóg jagãgtar kenh ke mũ, hã ra tóg tũ' henh ke tũ nĩ, ag jagtar ke ti. Ag jãvo ũn jykre há ag vỹ rĩr krỹg ja tũ venh ke mũ," he tóg, Jesus ti.

26

Ag tỹ Jesus tén sór

(Mc 14.1-2; Lc 22.1-2; Jo 11.45-53)

1 Vãhã tóg tó kãn ja nĩgtĩ, ti tỹ nén tónħ ke ja ti, Jesus ti. Kỹ tóg ã mré mũ tĩ ag mỹ:

2 "kurã régre tũg kỹ tóg ãg festa mág tỹ Páscoa nĩ," he mũ. "Ën kã ag tóg ãprã ke fi kósin ti senh ke mũ, kỹ ag tóg ti fẽg ke mũ, ka to ti sa jé. Inh hã vỹ," he tóg, Jesus ti.

3 Hã ra Topẽ tũ ki rĩr tĩ to pã'i mág ag vỹ vẽnħ mãn mũ sir, Topẽ vĩ to professor ag mré hã, kófa ag mré ke gé. Pã'i mág ĩn tá ag tóg vẽnħ mãn mũ sir, pã'i ãn jijin hã vỹ: Caifás, he mũ.

4 Kỹ ag tóg Jesus se to jykrén mũ sir. Ag tỹ ti vatãnh tá ti kãgmĩ sór vỹ, ti se jé, ti tén jé.

5 Kỹ ag tóg to jykrén kỹ: "festa tag to mẽ jé ãg tóg ke mũ ver," he mũ. "Ëg tỹ festa kã ti se kỹ vẽnħ génh mág hỹn tóg kutẽnħ mũ, ha vemni," he ag tóg mũ sir jagnẽ mỹ.

Jesus tỹ Betânia tá nĩ

(Mc 14.3-9; Jo 12.1-8)

6 Ën kã Jesus tóg kejẽn ãmã tỹ Betânia tá nĩ nĩ, Simão ĩn krẽm, vẽnħ kaga kren vãnħ han ja ãn ĩn krẽm.

7 Ti jẽg nĩ ra ũ fi tóg tá jun mũ, garrafa mãn kỹ. Pó kupri tânãj tỹ tóg há nĩ, garrafa ti. Ti ki nĩ vỹ tỹ nén kar tãg nĩ, ger

há ên, ùn kaja e ên. Ti gãnh tãg fi tóg mũ, ger há ên tỹ.

⁸ Kỹ ti mré mũ tĩ ag tóg fi vég mũ, hã ra tóg ag mỹ kórég nĩ. Fi to jũ kỹ ag tóg: “fi tỹ ne jé nén kaja e kókén nê?” he mũ.

⁹ “Êg tỹ ger há tag fón ke vê vê, kaja há to, êg tỹ ùn jagãgtar ag mỹ vin jé,” he ag tóg mũ.

¹⁰ Kỹ Jesus tóg mêng mũ, ag vĩ ti, kỹ tóg ag mỹ: “ãjag tỹ ne jé fi mỹ kaga han nê?” he mũ. “Inh jykre ki króm fi tóg.

¹¹ Inh hã tóg ver nĩ sĩ han mũ, ãjag mré, jãvo ùn jagãgtar ag vĩ kurã kar ki ãjag mré nỹtĩ nĩ.

¹² Fi tỹ inh kãn vê, ag tỹ vênh kej tá inh fón jé hã jé fi tóg ger há tag tỹ inh kri kujêg.

¹³ Ag tỹ vênh vĩ sér tugtón kỹ ag tóg fi tỹ nén han mũ tag tónh ke mũ gé, ga kar mũ hã, kỹ vênh kar vĩ fi tỹ nén han mũ mênh ke mũ, ha vemnĩ. Ki hã sóg tó mũ,” he tóg, Jesus ti.

Judas tỹ pã'i ag mỹ Jesus ven ke

(Mc 14.10-11; Lc 22.3-6)

¹⁴ Kar kỹ ù tỹ 12 (ke) ag kã ù tóg Topê tũ ki rĩr tĩ to pã'i ag venh tĩ mũ. Ûn tũg mũ jyjyn hã vĩ: Judas Iscariotes, he mũ.

¹⁵ Tá jun kỹ tóg ag mỹ: “sỹ ãjag mỹ Jesus ven ke vê, ãjag tỹ ti se jé,” he mũ. “Ãjag mỹ inh mỹ kajãm ke tũ, sỹ ãjag mỹ ti ven ke ti?” he tóg. Kỹ ag tóg ti mỹ: “vó,” he kỹ jãnkamy tỹ 30 (ke) tỹ kajãm mũ sir.

¹⁶ Ti tỹ jãnkamy ên mãn kar kỹ tóg to jykren mũ. “Inh hỹn hê ri kenh mũ, isỹ vênh kar vatánh tá ag mỹ Jesus ven jé?”

he tóg mũ sir, Judas ti, ón kỹ Jesus mré tĩ mũ ên ti.

Jesus tỹ Páscoa ko

(Mc 14.12-21; Lc 22.7-14, 21-23; Jo 13.21-30)

¹⁷ Kejên tóg pão jêgia tũ konh ke kurã tá krỹg mũ, kỹ Jesus mré mũ tĩ ag tóg ti mỹ: “êg hỹn hê tá ã mỹ carneiro sĩ tãnh mũ, êg tỹ kon jé?” he mũ.

¹⁸ Kỹ tóg ag mỹ: “êmã mág tag ra mũjêg,” he mũ. “Tá ù tóg nĩ nĩ. Ti mỹ: “êg Senhor vĩ ã mỹ vênh vĩ jênêg mũ,” hemnĩ. “Inh kurã vĩ kakó tĩ ha, kỹ sỹ ã ãn krêm Páscoa konh há tóg tĩ, inh mré mũ tĩ ag mré,” he tóg mũ,” hemnĩ ti mỹ,” he tóg, Jesus ti.

¹⁹ Kỹ ag tóg mũ mũ sir, ti mré mũ tĩ ag. Ti tỹ ag mỹ tó mũ han ag tóg mũ sir. Cordeiro tãnh ag tóg mũ sir, ag tỹ Páscoa kã ko tĩ ên.

²⁰ Rã pur kar kỹ tóg tá jun kỹ ù tỹ 12 (ke) ag mré nĩ mũ sir, jên jé.

²¹ Ag jên kã tóg ag mỹ: “ãjag kãmĩ ù tóg pã'i ag mỹ inh ven ke mũ, ag tỹ ise jé, ki hã sóg tó mũ,” he mũ.

²² Kỹ tóg ag fe kaj tĩ sir, kỹ ag tóg ti mỹ: “inh mỹ vó'? Inh mỹ vó'?” he kãn mũ sir.

²³ Kỹ tóg ag mỹ: “ũ tỹ inh mré pão tỹ kã punpun mũ ên hã vê,” he mũ. “Û tỹ ã nĩgé tỹ pênky kãki pão tỹ kã punpun mũ ên hã vê. Ên hã vĩ ag mỹ inh ven ke mũ,” he tóg.

²⁴ “Tĩg jé sóg ke mũ, isỹ tỹ êprã ke fi kósín nĩn kỹ. Hã kỹ tóg rán kỹ nĩ, isĩg ke ti. Hã ra ù tỹ ag mỹ inh ven ke mũ ên mỹ tóg vĩ kónãn tãvĩ han ke mũ,

Topê ti. Ti tỹ mur ja tũ nĩ ra tóg ti mỹ há tí vễ,” he tóg, Jesus ti.

²⁵ Kỹ Judas tóg ti mỹ ke mũ gé sir, ỹ tỹ pã'i ag mỹ ti ven ke mũ ên ti. Ên tóg ti mỹ: “Senhor', inh hã mỹ'?” he mũ gé. Kỹ tóg ti mỹ: “ki hã ã tóg tó mũ,” he mũ, Jesus ti.

Santa Ceia

(Mc 14.22-26; Lc 22.15-20; 1Co 11.23-25)

²⁶ Kỹ ag tóg jêg mũ. Ag jên nỹtĩ ra Jesus tóg êmĩ mäg mũ sir. Topê mré tóg vĩ mũ sir, êmĩ to, kỹ tóg vênh kã kugpãn kỹ ag mỹ vênh kãpãm mũ sir, ti mré mũ tĩ ag mỹ. Kỹ tóg: “té, ha kó,” he mũ. “Inh hã vễ,” he tóg, êmĩ to.

²⁷ Kar kỹ tóg copo vâg mũ gé sir, vinho tỹ ki jên kỹ. To tóg Topê mré vĩ mũ gé. Ag mỹ copo jun kỹ tóg: “ha kronkron,” he mũ.

²⁸ “Inh kyvénh hã vễ,” he tóg, vinho to. “Inh kyvénh tỹ vênh kar jagfy kutên hã vễ. Sỹ vênh e mré vênh jykre tãg han to ke hã vễ, hã vĩ tỹ inh kyvénh ti nĩ. Inh kyvénh tag to Topê vĩ ãjag mỹ vênh pãte fón ke mũ, ãjag tỹ ti vĩ mranh ja ti,” he tóg.

²⁹ “Ha mẽ, uva me kron măn ke tũ inh nĩ ha. Kejên sóg kron măn ke mũ, inh panh tỹ tỹ êg pã'i nĩnh ke kurã ên kã. Kỹ sóg ãjag mré kron măn ke mũ, ha vemnĩ,” he tóg, Jesus ti.

³⁰ Kỹ ag tóg jãn mũ gé sir, ag jên kar kỹ. Ag tỹ Topê jé tó kar kỹ ag tóg krĩ tỹ Oliveiras ra mũ mũ sir.

Jesus tỹ Pedro mỹ tó

(Mc 14.27-31; Lc 22.31-34; Jo 13.36-38)

³¹ Ag tỹ ra mũn kỹ Jesus tóg ag mỹ kãmén mũ. “Kuty tag kã ãjag tóg inh fón kỹ mũ kãn ke mũ,” he tóg mũ, ã mré mũ tĩ ag mỹ. “Hã kỹ tóg rán kỹ nĩ. “Ủ tỹ carneiro ki rĩr tĩ ên tãnh jé sóg ke mũ, kỹ ti mễg ag vĩ krig ke kãn ke mũ,” he tóg, Topê vĩ tỹ rán kỹ nĩ ki,” he tóg, Jesus ti. “Hã ve jé ãjag tóg ke mũ.

³² Hã ra sóg iser kar kỹ rĩr măn ke mũ. Ên kã sóg ãjag jo tĩg ke mũ, ga tỹ Galiléia ra,” he tóg, Jesus ti.

³³ Kỹ Pedro tóg ti mỹ: “inh pi(jé) ã fón kỹ tĩg ke mũ', ag kar tỹ ã ré kỹ mũ mũ ra,” he mũ.

³⁴ Hã ra Jesus tóg ti mỹ: “ha vé,” he mũ. “Ủri, kuty tag kã ã tóg iso: ti ki kagtĩg sóg nĩ, he tãgtũ han ke mũ, galo kyr to hã. Ki hã sóg tó mũ,” he tóg, Jesus ti.

³⁵ Hã ra Pedro tóg ti mỹ: “sỹ ã mré ter ke mũ ra sóg ã to: ti ki kagtĩg sóg nĩ, henh ke tũ pẽ nĩ,” he mũ. Kỹ ti mré mũ tĩ ag tóg hã tó kãn mũ gé sir.

Getsêmani tá

(Mc 14.32-42; Lc 22.39-46)

³⁶ Kỹ Jesus tóg ka krãn ja tá jun mũ sir, ag mré, ka krãn ja ên jijin hã vĩ: Getsêmani, he mũ. Kỹ tóg ã mré mũ tĩ ag mỹ: “ha ver nĩgnĩ, tag ki,” he mũ. “Sỹ ver Topê mré vĩnh ke vễ, tãtã,” he tóg.

³⁷ Kỹ tóg Pedro mré Zebedeu krê ag mỹ: “inh mré kãmũ jêg,” he mũ. Kỹ tóg fe kaj nĩ sir. Mũmễg tóg mũ sir.

38 Kĩ tóg ag mý: “inh fe kaj mág tóg tĩ,” he mũ, “kĩ inh fe kaj tóg inh mý iser ri ke nĩ,” he tóg. “Tag ki nýtĩmnĩ, nũgnũr tũg nĩ, inh ri kén,” he tóg, Jesus ti.

39 Kĩ tóg tĩg sĩ han mãn kĩ mũg ke mũ sir, Jesus ti, kĩ tóg ga kri nỹ mũ. Topẽ mré tóg vĩ mũ. “Panh’,” he tóg mũ. “Mỹ ã tỹ inh jagtar ke tag tỹ tũ’ he jãvãnh?” he tóg. “Hã ra isỹ ã mý nén to vĩ mũ tag han tũg nĩ. ã tỹ nén han ke mũ ên hã han nĩ,” he tóg, Jesus ti.

40 Kar kĩ tóg ã mré mũ tĩ ag venh tĩ mũ sir, hã ra ag kar tóg nũgnũr ja nĩ. Kĩ tóg Pedro mý: “mỹ ãjag mý hora pir ki nũr tũ kórég?” he mũ.

41 “Nũr tũg nĩ, Topẽ mré vĩmnĩ, ãjag tỹ ti vĩ mranh tũ nĩ jé, ù tỹ ãjag kutãn mũ ra. ãjag tỹ mranh sór tũ vê vê, hã ra ãjag tóg to krój nýtĩ, hã kĩ ãjag tóg mranh ke mũ,” he tóg, Jesus ti.

42 Kĩ tóg tĩg mãn mũ sir, kĩ tóg Topẽ mré vĩ mãn mũ. Kĩ tóg: “panh’,” he mãn mũ. “ã tỹ inh jagtar ke tag tỹ tũ’ henh jãvãnh nĩn kĩ sóg jagtar ke mũ. ã tỹ isỹ nén han ke mũ ên han nĩ,” he tóg.

43 Kĩ tóg ag venh tĩg mãn mũ gé sir, hã ra ag tóg nũgnũr mãn nýtĩ, ag nũr há pẽ tĩn kĩ.

44 Kĩ tóg ag mý vĩ tũ ra tĩ mũ sir, Topẽ mré vĩ mãn jé. Ti mý tóg ã tỹ tó ja ên tó mãn mũ.

45 Kĩ tóg ã mré mũ tĩ ag venh tĩg mãn mũ gé sir, kĩ tóg ag mý: “ãjag ne tóg nũgnũr ja nĩ” he mũ, “vẽnhkãn ja ãjag tóg nĩ,” he tóg mũ. “Pétẽm ti

huri, hora ti. Ti tỹ ag mý inh fẽg ke nẽ ha, Topẽ vĩ mranh tĩ ag mý, isỹ tỹ êprã ke fi kósın nĩn kỹ,” he tóg.

46 “Nĩgnĩ ra, mũ jé ha. Û tỹ ag mý inh ven mũ vĩ jun ke mũ ha,” he tóg, Jesus ti.

*Ag tỹ Jesus se
(Mc 14.43-50; Lc 22.47-53;
Jo 18.3-12)*

47 Ti tỹ ver tỹ vëmén jẽ ra Judas tóg jun mũ sir. Û tỹ 12 (ke) ag kã ù ên vê, Judas ti. Ti mré polícia ag tóg kãmũ mũ. Rógro génh kĩ ag tóg kãmũ mũ, ka kykyv génh kĩ ke gé. Topẽ tũ ki rĩr tĩ to pã’i ag tỹ ag jẽgnẽ vê, kófa ag tỹ ke gé.

48 Hã ra ù tỹ ag mý Jesus ven ke mũ ên tóg ag mý: “ti ki sóg nhun kenh mũ,” he ja nĩ. “Sỹ ùn ki nhun ke mũ ên hã semnĩ,” he ja tóg nĩ ag mý.

49 Hã kĩ tóg vësýmér Jesus to grẽn ke kĩ ti mý: “ã mý há, Senhor?” he mũ. Kĩ tóg ti ki nhun ke mũ, Judas ti.

50 Hã ra Jesus tóg ti mý: “régre,” he mũ. “ã tỹ nén han ke mũ ên han nĩ,” he tóg.

Kỹ polícia ag tóg vësýmér ti to ge kĩ ti ség mũ sir, Jesus ti.

51 Kĩ Jesus mré tĩ tĩ ù tóg rógro kunũnh kĩ polícia ù nĩgrég kym mũ sir. Topẽ tũ ki rĩr tĩ to pã’i mág camarada vê, ti tỹ ùn nĩgrég kym mũ ên ti.

52 Hã ra Jesus tóg ti mý: “ã rógro fẽg han ra,” he mũ. “Êg tỹ rógro tỹ ke kĩ ag tóg rógro tỹ êg tén ke mũ gé, ha vemnĩ,” he tóg.

53 “Isỹ inh panh mý to vĩ mũ ra tóg inh mý ã tỹ jẽgnẽ jafã ag

jëgnënh ke mũ vë, ùn e ên, 12 mĩl (ke) kãfór, ag tỹ iyy nĩgãn jé.

⁵⁴ Hã ra sóg ve sór mũ, nén tỹ iso rán kỹ nĩ ên ti, hã kỹ sóg ti mỹ tag to vĩ tũ nĩ. Ve jé sóg ke mũ ha, inh jagtar ke ti,” he tóg, Jesus ti.

⁵⁵ Ên kã tóg polícia ag mỹ: “ãjag ne tóg rógro génh kỹ kãmũ mũ', ka kykyv mré', ãjag tỹ ise jé',” he mũ. “Inh pi(jé) tỹ bandido nĩ'. Kurã kar ki sóg ãjag mré jê ja nĩgtĩ, Topê jo ãn krêm. Vënh kar kanhrãn kỹ sóg tá nĩ ja nĩgtĩ, hã ra ãjag tóg tá iség tũ nĩ vë mỹr,” he tóg.

⁵⁶ “Hã ra sóg nén tỹ iso rán kỹ nĩ ên vëg mũ, Topê vĩ tó tĩ ag tỹ iso nén rán ja ên ti, hã kỹ ãjag tóg ke mũ,” he tóg, Jesus ti.

Kỹ ti mré mũ tĩ ag tóg ti ré kỹ pétê kãn mũ sir, vënh pigju jé, mỹr, ha mẽ.

Pã'i ag tỹ Jesus ki jëmê

(Mc 14.53-65; Lc 22.54-55, 63-71; Jo 18.12-14, 19-24)

⁵⁷ Kỹ ù tỹ ti ség mũ ag tóg ti pére mũ mũ, Topê tũ ki rĩr tĩ to pã'i mág ra, hã vỹ: Caifás, he mũ. Tá ag tóg vënh mãn kỹ nỹtĩ, Topê vĩ to professor ag, kófa ag ke gé.

⁵⁸ Hã ra Pedro tóg Jesus nón kãtĩ mũ, kuvar há tá, kỹ tóg Topê tũ ki rĩr tĩ to pã'i mág ãn kãra rã mũ sir. Polícia ag mré tóg tá nĩ nĩ. Ti tỹ ag tỹ Jesus tỹ hën ri kenh ke mũ ên ve sór vë.

⁵⁹ Kỹ Topê tũ ki rĩr tĩ to pã'i ag tóg ù ag jãvãnhvãnh mũ, ag tỹ Jesus jykre kórég tó jé. Ti vĩ to ag tóg ti tén sór mũ, kófa ag, vënh jyvën tĩ kar ag.

⁶⁰ Hã ra ag tóg ù tỹ ki hã tó mũ vëg tũ nĩ. Û tỹ hën ri ke ag tóg ón kỹ ti jykre kórég tó mũ, hã ra tóg ag mỹ ki krov tũ nĩ. Kỹ vãhã ùn régre ag tóg tá junjun kỹ ón kỹ ti to vĩ mũ.

⁶¹ Ên ag vỹ tóg sir: “ti vĩ vënhmỹ mẽ êg,” he mũ. “Topê jo ãn kókén há inh nĩgtĩ, he ja tóg nĩ. Kókén kar sóg ù han mãn ke mũ. Kurã tăgtũ ki tóg kar kỹ nĩ, ãn ti, ha vemnĩ, he ja tóg nĩ, Jesus ti,” he ag tóg mũ, ón kỹ ti to vĩ kỹ.

⁶² Kỹ Topê tũ ki rĩr tĩ to pã'i mág vỹ jëgnë mũ sir, kỹ tóg ti mỹ: “ã tỹ nén tónh ke mỹ tũ'?” he mũ. “Ag hã ne ã vĩ kónãn tag tó ja nĩ gé'” he tóg.

⁶³ Hã ra Jesus tóg hun ke mũ, nén ù tó mẽ kã. Kỹ pã'i mág tóg ti mỹ: “Topê vỹ rĩr nĩ,” he mũ. “Ûn rĩr nĩ vỹ êg vëg mũ. Ti rĩnve sóg ã ki jëmêg mũ. ã mỹ tỹ Cristo nĩ', ã mỹ tỹ Topê kósin nĩ'? Ha êg mỹ tó,” he tóg, pã'i mág ti.

⁶⁴ Kỹ Jesus tóg ti mỹ: “ki hã ã tóg tó mũ,” he mũ. “Kỹ sóg ãjag mỹ tag tó mũ gé, ha mẽ. Êprã ke fi kósin ên vỹ tỹ inh nĩ,” he tóg. “Kỹ ãjag tóg ù tỹ nén (ũ) kar han mũ ên pëgja tá inh venh ke mũ. Kỹ sóg kanhkã góg kãmĩ kãtërenh ke mũ gé,” he tóg, Jesus ti.

⁶⁵ Kỹ pã'i mág ên tóg ã kur tỹ jaran' ke mũ sir, jũ kỹ. Kỹ tóg: “Topê kato vĩ kónãn ti huri,” he mũ. “Mẽ kãn êg mỹr, kỹ êg tóg ù tỹ ti jykre kórég tónh ke ù jãvãnh mãn ke tũ nĩ ha,” he tóg.

⁶⁶ “Êg hỹn ti tỹ hë ri kenh

mũ ha?” he tóg. Kÿ ag tóg ti mÿ: “ter jé tóg ke mũ, ti vĩ tag to,” he kãn mũ sir.

⁶⁷ Kÿ ag tóg ti kakã to sug-sug mũ sir, ti kakã ki tãnh ag tóg mũ gé sir. Ag kã ù tóg ti vatánh tá ti tãnh kÿ ti mÿ:

⁶⁸ “Cristo nêji tÿ ã jê, kÿ ã nêji nén kar ki kanhró nĩ,” he mũ. “Û nÿ ã tãnh?” he tóg mũ gé. Ti tãnh kÿ tóg ke mũ. Gen kÿ ag tóg ti to é he mũ.

Pedro tÿ Jesus to ón

(Mc 14.66-72; Lc 22.56-62; Jo 18.15-18, 25-27)

⁶⁹ Hã ra Pedro vÿ re tá nĩ nĩ, ãn vãso kã. Kÿ pã'i camarada ù fi tóg ti ve jé kãkutê mũ, kÿ fi tóg ti mÿ: “Jesus mré ã tóg tÿg mũ gé, Galiléia tá ke ên mré,” he mũ.

⁷⁰ Hã ra tóg: “vó,” he mũ. “Ã tÿ ne tó nê hÿn'?” he tóg mũ, Pedro ti. Kÿ ag kar vÿ ti vĩ mẽg mũ.

⁷¹ Kÿ tóg jãnkã fĩn rãm sór mũ. Hã ra ù fi tóg ti vég mũ gé, kÿ fi tóg tá ke ag mÿ: “Jesus mré ke ù vê, Nazaré tá ke ên mré ke ù vê,” he mũ gé.

⁷² Hã ra tóg: “vó,” he mãn mũ. “Ti ki kagtÿg sóg nĩ, Topê vÿ ki kanhró nĩ,” he tóg, Pedro ti.

⁷³ Si há ke tũ ra ù tÿ tá nÿtĩ ag kã ù ag tóg ti venh kãmũ kÿ ti mÿ hã tó mãn mũ gé. Kÿ ag tóg Pedro mÿ: “ha mẽ, ag kã ù vÿ tÿ ã nĩ,” he mũ. “Ã vĩ ki êg tóg ã ki kanhrãn mũ,” he ag tóg mũ.

⁷⁴ Hã ra tóg: “vó,” he mãn mũ. “Inh pi(jé) ti ki kanhró nĩ'. Inh ón mũ ra Topê vÿ inh vóg kónãn mũ vê,” he tóg,

Pedro ti. Hã ra vêsÿmér galo tóg kyr mũ.

⁷⁵ Kÿ Pedro tóg Jesus vĩ to jykrén mũ, ti tÿ ti mÿ: “iso ã tóg: ti ki kagtÿg sóg nĩ, he tãgtũ han ke mũ, galo kyr ke to hã,” he ja ên mĩ. Tag mĩ êkrén kÿ tóg tá kãkutê mũ sir, hã ra tóg fÿ jagy han mũ sir, Pedro ti.

27

Ag tÿ Pilatos mÿ Jesus ven

(Mc 15.1; Lc 23.1-2; Jo 18.28-32)

¹ Tÿ vaj kÿ kusã ki ag tóg Jesus to jykrén mũ sir, Topê tũ ki rĩr tĩ to pã'i ag, kófa ag mré hã. Ag tÿ ti tén sór vê.

² Kÿ ag tóg ti mÿnh mũ sir. Ti pére mũn kÿ ag tóg pã'i mág tÿ governador mÿ ti fêg mũ sir, Pilatos ên mÿ.

Judas ter

(Hk 1.16-19)

³ Hã ra Judas tóg vég mũ. Pã'i ag mÿ tóg Jesus ti ven ja nĩ, ag tÿ ti se jé. Kÿ tóg ag tÿ ti tén sór mũ tag vég mũ, Judas ti. Kÿ tóg to jykrén mãn mũ sir. Vãhã tóg ti mÿ e tĩ. Kÿ tóg jãnkamy tÿ prata ên ma kãtĩ mũ sir, ù tÿ 30 (ke) ên. Ma kãtÿg kÿ tóg Topê tũ ki rĩr tĩ to pã'i ag mÿ ven mũ, kófa ag mÿ.

⁴ Kÿ tóg ag mÿ: “ti kórég han inh,” he mũ. “Ti pi(jé) nén ù kórég han ja nĩgtĩ', hã kÿ tóg vênhmÿ nĩ, ti tÿ inh vĩ to ter kÿ,” he tóg.

⁵ Hã ra ag tóg ti mÿ: “êg tũ pijé,” he mũ. “Ã tũ hã nê,” he ag tóg mũ. Kÿ tóg jãnkamy ên vãm mũ sir, Topê jo ãn krêm, kÿ tóg hên ra tũ mũ sir. Tá tóg

ã nunh kã vënh jãján mũ sir, kÿ tóg ter mũ sir.

⁶ Kÿ Topë tũ ki rĩr tĩ to pã'i ag vÿ jãnkamy ên mãn kÿ to jykrén mũ. “Ëg tÿ Topë mÿ jãnkamy tag vin kÿ tóg vënhmÿ tĩ. Vënh kyvënh kajãm ja ti nĩ, hã kÿ ãg tóg Topë mÿ vin sór tũ nĩ,” he ag tóg mũ sir, jãnkamy ên to.

⁷ Kÿ ag tóg to vënh mãn kÿ to jykrén mũ. To jykrén kÿ ag tóg tÿ êpÿ kajãm mũ, ag tÿ tá go'or vég tĩ ên. Tá ag tóg fóg ag kej han sór mũ, fóg tÿ Jerusalém ra pasa tĩ ag mÿ.

⁸ Hã kÿ ãg tóg êpÿ ên to: “êpÿ kyvënh,” he tĩ.

⁹ Hã ra Topë vĩ tó tĩ tÿ Jeremias vÿ Judas to tag rán ja nĩ, ha mẽ: “jãnkamy tÿ 30 (ke) tÿ ag tóg êpÿ kajãm ke mũ. Jãnkamy ên tÿ ag tóg êprã ke ù kajãm vén ke mũ, Israel ag, ti kaja tag tÿ ag mÿ há nÿn kÿ.

¹⁰ Êprã ke ên tÿ kajãm kar kÿ ag tóg tÿ êpÿ kajãm mũ sir, ag tÿ tá go'or vég tĩ ên. Hã tó ja tóg nĩ, inh mÿ, ãg jóg tÿ Topë ti,” he ja tóg nĩgtĩ, Jeremias ti. Hã ra tóg ge nĩ.

Pilatos tÿ Jesus ve

(Mc 15.2-5; Lc 23.3-5; Jo 18.33-38)

¹¹ Hã ra Jesus tóg fóg tÿ pã'i mág rã jẽ nĩ. Kÿ pã'i mág tóg ti ki jëmẽ sór mũ, kÿ tóg: “ã mÿ tÿ Judeu ag pã'i nĩ?” he mũ. Kÿ Jesus tóg ti mÿ: “ki hã ã tóg tó mũ,” he mũ.

¹² Kÿ Topë tũ ki rĩr tĩ to pã'i ag tóg ti kato vĩ mág han mũ, kófa ag ke gé, hã ra tóg hun ke kÿ jẽ nĩ.

¹³ Kÿ Pilatos tóg ti mÿ: “mÿ ã mÿ tÿ nén ù tũ nĩ, ag tÿ ã kato vĩ mág han mũ tag ti?” he mũ.

¹⁴ Hã ra Jesus tóg vĩ mãn tũ nĩ, kÿ tóg Pilatos mÿ e tĩ sir.

Ag tÿ Jesus to: ter jé tóg ke mũ, he

(Mc 15.6-15; Lc 23.13-25; Jo 18.39-19.16)

¹⁵ Hã ra Pilatos tóg ag mÿ vése ag kar kã ùn pir kavãg tĩ, festar tÿ Páscoa kar ki. Ti jykre vë. Ag tÿ ùn to vĩ mũ ên kyvãg tóg tĩ.

¹⁶ Kÿ ù tóg se kÿ jẽ nĩ, ên kã. Ùn vënhmÿ vë, ù tÿ ag ri ke tũ, ti jijin hã vÿ: Barrabás, he mũ.

¹⁷ Jãvo ag tóg tá vënhmãn kÿ nÿtĩ, Judeu kar ag. Kÿ Pilatos tóg ag mÿ: “inh hÿn ù kavãn ha?” he mũ. “Û nÿ ãjag mÿ há nĩ? Barrabás mÿ, Jesus mÿ vó, ag tÿ ù to: “Cristo vÿ tÿ ti nĩ,” he tĩ ên?” he tóg, Pilatos ti.

¹⁸ Pã'i ag tÿ véké Jesus to jũ nÿtĩn ki kanhró tóg nĩ, Pilatos ti. Ti há nĩn hã kÿ ag tóg ti to jũ mũ, hã kÿ tóg ti kavãn sór mũ, Pilatos ti.

¹⁹ Fóg tÿ pã'i ên tÿ vënh jyvën jafã tá nĩn kÿ ti prũ fi tóg ti mÿ vënh vĩ jënëg mũ, kÿ fi tóg ti mÿ: “vënh jykre kuryj han ti tĩ,” he mũ, Jesus to. “Hã kÿ ti vóg sór tũg nĩ. Kutÿ tag kã sóg ti to vënh péti kónãn, ãg jagtar ke ti ve inh, inh vënh péti ki,” he fi tóg, Pilatos mÿ vënh vĩ jënën kÿ, hã kÿ tóg ti kavãn sór tãvĩ han mũ, Pilatos ti.

²⁰ Hã ra Topë tũ ki rĩr tĩ to pã'i ag tóg vënh kar krĩn mũ sir, kófa ag mré, vënh kar ag tÿ

Barrabás kavar kÿ jẽ ve sór jé, ag tÿ Jesus ter ve sór jé.

21 Kÿ fóg tÿ pã'i tóg ag ki jẽmẽ mãn mũ. "Inh hÿn ùn régre tag ag kã ù tÿ hẽ kavãn mũ ha?" he tóg. Kÿ ag tóg ti mÿ: "Barrabás ti," he mũ.

22 Kÿ Pilatos tóg ag mÿ: "kÿ inh Jesus tÿ hẽ ri kenh mũ?" he mũ. "Ag tÿ ù to: "Cristo vÿ tÿ ti nĩ," he tĩ ên tÿ inh hẽ ri kenh mũ?" he tóg. Kÿ ag tóg ti mÿ: "cruz to ti sã," he kãn mũ sir.

23 Kÿ fóg tÿ pã'i tóg ag mÿ: "ti kórég tÿ ne han ti?" he mũ. Hã ra ag tóg prẽnprẽr mũ sir. "!.Cruz to ti sã.!" he ag tóg mũ sir, prẽnprẽr kÿ.

24 Ag tÿ hẽ ri ke tũ tóg nĩ, Pilatos ti, hã kÿ tóg ag mÿ hã han sór mũ. Vẽnh génh kutẽ nĩ ve tóg nĩ, hã kÿ tóg goj jé prẽr mũ. Kÿ tóg kã nĩpég mũ sir, vẽn kar rĩnve, Pilatos ti, kÿ tóg ag mÿ: "inh jykre pijé," he mũ. "Inh nĩgé kavénh ke tũ ti nĩ, ti kyvénh ti. Ùn jykre kuryj vẽ, kÿ sóg ti tén jãvãnh nĩ. ãjag jykre vẽ," he tóg, Pilatos ti.

25 Kÿ vẽn kar ag tóg ti mÿ: "ẽg jykre vẽ," he kãn mũ. "Ëg hã ne ti tén sór mũ'. Kÿ Topẽ ẽg hã vóg kónãn ke mũ, ẽg krẽ ag ke gé, ti tÿ ti ter to ù vóg kónãn ken kÿ," he ag tóg, vẽn kar ên ag.

26 Kÿ Pilatos tóg Barrabás kavãn mũ sir. Jesus to tóg soldado ag mÿ: "ha ti mrãnmrãn," he mũ sir. Ag tÿ ti mrãnmrãn kar kÿ Pilatos tóg ag mÿ ti fẽg, soldado ag tÿ ka to ti sa jé.

Soldado ag tÿ Jesus vóg kónãn

(Mc 15.16-20; Jo 19.2-3)

27 Kÿ fóg tÿ pã'i krẽm soldado ag tóg Jesus pére mũ mũ, pã'i ãn ra, ãn tÿ Palácio do Governador ên ra. Kÿ ag tóg soldado ù ag jé prẽr kãn mũ.

28 Ti kur kunũg ag tóg mũ, kÿ ag tóg kur kusũg tÿ ti kri fón mũ.

29 Sónh pirĩn kÿ ag tóg tÿ ti krĩ tógfĩg mũ sir, krĩ tógfĩn ja rěr tÿ. Vãn tÿ ag tóg ti nĩgé kã fẽg mũ, ti pẽgja tá. Kÿ ag tóg ti krẽm grĩnhgrĩnh ke mũ sir, ón kÿ. Ti to é he ag tóg mũ, hã kÿ ag tóg: "viva, Judeu ag pã'i," he mũ.

30 Kÿ ag tóg ti to sugug mũ gé. Vãn ên tÿ ag tóg ti krĩ mũ mrãnmrãn mũ sir.

31 Ag tÿ ti nyg kar kÿ ag tóg ti ki kunũg mũ, kur ên ti. Kÿ ag tóg ti tũ pẽ tÿ ti kãra rãg mãn mũ sir. Kÿ ag tóg ti pére mũ mũ, ag tÿ cruz to ti san jé sir.

Jesus tÿ cruz to sa

(Mc 15.21-32; Lc 23.26-43; Jo 19.17-27)

32 Ag mũn kã ag tóg ù kato tẽ mũ, Cirene tá ke ù, ti jijin hã vÿ: Simão, he mũ. Ên mÿ ag tóg vĩ tar han mũ, ti tÿ Jesus cruz vyn jé ti jo, hã kÿ tóg vyn kÿ tĩ mũ.

33 Gen kÿ ag tóg Gólgota tá junjun mũ sir. Gólgota to ẽg tóg: vẽn krĩ kuka, he tĩ, ẽg vĩ ki.

34 Tá junjun kÿ ag tóg ti mÿ vinagre ven mũ, nẽn ù tÿmẽ jynh mré ha. Kÿ tóg kron sĩ han mũ, hã ra tóg kron sór tũ nĩ, vẽnhkagta tag.

35 Kÿ ag tóg cruz to ti sãg mũ sir. Ti kur tÿ ag tóg jagnẽ mÿ vẽnĥ kãpãm mũ sir, to ag tóg jogar he mũ gé, ti kur to, soldado ag.

36 Kÿ ag tóg nĩngĩg kÿ nÿtĩ, ti ki rĩr jé, soldado ag.

37 Ag tÿ nén tÿ ti kato vĩ mũ vÿ rán kÿ nĩ, hã vÿ: “Jesus, Judeu ag pã'i tÿ rei vẽn,” he mũ. Ti kri tóg sa, vẽnĥ rán ti. Ti tÿ nẽji vẽnÿ pã'i tÿ rei han mũ to ag tóg ti tén mũ.

38 Ti kóm ag tóg ùn régre ag tÿ cruz to sãg mũ gé, bandido ag. Kÿ ù tóg ti pẽgia tá sa, jó ù tóg ti jakãnh tá sa.

39 Kÿ ù tÿ mĩ mũ mũ ag tóg ti nyg' he mũ gé, vÿn vÿn hen kÿ.

40 “Ã mÿ Topẽ jo ìn kókén sór mũ?” he ag tóg mũ. “Ã mÿ kurã tãgtũ ki ù han mãn sór mũ? Vẽnĥ kren han ra kema', cruz to kãtére kema', ã tÿ tÿ Topẽ kósin nĩn kÿ,” he ag tóg ti mÿ.

41 Ge ag tóg mũ gé. Topẽ tũ ki rĩr tĩ to pã'i ag, Topẽ vĩ to professor ag mré hã, kófa ag mré hã. Ti nyg ag tóg mũ gé, kÿ ag tóg jagnẽ mÿ:

42 “ũ ag krenkren han tóg, hã ra tóg vẽnĥ hã kren han ki kagtĩg nĩ,” he mũ. “Israel pã'i tÿ rei jé cruz to kãtére kema', ěg tÿ ve jé, ěg tÿ ti ki ge jé,” he ag tóg.

43 “Topẽ ki ti nẽji rã kÿ jẽ, kÿ Topẽ jé ti kren han, ti tÿ ti to há nĩn kÿ. “Topẽ kósin vÿ tÿ inh nĩ,” he ti mÿr,” he ag tóg ti to, ti nyg kÿ, Judeu pã'i ag.

44 Kÿ bandido ag, ù tÿ ti kóm cruz to nÿtĩ ěn ag tóg ti nyg mũ

gé.

Jesus ter

(Mc 15.33-41; Lc 23.44-49; Jo 19.28-30)

45 Rã tÿ ěg nĩno kã sa ra tóg kuty' he mũ sir, ga kar mĩ hã. Kuty ěn tóg hora tãgtũ tũg mũ.

46 3 hora ki Jesus tóg prẽr mũ sir, kÿ tóg: “Eli, Eli, lemá sabactani?” he mũ. ěg vĩ ki ěg tóg tag to: “Topẽ, Topẽ, ã tÿ ne jé isovãnh nẽ?” he mũ.

47 Kÿ ù tÿ tá nÿtĩ ag tóg mẽg kÿ (ag tóg) jagnẽ mÿ: “Elias jé tóg prẽr mũ,” he mũ.

48 Kÿ ù tóg vẽnĥvãg mũ sir, kÿ tóg esponja tÿ vinho prãg mũ, vinho kaja pir tÿ. Ka jurÿn kÿ tóg tÿ kusón kÿ vinho kãra rãg kÿ ti mÿ ven mũ sir, ti tÿ ki ùnh' ùnh' ke jé.

49 Hã ra ù ag tóg: “toreg',” he mũ. “Hẽn ri ke mũn Elias kãtĩg mũ, ti kren han jé,” he ag tóg.

50 Hã ra Jesus tóg prẽr mág han mãn kÿ hun ke mũ sir.

51 Hã ra Topẽ jo ìn krẽm kur tÿ jãnkã nife tóg jaran ke mũ, ha mẽ, ti jar tóg vẽnĥ kãkym ke kãn mũ sir, ha mẽ.

52 Kÿ ga tóg ragra ke mũ gé sir, pãró vÿ gÿm ke mũ, vẽnĥ kej tÿ hẽn ri ke vÿ nugnor mũ, kÿ ù tÿ Topẽ ki ge kÿ nÿtĩ tÿ hẽn ri ke ag tóg rĩnrĩr mãn mũ gé, ùn kãgter ja ag. Ājag kej tá ag kãpa mũ.

53 ěn ag vÿ Jesus rĩr mãn kar kÿ tá kãpa kÿ cidade tÿ Jerusalém kãra ge mũ, kÿ ag tóg ùn mÿ vẽnĥ venven mũ sir, kÿ ù tÿ hẽn ri ke ag tóg ag vigvėg mũ, Jerusalém tá ke ag.

⁵⁴ Hã ra capitão tóg soldado ag mré Jesus ki rĩr jẽ nĩ. Ga tỹ ragra ke ên vég ag tóg mũ, nén kar ti, Jesus ter ên kã. Kỹ tóg ag mý e tĩ. Kỹ ag tóg: “hã ja vē,” he mũ. “Topẽ kósin ja vē mýr,” he ag tóg mũ, capitão ag.

⁵⁵ Kỹ ùn týtá fag vỹ tá nýtĩ gé, ù tỹ hên ri ke fag. Kuvar há tá nýtĩ kỹ fag tóg ti vég nýtĩ nĩ. Ti mré fag tóg kãmũ ja nĩ, ga tỹ Galiléia tá. Ti ki fag rĩr ja nĩgtĩ.

⁵⁶ Fag kã ù fi vỹ tóg tỹ Maria Madalena fi nĩ, kỹ ù fi tóg tỹ Maria fi nĩ gé, José mré Tiago mýnh tag fi. Kỹ ù fi vỹ tỹ Zebedeu krẽ ag mýnh fi nĩ gé. Fag mré ke ù fag vỹ tá nýtĩ gé.

*Ag tỹ vēnh kej kãkã Jesus fi
(Mc 15.42-47; Lc 23.50-56;
Jo 19.38-42)*

⁵⁷ Rãké tóg nỹ ha, kỹ ùn há tóg tá jun mũ. Arimatéia tá tóg kãtĩg ja nĩ. Ti jijin hã vỹ: José, he mũ. Jesus mré ke ù vē gé.

⁵⁸ Ên vỹ tóg Pilatos venh tĩ mũ, kỹ tóg ti mý Jesus to vỹ mũ, ti ter kar kỹ. Kỹ Pilatos tóg soldado ag mý: “ha ti mý ti fi,” he mũ.

⁵⁹ Kỹ José tóg Jesus va tĩg kỹ ti pãg mũ sir, kur jãnhkri tỹ.

⁶⁰ Kỹ tóg ã kej kãkã ti fig mũ sir. Pó kãkã tóg han ja nĩgtĩ, vēnh kej ti, hã ra tóg tãg nĩ. José tũ vē, vēnh kej ên ti. Ên kãkã tóg ti fig mũ sir, kỹ tóg pó tãpér tĩn mũ, vēnh kej jãnkã to, pó ên tỹ tóg ti kej nĩfênh mũ sir, José ti. Kỹ tóg tĩ mũ.

⁶¹ Hã ra Maria Madalena fi vỹ tá nĩ nĩ, Maria ù ên fi ke gé.

Ti kej rã fag tóg nĩgnĩ kỹ nýtĩ nĩ.

Ag tỹ ti kej ki rĩr

⁶² Tỹ vaj kỹ, festa kurã kã Topẽ tũ ki rĩr tĩ to pã'i ag tóg vēnh mãn mãn mũ sir, Fariseu ag mré hã. Kỹ ag tóg Pilatos venh mũjẽg.

⁶³ Ti mý ag tóg: “governador,” he mũ. “Vēnh kar krĩn kónãn tĩ ên tóg tag tó ja nĩ, ha mẽ: “kurã tãgtũ ki sóg rĩr mãn ke mũ,” he ja ti nĩ. Êg tỹ tag to jykrén kỹ êg tóg ã mý nén ù to vỹ sór mũ gé ver.

⁶⁴ Soldado ag tỹ ti kej ki rĩr há tóg tĩ, kurã tãgtũ ki. Êg mý tóg ti mré mũ tĩ ag tỹ ti to nón kỹ ti péjunh ha mẽ tĩ. Êg mý tóg ag tỹ ti péju kar vēnh kar mý: “rĩr mãn ti, ã ter kar kỹ,” henh ha mẽ tĩ gé. Kỹ vēnh ó tãg tag vỹ ti ón ja ên kãfór pẽ nýnh ke mũ. Hã kỹ soldado ag jẽgnẽ, ag tỹ ti kej ki rĩr jé,” he ag tóg, Pilatos mý.

⁶⁵ Kỹ Pilatos tóg ag mý: “hej,” he mũ. “Vỹ nýtĩ, ti kej ki rĩr ke mũ ag,” he tóg, soldado ù ag to. “Ti kej ki rĩr há han nĩ, ge kỹ,” he tóg.

⁶⁶ Kỹ ag tóg mũ kỹ ti kej to ag vin mũ, ti kej ki rĩr ti ên ag. Ti kej nĩfênh mũ ên ség ag tóg mũ gé, vãfe tỹ, pãró to. Kỹ ag tóg go'or tỹ vãfe ên kri tỹ tam ke mũ, ù tỹ ti kej nĩfe kunũg tũ nĩ jé.

28

Jesus rĩr mãn

(Mc 16.1-10; Lc 24.1-12; Jo 20.1-10)

¹ Vēnhkán ke kurã tỹ vaj kỹ, semana tỹ kurã ve tag ki

Maria Madalena fi tóg ti kej venh tĩ mũ, kusã ki, Maria ũ ên fi mré hã.

² Hã ra ga tóg ragra ke tar han mũ sir. Kĩ Topê tỹ jẽnê jafã tóg kanhkã tá kãtêre mũ. Ti kej tá jun kũ tóg pó tỹ jãnkã nĩfe ên tĩn mũ, kũ tóg kri nĩ mũ sir, pó ên kri.

³ Hã ra tóg tỹ ta tỹ kóm kóm ke ve nĩ, anjo ên ti. Ti kur vỹ kópréj nĩ, kukryr kó kupri ri ke.

⁴ Kĩ soldado ag tóg jũrũn ke mũ, kamêg kũ ag tóg kãgter nỹtĩ ve nĩ.

⁵ Kĩ Topê tỹ jẽnê jafã tóg ũn tỹtã fag mũ vĩ mũ, kũ tóg: “kamêg tũg nĩ,” he mũ. “Jesus jãvãnh ãjag nỹtĩ, ag tỹ cruz to ũn sãg mũ ên ti.

⁶ Ki ti tũ nĩ, rĩr ti huri, hã kũ tóg ãjag mũ tó ja nĩgtĩ. Ki ti nỹ ja nĩgtĩ, ha kãge jêg, ãjag tỹ ti nỹgja ve jé,” he tóg mũ, fag mũ, anjo ti.

⁷ “Kuri, ti mré mũ tĩ ag mũ tónh mũjêg, ti rĩr mãn ti, ti ter kar kũ. Ha vé, ãjag jo tóg tĩg mũ, Galiléia ra. Tá ãjag tóg ti venh mũ, ha vemnĩ. Inh vĩ kã jatu' he tũg nĩ,” he tóg, Topê tỹ jẽnê jafã ti.

⁸ Kĩ fag tóg ti kej tá kãpa mũ sir, to fũrũrũn kũ. Fag mũ tóg e tĩ. Fag mũ tóg sér pẽ tĩ, hã kũ fag tóg pétê mũ sir, fag tỹ Jesus mré mũ tĩ ag mũ tó jé.

⁹ Fag mũ ra Jesus hã ne fag kato jun ke mũ', kũ tóg fag mũ: “mỹ sér nỹtĩmĩ,” he mũ. Kĩ fag tóg ti to grẽn ke mũ, ti pẽn kãgmĩg fag tóg mũ sir. Ti krêm fag tóg mũg ke mũ gé.

¹⁰ Kĩ Jesus tóg fag mũ: “kamêg tũg nĩ,” he mũ. “Ha

mũjêg, inh régre ag mũ tónh mũjêg, ag tỹ ga tỹ Galiléia ra mũ jé. Tá ag tóg inh venh ke mũ,” he tóg, Jesus ti. Kĩ fag tóg mũ mũ.

Soldado ag ón

¹¹ Fag mũn kũ soldado ên ag tóg cidade ra mũ mũ, soldado tỹ Jesus kej ki rĩr mũ ên ag. Tá junjun kũ ag tóg Topê tũ ki rĩr tĩ to pã'i ag mũ tó kãn mũ, ag tỹ nẽn vég mũ ên ti. Kĩ tóg ag mũ e tĩ.

¹² Kĩ ag tóg kófa ag mré vẽn mãn mũ sir, ag tỹ to jykrén jé. “Êg hỹn hẽ ri kenh mũ, vẽn kar tỹ ti rĩr mãn tag to: ag ón vê, he jé?” he ag tóg mũ jagnê mũ. Ag tỹ to jykrén kar kũ ag tóg soldado ag mũ jãnkamy e ven mũ sir.

¹³ “Jãnkamy tag to vẽn kar mũ un'ón,” he ag tóg mũ, pã'i ag, soldado ag mũ. “Un'ón kũ vẽn kar mũ: êg nũgnũr mũ jãvo Jesus mré mũ tĩ ag tóg ti péju ja nĩ, kuty si há tá, hã kũ tóg ki tũ nĩ ha, hemnĩ,” he ag tóg, pã'i ag, soldado ag mũ.

¹⁴ “Hẽn ri ke mũn ãjag pã'i tỹ governador tóg mẽnũ mũ, ãjag nũgnũr ja ti. Kĩ êg tóg ti mré vêmén ke mũ, ti tỹ ãjag vóg kónãn tũ nĩ jé,” he ag tóg, Topê tũ ki rĩr tĩ to pã'i ag, soldado ag mũ.

¹⁵ Kĩ soldado ag tóg jãnkamy ên mãn kũ mũ mũ sir. Vẽn kar mũ ag tóg un'ón mũ mũ sir, Jesus mré mũ tĩ ag to. Hã kũ Judeu ag tóg ver tag tó tĩ, ũnri.

*Jesus tỹ ã mré mũ tĩ ag mỹ
vẽn̄h ven*

*(Mc 16.14-18; Lc 24.36-49;
Jo 20.19-23; Hk 1.6-8)*

16 Hã ra ti mré mũ tĩ ag tóg ga tỹ Galiléia ra mũ mũ, pãnónh ù ra, Jesus tỹ ag mỹ: “ẽn̄ ra mũjẽg,” he ja ẽn̄ ra.

17 Kỹ ag tóg tá ti vég mũ sir, kỹ ag tóg ti krẽm mũgmũg ke mũ sir. Hã ra ag kãmĩ ù ag mỹ tóg vẽn̄hmỹ tĩ, ag tỹ ti vég mũ ra, kỹ tóg ag mỹ ki hã ke tũ nĩ.

18 Kỹ Jesus tóg ag rã hã jun mũ, kỹ tóg ag mré vēmén mũ sir. “Nén kar vỹ tỹ inh krẽm ke nĩ ha, kanhkã tá ke kar, ga tá ke kar ke gé,” he tóg, Jesus ti.

19 “Hã kỹ mũjẽg, povo kar kanhrãn jé, ag tỹ inh ki ge jé. Ag tỹ inh ki ge kỹ nỹtĩn kỹ ag kygpemnĩ gé. Inh panh jiji tómnĩ, ag kygpe kỹ, kỹ ti kósin jyjy tómnĩ gé, kỹ Topẽ kuprĩg jiji tómnĩ gé, ãjag tỹ ag kygpe kỹ.

20 Kỹ isỹ ãjag mỹ nén tó mũ kãmén kãn nĩ gé, ag tỹ ki króm jé. Ha mẽ, ãjag mré sóg jẽ nĩ, kurã kar ki, ga tũg ke kurã ki ke gé. ãjag tovãnh ke tũ sóg nĩ ha,” he tóg, Jesus ti. Ti tỹ ã mré mũ tĩ ag jẽgnẽg mũn hã vẽ.

MARCOS TÏ RÁ

João Batista tÏ Jesus tó
(Mt 3.1-12; Lc 3.1-18; Jo 1.19-28)

¹ SÏ Jesus Cristo kãme sér tónh ke vë, Topë kósin ti.

² VãsÏ Jesus tóg rán kÏ nÏ, João ke gé, Jesus jo tÏnh ke ti. Topë vÏ tó tÏ tÏ Isaiás vÏ Jesus rán ja nÏ, kÏ tóg: “ha vé, ã jo sóg ù jënënh mü, ti tÏ vënh kar kãn jé, ã tÏg ken jo,” he ja nÏ. “Ag jyvën jé tóg ke mü, kÏ tóg ëprÏ prun ri ke nÏ, ëmÏn kuryñh ri ke.

³ Ëmã tÏg ja tá tóg jënh ke mü, ga kórég tá. Tá tóg ag mÏ kãmén ke mü. “Ëg Senhor kãtÏg ke jo vënh jãnhkrigkrig nÏ,” he tóg mü. “ËprÏ kurég ãjag tóg tÏ, ëmÏn kuryñh ãjag tóg tÏ, ãjag chefe jun ken kÏ. KÏ tag ri ke han nÏ, ãjag jykre pãno togvãnh kÏ, ëg Senhor kãtÏg ken jo,” he tóg, ã jo tÏnh ke ti,” he ja tóg nÏ, Isaiás ti, João to.

⁴ KÏ João tóg jë mü, ëmã tÏg ja ki, ag kygpég tÏ ti. Ag jyvën tóg jëgtÏ, kÏ tóg: “ã kÏpe jé sóg ke mü, ã tÏ ã jykre kórég tovänh kÏ, Topë tÏ ã tÏ ti vÏ mranh tÏ ã mÏ vënh pãte fón jé,” he tóg mü sir, vënh kar mÏ.

⁵ KÏ ag tóg ti to kãmü kãn mü sir, ga tÏ Judéia tá, cidade tÏ Jerusalém tá ke gé. KÏ tóg ag kygpég mü sir, goj tÏ Jordão ki, ag tÏ: “Topë vÏ mranh sóg nÏgtÏ, tag han kÏ,” hen kÏ.

⁶ Jó João kur tóg cavalo pãñ sór kyki tÏ há nÏ. Nén ù fãr tÏ tóg vësógfÏn ja han tÏ gé. Ópã hã ko ti tÏ, mÏg mré, João ti.

⁷ KÏ tóg Jesus kãmén kÏ (tóg) ag mÏ: “ù tóg inh nón kãtÏ mü, ha mÏ,” he mü. “Inh kãfór ti nÏ. SÏ tÏ ti camrada nÏnh ke vë vë, sÏ ti pën né kunÏnh ke vë vë, ti pën to ró ti, hã ra sóg tÏ ti krëm ke pë jë.

⁸ Goj hã tÏ sóg ãjag kygpenh ke mü. Û tÏ inh nón kãtÏg ke ën tóg sir Topë kuprÏg tÏ ãjag jagrë han ke mü. Ti tÏ ãjag kygpenh ken hã vë,” he tóg, João ti, vënh kar mÏ.

João tÏ Jesus kÏpe
(Mt 3.13-17; Lc 3.21-22)

⁹ KÏ kejën Jesus tóg João tá jun mü gé. Cidade tÏ Nazaré tá tóg kãtÏ mü, ga tÏ Galiléia tá. Tá jun kÏ João tóg ti kypég mü sir, goj tÏ Jordão ki.

¹⁰ Ti tÏ goj kãtá kãkutë kÏ kanhkã vÏ nor mü sir vësÏmér. Hã ra Jesus tóg vëg jë nÏ. KÏ tóg Topë kuprÏg vëg mü. Sórag ri ke ti nÏ, ti kãtére ti. Kãtére kÏ tóg Jesus kri nÏ nÏ sir.

¹¹ KÏ tóg kanhkã tá vënh vÏ mëg mü gé sir, kÏ tóg: “tÏ ã inh kósin pir jë, tÏ ã inh fe pë jëgtÏ,” he mü, vënh vÏ tÏ më há ën ki.

Satanás tÏ Jesus krÏn kónãn sór
(Mt 4.1-11; Lc 4.1-13)

¹² KÏ vësÏmér Topë kuprÏg tóg Jesus krÏn mü, ti tÏ ëmã tÏg ja ra tÏg jé.

¹³ Kurã tÏ 40 (ke) tÏg tóg mü, ëmã tÏg ja ki, Jesus ti. Tá nÏnh kÏ Satanás tóg ti tÏ ã jóg vÏ

mranh han sór mũ, hã ra tóg ke tũ nĩ. Nẽn kãmĩ bicho ag vỹ tá mũgtĩ gé, ẽmã tũg ja ki. Hã ra Topẽ tỹ jẽnẽ jafã ag tóg ti ki rĩr mũ sir, tá.

Jesus tỹ Galiléia ra vỹn ke

(Mt 4.12-22; Lc 4.14-15; 5.1-11)

¹⁴Kejẽn ag tóg João ség mũ. Ag tỹ ti se kar kỹ Jesus tóg ga tỹ Galiléia ra tĩ mũ. Tá tóg ag mỹ Topẽ tỹ tỹ ẽg pã'i nĩnh ke kãmén mũ, vẽnh kãme sér ẽn ti.

¹⁵Kỹ tóg: “Topẽ vỹ tỹ pã'i nĩ,” he mũ. “Pétẽm ti huri, ti kurã ti, ẽg tỹ ti tỹ tỹ ẽg pã'i nĩ ẽn ve jé. Kỹ ajag jykre kórég tovãnh nĩ. Ti vĩ kri fimnĩ, ajag tỹ ti tỹ tỹ ẽg pã'i nĩ ẽn ve jé,” he tóg ag mỹ, Jesus ti.

¹⁶Kejẽn Jesus tóg nig fyr tỹ Galiléia he mũ ẽn jagma tĩ mũ. Ả tỹ ti fyr mũ tĩ ra tóg Simão Pedro vég mũ, ti jãvy tỹ André ke gé. Kur tỹ pirã kugmĩ jafã tỹ ag tóg goj kãki fón mũ, rede tỹ, pirã kugmĩ jé. Ag rãnhraj hã vẽ.

¹⁷Kỹ Jesus tóg ag ve kỹ ag mỹ: “inh mré kãmũmnĩ,” he mũ. “Pirã kugmĩ há ajag nỹtĩ,” he tóg. “Ajag kanhrãn jé sóg ke mũ, ajag tỹ ẽprã ke ag tỹ inh ki ge han jé,” he tóg ag mỹ, Jesus ti.

¹⁸Vẽsỹmér ag tóg ti mré mũ mũ, ajag rede tovãnh kỹ, Pedro ti, André ti ke gé.

¹⁹Kỹ ag tóg mũ mũ, goj fyr jagma. Ag mũ sĩ han mũ ra ag tóg ẽn régre ù ag vég mũ gé. Ủ vỹ tỹ Tiago nĩ, kỹ ù vỹ tỹ João nĩ, ti jãvy. Zebedeu krẽ

ag vẽ. Canoa kãki ag nỹtĩ, pirã kugmĩ jafã ki han kỹ.

²⁰Ag ve kỹ tóg vỹsỹmér ag jé prěr mũ, Jesus ti. Kỹ ag tóg ajag panh ré kỹ mũ mũ, Zebedeu ti. Ag camarada ag vỹ ag panh mré canoa kãki nỹtĩ nĩ. Ag ré kỹ ag Jesus mré mũ mũ sir, Tiago ti, João ti ke gé.

Jesus tỹ vẽnh jagrẽ kórég kutẽm

(Lc 4.31-37)

²¹Kỹ ag tóg cidade tỹ Cafarnaum ki ge mũ sir. Vẽnhkán ke kurã ki tóg vỹsỹmér Judeu ag vẽnh kanhrãn jafã kãra rã mũ, ag kanhrãn jé, Jesus ti.

²²Ti tỹ ag kanhrãn kỹ tóg ag mỹ e tĩ, ti vĩ ti. Vẽnh kar vĩ kãfór ti nĩ. Topẽ vĩ to professor ag vĩ kãfór ti nĩ gé. Hã kỹ tóg ki hã tóg mũ. Kỹ tóg ag mỹ e tĩ.

²³Hã ra ù tóg tá nĩ nĩ, Judeu ag vẽnh kanhrãn jafã tá. Jagrẽ kórég ti nĩ.

²⁴Ả tỹ Jesus ve kỹ tóg prěr mũ. “Ả tỹ ẽg tỹ hẽ ri ke nẽ, Nazaré tá Jesus?” he tóg. “Ả mỹ ẽg kókén sór tũ’? Ả ki kanhró sóg nĩ. Tỹ ả tóg ả pir mỹ Topẽ mré ke nĩ, ti tũ pẽ vỹ tỹ ả nĩ,” he tóg, ẽn jagrẽ kórég ti.

²⁵Hã ra Jesus tóg ti mỹ vĩ tar han mũ, kỹ tóg: “vĩ tũg ra,” he mũ. “Ti tovãnh ra,” he tóg.

²⁶Kỹ ti jagrẽ kórég ẽn tóg ti ter tĩ han mũ sir, prěr tóg mũ sir. Kỹ tóg ti tovãnh mũ.

²⁷Kỹ tóg vẽnh kar mỹ e tĩ mỹr sir. Jagnẽ mỹ ag tóg: “ne nẽ vé?” he mũ. “Vẽnh vĩ tãg mỹ vó?” he ag tóg mũ. “Vẽnh

jagrē kórég ag mý tóg vī tī, kŷ ag tóg ki ke tī, ti kamēg kŷ. Ag kri ke hŷn,” he ag tóg mŷ, Jesus to.

28 Kŷ ti vēme tóg vēnh kar kri rūm mŷ, Galiléia tá ke kar kri.

Jesus tŷ Pedro má fi tŷ há' he

(Mt 8.14-15; Lc 4.38-39)

29 Kar tóg Judeu ag vēnh kanhrān jafā ki kutē mŷ, Jesus ti, kŷ tóg Simāo Pedro ĩn ra rā mŷ sir. André mré ti ĩn vē. Tiago vŷ João mré ra rā mŷ gé.

30 Hā ra Pedro prŷ fi mŷnh fi vŷ kaga nŷ nī, rŷg nŷ fi nī. Kŷ ag tóg Jesus mŷ fi tó mŷ.

31 Kŷ tóg fi venh tī mŷ. Fi nīgé kāmī kŷ tóg fi nīm mŷ. Kŷ fi rŷg ěn tóg tŷ' he mŷ sir. Ag ki rīr fi tóg mŷ sir, Pedro má fi.

Jesus tŷ ũn kagyga ag tŷ há' he

(Mt 8.16-17; Lc 4.40-41)

32 Kurā ěn kā kuty tá ag tóg ũn kagyga ag tatī kāmŷ mŷ, ũn jagrē kórég ag mré hā.

33 Cidade ěn ki ke kar ag vŷ ti ĩn jānkā tá nŷtī mŷ.

34 Kŷ Jesus tóg ag tŷ há' he kān mŷ sir, fag tŷ ke gé. Vēnh jagrē kórég pan kān tóg mŷ gé. Kŷ ag tóg ti tó sór mŷ, ag tŷ ti ki kanhró nŷtī kŷ. Hā ra tóg ag mŷ: “vī tŷg nī,” he mŷ.

Jesus tŷ ā jóg mré vī

(Lc 4.42-44)

35 Tŷ vaj kŷ tóg kurā ke ra (tóg) rīr mŷ, Jesus ti. Kŷ tóg ěmā tŷ ra tī mŷ sir, Topē mré vī jé.

36 Kŷ Simāo tóg ti kanēg tī mŷ, ti jāvānh kŷ. Ti mré ke ag mré tóg tī mŷ.

37 Kŷ ag ti vég mŷ sir. Kŷ ag tóg ti mŷ: “vēnh kar vŷ ā kanēgnēg mŷ, ā jāvānhvānh kŷ,” he mŷ.

38 Kŷ Jesus tóg ag mŷ: “mŷ nŷ, cidade ũ ra,” he mŷ, “sŷ ag mŷ Topē vī tó jé gé. Hā jé sóg kātīg,” he tóg mŷ ag mŷ, Jesus ti.

39 Kŷ tóg ga tŷ Galiléia kar mī tī mŷ. Vēnh kanhrān jafā krēm tóg ag mŷ Topē vī tó mŷ sir. Ag jagrē kórég pan tóg mŷ gé sir.

Jesus tŷ ũn kaga kren vānh tŷ há' he

(Mt 8.1-4; Lc 5.12-16)

40 Kŷ kejěn ũn kaga kren vānh vŷ ti to kātī mŷ, vēnh kaga tŷ lepra he mŷ ěn han mŷ ěn. Kŷ tóg ti krēm grīnh ke mŷ, ti mŷ nén ũ to vī jé. Kŷ tóg: “ā mŷ isŷ há' he sór tŷ nī?” he mŷ. “Ā hā tóg isŷ há' henh mŷ, ā tŷ isŷ há' he sór kŷ,” he tóg ti mŷ.

41 Kŷ tóg Jesus mŷ jagtar tī. Kŷ tóg ā nīgé tŷ ti mēg kŷ ti mŷ: “hej,” he mŷ. “To sóg há nī. Há' he ja há ā tóg nī,” he tóg ti mŷ.

42 Kŷ tóg ti kaga kren vānh ěn kren han mŷ sir vēsŷmér. Kŷ tóg jānhkri nī sir, ti fār ti.

43 Kŷ Jesus tóg ti mŷ vī tar han mŷ, ti tŷg jé.

44 Kŷ tóg ti mŷ: “ker ũ mŷ tó hē,” he mŷ. “Ha tŷg, Topē tŷ ki rīr tī to. Ti hā mŷ tómnī, kŷ Topē mŷ nīm nī, Moisés tŷ vāsŷ ěg mŷ nén tó ja ti, ā jānhkri to. Hā tugrīn vēnh

kar vỹ ã tỹ há' he mũ tag ki kanhrãn mũ," he tóg ti mỹ, Jesus ti.

⁴⁵ Hã ra tóg vãnh kar mỹ to mũ sir. Kỹ vême ên vỹ vãnh kar kri rùm mũ. Hã kỹ Jesus tóg êmã ù ki rã tũ nĩgtĩ, vãnh ven jé. Êmã tũ mĩ tóg tĩgtĩ, hã ra ag tóg êmã kar tá ti to kãmũ tĩ.

2

Jesus tỹ ùn grĩngrĩn kỹ nỹ tỹ há' he

(Mt 9.1-8; Lc 5.17-26)

¹ Kãnhmar Jesus tóg kejẽn cidade tỹ Cafarnaum tá jun mãn, kỹ ag tóg mễg mũ sir, ti tỹ tá nĩn ki, ti tỹ hẽ tá nĩ ên tá.

² Kỹ ùn e ag vỹ ti to vãnh mãn, kỹ tóg fôr nĩ, jãnkãn mĩ hã. Kỹ Jesus tóg ag mỹ Topẽ vĩ to jẽ nĩ.

³ Hã ra ù ag tóg tá junjun mũ gé sir, ùn grĩngrĩn kỹ nỹ vyn kỹ, ù tỹ 4 (ke) ag vễ.

⁴ Hã ra ag tóg ti pêtêm tũ nĩ sir, ti tỹ ag jy fôr tĩn kỹ. Kỹ ag tóg ãn kunũg mũ, ti kri. Nor ên ki ag tóg ùn grĩngrĩn kỹ nỹ ên ti térem mũ, kur kãkã nỹ ti.

⁵ Kỹ Jesus tóg ag jykre vég mũ sir, ag tỹ ti ki ge kỹ nỹtĩ ti. Kỹ tóg ùn grĩngrĩn kỹ nỹ ên mỹ: "inh kósin," he mũ. "Ã tỹ Topẽ vĩ mranh ja tỹ tũ' he vễ ha," he tóg ti mỹ, Jesus ti.

⁶ Hã ra Topẽ vĩ to professor ù ag vỹ tá nỹtĩ gé. Tĩ vĩ to ag tóg jykren mũ sir.

⁷ "Ne nẽ hỹn', ti tỹ tó tag ti?" he ag tóg mũ, komẽr hã. "Topẽ to vĩ kónãn vễ," he ag tóg. "Topẽ hã ne ã pin kỹ êg tỹ Topẽ vĩ mranh ên tỹ tũ' he

há nĩnh mũ. Ti hỹn vễsỹ Topẽ han mũ," he ag tóg mũ, ti to jykren kỹ.

⁸ Hã ra Jesus tóg ki kanhró nĩ, ã fe tỹ, ag jykren ki. Kỹ tóg ag mỹ: "ãjag tỹ ne to jykren kónãn nẽ?" he mũ.

⁹ "Ne nỹ ãjag mỹ vẽnhmỹ nỹ?" he tóg. "Ùn grĩngrĩn kỹ nỹ tag mỹ sóg: ã tỹ Topẽ vĩ mranh ja ên tỹ tũ' he vễ ha, hé," he tóg. "Kỹn mỹ ãjag mỹ vẽnhmỹ?" he tóg. "Sỹ ti mỹ: nĩ ra, ã kur gé(g) tĩg, henh ke nẽ ha," he tóg. "Kỹn mỹ ãjag mỹ vẽnhmỹ ke gé'?" he tóg.

¹⁰ "Hã ra isỹ ãjag mỹ inh jykre ven sór vễ ha. Tỹ sóg êprã ke fi kósin nĩ. Tá sóg krỹg ke mũ, Topẽ vĩ mranh tỹ vãnh pãte fón ke tá. Sỹ tá krỹg mũ ven jé sóg ke mũ, ãjag mỹ," he tóg. Hã kỹ tóg ùn grĩngrĩn kỹ nỹ ên mỹ:

¹¹ "nĩ ra, ã kur gé(g) tĩg," he mũ, Jesus ti.

¹² Kỹ tóg jẻgnẽ mũ sir, ã kur gég tóg mũ sir vãhã, kỹ tóg ag rĩnve tĩ mũ sir, ùn grĩngrĩn kỹ nỹ ja ên ti.

Vãnh kar mỹ tóg e tĩ, kỹ ag tóg Topẽ to: "êg jykre kãfôr ti nĩ," he mũ. "Ge ve ja tũ êg nỹtĩ," he ag tóg mũ sir.

Jesus tỹ Levi jé prẽr

(Mt 9.9-13; Lc 5.27-32)

¹³ Kỹ Jesus tóg tĩg mãn mũ, goj nig tỹ Galiléia ra. Kỹ vãnh kar ag tóg ti pẽnĩn vãnh mãn mãn mũ sir. Kỹ tóg ag kanhrãn mũ gé.

¹⁴ ã tĩg mãn kỹ tóg Levi vég mũ, Alfeu kósin. Governo mỹ imposto kaja mãg ti tĩ, hã ra

tóg ã rãnrãj han nĩ nĩ. Kĩ Jesus tóg ti mĩ: “inh mré kãtĩg,” he mũ. Kĩ tóg jëgnë kĩ ti mré tĩ mũ sir.

¹⁵ Kĩ tóg kejën ti ãn krëm jëg mũ, Jesus ti, Levi ãn krëm. Hã ra ti mré ag e nĩtĩ, governo mĩ jãnkamy mäg tĩ ag, Topë vĩ mranh tĩ ag ke gé. Jesus mré ag nĩgnĩg kĩ nĩtĩ, ti mré mũ tĩ ag mré ke gé. E tãvĩ ag nĩtĩ, ti nón mũ ag.

¹⁶ Hã ra Topë vĩ to professor ù ag vỹ tỹ Fariseu nĩtĩ gé. Jesus vëg ag tóg mũ, ti tỹ Topë vĩ mranh tĩ ag mré jën kĩ. Kĩ ag tóg Jesus mré mũ tĩ ag mĩ vĩ mũ. “Ti hã ne tóg ag mré jëg mũ” he ag tóg. “Governo mĩ jãnkamy mäg tĩ ag mré tóg jëg mũ,” he ag tóg, “Topë vĩ mranh tĩ ag mré ke gé,” he ag tóg.

¹⁷ Hã ra Jesus tóg mëg mũ, ag vëme ãn ti. Kĩ tóg ag mĩ: “ũn kagyga tũ ag vỹ médico venh mũ tũ nĩgtĩ,” he mũ. “Hã ra ùn kagyga ag hã vỹ ti venh mũ tĩ,” he tóg ag mĩ, Jesus ti. “Inh pi(jé) ù tỹ vënh jykre kuryj han mũ ag mĩ: “ãjag jykre tovãnh nĩ,” he sór tĩ. Û tỹ Topë vĩ mranh ja nĩ ãn ag hã mĩ sóg: “ãjag jykre kórëg tovãnh nĩ,” he sór tĩ. Hã jé sóg ãjag mĩ vënh ven,” he tóg ag mĩ, Jesus ti.

Vãkre
(Mt 9.14-17; Lc 5.33-39)

¹⁸ Hã ra João mré mũ tĩ ag tóg kejën vãkrëg mũ, jëg tũ ag nĩ, ag tỹ Topë mĩ há nĩtĩ jé. Kĩ Fariseu ag vãkrëg mũ gé. Kĩ ag tóg Jesus mĩ: “João mré mũ tĩ ag vỹ tóg vãkrëg mũ,

Fariseu mré mũ tĩ ag ke gé,” he mũ. “Jo ã mré mũ tĩ ag ne tóg vãkrëg tũ nĩ’. Vãkre kurã vë mĩr,” he ag tóg ti mĩ, tá nĩtĩ ù ag.

¹⁹ Kĩ Jesus tóg ag mĩ comparação han mũ. “Vënh kyprüg to kãmũ ãn ag pi(jé) vãkrëg tĩ,” he tóg. “Festa vë mĩr, vënh prügprüg ti, kĩ ti mré ke ag tóg ùn prüg mũ ãn venh kãmũ tĩ,” he tóg. “Ge ti nĩ, inh mré mũ ag mĩ. Isỹ ag mré nĩn kĩ tóg ver ag mĩ sér tĩ,” he tóg ag mĩ, Jesus ti.

²⁰ “Vãhã tóg jun mũ, inh kurã ti, kĩ ag tóg inh pére mũnh mũ, ãn kã hã ag tóg ãjag vãkrenh ke venh mũ, kurã ãn kã, inh mré mũ tĩ ag,” he tóg.

²¹ “Ti si fag pi(jé) vãfe kygnej tũ tỹ kur si jar ki hyn han tĩ ja nĩtĩgtĩ’. Ûn kygnej tũ tỹ ki hyn han mũ ra tóg jaran kenh mũ. Kĩ kur si jar ãn tóg mág mũ. Ûn kygnej hã tỹ fag tóg ki han han tĩ, kĩ tóg jaran ke tũ nĩ,” he tóg, Jesus ti. Ti tỹ ã jykre tãg tón hã vë, hã ra tóg kur kygnej tũ ri ke nĩ.

²² Kĩ tóg ag mĩ: “Kĩ vinho vỹ ge nĩgtĩ gé,” he mũ gé. “Ëg pi(jé) vinho kajãg mũ tỹ ti fár si tỹ sacco ki kujëg tĩ mĩr,” he tóg. “Ke tũ nĩ (mũ) ra tóg kugnãj kĩ jar mũ, kógnãj kĩ. Kĩ vinho tóg tũ’ he mũ, sacco ti ke gé mĩr. Vinho kajã tỹ ti fár tãg tỹ ki kujën ke vë mĩr,” he tóg. Jesus tỹ ã jykre tãg tón hã vë.

Vënhkãn ke kurã
(Mt 12.1-8; Lc 6.1-5)

²³ Kejën Jesus tóg ëpỹ mũ tĩ mũ, trigo krë mĩ. Ti mré mũ tĩ

ag tóg ti mré mũ mũ. Vēnhkán ke kurā vē. Ag mũ k̄y ti mré mũ t̄i ag v̄y trigo mugmó t̄y kam ke mũ, ko jé.

²⁴ K̄y Fariseu ag tóg Jesus m̄y: “ha vé,” he mũ. “Ag t̄y ne jé ãjag t̄y nén han ke tũ han nē, vēnhkán ke kurā ki?” he ag tóg mũ. “Vēnh rānhrāj vē m̄y, ag t̄y trigo t̄y kam ke ti,” he ag tóg, Jesus m̄y.

²⁵ K̄y tóg ag m̄y: “vó,” he mũ. “Davi t̄y nén han mũ to jykrén n̄i,” he tóg. “Ti kók̄ir n̄in k̄y tóg ã t̄y nén han ke tũ han gé, ã mré mũ t̄i ag mré, hã ra Topē pi(jé) ti to jũ mũ, tag han tugiñ, ha mē.

²⁶ Topē jo ãn k̄ara tóg rã, Davi ti, Abiatar t̄y Topē tũ ki r̄ir t̄i to pã'i n̄in k̄y. Tá tóg Topē jam̄i ěn kó, t̄y ti t̄y konh ke tũ ra, Topē tũ ki r̄ir t̄i ag hã t̄y konh ke vē vē. Hã ra tóg kó, ti mré mũ ag m̄y tóg vēnh ken gé, Davi ti,” he tóg, Jesus ti. “Rán k̄y tóg n̄i n̄i,” he tóg.

²⁷ K̄y Jesus tóg ag m̄y: “Topē v̄y ěg m̄y vēnhkán ke kurā n̄im, ěg t̄y ki vēnhkán jé,” he mũ. “Hã ra tóg t̄y kurā kórég han tũ n̄i, vēnhkán ke kurā t̄y,” he tóg.

²⁸ “Hã k̄y sóg t̄y vēnhkán ke kurā to pã'i n̄i gé. T̄y sóg ěprã ke fi kósin n̄i m̄y,” he tóg ag m̄y, Jesus ti.

3

Jesus t̄y ãn n̄igé tóg t̄y há' he (Mt 12.9-14; Lc 6.6-11)

¹ Kejēn Jesus tóg vēnh kanhrãn jafã ra rã m̄an mũ. Tá ã tóg jē n̄i, ti n̄igé tóg tóg ja n̄i.

² K̄y ag tóg ti tugn̄ym mũ sir, “kema ěg t̄y ti t̄y vēnhkán ke kurā kã ti t̄y há' he ve jé,” he ag tóg mũ sir. Hã ra ag tóg pã'i ag m̄y ti tó sór mũ, ti t̄y vēnhkán ke kurā to Topē v̄i mranh k̄y.

³ Hã ra Jesus tóg ãn n̄igé kórég ěn m̄y: “kun̄ig,” he mũ.

⁴ K̄y tóg ag m̄y: “vēnhkán ke kurā ki ěg h̄yn ne han mũ?” he mũ, “ěg t̄y Topē v̄i ki króm jé,” he tóg. “Ěg m̄y h̄yn nén ã há han mũ?” he tóg. “Ěg t̄y ã tũ kókén k̄yn m̄y kórég tũ n̄inh mũ?” he tóg ag m̄y. “Ěg m̄y ã kren han mũ h̄yn?” he tóg. “Ěg t̄y ã tén k̄yn m̄y há n̄inh mũ h̄yn?” he tóg. Hã ra ag tóg ti m̄y katy t̄i sir.

⁵ K̄y tóg ag ki ěvãnh k̄y jũ mũ sir, fe kaj tóg n̄i sir, ag kr̄i tũ n̄yt̄in k̄y. “Ã n̄igé t̄y kr̄yg' hé,” he tóg ti m̄y, ãn n̄igé tóg ěn m̄y. K̄y tóg t̄y kr̄yg' he mũ sir, há' he tóg mũ sir, vãhã, ãn n̄igé tóg ja ěn ti.

⁶ K̄y vãhã Fariseu ag mũ mũ sir, jagnē mré ti to jykrén jé, pã'i mág t̄y Herodes mré ke ag mré ke gé. “Ěg h̄yn hē ri ken k̄y ti tũg mũ?” he ag tóg mũ, Jesus ti to.

Jesus t̄y goj nig fyr tá ag kanhrãn

⁷ Hã ra Jesus tóg ti mré mũ t̄i ag mré goj nig t̄y Galiléia ra t̄i mũ, vēnh e tũg ja ra. Hã ra vēnh e ag tóg ti nón mũ mũ. Ga t̄y Galiléia tá ag tóg kãmũ mũ, ga t̄y Judéia tá ke gé,

⁸ cidade t̄y Jerusalém tá, ga t̄y Iduméia tá, goj t̄y Jordão mã tá, cidade t̄y Tiro tá,

cidade tỹ Sidom tá ke gé. E tãvĩ ag nỹtĩ, e pẽ. Ti tỹ nén hyn han kar mẽ kỹ ag tóg ti to kãmũ mũ.

⁹ Kỹ Jesus tóg ti mré mũ tĩ ag mỹ tó mũ, ag tỹ ti mỹ canoa jãján jé. Ti kutãn ag tóg, vẽn kar ên ti, hã kỹ tóg canoa to vỹ mũ.

¹⁰ Û tỹ hẽn ri ke tỹ há' he ja tóg nĩ, ùn kagyga ag tỹ, fag tỹ ke gé. Hã kỹ ag tóg ti kutãn mũ. Ag tỹ ti mẽ sór vẽ, ãjag nĩgẽ tỹ.

¹¹ Kỹ ùn jagrẽ kórég ag vỹ tá nỹtĩ gé. Ag tỹ Jesus ve kỹ ag tóg prẽnprẽn mũ sir. “!..Tỹ ã Topẽ kósin ne..!” he ag tóg mũ, prẽnprẽn kỹ.

¹² Kỹ Jesus tóg ag mỹ vỹ tar han tĩ. “Ker inh kãmén hẽ’,” he tóg tĩ, ag mỹ.

*Jesus tỹ ù tỹ 12 (ke) ag vin
(Mt 10.1-4; Lc 6.12-16)*

¹³ Kejẽn tóg pãnónh ra tĩ mũ, Jesus ti. Kỹ tóg ag jé prẽn mũ, ag kuprẽg kỹ. Kỹ ag tóg ti to mũ mũ.

¹⁴ Kỹ tóg ù tỹ 12 (ke) ag vin mũ sir, ag tỹ tỹ ti mré mũ tĩ nỹtĩ jé, ti tỹ ag jẽgnẽ jé ke gé, “Topẽ vỹ tó jé,” he tóg.

¹⁵ Ag mỹ tóg vẽn jykre nĩm mũ, ag tỹ vẽn jagrẽ kórég pan jé.

¹⁶ Û tỹ 12 (ke) ag hã vẽ, ha mẽ: Simão, Jesus tỹ ti jyjy ù hã vỹ: Pedro, he mũ,

¹⁷ Tiago ke gé, ti jãvy tỹ João mré, Zebedeu krẽ tag ag. Jesus tỹ ag jiji ù hã vỹ: Boanerges, he mũ, ãg vỹ ki ke hã vỹ: ta tỹ tỹrỹrỹ he ri ke ag, he mũ,

¹⁸ André ke gé, Filipe ke gé, Bartolomeu ke gé, Mateus ke

gé, Tomé ke gé, Tiago ke gé, Alfeu kósin tag ti, Tadeu ke gé, Simão ke gé, ag tỹ ù to: Zelote, he mũ tag ti,

¹⁹ Judas Iscariotes ke gé, ù tỹ pã'i ag mỹ Jesus ven ke ti.

*Topẽ vỹ to professor ag tỹ
Jesus to vỹ kónãn*

(Mt 12.22-32; Lc 11.14-23; 12.10)

²⁰ Kỹ Jesus tóg ag mré ã jamã tá jun mũ. Kỹ vẽn kar tóg sir tá vẽn mân mũ, kỹ tóg ag jẽn ke mũ ra vẽnhmỹ tĩ, Jesus mré mũ ag.

²¹ Kỹ Jesus kanhkã fag vỹ ti vême mẽ kỹ ti kãgmĩnh kãmũ mũ. “Krĩ vẽnhmỹ nĩ ve ti nĩ,” he fag tóg, hã kỹ fag tóg ti kãgmĩ sór mũ. Hã ra tóg fag mré tĩ tũ nĩ.

²² Kỹ Topẽ vỹ to professor ag tóg tá junjun mũ gé. Jerusalém tá ag tóg kãmũ jẽg, ti ve jé. Kỹ ag tóg ti to: “jagrẽ kórég ti hỹn nĩ,” he mũ. “Hã kỹ tóg vẽn jagrẽ kórég ag pã'i ên jykre han mũ, vẽn jagrẽ kórég ag pan jé,” he ag tóg. “Belzebu jykre tỹ tóg ag pan mũ, Nén-Kórég jykre tỹ,” he ag tóg, Jesus to, Topẽ vỹ to professor ag.

²³ Kỹ Jesus tóg ag jé prẽn kỹ ag mỹ comparação han mũ, kỹ tóg: “Satanás vỹ vẽn jagrẽ kórég pan tũ nĩgtĩ mỹr,” he mũ, Jesus ti.

²⁴ “Pã'i pir krêm ke ag tỹ jagnẽ kato tẽgtẽn kỹ ag tóg jagnẽ kãgtén kãn ke mũ,” he tóg.

²⁵ “Ïn pir kã ki ke ên fag tỹ jagnẽ kato tẽ kỹ fag tóg jagnẽ kãgtén kãn ke mũ gé,” he tóg.

26 “Satanás krēm ke ag tỹ jagnē kato tē kỹ ag tóg jagnē tỹ tũ' henh ke mũ gé, kỹ tóg tũ' he mũ sir, Satanás ti,” he tóg.

27 “Ēg tỹ ũ tỹ nén ũ mǎn sór kỹ, ti ĩn tá, kỹ ěg tóg ti se vén tĩ, ke tũ nĩ (mũ) ra tóg ã tũ ki rĩr ke mũ, kỹ ěg tóg ti tũ mǎn tỹ hē ri kenh ke tũ nĩgtĩ, ti tar nĩn kỹ. Ēg tỹ ti se kar kỹ ěg tóg ti tũ mǎg mũ sir,” he tóg. “Ge ti nĩgtĩ, sỹ nén han mũ ti. Tar ti nĩ, Japo ti, hã ra sóg hur ti sé, hã kỹ sóg ti tũ ag kygvãg mũ sir, ag jagrē kórég pan sóg mũ sir,” he tóg, Jesus ti.

28 “Sỹ ke há vĕ, hã kỹ sóg tó mũ,” he tóg. “Topĕ vỹ ãjag mỹ vĕnh pãte fón kǎn mũ, ãjag tỹ ti vỹ mranh kar ěn tỹ, ãjag tỹ ti kato vỹ kónǎn mré hã,” he tóg.

29 “Jãvo ãjag tỹ Topĕ kuprĩg kato vỹ kónǎn kỹ tóg ãjag mỹ vĕnh pãte fón mǎn ke tũ nĩ ha, Topĕ ti,” he tóg. “Ājag tỹ Topĕ vỹ mranh ěn vỹ ãjag hã kã nĩ nĩ, kurã tũ ti nĩ,” he tóg, Jesus ti.

30 Ag mỹ tóg ke mũ, Jesus ti, ag tỹ ti to: “jagrē kórég ti hỹn nĩ,” hen kỹ.

*Jesus mré ke pĕ fag
(Mt 12.46-50; Lc 8.19-21)*

31 Kỹ ti mỹnh fi tóg ti jãvy ag mré ti venh kãtĩ mũ. Re kã fi jĕ ag mré, kỹ ag tóg ũ jĕnĕg mũ, ti jĕ prĕr jĕ.

32 Jesus pĕnĩn vĕnh e vỹ tóg nỹtĩ, nĩgnĩg kỹ, kỹ ag tóg: “ha mĕ, ã mỹnh fi vỹ re kã jĕ, ã jãvy ag mré,” he mũ. “Fag tỹ ã mré vĕmĕn sór vĕ. Ā jĕ prĕr fag tóg mũ,” he ag tóg ti mỹ.

33 Hã ra Jesus tóg: “inh mỹnh fi mỹ inh ve sór mũ', inh

jãvy ag mré?” he mũ. “Inh mỹnh fi vĕ vĕ, inh jãvy ag vĕ vĕ, hã ra ag tóg tỹ inh mré ke pĕ tũ nỹtĩ,” he tóg.

34 Kỹ tóg ũn nĩgnĩg kỹ nỹtĩ ag ki ěvãnh kỹ tóg: “inh mỹnh fi hã vĕ, inh jãvy ag hã vĕ gé,” he mũ.

35 “Ũ tỹ Topĕ vỹ han mũ ěn ag vỹ tỹ inh jãvy nỹtĩ, inh ve fag ke gé, inh mỹnh ke gé,” he tóg ag mỹ, Jesus ti.

4

*Nén fy to comparação
(Mt 13.1-9; Lc 8.4-8)*

1 Kejĕn Jesus tóg goj nig tỹ Galilĕia fyr tá ag kanhrãn mǎn mũ. Hã ra vĕnh e vỹ ti pĕnĩn nỹtĩ, vĕnh e tãvĩ, hã kỹ tóg canoa kãra rã mũ, goj kãki, kỹ tóg canoa kãkã nĩ mũ, hã ra ag kar vỹ tar tá vĕnh mǎn kỹ nỹtĩ, nig fyr tá.

2 Ag mỹ tóg vĕnh vỹ e tó mũ, comparação han kỹ.

3 Kỹ tóg kejĕn ag mỹ: “ha mĕ,” he mũ. “Ũ tóg nén ũ fy krigkrig tĩ mũ,” he tóg.

4 “Ti tỹ krigkrig kỹ ti fy ũ tóg ěmĩn kri kutĕ mũ, ěpřy kri. Kỹ sĕsĩ tóg ti ko mũ sir.

5 Ti fy ũ tóg pãró kri kutĕ mũ, ga e tũ ki, kỹ tóg kãnhmar mur mũ vĕ, ga sĩ ěn ki.

6 Hã ra rã tóg ã tỹ ěg nĩno kã sa kỹ (tóg) ti pũn mũ. Ti jãre han tũ nĩn kỹ tóg tóg mũ.

7 Ti fy ũ tóg sónh kãki kutĕ mũ, kỹ sónh tóg ti mré mur mũ, ti kri rũm tóg mũ sir kỹ tóg kanĕ han tũ nĩ.

8 Ti fy ũ tóg ga há kri kutĕ mũ kỹ tóg mur há han mũ, mog há han tóg mũ, kanĕn ha

han tóg mũ gé, ù tóg kaně tỹ 30 (ke) han, jo ù vỹ kaně tỹ 60 (ke) han, jo ù vỹ kaně tỹ 100 (ke) han.

⁹ Û nĩgrěg nỹtĩ tỹ tỹ jěmě jé," he tóg, Jesus ti.

Jesus tỹ nén fy to comparação kāmén
(Mt 13.10-23; Lc 8.9-15)

¹⁰ Ûn e ěn ag mũn kar kỹ ti mré nỹtĩ ag tóg ti ki jěměnh kāmũ mũ, nén fy kāmén ti. Kỹ ag tóg ti mỹ: "ã tỹ ěg mỹ ne tó ně?" he mũ.

¹¹ Kỹ tóg ag mỹ: "ãjag hã tóg Topě tỹ tỹ ěg pa'i nĩ ki kanhró nỹtĩnh mũ, ijo tó ja tũ ěn ki," he mũ. "Hã ra sóg ěn ag mỹ comparação tãvĩ han mũ.

¹² Ag mỹ sóg tó há han ke tũ nĩ, ón kỹ měg mũ ag mỹ, kỹ ag tóg ãjag tỹ vėg mũ ra ki kagtĩg nỹtĩ, ãjag tỹ měg mũ ra ag tóg to jykren tũ nỹtĩ, kỹ ag tóg Topě ki ge tũ nỹtĩ gé, kỹ Topě tóg ag mỹ vėnh pãte fón ke tũ nĩ gé," he tóg, Jesus ti, ù ag to.

¹³ Kỹ tóg ag mỹ: "ãjag tỹ to jykren tũ tóg tĩ," he mũ, "sỹ ãjag mỹ nén fy kāmén kỹ," he tóg. "Kỹ ti mỹ ãjag tỹ ù to jykren há nĩnh mũ', sỹ ãjag mỹ comparação ù han kỹ?" he tóg.

¹⁴ Kỹ tóg jamã hár(a) ag mỹ kāmén mũ. "Û tóg nén fy vãvãm tĩ, kỹ ti tỹ Topě vĩ tó vė, hã vỹ: vãvãm, he mũ, nén fy ri ke vė," he tóg.

¹⁵ "Ti fy ù vỹ ěmĩn kri kutě mũ. Kỹ Topě vĩ měg mũ ù ag vỹ ěpřy ri ke nỹtĩ," he tóg. "Ag tỹ Topě vĩ měg mũ ra tóg ag mỹ tỹ tũ' he mũ, Satanás ti,

Topě vĩ tỹ. Věsỹmér tóg ag mỹ tỹ tũ' he mũ, ag mỹ Topě vĩ tó tỹ. Kỹ ěmĩn ri ke vė sir.

¹⁶ Hã ri ken hã vė gé, ti tỹ pãró kri vãvãm ěn ti. Ag tỹ Topě vĩ mě kỹ ag tóg vėsỹmér: hej, he mũ sir. Ag mỹ tóg sér tĩ.

¹⁷ Hã ra ag tóg nén kré jãre tũ ri ke nỹtĩ, kỹ ag tóg mũ sĩ han mũ, Topě mré. Nén ù jagy kutě kỹ ag tóg sir Topě tovãnh mũ vėsỹmér, ù tỹ Topě tugřn ag kato tẽ kỹ.

¹⁸ Ti tỹ sónh kãki vãm ěn hã vė gé, hã vỹ tỹ Topě vĩ měg mũ ag nỹtĩ gé.

¹⁹ Hã ra ag tóg ãjag rãnhřãj hã mĩ ěkrég mũ, ón kỹ rico nĩ sór jé. Nén ù kar to ag ěn, hã kỹ Topě vĩ tóg ag mỹ katy' he mũ sir. Kỹ ag tóg kaně há han tũ nĩ.

²⁰ Hã ra ti tỹ ga há kri vãvãm mũ ěn vỹ tỹ Topě vĩ měg mũ ag nỹtĩ gé. Hej, he ag tóg mũ sir, kaně há han ag tóg mũ, ù tóg kaně tỹ 30 (ke) han mũ, ù tóg kaně tỹ 60 (ke) han mũ, ù tóg kaně tỹ 100 (ke) han mũ," he tóg, Jesus ti, ag mỹ.

Jěngrě to comparação
(Lc 8.16-18)

²¹ Kỹ Jesus tóg ag mỹ: "ěg pi(jé) néj gru ma kāmũ kỹ kěj krěm fěg tĩ', ěg pi(jé) cama krěm fěg tĩ'," he mũ. "Ti fěg jãfã kri ěg tóg fěg tĩ.

²² Hã kỹ ěg tỹ nén vėg tũ ěn vėnh ven kãn ke vė, hã jé tóg ver pėju kỹ nĩ. ěg tỹ nén ki kagtĩg ěn vėnh ven kãn ke vė," he tóg.

²³ "Ûn nĩgrěg nỹtĩ tỹ tỹ jěmě jé," he tóg.

24 “Hã kÿ jẽmẽ há han,” he tóg. “Ăjag mré ke ag jykre tugnÿm ăjag tóg tĩ, kÿ ăjag tóg ag mÿ vĩ tar han tĩ. Kÿ Topẽ vÿ ăjag mÿ vĩ tar han ke mũ gé, ăjag tÿ ăjag mré ke ag jykre ri ke nÿtĩn kÿ. Hã ra tóg ăjag mÿ vĩ tar kăfór han ke mũ, ha vemnĩ,” he tóg.

25 “Û tÿ nén ù to jykrén há han kÿ tóg ù to jykrén măn', ù to jykrén măn', he mũ sir. Û tÿ nén ù to jykrén há han tũ nĩn kÿ tóg ti mÿ tũ' he mũ sir, ti tÿ nén to jykrén sĩ han mũ ra,” he tóg, Jesus ti.

Nén kré to comparação

26 Kÿ Jesus tóg ag mÿ: “Topẽ tÿ tÿ ẽg pã'i nĩ vÿ ge nÿnh mũ, ha mẽ,” he mũ. “Û vÿ nén ù fy vāvãm tĩg mũ, ẽpÿ ki,” he tóg.

27 “Û tÿ vāvãm mũ vÿ nÿr mũ sir, kutyg kÿ, tÿ vaj kÿ tóg rĩr măn mũ sir. Hã ra ti fy ẽn vÿ mur mũ, mog tóg mũ, jo ù tÿ vāvãm mũ tóg ki kagtĩg nĩ. “Ti hẽ ri ken kÿ mur?” he tóg.

28 Jăvo tóg vėsóg ki mog, kar tóg mó han, kÿ vāhã ti kanẽ vẽ sir, ti mó kăki.

29 Ti kanẽn kar kÿ tóg ag mÿ: “ha kre jafã va kămũ jẽg,” he mũ sir. Kÿ ti krenh ke kurã vẽ sir. Topẽ tÿ tÿ ẽg pã'i nĩ ri ken hã vẽ,” he tóg, Jesus ti, ă kătĩg măn ke tón kÿ.

Ka tÿ mostarda fy to comparación

(Mt 13.31-32, 35; Lc 13.18-19)

30 Kÿ Jesus tóg: “inh hÿn tóg tag tónh mũ ha, sÿ Topẽ tÿ tÿ ẽg pã'i nĩ kămén jé,” he mũ.

31 “Ka tÿ mostarda fy ri ke ti nĩ, Topẽ tÿ tÿ ẽg pã'i nĩ ti,” he tóg. “Ti krăn ẽg tóg tĩ, ẽg japÿ ki. Kăsir ti nĩ, ti fy ti. Û fy vÿ ti sĩ ri ke tũ nÿtĩ.

32 Ti krăn kar kÿ tóg mog mũ, kÿ tóg ẽgóho kar kăfór nĩ. Pẽ mág ti nÿtĩ, hã kÿ sėsĩ ag vÿ kăki krẽg tĩ, ti fẽnja ki,” he tóg, Jesus ti.

33 Comparação tÿ hẽn ri ke hÿn han tóg, ag mÿ Topẽ vĩ tón ki, ag tÿ to jykrén sór kÿ.

34 “Tag vÿ ge nÿnh mũ,” he hã han tóg ag mÿ, Jesus ti. Ag mÿ tóg jamã hár(a) nén ù tó tũ nĩ, ùn e ag mÿ. Hã ra tóg ă mré mũ tĩ ag mÿ kămén há han mũ, ag pin kÿ.

Jesus tÿ kóho tÿ tũ' he

(Mt 8.23-27; Lc 8.22-25)

35 Hã tÿ kuty tá tóg ag mÿ: “mũ nÿ, goj nig kafã ù ra,” he mũ.

36 Hã kÿ ag tóg vẽn e ẽn ré kÿ mũ mũ sir, canoa kămĩ, Jesus tÿ kăkã nĩn kÿ. Hã ra ù ag tóg ti mré mũ mũ gé, canoa ù kămĩ.

37 Hã ra kăka tar tăvĩ vÿ tóg vāhã krog he mũ, kóho ti. Kÿ goj tóg canoa kăki krém krém ke mũ. Ti fãn sór tóg mũ sir.

38 Hã ra Jesus tóg nÿr nÿ, fakrĩnh kÿ, canoa nér tá. Kÿ ag tóg ti rĩn kÿ ti mÿ: “Senhor,” he mũ. “Û mÿ ẽg kăgter ha mẽ tóg tĩ. Mÿ ă mÿ tÿ nén ù tũ?” he ag tóg ti mÿ.

39 Kÿ tóg rĩr mũ sir, kÿ tóg kóho mÿ vĩ tar han mũ, ti mÿ: “krÿg he ra,” hen kÿ. Kÿ kóho tóg tũ' he mũ, katy' he tóg mũ.

40 Kÿ tóg ag mÿ: “ăjag tÿ ne jé kanẽ jur nẽ?” he mũ. “Ăjag

mỹ inh ki rã há han tũ?” he tóg ag mỹ.

⁴¹ Kĩ tóg ag mỹ e (pẽ) tãvĩ tĩ sir. Jagnẽ mỹ ag tóg: “ti jykre tóg êg mỹ e tĩ,” he mũ. “Kóho vỹ ti vĩ han, goj ti ke gé,” he ag tóg.

5

Jesus tỹ vẽnh jagrẽ kórég tỹ mil ag pan

(Mt 8.28-34; Lc 8.26-39)

¹ Kĩ ag tóg goj nig kafã ù tá junjun mũ sir, Gerasa tá ke ag tá.

² Jesus tỹ canoa ki vag ke mũ ra ù tóg ti kato tẽ mũ. Jagrẽ kórég ti nĩ. Vẽnh kej tá tóg kãkutẽ mũ.

³ Tá tóg êmã nĩ, vẽnh kej tá. Ag tỹ ti sêg mũ ra tóg vẽnh mỹ nĩ, ferro mré hã.

⁴ Ti se tỹ hẽn ri ke han ja ag tóg nĩgtĩ vẽ, ti nĩgé, ti pẽn ke gé, ferro tỹ. Hã ra tóg ferro tỹ kam ke ja nĩgtĩ, ã pẽn se ja ti mrynhmranh kãn ja tóg nĩgtĩ. Ag tỹ ti kanhrãn ke mũ ra ag tóg ti tỹ hẽn ri ke ja tũ nĩgtĩ.

⁵ Kutỹ ki kurã mré tóg prẽr tĩgtĩ, vẽnh kej ki. Pãró ên ki pó génh kỹ tóg vêsãnh tĩgtĩ.

⁶ Ti tỹ kuvar há tá Jesus ve kỹ tóg ti to vẽnhvãg tĩ mũ, kỹ tóg ti krêm grĩnh ke mũ.

⁷ Jamã hár(a) tóg prẽr mũ, kỹ tóg: “!..ã isỹ hẽn ri kenh mũ, Jesus'..!” he mũ, “!..kynhmỹ Topẽ kósin'..!” he tóg. “!..Ã mỹ sóg to vĩnh mũ, ã tỹ inh vóg kónãnh tũ nĩnh jé, kỹ Topẽ vỹ inh vĩ mẽg mo..!” he tóg.

⁸ Hã ra Jesus tóg ti mỹ: “ti tovãnh ra, Nén-Kórég’,” he ja nĩ.

⁹ Kỹ Jesus tóg ti mỹ: “ã jyjy hẽn ri ke tĩ,” he mũ. Kỹ tóg: “Mil,” he mũ. “E tãvĩ êg nỹtĩ,” he tóg, Nén-Kórég ti.

¹⁰ Kỹ tóg to vĩ', to vĩ', he mũ, Jesus tỹ êmã ên ki ti kutẽm tũ nĩ jé.

¹¹ Hã ra ag mẽg tỹ porco ag tóg jêg nỹtĩ, pãnónh ên kri.

¹² Kỹ Nén-Kórég ag tóg Jesus mỹ: “ag mẽg to êg jêgnẽ, êg tỹ ag kãki ge jé,” he mũ.

¹³ Kỹ tóg ag mỹ: “hej,” he mũ. Kỹ Nén-Kórég ag tóg ên ti tovãnh mũ sir, porco ag ki ge ag tóg mũ sir. Kỹ ag tóg re mũ sir, porco ag. Rãn ki ag tóg re mũ, kỹ ag tóg nỹgnỹr kãn mũ sir, goj nig ki. Kãgter kãn ag tóg mũ. Porco tỹ mil régre ag vẽ, hỹn.

¹⁴ Kỹ porco ki rĩr tĩ ag tóg sir pêtẽ mũ, cidade ra. Tá ag tóg kãmén kãn mũ, Nén-Kórég tỹ jagrẽ ja ên ti. Kỹ ag tóg Jesus to mũ kãn mũ sir, nẽn ên ve jé.

¹⁵ Jesus tá ag tóg junjun mũ sir, kỹ ag tóg ùn jagrẽ kórég ja ên vэг mũ, kur tu kỹ. Krĩ há' he tóg mũ, ù tỹ mil tỹ jagrẽ kórég ja ên ti. Kỹ ag fe tóg jũrũn ke mũ.

¹⁶ Kỹ ù tỹ vэг mũ ag tóg kãmén mũ sir ag mỹ Ûn jagrẽ kórég ja ti, porco ag.

¹⁷ Hã kỹ ag tóg Jesus mỹ to vĩ mũ, ti tỹ tá kutẽ jé, ag rã hã nĩ tũ nĩ jé.

¹⁸ Ti tỹ canoa kãki rã kỹ ùn jagrẽ kórég ja tóg: “nhỹ ã mré tĩg mũ,” he mũ, Jesus mỹ.

¹⁹ Hã ra tóg ti mỹ nenh. “Ha tĩg, ã ãn ra, ã tỹ ã mré ke ag mré nĩ jé,” he tóg ti mỹ. “Ag mỹ kãmén nĩ, êg jóg mág tỹ ã

tỹ há' he mũ ti, ti tỹ ã jagãgtãn mũ ti," he tóg ti mỹ.

²⁰ Kỹ tóg ti mũ. Ēmã tỹ 10 (ke) ki ga tá tóg kãmén mũ, Jesus tỹ ã tỹ há' he ti. Kỹ tóg ag kar mỹ e tĩ.

Jairo tỹ Jesus mỹ ã kósin fi to vĩ
(Mt 9.18-19; Lc 8.40-42)

²¹ Kỹ Jesus tóg kafã ra tĩg mãn mũ, canoa kãmĩ. Kỹ vãnh e tóg ti jo vãnh mãn mũ. Hã ra tóg goj nig fyr tá jẽ nĩ.

²² Kỹ ù tóg kãtĩ mũ, ti jiji hã vỹ: Jairo, he mũ. Judeu ag vãnh kanhrãn jafã to tóg tỹ pã'i nĩ. Ti tỹ Jesus ve kỹ tóg ti krêm mũg ke mũ.

²³ Ti mỹ tóg: "inh kósin sĩ fi vỹ tũg sór mũ," he mũ. "Kunĩg, ã tỹ ã nĩgẽ tỹ fi mẽ jé, fi tỹ há' he jé, fi kren jé," he tóg.

²⁴ Kỹ tóg ti mré tĩ mũ. Hã ra ùn e ag tóg ti nón mũ kỹ ti kutãn mũ.

Ûn tỹtã kaga fi
(Mt 9.20-22; Lc 8.43-48)

²⁵ Jo ùn tỹtã ù fi tóg tá nĩgtĩ. Kyvãnh krỹg tũ han kỹ fi tóg nĩ, prỹg tỹ 12 (ke) ki.

²⁶ Médico ag tỹ fi vēsỹrénh mág han, to fi tóg ã tỹ nén vãm kãn, hã ra fi tóg há' he tũ nĩ, ke han han fi tóg.

²⁷ Hã ra fi tóg Jesus kãme mẽ ja nĩgtĩ, kỹ fi tóg vãnh e kãmĩ tũg kỹ ti nón ti kur mẽg mũ sir.

²⁸ "Sỹ hẽn ri ke mũn ti kur mẽ kỹ inh hỹn han mũ," he fi tóg.

²⁹ Fi tỹ ti kur mẽ kỹ fi kyvãnh tóg gym ke mũ sir vãhã, kỹ fi tóg ki kanhró nĩ, fi kaga tỹ há' he ên ki.

³⁰ Hã ra Jesus tóg ã fe tỹ ki kanhró nĩ, ã jykre kutẽ ên ki. Kỹ tóg vãnh e kãki vỹrĩn ke mũ sir. "Û nỹ inh kur mẽ'?" he tóg.

³¹ Kỹ ti mré mũ tĩ ag tóg ti mỹ: "vãnh kar tỹ ã kutãn vẽ," he mũ. "Jo ã tóg: ù nỹ inh kur mẽ? he mũ," he ag tóg ti mỹ.

³² Kỹ tóg tãmĩ êvãnh mũ, ù tỹ ã mẽg mũ fi ve jé.

³³ Hã ra ùn tỹtã fi tóg ki kanhró nĩ, fi han mũn ki. Kỹ fi tóg kamẽg kỹ, jũrũn ke kỹ mũg ke mũ, ti krêm. Kỹ fi tóg ti mỹ kãmén kãn mũ sir.

³⁴ Hã ra tóg fi mỹ: "inh kósin," he mũ. "Ã tỹ inh ki rã kỹ ã tóg há' hé," he tóg. "Ha tĩg, jatun mỹ, ã han vẽ ha," he tóg, fi mỹ.

Jairo kósin fi rĩr mãn
(Mt 9.23-26; Lc 8.49-56)

³⁵ Ti tỹ ver fi mré vēmén jẽ ra ù ag tóg tá junjun mũ, pã'i tỹ Jairo ên ãn tá. "Ã kósin fi vỹ hur ter," he ag tóg. "Tũg ja fi tóg nĩ ha," he ag tóg. "Hã kỹ ti mỹ: kunĩg, he mãn tũg nĩ, ti kutãn mãn tũg nĩ," he ag tóg, Jairon mỹ.

³⁶ Hã ra Jesus tóg mẽg mũ, kỹ tóg: "kamẽg tũg nĩ, inh vĩ hã kri nĩmĩn," he mũ, pã'i ên mỹ.

³⁷ Kỹ tóg ùn e ag tỹ ti ãn ra mũ kamẽg. "Pedro vỹ tũg mũ inh mré, Tiago ke gé," he tóg, "Tiago jãvy tỹ João ke gé," he tóg.

³⁸ Ag tỹ Jairo ãn tá junjun mũ ra Jesus tóg vãnh e vэг mũ sir, kygfỹ mũ fag, vēsỹrénh jagy han mũ fag.

³⁹ Kĩ tóg kã rã kũ fag mĩ: “ãjag tũ ne jé kygfỹ nẽ, ãjag tũ ne jé vêsỹrénh nẽ?” he mũ. “Ter tũ fi nĩ, nũr fi nỹ nĩ,” he tóg.

⁴⁰ Hã ra fag tóg ti nyg mũ. Hã ra tóg fag pan mũ sir, kũ tóg fi panh mré, fi mỹnh fi mré fi venh tĩ mũ, ti mré kãmũ mũ ag mré.

⁴¹ Fi nĩgẽ kãgmĩ kũ tóg fi mỹ: “talitá cumi,” he mũ. Ëg vĩ ki ke vẽ, hã vĩ: nĩ ra, jỹ, he mũ.

⁴² Kũ vãhã gĩr fi tóg nĩ mũ sir, kãnẽ tĩ fi nĩ sir. Kri prỹg tỹ 12 (ke) fi nĩ. Kũ tóg ag mỹ e tãvĩ tĩ.

⁴³ Hã ra tóg ag mỹ vĩ tar han, ag tỹ ù mỹ tó tũg jé. “Ha fi mỹ vễjên ven,” he tóg. Hã ra tóg fi ter kũ nỹ ra fi rĩn mãn.

6

Jesus jamã tá ke ag tỹ ti to é he

(Mt 13.53-58; Lc 4.16-30)

¹ Kũ Jesus tóg tá kãkutẽ kũ ã jamã tá jun mũ sir. Ti mré mũ tĩ ag tóg ti mré mũ mũ gé.

² Vẽnhkán ke kurã ki tóg ag vãnh kanhrãn jafã ki ag kanhrãn mũ. Ag tỹ ti vĩ mẽ kũ tóg ag mỹ e tĩ. “Hẽ tán hỹn ki kanhrãn, vãnh jykre tag ti ki? Û nỹ hỹn ti kanhrãn?” he ag tóg, ti jamã tá ke ag. “Ëg tỹ nén han vãnh hyn han tóg tũgtĩ,” he ag tóg.

³ “Ín han tĩ ên vễ mỹr,” he ag tóg. “Maria fi kósin vễ mỹr, Tiago kãke, José, Judas, Simão kãke, kũ ti ve fag vĩ ãg mré nỹtĩ gé mỹr. Ti tỹ ne jé tỹ ãg kãfór nĩ sór nẽ?” he ag tóg. Kũ tóg ag mỹ tỹ ù nỹ.

⁴ Kũ Jesus tóg ag mỹ: “ẽmã ù tá ke ag tóg Topẽ vĩ tó tĩ to é he tũ nĩgtĩ mỹr,” he mũ. “Ti jamã tá ke ag tóg ti to é he tĩ jãvo, ti mré ke ag, ti kanhkã ag,” he tóg.

⁵ Kũ Jesus tóg tá nén ù han tũ nĩ sir. Ûn kaga pipir ag hã tỹ há! he tóg, ã nĩgẽ tỹ ag mẽ kũ.

⁶ Ag tỹ ti ki ge tũ tóg ti mỹ e tĩ, ti jamãn ki. Kũ tóg ẽmã kãsir mũ tũg kũ ag kanhrãn tĩ nĩ sir.

Jesus tỹ ù tỹ 12 (ke) ag jẽgnẽ (Mt 10.5-15; Lc 9.1-6)

⁷ Kũ Jesus tóg ù tỹ 12 (ke) ag jé prêr mũ. Kũ tóg ag mũn mũ, ùn régre tĩn', ùn régre tĩn' he tóg. Ag mỹ tóg vãnh jykre nĩm mũ, ag tỹ vãnh jagrẽ kórég pan mũ jé.

⁸ Kũ tóg ag mỹ: “ãjag mũn kũ pão ma mũ tũg nĩ,” he mũ, “bolsa ke gé, jãnkamy ke gé,” he tóg.

⁹ “Vátó hã va mũmnĩ, kátó ti, pẽ né ke gé, pẽn to ró ti,” he tóg.

¹⁰ Kũ tóg ag mỹ: “ãjag tỹ ẽmã ù tá jun kũ, ãjag tỹ ãn ra rã mũ hã ki nũgnũr hemnĩ,” he mũ, “hã ki ãjag tỹ kurã ki panh ke mũ ên tá krỹgkrỹg nĩ,” he tóg.

¹¹ “Ëmã ù tá ke ag tóg kejên ãjag mỹ: kãgemnĩ, henh ke tũ nĩ, ag tỹ ãjag vĩ mẽ jãvãnh nỹtĩn kũ. Kũ ãjag pẽn hã kykũnh nĩ, ãjag tỹ tá pa kũ,” he tóg, “ag tỹ ve kũ to ki kanhró nỹtĩ jé, Topẽ tỹ ag mỹ: vó!, he ti,” he tóg ag mỹ. “Ha mẽ, ki hã sóg tó mũ. Kurã tỹ ãgno ki, isỹ vãnh kar jykre tugnỹm ke kurã ên ki ag tóg jagãgtar nỹtĩnh mũ, ag tỹ ãjag vĩ jẽmẽ

jãvãnh nýtĩn ký," he tóg, Jesus ti.

¹² Ký ag tóg mũ mũ sir, ù tỹ 12 (ke) ag. "Ajag jykre tovãnh nĩ," he ag tóg mũ, vãnh kar mỹ.

¹³ Vãnh jagrê kórég pan ag tóg mũ, ha mẽ. Ûn kagyga ag to tĩn ag tóg mũ, azeite tỹ, ký ag tóg tỹ há' he kãn mũ sir.

João Batista ter

(Mt 14.1-12; Lc 9.7-9)

¹⁴ Ký pã'i mág tỹ rei tóg Jesus kãme mễg mũ sir. Vãnh kar vỹ ti kãmén tĩ, hã ký tóg mễg mũ. Pã'i mág tỹ rei ên jijin hã vỹ: Herodes, he mũ. Ký tóg: "João hỹn (tóg)," he mũ, "ũ tỹ ag kygpég tĩ ên ti," he tóg. "Ã ter jan tán hỹn vỹn ké," he tóg. "Hã ký tóg êg tỹ nén han vãnh kar ên hyn han tĩ," he tóg, Jesus to, Herodes ti.

¹⁵ Hã ra ù tóg Jesus to: "Elias vễ," he mũ. Ký ù tóg: "Topê vĩ tó tĩ vễ, vãsỹ Topê vĩ tó tĩ ag ri ke vễ," he mũ gé.

¹⁶ Hã ra Herodes tóg ti kãme mẽ ký: "João hỹn ã ter ja tá vỹn ké, sỹ ùn krĩ kym ja ên ti," he mũ.

¹⁷ Herodes vỹ João se ja nĩ, vễse jafã kãki tóg ti fón ja nĩ, Herodias fi tugrĩn. Tỹ fi Filipe prũ fi nĩ, ti jãvy, hã ra tóg fi tỹ prũg mũ, Herodes ti.

¹⁸ Ký João tóg Herodes mỹ: "ã hã ne tóg ã mré ke prũ fi tỹ prũg mũ," he ja nĩ. "Fĩ ki ã tóg Topê vĩ mranh mũ," he ja tóg nĩ, João ti, Herodes mỹ.

¹⁹ Tag to Herodias fi tóg ti to kórég nĩ, ti tén ke to fi tóg jykren nĩgtĩ, hã ra fi tóg ti tỹ hê ri ke tũ nĩ,

²⁰ Herodes tỹ ti kamễg ký. João vỹ tóg tỹ ùn jykre kuryj nĩ. Topê jykre hã han tóg tĩ. Hã ký Herodes tóg ti jy nĩgãn tĩ, ti tỹ ti jykre há ki kanhró nĩn ký. João vĩ tóg ti mỹ vẽnhmỹ tĩ, ge ra tóg ti mỹ mẽ há tĩ, Herodes mỹ.

²¹ Kejẽn tóg fi mỹ ti tén ke ki króm ke mũ. Herodes tóg ã mur ja kurã ên ki festa mág han mũ, tenente ag mỹ, soldado ag pã'i ag mỹ ke gé, ùn rico ag mỹ ke gé, Galiléia tá ke ag mỹ.

²² Ký Herodias fi kósin fi tóg ag jo vãnh gringrén mũ, hã ra tóg ag mỹ sĩ tãvĩ tĩ, Herodes mỹ, ti mré nỹĩ ag mỹ ke gé, ti mré jễg mũ ag mỹ. Ký tóg fi mỹ: "ã tỹ nén to vĩ mũ tỹ sóg ã mỹ nĩm mũ," he mũ.

²³ Fi mỹ tóg: "sỹ ke há vễ," he mũ. "Ã tỹ nén to vĩ mũ kar nĩm jé sóg ke mũ, isỹ nén kar kuju mré hã," he tóg, tátãg fi mỹ.

²⁴ Hã ra fi tóg ã mỹnh fi to tĩ mũ sir. "Inh hỹn ne to vĩnh mũ?" he fi tóg mũ, ã mỹnh fi mỹ. Ký fi tóg: "João krĩ to vĩmĩnĩ," he mũ, "ũ tỹ ag kygpég tĩ ên krĩ to," he fi tóg, ã kósin fi mỹ, Herodias fi.

²⁵ Ký fi tóg vễsỹmér pã'i mág ên to vẽnhvãg tĩ mũ. "Inh mỹ ùri João Batista krĩ nĩm, pénky kãkã," he fi tóg mũ.

²⁶ Ký Herodes tóg fe kaj mág han mũ sir. Hã ra tóg fi mỹ: "sỹ ke há vễ," he ja nĩ, hã ký tóg fi mỹ han sór mũ, ti mré nỹĩ ag tỹ mẽ kãn ja nĩn ký.

²⁷ Hã ký tóg polícia ù jẽnễg mũ, ti tỹ ti krĩ ma kãtĩg jé. Ký

tóg ti krī kym mũ sir, vĕse ja kĕtá.

²⁸ Kÿ tóg ti krī ma kĕtĭ mũ sir, pĕnky kĕkĕ nĭm kÿ. Kÿ tóg fi mÿ nĭm mũ, tĕtĕg fi mÿ. Kÿ fi tóg ĕ mÿnh fi mÿ ma kĕtĭ mũ, Herodias fi mÿ.

²⁹ Kÿ Joĕo mrĕ mũ tĭ ag tóg ti venh mũ mũ, ti ter mĕ kÿ. Kÿ ag tóg ti há va mũ mũ, vĕnh kej ra. Tá ag tóg ti péju mũ sir.

Jesus tÿ ũ tÿ 5 mil (ke) ag jĕn (Mt 14.13-21; Lc 9.10-17; Jo 6.1-14)

³⁰ Kejĕn Jesus tÿ ũn vin mũ ag tóg Jesus to vÿnvÿn ke mũ, ti mÿ kĕmĕn jĕ, ag tÿ vĕnh kar mÿ nĕn tó ja ĕn ti, ag tÿ nĕn ũ han mũ kar ĕn ke gé.

³¹ Kÿ tóg ag mÿ: “mũ nÿ, ĕg pir mÿ ĕmĕ tÿg ja ra mũ jĕ, ĕg vĕnhkĕn sĭ han jĕ,” he mũ. Kĕmũ ag tóg nÿ nĭ, e ag tóg tĭ ha, kÿ tóg ag jĕn ke mũ ra vĕnhmÿ tĭ sir.

³² Kÿ ag tóg canoa kĕmĭ mũ mũ sir, ĕmĕ tÿg ja ra, ĕjag pir mÿ.

³³ Hĕ ra ũn e ag tóg ag mũ ve kÿ ag ki kanhrĕn mũ, kÿ ag tóg ĕjag pĕn kĕ ag jy pétĕ mũ, ĕmĕ kar tá kĕmũ kÿ. Ag jo ag tóg tá junjun mũ sir, vĕnh e ĕn ti.

³⁴ Jesus tÿ tá jun kÿ tóg sir ũn e ag vég mũ, kÿ ag tóg ti mÿ jagtar nÿtĭ. Ti mÿ ag tóg tÿ ĕg mĕg tÿ mé, ĕg mĕg tÿ carneiro ri ke nÿtĭ. Ũ tÿ ĕg mĕg ki rĭr tũ nĭn kÿ tóg jagĕgtar nÿtĭgtĭ, ĕg mĕg ti. Tag ri ke ag nÿtĭ, ũn e ĕn ag, Jesus mÿ, ag tÿ Topĕ vĭ ki kagtĭg nÿtĭn kÿ.

³⁵ Hĕ ra tóg rĕké nÿ sir, kÿ ti mrĕ mũ tĭ ag tóg ti mÿ: “ki

ti ĕmĕ tũ nĭ, rĕké ti nÿ ha,” he mũ.

³⁶ “Ā tÿ ag mũn kÿ tóg há tĭ vĕ. Kÿ ag tóg ĕmĕ kar mũ mũnh mũ, vĕjĕn jĕvĕnh jĕ,” he ag tóg ti mÿ.

³⁷ Hĕ ra tóg ag mÿ: “ha inhĕ ag jĕn ge,” he mũ. Hĕ ra ag tóg: “kÿ ĕg mÿ jĕnkamy tÿ hĕn ri ke tÿ pĕo kajĕm mũ?” he mũ, “ĕg tÿ ag jĕn jĕ?” he ag tóg ti mÿ.

³⁸ Kÿ tóg ag mÿ: “pĕo tÿ hĕ ri ke nÿ ki nÿtĭ?” he mũ. “Ha venh mũ jĕg,” he tóg. Ag tÿ ve kÿ ag tóg: “ũ tÿ 5 (ke) vĕ,” he mũ, “pirĕ régre ke gé,” he ag tóg.

³⁹ Kÿ tóg ag mÿ: “nĭgnĭ ra, re gÿnh tánh kri, mrugmru kri,” he mũ, “vĕnhmĕn kÿ,” he tóg, vĕnh kar ĕn mÿ.

⁴⁰ Kÿ ag tóg vĕnhmĕn kÿ nĭ', vĕnhmĕn kÿ nĭ' he mũ, ũ vÿ tóg 100 (ke) nĭ' he mũ, jo ũ tóg 50 (ke) nĭ' he mũ, ag vĕnhmĕn ũ.

⁴¹ Kÿ tóg pĕo tÿ 5 (ke) génh kÿ, pirĕ régre génh kÿ kanhkĕ ki ĕvĕnh mũ, kÿ tóg Topĕ mrĕ vĭ mũ sir, kÿ tóg pĕo kĕnh mũ sir, ĕ mrĕ mũ tĭ ag mÿ tóg vin mũ, ag tÿ ũn e ĕn mÿ vĕnh kĕpĕpĕm jĕ. Pirĕ régre tÿ tóg vĕnh kĕpĕpĕm mũ gé sir.

⁴² Kÿ vĕnh kar vÿ ko kĕn kÿ funfór mũ sir.

⁴³ Kĕj tÿ 12 (ke) fĕn ag tóg mũ sir, pĕo ke tÿ, pirĕ ke tÿ.

⁴⁴ Pĕo ĕn ko mũ ag tóg tÿ 5 mil (ke) nÿtĭ, ũn tÿtĕ fag tó tũ.

Jesus tÿ goj kri tÿg (Mt 14.22-33; Jo 6.15-21)

⁴⁵ Kÿ Jesus tóg vĕsÿmĕr ĕ mrĕ mũ tĭ ag mÿ tó mũ, ag tÿ

canoa kāmī mū jé, ag tỹ ti jo kafā ũ ra mū jé, ěmā tỹ Bet-saida ra. “Isỹ ũn e tag ag mỹ: ha mũjĕg, henh ke vē ver,” he tóg ag mỹ.

⁴⁶ Kỹ tóg ag mỹ: “ha mũjĕg,” he mũ sir. Ag mũn kar tóg pānónh to tāpry mũ, Topĕ mré vĩ jé.

⁴⁷ Kuty ěn kỹ canoa tóg ver tĩ nĩ, goj kāmī. Jo Jesus tóg tar tá jĕ nĩ ver, ã pir mỹ.

⁴⁸ Hã ra ag tóg canoa vóg kỹ ronron mũ sir, mũ kónān ag tóg mũ sir, kākā tỹ ag kato tĕn kỹ. Hã ra tóg ag ronron vég mũ sir, Jesus ti. Kỹ tóg kurā ke ra ag to kātĩ mũ, goj kri tĩg kỹ, ã pĕn kã mỹr. Hã ra tóg ag tá jun mũ sir, kỹ tóg ag pātén sór nĩ ve nĩ.

⁴⁹ Ag tỹ goj kri ti tĩg ve kỹ ag tóg: “vēnh kuprĩg vē,” he mũ. Kỹ ag tóg vēkrĕnrĕr mũ,

⁵⁰ ag tỹ jũrũn ken kỹ, ag kar tỹ ti ve kỹ. Hã ra tóg vēsỹmĕr ag mré vĩ mũ, kỹ tóg ag mỹ: “kamĕg tũg nĩ,” he mũ. “Inh hã vē, jũrũn ke tũg nĩ,” he tóg.

⁵¹ Kỹ tóg canoa kākī rã mũ sir ag mré, Jesus ti. Kỹ kākā tóg tũ' he mũ sir. Kỹ tóg ag mỹ e (pĕ) tãvĩ tĩ.

⁵² Hã kỹ tóg ag tỹ to jykrĕn tũ tĩ. Ver ag tóg krĩ tũ nỹtĩ, hã kỹ ag tóg Jesus jykre ki kagtĩg nỹtĩ ver, ti tỹ pão pir tỹ ũn e jĕn ja ra.

*Jesus tỹ Genesaré mĩ tĩg
(Mt 14.34-36)*

⁵³ Ag tỹ canoa kāmī pa kỹ ag tóg ga tỹ Genesaré tá junjun ja nĩ. Kỹ ag tóg canoa nỹgnỹn mũ sir.

⁵⁴ Ag tỹ canoa kāmī pa kar kỹ tá ke ag tóg vēsỹmĕr ti ki kanhrān mũ, Jesus ki.

⁵⁵ Kỹ ag tóg ĩn kar mĩ pĕtĕ mũ sir, kỹ ag tóg ũn kagyga ag gé kãmũ mũ ti to. Kur kã ag tóg ag gé kãmũ mũ. Ti jĕg jan ra ag tóg ti nón mũ mũ, ag tỹ ti jĕg ja mĕ kỹ.

⁵⁶ Ti tỹ ěmā ũ tá jun kỹ ag tóg vēnh kaga gé kãmũ tĩ, kỹ ag tóg ĩn prur ki ag vin tĩ, ěmā kāsir ki, ěmā mág ki ke gé, vānh kāmī ke gé. “Mỹ ã mỹ há, ěg tỹ hĕn ri ke mũn ã kur mráj mĕ jé?” he ag tóg ti mỹ. Kỹ ag tóg há' há' he kãn mũ sir, ag tỹ ti kur mĕn kỹ.

7

*Ti si ag jykre ti
(Mt 15.1-9)*

¹ Kejĕn Fariseu ag tóg Jesus to vēnhmān mũ, Topĕ vĩ to professor ag mré. Jerusalém tá ag kãmũ ja nĩ.

² Hã ra ag tóg Jesus mré mũ tĩ ũ ag jĕn vég mũ. Nĩgpĕg tũ ja ag tóg nĩ, hã kỹ tóg Fariseu ag mỹ jĕggryg tĩ.

³ Fariseu ag tóg nĩgpe kar kỹ tỹ jĕg tĩ, Israel kar ag ke gé, ag tỹ ti si ag jykre han kỹ.

⁴ Ag tỹ negocio tá kãmũ kỹ ag tóg vēso tỹ kó he tĩ, goj tỹ, vēso tỹ kó he kar hã ag tóg ko tĩ. Vĕnh jykre si tỹ hĕn ri ke hyn han ag tóg tĩ, caneca kupĕg tĩ, kukrũ kupĕg tĩ, lata kupĕg tĩ ke gé.

⁵ Kỹ Fariseu ag tóg Jesus mỹ ke mũ, Topĕ vĩ to professor ag mré hã. “Ā mré mũ tĩ ag tỹ hĕ ri ke jé ti si ag jykre han tũ nĩ nĕ?” he ag tóg mũ. “Ag tỹ ne jé

ājag nīgē jēggry ra jēn nē?" he ag tóg mū.

6 Hã ra tóg ag mý: "Isaías vỹ ājag to vī ja nī, vāsỹ," he mū, "kỹ tóg rán kỹ nī," he tóg. "Tĩ vĩn hã vễ, ha mễ: povo tag vỹ ājag nũnễ hã tỹ inh mỹ vĩ há han tĩ, hã ra ag jykre pi(jé) tỹ inh jykre nỹ'.

7 Fagrĩnh mỹ ag tóg iso grĩnh ke tĩ, hã ra ag tóg ěprã ke ag jykre to: Topẽ tỹ tón hã vễ, he tĩ, he ja tóg nĩgtĩ, Isaías ti," he tóg, Jesus ti. "Hã kỹ tóg ājag to ki hã tó ja nī, ājag jykre rēgre nỹtĩn kỹ," he tóg, Jesus ti.

8 "Topẽ vĩ tovãnh ājag tóg mū," he tóg. "Hã ra ājag tóg ěprã ke jykre han tĩ," he tóg, Jesus ti.

9 Kỹ tóg ag mý: "ājag hã ne tóg Topẽ vĩ mranh tĩ'," he mū, "ājag tỹ ājag jykre si hã han jé," he tóg. "Hã ra tóg ājag mỹ há nỹ, ājag jykre si ěn ti," he tóg, ag mý.

10 "Moisés tỹ ājag mỹ Topẽ vĩ tó kỹ tóg ājag mý: "ã mỹnh fi mré ã panh kamẽg nĩ, fag jagãgtãn nĩ," he ja nĩgtĩ. "Ū tỹ ã han mū fag mỹ vĩ kónãnh mū ěn tén jé ã tóg ke mū," he ja tóg nĩgtĩ, Moisés ti," he tóg, Jesus ti.

11-12 "Moisés jãvo ājag jykre vỹ ge nĩ, ha mễ. Ū tóg kejẽn ã han mū fag jagãgtãn sór tũ nĩ. Kỹ tóg fag mỹ ón kỹ: "Topẽ tũ vễ," he tĩ, ti tỹ fag mỹ nĩm jafã ěn to. Kỹ tóg fag ki rĩr ke tũ nĩ, kỹ tóg fag to é he mū sir. Ājag jykre kórég hã vễ," he tóg, Jesus ti.

13 Kỹ Jesus tóg ag mý: "Topẽ vĩ mranh ājag tóg tĩ, ti jēgja kã

ājag tóg ěprã ke ag jykre hã ki króm sór tĩ. Ge tỹ hẽn ri ke han ājag tóg tĩ," he tóg ag mý, Jesus ti.

*Nén tỹ ěg kavénh mū
(Mt 15.10-20)*

14 Kỹ tóg vẽn kar jé prěr mãn kỹ ag mý: "inh vĩ jēmễ ra," he mū, "ājag kar tỹ ki kanhrãn jé," he tóg.

15 "Vějẽn pi(jé) ěg kavénh tĩ'," he tóg, "ěg tỹn ko kỹ," he tóg. "Nén tỹ ěg ki kãpa vỹ ěg kavénh tĩ, ěg tỹ nén ũ vẽnhmỹ han ěn vỹ ěg kavénh tĩ," he tóg.

16 "Ū nĩgrēg nỹtĩ tỹ tỹ jēmễ jé," he tóg, Jesus ti.

17 Ti tỹ ã pir mỹ ĩn kãra rã kỹ ti mré mū tĩ ag tóg ti ki jēmễg mū. "Ěg mỹ kãmén há han nĩ, ã vĩ tag," he ag tóg ti mỹ.

18 Kỹ tóg ag mý: "kỹ ājag mỹ ki kanhró tũ nỹtĩ ver?" he mū. "Ěg jẽn tỹ ěg jẽnky kãra rã kỹ tóg ěg kavénh tũ nĩgtĩ mỹr," he tóg.

19 "Ěg nug kãra tóg rã mū, kar ěg fón mū. Ěg krĩ kãra tóg rã tũ nĩgtĩ," he tóg. Hã kỹ Jesus tóg vějẽn kar to: "há ti nĩ," he mū.

20 Kỹ tóg: "nén tỹ ěg ki kãpa vỹ ěg kavénh tĩ," he mū.

21 "Nén tỹ ěg ki kãpan hã vễ, hã vỹ: jykren kónãnh, he mū, ũn mén tũ fag to ěn, he mū, nén ũ pēju, he mū, ũ tén, he mū, ã prũ tũ fi mré nỹ, he mū, ã mén tũ mré nỹ, he mū.

22 nén kar to ěn, he mū, vẽn h jykre pãno han, he mū, ã tỹ nén ũ nenh (ka)mễ, he mū, ũ kato vĩ kónãnh, he mū, vẽnhmỹ inh ag kãfór kar nĩ, he tĩ, he mū, krĩ tũ, he mū.

²³ Nén kar kórég ěn tóg ěg ki kãpa tĩ, hã kũ tóg ěg kavěnh tĩ,” he tóg, Jesus ti.

Jesus tũ tãtãg sĩ fi jagrě kórég kutěm

(Mt 15.21-28)

²⁴ Kũ Jesus tóg tá kãkutě mũ sir, ga ũ ra tĩg jé, cidade tũ Tiro ra, cidade tũ Sidom ra ke gé. Tá tóg ĩn ũ krěm nĩ mũ, hã ra tóg: “ker ũ inh nĩgja ki kanhrãn hě’,” he mũ. Ge ra ag tóg ki kanhrãn mũ.

²⁵ Kũ vėsỹmér ũn tỹtã ũ fi tóg kãtĩ mũ. Fi kósin fi vỹ jagrě kórég nĩ. Fi tỹ ti kãme mẽ kũ fi tóg kãtĩ mũ. Kũ fi tóg ti krěm mũg ke mũ sir, ũn tỹtã fi.

²⁶ Hã ra fi vỹ vỹ tỹ Grego nĩ, ũ tỹ Siro-Fenício krě vỹ tỹ fi nĩ. Kũ fi tóg to vỹ mãn’, to vỹ mãn’, he mũ, ti tỹ fi kósin fi jagrě kórég ěn kutěm jé.

²⁷ Kũ Jesus tóg fi mũ: “ěg jěn vỹ tỹ ěg krě tỹ ko jafã nĩ,” he mũ. “Věnhmỹ ti nĩ, ěg tỹ ěg krě pão tỹ cachorro mũ fón kũ,” he tóg, fi mũ.

²⁸ Hã ra fi tóg Jesus ti mũ: “hỹ,” he mũ. “Hã ra cachorro sĩ ag tóg ěg krě pão vár ěn ko tĩ, mesa krěm,” he fi tóg ti mũ.

²⁹ Kũ Jesus tóg fi mũ: “tó há han ã tóg,” he mũ. “Ha tĩg, fi jagrě kórég tóg hur kutě, ã kósin fi ki,” he tóg mũ.

³⁰ Kũ fi tóg ã ĩn ra tĩ mũ sir. Fi tỹ tá jun kũ fi kósin fi tóg nỹ mũ, cama kri, hã ra fi jagrě kórég ěn vỹ kutě ja nĩ.

Jesus tũ ũn vỹ vãn vãn

³¹ Kũ Jesus tóg cidade tũ Tiro ki ga ki kutě mũ, kũ tóg cidade tũ Sidom ĩn rãm mũ

gé sir, kũ tóg ga tỹ Galilėia ki goj nig ra tĩ mũ sir, cidade tỹ 10 (ke) ĩn rãm kũ.

³² Kũ ag tóg ũ pėre kãmũ mũ, ti to, ũn kutu, ũn vỹ kar vãn. Kũ ag tóg ti mũ ti tó mũ, ti tỹ ã nĩgě tỹ ti mẽ jé.

³³ Hã ra Jesus tóg ti pėre tĩ mũ, ti pin kũ, kũ tóg ã nĩgě jufěj tỹ ti nĩgrěg nor nĩgfěnh mũ, kũ tóg ti nũně to sug mũ sir.

³⁴ Kũ tóg kanhkã ki ěvãn kũ ynh’ ynh’ he mũ sir, kũ tóg ti mũ: “efatã,” he mũ. ěg vỹ ki ke hã vỹ: “ti nĩgrěg jé nor hé,” he mũ.

³⁵ Kũ ti nĩgrěg tóg nor’ he mũ sir, ti nũně tóg kavar mũ sir. Vỹ tóg mũ sir, há’ he tóg mũ sir.

³⁶ Kũ Jesus tóg ag tỹ tó kaměg, hã ra ag tóg tugtó kãn mũ, ti tỹ: “ker tó hě’, ker tó hě’,” he mũ ra.

³⁷ Kũ ag fe tóg hěn ri ke mũ. “Ti tỹ nén kar há vỹ tóg há tãvĩ nỹtĩ,” he ag tóg, Jesus to. “Ũn kutu ag ěmě hyn han tóg, ũn vỹ vãn ag vỹ hyn han tóg ke gé,” he ag tóg, Jesus to.

8

Jesus tỹ ũ tỹ 4 mil (ke) ag jěn (Mt 15.32-39)

¹ Kejěn ũn e ag tóg věnhmãnãmãn mũ, hã ra ag tỹ nén ũ konh ke tóg tũ tĩ. Kũ Jesus tóg ã mré mũ tĩ ag jé prěr mũ sir, kũ tóg ag mũ:

² “inh mũ ag tóg jagtar nỹtĩ, ũn e tag ag,” he mũ. “Kurã tãgtũ han ag tóg huri, ěg mré, hã ra ag tóg vějěn ve ja tũ nĩgtĩ,” he tóg.

³ “Sỹ ag kókĩr ra ag mỹ: ha mũjêg, hen kỹ inh mỹ ù ag kãgter ha mẽ tóg tĩ, êmĩn kri, êpřy kri, ag tỹ ãjag jamã ra vỹnvỹn ke jé,” he tóg. “Kuar gy tóg nĩ, ù ag jamã ti,” he tóg, Jesus ti.

⁴ Kỹ ti mré mũ tĩ ag tóg ti mỹ: “êg hẽ ri ken kỹ pão venh mũ, êmã tũg ja tag ti ki, êg tỹ ag jẽn jé?” he mũ.

⁵ Hã ra tóg ag mỹ: “pão tỹ hẽ ri ke nỹ ki nỹtĩ ge?” he mũ. Kỹ ag tóg ti mỹ: “ũ tỹ 7 (ke) vỹ nĩ,” he mũ.

⁶ Kỹ tóg venh kar mỹ: “nĩgnĩ ra, ga kri,” he mũ. Kỹ tóg pão tỹ 7 (ke) ên mãn kỹ (tóg) Topẽ mré vĩ mũ. “Inh mỹ tóg há tĩ,” he tóg. Kỹ tóg kupãg' he mũ sir, pão ti, ã mré mũ tĩ ag mỹ tóg vin mũ sir, ag tỹ venh kar ken jé. Kỹ ag tóg venh kar ken mũ sir.

⁷ Kãkufár pipir vỹ ki nỹtĩ gé. Kỹ tóg to Topẽ mré vĩ mũ gé, kỹ tóg ag mỹ: “ha venh ken,” he mũ gé, ã mré mũ tĩ ag mỹ.

⁸ Kỹ ag tóg ko kãn mũ sir, funfór ag tóg mũ, hã ra tóg kén mũ sir. Kre tỹ 7 (ke) ên fãn tóg mũ, ti kén ti, Jesus mré mũ tĩ ag tỹ génh kỹ.

⁹ Û tỹ 4 (ke) ag vẽ, hẽn ri ke mũn, pão ko mũ ag.

¹⁰ Kar kỹ Jesus tóg ag mỹ: “ha mũjêg,” he mũ. Kỹ tóg vêsýmér canoa kãki rã mũ, ti mré mũ tĩ ag mré, kỹ ag tóg Dalmanuta tá ga ra mũ mũ.

Fariseu ag tỹ milagre ve sór (Mt 16.1-4)

¹¹ Kỹ Fariseu ag tóg ti tá junjun mũ. Ag tỹ ón kỹ ti ki jêmẽ sór vẽ, ag tỹ kar ti kato vĩ

jé. Kỹ ag tóg ti mỹ to vĩ mũ, ti tỹ ag mỹ kanhkã tá venh jykře ven jé, ti tỹ ag mỹ êg tỹ nén han vãnhan jé. Ag tỹ ti jykře to: “Topẽ jykře mỹ vỹ?” he sór vẽ.

¹² Kỹ Jesus tóg jẽnger jagy han, ã fe tỹ, kỹ tóg ag mỹ: “ãjag ne tóg êg tỹ nén han vãnhan hã ve sór mũ,” he mũ. “Sỹ ke há vẽ, hã kỹ sóg ke mũ: venh ke tũ ãjag nĩ. Ûri ke ag vỹ êg tỹ nén han vãnhan venh ke tũ pẽ nĩ,” he tóg, ag mỹ, Jesus ti.

¹³ Kỹ tóg ag ré kỹ tĩ mũ sir, canoa kãki tóg rã mãn mũ, kỹ tóg kafã ù ra tĩ mũ sir.

Fermento to comparação (Mt 16.5-12)

¹⁴ Hã ra ti mré mũ tĩ ag tóg pão mĩ êkrén ja tũ nĩ. Pão pir hã vỹ kã nĩ nĩ, canoa kãkã.

¹⁵ Hã ra Jesus tóg ag kanhrãn kỹ ag mỹ: “ha mẽ,” he mũ. “Fariseu tỹ fermento há(r) kamêg nĩ,” he tóg, “Herodes tỹ fermento há(r) kamêg nĩ gé,” he tóg.

¹⁶ Kỹ ag tóg jagnẽ mỹ: “pão kã êg jatun,” he mũ, “hã kỹ tóg tag tó mũ,” he ag tóg mũ.

¹⁷ Hã ra Jesus tóg ki kanhró nĩ, kỹ tóg ag mỹ: “pão tũ ti tĩ, he tũg nĩ,” he mũ. “Inh vĩ ki kagtĩg nỹtĩ ve ãjag tóg nỹtĩ, sỹ nén han mũ to jykřén tũ nỹtĩ ve ãjag tóg nỹtĩ,” he tóg. “Krĩ tũ nỹtĩ ve ãjag tóg nỹtĩ,” he tóg.

¹⁸ “Ãjag kanẽ ra ãjag kyvó nỹtĩ ve nỹtĩ,” he tóg. “Ãjag nĩgrêg ra ãjag tóg kutu nỹtĩ ve nỹtĩ,” he tóg. “Mĩ êkrén nĩ,

¹⁹ sỹ pão tỹ 5 (ke) tỹ ùn e jẽn ja ên mĩ. Û tỹ 5 mil (ke) ag vỹ

kó, mÿr, hã ra tóg kén,” he tóg. “Ăjag kêj tÿ hên ri ke fân ti, pão ke ti?” he tóg ag mÿ. Kÿ ag tóg: “kêj tÿ 12 (ke),” he mÿ.

²⁰ Kÿ tóg: “kÿ pão tÿ 7 (ke) to jykrén nÿ gé,” he mÿ. “Û tÿ 4 mil (ke) ag vÿ kó,” he tóg, “hã ra kre tÿ hê ri ke nÿ fór, ti ke tÿ?” he tóg. Kÿ ag tóg: “kre tÿ 7 (ke),” he mÿ.

²¹ Kÿ tóg ag mÿ: “ge ra ãjag tóg ki kagtÿg nÿtÿ,” he mÿ. Ti tÿ ag mÿ Fariseu ag jykre tó jan hã vê, Herodes jykre ti. Ag jykre hã to tóg: ag tÿ fermento há(r), he ja nÿ.

Jesus tÿ ùn kyvó tÿ há' he

²² Kÿ tóg kafã ù tá jun mÿ sir, êmã tÿ Betsaida tá, ti mré mÿ tÿ ag mré. Kÿ tá ke ag tóg ùn kyvó pére kãmÿ mÿ. Jesus mÿ ag tóg to vÿ mÿ, ti tÿ ti mē jé, ã nÿgē tÿ.

²³ Kÿ tóg ùn kyvó nÿgē kãgmÿ kÿ ti pére kuté mÿ, êmã ki. Kÿ tóg ti mÿ: “ã mÿ nén ù vég mÿ?” he mÿ.

²⁴ Kÿ tóg êvãnh kÿ ti mÿ: “ag ve inh,” he mÿ, “hã ra ag tóg inh mÿ tÿ ka mÿ ên ve nÿtÿ,” he tóg.

²⁵ Kÿ tóg ã nÿgē tÿ ti kanē mē mãn mÿ, kÿ tóg êvãnh há han mÿ sir. Há' he tóg mÿ. Tãmÿ tóg ve há han kãn mÿ, ùn kyvó ja ti.

²⁶ Kÿ Jesus tóg ti mÿ: “ha vêsÿmér ã jamã ra tÿg,” he mÿ. “Êmã tag ki rã tÿg nÿ,” he tóg ti mÿ, Jesus ti. Kÿ tóg tÿ mÿ sir.

Pedro tÿ Jesus tó

(Mt 16.13-20; Lc 9.18-21)

²⁷ Kÿ Jesus tóg ã mré mÿ tÿ ag mré tÿg mãn mÿ gé sir,

êmã tÿ Cesaréia Filipe tá ga ra. Êmãn jagma tÿg kÿ, êpÿr jagma tÿg kÿ tóg ã mré mÿ tÿ ag ki jêmēg mÿ, Jesus ti. “Ag iso hê ri ke tÿ?” he tóg.

²⁸ Kÿ ag tóg ti mÿ ke mÿ. “João Batista vê, he ag tóg tÿ ã to,” he ag tóg mÿ sir. “Jãvo ù ag tóg: Elias vê, he tÿ. Jãvo ù ag tóg: Topê vÿ tó tÿ ù vê, he tÿ, ã to,” he ag tóg ti mÿ.

²⁹ Kÿ tóg ag mÿ: “ag jãvo ãjag iso hê ri ke tÿ?” he mÿ. Kÿ Pedro tóg ti mÿ: “tÿ ã Cristo nÿ,” he mÿ.

³⁰ Kÿ tóg ag jyvên mÿ, ag tÿ ù mÿ kãmén tÿ nÿ jé.

Jesus tÿ ã jagtar ke tó

(Mt 16.21-28; Lc 9.22-27)

³¹ Kÿ tóg ag kanhrãn mÿ sir. “Tÿ sóg êprã ke fi kósín nÿ,” he tóg. “Ijagtar jagy han ke vê,” he tóg. “Kófa ag tÿ iso: kórég ti nÿ, henh ke vê, Topê tÿ ki rÿr tÿ ag ke gé, Topê vÿ to professor ag ke gé,” he tóg. “Ag tÿ isén ke vê, kurã tãgtÿ tÿg mÿ ra sóg rÿr mãn mÿ hã ra,” he tóg mÿ, ã mré mÿ tÿ ag mÿ.

³² Kÿ ag tóg ki kanhrãn kãn mÿ, ti tÿ ag mÿ nén tó mÿn ki.

Hã ra Pedro tóg ti pin kÿ ti mré vÿ mÿ, kÿ tóg: “vÿ tÿ ge han tÿg nÿ,” he mÿ.

³³ Hã ra Jesus tóg vêsÿjãm êvãnh kÿ ti mré mÿ tÿ ag ki êvãnh mÿ. Kÿ tóg Pedro to jÿ mÿ. “Kutÿg, Satanás!,” he tóg. “Ă pi(jé) Topê jykre tó mÿ!,” he tóg. “Êprã ke jykre vê, ã tÿ inh mÿ nén tó mÿ tag ti,” he tóg, Pedro mÿ.

³⁴ Kÿ Jesus tóg ã mré mÿ tÿ ag mré vênh kar jé prêr mÿ,

kỹ tóg ag mý kāmén mũ. “Ājag tỹ inh mré kāmũ kỹ tóg há tĩnh mũ,” he tóg. “Kỹ ājag jykre tovānh nĩ, ājag tỹ isũ tāvĩ han jé. Ha vé, ag tỹ inh cruz tỹ inh kri fi kỹ sóg tĩg ke mũ, ag tỹ to isa kỹ isén jé, ha vemnĩ. Vēnh nenh ke tũ sóg nĩ. Isỹ tag han ri ke han nĩ, kurā kar ki, ājag tỹ inh mré mũ sór nỹtĩn kỹ,” he tóg.

³⁵ “Ājag tỹ ājag jykre hã han sór kỹ ājag tỹ nũgme ki vár ke vē,” he tóg. “Jāvo ājag tỹ isugrĩn ājag jykre toyānh kỹ ājag krenkren ke vē,” he tóg, “ājag tỹ vēnh vĩ sér tigrĩn kãgter ke mũ (hã) ra,” he tóg.

³⁶ “Hẽn ri ke mũn ājag hỹn mundo ki nén ũ kar ganhar henh ke mũ, hã ra ājag kuprĩg tóg vãfor ke mũ. Kỹ tóg kórég nỹ.

³⁷ Ēg tỹ ne tỹ ěg kuprĩg kajãm ke tóg tũ tĩ, ěg tỹ ti ve mǎn jé,” he tóg, Jesus ti.

³⁸ “Ūri ke ag tóg vyr mỹ Topē ũ hyn han tĩ, kỹ ag tóg Topē vĩ mranh tĩ gé,” he tóg. “Ag kāmĩ iso mỹ'āg tũg nĩ, inh vĩ to. Ājag tỹ ũri iso mỹ'āg kỹ sóg ājag to mỹ'āg ke mũ gé, inh kãtĩg mǎn kỹ,” he tóg. “Ājag to sóg mỹ'āg ke mũ, sỹ Topē tỹ jēnē mág ag mré kãtĩg ken kỹ. Ijóg vỹ tóg isỹ ũn mág han ke mũ, inh kãtĩg mǎn ti kỹ,” he tóg. “Tỹ sóg ěprã ke fi kósin nĩ,” he tóg, Jesus ti.

9

¹ Kỹ tóg ag mỹ: “ha vé, ki hã sóg tó mũ,” he mũ. “Ājag kāmĩ ũ ag vỹ Topē tỹ tỹ ěg pã'i nĩ venh ke mũ, ājag ter ke to hã,

tag ki ěg mré nỹtĩ ũ ag. Topē vỹ tar nĩ. Ti tar nĩ ve jé ag tóg ke mũ, ājag ter ke to hã,” he tóg, Jesus ti.

*Jesus tỹ vēnh ve ũ han
(Mt 17.1-13; Lc 9.28-36)*

² Kar kurā tỹ 6 (ke) tũg kỹ Jesus tóg ag mỹ: “mũ nỹ, vyr mỹ,” he mũ. Pedro mỹ tóg ke mũ, Tiago mỹ ke gé, João mỹ ke gé. Ag hã mré tóg pãnónh ra tĩ mũ. Kỹ tóg ag jo vēnh ve ũ han mũ.

³ Ti kur vỹ tóg kókov tãvĩ nĩ sir, kóprėj tãvĩ, fag tỹ kur kupri fãg mũ ěn kupri kãfór tóg nĩ, ga kar mĩ hã.

⁴ Kỹ Elias tóg sir vēnh ven mũ, Moisés ke gé. Jesus mré ag tóg vēmén mũ.

⁵ Kỹ Pedro tóg Jesus mỹ: “Senhor,” he mũ. “Tag ki tóg ha nĩ,” he tóg. “Ēg tỹ tag ki pãjó tãgtũ han kỹn hỹn ha nĩnh mũ, ā mỹ, Moisés mỹ, Elias mỹ ke gé,” he tóg. Pedro ti.

⁶ Hã ra ag fe tỹ jũrũn ke kỹ tóg ti tỹ nén tónh ke ki kagtũg nĩ, Pedro ti.

⁷ Kỹ kanhkã góg vỹ sir ag kri rũm ke mũ, kỹ, vēnh vỹ tóg mẽ há' he mũ, kanhkã góg kãtá, kỹ tóg: “inh kósin hã vē,” he mũ. “Inh fe pẽ vē,” he tóg. “Ti vỹ jēmẽ ra,” he tóg, vēnh vỹ ti, Topē ti.

⁸ Kỹ vãhã ti mré mũ tĩ ag tóg ki ěvãnh mǎn mũ sir, kỹ ag tóg Jesus hã vég mũ sir, ti mré nỹtĩ ag ve mǎn tũ ag tóg nĩ.

⁹ Kỹ ag tóg pãnónh tá kãre mũ sir. Kỹ Jesus tóg: “ker ũ mỹ ājag tỹ ũri nén vég mũ tó hẽ,” he mũ. “Ēprã ke fi kósin

tỹ ã ter ja tã vỹn ke kar hã inh kãmén nĩ,” he tóg, Jesus ti.

10 Hã kỹ ag tóg ti vỹ han mũ sir. “Ne nẽ hỹn, ti tỹ: iser ja tá vỹn ke, he mũ tag ti?” he ag tóg mũ, jagnẽ mỹ.

11 Kỹ ag tóg Jesus mỹ: “hã ra Topẽ vỹ to professor ag tóg Elias kãtĩg mãn ke tó tĩ. “Kãtĩg jé tóg ke mũ, Cristo kãtĩg ke to hã,” he ag tóg tĩ, Elias to. Hã mỹ?” he ag tóg mũ, Jesus mỹ.

12 Kỹ tóg ag mỹ: “hỹ,” he mũ, “kãtĩg jé tóg ke mũ, Elias ti, nén kar han mãn jé,” he tóg. “Hã ra sóg rán kỹ nĩ gé. Tỹ sóg ẽprã ke fi kósin nĩ mỹr,” he tóg. “Jagtar jagy mẽ jé sóg ke mũ. Ag tỹ iso é henh ke,” he tóg.

13 “Kỹ Elias vỹ hur kãtĩg gé, kỹ ag tóg ti tỹ han, ag tỹ nén han sór mũ ẽn ti,” he tóg. “Hã kỹ tóg rán kỹ nĩ,” he tóg, Jesus ti.

Jesus tỹ kyrũ jagrẽ kórég kutẽm

(Mt 17.14-21; Lc 9.37-43a)

14 Kỹ ag tóg mũ mũ sir. Kỹ ag tóg vãhã Jesus mré mũ tĩ ù ag tá junjun mũ sir. Kỹ ag tóg vãnh e vég mũ, ag pẽnĩn, kỹ Topẽ vỹ to professor ag tóg ag vỹ kato vỹ ù han mũ, Jesus mré mũ tĩ ag mỹ.

15 Kỹ tóg vãhã vãnh e ẽn ag mỹ e tĩ, ag tỹ ti ven kỹ. Kỹ ag tóg ti to pêtẽ kãmũ mũ sir, ti mỹ: “ã mỹ há?” he jẽ.

16 Kỹ Jesus tóg ag mỹ: “ãjag tỹ ne tỹ vēmén nẽ?” he mũ.

17 Kỹ ag kã ù tóg ti mỹ: “Senhor,” he mũ. “Inh kósin pére sóg kãtĩ, ã to,” he tóg. “Jagrẽ kórég ti nĩ, hã kỹ tóg vỹ vãnh (pẽ) nĩ,” he tóg.

18 “Ti jagrẽ kórég tỹ ti kã vyryn ke kỹ tóg kutẽ tĩ, kỹ tóg jãrãn tĩ, ã jã tỹ tóg gyngyn ke tĩ, tar’ he tóg,” he tóg. “Ã mré mũ tĩ ag mỹ sóg to vỹ vẽ, ag tỹ ti jagrẽ kórég kutẽm jé, hã ra ag tóg tỹ hẽ ri ke tũ nĩ,” he tóg, Jesus mỹ.

19 Kỹ Jesus tóg ag mỹ: “ãjag ne tóg inh ki rã há han tũ nĩgtĩ,” he mũ. “Jykre pãno ãjag nỹtĩ,” he tóg. “Kysã tỹ hẽn ri ke ki inh hỹn ãjag mré tĩ nĩ? Kysã tỹ hẽn ri ke ki inh hỹn ãjag to fe tĩg nĩ?” he tóg. “Inh mỹ ti pére kãmũjẽg,” he tóg.

20 Kỹ ag tóg ti mỹ ti pére kãmũ mũ sir. Jesus tỹ ti jagrẽ kórég vég mũ ra tóg kyrũ kã vyryn ke mãn mũ gé, kỹ tóg kutẽ mãn mũ gé sir, vỹrĩn’, vỹrĩn’ ke tóg mũ gé sir, jãrãn tóg mũ gé sir.

21 Kỹ Jesus tóg ti panh ti mỹ: “mỹ si há tĩ ha?” he mũ. Kỹ tóg: “ã sĩ kã tóg ge nĩ,” he mũ, ti panh ti.

22 “Kejẽn ti jagrẽ kórég tóg pĩ ki ti fón mũ, goj ki ke gé, ti tỹ ti tén jé,” he tóg. “Ã tỹ hẽ ri ken há nĩn kỹ ẽg jagãgtãn nĩ, ti tỹ há’ hemnĩ,” he tóg.

23 Kỹ Jesus tóg ti mỹ: “ã tỹ hẽ ri ken há nĩn kỹ, he tũg nĩ, inh mỹ,” he mũ. “Û tỹ Topẽ ki rã mũ ẽn tỹ hẽ ri ken há han mũ, nén kar tỹ,” he tóg, Jesus ti.

24 Kỹ vêsỹmér kyrũ panh tóg: “ti ki sóg rãnh mũ,” he mũ, jamã hár(a). “Isỹ ti ki rã tũ ẽn ti tỹ inh ki tỹ tũ’ hemnĩ,” he tóg.

25 Hã ra Jesus tóg ù tỹ hẽn ri ke vẽnhmãn vég mũ, kỹ tóg ti

jagrë kórég to jũ mũ. “Vënh ja-grë vï vãnh’,” he tóg, “vënh ja-grë kutu’,” he tóg, “ha kãkutë, ti ki rã mãn tũg,” he tóg, Jesus ti.

²⁶ Kÿ tóg prër mũ sir, ti tÿ jũrũn ke han tóg mũ sir. Kÿ tóg kyrũ ki kãkutë mũ sir. Kÿ kyrũ tóg ter ve nĩ, kÿ ag tóg ti to: “tũg ja ti nĩ,” he mũ.

²⁷ Hã ra Jesus tóg ti nĩgë kãgmĩ kÿ ti nĩm mũ sir, kÿ tóg jëgnë mũ sir.

²⁸ Kÿ Jesus tóg tĩ mũ. Ti tÿ ãn kãra rã kÿ ti mré mũ tĩ ag tóg ti pin kÿ ti mÿ vï mũ. “Ëg ne tóg ti tÿ há’ he ja tũ nĩ’. Hë ri ken kÿ, hÿn?” he ag tóg, Jesus mÿ.

²⁹ Kÿ tóg ag mÿ: “vënh jagrë kórég tÿ ge kutëm tóg jagy nÿ ãg mÿ,” he mũ. “Topë mré ãg vï tĩ, kÿ ãg tóg mré vãkrég tĩ gé sir. Kÿ tóg vãhã kãkutë tĩ,” he tóg, Jesus ti.

Jesus tÿ ã ter ke tó mãn

(Mt 17.22-23; Lc 9.43b-45)

³⁰ Kÿ ag tóg tá kãpa kÿ Galilëia mĩ mũ mũ. Hã ra tóg: “ker ù ãg tÿ mĩ mũ ki kanhrãn hë’,” he mũ.

³¹ Ti tÿ ti mré mũ tĩ ag kanhrãn sór vë, hã kÿ tóg ke mũ. Kÿ tóg ag mÿ: “ëprã ke fi kósìn ãn vÿ jagtar nĩnh mũ,” he mũ. “Inh hã vë. Ëprã ke ag vÿ ag tÿ isÿ nén han sór mũ ãn han ke mũ,” he tóg. “Ag tÿ isén ke vë. Ag tÿ isén kar kÿ sóg hã ra rĩr mãn mũ, kurã tãgtũ tũg kÿ,” he tóg, Jesus ti.

³² Kÿ tóg ag tÿ ti tÿ nén tó mũ tag to jykrén tũ tĩ, hã ra tóg ag tÿ ti ki jëmëg tũ nÿtĩ, ag tÿ ti kamëg kÿ.

Û tÿ tÿ ãn mág nĩ

(Mt 18.1-5; Lc 9.46-48)

³³ Kÿ ag tóg mũ mãn kÿ cidade tÿ Cafarnaum tá junjun mũ sir. Tá ag tóg ãn ù krëm nÿtĩ. ãn ãn tá junjun kÿ Jesus tóg ag mÿ: “ãjag tÿ ne tó mũ në, ãpry jagma?” he mũ.

³⁴ Hã ra ag tóg ti mÿ tó tũ nĩ. Ëmĩn jagma mũ kÿ ag tóg jagnë mÿ: “ù nÿ hÿn ãg kãfór kar jë?” he ja nÿtĩ.

³⁵ Kÿ Jesus tóg nĩ mũ, kÿ tóg ù tÿ 12 (ke) ag jé prër mũ sir, kÿ tóg ag mÿ: “ãjag mÿ tÿ ãn mág nÿtĩ sór mũ?” he mũ. “Kÿ vësÿ ãn sĩ ri ke nÿtĩmĩ,” he tóg.

³⁶ Kÿ tóg gĩr sĩ mÿ: “kunĩg,” he mũ. Ag kuju kã tóg ti fëg mũ, kÿ tóg ti jagma ã pë fón mũ sir, kÿ tóg ù tÿ 12 (ke) ag mÿ: “ãjag hã vÿ tÿ inh mré ke nÿtĩ,” he mũ.

³⁷ “ãjag tÿ tÿ inh mré ke nÿtĩ kÿ gĩr tÿ ge jë’ÿn nĩ, ti to há nÿtĩmĩ, isugrĩn. ãjag tÿ isugrĩn ti to há nÿtĩn kÿ ãjag tóg iso há nÿtĩ gé,” he tóg. “ãjag tÿ iso há nÿtĩ kÿ ãjag tóg ù tÿ ijënëg mũ ãn to há nÿtĩ gé sir,” he tóg, Jesus ti.

Û tÿ Jesus kato tẽ tũ nĩ kÿ ti mré ke

(Lc 9.49-50)

³⁸ Kÿ João tóg Jesus mÿ: “Senhor,” he mũ. “Û ve ãg tóg, kÿ ãn tóg ã jyjy tó kÿ vënh jagrë kórég pan tĩ, ãg tÿ ãn vëg mũ ãn ti,” he tóg mũ, Jesus mÿ. “Hã ra tóg ãg mré tĩ tũ nĩgtĩ, kÿ ãg tóg ti mÿ: “vënh jagrë kórég pan sór tũg nĩ,” hé,” he tóg, João ti, Jesus mÿ.

39 Hã ra Jesus tóg ti mý: “ti tỹ vãnh jagrẽ kórég pan kamẽg tũg nĩ,” he mũ. “Û tỹ inh jiji tó ký nén han vãnh han ký tóg kar ký iso vĩ kónãn ke tũ nĩ,” he tóg.

40 “Û tỹ ẽg kato tẽ nĩ tũ nĩn ký ẽg mré ke vễ sir,” he tóg.

41 “Sỹ ke há vễ, hã ký sóg tó mũ: kejẽn ù tóg ãjag mý goj fẽg mũ, isugrĩn, ãjag tỹ tỹ inh mré ke nýtĩ tugrĩn. Ẽn tóg vãnh kato nén ù há venh ke mũ ge,” he tóg, Jesus ti.

*Ẽg tỹ Topẽ vĩ mranh
(Mt 18.6-9; Lc 17.1-2)*

42 Ký tóg ag mý ke mãn mũ.

“Ûn sĩ tag vỹ inh ki rã ký jẽ. Kejẽn ù tóg ti tỹ inh vĩ mranh han sór mũ. Ẽn jykre vỹ kórég tãvĩ nỹ,” he tóg. “Ẽn hã mý tóg há nỹnh mũ vễ, ù tỹ pó mág tỹ ti nunh to sa ký goj nig ki ti fón jé, ti tỹ goj ki ter jé. Jagy tãvĩ tóg tĩ, ù tỹ gĩr tỹ isovãnh han ký,” he tóg.

43 “Ã tỹ nén ù vóg ký Topẽ vĩ mranh ký ã nĩgnó kym nĩ, ã tỹ ke mãn tũ nĩ jé. Jagy tóg nỹ, ã nĩgnó pir ti. Jãvo tóg há nĩ, ã tỹ rĩr krỹg ja tũ venh ke mũ ti. Ã tỹ ã nĩgnó régre ra nũgme ki kutẽn ký tóg jagy kãfór tĩnh mũ, inferno ki kutẽn ký, pĩ nhyr vãnh ki kutẽn ký.

44 Tá ga ga tóg ã konh mũ gé, hã ra tóg tỹ tũ' henh ke tũ nĩ. Tá pĩ ẽn nhyr ke tũ nĩ gé.

45 Ã tỹ hẽ kátá tĩg ký Topẽ vĩ mranh ký ã pẽn kym nĩ, ã tỹ ke mãn tũ nĩ jé. Jagy ti nỹ, ã tĩg vãnh ti. Hã ra tóg há nĩ, ã tỹ rĩr krỹg ja tũ venh ke mũ

ti. Ã tỹ ã pẽn régre ra nũgme ki kutẽn ký tóg jagy kãfór tĩnh mũ, inferno ki kutẽn ký.

46 Tá ga (ga) tóg ã konh mũ gé, hã ra tóg tỹ tũ' henh ke tũ nĩ. Tá pĩ ẽn nhyr ke tũ nĩ gé.

47 Ã tỹ nén ù ki vễ'ĩ ký Topẽ vĩ mranh ký ã kanẽ tỹ nãm kemnĩ, ã tỹ ke mãn tũ nĩn jé. Jagy ti nĩ, ã kyvó ti. Jãvo tóg há nĩ, ã tỹ Topẽ tỹ tỹ ẽg pã'i nĩ ven ký. Ã tỹ ã kanẽ régre ra nũgme ki kutẽn ký tóg jagy kãfór tĩnh mũ, inferno ki kutẽn.

48 Tá ga (ga) tóg ã konh mũ, hã ra tóg tỹ tũ' henh ke tũ nĩ. Tá pĩ ẽn nhyr ke tũ nĩ gé,” he tóg, Jesus ti.

*Sa to comparação
(Mt 5.13-16; Lc 14.34-35)*

49 “Pĩ tỹ ẽg pũn ri ke ti nĩ, ẽg jagãgtar ti. Ký ãjag jagãgtar nýtĩn ký isugrĩn, ký ãjag jagãgtar ẽn ki ãjag jykre tóg kuryj nỹ sir. Ký tóg sa ri ke nĩ,” he tóg.

50 “Sa vỹ há nĩ. Hã ra sa kãhór nĩn ký tóg hã ra kórég nĩ, ký ẽg tỹ ne tỹ ti tỹ kajã' henh ke tóg tũ tĩ, tỹ sa' he mãn ke tóg tũ tĩ,” he tóg. “Kỹ sa há ri ke nýtĩmĩ. Jagnẽ to krĩ kusa nýtĩmĩ,” he tóg, Jesus ti.

10

*Ẽg tỹ ẽg prũ fi fón ke tũ
(Mt 19.1-12; Lc 16.18)*

1 Ký Jesus tóg tá kutẽ mũ, ký tóg ga tỹ Judéia ra tĩ mũ sir, goj tỹ Jordão mãra. Ký vãnh e ag tóg ti to vẽnhmãmãm mũ sir, ký tóg ag kanhrãn mãn mũ gé. Tĩ tỹ nén han tĩ ẽn han mãn tóg mũ.

² Kÿ Fariseu ag tóg ti tá jun-jun mũ gé sir. Ag tÿ ón kÿ ti ki jëmẽ sór vë, vënh prũ fón ke to. Kÿ ag tóg ti mÿ: “Ëg tÿ Ëg prũ fi mÿ: ha tÿg, he tag mÿ kuryj nÿ?” he mũ. Ag tÿ ón kÿ ti vÿ mẽ sór vë hã ra.

³ Kÿ tóg ag mÿ: “Moisés ãjag mÿ hë ri ké?” he mũ.

⁴ Kÿ ag tóg ti mÿ: “Moisés hã tóg Ëg mÿ: ã tÿ ã prũ fi fón sór kÿ fi mÿ vënh rán kÿ nÿm, fi tÿ kar kÿ tÿg jé, he ja nÿ, Moisés ti,” he ag tóg.

⁵ Hã ra Jesus tóg ag mÿ: “ãjag fe kórég nÿtÿn kÿ, hã kÿ tóg ãjag mÿ tag tó ja nÿ, vënh rán ki, Moisés ti,” he mũ.

⁶ “Topë tÿ nén kar han ve ki tóg ti mré fi han,” he tóg.

⁷ “Hã kÿ ùn gré tóg ã prũ fi to ã panh re kÿ tÿnh mũ, ã mÿnh fi ré kÿ ke gé. ã prũ fi mré tóg tÿnh mũ.

⁸ Fi mré tóg tÿ ùn pir nÿ sir, ã prũ fi mré, he tóg. Topë ti. Hã kÿ fag tóg tÿ ùn pir nÿtÿ. Fag pi(jé) tÿ ùn régre nÿtÿ’.

⁹ Hã kÿ fag tÿ vënh kãpãm tÿg nÿ. Topë tÿ fag tÿ ùn pir há(r) vë mÿr,” he tóg, Jesus ti.

¹⁰ Ag tÿ ïn kãtã nÿtÿn kÿ ti mré mũ tÿ ag tóg ti ki jëmẽ mãn mũ, vënh prũ fón to.

¹¹ Kÿ Jesus tóg ag mÿ: “ãjag tÿ ãjag prũ fi fón kar kÿ ù fi tÿ prũg mãn kÿ ãjag prũ tÿ fi vë, ha mẽ,” he mũ.

¹² “Kÿ fi tÿ ã mén fón kar ù tÿ mén mãn kÿ fi mén tÿ vë gé,” he tóg, Jesus ti.

*Jesus tÿ gÿr mÿ vÿ há han
(Mt 19.13-15; Lc 18.15-17)*

¹³ Jo fag tóg gÿr tatÿ kãmũ mũ, Jesus tÿ ã nÿgë tÿ ag mẽ jé.

Hã ra ti mré mũ tÿ ag tóg fag to jũ mũ, ù tÿ ag tatÿ kãmũ mũ fag to.

¹⁴ Hã ra Jesus tóg vég mũ, kÿ tóg ã mré mũ tÿ ag to jũ mũ. Kÿ tóg ag mÿ: “vÿ tÿg nÿ, gÿr ag mÿ,” he mũ, “gÿr ag tÿ iso kãmũ kamëg tÿg nÿ,” he tóg. “Û tÿ ge hã vÿ Ëg Senhor tÿ Topë krëm nÿtÿ nÿ,” he tóg.

¹⁵ “Sÿ ke há vë, hã kÿ sóg tó mũ: gÿr ag vÿ iso há pë nÿtÿ. Ûn kãsir tag ag ri ke nÿtÿmnÿ, ke tÿ nÿ (mũ) ra ãjag tóg venh ke tÿ (pë) nÿ, Topë tÿ tÿ Ëg pã’i nÿ ti,” he tóg.

¹⁶ Kÿ tóg gÿr jagma ã pë fón mũ sir, ã nÿgë tÿ tóg ag mẽ kãn mũ sir, ag to tóg Topë mré vÿ mũ sir.

*Ûn rico kãme
(Mt 19.16-30; Lc 18.18-30)*

¹⁷ Kÿ Jesus tóg tÿg mãn mũ gé sir. Ti tÿ tÿg ke jë ra ù tóg ti to vënhvãg kãtÿ mũ, kÿ tóg ã jakrÿ tÿ jë mũ, kÿ tóg ti mÿ: “Senhor,” he mũ. “Hã pë ã tóg nÿ,” he tóg. “Sÿ ïnh rÿr krÿg ja tÿ venh há tóg tÿ. Sÿ ti ve jé ïnh hÿn vënh jÿkre há tÿ hë ri ke han mũ?” he tóg.

¹⁸ Kÿ Jesus tóg ti mÿ: “ã tÿ ne jé iso: há ã nÿ, he nÿ?” he mũ. “Ëg pi(jé) há nÿtÿ!” he tóg. “Topë hã ne ã pir mÿ há nÿ,” he tóg.

¹⁹ “Topë tÿ nén to Ëg jÿvën ki kanhró ã tóg nÿ, hã vÿ: ù tén tÿg nÿ, he mũ, ã prũ tÿ fi mré nÿ tÿg nÿ, he mũ, nén ù péju(g) tÿg nÿ, he mũ, ù to ón tÿg nÿ, he mũ, vënh mÿ mẽ nÿ tÿg nÿ, he mũ, ã nÿ mré ã jóg kamëg nÿ, he mũ,” he tóg ti mÿ, Jesus ti.

20 Hã ra tóg Jesus ti mÿ: “tag kar ki sóg króm kãn, isĩn kã,” he mũ, kyrũ ti.

21 Kÿ Jesus tóg ti ki ãvãnh mũ, kÿ tóg tÿ ti fe jẽ. Kÿ tóg ti mÿ: “nén ù pir vÿ tũ nĩ ver,” he mũ. “Ã tũ kar vãm tĩg, ã tÿ ùn jagãgtar ag mÿ vin jé, jãnkamy ti. Kÿ ã tóg kanhkã tá tũ mág nĩ sir. Kar kãtĩg nĩ, ã tÿ inh mré tĩg jé,” he tóg, Jesus ti.

22 Kÿ tóg ti mÿ vẽnhmÿ tĩ, Jesus vĩ ti. Kÿ tóg fe kaj tĩ mũ sir, ti tũ e nĩn kÿ.

23 Kÿ Jesus tóg vẽn pẽnĩn ãvãnh kÿ ã mré mũ tĩ ag mÿ ke mũ sir. “Jagy ti nÿ, ùn rico tÿ Topẽ tÿ tÿ ãg pã'i nĩ venh ke ti,” he tóg.

24 Kÿ ti vĩ tóg ti mré mũ tĩ ag mÿ e tĩ. Hã ra Jesus tóg ag mÿ ke mãn mũ. “Inh krẽ,” he tóg. “Jagy tãvĩ ti nÿ mÿr, Topẽ tÿ tÿ ãg pã'i nĩ venh ke ti,” he tóg.

25 “Cavalo pãnĩ sór vÿ préj nor fĩn kutẽ tũ nĩ,” he tóg. “Ti tÿ fĩn kutẽ há nĩn ra tóg ver jagy tĩ vẽ, ùn rico tÿ Topẽ tÿ tÿ ãg pã'i nĩ venh ke ti,” he tóg.

26 Kÿ tóg ag mÿ e (pẽ) tãvĩ tĩ. “Kÿ ù hÿn kren ke tũ pẽ nĩ,” he ag tóg, jagnẽ mÿ.

27 Kÿ Jesus tóg ag ki ãvãnh kÿ ag mÿ: “ẽprã ke ag vÿ vẽn krenkren han ki kagtĩg nÿtĩ,” he mũ. “Ag jãvo Topẽ tóg ãg krenkren han ki kanhró nĩ,” he tóg. “Topẽ hã tóg nén kar han ke ki kanhró nĩ inhhã,” he tóg, Jesus ti.

28 Kÿ Pedro tóg ti mÿ: “ha vé,” he mũ. “Ëg tÿ nén ù kar ré kÿ ãg tóg ã mré mũ mũ,” he tóg ti mÿ.

29 Kÿ Jesus tóg ag mÿ ke mãn mũ. “Sÿ ke há vẽ, hã kÿ sóg tóg mũ,” he tóg mũ. “Û tóg kejẽn isugrĩn ã jamã ré kÿ tĩ mũ, ã jãvy ré kÿ tĩ mũ, ti kãke, ti ve, ti mÿnh, ti panh, ti krẽ, ti japÿ ré kÿ tĩ mũ gé, isugrĩn, vẽn vĩ sér tugrĩn,” he tóg.

30 “Ën vÿ tóg sir vẽn kato ù tÿ 100 (ke) venh ke mũ, ùri hã ra, hã vÿ: ẽmã kar, he mũ, jãvy kar, kãke kar, ve kar, mÿnh kar, ẽpÿ kar ve jé tóg ke mũ. Hã ra ag tóg ti vóg kónãn ke mũ gé. Kar kÿ tóg vãhã sir rĩr krÿg ja tũ venh ke mũ gé,” he tóg.

31 “Jãvo tag ki ùn mág ù tÿ tá tÿ ùn kãsir nÿtĩnh ke vẽ, tére kÿ, kÿ tag ki ùn kãsir ù tÿ tá tÿ ùn mág nÿtĩnh ke vẽ,” he tóg, Jesus ti.

Jesus tÿ ã jagtar ke tó mãn (Mt 20.17-19; Lc 18.31-34)

32 Kar kÿ ag tóg mũ nĩ sir, Jerusalém ra, Jesus mré mũ tĩ ag, kÿ Jesus tóg ag jãmĩ tĩ nĩ. Hã ra tóg ag mÿ e tĩ, ti nón mũ ag tóg mũmẽg mũ sir, ag tÿ Jerusalém ra mũn kÿ. Kÿ Jesus tóg ù tÿ 12 (ke) ag mÿ vẽn kãmén mãn mũ, vyr mÿ. Ti tÿ ag mÿ ã tÿ nén venh ke ãn tó mãn sór vẽ.

33 Kÿ tóg ag mÿ: “ha vé, Jerusalém ra ãg tóg mũ mũ,” he mũ. “Ëprã ke fi kósin ãn vÿ jagtar ke mũ. Inh hã vẽ. Ón kÿ Topẽ tũ ki rĩr tĩ to pã'i ag tóg ag tÿ isÿ nén han sór mũ ãn han ke mũ, Topẽ vĩ to professor ag ke gé,” he tóg. “Ag tÿ iso: ter jé tóg ke mũ, henh ke vẽ,” he tóg. “Kar kÿ ag tóg fóg ag mÿ inh fẽg ke mũ,” he tóg.

34 “Kỹ ên ag tỹ iso é henh ke vễ, iso sug ke vễ, inh mrănmrăn ke vễ gé, isén ke vễ gé. Kar kurã tâgtũ ki sóg hã ra rĩr măn mũ sir,” he tóg, Jesus ti.

Tiago mré João tỹ tỹ pã'i jẽ sór
(Mt 20.20-28)

35 Kỹ Tiago mré João ag tóg ti kukãm mũ mũ, Zebedeu krẽ ag. “Senhor,” he ag tóg ti mỹ. “Êg mỹ êg tỹ nén to vĩ tag ti han,” he ag tóg, Jesus mỹ.

36 Kỹ tóg ag mỹ: “ne nễ, sỹ ãjag mỹ han ke ti?” he mũ.

37 Kỹ ag tóg ti mỹ: “kejên ã tóg tỹ pã'i nĩnh mũ,” he mũ. “Kỹ sỹ ã pẽgja tá nĩnh há tóg tĩ vễ,” he tóg, jo ù tóg: “sỹ ã jakãnh tá nĩnh há tóg tĩ vễ,” he mũ gé. “Êg tỹ ã rã hã nỹtĩnh há tóg tĩ vễ, ã tỹ tỹ pã'i nĩn kỹ,” he ag tóg ti mỹ.

38 Hã ra Jesus tóg ag mỹ: “ãjag tỹ nén to vĩ mũ ki kagtĩg ãjag tóg nỹtĩ,” he mũ. “Ãjag mỹ inh ri kén jagtar sór mũ?” he tóg. “Ãjag mỹ ãjag jagtar jagy tag to krónh kenh ke tũ nĩ vỹ?” he tóg.

39 Kỹ ag tóg ti mỹ: “hỹ, ke je êg tóg ke mũ,” he mũ. Hã ra Jesus tóg ag mỹ: “hỹ, jagtar je ãjag tóg ke mũ, inh ri kén,” he mũ. “Vễsỹrénh je ãjag tóg ke mũ, inh ri kén,” he tóg.

40 “Hã ra isũ tũ vễ, sỹ ãjag mỹ: hej, he ti,” he tóg. “Ha inh pẽgja tá nĩ, henh ke tũ sóg nĩ,” he tóg. “Ha inh jakãnh tá nĩ, henh ke tũ sóg nĩ gé,” he tóg. “Isũ tũ vễ. Û tỹ inh rã nỹtĩnh ke ên ag tỹ inh rã nỹtĩnh ke vễ,” he tóg.

41 Hã ra ù tỹ 10 (ke) ag tóg mễg mũ, kỹ ag tóg ag to jũ mũ, João mré Tiago to.

42 Kỹ Jesus tóg ag je prẽr kãn mũ, kỹ tóg ag mỹ kãmén mũ. “Fóg ag pã'i ag jykre ki kanhró ãjag tóg nỹtĩ,” he tóg. “Vễnh kar jẽgnễg ag tóg tĩ, kỹ ag mág ag tóg vễnh kar mỹ: kemnĩ, ke tũg nĩ, he tĩ, vĩ tar han kỹ,” he tóg.

43 “Ag ri ke han tũg nĩ. ãjag mỹ tỹ ùn mág nỹtĩ sór mũ? Kỹ tỹ jagnẽ camarada ri ke nỹtĩmnĩ, jagnẽ tũ ki rĩr kỹ.

44 ãjag mỹ tỹ pã'i nỹtĩ sór mũ? Kỹ jagnẽ krẽm ke nỹtĩmnĩ, tỹ ùn kãsir nỹtĩmnĩ.

45 Hã kỹ sóg camarada tũ nĩ gé,” he tóg. “Sỹ tỹ camarada nĩ je sóg kãtĩg, sỹ ãjag ki rĩr je. Tỹ sóg êprã ke fi kósin nĩ. Hã kỹ sóg vễnh kar jagfỹ ter ke mũ, sỹ ag krenkren han je,” he tóg, Jesus ti.

Ûn kyvó tỹ há' he

(Mt 20.29-34; Lc 18.35-43)

46 Kejên ag tóg êmã tỹ Jericó tá junjun mũ. Ag tỹ Jerusalém ra mũ vễ. Kar kỹ tóg Jericó ki kutẽ mũ gé, Jesus ti. Ti mré mũ tĩ ag tóg ti mré mũ mũ, vễnh e kar ag ke gé. Hã ra Bartimeu tóg êprỹ kri nĩ nĩ. Kyvó ti nĩ, hã kỹ tóg êmĩn fyr kri nĩ kỹ: “inh mỹ nén ù nĩm,” he nĩgtĩ, Timeu kósin tag ti.

47 Ên tóg Jesus tỹ êprỹ jagma tĩg mễg mũ sir, Nazaré tá Jesus ti. Kỹ tóg prẽr mũ sir. “!..Jesus'..!” he tóg. “!..Davĩ kósin'..! !..Ijagãgtãn ra..!” he tóg.

48 Hã ra ag tóg ti to jũgũ mũ. “Mẽ kã nĩ nĩ,” he ag tóg ti mĩ. Hã ra tóg prẽr mãn', prẽr mãn', he mũ. “!..Davi kósin'..!” he tóg. “!..Ijagãgtãn ra..!” he tóg.

49 Kĩ Jesus tóg ti to krĩg he mũ. Kĩ tóg ti jé prẽr' he mũ sir. Kĩ ag tóg ùn kyvó ên jé prẽr mũ sir. “Á fe tĩ há' hé, jẽg ra, ã jé prẽr tóg mũ,” he ag tóg ti mĩ.

50 Kĩ tóg ã palitó fón kũ jẽgnẽ mũ sir, Jesus to tóg tĩ mũ sir.

51 Kĩ Jesus tóg ti mĩ: “inh ã tĩ hẽ ri kenh ke?” he mũ. Kĩ ùn kyvó tóg: “Senhor,” he mũ. “Sỹ venh há tóg ti,” he tóg.

52 Kĩ Jesus tóg ti mĩ: “hej,” he mũ. “Á tĩ há' henh ke nẽ ha,” he tóg. “Á tĩ inh ki rã kũ ã há' henh ke mũ,” he tóg. Kĩ tóg vêsỹmér êvãnh há' he mũ sir, kũ tóg ti nón tĩ mũ sir, êpry jagma.

11

Jesus tĩ Jerusalém tá jun (Mt 21.1-11; Lc 19.28-40; Jo 12.12-19)

1 Vãhã ag tóg cidade tĩ Jerusalém kakó tá nỹtĩ. Kĩ ag tóg êmã tĩ Betânia tá junjun vén mũ, êmã tĩ Betfagé tá, krĩ tĩ Oliveiras tá ke gé. Kĩ Jesus tóg ã mré mũ tĩ régre ag jẽgnẽg mũ, ag tĩ êmã ên ra mũ jé.

2 “Ha êmã ên ra mũjẽg,” he tóg, “ẽg jo êmã nĩ ên ra. Ájag tĩ tá jun kũ ãjag tóg burrica fi krẽ venh ke mũ. Se kũ tóg jẽ,” he tóg. “Û vỹ ver ti kri nĩ ja tũ nĩ,” he tóg. “Ti kavãn kũ ti pére kãmũmnĩ,” he tóg.

3 “Hẽn ri ke mũn ag tóg ãjag mĩ: ãjag tĩ ne jé ti kyvãn nẽ? henh mũ. Kũ ag mĩ: ẽg Senhor tóg ti ve sĩ han sór mũ, hemnĩ. Kãnhmar tóg ti jẽnẽ mãn mũ, hemnĩ,” he tóg ag mĩ, Jesus ti.

4 Kĩ ag tóg mũ mũ sir. Burrica krẽ vэг ag tóg mũ, jãnkã rã tóg se kũ jẽ, êmĩn kri. Kũ ag tóg ti kavãg mũ sir.

5 Kĩ ag tóg ag mĩ ke mũ. “Ájag tĩ ne jé burrica sĩ kyvãn nẽ?” he ag tóg ag mĩ.

6 Kĩ ag tóg Jesus tĩ ãjag mĩ nén tó ja ên ti tó mũ, kũ ag tóg: “ha ma mũjẽg ge,” he mũ.

7 Kĩ ag tóg burrica krẽ ma mũ mũ sir, Jesus to. Ájag kur tĩ ag tóg ti kri kugjén mũ sir, jumento sĩ ên kri, kũ tóg kri nĩ mũ sir, Jesus ti.

8 Kĩ vẽnh kar tóg ãjag kur kugjén mũ sir, êpry kri, jo ù ag tóg ka féj krég mũ gé, êpỹ tá, ti jo vãvãm jé.

9 Kĩ ù ag tóg ti jãmĩ mũ mũ, jo ù ag tóg ti nón mũ mũ. Ên ag tóg prẽnprẽr mũ sir. “!..Viva..!” he ag tóg, “!..pã'i vỹ ẽg tá jun, ẽg Senhor mág tĩ ti jẽnẽn kũ..!”

10 “!..Sér tãvĩ tóg tĩ..! !..Êg pã'i vỹ mỹr, ẽg jóg'jóg tĩ Davi ri kén..! !..Topê tá tóg kãtĩg, ù tĩ kynhmỹ nĩ ên tá, viva..!” he ag tóg mũ, prẽnprẽr kũ.

11 Kĩ tóg Jerusalém ra rã mũ sir, Jesus ti. Topê jo ìn ra tóg rã mũ sir. Nén kar ki êvãnh kar tóg Betânia ra tĩg mãn mũ, ù tĩ 12 (ke) ag mré, rãké ra.

Ka tĩ figueira (Mt 21.18-19)

¹² Tỹ vaj ký, ag tỹ Betânia tá kãmũ ký tóg kókĩr mũ, Jesus ti.

¹³ Hã ra tóg ka tỹ figueira féj vég mũ sir, tâtá. Ký tóg to tĩ mũ sir, ti kanẽ ko jé. Tá jun ký tóg vég mũ, hã ra tóg féj tãvĩ jé. Ti kanẽn ke pétẽm tũ tóg nĩ ver.

¹⁴ Ký tóg ka tỹ figueira mỹ: “ũ tóg ã kanẽ ko mãn ke tũ nĩ ha,” he mũ. Hã ra ti mré mũ tĩ ag tóg ti vĩ mẽg mũ.

Jesus tỹ Topẽ jo ãn krẽm ag pan

(Mt 21.12-17; Lc 19.45-48; Jo 2.13-22)

¹⁵ Ký ag tóg mũ mãn ký Jerusalém tá junjun mũ sir. Topẽ jo ãn ra tóg rã mũ sir, Jesus ti, ký tóg tá ag pan kãn mũ sir, nén ã vender he tĩ ag, nén ã comprar he tĩ ag ke gé. Topẽ jo ãn krẽm ag tóg negociar he tĩ, jãnkamy trocar he tĩ ag ke gé. Ag mesa tỹ tóg vyryn ke mũ, Jesus ti. Sórãg vender he tĩ ag nĩgnĩ jafã tỹ tóg vyryn ke mũ gé sir.

¹⁶ Ký tóg ag tỹ Topẽ jo ãn fĩn nén gé mũ kamẽg mũ gé sir.

¹⁷ Ký tóg ag kanhrãn ký ag mỹ: “Topẽ vĩ rá to jykrén nĩ,” he mũ. “Inh ãn jiji vỹ: nação kar mỹ Topẽ mré vĩ jafã, he mũ, he tóg, Topẽ vĩ rá ki,” he tóg, Jesus ti. “Hã ra ãjag tóg Topẽ mré vĩ jafã tag krẽm nén kar pigju(g) mũgtĩ, ký tóg bandido ag jamã ri ke nĩ,” he tóg. Ag pan ký tóg ke mũ, Jesus ti.

¹⁸ Hã ra Topẽ tũ ki rĩr tĩ to pã'i ag vỹ Jesus vĩ mẽg mũ, Topẽ vĩ to professor ag ke gé. Ký ag tóg: “ẽg hỹn ti tỹ hẽn ri kenh ke mũ?” he mũ, “ẽg tỹ ti tỹ tũ' he jé?” he ag tóg

mũ. Hã ra ag tóg ti kamẽg mũ. Vẽnh kar mỹ tóg há tĩ, ti tỹ ag kanhrãn ký. Hã ký ag tóg ti vóg tũ nĩ.

¹⁹ Kutyg ký ag tóg cidade mág ki pa mãn mũ sir, Jesus ti, ti mré mũ tĩ ag ke gé.

Ka tỹ figueira tóg

(Mt 21.20-22)

²⁰ Tỹ vaj ký ag tóg cidade ra mũ mãn mũ sir. Mũ ký ag tóg sir ka tỹ figueira ãn vég mũ, hã ra tóg tóg ja nĩ, ti jãre mré hã.

²¹ Ký Pedro tóg Jesus vĩ ki jykrén ký ti mỹ: “ha vé, Senhor,” he mũ. “Ã vĩ ja ãn hã vỹ,” he tóg. “Ã tỹ ka to vĩ kónãn ãn vỹ tóg ja nĩ, ka tỹ figueira ãn ti,” he tóg.

²² Ký Jesus tóg ag mỹ: “Topẽ ki ge pẽ han nĩ,” he mũ.

²³ “Sỹ ke há vỹ, hã ký sóg tóg mũ: kejẽn ãjag tóg krĩ tag ti mỹ: ha goj nig ki kutẽ, henh ke mũ. Ký tóg ki kutẽnh mũ, pãnónh ti, ãjag tỹ ãjag fe tỹ: ti mỹ ki kutẽnh mũ vỹ? he tũ nĩn ký,” he tóg. “Inh vĩ han jé tóg ke mũ, pãnónh ti, hemnĩ, ký tóg kutẽnh ke mũ, ha vemnĩ,” he tóg, Jesus ti.

²⁴ “Hã ký sóg ãjag mỹ ke mũ,” he tóg. “Ãjag tỹ Topẽ mỹ nén ã to vĩ ký to: han jé tóg ke mũ, Topẽ ti, hemnĩ, ký ãjag tóg venh ke mũ sir, ãjag tỹ ti mỹ nén ã to vĩ mũ ti,” he tóg.

²⁵ “Ãjag tỹ kejẽn Topẽ mré vĩ jẽ ra ã tỹ ãjag to jũ mũ ãn tỹ ti mỹ vẽn pãte fón nĩ,” he tóg. “Ãjag tỹ gen ký tóg ãjag mỹ vẽn pãte fón ke mũ gé, ẽg jóg mág ti,” he tóg. “Ãjag tỹ ti

vĩ mranh mũ ra tóg vènh kato ãjag mỹ vènh pãte fón ke mũ, ù tỹ kanhkã tá nĩ ti, ãjag tỹ ãjag mré ke ag mỹ vènh pãte fón kỹ,” he tóg.

26 “Ãjag tỹ hã ra ag mỹ vènh pãte fón tũ nĩn kỹ ãg jóg mág vỹ vènh kato ãjag mỹ vènh pãte fón ke tũ nĩ gé, ù tỹ kanhkã tá nĩ ti,” he tóg, Jesus ti.

Jesus tỹ ù tỹ ã jènẽg mũ tó tũg

(Mt 21.23-27; Lc 20.1-8)

27 Kỹ ag tóg mũ mãn kỹ Jerusalém tá junjun mãn mũ sir. Topẽ jo ìn tá tóg ãvãnh tĩ mũ, Jesus ti. Kỹ Topẽ tũ ki rĩr tĩ to pã'i ag tóg ti venh kãmũ mũ, Topẽ vĩ to professor ag ke gé, kófa ag ke gé.

28 “Ủ nỹ ã mỹ: tag han nĩ, hé?” he ag tóg, ti mỹ. “Ủ nỹ ã jènẽ?” he ag tóg.

29 Kỹ Jesus tóg ag mỹ: “ãjag ki sóg jēmènh ke mũ gé, vènh kato,” he mũ. “Ãjag tỹ ình mỹ tó há han kỹ sóg ãjag mỹ ù tỹ ình jènẽg mũ tónh ke mũ gé,” he tóg.

30 “João vỹ ag kygpég tĩ ja nĩgtĩ. Ti mỹ kanhkã tá vènh jykre han, ãjag mỹ, ãprã ke jykre vó? Ủ nỹ ti jènẽ?” he tóg ag mỹ, Jesus ti. “Ình mỹ tó,” he tóg.

31 Kỹ ag tóg jagnẽ mré to jykrén mũ. “Ëg tỹ ti mỹ: Topẽ tỹ ti jènẽ ja vè, hen kỹ tóg ãg mỹ: ãjag tỹ ne jé ti vĩ kri fig tũ ja nĩ nẽ? henh ke mũ,” he ag tóg jagnẽ mỹ.

32 “Ëg tỹ hã ra ti mỹ: ãprã ke jykre ja vè, hen kỹ tóg vènhmỹ

nỹ gé,” he ag tóg, ag tỹ vènh kar kamẽg kỹ. Vènh kar tóg João to: “Topẽ vĩ tó tĩ pẽ vè,” he tĩ.

33 Hã kỹ ag tóg Jesus mỹ: “ãg pi(jé) ki kanhró nỹtĩ,” he mũ. Òn kỹ ag tóg ke mũ. Kỹ Jesus tóg ag mỹ: “kỹ sóg ãjag mỹ tónh ke tũ nĩ gé, ù tỹ ình jènẽg mũ ti,” he mũ. Ìkato tẽ mũ ag mỹ tóg ke mũ.

12

Ủn camarada kórég ag to comparação

(Mt 21.33-46; Lc 20.9-19)

1 Kỹ Jesus tóg ag kanhrãn kỹ (tóg) ag mỹ comparação ù han mũ sir, kỹ tóg: “kejèn ù tóg nĩgtĩ,” he mũ. “Nén kanẽ tỹ uva krãn ja tóg nĩgtĩ,” he tóg. “Pénĩn tóg rón ja nĩ, kãki tóg kũm ja nĩgtĩ, uva jẽgmĩ jafã han jé. Ki tóg pãjó han ja nĩ gé, kỹ tóg ù tỹ ki rĩr tĩ ag mỹ ré kỹ tĩg ja nĩ, ga ù ra. Ag mré tóg jykrén ja nĩ, ag tỹ ti mré ãkré ãn kanẽ vènh kãpãm jé,” he tóg, Jesus ti.

2 “Ti tỹ kejèn kanẽn kỹ tóg ag mỹ ã camarada ù jènẽg mũ, ti tũ ki rĩr tĩ ag mỹ, ag tỹ ti mỹ vènh kãpãm jé, uva ti.

3 Hã ra ag tóg ti kãgmĩg mũ sir, ti mrãnmrãn ag tóg mũ sir, kỹ ag tóg ti mỹ: “ha tĩg,” he mũ sir, ti mỹ nén ù nĩm mẽ kã.

4 Kỹ tóg ag mỹ ã camarada ù jènẽ mãn mũ gé sir, kỹ ag tóg ti krĩ ki tãnh mũ sir, ti to é he ag tóg mũ sir.

5 Kỹ tóg ag mỹ ù jènẽ mãn mũ gé sir, hã ra ag tóg ti tén mũ gé sir. Ti camarada kar to

ag tóg jũ mũ, ù mrãnmrãn ag tóg, ù tén ag tóg.

⁶ Kĩ hã ra ù tóg kén mũ, hã ra ti kósin vễ, ti fe pễ vễ hã ra. Kĩ tóg vãhã ag mỷ ti jẽnẽg mũ sir. “Hên ri ke mũn ag inh kósin kamẽg mũ,” he tóg, hã kĩ tóg ti jẽnẽg mũ.

⁷ Ti tỹ tá jun kĩ ag tóg ti to jykren mũ, jagnẽ mré. “Kejẽn êkré kar vỹ tỹ ti tũ nĩnh mũ, ha vemnĩ,” he ag tóg ti to. “Mũ nỹ, ti tén jé, ti tũ tag tỹ tỹ ẽg tũ nỹnh jé,” he ag tóg, jagnẽ mỷ.

⁸ Kĩ ag tóg ti kãgmĩ kĩ ti tén mũ sir, ró mătá ag tóg ti fón mũ sir,” he tóg, Jesus ti.

⁹ “Kĩ êkré tỹ tũn mũ ẽn hẽ ri kenh ke mũ?” he tóg. “Jun jé tóg ke mũ, ã camarada ag kãgtén jé. Kĩ tóg êkré ki rĩr tĩ ù ag mỷ finh ke mũ, ti tũ ti,” he tóg. Jesus ti, ag mỷ comparação han kĩ.

¹⁰ Kĩ tóg ag mỷ: “Topẽ vĩ rá tag to jykren nĩ, ha mẽ,” he mũ. “Pó tỹ ãn han jafã fón ag tóg, pó tỹ ãn han tĩ ag. Ag mỷ tóg kórég ja nĩ, pó ẽn ti. Hã ra Topẽ tóg po ẽn hã tỹ ãn nũna han mũ.

¹¹ Ẽg Senhor mág tỹ há vễ, hã kĩ tóg ẽg mỷ e tĩ, ẽg tỹ ven kĩ, he tóg, Topẽ vĩ tỹ rán kĩ nĩ ki,” he tóg ag mỷ, Jesus ti. Ti tỹ ã kato vãsãnsãn mũ ag mỷ vễnh kãmén hã vễ.

¹² Kĩ ag tóg ki kanhró nỹtĩ, ti tỹ ag kato vĩ mũ ti. Hã kĩ ag tóg ti se sór mũ, hã ra ag tóg vễnh e ẽn kamẽg mũ, kĩ ag tóg ti ség tũ nĩ ha. Kĩ ag tóg sir mũ mũ, ti ré kĩ.

*Ẽg tỹ imposto kajãm ke
(Mt 22.15-22; Lc 20.20-26)*

¹³ Hã ra ag tóg ti to ù ag jẽnẽg mũ sir, Fariseu ù ag, Herodes mré ke ù ag ke gé, ag tỹ ti vĩ to ti se jé, Jesus ti.

¹⁴ Ag tỹ ti tá junjun kĩ ag tóg ti mỷ: “Senhor,” he mũ. “Á jykre kuryj nĩn ki kanhró ẽg tóg nỹtĩ,” he ag tóg, ón kĩ. “Vễnh jykre pir hã han ã tóg tĩ, vễnh kar mỷ. Kĩ ag ve tóg ã mỷ tỹ nén ù tũ nĩ. Hã kĩ ã tóg Topẽ jamĩn to, Topẽ japry to ã tóg ẽg kanhrãn há han tĩ,” he ag tóg, ón kĩ, Jesus mỷ. “Mỷ há nỹ', ẽg tỹ governo mỷ jãnkamy nĩm ke ti', imposto kajãm ke ti'?

¹⁵ Ẽg mỷ hỹn nĩm mũ', vó mỷ vó?” he ag tóg.

Hã ra Jesus tóg ki kanhró nĩ, ag jykre régre nỹtĩn ki. Kĩ tóg ag mỷ: “ãjag ne tóg ón kĩ inh ki jẽmẽ sór mũ',” he mũ. “Inh mỷ jãnkamy jun, sỹ ve jé,” he tóg.

¹⁶ Kĩ ag tóg ti mỷ ù jun mũ sir. Kĩ tóg: “ũ jiji nỹ kã nĩ?” he mũ. “Ủ kãgrá nỹ kã nĩ?” he tóg. Kĩ ag tóg ti mỷ: “pã'i mág tỹ imperador kãgrá vễ,” he mũ.

¹⁷ Kĩ Jesus tóg ag mỷ: “kỹ pã'i mág mỷ ti tũ nĩmĩ, hã ra Topẽ mỷ ti tũ nĩmĩ gé,” he mũ. Kĩ ti vĩ tóg ag mỷ e tĩ. Ag tỹ nén ù to ti se sór mũ vэг tũ ag tóg nĩ.

*Ẽg tỹ ẽg ter ja tá vỹn kenh ke
(Mt 22.23-33; Lc 20.27-40)*

¹⁸ Kĩ Saduceu ag tóg ti tá junjun mũ gé, ti ki jẽmẽ jé. Hã ra Saduceu ag tóg: ẽg ter ja tá ẽg vỹn kenh ke tũ nĩ,” he tĩ. Kĩ ag tóg Jesus tá jun kĩ ti mỷ:

19 “Senhor,” he mũ gé. “Moisés tóg ãg mÿ tag tó ja nĩ, ãg tÿ tÿ jykre nÿtĩ jé,” he ag tóg. “Ëg mÿ tóg: ã régre tÿ ã krê tũ ra ter kÿ, ã tÿ ti prũ fi tÿ prũg ke vë, he mũ. Á tÿ ã régre mÿ ã krê han ke vë, fi ki, he ja tóg nĩ, Moisés ti,” he ag tóg, Jesus mÿ, Saduceu ag.

20 “Kÿ ù tÿ jagnë mré pafa ja tÿ 7 (ke) ag vÿ nÿtĩ ja nĩgtĩ,” he ag tóg. “Ag kãke tóg prũg mũ, hã ra tóg ã kósin tũ ra ter mũ sir,” he ag tóg.

21 “Kÿ ti jãvy tóg fi tÿ prũg mũ, hã ra tóg ã kósin tũ ra ter mũ gé sir. Kÿ ti jãvy ù vÿ fi tÿ prũg mũ gé,” he ag tóg.

22 “Hã ra ag kar tóg fi kósin tũ ra kãgter kãn mũ sir, ag kãke ti nón, ù tÿ 7 (ke) ãn ag. Kejën fi tóg vãhã ter mũ gé sir,” he ag tóg.

23 “Kÿ fag kãgter ja tá vÿnvÿn ke kÿ fi hÿn mén tÿ 7 (ke) nĩnh mũ vë. Ag kar vÿ fi tÿ prũg ja nÿtĩgtĩ. Hã kÿ tóg vënhmÿ nÿ, ag tÿ: rĩr mãn jé ãg tóg ke mũ, hen kÿ,” he ag tóg, Jesus ti mÿ, Saduceu ag.

24 Hã ra Jesus tóg ag mÿ: “ãjag pi(jé) Topë vĩ tÿ rán kÿ nĩ ki kanhró nÿtĩ,” he mũ, “Topë jykre ki kagtũg ãjag nÿtĩ,” he tóg. “Hã kÿ ãjag tóg kygnë ja nĩ,” he tóg ag mÿ.

25 “Ëg tÿ ãg ter ja tá vÿn ke kÿ ãg prũg ke tũ nĩ, kÿ ãg mén ke tũ nĩ gé,” he tóg. “Topë tÿ jëgnë jafã ri ke ãg nÿtĩ, kanhkã tá,” he tóg.

26 “Topë vĩ ù to jykren nĩ, ti tÿ ãg tÿ ãg ter ja tá vÿn ke kãmén kÿ. Moisés tÿ rán ki tag tóg rán kÿ nĩ, Topë tÿ Moisés

mÿ nén tó ja tag ti, vãnh pũr kãmén jan ki,” he tóg. “Topë tóg ti mÿ: Abraão vÿ iso: Topë, he tũ, he ja nĩ, Isaque ke gé, Jacó ke gé, he ja tóg nĩ, Topë ti. Kãgter ag huri, Abraão, Isaque, Jacó. Hã ra Topë tóg: tÿ inh ag Topë nĩ, he ja nĩ, ag ter kar kÿ.

27 Hã kÿ ag tóg rĩnrĩr nÿtĩ mÿr, Topë tÿ ùn rĩnrĩr nÿtĩ ag hã kri ke nĩn kÿ,” he tóg, Jesus ti. “Hã kÿ ãjag tóg kygnë tãvĩn mũ,” he tóg, Jesus ti, Saduceu ag mÿ.

Topë tÿ ãg jyvën kãfór

(Mt 22.34-40; Lc 10.25-28)

28 Hã ra Topë vĩ to professor ù tóg tá jun mũ gé sir. Kÿ tóg ag tÿ jagnë mré vĩ mæg mũ, Jesus tÿ Saduceu ag mÿ tó há han ja ãn ti. Hã kÿ tóg: “Topë tÿ ãg jyvën tÿ hë nÿ hÿn ti tÿ ãg jyvën kar kãfór nÿnh mũ?” he mũ, Jesus mÿ.

29 Kÿ Jesus tóg ti mÿ: “ù tÿ kãfór nÿn hã vë, hã mē,” he mũ. “Ha mē, povo tÿ Israel,” he tóg mũ. “Ëg pã'i vÿ tÿ Topë nĩ, ãg pã'i vÿ tÿ ùn pir nĩ,” he tóg.

30 “Topë to, ãg jóg mág to há tãvĩ nÿtĩmnĩ,” he tóg, “ti ki ge há han nĩ, ti to jykre pir nÿtĩmnĩ, krĩ pir, ti to tar nÿtĩmnĩ,” he tóg.

31 “Kÿ ti tÿ ãg jyvën ù tóg há ri ke nĩ gé, hã vÿ: ãjag régre ki rĩr nÿtĩmnĩ, ãjag tÿ vënh ki rĩr há han ri ke, he mũ,” he tóg. “Ti tÿ ãg jyvën ù pi(jé) tag kãfór nĩ,” he tóg, Jesus ti, Topë vĩ to professor ãn mÿ.

32 Kÿ Topë vĩ to professor ãn tóg ti mÿ: “ke tóg tũ,” he mũ. “Á

tỹ ke há vễ. Pir ti nĩ, Topẽ ti, ù pi(jé) ti ri ke nĩ,” he tóg.

33 “Ëg jé ti to fe há nỹtĩgtĩ, Ëg jé ti to krĩ há nỹtĩgtĩ gé, jykre pir ke gé. Ëg jé ti to tar nỹtĩ gé. Ëg jé Ëg régre ki rĩr nỹtĩ gé, Ëg tỹ vễnh ki rĩr há han ri ke. Hã vỹ tóg nén kar kãfór nĩ,” he tóg. “Ëg tỹ Topẽ mỹ nén ù pũn kãfór tóg nĩ, Ëg tỹ ti to há nỹtĩ ãn ti, Ëg tỹ ti mỹ nén ù tãnh kãfór tóg nĩ gé,” he tóg, Topẽ vỹ to professor ãn ti.

34 Kĩ Jesus tóg ti tỹ tó há nĩ ve kỹ (tóg) ti mỹ: “nén ù sĩ tóg tũ nĩ ver,” he mũ, “ã tỹ Topẽ tỹ tỹ Ëg pã'i nĩ venh ke jé,” he tóg. Kar kỹ ù tóg Jesus ki jẽmẽ mãn tũ nĩ sir. Ti kamẽg ag tóg mũ sir, hã kỹ ag tóg ti ki jẽmẽ mãn tũ nĩ sir.

Cristo tỹ tỹ Davi kósin nĩ

(Mt 22.41-46; Lc 20.41-44)

35 Kĩ Jesus tóg Topẽ jo ãn krẽm ag kanhrãn jé ag ki jẽmẽg mũ. “Topẽ vỹ to professor ag tỹ ne jé: Cristo vỹ tỹ Davi kósin nĩ, he nẽ?” he tóg ag mỹ.

36 “Davi vỹ Cristo tó ja nĩ, Topẽ kuprĩg tỹ ti krĩn kỹ, kỹ tóg: Ëg jóg mág tỹ Topẽ vỹ inh Senhor mỹ tag tó ja nĩ, hã kỹ tóg: “nĩ ra ver, inh pẽgja tá,” he ja nĩ. “Sỹ ã kato vãsãnsãn mũ ag tỹ ã krẽm vin ke vễ, kỹ ag sigse vễ sir. Tag jãvãnh nĩ ver,” he ja ti nĩ, Topẽ ti, inh Senhor mỹ, he ja tóg nĩ, Davi ti,” he tóg ag mỹ, Jesus ti.

37 “Hã kỹ Davi tóg Cristo to: inh Senhor vễ, he tĩ. Ti tỹ tỹ ti kósin nĩ ra ti kósin mỹ tỹ ti kri ke nĩnh mũ vễ?” he tóg, Jesus ti. Hã ra ag tóg ti mỹ tó

tũg. Ag tỹ ne tónh ke tóg tũ tĩ, ti kato vãsãnsãn mũ ag mỹ. Hã ra vễnh kar mỹ ti vỹ tag tóg há nỹ.

Ón kỹ Topẽ vỹ to professor ag tỹ jagtar ke

(Mt 23.1-36; Lc 20.45-47)

38 Kĩ Jesus tóg ag kanhrãn kỹ: “ón kỹ Topẽ vỹ to professor ag kamẽg nĩ,” he mũ. “Kur téj rĩnh ka(mẽ) ag nỹtĩ,” he tóg. “Kỹ vễnh kar tỹ ag mỹ: ã mỹ há? he kỹ tóg ag mỹ sér tĩ, ag tỹ cidade kaju kãmĩ mũn kỹ,” he tóg.

39 “Ëg tỹ vễnh kanhrãn jafã krẽm ag tóg vễnh kãpãm kỹ nỹtĩgtĩ, festa ki ag tóg jẽn vén tĩ, ag tỹ tỹ pã'i nỹtĩn kỹ,” he tóg.

40 “Hã ra ag tóg ùn mén ter ja fag tũ mãn kãn tĩ. Fag tũ mãn kãn kỹ ag tóg ón kỹ Topẽ mré vỹ mág han mũgtĩ, Ëg tỹ ag to: ùn há vỹ tỹ ag nỹtĩ, he jé,” he tóg. “Hã to ag vễsỹrénh mág tãvĩ han ke mũ,” he tóg, Jesus ti.

Ûn jagtar fi tỹ ã tũ vin kãn

(Lc 21.1-4)

41 Kĩ Jesus tóg kejẽn Topẽ mỹ jãnkamy vin jafã kato nĩ mũ. Kỹ tóg ag tỹ kãki nén vin mũ vэг mũ sir. Ûn rico ag tóg jãnkamy mág tỹ kãki vin mũ.

42 Kỹ ùn jagtar fi tá jun mũ gé, ùn mén ter ja fi. Hã ra fi tóg jãnkamy kãsir régre hã vin mũ sir, hã vỹ: 1 centavo, he mũ.

43 Kỹ Jesus tóg ã mré mũ tĩ ag jé prẽr mũ sir, kỹ tóg ag mỹ: “ve ra ha,” he mũ. “Ûn rico tỹ vin kãfór han fi tóg, fi tũ sĩ (hã) ra. Tỹ nén ù tũ fi tóg nĩ, fi mén vỹ hur ter.

44 Kÿ fi tóg ã tũ vin kãn ja nĩ, fi jẽn mré hã. Jãvo ãn rico ag vÿ ãjag tũ ke hã tÿ Topẽ mÿ vin mág tĩ. Hã ki fi tóg ag tÿ nĩm kãfór han, fi tÿ nĩm sĩ pẽ han mũ ra. Ki hã sóg tó mũ mÿr,” he tóg, Jesus ti.

13

*Ag tÿ Topẽ jo ãn kókén ke
(Mt 24.1-2; Lc 21.5-6)*

1 Kÿ Jesus tóg Topẽ jo ãn tá kãkutẽ mũ sir. Re tá ti mré tĩ ã tóg ti mÿ: “ve ra ha, Senhor,” he mũ. “Pó sãnvĩ tÿ tóg há nÿtĩ, kÿ tóg sĩ(nvĩ) tãvĩ nÿtĩ, ãn ti,” he tóg, Topẽ jo ãn to.

2 Hã ra Jesus tóg ti mÿ: “ã mÿ ãn mág tag ti vigvég mũ?” he mũ. “Kejẽn ã pó tÿ jagnẽ kafãn mãn ke tũ nĩ,” he tóg. “Ag ránhraj kãn ke vẽ,” he tóg Jesus ti.

*Vẽnh jagãgtar to rã
(Mt 24.3-14; Lc 21.7-19)*

3 Kar kÿ Jesus tóg krĩ tÿ Oliveiras ra tũg kÿ tá nĩ nĩ sir, Topẽ jo ãn kakãm. Kÿ ag tóg ag pin kÿ ti mÿ ke mũ, Pedro, Tiago, João, André ke gé.

4 “Ëg mÿ ti kurã ti tó,” he ag tóg ti mÿ. “Ëg ne ve kÿ ti kurã ki kanhró nÿtĩnh mũ? Kurã tÿ hẽ ki ãg hÿn nén kar tag venh ke mũ?” he ag tóg ti mÿ.

5 Kÿ Jesus tóg ag mÿ kãmén mũ sir. “Ker ã ãjag lograr hé hẽ,” he tóg.

6 “Cristo vÿ tÿ ãn nĩ,” he jé ag tóg ke mũ, ijiji tó kÿ. ã tÿ hẽn ri ke ag tóg tag tónh mũ, kÿ ã tÿ hẽn ri ke ag tóg ag vĩ kri nĩm ke mũ,” he tóg.

7 “Vẽnh génh to vême mẽ jé ãjag tóg ke mũ, tag ki vẽn

génh ke to, kuvar há tá vẽnh génh to ke gé. To jũrũn ke tũg nĩ hã ra. Vẽnh génh enh ke vẽ. Hã ra kurã tÿ ãgno to hã ke vẽ ver,” he tóg.

8 “Nação ag tÿ jagnẽ kato tẽgtẽnh ke vẽ. Pã'i krẽm ke ag tÿ pã'i ã krẽm ke ag to jũnh ke vẽ gé. Kÿ ga tÿ ragrag ke tÿ hẽn ri ke han ke vẽ gé, ãmã tÿ hẽn ri ke ki. Vẽnh tÿ tũ' henh ke vẽ gé. Hã ra ãjag jagãgtar ke vẽnh ven vén vẽ ver,” he tóg, Jesus ti.

9 “ãjag kanẽ nĩm nĩ,” he tóg. “ãjag jyvẽn tar han jé ag tóg ke mũ, pã'i ag, vẽnh kanhrãn jafã krẽm. ãjag mrãnmrãn jé ag tóg ke mũ. ãjag jé prẽr jé ag tóg ke mũ, pã'i mág tÿ ãjag ve jé, pã'i mág kar ti, isugrĩn, ãjag tÿ pã'i ag mÿ ãn vĩ tugtó jé,” he tóg.

10 “Kÿ ãn kãtũg ke to hã povo kar vÿ ãn vĩ sér mẽnh ke mũ,” he tóg.

11 “Ag tÿ vãhã sir ãjag sigse kÿ, ãjag gé kãmũ jé, kÿ ãjag tÿ nén tónh ke mũ to jÿkrén tũg nĩ, kã jatu' hemnĩ. Ag tÿ ãjag ki jẽmẽn kÿ ãjag tóg tónh ke mũ, Topẽ kuprĩg tÿ ãjag nĩgrẽg ki vĩ mũ ãn ti,” he tóg. “ãjag tÿ tó tũ vẽ sir, ti tÿ tó vẽ sir,” he tóg.

12 “ã vÿ tóg ã régre senh ke mũ, ti ter jé, ãn kã,” he tóg. “Kÿ ãn panh tóg ã kósin senh ke mũ gé, ti ter jé,” he tóg. “Kÿ ã krẽ ãn tóg ã han mũ fag sigsenh ke mũ gé, fag kãgtén jé,” he tóg.

13 “Vẽnh kar vÿ tóg ãjag to vĩ kónãn ke mũ gé, ãn jiji tugrĩn,” he tóg. “Hã ra ã tÿ isovãnh ke tũ (pẽ) ãn kren ke

vě,” he tóg.

Vēsýrénh mág ke

(Mt 24.15-28; Lc 21.20-24)

¹⁴ Kŷ Jesus tóg ag mŷ: “kejĕn ājag tóg vāhā ājag tŷ nĕn ũ kamĕg tĩ ĕn venh ke mŷ,” he mŷ, “ĕg kavĕnh mŷ ĕn ti,” he tóg. “Topĕ vĩ tó tĩ tŷ Daniel vŷ ti tó ja nĭgtĩ. Ti jĕnh ke tũ tá tóg jĕnh mŷ,” he tóg. Ũ tŷ to ke mŷ ĕn jĕ ki kanhró nĩ. “Kŷ Judĕia ki ke kar ag jĕ vĕnh pigjunh mŷjĕg, pānónh ra, fag mrĕ hā,” he tóg.

¹⁵ “Ũ tŷ re tá nĩ ĕn jĕ kāra rā tŷg nĩ, ti ĭn ki, ti tũ mǎn jĕ.

¹⁶ Kŷ ũ tŷ ā japŷ tá jĕ ĕn jĕ vŷn ke tŷg nĩ gé, ti kur mǎn jĕ,” he tóg.

¹⁷ “Ũn kufy fag tŷ vĕsýrénh ke vĕ, kurā ĕn kǎ, ũ tŷ gĩr pygfām mŷ fag ke gé,” he tóg.

¹⁸ “Topĕ mrĕ vĭmnĩ, ti tŷ kusa kǎ vĕnh ven tũ nĩ jĕ.

¹⁹ Vĕsýrénh tŷ ge ve ja tũ ĕg nŷtĩ, Topĕ tŷ ĕg mundo han jan ki. Kŷ ĕg ge venh ke tũ nĩ gé, kar kŷ,” he tóg.

²⁰ “Ĕg tŷ kurā ki vĕsýrénh ke mŷ ĕn vŷ e nŷtĭnh mŷ vĕ, hā ra tóg térem kŷ nŷtĩ nĩ, Topĕ tŷ ũn kuprĕg ja ĕn ag tugrĭn. Ti tŷ térem tũ nĩ (mŷ) ra ũ vŷ kren ke tũ nĩ vĕ, ag vĕsýrénh ĕn to,” he tóg.

²¹ “Kŷ ũ tŷ ājag mŷ: ha vé, Cristo vŷ tag kǎ jĕ nĩ, he mŷ ra kri fig tŷg nĩ, ti tŷ: tátá ti jĕ nĩ, he mŷ ra,” he tóg.

²² “Ón kŷ Cristo vŷ vĕnh venven ke mŷ, ón kŷ Topĕ vĩ tó tĩ ag ke gé. Ón kŷ milagre hyn han jĕ ag tóg ke mŷ, milagre tŷ hĕn ri ke ti, ón kŷ

Cristo ĕn ag. Ag tŷ vĕnh kar krĭn kónān sór vĕ, ag tŷ kygnĕ jĕ, Topĕ tŷ ũn kuprĕg ja ĕn ag mrĕ hā, hĕn ri ke mŷn.

²³ Ha vé, sŷ ājag mŷ tó kǎn vĕ, ti kutĕnh ke to hā,” he tóg, Jesus ti.

Topĕ kósin kǎtĭg mǎn ke

(Mt 24.29-31; Lc 21.25-28)

²⁴ “Hā ra kurā ĕn kǎ, vĕsýrénh ĕn kar kŷ rā vŷ nhyr ke mŷ, kŷ kysā vŷ jĕngrĕ’ he mǎn ke tũ nĩ gé.

²⁵ Kŷ krĭg vŷ vár ke mŷ gé, kanhkā krĕm. Ĕg tŷ kanhkā tá nĕn vég tũ kar ĕn vŷ ragrag ke kǎn mŷ gé.

²⁶ Kŷ vāhā vĕnh kar vŷ inh kǎtére venh ke mŷ sir, kanhkā góg jagma, inh jykre tar (pĕ) nĭn kŷ,” he tóg. “Tŷ sóg ĕprā ke fi kósin nĩ mŷr,” he tóg. “Inh ve vŷ kókov (pĕ) kǎtĩ mŷ,” he tóg.

²⁷ “Kŷ sóg sŷ jĕgnĕ jafā ag mŷ: ha mŷjĕg, hĕnh ke mŷ, ag tŷ sŷ ũn kuprĕg ja ag vĕnhmǎn jĕ, ga kar tá, kanhkā fyr mĩ hā,” he tóg, Jesus ti.

Ka tŷ figueira to comparaçāo

(Mt 24.32-35; Lc 21.29-33)

²⁸ “Ka tŷ figueira to ki kanhrān nĩ, to comparaçāo han kŷ,” he tóg. “Ti pĕ tánh kŷ, ti fĕj tǎg han kŷ tóg kakó tĩ sir, ĕkrĕ tygtǎnh kurā ti.

²⁹ Ri ke ti nĩ, ājag tŷ inh kǎtĭg mǎn ke kurā ki kanhró nŷtĭnh ke mŷ ti. Ājag tŷ sŷ ājag mŷ nĕn tó mŷ tag ve kŷ tóg kakó tǎvĩ tĩ ha, inh kǎtĭg mǎn ke ti,” he tóg.

30 “Sỹ ke há vễ, hã kỹ sóg tag tó mũ, ha mẽ. Ủri ùn rĩnrĩr mũ ag tỹ nén kar ẽn venh ke vễ, ag kágter ke to hã,” he tóg.

31 “Kanhkã vỹ tũ' henh ke mũ, ga ti ke gé. Jãvo inh vỹ vỹ tũ' henh ke tũ nĩ,” he tóg, Jesus ti.

*Jesus kãtĩg mãn ke kurã
(Mt 24.36-44)*

32 “Hã ra ù pi(jé) isỹ kurã ki kãtĩg mãn ke ki kanhró nĩ, hora ẽn ki ke gé,” he tóg. “Topẽ tỹ jẽgnẽ jafã ag pi(jé) ki kanhró nỹtĩ'. Inh pi(jé) ki kanhró nĩ gé, isỹ tỹ Topẽ kósin ra,” he tóg. “Ëg jóg mág hã vỹ ã pin kỹ ki kanhró nĩ, kurã kã nén kutẽnh ke mũ ẽn ki,” he tóg.

33 “Ăjag kanẽ vin han nĩ, vẽn rinfig nĩ,” he tóg. “Topẽ mré vỹ, ăjag tỹ ti kurã ki kagtĩg nỹtĩn kỹ,” he tóg.

34 “Ủ pasa ri ke vễ,” he tóg. “Ă tỹ ã ãn ki kutẽ kỹ tóg ã camarada ag mỹ: “ijo ki rĩr,” he mũ, “inh rãnrãj ki,” he tóg. Kỹ tóg ù tỹ jãnkã ki rĩr tĩ ẽn mỹ: “ã kanẽ nĩm han nĩ,” he mũ gé.

35 Hã kỹ sóg ăjag mỹ: “ăjag kanẽ nĩm han nĩ,” he mũ gé,” he tóg. “Ăjag pi(jé) ti jun ke ki kanhró nỹtĩ', ãn tãn ti,” he tóg. “Hẽn ri ke mũn tóg kutyg ke ra jun mũ, hẽn ri ke mũn tóg kuty kuju ki jun mũ, hẽn ri ke mũn tóg galo kyr mũ ra jun mũ, hẽn ri ke mũn tóg kusã ki jun mũ,” he tóg.

36 “Vẽnh ki ẽmẽmnĩ, nũr tũg nĩ. Ăjag tỹ ijãvãnh tũ ra sóg jun mũ, vễsỹmér,” he tóg, Jesus ti.

37 “Vẽnh kar mỹ sóg tó mũ, sỹ ăjag mỹ tó mũ tag, hã vỹ: vẽnh ki ẽmẽmnĩ, he mũ,” he tóg, Jesus ti.

14

*Ag tỹ Jesus tén sór
(Mt 26.1-5; Lc 22.1-2; Jo 11.45-53)*

1 Hã ra festa tỹ Páscoa kurã kãtã kurã tãgtũ vễ sir, pão jẽgia tũ konh ke kãtã. Kỹ Topẽ tũ ki rĩr tĩ ag tóg Jesus vatãnh tá ti se sór mũ, vẽnh kar tỹ ti se vэг tũ nĩ jé. Topẽ vỹ to professor mré ag tóg ti se sór mũ gé, ti tén jé.

2 Hã ra ag tóg: “festa tag to mẽ jé ẽg tóg ke mũ ver,” he mũ. “Ëg tỹ festa kã ti se kỹ vẽnh génh mág hỹn tóg kutẽnh mũ, ha vemnĩ,” he ag tóg.

*Maria fi tỹ Jesus gãnh tãg
(Mt 26.6-13; Jo 12.1-8)*

3 Ẽn kã Jesus tóg kejẽn ẽmã tỹ Betânia tá nĩ nĩ, Simão ãn krẽm, vẽnh kaga tỹ lepra han ja ẽn ãn krẽm. Ti jẽg nĩ ra ù fi tóg tá jun mũ, garrafa vyn kỹ. Pó tỹ alabastro tỹ tóg há(r) nĩ, garrafa ti. Ti ki jẽ vỹ tóg tỹ nén kar tãg nĩ, hã vỹ: nardo, he mũ. Nardo pẽ vễ, kaja e pẽ ti nĩ, ger há ẽn ti. Garrafa ẽn mranh fi tóg mũ, kỹ fi tóg ti ki jẽ ẽn tỹ Jesus gãnh kri kugjẽg mũ sir.

4 Hã ra ù tỹ tá nỹtĩ ag kã ù ag tóg jagnẽ mỹ: “fi tỹ ne jé nén kaja e tag kókén nẽ?” he mũ.

5 “Ëg tỹ nén ger há tag fón ke vễ vễ, kaja há to, jãnkamy tỹ hẽn ri ke to,” he ag tóg. “Ëg tỹ ùn jagãgtar ag mỹ vin ke vễ

vẽ,” he ag tóg. Kÿ ag tóg fi mÿ vĩ tar han mũ sir.

⁶ Hã ra Jesus tóg ag mÿ: “fi mÿ vĩ tũg,” he mũ. “Ajag tÿ ne jé fi fe kaj han nẽ?” he tóg. “Inh ki fi krov nĩ, inh jykre ki,” he tóg.

⁷ “Ajag mré sóg nĩg sĩ han mũ, jãvo ùn jagãgtar mũ ag vĩ ajag mré nÿtĩg mág han tĩ,” he tóg. “Isĩg kar kÿ ag mÿ nĩmnĩ, ajag tÿ ag mÿ nén nĩm ke ti,” he tóg.

⁸ “A tÿ nén han ke mũn han fi tóg huri,” he tóg. “Inh kãn fi tóg huri, vẽn ke j tá inh fón ke to,” he tóg.

⁹ “Ag tÿ vẽn vĩ sér tugtó kÿ ag tóg fi tÿ nén han mũ tag ti tónh ke mũ gé, kÿ vẽn kar vĩ fi tÿ nén han mũ tag mẽgmẽn mũ sir, ha vemnĩ. Ki hã sóg tó mũ,” he tóg, Jesus ti.

Ag tÿ Jesus vatánh tá ti kãgmĩnh ke to jykren

(Mt 26.14-16; Lc 22.3-6)

¹⁰ Kar kÿ Judas Iscariotes tóg ti mũ, Topẽ tũ ki rĩr ti ag ra, ag mré Jesus jẽnjẽn ke to jykren jé. Hã ra ù tÿ 12 (ke) ag kã ù vẽn, Judas ti.

¹¹ Ag tÿ ti vĩ mẽ kÿ tóg ag mÿ sér ti sir. “A mÿ ãg to jãnkamy vin mũ,” he ag tóg ti mÿ. Hã kÿ tóg: “inh hÿn hẽ ri kenh mũ, ag tÿ ti kãgmĩ jé?” he mũ, Judas ti.

Ag tÿ Páscoa ko mũ

(Mt 26.17-25; Lc 22.7-14, 21-23; Jo 13.21-30)

¹² Pão jẽgja tũ konh ke kurã ve vẽn sir, cordeiro tãnh ke kurã vẽn sir, Páscoa kã. Kÿ ti mré mũ ti ag tóg Jesus mÿ:

“ẽg hÿn hẽ tá ã mÿ carneiro sĩ tãnh mũ, ãg tÿ kon jé?” he mũ.

¹³ Kÿ tóg ùn régre ag jẽgnẽg mũ, ti mré mũ ti ag. Kÿ tóg ag mÿ: “ha ãmã mág ra mũjẽg,” he mũ. “Tá ajag tóg ù vẽn ke mũ, goj vyn kÿ jẽ ù. Ën nón mũmnĩ,” he tóg.

¹⁴ “Ti tÿ ãn kãra rã kÿ ãn tãn ãn mré vĩmnĩ,” he tóg. “Ti mÿ tag tómnĩ,” he tóg. “Ëg Senhor vĩ ã mÿ vẽn vĩ jẽnẽg mũ, hemnĩ. Ti tÿ ã ãn krẽm Páscoa konh há tóg ti, ti mré mũ ti ag mré, hemnĩ ti mÿ,” he tóg, Jesus ti.

¹⁵ “Kÿ tóg ajag mÿ ven ke mũ, kroggrog tÿ kynhmÿ nÿ ãn ti,” he tóg. “Éhé ti nĩ. Tá nén kar vĩ kynkar kÿ nÿtĩ. Ëg nĩgja vĩ tá nÿtĩ gé. Tá ãg mÿ han nĩ,” he tóg, ti mré mũ ti régre ag mÿ.

¹⁶ Kÿ ag tóg mũ mũ sir, ãmã mág ra, kÿ ag tóg sir vég mũ, Jesus tÿ ag mÿ nén tó ja ti. Kÿ ag tóg vẽn kãn mũ sir, ag tÿ cordeiro ãn ko jé.

¹⁷ Rã pur kar kÿ Jesus tóg ù tÿ 12 (ke) ag mré tá jun mũ sir.

¹⁸ Ag jẽg mũ jãvo Jesus tóg ag mÿ: “ajag kãki ù tóg inh vatánh tá inh kato vãsãnsãn mũ ag mÿ inh ven ke mũ,” he mũ. “Inh mré jẽg mũ ù vẽn, ki hã sóg tó mũ,” he tóg.

¹⁹ Kÿ ag tóg fe kaj' he mũ sir. Ti mÿ ag tóg: “inh mÿ vó? Inh mÿ vó?” he kãn mũ sir.

²⁰ Hã ra tóg ag mÿ: “ajag kã ù vẽn,” he mũ. “Inh mré pão tÿ kã punpun mũ vẽn, pẽnky kãki,” he tóg. “Ën vẽn mÿr,” he tóg.

21 “Ter jé sóg ke mũ, isỹ tỹ ãprã ke fi kósın nĩn kỹ. Hã kỹ iser ke vỹ rán kỹ nĩ,” he tóg. “Vãsỹ sóg to rán kỹ nĩ,” he tóg. “Hã ra ù tỹ pã'i ag mỹ inh ven ke ên mỹ tóg vỹ kónãn tâvĩ han ke mũ. Tĩ mur tũ nĩn ran há tĩ vỹ,” he tóg, Jesus ti.

Santa Ceia

(Mt 26.26-30; Lc 22.15-20; 1Co 11.23-25)

22 Ag jêg nỹtĩ ra Jesus tóg êmĩ mäg mũ sir, kỹ tóg Topê mré vỹ mũ sir, êmĩ to. Kỹ tóg vênh kã kugpãn kỹ ag mỹ vênh kãpãm mũ sir, ti mré mũ tĩ ag mỹ. “Inh hã vỹ,” he tóg, êmĩ to.

23 Kar kỹ tóg copo vãg mũ gé sir, vinho tỹ ki jẽn kỹ. To tóg Topê mré vỹ mũ gé sir, kỹ tóg ùn pir mỹ ven', ven', he mũ sir. Kỹ ag tóg kãmẽ kãn mũ sir.

24 Kỹ tóg ag mỹ: “inh kyvénh hã vỹ,” he mũ. “Vênh kar jagfy tóg inh ki kãkutênk ke mũ, inh kyvénh ti,” he tóg. “Topê vỹ vênh kar to há nĩ sór mũ, inh kyvénh tugrĩn,” he tóg.

25 “Ha mẽ,” he tóg. “Inh pi(jé) vinho kron mãn ha'. Kejẽn sóg kron mãn ke mũ, Topê tỹ tỹ êg pã'i nĩ ên kã sóg kron mãn mũ,” he tóg.

26 Ag jẽn kar kỹ ag tóg Topê mỹ jãn mũ sir. Jãn kar kỹ ag tóg sir krĩ tỹ Oliveiras ra mũ mũ.

Jesus tỹ Pedro mỹ tó

(Mt 26.31-35; Lc 22.31-34; Jo 13.36-38)

27 Kỹ Jesus tóg ag mỹ: “ãjag kar vỹ inh ré kỹ mũ kãn ke mũ,” he mũ. “Hã kỹ tóg rán kỹ nĩ, hã mẽ. “Û tỹ carneiro ki rĩr tĩ ên tãnh jé sóg ke mũ, kỹ ti

mêg vỹ krig ke kãn ke mũ,” he tóg, iso, Topê ti, ti vỹ rá ki,” he tóg, Jesus ti. “Hã ve jé ãjag tóg ke mũ.

28 Hã ra sóg iser kar kỹ rĩr mãn ke mũ. Ên kã sóg ãjag jo tĩnh ke mũ, ga tỹ Galiléia ra,” he tóg, Jesus ti.

29 Kỹ Pedro tóg ti mỹ: “ag kar tỹ ã ré kỹ mũ mũ ra isóg ã ré kỹ tĩg ke tũ nĩ,” he mũ, Pedro ti.

30 Hã ra Jesus tóg ti mỹ: “ha vé,” he mũ. “Ûri, kuty tag kã ã tóg iso: ti ki kagtĩg sóg nĩ, he tãgtũ han ke mũ, galo kyr régre han ke to hã. Ki hã sóg tó mũ,” he tóg.

31 Hã ra Pedro tóg vỹ tar han. “Sỹ ã mré ter ke mũ ra sóg ã to: ti ki kagtĩg sóg nĩ, henh ke tũ pẽ nĩ,” he tóg, Pedro ti. Kỹ ti mré mũ tĩ ag tóg hã tó kãn mũ gé sir.

Getsêmani tá

(Mt 26.36-46; Lc 22.39-46)

32 Kỹ ag tóg ka kré ra mũ mũ sir. Ka kré ên jijin hã vỹ: Getsêmani, he mũ. Kỹ tóg ã mré mũ tĩ ag mỹ: “nĩgnĩ ra ver, tag ki,” he mũ. “Sỹ ver Topê mré vêmén ke vỹ,” he tóg, Jesus ti.

33 Kỹ tóg Pedro, Tiago, João ag mỹ: “inh mré kãmũ jêg,” he mũ. Kỹ tóg ti mỹ e tĩ sir, jũrũn ke tóg mũ sir, Jesus ti.

34 Kỹ tóg ag mỹ: “inh fe kaj mág tóg tĩ,” he mũ, “kỹ inh fe kaj tóg inh mỹ tỹ iser ri ke nĩ,” he tóg. “Tag ki nỹtĩmnĩ, nũgnũr tũg nĩ,” he tóg.

35 Kỹ tóg tĩg sĩ han mãn kỹ mũg ke mũ, ga kri nỹ tóg mũ sir. ã jóg mré tóg vỹ mũ sir,

“isỹ hẽn ri ke mũn nén venh ke mũ ěn vég tũ nĩ jé, hora ěn ki,” he tóg.

36 Kĩ tóg: “Aba', panh',” he mũ. “Nén kar han ki kanhró ã tóg nĩ,” he tóg. “Inh jagtar ke tag tỹ tũg' hemnĩ,” he tóg. “Hã ra isỹ ã mỹ nén to vĩ mũ tag han tũg nĩ, ã tỹ nén han ke mũ ěn hã han nĩ,” he tóg.

37 Kĩ tóg ã mré mũ tĩ ag venh tĩ mũ, hã ra ag tóg nũgnũr ja nĩ, kỹ tóg Pedro mỹ: “Simão, ã mỹ nũr'?” he mũ, “ã mỹ hora pir hã ki nũr tũ kórég?” he tóg ti mỹ.

38 “Nũr tũg nĩ,” he tóg. “Topẽ mré vĩmnĩ, ãjag tỹ ti vĩ mranh tũ nĩ jé, ù tỹ ãjag kutãn mũ ra. ãjag tỹ mranh sór tũ vễ vễ, hã ra ãjag tóg krój nỹtĩ, hã kỹ ãjag tóg mranh ke mũ,” he tóg.

39 Kĩ tóg tĩg mãn mũ sir, Topẽ mỹ tó mãn jé. Ti vĩ ěn hã tó mãn tóg mũ.

40 Kĩ tóg ag tá jun mãn mũ gé sir, hã ra ag tóg nũgnũr mãn nỹtĩ, ag kanẽ krój nỹtĩn kỹ. Hã kỹ ag tỹ ti mỹ vĩnh ke ěn tóg tũ tĩ.

41 Kĩ tóg tá jun tăgtũ han mãn mũ. Kĩ tóg ag mỹ: “ãjag ne tóg nũgnũr ja nĩ', vẽnkhán ja ãjag tóg nĩ,” he mũ. “Gen kỹ,” he tóg. “Pétẽm ti huri, hora ti,” he tóg. “Ủ tỹ Topẽ vĩ mranh tĩ ag tỹ isenh ke nẽ ha,” he tóg. “Tỹ sóg ěprã ke fi kósin nĩ mỹr,” he tóg.

42 “Nĩgnĩ ra, mũ jé ha. Ủ tỹ ag mỹ inh ven mũ tóg jun ke kãtĩg ha,” he tóg.

Ag tỹ Jesus se

(Mt 26.47-56; Lc 22.47-53; Jo 18.3-12)

43 Jesus tỹ ver tỹ vẽnén jẽ ra Judas tóg vễsỹmér jun mũ sir. Ủ tỹ 12 (ke) ag kã ù vễ, Judas ti. Ti mré polícia ag tóg kãmũ mũ gé. Rógro génh kỹ ag kãmũ mũ, ka kykyv génh kỹ ke gé. Topẽ tũ ki rĩr tĩ ag pã'i ag vỹ ag jẽgnẽ, Topẽ vĩ to professor ag ke gé, kófa ag ke gé.

44 Judas ěn, ù tỹ ag mỹ Jesus ven mũ ěn vỹ ag mỹ vẽnh jykre nĩm ja nĩ. “Sỹ ùn ki nhun ke mũ ěn hã semnĩ. ěn hã pére mũmnĩ,” he ja tóg nĩ, Judas ti.

45 ã tỹ tá jun kỹ tóg vễsỹmér Jesus to grẽn ke kỹ ti mỹ: “Senhor,” he mũ. Kỹ tóg ti ki nhun ke mũ sir, Judas ti, ón kỹ.

46 Kỹ ag tóg ti kãgmĩ kỹ ti ség mũ sir.

47 Jesus mré tĩ tĩ ù tóg rógro kunũnh kỹ polícia ù nĩgrẽg kym mũ sir. Topẽ tũ ki rĩr tĩ to pã'i mág camarada vễ, ti tỹ ùn nĩgrẽg kym mũ ěn ti.

48 Kỹ Jesus tóg ag mỹ: “ãjag ne tóg rógro génh kãmũ mũ',” he mũ, “ka kykyv génh kỹ ke gé” he tóg. “Inh pi(jé) tỹ bandido nĩ',” he tóg.

49 “Kurã kar ki sóg ãjag mré jẽ ja nĩgtĩ, mỹr, Topẽ jo ĩn krẽm,” he tóg. “Vẽnh kanhrãn kỹ isóg tá nĩ ja nĩgtĩ, hã ra ãjag tóg tá iség tũ nĩ vễ mỹr,” he tóg. “Hã ra vãsỹ iso nén rán kỹ nĩ ěn ki kenh ke hỹn,” he tóg.

50 Kỹ ti mré mũ tĩ ag tóg ti ré kỹ pétẽ kãn mũ, vẽnh pigju jé, mỹr, ha mẽ.

51 Hã ra kyrũ ù tóg ti nón tĩ mũ. Vẽnh kãtor tăvĩ ti nĩ. Ti kãgmĩg ag tóg mũ gé.

52 Hã ra tóg kamêg ký ã kur ré ký vênhvãg mũ, ti kator ra.

Pã'i tỹ Jesus mré vĩ

(Mt 26.57-68; Lc 22.54-55, 63-71; Jo 18.13-14, 19-24)

53 Ký ag tóg Jesus pére mũ mũ, Topê tũ ki rĩr tĩ to pã'i mỹ. Ti ãn tá ag tóg vênhmãn kãn ký nỹtĩ, Topê tũ ki rĩr tĩ to pã'i ag, kófa ag mré hã, Topê vĩ to professor ag mré hã.

54 Hã ra Pedro tóg Jesus nón kãtĩ mũ, kuvar há tá. Ký tóg Topê tũ ki rĩr tĩ to pã'i ãn vãso ra rã mũ gé. Ký tóg polícia ag mré pĩ to tón nĩ nĩ, Pedro ti.

55 Ký Topê tũ ki rĩr tĩ to pã'i ag tóg ù jãvãnhvãnh mũ, ù tỹ ón ký Jesus jykre kórég tó mũ ãn. Ti vĩ tugrĩn ag tóg Jesus ti tén sór mũ. Hã ra tóg ag mỹ ki krov tũ nĩ. Vênh jyvẽn tĩ kar ag tóg ù jãvãnhvãnh mũ, hã ra tóg ag mỹ ki krov tũ nĩ gé.

56 ù tỹ hẽn ri ke ag tóg ón ký Jesus jykre kórég tó mũ, hã ra tóg ag mỹ ki krov tũ pẽ nĩ sir, ag tỹ vênh jykre ù tó', vênh jykre ù tó' he mũ ra.

57 Ký ù ag tóg vãhã jëgjęg ký nỹtĩn ký (ag tóg) ón ký ti jykre kórég ù kãmén mũ sir.

58 "Ti tỹ tó mẽ ãg," he ag tóg. "Topê jo ãn tag kókén jé sóg ke mũ, he ja tóg nĩ, vênh nĩgẽ tỹ há tag ti, he ja tóg nĩ, hã ra sóg kurã tãgtũ ki ù han mãn ke mũ, ãg tỹ ãg nĩgẽ tỹ han vãn ãn han jé sóg ke mũ, he ja tóg nĩ," he ag tóg, Jesus to.

59 Ge ra tóg ag mỹ ki krov tũ nĩ, ti jykre kórég ãn vég tũ ag tóg nĩ.

60 Ký Topê tũ ki rĩr tĩ to pã'i mág tóg jëgnẽ ký (tóg) ag kuju

kã jẽ mũ sir. "Ã tỹ nén ù tónh ke mũ mỹ ã mỹ tũ?" he tóg mũ. "Ag hã ne tóg ã vĩ kónãn tag tó ja nĩ gé," he tóg, Jesus mỹ.

61 Hã ra tóg hun ke mũ, nén ù tó tũ tóg nĩ. Ký pã'i mág ãn tóg ti mỹ ke mãn mũ. "Ã mỹ tỹ Cristo nĩ?" he tóg, "ãg tỹ ù to: há ti nĩ, he mũ ãn kósin mỹ tỹ ã nĩ? ã mỹ tỹ Topê kósin nĩ?" he tóg.

62 Ký Jesus tóg ti mỹ: "hỹ, ãn hã vẽ," he mũ. "Ëprã ke fi kósin ãn vỹ tỹ ãn nĩ. ãn ve jé ãgag tóg ke mũ ha. ù tỹ nén kar han mũ ãn pëgja tá sóg nĩnh ke mũ. Kanhkã góg kãmĩ sóg kãtérénh ke mũ gé," he tóg.

63 Ký pã'i mág ãn tóg ã kur tỹ jaran' ke mũ sir, jũ ký. Ký tóg: "ù tỹ ti jykre kórég tónh ke ù jãvãnh mãn ke tũ ãg nĩ ha," he mũ.

64 "Ti tỹ Topê kato vĩ kónãn ja ãn mẽ ãg huri," he tóg. "Ëg hỹn ti tỹ hẽ ri kenh mũ ha?" he tóg.

"Ter jé tóg ke mũ, ti vĩ tag tugrĩn," he ag tóg, ag kar ãn.

65 Ký ù ag tóg ti to sugsgug mũ sir. Ti kanẽ pãg ag tóg mũ gé sir, ký ag tóg ti tãnh ký ti mỹ: "ù nỹ ã tãnh?" he mũ. Kar ký polícia ag tóg ti tãnh mũ gé sir, ti kakã ki.

Pedro tỹ Jesus to ón

(Mt 26.69-75; Lc 22.56-62; Jo 18.15-18, 25-27)

66 Hã ra Pedro tóg ãn vãso kã nĩ nĩ, Topê tũ ki rĩr tĩ to pã'i ãn ãn tá. Hã ra pã'i ãn camarada fag vỹ tá nỹtĩ gé, ký fag kã ùn pĩr fi tóg Pedro to kãtĩ mũ.

67 Kÿ fi tóg ti vég mũ sir, ti tÿ pĩ to tón nĩ ra. Kÿ fi tóg ti tugnÿm kÿ ti mÿ: “Jesus mré ã tóg tĩg mũ gé,” he mũ. “Nazaré tá ke ên mré,” he fi tóg ti mÿ.

68 Hã ra Pedro tóg: “vó,” he mũ. “Inh pi(jé) ti ki kanhró nĩ,” he tóg. “Ã tÿ ne tó nê?” he tóg. Kÿ tóg ãn jãnkã ra tĩ mũ sir, ãn kãra rã jé. Hã ra galo tóg kyr mũ.

69 Hã ra fi tóg tá ti vég mũ gé. Kÿ fi tóg tá nÿtĩ ag mÿ ke mãn mũ sir. “Tá jê ên tóg tÿ ag kã ù jê gé,” he fi tóg, Pedro to.

70 Hã ra tóg: “vó,” he mãn mũ. Kar kÿ tá nÿtĩ ag tóg Pedro mÿ ke mãn mũ. “Ã hÿn tÿ ag kã ù nĩ,” he ag tóg ti mÿ. “Tÿ ã Galiléia tá ke nĩ mÿr,” he ag tóg. “Ã vĩ vÿ tá ke ag vĩ ri ke nĩ,” he ag tóg.

71 Hã ra Pedro tóg ag mÿ: “ãjag tÿ nén tó mũ ên ki kagtĩg sóg nĩ mÿr,” he mũ. “Inh ón mũ ra Topê tóg inh vóg kónãn ke mũ vê, hã kÿ sóg ón ke tũ pé nĩ,” he tóg.

72 Hã ra vêsÿmér galo tóg kyr mãn mũ. Kÿ Pedro tóg Jesus vĩ to jykrén mũ sir, Jesus tÿ ti mÿ nén tó ja ên to, hã vÿ: “iso ã tóg: ti ki kagtĩg sóg nĩ, he ãgtũ han ke mũ, galo kyr régre han to hã,” he mũ. Tag mĩ êkrén kÿ tóg vênh péju kÿ nĩ kÿ fÿ nĩ nĩ sir, Pedro ti. Vãhã tóg ti mÿ e tĩ.

15

Pilatos tÿ Jesus mré vĩ

(Mt 27.1-2, 11-14; Lc 23.1-5; Jo 18.28-38)

1 Tÿ vaj kÿ ag tóg kusã ki Jesus ti jykrén mũ jagnê mré,

Topê tũ ki rĩr tĩ to pã'i ag, kófa ag mré hã, Topê vĩ to professor ag mré hã ke gé, vênh jyvên tĩ kar ên ag. Kÿ ag tóg Jesus mrĩnh kÿ ti pére mũ mũ, Pilatos mÿ ti fêg jé.

2 Kÿ Pilatos tóg ti mÿ: “ã mÿ tÿ Judeu ag pã'i nĩ?” he mũ. Kÿ tóg: “ki hã ã tóg tó mũ,” he mũ, Jesus ti.

3 Hã ra Topê tũ ki rĩr tĩ to pã'i ag tóg ti kato vĩ tÿ hên ri ke han mũ sir.

4 Kÿ Pilatos tóg ti mÿ ke mãn mũ. “Mÿ ã tÿ ag mÿ nén ù tó jãvãnh,” he tóg. “Ha mẽ, ã to ag tóg vĩ kónãn mág kÿ nÿtĩ,” he tóg, Pilatos ti.

5 Hã ra Jesus tóg vĩ mãn tũ nĩ, kÿ tóg Pilatos mÿ e tĩ sir.

Ag tÿ Jesus to: ter jé tóg ke mũ, he

(Mt 27.15-26; Lc 23.13-25; Jo 18.39-19.16)

6 Hã ra Pilatos tóg ag mÿ Vêse ag kar kã ùn pir kavãg tĩ, festa tÿ Páscoa kar ki. Ti jykre vê. Ag tÿ ù to vĩ mũ ên kavãg tóg tĩ.

7 Hã ra ù tóg se kÿ nĩ, ti jijin hã vÿ: Barrabás, he mũ. Vênh génh kutêm ti ag mré tóg se kÿ jê nĩ, vênh génh kÿ ag tóg ù tén ja nĩ, hã kÿ ag tóg nĩgfênh kÿ nÿtĩ.

8 Kÿ vênh kar ên ag tóg Pilatos to mũ mũ sir, ti mÿ: “êg mÿ ã tÿ nén han tĩ ên han nĩ,” he jé.

9 Kÿ Pilatos tóg ag mÿ: “mÿ ãjag mÿ sÿ Judeu ag pã'i kyvãn há?” he mũ.

10 Topê tũ ki rĩr tĩ to pã'i ag tóg véké Jesus to jũ nÿtĩ, hã kÿ ag tóg nén (ũ) tũ to ti se ja nĩ.

Hã ra Pilatos tóg ki kanhró nĩ, hã ky tóg ti kavãn sór mũ.

11 Hã ra Topẽ tũ ki rĩr tĩ to pã'i ag tóg vênh kar ag krĩn ja nĩ, ag tỹ Pilatos mỹ: “Barrabás hã kava ra,” he jé.

12 Kĩ Pilatos tóg ag mỹ ke mãn mũ. “Kỹ sóg ti tỹ hẽ ri kenh mũ, ãjag tỹ ù to: Judeu ag pã'i, he mũ ẽn tỹ?” he tóg.

13 Kĩ ag tóg prẽnprẽn mũ sir. “!..Cruz to ti sã..!” he ag tóg mũ sir, prẽnprẽn kỹ.

14 Kĩ Pilatos tóg ag mỹ: “e ri ken kỹ?” he mũ. “Ti kórég tỹ ne han ti?” he tóg ag mỹ. Hã ra ag tóg prẽn mãn', prẽn mãn' he mũ sir. “!..Cruz to ti sã..!” he ag tóg, prẽnprẽn kỹ.

15 Kĩ Pilatos tóg ag mỹ hã han sór mũ sir, kỹ tóg ag mỹ Barrabás kyvãg mũ sir. Jesus mrãnmrãn tóg mũ sir, mrãn ke jafã tỹ, kỹ tóg ag mỹ ti fẽg mũ sir, ag tỹ ka to ti sa jé.

Soldado ag tỹ Jesus vóg kónãn

(Mt 27.27-31; Jo 19.2-3)

16 Kĩ soldado ag tóg pã'i mág ãn kãra Jesus pére mũ mũ sir, ag vênh jyvẽn jafã ẽn kãra. Kĩ ag tóg soldado kar ag jé prẽn mũ sir.

17 Ti kri ag tóg kur fón mũ, kur kusũg tỹ. Sónh pirĩn kỹ ag tóg ti krĩ tógfĩg mũ sir.

18 Kĩ ag tóg ti mỹ: “viva, Judeu ag pã'i,” he mũ sir, ti nyg kỹ.

19 Kĩ ag tóg vãn tỹ ti krĩ mũ mrãnmrãn mũ sir, ti to ag tóg sugsgũ mũ sir, kỹ ag tóg ti jo grĩnhgrĩnh ke mũ sir, ag tỹ ón kỹ ti to: “Senhor,” hen kỹ.

20 Ag tỹ ti nyg kar ag tóg ti ki kunũg mũ, kur kusũg ẽn ti. Kỹ ag tóg ti kur pẽ tỹ ti kãra rãg mũ sir. Kỹ ag tóg ti pére mũ mũ, ag tỹ cruz to ti san jé.

Jesus tỹ cruz to sa
(Mt 27.32-34; Lc 23.26-43; Jo 19.17-27)

21 Hã ra ù tóg vãnh kãtã kãtĩ mũ, hã vỹ: Cirene tá Simão, he mũ. Alexandre panh vẽ, Rufo panh vẽ gé. Ti tỹ mũ mũ ra ag tóg ti mỹ vĩ tar han mũ, ti tỹ Jesus cruz vyn jé.

22 Kĩ ag tóg Gólgota tá junjun mũ sir ti mré. Gólgota to ken hã vẽ, hã vỹ: vênh krĩ kuka, he mũ ẽg vĩ ki.

23 Kĩ ag tóg ti mỹ vinho ven mũ, Jesus mỹ, ka tỹ mirra jẽnjo grór mré hã, hã ra tóg kron jãvãnh nĩ, vênh kagta ti.

24 Kĩ ag tóg cruz to ti sãg mũ sir. Ti kur tỹ ag tóg jagnẽ mỹ vênh kãpãm mũ sir, to ag tóg jogar he mũ gé, ti kur to, soldado ag.

25 Kusã ki 9 hora vẽ sir, kỹ tóg cruz to ti sãg mũ.

26 Ag tỹ nén tỹ kato vĩ tóg rán kỹ nĩ, hã vỹ: “Judeu ag pã'i tỹ rei vẽ,” he mũ. Ti kri tóg sa, vênh rán ti. Ti tỹ nẽji vêsỹ pã'i tỹ rei han mũ to ag tóg ti tén mũ.

27 Ti kóm ag tóg ùn régre ag tỹ cruz to sãg mũ gé, bandido ag. Û vỹ ti pẽgja tá sa, jó ù vỹ ti jakãnh tá sa.

28 Hã kỹ tóg nén tỹ ã to rán kỹ nĩ ẽn vẽ, hã vỹ: “ag mỹ tóg tỹ ùn jykre pãno ag mré ke nĩ,” he mũ, Topẽ vĩ rán ki. Hã ra tóg ge nĩ.

²⁹ Kÿ ũ tÿ mĩ mũ mũ ag tóg ti nyg' he mũ gé, vÿn vÿn he kÿ. "Ó," he ag tóg mÿ. "ã hã ne tóg: Topê jo ãn kókén jé sóg ke mũ, he gé," he ag tóg. "Kurã tâgtũ ki sóg ũ han mũ, he ã tóg mũ gé," he ag tóg.

³⁰ "Vênh kren han ra kema'. Cruz to kãtére kema'," he ag tóg ti mÿ.

³¹ Ge ag tóg mũ gé, Topê tũ ki rĩr tĩ to pã'i ag, Topê vĩ to professor ag mré. Tĩ nyg ag tóg mũ gé, kÿ ag tóg jagnê mÿ: "ũ krenkren han tóg, hã ra tóg vênh hã kren han ki kagtĩg nĩ," he mũ.

³² "Cristo jé cruz to kãtére kema', Judeu ag pã'i ti', êg tÿ ve jé, êg tÿ ti vĩ kri nĩm jé," he ag tóg. Kÿ bandido ag, ũ tÿ ti kóm cruz to nÿtĩ ên ag tóg ti nyg mũ gé.

Jesus ter

(Mt 27.45-56; Lc 23.44-49; Jo 19.28-30)

³³ Rã tÿ êg nĩno kã sa ra tóg kuty' he mũ sir, ga kar mũ hã. Kÿ kuty ên tóg hora tâgtũ tũg mũ.

³⁴ 3 hora ki Jesus tóg prër mũ sir, jamã hár(a), kÿ tóg: "Eloĩ, Eloĩ, lemá sabactani?" he mũ. Êg vĩ ki êg tóg tag to: "Topê, Topê, ã tÿ ne jé isovãnh nê?" he mũ.

³⁵ Kÿ tá nÿtĩ ũ ag tóg jêmê kÿ (ag tóg) jagnê mÿ: "ha vé, Elias jé tóg prër mũ," he mũ.

³⁶ Kÿ ũ tóg vênhvãg mũ sir, kÿ tóg esponja tÿ vinho prãg mũ, vinho kaja pir tÿ. Ka jurÿn kÿ tóg tÿ kusón kÿ vinho kãra rãg kÿ ti mÿ ven mũ sir, ti tÿ ki ãnh' ãnh' ke jé. "Toreg',"

he tóg. "Hên ri ke mũn Elias kãtĩ mũ, ti kãtérem jé," he tóg.

³⁷ Hã ra Jesus tóg prër mág (pê) han kÿ hun ke mũ sir.

³⁸ Hã ra Topê jo ãn krêm kur tÿ jãnkã nĩfe tóg jaran ke mũ, ti jar tóg vênh kãkym ke kãn mũ sir.

³⁹ Hã ra capitão tóg ti vэг jê nĩ. Ti prër mэг tóg mũ, ti tÿ hun ke ên mэг tóg mũ, kÿ tóg: "vênh vĩ há ja vê," he mũ. "Topê kósin ja vê" he tóg.

⁴⁰ Kÿ ãn tÿtã fag tóg tá nÿtĩ gé. Kuvar há tá nÿtĩ kÿ fag tóg ti vэг nÿtĩ nĩ. Fag kã ũ fi vÿ tóg tÿ Maria Madalena fi nĩ, kÿ ũ fi tóg tÿ Salomé fi nĩ gé, kÿ ũ fi tóg tÿ Maria fi nĩ gé, José mré Tiago sĩ mÿnh tag fi.

⁴¹ ãn tÿtã ên fag tóg ti nón mũ ja nĩgtĩ, ti tÿ Galiléia mũ tĩ mũn kÿ. Tá fag tóg ti ki rĩr ja nĩgtĩ gé. Kÿ ãn tÿtã tÿ hên ri ke fag tóg ti ve kÿ nÿtĩ gé, ti tÿ cruz to sa kÿ, ti mré Jerusalém ra mũ ja ên fag.

Ag tÿ vênh kej tá ti fi

(Mt 27.57-61; Lc 23.50-56; Jo 19.38-42)

⁴² Rãké tóg nÿ ha, nén kar han jé kurã vê sir, hã vÿ: vênhkãn ke jo kurã ên, he mũ.

⁴³ Hã ki Arimatéia tá José tóg Pilatos mÿ ke mũ, ti tÿ ti mÿ Jesus fár fi jé. Arimatéia tá José tóg tÿ vênh jÿvên tĩ ag kã ũ nĩ. Jÿkre kuryj tóg nĩ. Topê tÿ tÿ êg pã'i nĩ ve sór tóg tĩ gé. Ên hã vÿ tóg mũmэг vãnh kÿ Pilatos mÿ Jesus fár to vĩ mũ.

⁴⁴ Kÿ Pilatos tóg: "kÿ ti mÿ ter huri'?" he mũ. Kÿ tóg capitão jé prër kÿ ti mÿ: "ti mÿ

ter huri?" he mǔ, "mỹ vāsỹ?" he tóg.

⁴⁵ Kỹ capitão tóg: "hỹ," he mǔ. "Ter ti huri," he tóg. Kỹ Pilatos tóg José mỹ Jesus fár ti fig mǔ sir.

⁴⁶ Kỹ tóg sir kur kupri kym mǔ, ùn há tǎvĩ. Kỹ tóg Jesus kátérem mǔ. Kur ãn tỹ tóg ti pǎg mǔ. Kỹ tóg vãnh kej kátá ti finh tĩ mǔ sir, pǎró nor kākã. ag tỹ pǎró nor han ja kākã. Kỹ tóg pó tỹ nífénh mǔ sir, ti jy.

⁴⁷ Hã ra Maria Madalena fi tóg vég mǔ sir, ag tỹ ti fi ti, Maria fi mré hã, José mýnh fi.

16

Jesus rĩr mǎn

(Mt 28.1-8; Lc 24.1-12; Jo 20.1-10)

¹ Vãnhkán ke kurã tũg kỹ Maria Madalena fi tóg nén ger há mǎg mǔ, Salomé fi ke gé, Maria fi ke gé, Tiago mýnh ãn fi. Fag tỹ ti fár ger há han sór vê.

² Kỹ semana kurã ve ki fag tóg kusã (pê) ki ti kej ra mǔ mǔ, rã tỹ jun ke kỹ sa ra.

³ Mũn kỹ fag tóg jagnê mỹ: "ũ nỹ hỹn ãg mỹ ti kej ti nón mǔ', tá', pó tỹ nife ãn ti'?" he mǔ.

⁴ Hã ra fag tóg vãnh jo vég mǔ, ti kej tá, hã ra tóg nor nỹ nĩ, pó mág ãn tóg tĩn kỹ nĩ nĩ sir.

⁵ Tá junjun kỹ fag tóg ti kej kãra ge mǔ sir, kỹ fag tóg kátá kyrũ vég mǔ, hã ra tóg ti nỹgja pẽgja tá nĩ nĩ, kur kupri tu kỹ. Kỹ tóg fag mỹ e tĩ, mýr, ha mẽ.

⁶ Kỹ kyrũ ãn tóg fag mỹ: "vãnhmỹ" he tũg," he mǔ. "Ãjag hỹn Jesus jãvãnh mǔ, Nazaré

tá ke ti," he tóg, "ag tỹ cruz to ùn sãg mǔ ãn ti," he tóg. "Rĩr ti jẽ nĩ, tag ki ti tũ nĩ ha," he tóg. "Ag tỹ ti fi ja hã vẽ ha," he tóg.

⁷ "Kur Pedro mỹ tónh mǔ jẽg, ti mré mǔ tĩ kar ag mỹ ke gé," he tóg. "Ag mỹ: ãjag jãmĩ tóg tũg mǔ nẽji, hemnĩ, Galiléia ra, hemnĩ. Tá ãjag ti vãnh mǔ, hã kỹ tóg ãjag mỹ to ja nĩ, hemnĩ," he tóg, fag mỹ, kyrũ ti.

⁸ Kỹ fag tóg ti kej tá fũrũrũn kỹ pa mǔ. Pétê fag tóg sir mǔ mǔ, fag mỹ e tĩn kỹ, fag tỹ jũrũn ke kỹ. Kỹ fag pi(jé) ù mỹ nén ù tó mǔ mýr', fag kanê jur kỹ.

Maria Madalena fi tỹ ti ve
(Mt 28.9-10; Jo 20.11-18)

⁹ Jesus tỹ kusã ki rĩr mǎn kỹ, ti tỹ semana ki kurã ve ãn ki rĩr mǎn kỹ tóg Maria Madalena fi mỹ vãnh ven vén mǔ, ti tỹ ùn ki vẽjagrê kórég tỹ 7 (ke) pan ja ãn fi mỹ.

¹⁰ Kỹ fi tóg tĩ mǔ, ti mré nỹtĩ ag mỹ tó jé, ag fe kaj nỹtĩn kỹ, ag kygfỹ' hen kỹ.

¹¹ Hã ra ag tóg kri nĩm tũ nĩ, fi tỹ ag mỹ kãmén mǔ ra, ti tỹ rĩr nĩ ãn ti, fi tỹ ã tỹ ti ve ja ãn kãmén mǔ ra.

Ûn régre ag tỹ ti ve
(Lc 24.13-35)

¹² Kar kỹ tóg ùn régre ag mỹ vãnh ven mǔ gé sir. Ag mỹ tóg vêsỹ ùn kỹ tĩ nĩ. Ag mǔ ra ag tóg ãpry kri ti vég mǔ.

¹³ Kỹ ag tóg vỹnvỹn ke kỹ (ag tóg) ù tỹ tá nỹtĩ ag mỹ tó mǔ gé sir, Jesus mré mǔ tĩ ù ag mỹ, hã ra ag tóg ag vĩ kri fig tũ nĩ gé.

*Jesus tỹ ã mré mũ tĩ ag mỹ
vẽnh ven*

*(Mt 28.16-20; Lc 24.36-49;
Jo 20.19-23; Hk 1.6-8)*

¹⁴ Vãhã tóg ù tỹ 11 (ke) ag mỹ vẽnh ven mũ gé, ag pin kỹ, ag jêg nỹtĩ ra. Kỹ tóg ag mỹ vĩ tar han mũ, ag tỹ kri nĩm jãvãnh nỹtĩn kỹ, ag tỹ to jykrén tũ nỹtĩn kỹ. “Ăjag hã ne tóg ù tỹ inh vég mũ ên fi vĩ kri fi ja tũ nĩ', ù tỹ inh vég mũ ên ag vĩ kri nĩm ja tũ ãjag nĩ gé,” he tóg. “Ag tỹ inh rĩr mãn vég mũ ra ãjag tóg kri fi ja tũ nĩ,” he tóg.

¹⁵ Kỹ tóg ag mỹ: “ga kri mũ kỹ êmã kar mĩ vẽnh vĩ sér kãmén nĩ, Topẽ tỹ há(r) ag kar mỹ,” he mũ.

¹⁶ “Û tỹ ãjag vĩ kri fig mũ ên ag vĩ krenkren ke mũ, ù tỹ inh ki ge kỹ kygpe kỹ nỹtĩ ên ag vĩ krenkren ke mũ,” he tóg. “Hã ra ù tỹ kri fig tũ ên vĩ kren ke tũ nĩ, ù tỹ inh ki rã tũ ên vĩ kren ke tũ nĩ,” he tóg, Jesus ti.

¹⁷ “Û tỹ inh ki ge mũ ên ag vĩ milagre venh ke mũ inhhã,” he tóg. “Tag ve jé ag tóg ke mũ, ha mẽ. Vẽnh jagrê kórég pan jé ag tóg ke mũ, ijykre tỹ,” he tóg. “Ûn vĩ ù ag vĩ tó jé ag tóg ke mũ,” he tóg.

¹⁸ “Ag tỹ kejẽn pỹn kãgmĩg mũ ra, ag tỹ kejẽn veneno kron mũ ra tóg ag tỹ hẽ ri kenh ke tũ nĩ,” he tóg. “Ûn kaga ag mẽgmẽ jé ag tóg ke mũ gé, ag nĩgé tỹ, kỹ ag tóg sir ag tỹ há' henh ke mũ,” he tóg, Jesus ti.

¹⁹ Jesus tỹ ã mré mũ tĩ ag mỹ tag tó kar kỹ tóg kanhkã ra tãpry mũ sir, kỹ tóg tá jun kỹ (tóg) Topẽ pẽgja tá nĩ mũ.

²⁰ Kỹ ag tóg mũ mũ sir, êmã kar mĩ hã, ti mré mũ tĩ ag. Kỹ ag tóg tugtó mũ, vẽnh vĩ sér ên ti, kỹ êg Senhor tóg ag mré han tĩ nĩ, ag vĩ kóm tóg vẽnh kar tỹ nén han vãn ên hyn han mũ. Hã vẽ.

*Jesus tỹ ã jóg ra tĩg
(Lc 24.50-53; Hk 1.9-11)*

LUCAS TÛ RÁ

¹ Lucas tÛ rá vë. Sÿ ã mÿ rán vë, Teófilo'. Û tÿ hën ri ke ag vÿ to jykrén, ag tÿ kãmén jé, ãg tÿ Jesus to nén ki kanhró nÿtÿ ên ti, Topë tÿ ti jënë ja ên ti, kÿ ag tóg rán huri.

² Û tÿ ti vég mÿ ag tóg ãg mÿ kãmén ja nÿgtÿ, ù tÿ ti vÿ tó tÿ ag, ù tÿ ti mré mÿ ja ên ag. Ên ag tÿ nén tó rán ag tóg huri, ù ag.

³ Kÿ sóg vãhã rán to jykrén mÿ gé sir, ha mē. Jesus kãme mē kãn ja inh nÿ ha, ti mur mré hã, kÿ sóg ti tÿ nén han mÿ mē kãn gé. Hã kÿ sóg ã mÿ Jesus kãme rán mÿ sir. Komēr hã sóg rán kãn sór mÿ.

Tÿ ã tóg pã'i mág nÿ, Teófilo'.

⁴ Mē ã huri, Jesus kãme ti. Sÿ ã mÿ rán vë, ã tÿ ti tÿ ki hã tó ja mën jé sir.

João Batista mur ke tó

⁵ Kejën Herodes tóg tÿ Israel ag pã'i mág tÿ rei nÿ, ga tÿ Judéia tá. Kÿ Topë tÿ ki rÿr tÿ ù tóg nÿ nÿ, ti jiji hã vÿ: Zacarias, he mÿ. Ti jóg'jóg ve jyjyn hã vÿ: Abias, he mÿ. Arão krë'krë ù vë, Abias ti. Semana pir ki tóg Topë tÿ ki rÿr tÿgtÿ, Abias ti. Ti semana ki ti krë'krë tÿ Zacarias ên tÿ ki rÿr vë, ti tÿ tÿ Abias krë'krë nÿn kÿ.

Prÿ ti nÿ, Zacarias ti, kÿ ti prÿ fi jiji hã vÿ: Isabel, he mÿ. Arão krë'krë fi vë gé, Isabel fi.

⁶ Ên fag vÿ vënh jykre kuryj han tÿ, kÿ fag jykre vÿ kuryj nÿtÿ, Topë mÿ. Ti vÿ ki króm fag tóg tÿ, ãg Senhor vÿn ki.

Ti tÿ ãg jyvën han fag tóg tÿ, kygnë sór tÿ fag tóg nÿgtÿ.

⁷ Hã ra fag krë tóg tÿ tÿ. Kurÿ fi tóg nÿ, Isabel fi, hã kÿ fag tóg krë tÿ nÿtÿ. Krë tÿ nÿtÿ ki fag tóg kófa nÿtÿ ha.

⁸ Kejën Zacarias tóg ã semana pétëm mÿ sir, ti tÿ Topë tÿ ki rÿr jé. Kÿ tóg cidade tÿ Jerusalém ra tÿ mÿ, Topë tÿ ki rÿr jé. Tá jun kÿ ag tóg jogar he mÿ, ag tÿ ù tÿ Topë mÿ ger há pÿn ke mÿ ên ve jé, incenso ên ti.

⁹ Ag jykre vë, ag tÿ to jogar he sór ti. Ag tÿ to jogar hen kÿ tóg tÿ Zacarias nÿ sir, kÿ tóg Topë jo ãn kãra rã mÿ sir, ti mÿ pÿn jé, ger há ên ti.

¹⁰ Ti tÿ Topë jo ãn krëm pÿn kÿ vënh kar tóg re tá nÿtÿ nÿ, Topë mré vÿn kÿ. Zacarias tÿ Topë mÿ pÿn kÿ ag tóg Topë mré vÿ nÿtÿ nÿ, re ki, ùn e ên ag.

¹¹ Kÿ tóg ti mÿ pÿn mÿ sir. Kÿ Topë tÿ jënë jafã vÿ ti mÿ vënh ven mÿ. Topë mÿ ger há pÿn jafã vÿ tá jë nÿ, ãn kãtã. Mesa ên pëgia tá tóg jë nÿ, Topë tÿ jënë jafã ti.

¹² Zacarias tÿ ti ve kÿ tóg jÿrÿn ke mÿ. Ti mÿ tóg e tÿ, ti tÿ ti ven kÿ.

¹³ Hã ra tóg ti mré vÿ mÿ, Topë tÿ jënë jafã ti. Kÿ tóg ti mÿ: “Zacarias,” he mÿ. “Kamëg tÿg nÿ,” he tóg. “Topë vÿ ã tÿ ti mÿ nén to vÿ mÿ ên mē, kÿ tóg ã mÿ han ke mÿ ha. Fi kufyg jé ã tóg ke mÿ, ã prÿ fi, Isabel fi. Fi tÿ ti ve kÿ tóg gré nÿnh mÿ, ã kósin ti, ha vemni,” he tóg, Topë tÿ jënë jafã ti. “Kÿ ã tÿ ti jyjy han kÿ: João, hemni,” he tóg mÿ.

14 “Kỹ tóg ã mÿ sér tĩnh mũ. Æ fe tóg mrin kenh mũ. Æ tÿ hẽn ri ke ag mÿ tóg há tĩnh mũ, fi tÿ ti ven ký.

15 Topê vÿ ti tÿ ùn mág han ke mũ. Vinho vóg ke tũ tóg nĩ, goj fa vóg ke tũ tóg nĩ gé. Ti vãkre vê. Topê kuprĩg vÿ tÿ ti jagrê nĩnh mũ, fi tÿ ver ti vég tũ ki.

16 Israel ag mÿ tóg Topê vĩ tónh mũ, ký ù tÿ hẽn ri ke ag vÿ ti vĩ mẽ ký kri fi ký ãjag jykre tovãnh ke mũ. Topê jykre hã han jé.

17 Æg Senhor jo tóg tĩg ke mũ gé. Vãsÿ Topê vĩ tó tĩ tÿ Elias jykre han jé tóg ke mũ. Elias vÿ Topê kuprĩg tÿ jagrê ja nĩgtĩ, ký tóg jykre tar han ja nĩgtĩ. Æn jykre han jé tóg ke mũ. Æ kósın tag tÿ ag jyvẽn ký ag panh tóg ãjag krê mré vẽn jykre pir han ke mũ. Æ tÿ Topê vĩ mranh tĩ Æn tóg vẽn jykre kuryj han sór ke mũ gé, ù tÿ Topê vĩ ki króm tĩ Æn ri ke. Hã ki tóg vẽn kar jykre tÿ há' henh ke mũ, ag kugrynh ký, Æ kósın tag ti. Topê mÿ tóg ag jykre tÿ há' henh mũ, Cristo tÿ kãtĩg ken jo, ag tÿ ti jãvãnh jé,” he tóg mũ, Topê tÿ jẽnê jafã ti, Zacarias mÿ.

18 Ký Zacarias tóg ti mÿ: “hã ra sóg kófa nĩ ha,” he mũ. “Kar inh prũ fi vÿ kófa nĩ gé, inh mré. Ký inh hÿn hẽ ri kenh mũ? Inh mÿ tá krÿg mũ vÿ?” he tóg.

19 Ký Topê tÿ jẽnê jafã tóg ti mÿ: “tÿ sóg Gabriel nĩ,” he mũ. “Topê nĩgja tá inh jẽgtĩ. Hã ra tóg inh jẽnê, sÿ Æ mré vĩ jé, sÿ Æ mÿ vẽn vĩ sér tag tó jé,” he

tóg.

20 “Ha vé, vĩ vãnh nĩ jé Æ tóg ke mũ ha, ha vemnĩ. Vĩ vãnh nĩ ki Æ tóg isÿ Æ mÿ nén tó mũ kurã Æn pétẽm ke mũ. Æ hã ne tóg sÿ Æ mÿ vĩ kri nĩm tũ nĩ'. Ti kurã ki Æ tóg venh mũ, sÿ Æ mÿ nén tó ja ti. Æ tÿ inh vĩ kri fig tũ nĩnh ký Æ tóg vĩ vãnh nĩnh mũ ha,” he tóg, Topê tÿ jẽnê jafã ti.

21 Hã ra vẽn kar Æn tóg re tá nÿtĩ nĩ, Zacarias jãvãnh ký. Ag mÿ tóg e tĩ, ti kãkutẽ vãn han ký, Topê jo ĩn kãtã.

22 Vãhã tóg kãkutẽ mũ, hã ra tóg sir vĩ vãn jẽ. Ký tóg ag mÿ ven mũ, Æ nĩgé tÿ. Hã ki ag tóg ki kanhrãn mũ sir, ti tÿ nén nẽ ve ja Æn ti, Topê jo ĩn kãtã.

23 Ti vĩ vãn nĩn ki ti rãnhraj tóg kejẽn tũ' he mũ sir, ti tÿ Topê tũ ki rĩr Æn ti. Ký tóg Æ ĩn ra tĩ mũ sir.

24 Ti tÿ Æ ĩn tá jun kar ký ti prũ fi tóg kejẽn kufyg mũ sir, Isabel fi. Ký fi tóg vẽn pēju ký nĩ nĩ sir, fi mÿ sér tĩnh ký. Kysã tÿ 5 (ke) han fi tóg, vẽn pēju ký nĩ ki.

25 “Topê hã ne inh jagãgtãn,” he fi tóg mũ. “Inh ve tóg, ký tóg inh mÿ'ãg tÿ tũg' hé. Inh kurĩ to fag tóg: “Topê hÿn fi to kórég nĩ,” he ja nĩgtĩ. Hã ra tóg fag vĩ tÿ tũg' hé, Topê ti,” he fi tóg mũ. Hã ký fi tóg kufyg mũ sir, Æ kósın vãn (hã) ra.

Jesus mur ke tó

26 Fi kufy nĩ ki kysã tÿ 6 vẽn sir, ký Topê vÿ Æ tÿ jẽnê jafã jẽnẽg mũ, ti tÿ Jesus mur ke tónh tĩg jé, Gabriel Æn ti. Ký tóg ga tÿ Galiléia ra tĩ mũ, cidade tÿ Nazaré ra.

27 Tá tátãg ù fi tóg nĩ nĩ. Ûn mén ja tũ fi vễ. Fi jijin hã vỹ: Maria, he mũ. Fi mén ken hã vỹ: José, he mũ. Davi krê'krê ù vễ, José ti, fi mén ke ên ti.

28 Fi hã mỹ tóg vễnh ven mũ sir, Gabriel ti, kỹ tóg fi mỹ: “ã mỹ há?” he mũ. “Topê vỹ ã jagãgtãn, kỹ tóg ã vэг mũ,” he tóg mũ.

29 Fi tỹ ti ve kỹ fi tóg jũrũn ke mũ. Ti vĩ tóg fi mỹ e tĩ, kỹ fi tóg to jykren mũ sir, ti vĩ to. “Ti tỹ ne tó nễ, hỹn?” he fi tóg mũ, to jykren kỹ.

30 Kỹ Topê tỹ jẽnẽ jafã tóg fi mỹ: “kamẽg tũg ra,” he mũ. “Topê vỹ ã jagãgtãn mỹr,” he tóg.

31 “Ha vé, kufyg jé ã tóg ke mũ,” he tóg. “Kỹ ã tóg kósin ke mũ. ã tỹ ti jyjyn kỹ ti mỹ: Jesus, hemnĩ,” he tóg, Topê tỹ jẽnẽ jafã ti, fi mỹ.

32 “Tỹn ùn mág jẽnẽ ke mũ, ã kósin tag ti, kỹ ag tóg ti to: ù tỹ kynhmỹ nĩ ên kósin, henh ke mũ. Kỹ ẽg jóg tỹ Topê vỹ ti tỹ pã'i mág han ke mũ, vãsỹ ti jóg'jóg ve tỹ Davi jẽgja kã.

33 Kỹ tóg tỹ pã'i nĩ sir, Jacó krê kar to pã'i. Ti tỹ tỹ pã'i nĩ tag vỹ tũ' henh ke tũ nĩ. Tỹ pã'i han kỹ tóg nĩ nĩ,” he tóg, Gabriel ti.

34 Kỹ fi tóg ti mỹ: “hã ra sóg ù mré nỹ ja tũ nĩ ver,” he mũ. “Kỹ inh hẽ ri kenh mũ?” he fi tóg ti mỹ.

35 Kỹ tóg fi mỹ: “Topê kuprĩg vỹ ã kri tĩnh mũ,” he mũ, “kỹ ti kãnhvэг vỹ ã kri tĩnh mũ gé, kỹ tóg ã jykre tỹ ã kósin ti han ke mũ, Topê ti. Hã kỹ ag tóg ti to: Topê tũ, henh ke mũ, ã tỹ

ùn venh ke ên to. Topê kósin, he jé ag tóg ke mũ, ti to.

36 Ha vé, ã mré ke fi vỹ kufy nĩ, Isabel fi. Ûn gré ve jé fi tóg ke mũ. ã kófa (hã) ra fi tog kufy nĩ. Kysã tỹ 6 (ke) han fi tóg huri, kufy nĩ ki. Fi to ãjag tóg: kurĩ fi tóg nĩ, he tĩ vễ, hã ra fi tóg kufy nĩ ha.

37 Topê hã ne nén kar han há nĩ', hã kỹ tóg fi mỹ han. Kỹ tóg ã mỹ han ke mũ gé, sỹ ã mỹ tó mũ tag ti,” he tóg, Gabriel ti.

38 Kỹ fi tóg ti mỹ: “há ti nĩ,” he mũ. “Tỹ sóg Topê camarada nĩ mỹr, ti tũ pẽ. Kỹ tóg inh mỹ há tĩ, ã tỹ inh mỹ tó mũ tag ti,” he fi tóg ti mỹ. Kỹ tóg ti mũ sir, Topê tỹ jẽnẽ jafã ti.

Maria fi tỹ Isabel fi venh tĩ

39 Ti tĩg kar kỹ Maria fi tóg tĩ mũ gé sir, Isabel fi jamã ra. Pãnónh e tá tóg nĩ, fi jamã ti, ga tỹ Judéia tá. Fi tỹ ra tĩg kỹ fi tóg fũrũn tĩ mũ.

40 Fi tỹ Zacarias ãn tá jun kỹ fi tóg Isabel fi mỹ: “ã mỹ há?” he mũ.

41 Kỹ Isabel fi tóg fi vĩ mẽg mũ, kỹ fi kósin tóg vo mũ, fi kãki. Kỹ Topê kuprĩg vỹ fi krĩn mũ.

42 Kỹ fi tóg prẽr mũ. “Topê tóg ã ve há han, fag kar kãmĩ tóg ã kuprẽg,” he fi tóg fi mỹ. “Kỹ Topê vỹ ã kósin ve há han mũ gé, ã tỹ ùn venh ke ti.

43 Inh Senhor mỹnh fi hã ne tóg inh venh kãtĩ mũ', kỹ tóg inh mỹ e tĩ,” he fi tóg fi mỹ.

44 “Ha vé, isỹ ã vĩ mẽ kỹ inh kósin tóg vo ja nĩ, inh kãki. Ti mỹ tóg sér tĩ, ã vĩ ti.

45 Ā hã ne tóg Topê vĩ kri fi', ti tỹ ã mỹ vãnh vĩ jẽnẽn kỹ. Hã kỹ tóg ã ve há han, Topê ti. Ā tỹ ti vĩ kri nĩm kỹ ã tóg venh ke mũ, ti tỹ ã mỹ nén tó ja ti," he fi tóg, Isabel fi, Maria fi mỹ.

Maria fi jãn

46 Kỹ Maria fi tóg ke mũ gé. "Topê mỹ sóg vĩ há han sór mũ," he fi tóg. "Inh mỹ tóg tỹ ùn mág nĩ, ěg Senhor ti.

47 Kỹ inh fe tóg mrin ke mũ, isỹ tỹ Topê tũ nĩn kỹ, isỹ tỹ ěg kren han tĩ ěn tũ nĩn kỹ.

48 Inh ki tóg ěvãnh mỹr. Tỹ sóg ti camarada nĩ. Tỹ sóg ùn sĩ nĩ, hã ra tóg inh ki ěvãnh. Kỹ vãnh kar tóg iso: "Topê vĩ fi ve há han," henh ke mũ, inh krẽ'krẽ kar ke gé, ěprã ke krẽ kar ke gé.

49 Topê hã ne inh mỹ ěg tỹ nén han vãnh han'. Tar ti nĩ, Topê ti, hã kỹ tóg han, inh mỹ. Jykre kuryj ti nĩ, Topê ti, kỹ ti jiji tóg ěg mỹ mẽ há ti.

50 ěg jagãgtãn tóg nĩgtĩ, ěg jóg'jóg ve ag ke gé, ěg panh ag ke gé, ěg ke gé, ěg krẽ kar ke gé. Ủ tỹ ti kamẽg mũ kar jagãgtãn tóg nĩgtĩ mỹr, ha mẽ.

51 Jykre (ka)mẽ tóg nĩ, kỹ tóg ěg tỹ nén han vãnh hyn han tĩ. Ủ tỹ: "vėsóg ki inh nén kar han tĩ," he mũ ěn ag jykre tỹ tóg tũg' henh ke mũ," he fi tóg.

52 "Pã'i mág ag tỹ tóg ùn kãsir han, Topê ti. Kỹ tóg ùn kãsir ag tỹ ùn mág han.

53 Ủn jagãgtar ag fónfan tóg mũ, nén ù há tỹ, ù tỹ ti vĩ mẽ sór mũ ag. Ủn rico ag mỹ tóg: "ha mũ jẽg," hé, kỹ tóg ag

mỹ nén ù nĩm tũ nĩ, kỹ ag tóg jagãgtar nỹtĩ ha, ù tỹ ti vĩ mẽ jãvãnh ěn ag.

54 Israel ag jagãgtãn tóg mũ, ã camarada ag, ã tỹ vãsỹ ag jagãgtãn tĩ ěn to jykrén kỹ. ěg hã vễ, ěg jagãgtãn tóg.

55 ěg jóg'jóg ve ag mỹ tóg tó ja nĩ, Abraão mỹ, ti krẽ ag mỹ ke gé, ti tỹ ěg jagãgtãn ke ti. Kỹ tóg ã vĩ ěn to jykrén kỹ han, ti tỹ vãsỹ nén tó ja ti. Ti tỹ ěg jagãgtãn ke ěn tóg tũg' he jãvãnh nĩ," he fi tóg, Maria fi. Fi tỹ Topê mỹ vĩ há han hã vễ.

56 Kar fi tóg kysã tãgtũ han mũ sir, Isabel fi mré, kỹ fi tóg ã jamã ra vỹn ke mũ sir.

João Batista mur

57 Fi tũg kar Isabel fi vỹ fi kósin venh ke kurã pětẽm mũ sir, kỹ fi tóg vég mũ. Hã ra tóg gré nỹ, fi kósin ti.

58 Kỹ fi rã nỹtĩ fag vỹ vég mũ, fi kanhkã fag ke gé. Topê tỹ fi jagãgtãn mẽg fag tóg mũ. Kỹ tóg fag mỹ sér tĩ sir, fi mré, fi kósin to.

59 Kurã tỹ 8 (ke) ki ag tóg fi tá junjun mũ, ag tỹ ti gré junun fár kym jé. Kỹ ag tóg ti jyjy to jykrén mũ gé, hã vỹ: Zacarias, he mũ. Ti panh jiji tó sór ag tóg mũ, ti mỹ.

60 Hã ra ti mỹnh fi tóg: "vó," he mũ. "João, he jé tóg ke mũ, ti jyjy ti," he fi tóg mũ.

61 Kỹ ag tóg fi mỹ: "ã kanhkã jiji tũ vễ hã ra," he mũ.

62 Kỹ ag tóg ti panh ki jẽmẽ sór mũ. Ājag nĩgé tỹ ag tóg ti mỹ: "ti jyjy hỹn hẽ ri kenh mũ?" he mũ, ti panh mỹ, ag nĩgé tỹ.

63 Kÿ tóg ki rán jafã to vî mũ, Zacarias ti, kÿ tóg rán mũ. “Ti jijin hã vÿ: João, he mũ,” he tóg, vênh rán ki. Kÿ tóg ag mÿ e tĩ sir.

64 Kÿ vãhã ti vî tóg punh ke mũ. Ti nũnẽ tóg krónh ke mũ, kÿ tóg vî mũ sir, Topẽ mÿ vî há han tóg mũ, ti mÿ sér tĩn kÿ.

65 Kÿ fag rã nÿtĩ kar vÿ kamêg mũ. Kÿ vênh vî ên tóg vênh kar kri rũm mũ, ga tÿ Judéia kar mĩ hã. Vênh kar tóg tÿ vémén kãn mũ.

66 Kÿ ù tÿ mêg mũ fag vÿ to jykrén mũ. “Gĩr tag hÿn hẽ ri kenh mũ,” he fag tóg mũ. Topẽ vÿ ti ki rĩr há han, hã kÿ tóg fag mÿ e tĩ.

Zacarias tÿ Topẽ mÿ vî há han

67 Kÿ Topẽ kuprĩg vÿ ti panh tÿ Zacarias krĩn mũ, kÿ tóg tag tó mũ, ha mẽ.

68 “Tÿ ti ùn mág jẽ, êg povo tÿ Israel kri, êg Senhor ti, hã vÿ: Topẽ, he mũ. Êg ki tóg êvãnh nĩgtĩ, Topẽ ti, ti tÿ ti tũ ag krenkren han jé. Êg hã vÿ tÿ ti tũ nÿtĩ,” he tóg.

69 “Ti camarada tÿ Davi krẽ'krẽ ên vÿ êg krenkren han ke mũ, êg tÿ ti vî jêmẽn kÿ. Ûn mág pẽ vẽ, Davi krẽ'krẽ ên ti. Topẽ tÿ êg mÿ nén han hã vẽ.

70 Hã kÿ tóg tó ja nĩ, vãsÿ. Ti vî tó tĩ ag vÿ tugtó ja nĩ, vãsÿ, êg si ag, ti tũ ag.

71 Û tÿ hẽn ri ke ag vÿ êg kato tẽgtẽ mũgtĩ, hã ra tóg êg krenkren han mũ, ag to, ù tÿ êg to kórég tãvĩ nÿtĩ ag to.

72 Ti tÿ êg jóg'jóg ve ag mÿ tó ja ên han ja tóg nĩ, êg jagãgtãn kÿ, Topẽ ti. Ag mré jykrén ja

tóg nĩ, Topẽ ti. Ên to jykrén ja tóg nĩ, kÿ tóg ki króm ja nĩ sir, Topẽ ti.

73 Êg jóg'jóg ve tÿ Abraão mÿ tóg vênh vî mág han ja nĩ, Topẽ ti.

74 Kÿ tóg ti mÿ: “ag krenkren han jé sóg ke mũ, ã krẽ ag, ag kato tẽgtẽ mũ ag to, ha vemnĩ,” he ja nĩ. “Sÿ ke há vẽ. Sÿ ag krenkren han kÿ ag tóg sir jatun mÿ isũ han ke mũ, mũmêg tũ nĩn kÿ,” he ja tóg nĩgtĩ, Topẽ ti.

75 “Nén ù vênhmÿ han ke tũ ag tóg nĩgtĩ, kurã kãtig ke mũ ên kã. Vênh jykre kuryj tãvĩ han jé ag tóg ke mũ, isũ han kÿ. Ag tÿ ga kri mũn kÿ ag tóg han ke mũ, isũ ti. Kurã kar ki ag tóg sir inh jykre hã han ke mũ,” he ja tóg nĩgtĩ, Topẽ ti, Abraão mÿ,” he tóg, Zacarias ti.

76 Kÿ tóg ã kósin mÿ: “ha vé, vÿ,” he mũ. “Sĩ ã tóg nĩ ver. Û tÿ kynhmÿ nĩ ên vî tó jé ã tóg ke mũ, kÿ ag tóg ã to: “Topẽ vî tó ti tĩ,” henh ke mũ. “Êg Senhor jo ã tóg tĩnh mũ, ã tÿ ti japry kure ri ke han jé, ã tÿ ti jamĩn kurynh ri ke han jé, ã tÿ vênh kar mÿ Topẽ vî tón kÿ,” he tóg.

77 “Ag kanhrãn jé ã tóg ke mũ, Topẽ tÿ êg krenkren han sór ên to. Êg tÿ ti vî mranh tÿ tóg êg mÿ vênh pãte fón ke mũ, hã ki tóg êg krenkren han ke mũ, Topẽ ti,” he tóg, Zacarias ti.

78 “Topẽ tÿ êg jagãgtãn hã vẽ, ti tÿ êg to há tãvĩ nĩn kÿ. Êg ve jé tóg kãtig ke mũ, kÿ tóg rã tÿ jun ke ri ke nĩ, Cristo mur

ke ti.

⁷⁹ Kuty ri ke ti nĩ, ěg mỹ, ěg tỹ ti ki kagtĩg nỹtĩn kỹ. Ti kãtĩg kỹ tóg ěg mỹ kurã ri ke nĩ sir. Kãgter jé ěg tóg ke mũ, kỹ tóg ěg mỹ kuty ri ke nỹ sir. Hã ra tóg ěg mỹ ã japry ven ke mũ, ã jamĩn ti. Jagma mũn kỹ ěg tóg ti jykre kusa venh ke mũ,” he tóg, Zacarias ti. Ti tỹ ã kósin mỹ tón hã vē.

⁸⁰ Hã kỹ fi tóg João ve ja nĩ, ti han mũ fag tỹ kófa (hã) ra. Kỹ tóg mog mũ sir, kỹ tóg tar jé sir. Krĩ há tóg nĩ gé. Ěmã tũ mĩ tóg tĩ mũ ver, ã kurã tỹ tá krỹg ki. ã kurã ki tóg Israel ag mỹ vēnh ven mũ, ag mỹ Topě vĩ kãmén jé.

2

Jesus Mur (Mt 1.18-25)

¹ João mur kar kỹ ga kri pã'i mág tỹ imperador tỹ Augusto vỹ kejĕn vēnh vĩ jĕnĕg mũ, vēnh kar ag tỹ ãjag jyjy rán mũ jé. Ga kri mũ kar ag mỹ tóg vēnh vĩ ěn jĕgnĕg mũ, pã'i mág tỹ Augusto ti.

² Vĕnh jiji rá ve vē, ge han ja tũ ag nỹtĩ. Cirĕnio vỹ tỹ ga tỹ Sírĩa kri pã'i tỹ governador nĩ, Augusto tỹ vēnh vĩ ěn jĕnĕg mũn kã. Tỹ tóg Augusto krĕm ke nĩ, Cirĕnio ti. Ti tỹ tỹ pã'i nĩn kỹ ag tóg sir ãjag jyjy ránrán vén mũ.

³ Kỹ ag tóg mũ kãn mũ, ãjag jóg'jóg ve ag jamã ja ra. Tá ag tóg ãjag jiji rá vin mũ sir.

⁴⁻⁵ Kỹ José tóg tĩ mũ gé, ã prũnh ke fi mré, hã vỹ: Maria, he mũ. Cidade tỹ Nazaré tá fag tóg pa mũ, ga tỹ Galilĕia tá.

Kỹ fag tóg ga tỹ Judĕia ra mũ mũ, cidade tỹ Belém ra. Davi krĕ'krĕ vē, José ti, hã kỹ tóg Belém ra tĩ mũ, ã jyjy rá nĩmjé. Davi jamã ja vē, Belém ti. Hã kỹ tóg ra tĩ mũ. Kỹ ti prũnh ke fi vỹ ti mré tĩ mũ, hã ra fi tóg kufy jagy nĩ.

⁶ Fag tỹ tá nỹtĩ ki fi tóg ã kurã pétĕm mũ.

⁷ Kỹ fi tóg ã kósin vég mũ sir. Gré ti nỹ, fi kósin ve tag ti. Kỹ fi tóg ti pãg kỹ koso kãkã ti fig mũ. Ěn vỹ funfór nỹtĩ, hã kỹ fag tóg vēnh mĕg jo ěn krĕm nỹtĩ ja nĩgĩ.

Mé ki rĩr tĩ ag

⁸ Kỹ ũ tỹ mé ki rĩr tĩ ag vỹ tá nỹtĩ gé, carneiro ki rĩr tĩ ag. Ag japỹ ja tá ag nỹtĩ, ãjag mĕg ki rĩr jé, kuty ěn kã.

⁹ Kỹ vãhã Topě tỹ jĕnĕ jafã vỹ ag mỹ vēnh ven mũ, kanhkã tá. Topě tỹ jĕngřĕ vỹ ag kri rũm ke mũ. Kỹ ag tóg kamĕg kỹ jũrũn ke mũ sir.

¹⁰ Kỹ Topě tỹ jĕnĕ jafã tóg ag mỹ: “kamĕg tũg ra,” he mũ. “Sỹ ãjag mỹ nĕn ũ tónh ke vē. Vĕnh vĩ há tó jé sóg ke mũ, kỹ tóg ãjag mỹ sér tĩnh mũ. Vĕnh kar vỹ mĕnh mũ, inh vĩ ti, povo kar, kỹ ag fe tóg mrin ke mũ sir.

¹¹ ãjag krenkren han tĩ vỹ ũri mur, hã vỹ: Cristo, he mũ. Ěg Senhor vē ha mỹr. Davi jamã ja tá tóg mur mũ.

¹² Ha mũ jĕg, ãjag tỹ gĩr ěn ve jé. Koso kãkã tóg pãg kỹ nỹ nĩ. Hã ki ãjag tóg ti ki kanhró nỹtĩnh mũ,” he tóg ag mỹ, Topě tỹ jĕnĕ jafã ti.

13 Kÿ vāhā ũ tÿ hēn ri ke ag tóg vēnh ven mŭ sir. Topē tÿ jēnē jafā ag, kanhkā tãn ag. Ēn ag vÿ Topē mÿ vĭ há han mŭ.

14 “Topē vÿ tÿ ũn mág pē nĭ,” he ag tóg mŭ. “Kynhmÿ ti nĭ, vēnh kar kãfór ti nĭ, kÿ ěprã ke ag vÿ jatun mÿ nÿtĭ, ãjag krĭ kusa tĭn kÿ, Topē tÿ ũ tó há ag,” he ag tóg mŭ.

15 Kar ag tóg tŭg' he mŭ sir, ag tÿ kanhkā ra mŭn kÿ.

Ag tÿ tŭg' hen kÿ ũ tÿ carneiro ki rĭr tĭ ag vÿ jagnē mÿ: “mŭ nÿ, Belém ra, ěg tÿ ve jé, Topē tÿ nén han ja ti, ěg Senhor tÿ ěg mÿ vēnh vĭ jēnē ja ěn ti,” he mŭ.

16 Kÿ ag tóg fŭrŭnrŭn mŭ mŭ sir. Tá ag tóg junjun mŭ. Kÿ ag tóg vég mŭ, Maria fi, José ti ke gé, gĭr ti ke gé. Koso kãkã tóg nÿ nĭ, Maria fi kósin ěn ti.

17 Hã kÿ ag tóg vég mŭ. Hã kÿ ag tóg kãmén mŭ, vēnh kar mÿ. Topē tÿ ag mÿ vēnh vĭ jēnē ja ěn kãmén ag tóg mŭ, gĭr ěn to.

18 Kÿ tóg ũ tÿ mēg mŭ ag mÿ e tĭ sir. Ũ tÿ mé ki rĭr tĭ ag vĭ mēg ag tóg mŭ, kÿ tóg ag mÿ sér tĭ.

19 Kÿ Maria fi tóg vēnh vĭ tag to jykrén mŭ gé sir. Fi pi(jé) kã jatun mŭ', ag tÿ nén tó ja ěn ti. To jykrén kÿ fi tóg nĭ nĭ, Maria fi.

20 Kÿ carneiro ki rĭr tĭ ag tóg sir ãjag mēg to vÿnvÿn ke mŭ gé. Topē mÿ ag tóg vĭ há han mŭ. “Ti hã ne tóg ěg mÿ vēnh vĭ jēnē ja nĭ', ã tÿ jēgnē jafā ag tÿ', kÿ ěg tóg vé,” he ag tóg mŭ sir, Topē to.

Fag tÿ Jesus jĭjin

21 Kar kurã tÿ 8 (ke) vÿ tŭg mŭ. Kÿ tóg ti gré junun fár kym ke kurã pétēm mŭ sir, gĭr sĭ ěn ti. Kÿ fag tóg ti jĭjin kÿ ti mÿ: “Jesus,” he mŭ. Topē tÿ jēnē jafā vÿ ti jygy tag tó ja nĭ, ti mÿnh fi tÿ ver ti tÿ kufyg tŭ ra. Hã kÿ fag tóg sir tÿ ti jĭjin mŭ.

Fag tÿ Topē mÿ Jesus ven

22 Kejēn fag vãkre tóg tá krÿg mŭ, kÿ fag tóg vēnh kykŭnh sór mŭ. Moisés vÿ tag rán ja nĭ, gĭr mur kar kÿ fag tÿ vēnh kykŭnh ke ti. Judeu ag jykre hã vē. Fag tÿ vēnh kykŭnh jé fag tóg cidade tÿ Jerusalém ra mŭ mŭ, fi tÿ Topē mÿ ã kósin ven jé, tá. “Ā tŭ vē,” he sór fag tóg mŭ, Topē mÿ, fi kósin ěn to.

23 Topē vĭ ki tag vÿ rán kÿ nĭ, hã vÿ: “fi kósin ve tÿ gré nÿn kÿ tóg tÿ ěg jóg mág tÿ Topē tŭ nÿ,” he mŭ, Topē vĭ tÿ rán kÿ nĭ ki.

24 Hã kÿ fag tóg Topē jo ĩn ra mŭ mŭ, Topē mÿ nén ũ pŭn jé. Rán kÿ tóg nĭ nĭ, ěg jóg mág vĭn ki, fag tÿ ne tÿ ti mÿ pŭn ke ti, hã vÿ: sórãg régre, ke tŭ nĭ kÿ ton régre, he mŭ gé. Ēn ma fag tóg mŭ mŭ, fag tÿ Topē mÿ pŭn jé. Topē tŭ ki rĭr tĭ ag mÿ fag tóg vin tĭ, sórãg ti, kÿ ag tóg tãnh kÿ Topē mÿ pŭn tĭ.

25 Kÿ Jerusalém tá ũ tóg nĭ nĭ, ti jygy hã vÿ: Simeão, he mŭ. Ũn jykre kuryj vē, Simeão ti. Topē kamēg tóg tŭgtĭ, Topē kuprĭg tÿ tóg jagrē nĭ. Topē tÿ Israel ag krenkren han mŭ ěn jãvãnh tóg nĭgtĭ, Simeão ti.

26 Kŷ Topě kuprĩg vŷ ti mŷ: “Cristo ve jé ã tóg ke mũ, ã ter ke to hã, ěg Senhor tŷ ti jĕnĕn kŷ,” he ja nĩgtĩ ti mŷ.

27 Topě kuprĩg tŷ ti krĩn kŷ tóg kejĕn Topě jo ĩn kãra tĩ mũ. Kŷ tóg tá jĕ nĩ, hã ra fag tóg Jesus ma kãmũ mũ, fag tŷ Topě mŷ sórãg pũn jé, Moisés tŷ Judeu ag mŷ nĕn tó ja ti.

28 Ā tŷ Jesus ve kŷ tóg ti vãg mũ sir, kŷ tóg ti to Topě mŷ vĩ há han mũ, Simeão ti.

29 “Ēg jóg mág,” he tóg, Topě mŷ. “Vãhã ã tóg inh jé prĕr ke mũ, kŷ sóg jatun mŷ tĩg mũ ha,” he tóg. “Ā tŷ inh mŷ nĕn tó jan han ã tóg huri,” he tóg.

30 “Ve inh huri, ã tŷ ěg krenkren han ke mũ ti. Cristo ve inh huri,” he tóg, Simeão ti.

31 “Vĕnh kar rĩnve ã tóg han, ã tŷ ěg krenkren han ke mũ ti.

32 Kŷ tóg ěg mŷ jĕngrĕ ri ke nĩ, Cristo mur ti. Kŷ povo kar vŷ vég mũ, fóg ag kar, kanhgág ag kar ke gé, ã tŷ ag krenkren han ke mũ ti. Ēg povo tŷ Israel tŷ ã tóg ũn mág han huri, vĕnh kar rĩnve, Cristo tŷ ěg mré ke nĩn kŷ,” he tóg, Simeão ti, Topě mŷ.

33 Kŷ Jesus jóg vŷ ti vĩ mĕg mũ, Jesus mŷnh fi ke gé, kŷ tóg fag mŷ e tĩ, ti tŷ Jesus to nĕn tó mũ ěn ti.

34 Kŷ Simeão vŷ fag mŷ vĕnh vĩ há tó mũ gé. “Topě vŷ ãjag ve há han mũ,” he tóg mũ fag mŷ, Simeão ti. Kŷ tóg Maria fi mŷ: “ha vé,” he mũ. “Israel tŷ hĕn ri ke ag vŷ ti tugrĩn mũ há han ke mũ, jãvo ũ tŷ hĕn ri ke ag vŷ ti tugnĩn mũ kónãn ke

mũ gé. Kŷ ag tóg ti kato vĕnh ke mũ gé, Topě tŷ ti jĕnĕ ja ra.

35 Kŷ ã tóg ti tugrĩn vĕsŷrĕnh kenh ke mũ, jŷ, kŷ tóg rógro tŷ ã fe tŷ gynh ke ri ke nĩnh ke mũ, ã vĕsŷrĕnh ke ti. Kŷ ěg tóg venh ke mũ, ag tŷ nĕn to ti to jykren mũ ti,” he tóg, Maria fi mŷ, Simeão ti.

36 Kŷ ũ fi tóg tá nĩ gé, Topě jo ĩn krĕm, fi jiji hã vŷ: Ana, he mũ. Topě vĩ tó tĩ fi vĕ gé. Fanuel kósin fi vĕ. Kŷ fi jóg'jóg ve vŷ tŷ Aser nĩ. Kófa fi nĩ ha, kófa tãvĩ. Ā mén kŷ fi tóg 7 anos han, fi mén mré, kar tóg ter ja nĩ, fi mén ti, fi mré 7 anos han kar.

37 Kar fi tóg mén tũ tĩ nĩ sir. 84 anos han fi tóg, mén tũ tĩ ki. Ēn fi vŷ Topě jo ĩn krĕm nĩ nĩ, kurã kar ki fi tóg tá nĩ nĩ sir. Tá fi tóg Topě tũ han nĩgtĩ, ti mré vĩ kŷ. Jĕg tũ fi nĩgtĩ, fi tŷ Topě mré vĩ jé. Kuty tá fi tóg ke tĩ, kurã tá ke gé.

38 Ēn fi vŷ hora ěn kã Topě jo ĩn krĕm jĕ mũ, Simeão tŷ Jesus ven kŷ. Kŷ fi tóg Jesus vég mũ gé sir, Ana fi. Ti ve kŷ fi tóg Topě mŷ vĩ há han mũ. “Inh mŷ tóg há tĩ, sŷ ti ven kŷ,” he fi tóg mũ, Topě mŷ. Vĕnh kar mŷ fi tóg tó mũ, ũn krenkren sór mũ ag mŷ, Jerusalém tá.

Fag tŷ Nazaré ra vŷn ke

39 Kŷ fag tóg sir Moisés tŷ vĕnh kykũnh to nĕn rán ja ěn han kãn mũ sir, Jesus mŷnh fi, Topě tŷ Judeu fag mŷ vĕnh jykre nĩm ja ěn ti. Kar kŷ fag tóg sir cidade tŷ Nazaré ra vŷnvŷn ke mũ, ga tŷ Galiléia ra, fag jamã ra ke vĕ sir.

40 Kÿ gÿr sÿ ên tóg mog mũ sir, komêr hã tóg tar jê sir. Kÿ tóg vênh kanhrãn há han mũ, kÿ Topê vÿ ti ve há han mũ gé, hã kÿ tóg vênh kanhrãn mág mũ sir, ùn sÿ ên ti.

Jesus tÿ ã pir mÿ Topê jo ãn tá nÿ

41 Jesus mÿnh fag tóg prÿg kar ki Jerusalém ra mũ tí, fag tÿ festa tÿ Páscoa venh mũ jé. Fag jykre hã vê.

42 Jesus tÿ 12 anos han kÿ tóg fag mré tí mũ gé, fag tÿ festa ên venh mũn kÿ, Jerusalém ra.

43 Festa tÿ tú ken kÿ fag tóg vÿnvÿn ke mũ, hã ra Jesus tóg Jerusalém tá nÿ nÿ. Hã ra fag tóg ki kagtÿg nÿtÿ, ti tÿ Jerusalém tá nÿ ên ki.

44 Kÿ fag tóg: “ti hÿn ù tÿ êg mré kãmũ mũ fag mré vyr, êg jo,” he mũ. Kÿ fag tóg kurã pir ki mũ mũ, fag jamã ra vÿnvÿn ke kÿ. Fag tÿ ãjag mré ke fag tá junjun kÿ fag tóg ti jãvãnh mũ, ãjag to há kar fag kãmĩ.

45 Hã ra fag tóg tá Jesus vég tú nÿ. Kÿ fag tóg Jerusalém ra vÿnvÿn ke mãn mũ gé, ti jãvãnh jé.

46 Vãhã fag tóg ti vég mũ, kurã tãgtũ tú kÿ. Topê jo ãn krêm tóg nÿ nÿ, professor ag mré. Ag vÿ mæg tóg nÿ nÿ, kÿ tóg ag ki jêmæg mũ gé, “ne nê?” hen kÿ.

47 Û tÿ ti vÿ mæg mũ ag mÿ tóg e tí. To jykren há han tóg, Jesus ti, kÿ tóg ag mÿ tó há han mũ. Ag tÿ ti vÿ mæg kÿ tóg ag mÿ e tí, professor ag mÿ.

48 Ti mÿnh fag tÿ ti ve kÿ tóg fag mÿ e tí gé sir. Kÿ ti mÿnh fi

tóg ti mÿ: “inh kósin’,” he mũ. “Ã tÿ tag kã ne han nÿ nê”? ã jóg mré sóg ã jãvãnh jagy han. ã jãvãnh to êg tóg kanê jur, êg tÿ ã vég tú nÿn kÿ,” he fi tóg ti mÿ.

49 Hã ra tóg fi mÿ: “ã tÿ ne jé inh jãvãnh ja nê?” he mũ. “Hê ri ken kÿ hÿn’?” he tóg. “Inh panh pê ãn krêm sóg nÿ nÿ mÿr, kÿn mÿ ãjag mÿ vênhmÿ?” he tóg, ã mÿnh fag mÿ.

50 Hã ra tóg fag tÿ to jykren tú tí, fag kósin vÿ to.

51 Kÿ tóg fag mré tí mũ, cidade tÿ Nazaré ra. Tá tóg fag mré nÿ nÿ sir, ti tÿ fag vÿ jêmên kÿ. Kÿ ti mÿnh fi pi(jé) vênh vÿ kar tag kã jatun nÿ’.

52 Kÿ Jesus tóg mog mũ sir. Krÿ há tãvÿ tóg nÿ. Topê vÿ ti ve há han mũ gé. Kÿ tóg vênh kar mÿ há tí sir, ag tÿ ti jykre ven kÿ.

3

João Batista ti

(Mt 3.1-12; Mc 1.1-8; Jo 1.19-28)

1 Kejên tóg Tibério tÿ pã'i mág tÿ imperador nÿ kri 15 anos han mũ. Ti tÿ Roma tá tÿ pã'i mág nÿ ên kã Pôncio Pilatos vÿ tÿ ga tÿ Judéia kri pã'i tÿ governador nÿ, Tibério krêm. Ên kã Herodes vÿ tÿ Galiléia kri pã'i tÿ governador nÿ gé, Tibério krêm. Herodes jãvy tÿ Filipe vÿ tÿ ga tÿ Ituréia tá pã'i tÿ governador nÿ gé, ga tÿ Traconites tá ke gé, Tibério krêm. Jãvo Lisânias vÿ tÿ ga tÿ Abilene tá pã'i tÿ governador nÿ, Tibério krêm.

² Ĕn kã Caifás vỹ tỹ Topẽ tũ ki rĩr tĩ ag pã'i mág nĩ, Anás mré hã. Kỹ vãhã Topẽ vỹ João mré vĩ mũ sir, Zacarias kósin ěn mré. Ĕmã tũg ja mĩ tóg tĩ mũ, João ti. Kỹ Topẽ tóg ti mỹ: “ha Israel ag mỹ vẽn ven tũg,” he mũ.

³ Kỹ tóg sir tĩ mũ. Goj tỹ Jordão jagma tóg tĩ mũ. Tĩg kỹ tóg vẽn kar jyvẽn mũ, kỹ tóg ag mỹ: “ã kype jé sóg ke mũ, ã tỹ ã jykre kórég tovãnh sór kỹ, Topẽ tỹ ã tỹ ti vĩ mranh tỹ ã mỹ vẽn pãte fón jé,” he tóg mũ sir, vẽn kar mỹ.

⁴ João tóg rán kỹ nĩ, vãsỹ. Topẽ vĩ tó tĩ tỹ Isaías vỹ João to tag rán ja nĩ, ha mẽ: “ẽmã tũg ja tá tóg jẽn ke mũ, ga kórég tá,” he ja tóg nĩ, Isaías ti. “Tá tóg ag mỹ tónh ke mũ. “Ĕg Senhor kãtĩg ke jo vẽn jãnhkrigkrig nĩ,” he jé tóg ke mũ. “Ĕpry kurég ãjag tóg tĩ, ěmĩn kurynh ãjag tóg tĩ, ãjag chefe jun ken kỹ. Kỹ tag ri ke han nĩ, ãjag jykre pãno togvãnh kỹ, ěg Senhor kãtĩg ken jo.

⁵ Ti kãgnó tỹ ãjag tóg kyjer' he tĩ, kar ãjag tóg ěpry sór kar kũm ke tĩ gé, ěmĩn sór ti. Ti jonjor kugrynh kãn ãjag tóg tĩ, ti sunsór vãvãm kãn ãjag tóg tĩ gé, ãjag tỹ ěpry han kỹ, ěmĩn han kỹ. Kỹ tag ri ke han nĩ, ãjag jykre kórég to.

⁶ Hã kỹ ěprã ke kar vỹ venh ke mũ, Topẽ tỹ ěg krenkren han ke ti,” he jé tóg ke mũ, kỹ vẽn kar vỹ ti vĩ mẽnh mũ,” he ja tóg nĩ, Isaías ti, João to.

⁷ Hã kỹ João tóg sir ag jyvẽn mũ sir, ag tỹ ti venh kãmũn

kỹ, ti tỹ ag kygpe jé. E tãvĩ ag nỹtĩ, ũ tỹ ti venh kãmũ mũ ag. Ag jyvẽn kỹ tóg ag mỹ: “pỹn ri ke ãjag tóg nỹtĩ, ãjag jykre pãno tãvĩ nĩn kỹ,” he mũ. “Ũ nỹ ãjag mỹ: “Topẽ jũ venh ke tũ ãjag nĩ,” he tĩ’?

⁸ Ĥjag jykre si togvãnh ra, ãjag tỹ ti jũ ve jãvãnh tĩn kỹ. Vẽn jykre há han ra, ěg tỹ ãjag jykre tãg ve jé. Hã ra ãjag tóg jagnẽ mỹ: “Abraão vỹ tỹ ěg jóg'jóg ve nĩ,” he mũ, “kỹ Topẽ hỹn ěg to jũnh ke tũ nĩ, ěg tỹ tỹ Abraão krẽ'krẽ nỹtĩn tugrĩn,” he ãjag tóg tĩ. Hã tũ vẽ hã ra. Ĥjag jykre kórég ěn to ãjag tóg jagtar ke mũ, ha vemnĩ. Topẽ vỹ Abraão krẽ'krẽ hyn han ki kanhró nĩ, pó tag tỹ mỹr, ti tỹ Abraão krẽ'krẽ ve sór kỹ, Topẽ ti.

⁹ Hã ra tóg ãjag tỹ tũ' henh ke mũ, ãjag tỹ ãjag jykre kórég tovãnh tũ nĩn kỹ,” he tóg, João ti.

“Ĕg tỹ ka gỹn ri ke tóg nĩ. Ti kanẽn vãnh nĩn kỹ ěg tóg ti gỹn tĩ, tỹ pĩ han jé. Tag ri ke han jé tóg ke mũ, Topẽ ti, ãjag mỹ, ãjag tỹ vẽn jykre há han tũ nĩn kỹ. Kỹ tóg pĩ ki ãjag vãm ke mũ, Topẽ ti,” he tóg ag mỹ, João ti.

¹⁰ Kỹ ũn e ag tóg ti ki jẽmẽn kãmũ mũ sir, João ki. Kỹ ag tóg ti mỹ: “kỹ ěg hỹn hẽ ri kenh mũ ha, Topẽ jykre han jé?” he mũ.

¹¹ Kỹ tóg ag mỹ: “ã kur régre nĩn kỹ ã kur pir nĩmĩn, ũn kur tũ ěn mỹ,” he mũ. “Ã jẽn tỹ ũn kókĩnkĩr ag mỹ vẽn kãpópãm nĩ gé,” he tóg.

12 Kĩ ù tỹ governo mỹ im-
posto kaja mǎg tĩ ag vỹ João to
kāmũ mũ gé, ti tỹ ag kygpe jé.
Kỹ ag tóg ti mỹ: “professor’,”
he mũ. “Ëg hỹn hẽ ri kenh
mũ?” he ag tóg mũ gé.

13 Kĩ João tóg ag mỹ: “pǎ'i
mág tỹ ãjag mỹ nén tó mũ ãn
hã ri ke mǎn nĩ, jǎnkamy ti,” he
mũ. “Ker ti kǎfór mǎn sór hẽ’,”
he tóg ag mỹ.

14 Kĩ soldado ag vỹ tá jun-
jun mũ gé. “Kỹ ãg hỹn hẽ ri
kenh mũ?” he ag tóg mũ gé
sir, soldado ag. Kĩ tóg ag mỹ:
“ag tũ mǎn sór tũg nĩ,” he mũ.
“Ag to vǎsǎn ãjag tóg tĩ, ù to ón
ãjag tóg tĩ gé, ãjag tỹ ag jǎnkamy
ve jé. Ke tũg nĩ. ãjag rǎnhrǎj
to ãjag tóg jǎnkamy vég tĩ. Ti
kǎfór mǎn sór tũg nĩ,” he tóg,
João ti, soldado ag mỹ.

15 Kĩ vãnh kar ag tóg ti to
jykrén mũ, João to. “Ti mỹ tỹ
Cristo tũ nĩ vỹ?” he ag tóg mũ
sir ti to. João to ag tóg ke mũ,
ag tỹ Cristo kǎtĩg jǎvǎnh kỹ.

16 Kĩ João tóg ag mỹ: “inh
pi(jé) tỹ Cristo nĩ’,” he mũ.
“Goj hã tỹ sóg ãjag kygpég tĩ.
Inh nón tóg kǎtĩg mũ, Cristo ti,
ha mẽ. Inh kǎfór ti nĩ. Sỹ tỹ
ti camarada nĩnh ke vẽ vẽ, sỹ
ti pẽn né kunũ jé, ti pẽn to ró
ti. Hã ra sóg tỹ ti krẽm pẽ jẽ.
Ën vỹ tóg Topẽ kuprĩg jẽnẽnh
ke mũ, ti tỹ tỹ ãjag jagrẽ nĩ jé,
kỹ tóg pĩ jẽngrẽ ri ke nĩ. Ti tỹ
ãjag kygpenh ken hã vẽ,” he
tóg, João ti. mũ, ti tỹ tỹ ãjag
jagrẽ nĩ jé, kỹ tóg pĩ jẽngrẽ ri
ke nĩ. Ti tỹ ãjag kygpenh ken
hã vẽ,” he tóg, João ti.

17 “Ti kǎtĩg vỹ tỹ ãg tỹ rǎgró
rẽn ri ke nĩ. Ti rẽn kar kỹ

ẽg tóg ti fár vǎm tĩ, ãg tỹ pǎjó
kuprǎg jé. Ti kanẽ há vin han
ẽg tóg tĩ. Ti fár pũn ãg tóg tĩ.
Cristo kǎtĩg kỹ tóg ri ke nỹ. ù
tỹ ã to há ag mỹ tóg: “ha kāmũ
jẽg,” henh ke mũ. ù tỹ ã to
kórég ag vǎm jé tóg ke mũ, pĩ
ki, hã ra tóg nhyn kenh ke tũ
pẽn nĩ,” he tóg, João ti.

18 Hã kỹ tóg vãnh kar mỹ
Topẽ vĩ sér tó mũ, ag jyvẽn kỹ,
João ti.

19 Kĩ tóg pǎ'i mág tỹ
Herodes jyvẽn mũ gé, ti prũ
fi to, hã vỹ: Herodias fi, he
mũ. Tỹ fi ti jǎvy prũ ja nĩ, hã
ra tóg fi péju kỹ fi tỹ prũg mũ,
Herodes ti. Nén ù vẽnhmỹ e
han tóg tĩ, hã kỹ João tóg ti
jyvẽn mũ.

20 Kar tóg sir nén ù vẽnhmỹ
ù han mǎn mũ gé, Herodes ti.
João ség tóg mũ, ti tỹ ti jyvẽn
to.

*João tỹ Jesus kype
(Mt 3.13-17; Mc 1.9-11)*

21 Hã ra tóg kǎgmĩ kỹ jẽ tũ nĩ
ver, João ti. Kĩ tóg ag kygpe
kǎn mũ. Kỹ tóg kejẽn Jesus
kypég mũ gé. Kỹ Jesus tóg jẽ
nĩ, ti tỹ Topẽ mré vĩn kỹ, João
tỹ ti kype kar kỹ. Kỹ vǎhã
kanhkã tóg nor' he mũ.

22 Kỹ Topẽ kuprĩg vỹ
kanhkã tá kǎtère mũ, ti kri.
Tỹ sórǎg ve ti nĩ, Topẽ kuprĩg
ti. Kỹ kanhkã tá vãnh vĩ tóg
mẽ há tĩ, kỹ tóg: “tỹ ã inh kósin
pir jẽ, tỹ ã tóg inh fe pẽ jẽgtĩ’
he mũ, vãnh vĩ ti, Topẽ ti.

*Jesus jóg'jóg ve ag
(Mt 1.1-17)*

23 Jesus vỹ 30 anos han mũ,
ti tỹ vãnh kar mỹ Topẽ kámén
ve ki. “José kósin vẽ,” he ag tóg

tĩ ti to, hã ra tóg tỹ ti kósin tũ
nĩgtĩ. Eli kósin vẽ, Jesus ti, kỹ
Eli ên vỹ tỹ ti vovô nĩ.

²⁴ Eli vỹ tỹ Matate kósin nĩ.
Matate vỹ tỹ Levi kósin nĩ.
Levi vỹ tỹ Malqui kósin nĩ.
Malqui vỹ tỹ Janai kósin nĩ.
Janai vỹ tỹ José kósin nĩ.

²⁵ José vỹ tỹ Matatias kósin
nĩ. Matatias vỹ tỹ Amós kósin
nĩ. Amós vỹ tỹ Naum kósin nĩ.
Naum vỹ tỹ Esli kósin nĩ. Esli
vỹ tỹ Nagai kósin nĩ.

²⁶ Nagai vỹ tỹ Maate kósin
nĩ. Maate vỹ tỹ Matatias kósin
nĩ. Matatias vỹ tỹ Semei kósin
nĩ. Semei vỹ tỹ José kósin nĩ.
José vỹ tỹ Joda kósin nĩ.

²⁷ Joda vỹ tỹ Joanã kósin
nĩ. Joanã vỹ tỹ Resa kósin nĩ.
Resa vỹ tỹ Zorobabel kósin nĩ.
Zorobabel vỹ tỹ Salatiel kósin
nĩ. Salatiel vỹ tỹ Neri kósin nĩ.

²⁸ Neri vỹ tỹ Melqui kósin
nĩ. Melqui vỹ tỹ Adi kósin
nĩ. Adi vỹ tỹ Cosã kósin nĩ.
Cosã vỹ tỹ Elmadão kósin nĩ.
Elmadão vỹ tỹ Er kósin nĩ.

²⁹ Er vỹ tỹ Josué kósin nĩ.
Josué vỹ tỹ Eliézer kósin nĩ.
Eliézer vỹ tỹ Jorim kósin nĩ.
Jorim vỹ tỹ Matate kósin nĩ.
Matate vỹ tỹ Levi kósin nĩ.

³⁰ Levi vỹ tỹ Simeão kósin
nĩ. Simeão vỹ tỹ Judá kósin nĩ.
Judá vỹ tỹ José kósin nĩ. José
vỹ tỹ Jonã kósin nĩ. Jonã vỹ tỹ
Eliaquim kósin nĩ.

³¹ Eliaquim vỹ tỹ Meleá
kósin nĩ. Meleá vỹ tỹ Mena
kósin nĩ. Mena vỹ tỹ Matata
kósin nĩ. Matata vỹ tỹ Natã
kósin nĩ. Natã vỹ tỹ Davi kósin
nĩ.

³² Davi vỹ tỹ Jessé kósin nĩ.

Jessé vỹ tỹ Obede kósin nĩ.
Obede vỹ tỹ Boaz kósin nĩ.
Boaz vỹ tỹ Sala kósin nĩ. Sala
vỹ tỹ Nassom kósin nĩ.

³³ Nassom vỹ tỹ Aminad-
abe kósin nĩ. Aminadabe vỹ
tỹ Admim kósin nĩ. Admim
vỹ tỹ Arni kósin nĩ. Arni vỹ
tỹ Esrom kósin nĩ. Esrom vỹ
tỹ Peres kósin nĩ. Peres vỹ tỹ
Judá kósin nĩ.

³⁴ Judá vỹ tỹ Jacó kósin nĩ.
Jacó vỹ tỹ Isaque kósin nĩ.
Isaque vỹ tỹ Abraão kósin nĩ.
Abraão vỹ tỹ Tera kósin nĩ.
Tera vỹ tỹ Nacor kósin nĩ.

³⁵ Nacor vỹ tỹ Seruque
kósin nĩ. Seruque vỹ tỹ Ragaú
kósin nĩ. Ragaú vỹ tỹ Faleque
kósin nĩ. Faleque vỹ tỹ Éber
kósin nĩ. Éber vỹ tỹ Sala kósin
nĩ.

³⁶ Sala vỹ tỹ Cainã kósin nĩ.
Cainã vỹ tỹ Arfaxade kósin nĩ.
Arfaxade vỹ tỹ Sem kósin nĩ.
Sem vỹ tỹ Noé kósin nĩ. Noé vỹ
tỹ Lameque kósin nĩ.

³⁷ Lameque vỹ tỹ Me-
tusalém kósin nĩ. Metusalém
vỹ tỹ Enoque kósin nĩ.
Enoque vỹ tỹ Jarete kósin nĩ.
Jarete vỹ tỹ Maleleel kósin nĩ.
Maleleel vỹ tỹ Cainã kósin nĩ.

³⁸ Cainã vỹ tỹ Enos kósin nĩ.
Enos vỹ tỹ Sete kósin nĩ. Sete
vỹ tỹ Adão kósin nĩ. Adão vỹ
tỹ Topê tỹ há nĩ. Jesus jóg'jóg
ve ag hã vẽ.

4

*Jesus tỹ Topê vĩ mranh tũ
(Mt 4.1-11; Mc 1.12-13)*

¹ Kỹ Topê kuprĩg vỹ tỹ Jesus
jagrê nĩ. Kỹ Jesus vỹ goj tỹ
Jordão tá vỹn ke mũ, ã kype kỹ

jĕn kŷ. Ti tŷg kŷ Topĕ kuprŷg vŷ ti krŷn mŷ.

² Kŷ tóg ti tŷ ti krŷn kŷ ěmã tŷg ja ra tŷ mŷ sir, ga kórég ra. Tá tóg kurã tŷ 40 (ke) han mŷ, ěmã tŷg ja ki. Kŷ Japo vŷ ti tŷ ã jóg vŷ mranh han sór mŷ, tá, hã ra Jesus tóg ke tŷ nŷ. ěmã tŷg ja tá nŷn kŷ tóg jĕg tŷ nŷ, kurã tŷ 40 ěn ki. Kar kŷ tóg sir kókŷr mŷ.

³ Ti kókŷr nŷn kŷ Japo vŷ ti mŷ vŷ mŷ. “Tŷ ã Topĕ kósin nŷ mŷr,” he tóg. “Ã tŷ tŷ Topĕ kósin nŷn kŷ pó tag tŷ ěmŷ han nŷ, ã tŷ kon jé,” he tóg ti mŷ, Nén-Kórég ěn ti, Jesus mŷ.

⁴ Kŷ Jesus tóg ti mŷ: “hã ra tag tóg rán kŷ nŷ, ha mĕ,” he mŷ. “Ěmŷ tãvŷ jamĕn kŷ ěg rŷnrŷr tŷ nŷtŷ, Topĕ vŷ jamĕn kŷ ěg rŷnrŷr nŷtŷ. Hã kŷ tóg sŷ ti vŷ mranh jãvãnh tŷ, ěmŷ to,” he tóg, Jesus ti, Nén-Kórég ěn mŷ.

⁵ Kŷ Japo vŷ ti mré tãpry mŷ. Kŷ tóg ti mŷ mundo ven kãn mŷ, ũ tŷ kri ke kar ag ke gé. Ven pir ki tóg ti mŷ ven kãn mŷ.

⁶ Kŷ tóg ti mŷ: “isŷ vĕ mŷr,” he mŷ, Japo ti. “Ã mŷ sóg tovãnh kãn sór mŷ, ã tŷ tŷ vĕnh kar tag ag pã'i jĕ jé. Kŷ ti sŷnvŷ tag kar vŷ tŷ ã tŷ nŷnh mŷ. Isŷ vĕ mŷr, ũ tŷn han ja ěn tŷ inh mŷ: “té,” hen kŷ. Kŷ sóg sŷ ũn kuprĕg mŷ ěn mŷ vin tŷ sir.

⁷ Ā hã mŷ sóg tovãnh sór mŷ ha, ã tŷ inh krĕm grŷnh ken kŷ, ã tŷ iso: “Topĕ vŷ tŷ ã nŷ,” hen kŷ,” he tóg, Nén-Kórég ti, Jesus mŷ.

⁸ Kŷ Jesus tóg ti mŷ: “tag vŷ rán kŷ nŷ, ha mĕ,” he mŷ.

“Ěg pã'i tŷ Topĕ hã krĕm ěg tóg ěg jakrŷ tŷ krŷ' he tŷ, ti hã to ěg tóg: Topĕ vĕ, he tŷ,” he tóg, Topĕ vŷ tŷ rán kŷ nŷn ki. Hã kŷ sóg mranh jãvãnh nŷ,” he tóg, Jesus ti, Nén-Kórég mŷ.

⁹ Kŷ Japo tóg ti mré tŷg mãn mŷ, cidade tŷ Jerusalém ra. Tá tóg ti mŷ: “Topĕ jo ĩn kri jĕmŷnŷ, ti krŷ kri,” he mŷ. Kŷ tóg ke mŷ. Hã ra kãgnó tóg tá nŷ, Topĕ jo ĩn jo. Japo tóg Jesus mŷ: “Topĕ kósin vŷ tŷ ã nŷ,” he mŷ. “Kŷ hŷm hemnŷ.

¹⁰ Tag vŷ rán kŷ nŷ, ha mĕ: “ã tŷ jĕnĕ jafã ag mŷ tóg tónh mŷ, Topĕ ti, kŷ ag tóg ã ki rŷr ke mŷ.

¹¹ Ā jag nŷgé tŷ ag tóg ã vyn ke mŷ, kŷ ã tóg rŷj ke tŷ nŷ. Ā pĕn vŷ rŷj ke tŷ nŷ gé, hã jé ag tóg ã ki rŷr ke mŷ,” he tóg, Topĕ vŷ tŷ rán kŷ nŷ ěn ki. Kŷ jatun mŷ hŷm nŷ,” he tóg, Nén-Kórég ti, Jesus mŷ.

¹² Kŷ Jesus vŷ ti mŷ ke mŷ gé. “Kŷ tag vŷ rán kŷ nŷ gé, ha mĕ,” he tóg. “Topĕ mŷ: ã mŷ ã tŷ nĕn tó ja ěn han mŷ vŷ? he tŷg nŷ,” he tóg mŷ gé, Topĕ vŷ tŷ rán kŷ nŷ ěn ki. Hã kŷ sóg Topĕ hã tŷ inh mŷ nĕn tó mŷ ěn han ke mŷ, kŷ sóg hŷm ke tŷ nŷ, ti tŷ inh mŷ tó tŷ nŷn kŷ,” he tóg, Jesus ti, Nén-Kórég mŷ.

¹³ Kŷ Japo vŷ ã tŷ nĕn tónh ke ěn tó kãn ja nŷ, hã kŷ tóg Jesus tovãnh mŷ ver, ti tŷ kurã ũ kã ti mré vŷ mãn jé, kejĕn, ti tŷ ti mŷ há tŷ ve nŷn kŷ, Japo mŷ.

Jesus tŷ Galilĕia tá ag kanhrãn

(Mt 4.12-17; Mc 1.14-15)

¹⁴ Kŷ Jesus tóg tŷ mŷ sir, Topĕ kuprŷg tŷ ti krŷn kŷ. Ga tŷ

Galiléia ra tóg tĩ mũ. Kĩ vėnh kar ti kãme mẽ kãn mũ sir, ga ẽn tá ke kar ag.

¹⁵ Kĩ tóg ag kanhrãn mũ sir, Jesus ti, ag vėnh kanhrãn jafã krēm. Krēm ag tóg Topẽ vĩ tó tĩ, Judeu ag. Jesus tỹ ag kanhrãn kĩ tóg ag mỹ e tĩ, ti vĩ ti. Hã kĩ ag tóg ti to vĩ há han mũ sir.

*Jesus tỹ Nazaré ra vỹn ke
(Mt 13.53-58; Mc 6.1-6)*

¹⁶ Kĩ Jesus tóg Nazaré tá jun mũ gé, ã jamã tá. Tá tóg mog ja nĩ, cidade tỹ Nazaré tá. Kĩ tóg ã tỹ nén han tĩ ẽn han mũ. Ag vėnh kanhrãn jafã ra tóg tĩ mũ, vėnh kán ke kurã ki. Tá tóg sir jėgnẽ mũ, culto ki, ag vėnh mãn kĩ nỹtĩ ẽn ki. Ti tỹ Topẽ vĩ to ke sór vė, há kĩ tóg jėgnẽ mũ, Jesus ti.

¹⁷ Ti jẽ kĩ ag tóg ti mỹ livro nĩm mũ, Isaías tỹ rán ja ẽn ti, vãsỹ Topẽ vĩ tó tĩ tỹ rán ja ẽn ti. Kĩ tóg livro tỹ vym ke mũ. Kĩ tóg ã tỹ to ke sór mũ ẽn vėg mũ, Isaías tỹ tó ja ti, ha mẽ.

¹⁸ “Topẽ kuprĩg vỹ inh krĩn mũ,” he tóg. “Inh jagrẽ vė mỹr, há kĩ tóg inh krĩn mũ. “Ûn jagãgtar ag mỹ inh vĩ tómnĩ,” he tóg inh mỹ. Inh jėnėg tóg mũ, isỹ ùn sigse kĩ nỹtĩ ag kygvãn jé, isỹ ùn kyvó ag tỹ ėvãnh (há) han jé, isỹ ag tỹ ùn vóg kónãn mũ ag ki rĩr há han jé, ag jatu nỹtĩ jé,

¹⁹ isỹ vėnh kar mỹ: “Ûri ẽg jóg mág vỹ ẽg kren han sór mũ,” he jé,” he tóg, Isaías ti, vėnh rá ki. Hã to ke tóg mũ, Jesus ti.

²⁰ Tag to ke kar kĩ tóg livro ẽn kri tỹ tam ke mãn mũ.

Livro ki rĩr tĩ ẽn mỹ tóg jun mũ, livro ti. Kĩ tóg nĩ mũ sir.

Hã ra vėnh kar ag tóg ti ki ėvãnh mũ.

²¹ Kĩ tóg ag mỹ kãmén mũ, kĩ tóg: “vãsỹ rán kĩ nĩ ja tag mẽ ãjag tóg,” he mũ. “Ûri ke vė, ùri ãjag tóg vėg mũ, vãsỹ rán kĩ nĩ ja ẽn ti,” he tóg. “Inh há to tóg tag tó ja nĩ, Isaías ti,” he tóg, Jesus ti.

²² Ag tỹ ti vĩ mẽ kĩ tóg ag mỹ e tĩ sir. “Ki há tóg tó mũ, há kĩ tóg ẽg mỹ e tĩ,” he ag tóg mũ. Kĩ ag tóg ti to vĩ mũ gé. “José kósin vė mỹr, ẽg mré ke ẽn, há ra tóg ẽg vĩ kãfór han sór mũ,” he ag tóg mũ ti to.

²³ Kĩ Jesus tóg ag mỹ: “ãjag hỹn iso jykrén sór mũ,” he mũ. “Médico mỹ ẽg tóg: “kur vėsỹ há’ hé, ã tỹ tỹ médico nĩ sór nĩn kĩ,” he tĩ. ãjag hỹn tag tó sór mũ inh mỹ. ãjag hỹn inh mỹ: “cidade tỹ Cafarnaum tá ã tóg ag tỹ há’ hé, ùn kagyga ag tỹ, kĩ kur tag ki ẽg tỹ há’ hemnĩ gé, ã jamã tag ki, ã tỹ vėnh kar tỹ há’ he sór nĩn kĩ,” he sór ãjag hỹn mũ inh mỹ,” he tóg, Jesus ti.

²⁴ Kĩ tóg ag mỹ: “ti jamã tá ke ag ne tóg Topẽ vĩ tó tĩ ẽn to é he tĩ,” he mũ. “Ti tỹ ke há vė. Hã kĩ ãjag tóg iso é he tĩ,” he tóg ag mỹ, Jesus ti.

²⁵⁻²⁶ “Ha mẽ, sỹ nén tó mũ ti. Elias to jykrén nĩ. Ti tỹ ga kri tĩ mũ kĩ tóg ta kutẽ vãnh han ja nĩgtĩ, prỹg tãgtũ kri kysã tỹ 6 (ke) ki. Kĩ tóg prỹg tĩ sir, ga ẽn mĩ, vėjėn tóg tũ’ he mũ sir. Kĩ Topẽ tóg Elias mỹ tó, ti tỹ cidade tỹ Sarepta ra tĩg jé, cidade tỹ Sidom kakó ra. Tá

fóg fi tóg nĩ nĩ, ùn mén ter ja fi. Fi mré tóg jêg tĩ sir, Elias ti, fi tỹ ti mỹ vễjên tỹ vễnh kãpãm kỹ, prỹg ra. Topê pi(jé) Israel fi to ti jênê ja nĩgtĩ'. Ti pi(jé) ti jamã ra ti jênê ja nĩgtĩ'. Tá fag tóg e nỹtĩ ja nĩgtĩ gé, ùn mén ter ja fag. Hã ra Topê tóg fóg ên fi to ti jênê ja nĩgtĩ, fi tỹ ti ki rĩr jé," he tóg, Jesus ti.

27 "Kỹ Eliseu to jykren nĩ gé, vãsỹ Topê ví tó tĩ ên to. Ti tỹ ga kri tĩ nĩn kỹ ùn kagyga ag tóg e ja nỹtĩgtĩ gé, êg povo tỹ Israel kãmĩ, vễnh kaga kren vãnh han mũ ag, vễnh kaga tỹ lepra han mũ ag. Hã ra ag tóg ti mỹ to ví ja tũ nĩgtĩ, ti tỹ ag tỹ há' hen jé. Kuvar há tá tóg kãtĩg ja nĩgtĩ, fóg ti, Naamã ti, ga tỹ Síria tá ke ên ti. Kỹ ti hã ne tóg Eliseu mỹ to vĩn kỹ há' he mũ sir inhhã. Ti kaga kren vãnh ên tóg tũ' he mũ sir. Ge ãjag tóg nĩgtĩ iso. Kuvar há tá ke fag vỹ inh ki ge tĩ, jãvo ãjag tóg inh ki ge jãvãnh nỹtĩ, ãjag tỹ tỹ inh jamã tá ke nỹtĩ ra," he tóg ag mỹ, Jesus ti.

28 Kỹ ù tỹ ti ví mễg mũ ag fe tóg gỹm ke mũ sir, Jesus to, ù tỹ vễnh kanhrãn jafã ên krêm nỹtĩ ag.

29 Jêgĩêg nễgnễ ag tóg mũ sir. Kãpa ag tóg mũ sir. Ti vóg ag tóg mũ sir, pãnónh ra. Nazaré vỹ pãnónh tá nĩ, ag jamã ti. Pãnónh ên to jãpry kỹ ag tóg tá ti kutêm sór mũ, kãgnó ki ti ter jé.

30 Hã ra Jesus tóg ag ré kỹ tĩ mũ, ag jãmĩ. Ti tỹ hẽ ri ke tũ ag tóg nĩ sir, kỹ tóg ag fĩn rãm kỹ ag ré kỹ tĩ mũ.

Hã ra ag tóg ti ví kri fi jãvãnh nỹtĩ, ti jamã tá ke ag.

Jesus tỹ vễnh jagrẽ kórég kutêm

(Mc 1.21-28)

31 Kỹ Jesus tóg cidade tỹ Cafarnaum ra tĩ mũ. Ga tỹ Galilêia tá ti nĩ, Cafarnaum ti. Tá jun kỹ tóg ag kanhrãn mũ, vễnh kãn ke kurã ki.

32 Kỹ tóg ag mỹ e tĩ, ag tỹ ti ví mễn kỹ. Ti ví vỹ vễnh kar ví kãfór nĩ, hã kỹ tóg ag mỹ e tĩ.

33 Kỹ vễnh kanhrãn jafã ên krêm ù tóg nĩ nĩ. Jagrẽ kórég ti nĩ. Kỹ tóg prěr mũ, kỹ tóg:

34 "ha mẽ, ã tỹ êg tỹ hẽ ri kenh ke nẽ, Nazaré tá Jesus?" he mũ. "Ã mỹ êg tũg sór mũ?" he tóg. "Ã ki kanhró sóg nĩ. Tỹ ã tóg ã pir mỹ Topê mré ke nĩ, ti tũ pẽ vỹ tỹ ã nĩ," he tóg, ùn jagrẽ kórég ti.

35 Hã ra Jesus tóg ti mỹ ví tar han mũ, kỹ tóg: "ví tũg ra," he mũ. "Ti tovãnh ra," he tóg. Kỹ ti jagrẽ kórég ên tóg ti ter tĩ han mũ, vễnh kar rĩnve, kỹ tóg ti ki kutê mũ sir. Ti kókég tũ tóg nĩ, ti jagrẽ kórég ti.

36 Kỹ tóg vễnh kar mỹ e pẽ tãvĩ tĩ sir. Jagnễ mỹ ag tóg: "ne nẽ hỹn vé'?" he mũ. "Vễnh jagrẽ kórég ag mỹ tóg ví tĩ, Jesus ti, kỹ ag tóg sir ki króm tĩ, ti ví ki, ti kamêg kỹ, ti tỹ ag pan kỹ. Ti hỹn tỹ ag kri ke nĩ," he ag tóg mũ sir, Jesus to.

37 Kỹ ti kãmê tóg vễnh kar kri rũm ke kãn mũ sir, ga ên tá.

Jesus tỹ ùn kagyga e ag tỹ há' he

(Mt 8.14-17; Mc 1.29-34)

38 Kÿ Jesus tóg vënh kanhrân jafã ên ki kutê kÿ Simão ãn ra tĩ mũ. Hã ra Simão prũ fi mÿnh fi tóg kaga nÿ nĩ. Rÿ jagy fi nÿ nĩ. Kÿ ag tóg Jesus mÿ fi tó mũ.

39 Kÿ tóg fi vënh tĩ mũ. Fi krĩ tá jê kÿ tóg fi mÿ: “rÿg măn tũg nĩ,” he mũ. Kÿ fi rÿ ên tóg tũ' he mũ sir. Kÿ fi tóg vësÿmér nĩ nĩ. Ag ki rĩr fi tóg mũ sir, Simão má fi.

40 Kÿ tóg sir kutyg mũ, rá tÿ pun ke kÿ. Kÿ ag tóg ãn kagyga ag tafĩn kãmũ kãn mũ. Kÿ tóg ã nĩgê tÿ ag mẽ kãn mũ, Jesus ti, kÿ ag tóg hághá' he kãn mũ.

41 Vënh jagrê kórég pan kãn tóg mũ gé, ag to jũ kÿ. Ag panh ke to hã ag tóg prër mũ, kÿ ag tóg: “Topê kósin vÿ tÿ ã nĩ,” he tĩ. Hã ra tóg ag mÿ: “vĩ tũg ra,” he mũ. Tĩ ki kanhró ag tóg nÿtĩ, ti tÿ tÿ Cristo nĩ ti. Hã kÿ tóg ag mÿ: “vĩ tũg ra,” he mũ, Jesus ti.

*Jesus tÿ Topê vĩ tó
(Mc 1.35-39)*

42 Tÿ vaj kÿ Jesus tóg tá kutê kÿ êmã tũg ja ra tĩ mũ. Kÿ vënh kar ag tóg ti jãvãnh kãn mũ. Hã ra ag tóg ti vég mũ. Tĩ ve kÿ ag tóg ti mÿ: “êg ré kÿ tĩ tũg nĩ,” he mũ.

43 Hã ra tóg ag mÿ: “vó,” he mũ. “Cidade ã ra sóg tĩg mũ, sÿ ag mÿ Topê vĩ tó jé gé, Topê tÿ tÿ êg pã'i nĩnh ke ti. Hã jé Topê tóg inh mÿ: “ha ag mÿ vënh ven,” he ja nĩ,” he tóg ag mÿ, Jesus ti.

44 Kÿ tóg tĩ mũ sir. Ga tÿ Judéia mũ tóg tĩ mũ. Vënh

kanhrân jafã krêm tóg ag mÿ Topê vĩ tó tĩ mũ sir, Jesus ti.

5

*Jesus tÿ Pedro kanhrân
(Mt 4.18-22; Mc 1.16-20)*

1 Kejën Jesus tóg goj nig tÿ Genesaré fyr tá jê nĩ, Topê vĩ kãmén kÿ. Kÿ vënh kar vÿ ti pénĩn nÿtĩ nĩ, kÿ ag tóg ti kutãn mũ sir, ag e tãvĩ nÿtĩn kÿ, ag tÿ Topê vĩ mẽ sór kÿ.

2 Ag tÿ ti kutãn kÿ tóg canoa régre vigvég mũ, nig fyr tá. Pirã kugmĩg tĩ ag vÿ tá kãpa kÿ nÿtĩ nĩ. Goj kãki jëgjëg kÿ ag tóg pirã kugmĩ jafã kunũnh kÿ kupég nÿtĩ nĩ.

3 Kÿ Jesus tóg canoa kãra rá mũ. Simão tũ vë, canoa ên ti. Kÿ tóg Simão mÿ: “tĩg sĩ han ra, canoa kãmĩ, goj kaju ra,” he mũ. Kÿ Simão tóg tĩ mũ. Hã ra Jesus tóg canoa kãkã nĩ nĩ, ti mré. Kãkã nĩ kÿ tóg ag kanhrân mũ sir, vënh kar ên ag, ã tÿ ti kutãn ja ên ag. Goj fyr tá ag tóg nÿtĩ.

4 Ti tÿ ag kanhrân kãn kÿ tóg Simão mÿ: “goj kaju ra tĩg, ti nig ja ra,” he mũ. “Tá ã rede tÿ goj kãki fón, ã tÿ pirã kugmĩ jé,” he tóg.

5 Kÿ Simão tóg êg Senhor mÿ: “hã ra êg tóg kuty tag kã goj ki ti fón', fón' he ja nĩgtĩ, fagrĩnh mÿ,” he mũ. “Nén ã kãgmĩg tũ êg tóg nĩ mÿr,” he tóg. “Hã ra sóg ã vĩ tigrĩn ki fón sór mũ ha,” he tóg, Simão ti.

6 Kÿ tóg ke mũ sir. Kÿ tóg kugmĩ mág mũ. Fór tóg nĩ, rede ti, kÿ tóg jaran ke mũ, ti

kufy jagy tävĩ nĩn kÿ, pirã e tugnĩn.

⁷ Kÿ ag tóg ãjag régre ag mÿ ven mÿ, ag tÿ canoa ù kãki kãmũ jé. Ag tÿ tá junjun kÿ ag tóg canoa régre ên fãn mÿ, pirã tÿ. Funfór ti nÿtĩ, hã kÿ tóg ki punpun ke kren mÿ sir, canoa régre ên ti.

⁸ Kÿ Simão tóg Jesus krêm grĩnh ke mÿ. Ti mÿ tóg e tĩ, pirã e ên to, kÿ tóg Jesus krêm grĩnh ke mÿ. Kÿ tóg ti mÿ: “Senhor,” he mÿ. “Ã hÿn inh ré kÿ tũg mÿ ha. Topê vĩ mranh ja inh nĩgtĩ, kÿ inh hÿn ã mÿ kórég nĩ ha,” he tóg, Simão ti, Jesus mÿ.

⁹ Ti mÿ tóg e pê tävĩ tĩ, ti tÿ pirã e ên ven kÿ, ti tÿ Jesus jykre ven kÿ. Ti mré ke ag mÿ tóg e tĩ gé,

¹⁰ Tiago mÿ ke gé, João mÿ ke gé, Zebedeu krê tag ag mÿ. Simão régre ag vê, Zebedeu krê tag ag, ti companheiro ag vê.

Kÿ Simão tóg Jesus mÿ: “ã hÿn inh ré kÿ tũg mÿ ha,” he mÿ. Hã ra Jesus tóg ti mÿ: “kamêg tũg nĩ,” he mÿ. “Pirã kugmĩ há ã tóg jê. ã kanhrãn jé sóg ke mÿ, ã tÿ êprã ke ag tÿ inh ki ge han jé,” he tóg, Simão mÿ, Jesus ti.

¹¹ Kÿ ag tóg ãjag canoa vóg mÿ, goj fyr ra. Tá junjun kÿ ag tóg ãjag tũ kar ré kÿ mÿ mÿ sir, Jesus mré.

Jesus tÿ ùn kaga kren vãnħ tÿ há' he

(Mt 8.1-4; Mc 1.40-45)

¹² Kÿ tóg kejên cidade ù tá nĩ nĩ. Kÿ ù tóg ti tá jun mÿ, ù tÿ vãnħ kaga kren vãnħ han kÿ

nĩ ti, vãnħ kaga tÿ lepra he mÿ ên. Ti kri tóg rÿm ke kãn ja nĩ, vãnħ kaga ti. Ên tóg Jesus tá jun kÿ ti krêm mÿg ke mÿ, kÿ tóg ti mÿ: “Senhor,” he mÿ. “Ã mÿ isÿ há' he sór tũ nĩ?” he tóg. “Ã hã tóg isÿ há' henh mÿ, ã tÿ isÿ há' he sór kÿ,” he tóg ti mÿ.

¹³ Kÿ Jesus tóg ã nĩgé tÿ ti mêm mÿ, kÿ tóg ti mÿ: “hej,” he mÿ. “To sóg há nĩ, há' he ja há ã tóg nĩ,” he tóg ti mÿ. Kÿ tóg ti kaga kren vãnħ tÿ há' he mÿ sir vêsÿmér. Jãnhkri' he tóg mÿ, ti fár ti.

¹⁴ Kÿ Jesus tóg ti mÿ ke mÿ, ti tÿ ù mÿ tó tũg jé, ti tÿ há' he tag ti. “Ha tũg,” he tóg. “Topê tũ ki rĩr tĩ to tũg. Ti hã mÿ tómnĩ, kÿ ti mÿ nén ù nĩm nĩ, ti tÿ Topê mÿ pũn jé, Moisés tÿ vãsÿ êg mÿ nén tó ja ên ti, ã jãnhkri to. Hã tugrĩn vãnħ kar vÿ ã tÿ há' he mÿ tag ki kanhrãn mÿ,” he tóg ti mÿ, Jesus ti.

¹⁵ Ge ra ti kãme tóg vãnħ kar kri rÿm ke mÿ, kÿ ù tÿ hên ri ke ag tóg vãnħ mãn mÿ sir. Ag tÿ ti vĩ mē sór vê, ag tÿ ãjag tÿ há' he ên ve sór vê gé. Hã jé ag tóg sir vãnħ mãn mÿ.

¹⁶ Hã ra Jesus tóg êmã tũg ja ra tĩ mÿ, Topê mré vēmén jé.

Jesus tÿ ùn tũg vãnħ tÿ há' he
(Mt 9.1-8; Mc 2.1-12)

¹⁷ Kejên tóg ag kanhrãnrãn mãn mÿ. Kÿ Fariseu ù ag tóg ti vĩ mēgmēg mÿ gé sir, Topê vĩ to professor ag mré hã. Kór há tá ag tóg kãmũ ja nĩ, ga tÿ Galiléia tá, ga tÿ Judéia tá ke gé, cidade tÿ Jerusalém tá ke gé. Jesus pénĩn ag tóg nĩgnĩ kÿ

nýtĩ nĩ. Hã ra Topẽ tóg ti tar han ja nĩ, hã kÿ tóg ù tÿ hẽn ri ke ag tÿ há' he mũ, ùn kagyga ag tÿ, Jesus ti.

¹⁸ Kÿ vãhã ù ag tóg tá junjun mũ gé. Û va ag tóg kãmũ jëg, kur kã, ùn kãnhgrĩ, ùn kónhgrĩ. Ag tÿ Jesus mÿ ti ven sór vë, ag tÿ ti krêm ti fi sór vë.

¹⁹ Hã ra tóg fór tãvĩ nĩ, tá, kÿ ag tóg ti tá junjun tũ nĩ sir, Jesus tá. Kÿ ag tóg ãn to jãpy kÿ ti kri ãn kunũg mũ. Ti nor ên ki ag tóg ti térem mũ, Jesus jë ên kukãm.

²⁰ Kÿ Jesus tóg ag tÿ ti ki ge kÿ nýtĩ tag vég mũ. Hã kÿ tóg ùn kãnhgrĩ mÿ: “ã tÿ Topẽ vĩ mranh ja ên tÿ tũ' he vë ha, vÿ,” he mũ.

²¹ Hã ra ti vĩ tag tóg Topẽ vĩ to professor ag mÿ e tí, Fariseu ag mÿ ke gé. Kÿ ag tóg ti vĩ tag to jykrén kónãn mũ. “Ti tÿ ne tó nẽ hÿn'?” he ag tóg mũ. “Topẽ to vĩ kónãn vë mÿr, ti vĩ tag to,” he ag tóg. “Topẽ hã ne ã pin kÿ Topẽ vĩ mranh ên tÿ tũg' he há nĩnh mũ', kÿ ti tÿ vësÿ tÿ Topẽ han vë sir, ti mÿ vënh pãte fón sór kÿ,” he ag tóg mũ, to jykrén kónãn kÿ.

²² Hã ra Jesus tóg ag tÿ nén to jykrén mũ vég mũ. Kÿ tóg ag mÿ: “ãjag tÿ ne jé to jykrén kónãn nẽ?” he mũ.

²³ “Ne nÿ ãjag mÿ vënhmÿ nÿ?” he tóg. “Ûn tĩg vãnh mÿ sóg: “ã tÿ Topẽ vĩ mranh ja ên tÿ tũ' he vë ha,” hé. Kÿn mÿ ãjag mÿ vënhmÿ?” he tóg. “Sÿ ti mÿ: “nĩ ra, tĩg ra,” henh ke vë gé. Kÿn mÿ ãjag mÿ vënhmÿ ke gé?” he tóg, tag to.

²⁴ “Hã ra sÿ ãjag mÿ inh jykre ven sór vë ha. Tÿ sóg êprã ke fi kósin nĩ. Tá sóg krÿg ke mũ, Topẽ vĩ mranh tÿ vënh pãte fón ke tá. Sÿ tá krÿg mũ ven jé sóg ke mũ ãjag mÿ,” he tóg. Hã kÿ tóg ùn kónhgrĩ mÿ: “nĩ ra, ã kur gég tĩg, ã ãn ra,” he mũ, Jesus ti.

²⁵ Kÿ tóg vësÿmër jëgnë mũ sir. ã kur gég tóg mũ vãhã, ag rĩnve. ã ãn ra tóg tí mũ, Topẽ mÿ vĩ há han kÿ, ùn kãnhgrĩ ja ên ti.

²⁶ Kÿ tóg vënh kar mÿ e tãvĩ tí. Topẽ mÿ ag tóg vĩ há han mũ gé, ti to: “ëg kãfór ti nĩ,” hen kÿ. “Ge ve ja tũ ëg nýtĩ, kÿ ëg tÿ ne to jykrén ke tóg tũ tí,” he ag tóg mũ sir, Jesus tÿ ùn kãnhgrĩ ja ên tÿ há' hen kÿ.

*Jesus tÿ Levi jé prër
(Mt 9.9-13; Mc 2.13-17)*

²⁷ Kar kÿ Jesus tóg tĩg mãn mũ. Kÿ tóg ù tÿ governo mÿ jãnkamy mäg tí ù vég mũ, imposto mäg tí ên ti. Ti jijin hã vÿ: Levi, he mũ. ã rãnhraj han kÿ tóg nĩ nĩ, ti rãnhraj jafã krêm, Jesus tÿ ti ve kÿ. Kÿ tóg ti mÿ: “inh mré kãtĩg,” he mũ.

²⁸ Kÿ tóg jëgnë mũ sir. Ti mré tóg tí mũ sir, ã tũ kar ré kÿ.

²⁹ Kÿ Levi tóg ti mÿ festa mág han mũ, ti ãn tá. Kÿ ti tÿ festa to ùn jé prër mũ ag vÿ tÿ ù tÿ hẽn ri ke nýtĩ, festa venh kãmũ mũ ên ag. Governo mÿ jãnkamy mäg tí ù ag vë, ag mré ke ù ag mré hã. Jesus mré ag tóg jëg mũ.

³⁰ Kÿ Fariseu ag tóg vég mũ, Topẽ vĩ to professor ag ke gé, kÿ tóg ag mÿ kórég tí. Kÿ ag

tóg ù tỹ Jesus mré mũ tĩ ag to vĩ mũ gé. Ag mỹ ag tóg: “ãjag hã ne tóg governo mỹ jãnkamy mãng tĩ ag mré jëg mũ!” he mũ. “Topê ví mranh tĩ ag mré ãjag tóg jëg mũ!” he ag tóg, ù tỹ Jesus mré mũ tĩ ag mỹ.

³¹ Hã ra Jesus tóg ag mỹ kãmén mũ. “Hỹ, ag mré sóg jëg mũ,” he tóg. “Hã ra ùn kagyga tũ ag vỹ médoco venh mũ tũ nĩgtĩ,” he tóg mũ. “Ûn kagyga ag hã vỹ ti venh mũ tĩ,” he tóg.

³² “Inh pi(jé) ù tỹ vënh jykre kuryj han mũ ag mỹ: “ãjag jykre tovãnh ra,” he sór tĩ. Û tỹ Topê ví mranh ja ên ag hã mỹ sóg: “ãjag jykre kórég tovãnh ra,” he sór tĩ. Hã jé sóg ãjag mỹ vënh ven,” he tóg, Jesus ti.

*Vãkre
(Mt 9.14-17; Mc 2.18-22)*

³³ Kỹ Fariseu ag tóg ti mỹ ke mãn mũ. “João mré mũ tĩ ag vỹ vãkre (ka)mẽ nỹtĩgtĩ, vëjên ki, kỹ ag tóg Topê mré vỹ (ka)mẽ han tĩ gé, ag vãkre kỹ. Kỹ Fariseu mré ke ag tóg ge nỹtĩgtĩ gé. Hã ra ã mré mũ tĩ ag tóg ge tũ nỹtĩ. Jëg ag tóg mũgtĩ, kurã kar ki. Vãkre vãnh ag nỹtĩ, êg vãkre kurã ki,” he ag tóg mũ sir, Jesus mỹ.

³⁴ Kỹ tóg ag mỹ: “hỹ,” he mũ. “Hã ra vënh prũg tỹ festa to kãmũ ag pi(jé) vãkrég tĩ,” he tóg. “Festa vë mỹr, vënh prũg ti, kỹ ti mré ke ag tóg ùn prũg mũ ên venh kãmũ tĩ. Hã ra sóg tỹ ùn prũg mũ ên ri ke nĩ, hã kỹ tóg inh mré mũ tĩ ag mỹ sér tĩ,” he tóg.

³⁵ “Vãhã tóg jun mũ, inh kurã ti. Ên kã ag tóg inh pére mũnh mũ. Ên kã hã ag tóg ãjag vãkrenh ke venh mũ, kurã ên kã, inh mré mũ tĩ ag,” he tóg, Jesus ti.

³⁶ Kỹ tóg ag mỹ comparação han mũ, kỹ tóg: “inh jykre tãg vỹ ge nỹnh mũ,” he mũ. “Êg pi(jé) êg kur tãg kókég tĩ’, êg tỹ êg kur si jar kã nĩm jé,” he tóg. “Ke tũ nĩ mũ ra êg tóg êg kur há ên kókég mũ, hã ra tóg êg kur si ên ki par tũ nĩgtĩ gé, ùn há ti. Kỹ êg kur tóg kórég kar nỹtĩ nĩ sir,” he tóg. Ti tỹ ã jykre tãg tó vë, hã ra tóg kur tãg ri ke nĩ.

³⁷ Kỹ tóg ag mỹ: “vinho vỹ ge nĩgtĩ gé,” he mũ gé. “Êg pi(jé) vinho kajãg mũ tỹ ti fár si tỹ sacco ki kujëg tĩ’, vinho tãg ên ti’. Ke tũ nĩ mũ ra tóg kunãnh kỹ jar mũ. Kỹ vinho ên tóg tũ’ he mũ, bolsa ke gé sir.

³⁸ Vinho kajãg mũ tỹ ti fár tãg tỹ bolsa ki kujën ke vë mỹr,” he tóg. Ti tỹ ã jykre tãg tó vë, hã ra tóg vinho kajãg mũ ri ke nĩ.

³⁹ Kỹ tóg ag mỹ: “êg pi(jé) vinho si kron kỹ ùn kajãg kron sór tĩ’, ùn tãg ên ti’,” he mũ gé. “Ti si hã tóg êg mỹ há nĩ,” he êg tóg tĩ,” he tóg, Jesus ti. Ti tỹ ã jykre tãg tó vë, hã ra ag jykre si tóg ag mỹ há tĩ, ù tỹ ti vỹ mẽg mũ ag mỹ.

6

*Vënhkán ke kurã ki vënh jykre
(Mt 12.1-8; Mc 2.23-28)*

¹ Kejēn tóg vėnhkán ke kurā tá krýg mũ. Ký Jesus tóg ěpỹ mũ tĩ mũ, trigo jo ěpỹ mũ. Ti mré mũ tĩ ag tóg ti mré mũ mũ. Hã ra ag tóg sir trigo mó ěn tỹ kam ke mũ sir. Ājag nĩgė tỹ ag tóg rynhranh mũ, ag tỹ ti kanė ko jė.

² Hã ra Fariseu ũ ag tóg ag vėg mũ. Ag mũ vėnh rãnrãj vė, ag tỹ trigo rynhranh mũ ti. Hã ki ag tóg ag mũ Topė vĩ mranh mũ, ag tỹ vėnhkán ke kurā ki rãnrãj ký. Hã ký ag tóg ag mũ: “ãjag ne tóg nén han ke tũ han mũ nĩ', vėnhkán ke kurā ki',” he mũ. “Vėnh rãnrãj vė mỹr', ãjag tỹ nén han mũ ti,” he ag tóg, Jesus mré mũ tĩ ag mũ.

³ Hã ra Jesus tóg ag mũ: “vó,” he mũ. “Ag kókĩnkĩr vė mỹr,” he tóg. “Davi to jykrén nĩ, ti mré mũ tĩ ag to ke gé. Ti kókĩr ký tóg ã tỹ nén han ke tũ han gé, hã ra Topė pi(jė) ti to jũ mũ’,” he tóg.

⁴ “Topė jo ĩn kã ra tóg rã, Davi ti. Tá tóg Topė jamĩ ěn kó. Ti tỹ konh ke tũ vė vė, Topė tũ ki rĩr tĩ ag hã tỹ konh ke vė vė. Hã ra tóg kó, ã mrė mũ tĩ ag mũ tóg vėnh kãpópãm gé, Davi ti. Rãn ký tóg nĩ nĩ mỹr,” he tóg, Jesus ti.

⁵ Ký tóg ag mũ: “tỹ sóg vėnhkán ke kurā to pã'i nĩ mỹr,” he mũ. “Tỹ sóg ěprã ke fi kósın nĩ,” he tóg ag mũ, Jesus ti.

Jesus tỹ vėnhkán ke kurā kã ũ tỹ há' he
(Mt 12.9-14; Mc 3.1-6)

⁶ Vėnhkán ke kurā ũ kã Jesus tóg Israel ag tỹ vėnh

kanhrãn jafã kãra rã mũ, ag kanhrãn jė. Tá ũ tóg jė nĩ. Ti nĩgė vỹ tóg ja nĩ.

⁷ Ký Topė vĩ to professor ag tóg Jesus tugnỹm mũ, Fariseu ag ke gé, ag tỹ ti tỹ há' he mũ ěn ven jė. “Ti mũ ti tỹ há' he sór tũ, tỹ ěg vėnhkán ke kurā (hã) ra?” he ag tóg. “Ti tỹ ti tỹ há' he ký ěg tóg ti kãmén mũ, pã'i ag mũ, ti tỹ vėnhkán ke kurā kã rãnrãj mũ ti,” he ag tóg. Hã ký ag tóg ti tugnỹm mũ.

⁸ Hã ra Jesus tóg ag tỹ nén to jykrén vėg jė nĩ. Ký tóg ũn nĩgė tóg ěn mũ: “kunĩg,” he mũ. “Tag kã jėnh nĩ,” he tóg ti mũ. Ký tóg kãtĩg ký kã jė mũ sir.

⁹ Ký tóg ag mũ: “sỹ ãjag ki jėmėnh há tóg tĩ,” he mũ. “Vėnhkán ke kurā ki ěg hỹn ne han mũ?” he tóg, “ěg tỹ Topė vĩ ki króm jė?” he tóg. “Ěg mũ nén ũ há han mũ? Ěg tỹ ũ tũ kókén kỹn mũ kórég tũ nỹnh mũ hỹn?” he tóg. “Ěg mũ ũ kren han mũ hỹn? Ěg tỹ ũ tén kỹn mũ kórég tũ nĩnh mũ hỹn?” he tóg. Hã ra ag tóg ti mũ nén ũ tó tũ nĩ.

¹⁰ Ký tóg ag ki ěvãnh kãn ký ũn nĩgė tóg ěn mũ: “ã nĩgė tỹ krýg hé,” he mũ. Ký tóg tỹ krýg he mũ sir. Ti tỹ tỹ krýg he ký tóg há' he mũ, ti nĩgė tóg ěn ti.

¹¹ Ký tóg vėnh kar mũ e tĩ. Ag fe tóg gỹm ke mũ, ký ag tóg jagnė mré vėmén mũ. “Ěg hỹn ti tỹ hė ri kenh mũ hỹn', ti kãgmĩnh mũ vó?” he ag tóg, Jesus to. Hã ra tóg ũn nĩgė tóg ěn tỹ há' he ja nĩ sir.

*Jesus tÿ apóstolo ag kuprëg
(Mt 10.1-4; Mc 3.13-19)*

12 Ën kã Jesus tóg kejën pãnónh ra tí mũ, ti tÿ Topë mré vëmén jé. Kutÿ ãn kã tóg Topë mré vï nĩ ki kurãg mũ.

13 Tÿ vaj kÿ tóg ã mré mũ tí ag jé prër kãn mũ, kÿ tóg ag kãmĩ ù tÿ 12 (ke) ãn ag kuprëg mũ. Ag to tóg: “sÿ ùn vin mũ ãn ag,” he mũ, hã vÿ: apóstolo, he mũ.

14 Ag hã vë, ha më: Simão, Jesus tÿ ti jyjÿ ù hã vÿ: Pedro, he mũ, ti jãvy tÿ André ke gé, Tiago ke gé, ti jãvy tÿ João mré, Filipe ke gé, Bartolomeu ke gé,

15 Mateus ke gé, Tomé ke gé, Tiago ke gé, Alfeu kósin tag ti, Simão ke gé, ag tÿ ù to: Zelote, he mũ tag ti,

16 Judas ke gé, Tiago kósin tag ti, Judas Iscariotes ke gé, ù tÿ Jesus vatánh tá pã'i ag mÿ ti kãmén ke tag ti.

*Jesus tÿ ùn e ag ki rÿr
(Mt 4.23-25)*

17 Kÿ Jesus tóg ag mré pãnónh ãn to tére mũ sir, kÿ tóg kyjer tá jë nĩ. Kÿ ti mré mũ tÿ hën ri ke ag vÿ tá nÿtĩ gé. Û tÿ hën ri ke ag vÿ ti ki junjun ja nĩgtĩ, ga tÿ Judéia tá kãmũ kÿ, cidade tÿ Jerusalém tá ke gé, goj kafã tú fyr tá ke gé, hã vÿ: cidade tÿ Tiro, he mũ, cidade tÿ Sidom, he mũ gé. Ën kar vÿ ti ki junjun ja nĩgtĩ, ti tÿ ag tÿ há' he jé. Kÿ tóg fór pë nĩ, tá, ag tÿ e pë tãvĩ nÿtĩn kÿ.

18 Ûn jagrë kórég ag tÿ tóg há' he mũ gé, ag jagrë pan tóg mũ, Jesus ti, fag mré hã.

19 Kÿ vënh kar vÿ ti kã krÿ' he sór mũ sir, hã jé ag tóg ti ki junjun mũ. Kÿ ù tÿ ti kã krÿ' he mũ ãn ag vÿ há' he kãn mũ, ti tÿ ã jykre tar tÿ ag tÿ hághá' hen kÿ. Hã jé ag tóg vënh mãn ja nĩ. Hã kÿ ag tóg ti pënĩn e tí sir.

*Jesus tÿ ag kanhrãn
(Mt 5.1-12)*

20 Kÿ tóg ã mré mũ tí ag ki ëvãnh mũ, kÿ tóg ag mÿ kãmén mũ, Jesus ti, kÿ tóg: “Topë vÿ ãjag ve há han mũ, ãjag tÿ: “kórég eg tóg nÿtĩ,” hen kÿ,” he mũ. “Kÿ ãjag tóg Topë tÿ tÿ ëg pã'i nĩ venh ke mũ,” he tóg.

21 “Topë vÿ ãjag ve há han mũ, ãjag tÿ: “inh kókĩr ri ke tóg tí, sÿ vënh jykre kuryj ve sór tí ãn ti,” hen kÿ. Kÿ ãjag tóg venh ke mũ,” he tóg. “Topë vÿ ãjag ve há han mũ, ãjag vësÿrénh mÿn kÿ, ëprã. Æjag mÿ sér nĩ jé tóg ke mũ, tá,” he tóg.

22 “Topë vÿ ãjag ve há han mũ, ag tÿ ãjag to kórég nÿtĩn kÿ isugnĩn, ag tÿ ãjag mÿ: “ha mũ jëg,” hen kÿ, isugrĩn. Ag tÿ isugnĩn ãjag mÿ vï kónãn kÿ tóg há tí, ag tÿ ón kÿ ãjag jykre kórég tó kÿ. Tÿ sóg ëprã ke fi kósin nĩ mÿr,” he tóg, Jesus ti.

23 “Mÿ sér nÿtĩmnĩ, ãjag fe tÿ mrin kemnĩ, ag tÿ isugrĩn ãjag vóg kónãn mũ ra. Kÿ ãjag tóg kanhkã tá nén ù há kar venh ke mũ, vënh kaja jé, isugnĩn. Ge ja ag tóg nÿtĩ ja nĩgtĩ, ù tÿ ãjag vóg mũ ag jóg'jóg ag, vãsÿ Topë vï tó tí ag mÿ. Ag vóg kónãn ja ag tóg nĩ gé. Vãsÿ Topë vï tó tí ãn ag ri ke ãjag tóg nÿtĩ, ag krë'krë tÿ ãjag vóg kónãn kÿ,” he tóg, Jesus ti.

24 “Hã ra Topê vỹ ãjag ve kónãn mũ, ãjag tỹ: “há êg tóg nỹtĩ,” hen kỹ. Ga kri mũn kỹ ãjag tóg nén ù há vég tĩ, kỹ ãjag tóg kanhkã tá jun ke tũ nĩ,” he tóg.

25 “Topê vỹ ãjag ve kónãn mũ, ãjag tỹ vênh jykre kuryj ve sór tũ nỹtĩn kỹ, ti tỹ ãjag mỹ ãjag kókĩnkĩr ri ke tũ nĩn kỹ, êprã. Kỹ ãjag tóg venh ke tũ nĩ. Kỹ tóg ãjag kókĩnkĩr ri ke tĩnh mũ, tá,” he tóg. “Topê vỹ ãjag ve kónãn mũ, ti tỹ ãjag mỹ sér tĩn kỹ, êprã. Vēsỹrénh jé ãjag tóg ke mũ, kygfỹ jé ãjag tóg ke mũ, tá,” he tóg.

26 “Topê vỹ ãjag ve kónãn mũ, vênh kar tỹ ãjag to vĩ há han mũn kỹ. ãjag mỹ ti há tĩ, vênh kar tỹ ãjag to vĩ há han mũn kỹ, hã ra tóg Topê mỹ kórég nĩ. Ge ja ag tóg nỹtĩgtĩ, ù tỹ ãjag mỹ vĩ há han mũn ên jóg'jóg ag, ón kỹ Topê vĩ tó (ka)mẽ ên ag mỹ, vãsỹ. Ag mỹ ag tóg vĩ há han ja nĩ gé. Ag ri ke ãjag tóg nỹtĩ, ón kỹ Topê vĩ tó (ka)mẽ ên ri ke ãjag tóg nỹtĩ, vênh kar tỹ ãjag mỹ vĩ há han kỹ. Hã kỹ tóg ãjag ve kónãn mũ, Topê ti,” he tóg, Jesus ti, ag mỹ.

Êg tỹ êg kato tẽ mũ ag to há nỹtĩnh ke

(Mt 5.38-48)

27 “Ãjag jyvẽn sóg mũ, ãjag tỹ inh vĩ jêmẽn kỹ, ha mẽ. Û tỹ ãjag kato vãsãnsãn mũ ên ag to fe nỹtĩmnĩ jãvo. Û tỹ ãjag to jũ mũ ag mỹ nén ù há han nĩ jãvo.

28 Û tỹ ãjag mỹ vĩ kónãn mũ ag mỹ vĩ há han nĩ gé. Û tỹ ãjag

mỹ féfén mũ ag to Topê mré vĩmnĩ gé.

29 Û ag tỹ ãjag jamẽ ki tãnh kỹ ag mỹ ãjag jamẽ ù ti ven nĩ gé, ag tỹ ãjag mỹ ki tãnh jé gé. Û ag tỹ ãjag capa mãn sór mũ ên ag mỹ ãjag camisa nĩn nĩ gé.

30 Û ag tỹ ãjag mỹ nén ù to: “inh mỹ nĩn,” he kỹ ag mỹ nĩmnĩ. Û ag tỹ ãjag tỹ nén ù mãn kỹ ag mỹ: “inh mỹ isũ nĩn,” he tũg nĩ.

31 ãjag tỹ ãjag mré ke ù to: “ti tỹ êg mỹ tag han há tóg tĩ vỹ,” he mũ ra êg hã tóg ti mỹ han ke mũ,” he tóg.

32 “Û ag tóg ãjag to há nỹtĩ. ãjag tỹ tag ag hã to há nỹtĩn kỹ tóg tỹ nén ù tũ tĩ ver. Vênh kar ag vỹ ge nỹtĩ gé. Û tỹ ãjag to há nỹtĩ ên ag to ag tóg há nỹtĩ gé, vênh kato, ù tỹ Topê vĩ mranh mũ ag vỹ tag han tĩ. Tag vỹ há nĩ, hã ra tóg tỹ nén ù tũ nĩ ver.

33 Û ag tóg ãjag mỹ vĩ há han tĩ. ãjag tỹ ên ag hã mỹ vĩ há han kỹ tóg tỹ nén ù tũ nĩ ver. Ge ag tóg nỹtĩ gé, Topê vĩ mranh tĩ ag. ãjag tỹ ag mỹ vĩ há han kỹ ag tóg ãjag mỹ vĩ há han mũ gé, vênh kato. Há ti nĩ, hã ra tóg tỹ nén ù tũ nĩ ver.

34 Û ag vỹ, ãjag tỹ ag mỹ prestar hen kỹ ag tóg ãjag mỹ nĩn mãn mũ, ãjag tũ ti. ãjag tỹ ag hã mỹ prestar he mãn kỹ tóg tỹ nén ù tũ nĩ ver. Topê vĩ mranh tĩ ag vỹ ge nỹtĩ gé. ãjag tỹ ag mỹ nĩn mãn kỹ ag tóg ãjag mỹ prestar he mãn mũ sĩr, ãjag tũ ti. Há ti nĩ, hã ra tóg tỹ nén ù tũ nĩ ver.

35 Ag jāvo ũ tỹ ājag kato vāsānsān mũ ag to há nỹtĩmnĩ, ha mẽ. Vēnh kar mỹ vĩ há han kãn nĩ. Vēnh kar mỹ prestar he kãn nĩ, ag tỹ ājag mỹ ājag tũ nĩm tũ (hã) ra. Kỹ ājag tóg kanhkã tá venh ke mũ, ājag tỹ ũri nén han mũ tag ri ke ti. Hã ki ājag tóg tỹ ũ tỹ kynhmỹ nĩ ěn krẽ nỹtĩ, ājag tỹ ti ri ke han kỹ. Ti hã ne vēnh kar mỹ vĩ há han kãn tĩ ver', ũn jykre kórég kar ag mré hã, ag tỹ ti mỹ: “ěg mỹ tóg há tĩ,” he tũ (hã) ra, ag tỹ vēnh hã ki rĩr há han mũ (hã) ra tóg ag mỹ vĩ há han tĩ ver, Topẽ ti.

36 Vēnh kar jagāgtān kãn nĩ, ěg jóg ri ke. ěg jóg tỹ vēnh kar jagāgtān kóm vēnh kar jagāgtān nĩ gé,” he tóg, Jesus ti.

*Ěg tỹ kãnhmar ũ to vĩ kónãn ke tũ
(Mt 7.1-5)*

37 “Kãnhmar ũ to vĩ kónãn tũg nĩ, kỹ Topẽ vỹ ājag to vĩ kónãn ke tũ nĩ gé. Kãnhmar ũ to: “kórég ti nĩ,” he tũg nĩ, kỹ Topẽ vỹ ājag to: “kórég ti nĩ,” henh ke tũ nĩ gé. Vēnh kar mỹ vēnh pãte fón nĩ, ke tũ nĩ mũ ra Topẽ vỹ ājag mỹ vēnh pãte fón ke tũ nĩ gé.

38 Ag mỹ nén ũ há kar nĩmnĩ, kỹ Topẽ vỹ ājag mỹ nén ũ há kar nĩm ke mũ gé sir, hã ra tóg ājag mỹ ěn kãfór nĩm ke mũ. Ājag mỹ nĩm mág han jé tóg ke mũ, Topẽ ti. Nĩm mág pẽ han jé tóg ke mũ, nén ũ há kar tỹ. Hỹ, ge ti nĩ. Ājag tỹ ag mỹ nén ũ há han kỹ Topẽ vỹ ājag mỹ nén ũ há han ke mũ gé. Ājag tỹ ag mỹ nén ũ kórég han kỹ

tóg ājag mỹ hã ri ke han ke mũ gé,” he tóg, Jesus ti.

39 Kỹ tóg ag mỹ: “ũ tỹ ki kagtĩg ra tỹ ājag pã'i nỹtĩ sór mũ tag vỹ ge nỹnh mũ, ha mẽ,” he mũ gé. Kỹ tóg: “ũn kyvó tỹ ũn kyvó ũ mỹ: “sỹ ã péré tĩg ke vē,” hen kỹ ag tóg ag mũn kỹ kãgnó ki vár kãn ke mũ. Ge ag tóg tĩ, ājag pã'i ag. Ājag tỹ ũn ki kagtĩg ag mré mũn kỹ ājag tóg mũ kónãn kãn ke mũ.

40 Aluno pi(jé) ã professor kãfór nĩnh mũ'. Ti tỹ kanhrãn há han kỹ tóg kejẽn ã professor ri ke nĩnh mũ, hã ra ti pi(jé) ti kãfór nĩnh mũ'.

41 Jykre kórég mág ājag tóg nỹtĩ, hã ra ājag régre jykre pãno sĩ ěn ājag mỹ kórég nỹ'.

42 Kỹ ājag hã ne tóg ājag régre ag mỹ: “sỹ ã mỹ ã jykre kórég kurynh há tóg tĩ,” he tĩ', ājag tỹ ājag jykre pãno tãvĩ ěn kurynh jãvãnh (hã) ra. Ke tũg ra mỹr, ke tũ nĩ mũ ra ājag tóg jykre régre nỹtĩ. Ājag jykre kurynh vén nĩ, kar ājag tóg ājag régre ag jykre kurynh há han mũ,” he tóg, Jesus ti.

*Ka to comparação
(Mt 7.16-20; 12.33-35)*

43 “Ha vé, ka há pi(jé) kanẽ kórég han tĩ'. Kỹ ka kórég pi(jé) kanẽ há han tĩ gé'.

44 Ěg tỹ ti kanẽ ve kỹ ěg tóg: “ũn kanẽ ko há ja vē,” henh ke mũ, ke tũ nĩn kỹ ěg tóg: “ũn kanẽ ko vãnh ja vē,” henh ke mũ. Sónh to ěg tóg pẽnva vég tũ nĩgtĩ mỹr', kar ěg tóg vãnh tỹ jóhó to uva vég tũ nĩgtĩ gé, ha mẽ.

45 Ge tóg nỹgtĩ, ěprã ke ag jykre ti. ũn jykre há vỹ nén

ũ há kar to jykrén tĩ, ti jykre kuryj nĩn kỹ. Kỹ tóg ěg mỹ tó há han tĩ gé sir. Kỹ ũn jykre kórég vỹ ũ kórég kar to jykrén tĩ, ti jykre pãno nĩn kỹ. Kỹ tóg ěg mỹ tó kónãn tĩ gé sir. Hỹ, ge ti nỹgtĩ. Ěg tỹ nén to jykrén tĩ ěn kãmén ěg tóg tĩ mỹr," he tóg, Jesus ti.

Īn to comparação (Mt 7.24-27)

46 "Ājag ne tóg inh mỹ: "Senhor', Senhor'," he tĩ'. Hã ra ājag tóg isỹ ājag mỹ nén tó mũ ěn han vãnħ nỹtĩgtĩ. Kỹ tóg vẽnħmỹ nỹ.

47 Inh ki ge kỹ ājag nỹtĩ. Inh vĩ ki kanhró ājag tóg nỹtĩ. Ājag tỹ ki króm kỹ ājag tóg sir tag ri ke nỹtĩnh mũ, ha mẽ.

48 Īn han mũ ri ke vė. Ũ tóg, ti tỹ ĩn han jé tóg kũm tĩ, kã há tá. Kũm kỹ tóg pãró kri ĩn han mũ sir, pãró kri tóg ti nũna gunhgũnh mũ sir. Kỹ vãhã goj tóg var mũ, kỹ tóg ĩn kri rũm ke mũ, goj var ti. Hã ra ĩn tóg jė nĩ. Ti kókég tũ tóg nĩ, goj var ti. Ti tỹ pãró kri jė hã kỹ tóg tar jė. Ge ti nĩ, ājag tỹ inh vĩ ki króm kỹ.

49 Ājag tỹ inh vĩ ki króm tũ nĩn kỹ ājag tóg sir tag ri ke nỹtĩnh mũ, ha mẽ. Ũ tóg ĩn han mũ gé, hã ra tóg jo kũm tũ nĩ, ti nũna vỹ jãvo krĩgmỹ nỹtĩ. Kỹ vãhã goj var vỹ ĩn kri rũm ke mũ sir, kỹ tóg kutė mũ sir, ĩn ti. Kỹ tóg mráj mũ sir, ha mẽ, ti nũna tỹ krĩgmỹ nỹtĩn kỹ. Ge ti nĩ, ũ tỹ inh vỹ jėmė jãvãnħ ěn ti," he tóg, Jesus ti.

7

Fóg tỹ capitão tỹ Jesus ki rã (Mt 8.5-13)

1 Jesus tỹ ag kar kanhrãn kãn kar tóg cidade tỹ Cafarnaum ra tĩ mũ.

2 Tá fóg tỹ capitão tóg nĩ nĩ. Ti camarada tóg kaga nỹ nĩ. Vẽnħmỹ tóg nỹ, kỹ capitão tóg: "ti hỹn ter mũ ha," he mũ. Hã ra tóg ti mỹ ti fe ri ke nĩ, ti camarada ti, capitão ěn mỹ.

3 Hã kỹ tóg Jesus kãme mẽ kỹ Israel kófa ag jėgnėg mũ, Jesus to, ag tỹ ti mỹ: "ti venh kãtĩg," he jė. Jesus tỹ ti camarada tỹ há' he jė tóg ti mỹ vẽnħ vỹ jėnėg mũ, fóg tỹ capitão ěn ti.

4 Kỹ ag tóg Jesus tá junjun mũ, Israel kófa ěn ag. Kỹ ag tóg Jesus mỹ tó mũ. "Ā mỹ ti venh tĩg ke tũ nĩ?" he ag tóg mũ, Jesus mỹ. "Ũn há vė.

5 Ěg povo to tóg há tãvĩ nĩ, ti tỹ tỹ fóg (hã) ra. Ěg mỹ tóg ĩn han ja nĩ, ěg tỹ krēm Topė vỹ tó jafã ti, ti tỹ tỹ fóg (hã) ra," he ag tóg mũ, Jesus mỹ, fóg tỹ capitão ěn to.

6 Kỹ Jesus tóg: "hej," he mũ. Kỹ tóg ag mré tĩ mũ. Kỹ tóg ti ĩn kakó ki jun mũ. Kỹ capitão tóg ti mỹ vẽnħ vỹ jėnė mãn mũ gé. Ā mré ke ag jėgnėg tóg mũ, Jesus to. Kỹ ag tóg ti mỹ: "Senhor'," he mũ. "Ti venh kãrãnħ ke tũ ã nėji nĩ, ti tỹ tỹ fóg nĩn kỹ," he ag tóg. "Ā mỹn hỹn jagy nỹ, ã tỹ fóg ĩn kãki sãn ken kỹ, Judeu ag tỹ fóg ĩn sãn jãvãnħ nỹtĩn kỹ," he ag tóg.

7 "Hã kỹ ti nėji ã venh kãtĩg tũ nĩ gé, hã ra tóg ã mỹ vẽnħ vỹ jėnėg mũ. Ā vỹ pir ki ti

camarada nêji há' henh mũ, ã tỹ ã vĩ tỹ ti tỹ há' henh há nĩn kỹ," he ag tóg.

⁸ "Ha vé, tỹn ji pã'i krêm ke nĩ gé, kỹ soldado ag nêji tỹ ti krêm ke nỹtĩ gé. Hã kỹn ji tóg pã'i jykre ki kanhró nĩ. Ti tỹ soldado ù mỹ: "kutĩg," hen kỹn ji tĩ mũ, ti tỹ ti mỹ: "kunĩg," hen kỹn ji kãtĩ mũ gé. Ti tỹ ã camarada mỹ: "tag han ra," hen kỹn ji han mũ. Ti vĩ tỹn ji ag jêgnêg tĩ. Hã kỹn ji ki kanhró nĩ. Á vĩ tỹ ã nêji ti camarada tỹ há' he há nĩ," he ag tóg mũ, Jesus mỹ, capitão mré ke ag.

⁹ Kỹ tóg Jesus mỹ e tĩ, ti vĩ tag ti. Kỹ tóg ã mré mũ tĩ ag mỹ ke mũ, ùn a ag mỹ, ti nón kãmũ ên ag mỹ. Kỹ tóg ag mỹ: "Israel ù pi(jé) ti ri ke nĩ', ti tỹ tỹ fóg (hã) ra'," he mũ. "Ki kanhró tóg nĩ mỹr, kỹ tóg inh ki rã kỹ jê. Ge ve ja tũ sóg nĩ. Há' he kỹ ti nĩ ha, ti camarada ti," he tóg, Jesus ti.

¹⁰ Kỹ ag tóg vỹnvỹn ke mũ, capitão ãn ra, capitão tỹ ùn jêgnêg mũ ag. Hã ra ti camarada ên tóg há' he ja nĩ sir, ag tỹ tá junjun mũ ra.

Jesus tỹ ùn ter mũ rĩn mãn

¹¹ Kãnhmar Jesus tóg tĩ mũ gé sir, ên ki. Kỹ tóg cidade tỹ Naim ra tĩ mũ. Ti mré mũ tĩ ag tóg ti mré mũ mũ, ùn e a g ke gé. Ti nón ag tóg mũ mũ.

¹² Kỹ tóg cidade ên fyr ki jun mũ, cidade to ró jãnkã ki. Kỹ ag tóg vêser va kãmũ nĩ, ha mẽ. Ti mỹnh fi kósin pir vê mỹr. TI panh tóg ter ja nĩ. Kỹ ù tỹ hên ri ke fag vỹ fi mré mũ

nĩ, cidade tá kãmũn kỹ. ag tỹ ti péjunh mũ vê, vênh kej tá.

¹³ Kỹ Jesus tóg fi vég mũ, kỹ fi tóg ti mỹ jagtar nĩ. Kỹ tóg fi mỹ: "fỹ tũg nĩ," he mũ.

¹⁴ Kỹ tóg vêser venh tĩ mũ, kỹ tóg tá jun kỹ ti mẽg mũ. Kỹ ù tỹ ti va mũ ên ag vỹ krỹg'krỹg' he mũ. Kỹ Jesus tóg vêser mỹ: "kyrũ'," he mũ. "Nĩ ra, he sóg mũ ã mỹ," he tóg mũ, vêser mỹ, Jesus ti.

¹⁵ Kỹ tóg nĩ mũ (mỹr) sir, ha mẽ, vêser ên ti, kỹ tóg vĩ mũ sir, ùn ter ja ên ti. Kỹ Jesus tóg ti mỹnh fi mỹ ti fêg mũ.

¹⁶ Kỹ tóg vênh kar mỹ e tĩ, kỹ ag tóg Topê to vĩ há han mũ sir. "Topê vĩ tó tĩ kãfór vỹ êg ki jun," he ag tóg mũ, "Topê vỹ êg ve há han, hã kỹ tóg ti jêñê," he ag tóg mũ, Jesus to.

¹⁷ Kỹ ti vême tóg vênh kar kri rũm ke mũ sir, ga tỹ Judéia kar tá, ga kar ên kãmĩ ke gé, Jesus tỹ ùn ter ja ên rĩn mãn ja ti.

João Batista tỹ Jesus mỹ vênh vĩ jêñê

(Mt 11.2-19)

¹⁸ Ên kã João vỹ se kỹ jê nĩ, João Batista ti, ù tỹ ag kygpég tĩ ti. Kỹ João mré mũ tĩ ag tóg ti mỹ tó kãn mũ sir, Jesus tỹ nén han mũ ti.

¹⁹ Kỹ tóg ti mỹ e tĩ. Kỹ tóg Jesus to: "Topê tỹ ùn jêñêg mũ hã mỹ vỹ?" he mũ. Hã kỹ tóg ã mré mũ tĩ régre ag jêgnêg mũ, ag tỹ Jesus venh mũ jé, ag tỹ ti ki jêñê jé, ti mỹ: "ã hã mỹ'?" he jé. "Êg tỹ ùn jãvãnh mũ mỹ tỹ ã nĩ? Topê tỹ ùn jêñêg mũ hã mỹ tỹ ã nĩ? Êg mỹ ù jãvãnh

mãn ke tũ nĩ ha', ã pãte?" he sór ag tóg mũ, Jesus mĩ.

²⁰ Kĩ ag tóg Jesus tá junjun mũ. Kĩ ag tóg ti mĩ: "João Batista vỹ ãg jẽgnẽ, ãg tỹ ã ki jẽmẽ jé," he mũ. "Ã hã mĩ?" he tóg. Ëg tỹ ãn jãvãnh mũ ãn hã mĩ tỹ ã nĩ? Ëg mĩ ã jãvãnh mãn ke tũ nĩ ha', ã pãte? he tóg, João ti, ã mĩ," he ag tóg mũ, Jesus mĩ.

²¹ Hã ra Jesus tóg ãn kaga ag tỹ há' he mũ, ag tỹ ti mré vĩnh kãmũ kĩ. Vẽnh jagrẽ kórég pan tóg mũ gé, kurã ãn kã. ãn kyvó ag tỹ há' he tóg mũ gé, ag kanẽ tỹ.

²² Kĩ tóg João mré mũ ti ag mĩ: "Ha João mĩ tag tómnĩ, ha mẽ," he mũ. "Ãjag tỹ nén vég mũ ta g tómnĩ, ãjag tỹ nén mẽg mũ ti ke gé," he tóg. "Tag han inh tĩ, ha mẽ: ãn kyvó ag vỹ isugrĩn ãvãnh há nỹtĩ ha. ãn kãnhgrĩ ag vỹ mũ há han mũ ha, ãn kónhgrĩ ãn ag. ã tỹ vẽn kaga kren vãnh han mũ ag krenkren han inh tĩ, ã tỹ lepra han mũ ag. ãn kutu ag vỹ ãmẽ há nỹtĩ ha. ãn kãgter mũ ag vỹ rĩnrĩr mãn gé. ãn jagãgtar e ag vỹ Topẽ vỹ sér mẽg mũ ha ke gé, Topẽ tỹ tỹ ãg pã'i nĩnh ke to.

²³ Kĩ tóg ti tỹ iso jykrén kónãn tũ nĩn kĩ há' he mũ. Kĩ Topẽ tóg ti ve há han mũ sir. Tag tómnĩ, João mĩ," he tóg, Jesus ti.

²⁴ Kĩ João tỹ ãn jẽgnẽg mũ ag tóg mũ mũ sir, João mĩ tó jé, mĩr, ha mẽ.

João tỹ ãn jẽgnẽg mũ ãn ag mũ kar kĩ Jesus tóg ãn e ãn ag

kanhrãn mũ sir, kĩ tóg ag mĩ João kãmén mũ. "Ëmã tũ ja ra ãjag tóg mũ ja nĩgtĩ, João ve jé," he tóg. "Kĩ ti jykre hỹn ne ri ke nĩ, ãjag mĩ? Kejẽn kãka tóg goj jagma krã tỹ man man ke tĩ. João jykre mĩ ãjag mĩ tag ri ke tũ nĩ? Hỹ, ri ke tũ ti nĩ.

²⁵ Kĩ ti jykre hỹn ne ri ke nĩ ãjag mĩ? Ti mĩ ãjag mĩ ãn kur sĩnvĩ ag jykre ri ke nĩ? Vó. ãn kur sĩnvĩ ag vỹ cidade mág tá nỹtĩ, pã'i mág ĩn krẽm, ãn jẽn mág mũ ag. Ag pi(jé) ãmã tũg ja mĩ mũ tĩ'.

²⁶ Kĩ ti jykre hỹn ne ri ke nĩ ãjag mĩ? Ti jykre mĩ ãjag mĩ Topẽ vỹ tó tĩ ag jykre ri ke nĩ? Hỹ, ri ke ti nĩ. Topẽ vỹ tó tĩ vỹ mĩr, hã ra tóg Topẽ vỹ tó tĩ ag kãfór kar nĩ, João ti.

²⁷ Topẽ vỹ João jẽnẽ, ti tỹ ijo tũg jé. Hã kĩ tag tóg ti to rán kĩ nĩ, Topẽ vỹ ki, ha mẽ. "Ha vé, ã jo sóg ã jẽnẽnh mũ, ti tỹ vẽn kar tỹ há' he jé, ã tũg ken jo. Ag jyvẽn jé tóg ke mũ, kĩ tóg ãpny kure ri ke nĩ, ãmĩn kurynh ri ke," he tóg, Topẽ vỹ tỹ rán kĩ nĩ ki, João to, ti tỹ ijo tũg ke tag to," he tóg, Jesus ti, ag mĩ.

²⁸ "Ki hã sóg tó mũ, hã kĩ sóg ke mũ, ha mũ. Ëprã ke ag kãfór kar ti nĩ, João ti, Topẽ vỹ tón ki. ã tỹ ga kri mũ kãfór kar ti nĩ. Hã ra ã tỹ hẽn ri ke ag tóg Topẽ tỹ tỹ ãg pã'i nĩ venh ke mũ mĩr. Ag tỹ venh ke mũ (hã) ra ag tóg kãsir nỹtĩ. Kĩ ãn kãsir ãn ag tỹ ãgno pẽ ãn tóg João mág kãfór nĩnh mũ hã ra," he tóg, Jesus ti, João to.

²⁹ "Jo João vỹ mẽg mũ e ãn ag tóg João vỹ mẽ há han ja nĩgtĩ, hã kĩ ag tóg Topẽ vỹ tag ti to:

“ki hã ã tóg tó mũ,” he ja nĩgtĩ, João tỹ ag mỹ nén tó ja to. Hã kỹ tóg ag kygpe ja nĩgtĩ, João ti, ù tỹ governo mỹ imposto tỹ jãnkamy mǎg tĩ ag mré hã.

30 Hã ra Fariseu ag tóg João vĩ jẽmẽ jãvãnh ja nỹtĩgtĩ, Topẽ vĩ to professor ag ke gé. Hã kỹ ag tóg Topẽ tỹ ag mỹ nén han sór mũ ẽn tỹ ti mỹ nenh ja nĩgtĩ gé. Hã kỹ João tóg ag kygpe ja tũ nĩgtĩ gé,” he tóg, Jesus ti.

31 “Ûri ke ag vỹ ge nỹtĩ gé, ha mẽ.

32 Gĩr ag ri ke ag tóg nỹtĩ. Gĩr ag vỹ jagnẽ mré kanhinnhir mũgtĩ. Kỹ ag tóg ãjag mré ke ag jé prẽr tĩgtĩ, ag mré kanhinnhir jé. Kỹ ag tóg kejẽn jũ tĩ. “Ãjag mỹ ẽg tóg vãkyn, kanhinnhir kỹ, hã ra ãjag ne tóg vẽnh gringrén jãvãnh nỹtĩ,” he ag tóg tĩ, gĩr ag, jagnẽ mỹ. “Ãjag tỹ vẽnh gringrén jãvãnh nỹtĩn kỹ ẽg tóg ón kỹ vësýrénh mũ sir, ẽg kanhinnhir kỹ, hã ra ãjag ne tóg ẽg mré fỹ jãvãnh nỹtĩgtĩ gé,” he ag tóg tĩ gé, ón kỹ jagnẽ to jũ kỹ, gĩr ag.

33 Gĩr tag ag ri ke ãjag tóg nỹtĩ, João to, iso ke gé,” he tóg, Jesus ti. “João vỹ vãkre ja nĩgtĩ, jẽn mág tũ, kron tũ. Kỹ ãjag tóg ti to: “jagrẽ kórég tóg nĩ,” he ja nĩgtĩ, ti vãkre to.

34 Ti jãvo sóg vãkrég tũ nĩgtĩ. Jẽg sóg nĩgtĩ, kron sóg nĩgtĩ. Kỹ ãjag tóg iso: “ti hã ne jẽn mág tĩ,” he tĩ. “Ti hã ne kronkron tĩ, ti hã ne governo mỹ imposto tỹ jãnkamy mǎg tĩ ag to há nĩ, ti hã ne Topẽ vĩ mranh tĩ ag to há nĩ,” he ãjag tóg tĩ iso, ẽprã ke fi kósin to. Kỹ João

jykre tóg ãjag mỹ kórég nĩ, ti vãkre to, jãvo inh jykre tóg ãjag mỹ kórég nĩ gé, inh vãkrég tũ to.

35 Hã ra ẽg tỹ ù jykre tugnỹm kỹ ẽg tóg ti jykre há ẽn ki kanhró nỹtĩ sir. Kỹ tóg tỹ Topẽ krẽ nĩ sir, kỹ ẽg tóg ti ki Topẽ jykre ki kanhró nỹtĩ sir, ti jykre há ẽn tigrĩn,” he tóg, Jesus ti. Ti tỹ ag mỹ João kãmén hã vẽ.

Jesus tỹ Simão ãn krẽm jẽg

36 Kejẽn Fariseu ù tóg Jesus mỹ tó mũ, ti tỹ ti mré jẽn jé. Kỹ tóg tĩ mũ, Fariseu ẽn ãn ra. Tá tóg ti mré jẽg mũ sir.

37 Ti tỹ mré jẽg nĩ ra ù fi tóg ti ki jun mũ, cidade tá ke ù fi. Hã ra fi tóg mẽn ja e nĩ, Topẽ vĩ mranh kỹ. Jesus tỹ Fariseu ẽn ãn krẽm jẽ mẽg fi tóg mũ, hã kỹ fi tóg garrafa va kãtĩ mũ. Garrafa kãki tóg ẽg tãg jafã nĩ, nén ger há tỹ. Pó kupri tỹ tóg han kỹ nĩ nĩ, garrafa ẽn, pó tãnjã tỹ.

38 Ẽn va kãtĩg kỹ fi tóg ti pẽn to jẽ nĩ sir. Hã ra Jesus tóg cama kri nỹ kỹ jẽg mũ. Ag jykre vẽ, ag tỹ nỹ kỹ jẽn ke mũ ẽn ti. Kỹ fi tóg ti pẽn to jẽ kỹ fỹ mũ. Fi tỹ Topẽ vĩ mranh ja ẽn tigrĩn fi tóg fỹ mũ. Kỹ fi tóg ã kanẽ var tỹ ti pẽn kupég mũ, kỹ fi tóg ã gãnh tỹ ti pẽn kykũg mũ gé. Ti pẽn ki nhun ke fi tóg mũ gé. Kỹ fi tóg ti pẽn tãg mũ sir, garrafa ki jẽ ẽn tỹ.

39 Kỹ Fariseu ẽn tóg vég mũ, ù tỹ Jesus mỹ: “inh mré jẽn kãtĩg,” he ja ẽn ti. Kỹ tóg to jykrén mũ, ùn tỹtã fi to, Jesus to ke gé. “Ti tỹ tỹ Topẽ vĩ tó tĩ nĩ ra tóg fi ki kanhró nĩnh

mũ vễ,” he tóg. “Hã ra tóg ki kagtĩg nĩ ve nĩ. Ûn mén ja e fi vễ mỷr, Topẽ vĩ mranh fi tóg tũgtĩ mỷr, hã ra tóg fi tỹ ã pẽn mẽ ên kamẽg tũ nĩ, Jesus i,” he tóg, to jykrén kỹ, Fariseu ên ti.

⁴⁰ Hã ra Jesus tóg ki kanhró nĩ. Kỹ tóg ti mỷ: “Simão!,” he mũ. “Sỹ ã mré vემեն ke vễ,” he tóg. Kỹ tóg ti mỷ: “ha tó,” he mũ sir, Jesus mỷ.

⁴¹ Kỹ tóg: “kejẽn patrão ù tóg nĩgtĩ,” he mũ. “Ti camarada régre ag tóg ti mỷ név(e) nỹtĩ. Ûn név(e) ên vỹ tỹ 500 (ke) nĩ, kar ùn név(e) vỹ tỹ 50 (ke) nĩ gé.

⁴² Hã ra ag tỹ ne tỹ kajãm ke tóg tũ tĩ, kỹ tóg ag mỷ tỹ tũg' he mũ, ag név(e) tỹ, ag patrão ti. Kỹ ti camarada tỹ hẽ nỹ hỹn ti to há kãfór nĩ?” he tóg, Jesus ti, ti tỹ Simão ki jẽmẽn kỹ.

⁴³ Kỹ Simão tóg ti mỷ: “ùn név(e) mág ja ên hỹn tóg ti to há kãfór nĩ,” he mũ. Kỹ Jesus tóg ti mỷ: “ki hã ã tóg tó mũ,” he mũ.

⁴⁴ Kỹ tóg fi jé vĩrĩn ke mũ sir, ùn tỹtá kórég ên fi jé, kỹ tóg Simão mỷ: “ã mỷ fi vég mũ?” he mũ. “Ã kanẽ var tỹ fi tóg inh pẽn kugpég mũ, kar fi tóg ã gãnh tỹ inh pẽn kykũg mũ gé,” he tóg. “Fi jãvó ã tóg inh mỷ goj ven tũ nĩ, isỹ inh pẽn kugpe jé, sỹ ã ãn kãra rã kỹ,” he tóg.

⁴⁵ “Inh ki nhun ke ja tũ ã tóg nĩ, ã jãvo fi tóg inh pẽn ki nhun ke mũ, to fi krónh ke tũ nĩ jãvo,” he tóg.

⁴⁶ “Ã pi(jé) inh gãnh tãg ja nĩ, ã jãvo fi tóg inh pẽn tãg,” he tóg.

⁴⁷ “Hã kỹ sóg ã mỷ tó mũ. Topẽ vĩ mranh tỹ hẽn ri ke han fi tóg. Hã ra tóg fi mỷ vẽnh pãte fón kãn mũ sir, Topẽ ti, fi tỹ iso há tãvĩ nĩn kỹ, sỹ tỹ fi fe nĩn kỹ. Û mỷ tóg kejẽn vẽnh pãte fón pir han tũ, Topẽ ti, ù tỹ patrão ki név(e) sĩ ên ri ke mỷ. Kỹ ên tóg ti to há sĩ nĩ gé sir, fi tỹ iso há tãvĩ jãvo,” he tóg.

⁴⁸ Kỹ tóg fi mỷ: “ã tỹ Topẽ vĩ mranh ja ên tỹ sóg vẽnh pãte fón mũ,” he mũ, Jesus ti.

⁴⁹ Kỹ ti mré jẽg mũ ag tóg to jykrén mũ sir, ti vỹ to. Kỹ ag tóg jagnẽ mỷ ke mũ. “Ti hã mỷ ěg tỹ Topẽ vĩ mranh kỹ vẽnh pãte fón ke mũ vỹ?” he ag tóg mũ. “Topẽ hã ne vẽnh pãte fón há nĩ’, hã kỹ tóg ěg mỷ vẽnhmỹ tĩ,” he ag tóg.

⁵⁰ Hã ra Jesus tóg fi mỷ ke mãn mũ. “Ã tỹ inh ki rã kỹ sóg ã kren han mũ,” he tóg. “Ha jatun mỷ tĩg,” he tóg, Jesus ti, ùn tỹtá kórég ja ên fi mỷ.

8

Ûn tỹtá fag tỹ Jesus ki rĩr

¹ Tag pãte Jesus vỹ cidade kar mĩ tũg kãn mũ, ěmã kãsir mĩ ke gé. Topẽ vỹ tó tóg tĩ mũ. Ag mỷ tóg: “Topẽ tỹ tỹ ãjag pã'i nĩ sór vễ,” he mũ. Kỹ ù tỹ 12 (ke) ag tóg ti mré mũ mũ.

² Kỹ ùn tỹtá fag tóg ti mré mũ mũ gé sir. Jesus tóg fag tỹ há' he ja nĩ. Û fag tóg kaga ja nỹtĩgtĩ, kỹ ù fag tóg jagrẽ kórég ja nỹtĩgtĩ gé. Hã ra Jesus tóg fag tỹ hághá' he kãn ja nĩ. Û fi vỹ tỹ Maria fi nĩ, Madalena he mũ tag fi. Jesus vỹ fi jagrẽ kórég pan ja nĩ, ù tỹ

7 (ke) vĕ, ha mĕ, fi jagrĕ kórég ag.

³ Kar ũ fi vỹ tỹ Joana fi nĩ gé, Cuza prũ fi vĕ, pã'i mág tỹ Herodes tũ vég nĩ ěn prũ fi vĕ. Kar ũ fi vỹ tỹ Suzana fi nĩ gé. Kar ũ fag vỹ ti mré mũ mũ gé, ti mỹ vĕjĕn han jé. Ājag tũ tỹ fag tóg ti mỹ vĕjĕn han tĩ, kar ti mré mũ tĩ ag mré hã.

*Nén fy to comparação
(Mt 13.1-9; Mc 4.1-9)*

⁴ Kejĕn ũn e ag vỹ vĕnh mǎn mũ sir, ěmã tỹ hĕn ri ke tá kãmũ kỹ. Jesus to ag tóg vĕnh mǎn mũ. Kỹ tóg ag kanhrânran kỹ ag mỹ: “ũ tỹ Topĕ vĩ tó tĩ vỹ ge nỹnh mũ, ha mĕ,” he mũ.

⁵ “Kejĕn ũ tóg trigo fy vāvãm tĩ mũ. Ti tỹ vāvãm kỹ ti fy ũ tóg ěpry kri, ěmĩn kri vár mũ, kỹ ag tóg ti sǎn mũ, kỹ sĕsĩ ag vỹ ko mũ gé sir, jĕsĩ tóg tỹ tũg' ke mũ sir.

⁶ Ti fy ũ tóg pǎró kri vár mũ. Kỹ tóg mur mũ vĕ, hã ra tóg tóg mũ sir. Ga tỹ sĩ nĩn kỹ tóg goj ve ja tũ nĩ, hã kỹ tóg tóg mũ sir.

⁷ Ti fy ũ tóg sónh kãki vár mũ. Kỹ sónh tóg ti mré mur mũ, ti kri tóg rũm ke mũ sir. Kỹ tóg ter mũ sir, sónh kãki.

⁸ Ti fy ũ tóg ga há kri vár mũ. Kỹ tóg mur há han mũ, kanĕ há ke gé. Kanĕ tỹ 100 (ke) han tóg mũ sir, ga há kri,” he tóg, Jesus ti. Kỹ tóg tag tó kar kỹ prĕr mũ. “!..Ũ nĩgrĕg nỹtĩ ag tỹ ki ěmĕn jé..!” he tóg, prĕr kỹ, Jesus ti.

*Jesus tỹ nĕn fy to comparación kãmĕn
(Mt 13.10-23; Mc 4.10-20)*

⁹ Kỹ ti mré mũ tĩ ag tóg ti ki jĕmĕg mũ. “Ne to ke nĕ, trigo fy kãme tag ti?” he ag tóg mũ, Jesus mỹ.

¹⁰ Kỹ tóg ag mỹ: “ãjag hã mỹ sóg Topĕ tỹ tỹ ěg pã'i nĩ ěn kãmĕn há han ke mũ, ijo tó ja tũ ěn ti,” he mũ. “Hã ra sóg ũ ag mỹ comparação tãvĩ han mũ. Ag mỹ sóg tó há han ke tũ nĩ, ũ tỹ ón kỹ mĕg mũ ag mỹ, kỹ ag tóg ãjag tỹ vég mũ ra ki kagtũg nỹtĩ, ãjag tỹ mĕg mũ ra ag tóg to jykrĕn tũ nỹtĩ, kỹ tóg ag tỹ to jykrĕn ke tũ tĩ,” he tóg.

¹¹ Kỹ tóg ag mỹ kãmĕn mũ. “Nén fy kãme vỹ ge nỹnh mũ, ha mĕ,” he tóg. “Topĕ vĩ vỹ trigo fy ri ke nĩ.

¹² Ũ ag tóg Topĕ vĩ jĕmĕg tĩ. Jĕmĕ kar kỹ Japo tóg ag mỹ tỹ tũg' he tĩ, Topĕ vĩ tỹ. Kỹ ag tóg sir ti ki ge tũ nĩgtĩ, krenkren ke tũ ag nĩgtĩ sir. Kỹ tóg ěpry ěn, ěmĩn kri vár mũ ěn ri ke nĩ, ěn ti.

¹³ Kar ũ ag tóg pǎró kri vár mũ ěn ri ke nỹtĩ gé. Mĕg ag tóg tĩ vĕ, Topĕ vĩ ti. Kỹ ag tóg: “hej,” he mũ. Ag mỹ tóg sér tĩ sir. Hã ra ag tóg tỹ nĕn kré jãre tũ ri ke nỹtĩ mỹr, ha mĕ. Mũ sĩ han ag tóg mũ, Topĕ mré. Nén ũ jagy kutĕ kỹ ag tóg Topĕ tovãnh mũ sir, ag tỹ Topĕ vĩ mranh sór kỹ.

¹⁴ Kar ti tỹ sónh kãki vár mũ vỹ ge nỹtĩgtĩ gé. Topĕ vĩ mĕg ag tóg tĩ gé. Hã ra ag tóg mũ mũ sir, ãjag rãnrãj nón. Ón kỹ ag tóg rico nỹtĩ sór mũ, ãjag rãnrãj to. Hã to ag tóg krĩ kufy nỹtĩ. Nĕn kar to ěn ag tóg tĩ, kỹ tag hã ne ag mỹ há tĩ'. Hã kỹ ag tóg Topĕ vĩ to jykrĕn

mãn tũ nĩgtĩ sir. Hã kÿ ag tóg kanē há han tũ nĩ gé sir.

¹⁵ Kar ga há kri vár mũ vÿ ge nĩ gé. Jēmēg ag tóg tĩ gé, Topē vĩ ti. Kÿ ag tóg ajag fe tÿ ti ki rãg mũ sir, ag tÿ ti vĩ ki króm jé. Kÿ ag tóg kanē há han mũ sir. Komēr hã ag tóg kanē há han', han', he mũ, ag tÿ nén ù jagy vэг mũ ra," he tóg. Ti tÿ ag mũ ěg tÿ Topē tovãnh ke tũ kãmén hã vє, Jesus ti.

Lampião to comparação
(Mc 4.21-25)

¹⁶ Kÿ tóg ag mũ: ěg tÿ lampião grug kÿ ěg pi(jé) kěj krēm fэг tĩ," he mũ. "Ěg pi(jé) cama krēm fэг tĩ gé', néj gru ti. Ti fэг jafã kri ěg tóg ti fэг tĩ. Kÿ vєnh kar tóg vэг mũ sir, ag tÿ ěg ãn kãra kãgen kÿ.

¹⁷ Ge ti nÿ, sÿ ajag mũ nén tó mũ kar ti. Ver ajag tóg to jykrén tũ nĩgtĩ. Ajag tÿ vãhã to jykrén kãn ke vє. Ver ajag tóg ki kagtĩg nÿtĩ. Ajag tÿ vãhã ki kanhrãn kãn ke vє," he tóg.

¹⁸ "Hã kÿ jēmē há han nĩ. Û tÿ to jykrén há han kÿ tóg ù to jykrén mãn', ù to jykrén mãn', henh ke mũ. Û tÿ inh vĩ to jykrén há han tũ nĩn kÿ tóg ti mũ tũg' he kãn mũ, ti tÿ nén ù to jykrén mũ kar ěn mré hã," he tóg. Ti tÿ ag mũ ěg tÿ ti vĩ to jykrén há han ke kãmén hã vє, Jesus ti.

Jesus mré ke pє fag
(Mt 12.46-50; Mc 3.31-35)

¹⁹ Kejēn Jesus mÿnh fi vÿ ti venh kãtĩ mũ, ti jãvy ag mré. Hã ra fag tóg ti ki junjun tũ nĩ. Ti pėnĩn tóg fór tãvĩ tĩ, hã kÿ ag

tóg ti ki junjun tũ nĩ, ti mÿnh fi mré hã.

²⁰ Kÿ ù tóg ti mũ: "ã mÿnh fi vÿ re tá jě, ã jãvy ag mré," he mũ. "Fag tÿ ã venh kãmũ vє," he tóg, Jesus mũ.

²¹ Hã ra Jesus tóg ti mũ: "mě'," he mũ. "Hã ra ù tÿ Topē vĩ jēmēg mũ fag vÿ inh mÿnh pє ri ke nÿtĩ, inh jãvy pє ri ke ke gé, ù tÿ Topē vĩ ki króm mũ ag," he tóg, Jesus ti.

Jesus tÿ kóho tÿ tũg' he
(Mt 8.23-27; Mc 4.35-41)

²² Kejēn tóg canoa kãra rã mũ, ti mré mũ tĩ ag mré. Kÿ tóg ag mũ: "mũ nÿ, goj nig kafã ù ra," he mũ. Kÿ ag tóg mũ mũ, canoa kãmĩ.

²³ Ag mũn ki Jesus tóg nũr mũ sir. Kÿ vãhã kóho jũ tóg kraug he mũ sir. Króg ke tóg mũ sir, kóho ti. Kÿ goj tóg canoa kãki krém ke mũ. Ti fãn sór tóg mũ sir. Kÿ tóg ag mũ ag kãgter ha mẽ tĩ.

²⁴ Kÿ ag tóg ti rĩn mũ mũ. Ti mũ ag tóg: "Senhor', Senhor'," he mũ. "Ěg mũ ěg kãgter ha mẽ tóg tĩ," he ag tóg ti mũ. Kÿ tóg rĩr mũ sir. Kÿ tóg kóho mũ vĩ mũ, goj mũ ke gé, goj vóg nén ěn mũ. Kÿ tóg krÿg' he mũ sir, kóho ti. Katy' he tóg mũ sir.

²⁵ Kÿ tóg ag mũ ke mũ. "Ajag tÿ ne jé inh ki ge há han tũ nĩ nē?" he tóg. Kÿ ag tóg kanē jur nÿtĩ nĩ. Ag mũ tóg e tĩ, kÿ ag tóg jagnē mũ: "ti jykre tóg ěg mũ e tĩ," he mũ. "Kóho mũ tóg vĩ mũ, Kÿ tóg ki hã ke mũ, kóho ti, goj ti ke gé," he ag tóg mũ, jagnē mũ.

Jesus tỹ ùn jagrẽ kórég tỹ há' he

(Mt 8.28-34; Mc 5.1-20)

²⁶ Kóho tỹ tũg' hen kỹ ag tóg Gerasa ag jamã tá junjun mũ sir. Goj nig kafã ù tá tóg nĩ, ga tỹ Galiléia to hã.

²⁷ Kỹ tóg canoa kãki kãkutẽ mũ, Jesus ti. Kỹ ù tóg ti kato tẽ mũ, cidade tá ke ù, hã ra tóg jagrẽ kórég tỹ hẽn ri ke nĩ. Si há tóg tĩ ha, ti jagrẽ e nĩ ti. Kỹ tóg kur tũ nĩ. Kato r tóg nĩ. Ìn tũ ti nĩ gé. Vẽnh kej tá tóg jẽgtĩ, pãró tỹ vẽnh kej tá.

²⁸ Ën tóg Jesus kato tẽ mũ. Kỹ tóg ti krẽm mũg ke mũ. Prẽr kỹ tóg: “!..ã isỹ hẽn ri kenh mũ, Jesus'..!” he mũ. “!..Kynhmỹ Topẽ kósin'..!” he tóg. “!..Ã mỹ sóg to vĩnh mũ, ã tỹ inh vóg kónãn tũ nĩ jé..!” he tóg, prẽr kỹ, ùn jagrẽ kórég ãn ti.

²⁹ Hã ra Jesus tóg Nén-Kórég mỹ: “ti ki pa jẽg,” he ja nĩ, hã kỹ tóg prẽr mũ. Ti ki vĩrĩn ke', ti ki vĩrĩn ke' tỹ hẽn ri ke han ja ag tóg nĩgtĩ, Nén-Kórég ag. Kỹ ti mré ke ag tóg ti se ja nĩgtĩ gé, ti mrĩnh kỹ, ferro tỹ, ti nĩgé, ti pẽn ke gé. Hã ra tóg ã se ja kykym kãn ja nĩgtĩ. Kỹ Nén-Kórég ag tóg ãmã tũg ja ra ti tĩn ja nĩgtĩ. Hã kỹ tóg vẽnh kej mũ tĩgtĩ, ùn jagrẽ kórég ãn ti.

³⁰ Kỹ Jesus tóg ti mỹ: “ã jiji hẽn ri ke tĩ?” he mũ. Kỹ tóg: “Mil,” he mũ. Nén-Kórég tỹ hẽn ri ke ag tỹ tóg jagrẽ nĩ, hã kỹ tóg: “Mil,” he mũ.

³¹ Kỹ ag tóg Jesus mỹ to vĩ mũ, Nén-Kórég ag, ti tỹ nũgme ra ag jẽgnẽg tũ nĩ jé, inferno ra.

³² Hã ra porco tỹ hẽn ri ke tóg tá jẽg nỹtĩ nĩ, pãnónh tá. Kỹ Nén-Kórég ag tóg Jesus mỹ to vĩ e han, ti tỹ ag mỹ: “ha porco ki ge jẽg, ge kỹ,” he jé. Kỹ tóg ag mỹ ke mũ.

³³ Kỹ ag tóg ãn ki kãpa mũ sir, Nén-Kórég ag. Porco ag ki ag tóg ge mũ sir. Kỹ porco ag tóg mer ki re mũ, rãn ki, goj nig ra. Goj ki ag tóg vár mũ sir. Nãgnãr kỹ ag tóg tũ' he kãn mũ sir.

³⁴ Kỹ ù tỹ porco ki rĩr tĩ ag tóg vég mũ. Kỹ ag tóg pětẽ mũ, cidade ra. Tá ag tóg kãmén mũ, ãmã kãsir mũ hã ke gé.

³⁵ Kỹ tá ke ag tóg ra mũ kãn mũ, ag vĩ mẽg mũ ag. Ag tỹ nẽn ãn ve sór vẽn. Ra mũ kỹ ag tóg Jesus tá junjun mũ. Kỹ ag tóg ti vég mũ sir, ùn jagrẽ kórég ja ti. Nĩ tóg mũ ha, Jesus rã hã. Kur tóg nĩ ha, krĩ há tóg nĩ ha. Kỹ ag fe tóg jũrũn ke mũ sir.

³⁶ Û tỹ Jesus tỹ ti tỹ há' he mũ vég mũ ãn ag tóg kãmén kãn mũ sir, ù tỹ ùri ti venh kãmũ mũ ãn ag mỹ. Ûn jagrẽ kórég tó ag tóg mũ, ag mỹ, Jesus tỹ ti han ja ti, porco kãgter ja ti ke gé.

³⁷ Kỹ tá ke ag tóg ti mỹ to vĩ mũ, Jesus mỹ, ti tỹ tá kãkutẽ jé. Gerasa tá ke kar ag tóg kanẽ jur nỹtĩ, hã kỹ ag tóg ti mỹ: “ã tĩg kỹ tóg ãg mỹ há tĩnh mũ,” he mũ. Kỹ tóg canoa kãra rã kỹ tĩg sór mũ, ti mré mũ tĩ ag mré.

³⁸ Kỹ ùn jagrẽ kórég ja tóg ti mỹ to vĩ e han mũ, “nhỹ ã mré tĩg mũ,” hen kỹ, Jesus mỹ. Hã ra Jesus tóg ti pẽre tĩg jãvãnh nĩ.

39 “Ā jamā ra vŷn ké,” he tóg ti mŷ. “Tá ag mŷ kāmén nī, Topē tŷ ā tŷ há’ he ja tag ti,” he tóg, Jesus ti. Kŷ tóg tī mŷ sir, ūn jagrē kórég ja ti. Cidade kar mī tóg tī mŷ. Ag mŷ tóg kāmén mŷ sir, Jesus tŷ ti tŷ há’ he ja ěn ti.

Jesus tŷ Jairo kósin fi rŷn mǎn

(Mt 9.18-26; Mc 5.21-43)

40 Kŷ Jesus tóg vŷn ke mŷ, nig kafā ū ra. Kŷ tóg vēnh e ěn mŷ sér tī, ag tŷ ti ven kŷ. Ti jāvānh ja ag tóg nī, hā kŷ tóg ag mŷ sér tī, ag tŷ ti ven kŷ.

41 Kŷ vāhā ū tóg ti ki jun mŷ, Jesus ki. Israel ag vēnh kanhrān jafā to pā’i vē, ti jyjyn hā vŷ: Jairo, he mŷ. Ěn tóg Jesus krēm mŷg ke mŷ, ā jakrī tŷ tóg jē mŷ, kŷ tóg ti mŷ vī mŷ, ti tŷ ti ĩn ra tŷg jé, Jesus ti.

42 Ti kósin pir fi vŷ kaga tāvī nŷ, kŷ fi kaga tāvī ěn vŷ fi tén sór mŷ. Kri prŷg tŷ 12 (ke) fi nī, Jairo kósin pir ěn fi. Kŷ tóg ti mré tī mŷ, Jesus ti.

Ti tŷg kŷ ūn e ag tóg ti nón mŷ mŷ.

43 Kŷ ag kā ū fi tóg ag pétēm mŷ. Kyvénh krŷg tŷ han kŷ fi tóg nī, prŷg tŷ 12 (ke) ki. Hā ra ag tóg fi kaga tŷ hē ri ke ja tŷ nī, ag tŷ fi kygtāg mŷ ra, médico ag.

44 Ěn fi tóg ti nón ti kur mráj vóg mŷ. Kŷ vēšmér fi kyvénh tóg tŷ’ he mŷ.

45 Kŷ Jesus tóg: “ū nŷ inh kur vóg?” he mŷ. Hā ra vēnh kar tóg: “inh hā tŷ vē, inh hā tŷ vē,” he mŷ. Kŷ Pedro tóg ti mŷ vī mŷ, Jesus mré mŷ tī ag

kar ke gé. Ti mŷ ag tóg: “ā kur mē kǎn ěg tóg, hā ra ā tóg: “ū nŷ inh kur vóg?” he mŷ,” he tóg, Pedro ti, Jesus mŷ.

46 Hā ra Jesus tóg: “vó,” he mŷ. “Ū tóg inh kur vóg,” he tóg. “Inh kuprīg tóg inh ki kǎtére, hā kŷ sóg ki kanhrān mŷ,” he tóg.

47 Kŷ ūn tŷtá ěn fi tóg to jykren mŷ sir. “Ti hŷn tóg inh vé,” he fi tóg. Hā kŷ fi tóg jŷrŷn ke kŷ kǎtī mŷ. Jesus krēm fi tóg mŷg ke mŷ. Kŷ fi tóg ti mŷ tó kǎn mŷ, vēnh kar rŷnve. Ti mŷ fi tóg ā kaga ja ěn kāmén kǎn mŷ, fi tŷ ti kur vóg ja ěn ti ke gé, fi tŷ há’ he ja ti ke gé. “Isŷ ā kur vóg kŷ sóg vēšmér há’ hé,” he fi tóg, Jesus mŷ.

48 Kŷ tóg fi mŷ vī há han mŷ, Jesus ti. “Inh kósin’,” he tóg. “Ā tŷ inh ki rā kŷ ā tóg há’ hé. Ha tŷg, jatun mŷ. Há ā tóg nī ha,” he tóg fi mŷ, fi han kar kŷ, Jesus ti.

49 Ti tŷ ver fi mré vēmén jē ra ū tóg jun mŷ, pā’i tŷ Jairo ěn ĩn tá. “Ā kósin fi hur ter,” he tóg, pā’i mŷ. “Tŷg ja fi tóg nī ha,” he tóg, Jairo mŷ. “Hā kŷ ti mŷ: kunīg, he mǎn tŷg nī, ti kutān mǎn tŷg nī,” he tóg.

50 Hā ra Jesus tóg mēg mŷ, kŷ tóg ti mŷ: “mŷmēg tŷg nī,” he mŷ. “Inh vī hā kri fimnī, kŷ ā kósin fi tóg há’ henh mŷ,” he tóg.

51 Kŷ ag tóg mŷ kŷ ti ĩn tá junjun mŷ sir, Jairo ĩn tá. Kŷ Jesus tóg ag tŷ ĩn kǎra ge kamēg mŷ. “Pedro vŷ ĩn ra rānh mŷ, inh mré, João ke gé, João kǎke tŷ Tiago ke gé, gŷr fi

panh ke gé, fi mýnh fi ke gé,” he tóg, Jesus ti.

⁵² Hã ra ùn e fag vỹ tá nýtĩ nĩ gé, kygfỹ fag nýtĩ nĩ, vësýrénh ký, Ký Jesus tóg fag mỹ: “kygfỹ tũg ra,” he mũ. “Fi pí(jé) ter mũ'. Fi nũr vë,” he tóg.

⁵³ Hã ra fag tóg ti nyg mũ. Fi ter ki kanhró fag tóg nýtĩ, hã ký fag tóg ti nyg mũ. Hã ra Jesus tóg fag mỹ: “ha mũjëg,” he mũ.

⁵⁴ Fag mũn kar ký Jesus tóg fi nĩgé kãgmĩg mũ, ký tóg prër mũ sir. “!..Nĩ ra, já..!” he tóg, jamã hár(a).

⁵⁵ Ký fi kuprĩg tóg fi to vỹn ke mũ. Nĩ fi tóg mũ sir, mýr, ha mẽ, ùn ter mũ ên fi. Ký Jesus tóg fag mỹ tó mũ, fag tỹ fi mỹ vëjën ven jé.

⁵⁶ Ký tóg fi han mũ fag mỹ e tãvĩ tĩ sir. Hã ra Jesus tóg fag mỹ tó mũ, fag tỹ ù mỹ tó tũg jé, fi rĩr mãn ja tag ti. Hã ra tóg fi ter mũ ra fi rĩn, Jesus ti.

9

Jesus tỹ ãmré mũ tĩ agjëgnë (Mt 10.5-15; Mc 6.7-13)

¹ Ký Jesus tóg ù tỹ 12 (ke) ag jé prër mũ, ti tỹ ùn vin mũ ên ag, ag vënh mãn jé. Ag vënh mãn ký tóg ag tar han mũ sir, ag tỹ vënh jagrë kórég pan jé, ag tỹ ùn kagyga ag tỹ há' he jé gé.

² Ký tóg ag jëgnëg mũ sir, ag tỹ Topë tỹ tỹ ëg pã'i nĩ ên kãmén jé, vënh kar mỹ, ag tỹ ùn kagyga ag tỹ há' he kãn jé gé.

³ Hã ký tóg ag mỹ ke mũ sir. “Ăjag mũn ký nén ù ma

mũ tũg nĩ, vátó va mũ tũg nĩ, sacon ke gé, bolsa ên, pão ke gé, jãnkamy ke gé. Kur régre rĩnh tũg nĩ gé,” he tóg.

⁴ “Ăjag tỹ ãn ra ge mũ hã ki nũgnũr' hemnĩ, hã ki ãjag tỹ kurã ki kãpanh ke tá krỹg nĩ,” he tóg.

⁵ “Ag tỹ ãjag mỹ: “kãge jëg ra,” he jãvãnh nũn ký tá kãpamnĩ. Tá kãpa ký ãjag pën hã kykũnhkũnh nĩ, ag tỹ to ki kanhró nýtĩ jé sir, Topë tỹ ag tovãnh ken ki,” he tóg, Jesus ti.

⁶ Ti tỹ ag jëgnën ký ag tóg mũ sir, ù tỹ 12 (ke) ag. Êmã kar mũ ag tóg mũ sir. Topë kãmén ag tóg mũ mũ sir. Ûn kagyga ag tỹ há' he kãn ag tóg mũ gé sir, fag ke gé.

Jesus kãme tỹ pã'i tỹ Herodes mỹ e

(Mt 14.1-12; Mc 6.14-29)

⁷ Ký pã'i mág tỹ governador tỹ Herodes vỹ mëg mũ sir, Jesus tỹ nén han mũ ti. Ký tóg ti mỹ e tĩ. Ký ti tỹ ne to jykrén ke tóg tũ tĩ. Hã ra ù ag tóg Jesus to: “João Batista vë,” he tĩ. “João hỹn tóg ã ter ký rĩr mãn,” he ag tóg tĩ, Jesus to.

⁸ Jo ù ag tóg ti to: “Elias vë,” he tĩ gé. “Ti hỹn vënh ven mãn, vãsỹ Topë vĩ tó tĩ ên, Elias ti,” he ag tóg tĩ gé, Jesus to. Ký ù ag tóg ti to: “vãsỹ Topë vĩ tó tĩ ù hỹn rĩr mãn,” he tĩ gé.

⁹ Hã jëmë tóg, Herodes ti, ký tóg to jykrén ký: “João mỹ vó?” he mũ, Jesus to. “Hã ra sóg João krĩ kym, ký tóg tũ' he mũ. Ký ù nẽ, hỹn'?” he tóg. “Nén han vãnh tỹ hën ri ke hyn han tóg huri. Û nẽ, hỹn'?” he tóg.

Herodes ti. Kÿ tóg kejĕn ti ve sór mũ, ti tÿ ti mÿ e tĭn kÿ, hã ra Jesus vÿ ti venh tĭ tũ nĩ.

Jesus tÿ ù tÿ 5 mil (ke) ag jĕn (Mt 14.13-21; Mc 6.30-44; Jo 6.1-14)

¹⁰ Kejĕn Jesus tÿ ùn vin mũ ag vÿ Jesus to vÿnvÿn ke mũ, ti tÿ ag jĕgnĕ ja ĕn tá. Ti mÿ ag tóg kãmén mũ sir, ag tÿ nĕn han ja ĕn kar ti. Kÿ tóg ag mré vĕnh péju kÿ tĭ mũ, ĕmã tÿ Betsaida ra, vyr mÿ ag mré vĕmén jé.

¹¹ Hã ra ùn e ĕn ag tóg mĕg mũ, Jesus tĭg ti, kÿ ag tóg ti nón mũ mũ. Ag tÿ ti pétĕm kÿ tóg ag mÿ vĭ há han mũ, Jesus ti. Ag mÿ tóg kãmén mũ, Topĕ tÿ tÿ ĕg pã'i nĩ sór ti. Ag kãmĩ ùn kagyga tÿ há' he tóg mũ gé, fag mré hã.

¹² Ti tÿ ag mÿ tó jĕ ki tóg rãké nÿ sir, kÿ ù tÿ 12 (ke) ag tóg Jesus to kãmũ mũ. Ti mÿ ag tóg: “ã tÿ ag jĕgnĕnh há tóg tĭ,” he mũ, “ag tÿ ĕmã kar mĩ mũ jé, pão comprar he jé, tá nũgnũr jé ke gé. Tag ki tóg ĕmã tũ nĩ,” he ag tóg, Jesus mÿ.

¹³ Hã ra Jesus tóg ag mÿ: “vó,” he mũ. “Ha inhhã ag jĕn,” he tóg. Kÿ ag tóg ti mÿ: “hã ra vĕjĕn tóg ĕg mÿ tũ tĭ,” he mũ. “Pão tÿ 5 (ke) hã vÿ ki nÿtĭ, pirã régre mré ke gé. Ĕg mÿ ag jo comprar henh mũ vÿ, vĕjĕn ti?” he ag tóg, Jesus mÿ.

¹⁴ ù tÿ mil tÿ 5 (ke) ag vĕ, ag tãvĭ, fag mré tó tũ ra. Hã ra fag tóg tá e nÿtĭ gé, gĭr mré ke gé.

Ag tÿ ti mÿ ke kÿ Jesus tóg ã mré mũ tĭ ag mÿ: “ag mÿ

tugtó, ag nĭgnĩ jé,” he mũ, “ag tÿ vĕnh nĩkrĕn jé, ù tÿ 50 (ke) pãte ù tÿ 50 (ke) ù pãte nĭgnĩ jé,” he tóg, Jesus ti, ã mré mũ tĭ ag mÿ.

¹⁵ Kÿ ag tóg ke mũ sir. Kÿ vĕnh kar tóg nĭgnĩ mũ sir.

¹⁶ Kÿ tóg pão tÿ 5 (ke) in gég mũ, pirã régre ĕn mré. Kÿ tóg kanhkã ki ĕvãnh mũ, kÿ tóg Topĕ mré vĭ mũ sir. Kÿ tóg pão vĕnh kãpópãm mũ sir. Kÿ tóg ã mré mũ tĭ ag mÿ vin mũ, ag tÿ ùn e ĕn mÿ vĕnh kãpópãm jé, pirã ĕn mré hã.

¹⁷ Kÿ vĕnh kar tóg ko kãn kÿ funfór mũ sir. Kÿ ag tóg ti ke ĕn gég mũ. Kĕj tÿ 12 (ke) fãn tóg, vĕjĕn mru ĕn ti. Hã kÿ Jesus tóg pão tÿ 5 (ke) tÿ ùn e ag fónfãn ja nĭgtĭ.

Pedro tÿ Jesus tó

(Mt 16.13-19; Mc 8.27-29)

¹⁸ Kejĕn Jesus tóg Topĕ mré vĭ mũ, ã pin kÿ. Hã ra ti mré mũ tĭ ag tóg ti mré nÿtĭ nĩ. Kÿ tóg ag mÿ ke mũ. “Ag iso hĕ ri ke tĭ?” he tóg ag mÿ, Jesus ti.

¹⁹ Kÿ ag tóg ti mÿ: “ù ag vÿ: João Batista vĕ, he tĭ, jãvo ù ag vÿ: Elias vĕ, he tĭ gé, jãvo ù ag vÿ: vãsÿ Topĕ vĭ tó tĭ ù vÿ rĭr mãn, he tĭ gé, ã to,” he ag tóg, Jesus mÿ.

²⁰ Kÿ tóg ag mÿ: “ag jãvo ãjag hĕ ri ke tĭ, iso?” he mũ. Kÿ Pedro vÿtĭ mÿ kãmén mũ. “Tÿ ã Cristo nĩ, Topĕ tÿ ĕg mÿ ùn jĕnĕg mũ ĕn vÿ tÿ ã nĩ,” he tóg, Pedro ti, Jesus mÿ.

²¹ Kÿ tóg ti mÿ vĭ tar han mũ, Jesus ti, ag tÿ ù mÿ tó tũ nĩ jé ver, ti tÿ tÿ Cristo nĩ ĕn.

*Jesus tỹ ã jagtar ke tó vén
(Mt 16.20-28; Mc 8.30-9.1)*

22 Kỹ tóg ag mỹ kãmén mũ.
“Tỹ sóg ãprã ke fi kósín ãn nĩ,”
he tóg. “Ijagtar jagy han ke
vẽ,” he tóg. “Kófa ag tỹ iso:
kórég ti nĩ, henh ke vễ, Topẽ
tũ ki rĩr tĩ to pã'i ag ke gé, Topẽ
vĩ to professor ag ke gé. Ag tỹ
isén ke vễ. Kurã tâgtũ tũg mũ
ra sóg rĩr mãn mũ hã ra,” he
tóg, Jesus ti.

23 Kỹ Jesus tóg vễnh kar mỹ
tó mũ. “Ãjag tỹ inh mré kãmũ
kỹ tóg há tĩnh mũ,” he tóg. “Kỹ
ãjag jykre tovãnh nĩ, ãjag tỹ isũ
tãvĩ han jé. Ha vé, ag tỹ inh
cruz tỹ inh kri fi kỹ sóg tũg ke
mũ, ag tỹ to isa kỹ isén jé, ha
vemnĩ. Vễnh nenh ke tũ sóg
nĩ. Isỹ tag han ri ke han nĩ,
kurã kar ki, ãjag tỹ inh mré
mũ sór nỹtĩn kỹ,” he tóg.

24 “Ãjag tỹ ãjag jykre hã han
sór kỹ ãjag tỹ nũgme ki vár ke
vễ. Jãvo ãjag tỹ isugrĩn ãjag
jykre tovãnh kỹ ãjag krenkren
ke vễ, ãjag kãgter ke mũ (hã)
ra.

25 ãjag tỹ ga kri mũn kỹ ãjag
tóg nén kar ganhar he sór mũ.
Kỹ ãjag kuprĩg vỹ vãfor ke mũ.
Kỹ tóg kórég nỹ sir, ãjag rico
tãvĩ nỹtĩ ra. Ganho há venh ke
tũ ãjag tóg ke mũ, gen kỹ.

26 Iso mỹ'ãg tũg nĩ, inh vỹ
to. ãjag tỹ ùri iso mỹ'ãg kỹ sóg
ãjag to mỹ'ãg ke mũ gé, inh
kãtĩg mãn ken kỹ. Tỹ sóg ãprã
ke fi kósín ãn nĩ. Sĩnvĩ ti nĩnh
mũ, inh kãtĩg mãn kỹ, inh jóg
tỹ inh jẽnẽn kỹ, ti tỹ isỹ ùn
mág han kỹ. Kỹ ti tỹ jěgně jafã
ag vỹ inh mré kãmũnh mũ gé,
Topẽ tũ ag. Ën kã sóg ãjag to

mỹ'ãg ke mũ, ãjag tỹ ùri iso
mỹ'ãg kỹ,” he tóg.

27 “Ki hã sóg tó mũ, ha mẽ.
Ãjag kãmĩ ù ag vỹ Topẽ tỹ tỹ ãg
pã'i nĩ venh ke mũ, ag ter ke
to hã, tag ki ãg mré nỹtĩ ù ag,”
he tóg, Jesus ti.

*Jesus tỹ vễnh ven ù han
(Mt 17.1-13; Mc 9.2-8)*

28 Jesus tỹ tag tó kar kỹ kurã
tỹ 8 (ke) vỹ tũg mũ. Kỹ tóg
kejẽn ag mỹ: “mũ nỹ, vyrmỹ,”
he mũ. Pedro mỹ tóg ke mũ,
João mỹ ke gé, Tiago mỹ ke gé.
Ag hã mré tóg tĩ mũ, pãnónh
ra, Topẽ mré vēmén jé.

29 Tá jun kỹ tóg Topẽ mré vỹ
mũ sir. Kỹ tóg vãhã vễnh ven
ũ han mũ, vễnh ven kupri han
tóg mũ. Ti kur tóg kóprėj nĩ,
kókov tóg nĩ, ti kur ãn ti.

30 Kỹ ùn régre ag tóg vãhã
tã vễnh ven mũ sir. Kỹ ag
tóg Jesus mré vēmén mũ sir.
Moisés vễ, Elias mré hã, ùn
régre ãn ag.

31 Ag ve vỹ ti ve ri ke nĩ
gé, Moisés mré Elias ti. Jesus
mré ag tóg vēmén mũ, ti ter
ken kãmén ag tóg mũ sir, ti tỹ
Jerusalém tá ter ke mũ ãn ti.

32 Pedro ag mỹ tóg nũr há
tãvĩ tĩ, ge ra ag tóg ag vэг mũ
sir, ag mỹ nũgnũr há (hã) ra.
Hã kỹ ag tóg Jesus tỹ ag mỹ
vễnh ven ù han mũ ãn vэг mũ
sir, ti kókov ãn ti, ti mré vēmén
mũ ag ke gé.

33 Kỹ ù tỹ Jesus mré vēmén
kỹ nỹtĩ ag tóg mũ sór mũ sir.
Kỹ Pedro tóg Jesus mỹ: “Sen-
hor',” he mũ. “Tag ki tóg há
nĩ,” he tóg. “Ëg tỹ tag ki pãjó
tãgtũ han kỹn hỹn há nĩnh mũ,
ã mỹ, Moisés mỹ, Elias mỹ ke

gé,” he tóg, Pedro ti. Hã ra tóg krĩ tũ nĩ, hã kũ tóg pãjó tó mũ.

³⁴ Pedro tũ ver ti mũ vēmén kũ kanhkã góg vỹ ag kri rũm ke mũ sir. Kũ ag tóg kamẽgmẽg mũ, kanhkã góg ẽn ti.

³⁵ Kũ vẽn vỹ tóg mẽ há' he mũ, kanhkã góg ẽn kátá, kũ tóg: “inh kósín hã vỹ,” he mũ. “Inh fe pẽ hã vỹ,” he tóg. “Ti vỹ jẽmẽ ra,” he tóg, vẽn vỹ ti, Topẽ ti.

³⁶ Ag tũ tag mẽ kar kũ Jesus tóg ã pir mũ tá jẽ nĩ sir. Ti mré vēmén ja ẽn ag ve mãn tũ ag tóg nĩ sir, Pedro ag. Kũ ag tóg mũ mũ. Hã ra ag tóg ã mũ tó tũ nĩ ver, ag tũ nén ve ja ti. Tũ vēmén tũ ag tóg nĩ ver, ag tũ kanhkã tá vẽn jykre ve ja ẽn ti.

Jesus tũ kyrũ jagrẽ kórég kutẽm

(Mt 17.14-21; Mc 9.14-29)

³⁷ Tũ vaj kũ ag tóg pãnónh ẽn tá kãre mũ, Jesus mré. Kũ ag tóg ã tũ hẽn ri ke ag vigvæg mũ sir. Jesus kato ag tóg kãmũ mũ.

³⁸ Kũ vãhã ã tóg ag kãmĩ prẽr mũ, ha mẽ. “!..Senhor..!” he tóg. “!..Inh kósín ve ra..! Inh kósín pir vỹ.

³⁹ Jagrẽ kórég ti nĩ, ha mẽ. Kũ tóg kejẽn ti kã vyryn ke tĩ, kũ tóg prẽr tĩ, kũ tóg ti ter tĩ han tĩ gé, kũ tóg jãrãn mũ. Jãrãn kũ tóg jũrũn' jũrũn' ke tĩ gé, kũ tóg kejẽn ti tovãnh mũ sir, komẽr hã, ti rỹj kar kũ.

⁴⁰ ã mré mũ tĩ ag mũ sóg to vỹ mũ vỹ, ag tũ ti jagrẽ kórég tag kutẽm jé, hã ra ag tóg ti tũ

hẽ ri ke tũ nĩ,” he tóg, ti panh ti, Jesus mũ.

⁴¹ Kũ Jesus tóg ti mũ: “ãjag ne tóg inh ki ge há han tũ nĩgtĩ,” he mũ. “Jykre pãno ãjag nỹtĩ,” he tóg. “Kysã tũ hẽn ri ke ki inh hỹn ãjag mré tĩ nĩ? Kysã tũ hẽn ri ke ki inh hỹn ãjag to fe tũg nĩ?” he tóg. “Inh mũ ti pére kãtĩg nĩ,” he tóg, Jesus ti, ti panh mũ.

⁴² Kũ ag tóg ti pére kãmũ mũ. Ti jun kũ ti jagrẽ tóg ti kã vyryn ke mũ. Ti tũ jũrũn', jũrũn' ke han tóg mũ sir. Kũ Jesus tóg ti jagrẽ mũ vỹ jũ han mũ, ti tũ ti ki kãkutẽ jé. Hã ki tóg kyrũ ẽn tũ há' he mũ sir. Kũ tóg ti panh mũ: “té,” he mũ sir.

⁴³ Kũ tóg vẽn kar mũ e tãvĩ tĩ. “Topẽ ne tóg tũ ãn mág tãvĩ nĩ', ti jykre tóg há tãvĩ nĩ,” he ag tóg mũ sir, ag tũ Jesus tũ nén han mũ to jykrén kũ.

Jesus tũ ã jagtar ke tó mãn

(Mt 17.22-23; Mc 9.30-32)

Kũ Jesus tóg ã mré mũ tĩ ag mũ:

⁴⁴ “ha mẽ há han,” he mũ. “Ëprã ke fi kósín ẽn vỹ jagtar nĩnh ke mũ. Inh hã vỹ,” he tóg. “Ëprã ke ag vỹ ãjag tũ inh ki nén han sór mũ ẽn han ke mũ,” he tóg, Jesus ti.

⁴⁵ Hã ra tóg ag tũ ti tũ ã ter ke kãmén tag to jykrén tũ nĩgtĩ. Ag tũ to jykrén mũ ra ag tóg ki kãgtũg nỹtĩ. Kũ ag tóg ãjag tũ ti ki jẽmẽ sór mũ ra ti kamẽg mũ gé, hã kũ ag tóg ti mũ: “ã tũ ne tó nẽ?” he tũ nĩ, Jesus mũ.

Ûn mág

(Mt 18.1-5; Mc 9.33-37)

46 Kejĕn Jesus mré mũ ag vỹ jagnĕ mỹ vĩ jũ han mũ. “Ĕg kã ù tỹ hĕ nỹ jagnĕ kãfór nĩ?” he ag tóg jagnĕ mỹ. Tag to ag tóg jagnĕ mỹ vĩ jũ han mũ.

47 Hã ra Jesus tóg vĕg mũ, ag tỹ nĕn to jykrĕn mũ ti. Kỹ tóg gĩr jé prĕr mũ, ti tỹ ti mré jé jé.

48 Kỹ tóg ag mỹ tag tó mũ, ha mĕ. “Gĩr tỹ ge jĕ'ỹn nĩ, ti to há nỹtĩmĩ, isugnĩn,” he tóg. “Ājag tỹ isugrĩn ti to há nỹtĩn kỹ ājag tóg iso há nỹtĩ gé sir. Ājag tỹ iso há nỹtĩn kỹ ājag tóg ù tỹ inh jĕnĕg mũ to há nỹtĩ gé sir. Kỹ ājag tỹ ĕgno kar vỹ tỹ ājag mág kãfór kar nĩnh mũ, ha mĕ, ājag tỹ tỹ ùn mág nỹtĩ sór kỹ. Tag to jykrĕn nĩ,” he tóg, Jesus ti, ag mỹ.

*Ū tỹ ĕg kato tĕ tũ ag
(Mc 9.38-40)*

49 Kỹ João tóg Jesus mỹ: “Senhor,” he mũ. “Ū ve ĕg tóg vĕnh jagrĕ pan tĩ, ā jiji tó kỹ, ĕg tỹ ùn vĕg mũ ĕn ti,” he tóg, Jesus mỹ. “Hã ra tóg ĕg mré tĩ tũ nĩgtĩ, hã kỹ ĕg tóg ti mỹ: “vĕnh jagrĕ kórĕg pan sór tũg nĩ,” hé,” he tóg, João ti, Jesus mỹ.

50 Kỹ Jesus tóg ti mỹ: “ũ mỹ: “vĕnh jagrĕ kórĕg pan tũg nĩ,” he tũg nĩ,” he mũ. “Ū tỹ ĕg kato tĕ tũ nĩn kỹ ĕg mré ke vĕ sir,” he tóg, Jesus ti, João mỹ.

Samaria tá ke ag tỹ Jesus mỹ: “kãrã ra,” he sór tũ

51 Kejĕn Jesus ter ke kurã tóg kakó nĩ sir. Kỹ tóg to jykrĕn kỹ Jerusalém ra tĩg sór mũ, ag tỹ tá ti tén jé. Kỹ tóg tũg kỹ ù ag jĕgnĕg mũ, vĕnh jo, ag

tỹ ti jun ke tó jé, cidade kãsir tá.

52 Kỹ ag tóg mũ mũ, ag tỹ tón jé. Kỹ ag tóg cidade sĩ ù ki jun mũ. Samaria tá ke ag jamã ù vĕ. Tá ag tóg ti nũr ke ve sór mũ.

53 Hã ra tá ke ag tóg ag mỹ nenh mũ. Ag mỹ ag tóg: “ājag tỹ hĕ ra mũ nĕ?” he mũ. Kỹ ag tóg: “Jerusalém ra,” he mũ. Kỹ tóg ag mỹ kórĕg nĩ, hã kỹ ag tóg ag mỹ cama ven sór tũ nĩ.

54 Kỹ Tiago tóg jũ mũ, João ke gé, Jesus mré mũ tĩ ag. Kỹ ag tóg Jesus mỹ: “Senhor,” he mũ. “Ĕg mỹ tóg há nỹnh mũ, ĕg tỹ Topĕ mỹ: “kanhkã tá pĩ tỹ ag pũn nĩ,” hen kỹ. Mỹ ã mỹ há nỹnh mũ?” he ag tóg. “Ĕg tỹ Elias tỹ nĕn han ja ĕn han há tóg tĩ,” he ag tóg, Jesus mỹ.

55 Hã ra Jesus tóg ag jé vĩrĩn ke kỹ ag mỹ: “vĩ tũg ra,” he mũ. “Topĕ jykre pijé', ājag tỹ nĕn han sór mũ tag ti. Inh pí(jé) ag tũg sór mũ'. Isỹ ag kren han sór vĕ jãvo, hã jé sóg kãtĩ mũ, inh, hã vỹ: tỹ sóg ĕprã ke fi kósĩn ĕn nĩ, he mũ,” he tóg, Jesus ti, ag mỹ.

56 Kỹ ag tóg cidade ù ra mũ mũ, tá nũgnũr jé sir.

*Ĕg tỹ Jesus mré mũnh ke
(Mt 8.18-22)*

57 Ag mũn kỹ ù tóg Jesus mỹ: “sỹ ã mré tũg há tóg tĩ,” he mũ. “Ā tỹ hĕn ra tũg kỹ sóg ã mré tũg ke mũ,” he tóg.

58 Kỹ Jesus tóg ti mỹ: “hã ra tóg jagy tĩ,” he mũ. “Īn tũ sóg nĩ. Mĩg vỹ kré nỹtĩgtĩ, jĕsĩ vỹ jagfe nỹtĩgtĩ gé, ag jãvo isỹ hĕ tá nũr ke tóg tũ tĩ. Tỹ sóg ĕprã

ke fi kósin ên nĩ,” he tóg, Jesus ti.

⁵⁹ Kĩ Jesus tóg kejên ù mĩ: “mũ nĩ, inh mré,” he mũ. Hã ra tóg ti mĩ: “inh hỹn ver tĩg mũ ha, sỹ inh panh ter kũ ga ki ti fón jé ver,” he mũ.

⁶⁰ Hã ra Jesus tóg ti mĩ: “vó,” he mũ. “Inh ki ge tũ ag vỹ ã panh kej han mũnh mũ. ã tỹ inhhã inh mré tĩg há tóg tĩ, ã tỹ Topẽ tỹ tỹ êg pã'i nĩnh ke ên kãmén jé,” he tóg ti mĩ, Jesus ti.

⁶¹ Kĩ ù tóg ti mĩ ke mũ gé sir, Jesus mĩ. “Sỹ ã mré tĩg há tóg tĩ,” he tóg. “Hã ra sóg inh jamã ra tĩg sór mũ ver, sỹ inh mré ke fag mĩ isĩg ke tó jé,” he tóg, Jesus mĩ.

⁶² Kĩ Jesus tóg ti mĩ: “vó,” he mũ gé. “Êg tỹ arado tỹ ga kũm kũ êg pi(jé) vēsỹjãm êvãnh tĩ,” he tóg. “Ge ti nĩ, ã tỹ inh mré tĩg sór kũ. Inh mré ã tóg tĩg mũ. ã tỹ ã tũ han sór tĩn kũ ã tóg Topẽ tỹ tỹ êg pã'i nĩ tá krỹg ke tũ nĩ,” he tóg, Jesus ti, ù tỹ ti mré tĩg sór mũ mĩ.

10

Û tỹ 70 (ke) ag tỹ Jesus vĩ kãmén mũ

¹ Kĩ Jesus tóg ù ag vin mũ gé sir, ù tỹ 70 (ke) ag. Kĩ tóg ag jěgněg mũ sir, ag tỹ ti jo mũ jé. Ûn régre tĩn', ùn régre tĩn' he tóg. Ag mĩ tóg ke mũ, ag tỹ êmã kar mĩ Topẽ kãmén mũn jé, cidade kar mĩ ke gé. Ag nón tóg ra tĩg sór mũ gé, Jesus ti.

² Kĩ tóg ag mĩ: “inh mĩ ag tóg êkré ri ke nỹtĩ, ãjag tỹ ùn mĩ tónh ke mũ ag,” he mũ. “Kejên êg jakré tóg éhé nỹgtĩ,

hã ra ag pipir nỹtĩ, ù tỹ krenh ke mũ ag. Kĩ ag tóg ãjag tỹ krég mũ (hã) ra kre kãn tũ nĩgtĩ sir. Ge ti nĩgtĩ, inh vĩ ti. Ûn e ag tóg inh ki ge sór mũ nĩ, hã ra ù tỹ ag mĩ tónh ke tóg tũ tĩ,” he tóg. “Hã kũ Topẽ mré vĩmnĩ, ti tỹ ù ag jěgněn jé, ag tỹ ag mĩ tugtón jé, ti vĩ ti,” he tóg, Jesus ti, ã mré mũ tĩ ag mĩ.

³ “Ha mũjěg. Ha vé, carneiro krě vỹ věnh jy nĩgãn ki kagtĩg nỹtĩ, mĩg tỹ ag mãn sór kũ. Mé krě ên ri ke ãjag nỹtĩ, hã ra sóg ãjag jěgněg mũ, kũ Topẽ vỹ ãjag jy nĩgãn mũ,” he tóg.

⁴ “Kĩ ãjag mũn kũ saco ma mũ tũg nĩ, bolso ên, jãnkamy tũ ke gé, pěn né věnh kafã gé(g) mũ tũg nĩ gé, pěn to ró ên. Kĩ ãjag tỹ ù ven kũ ti mĩ: “ã mĩ há?” he tũg nĩ gé. Jatun mĩ mũmnĩ,” he tóg.

⁵ “Kejên ãjag tóg êmã ù tá junjun ke mũ. Kĩ ãjag tỹ ùn ù ra ge kũ tá ke fag mĩ: “Topẽ jé ãjag ki rĩr, kũ ãjag jé jatun mĩ nỹtĩ nĩ,” hemnĩ fag mĩ,” he tóg, Jesus ti, ag mĩ.

⁶ “Kĩ tá ke ù tỹ inh ki rã kũ tóg jatun' he mũ sir, ti tỹ tỹ Topẽ kósin nĩn kũ. Tá ke ù tỹ inh ki rã jãvãnh nĩn kũ tóg jatun' he tũ nĩ sir. Ti jãvo ãjag tóg jatun' he mũ sir inhhã.

⁷ Ìn ên krēm nũgnũrmnĩ, ãjag tỹ kãra ge ja ên krēm. Fag tỹ ãjag mĩ něn nĩm mũ ên komnĩ gé. Ûn rãnrãj han mũ ên tóg ti kaja venh ke mũ, ti rãnrãj kaja ti, hã kũ ag tóg ãjag jěn ke mũ sir, věnh kaja jé. Ìn ù kãra ge tũg nĩ, êmã ên tá.

⁸ Ājag tỹ ěmã ũ tá junjun kỹ ĩn pir krēm nỹtĩmnĩ, tá ke ag tỹ ājag mỹ: “kãge ra,” hen kỹ. Ag vỹjẽn hã komnĩ.

⁹ Ũn kagyga ag tỹ há' hemnĩ. Ag mỹ: “Topẽ vỹ tỹ ājag pã'i nĩnh mũ, ũn ri,” hemnĩ.

¹⁰ Kejẽn ěmã ũ tá ke ag tóg ājag mỹ: “kãge ra,” he jãvãnh nỹtĩnh mũ. Kỹ ěmã ěn fĩn rãm kỹ ag mỹ tag tómnĩ, ha mẽ:

¹¹ “ha vé, ěg pẽn nug hã kykũnh ěg tóg mũ, ājag tỹ ěg kavénh tũ nĩ jé,” hemnĩ. “Ge ra ěg tóg ājag mỹ tó mũ, ěg tỹ ājag mỹ nén tónh kãmũ jan ki, hã vỹ: “Topẽ vỹ tỹ ěg pã'i nĩnh mũ, ũn ri,” he mũ,” hemnĩ ag mỹ,” he tóg, Jesus ti.

¹² “Ha mẽ, kurã tỹ ěgno ki ag tóg vỹsỹrénh ke mũ, ag tỹ ājag vỹ mẽ jãvãnh kỹ. Cidade tỹ Sodoma tá ke ag vỹsỹrénh kãfór han jé ag tóg ke mũ, kurã ěn kã, ha vemnĩ,” he tóg, Jesus ti, ag mỹ.

*Jesus tỹ ũ ag mỹ vỹ kónãn
(Mt 11.20-24)*

¹³ Kỹ tóg: “sỹ cidade tỹ Corazim ki ke ag mỹ tag tó sór mũ, ha mẽ,” he mũ. “Kórég ve jé ājag tóg ke mũ,” he tóg. “Sỹ cidade tỹ Betsaida ki ke ag mỹ tag tó sór mũ gé, ha mẽ. Kórég ve jé ājag tóg ke mũ gé,” he tóg. “Ěg tỹ nén han vãnh tỹ hẽn ri ke hyn han isóg ājag mỹ, milagre tỹ hẽn ri ke, hã ra ājag tóg ājag jykre tovãnh sór tũ nĩgtĩ,” he tóg. “Cidade tỹ Tiro tá, cidade tỹ Sidom tá sóg ěg tỹ nén han vãnh ěn hyn han tũ nĩ. Sỹ tá milagre hyn han mũ ra ag tóg ājag jykre kórég tovãnh mũ vỹ, vãsỹ,” he tóg.

“Ājag jykre pãno to ag jykren ke mũ vỹ, kygfỹ ag mũ vỹ, ag mỹ ti e tĩnh mũ vỹ, sỹ ag mỹ tó mũ ra. Ag jãvo ājag tóg tovãnh sór tũ nĩ', to jykren sór tũ pẽn nĩ',” he tóg, Jesus ti.

¹⁴ “Tiro tá ke ag vỹ vỹsỹrénh kãn ke mũ, kurã tỹ ěgno ěn ki, Sidom tá ke ag ke gé, ag jykre pãno to. Ag vỹsỹrénh kãfór han jé ājag tóg ke mũ jãvo, ha mẽ,” he tóg, Corazim tá ke ag to, Betsaida tá ke ag to ke gé.

¹⁵ Kỹ tóg: “sỹ cidade tỹ Cafarnaum ki ke ag mỹ tag tó sór vỹ, ha mẽ,” he mũ. “Ũri tóg ver ājag mỹ sér tĩ,” he tóg. “Kanhkã ve jé ěg tóg ke mũ,” he ājag tóg tĩ, ón kỹ. Hã ra ājag tóg nũgme ki vár ke mũ jãvo, inferno ki,” he tóg, Jesus ti. Tĩ tỹ ã vỹ jẽmẽ jãvãnh mũ ag mỹ vỹ kónãn hã vỹ.

¹⁶ Kỹ tóg ã mré ke ag mỹ tag tó mũ. “Ũ tóg ājag vỹ mẽ sór mũ, ha vemnĩ,” he tóg. “Kỹ tóg sir inh vỹ mẽg mũ gé, ti tỹ ājag vỹ mẽnh kỹ. Ũ tóg ājag vỹ mẽ sór tũ nĩ, ha vemnĩ. Kỹ tóg inh vỹ mẽnh ke tũ nĩ gé. Tĩ tỹ inh vỹ mẽnh ke tũ nĩnh kỹ tóg ũ tỹ inh jẽnẽg mũ ěn vỹ mẽnh ke tũ nĩ gé sir, Topẽ vỹ ti,” he tóg, Jesus ti. Tĩ tỹ ã mré mũ tĩ ag mỹ tón hã vỹ, ag tỹ ti vỹ kãmén mũ jé, kór há mũ, kuvar há mũ.

Kỹ ag tóg sir mũ mũ, ũ tỹ 70 (ke) ěn ag.

Ũ tỹ 70 (ke) ag tỹ Jesus to vỹnvỹn ke

¹⁷ Kejẽn ag tóg ti to vỹnvỹn ke mũ, kỹ ag tóg ti mỹ vỹ sér han mũ sir. “Senhor’,” he ag tóg mũ. “Vẽn h jagrẽ kórég ag vỹ ěg vỹ ki han tĩ. Ā jiji tó kỹ

ẽg tóg ag mý vī tĩ, ký ag tóg ki hã han tĩ,” he ag tóg mũ, Jesus mý.

18 Ký tóg ag mý: “vãsỹ inh Japo vé, ti tỹ kanhkã tá kãtère ký,” he mũ. “Ti fĩn rãm sóg, hã ký sóg ti fón. Ta tỹ kómkóm ke ri ke nĩ ja ti nĩ, ti kutẽ ja ẽn ti.

19 Ti kri ke vỹ tỹ inh nĩ. Ha vé, ãjag to sóg vãsãn mũ, pỹn tỹ ãjag kókén tũ nĩ jé, ãjag tỹ ti sãn mũ ra, pỹn kakrã ke gé, Nén-Kórég kar ag ke gé. Û vỹ ãjag kókén ke tũ pẽ nĩ gé.

20 Hã ra tag to mý há nýtĩ tũg nĩ ver. Tag vỹ tỹ nén ù tũ nĩ ver. Vẽnh jagrẽ kórég vỹ ãjag vĩ han, vẽn kuprĩg ke gé. Hã ra tag to mý sér nýtĩ tũg nĩ. Nén ù vỹ há pẽ nĩ, ký tag hã to mý sér nýtĩmnĩ. ãjag jyjy vỹ ránrán ký nýtĩ, Topẽ livron ki, kanhkã tá, ãjag tỹ kanhkã tá junjun jé. Ký tag hã to mý sér nýtĩmnĩ,” he tóg, Jesus ti.

*Jesus tỹ ùn kãsir ag to há
(Mt 11.25-27; 13.16-17)*

21 Ký tóg Jesus mý sér tĩ, hora ẽn kã. Topẽ kuprĩg tỹ ti krĩn ký tóg ti mý sér tĩ: “jóg’,” he mũ. “Tỹ ã tóg kanhkã tân ag kãfór kar nĩ, kar ã tóg tỹ ẽprã ke ag kãfór nĩ gé,” he tóg. “Inh mý tóg há tĩ, ã tỹ nén han mũ ti. Û tỹ: “ki kanhró mág inh nĩ,” he mũ ag mý ã tóg ã jykre ven ja tũ nĩ. Ag mý ã tóg kãmén ja tũ nĩ. Û tỹ gĩr ri ke ki kagtũg ag hã mý ã tóg ven ja nĩ, ã jykre ti,” he tóg. “Hỹ, hã vẽ. ã tỹ nén to jykrén mũn hã vẽ, hã ký ã tóg ag hã mý ã jykre ti nĩm. Hã ra tóg há tãvĩ nĩ, jóg’,” he tóg, Jesus ti.

22 Ký tóg ã mré mũ tĩ ag mý: “inh jóg tóg inh mý tovãnh kãn, ã tỹ nén han ja kar ti,” he mũ. “Ký ù pi(jé) ti kósin ki kanhró nĩ’. Inh jóg ne inh ki kanhró nĩ’. Ký ù pi(jé) inh jóg ki kanhró nĩ gé’. Inh hã ne ti ki kanhró nĩ’, isỹ tỹ ti kósin nĩn ký. Hã ra sóg ãjag mý ti kãmén jé kãtĩ mũ, inh jóg ti. Isỹ tag to ùn kuprẽg mũ ag hã mý sóg ti kãmén tĩ, inh jóg ti,” he tóg, Jesus ti.

23 Ký tóg ã mré mũ tĩ ag mý nén ù kãmén mũ gé. Vyrmy tóg ag mý ke mũ, ký tóg: “ãjag hã ne vég mũ’, Topẽ jykre ti, hã ký Topẽ tóg ãjag ve há han mũ,” he mũ. “Sér pẽ ti tĩ, ù tỹ ti jykre vég mũ ag mý,” he tóg, Jesus ti.

24 “Ki hã sóg tó mũ, ha mẽ. Û tỹ hẽn ri ke ag vỹ inh ve sór tãvĩ ja nýtĩgtĩ, vãsỹ, ãjag tỹ ùri nén vég mũ tag ti. Hã ra ag tóg inh mur ken jo kãgter kãn. Topẽ vĩ tó tĩ ag ja vẽ, pã’i mág ag ja vẽ, hã ký ag tóg ãjag tỹ nén vég mũ ve sór tãvĩ ja nýtĩgtĩ. Hã ra ag tóg ve ja tũ nĩ, mẽ ja tũ ag tóg nĩ gé, ãjag tỹ ùri nén mẽg mũ ti. ãjag hã ne mẽg mũ inhhã’,” he tóg, Jesus ti, ti mré mũ tĩ ag mý.

*Samaria tá ke to com-
paração*

25 Ký vãhã Topẽ vĩ to profes-
sor ù vỹ ag kãmĩ jëgnẽ mũ, ký tóg Jesus ki jëmẽ sór mũ. Ti tỹ ón ký ti vĩ mẽ sór vẽ, hã ký tóg ti mý: “Senhor’,” he mũ. “Inh hỹn hẽ ri kenh mũ, isỹ rĩr krỹg ja tũ ve jé?” he tóg, Jesus mý.

26 Ký Jesus tóg ti mý: “ne nỹ hỹn rán ký nĩ, Topẽ vĩ ki?” he

mũ. “Topê jykre tỹ ne han jé ã ke mũ hỹn'?” he tóg. “To ke há ã tóg nĩ, ha inh mẽ tó,” he tóg.

27 Kĩ tóg ti mẽ: “Topê vỹ tỹ ã kri ke nĩ, kĩ ti hã to há nĩmnĩ, ti ki rã há han nĩ, ti to jykre pir nĩmnĩ, ti to tar nĩmnĩ, ti mẽ ã tỹ nén han mũ kar ên han nĩ, ha mẽ. Kĩ ã régre kar ki rĩr nĩmnĩ gé, ã tỹ vènh ki rĩr há han ri ke. Topê tỹ nén tón hã vè,” he tóg, Topê vĩ to professor ti.

28 Kĩ Jesus tóg: “hỹ,” he mũ. “Ki hã ã tóg tó mũ,” he tóg. “Tag han ra, kĩ ã tóg rĩr krỹg ja tũ venh ke mũ,” he tóg.

29 Hã ra tóg ti mẽ há tũ nĩ, Jesus vĩ tag ti, hã kĩ tóg ti mẽ: “kỹ ù nỹ tỹ inh régre nĩ?” he mũ.

30 Kĩ Jesus tóg ti mẽ tag tó mũ, ha mẽ. “Kejẽn ù tóg nĩgtĩ. Hã ra tóg Jerusalém tá kãtĩg kĩ Jericó ra tĩ mũ. Êpry jagma, êmĩn jagma ùn jykre kórég ag tóg ti jo vãjig mũ, bandido ag. Kĩ ag tóg ti kãgmĩ kĩ ti kur kunũg mũ. Ti mrãnmrãn ag tóg mũ. Ti tén kren ag tóg mũ, kĩ ag tóg hã ki ti tovãnh kar mũ mũ sir, ti tũ mãn kãn kĩ. Kĩ tóg tá nỹ nĩ sir.

31 Ti tỹ tá nỹ ra ù tóg êpry ên jagma kãtĩ mũ gé. Topê tũ ki rĩr tĩ ù vè. Ti vég tóg mũ, ùn vèsýrénh kĩ nỹ ên ti, hã ra tóg ti venh rã tũ nĩ. Êmĩn jagma tóg tĩ mũ.

32 Kĩ vãhã Levi krẽ ù tóg êpry jagma kãtĩ mũ gé. Tá jun kĩ tóg ti vég mũ gé, hã ra tóg ti venh rã tũ nĩ gé. Êmĩn jagma tóg tĩ mũ gé sir.

33 Kĩ vãhã Samaria tá ke ù tóg êpry jagma kãtĩ mũ gé. Kĩ tóg tá jun mũ, kĩ tóg ti vég mũ.

34 Kĩ tóg ti venh rã mũ inhã. Ti kygtãg tóg mũ sir, azeite tỹ, vinho tỹ ke gé, ti mẽ to tũn kĩ. ã kur tỹ tóg ti pãg mũ sir. Kĩ tóg ã mẽg kri ti nĩm mũ, ã tỹ ti ma tĩg jé. Hã kĩ tóg ag tỹ ãn krẽm nũr jafã tá jun mũ sir. Kĩ tóg tá ti ki rĩr mũ.

35 Tỹ vaj kĩ tóg tĩg mãn sór mũ, hã kĩ tóg ù tỹ ãn ki rĩr mũ ên mẽ jãnkamy régre vin mũ, kĩ tóg ti mẽ: “ti ki rĩr há han,” he mũ. “Jãnkamy tag tỹ ã mẽ tá krỹg tũn kĩ sóg ã mẽ kajãm mãn mũ, sỹ vỹn ken kĩ,” he tóg. “Kajãm kãn jé sóg ke mũ, sỹ vỹn ken kĩ,” he tóg, Samaria tá ke ên ti. Ti tỹ ùn kaga ki rĩr mũn hã vè,” he tóg, Jesus ti.

36 Kĩ tóg: “kỹ ùn tãgtũ ag vỹ ti ve ja nĩ. Ag kã ù tỹ hẽ nỹ tỹ ti régre ja nĩ, ag tỹ ùn vóg kónãn ja ên régre? Ha to jýkrén (ke)ma',” he tóg, Jesus ti, Topê vĩ to professor ên mẽ.

37 Kĩ ù tỹ ti ki jẽmẽg mũ ên tóg ti mẽ: “ũ tỹ ti jagãgtãn mũ ên vỹ tỹ ti régre ja nĩ,” he mũ.

Kĩ Jesus tóg ti mẽ: “hỹ, tó há han ã,” he mũ. “Kỹ ên ri ke han nĩ. ùn vèsýrénh mũ ag jagãgtãn kãn nĩ, ti ri kén,” he tóg, Jesus ti. Ti tỹ ù tỹ ón kĩ ti ki jẽmẽg mũ mẽ tón hã vè.

Jesus tỹ Maria mré Marta fag venh tĩg

38 Kejẽn ag tóg mũ mũ, Jesus ag, kĩ ag tóg êmã sĩ ù ki junjun mũ. Tá ù fi tóg nĩ nĩ, fi jĩjin hã vỹ: Marta, he mũ. Ên fi vỹ

Jesus mÿ: “inh ãn kãra ge jëg, ãjag tÿ ëg mré nÿtÿ jé,” he mÿ.

³⁹ Kÿ fi jãvy fi vÿ nÿ gé, hã vÿ: Maria, he mÿ. Kÿ Maria fi vÿ Jesus mré nÿ nÿ, ti vÿ jëmë jé.

⁴⁰ Hã ra Marta fi vÿ rãnrãj (ka)më nÿ, Jesus ag mÿ vëjën han jé. Jãvo Maria fi tóg nÿ nÿ.

Kÿ Marta fi tóg Jesus mÿ: “Senhor,” he mÿ. “Rãnrãj mág han tÿ sóg nÿ, hã ra fi tóg nÿ nÿ. Fi mÿ ké, fi tÿ inh mré vëjën ki rÿr jé,” he fi tóg mÿ.

⁴¹ Hã ra Jesus tóg fi mÿ: “krÿ kufy ã tóg nÿ, nén ù tÿ to, hã ra fi tóg inh vÿ jëmëg nÿ nÿ,” he mÿ, Marta fi mÿ. “Vëjën to vënh kutãn tÿg nÿ.

⁴² Nén ù pir hã ne há nÿ', hã vÿ: inh vÿ, he mÿ. Maria fi vÿ inh vÿ hã jëmë sór mÿ, kÿ sóg fi mÿ: “ha nén ù han,” he jãvãnh nÿ. Nén ù há kuprëg fi tóg, fi tÿ inh vÿ mÿ sór kÿ,” he tóg, Jesus ti, Marta fi mÿ.

11

*Ëg tÿ Topë mré vëmén
(Mt 6.9-15; 7.7-11)*

¹ Kejën tóg Topë mré vÿ mÿ, Jesus ti, ëmã ù tá nÿ kÿ. Ti tÿ Topë mré vëmén kar kÿ ti mré mÿ tÿ ag tóg ti mré vÿnh kãmÿ mÿ. Kÿ ag tóg ti mÿ: “Senhor,” he mÿ. “Ëg kanhrãn nÿ, ëg tÿ Topë mré vÿ há han jé. João vÿ ã mré mÿ tÿ ag kanhrãn. Ge ki ëg kanhrãn nÿ gé,” he ag tóg, Jesus mÿ.

² Kÿ tóg ag kanhrãn kÿ ag mÿ: “Topë mré vÿ kÿ tag tómnÿ, ha mÿ,” he mÿ.

“Ëg jóg mág, ã jyjy tó ëg tóg tÿ. Kÿ vënh kar jé ã tÿ tÿ ùn mág nÿ vé.

Ëg jé kãnhmar ã tÿ tÿ ëg pã'i nÿ vé.

³ Ëg mÿ ëg jën ti nÿm, kurã kar ki, ëg tÿ kurã kar ki ko tÿ ën.

⁴ Kÿ ëg mÿ vënh pãte fón nÿ, ëg tÿ ã vÿ mranh ja ti, hã jé ëg tóg ëg tÿ jagnë to jÿ tÿ jagnë mÿ vënh pãte fón ke mÿ gé.

Kÿ ëg tÿ ã vÿ mranh sór kÿ ëg kren han nÿ, ëg tÿ mranh tÿ nÿ jé,” hemnÿ,” he tóg, Jesus ti.

⁵ Kÿ tóg ag mÿ ëg tÿ Topë mré vëmén tÿ ën kãmén mãn mÿ. Kÿ tóg ag mÿ: “kejën ù tóg nÿgtÿ,” he mÿ. “Kuty si há tá tóg ã régre ãn ki jun mÿ. Kÿ tóg ti mÿ: “régre!,” he mÿ. “Inh mÿ ëmÿ tãgtÿ nÿm, sÿ kar ã mÿ ti ri kén kÿ nÿm jé,” he tóg.

⁶ “Inh mré ke ù vÿ jun. Kór há tá tóg kãtÿg, kuvar há tá. Hã ra sÿ ti mÿ ne han ke tóg tÿ tÿ,” he tóg, ã régre mÿ.

⁷ Kÿ ti régre tóg ti mÿ: “hã ra sóg nÿr nÿ nÿ,” he mÿ. “Kar inh krë tóg inh mré nÿgnÿr nÿtÿ gé. Jãnkã vÿ nÿfénh kÿ jë nÿ. Hã kÿ tóg inh mÿ vënhmÿ tÿ, inh nÿnh ke mÿ ra, sÿ ã mÿ ëmÿ nÿm jé. Û ki jãvãnh,” he tóg ti mÿ.

⁸ Hã ra tóg sir to vÿ mãn', to vÿ mãn' he mÿ. Hã kÿ tóg nÿ kÿ ti mÿ nÿm mÿ sir, ti tÿ ti mÿ ëmÿ to vÿ mÿ ti. Ti régre vë, ù tÿ ti mÿ to vÿnh kãtÿ mÿ ti. Ge ra tóg ti mÿ nÿm ke tÿ nÿ vë, ti tÿ tÿ ti régre ra. Ti tÿ ti mÿ to vÿ mãn', to vÿ mãn' he tÿgrÿn tóg sir ti mÿ nÿm mÿ jãvo. Ëg tÿ Topë mré vÿ ri ken hã vë,” he tóg, Jesus ti.

⁹ “Ha mẽ, sỹ ãjag mỹ nén tó mũ tag ti. Topẽ mỹ nén kar to vĩmĩ, kỹ tóg ãjag mỹ han mũ sir. ãjag tỹ ti mỹ nén ù to vĩ mũ ên jãvãnh nĩ, kỹ ãjag tóg venh ke mũ sir. Ti mré vĩ kỹ êg tỹ ti jãnkã tỹ tórón tórón ke ri ke han nĩ, kỹ tóg ãjag mỹ ti róm ri ke han mũ, ti tỹ ãjag mỹ ãjag tỹ nén to vĩ mũ ên han kỹ.

¹⁰ Hỹ, hã vễ. ãjag tỹ ti mỹ nén to vĩn kỹ tóg ãjag mỹ han mũ. ãjag tỹ ti jãvãnh kỹ ãjag tóg venh ke mũ. ãjag tỹ êg tỹ jãnkã tỹ tórón tórón ke ri ke han kỹ tóg ãjag mỹ ti róm ri ke han mũ.

¹¹ Kejẽn ãjag kósin tóg ãjag mỹ pirã to vĩ mũ. Kỹ ãjag pi(jé) ti mỹ pỹn nĩm ke mũ'. Pirã hã nĩm jé ãjag tóg ke mũ.

¹² Kejẽn tóg ãjag mỹ garĩnh ovo to vĩ mũ, ãjag kósin ti. Kỹ ãjag pi(jé) ti mỹ pỹn kakrã nĩm ke mũ'. Garĩnh ovo hã nĩm jé ãjag tóg ke mũ.

¹³ Jykre pãno ãjag nỹtĩ. ãjag jykre pãno (hã) ra ãjag tóg ãjag krẽ mỹ nén ù há nĩm tĩ. Ge ti nĩ gé, ãjag tỹ Topẽ mỹ nén ù to vĩn kỹ. Nén ù há hã nĩm jé tóg ke mũ. Hã ra tóg ãjag kãfór han tĩ, êg jóg tỹ kanhkã tá nĩ ti. ãjag tỹ ti mỹ to vĩn kỹ tóg ã kuprĩg tỹ ãjag jagrẽ han ke mũ mỹr, Topẽ ti,” he tóg, Jesus ti.

Jesus tỹ Topẽ jykre hã han kỹ tar nĩ

(Mt 12.22-30; Mc 3.20-27)

¹⁴ Kejẽn tóg ùn jagrẽ kórég mỹ ti jagrẽ kutẽm mũ. Ti vĩ vãnh han ja tóg nĩ, ti jagrẽ ti. Jesus tỹ ti kutẽm kar tóg vĩ há

nĩ sir. Kỹ tóg vễnh kar mỹ e tĩ sir, ag mỹ tóg sér tĩ sir.

¹⁵ Hã ra ù ag tóg ti to: “jagrẽ kórég ti nĩ,” he mũ. “Nén-Kórég ag pã'i vĩ tỹ ti jagrẽ nĩ, Satanás ên, Belzebu he mũ ên,” he ag tóg mũ, ón kỹ. “Hã kỹ tóg Nén-Kórég ag pan tĩ, ag jagrẽ kórég ag. Nén-Kórég ag pã'i jykre tỹ tóg ag pan tĩ,” he ag tóg ón kỹ, Jesus to.

¹⁶ Hã ra ù ag tóg ón kỹ ti jykre ve sór mũ gé, kỹ ag tóg ti tỹ êg tỹ nén han vãnh han mũ ve sór mũ sir, ti tỹ ag mỹ kanhkã jykre ven jé.

¹⁷ Hã ra Jesus tóg ki kanhró nĩ, ag tỹ nén to jykrén mũn ki. Hã kỹ tóg ag mỹ: “pã'i pir krẽm ke ag tỹ jagnẽ kato tẽn kỹ ag tóg jagnẽ kãgtén kãn ke mũ,” he mũ. “Ĩn pir krẽm ke fag tỹ jagnẽ kato tẽn kỹ fag tóg jagnẽ kãgtén kãn ke mũ gé sir.

¹⁸ Ge ti nĩ, Nén-Kórég ag jykre ti. Nén-Kórég ag tỹ jagnẽ kato tẽn kỹ ag tóg jagnẽ tỹ tũ' henh mũ gé vễ, Satanás ag. Hã kỹ tóg vễnhmỹ nĩ, ãjag vĩ ti, ãjag tỹ iso: “Satanás jykre tỹ, Belzebu ên jykre tỹ tóg Nén-Kórég ag pan tĩ,” he mũ ti. Ag tỹ jagnẽ kato tẽgtẽ to ken hã vễ sir, ha mẽ,” he tóg, Jesus ti.

¹⁹ “Belzebu jykre tỹ tóg ag pan mũ, Nén-Kórég ag,” he ãjag tóg tĩ iso. ãjag mré ke ag to jykrén nĩ. Nén-Kórég ag pan ag tóg tĩ gé, ãjag mré ke ag. Ag pi(jé) Satanás jykre ki ag pan tĩ'. Topẽ jykre ki ag tóg ag pan tĩ (mỹr') ãjag tỹ tag to jykrén kỹ ãjag tóg inh jykre há ki kanhrãn ke mũ vễ,” he tóg ag mỹ, Jesus ti.

20 “Topê kuprĩg jykre tỹ sóg Japo ag pan tĩ mỹr, ha mẽ. Topê kuprĩg tỹ Japo ag pan kãn kỹ Topê tóg tỹ êg pã'i nĩ vễ, mỹr. Tag to jykrén nĩ,” he tóg, Jesus ti.

21 “Ủ tỹ é he (ka)mễ ag tóg ãjag tũ ki rĩr há han ti. Ag rógro vỹ jęgtĩ, kỹ ag tóg ãjag ĩn ki rĩr tĩ sir, ủ tỹ ag tũ mąg tũ nĩn jé. Kỹ ủ tóg ag tũ vóg ke tũ nĩ gé, ag tỹ ki rĩr há han kỹ.

22 Kejẽn ủ tóg ủ tóg ủ tỹ é he (ka)mễ ĩn tá jun mũ, ủ tỹ ti tar kãfór nĩ ti. Ti rará kãfór nĩn kỹ tóg ti tỹ hẽn ri kenh mũ sir. Kỹ tóg ti rógro vąg mũ. Ti tỹ ùn kãgtén jafã vąg tóg mũ, kỹ tóg ti tũ mãn kãn mũ gé sir. Ge ti nĩ, isỹ nén han mũ ĩn ti. Ủ tỹ é he (ka)mễ ri ke ti nĩ, Japo ti, hã ra sóg ùn tar ĩn ri ke nĩ,” he tóg.

23 “Ãjag tỹ tỹ ĩnh mré ke tũ nỹtĩn hã kỹ ãjag tóg ĩnh kato tęgtě mũ. ãjag tỹ ĩnh mré ĩprã ke ag tỹ Topê to kãmũ han tũ nĩn kỹ ãjag tóg ag kãmũ kamęg mũ,” he tóg.

Vẻnh jagrẻ kórẻg vỹn kenh ke

(Mt 12.43-45)

24 “Kejẽn sóg vẻnh jagrẻ kórẻg ủ kutẻm mũ. Kỹ tóg ga kórẻg mĩ tĩ mũ, ti jagrẻ ĩn ti. Goj venh ke tũ tóg nĩ, tá. Vẻnhkãn ke tũ tóg nĩ gé, ti tỹ hẻ ri ken kỹ vẻnhkãn ke tũ tĩn kỹ. Kỹ tóg vãhã to jykrẻn mũ sir. “Ĩnh hỹn ĩn ra tĩg mãn ha, sỹ ủ tá kãkutẻ ja ĩn ra. ĩnh mỹ tóg tỹ ĩn ri ke ja nĩ, kỹ ĩnh jẻ hỹn ti kãra rã mãn ha,” he tóg mũ, ti jagrẻ ĩn ti.

25 Kỹ tóg ti venh kãtĩ mũ. Hã ra tóg sir krĩ há nĩ. Kỹ tóg ti mỹ ĩn há ri ke nĩ sir, ĩn prur, ĩn sĩnvĩ ri ke.

26 Kỹ tóg Nẻn-Kórẻg tỹ 7 (ke) ag mỹ tẻnh tĩ mũ sir. “Hã kãmũ jẻg,” he jẻ tóg ke mũ. Hã ra ag jykre pãno tóg ti jykre pãno kãfór nĩ. Kỹ ag tóg sir ủ ĩn kãge ge mũ, tỹ ag tóg ti jagrẻ nỹtĩ sir, isỹ ùn mỹ ti jagrẻ pir kutẻm ja ĩn ti. Hã kỹ tóg kórẻg tãvĩ nĩ sir. Ti jagrẻ kórẻg pir kutẻm ĩnh nĩ vễ, hã ra ủ tỹ 8 (ke) ag tóg tỹ ti jagrẻ nỹtĩ, ti tỹ ĩnh ki rã tũ nĩn kỹ,” he tóg, Jesus ti. Ti tỹ ag mỹ vẻnh jagrẻ jykre tẻn hã vễ.

Topẻ tỹ êg ve há han ke

27 Kỹ ủ tỹ ti vỹ mẽg mũ ủ fi tóg prẻr mũ sir, fi tỹ ti vỹ tag mẽ kỹ. Ủn e ĩn kãmĩ fi tóg jẻ nĩ, kỹ fi tóg ti mỹ ke mũ. “!..Topẻ vỹ ã mỹnh fi ve há han, fi tỹ ã han tugrĩn, fi tỹ ã pafãm tugnen..!” he fi tóg, prẻr kỹ.

28 Kỹ Jesus tóg fi mỹ: “hỹ,” he mũ. “Hã ra Topẻ vỹ ã ve há han ke mũ gé, ã tỹ ti vỹ jẻmẻn kỹ. Hã kỹ ã tỹ ti vỹ mẽ kỹ ke krẻm nĩ, kỹ tóg ã ve há tãvĩ han ke mũ,” he tóg, Jesus ti, ủ tỹ prẻr mũ ĩn fi mỹ.

Jesus tỹ ón kỹ milagre han ke tũ

(Mt 12.38-42)

29 Hã ra ủ tỹ hẻn ri ke ag tóg sir tá junjun mũ, ti vỹ mẽ jẻ. Kỹ tóg fẻr tãvĩ tĩ. Kỹ Jesus tóg ag mỹ: “kórẻg ãjag nỹtĩ,” he mũ. “Ón kỹ ãjag tóg nẻn han vãnh ve sór mũ. Vẻnh ke tũ ãjag tóg nĩ. Nẻn ủ pir hã ve jẻ ãjag tóg ke mũ, hã vỹ: Jonas tỹ

nén ve ja ěn ri ke, he mũ,” he tóg.

³⁰ “Jonas vỹ cidade tỹ Nínive tá ke ag mỹ Topě vỹ tó ja nĩ, kỹ ag tóg ti vỹ mẽ há han ja nĩ. Ěn ri ke han jé sóg ke mũ, ājag mỹ. Tỹ sóg ěprā ke fi kósin ěn nĩ,” he tóg.

³¹ “Kỹ pā'i mág ěn fi, kanhkā tāpér tỹ sul tá kātīg ja ěn fi, tá tá kātīg ja ěn fi vỹ nĩnh ke mũ gé, kurā tỹ ěgno ki, sỹ vĕnh kar jykre venh ke kurā ěn ki. Ājag mré fi tóg jĕnh mũ, kỹ Topě tóg ājag mỹ vỹ kónān ke mũ, fi ve kỹ. Kanhkā fyr ja tá fi tóg kātīg ja nĩ, vāsỹ, fi tỹ pā'i mág tỹ Salomāo vỹ mẽ jé. Salomāo káfór vỹ tỹ inh nĩ, hā ra ājag tóg inh vỹ mẽ jāvānh nỹtĩ fi jāvo,” he tóg.

³² “Kỹ Topě vỹ Nínive tá ke ag ve kỹ ājag mỹ vỹ kónān ke mũ gé, kurā tỹ ěgno ěn ki, ha vemnĩ. Nínive tá ke ag tỹ Jonas vỹ mẽ kỹ ag tóg ājag jykre togvānh ja nĩ. Tỹ sóg Jonas káfór nĩ, hā ra ājag tóg ājag jykre tovānh jāvānh nỹtĩ, sỹ ājag mỹ tó tĩ (hā) ra,” he tóg, Jesus ti.

Jĕngrĕ ri ke ěg nỹtĩ
(Mt 5.15; 6.22-23)

³³ “Ěg tỹ lampiāo grug kỹ ěg pi(jé) ĩn krĕm péju kỹn fĕg tĩ', ěg pi(jé) kĕj krĕm fĕg tĩ'. Ti fĕg jafā kri ěg tóg fĕg tĩ, lampiāo gru ti. Kỹ ěg tóg ti gru tỹ ve há jĕgtĩ, ěg tỹ ĩn kátá kāmũ kỹ,” he tóg, Jesus ti.

³⁴ “Ěg kanĕ hā tóg tỹ ěg tỹ ve jafā nĩ. Kỹ tóg ěg jo kurā han tĩ, ěg kanĕ ti, ti há nĩn kỹ. Kỹ tóg ěg jo kurā kar nĩ sir, ěg

kanĕ há nĩn kỹ. Ěg kanĕ kórég nĩn kỹ tóg ěg jo kuty ke kān mũ sir. Kỹ tóg ge nĩ, ěg jykre kórég ti. Ěg kanĕ kórég ri ke ti nĩ, ěg jo kuty han tóg tĩ.

³⁵ Kỹ vĕnh kanhrān nĩ. Ke tũ nĩ mũ ra tóg ājag jo kuty ri ke nĩ. Vĕnh jykre kórég hā vĕ. Kỹ vĕnh jykre kórég han sór tũg nĩ.

³⁶ Ājag jo kurā nĩn kỹ tóg há tāvĩ nĩ, ājag jo kuty tũ nĩn kỹ, ājag jo kuty sĩ tũ nĩn kỹ ke gé. Ājag jykre há tāvĩ nĩn kỹ tóg ājag jo kurā ri ke nĩ. Kỹ ājag tóg sir lampiāo gru ri ke nỹtĩ gé. Lampiāo gru mág nĩn kỹ tóg kómkóm ke tĩ, ěg kanĕ jo, kỹ tóg ěg mỹ jĕngrĕ há han tĩ. Ge ěg nỹtĩ, ěg jykre há tāvĩ nĩn kỹ, ti kórég sĩ tũ nĩn kỹ,” he tóg, Jesus ti. Ti tỹ ag mỹ Topě jykre há tón hā vĕ.

Jesus tỹ ũn jykre régre ag mỹ vỹ kónān

(Mt 23.1-36; Mc 12.38-40)

³⁷ Ti tỹ ag mré vĕmén kar Fariseu ũ tóg ti mỹ: “inh mré jĕn kātīg,” he mũ. Kỹ tóg ti mré tĩ mũ, ti mré jĕn jé, Jesus ti.

³⁸ Hā ra Jesus tóg Judeu ag jykre han ja tũ nĩ, ag jĕn jé ag tóg vĕnh nĩgpég tĩ. Kỹ tóg Fariseu ěn mỹ e tĩ. Kỹ tóg to jykrén kónān mũ sir.

³⁹ Kỹ Jesus tóg ki kanhró nĩ, kỹ tóg ti mỹ kāmén mũ. “Fariseu vỹ tỹ ājag nỹtĩ,” he tóg. “Kỹ ājag tóg copo ven ja kugpég tĩ, pĕnky ven ja ke gé, hā ra ti kátá ke tóg kavĕj nĩ. Kỹ ājag jykre vỹ ge nỹtĩ gé. Jykre há nĩ ve ājag tóg nỹtĩ, hā ra ājag tóg vĕnh jykre pāno han tĩ, hā vỹ: jānkamy to ag

lograr he tĩ, he mũ, ãjag prũ tũ
fag mré nỹ, he mũ gé.

40 Krĩ tũ pẽ ãjag nỹtĩ. Ũ tỹ ěg
ven ja han mũ vỹ ěg jykre han
mũ gé mỹr. ěg jykre há nĩn kỹ
ěg ven ja vỹ há nĩ gé.

41 Ũ jagãgtãn ra, ãjag tỹ nén
ũ tỹ. Vẽnh jykre há kar han ra,
kỹ tóg ãjag tỹ nén ũ kar jãnhkri
nĩ ri ke nĩ sir," he tóg.

42 "Fariseu', Topẽ vỹ ãjag ve
kónãn. Ón kỹ ãjag tóg Topẽ mỹ
ãjag jakré tỹ dízimo han kãn
tĩ. ãjag jakré tỹ hortelã tỹ 10
(ke) nĩn kỹ ãjag tóg Topẽ mỹ
ũn pir nĩm tĩ, dízimo han kỹ.
ãjag jakré tỹ arruda tỹ ãjag tóg
dízimo nĩm tĩ gé, ãjag jakré tỹ
vẽnh kagta kar tỹ mỹr, ãjag tỹ
nén ũ kar mré hã. Nén ũ kar
tỹ ãjag tóg dízimo vin tĩ, Topẽ
mỹ. Hã ra ãjag tóg vẽn h jykre
kuryj han tũ nĩ jãvo. Topẽ to
há tũ ãjag tóg nỹtĩ, ti vỹ jẽmẽ
jãvãnh ãjag tóg nỹtĩ. ãjag tỹ
ti tỹ ěg jyvẽn ki króm mré hã
ãjag jakré tỹ dízimo vin ra tóg
há tãvĩ nĩnh mũ vẽ, ha mẽ. Hã
ra ãjag tóg ki króm sór tũ nĩgtĩ,"
he tóg.

43 "Fariseu', Topẽ vỹ ãjag
ve kónãn. Vẽn h kanhrãn jafã
krẽm ãjag tóg vẽn h kãpãm kỹ
nỹtĩ, vẽn h kar tỹ ãjag ve jé.
Cidade kuju tá ãjag tóg mũgtĩ,
kỹ vẽn h kar tỹ ãjag mỹ: "Sen-
hor, ã mỹ há?" hen kỹ tóg ãjag
mỹ sér tĩ.

44 Topẽ vỹ ãjag ve kónãn
mỹr. Vẽn h kej si ri ke ãjag nỹtĩ,
vẽn h kej to ró tũ ri ke. Kri mũ
ag tóg tĩ, vẽn h kar, kỹ ag tóg
ki kagtĩg nỹtĩ, ti tỹ tỹ vẽn h kej
nĩ ti. Kỹ ag tóg vẽn h vatãnh tá
vẽn h kavẽn h tĩ. Tag ri ke ãjag

tóg nỹtĩ. Kỹ ãjag krẽm ke ag vỹ
Topẽ vỹ mranh tĩ, ãjag ven kỹ,"
he tóg, Jesus ti, Fariseu ag mỹ.

45 Kỹ Topẽ vỹ to professor
ũ tóg Jesus mỹ: "ã tỹ Fariseu
ag mỹ tag tó kỹ ã tóg ěg to vỹ
kónãn tĩ nĩ gé, ag mré," he mũ,
ěg Senhor mỹ.

46 Kỹ tóg: "ón kỹ Topẽ vỹ to
professor'," he mũ. "Hỹ, Topẽ
vỹ ãjag ve kónãn gé," he tóg.
"Vẽn h kar mỹ ãjag tóg vẽn h
jykre kufy nĩm tĩ. Kufy jagy ti
nỹ, vẽn h jykre ěn ti, kỹ ãjag tóg
han sór tũ nĩgtĩ. Ge ra ãjag tóg
ag mỹ: "ha ki króm," he tĩ.

47 Topẽ vỹ ãjag ve kónãn
mỹr. ãjag jóg'jóg ve ag vỹ Topẽ
vỹ tó tĩ ag kãgtén. Jãvo ãjag tóg
ag kej ki rĩr há han tĩ.

48 Hã ki ãjag tóg ãjag jóg'jóg
ve ag tỹ ag kãgtén to: "há ti nĩ,"
he tĩ. Hã ki tóg ãjag mỹ há nĩ
mỹr, ag tỹ ag kãgtén ja tugrĩn.
Ag hã vỹ ag kãgtén ja nĩ, kỹ
ãjag hã nỹ ag kej ki rĩr há han
tĩ," he tóg.

49 "Hã kỹ Topẽ vỹ ãjag to vỹ
ja nĩ. Ki kanhró ti nĩ, Topẽ ti,
hã kỹ tóg ãjag to vỹ kónãn ja nĩ,
ha mẽ. "Inh vỹ tó tĩ ag jẽgnẽ
jé sóg ke mũ ag mỹ, isỹ ũn vin
mũ ag ke gé, ag tỹ ag mỹ inh
vỹ tó jé. Hã ra ag tóg ag vóg
kónãn ke mũ, ag kãgtén jé ag
tóg ke mũ," he ja tóg nĩ, Topẽ
tĩ.

50 ãjag jóg'jóg ve ag vỹ ag
kygrẽn kãn, hã ra tóg ãjag mỹ
há tĩ, hã kỹ Topẽ vỹ to ãjag vóg
kónãn ke mũ. Ũ tỹ hẽn ri ke ag
kygrẽn ag tóg, ãjag jóg'jóg ve
ag, Topẽ tỹ ěprã ke ag han kar
kỹ.

⁵¹ Ti kãke tóg Abel tén. Ti nón ke ag kãgtén ja ag tóg nĩ gé, ãjag jóg'jóg ve ag, Zacarias mré hã. Topẽ ãn jãnkã krẽm ag tóg ti tãnh, Topẽ mĩ nén ù pũn jafã ên ki, Zacarias ti. Topẽ tỹ jẽgnẽg mũ ag kãgtén tovãnh tũ pẽ ag nỹtĩ, ãjag jóg'jóg ve ag. Hã ra tóg ãjag mĩ há tĩ. ãjag tỹ ag kygrẽn kãn ri ke ti nĩ. Ûn kãgter mũ tag jagfy kajãm kãn jé ãjag tóg ke mũ, ha vemnĩ. ãjag mĩ sóg tó mũ mỹr," he tóg, Jesus ti.

⁵² "Ón kỹ Topẽ vĩ to profesor', Topẽ vỹ ãjag ve kónãn. Topẽ vỹ tỹ êg kanhrãn mũ ên ki ge jãvãnh ãjag tóg nỹtĩ mỹr'. Kỹ ù tỹ ki rã sór mũn kỹ ãjag tóg ti mỹ tó kónãn tĩ, ti tỹ ki vẽn h fón tũ nĩn jé. Kỹ tóg êg tỹ ù jo ãn nĩfenh ên ri ke nĩ, ãjag tỹ ag tỹ Topẽ ki ge kamẽg ti," he tóg, Jesus ti. Ti tỹ ù tỹ ón kỹ Topẽ vĩ to professor ag mỹ vĩ kónãn hã vẽ.

⁵³ Ti tỹ tag tó kar kỹ tóg hẽn ra tĩ mũ sir. Tag pãte Topẽ vỹ to professor ag tóg ti mré mũ kỹ ti tugnỹm tĩ, Fariseu ag ke gé. Ag tỹ ti vỹ to ti se sór vẽ. Hã kỹ ag tóg ón kỹ ti ki jẽmẽgmẽg mũ.

⁵⁴ Ón kỹ ag tóg ti vỹ jẽmẽg tĩ gé sir, ag tỹ ti vỹ to ti kãgmĩn jé.

12

*Ûn jykre régre ag
(Mt 10.26-27)*

¹ Hã ra ù tỹ hẽn ri ke ag vỹ vẽn h mãn kỹ nỹtĩ nĩ. E tãvĩ ag tóg tĩ ha, mũl tỹ hẽn ri ke ag. Kỹ ag tóg jagnẽ sãnsãn mũ sir, ag e nỹtĩn kỹ. Kỹ Jesus tóg ag kanhrãnãn mũ. Á mré mũ

tĩ ag kanhrãn vén tóg mũ, kỹ tóg ag mỹ: "Fariseu ag jykre han sór tũg nĩ," he mũ. "Pão jẽgia jafã ri ke ti nĩ, ag jykre ti, hã kỹ tóg Topẽ mỹ kórég nĩ. Ag jykre hã vẽ, ha mẽ: jykre régre ag nỹtĩ. Kỹ tag tóg Topẽ mỹ kórég tãvĩ nĩ," he tóg.

² "Êg tỹ péju kỹ nén han mũ vỹ vẽn h ven kãn ke mũ, êg tỹ vẽn h kar vatãnh tá nén to jykren mũ vỹ vẽn h ven kãn ke mũ, kurã tỹ êgno ki," he tóg.

³ "ãjag tỹ vẽn h kar vatãnh tá vẽn h ja ên mẽ kãn jé ag tóg ke mũ, vẽn h kar. ãjag tỹ kékén kỹ nén tó ja ên tó kãn jé ag tóg ke mũ, jamã hár(a), ãjag tỹ ãn kãtã nén tó ja ên. Hã kỹ vẽn h jykre régre han tũg nĩ," he tóg.

*Êg tỹ êprã pã'i ag kamẽg ke tũ
(Mt 10.28-31)*

⁴ "Ha mẽ, iso há ãjag nỹtĩ. Ag kamẽg tũg nĩ, ù tỹ êg tén tĩ ag, pã'i ag. Ag tỹ êg tén kar kỹ ag tóg êg tỹ hẽn ri kenh ke tũ nĩ sir. Hã kỹ ag kamẽg tũg nĩ.

⁵ ãjag mỹ sóg tónh mũ ha, ãjag tỹ ùn kamẽg ke ti, hã vỹ: Topẽ, he mũ. Ti hã ne êg tén kar nũgme ki êg vãm ki kanhró nĩ', mỹr ha mẽ'. Kỹ ti hã kamẽg nĩ.

⁶ Sēsĩ vãm ag tóg tĩ, jãnkamy kato, êg tỹ ko jé. Jēsĩ tỹ 5 (ke) kato êg tóg jãnkamy pir mãg tĩ. Hã ra Topẽ pi(jé) ag kã jatun mũ'. Ag ki rĩr nĩ tóg nĩ, sēsĩ ên ag ki.

⁷ Êg ki rĩr tóg nĩ gé, Topẽ ti. Êg tỹ nén vég mũ kar ki kanhró tóg nĩ. Hã kỹ tóg êg gãnh ki kanhró nĩ gé. Nĩkrén

kān ja tóg nī, Topē ti, ěg gānh ti. Jēsī kāfór ājag tóg nýtī, Topē mý. Ājag kāmī ũn pir tóg sēsī e kāfór nī, ti mý. Hā ký ag kamēg tūg nī, ũ tý ěg tén sór mū ag,” he tóg.

Ěg tý Jesus kāmén ke

(Mt 10.32-33; 12.32; 10.19-20)

⁸ “Hā ký sóg ājag mý tag tó mū. Ěprā ke ag mý: “tý sóg ti mré ke nī,” hemnī, iso. Ag kamēg tūg nī. Ký sóg ājag tónh ke mū gé, Topē tý jēnē jafā ag mý, kurā ěn kā, ājag tý tý inh mré ke nýtī ti. Tý sóg ěprā ke fi kósín ěn nī, ha mē.

⁹ Ājag tý ěprā ke ag mý inh kāmén tū nīn ký sóg ājag tónh ke tū nī gé, Topē tý jēnē jafā ag mý, ājag tý iso: “ti ki kagtīg sóg nī,” hen ký,” he tóg.

¹⁰ “Tý sóg ěprā ke fi kósín ěn nī. Ag tý iso vēme jū han ký sóg ag mý vēnh pāte fón sór mū. Ag tý hā ra Topē kuprīg to vēme jū han ký Topē tóg ag mý vēnh pāte fón mán ke tū nī ha,” he tóg.

¹¹ “Ājag vin jé ag tóg ke mū, pā'i ag mý, governador ag mý ke gé, ag tý ājag sigse jé. Ěg vēnh kanhrān jafā krēm ag tóg ājag ki jēmē sór ke mū, ājag tý inh ki ge ký nýtī ti, ha vemnī. Hā ra to krī kufy han tūg nī, ājag tý ag mý inh kāmén ke ěn to.

¹² Topē kuprīg hā ne ājag kanhrān ke mū', kurā ěn kā. Hā ký ājag tóg tónh ke mū sir,” he tóg, Jesus ti, ā mré mū tī ag mý.

Ěg tý nén ũ to én ke tū

¹³ Ký ũn e ag kāmī ũ tóg Jesus mý: “Senhor,” he mū. “Inh jo inh kāke mré vīmñī, ěg tý ěg panh ter ja tý nén kar vēnh kápām jé, ti kuge ti,” he tóg, Jesus mý.

¹⁴ Hā ra Jesus tóg ti mý: “vó,” he mū. “Isū pijé’,” he tóg. “Inh pi(jé) ā mý ā kuge ve sór mū'. Inh pi(jé) ā tū tý vēnh kápām sór mū',” he tóg.

¹⁵ Ký tóg ag kar mý: “ker nén ũ to én hē’,” he mū. “Ěg tý nén kar pi(jé) ěg rīr han ke mū'. Ěg tū mág nī ra ěg pi(jé) mū há han ke mū',” he tóg.

¹⁶ Ký tóg ag mý: “vēnh jykre há vý ge nýnh mū, ha mē,” he mū. “Ũn rico tóg nī ja nīgtī mýr,” he tóg. “Ti japý vý nén kar kanē e han ja nīgtī.

¹⁷ Ký tóg to jykrén mū sir, ũn rico ti. “Inh hýn ne han mū ha?” he tóg. “Inh pājó mág vó, inh pājó kása vó, sý krēm isū kar rāg jé?” he tóg.

¹⁸ “Inh pājó kókén jé sóg ke mū, sý ti jēgja ki ũn mág han jé, ký sóg krēm isū kar vin mū, inh jakré kanē kar ti,” he tóg mū, to jykrén ký.

¹⁹ “Ký sóg jatu nī sir. Isū vý prýg tý hēn ri ke pétēm mū, ký sóg rānhraj mán ke tū nī ha. Jatun mý sóg jēg nīnh ke mū, kron nī jé inh ke mū gé. Inh mýn sér tī sir, sý jatu nīn ký,” he tóg, to jykrén ký, ũn rico ti.

²⁰ Hā ra Topē tóg ti mý vī mū. “Krī tū ā nī,” he tóg ti mý. “Kuty tag kā ā tóg ter ke mū ha, ký ā tū mág tag tý tý ũ tū nīnh ke mū ha ke gé. Ma tīg ke tū ā tóg nī. Ā ter ke vē,” he tóg ti mý, Topē ti,” he tóg, Jesus ti,

ũ tỹ ã panh tũ mǎn sór mũ ên mỹ.

²¹ “Ge tóg tĩ, êg tỹ ga kri nén ũ há ve sór kỹ, êg tỹ kanhkã tá tỹ nén ũ tũ nĩn kỹ, Topê mré. Êg pi(jé) ga kri êg tũ mág ên ma mũnh mũ'. Êg tỹ kanhkã tá tũ mág nỹtĩn kỹ tag hã tóg há nĩ,” he tóg, Jesus ti.

Êg tỹ nén ũ to krĩ kufy han ke tũ
(Mt 6.25-34)

²² Kỹ tóg ã mré mũ tĩ ag mỹ: “ha vé,” he mũ. “Vějẽn to jykrén kỹ krĩ kufyg tũg nĩ,” he tóg. “Inh hỹn ũri ne konh mũ’? Inh hỹn ne tunh mũ’?” he tũg nĩ.

²³ Topê tỹ êg han ja vē, êg tỹ ga kri mũ jé. Hã kỹ tóg êg jẽn ki rĩr ke mũ gé, êg kur ki ke gé.

²⁴ Sēsĩ to jykrén nĩ. Ag mỹ êkrãn tĩ’? Vó. Ag mỹ ãjag jakré kunũg tĩ’? Vó. Ag mỹ pãjó han tĩ’? Vó, ke tũ ag tóg nĩgtĩ, ge ra Topê tóg ag jẽn tĩ. Jēsĩ kãfór ãjag tóg nỹtĩ, Topê mỹ, hã kỹ tóg ãjag jẽn ke mũ gé.

²⁵ Kỹ, Topê tỹ êg jé prěr kỹ êg tóg mũnh mũ gé. Êg pi(jé) mũnh ke tũ nĩ’, ti tỹ êg jé prěr kỹ’. Êg tỹ to krĩ kufy han mũ ra êg tóg tũg mũ.

²⁶ Êg pi(jé) êg krĩ kufy tu-grĩn, êg krĩ há tũgnĩn mũnh ke tũ nĩ’. Mũ jé êg tóg ke mũ, ti tỹ êg jé prěr kỹ. Hã kỹ nén ũ ũ to krĩ kufy han tũg nĩ.

²⁷ Ka fej to jykrén nĩ gé. Jatun mỹ tóg mog tĩ. Rãnrhãj tũ tóg nĩgtĩ, kur han tũ tóg nĩgtĩ. Hã ra tóg sĩnvĩ nỹtĩgtĩ, ka fej ti, kỹ pã’i mág tỹ Salomão ên kur tóg ri ke tũ nỹtĩ ja nĩgtĩ,

ti sĩnvĩ ja ra, vēnh kar kur sĩnvĩ kãfór ti nĩ, Salomão kur ti. Ki hã sóg tó mũ mỹr.

²⁸ Topê hã ne ka fej sĩnvĩ han tĩ’. Hã ra tóg kãnhmar kãgter tĩ, ka fej ti, ti sĩnvĩ ra. Ũri tóg há nỹtĩ, tỹ vaj kỹ tóg kógungun tĩ. Topê tỹ ka fej sĩnvĩ han kỹ tóg ãjag kur ki rĩr ke mũ gé, ha vemnĩ. Kỹ ti to: “ti mỹ êg mỹ kur nĩm mũ vỹ’?” he tũg nĩ.

²⁹ “Inh hỹn ne konh mũ’, ũri’?” he tũg nĩ gé. To krĩ kufy han tũg nĩ.

³⁰ Topê ki ge tũ ag vỹ tag to jykrén mág tĩ. Hã ra êg jóg tỹ Topê vỹ êg ki kanhró nĩ, êg tỹ nén konh ke mũ ti, êg kur ti ke gé. Kỹ to krĩ kufy han tũg nĩ.

³¹ Topê tỹ tỹ êg pã’i nĩ ên hã ve jé vãsãnsãn nĩ. Kỹ tag hã to jykrén nĩ. Kỹ Topê vỹ ãjag mỹ ãjag tỹ nén ve sór mág ên vin ke mũ sir,” he tóg, Jesus ti.

Kanhkã tá êg tũ
(Mt 6.19-21)

³² “Kamêg tũg nĩ, ãjag pipir nỹtĩ ra. Êg jóg tỹ Topê vỹ ãjag to há nĩ, hã kỹ tóg ãjag mỹ kanhkã ti ven sór mũ, ha mẽ.

³³ ãjag tỹ nén kar vin nĩ, ũn vēsýrénh mũ ag mỹ. Hã kỹ ãjag tóg kanhkã tá tỹ nén ũ mág nỹtĩnh mũ. Tá ãjag kuge tóg tũ’ henh ke tũ nĩ. Tag ki êg tóg êg jãnkamy fón tĩ, nén ũ kar to. Tá tóg tũ’ he jãvãnh nĩ, êg kuge ti. Tá ũ tóg péjunh kãtĩg ke tũ nĩ gé, tá ti ga tóg kaggranh ke tũ nĩ gé. Kanhkã tá êg tũ vỹ ge nĩ. Tũg jãvãnh ti nĩ.

³⁴ ãjag tỹ ga kri tỹ nén ũ mág nỹtĩn kỹ ãjag tóg ga kri

mũ mág sór mũ. Ājag tỹ hã ra kanhkã tá tỹ nén ũ mág nỹtĩn kỹ ājag tóg kanhkã ra mũ sór mũ, kỹ tag hã ne há nĩ,” he tóg, Jesus ti.

Ēg tỹ Jesus kãtĩg mãn jãvãnh ke

³⁵ “Ēg kur tỹ ěg tóg vėsógfĩg tĩ, ěg tỹ rãnrãj há han jé. Ēg lampião grug ěg tóg tĩ, kuty kã, ěg tỹ ve há han jé. Ēn ri ke han nĩ, ājag tỹ inh kãtĩg mãn ke jãvãnh kỹ.

³⁶ Kỹ ājag tóg ũn camarada ri ke nỹtĩ. Kejẽn ag patrão vỹ hẽn ra tĩg mũ, ã prũ ke festa mág han jé. Kỹ ti camarada ag vỹ ti tỹ tá vỹn ke jãvãnh nỹtĩ. Ag tỹ ti jãvãnh há han kỹ tóg há tĩ, ag nũgnũr tũ nĩn kỹ. Kỹ ag tóg kãnhmar ti tỹ jãnkã tỹ tórón tórón ke kỹ mẽnh mũ, kỹ ag tóg ti mỹ róm ke mũ sir, ti jun kỹ.

³⁷ Kỹ tóg kejẽn jun mũ sir, ag patrão ti. Kỹ tóg sér tĩ, ti camarada ag tỹ ti jãvãnh nỹtĩn kỹ. Kỹ tóg ag mỹ vĩ há han ke mũ sir. Kỹ tóg vėsóg fĩn kỹ ag mỹ: “nĩgnĩ ra ver, mesa to,” henh ke mũ sir. Kỹ tóg ag mỹ vėjẽn ven ke mũ. Ag patrão hã ne ã camarada ag mỹ vėjẽn ven ke mũ, ha vemnĩ. Ki hã sóg tó mũ,” he tóg, Jesus ti.

³⁸ “Hẽn ri ke mũn tóg meia noite ki jun ke mũ, hẽn ri ke mũn tóg galo kyr mũ ra jun ke mũ. Ti camarada ag tỹ ti jãvãnh kỹ nỹtĩn kỹ tóg ag mỹ vĩ há tãvĩ han ke mũ sir, ha vemnĩ,” he tóg, Jesus ti.

³⁹ “Kỹ tag to jykrén nĩ, ha mẽ. Inh kãtĩg mãn ke vỹ ũ tỹ nén ũ pigju(g) tĩ kãtĩg ri ke

nĩnh mũ. Ũ tỹ ti ĩn krẽm nĩ ěn pi(jé) ki kanhró nĩ, hora kã ti kãtĩg ke mũ ti. Ũ tỹ ti tỹ nén ũ pēju sór mũ tóg ěn ge nĩ, ha mẽ. Ti tỹ ti kãtĩg ke hora ki kanhró nĩ (hã) ra tóg ã kanẽ fãn mũ vẽ, ti tỹ ti ĩn kãra rã tũ nĩ jé. Hã ra tóg ki kãtĩg nĩ.

⁴⁰ Ge ti nĩ, inh kãtĩg mãn ke ti. Vẽn ki rĩr, vẽn ki ěmẽ. Ēprã ke fi kósin vỹ kãtĩg ke mũ, ājag tỹ ti kãtĩg ke to jykrén tũ (hã) ra,” he tóg, Jesus ti.

Ũn camarada to com-paração

(Mt 24.45-51)

⁴¹ Kỹ Pedro vỹ ti mỹ: “Senhor,” he mũ. “Ā tỹ ũ mỹ ke nẽ, ã tỹ tó ja tag ti? Ā tỹ ũ tỹ ã ki ge tũ ag mỹ ke mỹ, ěg mỹ ke mỹ vó?” he tóg, Pedro ti, Jesus mỹ.

⁴² Kỹ ěg Senhor tóg ti mỹ: “hỹ,” he mũ. “Kejẽn patrão tóg hẽn ra tĩg sór mũ, kỹ tóg ã camarada ag kã ũ tỹ pã'i han mũ, ti tỹ ti jo ã mré camarada ag ki rĩr jé. Ũ tỹ ã rãnrãj ki rĩr há han tĩ ěn kuprẽg tóg mũ, ti tỹ ag mỹ vėjẽn ven jé, vėjẽn ke horan ki.

⁴³ Ti tỹ ag ki rĩr há han kỹ ti patrão vỹ ti mỹ vĩ há han ke mũ, ti kãtĩg mãn kỹ, ũ tỹ ag ki rĩr há han mũ ěn mỹ.

⁴⁴ Tỹ pã'i mág han jé tóg ke mũ, ti tỹ ti tũ ki rĩr kãn jé sir. Ki hã sóg ke mũ, ha mẽ.

⁴⁵ Ti camarada ěn jykre kórég nĩn kỹ tóg vẽnhmỹ nĩ jãvo, ha mẽ. To jykrén kỹ tóg: “ěg patrão vỹ kãtĩg vãnh han mũ,” he mũ. Kỹ tóg ã mré camarada ag vóg kónãn kỹ ag mrãnmrãn mũ sir, fag ke gé.

Kỹ tóg jatun mý jën mág han mũ, ùn kronkron tĩ ag mré tóg kronkron kỹ pépév tĩ nĩ gé sir.

46 Kỹ ti patrão vỹ ti kãnhmỹ jun ke mũ, ha vemnĩ, ti tỹ ti jun ke kurã ki kagtĩg nĩn kỹ, ti hora ti ke gé, kỹ tóg ti vóg kónãn ke mũ gé sir, ti patrão ti, kỹ tóg ti fón ke mũ, Topẽ vĩ mranh tĩ ag mré hã,” he tóg.

47 “Topẽ camarada ù vỹ ã patrão kãtĩg ken jo ki rĩr há han tũ nĩgtĩ, ti patrão tỹ ti mý tó mũ ra. ã patrão vĩ ki króm tũ ti nĩgtĩ. Ti mrãnmrãn mág jé tóg ke mũ, ti patrão ti, Topẽ ti.

48 Û tóg ã tỹ nén han ke mẽ ja tũ nĩ, ti patrão vĩ ti, ti camarada ù ti. Hã ra tóg kórég han mũ gé. Kỹ ti patrão tóg ti mrãnmrãn ke mũ gé. Ti mrãnmrãn sĩ han jé tóg ke mũ jãvo. Û tóg vënh kanhrãn mág han tĩ. Kỹ Topẽ tóg vënh jykre há tãvĩ ve sór mũ sir, ti tỹ ki kanhrãn mág han mũ ên to. Û mý ti vĩ mág tĩ, Topẽ ti, kỹ tóg ti tỹ ki króm há han ve sór mũ gé sir,” he tóg, Jesus ti.

Û tỹ Jesus tugrĩn êg kato tênh ke
(Mt 10.34-36)

49 “Ga kri inh mur, isỹ re pũr tĩg ri ke han jé, hã vỹ: ùn e tỹ inh ki ge mũ, he mũ. Sỹ re pũr tĩg ri ke ên venh há tóg tĩ, hã ra tóg ver gru tũ nĩ.

50 Ti grug to hã sóg vësỹrénh ke mũ. Iser ke vë, kỹ tóg inh mý e tĩ. Sỹ ve jãvãnh tóg tĩ, inh vësỹrénh ke ti,” he tóg, Jesus ti.

51 “Ãjag hỹn iso: “vënh kar tỹ jagnẽ to há han jé tóg ke mũ,” he tĩ. Hã tũ vë. Û tỹ hën ri

ke tỹ jagnẽ kato tẽ han jé sóg ke mũ, ha vemnĩ.

52 Ha vé, ãn pir krêm ke fag vỹ jagnẽ kato tênh ke mũ. Ûn tãgtũ fag vỹ ùn régre fag kato tẽgtênh mũ ha. Kar ùn régre ên fag vỹ ùn tãgtũ fag kato tẽgtênh mũ gé sir.

53 Jagnẽ kato fag jagnẽ to jũgũnh mũ. Û tóg ã kósin kato tênh ke mũ, kỹ ù tóg kejën ã panh kato tênh ke mũ gé. Û fi vỹ ã kósin fi kato tênh ke mũ, kỹ fi vỹ ã mýnh fi kato tênh ke mũ gé. Kỹ ù tóg ã má fi kato tênh ke mũ, kỹ fi tóg ã jamré kato tênh ke mũ gé sir. Ge ti nĩgtĩ,” he tóg, Jesus ti.

Jesus jykre ki kanhrãn
(Mt 16.2-3)

54 Kỹ tóg vënh kar mý tó mãn mũ gé, kỹ tóg ag mý: “kanhkã ve kỹ ãjag tóg ta ki kanhró nỹtĩ,” he mũ. “Kanhkã góg tỹ tãtã kãtĩn kỹ ãjag tóg: “ta vỹ kutênh mũ,” he tĩ. Ki kanhró ãjag tóg nỹtĩgtĩ.

55 Kar ãjag tóg kãka ki kanhró nỹtĩ gé. “Tag tán kãtĩ mũ, kãka ti, kỹn hỹn jũ jagy nĩnh mũ, ha vemnĩ,” he ãjag tóg tĩ gé.

56 Ki kanhró ãjag tóg nỹtĩ, ta jykre ti, kãka jykre ti, ga jykre ti ke gé. Hã ra ãjag tóg inh jykre ki kanhrãnran sór tũ nĩ, sỹ ùri ãjag mý tó mũ tag ti. Kutu ãjag nỹtĩ, ha mẽ, hã kỹ ãjag tóg ki kanhrãnran sór tũ nĩ,” he tóg, Jesus ti.

Êg tỹ jagnẽ mý vënh pãte fón
(Mt 5.25-26)

57 “Kỹ ãjag tóg vënh jykre kuryj to jykrén tũ nĩ gé, ãjag tỹ

jagně mý věnh pãte fón jé, ãjag tỹ ver ga kri mũn kỹ.

⁵⁸ Kejẽn ãjag tóg jagně mý věnh jykre věnhmỹ tó tĩ. Kỹ ãjag tóg pã'i mý tónh mũ sir. Ā tỹ ũ to jũ mũ ěn vỹ ã tónh tũg sór mũ. Ti tỹ pã'i tá jun ke to hã ti mré vĩmnĩ. Ti mý: "inh mý věnh pãte fón," hemnĩ. Ke tú nĩ mũ ra pã'i vỹ ã jykre pãno venh ke mũ, kỹ tóg polícia mý: "ti se ra," henh ke mũ. Kỹ tóg ã senh ke mũ sir.

⁵⁹ Ha mẽ, tá ã kãnhmar kãkutẽ mãn ke tú nĩ. Ā tỹ kajãm kãn kar kỹ ã hẽn ri ke mũn tá kãkutẽ mãn ke mũ sir," he tóg. Jesus tỹ ěg tỹ jagně mý věnh pãte fón kãmén hã vẽ.

13

Ěg tỹ ěg jykre tovãnh ke

¹ Kejẽn ũ ag tóg Jesus tá jun-jun mũ, hã ra ag tóg ti vĩ mẽ kỹ nỹtĩ. Kurã ěn kã ũ ag tóg ti mý Galiléia tá ke ag tó ja nĩ, fóg tỹ pã'i tỹ Pilatos tỹ ũn kãgtén ja ěn ag. Topě mý ag tóg ãjag mẽg tãnh ja nĩ, ti mý pũn jé, hã ki Pilatos tóg ag kygrẽn ja nĩ, hã kỹ ag kyvénh tóg ãjag mẽg kyvénh mré kutẽ ja nĩ. Hã kãmén ag tóg, Jesus mý, ti tỹ ag mý e tũn kỹ, ag tỹ ũn kãgter mũ ag to: "ag hỹn Topě vĩ mranh mág," hen kỹ.

² Kỹ Jesus tóg ag mý: "ãjag hỹn Galiléia tá ke ěn to jykrén sór mũ, ũn kãgter mũ ěn ag to," he mũ. "Topě vĩ mranh mág tĩ ag vẽ," he ãjag tóg mũ ag to. "Ag hỹn věnh jykre pãno han mũ nĩ, ag hỹn Galiléia tá ke ag jykre pãno kãfór han mũ

nĩ, hã kỹ Topě hỹn tóg ag vóg kónãn mág," he ãjag tóg tĩ ag to.

³ Ke tú vẽ hã ra. Ājag ri ke ag tóg nỹtĩ, mýr, ha mẽ. Ājag tỹ ãjag jykre tovãnh tũ nĩn kỹ ãjag tóg nũgme ki vár ke mũ, ha vemnĩ," he tóg.

⁴ "Ũ tỹ 18 (ke) ěn ag to jykrén nĩ, ũ tỹ goj tỹ Siloé tá kãgter mũ ěn ag. Īn tég ěn tóg ag kri kutẽ, ĩn vag jẽ ěn ti, hã kỹ ag kãgter mũ. Jerusalém tá ke kar ag jykre ri ke ja ag tóg nỹtĩ. Ag pi(jé) ag jykre pãno ěn kãfór ja nỹtĩ'. Ag ri ke han ja ag nỹtĩ, ha mẽ.

⁵ Kỹ sóg ãjag mý ke mũ. Ājag tỹ ãjag jykre pãno tovãnh tũn kỹ ãjag tóg nũgme ki vár ke mũ," he tóg, Jesus ti.

Ka tỹ figueira to com-paração

⁶ Kỹ tóg ag mý: "ũ tỹ Topě jykre han sór tũ ag vỹ ge nỹtĩnh mũ, ha mẽ," he mũ. "Kejẽn ũ tóg nĩgtĩ. Ka há krãn ja tóg nĩgtĩ, ka tỹ figueira. Ka kanẽ ũ vẽ, ko há ti jẽ. Ěn krãn ja tóg nĩ. Uva kãmĩ tóg ti krãn ja nĩ. Kỹ tóg kejẽn ti kanẽ ko sór mũ, kỹ tóg venh kãtĩ mũ. Hã ra tóg kanẽn ja tũ nĩ.

⁷ Kỹ tóg uva ki rĩr tĩ mý: "ti gỹn ra," he mũ. "Prỹg tãgtũ tóg nĩ ha, sỹ ti kanẽ vég tũ ki. Kanẽn vãnh ti hỹn jẽ. Ti gỹn ra, ti tỹ ga kókég tũ nĩn jé," he tóg.

⁸ Hã ra tóg ã patrão mý: "ti tovãnh ra ver," he mũ, uva ki rĩr tĩ ti. "Ti pẽnĩn sóg kũm mũ ver, sỹ ti krẽm ga jẽgja han jé ver.

⁹ Hën ri ke mün tóg kaně há hyn han ke mü ha. Ke tũ nĩn kÿ sóg ã mÿ ti gÿn ke mü vãhã,” he tóg mü, uva ki rĩr tĩ ti,” he tóg, Jesus ti. Ti tÿ ù tÿ ã jykre kórég tovãnh sór tũ tón hã vë.

Jesus tÿ vënhkán ke kurã ki ùn kaga tÿ há' he

¹⁰ Kejën tóg ag vënh kanhrãn jafã krëm ag kanhrãn mü, Jesus ti, vënhkán ke kurã ki.

¹¹ Kÿ ù fi tóg tá jë nĩ. Jagrë kórég fi nĩ, hã kÿ fi tóg pãnh ke kÿ jë nĩ. Vënh ra hã jë kórég fi tóg nĩ, fi jagrë tugñin. Prÿg tÿ 18 (ke) han fi tóg, fi jagrë tÿ fi kagãg tĩ ki.

¹² Kÿ Jesus tóg fi vég mü, kÿ tóg fi jé prër mü. “Kunĩg, jÿ,” he tóg. “Ã kaga tÿ sóg tũ' henh mü,” he tóg fi mÿ.

¹³ Kÿ tóg ã nĩgé tÿ fi kri fig mü. Kÿ fi tóg vënh ra hã jëg há han mü, ha mẽ. Kÿ fi tóg Topë to vĩ há han mü sir.

¹⁴ Hã ra vënh kanhrãn jafã to pã'i tóg Jesus to jũ mü, ti tÿ vënhkán ke kurã ki fi tÿ há' hen kÿ. Ti mÿ tóg tÿ vënh rãnrãj nĩ, fi tÿ há' he mü tag ti, hã kÿ tóg Jesus to jũ mü. Kÿ tóg vĩ mü sir. Vënh kar jyvën kÿ tóg ag mÿ: “kurã tÿ 6 (ke) hã ki ëg tóg rãnrãj ke mü ha,” he mü. “Hã kÿ kurã tÿ 6 (ke) ën ki kãmümnĩ, ti tÿ ãjag tÿ há' hen jé. Vënhkán ke kurã ki vënh kygtãg kãmü tũg nĩ,” he tóg mü, pã'i ti.

¹⁵ Hã ra Jesus tóg ti vĩ kãfãn mü, kÿ tóg: “jykre régre ã nĩ (mÿr),” he mü. “Vënhkán ke kurã kã ãjag tóg ãjag mëg ki rĩr

tĩ gé, monh ki, cavalo ki ke gé, ha mẽ. ãjag mëg kygvãn ãjag tóg tĩ, ãjag tÿ ti kron mün jé, ti tÿ ùn kãkã se kÿ jë kÿ, cocho to.

¹⁶ Kÿ tag fi vÿ se kÿ jë ën ri ke jë ja nĩ gé, ha mẽ. Satanás hã vÿ fi sé', prÿg tÿ 18 (ke) ki. Ëg jóg'jóg ve tÿ Abraão kósin ù fi vë, ëg mëg kãfór fi tóg jë, hã ra ã tóg jũ sór mü, isÿ vënh kán ke kurã ki fi tÿ há' hen kÿ, isÿ fi kavãn ri ke han kÿ. Vënh jykre vënhmÿ han sór ã tóg nĩ,” he tóg, Jesus ti, pã'i ti mÿ.

¹⁷ Ti vĩ tag to ag tóg mÿ'ãg'ãg mü sir, ti kato tẽ mü ag. Hã ra tóg vënh e ën mÿ sér tĩ sir. Ag mÿ tóg nén ù kar há han tĩ, hã kÿ tóg ag mÿ sér tĩ sir.

Mostarda fy to comparação

(Mt 13.31-32; Mc 4.30-32)

¹⁸ Kÿ Jesus tóg ag mÿ: “Topë tÿ tÿ ëg pã'i nĩnh ke vÿ ge nĩ, ha mẽ,” he mü.

¹⁹ “Vãnh tÿ mostarda fy ri ke ti nĩ. Sĩ ti nĩ, ti fy ti. Ëg japÿ ki ëg tóg krãn tĩ, kÿ tóg mog tĩ. Kÿ tóg ka ri ke nĩ, ti tÿ pẽ téj nĩn kÿ. Hã kÿ sësĩ tóg kri jagfénh ke mü, ti pẽ kri, ti pẽ mág nĩn kÿ. Topë tÿ tÿ ëg pã'i nĩ kãme tÿ vënh kar kri rüm ke to ken hã vë,” he tóg, Jesus ti.

Fermento to comparação

(Mt 13.33)

²⁰ Kÿ tóg ag mÿ: “Topë tÿ tÿ ëg pã'i nĩn kÿ tóg tag ri ke nĩnh mü, ha mẽ,” he mãn mü.

²¹ “Ûn tÿtã fag vÿ pão han tĩ, farĩnh tÿ. Pão han jé fag tóg pão jëgja jafã tÿ fermento ën tÿ farĩnh mré jëgãg tĩ. Kejën ù

fi tóg farĩnh e kãki ti jãgia jafã pir tỹ kãki vãm ja nĩ, hã ra tóg tỹ sòn ke kãn,” he tóg, Jesus ti. Ti vĩ tỹ vẽn kar kri rũm ke kãmén hã vẽ.

*Jãnkã sĩ to comparação
(Mt 7.13-14, 21-23)*

22 Kỹ Jesus tóg tĩ mũ. Cidade e fĩn rãm tóg mũ, êmã kãsir fĩn ke gé. Tĩg kỹ tóg ag kanhrãnrãn mũ sir. Ge kỹ tóg komẽr hã cidade tỹ Jerusalém kukãm tĩ mũ.

23 Kỹ ù tóg ti mỹ: “Senhor’,” he mũ. “Ûn krenkren mũ ag mỹ pipir nỹĩ, e nỹĩ vó?” he tóg ti mỹ. Kỹ tóg ti mỹ:

24 “hỹ,” he mũ. “Inh ki rã vỹ jãnkã sĩ ra rã ri ke nĩ,” he tóg. “Vãsãn nĩ, ã tỹ ra rã já. Kejẽn ù tóg ra rã mãn ke tũ nĩ ha. Ën kã ù tỹ hẽn ri ke ag vỹ ra ge sór mũ, hã ra ag tóg tỹ hẽ ri kenh ke tũ nĩ ha sir.

25 Ìn ki rĩr tĩ ãn tỹ nĩfénh ja vẽ mỹr, hã kỹ ag tóg ìn kãra genh ke tũ nĩ ha. Kanhkã to ken hã vẽ, ìn ti. Ìn ki rĩr tĩ ãn hã ne nĩfénh ke mũ’, kỹ ãjag tóg sir re tá nỹtĩnh kỹ tỹ tórón’ tórón’ kenh ke mũ. “Senhor’, ãg mỹ róm, ãg mỹ nón, jãnkã ti,” he já ãjag tóg ke mũ. Hã ra tóg sir ãjag mỹ: “ãjag ki kagtĩg sóg nĩ,” henh ke mũ, ìn ki rĩr tĩ ti. “ãjag tỹ ù nỹtĩ?” he já tóg ke mũ.

26 Kỹ ãjag tóg ti mỹ: “ã mỹ ãg ki kagtĩg?” henh ke mũ. “Ëg hã vỹ ã mré jẽn ja nĩ, ãg hã vỹ ã mré kron ja nĩ, ãg kanhrãn ja ã tóg nĩ, ãg jamã tá. Ëg hã vẽ,” he já ãjag tóg ke mũ, ãjag tỹ re tá nỹtĩnh kỹ.

27 Hã ra tóg ãjag mỹ: “inh pi(jé) ãjag ki kanhró nĩ,” henh ke mũ. “ãjag pi(jé) tỹ inh mré ke nỹtĩ’. Ha mũjẽg. Vẽnh jykre pãno han ãjag tóg mũgtĩ,” he já tóg ke mũ, ìn ki rĩr tĩ ti, ãjag mỹ.

28 ãjag tỹ ra mũnh ke tá ãjag tóg vẽnỹrénh ke mũ, tá ãjag já tóg gyngyn ke mũ, gangan ke já ãjag tóg ke mũ, tá. Kór há tá ãjag tóg Abraão venh ke mũ, tá, Isaque ke gé, Jacó ke gé, Topẽ vỹ tó tĩ ag kar ke gé. Ën ag kar vỹ Topẽ tỹ tỹ ãg pã’i nĩ venh mũ sir, ãjag jãvo.

29 Ën kã Topẽ ki ge kỹ nỹtĩ kar ag tóg kãmũnh mũ, rã jur ja tá, rã pur ja tá, kanhkã fyr tá, rã krẽm tĩg ja tá. Kãmũ kỹ ag tóg Topẽ tỹ tỹ ãg pã’i nĩ venh ke mũ, ti tỹ ag ki rĩr nĩ ti, kỹ ag tóg tá jẽg nỹtĩnh mũ ãjag jãvo.

30 Kỹ tag ki ùn kãsir ù ag tóg mág nỹtĩnh mũ, tá pã’i nỹtĩnh mũ. Kỹ tag ki ùn mág ù ag tóg kãsir nỹtĩnh mũ gé, tá, tere kỹ,” he tóg, Jesus ti.

Jesus tỹ Jerusalém tá ke ag to há nĩ

(Mt 23.37-39)

31 Kurã ãn kã Fariseu ù ag tóg tá junjun mũ, Jesus mré vémén já. Ti mỹ ag tóg: “ha mẽ,” he mũ. “Pã’i mág tỹ Herodes vỹ ã tén sór mũ. Hã kỹ vẽnh péju tĩg, êmã ù ra,” he ag tóg mũ sir, Jesus mỹ.

32 Kỹ tóg ag mỹ: “mĩg sĩ ri ke ti nĩ, Herodes ti,” he mũ. “Hã kỹ tóg ke mũ. Ver sóg vẽnh jagrẽ kórég pan mũ, ùn kagyga ag tỹ há’ he já sóg ke mũ, ùri, vaj kỹ ke gé, kurã tỹ

hên ri ke ki. Kãnhmar sóg ter ke mũ, inh kurã ki, ha vemñi.

³³ Ūri sóg ver tĩg mũ, vaj kỹ ke gé, vaj ùn kỹ ke gé. Iser ken kỹ sóg Jerusalém tá ter ke mũ. Tag ki ke pijé'. Topê ví tó tĩ vỹ tỹ inh ñi, jo Jerusalém tá ke ag tóg ag kãgtén tĩ, Topê ví tó tĩ ag. Hã kỹ sóg Jerusalém tá ter tĩg ke mũ gé. Tag tómnĩ, Herodes mỹ," he tóg, Jesus ti.

³⁴ Kỹ tóg Jerusalém ki ke ag to vēmén mũ. Fe kaj han tóg, ag to, kỹ tóg: "Jerusalém tá ke ag mỹ sóg tag tó sór mũ, ha mẽ," he mũ. "Topê ví tó tĩ ag kãgtén ag tóg tĩ. Topê tỹ ag mỹ ùn jẽgnẽg tĩ ag pin ag tóg tĩ, pó tỹ, ag tỹ ag kãgtén jé. Isỹ ag vẽnh mãn há tóg tĩ vẽ, isỹ ag ki rĩr jé, Jerusalém tá ke ag, hã kỹ sóg ag jé prêr tỹ hên ri ke han mũ. Garĩnh fi jykre ri ke han sór isóg mũ vẽ, ag mỹ. Garĩnh fi vỹ ã krê kri jẽ ñi, fi tỹ ag vẽsỹrénh tũ ñi jé ke vẽ. Ēn ri ke han sór sóg mũ vẽ, hã ra ag tóg ke jãvãnh nỹtĩ.

³⁵ Hã kỹ ag tóg ag jamã pũn kãn ke mũ, kỹ vãpũr vẽ sir. Ū vỹ kãnhmar tá ñĩg mãn ke tũ ñi ha, ag tỹ cidade kókén ja tá. Hã kỹ sóg ag mỹ ke mũ. Inh ve mãn ke tũ ag ñi ha (mỹr). Kejẽn ag tóg iso: "Topê tỹ ti jẽnẽ ja vẽ," henh ke mũ. "Topê vỹ ti ve há han, ti tỹ ti jiji tó kãtĩg kỹ," he jé ag tóg ke mũ iso. Ēn hã kã ag tóg inh ve mãn ke mũ," he tóg, Jesus ti.

14

Jesus tỹ vẽnhkán ke kurã ki ù tỹ há' he

¹ Kejẽn tóg vẽnhkán ke kurã tá krỹg mũ. Kỹ tóg pã'i ù ñn krêm ñi ñi. Fariseu ag pã'i vẽ. Ti tỹ ti ñn krêm jẽn ke vẽ. Hã ra ag tóg tá ti tỹ rĩr mũ, "ti mỹ vẽnhkán ke kurã ki rãnrãj ke tũ?" he ag tóg mũ.

² Hã ra ù tóg tá ñi gé, ùn kaga ù. Kãnhpar kãn kỹ tóg jẽ. Jesus rĩn ja tá tóg jẽ ñi.

³ Kỹ Jesus tóg Topê ví to professor ag mỹ ke mũ, Fariseu ag mỹ ke gé. Ag mỹ tóg: "ẽg tỹ vẽnhkán ke kurã kã ù tỹ há' hen mỹ há ñi, mỹ kórég ñi vó?" he mũ.

⁴ Hã ra ag tóg ti mỹ nén ù tó tũ ñi. Kỹ Jesus tóg ùn kaga ěn kri ã ñĩgé fi kỹ ti tỹ há' he mũ sir. Kỹ tóg ti mỹ: "ha tĩg ge," he mũ.

⁵ Kỹ tóg ag mỹ: "kejẽn ãjag kósin ù tóg goj ki kutẽnh mũ," he mũ, "goj nig ki, ke tũ ñĩn kỹ ãjag mẽg tỹ monh. Vẽnhkán ke kurã ki tóg goj ki kutẽnh mũ, hên ri ke mũn. Kỹ ãjag tóg ti kunũg tĩ gé, ti tỹ vẽnhkán ke kurã kã ki kutẽn kỹ. Kỹ ãjag tỹ ne jé iso jũ sór nẽ?" he tóg.

⁶ Kỹ tóg ag tỹ ti mỹ nén tónh ke tóg tũ tĩ sir.

Festa to comparação

⁷ Kỹ Jesus tóg vẽnh kar kanhrãn jé tag tó mũ sir, ha mẽ. Ti mré jẽgiẽn kỹ nỹtĩ ag mỹ tóg kãmén mũ. Ag jẽn vén sór vẽ, ag tỹ tỹ ùn mág nỹtĩ jé. Hã vég tóg mũ, hã kỹ tóg ag kanhrãn rãn sór mũ, Jesus ti.

⁸ Kỹ tóg ag mỹ: "kejẽn ù tóg ãjag mỹ: "kurã ěn kã sóg vẽnh prũg ke to festa han ke mũ. Ha ñnh mré jẽn kãtĩg," henh ke mũ. Kỹ ti festa kã jẽn vén sór

tũg nĩ. Hẽn ri ke mũn ã kãfór nĩ ù tóg ki jun mũ.

⁹ Kĩ festa ki rĩr mũ tóg ã mĩ: “toreg ver’,” henh ke mũ. “Ti jẽn kar kĩa ã tóg jẽn ke mũ. Mẽ kĩa jẽ nĩ ver,” he jé tóg ke mũ ã mĩ, ù tỹ festa ki rĩr tĩ ti. Kĩ tóg ã mĩ'a tĩnh mũ sir, ha mẽ.

¹⁰ Kĩ ã tỹ festa venh tĩg kĩa mẽ kĩa nĩmĩ ver, vễjẽn jãvãnh kĩa. Kĩ festa ki rĩr mũ vỹ ã mĩ: “ha jẽn vén, fag mré,” henh ke mũ. Kĩ ã pi(jé) mĩ'ãg ke mũ'” he tóg ag mĩ, Jesus ti.

¹¹ “Hã kĩa tóg ù tỹ ag kãfór nĩ sór mũ térem ke mũ, vễsỹkã, Topẽ ti, ha vemnĩ. Jãvo tóg ù tỹ: “tỹ inh ùn sĩ nĩ,” he mũ ẽn jãnfyn ke mũ, ha vemnĩ,” he tóg, Jesus ti.

Êg tỹ ùn jagtar ag jagãgtãn

¹² Kĩ tóg ù tỹ ã kógfyn mũ ẽn mĩ kãmén mũ gé. Ti mĩ tóg: “ã tỹ festa han sór kĩa ùn rico ag mĩ tó sór tũg nĩ, ã mré ke fag mĩ, ã kãke ag mĩ, ã jãvy ag mĩ, ã rã nỹtĩ ag mĩ tó tũg nĩ gé,” he mũ. “Ã tỹ ùn rico ag mĩ tó mũ ra ag tóg vẽn kaja jé ã mĩ festa han sór mũ gé. Kĩ ã tóg ã festa kaja ti vég mũ sir, ẽprã.

¹³ ã tỹ festa han sór kĩa ùn kaga kĩa rãnrãj vãnh ag mĩ tómnĩ, ùn kãnhgrĩ ag mĩ, ùn kyvó ag mĩ.

¹⁴ ã tỹ tag han kĩa Topẽ vỹ ã ve há han ke mũ, ha vemnĩ. ã mĩ ag tóg festa han ke tũ nĩ, ag tỹ nén ù tũ nĩn kĩa. Kĩ ã tóg ã rĩr mãn ken kĩa ti kaja venh ke mũ, Topẽ tỹ ùn jykre kuryj kar rĩnrĩr mãn ke kurã ẽn kã,” he tóg, Jesus ti.

Festa mág to comparação (Mt 22.1-10)

¹⁵ Kĩ tóg tá nĩ ù mĩ mẽ há tĩ, Jesus vĩ tag ti. Tá nĩg kĩa tóg ag mré jęg mũ gé, hã kĩa tóg Jesus vĩ męg mũ. Kĩ tóg ti mĩ: “ù tỹ Topẽ tỹ tỹ ęg pã'i nĩ vég mũ mỹn hỹn sér pẽ tĩnh mũ, ù tỹ tá festa vég mũ ẽn mĩ,” he mũ.

¹⁶ Kĩ Jesus tóg ti kanhrãn kĩa ti mĩ: “kanhkã tá festa vỹ ge nĩnh mũ, ha mẽ,” he mũ. “Kejẽn ù tóg nĩgtĩ. Festa mág han sór tóg mũ, kĩa tóg ù tỹ hẽn ri ke ag mĩ tó ja nĩ, ti tỹ festa han ke to hã.

¹⁷ Ti festa kurãn kã tóg ã camarada jẽnẽg mũ, ti tỹ ùn kógfyn kĩa nỹtĩ ag mĩ: “ha kãmũjẽg,” he jé. “Kar kĩa tóg nĩ ha, inh festa ti,” hemnĩ,” he tóg, ã camarada mĩ. Kĩ tóg ag mĩ tónh tĩ mũ sir.

¹⁸ Hã ra ag tóg ve sór tũ nĩ, ag kar ti, hã kĩa ag tóg ti mĩ vỹ mũ. ù tóg ti mĩ: “ga kajãm inh,” he mũ. “Hã kĩa sóg ijapỹ venh tĩ mũ ver. ùri tóg inh mĩ vẽnhmỹ tĩ. Sỹ festa venh tĩg ke vễ vễ, hã ra tóg vẽnhmỹ tĩ,” he tóg mũ.

¹⁹ Kĩ ù tóg ti mĩ: “monh génh sóg, monh tỹ 5 (ke) régre,” he mũ gé. “Kĩ sóg ag venh tĩ mũ ver. Sỹ festa venh tĩg ke vễ vễ, hã ra tóg vẽnhmỹ ti,” he tóg mũ gé sir, ù ti.

²⁰ Kĩ ù tóg ti mĩ: “ùri sóg prũg mũ ha, hã kĩa tóg vẽnhmỹ tĩ,” he mũ gé.

²¹ Kĩ ti camarada tóg ti mĩ tónh kãtĩ mũ, ã patrão mĩ. Kĩ tóg jũ mũ. Ti mĩ tóg: “ẽpry ra tĩg, ẽmĩn mág ra, ẽpry kãsir ra ke gé, ẽmã kar ki,” he mũ.

“Kỹ ùn jagtar ag tatĩ kãtĩg, ùn kónhgrĩ ag, ùn kyvó ag, ùn tĩg vãnh ag ke gé,” he tóg. Á camarada mỹ tóg ke mũ.

²² Kĩ tóg tĩg mãn mũ, ti camarada ti. Kĩ tóg tá vỹn ke kũ ã patrão mỹ: “ke kãn inh huri,” he mũ. “Ag tatĩ kãtĩg inh huri, hã ra tóg fór tũ nĩ ver, festa jo ãn ti,” he tóg mũ, ti camarada ti, ti patrão mỹ.

²³ Kĩ ti patrão tóg ti mỹ: “vẽsỹkã tĩg mãn ge,” he mũ. “Vãnh kãmĩ tĩg, êmã kãsir pẽ kãmĩ ke gé, ẽpry ra, ẽmĩn jagma,” he tóg. “Tá ag mỹ tugtónh tĩg. Ag kutãn nĩ, ag kãmũ jé, festa jo ãn fór jé,” he tóg, patrão ti, ã camarada mỹ,” he tóg, Jesus ti.

²⁴ “Hã kũ sóg ãjag mỹ ke mũ,” he tóg. “Û mỹ sóg tó vén ja nĩ, hã ra ag tóg inh festa venh ke tũ pẽ nĩ, sỹ ù mỹ tó vén ja ag,” he tóg. Jesus tỹ Fariseu ag mré jẽn kũ ag mỹ kãmén hã vẽ.

*Ëg tỹ ãg jykre tovãnh
(Mt 10.37-38)*

²⁵ Kejẽn ùn e ag tóg Jesus nón mũ mũ. Kĩ tóg ag jé vĩrĩn ke kũ ag mỹ:

²⁶ “ha mẽ,” he mũ. “Û tỹ inh mré tĩg pẽ han sór mũ jé inh hã to há kãfór nĩ, ã han mũ fag kri, ti prũ fi kri, ti krẽ kri, ti kãke ag kri, ti jãvy ag kri, ti ve fag kri, vẽnh kri ke gé, mỹr, ha mẽ,” he tóg. “Ke tũ nĩ mũ ra tóg inh mré kãtĩg ke tũ nĩ, kũ tóg tỹ inh mré ke nĩnh ke tũ nĩ gé.

²⁷ Ha vé, ag tỹ inh cruz tỹ inh kri fi kũ sóg tĩg ke mũ, ag

tỹ to isa kũ isén jé, ha vemnĩ. Vẽnh nenh ke tũ sóg nĩ. Û tỹ inh ri ke han sór tũ nĩn kũ tóg inh mré kãtĩg ke tũ nĩ, kũ tóg tỹ inh mré ke nĩnh ke tũ nĩ gé,” he tóg, Jesus ti,

²⁸ “To jykrén, ù tỹ ãn téj han sór mũ ẽn to. Ti tỹ ãn téj han sór kũ tóg ã jãnkamy nĩkrén vén ke mũ. Kĩ tóg ãn kaja to jykrén ke mũ gé sir. Kar kũ tóg ãn han sór ke mũ vãhã.

²⁹ Ti tỹ to hã to jykrén há han tũ ra tóg vẽnhmỹ tĩ. Kĩ tóg ãn jẽg ken ki kũm kũ ti króggróg han ke mũ sir. Ti króggróg han kũ ti jãnkamy tóg tũ' henh ke mũ, kũ tóg tovãnh ke mũ sir, ti tỹ ãn han ti. Kĩ ti mré ke ag tóg ti to vĩ kũ ti nynh mũ sir.

³⁰ Ti to ag tóg: “ha mẽ, ãn téj han sór tóg mũ vẽ, hã ra tóg to jykrén há han ja tũ nĩ, hã kũ tóg kar tũ nĩ,” henh ke mũ, ti régre ag,” he tóg.

³¹ “Kar pã'i mág to jykrén nĩ gé. Pã'i ù tỹ ti mré vẽnh génh sór kũ tóg ã krẽm ke ag nĩkrén ke mũ gé sir, vẽnh génh ke to hã. “10 mil (ke) ãg nỹtĩ,” he jé tóg ke mũ. “Ëg mỹ ag tỹ hẽn ri kenh mũ vỹ?” he jé tóg ke mũ. “20 mil (ke) ag nỹtĩ. Ag mỹ ãg tỹ tũ' he kãn ke tũ nĩ vỹ? Ëg kãfór ag tóg nỹtĩ. Ëg hỹn hẽn ri kenh mũ, ag tỹ ãg tovãnh jé?” he jé tóg ke mũ, pã'i ti.

³² Ti tỹ tag to jykrén kũ tóg pã'i ù ẽn mỹ vẽnh vĩ jẽnẽn mũ, ti tỹ kór há tá nĩ (hã) ra, kuvar há tá. Ti mỹ vẽnh vĩ jẽnẽn kũ tóg ti mỹ: “ã mỹ ãg tovãnh ke tũ nĩ?” he mũ. “Inh ã mỹ ne nĩm mũ, ã tỹ isovãnh

je?" he je tóg ke mũ, pã'i ên mÿ," he tóg, Jesus ti.

³³ "Hã ký to jykrén nĩ, ãjag tÿ inh mré mũ pẽ han ke to. Iso há kãfór nÿtĩmnĩ, ãjag tũ kar kri. Ke tũ nĩ mũ ra ãjag pi(jé) inh mré mũ pẽ han mũ," he tóg, Jesus ti.

Sa to comparação

(Mt 5.13; Mc 9.50)

³⁴ "Sa vÿ há nĩ. Hã ra sa kãhór tĩn ký êg tÿ ne tÿ ti tÿ kajã' henh ke tóg tũ tĩ, tÿ sa' he mãn ke tũ tóg tĩ," he tóg.

³⁵ "Ti kãhór tĩn ký tóg kórég nĩ, ký êg tóg fón tĩ. Êg pi(jé) êg japÿ ki ti fón tĩ, ti tÿ êg jakré tÿ há' he tũ nĩn ký, sa kãhór ti. Ti fón pẽ han je êg tóg ke mũ. Ri ke ãjag nÿtĩ, ãjag tÿ inh mré mũ pẽ han tũ nĩn ký. Jẽmẽ há han nĩ, sÿ ãjag mÿ nén tó mũ tag ti," he tóg, Jesus ti.

15

Ovelha vãfor to comparação

(Mt 18.12-14)

¹ Kejẽn ù tÿ imposto mãg tĩ ag tóg ti to kãmũ mũ, Topẽ vĩ mranh tĩ ag ke gé. Ag tÿ ti vĩ mẽ sór vẽ.

² Ký tóg Fariseu ag mÿ kórég nÿ, Topẽ vĩ to professor ag mÿ ke gé. Ký ag tóg ti to vĩ vĩ he mũ sir. "Topẽ vĩ mranh tĩ ag to tóg há nĩgtĩ, tag ti," he ag tóg mũ. "Ag mré tóg jêg tĩ mÿr," he ag tóg mũ, Jesus to.

³ Ký tóg ag kanhrãn je ag mÿ: "ũ tÿ Topẽ vĩ mranh mũ tÿ ã jykre kórég tovãnh ký tóg ge nÿnh mũ, ha mẽ," he mũ.

⁴ "Û tóg nĩ ja nĩgtĩ," he tóg. "Ti mẽg tÿ mé vÿ tÿ 100 (ke)

nÿtĩ, ti mẽg tÿ ovelha ti. Ký ti mẽg pir tóg vãfor mũ. Hã ra tóg ti kanêg tĩ mũ, ti jãvãnh tĩ tóg mũ, ha mẽ. Û e ên tovãnh ký tóg ùn pir ên nón tĩ mũ. Ga kórég tá ag nÿtĩ, ti mẽg kar ên ag. Ag togvãnh ký tóg ùn pir ên nón tĩ mũ, ha mẽ.

⁵ Ký tóg ti vég mũ sir, ti mẽg vãfor ja ên ti. Ký tóg ã nunh kri ti fi ký ma tĩ mũ. Ti fe tóg mrin ke mũ sir.

⁶ Ký tóg ã ãn tá jun mũ. Tá tóg ã kanhkã fag je prẽr mũ, ti rã hã nÿtĩ fag kar. Ký tóg fag mÿ tó mũ. "Inh mré ti to mÿ sér," he tóg. "Inh mẽg vÿ vãfor ja nĩ, hã ra sóg ti ve mãn mũ ha," he tóg mũ, ã mẽg to," he tóg, Jesus ti.

⁷ "Hã ra tóg ge nĩ, ha mẽ. Û tÿ 99 (ke) ag tÿ vẽnh jykre kuryj han ký tóg há tĩ sir, ký tóg mÿ sér tĩ sir, kanhkã tá ke ag mÿ. Hã ra tóg mÿ sér kãfór tĩ, ùn pir tÿ ã jykre kórég tovãnh ký, ti tÿ ã tÿ Topẽ vĩ mranh mũ ên tovãnh ký, ha mẽ. Ký isũ ag vÿ e nÿtĩ," he tóg, Jesus ti.

Jãnkamy vãfor to comparação

⁸ "Kÿ ùn tÿtá to vẽme vÿ ge nĩ, ha mẽ," he tóg. "Jãnkamy tÿ 10 (ke) tÿ fi tũ nĩ, jãnkamy tÿ por dia kaja tÿ 10 (ke) tÿ. Kejẽn ùn pir tóg fi mÿ vãfor mũ, ký fi tóg lampião grug mũ sir. Fi ãn kãmĩ fi tóg prun kãn mũ. Ve há han fi tóg mũ, jãnkamy ên kanêg je, ãn péno kar mĩ hã.

⁹ Vãhã fi tóg kejẽn ve mãn mũ sir. Ký fi tóg ã mré ke kar fag je prẽr mũ, fi rã hã nÿtĩ fag

kar ke gé. Kÿ fi tóg fag mÿ: “inh mré to mÿ sér,” he mÿ. “Inh jãnkamy vÿ vãfor ja nÿ, hã ra sóg ve mãn mÿ ha,” he fi tóg mÿ.

¹⁰ Hã ra tóg ge nÿ, kanhkã tá, ha mẽ. Topẽ tÿ jẽnẽ jafã ag mÿ tóg sér tãvĩ tĩ, ù tÿ ã jykre kórég to jũn kÿ, ti tÿ ã tÿ Topẽ vĩ mranh ên tovãnh kÿ, ha mẽ,” he tóg, Jesus ti.

*Ûn kósín vãfor to com-
paração*

¹¹ Kÿ tóg ag mÿ tag tó mÿ gé sir, ha mẽ. “Û vÿ tóg kósín régre ja nĩgtĩ,” he tóg.

¹² “Kÿ ti kósín tÿ ãgno tóg ã panh mÿ: “panh’,” he mÿ. “Inh mÿ ùri isũ nĩm, ã tÿ inh mÿ nén nĩm ke mÿ ên ti,” he tóg, ã panh mÿ. Ti tÿ to vĩnh ke tũ vẽ vẽ, hã ra tóg to vĩ mÿ. Ge ra ti panh tóg ã krẽ mÿ ã tũ vãnh kãpãm mÿ sir.

¹³ Kãnhmar ti kósín kyrũ tóg ã tũ mãn kÿ kór há ra, kuvar há ra tĩ mÿ, ga ù ra. Tá tóg ã tũ vãm kãn mÿ, nén ù kórég kar to.

¹⁴ Vãm kãn ja tóg nĩgtĩ, ti jãnkamy ti. Kÿ tóg kejẽn tá prÿg han mÿ sir, ga ên tá. Kÿ kyrũ ên tóg kókĩr mÿ gé.

¹⁵ Kÿ tóg tá ke ù mré vëmén tĩ mÿ, ti tÿ ti mÿ vãnh rãnhrãj nĩm jé. Kÿ tóg ti jẽnẽg mÿ, ti tÿ ti porco ki rĩr jé sir, ti safra tá.

¹⁶ Kÿ tóg porco jẽn ko sór mÿ, ti kókĩr nĩn kÿ. Hã ra ag tóg ti mÿ nén ù nĩm tũg mÿ, ti tÿ ko jé. Hã kÿ tóg kókĩr tãvĩ nĩ sir.

¹⁷ Kÿ tóg kejẽn krĩ há han mÿ. To jykrén tóg mÿ sir. “Inh panh mÿ rãnhrãj tĩ ag vÿ pão

mág ko tĩ. Ag mÿ tóg kén tĩ, ag jén tĩ. Jo sóg kókĩr kÿ ter ke mÿ,” he tóg, kyrũ ti, ã pir mÿ nĩn kÿ.

¹⁸ “Inh jé hÿn inh panh kukãm tĩg ha,” he tóg. “Kÿ sóg ti mÿ: “panh’,” henh ke mÿ. “Kanhkã tá nĩ ên vĩ mranh inh, ã vĩ ti ke gé.

¹⁹ Kÿ sóg vãnhmÿ tÿ ã kósín tũ nĩ. Sÿ tÿ ã camarada nĩnh há tóg tĩ,” he jé sóg ke mÿ, inh panh mÿ,” he tóg mÿ, kyrũ ti.

²⁰ Kÿ tóg tĩ mÿ sir, ã panh kukãm.

Hã ra ti panh tóg kór há tá, kuvar há tá ti vég mÿ, kÿ tóg ti kato tẽ mÿ. Ti kato tẽ kÿ tóg ti ki póm ke mÿ sir, ti ki nhun ke tóg mÿ gé sir.

²¹ Kÿ ti kósín tóg ti mÿ: “panh’,” he mÿ. “Kanhkã tá nĩ ên vĩ mranh inh, ã vĩ ke gé. Hã kÿ sóg vãnhmÿ tÿ ã kósín tũ nĩ ha,” he tóg, ti panh mÿ.

²² Hã ra ti panh tóg ti mÿ: “vó, vãnh pãte fón kÿ tóg nĩ,” he mÿ. Kÿ tóg ã camarada ag mÿ: “kur há tãvĩ ên ma kãmũjẽg,” he mÿ, “ti tÿ kur tãg ra rã jé. Ti mÿ nĩgẽ kãnĩm ja nĩm gé. Pẽn né ên tÿ, pẽn to ró ên tÿ ti mÿ jun gé.

²³ Monh tãgy ên venh mũjẽg. Ti tãnh ra, êg tÿ ko jé, êg fe tÿ mrin ke jé.

²⁴ Inh kósín vÿ inh mÿ ter ja ri ke han, hã ra tóg rĩr mãn ri ke han. Vãfor ti vẽ vẽ, hã ra tóg kãtĩg mãn huri,” he tóg, ti panh ti. Kÿ tóg ag mÿ sér tĩ sir, ag tÿ festa han kÿ.

²⁵ Hã ra ti kósín sanh tóg ti japÿ tá rãnhrãj jẽ. Kÿ tóg vãhã tá kãtĩg kÿ ã ãn tá jun mÿ. Tá

jun kŷ tóg vākŷr mēg mŷ, fag vēnh gringrén ěn ti.

²⁶ Kŷ tóg ā camarada jé prēr mŷ. Ti mŷ tóg: “festa tŷ ne nē?” he mŷ.

²⁷ Kŷ tóg ti mŷ: “ā jāvy vŷ jun, kŷ ā panh vŷ monh tāgy ěn tãnh,” he mŷ. “Ti mŷ tóg sér tŷ, ti tŷ ti ve mãn kŷ. Kaga tŷ tóg jē, há tóg jē, hã kŷ tóg ā panh mŷ sér tŷ,” he tóg, ti camarada ti.

²⁸ Kŷ tóg jŷ mŷ sir. Kŷ tóg ĩn kãra rã tŷg mŷ, jŷ kŷ.

Kŷ ti panh tóg ti mré vēmén tŷ mŷ. Ti mŷ tóg: “ěg mré festa venh kãrã,” he mŷ.

²⁹ Hã ra tóg ti mŷ: “vó,” he mŷ. “Prŷg tŷ hēn ri ke ki sóg ā rãnrãj ti han, ha mē. Inh pi(jé) ā vŷ mranh ja nŷgtŷ. Ge ra ā tóg inh mŷ nén ũ nŷm ja tŷ nŷ. Ā pi(jé) inh mŷ cabrito fēg tŷ, sŷ inh mré ke ag mŷ festa han jé.

³⁰ Hã ra ā kósin ěn tóg jun mŷ sir, jo ā tóg ti mŷ monh tāgy ěn tãnh. Kórég ti nŷ, ā kósin ěn ti. Ā tŷ fón kãn tóg mŷr, ũn tŷtã kórég fag to, hã ra ā tóg festa mág han mŷ, ti kãtŷg kŷ,” he tóg, ti kósin sanh ti, ā panh mŷ.

³¹ Hã ra ti panh tóg ti mŷ: “vó,” he mŷ. “Inh mré ā tóg jē nŷ, kŷ tóg inh mŷ sér tŷ. Kŷ isŷ kar vŷ tŷ ā tŷ nŷtŷ, mŷr, ha mē.

³² Hã ra festa tag vŷ há nŷ, ha mē. ěg mŷ tóg sér tãvŷ tŷ. Ā jāvy vŷ inh mŷ ter ja ri ke han, hã ra tóg rŷr mãn ri ke han. Vãfor ti vē vē, hã ra tóg kãtŷg mãn huri,” he tóg, ti panh ti, ā kósin sanh mŷ,” he tóg, Jesus ti. Ti tŷ Topē kãmén hã vē.

16

ěg tŷ ěg tŷ vēnh kãpãm ke

¹ Kŷ Jesus tóg ā mré mŷ tŷ ag mŷ tag tó mŷ, ha mē. “Kejēn ěprã ke ũ tóg nŷgtŷ, ũn rico. Kŷ ti tŷ ki rŷr tŷ tóg nŷgtŷ gé. Ti patrão mŷ név(e) nŷtŷ ag vég ti tŷ, ti mŷ, ti tŷ ki rŷr tŷ ti. Kejēn ag tóg ti camarada ěn to vŷ mŷ, ti tŷ ki rŷr tŷ ěn to. Ti lograr ke (ka) mē ti nēji nŷ, ti tŷ to, ti camarada ti.

² Kŷ tóg ti jé prēr mŷ, kŷ tóg ti mŷ: “ā tŷ han mŷ mē inh,” he mŷ. “Sŷ ā rãnrãj tugnŷm ke vē. Ki rŷr mãn ke tŷ ā tóg nŷ ha,” he tóg mŷ ti mŷ.

³ Kŷ tóg to jykrén mŷ sir, ti camarada ti. “Inh hŷn hē ri kenh mŷ ha?” he tóg mŷ. “Inh patrão vŷ inh kutēm, inh rãnrãj ki. Kŷ inh hŷn ne konh ke mŷ ha? Inh ěpŷ jé sóg krój nŷ. Kŷ sóg vēnh kar mŷ: “inh mŷ nén ũ nŷm, inh mŷ jānkamy nŷm,” he sór tŷ nŷ gé. Inh mŷ a tóg tŷ, sŷ ag mŷ tónh ke ti,” he tóg.

⁴ Kejēn tóg: “ŷri hã sóg ki kanhró nŷ ha, sŷ nén han ke ti,” he mŷ. “Sŷ tag han kŷ ag tóg iso há nŷtŷnh mŷ, kŷ ag tóg inh mŷ: “inh mré nŷnh kãtŷg,” henh ke mŷ, inh patrão tŷ inh fón kar kŷ,” he tóg mŷ, ti camarada kórég ti.

⁵ Kŷ tóg ũ tŷ ā patrão mŷ név(e) nŷtŷ ěn ag jé prēr kãn mŷ sir. Kŷ tóg ũ mŷ: “ā név(e) hē ri ke nŷ?” he mŷ.

⁶ Kŷ tóg ti mŷ: “azeite tŷ lata tŷ 100 (ke) ki inh név(e) jē,” he mŷ. Kŷ tóg ti mŷ: “hŷn, ā vēnh rán ti, sŷ ā mŷ ā név(e) térem

kỹ 50 (ke) rán jé,” he mũ. Kỹ tóg rán mũ sir.

⁷ Kỹ tóg ù ù mỷ: “jo ã?” he mũ gé. “Á név(e) hē ri ke nĩ?” he tóg mũ gé. Kỹ tóg ti mỷ: “trigo tỹ saco tỹ 100 (ke) ki inh név(e) jē,” he mũ. Kỹ tóg ti mỷ: “hỹn, ã vēnh rán ti, sỹ ã mỷ ã név(e) térem kỹ 80 (ke) rán jé,” he mũ gé. Kỹ tóg rán mũ gé sir.

⁸ Kỹ ti patrão tóg mēg mũ, ti camarada tỹ nén han mũ ti. Kỹ tóg ti mỷ: “jykre (ka)mē ã tóg nĩ, kỹ ã tóg ù tỹ hēn ri ke tỹ ã to há nĩ han, ã tỹ ag mỷ ag név(e) rem kỹ,” he mũ, ti patrão ti,” he tóg, Jesus ti.

“Kỹ hã vē. Û tỹ inh ki ge tũ ag vỹ ãjag tũ to jykrén há han tĩ, inhhã, ha mē. Ājag krĩ há kãfór han ag tóg tĩ ag tũ to jykrén ki. Ājag tỹ inh ki ge mũ ra ag tóg ãjag krĩ há kãfór han tĩ. Tỹ ag ěprã ke nỹtĩ, hã kỹ ag tóg tag ki nén to jykrén há han tĩ,” he tóg.

⁹ “Hã kỹ sóg ãjag mỷ tó mũ. Ti camarada ěn ri ke han nĩ, ãjag tũ tỹ ùn mỷ vēnh kãpãm nĩ, ãjag tỹ ga kri mũn kỹ. Kỹ ag tóg ãjag to há nỹtĩnh mũ. Kejēn ãjag tóg ãjag tũ ré kỹ mũnh mũ. ěn kã ãjag tóg mũ há han ke mũ gé. Kỹ ãjag tóg kanhkã tá junjun ke mũ sir, ãjag tỹ ag mỷ ãjag tũ tỹ vēnh kãpãm kỹ.

¹⁰ Û tỹ nén ù sĩ ki rĩr há han kỹ tóg nén ù ki rĩr há han kãn ke mũ gé. Jãvo ù tỹ nén ù sĩ ki rĩr kónãn kỹ tóg nén ù ki rĩr kónãn kãn ke mũ gé sir.

¹¹ ěg tỹ ga kri nén vég mũ vỹ

kãnhmar tũ' he mũ. Ājag tỹ hã ra ga kri ãjag tũ ki rĩr há han tũ kỹ ãjag tóg kanhkã tá tỹ nén ùn tũ nỹtĩnh mũ gé.

¹² Ājag tỹ ěprã nén vég mũ vỹ tỹ Topē tũ nĩ. Ti hã mỷ ãjag tóg ki rĩr ke mũ. Ājag tỹ ti tũ ki rĩr há han tũ kỹ tóg sir ãjag mỷ ãjag tũ pē ěn nĩm ke tũ nĩ gé, kanhkã tá,” he tóg.

¹³ “Ā jagrē régre nĩn kỹ tóg vēnhmỹ tĩ. Ā tỹ Topē hã tỹ jagrē nĩn kỹ jãnkamy tãn ěn tỹ jagrē nĩ sór tũg nĩ. Ā tỹ jãnkamy e ve sór kỹ ti hã mĩ ěkrén kỹ ti hã vỹ tỹ ã jagrē nĩnh mũ. Kỹ ěg tóg Topē tỹ ěg mỷ nén tó mũ ěn to jykrén há han ke tũ nĩgtĩ. Ā tỹ Topē to há nĩn kỹ ã tóg sir ga kri rico to vãsãn sór ke tũ nĩ. Ā tỹ ga kri rico nĩ sór kỹ ã tóg Topē mĩ ěkrég tũ nĩ, ha vemnĩ,” he tóg, Jesus ti. Ti tỹ ěg tỹ ti tũ hã to jykrén há to jykrén há han ke tón hã vē.

Topē jykre

(Mt 11.12-13; 5.31-32; Mc 10.11-12)

¹⁴ Hã ra Fariseu ag tóg mēg mũ, ti tỹ nén tó mũ ti. Jãnkamy mág hã to ag tóg há nỹtĩ, rico ke sór ag nỹtĩ, Fariseu ag. Kỹ ag tóg Jesus vĩ tag mē kỹ ag tóg ti to é he mũ.

¹⁵ Hã ra Jesus tóg ag mỷ: “ěprã ke ag mỷ ãjag tóg há nỹtĩ ve nỹtĩ,” he mũ. “Hã ra Topē vỹ ãjag tỹ nén to jykrén mũ ěn vég nĩ. Ôn kỹ ãjag tóg há nỹtĩ. ěprã ke kãmĩ ãjag tóg tỹ ùn mág nỹtĩ. Topē mỷ ãjag tóg kórég nỹtĩ jãvo, ti mỷ kavéj ãjag tóg nỹtĩ,” he tóg.

16 “Moisés tỹ ěg mỹ Topě vĩ tó ja ěn vỹ João tá krỹg, vãsỹ Topě vĩ tó tĩ ag tỹ ěg mỹ nén tó ja kar ěn ti. João tá ti krỹg, ěg kygpég tĩ ěn tá. João tá jun kỹ vènh ũ tỹ hèn ri ke ag tóg vãsãnsãn tĩ, ag tỹ ve jé.

17 Hã ra Topě jykre si ěn tóg tũ' henh ke tũ nĩ gé, Moisés tỹ ěg mỹ nén tó mũ ěn ti. Ga vỹ tũ' henh ke tũ nĩ. Ki króm kãn kỹ tóg nĩnh mũ,” he tóg.

18 “Ěg prũg kỹ tóg ge nĩ, ha mẽ. Ā tỹ ã prũ fi fón kar kỹ ũ fi tỹ prũg mãn kỹ ã prũ tũ fi vè sir. Kỹ fi mén tỹ fi fón kỹ ũ tỹ fi tỹ prũg mãn kỹ fi mén tũ vè gé sir,” he tóg, Jesus ti. Ti tỹ Topě jykre kãmén hã vè.

Ũ tỹ Topě vĩ mẽ jãvãnh ag tỹ nũgme ki vár

19 Kỹ Jesus tóg ag mỹ: “kejèn ũ tóg nĩgtĩ, ũn rico pè,” he mũ. “Kur kaja e tu ti tĩgtĩ, ũn tánh sá, kur ha pè. Kurã kar ki tóg vèjèn há ko tĩ. Festa ri ke han tóg tĩ, kurã kar ki.

20 Kỹ ũn jagtar tóg nĩgtĩ gé. Ti jiji hã vỹ: Lázaro, he mũ. Vènh kaga fugfo han vãnh han tóg tĩ, kỹ tóg nỹ nĩ, ũn rico jãnkã ki.

21 Ěn vỹ kókĩr tĩgtĩ, ã kaga to. Kỹ tóg ũn rico jèn vár ko sór tĩgtĩ, ti jèn mru, hã ra tóg ti mỹ nĩm tũg tĩ. Cachorro hã ne ti pènnĩ e nỹtĩ. Vènh fugfo han vãnh ěn tugmãn ag tóg tĩ.

22 Kejèn tóg ter mũ, ũn jagtar ěn ti. Kỹ Topě tỹ jènẽ jafã ag vỹ ti va mũ mũ, ti kuprĩg ti, kãnhkã ra. Tá Abraão tóg nĩ nĩ, ěg jóg' jóg ve ti, kỹ tóg ti

mré nĩ nĩ sir, ti tỹ tỹ ti krẽ'krẽ nĩnh kỹ.

Kar ũn rico tóg ter mũ gé sir. Kỹ ag tóg ga kãtã ti péju(g) mũ.

23 Hã ra tóg nũgme ki kutě mũ, ti kuprĩg ti. Inferno tá ti vèsỹrènh jagy han mũ sir. Kejèn tóg kãnhkã ki ěvãnh mũ, kỹ tóg tá Abraão vèg mũ, Lázaro ke gé, ti tỹ Abraão mré nĩnh kỹ, kuvar há tá.

24 Kỹ tóg ag mỹ prěr mũ. Kỹ tóg Abraão mỹ: “!..Ijóg'!..” he mũ. “!..Abraão..!” he tóg. “!..Ijagãgtãn ra..!” he tóg. “Lázaro jènẽ ra, ti tỹ ã nĩ(gé) juja junun mrãn kỹ inh nũnẽ mrãn sĩ han jé. Inh mỹ tóg rỹjgy tãvĩ tĩ, pĩ kãki,” he tóg, Abraão mỹ, ũn rico ja ěn ti.

25 Kỹ Abraão tóg ti mỹ: “inh kósĩn,” he mũ. “Ā tỹ ga kri tĩg ja ěn ki ěkré. Tá ã tóg há tĩ ja nĩgtĩ, jãvo Lázaro tóg jagtar ja nĩgtĩ. Kỹ tóg tag ki há han tĩ nĩ, jo ã tóg vèsỹrènh jẽ nĩ, ã tỹ ti jagãgtãn ja tũ nĩnh kỹ.

26 Kỹ ěg kaju ki tóg tỹ kãgnó nĩ, kỹ ũ tóg pãte rãnh ke tũ nĩ. Tag ki ke pí(jé) ěn ra tĩg mũ', ěn tá ke pí(jé) tag ra kãtĩg mũ gé', kãgnó tag tugrĩn',” he tóg, Abraão ti, ũn rico ja ěn mỹ.

27 Kỹ ũn rico ja tóg ã jóg tỹ Abraão mỹ: “kỹ sóg ã mỹ nén ũ tó sór mũ, ha mẽ,” he mũ. “Ā mỹ inh jóg ĩn ra ti jènẽnh ke tũ? Tá inh mré ke ag vỹ nỹtĩ.

28 5(ke) ag nỹtĩ, inh mré pafa ja ag. Ti tỹ ag mỹ tónh tĩg jé, ag tỹ tag ki junjun tũ nĩ jé, ag tỹ inh mré vèsỹrènh tũ nĩnh jé,” he tóg, ũn rico ja ti, Abraão mỹ.

29 Kĩ Abraão tóg ti mĩ: “tá ag tóg Moisés tỹ ãg mĩ nén tó ja ãn mẽn̄h mũ, Topẽ vĩ tó tĩ kar ag vĩ ke gé. Hã kỹ ag tóg Topẽ vĩ jẽmẽn̄h mũ, ag tỹ mẽ sór kỹ,” he tóg.

30 Hã ra tóg ã jóg tỹ Abraão ti mĩ: “vó” he mũ. “Vẽser tỹ ag tá jun mũ ra ag jẽmẽ há han ke mũ vẽ, kỹ ag tóg ãjag jykre pãno ãn tovãnh ke mũ vẽ, vẽser tỹ ag mĩ tó mũ ãn ti,” he tóg.

31 Hã ra tóg: “vó,” he mũ gé. “Ag tỹ Moisés vĩ jẽmẽ sór tũ nĩn kỹ ag tóg vẽser vĩ mẽn̄h ke tũ nĩ gé, ag tỹ Topẽ vĩ tó tĩ ag vĩ mẽ jãvãnh nỹtĩn kỹ,” he tóg, Abraão ti, ãn rico ja ãn mỹ,” he tóg, Jesus ti. Ti tỹ ag mỹ ãg tỹ Topẽ vĩ jẽmẽ jãvãnh nỹtĩn kỹ vỹsỹrénh ke ãn tón hã vẽ.

17

*Topẽ vĩ mranh tỹ jagy nĩ
(Mt 18.6-7, 21-22; Mc 9.42)*

1 Kĩ Jesus tóg ã mré mũ tĩ ag mỹ: “ũ tỹ hẽn ri ke ag vỹ ù tỹ iso há ãn tỹ isovãnh han sór mũ, ha mẽ,” he mũ. “Vỹsỹrénh tãvĩn mũ jé ag tóg ke mũ, tag to. Topẽ vỹ ag ve kónãn tãvĩn mũ, ag tỹ ãn krĩn kónãn mũ tag to.

2 ù tỹ ag krĩn kónãn mũ mỹ tóg há nỹnh mũ vẽ, ãg tỹ pó tỹ kra mág tỹ ag nunh to sa kỹ goj nig kuju ki ag vãm jé. Tag vỹ ag mỹ jagy tĩ vẽ. Hã ra ag tóg ti jagy tag kãfór venh ke mũ, ag tỹ ãn sĩ tỹ inh ki rã kỹ nĩ (hã) ra ti tỹ inh vĩ mranh han sór kỹ.

3 To jykrén, vẽn̄h ki rĩr kỹ.

Kejẽn ã régre vỹ Topẽ vĩ mranh mũ. Kỹ ti mỹ tómnĩ, ti tỹ kygnẽ ti. Ti tỹ tovãnh sór kỹ ti mỹ vẽn̄h pãte fón nĩ.

4 Hẽn ri ke mũn tóg ã tỹ Topẽ vĩ mranh han sór mũ han mãn', han mãn' he mũ, kejẽn. Kurã pir ki tóg ã jũ tỹ hẽn ri ke han sór mũ, hẽn ri ke mũn. Hã ra tóg ã jũ han kar kỹ: “inh pi(jé) ke mãn mũ ha',” henh ke mũ gé. ã jũn kỹ tóg tónh kãtĩg mãn', tónh kãtĩg mãn' he mũ gé. Kỹ ti mỹ vẽn̄h pãte fón to krónh ke tũg nĩ,” he tóg, Jesus ti.

Ëg tỹ Topẽ ki rã há han ke

5 Kĩ Jesus tỹ ãn vin mũ ag tóg ti mỹ: “ãg tỹ Topẽ ki rã há pẽ han há tóg tĩ,” he mũ. “Kỹ to ãg tar han nĩ,” he ag tóg, Jesus mỹ.

6 Kỹ tóg ag mỹ: “ãjag tỹ Topẽ ki rã kỹ tóg há tĩ,” he mũ. “Ka tỹ mostarda fy mĩ ãkrén nĩ,” he tóg. “Sĩ ti nĩ, hã ra tóg mog tĩ. Tag ri ke han nĩ, Topẽ ki rã kỹ. Ti ki rã kỹ ãjag tóg nén ù kar to tar nỹtĩnh mũ. Ka tag ve ra, ka krén tag ti. ãjag tỹ ti mỹ: “ã jãre tỹ ga tá kãkutẽ, kỹ goj nig ki vẽn̄h krãn,” henh kỹ tóg kenh mũ, ãjag tỹ Topẽ ki rãn kỹ,” he tóg, Jesus ti.

Tỹ ãg Topẽ camarada nỹtĩ

7 “ãjag camarada jykre to jykrén nĩ,” he tóg. “ãjag japỹ ki tóg rĩr tĩ, ga tỹ vĩrĩn ken kỹ, ke tũ nĩn kỹ tóg ãjag mẽg ki rĩr tĩ gé. Rãkãnh kỹ tóg ã rãnrãj ja tá kãtĩ tĩ. Kỹ ãjag pi(jé) ti mỹ: “kunĩg, jẽn̄ jé,” he tĩ'.

8 Tĩ mỹ ãjag tóg: “inh mỹ vỹjẽn han, ijẽn jé,” he tĩ. “Kuri

ã kur tãnfyn kÿ tógfïn, ã tÿ inh mÿ vÿjÿn jun jé, ijÿn jé, kron jé, kar kÿ ã tóg jÿn ke mÿ gé sir, kron ke mÿ gé sir, ijÿn kar kÿ,” he ãjag tóg tÿ, ãjag camarada mÿ.

⁹ Kÿ ãjag tóg ti mÿ vÿ há han tÿ nÿ gé, ti tÿ ãjag vÿ ki króm mÿ ra. ãjag camarada vÿ mÿr, ti rãnrãj vÿ, hã kÿ tóg ãjag vÿ ãn han ke mÿ.

¹⁰ Kÿ ãjag camarada ag ri ke han nÿ, Topÿ mÿ, ha mÿ. ãjag tÿ Topÿ vÿ ki króm kãn kÿ jagnÿ mÿ: “ti camarada vÿ tÿ ãg nÿtÿ,” hemnÿ. “Ti tÿ ãg mÿ nÿn tó mÿn hã han ãg tóg, kÿ tóg tÿ nÿn ù tÿ nÿ,” hemnÿ jagnÿ mÿ. “Ti vÿ han kãn tugrÿn ãg tóg há nÿtÿ,” he tÿg nÿ, he tóg, Jesus ti.

Jesus tÿ ùn kaga tÿ 10 (ke) ag tÿ há he

¹¹ Kÿ Jesus tóg Jerusalém ra tÿg sór mÿ. Hã kÿ tóg ga tÿ Samaria fyr mÿ tÿ mÿ. Ga tÿ Galiléia mré ti fyr vÿ.

¹² Tá tóg ãmã ù ki rã mÿ, kÿ ù tÿ 10 (ke) ag tóg ti kato tÿgtÿ mÿ sir. Vÿnh kaga kren vãnh hyn han ag tóg mÿ, lepra han kÿ. Hã kÿ ag tóg kór há tá nÿtÿ, kuvar há tá.

¹³ Jamã hár(a) ag tóg prÿnprÿr mÿ, kÿ ag tóg: “!..Jesus'..!” he mÿ. “!..Senhor'..!” he ag tóg mÿ. “!..Ëg jagãgtãn ra..!” he ag tóg mÿ.

¹⁴ Kÿ tóg ag ki ãvãnh mÿ, kÿ tóg ag mÿ: “Topÿ tÿ ki rÿr tÿ ag mÿ vÿnh ven mÿjÿg,” he mÿ. Kÿ ag tóg mÿ mÿ.

Ag mÿn kã ag tóg jãnhkri' he mÿ sir, ag fãr ti, tá junjun to hã. Hághá' he ag tóg mÿ sir.

¹⁵ Kÿ ag kãmÿ ùn pir tóg kyrã mÿ, Jesus to. Topÿ mÿ tóg vÿ há han mÿ, ã tÿ há' hen kÿ. Kÿ vÿnh kar vÿ ti vÿ mÿg mÿ.

¹⁶ Ti tÿ Jesus tá jun kÿ tóg ti krÿm mÿg ke mÿ. Ti mÿ tóg: “inh mÿ tóg há tÿ, ã tÿ isÿ há' hen kÿ,” he mÿ. Samaria tá fóg ù vÿ, Jesus to ùn kyrã mÿ ãn ti.

¹⁷ Kÿ Jesus tóg: “ù tÿ 10 (ke) tÿ mÿ', hã vÿ: há', he mÿ?” he mÿ. “Hã ra ùn pir ne kãtÿg ja nÿ'. Hÿn, ù ag, ù tÿ 9 (ke) ãn ag?” he tóg.

¹⁸ “Fóg tag hã vÿ ã pir mÿ kyrã, Topÿ to: “ùn mág vÿ tÿ ti nÿ,” he jé,” he tóg, Jesus ti.

¹⁹ Kÿ tóg fóg ãn mÿ: “jÿgnÿ ra,” he mÿ. “Ha tÿg,” he tóg. “ã tÿ inh ki rã kÿ, hã kÿ ã tóg há' he mÿ,” he tóg, Jesus ti.

Topÿ tÿ tÿ ãg pã'i nÿ to vÿnh jykre

(Mt 24.23-28, 37-41)

²⁰ Kejÿn Fariseu ag tóg ti ki jÿmÿnh kãmÿ mÿ. “Topÿ tÿ tÿ ãg pã'i nÿ ãn mÿ ver kór gy nÿ, mÿ kuvar gy?” he ag tóg ti mÿ. Kÿ tóg ag mÿ kãmÿn mÿ sir. “Ti vég tÿ ãg tóg nÿ, ãg kanÿ tÿ, Topÿ tÿ tÿ ãg pã'i nÿ ti,” he tóg.

²¹ “Hã kÿ ãg tóg to: “tag kã ti nÿ, tãtã ti nÿ,” henh ke tÿ nÿ gé. Ha mÿ, ãjag kãmÿ ti huri vÿnh ven, ti tÿ tÿ ãg pã'i nÿ ti, ãjag tÿ ti vég tÿ (hã) ra,” he tóg.

²² Kÿ tóg ã mré mÿ tÿ ag mÿ: “tÿ sóg ãprã ke fi kósìn nÿ,” he mÿ. “Kejÿn tóg ãjag tÿ Topÿ tÿ tÿ ãg pã'i nÿ venh ha pÿ tÿnh mÿ. Ti tÿ kurã pir ki vÿnh ven mÿ vÿ ãjag mÿ há tÿnh mÿ vÿ, hã ra ãjag tóg venh ke tÿ nÿ ver,” he tóg.

23 “Kỹ ag tóg ãjag mÿ: “tag ki ti jun ja nĩ,” henh ke mũ. “Ën tá tóg jẽ nĩ,” he jé ag tóg ke mũ gé. Kÿ venh mũ tũg nĩ hã ra. Ag vĩ jẽmẽ sór tũg nĩ.

24 Inh kãtĩg mãn ke vỹ ta tỹ kóm kóm ke ri ke nĩ. Ti tỹ kóm kóm ke kÿ ãg tóg nén kar vég tĩ, kanhkã krẽm. Kÿ vẽn kar vỹ ti tỹ kóm kóm ke ãn vég tĩ gé. Inh kãtĩg mãn ke vỹ ri ke nĩnh mũ, inh kurã ãn kã. Vẽn kar vỹ inh ve kãn mũ. Tỹ sóg ãprã ke fi kósín nĩ,” he tóg.

25 “Inh kãtĩg mãn ke to hã sóg hã ra vêsÿrénh mág han ke mũ ver. Ûri ke ag vỹ iso é henh ke mũ ver,” he tóg.

26 “Kỹ inh kãtĩg mãn ke kurã ãn kã ãprã ke ag tóg han kãn ke mũ, ag tỹ Noé tỹ ga mĩ tĩ mũ kã nén han ja ãn ti.

27 Ta kutẽ to hã ag tóg jẽn ja nĩgtĩ, jẽn kar kÿ ag tóg kron ja nĩgtĩ gé, vẽnh prũ kutẽm ja ag nĩgtĩ gé. Ën kã Noé tóg kejẽn barco tỹ ãn kãra rã ja nĩ. Ti tỹ kãra rã kar kÿ ta tóg sir kutẽ ja nĩ, kÿ ag tóg goj var ki kãgter kãn ja nĩ.

28 Kÿ tóg ri ke pẽ ja nĩ gé, Ló tỹ ga mĩ tĩg ki. Ën kã ag tóg jẽn ja nĩgtĩ gé, jẽn kar kÿ ag tóg kronkron ja nĩgtĩ gé. Vender ke mũ ja ag nĩgtĩ gé, kygjãm ke mũ ja ag nĩgtĩ gé. Ëkrãn ja ag nĩgtĩ gé, ãn hyn han ja ag nĩgtĩ gé.

29 Ën kã Ló tóg kejẽn cidade tỹ Sodoma tá kãkutẽ ja nĩ, kÿ pĩ tóg kanhkã tá kãtère ja nĩ, cidade kri, pó tỹ enxofre nĩja ãn ke gé. Kÿ ãn tóg ag kãgtén kãn ja nĩ. Topẽ tỹ ag vóg kónãn

ke to jykrén sór tũ ja ag nÿtĩgtĩ.

30 Ge ti nĩnh mũ gé, ãprã ke fi kósín tỹ vẽn ven mãn ke kurã ãn kã. Mĩ ãkrén ke tũ ag nĩgtĩ gé, ti to há tũ ag.

31 Û tỹ kurã ãn kã ã ãn rã hã tĩn kÿn jé ã tũ mãn rã sór tũg, ti tũ tỹ ti ãn krẽm nÿtĩ ti. Û tỹ ãpÿ tá tĩ ãn jé ã tũ to vÿn ke tũg.

32 Ló prũ fi to jykrén.

33 ãjag tỹ ãjag jykre hã han sór kÿ ãjag nũgme ki var ke mũ, ha vemnĩ. ãjag tỹ isugrĩn ãjag jykre fi mãn kÿ ãjag krenkren ke vẽn, ha vemnĩ,” he tóg.

34 “Hã kÿ sóg tag tó mũ, ha mẽ. Kuty ãn kã, inh kãtĩg mãn ke kuty ãn kã ãn régre ag vỹ jagnẽ mré nũgnũr nÿtĩnh mũ. Ag kãmĩ ãn pir jé prẽr sóg ke mũ, kÿ tóg inh mré tĩnh mũ, jãvo ti régre vỹ kã nÿnh mũ, ha vemnĩ.

35 Ûn régre fag vỹ ãgtynyn nÿtĩnh mũ, jagnẽ mré, ãn kã. Kÿ sóg ãn pir fi jé prẽr ke mũ, kÿ fi tóg inh mré tĩnh mũ, jãvo fi régre fi vỹ kã jẽn h mũ, ha vemnĩ.

36 Ûn régre ag vỹ ãpÿ ki rãnrãj mũnh mũ, ãn kã. Kÿ sóg ãn pir jé prẽr ke mũ, kÿ tóg inh mré tĩnh mũ. Jãvo ti régre vỹ tá tĩnh mũ gé, ha vemnĩ,” he tóg, Jesus ti.

37 Kÿ ti mré mũ tĩ ag tóg ãg Senhor mÿ: “tag hẽ tá ke nĩnh mũ hÿn'?” he mũ. Kÿ tóg ag mÿ: “kurã ãn kã ãjag ki kanhró nÿtĩnh mũ,” he mũ. “Nén ã ter nÿg ja ri ke ti nĩ. Hã tá tóg vẽn mãn tĩ, jãtã ti, he ãg tóg tĩ. Tag ri ke ti nĩnh mũ, ha

vemni,” he tóg, Jesus ti. Ti tỹ ã kãtĩg mãn ke tón hã vễ.

18

Êg tỹ Topẽ mré vỹ to krónh ke tũ

¹ Kỹ Jesus tóg ag mỹ: “ãjag tỹ Topẽ mré vễmén ke vỹ ge nỹnh mũ, ha mẽ,” he mũ. Êg tỹ kurã kar ki Topẽ mré vễmén kỹ tóg há tĩnh mũ, êg tỹ to krónh ke tũ nĩn kỹ. Tag tỹ tóg ag kanhrãnrãn sór mũ, ã mré mũ tĩ ag, hã kỹ tóg tag tó mũ, ha mẽ.

² “Kejẽn pã'i tóg nĩgtĩ, êmã ù tá,” he tóg. “Ag tỹ jagnẽ to jũ vég ti tĩ. Ti rãnrhãj hã vễ. Hã ra tóg Topẽ kamẽg vãnh nĩ, ti jykre pãno nĩn kỹ. Kỹ tóg ã mré ke ag kamẽg vãnh pẽ nĩgtĩ gé. Kórég pẽ ti nĩgtĩ.

³ Ti jamã tá ù fi tóg nĩgtĩ gé, ùn mén ter ja fi. Ên fi vỹ kejẽn ti to kãtĩg kỹ ti mré vễmén mũ. Kỹ fi tóg ti mỹ: “inh lograr ke sór mũ ên ag jo inh vemni,” he mũ.

⁴ Hã ra tóg mẽ jãvãnh nĩ. Jatu tóg nĩ nĩ, kysã tỹ hẽn ri ke ki. Kỹ fi tóg ti tá jun tỹ hẽn ri ke han mũ, to krónh ke tũ fi nĩ. Kỹ tóg kejẽn to jykrén mũ. “Topẽ kamẽg vãnh inh nĩgtĩ,” he tóg. “Û kamẽg vãnh inh nĩgtĩ gé.

⁵ Hã ra fi tóg isovãnh tũ pẽ nĩ, ùn mén ter ja ên fi. Kurã kar ki fi tóg inh mỹ to vĩnh kãtĩ tĩ. Kỹ inh hỹn fi jy rãnh mũ ha, ke tũ nĩ mũ ra fi tóg ijũ han ke mũ, fi tỹ inh venh kãtĩ to krónh ke tũ nĩn kỹ, ha vemni,” he tóg, pã'i kórég ti,” he tóg, êg Senhor tỹ Jesus ti.

⁶ Kỹ tóg ag mỹ: “ti vỹ jẽmẽ ra,” he mũ. “Jykre pãno ti nĩ, pã'i kórég ên ti, hã ra tóg fi tỹ ti mỹ vỹ e ên to fi kren han sór mũ,” he tóg.

⁷ “Hã kỹ Topẽ vỹ ãjag krenkren han ke mũ gé. ãjag kuprẽg ja tóg nĩ mỹr, kỹ ti mré vễmén nĩ. Kurã ki ti mỹ vĩmnĩ, kuty tá ke gé. ãjag kren han vãnh nĩ ve ti nĩ, kejẽn.

⁸ Hã ra tóg ãjag krenkren han ke mũ, kãnhmar, ha vemni. Ki hã sóg tó mũ,” he tóg. “Hã ra êprã ke fi kósin ên tỹ kãtĩg mãn kỹ ag mỹ ti ki ge sór mũ vỹ?” he tóg, Jesus ti.

Êg tỹ: “tỹ inh ùn há nĩ,” henh ke tũ

⁹ Kỹ Jesus tóg ag kanhrãn mãn mũ gé. Û tóg ù tỹ ti vỹ mẽg mũ ên ag kãmĩ nỹtĩ, hã ra ag tóg vẽso: “tỹ êg tóg ùn há nỹtĩ,” he tĩ. “Kórég tũ êg nỹtĩ, jo ù ag ne kórég nỹtĩ,” he ag tóg tĩ, vẽso, Jesus vỹ mẽg mũ ù ag. Ên ag kanhrãnrãn sór tóg mũ, Jesus ti. Kỹ tóg ag mỹ: “ãjag jykre vỹ ge nỹnh mũ, ha mẽ,” he mũ.

¹⁰ “Kejẽn Fariseu ù tóg nĩgtĩ. Topẽ jo ìn ra tóg tĩ mũ, tá Topẽ mré vỹjé. Ti mré ù tóg ra tĩ mũ gé, ù tỹ governo mỹ jãnkamy mãg tĩ ti. Topẽ mré vỹ sór tóg mũ gé.

¹¹ Kỹ Fariseu tóg Topẽ mré vễmén jẽ nĩ. “Topẽ,” he tóg. “Inh mỹ tóg há tĩ, isỹ jykre kórég tũ nĩn kỹ, ag jãvo. Û ag tóg nén ù péju(g) tĩ, hã ra sóg han tũ nĩgtĩ. Û ag tóg nén ù vẽnhmỹ han tĩ inhhã, jãvo inh pi(jé) han tĩ. ãjag prũ tũ fag

mré ag tóg nýtĩ inhhã. Kĩ governo mĩ jãnkamy mãg tĩ tag ti vỹ kórég nĩ gé inhhã.

¹² Ag jãvo sóg vènh jykre há han tí. Semana kar ki sóg vãkre régre han tí, jèg mē tí ki. Hã ki sóg ã jykre ki króm tí. Isũ tỹ sóg dízimo kajãm tí, ã mỹ. Sỹ nén ù tỹ 10 (ke) ki sóg ùn pir nĩm tí, ã mỹ dízimo han kỹ,” he tóg, Fariseu ti, Topé mỹ.

¹³ Hã ra governo mỹ jãnkamy mãg tí ãn tóg kór há tá jē nĩ, kuvar há tá, mỹ'ãg kỹ. Kỹ tóg kanhkã ki èvãnh tũ nĩ gé. Æ fe kri tóg kãgmĩg mũ, ti tỹ mỹ'ãg mág kỹ. Kỹ tóg Topē mré vĩ mũ. “Topē,” he tóg mũ gé. “Æ vĩ mranh inh mỹr,” he tóg. “Æ mỹ inh jagãgtãn ke tũ hã ra,” he tóg, Topē vĩ mranh tí ãn ti,” he tóg, Jesus ti.

¹⁴ “Ha mē, Topē vỹ ti mỹ vènh pãte fón, hã kỹ tóg jatun mỹ vyr. Jãvo tóg Fariseu ãn mỹ vènh pãte fón tũ nĩ. Ge ti nĩgtĩ. Èg tỹ vēsō: “há inh nĩ,” hen kỹ Topē tóg èg to kórég nĩ. Kỹ tóg èg térem mũ sir. Èg tỹ hã ra vēsō: “kórég inh nĩ,” hen kỹ Topē vỹ èg to há nĩ, kỹ tóg èg tỹ ùn mág han ke mũ gé sir,” he tóg, Jesus ti.

*Jesus tỹ ùn kãsir ag to há
(Mt 19.13-15; Mc 10.13-16)*

¹⁵ Kỹ fag tóg gĩr tatĩ kãmũ mũ ti to, ti tỹ gĩr kri ã nĩgé fi jé. Hã ra ti mré mũ tĩ ag tóg vég mũ, kỹ ag tóg fag to jũ mũ, ù tỹ ag tatĩ kãmũ mũ fag to.

¹⁶ Hã ra Jesus tóg fag jé prēr kỹ ag mỹ: “vĩ tũg nĩ, gĩr ag mỹ,” he mũ. “Gĩr ag tỹ iso kãmũ

kamēg tũg nĩ,” he tóg. “Û tỹ ge hã vỹ èg Senhor tỹ Topē krēm nýtĩnh mũ,” he tóg.

¹⁷ “Sỹ ke há vē, hã kỹ sóg tó mũ. Gĩr ag vỹ iso há pē nýtĩ. Ùn kãsir tag ag ri ke nýtĩmnĩ, ke tũ nĩ mũ ra ãjag tóg Topē tỹ tỹ èg pã'i nĩ venh ke tũ nĩ mỹr,” he tóg, Jesus ti.

*Ûn rico ag
(Mt 19.16-30; Mc 10.17-31)*

¹⁸ Kỹ kejēn ù tóg Jesus ki jēmēnh kãtĩ mũ, pã'i ù. Kỹ tóg ti mỹ: “Senhor,” he mũ. “Hã ã tóg nĩ,” he tóg. “Sỹ rĩr krỹg ja tũ venh há tóg tí. Sỹ ti ve jé inh hỹn vènh jykre há tỹ ne han ke mũ?” he tóg.

¹⁹ Kỹ Jesus tóg ti mỹ: “iso: “há ã nĩ,” he sór tũg nĩ,” he mũ. “Èg pi(jé) há nýtĩ,” he tóg. “Topē hã ne ã pir mỹ há nĩ,” he tóg.

²⁰ “Topē tỹ nén ù to èg jyvēn ja ãn ki kanhró ã tóg nĩ, hã vỹ: ã prũ tũ fi mré nỹ tũg nĩ, he mũ, ù tén tũg nĩ, he mũ, nén ù péju(g) tũg nĩ, he mũ, ù to ón tũg nĩ, he mũ, ã nỹ mré ã jóg kamēg nĩ, he mũ,” he tóg ti mỹ, Jesus ti.

²¹ Hã ra tóg: “ki króm kãn sóg, isĩn kã,” he mũ.

²² Kỹ Jesus tóg ti mỹ: “nén ù pir vỹ tũ nĩ ver,” he mũ. “Æ tũ vãm kãn nĩ, ã tỹ ùn vēsỹrénh mũ ag mỹ vin jé, jãnkamy ti. Kỹ ã tóg kanhkã tá tũ mág nĩ sir. Kar kãtĩg nĩ, ã tỹ inh mré tũg jé,” he tóg ti mỹ, Jesus ti.

²³ Kỹ tóg ti mỹ vènhmỹ tí, Jesus vĩ ti, ti rico pē nĩn kỹ.

²⁴ Hã ra Jesus tóg ti mỹ vènhmỹ ãn ki kanhrãn mũ. Kỹ

tóg ã mré mũ tĩ ag mỹ: “jagy ti nỹ, ùn rico tỹ Topẽ tỹ tỹ ẽg pã'i nĩ venh ke ti,” he mũ.

²⁵ “Cavalo pãñĩ sór vỹ préj nor fĩn rãm ke tũ nĩ,” he tóg. “Ti tỹ fĩn rãm ke ra tóg jagy ti vẽ, ùn rico tỹ Topẽ tỹ tỹ ẽg pã'i nĩ venh ke ti,” he tóg.

²⁶ Kỹ ti vĩ mẽg mũ ag tóg to vēmén mũ. “Kỹ ù hỹn kren ke tũ pẽ nĩ,” he ag tóg.

²⁷ Kỹ Jesus tóg ag mỹ: “ẽprã ke ag vỹ tá junjun ke tũ nĩ vẽ,” he mũ. “Hã ra Topẽ hã tóg ẽg tỹ tá junjun han ke mũ,” he tóg.

²⁸ Kỹ Pedro vỹ: “ha vé,” he mũ. “Èg tỹ nén ù kar ré jé ẽg tóg mũ mũ, ẽg tỹ ã mré mũ jé,” he tóg.

²⁹ Kỹ Jesus tóg ag mỹ: “sỹ ke há vẽ, hã kỹ sóg tó mũ,” he mũ. “Û tóg kejẽn ã jamã ré kỹ tĩ mũ, ti prũ fi, ti kãke, ti jãvy, ti han mũ fag, ti krẽ ré kỹ tóg tĩ mũ, Topẽ tỹ tỹ ẽg pã'i nĩ tugrĩn, ti tỹ ti vĩ ki króm jé,” he tóg.

³⁰ “Èn vỹ tóg sir vẽnh kaja jé nén kar ẽn tỹ ùn e venh ke mũ, ag jẽgja kã, ga kri, kar kỹ tóg vãhã sir ẽg rĩr krỹg ja tũ venh ke mũ gé sir, kanhkã tá,” he tóg, Jesus ti.

*Jesus tỹ ã ter ke tó mãn
(Mt 20.17-19; Mc 10.32-34)*

³¹ Kỹ tóg ù tỹ 12 (ke) ag jé prẽr mũ, vyrmỹ, ag mỹ kãmén jé. “Ha vé,” he tóg. “Jerusalém ra ẽg mũ mũ, kỹ sóg tá ve kãn ke mũ, vãsỹ Topẽ vĩ tó tĩ ag tỹ iso nén rãn ja ẽn ti,” he tóg. “Tỹ sóg ẽprã ke fi kósin ẽn nĩ,

hã kỹ ag tóg inh kãmén ja nĩ, Topẽ vĩ ki.

³² Fóg ag mỹ ag tóg inh fẽg ke mũ, pã'i ag, Jerusalém tá, ha vemnĩ, ag tỹ iso é he jé, ag tỹ inh vóg kónãn jé, ag tỹ iso sug ke jé gé,

³³ ag tỹ inh mrãnmrãn jé. Ag tỹ isén ke vẽ. Hã ra sóg kurã tãgtũ tũg kỹ rĩr mãn ke mũ, ha vemnĩ,” he tóg, ti mré mũ tĩ ag mỹ, Jesus ti.

³⁴ Hã ra ag tóg ti vĩ tag to jykrén tũ nĩ, ù tỹ 12 (ke) ẽn ag. Ti vĩ tóg ag mỹ vẽnhmỹ tĩ. Kỹ ag tóg ki kagtĩg nỹtĩ. “Ti tỹ ne tó nẽ hỹn'?” he ag tóg mũ sir.

*Jesus tỹ ùn kyvó tỹ há' he
(Mt 20.29-34; Mc 10.46-52)*

³⁵ Ag mũn kỹ ag tóg Jericó to hã mũ mũ. Tá ùn kyvó vỹ ẽpry kri nĩ nĩ, ẽmĩn kri. “Inh mỹ jãnkamy nĩm,” he tóg tĩ, vẽnh kar mỹ, ti kyvó nĩn kỹ.

³⁶ Èn vỹ vẽnh kar tỹ ẽpry jagma mũ mẽg tĩ. Kỹ tóg ag mỹ: “ù nẽ?” he mũ.

³⁷ Kỹ ag tóg ti mỹ: “Jesus vẽ, Nazaré tá ke ẽn vẽ,” he mũ.

³⁸ Kỹ tóg prẽr mũ sir. “!..Jesus'..., Davi kósin'..., ijagãgtãn ra..!” he tóg mũ, prẽr kỹ.

³⁹ Kỹ Jesus jo mũ ag vỹ ti mỹ vĩ jũ han mũ. “Èmẽ kã nĩ nĩ,” he ag tóg ti mỹ. Hã ra tóg prẽr mãn', prẽr mãn' he mũ. “!..Davi kósin'..., ijagãgtãn ra..!” he tóg.

⁴⁰ Kỹ Jesus tóg krỹg he mũ, kỹ tóg: “ti jé prẽr,” he mũ. Kỹ ag tóg ti pére kãmũ mũ. Ti ki jun kỹ tóg ti mỹ:

⁴¹ “inh ã tỹ hẽ ri kenh ke?” he mũ. Kỹ tóg ẽg Senhor mỹ: “sỹ venh há tóg ti,” he mũ.

42 Kÿ Jesus tóg ti mÿ: “kÿ tÿ vé,” he mÿ. “Ă tÿ inh ki rã kÿ ă há' henh ke mÿ,” he tóg.

43 Kÿ tóg vêsÿmér êvãnh há' he mÿ sir. Kÿ tóg ti mré tĩ mÿ. Topê mÿ tóg vĩ há han mÿ. Kÿ tóg vënh kar mÿ há tĩ, ag tÿ ti tÿ há' he mÿ ên ven kÿ. Kÿ ag tóg Topê mÿ vĩ há han mÿ gé sir.

19

Jesus tÿ Zaqueu venh tĩg

1 Kÿ Jesus tóg cidade tÿ Jericó ki rã mÿ sir, kÿ tóg fĩn rãm kÿ tĩg sór mÿ.

2 Hã ra ù tóg tá nĩ nĩ, ti jÿÿ hã vÿ: Zaqueu, he mÿ. Governo mÿ jãnkamy mäg tĩ ag pã'i vë. Rico pë ti nĩ, rico tãvĩ.

3 Ên tóg Jesus ve sór mÿ, ti tÿ Jericó fĩn rãm kÿ. Hã ra tóg rur jë, hã kÿ tóg ti vëg tũ nĩ, vënh e ag tÿ ti pëñĩn mÿn kÿ.

4 Hã kÿ tóg ti jo vënhvãg tĩ mÿ, kÿ tóg ka tÿ krén to tãpÿ mÿ, ti tÿ Jesus ve jé, ti tÿ jagma tĩg kÿ.

5 Kÿ Jesus tóg ka ên tá jun mÿ. Hã ra tóg krĩg mÿ êvãnh kÿ ka kri ti vëg mÿ. Kÿ tóg ti mÿ: “Zaqueu’,” he mÿ. “Kur kãtére to fũrũn ké. Isÿ ă ãn krêm nũr ke vë,” he tóg, Jesus ti.

6 Kÿ tóg tére tÿ mrãnh ke mÿ sir. Jesus mÿ tóg: “mÿ jé ha,” he mÿ. Ti mÿ tóg sér tĩ, Jesus tÿ ti ãn krêm nũr sór kÿ.

7 Hã ra vënh e ên tóg Jesus to vĩ mÿ sir, ti to jũ kÿ. “Topê vĩ mranh tĩ vë, ên ti, hã ra tóg ti ãn krêm nũr sór mÿ, vënh

jÿkre pãno han tĩ ên mré,” he ag tóg mÿ.

8 Kÿ Jesus tóg ti ãn krêm nĩ nĩ. Kÿ Zaqueu vÿ ti mÿ vënh kãmén kãtĩ mÿ, ă jÿkre to jÿkrén kÿ. Kÿ tóg êg Senhor mÿ: “ha vé,” he mÿ. “Isũ kuju vin jé sóg ke mÿ, ùn jagtar ag mÿ. Û ag lograr he ja sóg nĩgtĩ, ag tũ ki, hã ra sóg ag mÿ ti kãfór nĩm sór mÿ ha. Sÿ jãnkamy pir ki ù lograr he jan ki sóg ti mÿ ù tÿ 4 (ke) vin sór mÿ,” he tóg, Zaqueu ti.

9 Kÿ Jesus tóg ti mÿ: “há ti nĩ,” he mÿ. “Ûri ă tóg kren mÿ, ă mré ke fag mré hã,” he tóg. “Abraão kósin vÿ tÿ ă nĩ gé,” he tóg.

10 “Tÿ sóg êprã ke fi kósin nĩ. Ûn vãfor mÿ ên jãvãnh jé sóg kãtĩg, sÿ ag krenkren han jé, ùn jÿkre pãno han mÿ ên,” he tóg, Jesus ti.

Jãnkamy to comparação (Mt 25.14-30)

11 Hã ra ag tóg ti vĩ mē há han mÿ, kÿ tóg ag mÿ Topê tÿ tÿ êg pã'i nĩnh ke ti kãmén sór mÿ. Jerusalém to hã tóg nĩ, hã kÿ ag tóg ti to: “Topê tÿ tÿ êg pã'i nĩ hÿn vënh ven ke mÿ, ti tÿ tá jun kÿ,” he mÿ.

12 Kÿ Jesus tóg ag mÿ kãmén mÿ, Topê tÿ tÿ êg pã'i nĩnh ke tÿ ver vënh ven ke tũ nĩ. Kÿ tóg tag tó mÿ, ha mē. “Kejën pã'i tóg nĩgtĩ,” he tóg. “Ên tóg ga ù ra tĩg sór mÿ, tá ă tũ ve jé, ga ên tá ă tũ han jé. Tag han kar tóg tá vÿn ke sór mÿ.

13 Pã'i ên vÿ ă camarada tÿ 10 (ke) ag jé prër mÿ, kÿ tóg ag mÿ jãnkamy prestar he mÿ sir.

Ag kar mÿ tóg ti kãmur pir nÿm mũ, jãnkamy tÿ, ù tÿ 10 (ke) ag mÿ. Kÿ tóg ag mÿ: “ha inh mÿ tÿ rãnrãj,” he mũ. “Kejën sóg vÿn kenh ke mũ, kÿ sóg tugnÿm ke mũ, ãjag rãnrãj ti,” he tóg. Kar tóg tí mũ sir.

14 Hã ra ti krêm ke ù ag vÿ ti to há tũ nÿtÿ, kÿ ag tóg ti nón vënh vÿ jënëg mũ. Kÿ ag tóg: “ã tÿ ãg kri tÿ pã'i nÿn kÿ tóg vënhmÿ nÿ,” he mũ, “ãg tÿ tag ve jãvãnh tóg tí,” he ja ag tóg nÿgtÿ, ag tÿ ti mÿ vënh vÿ jënëg mũn kã.

15 Hã ra tóg tÿ pã'i nÿn kÿ kÿjën vÿn ke mũ, ga ãn ve kar kÿ, tá ti rãnrãj han kãn kar. Kÿ tóg tÿ pã'i mág jë. Vÿn ke kÿ tóg ã camarada ag jé prër mũ sir, ti tÿ ùn mÿ jãnkamy vin ja ãn ag. Ti tÿ ag rãnrãj tugnÿm sór vë, ag ganho ve sór vë gé.

16 Kÿ ù tóg ti tá jun kÿ ti mÿ: “pã'i,” he mũ. “Ti kãmur pir nÿm ã tóg mÿr. Hã ra sóg kri ù tÿ 10 (ke) ganhar ké,” he tóg.

17 Kÿ ti patrão tóg ã camarada mÿ: “jykre há tâvÿ ã tóg nÿ,” he mũ. “Nén sÿ ki rÿr há han ã tóg, hã kÿ ã tóg cidade tÿ 10 (ke) ki rÿr mũ ha,” he tóg, pã'i ti, ã camarada mÿ.

18 Kÿ ù tóg ti tá jun mũ gé. Kÿ tóg ti mÿ: “pã'i,” he mũ gé. “Ti kãmur pir nÿm ã tóg mÿr. Hã ra sóg kri ù tÿ 5 (ke) ganhar ké,” he tóg.

19 Kÿ ti patrão tóg ti mÿ: “cidade tÿ 5 (ke) ki rÿr jé ã tóg ke mũ ha,” he mũ gé.

20 Kÿ ù tóg tá jun mũ gé. Kÿ tóg ti mÿ: “pã'i,” he mũ gé. “Ha vé, ã tũ tí,” he tóg. “Inh krÿ pãgja ki sóg tógfÿn kÿ nÿm han.

21 ã kamëg ja inh nÿ, ã vÿ tar to. ã tÿ nén vin ja tũ ãn mãn sór ã tóg tí, ã tÿ nén krãn ja tũ kunũnh sór ã tóg tí,” he tóg, ti camarada ti, pã'i ti mÿ.

22 Kÿ ti patrão tóg ti mÿ: “ã vÿ tóg ã jykre pãno han mũ, ha mẽ,” he mũ. “Inh mÿ vÿ tar han tí? Inh mÿ sÿ nén vin ja tũ mãn sór tí? Inh mÿ sÿ nén krãn ja tũ kunũnh sór tí? Hã ki kanhró ã mÿ nÿ?”

23 Kÿ ã tÿ ne jé inh jãnkamy tÿ banco ki rãnrãj tí ag mÿ vin ja tũ nÿ nê? ã tÿ ag mÿ vin mũ ra sóg ti juro venh mũ vë, kÿ sóg isũ kãfór mãn ke mũ vë,” he tóg, ti patrão ti, ã camarada mÿ.

24 Kÿ tóg tá nÿtÿ ag mÿ: “ti nÿgã ti tũ mã,” he mũ. “Û tÿ ti kãmur tÿ 10 (ke) mãn ja ãn mÿ nÿm, ti tũ pir ti,” he tóg mũ sir.

25 Kÿ ag tóg ti mÿ: “pã'i,” he mũ. “Ti kãmur tÿ 10 (ke) vÿ tÿ ti tũ nÿtÿ. Tũ mág ve ti huri,” he ag tóg, pã'i mÿ.

26 Kÿ tóg: “hÿ,” he mũ. “Hã kÿ sóg tó mũ. Ûn tũ mág vÿ mãn mãn ke mũ. Û tÿ tũ sÿ nÿ ãn tũ kunũnh kãn jé ag tóg ke mũ gé,” he tóg.

27 “Kÿ inh kato tẽ mũ ag pére kãmũmnÿ, ù tÿ iso: “ti tÿ ãg kri tÿ pã'i jën kÿ tóg ãg mÿ kórég nÿ,” he mũ ãn ag. Ag kãgtén ra, inh rÿnve,” he tóg, pã'i ti,” he tóg, Jesus ti. Ti tÿ ãg tÿ ti rãnrãj ki rÿr há han ke kãmén hã vë.

28 Tag tó kãn kÿ tóg tá kãkutẽ mũ sir, kÿ tóg cidade tÿ Jerusalém ra tí mũ.

Jesus tỹ Jerusalém tá jun

(Mt 21.1-11; Mc 11.1-11; Jo 12.12-19)

29 Ti tỹ Jerusalém ra tĩg kỹ tóg êmã tỹ Betfagé to hã jun mũ, êmã tỹ Betânia tá, pãnónh tỹ Oliveiras he mũ ên tá. Tá jun kỹ tóg ã mré mũ tĩ régre ag jênêg mũ, ag tỹ ti mỹ ag mễg tỹ burrica ve jé.

30 Hã kỹ tóg ag mỹ: “êmã ên ra mũmnĩ, êg jo êmã ên ra,” he mũ. “Tá junjun kỹ ãjag tóg burrica fi kósin venh mũ. Kri nĩ ja tũ ja tóg jê ver. Ên kavãn kỹ ti pére kãmũmnĩ, ti kyvãn kỹ,” he tóg.

31 “Hẽn ri ke mũn ag tóg ãjag mỹ: “ãjag tỹ ne jé ti kavãn nê?” henh mũ. Kỹ ag mỹ: “êg Senhor vỹ ti ve sór mũ,” hemnĩ,” he tóg, Jesus ti.

32 Kỹ ag tóg mũ mũ, Jesus tỹ ag jêgnên kỹ. Ti tỹ ag mỹ tó mũ ve kãn ag tóg mũ sir.

33 Kỹ ag tóg ti kyvãg mũ. Kỹ ti tỹ tỹ ùn mễg mũ ag tóg ag mỹ vĩ mũ. “Ãjag tỹ ne jé burrica kósin tag kavãn nê?” he ag tóg.

34 Kỹ ag tóg: “êg Senhor vỹ ti ve sór mũ,” he mũ.

35 Kỹ ag tóg Jesus mỹ ti pére kãmũ mũ. ãjag kur kugjén ag tóg mũ sir ti kri. Kỹ Jesus tóg kri nĩ mũ sir.

36 Kỹ tóg tĩ mũ. Kỹ ag tóg ãjag kur kugjén mũ sir, êpy jagma, êmĩn jagma.

37 Ge kỹ ag tóg Jerusalém to hã junjun mũ sir, pãnónh tỹ Oliveiras to re kỹ.

Ag tỹ pãnónh ên to re kỹ vãhã ag kar ên tóg Topê mỹ vĩ há han mũ sir, Jesus mré mũ kar ên ag. Ag mỹ tóg sér

tĩ. Jesus tỹ nén han mũ ve ja ag tóg nĩgtĩ, ti tỹ nén han vãn hyn han mũ ti. Ên mũ êkren kỹ ag tóg Topê mỹ vĩ há han mũ, jamã hár(a).

38 Kỹ ag tóg: “!..sér tóg tĩ êg mỹ..!” he mũ. “!..Êg Senhor vỹ êg ki jun..., êg jóg mág tỹ ti jênên kỹ..!” he ag tóg. “!..Kanhkã tá ke ag tóg jatu nỹtĩ..! Topê mỹ êg tóg vĩ há han sór mũ, kynhmỹ nĩ ên mỹ..!” he ag tóg, prênprêr kỹ.

39 Hã ra Fariseu ù ag tóg tá nỹtĩ gé, vênh e ên kãmĩ. Kỹ ag tóg Jesus mỹ: “Senhor,” he mũ. “Ã mré mũ tĩ ag mỹ: “prênprêr tũg ra,” hé,” he ag tóg, Jesus mỹ.

40 Hã ra Jesus tóg ag mỹ: “vó,” he mũ. “Ha mẽ, ag prênprêr tũ nĩ ra pó hỹn prênprêr mũ vễ, ag mỹ sinsér mũ vễ,” he tóg ag mỹ.

Jesus tỹ Jerusalém to fỹ

41 Ge kỹ ag tóg cidade tá junjun mũ sir. Cidade ên ve kỹ tóg to fỹ mũ, Jesus ti.

42 “Jerusalém tá ke ag vĩ ki kanhrãnrãn sór tũ nỹtĩ,” he tóg. “Ag tỹ ùri ki kanhrãnrãn há tóg tĩ vễ, hã ra ag tóg ke jãvãn nỹtĩ. ãjag tỹ ki kanhrãnrãn' he mũ ra ãjag tóg jatu kenh ke mũ vễ, mỹr, ha mẽ, hã ra ãjag tóg jêmê sór tũ nĩ. Kutu ãjag tóg nỹtĩ.

43 Hã kỹ ãjag tóg vãhã kurã kórég pẽ venh ke mũ. ãjag kato tễgtễ mũ ag vĩ ãjag to ráránh ke mũ. Kũm'kũm ke jé ag tóg ke mũ, ãjag cidade jy ró pênĩn. Komêr hã ag tóg ãjag to grêngrên kenh ke mũ, kỹ

ag tóg ãjag mǎn vÿrÿn kenh ke mǔ sir.

⁴⁴ Æjag tÿ tÿg' he kǎn jé ag tóg ke mǔ, ãjag krē ke gé. Æjag ïn kókén kǎn jé ag tóg ke mǔ gé. Kÿ ïn tÿ pó pi(jé) jagnē kri nÿtǐnh mǔ'. Kurā há ki ãjag tóg Topē vĭ mē jāvānh nÿtĭ, ũri. Topē vÿ ũri ãjag mÿ vĭ há han mǔ ver, hā ra ãjag tóg mē jāvānh nÿtĭ. Hā kÿ ãjag tóg ti kórég venh ke mǔ," he tóg, Jesus ti. Fÿ pē han kÿ tóg tó mǔ, cidade mĭ tĭg kÿ.

Jesus tÿ Topē jo ïn tá jun

(Mt 21.12-17; Mc 11.15-19; Jo 2.13-22)

⁴⁵ Kÿ tóg Topē jo ïn tá jun kÿ kǎra rǎ mǔ sir. Kÿ tóg ũ tÿ tá nén ũ vender he tĭ ag pan mǔ sir.

⁴⁶ Ag mÿ tóg tag tó mǔ, ha mē. "Topē vĭ rá to jykrén nĭ," he tóg. "Tag vÿ rán kÿ nĭ, ha mē. ïnh ïn jĭji vÿ tÿ Topē mré vĭ jafā nĭ, he tóg, Topē vĭ tÿ rán kÿ nĭ ki. Hā ra ãjag tóg Topē mré vĭ jafā tag krēm nén kar pigju mǔgtĭ, kÿ tóg bandido ag jamā ri ke nĭ sir," he tóg, Jesus ti. Ag pan kÿ tóg ag mÿ tó mǔ.

⁴⁷ Hā ki tóg kurā kar ki ag kanhrānrān mǔ, Topē jo ïn krēm. Hā ra Topē tǔ ki rĭr tĭ to pǎ'i ag mÿ tóg kórég nĭ, Topē vĭ rán tĭ ag mÿ ke gé, pǎ'i kar ag mÿ. Hā kÿ ag tóg ti tén ke to jykrén mǔ sir.

⁴⁸ Hā ra tóg ag mÿ ki króm sór tǔ nĭ. Vēnh kar mÿ tóg mē sér tĭ, ti vĭ ti, hā kÿ pǎ'i ag tÿ ti tén sór mǔ ra tóg vēnhmÿ tĭ sir ag mÿ.

20

Ũn nÿ hÿn Jesus jēnē

(Mt 21.23-27; Mc 11.27-33)

¹ Kurā kar ki Jesus tóg Topē vĭ tó jē nĭ, vēnh vĭ sér ěn, Topē jo ïn krēm. Kÿ tóg kejēn tá jē nĭ. Kÿ Topē tǔ ki rĭr tĭ to pǎ'i ag tóg ti to kǎmǔ mǔ, Topē vĭ to professor ag ke gé, kófa ag ke gé.

² Ti mÿ ag tóg: "ĕg tÿ ā ki jēmēnh há tóg tĭ," he mǔ. Kÿ tóg ag mÿ: "hej," he mǔ. Kÿ ag tóg: "ā vēnh jykre tÿ ne tÿ tag han mǔ'?" he mǔ. "Ũ nÿ ā jēnē?" he ag tóg.

³ Kÿ tóg ag mÿ: "ãjag ki sóg jēmēnh ke mǔ gé, vēnh kato," he mǔ. "Ha mē.

⁴ João vÿ ag kygpég tĭ ja nĭgtĭ. Kÿ ti mÿ kanhkā tá vēnh jykre han mǔ', ĕprā jykre vó?" he tóg. "Ũ nÿ ti jēnē?" he tóg. "ïnh mÿ tó," he tóg, Jesus ti, ag mÿ.

⁵ Kÿ ag tóg jagnē mré to jykrén mǔ sir. "ĕg tÿ ti mÿ: "Topē tÿ ti jēnē vē," hen kÿ tóg ĕg mÿ: "ãjag tÿ ne jé ti vĭ kri fig tǔ ja nĭ nē?" henh ke mǔ," he ag tóg jagnē mÿ.

⁶ "ĕg tÿ hā ra ti mÿ: "ĕprā ke jykre ja vē," hen kÿ vēnh kar vÿ ĕg pin sór ke mǔ, pó tÿ, ha vemnĭ. João to ag tóg: "Topē vĭ tó tĭ pē ja vē," he tĭ, hā kÿ ag tóg ĕg to jũnh ke mǔ, ĕg tÿ: "hā tǔ vē," hen kÿ," he ag tóg mǔ jagnē mÿ.

⁷ "Topē jykre han ja ti nĭ," he sór tǔ ag nÿtĭ, kÿ ag tóg: "ĕprā ke jykre han ja ti nĭ," he sór tǔ nÿtĭ gé. Hā kÿ ag tóg Jesus mÿ: "ĕg pi(jé) ki kanhró nÿtĭ," he mǔ, João jykre to.

⁸ Kĩ Jesus tóg ag mĩ: “kĩ sóg ãjag mĩ ù tỹ inh jẽnẽg mũ ãn tónh ke tũ nĩ gé,” he mũ. ã kato tẽ mũ ag mĩ tóg ke mũ.

Ûn camarada kórég ag to comparaçã

(Mt 21.33-46; Mc 12.1-12)

⁹ Kĩ tóg vẽn kar kanhrãnrãn kũ ag mĩ: “ẽg tỹ Topẽ kato tẽ kũ tóg ge nỹnh mũ, ha mẽ,” he mũ. “Kejẽn ù tóg nĩgtĩ. Uva krãn ja tóg nĩ, nén kanẽ tỹ vinho han jafã ãn. Kĩ tóg ù tỹ ki rĩr tĩ ag mré to jykrén kũ ag mĩ tovãnh mũ sir. Ag mĩ tovãnh kũ tóg ga ù ra tĩ mũ. Hã ra tóg kãtĩg vãnhan mũ.

¹⁰ Ti uva kanẽn kũ tóg ag mĩ ã camarada jẽnẽg mũ, ù tỹ ki rĩr tĩ ag mĩ, ag tỹ ti mĩ ti tũ nĩm jé, ẽkré kanẽ ãn ti. Hã ra ag tóg ti mĩ vin tũg mũ. Ti mrãnmrãn ag tóg mũ. Kĩ ag tóg ti mĩ: “ha tũg,” he mũ. Nén ù tũ ra tóg tĩ mũ sir.

¹¹ Kĩ tóg ã camarada ù jẽnẽg mũ gé sir. Hã ra ag tóg ti mrãnmrãn mũ gé. Ti mĩ féfén kar kũ ag tóg ti mĩ: “ha tũg,” he mũ gé sir. Nén ù tũ ra tóg tũg mũ gé.

¹² Kĩ tóg ag mĩ ù jẽnẽ mãn mũ gé sir, hã ra ag tóg ti mrãnmrãn kũ ti rãnh kũ ti tũn mũ sir.

¹³ Kĩ uva kré tỹ ùn tũn mũ tóg to jykrén mũ. “Inh hỹn hẽn ri kenh ha,” he tóg, to jykrén kũ. “Inh kósín jẽnẽ jé sóg ke mũ, inh fe pẽ ãn, hẽn ri ke mũn ag ti kamẽg mũ,” he tóg.

¹⁴ Ti kósín tỹ ag tá jun kũ nén kré ki rĩr tĩ ag tóg ti vég mũ. Kĩ

ag tóg ti to jykrén mũ, jagnẽ mré. “Kejẽn ẽkré tag vỹ tỹ ti tũ nỹnh mũ,” he ag tóg. “Mũ nỹ, ti tén jé, ti tũ tag tỹ tỹ ẽg tũ nỹnh jé,” he ag tóg.

¹⁵ Kĩ ag tóg ró mã ra ti pére mũ kũ tá ti tén mũ sir. Kỹn hỹn hẽn ri kenh ke mũ', ẽkré tỹ ùn tũn mũ ãn ti?” he tóg, Jesus ti.

¹⁶ “Kãtĩg jé tóg ke mũ, ẽkré ki rĩr tĩ ag kãgtén jé. Kĩ tóg camarada ù ag mĩ finh mũ sir, ã jakré ti,” he tóg, Jesus ti.

Kĩ ag tóg mẽg mũ, ti ví ti, ti pẽnĩn nỹtĩ ãn ag. Kĩ tóg ag mĩ e tĩ. “Ëg jé tag venh ke tũ nĩ,” he ag tóg mũ, ù tỹ Jesus ví mẽg mũ ag.

¹⁷ Hã ra Jesus tóg ag ki ẽvãnh kũ ag mĩ: “Topẽ ví rá tag to jykrén nĩ, ha mẽ,” he mũ. “Pó tỹ ãn han jafã fón ag tóg, pó tỹ ãn han tũ ag. Ag mĩ tóg kórég ja nĩ, pó ãn ti. Hã ra Topẽ tóg pó ãn hã tỹ ãn nũna han mũ,” he tóg, Topẽ ví tỹ rán kũ nĩ ki,” he tóg, Jesus ti. Ti tỹ ã kato vãsãnsãn mũ ag mĩ vẽn kãmén hã vẽ.

¹⁸ Kĩ tóg ag mĩ: “ù tỹ hẽn ri ke ag vỹ pó tag kri vár ke mũ, kũ ag tóg kri vár kũ tũ' henh ke mũ,” he mũ. “Kỹ pó tag vỹ ù tỹ hẽn ri ke ag kri kutẽn h ke mũ gé, kũ tóg ag tỹ nám nám ke kãn mũ sir, ag kri kutẽ kũ,” he tóg, Topẽ ví tỹ rán kũ nĩ ki,” he tóg, Jesus ti. Ti tỹ ag tỹ ti ki rã tũ tugrĩn nũgme ki vár ke tón hã vẽ.

Ëg tỹ imposto kajãm

(Mt 22.15-22; Mc 12.13-17)

¹⁹ Kĩ Topẽ ví to professor ag vỹ ti ví mẽg mũ, Topẽ tũ ki rĩr tĩ to pã'i ag ke gé. Ag hã to tóg

kāmén ja nĩ, “ĕg tỹ Topĕ kato vāsān tag vỹ ge nỹnh mũ,” he mũ ěn ti. Kỹ ag tóg ki kanhró nỹtĩ sir, hã kỹ ag tóg ti se sór mũ. Hã ra ag tóg ũn e ěn kamĕg mũ. Ti vỹ vỹ vĕnh kar mỹ mĕ há tĩ, hã kỹ pã'i ag tóg ti ség tũ nĩ ver, ag tỹ ti se sór mũ (hã) ra.

²⁰ Kỹ ag tóg hã ra ti tugnỹm mũ. Ti vỹ to ag tóg vājig mũ, ag tỹ ti vỹ to fóg tỹ pã'i mỹ ti fĕg jé. Ag tỹ ti vỹ tugnĩn fóg tỹ pã'i mág mỹ: “ha ti vóg kónān,” he sór vĕ. Hã je ag tóg ũn jykre kuryj nỹ ve ag jĕgnĕg mũ, ag tỹ ón kỹ Jesus ki jĕmĕ jé.

²¹ Kỹ ěn ag tóg sir Jesus mỹ: “Senhor’,” he mũ. “Vĕnh jykre kuryj hã tóg ĩ, hã kāmén ĩ tóg tĩ. Hã kỹ ĕprã ke ag ve tóg ĩ ĩ mỹ tỹ nĕn ũ tũ nĩ. Hã kỹ ĩ tóg Topĕ japry to, Topĕ jamĩn to ĕg kanhrān há han tĩ,” he ag tóg mũ.

²² “Kỹn mỹ há nỹ, ĕg tỹ fóg tỹ pã'i mág tỹ imperador mỹ jānkamy ěn nĩm ti, imposto kajām jé? Ĕg mỹ hỹn nĩm mũ', nĩm ke tũ nĩ vó?” he ag tóg.

²³ Hã ra Jesus tóg ki kanhró nĩ, ag jykre régre ti. Hã kỹ tóg ag mỹ: “ājag ne tóg ón kỹ inh ki jĕmĕ sór mũ’,” he mũ.

²⁴ “Inh mỹ jānkamy ven. Ũ jiji nỹ kã nĩ? Ũ kãgrá nỹ kã nĩ?” he tóg. Kỹ ag tóg ti mỹ: “pã'i mág kãgrá vĕ,” he mũ.

²⁵ Kỹ tóg ag mỹ: “kỹ pã'i mág mỹ ti tũ nĩm, jo Topĕ mỹ ti tũ nĩm gé,” he mũ, Jesus ti.

²⁶ Hã kỹ tóg ag tỹ ti vỹ to ti senh ke tóg tũ tĩ, ti vỹ há han kỹ. Kỹ tóg ag mỹ e tĩ, ti vỹ há tãvĩ ěn ti. Kỹ ag tóg ti mỹ vỹ

mãn tũ nĩ sir. Hã ra vĕnh kar vỹ ti vỹ mĕg nỹtĩ nĩ.

Ũn kãgter mũ ag tỹ rĩnrĩr mãn ke

(Mt 22.23-33; Mc 12.18-27)

²⁷ Kỹ Saduceu ag tóg ti tá junjun mũ gé, ti ki jĕmĕ jé. Hã ra Saduceu ag tóg: “ĕg ter ja tá ĕg tóg vỹn ke mãn ke tũ nĩ, rĩr mãn ke tũ ĕg tóg nĩ,” he tĩ.

²⁸ Ĕn ag vỹ Jesus ki jĕmĕ sór mũ gé, ón kỹ. Kỹ ag tóg ti mỹ: “Senhor’,” he mũ gé. “Moisés vỹ ĕg mỹ vĕnh jykre tag nĩm, hã vỹ: ĩ régre tỹ ĩ krĕ tũ ra ter kỹ ĩ tỹ ti prũ fi tỹ prũg ke vĕ, he mũ. ĩ tỹ ĩ régre mỹ ĩ krĕ han ke vĕ, fi ki, he tóg mũ gé. Moisés tỹ ĕg mỹ tóg jan hã vĕ,” he ag tóg mũ, Saduceu ag.

²⁹ “Kỹ ũ tỹ jagnĕ mré pafa ja tỹ 7 (ke) ag vỹ nỹgtĩ. Ag kãke vỹ prũg mũ, hã ra tóg ĩ kósĩn tũ ra ter mũ.

³⁰ Kỹ ti jāvy vỹ fi tỹ prũg mũ sir, hã ra tóg ĩ kósĩn tũ ra ter mũ gé.

³¹ Kỹ ti jāvy ũ tóg fi tỹ prũg mũ gé, hã ra tóg ter mũ gé, ti kósĩn tũ ra. Gen kỹ ag tóg kãgter kãn mũ kejĕn, ũ tỹ 7 (ke) ěn ag.

³² Kỹ vãhã ag prũ fi vỹ ter mũ gé sir.

³³ Kỹ fag kãgter ja tá rĩnrĩr mãn kỹ fi hỹn mén tỹ 7 (ke) nĩnh mũ vĕ. Ag kar vỹ fi tỹ prũg ja nỹtĩgtĩ. Hã kỹ tóg vĕnhmỹ nỹ, ag tỹ: “rĩnrĩr mãn jé ĕg tóg ke mũ,” hen kỹ,” he ag tóg. Saduceu ag tỹ Jesus mỹ ken hã vĕ.

³⁴ Kỹ Jesus tóg ag mỹ kāmén mũ. “Ĕprã ke ag vỹ prũgprũg tĩ, kỹ fag vỹ ag tỹ mén tĩ gé.

35 Ag kāmī ũ ag tóg ājag kăgter ja tá rĩnrĩr măn ke mũ, ti kurā tá krỹg kỹ. Ēn ag vỹ prũg măn ke tũ nĩ sir, mén măn ke tũ fag tóg nĩ gé sir, ājag rĩnrĩr măn kỹ.

36 Ter măn ke tũ ag tóg nĩ gé, mỹr, ha mẽ, hã kỹ ag prũg măn ke tũ nĩ, kỹ fag mén măn ke tũ nĩ gé. Kanhkã tăn ri ke ag nỹtĩ, Topẽ tỹ jěgně jafã ag ri ke mỹr, ũn rĩnrĩr măn mũ ag. Topẽ krẽ vỹ tỹ ag nỹtĩ sir, ag tỹ ājag kăgter tá rĩnrĩr măn ken kỹ.

37 Rĩnrĩr măn jé ag tóg ke mũ, ũn kăgter mũ ag, ha vemnĩ. Hã kỹ Moisés tóg Topẽ to tag tó ja nĩ, ha mẽ. Ti tỹ vãnħ pũr nĩ ěn tá ti mré vēmén kar kỹ tóg Topẽ to: “Abraão tỹ ũn to: Topẽ, he mũ ěn vễ, Isaque tỹ ũn to: Topẽ, he mũ ěn, Jacó tỹ ũn to: Topẽ, he mũ ěn,” he ja nĩ, Moisés ti.

38 Kăgter ag huri, Abraão, Isaque, Jacó, hã ra Moisés tóg Topẽ to: “Abraão tỹ ũn to: Topẽ, he mũ ěn vễ,” he ja nĩ. Ti tỹ tỹ ag Topẽ nĩn kỹ ag tóg rĩnrĩr nỹtĩ, ha mẽ, ag kăgter mũ ra. ũn kăgter kar ag vỹ Topẽ mỹ rĩnrĩr nỹtĩ,” he tóg, Jesus ti.

39 Kỹ ũ tỹ Topẽ vĩ rán tĩ ũ ag tóg ěg Senhor tỹ Jesus mỹ: “vĩ há han ģ, ěg ter ja tá vỹn kenħ ke mũ tag to,” he mũ, ti mỹ.

40 Kỹ ũ tóg ti ki jěmẽ măn sór tũ nĩ sir. Ti kaměgměg ag tóg mũ, hã kỹ ag tóg ti ki jěmẽ măn sór tũ nĩ ha.

Cristo mỹ tỹ Davi kósin nĩ, Topẽ kósin mỹ vó
(Mt 22.41-46; Mc 12.35-37)

41 Kỹ Jesus tóg ag ki jěměg mũ gé sir. Kỹ tóg ag mỹ: “Topẽ vĩ rán tĩ ag ne tóg: “Cristo vỹ tỹ Davi kósin nĩ,” he tĩ,” he mũ.

42 “Hã ra Davi tóg Cristo tó ja nĩ, ti tỹ Topẽ jé rán kỹ. Kỹ tóg: “ěg jóg mág tỹ Topẽ vỹ inh Senhor mỹ tag tó ja nĩ, ha mẽ: “nĩ ra ver, inh pějja tá,” he ja ti nĩ.

43 “Isỹ ģ kato văsănsăn mũ ag tỹ ģ krēm vin ke vễ, kỹ ag sigse ri ke vễ sir. Tag jāvãnħ nĩ ver,” he ja ti nĩ, Topẽ ti,” he ja tóg nĩgtĩ, Davi ti,” he tóg, Jesus ti.

44 “Hã kỹ Davi tóg Cristo to: “inh Senhor,” he ja nĩ. Kỹ ti kósin mỹ tỹ ti kri ke nĩ?” he tóg mũ, Jesus ti.

Hã ra ag tóg ti mỹ tó tũg mũ. Ag tỹ ne tónħ ke tóg tũ tĩ, ti kato tějgẽ mũ ag mỹ.

Ón kỹ Topẽ vĩ to professor ag kaměg jé ěg ke mũ
(Mt 23.1-36; Mc 12.38-40)

45 Věnh kar tóg měg mũ, Jesus vĩ ti. Kỹ tóg ģ mré mũ tĩ ag mỹ:

46 “ón kỹ Topẽ vĩ to professor ag kaměg nĩ,” he mũ. “Kur těj rĩnh ka(mě) ag nỹtĩ,” he tóg. “Kỹ věnh kar tỹ ag mỹ: “ģ mỹ há?” hen kỹ tóg ag mỹ sér tĩ, ag tỹ cidade kuju kāmĩ mũn kỹ. Věnh kanhrãn jafã krēm ag tóg věnh kăpãm kỹ nỹtĩgtĩ. Festa ki ag tóg jěn vén tĩ, ag tỹ tỹ pã'i nỹtĩn kỹ,” he tóg.

47 “Hã ra ag tóg ũn mén ter ja fag tũ măn kãn tĩ. Fag tũ măn kãn kỹ ag tóg ón kỹ Topẽ mré vĩ mág han mũgtĩ, ěg tỹ ag to: “ũn há vỹ tỹ ag nỹtĩ,” he jé. Hã to ag vėsỹrénh mág tãvĩ

han ke mũ,” he tóg, Jesus ti. Ti tỹ ù tỹ ón kỹ Topẽ to há nỹtĩ ag kãmén hã vë.

21

Ûn mén ter ja fi tỹ ã tũ vin kãn

(Mc 12.41-44)

¹ Kỹ Jesus tóg Topẽ jo ãn tá jẽ kỹ tãmĩ ãvãnh kỹ ùn rico ag vigvég mũ. Jãnkamy vin jafã ki ag tóg ãjag tũ vin tĩ, Topẽ mỹ, jãnkamy ti. Vin mág ag tóg mũ.

² Kỹ ùn mén ter ja fi vỹ tá jun mũ gé sir. Tỹ nén ù tũ fi tóg nĩ, hã ra fi tóg jãnkamy kãsir régre vin mũ, Topẽ mỹ.

³ Kỹ Jesus tóg fi to: “ve ra ha,” he mũ. “Ûn rico tỹ vin kãfór han fi tóg, fi tũ sĩ (hã) ra. Tỹ nén ù tũ fi tóg nĩ, fi mén vỹ hur ter.

⁴ Kỹ fi tóg ã tũ vin kãn ja nĩ, fi jën mré hã. Jãvo ùn rico ag vỹ ãjag tũ ke hã tỹ Topẽ mỹ vin mág tĩ. Hã ki fi tóg ag tỹ nĩm kãfór han, fi tỹ nĩm sĩ pẽ han mũ ra. Ki hã sóg tó mũ mỹr,” he tóg, Jesus ti.

Topẽ jo ãn kókén kỹ nĩnh ke
(Mt 24.1-2; Mc 13.1-2)

⁵ Ën kã ù ag tóg Topẽ jo ãn to vỹ há han mũ. “Sĩnvĩ pẽ ti jẽ,” he ag tóg mũ. “Ti pó ve ra ha, mág ti nỹtĩ. Ti sĩnvĩ han jafã vỹ e nỹtĩ gé,” he ag tóg.

⁶ Kỹ Jesus tóg ke mũ. “Mỹ ãjag mỹ sĩ?” he tóg. “Kejën tóg kókén kãn kỹ nỹnh mũ, ha vemnĩ, kỹ pó vỹ jagnẽ kri nỹtĩ mãn ke tũ nĩ ha. Gũm ke kãn jé tóg ke mũ, tag ti,” he tóg, Jesus ti.

Vënh jagãgtar to rã
(Mt 24.3-14; Mc 13.3-13)

⁷ Kỹ ag tóg ãg Senhor ti mỹ: “kurã tỹ ne kã ke nẽ hỹn’?” he mũ. “Ëg hỹn hën ri ken kỹ ti kurã ki kanhró nỹtĩnh mũ hỹn’? Topẽ hỹn ne han ke mũ, ãg tỹ kurã ãn ki kanhró nỹtĩ jé?” he ag tóg.

⁸ Kỹ tóg ag mỹ: “ker ù vỹ jëmẽ hẽ,” he mũ. “Û tỹ hën ri ke ag vỹ inh jiji tó kãmũnh mũ. “Cristo vỹ tỹ inh nĩ,” he jé ag tóg ke mũ. “Inh kurã vỹ hur jun,” he jé ag tóg ke mũ. Ag nón mũ tũg nĩ.

⁹ Vënh génh mëgmë jé ãjag tóg ke mũ, jagnẽ kato vãsãnsãn mũ ag. Kamëg tũg nĩ hã ra. Vënh génh tỹ hën ri ke han jé ag tóg ke mũ, kurã tỹ ãgno to hã. Ti kurã kã ke pijé,” he tóg.

¹⁰ Kỹ tóg ag mỹ: “povo ag tỹ jagnẽ kato vãsãnsãn ke vë, pã'i krëm ke ag tỹ pã'i ù krëm ke ag to jũnh ke vë,” he mũ.

¹¹ “Ga tỹ ragrag ke jagy tỹ hën ri ke han ke vë gé, ãn kã. Kỹ vëjën tóg tũ' henh ke mũ gé. Vënh kaga kórég (ka)më vỹ vënh vinven ke mũ, ãn kã sir. Nén ù vënhmỹ vỹ vënh vinven ke mũ gé, kanhkã tá, kỹ vënh kar vỹ kanë junjur ke mũ,” he tóg, Jesus ti.

¹² “Tag to hã ag tóg ãjag sigsenh ke mũ gé, ãjag vóg kónãn jé ag tóg ke mũ gé, vënh kanhrãn jafã krëm ag tóg ãjag jykre vigvenh ke mũ gé, vënh se ja kãki ag tóg ãjag vin ke mũ gé. Pã'i mág tỹ rei ag mỹ ag tóg ãjag venven ke mũ, pã'i tỹ governador ag mỹ ke gé, ãjag tỹ inh jyjy tó ja tugnĩn.

13 Ājag tỹ inh vĩ tó jé, hã jé ag tóg ājag tỹ genh ke mũ.

14 Ēn kã ājag tỹ nén ù tónh ke to jykrén tũg nĩ, to krĩ kufy han tũg nĩ gé.

15 Inh hã vĩ ājag vĩ han ke mũ, inh jykre nĩm jé sóg ke mũ ājag mỹ, ājag tỹ ag mỹ tón jé," he tóg. "Kỹ ag tỹ ājag vĩ kafãn sór mũ ra tóg ag mỹ vẽnhmỹ tĩnh mũ, ha vemnĩ, ājag kato tẽgtẽ mũ ag mỹ. Ag tỹ ne tónh ke tóg tũ tĩnh mũ, ha vemnĩ," he tóg, Jesus ti.

16 "Ēn kã ājag han mũ ěn vĩ ājag senh mũ, ājag mré pafa mũ ag ke gé, ājag mré ke ag ke gé, ājag to há kar ag mỹr," he tóg. "Ājag kãmĩ ù ag kãgtén jé ag tóg ke mũ gé, ha vemnĩ.

17 Vẽn kar vĩ ājag to kórég tãvĩ nỹtĩnh mũ, inh jiji tugrĩn.

18 Hã ra ājag véké vẽnỹrénh ke tũ nĩ, ājag gãnh pir vĩ fagrĩnh mỹ kutẽnh ke tũ nĩ, ha vemnĩ.

19 To tar nỹtĩmnĩ, ājag vẽnỹrénh ke to, kỹ ājag tóg rĩr krỹg ja tũ ěn venh ke mũ," he tóg, Jesus ti.

Jerusalém kókén kỹ nỹnh ke (Mt 24.15-21; Mc 13.14-19)

20 "Kejẽn ag tóg Jerusalém jy nỹtĩnh mũ, soldado ag, ag tỹ cidade ěn kókén jé. Ājag tỹ tag ve kỹ ājag tóg ki kanhró nỹtĩnh mũ. Ag tỹ ti kókén kãn ke kurã ěn kã.

21 Kỹ vẽn pigju mũmnĩ, pãnónh ra, ājag tỹ Judéia ki nỹtĩn kỹ. Ājag tỹ cidade mág tá nỹtĩn kỹ pétigtẽmnĩ, vãn kãra. Ājag tỹ vãn kãmĩ ěmã kãsir ki nỹtĩn kỹ cidade ra mũ tũg nĩ.

22 Topẽ tỹ ag vóg kónãn ke kurã vẽn sir, ag jykre kórég to, hã kỹ tóg vãsỹ rán kỹ nĩ. Vẽn rá ěn ve jé ājag tóg ke mũ, kurã ěn kã.

23 Kỹ ùn kufy fag vĩ vẽnỹrénh mág ke mũ, kurã ěn kã, gĩr pygfãm mũ fag ke gé. Ēprã ke ag vẽnỹrénh mág tãvĩ han ke vẽn, Topẽ tỹ povo tag to jũ jagy han ke vẽn, kurã ěn kã.

24 Ājag kãmĩ ùn e tãvĩ kãgter ke vẽn, rógro tỹ. Kỹ ājag kãmĩ ù ag vĩ sigse kỹ mũnh mũ, povo kar kãmĩ. Kỹ Jerusalém vĩ kókén kãn kỹ nĩnh ke mũ. Fóg ag vĩ sãnsãn ke mũ, ājag cidade mág ti. Kejẽn fóg ag tỹ tũ' henh ke kurã vĩ jun ke mũ gé hã ra," he tóg, Jesus ti.

Topẽ kósın kãtĩg mãn ke (Mt 24.29-31; Mc 13.24-27)

25 "Kurã ěn kã rã vẽnhmỹn ke vẽn, kysã ti ke gé, krĩg ti ke gé. Kỹ ga kri mũ ag vĩ kamẽgmẽg kãn ke mũ. Kanẽ junjur mág jé ag tóg ke mũ, povo kar ěn ag. Kỹ goj vĩ krém ke mũ, goj kafã tũ vĩ jũnh ke mũ, ti kurã jun kỹ.

26 Kỹ ěprã ke ag fe vĩ vo kónãn ke mũ, ag tỹ jũrũn ke vĩ ag kãgtén ke mũ, ag tỹ ājag tỹ nén venh ke to jũrũn ken kỹ. Ēg tỹ kanhkã tá nén vég tũ kar ěn vĩ ragrag ke kãn mũ mỹr, ha mẽ.

27 Kỹ vãnã vẽn kar vĩ ti kãtĩg ěn venh ke mũ, ěprã ke fi kósın ěn ti. Kanhkã góg kãmĩ sóg kãtĩg ke mũ vãnã sir. Inh ve vĩ tar nĩnh mũ, inh kãtĩg mãn kỹ. Kókov kãtĩg jé sóg ke mũ vãnã sir," he tóg, Jesus ti.

Ka tỹ figueira to comparação

(Mt 24.32-35; Mc 13.28-31)

28 “Ājag tỹ isỹ ājag mỹ nén tó mũ ěn ve sí han kỹ ājag kanē nĩm nĩ, ājag krĩ ti ke gé, ti tỹ ājag mỹ sér gy tĩn kỹ. Isỹ ājag krenkren han ken vē ha, isỹ kurā ěn hā kā jun kỹ,” he tóg.

29 Kỹ tóg ag mỹ: “inh kãtĩg mãn ke vỹ ge nỹnh mũ, ha mẽ,” he mũ. “Ka tỹ figueira to ki kanhrãn nĩ, ka ũ to ke gé, to comparação han kỹ,” he tóg.

30 “Ti pẽ tánh kỹ, ti féj tãg han kỹ tóg kakó tĩ sir, ěkré tygtánh kurā ti.

31 Ěn ri ke ti nĩ, ājag tỹ inh kãtĩg mãn ke kurā ki kanhró nỹtĩ ti. Ājag tỹ sỹ ājag mỹ nén tó ja ěn ve kỹ tóg kakó tãvĩ tĩ ha, inh kãtĩg ke ti,” he tóg. “Ěn kã Topẽ tỹ tỹ ěg pã'i nĩ kenh ke vē sir.

32 Sỹ ke há vē, hã kỹ sóg tag tó mũ, ha mẽ. Ũ tỹ nén kar ěn vég mũ ag vỹ inh kãtĩg mãn ke tag venh ke mũ, ũri, ag kãgter ke to hã,” he tóg.

33 “Kanhkã vỹ tũ' he mũ, ga ti ke gé. Jãvo inh vỹ vỹ tũ' henh ke tũ nĩ,” he tóg, Jesus ti.

Ěg tỹ vẽnħ ki ěmẽnħ ke

34 “Vẽnħ ki ěmẽ, ājag tỹ vějẽn e to nug kaga tũ nĩ jé, tógá nĩnh to, ājag tỹ kronkron to krĩ vẽnħmỹ tũ nĩ jé gé. Kỹ vějẽn to krĩ kufy han tũg nĩ gé, kur to, tag ki nén ũ kar to. Ke tũ nĩ mũ ra kurā ěn vỹ ājag vatánh tá jun ke mũ, inh kãtĩg mãn ke kurā ěn ti.

35 Ājag tỹ to vẽnħ kãn kỹ nỹtĩ tũ nĩn kỹ tóg ājag mỹ sēsĩ tỹ

ěgje ki kutẽ ri ke nĩ. Vẽnħ vatánh tá tóg ki kutẽ tĩ, jēsĩ ti. Ge ti nĩnh mũ, inh kãtĩg mãn ke ti, ga kri mũ ag kar mỹ. Ag vatánh tá sóg jun ke mũ.

36 Hã kỹ ājag kanē nĩm nĩ, nũr sór tũg nĩ. Inh kãtĩg kã jatu to ken hã vē, hã vỹ: nũr, he mũ. Topẽ mrẽ vĩ tovãnh tũg nĩ, ājag tar nỹtĩ jé, nén ũ jagy ěn ve kỹ. Kỹ ājag tóg ěprã ke fi kósin rĩnja tá jẽnħ ke mũ sir, mỹ'ãg tũ nĩn kỹ, isỹ vẽnħ kar jykre tugnỹm kurā ěn kã,” he tóg, Jesus ti. Ti tỹ ag mỹ kurā tỹ ěgno kãmén hã vē.

37 Hã ki tóg kurā kar ki Topẽ jo ĩn krẽm ag kanhrãnran tĩ, Jesus ti. Kutyg kỹ tóg cidade tá kãkutẽ kỹ pãnónh ra tĩ tĩ, tá nũr jé. To ag tóg: Oliveiras, he tĩ, pãnónh ěn to.

38 Ti tỹ kusã ki Topẽ jo ĩn tá jun kỹ ag tóg tá ti vỹ jēmẽnħ kãmũ tĩ, ũ tỹ hẽn ri ke ag.

22

Ag tỹ Jesus se sór

(Mt 26.1-5; Mc 14.1-2; Jo 11.45-53)

1 Ěn kã festa tóg kakó tĩ sir. Festa ěn ki ag tóg pão ũ ko tĩ, hã ra tóg jãgia tũ ja nĩgtĩ. Festa ěn jijin hã vỹ: Páscoa, he mũ.

2 Kỹ Topẽ tũ ki rĩr tĩ to pã'i ag vỹ Jesus to jykrén mũ. Ag tỹ ti tén sór vē. Topẽ vĩ to professor ag vỹ ti tén sór mũ gé. Hã ra ag tóg povo kamẽg mũ, kỹ ag tóg to jykrén kỹ nỹtĩ nĩ.

Judas tỹ pã'i ag mỹ Jesus ven sór

(Mt 26.14-16; Mc 14.10-11)

³ Ën kã Judas ãn, ù tỹ Iscariotes he mũ ãn vỹ jagrẽ vэг mũ sir, Satanás tỹ. Hã ra tóg tỹ ù tỹ 12 (ke) ag kã ù nĩ, Jesus tỹ ùn vin mũ ag kã ù vỹ tỹ ti nĩ.

⁴ Ti tỹ Satanás tỹ jagrẽ nĩn kỹ tóg Topẽ tũ ki rĩr tĩ to pã'i ag venh tĩ mũ sir, soldado to pã'i ag ke gé. Ti tỹ ag mũ Jesus ven sór vẽ, ag tỹ ti se jé.

Kỹ tóg tá jun kỹ ag mũ tó mũ.

⁵ Kỹ tóg ag mũ sér pẽ tĩ sir. Kỹ ag tóg ti mũ jãnkamy tó mũ. Ag tỹ ti mũ vin sór vẽ, ti tỹ ag mũ Jesus ven kar kỹ.

⁶ Kỹ tóg ag mũ: “hej,” he mũ sir. Kỹ tóg to jykrén mũ, ti tỹ ã mũ ki króm ke to, ag mũ: “ha ti kãgmĩ ha,” he jé, Judas ti. Ag tỹ vãnh kar vatánh tá ti se sór vẽ. Hã kỹ Judas tóg ti tó sór mũ.

Pedro tỹ João mré festa tỹ Páscoa han

(Mt 26.17-25; Mc 14.12-21; Jo 13.21-30)

⁷ Kỹ tóg pão jãgja tũ ãn konh ke kurã tá krỹg mũ sir. Kurã ãn ki ag tóg mé tãg tãnh tĩ, ovelha tãg ãn, ag tỹ kurã tỹ Páscoa kã ko tĩ ãn.

⁸ Kỹ Jesus tóg Pedro jẽnẽg mũ sir, João mré. Kỹ tóg ag mũ: “ha mũjẽg, mé tãnh jé, ovelha ãn, ãg tỹ kon jé,” he mũ.

⁹ Kỹ ag tóg ti mũ: “ẽg hẽ tá ti tãnh mũ hỹn'?” he mũ.

¹⁰ Kỹ tóg ag mũ: “ha vé,” he mũ. “Ëmã mág tag ra mũjẽg. Tá ãjag tóg ù venh mũ. Goj vyn kỹ tóg tĩ mũ. Ën nón mũmnĩ. Kỹ ti ãn tá junjun kỹ ti nón gemnĩ.

¹¹ Kỹ ãn ki rĩr tĩ mũ: “ẽg Senhor vỹ ã mũ vãnh vỹ jẽnẽg mũ,” hemnĩ. “Inh hỹn hẽ tá ovelha konh ke mũ, inh mré mũ tĩ ag mré?” he ti, ãg Senhor ti,” hemnĩ. “Mỹ ki vãnh kánkán jafã tũ?” hemnĩ.

¹² Kỹ tóg ãjag mũ ven ke mũ sir, kroggrog tỹ kynhmỹ nỹ ãn ti, assoalho tỹ kynhmỹ nỹ ãn ti. Éhé ti nĩ, kỹ mesa to nỹtĩ jafã vỹ tá nỹtĩ gé. Ën tá ti kãn nĩ ãg mũ,” he tóg, Jesus ti.

¹³ Kỹ ag tóg mũ mũ sir. Jesus tỹ ag mũ tó ja ãn ve kãn ag tóg mũ, kỹ ag tóg mé tãnh mũ sir, tá.

Santa Ceia

(Mt 26.26-30; Mc 14.22-26; 1Co 11.23-25)

¹⁴ Kỹ tóg ag tỹ konh ke hora tá krỹg mũ sir. Kỹ Jesus tóg tá nĩ nĩ, ti tỹ ùn vin ja ag mré hã, apóstolo ãn ag.

¹⁵ Kỹ tóg ag mũ vēmén mũ sir. “Sỹ ovelha tag konh ha pẽ tóg tĩ vẽ ãjag mré,” he tóg. “Sỹ ãn vỹ ãn vỹ ãn ke to hã ãjag mré ko sór ja vẽ,” he tóg, Jesus ti, ã mré mũ tĩ ag mũ.

¹⁶ “Ti ko mãn ke tũ ãn nĩ ha, ha vemnĩ. Topẽ tỹ tỹ ãg pã'i nĩ vỹ vãnh ven ke mũ. Ti tỹ vãnh ven ja ãn kã sóg ko mãn ke mũ, kejẽn,” he tóg.

¹⁷ Kỹ tóg copa mãg mũ sir. To tóg Topẽ mré vỹ mũ, kỹ tóg ag mũ: “ha kron,” he mũ. “Ha vãnh kãpãm,” he tóg.

¹⁸ “Tag kron mãn ke tũ ãn nĩ ha, ke gé, ha vemnĩ. Topẽ tỹ tỹ ãg pã'i ãn ãn kãn kãn kãn ke mũ, ha vemnĩ,” he tóg.

19 Kÿ tóg ěmĩ mǎg mũ sir. To tóg Topě mré vĩ mũ. Kupãn kÿ tóg ag mÿ vĕnh pipin mũ. Kÿ tóg ag mÿ: “inh hã vĕ,” he mũ. “Ājag jagfÿ sóg vĕnh fĕg ke mũ. Kÿ inh mĩ ěkrén nĩ, ājag tÿ pǎo tag konh ken kÿ,” he tóg, Jesus ti.

20 Ag tÿ ko kar kÿ tóg copa mǎg mũ gé. Kÿ tóg ag mÿ: “copa ki jĕ tag vÿ inh kyvénh ri ke nĩ,” he mũ. “Ājag jagfÿ tóg inh ki kākutĕnh mũ, inh kyvénh ti. Inh jykre tǎg to ken hã vĕ, isÿ inh kyvénh tigrĩn ājag mÿ vĕnh pǎte fón jé,” he tóg.

21 “Hã ra ājag kāmĩ ũ tóg inh vatánh tá isónh ke mũ, inh kato tĕ ag mÿ. Inh mré tóg mesa tag to nĩ nĩ.

22 Tĩg jé sóg ke mũ, sÿ tÿ ěprǎ ke fi kósin nĩn kÿ. Vǎsÿ Topě tóg to jykrén ja nĩ, hã kÿ sóg tĩ mũ. Hã ra ũ tÿ isónh ke ěn mÿ tóg vĩ kónǎn tǎvĩ han ke mũ, Topě ti,” he tóg.

23 Kÿ ag tóg jagnĕ mÿ ke mũ. “Ěg kāmĩ ũ tÿ hĕ nĕ hÿn’?” he ag tóg mũ sir jagnĕ mÿ, ũ tÿ ti tónh ke ěn to.

Ū tÿ hĕ nĕ tÿ ũn mág nĩ

24 Ěn kǎ ag tóg jagnĕ kǎfór nĩ sór mũ. Hã kÿ ag tóg jagnĕ to jũ mũ.

25 Kÿ Jesus tóg ag mÿ ke mũ. “Fóg ag pǎ'i ag vÿ ājag krĕm ke ag mÿ vĩ tar han tĩ, kÿ ag tóg ag kri ke ag mÿ: “ĕg jóg,” he tĩ, ag tÿ ag mÿ vĩ tar han mũ ra.

26 Ag ri ke han tũg nĩ. Ājag mÿ tÿ ũn mág nÿtĩ sór mũ? Kÿ tÿ ũn kǎsir ri ke nÿtĩmnĩ jagnĕ mré,” he tóg, Jesus ti. “Ū tÿ

inh jykre ki tÿ pǎ'i nĩn kÿ tóg Ā krĕm ke ag camarada ri ke nĩnh ke mũ, ag ki rĩr kÿ.

27 Kejĕn ĕg tóg mesa to nÿtĩ, kÿ ũ tóg mesa ki rĩr tĩgtĩ. Ū tÿ hĕ nÿ hÿn mesa ki rĩr tĩ? Ag patrǎo mÿ', ti camarada mÿ vó? Ti camarada vÿ ki rĩr tĩgtĩ. Jo sóg ājag ki rĩr tĩgtĩ, ājag camarada ri ke.

28 Ājag hã ne inh mré mũgtĩ'. Isovǎnh ja tũ pĕ ājag tóg nÿtĩ. Isÿ nén ũ jagy vég mũ ěn ve kǎn ājag tóg tĩ, inh mré.

29 Inh panh vÿ isÿ pǎ'i han ke mũ, kÿ sóg ājag tÿ pǎ'i han ke mũ gé, ti tÿ isÿ pǎ'i han kóm,

30 ājag tÿ inh mré jĕn jé tá, inh mré kron jé tá, isÿ tÿ pǎ'i nĩn kÿ. Kÿ ājag tóg ājag nĩgja kri nĩgnĩ kÿ nÿtĩnh mũ, ājag tÿ povo tÿ Israel ag jykre vigve jé, povo tÿ 12 (ke) ěn ag,” he tóg, Jesus ti.

Jesus tÿ Pedro mÿ tó
(Mt 26.31-35; Mc 14.27-31;
Jo 13.36-38)

31 Kÿ ĕg Senhor vÿ Pedro mÿ: “Simǎo', Simǎo',” he mũ. “Ha vé, Satanás vÿ ājag to vĩ, Topě mÿ. Ti tÿ ājag jykre ve sór vĕ. Trigo tÿ ĕg tóg gren ki kākag tĩ, ĕg tÿ ti fár pan jé. Ěn ri ke han jé tóg ke mũ, ājag tÿ, Satanás ti.

32 Hã ra sóg hur Ā jagfÿ vĩ, Ā tÿ inh ki rǎ tovǎnh pĕ han tũ nĩ jé. Kÿ Ā tóg kejĕn Ā jykre to jykrén mǎn ke mũ, Ā tÿ inh jykre hã han jé. Ěn kǎ Ā tóg Ā mré ke ag jyvĕn kÿ ag tÿ tar' he mũ.

33 Hã ra Pedro tóg ti mý: “Senhor,” he mũ. “Ã mré sóg se ký jênh mũ, ã mré sóg ter ke mũ gé,” he tóg.

34 Hã ra Jesus tóg Pedro mý: “vó,” he mũ. “Ha vé, ùri ã tóg iso: “ti ki kagtíg sóg nĩ,” he tãgtũ han ke mũ, galo kyr to hã, ha vemnĩ,” he tóg mũ, Jesus ti.

Jesus tỹ ã mré mũ tĩ ag mý tó

35 Ký tóg ag kar mý: “ãjag jêgnê ja inh nĩ, vãsỹ,” he mũ. “Kỹ ãjag tóg nén ù ma mũ ja tũ nĩgtĩ, sacco tũ, bolsa tũ, pên né tũ, pên to ró ên. Ên kã ãjag mý jagãgtar ja nỹtĩgtĩ?” he tóg. Ký ag tóg ti mý: “vó,” he mũ.

36 Ký tóg ag mý: “hã ra tóg ùri ke tũ nĩgtĩ,” he mũ. “Hã ký ãjag jãnkamy ma mũjêg, ãjag sacon ma mũjêg, ãjag bolsa ma mũjêg. ãjag tỹ nén ù tũ nỹtĩn ký ãjag kur vender hemnĩ, rógro kajãm jé sir.

37 Nén ù tóg iso rán ký nĩ, hã vỹ: ag mý tóg tỹ ùn jykre pãno nĩ, he mũ. Sỹ vãhã tag venh ke vê ha. Isỹ iso nén rán ký nĩ ên ve kãn ke vê ha, vãhã,” he tóg, Jesus ti.

38 Ký ag tóg ti mý: “Senhor,” he mũ. “Rógro régre vỹ ki nỹtĩ,” he ag tóg mũ. Hã ra tóg ag mý: “gen ký,” he mũ.

Jesus tỹ ã panh mré vĩ
(Mt 26.36-46; Mc 14.32-42)

39 Ký tóg ã tỹ tĩ jafã ra tĩ mũ sir, hã vỹ: pãnónh tỹ Oliveira, he mũ ên ra. Ti mré mũ tĩ ag vỹ ti nón mũ mũ sir.

40 Tá jun ký tóg ag mý: “Topê mré vĩ, ãjag tỹ ti vĩ

mranh tũ nĩ jé, ãjag tỹ nén ù jagy ve ký,” he mũ, Jesus ti, ã mré mũ tĩ ag mý.

41 Ký tóg tĩg sĩ han mũ, ký tóg ã jakrĩ tỹ jêg mũ. Ký tóg Topê mré vĩ mũ sir.

42 Ký tóg: “panh’,” he mũ. “Mỹ ã tỹ inh vêsỹrenh ke tag tỹ tũ’ he mũ jãvãnh? Hã ra isỹ ã mý nén to vĩ mũ tag han tũg nĩ. ã tỹ nén han ke mũ ên hã han nĩ,” he tóg, Jesus ti, Topê mý.

43 Ký Topê tỹ jêñê jafã ù vỹ ti mý vênh ven mũ sir, kankã tá, ký tóg ti tar han mũ.

44 Hã ra tóg ã ter ke to kanê jur mũ, ký tóg Topê mré vĩ mãn’, vĩ mãn’, he mũ. Ký ti kãrãn vỹ kyvénh nĩ sir, ký tóg ga kri vênh kugjêg mũ.

45 Ký tóg Topê mré vĩ kar ã mré mũ tĩ ag to kãtĩ mũ. Hã ra ag tóg nũgnũr nỹtĩ nĩ. Krónh’ krónh’ he ja ag tóg nĩ, ag fe kaj tigrĩn.

46 Ký tóg ag mý: “ãjag ne tóg nũgnũr nỹtĩ nĩ,” he mũ. “Nĩgnĩ ra, Topê mré vĩ, ãjag tỹ ti vĩ mranh tũ nĩ jé, ãjag tỹ nén ù jagy ve ký,” he tóg, ti mré mũ tĩ ag mý.

Ag tỹ Jesus se
(Mt 26.47-56; Mc 14.43-50; Jo 18.3-11)

47 Ti tỹ ver tỹ vêmén jê ra ag tóg junjun mũ sir, Judas mré hã, ù tỹ 12 (ke) ag kã ù ên ti. Ti tỹ ag tatĩn kãtĩg hã vê, ù tỹ ti senh ke mũ ag. Û tỹ ag jo tĩ mũ ên tóg sir Jesus to grên ke ký ti ki nhun ke mũ.

48 Ký Jesus tóg ti mý: “Judas’,” he mũ. “Ã ne tóg inh ki nhun ke ký iso: “ti hã vê,” he

mũ', inh kato tẽ ag mỹ, inh, hã vỹ: ãprã ke fi kósin, he mũ," he tóg, Jesus ti.

⁴⁹ Kĩ ti mré mũ ag tóg ag tỹ ti senh ke vég mũ. Kĩ ag tóg ti mỹ: "Senhor'," he mũ. "Ëg mỹ rógro tỹ ag fynh ke tũ'?" he ag tóg.

⁵⁰ Kĩ ag kã ù tóg polícia ù fynh mũ, ti nĩgrẽg tỹ rãm ke tóg mũ, ti pẽgja tá. Topẽ tũ ki rĩr tĩ to pã'i krẽm ke ù vẽ, polícia ãn ti.

⁵¹ Hã ra Jesus tóg ag mỹ: "ag vóg tũg ra, há ti nĩ," he mũ. Kĩ tóg ti nĩgrẽg mãn kũ to tỹ grẽn ke mũ sir.

⁵² Kĩ Jesus vỹ pã'i ag mré vēmén mũ, Topẽ tũ ki rĩr tĩ to pã'i ag mré, Topẽ jo ãn ki rĩr tĩ to pã'i ag mré ke gé, kófa ag mré ke gé. Ag kar vỹ ti se kãmũ mũ. Kĩ tóg ag mỹ: "ãjag ne tóg rógro génh kũ iso kãmũ mũ', ka kyv génh kũ ke gé," he mũ. "Inh pi(jé) tỹ bandido nĩ," he tóg.

⁵³ "Kurã kar ki sóg Topẽ jo ãn krẽm ãjag mré nĩ ja nĩgtĩ, hã ra ãjag tóg tá ise sór ja tũ nĩ, ãjag tỹ ag kamẽg kũ," he tóg. "Hã ra tóg ùri jun, ãjag kurã ti, Japo tỹ ã tỹ nén han sór tĩ ãn han jé, ãjag tỹ. Jykre ki kuty ti nĩ, Japo ti," he tóg, Jesus ti.

Pedro tỹ Jesus to ón

(Mt 26.57-58, 69-75; Mc 14.53-54, 66-72; Jo 18.12-18, 25-27)

⁵⁴ Kĩ ag tóg ti ség mũ sir. Ag tỹ ti péré mũ kũ ag tóg Topẽ tũ ki rĩr tĩ to pã'i mág ãn tá junjun mũ sir.

Hã ra Pedro vỹ kuvar há tá ag nón tĩ mũ.

⁵⁵ Ìn vãso tá ag tóg pĩ grug mũ, soldado ag, kũ ag tóg tugtón nỹtĩ nĩ. Kĩ Pedro vỹ ag mré tón nĩ nĩ sir.

⁵⁶ Kĩ pã'i camarada ù fi vỹ tá ti vég mũ, pĩ grun ki. Kĩ fi tóg ti tugnỹm mũ. Kĩ fi tóg ag mỹ: "ti mré tĩ ù vẽ inh mỹ'," he mũ.

⁵⁷ Hã ra Pedro tóg: "vó," he mũ. "Ti ki kagtĩg sóg nĩ, jỹ," he tóg.

⁵⁸ Kar kũ ù tóg ti tugnỹm mũ gé, kũ tóg ti mỹ: "ag kã ù vỹ tỹ ã nĩ," he mũ. Hã ra Pedro tóg ti mỹ: "inh hã tũ vẽ, vỹ," he mũ gé.

⁵⁹ Tag kar kũ, hora pir tũg kũ hẽn ri ke mũn ù tóg ti tugnỹm mũ gé. Kĩ tóg tá nỹtĩ ag mỹ: "ha vé, Galiléia tá ke vỹ tỹ ti nĩ," he mũ. "Inh mỹ tóg tỹ ti mré ke nĩ," he tóg mũ gé sir.

⁶⁰ Hã ra Pedro tóg ti mỹ: "inh pi(jé) ti ki kanhró nĩ, vỹ'," he mũ. "Ã tỹ ne tó nẽ?" he tóg mũ sir. Ti tỹ ver tó nĩ ra galo vỹ kyr mũ.

⁶¹ Kĩ ãg Senhor vỹ vēsỹjãm ãvãnh kũ Pedro tugnỹm mũ. Kĩ Pedro vỹ to jykrén mũ sir, ãg Senhor tỹ ti mỹ nén tó ja to, hã vỹ: "iso ã tóg: "ti ki kagtĩg sóg nĩ," he tãgtũ han ke mũ, galo kyr to hã," he ja ãn mũ.

⁶² Kĩ Pedro vỹ tá kãkutẽ mũ, kũ tóg fỹ mág han mũ sir.

Ag tỹ Jesus vóg kónãn

(Mt 26.67-68; Mc 14.65)

⁶³ Kĩ ù tỹ Jesus ség mũ ag vỹ ti to é he mũ sir. Ti tãnh ag tóg mũ gé sir.

⁶⁴ Ti kanẽ pãg kũ ag tóg ti kakã ki tãnh kũ ti mỹ: "ù nỹ ã tãnh?" he mũ. "Ã tỹ nén

kar ki kanhró nĩn kŷ ã hŷn ki kanhró nĩ,” he ag tóg ti mŷ.

⁶⁵ Gen kŷ ag tóg ti mŷ vĩ kónãn tŷ hên ri ke han mũ, ti to é he kŷ.

Pã'i ag tŷ Jesus ki jẽmẽ

(Mt 26.59-66; Mc 14.55-64; Jo 18.19-24)

⁶⁶ Tŷ vaj kŷ kófa kar ag tóg vẽn ĩn mũ, Topẽ tũ ki rĩr tĩ to pã'i ag mré hã, Topẽ vĩ to professor ag mré hã. Ag vẽn ĩn mũ kŷ ag tóg ti jé prêr kŷ ag rĩnja tá ti fêg mũ sir, ag tŷ ón kŷ ti jykre ve jé. Ag tŷ ti tén sór vẽn, hã ra ag tóg ón kŷ ti jykre ve vén sór mũ.

⁶⁷ Hã kŷ ag tóg ti mŷ: “ã mŷ tŷ Cristo nĩ?” he mũ. “Ha êg mŷ tó,” he ag tóg. Kŷ tóg ag mŷ: “ãjag pi(jé) inh vĩ kri fig tĩ', isŷ ãjag mŷ tó tĩ (hã) ra',” he mũ.

⁶⁸ “Isŷ ãjag ki jẽmẽ sór mũ ra ãjag tóg inh mŷ tó tũ nĩ gé. Kŷ ãjag tóg isovãnh tũ nĩ gé,” he tóg.

⁶⁹ “Hã kŷ êprã ke fi kósin vŷ Topẽ pẽgja tá nĩnh ke mũ ha. Topẽ vŷ tar nĩ. Sŷ ti pẽgja tá nĩnh ken vẽn ha,” he tóg.

⁷⁰ Kŷ ag tóg ti mŷ ke kãn mũ. “Kŷ ã mŷ tŷ Topẽ kósin nĩ?” he ag tóg mũ ti mŷ. Kŷ tóg ag mŷ: “ki hã ãjag tóg tó mũ,” he mũ. “Inh hã vẽn,” he tóg ag mŷ, Jesus ti.

⁷¹ Kŷ ag tóg: “ti kato vĩ ù jẽmẽ ĩn ke tũ êg nĩ ha,” he mũ, jagnẽ mŷ. “Ti jẽnky ki kutẽ mẽ êg tóg huri. Topẽ to vĩ kónãn ti huri. Ti ter ke vẽn,” he ag tóg mũ sir, pã'i ag, Jesus to.

23

Pilatos tŷ Jesus ki jẽmẽ

(Mt 27.1-2, 11-14; Mc 15.1-5; Jo 18.28-38)

¹ Hã ra tá ke kar ag vŷ Jesus pére mũ mũ, fóg tŷ pã'i tŷ Pilatos mŷ.

² Tá ag tóg ti kato vĩ mũ sir, kŷ ag tóg Pilatos mŷ: “vẽn ĩn kar krĩn kónãn han tóg tĩ, ag tŷ vẽn ĩn jykre há tovãnh jé,” he mũ. “Kŷ tóg ag mŷ: “pã'i mág tŷ imperador mŷ imposto nĩn tũg nĩ,” he tĩ gé. Kŷ tóg vẽnso: “tŷ inh Cristo nĩ, pã'i mág tŷ rei ti,” he tĩ gé,” he ag tóg mũ, Jesus to.

³ Kŷ Pilatos tóg ti mŷ: “ã mŷ tŷ Judeu ag pã'i tŷ rei nĩ?” he mũ. Kŷ tóg ti mŷ: “ki hã ã tóg tó mũ,” he mũ, Jesus ti.

⁴ Kŷ Pilatos vŷ ag mŷ kãmén mũ, Topẽ tũ ki rĩr tĩ to pã'i ag mŷ, povo kar mŷ ke gé, kŷ tóg: “ti tŷ nén ù kórég han ja vég tũ sóg nĩ, ti ki,” he mũ.

⁵ Hã ra ag tóg ti tovãnh jãvãnh pẽ nŷtĩ. Kŷ ag tóg ti mŷ: “hã ra tóg vẽn ĩn kar krĩ rŷg tŷgtĩ,” he mũ. “Ga tŷ Judéia kar mĩ tóg tŷg ja nĩ, ga tŷ Galiléia mĩ ke gé, tag mĩ ke gé. Tŷg kŷ tóg vẽn ĩn kar krĩn kónãn tĩ,” he ag tóg ti mŷ, pã'i ag.

Herodes tŷ Jesus ki jẽmẽ

⁶ Kŷ Pilatos vŷ ga tŷ Galiléia tag to jykren mũ, kŷ tóg: “ti mŷ tŷ Galiléia tá ke nĩ?” he mũ.

⁷ Kŷ ag tóg ti mŷ: “hŷ,” he mũ. Hã ra Herodes vŷ tŷ ga tŷ Galiléia tá pã'i mág nĩ. Hã kŷ Pilatos tóg ti hã mŷ ti jẽnẽg mũ. Ên kã tóg Jerusalém tá nĩ gé, Herodes ti.

⁸ Kĩ tóg Herodes tá jun mũ sir. Ti tỹ ti ve kĩ tóg ti mũ sér tĩ. Ti tỹ ti ve sór ja vễ. Ti kãme mẽ ja tóg nĩ, hã kĩ tóg ti ve sór ja nĩgtĩ, Herodes ti. “Hễn ri ke mũn tóg nén ù han vãnh han ke mũ, sỹ ve jé,” he tóg.

⁹ Jesus tỹ ti ki jun kĩ Herodes tóg ti ki jẽmẽ sór mũ, nén tỹ hễn ri ke ki, hã ra tóg ti mũ vĩ tũg mũ.

¹⁰ Hã ra pã'i ag vĩ tá nỹtĩ nĩ, kĩ ag tóg ti kato vĩ mág han mũ sir, Topẽ vĩ to professor ag ke gé. Hã ra Jesus tóg ag mũ vĩ tũg mũ gé.

¹¹ Kĩ Herodes vĩ ti to é he mũ gé, ti mré ke kar ag ke gé, kĩ ag tóg ti nyg mũ sir. Kur kupri pẽ tỹ tóg ti kri fón mũ, ón kĩ. Kĩ tóg Pilatos mũ ti jẽnẽ mãn mũ sir.

¹² Kurã ên kã Pilatos vĩ Herodes mũ vĩ há han mũ. Jagnẽ to há' he mãn ag tóg mũ ha. Ag tỹ Jesus ve jo ag tóg jagnẽ kato tẽ ja nĩgtĩ.

Ag tỹ Jesus tén sór

(Mt 27.15-26; Mc 15.6-15; Jo 18.39-19.6)

¹³ Kĩ Pilatos vĩ Topẽ tũ ki rĩr tĩ to pã'i ag jé prẽr mũ sir, pã'i kar ag ke gé.

¹⁴ Kar tóg ag mũ: “ãjag ne inh mũ ti fẽg'!” he mũ, “kỹ ãjag ne ti to: “vãnh kar krĩn kónãn tóg tĩ,” he mũ'. ãjag rĩnve sóg ti ki jẽmẽ huri, hã ra sóg ve ja tũ nĩ, ãjag tỹ ti to nén tó ja ti. Nén ù kórég han ja tũ tóg nĩ.

¹⁵ Kĩ Herodes vĩ vég tũ nĩ gé. Sỹ ti mũ ti jẽnẽ ja vễ, ãjag ke gé. Hã ra tóg inh mũ ti jẽnẽ mãn mũ gé. Êg hẽ ri ken kĩ ti

tén mũ hỹn'? Sỹ ki kagtĩg tóg tĩ.

¹⁶ Hã kĩ sóg ti mrãnmrãn kar ti tovãnh ke mũ,” he tóg, Pilatos ti.

¹⁷ Festa tỹ Páscoa ki tóg ag mũ vễse pir tovãnh tĩ, prỹg kar ki. Ti jykren hã vễ. Hã kĩ tóg: “Jesus tovãnh jé sóg ke mũ,” he mũ.

¹⁸ Hã ra vãnh kar ag tóg vãnh prẽnprẽr mũ sir. “!..Ti tén ra..!” he ag tóg mũ. “!..Barrabás tovãnh ra..!” he ag tóg.

¹⁹ Barrabás vĩ vãnh génh to se kĩ jẽ nĩ. Cidade tá tóg vãnh génh han ja nĩgtĩ, ên kã tóg ù tén ja nĩgtĩ, hã to tóg se kĩ jẽ nĩ.

²⁰ Kĩ Pilatos vĩ ag mũ vĩ mãn mũ. Ti tỹ Jesus tovãnh sór vễ, hã kĩ tóg ag mũ vĩ mãn mũ.

²¹ Hã ra ag tóg prẽnprẽr kĩ: “!..cruz to ti sã, cruz to ti sã..!” he mũ.

²² Kĩ tóg ag mũ vĩ tãgtũ han mũ gé, Pilatos ti. “Ti kórég tỹ ne han ti? Sỹ vég tũ tóg tĩ. Ti tỹ ne to ter ke nẽ? Sỹ ki kagtĩg tóg tĩ. Hã kĩ sóg ti mrãnmrãn kar kĩ ti tovãnh ke mũ,” he tóg.

²³ Hã ra ag tóg prẽnprẽr tãvĩ han mũ sir, hã kĩ ag tóg ti kutãn mũ. Ti mũ ag tóg: “!..cruz to ti sã..!” he tãvĩ han mũ. Kĩ tóg ag prẽnprẽr to ag mũ han sór mũ sir.

²⁴ To tóg jykren mũ, kĩ tóg ag mũ: “hej,” he mũ, ag tỹ ti kutãn to.

²⁵ Kĩ tóg ù ên tovãnh mũ sir, ù tỹ vãnh génh to se kĩ jẽ ên ti, ù tỹ ù tén ja ên ti. Ag tỹ ù to vĩ mũ ên tovãnh tóg mũ sir. Kĩ

tóg ag mÿ Jesus ti fêg mũ sir, ag tÿ ti ki han sór mũ ên han jé.

²⁶ Kÿ ag tóg ti pére mũ mũ, cruz to ti sa jé.

Jesus tÿ cruz to sa

(Mt 27.32-44; Mc 15.21-32; Jo 19.17-27)

Ag mũn kÿ ag tóg ù kătĩg vég mũ. Êpÿ tá tóg kătĩ mũ, ti jijin hã vÿ: Cirene tá Simão, he mũ. Ti kri ag tóg Jesus cruz ti fig mũ, ti tÿ ti jo va tĩg jé, ti nón.

²⁷ Kÿ ù tÿ hên ri ke ag vÿ Jesus nón mũ mũ, ùn tÿtá fag ke gé. Ên fag vÿ vêsÿrénh mũ, kygfÿ mág han fag tóg mũ sir.

²⁸ Hã ra Jesus tóg vêsÿjãm êvãnh kÿ fag mÿ vĩ mũ. “Jerusalém tá ke’,” he tóg. “Ijé kygfÿ tũg nĩ,” he tóg. “Vênh jé kygfÿmnĩ, ãjag krê jé kygfÿmnĩ,” he tóg fag mÿ.

²⁹ “Ha vé, kurã kórég pê vÿ jun ke mũ ãjag mÿ. Ên kã ag tóg tag tónh ke mũ, ha mẽ: “ùn kurĩ fag mÿn pãgsĩ nĩnh mũ, fag tÿ ãjag krê ter vég tũ nĩn kÿ. ùn krê tũ fag mÿn pãgsĩ nĩnh mũ, ù tÿ gĩr pafãm tũ fag mÿ ke gé,” he jé ag tóg ke mũ.

³⁰ Ên kã ag tóg pãnónh mÿ: “inh kri tÿ tam ké,” henh ke mũ gé, kÿ ag tóg sór mÿ: “inh péju ra, vênh krêm,” henh ke mũ gé.

³¹ Êg kato tẽ ag tÿ ka tánh gÿn kÿ ag hÿn ka tóg tovãnh ke tũ pê nĩ. Ka tánh ên ri ke sóg nĩ, jo ãjag vÿ ka tóg ri ke nÿtĩ. Hã kÿ ãjag tóg inh vêsÿrénh kãfór venh ke mũ, ha vemnĩ,”

he tóg, Jesus ti. Jerusalém fĩn rãm kÿ tóg ke mũ.

³² Ag tÿ Jesus pére mũn kÿ ag tóg ùn régre ag pére mũ mũ gé, ùn jykre pãno ag. Ag tÿ ka to ag sanh ke vê gé.

³³ Kÿ ag tóg pãnónh tá jun-jun mũ sir, ti jÿjÿn hã vÿ: Krĩ Kuka, he mũ. Tá ag tóg cruz to ti sãg mũ sir. ùn jykre pãno tÿ ag tóg cruz to sãg mũ gé, ti kóm, kÿ ù vÿ ti pêgja tá sa, jo ù vÿ ti jakãnh tá sa.

³⁴ Kÿ Jesus vÿ: “panh’,” he mũ. “Ag mÿ vênh pãte fón nĩ,” he tóg. “Ag pi(jé) ki kanhró nÿtĩ’, ag tÿ nén han mũ tag ti’,” he tóg.

Kÿ soldado ag tóg ti kur tÿ jagnê mÿ tÿ vênh ken jé to jogar he mũ sir.

³⁵ Kÿ vênh e ag vÿ tá vég nÿtĩ. Hã ra pã’i ag tóg ti nyg mũ. Kÿ ag tóg jagnê mÿ: “ù ag krenkren han ja tóg nĩgtĩ,” he mũ. “Cristo jé vênh kren han, Topê tÿ ti fêg ja nĩn kÿ, ti tÿ ti kuprêg ja nĩn kÿ, hã ra tóg vênh kren han ki kagtĩg nĩ,” he ag tóg mũ, Jesus to é he kÿ.

³⁶ Kÿ soldado ag vÿ ti nyg mũ gé. Ti rã hã nÿtĩn kÿ ag tóg ti mÿ vinagre ven mũ sir.

³⁷ Kÿ ag tóg: “ã mÿ tÿ Judeu ag pã’i mág nĩ’?” he mũ. “Vênh kren han ra, ã tÿ tÿ pã’i nĩn kÿ,” he ag tóg mũ ti mÿ, ti to é he kÿ.

³⁸ Hã ra ag tóg rán ja nĩ gé, ti tÿ cruz to sa kÿ jê ên ti. Ti to rán hã vê, hã vÿ: “Judeu ag pã’i mág tÿ rei hã vê,” he mũ. Ti kri tóg cruz to sa gé, ên rá ti.

³⁹ Kÿ ti kóm cruz to sa ù tóg ti mÿ vĩ mũ mũ gé, ùn jykre pãno

ên. Ti to tóg é he mũ gé. Kĩ tóg ti mĩ: “ã mĩ tỹ Cristo nĩ?” he mũ. “Věnh kren han ra, kũ ěg krenkren han gé,” he tóg mũ gé.

40 Hã ra ti kóm cruz to sa ũ ũ tóg ti mĩ vĩ jũ han mũ, ũ tỹ Jesus mĩ vĩ kónãn mũ ěn mĩ. Kĩ tóg ti mĩ: “kũ ã mĩ Topě kaměg tũ?” he mũ. “Věsỹrěnh ã tóg mũ gé, ti kóm.

41 Ěg tỹ ěg tỹ nén han ja kajãm vě jãvo, ěg jykre pãno to ěg věsỹrěnh nỹtĩ nĩ. Ěg jãvo tóg jykre kuryj nĩ. Ti pi(jé) nén ũ kórég han ja nĩ,” he tóg.

42 Kĩ tóg Jesus mĩ: “Senhor,” he mũ. “Inh ki ěkrén nĩ, ã tỹ tỹ pã'i ki rãn kũ,” he tóg mũ, Jesus mĩ.

43 Kĩ Jesus tóg ti mĩ: “ha mẽ, ũri ã tóg inh mré nĩnh mũ, ěmã há ěn tá, Paraíso he mũ ěn tá, kanhkã tá. Ki hã sóg to mũ,” he tóg, Jesus ti.

Jesus ter

(Mt 27.45-56; Mc 15.33-41; Jo 19.28-30)

44 Kejëň rã tóg ěg nĩno kã sa mũ sir. Hã ra tóg kuty' he mũ sir, ga kar mĩ hã. Kuty ěn tóg hora tãgtũ han mũ.

45 Kĩ rã vĩ nhyn ke mũ sir. Topě jo ĩn krēm kur tỹ jãnkã mág pě vĩ kã sa nĩ. Ěn vĩ jaran ke mũ. Kuju mĩ tóg jaran ke kãtère mũ sir, fĩn rãm kãn tóg mũ.

46 Kĩ Jesus vĩ prěr mág pě han mũ. Kĩ tóg: “!..panh!..!” he mũ. “!..Sỹ ã mĩ věnh fěg vē, inh kuprĩg ti..!” he tóg. Tag tó kar tóg hun ke mũ sir.

47 Hã ra fóg tỹ capitão tóg ti ter vég mũ. Kĩ tóg Topě mĩ vĩ

há han mũ. “Věnh vĩ há ja vē, ũn há ja vē,” he tóg mũ.

48 Kĩ věnh e ěn vĩ ti ter vég mũ gé. Kĩ ag tóg ãjag tỹ nén han ja to jykrén mũ sir. Vãhã tóg ag mĩ e tĩ. “Topě hỹn ěg tỹ hě ri kenh mũ, ěg tỹ ti tén kũ?” he ag tóg mũ sir. Tag tó kũ ag tóg ãjag ĩn ra vĩnvỹn ke mũ.

49 Hã ra ti to há kar ag vĩ ti vég nỹtĩ nĩ, kakó ki, ũn tãtã fag ke gé. Galilėia tá ke fag tóg ti mré kãmũ ja nĩgtĩ gé. Ti ter ve kãn fag tóg mũ sir.

Ag tỹ věnh kej tá Jesus fi

(Mt 27.57-61; Mc 15.42-47; Jo 19.38-42)

50 Kĩ ũ tóg tá nĩ gé, věnh jyvěn tĩ ũ, ha mẽ, ti jijin hã vĩ: José, he mũ. Judeu ag tỹ cidade tỹ Arimatėia tá ke ti nĩ. Jykre kuryj tóg nĩ, jykre há.

51 Ti pi(jé) ag tỹ Jesus tén ke to: “hej,” he ja nĩgtĩ', ag tỹ Jesus to jykrén kũ. Topě tỹ tỹ ěg pã'i nĩnh ke ve sór tóg mũ gé.

52 Ěn vĩ Pilatos venh tĩ mũ. Kĩ tóg ti mĩ Jesus to vĩ mũ, ti ter kar kũ.

53 Kĩ tóg cruz to ti kãtérem mũ, kũ tóg kur há tỹ ti pãg mũ sir. Kĩ tóg pãró nor kãki věnh kej kãkã ti fig mũ. Věnh kej tãg vē, ag pi(jé) kãkã ũ fi ja nĩgtĩ ver'.

54 Hã ra sexta-feira vē sir, věnhkãn ke kurã ki rã tóg nỹ ha, sãbado ki.

55 Kĩ ũn tỹtã fag vĩ ag nón mũ mũ, ti kej ve jé, ag tỹ ti finh mũ ja tá. Ti mré Galilėia tá kãmũ ja ěn fag vē, ũ tỹ ti fi han vég mũ fag.

⁵⁶ Ve kar kÿ fag tóg kyrãgrã kÿ nén ger há han mũ sir, ti tãg jafã ti, ti to tĩn jé. Hã ra fag tóg vênhkán mũ ver, vênhkán ke kurã kã, Topê vĩ ki króm jé.

24

Jesus rĩr mãn

(Mt 28.1-10; Mc 16.1-8; Jo 20.1-10)

¹ Kÿ semana kurã ve tóg tá krÿg mũ sir. Kÿ fag tóg kusã pẽ ki ti kej tá venh mũ mũ. Vêser ger há han jafã ên ma fag tóg mũ mũ, fag tÿ han ja ên ti, ti kej ra mũn kÿ.

² Hã ra pó ên tÿ ti kej nĩfénh kã nĩ ên vÿ kunũnh kÿ nĩ nĩ. Hã vég fag tóg mũ.

³ Kÿ fag tóg ti kej tá junjun kÿ ra ge mũ, hã ra fag tóg vég tũ nĩ, vêser ti, Jesus ti, êg Senhor ti.

⁴ Kÿ tóg fag fe kaj tĩ sir, fag tÿ ti vég tũ nĩn kÿ. Kÿ vãhã ùn régre ag vÿ kãge mũ, kur kupri rĩnh kÿ, kur kókov, Topê tÿ jênẽ jafã ag.

⁵ Kÿ fag tóg kanẽ junjur mũ sir, kÿ fag tóg êprã êvãnh mũ. Hã ra ag tóg fag mÿ: “ãjag ne tóg vêser jãvãnh mũ', ti rĩr ja (hã) ra',” he mũ.

⁶ “Ki ti tũ nĩ, rĩr ti jẽ ha. Hã kÿ tóg ãjag mÿ tó ja nĩgtĩ, ãjag tÿ Galiléia tá nÿtĩ ên kã.

⁷ Kÿ tóg ãjag mÿ: “êprã ke fi kósin ên fêg jé ag tóg ke mũ, ù tÿ Topê vĩ mranh tĩ ag mÿ,” he ja nĩ. “Ka to ag ti sanh ke mũ, hã ra tóg kurã tãgtũ ki rĩr mãn ke mũ,” he ja tóg nĩgtĩ, Jesus ti, vêso,” he ag tóg mũ, Topê tÿ jênẽ jafã ag.

⁸ Kÿ fag tóg Jesus tÿ nén tó ja ên mũ êkrén mãn mũ sir.

⁹ Kÿ fag vÿ ti kej tá kãpa kÿ mũ mũ sir, ù tÿ 11 (ke) ag mÿ tó jé, ti mré mũ tĩ kar ag mÿ ke gé.

¹⁰ Maria Madalena fi vê, kar kÿ Joana fi ke gé, Maria ù fi ke gé, Tiago mÿnh tag fi, ù fag ke gé, fag mré. Fag hã ne Jesus tÿ ùn vin mũ ag mÿ kãmén mũ, apóstolo ag mÿ.

¹¹ Hã ra tóg ag mÿ tÿ vênh ó nÿ ve nĩ, hã kÿ ag tóg kri fi ja tũ nĩgtĩ, fag vĩn kri.

¹² Kÿ Pedro vÿ jẽ kÿ ti kej ra vênh vãg tĩ mũ. Pãnh ke tóg, kÿ tóg ki êvãnh mũ, kÿ tóg ti kur tãvĩ vég mũ sir, ti pãg ja ti. Kÿ tóg ti mÿ e tĩ. Ti tÿ to jykrén tũ tóg tĩ sir. Kÿ tóg tũg mãn mũ.

Ag tÿ Emaús ra mũ
(Mc 16.12-13)

¹³ Kÿ vãhã ag kã ù ag tóg mũ mũ, kurã ên kã, ùn régre ag. Êmã sĩ ra ag tóg mũ mũ. Jerusalém tán kakó nĩ, 10 (ke) quilômetros hÿn. Êmã ên jyjyn hã vÿ: Emaús, he mũ.

¹⁴ Ag mũn kÿ ag tóg jagnẽ mré vémén mũ sir, ãjag tÿ nén ve ja kar ên to.

¹⁵ Ag tÿ vémén nÿtĩ ra, ag tÿ jagnẽ mré tÿ vémén mág han nÿtĩ ra Jesus tóg ag tá jun kÿ ag mré tĩ mũ.

¹⁶ Hã ra ag tóg ti ki kagtũg mũ, ag tÿ ti vég mũ (hã) ra.

¹⁷ Kÿ Jesus tóg ag mÿ: “ãjag tÿ ne tó nẽ?” he mũ. “Vémén mág ãjag tóg mũ nĩ,” he tóg. Kÿ ag tóg krÿg he mũ sir, ve ù han ag tóg mũ, ãjag fe kaj tugnĩn.

¹⁸ Kÿ ù tóg ti mÿ tó mũ. Cleopas he mũ ên tóg ti mÿ:

“kỹ ã mỹ mễg tũ?” he mũ. “Ũ tỹ festa venh kãmũ ja ag vỹ mẽ kãn. ã hã mỹ ã pir mỹ mễg tũ, ẽg tỹ nén ve ja ti, ã tỹ Jerusalém kã nĩ (hã) ra?” he tóg ti mỹ.

¹⁹ Kĩ tóg ag mỹ: “ne nẽ?” he mũ. Kĩ ag tóg ti mỹ: “Jesus ti,” he mũ. “Nazaré tá ke vễ. Topẽ vĩ tó tĩ vễ. Ẽg tỹ nén han vãnh hyn han ja tóg nĩgtĩ. Topẽ vĩ tó há han ja tóg nĩgtĩ, kỹ Topẽ vĩ ti mré han tĩ, milagre kar ti. Kĩ povo kar ag vỹ vég tĩ, kỹ tóg ẽg kar mỹ e tĩ.

²⁰ Kĩ Topẽ tũ ki rĩr tĩ ag vỹ ti fẽg, ẽg pã'i kar ag, fóg tỹ pã'i tỹ ti tén jé, cruz to ti sa jé, hã kỹ tóg tũg mũ.

²¹ Ẽg tỹ ti ve kỹ ẽg tóg ti to: “ti hỹn ẽg povo tỹ Israel ag krenkren han ke mũ,” he mũ vễ. Hã ra tóg ter ja nĩ. Ũri tóg kurã tágtũ han, ti ter kri,” he ag tóg, Jesus mỹ.

²² “Kỹ ẽg kã ù fag vỹ ẽg mỹ nén ù tó gé, kỹ tóg ẽg mỹ e tĩ gé. Kusã pẽ ki fag tóg ti kej ra mũjẽg.

²³ Hã ra fag ti vég tũ nĩ, ti tỹ tá nỹ tũ nĩn kỹ. Kĩ fag tóg: “nén nẽ ve ẽg,” he mũ gé. Topẽ tỹ jẽnẽ jafã nẽji, kỹ tóg nẽji fag mỹ: “rĩr ti jẽ nĩ,” hé.

²⁴ Kĩ ẽg kã ù ag vỹ ra mũ mũ, ti kej ra, kỹ ag tóg vég mũ gé, fag tỹ nén tó ja ti. Hã ra ag tóg ti vég tũ pẽ nĩ,” he ag tóg, Jesus mỹ, ag tỹ ti ki kagtĩg nỹtĩn kỹ.

²⁵ Kĩ ù tỹ ag mré tĩ mũ ẽn tóg ag mỹ: “ãjag tỹ ne jé vãsỹ Topẽ vĩ tó tĩ ag vĩ kri fi ja tũ nĩ nẽ?” he mũ. “Krĩ tũ ãjag

nỹtĩ, to jykrén há han tũ ãjag tóg nỹtĩ,” he tóg.

²⁶ “Cristo vễsỹrénh ke vễ, vễsỹrénh kar kỹ tóg tỹ ùn mág nĩnh mũ vãnh,” he tóg.

²⁷ Kĩ tóg ag mỹ vãnh rá kãmén kãn mũ sir, Moisés tỹ rá ti, Topẽ vĩ tó tĩ ag kar tỹ rá ti, ag tỹ Jesus to rán ja ti.

²⁸ Ag mỹ kãmén tĩ ki tóg ẽmã ẽn tá jun mũ sir. Ag mré tá jun kỹ tóg mã ra tĩg mũ ve nĩ.

²⁹ Kĩ ag tóg ti kógfyn mũ sir, kỹ ag tóg: “ẽg mré nĩ,” he mũ. “Rãké tóg nỹ ha, kutyg ke rã tóg nỹ ha,” he ag tóg mũ sir. Kĩ tóg ag mré kãra rã mũ, ag mré nĩ jé.

³⁰ Kĩ tóg ag mré jẽn ke mũ gé sir. Ag mré jẽn ke kỹ tóg pão mág mũ, ẽmĩ ti. Kĩ tóg Topẽ mré vĩ mũ, kar tóg kupãn kỹ tỹ vãnh ken mũ.

³¹ Kĩ ag tóg ti ki kanhrãn mũ sir vãnh. Ti ve há han ag tóg mũ sir. Hã ra tóg ki tũ nĩ ha, ti ve mãn tũ ag tóg nĩ sir.

³² Kĩ ag tóg jagnẽ mỹ: “ti tỹ ẽg mré vēmén kỹ tóg ẽg fe ki rã,” he mũ. “Ẽg mỹ tóg ã to rán ja ẽn kãmén kãn, ẽg mũn kỹ. Hã ja vễ,” he ag tóg mũ jagnẽ mỹ.

³³ Kĩ ag tóg vễsỹmér Jerusalém ra vỹnvỹn ke mũ sir. Tá ag tóg ù tỹ 11 (ke) ag vég mũ, ag mré ke ù ag mré hã.

³⁴ Hã ra ẽn ag tóg ag mỹ: “ẽg Senhor vỹ rĩr mãn,” he vén mũ. “Simão Pedro mỹ tóg vãnh ven, mỹr, ha mẽ,” he ag tóg mũ sir.

³⁵ Kĩ ag tóg ag mỹ: “hỹ, ti ve ẽg ke gé,” he mũ gé. Kĩ ag

tóg ag mý ājag tỹ nén ve ja ěn tó mũ sir, ag tỹ ājag mũ ki ti ve ja ti, ti tỹ ag mý ěmĩ kupān ja ti ke gé. “Hã ki ěg tóg ti ki kanhró nỹtĩ, ěmĩ kupān ja ki,” he ag tóg mũ.

Jesus tỹ vĕnh kar ěn mý vĕnh ven

(Mt 28.16-20; Mc 16.14-18; Jo 20.19-23; Hk 1.6-8)

³⁶ Ag tỹ ver tỹ vĕmén nỹtĩ ra Jesus tóg ag mré jĕ mũ vāhã, ti tỹ hĕ tá kārānh ke tũ nĩ ra. Kỹ tóg ag mý: “mý sér nỹtĩmnĩ,” he mũ.

³⁷ Hã ra ag tóg jũrũnrũn ke mũ sir. Ti kamĕg ag tóg mũ. “Vĕnh kuprĩg hỹn,” he ag tóg mũ, Jesus to.

³⁸ Kỹ tóg ag mý: “ājag ne tóg jũrũnrũn ke mũ!” he mũ. Ājag tỹ ne jé: “vĕnh kuprĩg hỹn,” he nĕ?” he tóg.

³⁹ “Inh nĩgé ve ra, inh pĕn ve ra, inh hã vĕ,” he tóg. “Inh mĕgmĕ ra, ve há han ra. Vĕnh kuprĩg pi(jé) fár nĩ, ti pi(jé) kuka nĩ. Inh fár ve ra, inh kuka ti,” he tóg.

⁴⁰ Vĩ kỹ tóg ag mý ā nĩgé ven mũ, ā pĕn ke gé.

⁴¹ Hã ra tóg ver ag mý e tĩ, ag fe tỹ mrin ke pĕ han kỹ, kỹ tóg ver ag tỹ ki kagtĩg tĩ. Hã kỹ tóg ag mý: “mý ki vĕjĕn tũ?” he mũ.

⁴² Kỹ ag tóg ti mý pirã nĩm mũ, mýg mré.

⁴³ Kỹ tóg mǎn kỹ ko mũ, ag rĩnve.

⁴⁴ Kỹ tóg ag mý: “hã tó ja inh nĩ, ājag mý, iser to hã, isỹ ājag mré nĩgnĩn kã,” he mũ. “Vāhã sóg ve kǎn ja nĩgtĩ, ag tỹ iso nén rán ja ti, Moisés ti, ti tỹ ājag mý vĕnh jykre nĩm jan ki,

kar kỹ Topĕ vĩ tó tĩ ag kar tỹ nén rán ja ki ke gé, Topĕ to jǎn ki ke gé. Sỹ nén ven jan hã vĕ,” he tóg, ā mré mũ tĩ ag mý.

⁴⁵ Kỹ tóg ag mý kāmén há han mũ sir, hã kỹ ag tóg ti to nén rán ja ki kanhrān kǎn mũ sir, to jykren há han ag tóg mũ sir, ti tỹ ag nĩgrĕg róm kỹ.

⁴⁶ Kỹ tóg ag mý: “tag vỹ rán kỹ nĩ, ha mĕ,” he mũ. “Hã kỹ Cristo vỹ vĕsỹrĕnh, kỹ tóg rĩr mǎn gé, ā ter kar kỹ, kurā tǎgtũ tũg kỹ. Tag ve kǎn sóg huri,” he tóg.

⁴⁷ “Kỹ tóg rán kỹ nĩ gé, ũ ag tỹ vĕnh kar mý inh kāmén ke ti. Inh jijin tó jé ag tóg ke mũ, ag tỹ vĕnh kar mý: “ājag jykre si tovānh ra,” hĕnh ken kỹ, ũ tỹ inh vĩ tó tĩ ag. “Tovānh kỹ Topĕ tóg ājag mý vĕnh pāte fón ke mũ, ājag tỹ ti vĩ mranh ja ti,” he jé ag tóg ke gé. Povo kar mý ag tóg tónh ke mũ, hã ra ag tóg tag ki tó vén ke mũ, Jerusalém ki. Ājag to ken hã vĕ. Inh kāmén jé ājag tóg ke mũ.

⁴⁸ Ve kǎn ājag tóg mýr, hã kỹ ājag tóg tónh ke mũ.

⁴⁹ Ha mĕ, inh panh vỹ ājag mý nén ũ tó ja nĩ, ājag tỹ venh ken jé. ěn jĕnĕ jé sóg ke mũ ājag mý. Hã kỹ tag ki nỹtĩmnĩ ver, cidade tỹ Jerusalém tag ki. Hĕn ra mũ tũg nĩ. Vāhã ājag tóg venh ke mũ, inh panh tỹ ājag mý ũn tó ja ti, hã vỹ: ti kuprĩg, he mũ. Kanhkã tá tóg kǎtĩg ke mũ, ũ tỹ ājag tar han ke ti,” he tóg, Jesus ti.

Jesus tỹ kanhkã ra tĩg
(Mc 16.19-20; Hk 1.9-11)

⁵⁰ Kĩ tóg ag jãmĩ tĩ mũ, ãmã tỹ Betânia ra. Tá tóg ã nĩgẽ tỹ ag kri ven mũ. Kĩ tóg ag mỹ vĩ há han mũ sir.

⁵¹ Ag mỹ vĩ há han kĩ tóg ag ré kĩ tĩ mũ, kanhkã ra tãpry tóg mũ.

⁵² Kĩ ag tóg ti to: “Topẽ vĩ tỹ ti nĩ,” he mũ sir. Kĩ ag tóg Jerusalém ra kãmũ mãn mũ, vēsỹkã. Ag mỹ tóg sér pẽ tĩ vãhã.

⁵³ Kurã kar ki ag tóg Topẽ jo ãn ra mũ tĩ, tá Topẽ to vĩ há han jé, ti mỹ nén ã há kar tó jé, ti tỹ ag mỹ sér tĩn kĩ.

Hã vë.

JOÃO TÏ RÁ

Topě tÏ ā vÏ tÏ nén ũ kar han

1 Topě tÏ nén ũ kar han ja tÏg ki tóg nÏ ja nÏ, ěg tÏ ũ to: “Topě vÏ,” he mÏ ěn ti, hã to ěg: Jesus, he mÏ. Topě mré tóg nÏ. Topě vÏ tÏ ti nÏ gé.

2 Topě tÏ nén (ũ) kar han tÏg ki tóg Topě mré nÏ nÏ.

3 Ti hã tigrÏn tóg nén ũ kar han, Topě ti, ěg tÏ ũ to: “Topě vÏ,” he mÏ ěn tugnÏn. Ā pir mÏ Topě tóg nén ũ han tÏ nÏ, ti hã mré tóg nén kar han kãn.

4 ěg tÏ ũ to: “Topě vÏ,” he mu ěn vÏ rÏr nÏ, hã kÏ tóg ěg rÏnrÏr han mÏ gé. Jęngrę ri ke ti nÏ, ũ tÏ ěg rÏnrÏr han mÏ ěn ti. Ti tÏ ěg kanhrãn to ken hã vę.

5 Ũn jykre pãno ag vÏ ũ tÏ kuty mÏ mÏ ěn ag ri ke nÏtÏ. Hã ra tóg ěg mÏ jęngrę ri ke nÏ, ěg tÏ ũ to: “Topě vÏ,” he mÏ ěn ti. KÏ Nén-Kórég vÏ ti tÏ tÏ' he han sór ja nÏ, hã ra tóg ti tÏ hę ri ke ja tÏ nÏ.

6 KÏ kejęn Topě tóg ěprã ke ũ jęnę, ti jiji hã vÏ: João, he mÏ.

7 Ti mÏ tóg: “ag mÏ ũ tÏ ag mÏ jęngrę hen mÏ ěn kãmén” he ja nÏ, hã kÏ tóg ke mÏ, ag kar tÏ ti vÏ mę ję, ag tÏ ti vÏ kri fi ję.

8 João pi(jé) ěg mÏ jęngrę han ja nÏ'. Ti tÏ ěg mÏ: “ěn hã vę,” henh kãtġg ja vę, ũ tÏ ěg mÏ jęngrę han mÏ ěn to, hã vÏ: Jesus, he mÏ.

9 Jęngrę pę ěn hã vę. ěprã tóg jun, ti tÏ ěg kanhrãn ję,

ěprã ke kar, ũ tÏ ěg ki jęngręg pę han mÏ ěn ti.

10 Ga han tóg, ũ tÏ ěg mÏ jęngrę han mÏ ěn ti, kÏ tóg ěg mré ga kri tġnh kãtġg gé, ga han kar kÏ. Hã ra ag tóg ti ki kanhrãn ja tÏ nÏ, ěprã ke ag.

11 Ā povo kar mÏ tóg tġg ja nÏ, hã ra ti mrę ke ag pi(ję) ti ki ge sór ja nġgtÏ'.

12 Ũ ag tóg hã ra ti ki ge mÏ. En ag to tóg: “Topě krę,” he mÏ, ũ tÏ ti ki ge kÏ nÏtÏ tãvÏ ag to.

13 Ti ki ge kÏ nÏtÏ tigrÏn ěg hã vÏ tÏ ti krę nÏtÏ. ěg mur tigrÏn ěg tóg ver tÏ ti krę tÏ nÏtÏ. ěg panh tÏ ěg mÏnh fi mrę nÏ tigrÏn ěg tóg mur mÏ gé. Topě tÏ ěg han mãn tigrÏn ěg tóg tÏ ti krę nÏtÏ jãvo.

14 ěg tÏ ũ to: “Topě vÏ,” he mÏ ěn vÏ ěg ri ke mur, kÏ tóg tÏ ěprã ke ję sir. ěg mrę tóg tġg ja nġgtÏ. Há kÏ sóg ti vę. Pã'i mág vÏ tÏ ti nÏ, ũn tar, tag ve inh. ěg to há pę tãvÏ ti nÏ, kÏ tóg ki hã tó ti gé. Topě kósin pir vę, kÏ Topě vÏ ti mÏ: “ũn mág vÏ tÏ ā nÏ,” hé, ti jóg ti.

15 João vÏ ti kãmén ja nÏ gé. Ti kãmén há han tóg, kÏ tóg: “inh nón kãtÏ mÏ ěn vÏ inh kãfór nÏ,” he ja nÏ. “Inh nón kãtġg ję tóg ke mÏ, hã ra tóg tÏ ijo ke nÏ. ěn tó inh huri ājag mÏ. Ti hã vę,” he ja tóg nÏ, João ti, Jesus to.

16 ěg to hã tãvÏ tóg nÏ, hã kÏ tóg mÏ nén ũ ha kar han, ěg jagãgtãn kÏ. ěg jagãgtãn tag tovãnh ke tÏ pę tóg nÏ.

17 Moisés vÏ ěg mÏ Topě tÏ ěg jyvęn mÏ ěn tó ja nġgtÏ, ěg

tỹ ti vĩ ki króm jê, kỹ Jesus tóg ãg mỹ: “Topê vĩ ãjag mỹ vãnh pãte fón sór mũ, ti tỹ ãjag to há nĩn kỹ,” he mũ. Ti hã ne ãg mỹ vãnh vĩ sér ên to mũ'.

¹⁸ ãg pi(jê) Topê vég tĩ'. Kỹ ãg kãmĩ ù vĩ ti ve ja tũ nĩ gé. Ti kósın pir hã vĩ ãg mỹ ti kãmén tĩ, ti hã vĩ ã jóg mrê nĩnĩ, Topê mrê. Ti hã vĩ Topê ri ke nĩ. Kỹ tóg ãg mỹ ã panh ti kãmén tĩ, Topê kósın ti, Jesus ti.

João Batista tỹ Jesus kãmén.

(Mt 3.1-12; Mc 1.1-8; Lc 3.1-18)

¹⁹ Kejên Judeu ag pã'i ag vĩ João mỹ vãnh vĩ jêñêg mũ. Jerusalém tá ag nỹtĩ, pã'i ag, Topê tũ ki rĩr tĩ, Levi krê'krê ag ke gé. Ag João mỹ vãnh vĩ jêñê kỹ ag tóg mỹ: “ũ nỹ tỹ nĩ?” he mũ.

²⁰ Kỹ tóg ag mỹ: “inh pi(jé) tỹ Cristo nĩ’,” he mũ. Tó há han tóg, ag mỹ.

²¹ Kỹ ag tóg ti mỹ: “kỹ ã hỹn tỹ ù nĩ?” he mũ. “Á mỹ tỹ Elias nĩ’?” he ag tóg ti mỹ. Hã ra tóg ag mỹ: “vó” he mũ gé.

Kỹ ag tóg ti mỹ: “Topê vĩ tó tĩ ù nêji kãtĩg ke mũ gé. Ti hã mỹ tỹ ã nĩ?” he mũ. Hã ra tóg: “vó,” he mũ gé.

²² Kỹ ag tóg ti mỹ: “ũ nỹ tỹ ã nĩ, ge kỹ?” he mũ. “Pã'i ag vĩ ãg jêñê, ãg tỹ ã ki jêñê jê. ãg hỹn ne tónh ke mũ, ag mỹ?” he ag tóg mũ. “Vêso ã hêri ke ti?” he ag tóg mũ, João mỹ.

²³ Kỹ João vĩ ag mỹ vãnh kãmén mũ. Á to nén rán kỹ nĩ ên tó tóg mũ, hã vĩ: “ũ tỹ êmã tũg ja tá jê kỹ vãnh kar mỹ Topê jykre kãmén mũ ên vĩ tỹ inh nĩ,” he mũ. “Ủ tỹ vãnh kar

mỹ: “ãg Senhor japry kure ra, ti jamĩn kurynh ra, ti tỹ jagma tĩg há han jê, he tĩ ên vĩ tỹ inh nĩ. Isaiás tỹ inh kãmén hã vê,” he tóg, João ti.

²⁴ Jãvo ù tỹ ti ki jêñêg mũ ag vĩ tỹ Fariseu ag mrê ke nỹtĩ.

²⁵ Kỹ ag tóg ti mỹ: “ã tỹ hê ri ken kỹ ag kygpe sór nê, ã tỹ tỹ Cristo tũ hã ra?” he mũ. “Inh pi(jê) tỹ Elias nĩ’, he ã tóg tĩ. Inh pi(jê) tỹ Topê vĩ tó tĩ ên nĩ’, ãg tỹ ùn kãtĩg jãvãnh mũ ên, he ã tóg tĩ, hã ra ã tóg ag kygpég tĩ,” he ag tóg mũ, João mỹ.

²⁶ Kỹ tóg ag mỹ: “goj tỹ sóg ag kygpég tĩ,” he mũ. “Hã ra ù tóg ãjag kãmĩ tĩ mũ ha, ãjag tỹ ùn ki kagtĩg ù.

²⁷ Ên vĩ inh nón kãtĩg ke mũ, hã ra tóg inh kãfór nĩ. Sỹ ti camarada nĩnh ke vê vê, sỹ ti pên né kunũnh ke vê vê, ti pên to ró ti. Hã ra sóg tỹ ti krêm ke pê jê,” he tóg, João ti

²⁸ Kỹ ag tóg mũ mũ, ti vĩ mẽ kar kỹ. Cidade tỹ Betânia tá ag tóg ti venh kãmũ ja nĩgtĩ, Fariseu ag, João ti, Jordão mã tá. Tá tóg ag kygpég jê nĩ, João ti.

Jesus tỹ tỹ ãg tỹ Topê mỹ ãg mẽg tânh ên ri ke

²⁹ Tỹ vaj kỹ João vĩ Jesus vég mũ sir. João tá tóg jun mũ, Jesus ti. Kỹ João tóg ti to: “ti hã vê,” he mũ. “ãg tỹ Topê mỹ ãg mẽg tỹ carneiro krê tânh ên ri ke ti nĩ, cordeiro ên ti. Ti hã vĩ ãg kar tỹ Topê vĩ mranh jagfỹ ter ke mũ,” he tóg.

³⁰ “Sỹ ùn kãmén mũ ên hã vê. Ủ tỹ ijo jê mũ vĩ inh nón kãtĩg ke mũ, he ja inh nĩ ti to.

Inh kãfór ti nĩ, ti tỹ inh jo ke nĩn kỹ, he ja inh nĩ.

³¹ Inh pi(jé) ti ki kanhró ja nĩ', hã ra sóg goj tỹ vėnh kar ag kygpé, ag tỹ ti ki kanhrãn kãn jé, povo tỹ Israel ag kar," he tóg, João ti

³² Kỹ tóg: "Topě kuprĩg ve inh," he mũ gé. "Kanhkã tá kãkutě kỹ tóg ti krĩ kri nĩ nĩ. Tỹ sórãg ve ti nĩ, Topě kuprĩg ti, ti tỹ ti krĩ kri nĩn kỹ.

³³ Inh pi(jé) Jesus ki kanhró nĩ vė'. Hã ra Topě tóg inh mỹ: ha ag kygpenh tĩg," he ja nĩgtĩ, kỹ tóg inh mỹ: "ã tỹ inh kuprĩg ve kỹ ã tóg ti ki kanhró nĩnh mũ," he ja nĩ gé. "Kanhkã tá kãkutě kỹ tóg ag kã ùn pir kri nĩnh mũ. Ti tỹ ùn kri nĩ mũ ěn vỹ inh kuprĩg tỹ ag kygpenh ke mũ," he ja tóg nĩ inh mỹ, Topě ti.

³⁴ Tag ve inh, hã kỹ sóg ãjag mỹ: ti hã vỹ tỹ Topě kósin nĩ, he mũ" he tóg, João ti. Ti tỹ Jesus kãmén hã vė.

Jesus tỹ ã mrě mũ tĩ ag jé prěr

³⁵ Tỹ vaj kỹ João vỹ ã mrě mũ tĩ régre ag mré vēmén jě nĩ.

³⁶ Kỹ tóg Jesus tỹ mũ tĩg vėg mũ, kỹ tóg ag mỹ: "Topě tũ vỹ tỹ ti nĩ," he mũ. "Ěg tỹ Topě mỹ ěg mēg tỹ cordeiro tãnh tĩ ěn ri ke ti nĩ," he tóg, João ti.

³⁷ Ag tỹ ti vĩ tag mẽ kỹ ag tóg Jesus nón mũ mũ.

³⁸ Kỹ Jesus vỹ ag vėg mũ, ag tỹ ti nón mũ ti. Kỹ tóg ag mỹ: "ne nē?" he mũ. Kỹ ag tóg ti mỹ: "ã hē tá ěmã nĩ?" he mũ.

³⁹ Kỹ tóg ag mỹ: "mũ jé ha, inh mrě, ãjag tỹ inh jamã ven

jé," he mũ. Kỹ ag tóg ti mrě mũ mũ sir. Ti mré ag kurã ěn tũg mũ. Rã ké ti nỹ ha, ag tỹ ti mrě mũ kri, 4 horas hỹn hěn ri ke mũn.

⁴⁰ Ti mré mũ ag kã ù vỹ tỹ André nĩ, ù tỹ João tỹ Jesus tó ja ěn mēg mũ ag kã ù, hã vỹ: Simão Pedro jãvy, he mũ, André ti, Jesus mrě vēmén tĩ ěn ag kã ù ti.

⁴¹ Ěn tóg tá kãtĩg, kỹ tóg vėsỹmér ã kãke tỹ Simão Pedro venh tĩ mũ, kỹ tóg ti mỹ: "Messias ve inh," he mũ. "Messias," he ag tóg tĩ, Topě tỹ ùn jēnēnh ke ěn to, Cristo to.

⁴² André tỹ ti mỹ Jesus tó kỹ tóg ti mré ti venh tĩ mũ. Kỹ Jesus vỹ ti ki ěvãnh mũ, kỹ tóg ti mỹ: "Simão vỹ tỹ ã nĩ, João kósin," he mũ. "Sỹ ã jyjyn mãn ke vė, hã vỹ: Cefas, he mũ," he tóg, Jesus ti. Cefas to ken hã vė, hã vỹ: Pedro, he mũ, hã vỹ: pãró, he mũ, ěg vĩ ki.

Jesus tỹ Filipe mré Natanael jé prěr

⁴³ Tỹ vaj kỹ Jesus vỹ ga tỹ Galilėia ra tĩg sór mũ. Ā tĩg ke jo tóg Filipe kato tẽ mũ. Kỹ tóg ti mỹ: "inh mré kãtĩg," he mũ. Kỹ tóg ti mũ.

⁴⁴ Hã ra Filipe vỹ tỹ Bet-saida tá ke nĩ, André mré Pedro jamã ěn tá ke.

⁴⁵ Kỹ Filipe vỹ Natanael venh tĩ mũ, ti mỹ Jesus kãmén jé. Kỹ tóg ti mỹ: "Cristo ve inh huri," he mũ. "Moisés vỹ ti kãtĩg ke rãn ja nĩ, Topě vĩ tó tĩ ag ke gé. Jesus to ken hã vė, Nazaré tá ke ěn to ken hã vė, José kósin ěn ti. Ti hã vỹ

tỹ Cristo nĩ,” he tóg, Filipe ti, Natanael mỹ.

46 Kỹ tóg ti mỹ: “hã ra sóg Nazaré tá ùn há ve ja tũ nĩ ver,” he mũ. Hã ra Filipe tóg ti mỹ: “ge ra ti venh kãtĩg,” he mũ. Kỹ tóg ti mré tĩ mũ.

47 Ag tỹ Jesus tá junjun mũ ra Jesus tóg Natanael kãmén mũ, ù tỹ tá nỹtĩ ag mỹ. “Û tỹ tá kãtĩ mũ ên ve ra,” he tóg. “Israel krẽ'krẽ pẽ vê,” he tóg. “Ûn há vỹ tỹ ti nĩ, ón vãnh ti nĩ,” he tóg.

48 Hã ra Natanael vỹ Jesus tỹ ã to vỹ tag mễg mũ. Kỹ tóg ti mỹ: “kỹ ã mỹ inh ki kanhró nĩ?” he mũ. Kỹ Jesus tóg ti mỹ: “Filipe tỹ ã jé prěr to hã sóg ã vé,” he mũ. “Ã tỹ ka krêm jẽ kỹ sóg ã vé, ka tỹ figueira ên krêm,” he tóg,” he tóg. Jesus ti.

49 Kỹ Natanael tóg Jesus mỹ: “mẽi,” he mũ. “Topẽ kósin vỹ tỹ ã nĩ,” he tóg. “Ëg povo tỹ Israel kri pã'i vỹ tỹ ã nĩ,” he tóg.

50 Kỹ Jesus tóg: “isỹ ã mỹ: ã ve ja inh nĩ, ã tỹ ka krêm jẽ ra, hen kỹ tóg ã mỹ e tĩ, kỹ ã tóg inh vỹ kri fi sór mũ,” he mũ. “Hã ra tóg ver tỹ nén ù tũ nĩ, sỹ ã ve ja tag ti. Isỹ kar kỹ nén han ke vỹ ã mỹ e pẽ tãvĩ tĩnh mũ, ha vemnĩ,” he tóg, Jesus ti.

51 “Ha vé, ki hã sóg tónh ke mũ, ha mẽ. Kanhkã nor kỹ nĩ ve jé ãjag tóg ke mũ. Tá ãjag tóg Topẽ tỹ jẻgnẻ jafã ag venh ke mũ gẻ. Kanhkã tá ag kãrenh ke mũ, iso, kỹ ag ra mũ mãn ke mũ gẻ. Tỹ sóg ẻprã ke fi kósin nĩ mỹr,” he tóg, Jesus ti.

2

Jesus tỹ vẻnh prũg venh tĩ

1 Kurã tãgtũ tũg kỹ ù tóg vẻnh prũg han mũ ẻmã tỹ Caná tá, ga tỹ Galilẻia tá. Jesus mỹnh fi vỹ venh tĩg ja nĩ.

2 Kỹ ag tóg Jesus mỹ tó mũ gẻ, ti tỹ festa venh kãtĩg jẻ, ti mrẻ mũ tĩ ag mrẻ.

3 Ag tỹ tá nỹtĩ ra vãhã vinho tóg tũ' he mũ. Kỹ Jesus mỹnh fi tóg ti mỹ: “vinho hur tũg,” he mũ.

4 Hã ra Jesus tóg fi mỹ: “toreg', mỹnh',” he mũ. “Inh mrẻ ke tũ vẻ, ã tỹ inh mỹ nẻn tó mũ tag ti,” he tóg, Jesus ti, ã mỹnh fi mỹ.

5 Hã ra fi tóg ù tỹ festa ki rĩr tĩ ag mỹ: “ti tỹ ãjag mỹ nẻn ù tó kỹ han nĩ,” he mũ.

6 Hã ra goj né mág tỹ 6 (ke) vỹ tá nỹtĩ, pó tỹ goj hé mág. Éhé ti nỹtĩ, balde fór tỹ 10 (ke) tỹ ẻg tóg ùn pir fãn tĩ. Judeu ag vỹ vẻnh kygpe e han tĩ, ag tỹ Topẻ mỹ há nỹtĩ jẻ. Ag jykre hã vẻ. Ag tỹ vẻnh kygpe hã jẻ tóg tá nỹtĩ, goj nẻn ti.

7 Kỹ Jesus tóg festa ki rĩr tĩ ag mỹ: “goj né ên fónfãn, goj run kỹ,” he mũ. Kỹ ag tóg ke mũ. Fónfãn kãn ag tóg mũ.

8 Kỹ tóg ag mỹ: “goj tag tỹ festa to pã'i mỹ ven,” he mũ. Kỹ ag tóg ke mũ.

9 Kỹ tóg kron mũ, festa to pã'i ên ti. Hã ra tóg tỹ vinho nĩ sir, ag tỹ run ja ti. Hã ra tóg ki kagtĩg nĩ, festa to pã'i ti. Û tỹ festa ki rĩr tĩ ag hã vỹ ki kanhró nỹtĩ, pã'i ên krêm ke ag.

Pã'i tỹ vinho hã ên kron kỹ tóg ùn prũg mũ ên jé prêr mũ. Kỹ tóg ti mỹ:

¹⁰ “vênh jykre vênhmỹ han ã,” he mũ. “Ag tỹ kronkron vén kỹ ã tóg ag mỹ vinho há tâvĩ nĩm ke mũ vê, kar kỹ vinho pãgsĩ vỹ há nĩ vê. Jãvo ã tóg ag mỹ vinho pãgsĩ ên nĩm vén, kỹ ã tóg vinho há pẽ tag nĩm sór mũ ha vãhã,” he tóg, festa to pã'i ti, ùn prũg mũ ên mỹ. Hã ra tóg ki kagtĩg nĩ, Jesus tỹ goj tỹ vinho há ên han mũ ti, há kỹ tóg ti mỹ e tĩ, ti tỹ festa kaju ki vinho há ven sór kỹ.

¹¹ Jesus tỹ êmã tỹ Caná tá nén han mũn hã vê, Galiléia tá. Êg tỹ nén han ki kagtĩg hyn han tóg tĩ, kỹ tóg tag han vén. Ti tỹ nén han mũ ki êg tóg ti jykre tar ki kanhró nỹtĩ sir. Hã kỹ ag tóg ti ki ge mũ sir, ti mré mũ tĩ ag, ag tỹ ti jykre tar ên ven kỹ.

¹² Kar kỹ Jesus vỹ cidade tỹ Cafarnaum ra tĩ mũ, ti mỹnh fi mrê, ti jãvy ag mré hã, ti mré mũ tĩ ag mré ke gé. Tá ag tóg nỹtĩg mág sĩ han.

Jesus tỹ Topẽ jo ãn ra tĩ

(Mt 21.12-13; Mc 11.15-17; Lc 19.45-46)

¹³ Ên kã Judeu ag festa tỹ Páscoa vỹ kakó nĩ ha Kỹ Jesus vỹ cidade tỹ Jerusalém ra tĩ mũ, ti mré mũ ti ag mré.

¹⁴ Ti tỹ Topẽ jo ãn tá jun kỹ tóg ù tỹ boi vender he tĩ ag vég mũ, carneiro vender he tĩ ag ke gé sórãg vender he tĩ ag ke gé. Topẽ jo ãn krêm ag tóg ãjag negócio hyn han tĩ. Kar

kỹ ù ag tóg tá nỹtĩ gé jãnkamy trocar he tĩ ag.

¹⁵ Jesus tỹ ag ve kỹ tóg ti mỹ e tĩ, ag tỹ Topẽ jo ãn kavénh mũn kỹ. Hã kỹ tóg mrãn ke jafã fy tỹ ag mrãnmrãn jafã han mũ. Ên vyn kỹ tóg ag pan mũ, Topẽ jo ãn kãtã, carneiro ti ke gé, boi ti ke gé. Û tỹ jãnkamy trocar he tĩ ag jãnkamy ên vãm tóg mũ gé, êprã, kỹ tóg ag mesa tỹ kréj ke mũ gé.

¹⁶ Û tỹ sórãg vender he tĩ ag mỹ tóg: “ãjag tũ ma mũjêg,” he mũ. “Inh panh jo ãn krêm negócio han sór tũg nĩ. Bodega pijê', inh panh jo ãn ti,” he tóg, Jesus ti.

¹⁷ Ti mré mũ tĩ ag tỹ tag ve kỹ ag tóg ti to rán kỹ nĩ ên mũ êkrég mũ, ha mẽ: “ã ãn tóg inh mỹ sĩnvĩ jê, kỹ tóg inh mỹ e tĩ, ag tỹn kavénh kỹ. Tag tugrĩn ag tóg inh krĩ rỹ han mũ, kỹ tóg kejên isén ke mũ sir, inh kri rỹ ti, ha vemnĩ,” he tóg, Topẽ vỹ tỹ rán kỹ nĩ ki, Jesus to.

¹⁸ Kỹ Judeu ag pã'i ag vỹ Jesus tỹ ag pan mũ vég mũ gé. Kỹ ag tóg ti mỹ: “ã tỹ hẽ ri ke nẽ?” he mũ. “Û nỹ hỹn ã mỹ: tag han nĩ, hé? Milagre ù han nĩ, êg tỹ ù tỹ ã jêñêg mũ ki kanhrãn jé,” he ag tóg mũ, pã'i ag, Jesus mỹ.

¹⁹ Hã ra Jesus tóg ag mỹ: “ãjag tỹ Topẽ jo ãn tag kókén kỹ sóg ti jêgja ki ù han mãn ke mũ, kurã tãgtũ ki, ha vemnĩ,” he mũ.

²⁰ Kỹ tóg ag mỹ e tĩ. “Û tỹ Topẽ jo ãn tag han mũ ag vỹ ano tỹ 46 (ke) ki rãnrãj kỹ ti

han. Jãvo ã mÿ kurã tâgtũ ki ti han sór mũ', in ti'?" he ag tóg mũ, Jesus mÿ, pã'i ag.

²¹ Hã ra Jesus tóg ag mÿ ã ter ke tó ja nĩgtĩ, vênh kãmén ja ti nĩgtĩ, ti tÿ vëso: "Topê jo ìn ri ke ình nĩ," hen kÿ.

²² Ti tÿ kejên ã ter kar kÿ rĩr mãn kÿ ti mré mũ tĩ ag tóg ti vĩ tag ki êkrén kÿ ki kanhrãn mũ, kÿ ag tóg Topê vĩ ki rãn kÿ nĩ ên to jykrén há han mũ vãhã, Jesus vĩ to ke gé, kÿ ag tóg ti ki ge há han mũ ha.

Jesus tÿ vênh kar ki kanhró

²³ Kÿ ù tÿ hên ri ke ag vÿ Jesus ki ge mũ, ti tÿ Jerusalém tá nĩn kÿ, festa tÿ Páscoa ên kã. Ag tÿ ti tÿ nén han mũ ve kÿ ag tóg ti ki ge mũ. Milagre hyn han tóg tĩ.

²⁴ Hã ra tóg ag jykre ki kanhró nĩ, ù tÿ ón kÿ ti ki ge mũ ag jykre ki. Ón kÿ ag tóg ti ki ge mũ, hã kÿ ag tóg ti ki fe tũ nÿtĩ sir.

²⁵ Kÿ ù tÿ ti mÿ: "ù ên jykre vÿ ge nĩ," hen kÿ tóg: "hÿ, ki kanhró ình nĩ," he tĩ. Vësóg ki tóg ag jykre ki kanhró nĩgtĩ.

3

Nicodemos tÿ Jesus mré vëmén

¹ Ên kã ù tóg nĩgtĩ, ti jijin hã vÿ: Nicodemos, he mũ. Judeu ag pã'i ù vë, Fariseu ù vë.

² Ên vÿ Jesus ve sór mũ, kÿ tóg kuty ra ti venh tĩ mũ, ti mré vëmén jé. Kÿ tóg ti mÿ: "Topê vÿ ã jênê, tag ki kanhró êg tóg nÿtĩ," he mũ. "Topê tÿ êg mÿ ùn jênê vÿ tÿ ã nĩ, hã kÿ ã tóg êg tÿ nén han vãnh ên

hyn han tĩ. Topê tÿ ã mré han tũ nĩ ra ã tóg ã tÿ han mũ tag ki kagtĩg nĩnh mũ vë," he tóg, Nicodemos ti, Jesus mÿ.

³ Kÿ Jesus tóg ti mÿ: "sÿ ã mÿ tag kãmén ke vë, ha mē," he mũ. "Ûn mur mãn kÿ nÿtĩ ag hã vÿ Topê tÿ tÿ êg pã'i nĩ venh ke mũ, ag tãvĩ. Ki hã sóg tó mũ mÿr," he tóg, Jesus ti, Nicodemos mÿ.

⁴ Kÿ Nicodemos tóg ti mÿ: "kÿ ùn sanh hÿn hê ri kenh mũ, ti mur mãn jé?" he mũ. "Ti mÿ vësi han ki kanhró nĩ, kÿn mÿ ã mÿnh fi nug ki rã mãn kÿ mur mãn ke mũ?" he tóg, Nicodemos ti.

⁵⁻⁶ Hã ra Jesus tóg ti mÿ: "vó," he mũ. "Êprã ke ag krê vÿ tÿ êprã ke nÿtĩ, ag mÿnh fag ri ke, Jãvo Topê kuprĩg tÿ ù han kÿ tóg Topê kuprĩg tÿ jagrê nĩ. Mur mãn to ken hã vë, hã vÿ: ình ki rã, he mũ, hã vÿ: mur mãn, he mũ. Goj tÿ ke vë, Topê kuprĩg tÿ ke vë gé. Û tÿ gen kÿ mur mãn ja tũ nĩn kÿ tóg Topê tÿ tÿ êg pã'i nĩ venh ke tũ pẽ nĩ.

⁷ Hã ra tóg ã mÿ e tĩ, sÿ ã mÿ: "mur mãn jé ã tóg ke mũ," hen kÿ.

⁸ Kãka to jykrén nĩ. Ti tÿ mĩ tĩg sór mũ ên mĩ tóg tĩ tĩ kãka ti. Ti tÿ krog he mũ ên hã mēg êg tóg tĩ, hã ra êg tóg ti vég tũ nĩ, kÿ êg ti tÿ hê ra tĩg ke mũ ki kagtĩg nÿtĩ, ti tÿ hê tá kãtĩg ên ti ke gé. Ge ti nĩgtĩ, Topê kuprĩg tÿ ùn han mãn mũ ag mré," he tóg, Jesus ti, Nicodemos mÿ. (Topê kuprĩg vég tũ êg tóg nĩgtĩ. Ha ra tóg êg mÿ ã jykre tãg nĩm, ti tÿ

ẽg han mǎn kÿ. Hǎ kÿ Jesus tóg Nicodemos mÿ: “kǎka ri ke nĩ,” he mũ

9 Kÿ Nicodemos tóg: “tag hÿn hẽ ri ke tĩ?” he mũ.

10 Kÿ Jesus tóg ti mÿ: “Israel ag kanhrǎn ǎ tóg tĩ, hǎ ra ǎ tóg sÿ ǎ mÿ nén tó mũ tag ki kagtĩg nĩ,” he mũ.

11 “Ki hǎ sóg tó mũ, hǎ kÿ sóg ǎ mÿ kǎmẽn mũ. Sÿ nén ù ki kanhrǎn mũ ẽn hǎ tó sóg tĩ. Isÿ nén ù ve ja ẽn hǎ kǎmẽn sóg tĩ, hǎ ra ǎjag tóg mẽ jǎvǎnh nÿtĩ.

12 Isÿ ǎjag mÿ ga kri vẽnh jykre kǎmẽn mũ ra ǎjag tóg jẽmẽ sór tũ nĩgtĩ. Kÿ ǎjag hÿn hẽ ri kenh ke mũ', sÿ ǎjag mÿ kanhkǎ tá vẽnh jykre kǎmẽn kÿ?” he tóg.

13 “Ha vé, ǎjag kǎmĩ ù vÿ kanhkǎ ra tǎpny tũ nĩ, tá vẽnh jykre ẽn ve jé. ǎjag jǎvo isóg tá kǎkutẽ ja nĩ, hǎ kÿ sóg tó tĩ. Inh jamǎn hǎ vẽ. Tÿ sóg ẽprǎ ke fi kósin nĩ,” he tóg, Jesus ti.

14 “Moisés vÿ pÿn tÿ ka to sa ja nĩgtĩ, ga kórég ẽn tá. Pÿn tÿ ferro kusũg tÿ há ẽn tÿ tóg ka to sa ja nĩgtĩ. Tag ri ke han jé ag tóg ke mũ, isÿ, isÿ tÿ ẽprǎ ke fi kósin nĩn kÿ.

15 Kÿ ù tÿ inh ki rǎnh ke mũ ẽn vÿ kren ke mũ. Rĩr krÿg ja tũ ve jé tóg ke mũ. Hǎ jé ag tóg ka to isanh ke mũ.

16 Topẽ vÿ ga kri mũ ag to há nĩ, hǎ kÿ tóg ǎ kósin pir fẽg, vẽnh kar tÿ ti ki ge jé, ag tÿ tũ' he tũ nĩ jé, ag tÿ ẽg rĩr krÿg ja tũ ẽn ven jẽ.

17 Topẽ vÿ ǎ kósin jẽnẽ, ti tÿ ẽprǎ ke ag krenkren han jé. Ti pi(jé) sÿ ǎjag vóg kónǎn

jé inh jẽnẽ,” he tóg, Jesus ti, Nicodemos mÿ.

18 “Û tÿ inh ki rǎnh ke mũ to tóg jũnh ke tũ nĩ, Topẽ ti. Jǎvo tóg ù tÿ inh ki ge tũ ẽn ag hǎ to jũ nĩ isÿ tÿ ti kósin pir nĩn kÿ,” he tóg.

19 “Topẽ tÿ ù tÿ inh ki ge tũ ag to jũ vÿ ge nĩ, ha mẽ. Ga kri mũ ag kanhrǎn sóg tĩ, hǎ ki sóg ag mÿ jẽngrẽ ri ke nĩ. Hǎ ra ag tóg mẽ sór tũ nĩgtĩ. Kuty mĩ ag tóg mũ sór mũ, jẽngrẽ tóg ag mÿ kórég nĩ, ag jykre pǎno nĩn kÿ.

20 Û tÿ vẽnh jykre pǎno han mũ kar vÿ kurǎ to kórég nÿtĩ, kÿ ag tóg kurǎ ki vẽnh ven sór tũ nĩ, vẽnh kar tÿ ag jykre pǎno venh ha mẽ tĩn kÿ.

21 Û tÿ Topẽ vÿ ki króm mũ ag vÿ kurǎ ki vẽnh ven sór tĩ. Kurǎ tóg ag mÿ sér tĩ, vẽnh kar tÿ ag jykre hǎ ven jé. Topẽ vÿ ag tar han tĩ, ag tÿ nén ù há han jé. Hǎ ve jé ag tóg ke mũ, vẽnh kar ag,” he tóg, Jesus ti, Nicodemos mÿ. Ti tÿ ti mÿ Topẽ jykre kǎmẽn ja hǎ vẽ.

João Batista tÿ Jesus kǎmẽn mǎn

22 Ẽn kǎ kejẽn Jesus tóg ǎ mré mũ tĩ ag mré ga tÿ Judéia ra tĩ mũ, kÿ ag tóg tá nÿtĩ, vẽnh kar kygpe kÿ.

23 Hǎ ra João vÿ ag kygpég mũ gé, ẽn kǎ, vǎnh tÿ Enom tá, Salim tóg tá kakó nĩ. Tá goj vÿ éhé nĩ, hǎ kÿ tóg ag tÿ tá vẽnhmǎn kÿ ag kygpég mũ, João ti.

24 Ẽn kǎ tóg ver se kÿ jẽ tũ nĩ, João ti.

²⁵ Kejën Judeu ù tóg tá nĩ gé, hã ra tóg João mré mũ tĩ ag vĩ kafãn mũ. “Goj tỹ ěg tóg Topě mỹ jãnhkri kỹ nĩgtĩ,” he tóg mũ, ag mỹ, Judeu ěn ti. Hã ra ag tóg jagně vĩ kafãn mũ.

²⁶ Kỹ João mré mũ ag tóg João mỹ tag tó mũ, ha mẽ. “Ũ tỹ Jordão mâtá ã mré nĩ ja ěn vỹ ag kygpég jě nĩ, ã tỹ ěg mỹ ùn kãmén ja ěn ti. Hã ra vėnh kar vỹ ti mré mũ mũ ha, hã kỹ ag tóg ã venh kãmũ mãn tũ nĩ ha,” he ag tóg mũ, João mỹ, Jesus to.

²⁷ Hã ra tóg ag mỹ: “há ti nĩ,” he mũ. “Topě tỹ ěg mỹ ùn nĩm mũ ěn hã vég ěg tóg tĩ,” he tóg.

²⁸ “Mĩ ěkrén nĩ, sỹ ãjag mỹ nén tó ja ti, hã vỹ: inh pi (jé) tỹ Cristo nĩ’, he mũ. Sỹ ti jãmĩ tũg ke hã jé tóg inh jěně, Topě ti, he ja sóg nĩ ãjag mỹ,” he tóg, João ti.

²⁹ “Vėnh prũg to jykrén nĩ. Ũn prũg mũ hã vỹ ã prũ ke fi mré nĩ nĩ. Ti régre tóg hã ra ti rã hã jě, ùn prũg mũ ěn rã hã, kỹ tóg ti vĩ męg mũ, hã ra tóg ti mỹ mẽ sér pě tĩ, ti, vĩ ti. Ge ti nĩ, inh mré. Inh mỹ tóg sér tĩ, vėnh kar tỹ ti mré mũn kỹ, ti tỹ ùn prũg mũ ri ke nĩn kỹ, Jesus ti.

³⁰ Ũn e tỹ ti mré mũn kỹ tóg há tĩ, kỹ tóg tỹ ùn mág nĩnh mũ ha. Hã ra sóg tỹ nén ù tũ nĩnh ha,” he tóg, João ti.

Jesus tỹ kynhmỹ kãtĩ

³¹ “Ũn tỹ kynhmỹ kãtĩ mũ ěn vỹ vėnh kar kafór nĩ. Ěprã ke ag vỹ tỹ ěprã ke nỹtĩ, kỹ ag tóg ěprã ke jykre tỹ vėmén tĩ.

Ũ tỹ kanhkã tá kãtĩ mũ ěn vỹ tỹ vėnh kar kri ke jě.

³² Kỹ tóg ã tỹ tá nén ve ja ěn hã tó mũ, ã tỹ tá nén mẽ ja ěn, hã ra ag tóg ti vĩ mẽ sór tũ nĩ.

³³ Ũ tỹ ti vĩ męg mũ ag hã ra Topě to: “ki hã tóg tó tĩ,” he mũ.

³⁴ Topě tỹ ùn jěněg mũ ěn vỹ ti vĩ kãmén mũ. Topě kuprĩg vỹ Jesus tar han mũ, ti tỹ tỹ ti jagrě pě nĩn kỹ, ti tỹ ti ve mág han kỹ.

³⁵ Topě vỹ ã kósin to há tãvĩ nĩ, kỹ tóg ti mỹ nén (ũ) kar tovãnh, ti hã tỹ ki rĩr jé.

³⁶ Hã kỹ ù tỹ ti kósin ki rã mũ vỹ ter mãn ke tũ nĩ. Rĩr krỹg ja tũ ve jé tóg ke mũ. Ũ tỹ ti vĩ han sór tũ ěn vỹ tag venh ke tũ pě nĩ, rĩr krỹg ja tũ tag ti. Topě vỹ ti vóg kónãn ke mũ, kỹ tóg tũg’ henh ke tũ nĩ, Topě tỹ ti vóg kónãn ke ti,” he tóg, João ti. Ti tỹ ã mré mũ tĩ ag mỹ Jesus kãmén jan hã vė.

4

Jesus tỹ Samaria tá fi mré vėmén mũ

¹ Kỹ Fariseu ag vỹ męg mũ, ùn tỹ hėn ri ke ag tỹ Jesus mré mũ ěn ti. Ũn e ag kygpég tóg mũ gé, Jesus ti, João tỹ ùn kygpe ja ag kãfór.

² Hã ra Jesus vỹ ag kygpe ja tũ nĩ. Ti mré mũ tĩ ag hã vỹ ag kygpe ja nĩgtĩ.

³ Kỹ Jesus tóg męg mũ, Fariseu ag tỹ ti tỹ tỹ ùn mág nĩ mẽ ja ti, hã kỹ tóg ga tỹ Judéia tá kãkutě kỹ ga tỹ Galiléia ra tĩ mũ, ti mré mũ tĩ ag mré.

⁴ Galiléia ra tĩg jé tóg ver ga tỹ Samaria fĩn rãm mũ.

⁵ Fĩn rãm kÿ tóg Samaria tá cidade ù tá jun mũ, hã vÿ: Sicar, he mũ. Tán kakó nĩ, Israel jóg'jóg ve tÿ Jacó japÿ ja ti. Êpÿ ãn fi ja tóg nĩ, ã kósın tÿ José mũ, Jacó ti.

⁶ Kÿ Jacó tÿ poço vÿ tá nĩ gé. Jesus tÿ poço ãn tá jun kÿ tóg tá vẽnkhán kÿ nĩ nĩ, poço ãn rã hã. Rã tÿ ãg nĩno kã sa ra ke ja vẽ.

⁷ Jesus tÿ tá nĩn kÿ ùn tÿtá fi vÿ tá jun mũ, Samaria tá ke ù fi. Goj run jé fi tóg kãtĩ mũ. Kÿ Jesus vÿ fi mũ: “inh mũ goj jun, sÿ kron jé,” he mũ.

⁸ Ti mré mũ tĩ ag vÿ tá tũgtũ nÿtĩ, ã pir mũ tóg tá nĩ nĩ, Jesus ti. Cidade ra ag kagáv, vẽnẽn comprar he jé.

⁹ Jesus tÿ fi mũ goj to vĩn kÿ fi tóg ti mũ: “Judeu vÿ tÿ ã nĩ, hã ra ã tóg inh mũ goj to vĩ mũ,” he mũ, “isÿ tÿ Samaria tá ke nĩ ra,” he fi tóg mũ, Jesus mũ. Judeu ag vÿ Samaria tá ke ag to é he tĩ, hã kÿ fi tóg ti mũ ke mũ.

¹⁰ Kÿ Jesus tóg fi mũ: “Topẽ tÿ ã mũ nén han sór mũ tag ki kagtĩg ã nĩ ver,” he mũ. “Kÿ ã tóg inh ki kagtĩg nĩ gé. Ke tũ nĩ mũ ra ã tóg inh mũ: “inh mũ goj nĩm,” henh ke mũ vẽ, kÿ sóg ã mũ goj ror tÿ goj nĩm ke mũ vẽ,” he tóg fi mũ, Jesus ti.

¹¹ Kÿ fi tóg Jesus mũ: “runja tũ ã nĩ,” he mũ, “kÿ ã hÿn hẽ ri kenh mũ, ã tÿ goj ror tÿ goj ãn run jé? Téj jagy ti nĩ, poço ti,” he fi tóg ti mũ.

¹² “Ëg jóg'jóg ve tÿ Jacó vÿ poço tag han, kÿ ag tóg ti goj kron, ti krẽ ke gé, ti mẽg ke gé.

Ã mũ ti kãfór nĩ, hã kÿ ã mũ goj ror tÿ goj run sór mũ?” he fi tóg mũ, Jesus mũ.

¹³ Kÿ Jesus tóg fi mũ: “ã tÿ goj tag kron kÿ ã tóg kãnhmar kron mãn sór mũ,” he mũ.

¹⁴ “Isÿ ã mũ goj nĩm kÿ ã tóg kron pir han kar kÿ há nĩ ha, kron mãn sór ke tũ ã nĩ sir. ã kãki tóg goj ror han ke mũ, sÿ ã mũ goj nĩm ke ti. Kÿ goj tag vÿ ã ter ke tũ han ke mũ, ha vemnĩ,” he tóg, Jesus ti.

¹⁵ Kÿ fi tóg ti mũ: “inh mũ nĩm gé, goj tag ti,” he mũ. “Kÿ sóg tag ki run mãn ke tũ nĩ ha, kÿ sóg kron sór mãn ke tũ nĩ ha,” he fi tóg.

¹⁶ Hã ra Jesus tóg fi mũ: “kÿ ã mén jé prẽrnĩ ge, ti mré inh venh kãtĩg nĩ,” he mũ fi mũ.

¹⁷ “Hã ra sóg mén tũ nĩ,” he fi tóg. “Hÿ,” he tóg, Jesus ti. “Mẽn tũ ã nĩ, ki hã ã tóg tó mũ.

¹⁸ ã mén ag vÿ ù tÿ 5 (ke) ja nĩgtĩ, kÿ ã tÿ ùri ùn mré nĩ ãn pi(jé) tÿ ã mén nĩ'. Ki hã ã tóg tó mũ,” he tóg, Jesus ti.

¹⁹ Kÿ fi tóg Jesus mũ: “Topẽ vĩ tó jafã vÿ tÿ ã nĩ, vég isóg nĩ nĩ,” he mũ. “Kÿ inh mũ tag tó, ha mẽ. Ëg jóg'jóg ve ag vÿ tag ki Topẽ mré vẽnén tĩ ja nĩgtĩ, pãnónh tag kri, kÿ ãg tóg ùri ke tĩ gé.

²⁰ Hã ra tóg ãjag mũ há tũ nĩ, tag, ãjag tÿ tÿ Judeu nÿtĩn kÿ. “Jerusalém tá ãg Topẽ mré vẽnén ke mũ, Jerusalém tá ãg tóg ti mũ: ùn mág vÿ tÿ ã nĩ, henh ke mũ,” he ãjag tóg tĩ. Ti hÿn hẽ tá há nĩ, ãg tÿ Topẽ mré vẽnén ke ti?” he fi tóg, Jesus mũ

21 Hã ra Jesus tóg fi mÿ: “ha mẽ, sÿ ã mÿ nén kãmén ke ti,” he mũ. “Kãnhmar ãjag tóg pãnónh tag kri ãg jóg tÿ Topê mré vēmén mãn ke tũ nĩ, kÿ ãg Jerusalém tá ti mré vēmén mãn ke tũ nĩ gé.

22 Topê mré ãjag tóg vēmén sór ti, hã ra ãjag tóg ãjag tÿ ùn mré vēmén mũ ki kagtig nÿtĩ. ãjag jãvo ãg tóg ti ki kanhró nÿtĩ, ù tÿ vènh kar krenkren han ke ên tÿ tÿ Judeu krê'krê ag kã ù nĩn kÿ.

23 Kãnhmar vènh kar vÿ Topê mré vēmén há han ke mũ. Kakó ti nĩ ha, kurã tag. Kÿ ù tÿ ti mré vēmén mũ ag vÿ Topê kuprĩg tÿ jagrê nÿtĩ, hã kÿ ag tóg ti mré vēmén há han ke mũ, ãg jóg mág mré. ù tÿ ge hã jãvãnh ti mũ, ãg jóg mág ti, ag tÿ ti mré vēmén jé, ti mÿ: “ùn mág vÿ tÿ ã nĩ,” he jé,” he tóg.

24 “Ëg pi(jé) Topê vég tĩ, hã ra tóg ãg mré nĩ nĩ. Kÿ, ãg tÿ ti mré vēmén sór kÿ ãg tóg ti kuprĩg tÿ jagrê nÿtĩnh mũ, ãg tÿ ti mré vēmén há han jé, ãg tÿ ti vég tũ ra. Ëg tÿ ti mÿ: “ùn mág vÿ tÿ ã nĩ,” hen kÿ ãg tóg ti mÿ ón ke tũ nĩ, vènh vĩ há hã tó jé ãg tóg ke mũ,” he tóg mũ, Jesus ti, fi mÿ.

25 Kÿ fi tóg ti mÿ: “hÿ,” he mũ. “Messias ên vÿ kãtig ke mũ, ãg tÿ ù to: Cristo, he mũ ên. Ên vÿ ãg mÿ kãmén kãn ke mũ, tag kar ti,” he fi tóg ti mÿ.

26 Kÿ Jesus tóg fi mÿ: “inh hã vè,” he mũ. “Û tÿ ã mré vēmén jèn hã vè,” he tóg.

27 Ti tÿ fi mÿ tag tó kÿ ti mré

mũ tĩ ag tóg ti tá junjun mũ. Kÿ ag tóg ti tÿ fi mré vēmén vég mũ, kÿ tóg ag mÿ e tãvĩ tĩ. Hã ra ag tóg ti mÿ nén ù tó tũ nĩgtĩ. “Á tÿ ne mẽ sór nẽ, fi ki?” he tũ ag tóg nĩgtĩ. “Á tÿ ne tó nẽ, fi mÿ?” he tũ ag tóg nĩgtĩ gé.

28 Hã ra fi tóg ã runja ré kÿ ti mũ, ã jamã ra. Kÿ fi tóg ã nĩgia tá ke ag mÿ:

29 “mũ nÿ, ù ve jé,” he mũ. “Inh mÿ tóg sÿ nén han ja tó kãn. Ti mÿ tÿ Cristo tũ nĩ vÿ?” he fi tóg ag mÿ.

30 Kÿ ag tóg fi mré kãmũ mũ sir, ti ve jé.

31 Fi tĩg kar kÿ ti mré mũ tĩ ag tóg Jesus mÿ “vějèn ti ko ra,” he mũ.

32 Hã ra tóg ag mÿ: “ijèn vÿ nĩ nĩ, hã ra tóg ãjag jèn ri ke tũ nĩ,” he mũ.

33 Kÿ ag tóg jagnẽ mÿ: “ù nÿ ti mÿ vějèn nĩm hÿn?” he mũ.

34 Hã ra Jesus tóg: “ijèn to ken hã vè, hã vÿ: tÿ isÿ Topê rãnhraj han kãn ke, he mũ, isÿ ù tÿ inh jènẽg mũ ên vĩ han ke, he mũ gé,” he tóg, Jesus ti.

35 “ãjag mÿ ti kysã tÿ 4 (ke) nĩ ver, ãg tÿ ãg jakré kanẽ venh ke ti. Ha Sicar tá kãmũ mũ ag vigvé. Ûri ag tóg inh ke ge sór mũ, kÿ ag tóg inh mÿ ãg jakré tóg nÿ ên ri ke nÿtĩ.

36-38 Fi mÿ sóg Topê vĩ tó, kÿ fi tóg ã mré ke ag mÿ tó. Hã ra sóg ãjag mÿ: “ha ag mÿ tó mãn, ag tÿ inh ki ge jé,” he mũ. Kÿ ãjag tóg ù jakré kym ri ke han mũ, ãjag tÿ Sicar tá ke ag tÿ inh ki ge mũ ven kÿ. “Û vÿ krãn tĩ, kar kÿ ù vÿ ti kanẽ mãg tĩ,” he ãg tóg tĩ. Ki hã tó

vê, tag, êg tỹ êprã ke ag tỹ inh ki genh ke to jykrén kỹ. Kỹ ù tỹ ag mỹ tó mãn mũ mỹ tóg sér tĩ, ti tỹ ag tỹ inh ki ge mũ ven kỹ. ã rãnrãj kaja vég tóg mũ sir. Hã ra ù tỹ ag mỹ tó ven ja ên mỹ tóg sér tĩ gé, ag tỹ inh ki ge mũ ti. ã rãnrãj kaja vég ti tĩ gé,” he tóg, Jesus ti, ã mré mũ tĩ ag mỹ.

39 Hã ra ùn tỹtã ên fi tóg ã mré ke kar ag mỹ: “inh mỹ tóg sỹ nén han ja tó kãn,” he ja nĩ, Jesus to. Kỹ ag tóg Jesus ki ge mũ, fi vỹ to.

40 Kỹ ag tóg Jesus tá junjun mũ sir. Kỹ ag tóg ti mỹ: “tũg tũg nĩ. Êg mré nĩmnĩ,” he mũ. Kỹ tóg ag mré kurã régre tũg mũ.

41 Kỹ ù tỹ hên ri ke ag tóg ti ki ge mũ sir, ti vỹ to.

42 Ûn tỹtã ên fi mỹ ag tóg: “ã vỹ tigrĩn êg tóg ti ki ge mũ,” he mũ, “hã kỹ êg tóg ùri ti vỹ mēg mũ, kỹ êg tóg ti vỹ tũgnĩn ti ki ge pē han kỹ nỹtĩ, ùri. Ti ki kanhró êg tóg nỹtĩ ha. Vēnh kar kren han tĩ ên vē mỹr,” he ag tóg mũ, ùn tỹtã ên fi mỹ. Hã kỹ Samaria tá ke tỹ hên ri ke ag vỹ Jesus ki ge kỹ nỹtĩ.

Jesus tỹ pã'i kósin tỹ há' he

43 Jesus tỹ Samaria tá ke ag mré kurã régre tũg kar tóg ga tỹ Galiléia ra tĩ mũ sir.

44 “Û tỹ Topē vỹ tó ti ên jamã tá ke ag ne tóg Topē vỹ tó tĩ ên to é he tĩ,” he ja tóg nĩ, Jesus ti, hã kỹ tóg kór há ra tĩ mũ, Galiléia ra.

45 Hã ra ag tóg, ti tỹ tá jun kỹ (ag tóg) ti mỹ vỹ há han mũ. Ti ve ja ag tóg nĩ, Jerusalém tá, festa tỹ Páscoa ên tá, kỹ ag tóg

ti tỹ tá nén hyn han ja ên ve kãn. Hã kỹ ag tóg ti mỹ vỹ há han mũ.

46 Kỹ Jesus tóg êmã tỹ Caná ra tĩg mãn mũ, ga tỹ Galiléia tá êmã tỹ Caná ên ra. Tá tóg goj tỹ vinho han ja nĩgtĩ. Ên tá cidade tỹ Cafarnaum vỹ kakó nĩ.

Cafarnaum tá pã'i mág tóg nĩgtĩ. Ti kosin vỹ kaga nỹ nĩ.

47 Kỹ tóg mēg mũ, Jesus tỹ Judéia tá kãtĩg ja ti, ti tỹ Galiléia tá jun ja ti, pã'i mág ên ti. Kỹ tóg ti venh kãtĩ mũ. “Inh mré inh kósin venh kãtĩg,” he tóg mũ, Jesus mỹ. “Kaga jagy tóg nỹ, kỹ tóg inh mỹ ti ter ha mē tĩ. ã mỹ ti tỹ há' henh ke tũ?” he tóg, pã'i mág ti Jesus mỹ.

48 Hã ra Jesus tóg ti mỹ: “isỹ êg tỹ nén han vãnhan mũ ve sór ãjag tóg mũ, ãjag tỹ hên ri ke mũn inh ki ge jé,” he tóg, Jesus ti.

49 Hã ra pã'i ên tóg Jesus ti mỹ: “vó,” he mũ. “Kuri inh mré tĩg, ti ter tũ nĩ jé,” he tóg.

50 Kỹ Jesus tóg ti mỹ: “ha ã hã tĩg,” he mũ. “Há tóg nĩ ha, ã kósin ti,” he tóg. Kỹ tóg Jesus vỹ tag kri fi kỹ tĩ mũ sir, pã'i ên ti.

51 Ti tĩg kỹ tóg ã camarada ag kato tē mũ. Tỹ vaj kỹ ke vē. Ti ãn tá ag tóg kãmũ mũ, kỹ ag tóg ti mỹ: “ã kósin tóg há' hé huri,” he mũ sir.

52 Kỹ tóg ag mỹ: “ti rã tỹ hē kã sa ra há' hé?” he mũ. Kỹ ag tóg ti mỹ: “rãké tá, meio dia pãte ke sĩ,” he mũ. “Ên kã ti rỹg tóg tũ' he mũ,” he ag tóg ti mỹ.

⁵³ Hora ên kã Jesus tóg ti mÿ: “ã kósín vÿ há nĩ,” he ja nĩ. Kÿ tóg to jykrén há han mÿ sir, pã'i ên ti, kÿ tóg Jesus ki rã mÿ, ti prÿ fi ke gé, ti krê kar ag ke gé, ti camarada kar ag ke gé.

⁵⁴ Jesus vÿ ga tÿ Judéia tá kãtÿg kÿ ga tÿ Galiléia ra tÿg ja nĩ. Ên kã tóg milagre ên han, kÿ tóg tÿ régre nÿtĩ, ti tÿ êg tÿ nén ù han vãn hyn han mÿ ti.

5

Jesus tÿ ùn grÿn grÿn kÿ nÿ tÿ há' he

¹ Tag pãte Judeu ag tÿ festa há ù tóg kejên kutê mÿ, kÿ Jesus vÿ Jerusalém ra tĩ mÿ.

² Tá goj nig tóg nÿgtĩ, cidade jyró jãnkã rã hã, jãnkã ên jijin hã vÿ: carneiro jo jãnkã, he mÿ. Goj pénin tóg ãn tÿ 5 (ke) nÿtĩ, vênh kaga jo ãn. Goj ên jÿjÿ hã vÿ: Betesda, he mÿ.

³ Ên tá vênh kaga tÿ hên ri ke ag vÿ nÿtÿgtĩ, ùn kyvó ag, ùn tÿg vãn ag, ùn grÿn grÿn kÿ nÿtĩ ag ke gé.

⁴ Goj vãn vãn he mÿ jãvãn kÿ ag tóg nÿtĩ. Kejên Topê tÿ jênê jafã vÿ goj ki rã kÿ tÿ vãnvãn he han mÿ. Ên kã ù tÿ kãrãn vén mÿ ên tóg há' he tĩ. Vênh kaga kar tÿ há' he tĩ, goj vãnvor mÿ ên, ù tÿ ki ge vén mÿ ag kar tÿ.

⁵ Ên tá ù tóg nÿgtĩ, ùn kaga ù. Kaga nĩ ki tóg 38 (ke) anos han mÿ.

⁶ Kÿ Jesus tóg tá jun kÿ ti vég mÿ, ti tÿ tá nÿn kÿ. Hã ra tóg ki kanhró nĩ, ti tÿ vãsÿ tá kaga

nÿ ki. Kÿ tóg ti mÿ: “ã mÿ há' he sór tũ?” he mÿ.

⁷ Hã ra tóg ti mÿ: “vó,” he mÿ. “Hã ra tóg tũ tũ, ù tÿ goj kãkã inh fêg ke ti,” he tóg, ùn kaga ti. “Gøj tÿ vãn vãn he kÿ ag tóg inh jo kã ra ge tĩ, ijo tá jun kÿ,” he tóg, ùn kaga si ên ti.

⁸ Kÿ Jesus tóg ti mÿ: “jêg ra,” he mÿ. “Ã cama va tÿg,” he tóg, Jesus ti, ùn kaga si ên mÿ.

⁹ Vêsÿmér tóg há' he mÿ, kÿ tóg ã cama va tĩ mÿ sir. Vênhkán ke kurã ki ke vê, Jesus tÿ ti han mÿ ti.

¹⁰ Ti tÿ vênhkán ke kurã ki ã cama va tÿg kÿ pã'i ag tóg ti mÿ: “vênhkán ke kurã ki êg tóg nén ù va tÿg ke tũ nĩ vê,” he mÿ. “Ã tÿ nén han ke tũ han ã tóg mÿ,” he ag tóg ti mÿ.

¹¹ Kÿ tóg ag mÿ: “ù tÿ isÿ há' he mÿ ên vÿ inh mÿ: “ã cama va tÿg,” he ja nĩ, hã kÿ sóg va tĩ mÿ,” he tóg.

¹² Kÿ ag tóg ti mÿ: “ù nÿ ã mÿ: “ã cama va tÿg,” hé?” he mÿ.

¹³ Hã ra tóg ki kagtÿg nĩ, ù tÿ ti tÿ há' he mÿ ên ti. Jesus vÿ ti tÿ há' he kar tÿg ja nĩ, vêsÿmér. E ag nÿtĩ, goj ên tá, vênh kaga ag, hã kÿ Jesus tóg ag ré kÿ tÿg ja nĩ. Kÿ ùn kaga ja ên tóg ti jiji mē ja tũ nĩ.

¹⁴ Kar kÿ Jesus tóg ti ve mãn mÿ, Topê jo ãn tá. Kÿ tóg ti mÿ: “ha vé,” he mÿ. “Ã tÿ inh há' hé. Topê vÿ mranh mãn sór tÿg nĩ, ã tÿ ti vÿ mranh mãn mÿ ra ã tóg ã kaga kãfór venh ke mÿ, ha vemní,” he tóg ti mÿ, Jesus ti, ã tÿ ù tÿ há' he ja ên mÿ.

15 Hã ra tóg tĩ mũ, pã'i ag mỹ Jesus ti tó jé.

16 Kĩ ag tóg ti tén sór mũ sir, ti tỹ vènhkán ke kurã ki ùn kaga ên tỹ há' hen kỹ.

17 Hã ra Jesus tóg pã'i ag mỹ: “inh panh vỹ rãnrãj kỹ nĩ nĩ, êg jóg mág ti,” he mũ. “Kỹ sóg ver ti kóm isũ han ke mũ gé,” he tóg, Jesus ti, pã'i ag mỹ.

18 Kĩ ag tóg ti to jũ jagy han mũ. “Ti tén jé êg tóg ke mũ,” he ag tóg mũ sir jagnẽ mỹ. Vènhkán ke kurã ên ki tóg ã tỹ nén han ke tũ ên han ja nĩ, Jesus ti, Judeu ag jykre tovãnh kỹ. Hã ra tóg Topẽ to: “inh panh vỹ tỹ ti nĩ,” he mũ gé. Ti tỹ vëso: “Topẽ ri ke inh nĩ,” he vë. Hã kỹ ag tóg ti to jũ mũ, pã'i ag.

Jesus tỹ ã tỹ tỹ Topẽ kósin nĩ kãmén

19 Kĩ Jesus tóg ag mỹ vènh kãmén mũ. “Ki hã sóg tó mũ, ha mẽ,” he tóg. “Êg jóg mág kósin vỹ ã pir mỹ nén ù han ki kagtĩg nĩ. ã panh vég ti tĩ, êg jóg mág kósin ti, kỹ tóg ã tỹ ã panh ki nén vég mũ ên hã han tĩ. Êg jóg mág tỹ nén han mũ ên hã han tóg tĩ gé, ti kósin ti.

20 Êg jóg mág vỹ ã kósin to há tãvĩ nĩgtĩ, hã kỹ tóg ti mỹ ã tỹ nén han mũ ên ven kãn mũ. Ti tỹ nén han mũ ù ve ãjag huri, hã ra ãjag tóg ti kãfór venh ke mũ ver, ha vemnĩ, kỹ tóg ãjag mỹ e tĩnh mũ.

21 Tag ve jé ãjag tóg ke mũ, ha mẽ. Êg jóg mág tóg ùn kãgter mũ ag rĩnrĩn mãn tĩ, ag rĩnrĩn nỹtĩ jé. Ên ri ke han jé tóg ke mũ gé, ti kósin ti. ã tỹ

ùn rĩn mãn mũ ên rĩn mãn jé tóg ke mũ.

22 Kĩ êg jóg mág vỹ vènh kar jykre tugnyĩm ke mũ, hã ra tóg ã kósin mỹ tag tovãnh.

23 Ti mỹ tóg tag tovãnh, vènh kar tỹ ti to: “ùn mág vỹ tỹ ti nĩ,” he jé, ag tỹ êg jóg mág to: “ùn mág vỹ tỹ ti nĩ,” he mũ tag ri ke. Û tỹ ti kósin mỹ: “ùn mág vỹ tỹ ã nĩ,” he jãvãnh kỹ tóg êg jóg mág mỹ tag tónh ke tũ nĩ gé. Ti hã vỹ ã kósin jênẽ ja nĩgtĩ. Inh hã vë, ti kósin ti,” he tóg, Jesus ti.

24 “ãjag mỹ sóg tag tó mũ, ha mẽ. Ki hã sóg tó mũ, ha mẽ. Û tỹ inh vỹ jëmêg mũ ên vỹ ter ke tũ nĩ, rĩr krỹg ja tũ ve jé tóg ke mũ, ti tỹ ù tỹ inh jênẽg mũ ên ki rã kỹ jên kỹ. Ên to tóg jũnh ke tũ nĩ, Topẽ ti. Ti ter ke vë vë, hã ra tóg ter ke tũ nĩ.

25 Ki hã sóg tó mũ, ha mẽ. Kãnhmar ùn kãgter kỹ nỹtĩ ag vỹ Topẽ kósin vỹ mẽnh ke mũ, kỹ ùn tỹ ti vỹ mẽg mũ ag vỹ rĩnrĩr mãn ke mũ. Kakó tãvĩ ti nĩ ha, ag rĩnrĩr mãn ke kurã ti.

26 Inh panh vỹ ã pir mỹ vènh kar rĩnrĩr han ki kanhró nĩ, hã ra tóg inh mỹ ã jykre tag nĩm gé, sỹ vènh kar rĩnrĩr han mãn jé gé, isỹ tỹ ti kósin nĩn kỹ.

27 Kỹ tóg inh mỹ: “êprã ke kar jykre tugnyĩm nĩ,” he ja nĩgtĩ, isỹ tỹ êprã ke fi kósin nĩn kỹ.

28 Tag hỹn tóg ãjag mỹ e tĩ, sỹ ãjag mỹ: “vènh kar rĩnrĩr han jé sóg ke mũ,” hen kỹ. Sỹ ke há vë, hã ra. Kejên ùn kãgter mũ kar ag vỹ inh vỹ mẽnh ke mũ, kỹ ag tóg ãjag kej tá kãpa kãn ke mũ.

29 Kÿ ùn tÿ vënh jykre há han mũ ag vÿ rĩnrĩr mǎn kÿ rĩr krÿg ja tũ ên venh ke mũ, jǎvo ùn tÿ vënh jykre pǎno han mũ ag rĩnrĩr mǎn sĩ han kÿ nũgme ki vár kǎn ke mũ,” he tóg, Jesus ti.

Jesus tÿ vënh kǎmén mũ

30 Kÿ tóg ag mÿ: “inh pi(jé) isÿ vësóg ki nén to jykrén mũ ên han tĩ’,” he mũ, Jesus ti. “Inh panh tÿ inh mÿ nén tó mũ ên hǎ tó sóg tĩ, isÿ vënh kar jykre tugnÿm ken kÿ. Hǎ kÿ sóg ki hǎ tó tĩ, isÿ vësóg ki to jykrén tũ nĩn kÿ. Û tÿ inh jënëg mũ ên tÿ inh mÿ nén tó mũ ên hǎ tó sóg tĩ, hǎ kÿ tóg há kar nĩ,” he tóg.

31 “Kÿ isÿ vëso: “êg jóg mág vÿ inh jënë, inh panh ti,” henh mũ ra ãjag tóg inh mÿ: “ǎ ón nê,” henh ke mũ vë.

32 Û vÿ iso: “Topê vÿ ti jënë,” he mũ. Hǎ ra tóg ki hǎ tó mũ, ù tÿ iso tag tó mũ ti.

33 Kÿ ãjag tóg João ki jëmë sór ja nĩ gé, hǎ kÿ ãjag tóg ti mÿ vënh vĩ jënë ja nĩgtĩ. Kÿ tóg ãjag mÿ inh kǎmén há han ja nĩgtĩ gé.

34 Hǎ ra tóg inh mÿ tÿ nén ù tũ nĩ, êprǎ ke tÿ iso: “Topê vÿ ti jënë,” hen kÿ. Hǎ ra sóg ãjag mÿ João vĩ tó mũ, ãjag tÿ ti vĩ kri fi jé, ãjag tÿ inh ki ge jé, ãjag krenkren jé,” he tóg, Jesus ti.

35 “João vÿ ãjag mÿ lampiǎo gru ri ke ja nĩ, ãjag mÿ kurǎ sĩ han kÿ, ti tÿ ãjag mÿ Topê vĩ kǎmén ja nĩn kÿ. Kÿ tóg ãjag mÿ sér tĩ ja nĩ, hǎ ra tóg kurǎ e han tũ nĩ.

36 João vÿ ãjag mÿ inh kǎmén ja nĩ, hǎ ra nén ù vÿ

inh kǎmén tĩ gé, kÿ tóg João vĩ kǎfór nĩ. Inh panh vÿ inh mÿ: “êprǎ ke ag tÿ nén han vǎnh hÿn han nĩ, milagre ti,” he ja nĩ, hǎ kÿ sóg hÿn han tĩ. Isÿ milagre hÿn han mũ tag vÿ inh kǎmén há han tĩ gé. ãjag tÿ milagre tag vigven kÿ ãjag tóg ki kanhrǎn ke mũ vë, êg jóg mág tÿ inh jënë jan ki, inh panh ti.

37 Kar kÿ êg jóg mág vÿ, ù tÿ inh jënëg mũ ên vÿ inh kǎmén tĩ gé. Ti vĩ jëmëg tũ ãjag nÿtĩ, kÿ ãjag tóg ti vëg tũ nĩ gé.

38 Kÿ ãjag tóg ti vĩ to jykrén há han tũ nĩ gé, ãjag tÿ inh ki ge sór tũ nÿtĩn kÿ. Ti hǎ vÿ inh jënë.

39 Topê vĩ to ke ãjag tóg tĩ. Há ti nĩ, tag ti. “Êg tÿ Topê vĩ rá to ken kÿ êg hÿn rĩr krÿg ja tũ venh ke mũ,” he ãjag tóg tĩ. Inh hǎ vÿ ki rán kÿ nĩ, ha mẽ, hǎ kÿ ki ve há han nĩ, vënh rán ki,” he tóg.

40 “Hǎ ra ãjag tóg inh ki ge sór tũ nĩ. ãjag tÿ inh ki ge kÿ nÿtĩ ra ãjag rĩnrĩr kÿ nÿtĩnh mũ vë,” he tóg, Jesus ti.

41 “Êprǎ ke ag tÿ inh mÿ vĩ há han tũ ra tóg inh mÿ tÿ nén ù tũ nĩ.

42 Hǎ ra sóg ãjag jykre ki kanhró nĩ. ãjag pi(jé) Topê to há nÿtĩ’.

43 ãjag mÿ sóg: “êg jóg mág vÿ inh jënë,” henh kǎtĩg ja nĩ, hǎ ra ãjag tóg inh vĩ mẽ sór tũ nÿtĩ. Û tóg kejën ãjag mré vëmén kǎtĩg ke mũ, Topê tÿ ti jënëg tũ (hǎ) ra. Ên vĩ jëmë jé ãjag ke mũ, ha vemnĩ.

44 Inh ki ge sór tũ ãjag nÿtĩ,

ājag tỹ ēprā ke ag vī jēmēn kỹ. Ēprā ke ag tỹ ājag mỹ vī há han kỹ tóg ājag mỹ sér tĩ. Kỹ ājag tóg Topē tỹ ājag mỹ nén tónh ke mū mī ēkrég tũ nĩgtĩ. “Inh jykre mỹ ti mỹ há nĩ vỹ?” he sór tũ ājag nĩ.

⁴⁵ Ājag hỹn iso: “ti hỹn ěg to vī kónān sór mū, ěg jóg mág mỹ,” he tĩ. Hā tũ vē. Ũ tỹ ājag to vī kónān ke mū hā vỹ tỹ Moisés nĩ, ājag tỹ ũ to: “ti hỹn ěg to há tāvĩ nĩ,” he mū ěn ti.

⁴⁶ Ājag tỹ Moisés vī kri fi (hā) ra ājag tóg inh vī kri nĩm ke mū gé vē vē. Moisés vỹ iso livro han ja nĩ, ha mē.

⁴⁷ Hā ra ājag tóg ti vī rá kri fi sór tũ nĩ, hā kỹ ājag tóg inh vī kri nĩm sór tũ nĩ gé,” he tóg, Jesus ti. Ti tỹ pā'i ag mỹ vēnh kāmén hā vē.

6

Jesus tỹ ũn e jēn

(Mt 14.13-21; Mc 6.30-44; Lc 9.10-17)

¹ Tag pāte Jesus tóg kejēn ga tỹ Galiléia tá goj nig fĩn rām mū. Goj ěn jiji hā vỹ: Tiberiades, he mū.

² Kỹ ũ tỹ hēn ri ke ag vỹ ti venh kāmū mū, ti nón, ũn e tāvĩ ag. Ti tỹ nén han vānh hyn han mū ěn ve ja ag tóg nĩ, ti tỹ ũn kagyga ag tỹ há' he mū ti.

³ Kỹ Jesus tóg pānónh tá ā mré mū tĩ ag mré nĩ nĩ.

⁴ Festa tỹ Páscoa ěn vỹ kakó nĩ ha, Judeu ag tỹ festa han tĩ ěn ti.

⁵ Kỹ Jesus vỹ ũn e ěn ki ěvānh mū, ũ tỹ ti vī mēnh kāmū mū ag ki. Kỹ tóg Filipe mỹ: “ěg hỹn hē tá vējēn venh

ke mū, ěg tỹ ũn e tag ag mỹ ven jé?” he mū, Jesus ti.

⁶ Filipe mỹ tóg ke mū, ti tỹ to ti jykre ve jé. Jāvo Jesus vỹ to jykrén há han huri, ti tỹ nén han ke mū ěn to.

⁷ Kỹ Filipe tóg ti mỹ: “ěg tỹ ũn e tag ag mỹ nén ũ sī ven jé ěg hỹn jānkamy tỹ hēn ri ke to comprar henh ke mū, hā ran kākyn kenh ke mū, ha vemnĩ,” he tóg, Filipe ti.

⁸ Kỹ ag mré tĩ ũ tóg, André he mū ěn tóg, Simão Pedro jāvy ěn tóg Jesus mỹ:

⁹ “kyrũ ũ tóg cevada tỹ ěmĩ tỹ 5 (ke) ma kātĩg ja nĩ, kākufár régre mré,” he mū. “Hā ra tóg tỹ nén ũ tú pē nĩ, vējēn sī tag. E tāvĩ ag nỹtĩ,” he tóg mū, André ti.

¹⁰ Hā ra Jesus tóg: “ag mỹ: “nĩgnĩ ra,” hé,” he mū. Kỹ ag tóg nĩgnĩ mū. Tá tóg re gỹnh nĩ, hā kỹ ag tóg tá nĩgnĩ kỹ nỹtĩ. Ũn tỹ 5 mil (ke) ag hỹn tá nỹtĩ, ěg tỹ ag tāvĩ tón kỹ, hā ra fag tóg tá nỹtĩ gé, gĩr tỹ hēn ri ke ke gé.

¹¹ Ag nĩgnĩ kỹ Jesus tóg ěmĩ ěn mág mū, kỹ tóg Topē mỹ: “há ti nĩ,” he mū. Kỹ tóg ag mỹ vēnh kápópām mū sir, kākufár ěn ke gé. Kỹ vēnh kar vỹ ag tỹ nén ko sór mū ěn ko mū sir. Sī tũ tóg nĩ, vējēn ti.

¹² Ag funfór nỹtĩn kỹ Jesus tóg ā mré mū tĩ ag mỹ: “ag tỹ ko ja tũ ěn génh mũjēg, ti vāgfor tũ nĩ jé,” he mū.

¹³ Kỹ ag tóg kěj tỹ 12 (ke) fān mū, cevada tỹ ěmĩ tỹ 5 (ke) ěn ke tỹ, vēnh e ěn tỹ ko kar kỹ.

¹⁴ Kỹ tóg ag mỹ e tĩ, ag tỹ Jesus tỹ milagre tag han mū ven kỹ. Kỹ ag tóg ti to: “Topē

vĩ tó tĩ ên hã vê,” he mũ. “Ëg tỹ ùn jãvãnh mũ ên hỹn tóg,” he ag tóg, Jesus to.

¹⁵ Hã ra Jesus vỹ ki kanhró nĩ, ag tỹ nẽn han sór mũ ti. Ag tỹ Jesus tỹ pã'i mág tỹ rei han sór vê. Tag ki kanhró tóg nĩ, Jesus ti. Hã kỹ tóg ã pir mỹ tĩ mũ, pãnónh ra, vẽnh péju jé.

Jesus tỹ goj nig kri tĩ (Mt 1422-33; Mc 645-52)

¹⁶ Kutyg ke mũ ra ti mré mũ tĩ ag tóg goj nig ra mũ mũ.

¹⁷ Barco kãra ge kỹ ag tóg goj fĩn rãm sór kỹ Cafarnaum ra mũ sór mũ. Kejẽn tóg kuty pẽ nỹ ha, hã ra Jesus tóg ag to vỹn ke ja tũ nĩ ver.

¹⁸ Kỹ vãhã kóho jũ vỹ kãtĩ mũ, kỹ goj vỹ krém ke mũ.

¹⁹ Mũ sĩ han ja ag nĩ, 5 (ke) quilômetros, hỹn, ke tũ nĩ kỹ 6 (ke) quilômetros, goj kri. Vãhã ag tóg Jesus vэг mũ sir, ti tỹ goj kri tĩg kỹ. Ag barco ki tóg jun mũ. Kỹ ag kanê tóg jũrũn ke mũ.

²⁰ Hã ra Jesus tóg ag mỹ: “inh hã vê, mũmẽg tũg nĩ,” he mũ.

²¹ Kỹ tóg ag mỹ sér tĩ, kỹ tóg barco kãra rã mũ sir, ag mré. Ti tỹ ag mré nĩn kỹ ag tóg kãnhmar junjun mũ, kafã ù tá.

Vẽnh kar tỹ Jesus ve sór

²² Hã ra vẽnh e ên vỹ kafã ù tá nỹtĩ ver. Tỹ vaj kỹ ag tóg Jesus jãvãnh mũ, tá. Ti jãvãnh kỹ ag tóg: “barco pir vỹ kã nỹ ja nĩ, kuty kỹ,” he mũ. “Kỹ ti mré mũ tĩ ag vỹ barco ên kãra ge kỹ mũ ja nĩ, hã ra tóg ag mré tĩg ja tũ nĩ,” he ag tóg mũ sir jagnê mỹ, ùn e ên ag. Tag

tó mũ ra ag tóg Jesus vэг tũ nĩ gé.

²³ Kỹ barco ù tóg ki junjun mũ, cidade tỹ Tiberíades tá kãmũ ù. Vẽnh e ên tá ag tóg junjun mũ. Tá Jesus vỹ êmĩ to Topê mré vĩ ja nĩ, kar kỹ tóg vẽnh e ên mỹ vẽnh kãpópãm ja nĩ.

²⁴ Barco tỹ tá junjun mũ ra ag tóg kãra ge kỹ mũ mũ sir, Cafarnaum ra, ti ve jé. “Ki ti tũ nĩ, ti mré mũ tĩ ag vỹ ki tũgtũ nĩ gé. Mũ nỹ, ti nón,” he ag tóg mũ sir, ùn e ag, hã kỹ ag tóg ti nón mũ mũ.

Kanhkã tá pão

²⁵ Ag tỹ Cafarnaum tá junjun kỹ ag tóg tá ti vэг mũ sir, goj nig kafã ù tá, ùn e ên ag. Kỹ ag tóg ti mỹ: “hẽ ri ken kỹ ã ki jun?” he mũ.

²⁶ Kỹ Jesus tóg ag mỹ: “ha mẽ, ki hã sóg tó mũ,” he mũ. “Ãjag tỹ êmĩ ko ja tugrĩn ãjag tóg inh ve sór mũ,” he tóg. “Sỹ milagre hyn han tĩ ên vэг ãjag tóg tĩ, hã ra ãjag tóg to jykrén há han tũ nĩgtĩ,” he tóg. “Ãjag tógá nỹtĩ tag hã ve sór ãjag tóg mũ.

²⁷ Ëg tỹ tag ki vějẽn vэг mũ ên vỹ kãnhmar tũ'henh ke mũ, kỹ tag tãvĩ to vãsãn sór tũg nĩ. Vějẽn ù jé vãsãn nĩ, êmĩ tỹ ãjag rĩnrĩr pẽ han mũ ên jé, êmĩ kórég vãn h ên jé. Sỹ ãjag mỹ êmĩ ên nĩm sór vê. Ëg jóg tỹ Topê tỹ inh mỹ vẽnh rãnhraj nĩm ja hã vê. Ti tỹ inh mỹ tag tó hã kỹ sóg ãjag mỹ nĩm sór mũ, êmĩ ti. Tỹ sóg êprã ke fi kósin nĩ mỹr;” he tóg ag mỹ, Jesus ti.

28 Kÿ ag tóg ti mÿ: “kÿ ãg hÿn hẽ ri kenh ke mÿ, ãg tÿ Topẽ jykre han jé?” he mÿ.

29 Kÿ Jesus tóg ag mÿ: “Topẽ tÿ ùn jẽnẽg mÿ ãn ki gemnĩ,” he mÿ.

30 Kÿ ag tóg ti mÿ: “kÿ ã hÿn ne han ke mÿ, ãg tÿ ve kÿ ã ki gen jé?” he mÿ. “Ã hÿn ne han há nĩgtĩ?”

31 Ëg jóg'jóg ve ag vÿ kanhkã tá pão ãn kó, maná he mÿ ãn, ag tÿ ga kórég ãn mĩ mÿn kÿ. Ag to tag vÿ rán kÿ nĩ, ha mẽ: “kanhkã tá tóg ag mÿ pão jẽnẽ, ag tÿ ko jé,” he ja tóg nĩ, Topẽ vÿ tÿ rán kÿ nĩ ki. Jãvo ã hÿn ãg mÿ ne han ke mÿ?” he ag tóg, Jesus mÿ, ti vÿ kãfã kÿ.

32 Kÿ Jesus tóg ag mÿ: “Moisés pi(jé) ãgag mÿ kanhkã tá pão pẽ nĩm ja nĩ,” he mÿ. “Kĩ há sóg tó mÿ, ha mẽ,” he tóg. “Û tÿ ãgag mÿ kanhkã tá pão pẽ nĩm mÿ ãn vÿ tÿ inh panh nĩ.

33 Topẽ jamĩ vÿ kanhkã tá kãtére mÿ. ãn vÿ ãprã ke kar rĩnrĩr han mÿ,” he tóg, Jesus ti.

34 Kÿ ag tóg ti mÿ: “ãg mÿ ãmĩ ãn nĩm, kurã kar ki,” he mÿ.

35 Kÿ Jesus tóg ag mÿ vẽn kãmén mÿ sir. “Inh há vÿ tÿ ãmĩ ãn ri ke nĩ, inh há vÿ ãgag rĩnrĩr han ke mÿ,” he tóg. “ãg tÿ vjẽn ko mÿ ra ãg tóg kãnhmar kókĩr mãn' he tĩ, goj kron mãn sór ãg tĩ gé. Û tÿ iso kãtĩg mÿ ãn mÿ tóg há ra sér tĩnh mÿ, ti tÿ inh ki rã kÿ. Ti mÿ sér tĩ ãn vÿ tũg' henh ke tũ pẽ nĩ. Isÿ ti mÿ vẽn jykre nĩm ke mÿ ãn vÿ vjẽn kãfór nĩ,” he tóg, Jesus ti.

36 “Hã ra ãgag tóg ãgag tÿ inh vég mÿ ra inh ki ge sór tũ nĩ.

37 Inh panh vÿ ù ag kuprẽg mÿ, ag tÿ tÿ isũ nÿtĩ jé. ãn ag vÿ iso kãmũ tĩ. Û tÿ iso kãmũ tĩ kar ag vÿ inh mÿ há nÿtĩ. Inh pi(jé) ù mÿ: “inh mré kãtĩ tũg,” henh ke mÿ'.

38 Kanhkã tá sóg kãtére ja nĩ. Inh pi(jé) isÿ vêsóg ki nén to jykrén mÿ ãn han sór mÿ'. Û tÿ inh jẽnẽg mÿ tÿ inh mÿ nén tó mÿ ãn há han sóg tĩ, há jé sóg tá kãtére ja nĩ.

39 Ti tÿ inh mÿ nén tó mÿn há vẽ, ha mẽ. “Isÿ ã mÿ ùn jẽnẽnh ke mÿ ãn ki rĩr há han nĩ, ag vãgfor tũ nĩ jé,” he ja tóg nĩ, inh mÿ, inh panh ti. Há kÿ sóg ke mÿ. Kÿ sóg ag rĩnrĩn mãn ke mÿ, kurã tÿ ãgno ki.

40 Hÿ, tag vÿ inh panh mÿ há nĩ. Û tÿ ti kósin to kãmũ mÿ ãn mÿ tóg rĩr krÿg ja tũ ven ke mÿ, inh panh ti, ù tÿ inh ki ge kÿ nÿtĩ ag kar mÿ. Kÿ sóg kurã tÿ ãgno ki ag rĩnrĩn mãn kãn ke mÿ, ha vemnĩ,” he tóg, Jesus ti. Ti tÿ Judeu ag mÿ vẽn kãmén há vẽ.

ãg tÿ Jesus nĩ konh ke

41 Kÿ Judeu ag tóg Jesus kato vÿ mÿ, ti vÿ to, ti tÿ ag mÿ: “ãmĩ tÿ kanhkã tá kãtére mÿ ãn ri ke inh nĩ,” hen kÿ.

42 “Ti ki kanhró ãg nÿtĩ,” he ag tóg mÿ. “José kósin vẽ, Jesus tag ti. Ti han mÿ fag ki kanhró ãg nÿtĩ. Há ra tóg vêsó: “kanhkã tá sóg kãtére,” he sór mÿ',” he ag tóg mÿ, Jesus to.

43 Há ra tóg ag mÿ: “iso vÿ kónãn tũg nĩ, jagnẽ mÿ,” he mÿ.

44 “Inh panh tỹ ùn krĩn mũ ag hã vỹ iso kãmũnh mũ. Ủ tỹ iso kãmũ mũ ag rĩnrĩn mãn jé sóg ke mũ, kurã tỹ ěgno ki.

45 Topẽ vĩ tó tĩ ù vỹ tag rán ja nĩ, ha mẽ: “Topẽ vỹ vẽn kar kanhrãn ke mũ,” he ja ti nĩ. Hã kỹ ù tỹ inh panh vĩ mẽg mũ ag hã tóg iso kãmũnh ke mũ, inh panh tỹ ùn kanhrãn mũ ag.

46 Ěprã ke ù pi(jé) inh panh ve ja nĩ. Ủ tỹ Topẽ tá kãtĩ mũ ěn hã vỹ ti ve ja nĩ, inh,” he tóg, Jesus ti.

47 “Sỹ ãjag mỹ ki hã tó mũn hã vẽ. Ủ tỹ inh ki rã mũ ěn vỹ rĩr krỹg ja tũ ěn venh ke mũ.

48 Inh hã vỹ ěmĩ pẽ ri ke nĩ, inh hã vỹ ãjag rĩnrĩr han ke mũ.

49 Ājag jóg'jóg ve ag vỹ, ag tỹ ga kórég mũ mũn kỹ ag tóg kanhkã tá ěmĩ ěn ko ja nĩgtĩ, maná he mũ ěn, ag tỹ ko mũ (hã) ra ag tóg kãgter kãn.

50 Ủ tỹ ěmĩ tỹ ěg rĩnrĩr han mũ ěn ko kỹ, ù tỹ kanhkã tá kãtère ja ěn ki rã kỹ tóg ter ke tũ pẽ nĩ.

51 Ěmĩ ěn hã vỹ tỹ inh nĩ, inh hã vỹ kanhkã tá kãtère, inh hã vỹ ãjag rĩnrĩr han ke mũ. Ājag tỹ ěmĩ tag ko kỹ ãjag ter ke tũ pẽ nĩ. Isỹ vẽn kar mỹ vẽn ěn nĩm ke hã vẽ, hã vỹ: inh nĩ, he mũ. Ājag tỹ inh nĩ kon kỹ ãjag rĩnrĩr nỹtĩnh mũ,” he tóg, Jesus ti.

52 Kỹ Judeu ag vỹ jagnẽ mỹ: “ti mỹ ěg mỹ ã nĩ nĩm ke mũ, ěg tỹ ti nĩ ko jé?” he mũ. “Vẽnhmỹ ti nĩ, tag,” he ag tóg mũ.

53 Kỹ Jesus tóg ag mỹ: “isỹ ãjag mỹ ke há vẽ,” he mũ.

“Ājag tỹ inh nĩ ko sór tũ nĩn kỹ, ãjag tỹ inh kyvénh kron sór tũ nĩn kỹ, ãjag rĩnrĩr ke tũ pẽ nĩ. Tỹ sóg ěprã ke fi kósin nĩ,” he tóg, Jesus ti.

54 “Ủ tỹ inh nĩ ko kỹ, ù tỹ inh kyvénh kron kỹ tóg rĩr krỹg ja tũ venh ke mũ, kỹ sóg ti rĩn mãn ke mũ, kurã tỹ ěgno ki.

55 Inh nĩ vỹ tỹ vẽn pẽ nĩ, inh kyvénh vỹ tỹ ěg tỹ kron jafã pẽ nĩ gé.

56 Ủ tỹ inh nĩ kon kỹ, ti tỹ inh kyvénh kron kỹ tóg inh ki rã kỹ jẽ nĩ, kỹ sóg ti kãki nĩ gé. Jagnẽ mré ke vỹ tỹ ěg nỹtĩ.

57 Inh panh vỹ rĩr nĩ. Ti hã vỹ inh jẽnẽ, ti tugrĩn sóg rĩr jẽ. Kỹ ù tỹ inh ki rã mũ ěn vỹ isugnĩn rĩr ke mũ gé.

58 Ěmĩ tỹ kanhkã tá kãtère jan hã vẽ. Ājag jóg'jóg ve ag tỹ ěmĩ ko ja ěn ri ke tũ ti nĩ. Ag hã vỹ ãjag tỹ ko mũ ra kãgter kãn ja nĩgtĩ. Ủ tỹ ěmĩ pẽ tag ko kỹ tóg ter mãn ke tũ nĩ. Inh ki rã to ken hã vẽ,” he tóg, Jesus ti.

59 Cafarnaum tá tóg ag kanhrãn mũ, kỹ tóg ag mỹ vẽn kãmén kãn mũ, Jesus ti, ag tỹ vẽn kanhrãn jafã ěn krêm.

Ủ tỹ ón kỹ Jesus mré mũ tĩ ag tỹ ti tovãnh

60 Kỹ tóg ti mré mũ tĩ ù ag mỹ e tĩ, ti vĩ ti. Kỹ ag tóg: “ti vĩ vỹ ěg mỹ mẽ jagy tĩ,” he mũ. “Mẽ jãvãnh ěg tóg nỹtĩ, ti tỹ ùri ěg mỹ nén tó mũ tag ti,” he ag tóg mũ.

61 Hã ra Jesus tóg ki kanhró nĩ, ag tỹ ti vĩ tag to vĩ kónãn mũ ti. Hã kỹ tóg ag mỹ: “tag mỹ ãjag mỹ há tũ nĩ?” he mũ.

62 “Kỹ ãjag hÿn hẽ ri kenh ke mũ, ãjag tÿ hẽn ri ke mũn isÿ kanhkã ra tÿg mãn ven kÿ, isÿ hẽ tá kãtẽre ja ẽn ra tÿg mãn kÿ, isÿ tÿ ẽprã ke fi kósin nÿn kÿ?” he tóg.

63 “Û tÿ ẽg rÿnrÿr han mũ vÿ tÿ Topẽ kuprÿg ti nÿ. Isÿ ãjag mÿ inh nÿ ko mũ tag to ken hã vẽ, hã vÿ: inh ki rã, he mũ. Inh vÿ tag ki króm tigrÿn ãjag rÿnrÿr nÿtÿnh ke mũ.

64 Hã ra ãjag tóg inh vÿ kri fi sór tũ nÿtÿ,” he tóg, Jesus ti. Ag jykre ki kanhró tóg nÿ, vësóg ki, Jesus ti, hã kÿ tóg ke mũ. Û tÿ ón kÿ ã ki ge mũ ẽn ki kanhró tóg nÿ. Kÿ tóg ù tÿ pã'i ag mÿ ti tónh ke mũ ẽn ki kanhró nÿ gé.

65 Kÿ tóg ag mÿ: “hã kÿ sóg ãjag mÿ: “inh panh tÿ ùn krÿn mũ ag hã vÿ iso kãmũnh ke mũ,” he ja nÿ,” he mũ, Jesus ti.

66 Jesus vÿ tag tigrÿn ti mré mũ tÿ ù ag tóg ti tovãnh mũ sir, ti mré ag mũ mãn tũ nÿ.

67 Kÿ Jesus tóg ù tÿ 12 (ke) ag mÿ: “ãjag hÿn isovãnh sór mũ gé,” he mũ.

68 Kÿ Simão Pedro tóg ti mÿ: “ẽg tÿ ã tovãnh mũ ra ẽg hÿn ù mré mũnh ke mũ?” he mũ. “Ã hã vÿ ẽg mÿ Topẽ vÿ tó tÿ, kÿ ẽg tóg rÿr krÿg ja tũ vẽnh ke mũ, ẽg tÿ ã vÿ kri fi kÿ.

69 ã ki ẽg ge kÿ nÿtÿ, kÿ ẽg tóg ã ki kanhró nÿtÿ. Cristo vÿ tÿ ã nÿ, Topẽ vÿ ẽg mÿ ã jẽnẽ,” he tóg, Pedro ti, Jesus mÿ.

70 Kÿ Jesus tóg ù tÿ 12 (ke) ag mÿ: “ãjag kuprẽg inh,” he mũ, “hã kÿ ãjag tóg tÿ ù tÿ 12 (ke) nÿtÿ,” he tóg. “Hã ra ãjag kãmÿ

ùn pir vÿ tÿ Japo tũ nÿ jãvo,” he tóg, Jesus ti.

71 Ti tÿ Judas ẽn tó vẽ, Simão Iscariotes kósin ẽn. Ẽn vÿ kejẽn Jesus tovãnh kÿ pã'i ag mÿ ti ven, ag tÿ ti se jé. Û tÿ 12 (ke) ag kã ù ja vẽ, Judas ti. Hã ra Jesus tóg ti tÿ nén han ke mũ ẽn ki kanhró ja nÿ.

7

1 Tag pãte Jesus tóg ga tÿ Galiléia mÿ tÿ mũ. Ga tÿ Judéia ra tÿg sór tũ ti nÿ ver, ag tÿ Judéia tá ti tén sór nÿtÿn kÿ, Judeu ag pã'i ag.

2 Kejẽn tóg Judeu ag tÿ festa há ù tá krÿg mũ. Festa ẽn kurã ki ag tóg pãjó krẽm nÿtÿ, Jerusalém tá.

3 Kÿ Jesus jãvy ag tóg ti mÿ: “ga tÿ Judéia ra tÿg nÿ, Jerusalém ra,” he mũ. “Ã tÿ tag hã ki milagre hÿn han kÿ tá ã mré ke ag tóg vég tũ nÿgtÿ, hã kÿ cidade mág ra tÿg nÿ.

4 Vẽnh kar tÿ ẽg jykre ve jé ẽg tóg vẽnh kar rÿnve ẽg tÿ nén han ke mũ ẽn han tÿ. Hã ra ã tóg ag vatãnh tá milagre ti hÿn han tÿ. Ag rÿnve han nÿ, ã tÿ nén han ke ti,” he ag tóg mũ, Jesus mÿ, ti jãvy ag.

5 Ag pi(jé) ti ki ge kÿ nÿtÿ', ti jãvy ag, hã kÿ ag tóg ti to é he mũ.

6 Hã ra Jesus tóg ag mÿ: “inh kurã vÿ jun ja tũ nÿ ver, hã kÿ sóg tÿg sór tũ nÿ ver,” he mũ. “Ãjag hÿn kurã tũ nÿtÿ, kurã kar hÿn ãjag mÿ há nÿtÿ, hã ra sóg kurã nÿ.

7 Û tÿ iso jũ mũ ag pi(jé) ãjag to kórẽg nÿtÿ', hã ra ag tóg iso

kórég nýtĩ, isỹ ag mỹ: “ãjag jykre vỹ kórég pẽ nĩ,” hen kỹ.

⁸ Ha festa venh mũjẽg inhhã. Inh pi(jé) tĩg sór mũ', ver'. Inh kurã vỹ jun ja tũ nĩ ver,” he tóg, Jesus ti, ã jãvy ag mỹ.

⁹ Tag tó kar kỹ tóg ver ga tỹ Galiléia mĩ tĩ mũ.

Jesus tỹ festa venh tĩ

¹⁰ Ti jãvy ag mũ kar kỹ kejẽn Jesus tóg tĩ mũ gé, Jerusalém ra, festa ãn ve jé. Hã ra tóg vẽn kar vatánh tá tĩ mũ, vẽnh péju kỹ.

¹¹ Kỹ Judeu ag tóg festa ki ti jãvãnh mũ. Jagnẽ mỹ ag tóg: “ti hẽ kã nĩ?” he mũ.

¹² Vẽn kar vỹ ti to vỹ mũ. Ũ ag tóg ti to: “ũn há vỹ tỹ ti nĩ,” he mũ. Jãvo ũ ag tóg: “vó, ãg mỹ tóg ón tĩ,” he mũ gé.

¹³ Hã ra ag tóg jamã hár(a) ti to vēmén tũ nĩgtĩ, pã'i ag kamẽg kỹ.

¹⁴ Festa kaju ki Jesus kejẽn Topẽ jo ãn ra tĩ mũ, ag kanhrãn jé.

¹⁵ Kỹ ti vỹ tóg vẽn kar mỹ e tĩ. “Estudo mág han ja tũ ti nĩ, hã ra tóg ki kanhró pẽ nĩ,” he ag tóg mũ ti to, pã'i ag.

¹⁶ Kỹ Jesus tóg ag mỹ: “isỹ ãjag mỹ Topẽ vỹ tó vẽ,” he mũ. “Inh jykre pijé! Ũ tỹ inh jẽnẽg mũ ãn jykre hã vẽ,” he tóg.

¹⁷ “Ũ tỹ Topẽ vỹ ki króm sór mũ ag vỹ ki kanhró nýtĩnh mũ, sỹ ãjag mỹ ti jykre tó mũ tag ti ki. Isỹ vėsóg ki sỹ nén tónh ke to jykrén mũ pijé,” he tóg.

¹⁸ “Ũ tỹ ã tỹ vėsóg ki nén to jykrén mũ ãn tó kỹ tóg tỹ ãn mág nĩ sór mũ. Hã ra sóg ũ tỹ

inh jẽnẽg mũ ãn to: “ũn mág vỹ tỹ ti nĩ,” he mũ. Hã kỹ ãjag tóg ki kanhró nýtĩ, isỹ ki hã tó mũn ki. Inh pi(jé) vẽn jykre vẽnhmỹ tó tĩ’.

¹⁹ Moisés vỹ ãjag jyvẽn ja nĩgtĩ. Topẽ jykre to. ãjag tỹ ne jé ti vỹ han tũ nĩ nẽ? Isỹ ti vỹ ki króm mũ ra ãjag tóg isén sór mũ’,” he tóg, Jesus ti.

²⁰ Kỹ ãn e ãn ag tóg ti mỹ: “krĩ vẽnhmỹ ã tóg nĩ.” he mũ. “Ã tén sór tũ ãg nýtĩ,” he ag tóg mũ, Jesus mỹ.

²¹ Hã ra Jesus tóg ag mỹ: “milagre pir han ja inh nĩ, vẽnhkán ke kurã ãn ki, kỹ tóg ãjag mỹ e tĩ,” he mũ.

²² “Vẽnhkán ke kurã ki ãjag tóg gĩr ag gré junun fár kym tĩ gé, Moisés tỹ ãjag mỹ: “ti mur pãte kurã tỹ 8 (ke) ki ti kym nĩ,” he ja nĩ ãn kỹ. Hã ra ũ tỹ ã krẽ fár kym vén pi(jé) tỹ Moisés nĩ ja nĩ’. Ti jo ke ũ ja vẽ, ũ tỹ kym vén ja ti.

²³ ãjag tỹ Moisés vỹ ki króm jé ãjag tóg vẽnhkán ke kurã ki gĩr fár kym tĩ. Hã ra ãjag tóg iso jũ sór mũ, isỹ vẽnhkán ke kurã ki ãn kaga pir tỹ há’ hen kỹ.

²⁴ Ón kỹ ãjag tóg iso jũ sór mũ. Inh jykre vỹ ãjag mỹ kórég nĩ ve nĩ. ãjag tỹ to jykrén há han mũ ra ãjag tóg inh jykre há nĩ venh mũ vẽ,” he tóg, Jesus ti.

Ag tỹ Jesus to: “ti mỹ tỹ Cristo nĩ vỹ?” he

²⁵ Kỹ Jerusalém tá ke ag tóg Jesus to: “ti tén sór ja ag tóg nĩ,” he mũ.

26 “Hã ra tóg jatun mý vënh kar mré vëmén jê nĩ. Ti mý ag tóg vĩ tũ nĩ, pã'i ag. Ag mý hën ri ke mũn ti to: “Cristo vỹ tỹ ti nĩ, Topê tỹ ùn jënêg mũ vỹ tỹ ti nĩ,” he mũ vỹ, êg pã'i ag?” he ag tóg mũ, Jesus to.

27 “Hã ra êg tóg ti tỹ hën tá kãtĩ mũ ki kanhró nýtĩ. Cristo ên kãtĩg kỹ êg tóg ti tỹ hën tá kãtĩg mũ ki kagtĩg nýtĩnh mũ, kỹ ti hỹn tỹ Cristo tũ nĩ,” he ag tóg mũ, Jesus to.

28 Hã ra Jesus tóg Topê jo ãn tá jê nĩ, vënh kar kanhrãn kỹ. Kỹ tóg jamã hár(a) ag kanhrãn mũ. “Ti ki kanhró êg nýtĩ, he ãjag tóg tĩ iso, ón kỹ,” he tóg. “Ti tỹ hën tá kãtĩ mũ ki kanhró êg tóg nýtĩ gé, he ãjag tóg tĩ, ón kỹ. Inh pí(jé) vësóg ki: inh hỹn tĩg mũ, hé'. Û tỹ inh jënêg mũ ên vỹ ki hã tó tĩ. Hã ra ãjag tóg ti ki kagtĩg nýtĩ, ù tỹ inh jënêg mũ ên ti ki.

29 Inh hã vỹ ti ki kanhró nĩ. Ti hã tá sóg kãtére, ãjag ve jé, ti tỹ inh mý: “ha ag venh tĩg,” hen kỹ,” he tóg, Jesus ti.

30 Kỹ ag tóg ti se sór mũ, hã ra ag tóg ti vóg tũ pẽ nĩ ver. Ti ter ke kurã vỹ jun ja tũ nĩ ver, hã kỹ ag tóg ag tỹ ti se sór mũ ra ti ség tũ nĩ.

31 Ag jãvo ùn e ag tóg Jesus ki ge mũ. Ti to ag tóg: “êg mý tóg tỹ Cristo nĩ ve nĩ,” he mũ. “Cristo kãtĩg kỹ ti nêji milagre hyn han ke mũ. Jesus tỹ milagre hyn han vỹ e nýtĩ. Êg mý tóg tỹ Cristo nĩ,” he ag tóg, Jesus to. Tag tó kỹ ag tóg ti ki ge mũ.

Pã'i ag tỹ Jesus se sór

32 Kỹ Fariseu ag tóg mễg mũ, ùn e ag tỹ Jesus to nén (ũ) tó mũ ti. Kỹ ag tóg Topê tũ ki rĩr tĩ to pã'i ag mré vëmén mũ, ag tỹ Jesus senh ke to. Kỹ ag tóg polícia ag jënêg mũ, ag tỹ ti se jé.

33 Hã ra Jesus tóg: “ãjag mré sóg nĩ sĩ han ke mũ ver,” he mũ. “Tag pãte sóg tĩg ke mũ, isỹ ù tỹ inh jënêg mũ ên ve jé.

34 Ên kã tóg ãjag tỹ inh venh há tĩnh mũ, hã ra ãjag tóg inh venh ke tũ nĩ. Ên tá junjun ke tũ ãjag tóg nĩ, isỹ hën ra tĩg ke ên tá,” he tóg.

35 Kỹ Judeu ag tóg jagnê mý: “ti hỹn hẽ ra tĩg sór mũ?” he mũ. “Êg hỹn hẽ tá ti venh ke tũ nĩ? Ti hỹn hën ri ke mũn ga tỹ Grécia ra tĩg sór mũ, tá êg mré ke ag kanhrãn jé.

36 Ne to ke nẽ, hỹn, hã vỹ: “ãjag tỹ inh venh há tóg tĩnh mũ, hã ra ãjag tóg inh venh ke tũ nĩ, he mũ tag ti?” he ag tóg, Judeu ag. Jesus vỹ vỹ ag mý e tĩ, hã kỹ ag tóg ki kagtĩg nýtĩ, ti tỹ nén tó mũn ki.

Topê kuprĩg tỹ goj ri ke nĩ

37 Vãhã tóg festa tỹ kurã tỹ êgno tá krỹg mũ. Festa to kurã mág pẽ vẽ, kurã tỹ êgno ên ti, hã kỹ ag e tãvĩ nýtĩ, Jerusalém tá. Kurã ên kã Jesus tóg jê kỹ vënh kar mý prër mũ sir. “!..Ãjag tỹ goj kron sór kỹ inh mý to vỹ, isỹ ãjag mý goj há ven jé..!” he tóg, prër kỹ.

38 “!..Topê vĩ ki tag vỹ rán kỹ nĩ, ha mẽ: !..ãjag tỹ inh ki ge kỹ tóg ãjag kãki goj ror han ke mũ, isỹ ãjag mý goj nĩm ke ti..!” he tóg. “!..Kỹ goj tag vỹ ãjag

rĩnrĩr pẽ han ke mo..!” he tóg, Jesus ti. Ti tỹ ag mỹ prẽr jan hã vẽ.

³⁹ Jesus tỹ ag mỹ Topẽ kuprĩg tón hã vẽ, hã to tóg: goj, he mũ. Topẽ kuprĩg tỹ tóg ag jagrẽn ke mũ, ù tỹ ti ki ge mũ ag. Festa ẽn kã tóg ag mỹ ti jẽnẽ ja tũ nĩ ver, Topẽ kuprĩg ti, ti tỹ ver ã ter kar kỹ rĩr mãn ja tũ nĩn kỹ, ti tỹ ã panh ra tĩg mãn ja tũ nĩn kỹ ver.

Ag tỹ Jesus ki kagtĩg

⁴⁰ Kỹ Jesus vĩ mẽg mũ ù ag tóg ti to: “Topẽ vĩ tó tĩ pẽ ẽn vẽ,” he mũ.

⁴¹ Kỹ ù ag tóg ti to: “Cristo vĩ tỹ ti nĩ, Topẽ tỹ ẽg mỹ ùn jẽnẽg mũ ẽn vĩ tỹ ti nĩ,” he tĩ gé. Hã ra ù ag tóg: “Cristo mỹ hỹn ga tỹ Galiléia tá kãtĩ mũ vĩ?” he mũ.

⁴² “Topẽ vĩ rá ki tóg: “Davi kósin vĩ tỹ ti nĩ, Cristo ti,” he mũ, “ẽmã tỹ Belém tá ke vĩ tỹ ti nĩ, Davi jamã ẽn tá ke,” he tóg, Topẽ vĩ tỹ rán kỹ nĩ ki. Hã kỹ tóg ẽg mỹ tỹ Cristo tũ nĩ, Jesus ti, ti tỹ tỹ Galiléia tá ke nĩn kỹ,” he ag tóg.

⁴³ Hã kỹ ag tóg vẽn h kãpãm kỹ nỹtĩ, ti tugnĩn.

⁴⁴ Kỹ ag kãmĩ ù ag vĩ ti se sór mũ, hã ra ag tóg ti kãgmĩg tũ nĩgtĩ, ti kamẽg kỹ.

Pã'i ag tỹ Jesus ki ge sór tũ

⁴⁵ Kỹ polícia ag tóg Topẽ tũ ki rĩr tĩ to pã'i ag to vĩnvỹn ke mũ, Fariseu ag to ke gé, ù tỹ ag jẽnẽ ja ag to. Kỹ ag tóg ag mỹ: “hỹn, ti?” he mũ.

⁴⁶ Kỹ ag tóg: “hã ra tóg vĩ há tãvĩ han mũ,” he mũ. “Vẽn h vĩ tỹ ge mẽ ja tũ ẽg nỹtĩ, hã kỹ ẽg

tóg ti kãgmĩ ja tũ nĩ,” he ag tóg mũ, polícia ag.

⁴⁷ Kỹ Fariseu ag tóg ag mỹ: “kỹ ãjag mỹ ti vĩ kri nĩm sór mũ', ti ón mũ ra?” he mũ.

⁴⁸ “Pã'i ù mỹ ti vĩ kri fig mũ'? Vó, ke tũ ẽg nỹtĩ. Fariseu ù tỹ ti vĩ kri nĩm tũ nĩ gé.

⁴⁹ Hã ra ag tóg ki kagtĩg nỹtĩ, ù tỹ ti vĩ kri fig mũ ag. Topẽ vĩ rán ki kagtĩg ag nỹtĩ, kỹ Topẽ vĩ ag mỹ vĩ kónãn ke mũ, ha vemnĩ,” he ag tóg mũ, Fariseu ag.

⁵⁰ Hã ra Nicodemos vĩ ag mré nĩ gé, ù tỹ kuty tá Jesus mré vẽn h ja ẽn ti. Ẽn tóg ag mỹ:

⁵¹ “ẽg tỹ ti vóg kónãn sór kỹ ẽg tóg ti ki jẽnẽ vén ke mũ,” he mũ. “Ti tỹ nẽn han ja to jykrẽn há han jé ẽg tóg ke mũ, ẽg tỹ kar kỹ ti vóg kónãn jé. Topẽ tỹ ẽg mỹ vẽn h jykre nĩm jan hã vẽ,” he tóg, Nicodemos ti.

⁵²⁻⁵³ Hã ra ag tóg ti mỹ: “ã hỹn tỹ Galiléia tá ke nĩ gé', hã kỹ ã tóg ti jy nĩgãn sór mũ',” he mũ. “Topẽ vĩ ki ve há han nĩ, kỹ ã tóg venh ke mũ. Galiléia tá ke ù vĩ Topẽ vĩ tónh ke tũ pẽ nĩ, Topẽ vĩ tá ke ù jẽnẽn h ke tũ pẽ nĩ,” he ag tóg, Nicodemos mỹ. Kỹ ag tóg ãjag jamã ra mũ mũ sir, pã'i kar ag.

8

Jesus tỹ ùn tỹtã kórég fi mỹ vẽn h pãte fón

¹ Hã ra Jesus tóg pãnónh tỹ Oliveiras ra tĩ mũ, tá nũr jé.

² Kurã ke ra tóg Jerusalém ra tĩg mãn kỹ (tóg) Topẽ jo ãn tá nĩ mãn mũ sir, kỹ vẽn h kar

ag tóg ti ví mẽnh kãmũ mũ. Tá nĩ kỹ tóg ag kanhrãn mũ.

³ Kỹ Topê ví to professor ag vỹ ùn týtá fi pére kãmũ mũ, Fariseu ag ke gé. Ûn týtá ên fi ve ja ag tóg nĩ, fi tỹ fi mén tũ mré nỹn kỹ. Vẽn kuju kã ag tóg fi fêg mũ.

⁴ Kỹ ag tóg Jesus mỹ: “Senhor,” he mũ. “Fi ve êg tóg, fi tỹ fi mén tũ mré nỹn kỹ,” he ag tóg, Jesus mỹ.

⁵ “Moisés vỹ êg mỹ: “ãjag kãmĩ ù fi tỹ fi mén tũ mré nỹn kỹ fi tén nĩ, pó tỹ fi pin kỹ,” he ja nĩ. Jo ã hỹn hẽ ri ke tí?” he ag tóg, Jesus mỹ.

⁶ Ag tỹ ón kỹ ti ví mẽ sór vễ, ag tỹ ti ví to ti se jé. Hã ra Jesus tóg pãnh ke kỹ nĩ kỹ ga kri rãn mũ, ã nĩgé tỹ. Vĩ tũ tóg nĩ.

⁷ Hã ra ag tóg ti tovãnh sór tũ nĩ. Kỹ tóg vãhã ag ki êvãnh kỹ ag mỹ: “ãjag kãmĩ ù hỹn Topê ví mranh ja tũ nĩ ver,” he mũ. “Ên hỹn fi pin vén ke mũ, pó tỹ,” he tóg mũ.

⁸ Kỹ tóg pãnh ke mãn kỹ ga kri rãn mãn mũ.

⁹ Kỹ ti ví tóg ag mỹ e tí. Ag kar vỹ ãjag tỹ Topê ví mranh ja ên mĩ êkrég mũ sir, hã kỹ ag tóg mũ mũ sir. Ûn si há ag vỹ mũ vén mũ, kar kỹ vẽn kar ag. Komêr hã ag tóg mũ kãn mũ. Vãhã Jesus vỹ ã pir mỹ nĩ, fi mré. Fi hã vỹ tá jẽ nĩ, ti mré.

¹⁰ Kỹ tóg fi ki êvãnh kỹ fi mỹ: “ag hẽ ra kagáv, ù tỹ ã kato ví mũ ag?” he mũ. “Ag mỹ ã vóg kónãn tũ?” he tóg. Ag mũ kar kỹ tóg fi mỹ ke mũ.

¹¹ Hã ra fi tóg ti mỹ: “hỹ,” he mũ. Kỹ tóg fi mỹ: “kỹ inh hỹn ã vóg kónãn ke tũ nĩ gé,”

he mũ. “Ha tũg, jatun mỹ. Hã ra Topê ví mranh mãn sór tũg nĩ,” he tóg, Jesus ti. Ûn týtá kórég ên fi vóg kónãn sór ja tũ ti nĩ, Jesus ti.

Jesus tỹ jẽngrẽ ri ke nĩ

¹² Kỹ Jesus tóg Topê jo ãn krêm nĩ kỹ vẽn kar kanhrãn mãn mũ. “Jẽngrẽ ri ke inh nĩ,” he tóg. “Ãjag tỹ inh mré mũn kỹ ãjag tóg kuty mĩ mũ tũ nĩgtĩ. Jẽngrẽ mĩ ãjag tóg mũgtĩ, kurã mĩ. ãjag tỹ vẽn jykre tãg han ke to ken hã vễ,” he tóg.

¹³ Hã ra Fariseu ag tóg ti ví kafãn mũ, kỹ ag tóg ti mỹ: “vẽn kãmén ã tóg mũ ha,” he mũ. “Êg tỹ vẽn kãmén kỹ êg tóg ón kỹ ví tí,” he ag tóg mũ sir.

¹⁴ Hã ra Jesus tóg ag mỹ: “hỹ,” he mũ. “Vẽn kãmén inh tí, hã ra sóg ki hã tó tí,” he tóg mũ. “Isỹ hẽ tá kãtũg mũ ên ki kanhró inh nĩ, isỹ hẽ ra tũg ke mũ ti ke gé,” he tóg. “Hã ra ãjag tóg inh ki kãtũg nỹtĩ, isỹ hẽ tá kãtũg mũn ki, isỹ hẽ ra tũg ken ki ke gé. Êprã ke ãjag nỹtĩ.

¹⁵ Kãnhmar ãjag tóg ù to: “jykre kórég ti nĩ,” henh ke mũ. ãjag jãvo sóg vẽn kar jykre to nén ù tó tũ nĩ ver.

¹⁶ Isỹ hã ra ù jykre to nén ù tó sór mũ ra sóg tó há han ke mũ vễ. Inh pi(jé) inh pir mỹ nén ù to jykren tí'. Û tỹ inh jẽnẽg mũ vỹ inh mré nén ù kar to jykren tí.

¹⁷ Kỹ ùn régre ag tỹ vẽn vĩ pir han kỹ tóg ãjag mỹ tỹ ki hã ke nĩ. Hã kỹ tóg rãn kỹ nĩ, Topê ví tỹ rãn kỹ nĩ ki.

18 Hã kÿ sóg vĕnh kāmén mŭ, hã ra inh panh tóg, ũ tÿ inh jĕnĕg mŭ tóg inh kāmén mŭ gé. Régre ĕg nÿtĭ, ũ tÿ inh kāmén mŭ ti,” he tóg, Jesus ti.

19 Kÿ ag tóg ti mÿ: “hÿn, ã panh ti?” he mŭ. Kÿ Jesus tóg ag mÿ: “ãjag pi(jé) inh ki kanhró nÿtĭ,” he mŭ. “Hã kÿ ãjag tóg inh panh ki kagtĭg nÿtĭ gé,” he tóg. “Ãjag tÿ inh ki kanhró nÿtĭ ra ãjag tóg inh panh ki kanhró nÿtĭnh mŭ vĕ gé,” he tóg, Jesus ti.

20 Ti tÿ ag mÿ vĕnh kāmén hã vĕ. Topĕ jo ĩn krĕm nĭ kÿ tóg ag mÿ vĕnh kāmén mŭ, ti tÿ jãnkamy vin jafã rã hã nĭnh kÿ. Kÿ pã'i ag tóg ti se sór mŭ, hã ra ag tóg ti kãgmĭg tũ nĭgtĭ, ag tÿ ti kamĕg kÿ. Ti ter ke kurã vÿ jun ja tũ nĭ ver, hã kÿ ag tóg ti tÿ hĕ ri ke tũ nĭ ver.

Jesus tÿ hĕn ra tĭg ke

21 Kÿ tóg ag mÿ kāmén mǎn mŭ. “Tĭg jé sóg ke mŭ, kÿ ãjag tóg inh ve sór ke mŭ, hã ra ãjag tóg inh venh ke tũ nĭ. Inh vég tũ ki ãjag tóg kãgter ke mŭ, kÿ ãjag tÿ Topĕ vĭ mranh ja ĕn vÿ ãjag kãkã nĭ nĭ. ãjag pi(jé) isÿ hĕn ra tĭg ke mŭ ĕn ki kanhró nÿtĭ'. Isÿ hĕn ra tĭg ke mŭ ĕn ki kagtĭg ãjag nÿtĭ,” he tóg, Jesus ti.

22 Kÿ ag tóg jagnĕ mÿ: “ti mÿ hĕn ri ke mŭn vĕsĕn sór mŭ, hã kÿn mÿ: “ãjag pi(jé) isÿ hĕn ra tĭg ke mŭ ĕn ki kanhró nÿtĭ’,” he mŭ?” he ag tóg, Jesus to.

23 Hã ra Jesus tóg ag mÿ: “ĕprã ke vÿ tÿ ãjag nÿtĭ,” he mŭ. “Jãvo sóg tÿ kanhkã tá ke nĭ. Ga tag ki ke tÿ ãjag nÿtĭ,

jãvo inh pi(jé) tÿ ga tag ki ke nĭ’.

24 Hã kÿ sóg ãjag mÿ: “kãgter jé ãjag tóg ke mŭ, kÿ ãjag tÿ Topĕ vĭ mranh ja ĕn vÿ ãjag kãkã nĭ nĭ,” he ja nĭ. Ha vé, ãjag tÿ inh ki ge sór tũ nĭnh kÿ tóg ãjag kãkã nĭnh ke mŭ, ãjag tÿ Topĕ vĭ mranh ja ĕn ti. “Ũ ĕn vÿ tÿ inh nĭ,” he ja inh nĭ ãjag mÿ. Tag to: hÿ, hemnĭ,” he tóg, Jesus ti.

25 Kÿ ag tóg ti mÿ: “tÿ ã ũ nĭ?” he mŭ. Kÿ Jesus tóg: “vãsÿ sóg ãjag mÿ tó huri, isÿ ãjag mré vĕmĕn vĕn kÿ,” he mŭ. “Ãjag mÿ sóg vĕnh kāmén tĭgtĭ.

26 Hã ra sóg ãjag mÿ tó kãn ja tũ nĭ ver, sÿ ãjag mÿ vĭ kónãn ke vÿ kã nĭ gé ver. Hã ra sóg ũ tÿ inh jĕnĕg mŭ ĕn vĭ hã tó tĭ, ti tÿ inh mÿ tó ja kar ĕn ti. Ki hã tóg tó tĭ, ũ tÿ inh jĕnĕg mŭ ti,” he tóg, Jesus ti.

27 Hã ra tóg ag tÿ to jykrĕn tũ nĭgtĭ, ti tÿ ag mÿ ã panh tó mŭ ra.

28 Kÿ Jesus tóg ag mÿ ke mǎn mŭ. “Ãjag tÿ ka to isa kÿ, kÿ ãjag tóg inh ki kanhrãn ke mŭ,” he tóg. “Tÿ sóg ĕprã ke fi kósĭn nĭ. Kurã ĕn kã ãjag tóg ki kanhró nÿtĭnh ke mŭ, isÿ tÿ ũn ĕn nĭ ti. Inh pi(jé) vĕsóg ki nĕn ũ to jykrĕn tĭ'. Inh panh tÿ inh mÿ nĕn tó mŭ ĕn hã tó sóg tĭ. Hã ki kanhró ãjag nÿtĭnh ke mŭ, kurã ĕn kã, ãjag tÿ ka to isa kÿ.

29 Kÿ ũ tÿ inh jĕnĕg mŭ vÿ inh mré nĭ nĭ. Ti mÿ nĕn há nĭ ĕn hã han sóg tĭ, hã kÿ tóg inh mré nĭ nĭ,” he tóg, Jesus ti.

30 Ag tỹ ti vĩ tag mẽ kỹ ùn e ag vĩ ti ki ge mũ, kurã ên kã.

Jesus tỹ êg tar han ke

31 Kỹ Jesus tóg ù tỹ ti ki ge kỹ nỹtĩ ag kanhrãn mũ. “Inh vĩ tovãnh tũg nĩ,” he tóg. “Kỹ ãjag tóg tỹ inh mré ke pẽ nỹtĩ.

32 Kỹ ãjag tóg Topẽ vĩ pẽ ki kanhró nỹtĩnh mũ. Topẽ vĩ pẽ ki kanhró tugrĩn ãjag tóg patrão kórég ve mãn ke tũ nĩ,” he tóg.

33 Kỹ ag tóg ti mỹ: “Abraão krẽ'krẽ vĩ tỹ êg nỹtĩ,” he mũ. “Êg pi(jé) tỹ ù camarada nỹtĩ', ùri, vãsỹ ke gé. Ne to ke nẽ, hã vĩ: patrão kórég ve mãn ke tũ ãjag nĩ, he mũ tag ti?” he ag tóg mũ, Jesus mỹ.

34 Hã ra Jesus tóg ag mỹ: “ki hã sóg ke mũ, hã kỹ sóg tó mũ,” he mũ. “Ãjag tỹ Topẽ vĩ mranh kỹ ãjag tóg tỹ ti vĩ mranh jafã nỹtĩ, kỹ tóg êg tỹ ùn kórég tỹ patrão vég mũ ri ke nĩ.

35 Ti camarada ag pi(jé) ti ìn krêm êmã nỹtĩgtĩ'. Ti kósin hã vĩ ti ìn krêm nĩgtĩ jãvo.

36 Kỹ, Topẽ kósin tỹ ãjag tỹ Topẽ krẽ han kỹ ãjag tóg patrão kórég ve mãn ke tũ nĩ ha.

37 Abraão krẽ vĩ tỹ ãjag nỹtĩ. Ki kanhró inh nĩ. Hã ra ãjag tóg isén sór mũ, ãjag tỹ inh vĩ to há tũ nỹtĩnh kỹ.

38 Inh panh tỹ inh mỹ nén tó mũ ên hã tó sóg tĩ. Inh jãvo ãjag tóg ãjag panh tỹ ãjag mỹ nén tó mũ ên hã tó tĩ,” he tóg, Jesus ti.

39 Kỹ ag tóg ti mỹ: “hỹ, Abraão vĩ tỹ êg panh nĩ,” he mũ.

Kỹ Jesus tóg ag mỹ: “ãjag tỹ tỹ Abraão krẽ nỹtĩnh kỹ ti jykre han nĩ ge,” he mũ.

40 “Hã ra ãjag tóg isén sór mũ. ãjag mỹ sóg Topẽ vĩ pẽ tó ja nĩ, Topẽ tỹ inh mỹ nén tó mũ ên ti, hã ra ãjag tóg isén sór mũ. Abraão vĩ tag han ja tũ nĩ.

41 Vyrmyndỹ ãjag panh ù tũ hã han ãjag tóg tĩ,” he tóg.

Kỹ ag tóg Jesus mỹ: “panh êg nỹtĩ, hã vĩ: Topẽ, he mũ. Êg pi(jé) panh tũ nỹtĩ',” he ag tóg mũ.

42 Hã ra Jesus tóg ag mỹ: “Topẽ tỹ tỹ ãjag panh nĩ ra ãjag tóg iso há nỹtĩnh mũ vẽ,” he mũ. “Inh panh tá sóg kãtére, hã kỹ sóg ãjag mré nĩ nĩ. Inh pi(jé) vêsóg ki nén to jykren kỹ kãtére mũ'. Ti hã vĩ inh jẽnẽ.

43 Hã ra ãjag tóg inh vĩ ki kagtĩg nỹtĩ. Mẽ sór tũ ãjag nỹtĩ, hã kỹ ãjag tóg ki kagtĩg nỹtĩ.

44 Japo krẽ vĩ tỹ ãjag nỹtĩ, kỹ ãjag tóg ti tỹ nén to jykren mũ ên han tĩ. Topẽ tỹ êprã ke ag han ên kã tóg ag kãgtén sór tĩgtĩ, Japo ti. Vãsỹ ti jykre vẽ, kỹ tóg ùri tỹ ti jykre nĩ gé ver. Ti pi(jé) ki hã tó tĩ'. Ki hã tó to ti kórég pẽ nĩ, Japo ti. Vẽn h ó vĩ tỹ ti tũ pẽ nĩ. Ón mẽ ti nĩgtĩ, vẽn ón né vẽ. Ti hã vĩ tỹ ùn ón mũ ag panh kar nĩ.

45 Ti jãvo sóg ki hã tó tĩ. Hã ra ãjag tóg inh vĩ kri nĩm sór tũ nĩgtĩ.

46 Inh hỹ ne ki Topẽ vĩ mranh? Ha inh mỹ tó. Mranh ja tũ sóg nĩ. Hã ra sóg ãjag mỹ Topẽ vĩ pẽ tó tĩ. ãjag hẽ ri ken kỹ inh vĩ kri fi sór tũ nĩ?

47 Topê krê ag vỹ Topê vĩ mễg tĩ. Ājag pi(jé) inh vĩ jễmễ sớ tĩ', ājag tỹ tỹ Topê krê tũ nỹtĩn kỹ," he tóg, Jesus ti, ag mỹ.

Jesus tỹ Abraão kăfór nĩ

48 Kỹ Judeu ag tóg ti mỹ: "Samaría tá ke ri ke ā tóg nĩ, ā tỹ ki kagtĩg nĩn kỹ, kỹ ā jagrê kórég nĩ gé," he mũ.

49 Hã ra Jesus tóg ag mỹ: "inh pi(jé) jagrê kórég nĩ'," he mũ. "Inh panh to sóg: ũn mág vỹ tỹ ti nĩ, he tĩ. Hã ra ājag tóg iso é he tĩ.

50 Inh pi(jé) vễsỹ ũn mág han sớ mũ'. Ũ tỹ isỹ ũn mág han ke mũ vỹ nĩ nĩ, ẽn vỹ vễnh kar jykre tugnỹm ke mũ.

51 Ki hã sóg ke mũ, hã kỹ sóg tó mũ, ha mẽ. Ājag tỹ inh vĩ kri fi kỹ ājag ter ke tũ pẽ nĩ," he tóg, Jesus ti.

52 Kỹ Judeu ag tóg ti mỹ: "jagrê kórég ā tóg nĩ," he mũ. "Vãhã tóg ve há tĩ, ā jagrê kórég ti," he ag tóg mũ ti mỹ. "Abraão vỹ ter, kỹ Topê vĩ tó tĩ ag kar vỹ kăgter. Hã ra ā tóg ón kỹ: "ājag tỹ inh vĩ kri nĩm kỹ ājag kăgter ke tũ pẽ nĩ," he mũ.

53 Ā mỹ vễsỹ ẽg jóg'jóg ve tỹ Abraão kăfór han sớ mũ', ā tỹ ẽg mỹ: kăgter ke tũ ājag nĩ, hen kỹ? Ter ja ti nĩ, Abraão ti, kỹ Topê vĩ tó tĩ ag kar vỹ kăgter kãn gé. Vễsỹ ũn mág han kỹ nĩ ve ā tóg nĩ," he ag tóg, Jesus mỹ, Judeu ag.

54 Kỹ Jesus tóg ag mỹ: "isỹ vễsỹ ũn mág han kỹ sóg ón kỹ ke mũ ve nĩ," he mũ. "Hã ra inh panh hã vỹ isỹ ũn mág

han ke mũ, ājag tỹ ũ to: ẽg jóg mág, he mũ ẽn ti.

55 Hã ra ājag tóg ti ki kagtĩg nỹtĩ, ājag jãvo sóg ti ki kanhró nĩ. Isỹ ājag mỹ: "ti ki kagtĩg inh nĩ," he mũ ra sóg ājag ón tag ri ke han mũ vễ, hã ra sóg ti ki kanhró nĩ, kỹ sóg ti vĩ ki króm tĩ gé.

56 Ājag jóg'jóg ve tỹ Abraão vỹ inh kurã ve sớ ja nĩ, kỹ tóg kejẽn vé, kỹ tóg ti mỹ sér pẽ tĩ, ti tỹ inh kurã ve kỹ," he tóg, Jesus ti.

57 Kỹ Judeu ag tóg ti mỹ: "50 (ke) anos han tũ ā nĩ ver, hã ra ā tóg: "Abraão ve inh," he mũ. Vĩ vễnhmỹ han ā tóg," he ag tóg mũ, Jesus mỹ.

58 Hã ra Jesus tóg ag mỹ: "ki hã sóg ke mũ, hã kỹ sóg tó mũ, ha mẽ," he mũ. "Abraão mur tũ ra sóg nĩ nĩ," he tóg, Jesus ti.

59 Kỹ ag tóg jũgũ mũ, ti tỹ vễso: "Topê ri ke inh nĩ," hen kỹ. Hã kỹ ag tóg pó mãn kỹ ti pin sớ mũ. Hã ra Jesus tóg Topê jo ĩn kătá kăkutẽ mũ sir, kỹ tóg tĩ mũ, vễnh pēju jé.

9

Jesus tỹ ũn kyvó tỹ há' he

1 Kejẽn Jesus tóg tĩg kỹ ũn kyvó vég mũ. Ā mur mũn kã tóg kyvó nĩ sir.

2 Kỹ ti mré mũ tĩ ag tóg ti mré ti vég mũ gé. Kỹ ag tóg Jesus mỹ: "ti han mũ fag hỹn Topê vĩ mranh'," he mũ, "ha kỹ tóg kyvó nĩ'," he ag tóg. "Ti tỹ vễsóg ki Topê vĩ mranh kỹn mỹ kyvó nĩ vó?" he ag tóg mũ.

3 Kỹ Jesus tóg ag mỹ: "ti tỹ Topê vĩ mranh to ke pijé," he mũ. "Ti han mũ fag tỹ Topê

vĩ mranh to ke pijé,” he tóg. “Topê tỹ vãnh kar mỹ ã tỹ nén han sór mũ ên ven sór vễ, ti ki.

⁴ Isỹ ù tỹ inh jẽnêg mũ ên tỹ inh mỹ nén tó mũ ên han sór vễ. Ver tóg inh mỹ kurã nĩ, sỹ rãnhrajé. Kãnhmar tóg kuty nỹnh mũ, kỹ ù tóg rãnhraj mãn ke tũ nĩ, iser ke kurã ên kã,” he tóg.

⁵ “Ver sóg ãjag mré tĩg mũ, kỹ sóg ãjag mỹ jẽngrê ri ke nĩ ver,” he tóg, Jesus ti.

⁶ Tag tó kar kỹ tóg sug mũ, ga kri, kỹ tóg óré sĩ han mũ. Óré ên tỹ tóg ùn kyvó kanê to tĩn mũ.

⁷ Kỹ tóg ti mỹ: “ha tĩg, goj tỹ Siloé ki vãnh kype jé,” he mũ. Goj tỹ Siloé to ke hã vỹ: “ù tỹ inh jẽnê ja,” he mũ, êg vĩ ki. Kỹ tóg tĩ mũ, ùn kyvó ti. Kỹ tóg tá kãtĩg kỹ êvãnh há han tĩ nĩ sir.

⁸ Ti tỹ êvãnh há han kỹ tóg ti rã hã nỹtĩ kar ag mỹ e ti. Vãnh kar vỹ ti ki kanhró nỹtĩ, vãnh kar mỹ tóg: “inh mỹ nén ù nĩm,” he tĩ ja nĩgtĩ. Kỹ ag tóg, ag tỹ ti êvãnh há tag ve kỹ (ag tóg) ti to: “ù tỹ êg mỹ: inh mỹ nén ù nĩm, he tĩ ên hã tũ mỹ?” he mũ.

⁹ Kỹ ag kãmĩ ù tóg: “ti hã vễ,” he mũ. Hã ra ù ag tóg: “ên ri ke nĩ ve ti nĩ, hã ra tóg êg mỹ tỹ hã tũ nĩ,” he mũ gé. Hã ra tóg vễso: “inh hã vễ,” he mũ.

¹⁰ Kỹ ag tóg ti mỹ: “kỹ ã hẽ ri ké, ã tỹ êvãnh há' he jé?” he mũ.

¹¹ Kỹ tóg ag mỹ: “ag tỹ ù to: Jesus, he mũ ên vỹ óré han, kỹ tóg inh kanê to tĩn, kỹ tóg inh mỹ: “goj tỹ Siloé ra tĩg nĩ, tá vãnh kupemñĩ,” hé. Kỹ sóg

vyr. Vãnh kupe sóg, kỹ sóg êvãnh há' he mũ sir,” he tóg, ùn kyvó ja ti.

¹² Kỹ ag tóg ti mỹ: “ti hẽ kã jẽ?” he mũ. Hã ra tóg ag mỹ: “ha’?” he mũ.

Fariseu ag tỹ ùn kyvó ja ki jẽmẽ

¹³ Kỹ ag tóg Fariseu ag mỹ ti pére mũ mũ, ùn kyvó ja ên ti.

¹⁴ Hã ra tóg tỹ vẽnkhán ke kurã nĩ. Ên kã Jesus tóg óré han kỹ ti tỹ há' hé.

¹⁵ Kỹ Fariseu ag tóg ti ki jẽmẽ sór mũ gé. “Á hẽ ri ké, ã tỹ êvãnh há' he jé?” he ag tóg mũ gé. Kỹ tóg ag mỹ: “óré tỹ tóg inh kanê to tĩn, kỹ sóg vãnh kupenh vyr, kỹ sóg êvãnh há' he mũ sir,” he mũ, ag mỹ, ùn kyvó ja ti.

¹⁶ Kỹ Fariseu ù ag tóg Jesus to: “Topê pi(jé) ti jẽnê’,” he mũ. “Vẽnkhán ke kurã ki tóg vẽnkhán vãnh nĩgtĩ, kỹ tóg kórég nĩ,” he ag tóg mũ, Jesus to, Fariseu ù ag. Hã ra ù ag tóg ti to: “hã ra tóg nén ù há tãvĩ han,” he mũ gé. “Ti kórég nĩ ran hỹn tag han ki kagtĩg nĩnh mũ vễ,” he ag tóg, Fariseu ù ag. Hã kỹ ag vãnh kãpãm kỹ nỹtĩ.

¹⁷ Kỹ ag tóg ùn kyvó ja ên ki jẽmẽ mãn mũ. “Ti mỹ tỹ ùn há nĩ, ùn kórég mỹ vó?” he ag tóg mũ. “Á tỹ tóg há' hé mỹr,” he ag tóg.

Kỹ tóg ag mỹ: “inh mỹ tóg tỹ Topê vĩ tó jafã nĩ,” he mũ, ùn kyvó ja ti.

¹⁸ Hã ra ag tóg ti vĩ kri nĩm sór tũ nĩ. “Ti mỹ kyvó ja nĩ vỹ?” he ag tóg mũ. Kỹ ag tóg ti han mũ fag jé prêr mũ.

19 Kÿ ag tóg fag mÿ: “ãjag kósin hã mÿ?” he mÿ. “Ti mÿ ã mur mÿn hã kã kyvó ja nÿ? Kÿn hÿn hẽ ri ké, ti tÿ ùri êvãnh há nÿn jé?” he ag tóg mÿ, ti han mÿ fag mÿ.

20 Kÿ fag tóg: “hÿ, êg kósin hã vẽ,” he mÿ. “Ã mur mÿn hã kã tóg kyvó ja nÿ.

21 Hã ra tóg ùri êvãnh há nÿ. Hẽ ri ken kÿ? Ha? Û nÿ ti han? Ha ti ki jêmẽmnÿ. Sanh há ti nÿ ha. Ajag mÿ ti tónh mÿ,” he fag tóg, ti han mÿ fag.

22 Hã ra fag tóg pã'i ag kamẽg mÿ, hã kÿ fag tóg: “ha ti ki jêmẽmnÿ,” he mÿ. Pã'i ag vÿ tag tó ja nÿ, Jesus to: “ãjag kãmÿ ù tÿ ti to: “Cristo vÿ tÿ ti nÿ,” hen kÿ êg ti kutẽm ke mÿ,” he mÿ, “ti tÿ tÿ êg mré ke tũ nÿ jé, ti tÿ êg mré vẽnhmãn tũ nÿ jé, êg vẽnhanhrãn jafã krẽm,” he ja ag tóg nÿgtÿ.

23 Hã kÿ ùn kyvó ja ãn han mÿ fag vÿ Jesus to nèn ù tó sór tũ nÿ, hã kÿ fag tóg pã'i ag mÿ: “sanh há ti nÿ ha, ajag mÿ ti tónh mÿ,” he mÿ, fag kósin kyvó ja ãn to.

24 Kÿ ag tóg ùn kyvó ja ãn jé prẽr mãn mÿ. Kÿ ag tóg ti mÿ: “ker ón hẽ', Topẽ vÿ ã vÿ mẽg mÿ,” he mÿ. “Û tÿ ã tÿ há' he mÿ ãn vÿ kórég nÿ, Topẽ vÿ mranh ti tÿ,” he ag tóg mÿ ti mÿ.

25 Kÿ tóg: “mẽ',” he mÿ. “Ti mÿ Topẽ vÿ mranh tÿ? Sÿ ki kagtÿg tóg tÿ. Nèn ù pir hã ki kanhró sóg nÿ. Kyvó ãn hẽ vẽ vẽ, hã ra sóg êvãnh há nÿ ha,” he tóg, ùn kyvó ja ãn ti.

26 Kÿ ag tóg ti mÿ: “ti hẽ ri ké, ã tÿ há' he jé?” he mãn mÿ.

27 Hã ra tóg ag mÿ: “ãjag mÿ ãn hur tó, hã ra ajag tóg mẽ sór tũ nÿ,” he mÿ. “Ajag tÿ ne jé mẽ mãn sór nẽ? Ajag mÿ ti mré mÿ sór mÿ gé?” he tóg.

28 Kÿ ag tóg ti nyg mÿ. “Ã hã vÿ tÿ ti mré ke nÿ,” he ag tóg mÿ. “Jãvo êg tóg tÿ Moisés mré ke nÿtÿ,” he ag tóg, pã'i ag, ùn kyvó ja ãn mÿ.

29 “Topẽ vÿ Moisés mré vẽnẽn ja nÿ, tag ki kanhró êg tóg nÿtÿ. Hã ra êg pi(jé) ãn ki kanhró nÿtÿ'. Ti hÿn tÿ hẽ tá ke nÿ?” he ag tóg, pã'i ag.

30 Kÿ ùn kyvó ja ãn tóg ag mÿ: “mẽ',” he mãn mÿ. “Ajag mÿ ti ki kagtÿg nÿtÿ, ti tÿ tÿ hẽ tá ke nÿn ki? Isÿ tóg há' hé mÿr, ãn kanẽ tÿ.

31 Hã ra Topẽ tóg êg vÿ mẽg tũ nÿgtÿ, êg tÿ tÿ ti vÿ mranh jafã nÿtÿn kÿ. Û tÿ Topẽ kamẽg mÿ ãn vÿ hã mẽg ti tÿ. Û tÿ ti vÿ ki króm mÿ ãn vÿ hã mẽg ti tÿ, Topẽ ti.

32 ãn mur mÿ kã ãn kyvó nÿ ja nÿ. Û tÿ ge tÿ há' he mÿ tag ve ja tũ ãn nÿ ver. Hã ra tóg isÿ há' hé.

33 Ti tÿ Topẽ tá kãtÿg tũ ra tóg nèn ù há han ki kagtÿg nÿ vẽ,” he tóg, ùn kyvó ja ti, pã'i ag mÿ.

34 Hã ra ag tóg ti mÿ: “Topẽ vÿ mranh kÿ ã tóg mur, hã ra ã tóg êg kanhrãn sór mÿ',” he mÿ. Kÿ ag tóg ti kutẽm mÿ, vẽnhanhrãn jafã krẽm.

Ûn kyvó to comparação

35 Hã ra Jesus tóg mẽg mÿ, ag tÿ ti kutẽm ja ti. Kÿ tóg ti venh tÿ mÿ. Kÿ tóg ti mÿ: “ã

mỹ ěprã ke fi kósin ěn ki rã sór tũ?" he mũ.

³⁶ Kĩ tóg Jesus mỹ: "kĩ ùn nẽ ge?" he mũ. "Sỹ ti ki rã sór vẽ," he tóg.

³⁷ Kĩ Jesus tóg ti mỹ: "ti ve ã huri," he mũ. "Û tỹ ã mré vēmén jẽ mũ hã vỹ tỹ ti nĩ, inh hã vỹ tỹ ti nĩ," he tóg.

³⁸ Kĩ ùn kyvó ja tóg ti mỹ: "Senhor," he mũ. "Ã ki rã kĩ inh jẽ nĩ," he tóg. Kĩ tóg ti krēm mũg ke mũ, Jesus krēm, ti mỹ: "Topẽ kósin vỹ tỹ ã nĩ," he jé.

³⁹ Kĩ Jesus tóg ti mỹ: "ga tag ki sóg jun, sỹ vãnh kar jykre tugnỹm jé," he mũ. "Ûn kyvó ag tỹ ěvãnh há han jé sóg ke mũ. Ag tỹ iso jykrén há han ke to ken hã vẽ. Kĩ sóg ù tỹ ve há han mũ ag kyvó han ke mũ gé. Ag tỹ iso jykrén há han ki kagtĩg to ken hã vẽ," he tóg, Jesus ti, ùn kyvó ja ěn mỹ.

⁴⁰ Hã ra Fariseu ù ag tóg ti vỹ mễg mũ. Kĩ ag tóg ti mỹ: "kỹ ěg mỹ kyvó nỹtĩ gé?" he mũ.

⁴¹ Kĩ Jesus tóg ag mỹ: "ãjag tỹ: kyvó ěg nỹtĩ, ki kagtĩg ěg nỹtĩ," he mũ hã ra Topẽ tóg ãjag to jũ tũ nĩ ver. Hã ra ãjag tóg vẽso: "ěvãnh há ěg nỹtĩ, ki kanhró ěg nỹtĩ," he tĩ. Hã kĩ ãjag tỹ Topẽ vỹ mranh ja vỹ ãjag kãkã nĩ nĩ," he tóg, Jesus ti, Fariseu ag mỹ.

10

Vãnh mễg tỹ carneiro to comparação

¹ Kĩ Jesus tóg ag mỹ vãnh kãmén mãn mũ. "Ki hã sóg ke mũ, hã kĩ sóg tó mũ," he tóg. "Ěg tỹ ěg mễg tỹ carneiro

jy ró han kĩ ěg tóg ti jãnkã ra rã tĩ. Jãvo ù tóg kejẽn ró to tãpry kĩ pãte rã sór tĩ. Ti tỹ carneiro péju sór vẽ, hã kĩ tóg ró to tãpry kĩ pãte rã sór mũ.

² Ti jãvo ù tỹ carneiro ki rĩr tĩ vỹ jãnkã ra rã mũ.

³ Jãnkã ki rĩr tĩ ěn vỹ ti mỹ ró nón tĩ, jãnkã ti. Kĩ tóg carneiro jygji tó kãn mũ sir. Ti vỹ ki kanhró fag nỹtĩ, ti mễg tỹ carneiro fag.

⁴ Kĩ tóg fag jo tĩ mũ, re ra. Kĩ tóg ã mễg fag jé prēr kãn mũ sir, kĩ fag tóg pa kãn mũ, ù tỹ carneiro ki rĩr tĩ ěn mễg fag. Kĩ tóg fag jo tĩ mũ, kĩ fag tóg ti nón mũ mũ sir, ti mễg fag, fag tỹ ti vỹ ki kanhró nỹtĩn kĩ.

⁵ Fag pi(jé) ù nón mũnh ke mũ', fag tỹ ùn ki kagtĩg nón. Û jo fag vãnh pigjunh ke mũ, fag tỹ ùn ki kagtĩg ěn jo. Fag pi(jé) ti vỹ ki kanhró nỹtĩ', hã kĩ fag tóg ti jo vãnh pigjunh ke mũ," he tóg, Jesus ti.

⁶ Jesus tỹ ag mỹ comparación han vẽ. Ti mỹ ěg tóg vãnh mễg tỹ carneiro ri ke nỹtĩ, ěg tỹ ti nón mũn kĩ. Hã ra Fariseu ag tóg ti vỹ to jykrén tũ nỹtĩ.

Vãnh mễg to comparação ù

⁷ Hã ra Jesus tóg ag mỹ kãmén mãn mũ. "Ki hã sóg tó mũ, hã kĩ sóg ke mũ," he tóg. "Carneiro jy ró jãnkã ri ke inh nĩ," he tóg.

⁸ "Û tỹ inh jo kãmũ ag vỹ tỹ carneiro pigju(g) tĩ ag nỹtĩ ja nĩgtĩ, ùn jũ (ka)mẽ ag nỹtĩ ja nĩgtĩ. Hã ra carneiro fag vỹ ag vỹ mẽ ja tũ nỹtĩ.

⁹ Inh hã vỹ fag mỹ jänkã ri ke nĩ. Û tỹ inh ki rã mũ vỹ kren ke mũ, kỹ tóg ti tỹ jänkã ra rã ri ke nĩ. Kỹ tóg kãra rã tĩ, kar kỹ tóg kãkutẽ tĩ gé, ti tỹ vễjẽn ve kỹ.

¹⁰ Vẽn h mễg tỹ carneiro pigju(g) tĩ ẽn vỹ carneiro pigju hã jé kãtĩ tĩ, fag kãgtén jé, fag kókén jé. Ti jãvo sóg fag ki rĩnrĩr há han hã jé kãtĩg, fag tỹ jagtar tũ nỹtĩ jé, fag mỹ sér tĩ jé," he tóg, Jesus ti.

¹¹ "Û tỹ carneiro ki rĩr tĩ ri ke inh nĩ gé, ùn tỹ ki rĩr há ri ke inh nĩ. Û tỹ carneiro ki rĩr há han mũ vỹ ã mễg jagfy ter ke mũ, fag krenkren jé.

¹² Kỹ ù camarada vỹ tag ri ke tũ nĩgtĩ. Mĩg kamễg jé tóg ke mũ, kỹ tóg mĩg ve kỹ vẽnhvãg tĩnh ke mũ, ã patrão mễg tovãnh kỹ, ti camarada ti. Kỹ mĩg vỹ fag kugmĩnh ke mũ, kỹ fag tóg vẽn kãpugpóv ke mũ gé, mĩg tigrĩn, carneiro fag. Ti camarada mễg pi(jé)', ti patrão mễg vễ, hã kỹ tóg fag jy nĩgãnh há han tũ nĩ.

¹³ Mĩg ve kỹ tóg vẽn vãg tĩ mũ. Jänkamy hã to tóg rãnhrãj jẽ nĩ, hã kỹ tóg mĩg kamễg mũ.

¹⁴ Ti jãvo sóg carneiro ki rĩr há han tĩ. Inh mễg ki kanhró sóg nĩ, kỹ fag tóg inh ki kanhró nỹtĩ gé.

¹⁵ Ri ke ti nĩ gé, inh panh mré. Inh ki kanhró tóg nĩ, kỹ sóg ti ki kanhró nĩ gé. Kỹ sóg inh mễg jagfy ter ke mũ.

¹⁶ Inh mễg ù vỹ nỹtĩgtĩ gé ver, inh mễg tỹ hẽ tá ke fag. ãjag povo kãmĩ ke pijé'. Ẽn jé prêr jé sóg ke mũ gé, kỹ fag tóg inh mré kãmũnh ke mũ gé.

Inh vĩ mẽ jé fag ke mũ gé. Inh mễg tỹ tag ki fag mré ke vỹ tỹ fag nỹtĩnh mũ. Fag kar jy sóg ró pir han ke mũ, inh mễg kar jy, kỹ sóg inh pir mỹ fag ki rĩr ke mũ," he tóg, Jesus ti.

¹⁷ "Inh panh vỹ iso há nĩ, isỹ inh mễg jagfy ter ken kỹ, kar kỹ sóg rĩr mãn ke mũ.

¹⁸ Iser sór tũ ra ù pi(jé) isén ke mũ vễ'. Hã ra sóg fag jagfy ter sór mũ. Iser sór kỹ sóg ter ke mũ. Inh rĩr mãn sór kỹ sóg rĩr mãn ke mũ gé, iser kar kỹ. Inh panh tỹ inh mỹ nén tó mũnh hã vễ," he tóg, Jesus ti.

¹⁹ Judeu ag tỹ ti vỹ tag mẽ kỹ ag tóg vẽn kãpãm kỹ nỹtĩ mãn mũ gé.

²⁰ Ûn e tóg ti to: "jagrẽ kórég ti nĩ, krĩ vẽnhmỹ ti nĩ, ti vỹ mẽ sór tũg nĩ," he mũ.

²¹ Hã ra ù ag tóg: "ùn pi(jé) ã jagrẽ kórég hã ra vẽn vĩ há tó tĩ," he mũ. "Ûn kyvó tỹ há' he ki kagtĩg tóg nĩ gé, ùn jagrẽ kórég ti," he ag tóg mũ, Judeu ù ag, ù tỹ Jesus to há nỹtĩ ag.

Judeu ag tỹ Jesus tén mãn sór

²² Kejẽn tóg Judeu ag tỹ festa há' ù tá krỹg mũ. Vãsỹ ù tỹ Judeu ag kato vãsãnsãn mũ ag vỹ Topê jo ãn kókén ja nĩgtĩ, hã ra Judeu ag tóg kejẽn ti ãn han mãn. Ag tỹ ãn han mãn to festa hã vễ sir. Prỹg kar ki ag tóg festa ẽn han tĩ. Kusãg mũ ẽn kã ke ja vễ, festa ẽn ti.

²³ Hã ra Jesus tóg venh tũg ja nĩ, kỹ tóg Topê jo ãn mĩ pasa ke tĩ nĩ, Salomão tỹ jänkã ẽn tá.

²⁴ Kỹ Judeu ag tóg ti venh kãmũ mũ, ag tỹ ón kỹ ti ki jẽmẽ

jé. “Ă hē ri ke kă ěg mŷ vĕnh kămén há han ke mŷ?” he ag tóg mŷ. “Ă mŷ tŷ Cristo nĩ? Topĕ tŷ ěg mŷ ũn jĕnĕnh ke mŷ ěn mŷ tŷ ģ nĩ? Ha ěg mŷ tó há han,” he ag tóg mŷ, ón kŷ.

25 Hă ra Jesus tóg ag mŷ: “ăjag mŷ sóg hur tó, hă ra äjag tóg kri nĩm sór tŷ nĩ,” he mŷ. “Milagre hyn han sóg tĩ gé, inh panh tŷ inh mŷ nĕn tó ja ěn. ěn ve kŷ äjag tóg inh ki kanhró nŷtĩnh mŷ vĕ.

26 Hă ra äjag tóg kri fi sór tŷ nŷtĩ. Äjag pi(jé) inh mĕg tŷ carneiro ri ke nŷtĩ', hă kŷ äjag tóg kri nĩm sór tŷ nŷtĩ.

27 Inh mĕg fag vŷ inh vĩ mĕg tĩ, fag ki kanhró sóg nĩ, hă kŷ fag tóg inh mré mŷgtĩ.

28 Fag jagfy sóg ter ke mŷ, kŷ fag tóg kăgter ke tŷ nĩ. Mĩg vŷ fag kugmĩnh ke tŷ pĕ nĩ gé, isŷ fag jy nĩgănh kŷ.

29 Inh panh tŷ inh mŷ fag vin mŷn hă vĕ, inh mĕg fag. Hă ra tóg vĕnh kar kăfór nĩ, inh panh ti. Kŷ ũ pi(jé) inh panh tŷ ag péju(g) tĩ', ti tŷ tŷ vĕnh kar kri ke nĩnh kŷ.

30 Inh panh mré sóg tŷ ũn pir nĩ,” he tóg, Jesus ti.

31 Ag tŷ ti vĩ tag mĕ kŷ ag tóg pó tŷ hĕn ri ke măg mŷ sir, Judeu ag, ag tŷ tŷ ti pin kŷ ti tĕn jé.

32 Hă ra Jesus tóg ag mŷ: “nĕn ũ há hă hyn han ja inh nĩ,” he mŷ. “Inh panh tŷ inh mŷ: “tag han ra,” he ja ěn hă han inh tĩ. Sŷ nĕn han ja tŷ hĕ nŷ hŷn äjag mŷ kórég nĩ', hă kŷ äjag tóg isĕn sór mŷ?” he tóg.

33 Hă ra ag tóg ti mŷ: “ěg pi(jé) nĕn ũ há to ģ tĕn sór

mŷ,” he mŷ. “ěpră ke vŷ tŷ ģ nĩ, ěg mré ke vŷ tŷ ģ nĩ, hă ra ģ tóg vĕso: “Topĕ kósin vŷ tŷ inh nĩ,” he mŷ. Ă tŷ Topĕ to vĩ kónănh hă vĕ. Tag to ěg tóg ģ tĕn ke mŷ, pó tŷ ģ pin kŷ,” he ag tóg mŷ, Judeu ag.

34 Kŷ Jesus tóg ag mŷ: “Topĕ vĩ tŷ rán kŷ nĩ ki tag vŷ rán kŷ nĩ, ha mĕ,” he mŷ. “Topĕ vŷ ěpră ke ag to: “Topĕ ri ke äjag nŷtĩ,” he tŷ,” he tóg, Topĕ vĩ rá ki.

35 Kŷ tóg ũ tŷ ti vĩ mĕg mŷ ěn ag mŷ: “Topĕ ri ke äjag nŷtĩ,” he ja nĩ, Topĕ ti. Hă ra tóg ón tŷ nŷgtĩ, Topĕ ti.

36 Hă kŷ tóg vĕnhmŷ tŷ nĩ gé, sŷ äjag mŷ: Topĕ kósin vŷ tŷ inh nĩ, hen kŷ. Inh panh vŷ inh kuprĕg, kŷ tóg inh jĕnĕ gé, isŷ äjag tá jun jé. Topĕ to vĩ kónănh pijé', sŷ nĕn tó mŷ tag ti.

37 Isŷ inh panh vĩ ki króm tŷ nĩ ra tóg há nĩnh mŷ vĕ, äjag tŷ inh vĩ kri nĩm sór tŷ nŷtĩ ti.

38 Hă ra sóg ti vĩ ki króm tĩ. Kŷ inh vĩ tŷ äjag mŷ kórég nĩnh kŷ isŷ milagre hyn han mŷ ěn vemnĩ. Isŷ milagre hyn han mŷ ki tóg ve há tĩ, isŷ inh panh ri ke nĩ ti, kŷ inh panh vŷ inh ri ke nĩ gé,” he tóg, Jesus ti.

39 Kŷ ag tóg ti vĩ to ti se sór măn mŷ sir, hă ra tóg kren măn mŷ gé.

40 Kŷ tóg vĕnh péju kŷ tĩ mŷ, goj tŷ Jordăo măra, Jesus ti. João vŷ ěn tá vĕnh kar kygpég jĕ ja nŷgtĩ, ti tŷ ag kygpe vén kŷ. ěn ra tóg tĩ mŷ sir, Jesus ti, kŷ tóg tá nĩ nĩ, ģ mré mŷ tĩ ag mré.

41 Kÿ ù tÿ hên ri ke ag vÿ tá ti venh kãmũ mũ. Jesus to ag tóg jagnê mÿ: “ha vé, João vÿ milagre han ja tũ nĩ,” he mũ. “Hã ra tóg Jesus kãmén. Tó há han ja tóg nĩ, João ti. Ki hã tóg tó ja nĩ, ti tÿ êg mÿ Jesus to nén tó mũ ti,” he ag tóg.

42 Kÿ tá ù tÿ hên ri ke ag tóg ti ki ge mũ sir.

11

Lázaro ter

1 Kejên ù tÿ Jesus to há ù tóg kaga nÿ nĩ, cidade tÿ Betânia tá. Ûn kaga ên jyjn hã vÿ: Lázaro, he mũ. Ti ve fi vÿ tÿ Maria fi nĩ, Marta fi ke gé. Betânia tá fag êmã nÿtĩ gé.

2 Maria ên fi vÿ kar kÿ kejên Jesus pên kri nén ger há kujê, kÿ fi tóg fi gãnh tÿ ti pên kykũg mũ gé. Ên fi mré pafa mũ vÿ kaga nÿ.

3 Kÿ ti ve fag vÿ Jesus mÿ vênh vĩ jênêg mũ. Ti mÿ fag tóg: “ã tÿ ù to há nĩ ên vÿ kaga nÿ,” he mũ.

4 Kÿ Jesus tóg mêng mũ. Hã ra tóg ã mré mũ tĩ ag mÿ: “ti pí(jé) vênh kaga tag to ter ke mũ,” he mũ. “Topê vÿ tÿ ùn mág nĩ. Tag vÿ vênh ven ke mũ, ti kaga tugrĩn. Kÿ Topê kósín vÿ tÿ ùn mág nĩ gé. Tag vÿ vênh ven ke mũ gé, ti kaga tugnĩn,” he tóg, Jesus ti.

5 Jesus vÿ Marta fi to há tãvĩ nĩ, fi jãvy fi to ke gé, Lázaro to ke gé.

6 Hã ra Jesus tóg, ti tÿ Lázaro kaga mêng mũ ra (tóg ver) ti venh tĩ tũ nĩ. ã tÿ hê tá nĩ ên tá tóg ver kurã régre han.

7 Tag pãte tóg ã mré mũ tĩ ag mÿ: “mũ nÿ, ga tÿ Judéia ra,” he mũ.

8 Kÿ ag tóg ti mÿ: “Senhor,” he mũ. “Êg tÿ Judéia tá nÿtĩn kÿ Judeu ag tóg ã pin sór ja nĩ, pó tÿ. Ra tĩ tũg nĩ,” he ag tóg ti mÿ.

9 Hã ra Jesus tóg ag mÿ com-paração han mũ, ti ter ke kurã jun ja tũ to. “Kurã pir vÿ tÿ 12 (ke) hora ke nĩ,” he tóg. “Êg tÿ kurã ên ki hên ra mũn kÿ êg tóg krĩm kenh ke tũ nĩ, êg tÿ kurã ve há han kÿ.

10 Êg tÿ hã ra kuty ra hên ra mũn kÿ êg tóg krĩm ke tĩ, êg tÿ kuty ki nén ù vég tũ nĩn kÿ,” he tóg, Jesus ti.

11 Kÿ tóg ag mÿ: “ù tÿ êg to há nĩ ên, Lázaro ên vÿ nÿr nÿ,” he mũ. “Isÿ ti tÿ mrin ke han tÿg ke nê ha,” he tóg.

12 Kÿ ag tóg ti mÿ: “ti nÿr nÿn kÿn kren ke mũ,” he mũ.

13 Hã ra Jesus tóg ti ter ja tó ja nĩ. Jó ag tóg: “ti nÿr vê, ti vênhkán vê,” he mũ, ag tÿ ti vĩ mên kÿ.

14 Kÿ Jesus tóg jamã hár(a) ag mÿ kãmén mũ. “Lázaro vÿ ter huri,” he tóg.

15 “Ăjag tugrĩn tóg inh mÿ sér tĩ, isÿ ti ter ve ja tũ nĩn kÿ. Ăjag tÿ isÿ nén han mũ ven kÿ Ăjag tóg inh ki ge há han ke mũ. Mũ jé ha, ti ve jé,” he tóg.

16 Kÿ Tomé he mũ ên, ag tÿ ù to: “ùn vègnig mũ,” he tĩ ên vÿ ti mré mũ tĩ ag mÿ: “mũ jé ha, ti mré, êg tÿ ti mré kãgter jé,” he mũ. Kÿ ag tóg mũ mũ sir.

Jesus tÿ vênh kar rĩnrĩr han ke

17 Kÿ ag tóg Betânia tá jun-jun mũ. Hã ra Lázaro vỹ vãnh kej tá nỹ nĩ. Kurã tỹ 4 (ke) vỹ sir, ag tỹ vãnh kej tá ti fón ja kri.

18 Hã ra ag tóg Jerusalém kakó ki nỹtĩ, 3 quilômetros hỹn, ãmã tỹ Betânia ki.

19 Kÿ Judeu tỹ hên ri ke fag vỹ Marta fi venh kãmũ ja nĩ, Maria fi ke gé, fag mré vëser kri fỹ jé.

20 Kÿ Marta fi tóg mễg mũ, Jesus kãtĩg ti. Kÿ fi tóg tim ke kÿ ti venh tĩ mũ. Hã ra Maria fi tóg ã ĩn krêm nĩ nĩ.

21 Kÿ Marta fi tóg Jesus kato tễ mũ. “Senhor,” he fi tóg. “Ã tỹ kãnĩ ra ti ter ke tũ nĩ vễ,” he fi tóg.

22 “Hã ra sóg ã ki kanhró nĩ. ã tỹ Topễ mỹ nén ù to vĩn kÿ tóg ã mỹ nĩm ke mũ, Topễ ti,” he fi tóg, Marta fi, Jesus mỹ.

23 Kÿ tóg fi mỹ: “ã mré ke vỹ rĩr mãn ke mũ,” he mũ.

24 “Hỹ,” he fi tóg. “Vãnh kar rĩnrĩr mãn ken kÿ tóg rĩr mãn ke mũ gé, ki kanhró sóg nĩ. Kurã tỹ ãgno ki ke vễ,” he fi tóg.

25 Hã ra Jesus tóg fi mỹ: “inh hã vỹ vãnh kar rĩnrĩr mãn han tũ,” he mũ. “Vãnh kar rĩnrĩn mũ vỹ tỹ inh nĩ,” he tóg. “Û tỹ inh ki rã mũ ĩn vỹ rĩr ke mũ, ti ter kÿ nỹ (hã) ra.

26 Kÿ ùn rĩr jễ tóg, ti tỹ inh ki rã kÿ (tóg) ter mãn ke tũ pễ nĩ. ã mỹ inh vỹ tag kri fig mũ?” he tóg, Jesus ti.

27 “Hỹ,” he fi tóg. “Cristo vỹ tỹ ã nĩ, Topễ kósin ti, ù tỹ ga kri jun ke mũ ĩn ti. Tag vỹ inh mỹ tỹ hã nĩ,” he fi tóg, Jesus ti mỹ.

28 Kÿ fi tóg tĩ mũ, fi jãvy fi jé prěr jé, Maria fi.

Jesus fỹ

Kÿ Marta fi tóg Maria fi tá jun kÿ fi mỹ: “ĕg Senhor vỹ jun, kÿ tóg ã ve sór mũ,” he mũ.

29 Fi tỹ tag mễ kÿ fi tóg tim ke kÿ tĩ mũ, Jesus ve jé.

30 Hã ra tóg ĩmã ĩn ra rã ja tũ nĩ ver. Ver tóg tá nĩ nĩ, Marta fi tỹ hẽ tá ti mré vēmén ja ĩn tá.

31 Kÿ Judeu fag vỹ vэг mũ, Maria fi tỹ tim ke kÿ tĩg mũ ti. Fi mré kygfỹ jé fag kãmũ ja nĩ, Judeu fag. Fag tỹ fi tĩg ve kÿ fag tóg fi nón kãmũ mũ gé. “Fi hỹn ti kej ra tĩg sór mũ, tá fỹ jé,” he fag tóg mũ, hã kÿ fag tóg fi nón kãmũ mũ.

32 Kÿ Maria fi tóg Jesus tá jun mũ. Fi tỹ ti ve kÿ fi tóg ti pẽn krêm mũg ke mũ. Ti mỹ fi tóg: “Senhor,” he mũ. “Ã tỹ kãnĩ ra ti ter ke tũ nĩ vễ,” he fi tóg mũ gé.

33 Kÿ Jesus tóg fi fỹ mũ vэг mũ, kÿ tóg Judeu tỹ hên ri ke fag vэг mũ gé, fi nón kãmũ mũ fag. Kÿ tóg ti mỹ e tãvĩ tĩ.

34 “Ti hẽ kã nỹ?” he tóg mũ sir. Kÿ ag tóg ti mỹ: “mũ nỹ, ti ve jé,” he mũ.

35 Kÿ Jesus tóg fỹ mũ.

36 Kÿ Judeu ag tóg: “ha vé,” he mũ. “Ti to há tãvĩ tóg nĩ, hã kÿ tóg fỹ mũ,” he ag tóg.

37 Hã ra ag kãmĩ ù tóg: “ti tỹ há' he ja tũ tóg nĩ,” he mũ. “Ûn kyvó kanẽ tỹ há' he ja tóg nĩ, ti tỹ hẽ ri ken kÿ ti tỹ há' he ja tũ nĩ nễ, ti ter tũ nĩ jé? Ti mỹ tỹ hẽ ri ke tũ nĩ vỹ, ti kaga tỹ?” he ag tóg, Jesus to.

Jesus tÿ Lázaro rĭn măn

38 Kÿ tóg Jesus mÿ e tăvĭ tĭ. Kÿ tóg ti tÿ vĕnh kej kÿ nÿ ěn ra tĭ mÿ. Hă ra ti kej vÿ tÿ păró nor nĭ, kÿ tóg pó mág tÿ nĭfénh kÿ nĭ, ti kej nor ti.

39 Kÿ Jesus tóg ag mÿ: “ha pó tag kunÿ,” he mÿ. Kÿ Marta fi, ũn ter kÿ nÿ ěn ve fi vÿ ti mÿ: “Senhor,” he mÿ. “Ti hÿn ger nÿ ha. Kură tÿ 4 (ke) vĕ ha, ěg tÿ ti fón ja kri,” he fi tóg mÿ.

40 Hă ra Jesus tóg fi mÿ: “ă mÿ sóg: ă tÿ inh ki ră há han kÿ ă tóg venh ke mÿ, Topĕ tÿ tÿ ũn mág nĭ ti, he ja nĭ,” he mÿ.

41 Kÿ ag tóg pó ěn kunÿg mÿ.

Kÿ Jesus tóg kanhkă ki ěvănĥ mÿ. Kÿ tóg: “panh’,” he mÿ. “Inh mÿ tóg há tĭ. Inh vĭ tag jĕmĕg ă tóg mÿ.

42 Jĕmĕg ă tóg tĭ, inh vĭ ti, hă kÿ ă tóg sÿ ă mÿ vĭ tag jĕmĕg mÿ gé. Hă ra sóg jamă hăr(a) ă mré vĭ mÿ, ũ tÿ ki nÿtĭ kar fag tÿ inh vĭ mĕ jé, fag tÿ inh ki ge jé, fag tÿ iso: “Topĕ tÿ ti jĕnĕ vĕ,” he jé,” he tóg, Jesus ti.

43 Tag tó kar kÿ tóg jamă hăr(a) prĕr mÿ. “!..Lázaro, kuneg..!” he tóg.

44 Kÿ ũn ter ja ěn tóg kătĭg mÿ sir, ă kej kăki tóg kăkutĕ mÿ sir, mÿr, ha mĕ. Ti pĕn vÿ sigse kÿ nÿtĭ, ti nĭgé ke gé, kÿ ti kakă vÿ păg kÿ nĭ gé. Kÿ Jesus tóg ag mÿ: “ha ti kava,” he mÿ, “ti tĭg jé,” he tóg. Kÿ ag tóg ti kyvăn kăn mÿ sir.

45 Kÿ ũ tÿ Maria fi mré kygfÿ jé kămÿ tÿ hĕn ri ke fag vÿ Jesus ki ge mÿ sir, fag tÿ Jesus tÿ ti rĭn măn mÿ ěn ven kÿ.

46 Hă ra ũ ag tóg Fariseu ag mÿ tónh mÿ mÿ, Jesus tÿ ti rĭn măn ja ti.

Ag tÿ Jesus tén ke to jykren (Mt 26.1-5; Mc 14.1-2; Lc 22.1-2)

47 Kÿ Fariseu ag tóg mĕg mÿ, Jesus tÿ Lázaro rĭn măn ja ti. Topĕ tÿ ki rĭr tĭ to pă'i ag vÿ mĕ kăn mÿ gé. Kÿ ag tóg vĕnh jyvĕn tĭ kar ag jé prĕr mÿ. “Ěg hÿn ti tÿ hĕ ri kenh ke mÿ?” he ag tóg mÿ, Jesus to. “Milagre tÿ hĕn ri ke hyn han tóg tĭ.

48 Ěg tÿ ti kato văsăn tÿ nĭn kÿ tóg ěg mÿ vĕnh kar tÿ ti ki genh ha mĕ tĭ. Kÿ ěg fóg tÿ Romano ag vÿ ěg kato văsănsăn ke mÿ. Topĕ jo ĭn kókén jé ag tóg ke mÿ, kÿ ag tóg ěg kăgtén kăn ke mÿ gé, ěg fóg tÿ Romano ag, ha vemnĭ,” he ag tóg, vĕnh jyvĕn tĭ ag.

49 Kÿ pă'i ag kămĭ ũ vÿ tÿ Caifás nĭ. Prÿg ěn kă tóg tÿ Topĕ tÿ ki rĭr tĭ to pă'i mág nĭ, Caifás ti. Ěn vÿ tóg ag mÿ: “to jykren há han tÿ ăjag nÿtĭ,” he mÿ.

50 “Tag to jykren nĭ, ha mĕ. Ũn pir ter ke tóg kórég nĭ, hă ra tóg povo kăgter kăn kórég jakrĕm nĭ. Kÿ ti hÿn ěg povo jagfy ter ke mÿ, Jesus ti,” he tóg, Caifás ti.

51 Hă ra tóg vĕsóg ki tag to jykren ja tÿ nĭ. Prÿg ěn ki tóg tÿ Topĕ tÿ ki rĭr tĭ to pă'i mág nĭ, hă kÿ Topĕ kuprĭg vÿ ti krĭn ja nĭ, ti tÿ Jesus to: “ěg povo jagfy tóg ter ke mÿ,” he jé, Caifás ti.

52 Hă ra Judeu ag tăvĭ jagfy ke pijé'. Topĕ krĕ kar jagfy ke

ja vë. Ti tỹ vënh kar tỹ ùn pir han sór ja vë, Jesus ti, hã jé tóg ãg jagfy ter ja nĩ, ù tỹ povo kar kãmĩ ti ki genh ke mũ ag kar jagfy.

⁵³ Pã'i ag tỹ tỹ vëmén kar kỹ ag tóg ti tén ke to jykrén mũ sir.

⁵⁴ Hã kỹ Jesus tóg vënh péju kỹ tĩ mũ, ga kórég ra, ãmã tỹ Efraim ra. Judeu ag mũ tóg tĩg mãn tũ nĩ sir. Efraim hã tá tóg nĩ nĩ ver, kỹ ti mré mũ tĩ ag vỹ ti mré tá nỹtĩ gé.

⁵⁵ Hã ra Judeu ag tỹ festa tỹ Páscoa há ù vỹ kakó tĩ ha. Kỹ ù tỹ hën ri ke ag tóg Jerusalém ra mũ mũ, Páscoa ãn ve jé. To hã ag tóg ra mũ mũ, vënh jãnhkrigkrig jé, Judeu ag jykre ki.

⁵⁶ Tá ag tóg Jesus jãvãnh mũ, Topê jo ãn tá nỹtĩ kỹ. Kỹ ag tóg jagnë mỹ: “ti ã mỹ hỹn hë ri ke mũ?” he mũ. “Ti mỹ hỹn festa to kãtĩg ke mũ vỹ?” he ag tóg mũ, jagnë mỹ.

⁵⁷ Hã ra Topê tũ ki rĩr tĩ to pã'i ag vỹ vënh kar mỹ vënh vĩ jënë ja nĩgtĩ, Fariseu ag mré hã. “Ájag tỹ ti ve kỹ ãg mỹ tónh kãmũmũ,” he ja ag tóg nĩ, vënh kar mỹ. Ag tỹ ti se sór vë, hã kỹ ag tóg ke mũ.

12

Betânia tá
(Mt 26.6-13; Mc 14.3-9)

¹ Festa tỹ Páscoa to hã ke vë sir, kurã tỹ 6 (ke) vỹ jun nỹ ha. Kỹ Jesus tóg Betânia ra tĩg mãn mũ, Lázaro jamã ra, ùn rĩr mãn mũ ãn jamã ra.

² Tá fag tóg Jesus mỹ festa han mũ. Kỹ Marta fi tóg vëjën

ki rĩr mũ. Lázaro vỹ Jesus mré nĩ nĩ, mesa to.

³ Kỹ Maria fi tóg nén ger há ma kãtĩ mũ, garrafa fór, ùn kaja e. ãn tỹ fi tóg Jesus pën kri kujëg mũ, kỹ fi tóg ã gãnh tỹ kykũg mũ, ti pën ti. Kỹ ger há ãn tóg ãn kar ãn kri rũm ke mũ.

⁴ Kỹ tóg Judas Iscariotes mỹ e tĩ, ù tỹ Jesus mré mũ ãn ag kã ù tag mỹ, ù tỹ pã'i ag mỹ Jesus ven ke mũ tag mỹ. Fi tỹ ger há tỹ ti pën to tĩn kỹ tóg ti mỹ e tĩ, kỹ tóg fi to:

⁵ “fi tỹ ger há ãn fón ke vë vë, jãnkamy tỹ hën ri ke to,” he mũ. “Fi tỹ ùn jagãgtar ag mỹ jãnkamy ãn kã vënh kãpópãm jé vë vë,” he tóg mũ, Judas ti.

⁶ Hã ra tóg tag tó, ti tỹ Jesus mỹ jãnkamy ki rĩr kỹ. Hã ra tóg ti jãnkamy péju(g) tĩ. Hã kỹ tóg fi to tag tó ja nĩ, Judas ti. Ti tỹ ùn jagãgtar ag to jykrén ja pijé'. Ti tỹ jãnkamy ãn mãn sór ja vë.

⁷ Hã ra Jesus tóg ti mỹ: “fi to vỹ tũg,” he mũ. “Fi tỹ nén ger há ãn nĩm han ja vë, fi tỹ iser jé ãn kri kujën jé, isỹ ãn kej kãkã nỹ jé. Ki hã fi tóg han ja nĩ.

⁸ ùn jagãgtar ag vỹ ãjag mré nỹtĩ, tũ' henh ke tũ ag tóg nỹtĩ. Ag jãvo sóg kãnhmar ãjag mré nĩ mãn ke tũ nĩ,” he tóg, Jesus ti.

Ag tỹ Lázaro tén sór

⁹ Kỹ Judeu tỹ hën ri ke ag vỹ mëg mũ, Jesus tỹ Betânia tá nĩ ti, kỹ ag tóg ti venh kãmũ mũ. Hã ra ag tóg Lázaro ve sór mũ gé, ùn rĩr mãn mũ ãn ti.

10 Pã'i ag tóg Lázaro tén sór mũ gé sir.

11 Judeu tỹ hẽn ri ke ag vỹ Jesus ki ge kỹ nỹtĩ, ti tỹ Lázaro rĩn mǎn ja tigrĩn, hǎ kỹ ag tóg Lázaro tén sór mũ.

Jesus tỹ Jerusalém ra tĩg

(Mt 21.1-11; Mc 11.1-11; Lc 19.28-40)

12 Tỹ vaj kỹ Jesus tóg Jerusalém ra tĩ mũ. Kỹ ùn e ag tóg Jesus tỹ Jerusalém ra tĩ mễg mũ sir, ù tỹ festa venh kǎmũ mũ ẽn ag.

13 Kỹ ag tóg ti ve jé kǎpa mũ, Jerusalém tá. Tǎnh féj génh kỹ ag tóg ti venh kǎmũ mũ. Kỹ ag tóg: “!..Viva..!” he mũ. “!..Sér tóg tĩ ẽg mỹ..! !..Ëg jóg mág vỹ ti jẽnẽ..! !..Israel kri pǎ'i mág pẽ vẽ..!” he ag tóg, prẽnprẽn kỹ.

14 Hǎ ra Jesus vỹ burrico sĩ ve ja nĩ, kỹ tóg kri nĩ kỹ Jerusalém ra tĩ mũ. Hǎ ra tóg rán kỹ nĩ, Topẽ vỹ tỹ rán kỹ nĩ ki, ti tỹ burrico sĩ kri tĩg ke ti, ha mẽ:

15 “kamẽg tũg nĩ, Sião tá ke kar',” he tóg. “Ájag pǎ'i mág vỹ ùri jun ke mũ ha. Burrico sĩ kri tóg jun ke mũ ha,” he ja tóg nĩ, Topẽ vỹ rán ki, Jesus to.

16 Kurǎ ẽn kǎ ag tóg ti rá tag to jykrén ja tũ nĩ ver, Jesus mré mũ tĩ ag. Jesus tỹ kanhkǎ ra vỹn ke kar kỹ ag tóg kejẽn to jykrén mũ ha, ti to rán kỹ nĩ ẽn to, hǎ ra tóg ge ja nĩ.

17 Û tỹ Jesus mỹ prẽnprẽn mũ ag kǎmĩ ù ag tóg Lázaro ve ja nĩ, Jesus tỹ ti rĩn mǎn kỹ. Lázaro tỹ vẽnh kej kǎkǎ nỹ ra Jesus tóg ti jé prẽn kỹ ti rĩn

mǎn ja nĩ. Û tỹ tag vég mũ ẽn ag vỹ jagnẽ mỹ kǎmén mũ sir.

18 Hǎ kỹ ùn e ẽn ag tóg Jesus kato pétẽ mũ, ti tỹ jun ke kỹ. Û ter kỹ nỹ rĩn mǎn ẽn ve ja tũ ag tóg nỹtĩ, kỹ tóg ag mỹ e tĩ.

19 Kỹ Fariseu ag tóg jagnẽ mỹ: “ha vé, ag pi(jé) ẽg vỹ jẽnẽ sór mũ',” he mũ. “Ti hǎ mré ag tóg mũ mũ,” he ag tóg, ti to jũgũ kỹ, pǎ'i ag.

Fóg tỹ Grego ag tỹ Jesus ve sór

20 Festa venh kǎmũ mũ ag vỹ e nỹtĩ. Ag kǎmĩ ù vỹ tỹ ga tỹ Grécia tá ke nỹtĩ gé.

21 Ẽn ag vỹ Jesus ve sór mũ. Hǎ kỹ ag tóg Filipe mré vỹ mũ. Ga tỹ Galiléia tá ẽmǎ tỹ Betsaida tá ke vỹ tỹ ti nĩ, Filipe ti. Kỹ fóg tỹ Grego ẽn ag tóg Filipe mỹ: “ẽg tỹ Jesus venh há tóg tĩ,” he mũ.

22 Kỹ Filipe tóg André mỹ tónh tĩ mũ, kỹ ag tóg Jesus mỹ tónh mũ mũ, Filipe ti, André ti ke gé.

23 Hǎ ra Jesus tóg ag mỹ: “inh kurǎ vỹ hur jun,” he mũ. “Topẽ vỹ isỹ ùn mág han ke mũ ha. Tỹ sóg ẽprǎ ke fi kósin nĩ,” he tóg.

24 “Ki hǎ sóg ǎjag mỹ tó mũ, hǎ kỹ sóg tó mũ. Isén jé ag tóg ke mũ, ùn e ag tỹ isugrĩn rĩnrĩr nỹtĩ jé. Ẽg tỹ nén ù fy krǎn ri ke ti nĩ. Tĩ péju(g) ẽg tóg tĩ, ga ki, kỹ tóg vag tĩ, nén ù fy fár ti. Hǎ ra ti fy ẽn tóg rĩr mǎn kỹ mur mũ, kỹ tóg mog kỹ kanẽ e han mũ. Ẽg tỹ ti krǎn tũ nĩ ra tóg kanẽn ke tũ nĩ vẽ.

25 Ẽn ri ke tóg nĩ, ẽg mré hǎ. Ẽg hǎ vỹ tỹ nén ù fy ri ke nỹtĩ

gé. Ëg tỹ ãg jykre si tovãnh kỹ ãg tóg ãg rĩr krỹg ja tũ ãn venh ke mũ. Jãvo ãg tỹ ãg jykre si tovãnh pẽ han tũ nĩn kỹ ãg rĩnrĩr ke ãn tóg krỹ' he mũ sir. Kỹ ãg kanhkã tá vég tũ nĩ sir.

²⁶ Æjag tỹ inh rãnrãj han sór kỹ inh ri ke han nĩ, kỹ ãjag tóg tỹ inh mré ke nỹtĩnh mũ, kỹ ãjag tóg inh mré kanhkã tá nỹtĩnh ke mũ gé, ãjag tỹ inh rãnrãj han kỹ. Kỹ inh panh vỹ ãjag tỹ ãn mág han ke mũ gé, inh ri ke han jé tóg ke mũ, ãjag tỹ," he tóg, Jesus ti.

Jesus tỹ ã ter ke tó

²⁷ "Ûri tóg inh mỹ e tĩ," he tóg. "Krĩ kufy jagy isóg nĩ. Ge ra sóg inh panh mỹ: "inh kren han nĩ, inh jagtar tũ nĩ jé," he sór tũ nĩ. Inh vėsỹrénh hã jé sóg kãtĩg, ti tỹ inh mỹ jagy pẽ (hã) ra.

²⁸ Tag tó jé sóg ke mũ, inh panh mỹ, hã vỹ: "vẽnh kar mỹ ven nĩ, ã tỹ tỹ ãn mág nĩ tag ti," he mũ," he tóg, Jesus ti.

Ti tỹ tag tó kỹ vãhã Topẽ tóg ti mỹ vỹ mũ, kanhkã tá nĩ kỹ. Kỹ tóg jamã hár(a) ti mỹ: "ag mỹ sóg ven huri," he mũ. "Hã ra sóg ag mỹ ven mãn ke mũ gé, isỹ tỹ ãn mág nĩ ti," he tóg, Topẽ ti. Kanhkã tá nĩg kỹ tóg ti mỹ tó mũ.

²⁹ Kỹ ãn e ag tóg mẽg mũ, Topẽ vỹ ti, ag tỹ ãprã nỹtĩ ra. Kỹ ag tóg ti vỹ to: "ta tỹ tỹrỹrỹ he hỹn," he mũ. Ag tỹ ki kagtĩg nỹtĩn kỹ ag tóg Topẽ vỹ to: "ta hỹn," he mũ. Hã ra ã ag tóg: "Topẽ tỹ jẽnẽ jafã ã hỹn ti mré vēmẽn," he mũ gé, ag tỹ ki kagtĩg nỹtĩn kỹ.

³⁰ Hã ra Jesus tóg ag mỹ: "Topẽ pi(jé) isugrĩn vỹ ja nĩ!" he mũ. "Æjag tugnĩn ke ja vỹ," he tóg.

³¹⁻³² "Hã kỹ ãjag tóg ka to isanh ke mũ, kynhmỹ. Topẽ tỹ ãprã ke ag jykre to: "kórég ti nĩ," he vỹ, ti tỹ tag ki ãn mág tỹ Japo he mũ ãn to: ti kutẽ jé, he vỹ, hã kỹ ag tóg cruz to isãg mũ. Ën kã vẽn kar ag vỹ inh ki genh ke mũ, isỹ ag krĩn kỹ, ha vemnĩ," he tóg, Jesus ti.

³³ Tag tó tóg, ã mré mũ tĩ ag mỹ, ã ter ke kãmẽn kỹ, ag tỹ cruz to ti sanh ke ti.

³⁴ Kỹ vẽn kar ag tóg ti mỹ: "hã ra ag tóg ãg mỹ: "Cristo vỹ ter ke tũ nĩ," he tĩ. Topẽ vỹ ki ti nẽji rán kỹ nĩ," he ag tóg mũ. "Jãvo ã tóg ãg mỹ: ãprã ke fi kósin ãn tỹ ag tóg cruz to ti sanh ke mũ, kynhmỹ, he mũ. Û to ke nẽ, hỹn, ãprã ke fi kósin ãn?" he ag tóg, Jesus mỹ.

³⁵ Kỹ tóg ag mỹ: "ver sóg ãjag mré nĩ nĩ, sỹ ãjag mỹ kurã han jé," he mũ. "Kurã ki inh japry jagma mũmũnĩ. Kãnhmar ti kuty nĩnh mũ. Æjag tỹ kuty ra inh jamĩn jagma mũ sór mũ ra ãjag tóg vãgfor mũnh ke mũ.

³⁶ Isỹ ver ãjag mré nĩn kỹ inh ki ge sórmnĩ, ãjag tỹ tỹ inh mré ke nỹtĩ jé. Kỹ ãjag tóg kurã ki nỹtĩ, isỹ tỹ jẽngrẽ ri ke nĩn kỹ," he tóg, Jesus ti. Æ tỹ tag tó kar kỹ tóg tĩ mũ, ag ré kỹ. Vẽn pēju kỹ tóg tĩ mũ.

Judeu ag tỹ Jesus ki ge sór tũ

³⁷ Jesus vỹ ag rĩnve nẽn tỹ hẽn ri ke hyn han ja nĩgtĩ, ãg tỹ nẽn han vãnh tỹ hẽn ri ke,

milagre tỹ hẽn ri ke, hã ra ag tóg ti ki ge sór tũ nĩgtĩ.

³⁸ Hã ra Isaías vỹ tag rán ja nĩ gé. “Ëg jóg mág,” he ja tóg nĩ. “Isỹ ag mỹ ã kãmén mũ ra ag tóg inh vĩ kri nĩm sór tũ nỹtĩ,” he ja tóg nĩ. “Ag tỹ ã tỹ nén han mũ ên vég mũ ra ag tóg: “Topẽ jykre vỹ tar nĩ,” he ja tũ nĩ,” he ja tóg nĩ, Isaías ti. Hã ra tóg ge nĩgtĩ, Jesus tỹ ag mỹ Topẽ vĩ tón kỹ, ti tỹ ag mỹ milagre hyn han kỹ.

³⁹⁻⁴⁰ Kỹ Isaías vỹ ag to tag tó gé, ha mẽ. “Topẽ vỹ ag kyvó han, nĩgrẽg kutu, hã kỹ ag tóg mẽg tũ nĩgtĩ, kỹ ag tóg to jykrén sór tũ nĩgtĩ gé, kỹ ag tóg inh ki ge sór tũ nĩgtĩ gé, kỹ sóg ag tỹ há' henh ke tũ nĩ gé,” he ja tóg nĩ gé, Isaías ti, ti tỹ Topẽ vĩ tó kỹ. Jesus to tóg ke mũ. Hã kỹ ag tóg Jesus ki ge sór tũ nĩgtĩ.

⁴¹ Isaías vỹ Jesus ve ja nĩ, ti tỹ tỹ ãn mág nĩ ti, ãn tar ti. Jesus mur to hã ke ja vẽ, vãsỹ. Ti tỹ ti ve hã kỹ tóg tag tó ja nĩ, ti to, Isaías ti.

⁴² Hã ra ã ag tóg ti ki ge kỹ nỹtĩ gé, pã'i ã ag mré hã. Hã ra ag tóg tó sór tũ nĩgtĩ. Fariseu ag kamẽg ag tóg tĩ, hã kỹ ag tóg tó sór tũ nĩ. “Fariseu ag vỹ ãg pan ke mũ, ãg tỹ ãg vẽnh kanhrãn jafã ra mũ tũ nĩ jé, ãg tỹ ãg mré ke ag mré tá vẽnh mãn kỹ nỹtĩ tũ nĩn jé,” he ag tóg mũ, hã kỹ ag tóg Jesus tó tũ nĩgtĩ.

⁴³ Ëprã ke ag tỹ ag to vĩ há han mũ tag vỹ ag mỹ sér tĩ, kỹ Topẽ tỹ ag mỹ vĩ há han mũ vỹ ag mỹ pãgsĩ tĩ. Há ti nĩ gé vẽ vẽ, hã ra ag tóg ãprã pã'i ag hã

kamẽg mũ.

Ag jykre kórég vẽnh ven ke

⁴⁴ Kỹ Jesus vỹ jamã hár(a) ke mũ, vẽnh kar tỹ ti vĩ mẽ jé. Kỹ tóg: “ãjag tỹ inh ki ge kỹ ãjag tóg ã tỹ inh jẽnẽg mũ ên ki ge mũ gé,” he mũ.

⁴⁵ “ãjag tỹ inh ve kỹ ãjag tóg ti vég mũ gé, ã tỹ inh jẽnẽg mũ ên ti.

⁴⁶ Sỹ ãjag mỹ kurã han hã jé sóg kãtĩg. ãjag tỹ inh ki ge kỹ sóg ãjag mỹ kuty ên tỹ tũ' he mũ.

⁴⁷ ãjag tỹ ón kỹ inh vĩ mẽg mũ ra sóg ãjag to: “kórég ãjag nỹtĩ,” henh ke tũ nĩ. Inh pi(jé) ãjag mỹ: “kórég ãjag nỹtĩ,” he jé kãtĩg'. Sỹ ãjag krenkren han hã jé sóg kãtĩg.

⁴⁸ ãjag tỹ iso é he kỹ, ãjag tỹ inh vĩ to é he kỹ tóg vẽnh ven mũ, ãjag jykre kórég ên ti, ha vemnĩ. Isỹ ãjag mỹ inh vĩ tó mũ ra ãjag tóg inh vĩ kri nĩm jãvãnh nỹtĩ. Hã tugrĩn tóg vẽnh ven ke mũ, ãjag jykre kórég ti, kurã tỹ ãgno tá hã.

⁴⁹ Inh pi(jé) isỹ vêsóg ki nén to jykrén ja ên tó tĩ'. Inh panh vĩ hã tó ja inh nĩgtĩ, ã tỹ inh jẽnẽg mũ ên vĩ ti. Ên vỹ inh mỹ: “tag tómnĩ, tag tó tũg nĩ,” he tĩ.

⁵⁰ Ti tỹ inh mỹ nén tó mũ vỹ ãjag rĩnrĩr han ke mũ, ki kanhró sóg nĩ. Hã kỹ sóg inh panh tỹ inh mỹ nén tó mũ ên hã tó tĩ, tag tãvĩ,” he tóg, Jesus ti.

13

Jesus tỹ ã mré mũ tĩ ag pẽn kugpe

1 Hã ra festa tỹ Páscoa vỹ kakó tãvĩ tĩ sir, hã ra tóg tá krỹg tũ nĩ ver. Kỹ Jesus vỹ ki kanhró nĩ, ti tỹ ùri ter ke ên ti. Ti kurã vỹ jun ja nĩ, ti tỹ ã panh ra tĩg jé. ã mré mũ tĩ ag to tóg há tãvĩ ja nĩgtĩ, ag tỹ tỹ ti tũ nỹtĩn kỹ. Kỹ tóg ã ter ke kurã ên kã ag to há tãvĩ nĩ gé, tag ki, êprã, ti mré mũ tĩ ag to.

2 Kỹ tóg rãkãnh kỹ ag mré jęg mũ. Hã ra Japo vỹ Judas krĩn huri, ti tỹ pã'i ag mỹ Jesus ven tĩg jé, ag tỹ ti se jé. Judas Iscariotes ên vễ, Simão kósin ên.

3 Hã ra Jesus tóg ki kanhró nĩ, ã tỹ Topê tá kãtĩg ja ên ki, kỹ tóg ki kanhró nĩ gé, ã tỹ ra tĩg mãn ken ki. Kỹ Topê tóg ti tar han mũ gé, ti tỹ nén ù kar ki ag mỹ tỹ ùn mág jẽ jé. Ên ki kanhró tóg nĩ gé, Jesus ti.

4 Tag kar to jykrén kỹ tóg vãhã jëgnẽ mũ sir, jën kar kỹ. Jëgnẽ kỹ tóg ã capa kunũnh kỹ vënh pẽfĩ jafã tỹ vënh pẽfig mũ.

5 Goj tỹ tóg pénky kãki kujëg mũ, kỹ tóg ã mré mũ tĩ ag pën kugpég mũ. Vënh pẽfĩ jafã ên tỹ tóg ag pën kykũg mũ.

6 Kỹ tóg Simão Pedro tá jun mũ gé, ti pën kugpe jé. Hã ra Pedro tóg ti mỹ: ã pi(jé) inh pën kugpenh ke mũ', he mũ.

7 Hã ra Jesus tóg ti mỹ: “ã pi(jé) ki kanhró nĩ', sỹ ã mỹ nén han mũ ti'”, he mũ. “Kar kỹ ã tóg kejën to jykrén ke mũ,” he tóg.

8 Hã ra Pedro tóg ti mỹ: “vó,” he mãn mũ. “Inh pën kugpenh ke tũ ã tóg nĩ,” he tóg. Kỹ Jesus tóg ti mỹ: “isỹ ã pën

kupég tũ nĩn kỹ ã tóg tỹ isũ tũ nĩnh ke mũ,” he mũ.

9 Kỹ Pedro tóg ti mỹ: “inh kupe kãn nĩ, ge kỹ, inh pën, inh krĩ, inh nĩgé ke gé,” he mũ.

10 Hã ra Jesus tóg ti mỹ: “mro ã huri,” he mũ. “ã mro kar kỹ sóg ã pën hã kugpenh ke mũ. Jãnhkri ã nĩ, ã mro kar kỹ. Jãnhkri ãjag nỹtĩ, hã ra ãjag kãmĩ ùn pir vỹ jãnhkri tũ nĩ,” he tóg, Jesus ti.

11 Û tỹ pã'i ag mỹ ã ven ke mũ ên ki kanhró tóg nĩ, Jesus ti, hã kỹ tóg ag mỹ: “ãjag kãmĩ ùn pir vỹ jãnhkri tũ nĩ,” he mũ.

12 Kỹ tóg ag pën kugpe kãn mũ. Ag pën kugpe kar kỹ tóg ã kur rĩnh mãn mũ, kỹ tóg nĩ mãn mũ. Kỹ tóg ag mỹ: “ãjag mỹ sỹ nén han ja ki kanhró nỹtĩ?” he mũ.

13 “Iso ãjag tóg: Senhor, he tĩ. Tó há han ãjag tĩ. Tỹ sóg ãjag Senhor nĩ.

14 Kỹ sóg tỹ ãjag professor nĩ gé. Hã ra sóg ãjag pën kugpé. Hã kỹ tóg há tĩ, ãjag tỹ jagnẽ mỹ jagnẽ pën kugpe kỹ, inh ri ke han kỹ.

15 Sỹ ãjag kanhrãn sór vễ, hã kỹ sóg ãjag mỹ ãjag pën kugpé. Inh ri ke han nĩ.

16 Ki hã sóg tó mũ, hã kỹ sóg ke mũ. Êg camarada pi(jé) ãjag patrão kãfór nỹtĩ'. Kỹ êg tỹ ù jënên kỹ tóg ù tỹ ti jënëg mũ ên kãfór tũ nĩ gé.

17 Tag ki kanhró ãjag nỹtĩ, kỹ tóg há tĩ, ãjag tỹ inh ri ke han kỹ.

18 ãjag kãmĩ ù tóg tag han ke tũ nĩ, ki kanhró sóg nĩ. ãjag kuprëg inh, kỹ sóg ãjag ki kanhró nĩ. Tag vỹ ãjag kãmĩ

ũ to rán kÿ nĩ, ha mẽ: “ũ tÿ inh mré inh jamĩ ko mũ ên vÿ isovãnh ke mũ ha,” he ti nĩ, Topê vĩ tÿ rán kÿ nĩ ki. Isÿ tag ve jé sóg ãjag kuprêg.

¹⁹ Ũri sóg ãjag mũ tó mũ, ti tÿ isovãnh ke to hã, ãjag tÿ ên ve kÿ inh ki êkrén' he jé. Ên ve kÿ inh ki ge kÿ nÿtĩmnĩ jãvo.

²⁰ Ki hã sóg tó mũ, hã kÿ sóg ke mũ. Isÿ ãjag jêgnênh ke vê. Kÿ ũ tÿ ãjag mũ vĩ há han kÿ tóg inh mũ vĩ há han ke mũ gé, hã ra tóg ũ tÿ inh jênêg mũ ên mũ vĩ há han ke mũ gé, ãjag mũ vĩ há han kÿ,” he tóg, Jesus ti, ti mré mũ tĩ ag mũ.

Ũ tÿ pã'i ag mũ Jesus ven ke (Mt 26.20-25; Mc 14.17-21; Lc 22.21-23)

²¹ Jesus tÿ tag tó kar kÿ tóg ti mũ e tĩ. Krĩ kufy jagy ti nĩ, kÿ tóg ã mré mũ tĩ ag mũ: “ki hã sóg tó mũ, hã kÿ sóg ke mũ,” he mũ. “Ãjag kãmĩ ũ vÿ pã'i ag mũ inh ven ke mũ,” he tóg.

²² Kÿ tóg ag mũ e tĩ. Ki kagtĩg ag nÿtĩ, kÿ ag tóg véké jagnê ki êvãnh mũ.

²³ Hã ra ũ tóg Jesus rã hã nĩ nĩ, ên kã, ti tÿ ti to há nĩn kÿ.

²⁴ Kÿ Pedro tóg ti mũ ã nĩgê ven mũ, kÿ tóg ti mũ: “ti ki jêmê há han,” he mũ, ũ tÿ Jesus rã hã nĩ ên mũ.

²⁵ Kÿ tóg ti to grên ke kÿ ti mũ: “Senhor,” he mũ. “Ũ tÿ hê nê?” he tóg ti mũ.

²⁶ Kÿ Jesus tóg ti mũ: “êmĩ tÿ sóg ti kume kã tÿ pun ke mũ,” he mũ, “kÿ sóg ti mũ nĩm ke mũ sir. Ên hã vê,” he tóg mũ, Jesus ti. Tag tó kÿ tóg êmĩ mäg mũ, kÿ tóg ti kume kã tÿ pun ke mũ sir, kÿ tóg Judas mũ nĩm

mũ, Simão Iscariotes kósin ên mũ.

²⁷ Kÿ Judas tóg ko mũ. Ti tÿ ko kar mũ ra vêsÿmêr Satanás tóg ti kãra rã ja nĩ sir. Kÿ Jesus tóg ti mũ: “ã tÿ nén han sór mũ ên han tĩg nĩ, to fũrũn nĩ,” he mũ.

²⁸ Hã ra ũ ag tóg ki kagtĩg nÿtĩ, Jesus tÿ ti mũ nén tó mũ ên ki.

²⁹ Judas vÿ ag jãnkamy ki rĩr tĩ. Hã kÿ ag kãmĩ ũ tóg: “ti hÿn ti mũ: “êg mũ festa to compra ũ han tĩg,” he sór mũ, ke tũ nĩ kÿ ti tÿ ãn jagãgtar ag mũ nén ũ nĩm ke hÿn,” he ag tóg mũ.

³⁰ Hã ra Judas tóg êmĩ ên ko kar kÿ (tóg) króm ke kãkutê mũ, re ra. Hã ra tóg kuty nÿ.

Vênh jykre tãg

³¹ Judas tĩg kar kÿ Jesus tóg ã mré mũ tĩ ag mũ: “vãhã tóg vênh ven ke mũ, isÿ tÿ ãn mág nĩ ti,” he mũ. “Tÿ sóg êprã ke fi kósin nĩ. Hã ra sóg vênh kar mũ Topê tÿ tÿ ãn mág nĩ tag ven ke mũ gé.

³² Isÿ vênh kar mũ Topê tÿ tÿ ãn mág nĩ ven kÿ Topê tóg vênh kar mũ ven ke mũ gé, isÿ tÿ ãn mág nĩ ti. Vêsÿmêr tóg tag han ke mũ, Topê ti, ha vemnĩ,” he tóg, Jesus ti.

³³ “Inh jãvy', ãjag mré sóg nĩ sĩ pẽ han mũ ver,” he tóg. “Inh jãvãnh jé ãjag tóg ke mũ, hã ra ãjag tóg inh venh ke tũ nĩ. Tag tó inh, Judeu ag mũ, hã ra sóg ãjag mũ tag hã tó mũ gé, hã vÿ: ãjag pí(jé) isÿ hên ra tĩg ke mũ ên ki kanhró nÿtĩ', he mũ.

³⁴ Kÿ sóg ãjag mũ vênh jykre tãg nĩm sór mũ, hã vÿ: jagnê

to há tãvĩ nýtĩmnĩ, he mũ. Ājag to há tãvĩ sóg nĩ gé. Tag ri ke han nĩ, jagnē mỹ. Vēnh jykre tãg hã vễ.

³⁵ Ājag tỹ jagnē to há nýtĩn kỹ vēnh kar vỹ ājag jykre ki kanhrãn ke mũ. “Ti mré ke vỹ tỹ ag nýtĩ,” he jé ag tóg ke mũ ājag to, ag tỹ ājag jykre há ve kỹ,” he tóg, Jesus ti.

Jesus tỹ Pedro mỹ nén tó mũ

(Mt 26.31-35; Mc 14.27-31; Lc 22.31-34)

³⁶ Kỹ Simão Pedro tóg Jesus mỹ: “Senhor,” he mũ. “Ā tỹ hẽ ra tĩg sór nẽ?” he tóg. Kỹ Jesus tóg: “ĕn ra Ā tĩg ke tũ nĩ ver, inh mré,” he mũ. “Kar kỹ Ā tóg kejẽn ĕn ra tĩg ke mũ gé, inh nón,” he tóg.

³⁷ Kỹ Pedro tóg ti mỹ: “isỹ Ā mré tĩg há tóg tĩ,” he mũ. “Isỹ Ā tugrĩn ter ken kỹ tóg inh mỹ tỹ nén ù tũ tĩnh mũ,” he tóg.

³⁸ Hã ra Jesus tóg ti mỹ: “vó,” he mũ. “Ūri Ā tóg ón kỹ iso: “ti ki kagtĩg sóg nĩ,” henh ke mũ. “Ti ki kagtĩg sóg nĩ,” he tãgtũ han jé Ā tóg ke mũ, galo kynkyr to hã. Ki hã sóg tó mũ, ha vemnĩ,” he tóg, Jesus ti. Ti tỹ Pedro mỹ tón hã vễ.

14

Kanhkã to ĕmĩn

¹ Kỹ Jesus tóg Ā mré mũ tĩ ag mỹ: “krĩ kufy han tũg nĩ,” he mũ. “Inh ki rã há han nĩ, kỹ Topẽ ki rã há han nĩ gé.

² Inh panh jamã tá ājag ĩn vỹ e nýtĩ, ki hã sóg tó mũ. Tĩ tỹ tá tũ nýtĩ ra sóg tónh ke tũ nĩ vễ. Ra tĩg jé sóg ke mũ, isỹ ājag mỹ ājag ĩn kãnkãn jé.

³ Isỹ kãnkãn kar kỹ sóg tá kãtĩg mãn ke mũ gé, sỹ ājag tatĩn tĩg jé, kỹ ājag tóg inh mré tá nýtĩnh mũ.

⁴ Ti to ĕpry ki kanhró ājag nýtĩ, sỹ hẽ ra tĩg ke to ĕmĩn ti,” he tóg.

⁵ Kỹ Tomé tóg ti mỹ: “ĕg pi(jé) ki kanhró nýtĩ', Ā tỹ hẽ ra tĩg ke ti',” he mũ. “Hã kỹ ĕg tóg ti to ĕpry ki kagtĩg nýtĩ gé,” he tóg.

⁶ Kỹ Jesus tóg ag mỹ: “ti to ĕmĩn vỹ tỹ inh nĩ,” he mũ. “Vēnh vĩ há hã tó sóg tĩ. Inh hã vỹ ājag rĩnrĩr han ke mũ. Ū tỹ inh ki ge mũ ag vỹ inh panh venh ke mũ.

⁷ Ājag tỹ inh ki kanhró nýtĩn kỹ ājag tóg inh panh ki kanhró nýtĩ gé. Inh ki kanhrãn ājag tóg huri, inh ve ājag tóg huri,” he tóg, Jesus ti.

⁸ Kỹ Filipe tóg ti mỹ: “ĕg mỹ ĕg jóg mág ti ven nĩ,” he mũ. “ĕg tỹ ti venh há tóg tĩ,” he tóg.

⁹ Kỹ Jesus tóg Filipe mỹ: “Ā mỹ inh ki kagtĩg nĩ ver', isỹ ājag mré tĩg mág ja ra?” he mũ. “Ā tỹ inh ve kỹ Ā tóg inh panh ti vég mũ gé. Hã ra Ā tóg inh mỹ: ĕg mỹ ti ven nĩ, he mũ.

¹⁰ Inh panh mré sóg tỹ ùn pir nĩ, kỹ tóg inh mré tỹ ùn pir nĩ gé. Ā mỹ tag kri fig tũ? Inh pi(jé) isỹ vėsóg ki nén to jykren mũ tó tĩ'. Inh panh tũ hã tó sóg tĩ, ti tũ hã han sóg tĩ, inh mré tỹ ùn pir nĩ ĕn tũ ti. Kỹ tóg inh mré nén kar han mũ, inh panh ti.

¹¹ Inh vĩ kri nĩmnĩ, isỹ Ā mỹ: “inh panh mré sóg tỹ ùn pir nĩ,” hen kỹ. Ā tỹ hã ra inh

vĩ kri fi sór tũ nĩn kũ isỹ nén han mũ ên ki êvãnh nĩ, ã tỹ to jykren há han jé.

¹² Ki hã sóg tó mũ, hã kũ sóg ke mũ. Ủ tỹ inh ki rã há han mũ ên vỹ isỹ nén han mũ ri ke han ke mũ gé, hã ra tóg isỹ nén han mũ kãfór han ke mũ, ha vemnĩ, isỹ ùri inh panh venh tũg ken kũ.

¹³ Kũ sóg ãjag tỹ inh mũ nén ù to vĩ mũ ên hyn han kãn ke mũ, isỹ tỹ ãjag kãke nĩn kũ. Isỹ vènh kar mũ inh panh tỹ tỹ ùn mág nĩ ven ke vè, hã jé sóg ãjag mũ ãjag tỹ nén to vĩ mũ ên hyn han ke mũ.

¹⁴ Kũ, ãjag tỹ inh mũ nén ù to vĩnh ken kũ sóg ên hyn han kãn ke mũ, isỹ tỹ ãjag kãke nĩn kũ, ha vemnĩ,” he tóg, Jesus ti.

Jesus tỹ Topẽ kuprĩg jẽnẽnh ke

¹⁵ “Ãjag tỹ iso há nỹtĩn kũ han nĩ, isỹ ãjag mũ nén tó mũ ti.

¹⁶ Kũ isóg inh panh mũ ti kuprĩg to vĩnh ke mũ, ti tỹ ãjag mũ ti jẽnẽ jé, ti tỹ tỹ ãjag jagrẽ nĩ jé, ti tỹ ãjag tar han jé, kũ tóg ãjag tovãnh mãn ke tũ nĩ. ãjag mũ tóg ki hã tónh ke mũ.

¹⁷ Hã ra tóg ù tỹ inh ki ge jãvãnh ên ag mũ nén ù tónh ke tũ nĩ, ag tỹ ti ki kagtũg nỹtĩn kũ. Ag jãvo ãjag tóg ti ki kanhró nỹtĩ. ãjag kãtá tóg ãjag mré nĩ nĩ, Topẽ kuprĩg ti,” he tóg, Jesus ti.

¹⁸ “Inh pi(jé) ãjag tovãnh ke mũ'. Isĩg mũ ra sóg vỹn kenh ke mũ, ãjag to.

¹⁹ Kãnhmar ù tỹ inh ki ge jãvãnh ên ag tóg inh ve mãn ke tũ nĩ. Ag jãvo ãjag tóg inh ve

mãn ke mũ. Rĩr inh nĩ nĩ, kũ ãjag tóg inh ri kén rĩr mãn ke mũ gé.

²⁰ ãjag tỹ Topẽ kuprĩg tỹ ãjag jagrẽ venh ke kurã ên ki ãjag tóg inh ki kanhrãn há han ke mũ, isỹ inh panh mré tỹ ùn pir nĩ ên ti. Kũ ãjag tóg inh mré tỹ ùn pir nỹtĩnh mũ gé, ha mẽ,” he tóg, Jesus ti.

²¹ “Ủ tỹ inh vĩ hã ki kanhrãn mũ ên, ù tỹ inh vĩ hã ki króm mũ ên hã vỹ iso há nĩ. Kũ ù tỹ iso há nĩ ên to inh panh tóg há tãvĩ nĩ. Ên to sóg há tãvĩ nĩ gé. Ên vỹ inh venh ke mũ,” he tóg, Jesus ti.

²² Kũ Judas tóg ti ki jẽmẽg mũ. Judas Iscariotes pijé', Judas ù vè. Ên vỹ Jesus mũ: “ẽg mũ ã tóg vènh ven sór mũ,” he mũ, “hã ra ã tóg ù tỹ ã ki ge sór tũ ag mũ vènh ven sór tũ nĩ. ã hẽ ri kenh ke mũ?” he tóg mũ.

²³ Kũ Jesus tóg ti mũ: “ủ tỹ iso há nỹtĩ kar ag vỹ inh vĩ ki króm ke mũ,” he mũ. “Ủ tỹ inh vĩ ki króm mũ to inh panh tóg há nĩ, kũ tóg ti mré ẽmãn ke mũ. Kũ sóg ti mré ẽmãn ke mũ gé.

²⁴ Ủ tỹ iso há tũ ên vỹ inh vĩ han sór ke tũ nĩ gé. Inh pi(jé) inh vĩ hã tó tĩ'. Ủ tỹ inh jẽnẽg mũ ên vĩ hã tó sóg tũ, inh panh vĩ ti,” he tóg.

²⁵ “Ãjag mré sóg nĩ nĩ ver, kũ sóg ãjag mũ tag kãmén mũ.

²⁶ Isĩg kar kũ sóg ãjag mũ vèsỹmér ù tỹ ãjag tar han ke mũ ên jẽnẽnh ke mũ, hã vỹ: Topẽ kuprĩg, he mũ. Inh panh vỹ ãjag mũ ti jẽnẽnh ke mũ. Ên vỹ nén ù kar to ãjag kanhrãn

há han ke mũ. Kĩ tóg ãjag mũ tó mãn ke mũ gé, sỹ ãjag mũ nén tó mũ kar ti, ãjag tỹ kã jatun tũ nĩ jé," he tóg, Jesus ti.

27 "Ãjag krĩ kãnhvy han jé sóg ke mũ. Sỹ ãjag mũ nén nĩm ke mũ hã vỹ: krĩ kãnhvy, he mũ. Hã ra tóg ù tỹ inh ki ge jãvãnh ag krĩ kãnhvy sĩ ên ri ke tũ nĩ, sỹ ãjag mũ ãjag krĩ kãnhvy han mũ ti. Krĩ kãnhvy pẽ ãjag nỹtĩnh ha. Hã kĩ krĩ kufy han tũg nĩ. Kanẽ jur han tũg nĩ gé.

28 Inh vĩ tag mẽ ãjag tóg huri, isỹ ãjag mũ: "tĩg jé sóg ke mũ, kar kĩ sóg ãjag to vỹn kenh ke mũ gé," he mũ ti. ãjag tỹ iso há nỹtĩ ra tóg ãjag mũ sér tĩnh mũ vẽ, isỹ inh panh venh tũg ke ti. Inh panh vỹ inh kãfór nĩ.

29 Ûri sóg ãjag mũ tag kãmén mũ, ãjag tỹ ên venh ke to hã. Kĩ inh mũ êkrén nĩ, ãjag tỹ ên venh ken kĩ. Ên kã inh ki ge kĩ nỹtĩmũ.

30 Isỹ ãjag mré vēmén tag vỹ rur nĩ ha. Êprã pã'i mág jun ke nẽ ha. Hã ra ti pi(jé) tỹ inh krĩg mũ ke nĩ'.

31 Hã ra sóg sỹ nén han ke mũ ên han sór mũ, êprã ke kar ag tỹ inh jykre ve jé, isỹ inh panh to há tãvĩ nĩ ti. Kĩ sóg inh panh tỹ inh mũ nén tó mũ ên han kãn tĩ. Hã ven sór inh mũ, êprã ke kar ag mũ. Mũ jé ha, re ra," he tóg, Jesus ti. Ti tỹ ã mré mũ tĩ ag mũ ag tỹ nén venh ke kãmén hã vẽ.

15

Jesus tỹ uva fa ri ke nĩ

1 Ag mũn kĩ Jesus tóg ag mũ: "uva fa ri ke inh nĩ," he mũ. "Inh panh vỹ ù tỹ uva ki rĩr mũ ên ri ke nĩ.

2 Kĩ ãjag uva pẽ ri ke nỹtĩ," he tóg. "Û tỹ inh vĩ han sór tũ ên ag hã vỹ uva pẽ kanẽn vãnh ên ri ke nỹtĩ. Ên kym kĩ tóg fón tĩ, inh panh ti, uva pẽ kanẽn vãnh ên ti. Ûn kanẽ há han mũ ên ki rĩr há han tóg tĩ, ên féj rógrãm tóg tĩ, ti pẽ kãsir nẽgnẽm tóg tĩ gé, ti tỹ kanẽ e han jé.

3 Tag ri ke han ti tĩ, inh panh ti, ãjag tỹ. ãjag tỹ há' he tóg huri, inh panh ti, ãjag tỹ inh vỹ kri nĩm tugrĩn.

4 Isovãnh tũg nĩ, kĩ sóg ãjag tovãnh ke tũ pẽ nĩ gé. Uva pẽ ên ri ke ti nĩ. Ti tỹ ti pẽ rógrãm kĩ tóg tóg mũ. Jãvo ti pẽ tỹ uva fa ên to nỹgtĩn kĩ tóg kanẽ há han tĩ. Ên ri ke ti nĩ, ãjag tỹ inh ki ge kĩ nỹtĩ tag ti. ãjag tỹ inh ki ge kĩ nỹtĩn kĩ ãjag tóg vẽn jykre há hã han kĩ nỹtĩ nĩ, jãvo ãjag tỹ isovãnh kĩ ãjag tóg vẽn jykre há tovãnh ke mũ gé," he tóg, Jesus ti.

5 "Uva fa ri ke inh nĩ, kĩ ãjag tóg uva pẽ ri ke nỹtĩ gé. ãjag tỹ inh ki ge kĩ nỹtĩn kĩ ãjag tóg kanẽ e han ke mũ, ãjag tỹ isovãnh tũ nĩn kĩ. ãjag pi(jé) ãjag pir mũ nén ù há han ki kanhró nỹtĩ'. Inh hã ne ãjag tar han tĩ'.

6 Û tỹ isovãnh ke mũ ên fón jé tóg ke mũ, inh panh ti. Êg tỹ uva pẽ kórég kym kĩ vãm ên ri ke tóg nĩ. Êg tỹ ti pẽ kym kĩ fón kĩ tóg tóg mũ, kĩ êg tóg ti pũn tĩ sir. Ên ri ke han jé tóg ke

mũ, inh panh ti, ù tỹ isovãnh mũ ên tỹ.

⁷ Ājag tỹ isovãnh tũ nĩn kỹ, ājag tỹ isỹ ājag mỹ nén tó mũ ên to jykrén kỹ nỹtĩn kỹ, kỹ inh mỹ nén kar to vĩmnĩ. Han jé sóg ke mũ, ājag mỹ, ājag tỹ inh mỹ nén to vĩ mũ ên ti, ha vemnĩ.

⁸ Ājag tỹ vènh jykre há han kỹ tóg uva pẽ tỹ kanẽ e han ri ke nĩ. Kỹ vènh kar ag tóg ājag jykre ve kỹ Topẽ to: “ũn há vĩ tỹ ti nĩ,” henh ke mũ. Hã ki ag tóg ki kanhró nỹtĩnh mũ, ājag tỹ tỹ inh mré ke nỹtĩ ti.

⁹ Inh panh vĩ iso há tãvĩ nĩ. Ge inh nĩgtĩ gé, ājag to. Ājag to ha pẽ sóg nĩ gé. Inh ki ge kỹ nỹtĩmnĩ, sỹ ājag to há tãvĩ nĩ jé.

¹⁰ Ājag tỹ isỹ ājag mỹ nén tó mũ ki króm kỹ ājag tóg inh ki ge kỹ nỹtĩnh mũ, kỹ sóg ājag to há nĩ gé. Hã kỹ sóg inh panh vĩ hã ki króm kãn mũ, kỹ tóg iso há tãvĩ nĩ.

¹¹ Inh mỹ tóg sér tĩ. Kỹ sóg ājag mỹ tag tó mũ, ti tỹ ājag mỹ sér tĩn jé gé, ti tỹ inh mỹ sér ên ri ke tĩn jé gé, ājag mỹ. Ti tỹ ājag mỹ sér tĩ hã jé sóg ājag mỹ inh jykre kãmén mũ.

¹² Sỹ ājag mỹ vènh jykre nĩm mũn hã vè, ha mẽ. Jagnẽ to há pẽ nỹtĩmnĩ, sỹ ājag to há nĩ ên ri ke han nĩ, he sóg mũ.

¹³ Ũ tỹ ã mré ke ù ag jagfy ter sór mũ ên vĩ ag to há ja nĩgtĩ. Ũ tỹ ãg to há kãfór pẽ ên venh ke tũ ãg tóg nĩ, ãprã.

¹⁴ Inh mré ke pẽ vĩ tỹ ājag nỹtĩ, ājag tỹ inh vĩ ki króm kỹ.

¹⁵ Hã kỹ sóg ājag to: “inh camarada ag,” he tũ nĩgtĩ gé. Ēg pi(jé) ãg camarada ên ag

mỹ ãg tỹ nén to jykrén mũ ên kãmén tĩ'. Ēg mré ke ag hã mỹ ãg tóg kãmén tĩ. Ājag mỹ sóg inh panh tỹ inh mỹ nén tó mũ ên kãmén kãn huri, hã kỹ sóg ājag to: “inh mré ke ag,” he mũ.

¹⁶ Ājag pi(jé) inh kuprẽg'. Inh hã ne ājag kuprẽg'. Kỹ sóg ājag mỹ: “kanẽ e han nĩ,” he mũ ha, hã vĩ: vènh jykre há, he mũ. Vènh jykre há hã vĩ tũ' henh ke tũ nĩ. Ājag tỹ ên han kỹ jatun mỹ Topẽ mỹ nén kar to vĩmnĩ, inh jygy tó kỹ. Ājag tỹ ti mỹ nén ù to vĩ mũ ên han jé tóg ke mũ, Topẽ ti, ājag tỹ vènh jykre há han kỹ nỹtĩn kỹ.

¹⁷ Sỹ ājag mỹ nén tó mũn hã vè, hã vĩ: jagnẽ to há nỹtĩmnĩ, sỹ ājag to há nĩ ên ri ke, he mũ,” he tóg, Jesus ti.

Ũ tỹ ãg to jũnh ke ag

¹⁸ Ũ tỹ inh ki ge tũ ag vĩ iso jũ vén ja nĩgtĩ, kỹ ag tóg ājag to jũ nỹtĩ gé. Tag mĩ êkrén nĩ, ag tỹ ājag to jũnh ken kỹ.

¹⁹ Ājag pi(jé) tỹ ag mré ke nỹtĩ'. Ājag tỹ tỹ ag mré ke nỹtĩ ra ag tóg ājag to há nỹtĩnh ke mũ vè, hã ra ājag tóg tỹ ag mré ke tũ nỹtĩ. Ājag kuprẽg inh, ag kãmĩ, ājag tỹ tỹ inh mré ke nỹtĩ jé, hã kỹ ag tóg ājag to jũ nỹtĩ.

²⁰ Vãsỹ sóg ājag mỹ: “ājag pi(jé) inh kãfór nỹtĩ’,” he ja nĩgtĩ. Tag mĩ êkrén nĩ. Inh camarada ri ke ājag nỹtĩ, jãvo sóg tỹ ājag patrão ri ke nĩ. Ag kãmĩ ù tóg inh vóg kónãn ke mũ. Ên vĩ ājag vóg kónãn ke mũ gé. Ag kãmĩ ù tóg inh vĩ ki króm tĩ. Ên ag vĩ ājag vĩ ki króm ke mũ gé.

21 Hã ra ag tóg ãjag vóg kónãn ke mũ gé, ãjag tỹ tỹ inh mré ke nỹtĩn kỹ. Ag pi(jé) ù tỹ inh jẽnêg mũ ên ki kanhró nỹtĩ'.

22 Inh kãtĩ tũ ra, isỹ ag mỹ inh vĩ tó tũ ra ag tóg: “hã ra êg tóg ki kagtĩg nỹtĩ,” henh ke mũ vê. Hã ra sóg ag mỹ tó, hã kỹ ag tóg ki kanhró nỹtĩ.

23 Û tỹ iso jũ nỹtĩ ên ag vĩ inh panh to jũ nỹtĩ gé.

24 Nén ù han vãn h hyn han sóg tũ, ag rĩnve, kỹ ù vĩ tag han ja tũ pẽ nĩ ijo. Isỹ tag han tũ nĩ ra ag tóg: “vêg tũ êg nĩ,” henh ke mũ vê. Hã ra ag tóg vé, ag tỹ vêg mũ ra ag tóg ge ra iso jũ nỹtĩ, kỹ ag tóg inh panh to jũ nỹtĩ gé.

25 Hã ra ag tóg rán kỹ nỹtĩ, Topê vĩ tỹ rán kỹ nĩ ki. “Nén ù tũ to ag tóg iso jũ sór mũ,” he tóg, Topê vĩ rá ki. Hã kỹ ag tóg ke tĩ,” he tóg, Jesus ti.

26 “Hã ra tóg kãtĩg ke mũ, ù tỹ ãjag tar han ke ti. Topê kuprĩg to ken hã vê. Ti hã vĩ ki hã tónh ke mũ, inh panh kuprĩg ti. Ên hã vĩ ãjag mỹ inh kãmén ke mũ.

27 Kỹ ãjag tóg vênh kar mỹ inh kãmén ke mũ gé, ên kã. Inh mré ãjag tóg mũ ja nĩ, isỹ ãjag mỹ tó vén mũn kã,” he tóg.

16

1 “Ãjag mỹ sóg tag kãmén kãn mũ, ãjag tỹ ki kanhró nỹtĩ jé, ãjag tỹ isovãn h sór tũ pẽ nĩ jé, ãjag jagtar ke kurã ên kã.

2 ãjag pan jé ag tóg ke mũ, pã'i ag, ãjag tỹ vênh kanhrãn jãfã ra mũ mãn tũ nĩ jé. Kỹ ag tóg ãjag kãgtén ke mũ gé. ãjag

kãgtén kỹ ag tóg ón kỹ: “Topê vĩ êg mỹ tó, hã kỹ êg tóg ag kãgtén,” henh ke mũ.

3 Ag tỹ êg jóg mág ki kagtĩg nỹtĩ hã kỹ ag tóg tag han ke mũ. Inh ki kagtĩg ag tóg nỹtĩ gé.

4 Ûri sóg ãjag mỹ tó mũ. Kỹ ãjag tóg, ãjag tỹ tag ve kỹ (ãjag tóg): “êg mỹ tóg tó ja nĩ, êg tỹ ùri nén vêg mũ tag ti,” henh ke mũ,” he tóg, Jesus ti.

Topê kuprĩg kãtĩg ke

Vãsỹ sóg ãjag mỹ tag tó ja tũ nĩ ver. Vãsỹ sóg ãjag mré tĩg nĩ vê, hã ra sóg ãjag mỹ tag tó ja tũ nĩ, sỹ ùri ãjag mỹ nén tó mũ tag ti.

5 Ûri sóg tĩg ke mũ, isỹ ù tỹ inh jẽnêg mũ ên ve jé. Kỹ ãjag pi(jé) inh mỹ: “ã tỹ hẽ ra tĩg ke nẽ?” henh ke mũ'.

6 ãjag mỹ tóg e tũ, sỹ ãjag mỹ isĩg ke tag tó ja nĩn kỹ, kỹ ãjag tóg fe kaj nỹtĩ.

7 Há ti nĩ hã ra, isĩg ke ti, ha mẽ. Isĩg tũ nĩn kỹ ù tỹ ãjag tar han mũ ên vĩ kãtĩg ke tũ nĩ vê, Topê kuprĩg ti. Isĩg kỹ sóg ãjag mỹ ti jẽnênh ke mũ.

8 Ên vĩ, ã kãtĩg kỹ (tóg) vênh kar mỹ: “Topê vĩ mranh ã huri,” henh ke mũ, kỹ tóg ag mỹ vênh jykre kuryj tónh ke mũ gé, kỹ tóg ag mỹ Topê tỹ ag vóg kónãn ke ên tónh ke mũ gé.

9 “Jesus ki ã tóg rã tũ nĩ, hã kỹ ã tóg Topê vĩ mranh tĩ,” he jé tóg ke mũ, vênh kar mỹ.

10 Kỹ tóg ag mỹ vênh jykre kuryj tónh ke mũ gé, Topê kuprĩg ti. Jãvo sóg tĩg ke mũ,

inh panh kukãm, kÿ ag tóg inh venh ke tũ nĩ.

¹¹ Kÿ Topẽ kuprĩg tóg ag mÿ Topẽ tÿ ag vóg kónãn ke ên tónh ke mũ gé. Tag ki ùn tÿ tÿ ùn mág pẽ tÿ Nén-Kórég ên to tóg: “kórég ti nĩ,” hé huri, Topẽ ti. Hã to êg tóg ti tÿ ùn vóg kónãn ke mũ ên ag ki kanhró nÿtĩ,” he tóg, Jesus ti.

¹² “Sÿ ãjag mÿ nén tónh ke mũ vÿ ver e nÿtĩ, hã ra tóg ver ãjag mÿ mẽ jagy tĩ, hã kÿ sóg tónh ke tũ nĩ.

¹³ Topẽ kuprĩg tÿ ãjag ki jun kÿ, ù tÿ ki hã tó tĩ ên kãtĩg kÿ tóg komër hã ãjag mÿ tó kãn ke mũ, nén tÿ ki hã tó mũ ên ti. Ti pi(jé) ã tÿ nén to jykrén mũ ên tónh ke mũ, Topẽ kuprĩg ti. Inh panh tÿ inh mré nén to jykrén mũ ên hã tó jé tóg ke mũ. Kÿ tóg ãjag mÿ ãjag tÿ kar kÿ nén venh ke ên tónh ke mũ gé.

¹⁴ Ti hã vÿ iso: “ùn mág vÿ tÿ ti nĩ,” henh ke mũ gé. Inh vÿ hã tó jé tóg ke mũ ãjag mÿ, hã kÿ tóg isÿ tÿ ùn mág nĩ tónh ke mũ.

¹⁵ Inh panh tÿ nén tó mũ ên hã tó sóg tĩ gé. Kÿ tóg ên hã tónh ke mũ gé, ti kuprĩg ti. Hã kÿ sóg ãjag mÿ: inh vÿ hã tó jé tóg ke mũ,” he mũ,” he tóg, Jesus ti.

Jesus tÿ ter kar kÿ rĩr mãn ke

¹⁶ “Kãnhmar ãjag tóg inh ve mãn ke tũ nĩ ha, kejẽn ãjag tóg kurã ù ki inh ve mãn ke mũ gé,” he tóg, Jesus ti.

¹⁷ Kÿ tÿ mré mũ tĩ ag tóg jagnẽ mÿ: “ti hÿn ne tó sór mũ, hã kÿ tóg: kãnhmar ãjag tóg inh ve mãn ke tũ nĩ ha, he mũ,

hã kÿ tóg: kejẽn ãjag tóg kurã ù ki inh ve mãn ke mũ gé, he mũ?” he ag tóg. “Ti tÿ ne tónh ke nẽ hÿn, hã kÿ tóg: inh panh kukãm sóg tĩg mũ ha, he mũ?” he ag tóg.

¹⁸ “Ne to ke nẽ hÿn, hã vÿ: kãnhmar, he mũ? Êg pi(jé) ti tÿ nén tó mũ ên ki kanhró nÿtĩ,” he ag tóg, jagnẽ mÿ.

¹⁹ Hã ra Jesus tóg ki kanhró nĩ, ag tÿ ti ki nén jẽmẽ sór mũ ên ki. Hã kÿ tóg ag mÿ: “inh vÿ mÿ ãjag mÿ e?” he mũ. “Kãnhmar ãjag tóg inh ve mãn ke tũ nĩ ha, kejẽn hã ãjag tóg kurã ù ki inh ve mãn ke mũ.

²⁰ Ki hã sóg tó mũ, hã kÿ sóg ke mũ. Kygfÿ jé ãjag tóg ke mũ. Vẽsÿrénh jé ãjag tóg ke mũ. Hã ra tóg ù tÿ inh ki ge tũ ag hã mÿ sér tĩnh mũ. Fe kaj han jé ãjag tóg ke mũ, tag pãte tóg ãjag mÿ sér tĩnh mãn ke mũ gé.

²¹ Ùn tÿtã fi tÿ gĩr venh ken kÿ tóg fi mÿ jagy tĩ, fi kaga jagy ên ti. Fi kósin tÿ fi ki mur kar kÿ tóg hã ra fi mÿ sér tĩ, kÿ fi tóg ã kaga ên mĩ êkrén mãn tũ nĩgtĩ. Fi tÿ ã kósin ve kÿ tóg fi mÿ sér tĩ.

²² Ge ve jé ãjag tóg ke mũ. Ùri tóg ãjag mÿ jagy tĩ, hã ra sóg ãjag ve mãn ke mũ, kÿ ãjag fe tóg mrin kenh ke mũ, ãjag tÿ inh ven kÿ. Kÿ ù tóg ãjag fe kaj han mãn ke tũ nĩ ha, inh kãtĩg mãn kÿ.

²³ Ên kã ãjag tóg inh mÿ nén ù to vÿ mãn ke tũ nĩ ha, isÿ ãjag mré nĩn kÿ. Ki hã sóg tó mũ, hã kÿ sóg ke mũ. ãjag tÿ inh panh mÿ nén ù to vÿn kÿ tóg ãjag mÿ vin kãn ke mũ, ãjag tÿ

ti mǎ nén ũ to vĩ mũ ên tỹ, ãjag tỹ tỹ inh mré ke nỹtĩn kỹ.

²⁴ Ver ãjag tóg ti mǎ nén ũ to vĩ ja tũ nĩ, ãjag tỹ ti mỹ: “ti mré ke vĩ tỹ êg nỹtĩ,” hen kỹ. Ti mǎ nén ũ to vĩmnĩ, kỹ tóg ãjag mỹ hyn han kãn ke mũ, ãjag tỹ nén to vĩ mũ ên ti, kỹ tóg ãjag mỹ sér távĩ tĩnh mũ,” he tóg, Jesus ti.

Jesus tỹ tỹ êprã ke kar kri ke nĩ

²⁵ “Ãjag mỹ sóg comparação han kỹ inh panh kãmén tĩ, kãnymar sóg jamã hár(a) ãjag mỹ inh panh kãmén ke mũ, kỹ sóg ãjag mỹ comparação han mãn ke tũ nĩ sir.

²⁶ Kurã ên kã ãjag tóg vėsóg ki inh panh mỹ nén ũ kar to vĩnh ke mũ, ãjag tỹ tỹ inh mré ke nỹtĩn kỹ. Kỹ sóg ãjag jagfy vĩ mãn ke tũ nĩ ha, ãjag tỹ vėsóg ki ti mré vēmén kỹ. ãjag hã vĩ ti mré vēmén ke mũ ha.

²⁷ Inh panh vĩ ãjag to há távĩ nĩgtĩ, ãjag tỹ iso há nỹtĩn kỹ, ãjag tỹ iso: “Topẽ vĩ ti jẽnẽ,” hen kỹ.

²⁸ Inh panh tỹ inh jẽnẽn hã kỹ sóg ga tag ki jun mũ. Hã ra sóg ũri inh mur ja ré kỹ tĩg ke mũ ha, inh panh kukãm,” he tóg, Jesus ti.

²⁹ Kỹ ti mré mũ tĩ ag tóg ti mỹ: “vãhã ã tóg êg mỹ kãmén há han mũ ha,” he mũ. “Vãhã ã tóg êg mỹ comparação tó tũ nĩ ha.

³⁰ Nén ũ kar ki kanhró ã tóg nĩ, vэг êg tóg mũ. Êg tỹ ã ki nén ũ jẽmẽ sór kỹ ã tóg ki kanhró nĩ. Êg tỹ ã mỹ nén ũ tó tũ ra ã tóg ki kanhró nĩ. Hã ki êg tóg vэг mũ, ã tỹ Topẽ tá

kãtĩg ja ti,” he ag tóg mũ, Jesus mỹ.

³¹ Kỹ tóg ag mỹ: “vãhã ãjag tóg inh ki ge kỹ nỹtĩ ha,” he mũ.

³² “Hã ra ãjag tóg kãnymar inh ré kỹ mũ kãn mũ ha, ãjag ĩn ra. Vẽn hã pugpóv kãn jé ãjag tóg ke mũ, ũri. Hã ra sóg pir pẽ tũ nĩ, ãjag tỹ inh ré kỹ mũ kãn mũ (hã) ra. Inh panh vĩ êgno kã inh mré jẽ nĩ.

³³ Tag kãmén sóg ãjag mỹ, ãjag tỹ krĩ kãnhy nỹtĩ jé, ãjag tỹ inh ki ge kỹ nỹtĩ tugrĩn. Tag ki ãjag tóg nén ũ jagy kar vэг tĩ ver. Hã ra to krĩ kufy han tũg nĩ. Êprã ke kar kri ke vĩ tỹ inh nĩ, êprã ke kri pã'i ên, Japo ên kutẽm inh huri,” he tóg, Jesus ti.

17

Jesus tỹ Topẽ mré vēmén

¹ Jesus tỹ ã mré mũ tĩ ag mỹ tag kãmén kãn kar kỹ tóg kanhkã ki êvãnh mũ, kỹ tóg: “panh,” he mũ. “Inh hora tán krỹg huri,” he tóg. “Ag mỹ isỹ tỹ ũn mág nĩ ven nĩ, isỹ tỹ ã kósin nĩn kỹ. Kỹ sóg ag mỹ ã tỹ tỹ ũn mág nĩ ven ke mũ gé.

² Êprã ke kar kri ã tóg inh fêg, isỹ ag mỹ rĩr krỹg ja tũ ven jé, ã tỹ inh mỹ ũn vin mũ kar ên ag mỹ, fag mỹ ke gé.

³ ũ tỹ ã ki kanhrãn mũ ên vĩ rĩr krỹg ja tũ venh ke mũ, ũ tỹ ã to: “Topẽ vè,” he mũ kar ag, ũ tỹ ã to: “Topẽ ũ vĩ tũ nĩ,” he mũ kar ag, fag kar ke gé. Kỹ ag tóg inh ki kanhró nỹtĩ gé, isỹ tỹ Jesus Cristo nĩn ki, ã hã tỹ inh jẽnẽ ên ki.

4 Ag hã mÿ sóg ã tÿ tÿ ùn mág nĩ tag ven, êprã ke ag mÿ, fag mÿ ke gé. ã tÿ inh mÿ nén tó mü ên han kãn inh.

5 Vãsÿ, êg tÿ ga tag han tÿg ki sóg ã mré nĩ ja nĩgtĩ, ên kã sóg tÿ ùn mág pẽ nĩ ja nĩgtĩ, ã mré. Ên han mãn nĩ, inh mÿ. Isÿ tÿ ùn mág pẽ nĩ han mãn nĩ, panh'.

6 Û ag kuprêg ja ã nĩ, ag tÿ inh ki ge jé, fag ke gé. Ên ag mÿ sóg ã kãmén ja nĩgtĩ. ã tÿ ag vê, hã ra ã tóg inh mÿ ag vin, fag ke gé. ã vĩ ki króm ag tóg tĩ, fag ke gé.

7 Ûri ag tóg ki kanhró nÿtĩ, isÿ ã tũ hã han mü ên ki, fag ke gé. ã hã ne inh mÿ nén kar ên tó tĩ'. Tag vég ag tóg tĩ.

8 Ag mÿ sóg ã vĩ ti tó tĩ, kÿ tóg ag mÿ sér tĩ, fag mÿ ke gé. Kÿ ag tóg vég mü, ã tÿ inh jênê ên ti. Kÿ ag tóg iso: "Topê tÿ ùn jênêg mü ên vê," he mü, fag ke gé.

9 ã tÿ inh mÿ ùn vin mü ên ag hã jagfy sóg vĩ tĩ, fag ke gé. Û tÿ inh ki ge tũ ên ag jagfy sóg vĩnh ke tũ nĩ. ã tũ ag hã jagfy sóg vĩ tĩ.

10 Ha vé, isũ kar vÿ tÿ ã tũ nÿtĩ, kÿ ã tũ kar vÿ tÿ isũ nÿtĩ gé. Ag hã tigrĩn sóg tÿ ùn mág nĩ, ù tÿ inh ki ge kÿ nÿtĩ ên ag hã tigrĩn, fag ke gé.

11 Inh mur ja ré kÿ sóg tÿg mü, ijãvo ag tóg êgno mĩ mü nĩ sir, isũ mré ã tũ ag. Ag jãvo sóg ã venh kãtÿg mü ha. Inh panh mág, há tãvĩ ã tóg nĩ. Ag jy nĩgãn nĩ, ã jykre ki. ã hã ne inh mÿ ag vin'. ã mré sóg tÿ ùn pir nĩ. Ag tÿ jagnê mré tÿ

ùn pir nÿtĩ han nĩ, isÿ ã mré tÿ ùn pir nĩ tag ri ke han nĩ, ag tÿ, fag tÿ ke gé.

12 Isÿ ag mré nĩn kÿ sóg ag jy nĩgãn tĩ, ã jykre ki, ã tÿ inh mÿ ùn vin mü ên ag kar jy, fag jy ke gé. Ag ki rĩr há han inh, kÿ ag kã ù tóg vãfor ja tũ nĩ. Ûn pir tóg hã ra vãfor kÿ nĩ inhhã, hã ra tóg ti to rãn kÿ nĩ, ti tÿ nũgme ki kutênh ke ti, hã kÿ ti tÿ ki kutênh ke nê ha.

13 Ûri sóg ã kukãm kãtÿg mü, hã ra sóg ver tag ki ag mÿ kãmén mü, ti tÿ ag mÿ sér tĩ jé, ti tÿ inh mÿ sér tĩ tag ri ke tĩ jé, ag mÿ.

14 Ag mÿ sóg hur ã vĩ kãmén. Kÿ ù tÿ inh ki ge tũ ag vÿ ag to jũ mü, ag tÿ tÿ ag mré ke tũ nÿtĩn kÿ. Inh pi(jé) tÿ ag mré ke nĩ gé', ù tÿ ag to jũ mü ên mré.

15 Hã ra sóg ã mÿ: "ha ag jé prêr," he tũ nĩ, "ag tÿ ga tovãnh jé," he tũ sóg nĩ. "Nén-Kórég jo ag jy nĩgãn nĩ," he sóg mü ã mÿ.

16 Ag pi(jé) tÿ inh ki ge tũ ag mré ke nÿtĩ'. Tÿ sóg ag mré ke tũ nĩ gé, ù tÿ inh ki ge jãvãnh ên ag mré.

17 ã vĩ há ki ag kanhrãn nĩ, ã tÿ ùn kuprêg mü ên ag, ag tÿ komêr hã ã ri ke nÿtĩ jé. ã vĩ ên vÿ tÿ vênh vĩ há tãvĩ nĩ.

18 Inh jênê ã tóg, sÿ ga kri mur jé. Kÿ sóg ã kóm ag jêgnênh mü, ag tÿ êprã ke kar ên ag mÿ inh kãmén jé.

19 Ag jagfy sóg ã mÿ vênh fêg ke mü, ag tÿ inh mré ã mÿ vênh vin kÿ nÿtĩ jé.

20 Hã ra sóg nén ù to vĩ sór mü gé, sÿ ã mÿ ag kãmén kar

kỹ. Û ag tóg ag vĩ mẽ kỹ inh ki genh ke mũ. Ên ag to sóg vĩ sór mũ gé.

²¹ Ag kar tỹ tỹ ùn pir nỹtĩnh ken kỹ tóg há tĩ, ã tỹ inh mré tỹ ùn pir nĩ ên ri ke, isỹ ã mré tỹ ùn pir nĩ ên ri ke. Ag tỹ ẽg mré tỹ ùn pir nỹtĩnh kỹ tóg há tĩ. Kỹ vẽn kar vĩ vẽn ke mũ, ã tỹ nén to inh jẽnẽg mũ ti.

²² Isỹ ã tóg ùn mág han. Kỹ sóg ag tỹ ùn mág han ke mũ gé, ag tỹ jagnẽ mré tỹ ùn pir nỹtĩ jé, ã tỹ inh mré tỹ ùn pir nĩ tag ri ke.

²³ Inh mré ke vĩ tỹ ag nỹtĩ, kỹ sóg tỹ ag mré ke nĩ gé, kỹ ẽg kar vĩ tỹ ùn pir ri ke nỹtĩ. Ẽg tỹ tỹ ùn pir nỹtĩ tugrĩn vẽn kar tóg vẽn ke mũ, ã tỹ inh jẽnẽ ên ti. Ûn tỹ inh ki ge kỹ nỹtĩ ên ag to há tâvĩ ã tóg nĩ, ã tỹ iso há nĩ tag ri ke. Tag ve jé ag tóg ke mũ, ẽprã ke ag, ag tỹ ẽg tỹ tỹ ùn pir nỹtĩ tag ven kỹ.

²⁴ Panh', vãsỹ ã tóg iso há nĩgtĩ vẽn, ẽg tỹ ga tag han tũg ki. Hã kỹ ã tóg isỹ ùn mág pẽ han. Kỹ tóg inh mỹ há tĩnh mũ, ag tỹ inh mré nỹtĩnh kỹ, ã tỹ inh mỹ ùn vin mũ ên ag. Ag tỹ inh mré nỹtĩnh kỹ ag tóg vẽn ke mũ, ã tỹ isỹ ùn mág han ja ti.

²⁵ Panh', jykre kuryj ã tóg nĩ. Û tỹ inh ki ge tũ ag vĩ ã ki kagtĩg nỹtĩ, ag jãvo sóg ã ki kanhró nĩ. Kỹ tag ki inh mré nỹtĩ ag vĩ ki kanhró nỹtĩ gé, ã tỹ nén to inh jẽnẽg mũ ti.

²⁶ Ag mỹ sóg ã kãmén huri, kỹ sóg ag mỹ ã kãmén mãn ke mũ gé, ag tỹ jagnẽ to há nỹtĩ jé, ag tỹ ã tỹ iso há tag ri ke nỹtĩ jé. Kỹ sóg ag mré ẽmãn ke mũ gé," he tóg, Jesus ti, ã panh

mré vẽnén kỹ.

18

*Ag tỹ Jesus se
(Mt 26.47-56; Mc 14.43-50;
Lc 22.47-53)*

¹ Jesus tỹ tag tóg kar kỹ tóg ã mré mũ tĩ ag mré tĩ mũ sir. Goj tỹ Cedrom kafã ù ra ag tóg pa mũ sir. Tá ka tóg krãnkrãn kỹ nỹtĩ. Ka kré ên krẽm ag tóg nĩgnĩ mũ sir.

² Hã ra Judas tóg ti tũg ên ki kanhró nĩ gé. Tã tóg ã mré mũ tĩ ag mré vẽnén tỹ hẽn ri ke han huri, Jesus ti, hã kỹ Judas tóg ag tỹ ra mũnh ke ki kanhró nĩ, ù tỹ pã'i ag mỹ Jesus ve ke mũ ên ti.

³ Kỹ tóg ag nón tá jun mũ sir, Judas ti, soldado ag mré, polícia ag mré hã ke gé, pã'i ag tỹ ag jẽnẽn kỹ. Fariseu ag vĩ pã'i ag mré polícia ag jẽnẽn ja nĩ gé. Lampião e gég ag tóg kãmũ mũ, pĩ jónhkó ke gé, ka kykyv mré hã.

⁴ Hã ra Jesus tóg ki kanhró nĩ, ã jagtar ken ki, kỹ tóg ag kato tẽ mũ sir. Kỹ tóg ag mỹ: "ãjag tỹ ù tỹ hẽ ve sór nẽ?" he mũ.

⁵ Kỹ ag tóg ti mỹ: "Nazaré tá ke ên ve sór ẽg tóg mũ," he mũ. "Jesus vẽn mỹr," he ag tóg mũ. Kỹ Jesus tóg ag mỹ: "inh hã vẽn," he mũ. Hã ra Judas tóg ag mré kãtĩg ja nĩ gé, ù tỹ pã'i ag mỹ Jesus ven mũ ên ti.

⁶ Jesus tỹ ag mỹ: "inh hã vẽn," hen kỹ ag tóg ti jo ranh ke mũ. Rom ke ag tóg mũ sir, ẽprã.

⁷ Kỹ Jesus tóg ag mỹ vĩ mãn mũ. "ãjag tỹ ù ve sór nẽ?" he tóg. Kỹ ag tóg ti mỹ: "Jesus, Nazaré tá ke ên," he mãn mũ.

⁸ Kÿ Jesus tóg ag mÿ: “ãjag mÿ sóg: inh hã vê, hé huri. Kÿ ãjag tÿ ise sór kÿ inh mré ke tag ag togvãnh nĩ sir,” he tóg.

⁹ Hã ra tóg tag tó, ã tÿ to hã ã panh mÿ: “ã tÿ inh mÿ ùn vin ja ên ag vÿ ki nÿtĩ, ag kãki ù vÿ vãfor ja tũ nĩ,” he jan kÿ. ã tÿ ag jy nĩgãnh jé tóg polícia ag mÿ: “ag togvãnh ra,” he mÿ, ã mré mÿ tĩ ag to.

¹⁰ Hã ra Simão Pedro tóg ã rógro ên vyn kÿ tóg polícia ag kãki ù nĩgrêg kym ke mÿ. Ti pëgja tá ti nĩgrêg jê ên tÿ tóg kym ke mÿ. Topê tũ ki rĩr tĩ to pã'i mág camarada ja vê, ti tÿ ù nĩgrêg kym mÿ ên ti, ti jijin hã vÿ: Malco, he mÿ.

¹¹ Kÿ Jesus tóg Pedro mÿ: “ã rógro tÿ ti pãg ja tá fêg,” he mÿ. “Inh panh tÿ inh mÿ: “vêsÿrênh jé ã tóg ke mÿ,” he ja vê, hã kÿ sóg ag mÿ vênh fêg ke mÿ ha. Vênh nenh ke tũ sóg nĩ,” he tóg, Jesus ti.

Pã'i tÿ Anás tÿ Jesus ve

¹² Kÿ soldado ag tóg, ãjag pã'i mré (ag tóg) Jesus mrĩnh mÿ sir, vãfe tÿ. Polícia ag vÿ ag mré ti mrĩnh mÿ gé.

¹³ Kÿ ag tóg ti pére mÿ mÿ, Anás ãn ra. Caifás kakrã vê, Anás ti, hã ra Caifás vÿ tÿ Topê tũ ki rĩr tĩ ag to pã'i mág nĩ, prÿg ên kã.

¹⁴ Hã ra Caifás ên vÿ pã'i ag mÿ: “ùn pir tÿ êg povo jagfÿ ter kÿ tóg pãgã nĩ,” he ja nĩ. Ên kakrã ãn ra ag tóg Jesus pére mÿ mÿ.

Pedro tÿ Jesus to: “ti ki kagtĩg sóg nĩ,” he vén

(Mt 26.57-58, 69-70; Mc 14.53-54, 66-80; Lc 22.54-57)

¹⁵ Kÿ Simão Pedro tóg Jesus nón tĩ mÿ, Jesus mré ke ù mré. Hã ra Jesus mré ke ù ên tóg Topê tũ ki rĩr tĩ ag to pã'i mág ên ki kanhró nĩ, hã kÿ tóg Jesus nón Anás ãn kãra rã mÿ, ãn vãso ra.

¹⁶ Hã ra Pedro tóg re tá jê nĩ, ãn jãnkã rã hã. Kÿ Jesus mré ke ù ên tóg ver ù tÿ jãnkã ki rĩr mÿ ên fi mré vêmén mÿ, kÿ fi tóg Pedro ti mÿ: “ha kãrã,” he mÿ, ti mré ke ù ên tÿ pã'i mág ki kanhró nĩn kÿ.

¹⁷ Kÿ fi tóg ti mÿ: “ã hÿn tÿ Jesus mré ke nĩ,” he mÿ, Pedro ti mÿ, ù tÿ jãnkã ki rĩr jê ên fi. Hã ra tóg fi mÿ ón kÿ: “vó,” he mÿ.

¹⁸ Hã ra Anás camarada ù ag vÿ tá nÿtĩ gé, polícia ag mré. ãn vãso ki ag tóg pĩ han kÿ nÿtĩ, ti tÿ kusa jagy tũn kÿ. Pĩ to ag tóg tugtón nÿtĩ. Kÿ Pedro tóg ag mré tón nĩ gé, pĩ ên ti to.

Anás tÿ Jesus ki jêmê sór

(Mt 26.59-66; Mc 14.55-64; Lc 22.66-71)

¹⁹ Kÿ pã'i mág tóg Jesus mÿ: “inh mÿ ã mré mÿ tĩ ag kãmén,” he mÿ. “ã tÿ nén kãmén tĩ ên ti kãmén nĩ gé, inh mÿ,” he tóg, Anás ti.

²⁰ Kÿ Jesus tóg ti mÿ: “vênh kar mÿ sóg jamã hár(a) tó tĩ,” he mÿ. “Vênh kanhrãnh jafã krêm sóg tó tĩ, Topê jo ãn krêm ke gé. Judeu kar tÿ vênhmãnh kÿ nÿtĩn kÿ sóg ag mÿ kãmén tĩ. Inh pi(jé) vênh péju kÿ tó tĩ', kÿ vênh kar vÿ ki kanhró nÿtĩ.

²¹ Hã ra ã tóg inh ki jêmê sór mÿ'. Inh vĩ jêmêg mÿ ên ag ki jêmêmnĩ. Ki kanhró ag tóg

nýtĩ, isỹ ag mỹ nén tó ja ěn ki,” he tóg, Jesus ti.

²² Jesus tỹ tag tó kỹ polícia ũ tóg Jesus tãnh mũ, kỹ tóg ti mỹ: “pã'i mág vẽ mỹr,” he mũ. “Hã ra ã tóg ti mỹ vĩ mũ,” he tóg mũ.

²³ Kỹ Jesus tóg ti mỹ: “kỹ inh hỹn vẽn vĩ kórég tỹ ne tó?” he mũ. “Ha inh mỹ sỹ vẽn vĩ kórég tó mũ ěn tó,” he tóg. “Vĩ há han inh, ã tỹ hã ra ne tugnĩn isãnh nẽ?” he tóg.

²⁴ Tag pãte Anás tóg Jesus jẽnẽg mũ sir, ti tỹ Caifás venh tũg jé, Topẽ tũ ki rĩr tĩ ag to pã'i mág ěn mỹ. Ti mrĩnh kỹ jẽ kỹ tóg ti jẽnẽg mũ.

Pedro tỹ Jesus to: “ti ki kagtĩg sóg nĩ,” he mãn

(Mt 26.71-75; Mc 14.69-72; Lc 22.58-62)

²⁵ Hã ra Simão Pedro tóg tón nĩ nĩ, pĩ to. Kỹ tá nýtĩ ag tóg ti mỹ: “ã hỹn tỹ ti mré ke nĩ gé,” he mũ. Hã ra tóg ón kỹ: “vó,” he mãn mũ.

²⁶ Kỹ pã'i mág mỹ rãnhraj tĩ ũ vĩ tá nĩ gé. Pedro tỹ ũ nĩgrẽg kym ja ěn kanhkã ũ vẽ. Ěn vĩ Pedro mỹ: “ã ve inh, ka kré krẽm,” he mũ. Tá ã tóg ti mré jẽ ja nĩ,” he tóg mũ.

²⁷ Hã ra Pedro tóg ón kỹ ti mỹ: “vó,” he mãn mũ. Ěn kã galo vĩ kynkyr mũ ha.

Pilatos tỹ Jesus ki jẽmẽ

(Mt 27.1-2, 11-14; Mc 15.1-5; Lc 23.1-5)

²⁸ Kusã pẽ ki ag tóg Jesus pére mũ mũ, pã'i tỹ governador ĩn ra, ti vẽnén jafã ra, palácio ěn ra. Caifás ĩn tá ag tóg ti pére kãpa mũ. Hã ra ag tóg pã'i tỹ governador ĩn kã

ra ge sór tũ nĩ. Ag tỹ festa tỹ Páscoa han ke vĩ kakó tĩ ha, kỹ ũ tỹ pã'i tỹ governador ĩn kã ra ge mũ vĩ festa tỹ Páscoa ěn ki jẽn ke tũ nĩ. Ag jykre vẽ. Hã ra ag tóg ko sór mũ, hã kỹ ag tóg kã ra ge ja tũ nĩ sir.

²⁹ Kỹ Pilatos tóg re ra kãkutẽ mũ, ag mré vẽnén jé. Kỹ tóg ag mỹ: “ti hẽ ri ké?” he mũ. “Ti vẽn hỹn kórég tỹ ne han'?” he tóg, Pilatos ti, Jesus to.

³⁰ Kỹ ag tóg ti mỹ: “vẽn hỹn kórég han ti tĩ,” he mũ. “Ti há nĩ ra ěg tóg ã mỹ ti ven ke tũ nĩ vẽ,” he ag tóg, Pilatos mỹ.

³¹ Kỹ Pilatos tóg ag mỹ: “ha mũjẽg,” he mũ. “Ăjag jykre ki ãjag tóg ti jykre kórég ěn to jykren kỹ tónh ke mũ, ti jykre ti,” he tóg. Hã ra ag tóg ti mỹ: “ti ter ke vẽ,” he mũ. “Kỹ ã hã vĩ ěg mỹ: “ha ti tén,” henh ke mũ,” he ag tóg, pã'i ag, Pilatos mỹ.

³² Hã ra Jesus tóg ag tỹ fóg tỹ pã'i mỹ ã fẽg ke tag tó ja nĩ, fóg ag tỹ cruz to ti sa kỹ ti tén jé. Hã kỹ ag tóg Pilatos mỹ ti ven mũ.

³³ Kỹ Pilatos tóg ã ĩn kãra rã mãn mũ, Jesus mré vẽnén jé. Kỹ tóg ti mỹ: “ã mỹ tỹ Judeu ag pã'i mág nĩ?” he mũ.

³⁴ Kỹ Jesus tóg ti mỹ: “ũ nỹ ã mỹ tag tó?” he mũ. “Ă tỹ vẽnóg ki to jykren mỹ vó, pã'i ag tỹ ã mỹ tó mỹ vó?” he tóg.

³⁵ Kỹ Pilatos tóg: “inh pi(jé) tỹ Judeu nĩ,” he mũ. “Ă kanhkã ag vĩ inh mỹ ã fẽg, ã povo to pã'i ag. Ě hẽ ri ké?” he tóg.

³⁶ Kÿ Jesus tóg ti mÿ: “inh pi(jé) tÿ ga tag kri pã'i mág nĩ,” he mÿ. “Isÿ tÿ tag ki ùn mág nĩ ra inh krêm ke ag tóg Judeu ag mré jagnê génh ke mÿ vê, kÿ ag tóg isenh ke tũ nĩ vê. Hã ra sóg tag ki tÿ ùn mág tũ nĩ, hã kÿ ag tóg isé, Judeu ag,” he tóg, Jesus ti.

³⁷ Kÿ Pilatos tóg ti mÿ: “kÿ ã mÿ hã ra tÿ pã'i mág nĩ?” he mÿ. Kÿ Jesus tóg: “ki hã ã tóg tó mÿ,” he mÿ. “Isÿ ki hã tó jé, hã jé sóg ga kri mur ja nĩ, hã jé sóg ga kri tũ mÿ gé. Kÿ ù tÿ ki hã tó to há nÿtĩ ên ag kar vÿ inh vĩ jëmêg mÿ,” he tóg, Jesus ti.

³⁸ Kÿ Pilatos tóg ti mÿ: “ne nÿ tÿ ki hã ke nĩ?” he mÿ. “Sÿ ki kanhrãn jãvãnh mẽ tóg tĩ,” he tóg, Pilatos ti.

Jesus ter ke

(Mt 27.15-31; Mc 15.6-20; Lc 23.13-25)

Kÿ tóg re ra tÿg mãn mÿ, pã'i ag mré vëmén jé, kÿ tóg ag mÿ: “ti pi(jé) vënh jykre kórég han tĩ,” he mÿ.

³⁹ “Páscoa kar ki sóg ãjag mÿ vëse ù kavãg tĩ. Kÿ inh hÿn ãjag mÿ ãjag tÿ ù to: “Judeu ag pã'i,” he mÿ ên kyvãh ke mÿ,” he tóg, Pilatos ti.

⁴⁰ Hã ra ag kar tóg prënprër mÿ sir. “!..Jesus pijé!..! Barrabás kava ra..!” he ag tóg mÿ sir, prënprër kÿ. Hã ra Barrabás ên vÿ tÿ ùn jykre kórég pẽ nĩ.

19

¹ Kÿ Pilatos tóg soldado ag mÿ: “ti mrãnmrãn ra, ge kÿ,” he mÿ.

² Kÿ ag tóg ti mrãnmrãn mÿ. Ti mrãnmrãn kar kÿ ag tóg sónh pĩrãn kÿ ti krĩ tógfíg mÿ sir. Kÿ ag tóg kur kusÿg tÿ ti kri fón mÿ gé sir.

³ Ti ki junjun kÿ ag tóg ti mÿ: “viva, Judeu ag pã'i,” he mÿ, ti nyg kÿ. Kar ag tóg ti tãnh mÿ gé sir.

⁴ Kÿ Pilatos tóg re ra kutê mãn mÿ gé sir. Kÿ tóg vënh kar mÿ: “ha vé ha,” he mÿ. “Ti jykre kórég mẽ ja tũ sóg nĩ vê. Kÿ sóg ãjag mÿ ti ven mÿ. Nén ù vënhmÿ han tũ ti nĩ vê,” he tóg, Pilatos ti, ag mÿ.

⁵ Kÿ Jesus tóg kãkutê mÿ, hã ra tóg sónh tÿ ã krĩ tógfín kÿ kãkutê mÿ, kur kusÿg ên tu kÿ ke gé. Kÿ Pilatos tóg vënh kar mÿ: “ti ve ra,” he mÿ, ag tÿ hën ri ke mÿn ti tovãnh jé, ag tÿ ti jagtar ên ve kÿ.

⁶ Pã'i ag tÿ ti ve kÿ, polícia ag tÿ ti ve kÿ ag tóg prënprër mÿ gé sir. “!..Ka to ti sã..! ..Ka to ti sã..!” he ag tóg mÿ sir, prënprër kÿ. Kÿ Pilatos tóg ag mÿ: “kÿ ãjag hÿn inhhã ka to ti sa sór mÿ!” he mÿ. “Ti pi(jé) nén ù kórég han mÿ!” he tóg.

⁷ Kÿ ag tóg ti mÿ: “hã ra tóg: “tÿ inh Topê kósín nĩ,” he tĩ êg mÿ,” he mÿ. “Ëg tÿ ù tÿ ge tén ke vê. Hã tó ja ti nĩ, êg mÿ, Topê ti, hã kÿ tóg rán kÿ nĩ,” he ag tóg mÿ sir, Pilatos mÿ.

⁸ Kÿ Pilatos tÿ ti tÿ tÿ Topê kósín nĩ mẽ kÿ tóg ti mÿ e tãvĩ tĩ.

⁹ Kÿ tóg ã ãn kãra rã mãn kÿ Jesus mÿ: “tÿ ã hẽ tá ke nĩ?” he mÿ. Hã ra Jesus tóg ti mré vëmén mãn sór tũ nĩ.

10 Kÿ Pilatos tóg ti mÿ: “ã mÿ inh mré vēmén ke tũ?” he mÿ. “Isÿ ã kavãn sór nĩ kÿ sóg ã kyvãg mÿ. Isÿ ka to ã sa sór kÿ sóg to ã sãg mÿ gé. Tag to jykren,” he tóg, Pilatos ti, Jesus mÿ.

11 Hã ra Jesus tóg ti mÿ: “Topẽ tÿ ã tÿ pã'i han tũ nĩ ra ã tóg tag han ki kagtĩg nĩnh mÿ vẽ,” he mÿ. “Hã kÿ ù tÿ ã mÿ inh fẽg mÿ ãn vÿ ã tÿ Topẽ vĩ mranh mÿ tag kãfór nĩ ha,” he tóg, Jesus ti.

12 Kÿ tóg Pilatos mÿ e pẽ tãvĩ tĩ, kÿ tóg ti kavãn sór mÿ sir. Hã ra Judeu ag tóg ti mÿ: “ã tÿ tag kyvãn kÿ ã pi(jé) tÿ ãg kar kri pã'i mág pẽ tÿ Imperador ãn mré ke nĩ,” he mÿ. “Û tÿ vêsÿ pã'i mág han mÿ ãn vÿ Imperador kato tẽ mÿ,” he ag tóg.

13 Kÿ Pilatos tóg ag vĩ tag mẽ kÿ mÿmẽg mÿ, kÿ tóg Jesus jé prẽr mÿ, ti tÿ ti mré re tá jẽnh kuté jé. Kÿ tóg ã nĩgia ãn kri nĩ nĩ, ã tÿ hẽ tá vẽnh kar jykre vég tĩ ãn ki. Tá ag tóg pó nẽ ja nĩgtĩ, hã kÿ ag tóg to: “Pó Nẽ,” he tĩ, hã vÿ: “Gabatá,” he mÿ, Hebreu vĩ ki.

14 Meio dia ki ke vẽ. Tÿ vaj kÿ ag tóg festa tÿ Páscoa ãn han sór mÿ, hã kÿ ag tóg ùri vễjẽn tÿ hẽn ri ke kãn mÿ. ãn kã meio dia ki Pilatos tóg ã nĩgia kri nĩ nĩ, ag mÿ ag tÿ vẽnh jykre han ke mÿ ãn tó jé. Kÿ tóg Judeu ag mÿ: “ãjag pã'i mág hã vẽ ha,” he mÿ.

15 Hã ra ag tóg prẽnprẽr kÿ: “!..ti tén ra, ti tén ra, ka to ti sã..!” he mÿ sir.

“Kÿ inh mÿ ãjag pã'i mág tÿ

cruz to sanh mÿ?” he tóg, Pilatos ti. Kÿ pã'i ag tóg ti mÿ: “pã'i mág ãg nÿtĩ, hã vÿ: Imperador, he mÿ,” he mÿ.

16 Kÿ Pilatos tóg ag mÿ: “ha cruz to ti sanh mÿjẽg gé,” he mÿ sir.

Ag tÿ Jesus tÿ cruz to sanh ke

(Mt 27.32-44; Mc 15.21-32; Lc 23.26-43)

17 Kÿ ag tóg Jesus mÿ cruz fig mÿ, ti tÿ vyn kÿ pãnónh tÿ Calvário ra tũg jé, ag tÿ Hebreu vĩ ki to: Gólgota, he mÿ ãn ra.

18 Tá ag tóg cruz to ti sãg mÿ sir. Ti mré ag tóg ùn régre ag tÿ cruz to ag sãg mÿ gé, kÿ ù vÿ ti pẽgja tá cruz to sa, jãvo ù vÿ ti jakãnh tá cruz to sa gé. Jãvo Jesus vÿ ag kuju kã cruz ti to sa gé.

19 Hã ra Pilatos tóg Jesus to vẽnh rá han ja nĩ, kÿ ag tóg ti krĩg mÿ vẽnhrá ãn sa ja nĩ, hã vÿ: “Nazaré tá Jesus vẽ, Judeu ag pã'i tÿ rei vẽ,” he mÿ, vẽnh rán ki. Hebreu vĩ ki tóg rán kÿ nĩ, Latim vĩ ki ke gé, Grego vĩ ki ke gé.

20 Kÿ Judeu tÿ hẽn ri ke ag tóg vég mÿ sir, vẽnh rá ti. Jerusalém vÿ tá kakó nĩ, Jesus tÿ hẽ tá cruz to sa kÿ jẽ ãn ti tá, hã kÿ ù tÿ hẽn ri ke ag tóg ti venh kãmÿjẽg sir.

21 Kÿ tóg pã'i ag mÿ há tũ nĩ. Hã kÿ ag tóg Pilatos mÿ: “Judeu ag pã'i tÿ rei vẽ, he ja ã nĩ, vẽnh rán ki,” he mÿ. “Hã ra tóg ki krov ja tũ nĩ. Vẽso tóg: “tÿ sóg Judeu ag pã'i tÿ rei nĩ,” he ja nĩ. Kÿ: Judeu ag pã'i mág vÿ tÿ inh nĩ, he rán nĩ,” he ag tóg, Pilatos mÿ.

22 Hã ra Pilatos tóg ag mÿ: “vó,” he mÿ. “Rán inh huri, kÿ tóg rán kÿ nĩ ha,” he tóg mÿ.

23 Kÿ soldado ag tóg Jesus tÿ ka to sãg mÿ. Kÿ ag tóg ti kur mãn kÿ vãnh kãpãm mÿ. Û tÿ 4 (ke) ag vễ, soldado ag, hã kÿ ag tóg ti kur tÿ vãnh kãpãm tÿ 4 (ke) han mÿ. Hã ra ti vãnh kri fêg ja vÿ kur pir tÿ há nĩ. Kurÿr tú ti nĩ.

24 Kÿ ag tóg ti capa há ve kÿ jagnê mÿ: “êg hÿn tag kym ke tũ nĩ,” he mÿ. “Ti capa to jogar he jé êg tóg ke mÿ. Û tÿ mãg mÿ ên hã vÿ tóg tunh mÿ,” he ag tóg mÿ. Kÿ ag tóg to jogar he mÿ sir. Hã ra ag tÿ ti kur to jogar he mÿ ên tóg rán kÿ nĩ gé, Topê vĩ rá ki, ha mễ. “Inh kur tÿ vãnh kãpãm ag tóg, hã ra ag tóg inh kur tÿ vãnh kri fêg ja to jogar he mÿ,” he ja tóg nĩ, Topê vĩ rá ki, hã kÿ ag tóg ke mÿ.

25 Hã ra Jesus mÿnh fi vÿ tá jễ nĩ, cruz rã hã, fi jãvÿ fi mré. Kar kÿ Maria Madalena fi vÿ tá jễ nĩ gé, kar kÿ Maria ù fi ke gé, Clopas prũ fi.

26 Kÿ Jesus tóg ã mÿnh fi vég mÿ sir. Ti mré tĩ mÿ ù vÿ fi to grẽn ke kÿ jễ nĩ, Jesus tÿ ù to há pễ ên ti. Kÿ Jesus tóg ã mÿnh fi mÿ: “tag vÿ tÿ ã kósin nĩnh mÿ ha,” he mÿ, ã mré tĩ mÿ ên to.

27 Jãvo tóg ti mÿ: “fi hã vÿ tÿ ã mÿnh nĩnh mÿ ha,” he mÿ gé, fi to. Hã kÿ ti mré tĩ mÿ ên tóg fi mÿ: “inh mré nĩnh kãtĩg,” he mÿ, kÿ fi tóg ti Ìn krêm nĩ nĩ, ti tÿ Jesus jêgja ki fi jê'ÿn jé.

Jesus ter
(Mt 27.45-56; Mc 15.33-41; Lc 23.44-49)

28 Jesus tÿ ã mÿnh fi mÿ tag tó kar kÿ tóg sir ã tÿ nén hÿn han ke mÿ ên hÿn han kãn ja nĩ. Hã to jykrén kÿ tóg hã ra nén tÿ ã to rán kÿ nĩ ên hÿn han kãn sór mÿ, hã kÿ tóg: “inh og há tóg tĩ,” he mÿ sir.

29 Tá runja ù vÿ nĩ nĩ, hã ra vinho kaja pir vÿ ki nĩ, runja ên ki. Kÿ ag tóg esponja tÿ vinho ki tÿ pun ke mÿ, kÿ ag tóg ka tÿ hissopo jurÿn kÿ (ag tóg) nén kugpe jafã ên kusón mÿ, kusón kÿ ag tóg vinho kãra rãg kÿ ti mÿ jun mÿ sir, vinho ti.

30 Kÿ tóg ki ùnh ùnh ge mÿ sir, vinho ên ki. Kÿ tóg: “ke kãn inh huri,” he mÿ. Kÿ ti krĩ tóg héré' he mÿ, kÿ tóg hun ke mÿ. Kÿ tóg hur ter.

Soldado ù tÿ Jesus kusón

31 Kÿ Judeu ag tóg Pilatos mÿ to vĩ mÿ, soldado ag tÿ ù tÿ ka to sa kÿ nÿtĩ ag fa mrynhmranh jé, ag tÿ kãnhmar kãgter jé. Tÿ vaj kÿ ag mÿ festa mág vễ, kÿ ag tóg ùri festa ên to nén kar kãn kãn tĩ gé. Hã ra tóg ag mÿ kórég nĩ, ù tÿ ag festa kurã ki cruz to sa kÿ ter mÿ ti. Hã kÿ ag tóg Pilatos mÿ ag kãgtén ke to vĩ mÿ, ag tÿ ka to ag kãrem jé.

32 Kÿ soldado ag tóg ù tÿ Jesus mré cruz to vin kÿ nÿtĩ ag fa mrynhmranh mÿ mÿ.

33 Kÿ ag tóg Jesus fa mrynhmranh sór mÿ gé, hã ra tóg hur ter, hã kÿ ag tóg mrynhmranh tũ nĩ sir.

³⁴ Kÿ soldado ù tóg ã rógro tÿ ti jên'yr ki kusón mũ, kÿ ti kyvénh tóg ki kãkutẽ mũ, kyvénh jãpri mré.

³⁵ Tag ve inh, mÿr, ha mẽ, hã kÿ sóg ãjag mÿ tó mũ. Sÿ ki hã tó vë. Sÿ ãjag mÿ tag kãmén vë, ãjag tÿ inh vÿ tag kri fi jé, ãjag tÿ ti ki ge sór jé.

³⁶ Hã ra tóg rán kÿ nĩ gé, ag tÿ ti kusón ke tag ti. “Ag pi(jé) ti kuka mrynhmranh ke mũ’,” he tóg, Topê vÿ tÿ rán kÿ nĩ ki.

³⁷ Kÿ tag tóg rán kÿ nĩ gé, hã mẽ. “Ag tÿ ùn kusón mũ ên ve jé ag tóg ke mũ,” he tóg mũ gé, Topê vÿ ki, Jesus to.

Ag tÿ vënh kej ra ti va mũ

(Mt 27.57-61; Mc 15.42-47; Lc 23.50-56)

³⁸ Kÿ Jesus to há ù tóg nĩgtĩ, Arimatéia tá José. Ên vÿ ti mré tĩg ja tũ nĩgtĩ, ti tÿ pã'i ag kamêg kÿ, hã ra tóg Jesus to há nĩ. Ên vÿ tóg sir Pilatos venh tĩ mũ, kÿ tóg ti mÿ: “sÿ Jesus tÿ ka to ti kãtérem há tóg tĩ,” he mũ. Kÿ Pilatos tóg ti mÿ: “há ti nĩ,” he mũ. Kÿ Arimatéia tá José ên tóg Jesus tÿ cruz to ti kãtérem tĩ mũ.

³⁹ Kÿ Nicodemos vÿ kãtĩ mũ gé, ù tÿ kuty tá Jesus mré vëmén mũ ên ti. Ên vÿ ger há ma kãtĩ mũ, 45 (ke) quilos vë mÿr. Ka tÿ mirra jênjo ger há vë, kar ka tÿ aloés jênjo ger há mré. Ên ma kãtĩg tóg mũ, Nicodemos ti.

⁴⁰ Kÿ ag tóg Jesus ti kãtérem mũ sir, cruz to, José mré Nicodemos ti. Ti pãg ag tóg mũ sir, kur tÿ, hã ra ag tóg nén ger há ên tÿ ti pãg ke ên kãkã

nĩm mũ gé. Judeu ag jykre hã vë, ag tÿ vënh kej tá ù fi kÿ.

⁴¹ Ka kré ù vÿ Gólgota tá kakó nĩ, kÿ tóg tá vënh kej tãg nĩ, pãró nor ti, ka kré ên tá. Kuprã ti nÿ.

⁴² Ên kãkã ag tóg ti fig mũ, ti kakó nĩn kÿ. Hã ra tóg rãké nÿ ha, kÿ ag festa tóg kakó' he mũ ha, hã kÿ ag tóg vënh kej tãg ên kãkã Jesus fig mũ sir.

20

Jesus rÿr mãn

(Mt 28.1-8; Mc 16.1-8; Lc 24.1-12)

¹ Tÿ vaj ùn kÿ, semana ki kurã ve ki Maria Madalena fi tóg Jesus venh tĩg sór mũ, ti kej tá. Kusã pë ki fi tóg ra tĩ mũ, kurã sÿ hã ra. Hã ra fi tóg tá jun kÿ (fi tóg) pó ên vëg mũ, ti kej nĩfe ên ti. Kunũnh kÿ tóg jẽ nĩ, kÿ tóg sir nor kÿ nÿ nĩ, ti kej ti.

² Kÿ fi tóg Simão Pedro to vënhvãg tĩ mũ sir, Jesus mré tĩ tĩ ù to ke gé, ù tÿ Jesus to há tãvĩ ên to. Kÿ fi tóg ag mÿ: “êg Senhor va ag tóg mũ ja nĩ,” he mũ. “Ã kej kãki tóg tũ nĩ,” he fi tóg mũ. “Ag hÿn hẽ ra ti va kagáv,” he fi tóg mũ ag mÿ.

³ Kÿ ag tóg venh mũ mũ gé, Pedro ti, Jesus mré tĩ tĩ ù ên ke gé.

⁴ Pétẽ ag tóg mũ mũ, hã ra ù ên tóg Pedro kã raran ke mũ, kÿ tóg tá jun vén mũ.

⁵ Kÿ tóg pãró nor ên ki pãnh ke kÿ kãtã kur ên vëg mũ, ti pãg ja ti, hã ra tóg kãra rã ja tũ nĩ.

⁶ Kÿ Simão Pedro tóg ti nón tá jun mũ gé, hã ra tóg inhhã

kāra rā mū, ti kej kāra, Pedro ti. Kŷ tóg kur ěn vэг mū gé sir.

⁷ Ti krĩ pǎg ja vŷ vyr mŷ nĩ nĩ, kónhpĕn kŷ.

⁸ Kŷ ũ ěn tóg ti nón kāra rā mū gé sir, kŷ tóg ā tŷ ven kŷ: “hã ja vē,” he mū.

⁹ Vãhã ag tóg ki kanhró nŷtĩ. Tag to hã ag tóg ti vĩ to jykrén há han ja tũ nĩ ver, ti to nén rán kŷ nĩ ěn to, ti tŷ ā ter kar kŷ rĩr mǎn ke ěn to. Vãhã ag tóg ki kanhró nŷtĩ.

¹⁰ Ag tŷ ti kej tŷ kuprã nŷ ve kar kŷ ag tóg vŷnvŷn ke mū, ãjag ĩn ra.

Jesus tŷ Maria Madalena fi mŷ vĕnh ven

(Mt 28.9-10; Mc 16.9-11)

¹¹ Hã ra Maria Madalena fi tóg tá jĕ nĩ, ti kej nor nĩ ěn tá. Fŷ fi tóg jĕ nĩ. Fi fŷ kŷ fi tóg ti kej to pǎnh ke kŷ (fi tóg) kátá ěvãnh mū sir.

¹² Kŷ fi tóg ũn régre ag vigvэг mū. Topĕ tŷ jĕgnĕ jafã ag vē. Kur kupri rĩnh kŷ ag nĩgnĩg kŷ nŷtĩ, Jesus nŷgja tá, ti kej kátá. Ũ tóg ti krĩ nĩgja tá nĩ, kŷ ũ tóg ti pĕn nŷtĩgja tá nĩ gé.

¹³ Kŷ ag tóg fi mŷ: “ã tŷ ũ jãvãnh kŷ fŷ nĕ, jŷ?” he mū. Kŷ fi tóg ag mŷ: “inh Senhor va ag tóg mū ja nĩ, hã ra sóg ag tŷ hĕ ra ti va mū ja ěn ki kagtĩg nĩ,” he mū.

¹⁴ Kŷ fi tóg vēsykã ěvãnh mū, hã ra Jesus tóg tá jĕ nĩ. Hã ra fi tóg ti ki kagtĩg nĩ.

¹⁵ Kŷ tóg fi mŷ: “ã tŷ ũ jãvãnh kŷ fŷ nĕ, jŷ?” he mū gé. Hã ra fi tóg ti to: “ti hŷn tŷ ka kré tag ki rĩr tĩ jĕ, he sóg mū,” he mū. Hã kŷ fi tóg ti mŷ: “ã

mŷ ag tŷ hĕn ra ti va mū vэг tũ, vŷ?” he mū.

¹⁶ Kŷ Jesus tóg fi mŷ: “Maria,” he mū, fi jiji tó kŷ. Kŷ fi tóg ti tŷ fi mŷ fi jyjy tó kŷ (fi tóg) vãhã ti ki kanhrãn mū sir. Kŷ fi tóg ti mŷ: “Raboni, ã hã mŷ?” he mū. Hebreu vĩ ki fi tóg tó mū, hã kŷ fi tóg: “Raboni,” he mū. Ęg vĩ ki ěg tóg tag to: “Senhor,” he tĩ. Fi tŷ vãhã Jesus ki kanhrãn kŷ nĩn kŷ fi tóg ti mŷ ke mū.

¹⁷ Hã ra Jesus tóg fi mŷ: “inh vóg tũg nĩ ver,” he mū. “Isŷ ver inh panh ra tãprynĕ ke vē. Inh kanhkã ag mŷ tónh tĩg nĩ hã ra. Ag mŷ: “isŷ ver inh panh venh tĩg ke vē, hã ra tóg tŷ ãjag panh nĩ gé, he tóg,” hemnĩ. “Isŷ ver inh Topĕ to tãprynĕ ke vē, kŷ tóg tŷ ãjag Topĕ nĩ gé, he ti,” hemnĩ ag mŷ,” he tóg Jesus ti, Maria Madalena fi mŷ.

¹⁸ Kŷ fi tóg tĩ mū, ti mrĕ mũgtĩ ag mŷ tó jĕ. “Ęg Senhor ve inh,” he fi tóg mū. Kŷ fi tóg ag mŷ tó kãn mū sir, ti tŷ fi mŷ nĕn tó mū ěn ti.

Jesus tŷ ã mrĕ mū tĩ ag mŷ vĕnh ven

(Mt 28.16-20; Mc 16.14-18; Lc 24.36-49)

¹⁹ Kurã ěn kã, semana tŷ kurã ve ěn tŷ rãkãnh kŷ ag tóg vĕnhmãn kŷ nŷtĩ, ĩn ũ krĕm, ti mrĕ mū tĩ ag. Hã ra ag tóg jãnkã nĩfĕnh ja nĩ, chave tŷ, ag tŷ ěprã pã'i ag kamĕg kŷ. Hã ra Jesus tóg vãhã vĕnh ven mū, ag kãki, kŷ tóg ag mŷ: “mŷ sér nŷtĩmnĩ,” he mū.

²⁰ Tag tó kŷ tóg ag mŷ ã nĩgĕ nug ven mū, ã jĕn'yr ti ke gé.

Kỹ tóg ag mý sér tĩ sir, ag tỹ ãg Senhor ven kỹ.

²¹ Kỹ tóg ag mý ke mǎn mũ. “Mý sér nýtĩmnĩ,” he tóg. “Inh panh tỹ inh jẽnẽ vẽ. Kỹ sóg ũri ãjag jẽnẽg mũ gé, ti tỹ inh jẽnẽ ri ke,” he tóg.

²² Tag tó kar tóg ag ki hu he mũ, ag kar ki, kỹ tóg ag mý: “Topẽ kuprĩg vỹ tỹ ãjag jagrẽ nýtĩ ha,” he mũ.

²³ “Ãjag tỹ ũ mý: “ã tỹ Topẽ vĩ mranh ja ãn tỹ tóg vẽn h pãte fón mũ,” hen kỹ tóg vẽn h pãte fón kỹ nĩ nĩ. ãjag tỹ ũ mý: “ã mý ti vẽn h pãte fón ke tũ nĩ,” hen kỹ tóg vẽn h pãte fón ke tũ nĩ,” he tóg, Jesus ti, ti tỹ ag mý vẽn h ven vén kỹ.

Tomé tỹ vǎhã Jesus ve

²⁴ Hã ra Tomé vỹ ag mré nĩ ja tũ nĩ, ag tỹ Jesus vég mũ ãn kã. Tomé ãn vẽ, ag tỹ ũ to: “ũn vẽn gni,” he mũ ãn vẽ, Jesus mré tĩ tĩ ãn ti.

²⁵ Ag tỹ Tomé ãn ve kỹ ag tóg ti mý: “ãg Senhor ve ãg,” he mũ. Hã ra tóg ag mý: “ti nĩgẽ nug ve sór inh mũ,” he mũ, “isỹ ag tỹ prego tỹ ti nĩgẽ nugnón ja ãn mẽ jé, inh nĩgẽ tỹ,” he tóg mũ. “Kỹ sóg ti jẽn'yr ki mẽnh ke mũ gé, sỹ ki ti kusón ja ãn mẽ jé. Ke tũ nĩ (mũ) ra isóg kri nĩm ke tũ pẽ nĩ, ti rĩr mǎn kri,” he tóg, Tomé ti.

²⁶ Kurã tỹ 8 (ke) tũg kỹ ag tóg vẽn h mǎn kỹ nýtĩ gé, kỹ Tomé vỹ ag mré nĩ gé. Ìn jǎnkã vỹ ki chaven kỹ nýtĩ. Kỹ Jesus tóg ag mý vẽn h ven mǎn mũ, ag mré jẽn kỹ. Kỹ tóg ag mý: “mý sér nýtĩmnĩ,” he mũ.

²⁷ Kỹ tóg vẽn sýmér Tomé mý: “ã nĩgẽ tỹ inh nĩgẽ nugnor mẽ,” he mũ. “Ã nĩgẽ tỹ inh jẽn'yr kusón ja ãn ti mẽ gé. Kri nĩmnĩ, to: “vẽn h ó vẽ,” he mǎn tũg nĩ,” he tóg, Jesus ti.

²⁸ Kỹ Tomé tóg ti mý: “inh Senhor,” he mũ. “Topẽ!,” he tóg.

²⁹ Kỹ Jesus tóg ti mý: “vǎhã ã tóg kri nĩm sór mũ ha, ã tỹ inh ve kỹ,” he mũ. “Û tỹ ã tỹ inh vég tũ ra kri nĩm mũ ãn mý tóg vĩ há pẽ han ke mũ, Topẽ ti,” he tóg, Jesus ti, ti tỹ ag mý vẽn h ven mǎn kỹ.

Ëg tỹ Jesus ki ge jé livro tag tóg rán kỹ nĩ

³⁰ Jesus vỹ ag rĩnve ãg tỹ nén han vǎnh hyn han kǎn ja nĩgtĩ, nén tỹ hẽn ri ke, hã ra sóg rán kǎn ja tũ nĩ.

³¹ Sỹ livro tag rán vẽ, ũ tỹ vẽn h rá tag vég mũ kar ãn ag tỹ Jesus ki ge sór jé, ag tỹ ti to: “Cristo vỹ tỹ ti nĩ, Topẽ kósĩn vỹ tỹ ti nĩ,” he jé. Kỹ ãjag tỹ ti ki ge kỹ ãjag tóg rĩr krỹg ja tũ ãn venh ke mũ, ti tugrĩn, mýr, ha mẽ.

21

Jesus tỹ ã mré mũ tĩ ũ ag mý vẽn h ven mǎn

¹ Tag pãte Jesus tóg kejẽn goj tỹ Tiberiádes tá ag mý vẽn h ven mǎn mũ, kỹ tóg ge tĩ, ha mẽ.

² Simão Pedro vỹ tá nĩ, Tomé ti ke gé, ag tỹ ũ to: “ũn vẽn gni,” he mũ ãn ti, kar kỹ Natanael ti ke gé, ãmã tỹ Caná tá ke ãn, ga tỹ Galiléia tá ke ãn, kar kỹ Zebedeu krẽ ag vỹ tá

nýtĩ gé, ù tỹ Jesus mré mũ tĩ régre ù ag ke gé.

³ Kỹ Simão Pedro vỹ ag mỹ: isỹ pirã kugmĩnh tĩg vê,” he mũ. Kỹ ag tóg ti mỹ: “ã mré ěg mũnh mũ,” he mũ gé. Kỹ ag tóg barco ki ge mũ, goj kri mũ jé. Hã ra ag tóg nén ù kãgmĩg tũ pẽ nĩ, kuty ěn kã.

⁴ Tỹ vaj kỹ kusã pẽ ki, rã tỹ jun ke mũ ra Jesus vỹ ga fyr tá jẽ nĩ, hã ra ag tóg ti ki kagtĩg nýtĩ ver.

⁵ Kỹ tóg ag mỹ: “ãjag mỹ pirã ù kãgmĩg tũ?” he mũ. Kỹ ag tóg ti mỹ: “hỹ,” he mũ.

⁶ Kỹ tóg ag mỹ: “rede tỹ barco pẽgia tá fón,” he mũ, “kỹ ãjag tóg kugmĩnh ke mũ, pirã ti,” he tóg mũ. Kỹ ag tóg ke mũ. Kỹ tóg fór mũ, rede ti, kỹ ag tóg kãtãnfyn kórég nýtĩ, ti kufy tĩn kỹ, pirã e nýtĩn kỹ.

⁷ Kỹ ù tóg Pedro mỹ: “ěg Senhor hã vê,” he mũ. Jesus tỹ ù to há pẽ ěn vỹ Pedro mỹ ke mũ. Kỹ Pedro tóg ti vỹ tag to ã kur rĩnh mãn mũ. Kunũnh ja ti nĩ, ti kur ti. ã kur rĩnh kỹ tóg barco ki kãkutẽ kỹ (tóg) goj kãmĩ tĩ mũ sir, ti tỹ Jesus kukãm tĩg jé, goj kãmĩ.

⁸ Hã ra ag tóg ti nón barco kãmĩ mũ mũ gé, rede ěn raran ag tóg mũ mũ. Kakó ti nĩ ha, goj fyr ti, 100 (ke) metros hỹn.

⁹ Ag tỹ vagvag ke pa kỹ ag tóg Jesus jãká vég mũ sir. Pirã kugjin tóg nĩ nĩ, kỹ ěmĩ tóg tá ti rã nĩ gé.

¹⁰ Kỹ Jesus tóg ag mỹ: “ãjag pirã gé kãmũjěg,” he mũ.

¹¹ Kỹ Simão Pedro tóg barco kãra rã kỹ rede ěn raran mũ. Goj fyr kukãm tóg ma tĩ mũ,

kỹ tóg vag ke mũ sir, tar tá. Hã ra tóg fór nĩ, rede ti, pirã tỹ, 150 (ke) hỹn, pirã mág tãvĩ. Hã ra rede tóg jar ja tũ nĩ, ti e tãvĩ nýtĩ ra.

¹² Kỹ Jesus tóg ag mỹ: “konh kãmũjěg,” he mũ. Hã ra ag tóg ti mỹ: “tỹ ã ù nĩ?” he jãvãnh nýtĩgtĩ. Ti ki kanhró ag tóg nýtĩ, ti tỹ tỹ ěg Senhor nĩn ki.

¹³ Kỹ Jesus tóg ag mỹ ěmĩ ěn kã věnh ken mũ sir, pirã ti ke gé.

¹⁴ Jesus tỹ ag mỹ věnh ven tãgtũ vě ha, ěn kã, ti ter kar kỹ rĩr mãn kar kỹ.

Jesus tỹ Pedro mré věměn

¹⁵ Ag jěn kar kỹ Jesus tóg Simão Pedro mỹ: “Simão!,” he mũ. “João kósin!,” he tóg. “ã mỹ iso há tãvĩ nĩ, ã mré ke ag tỹ iso há nýtĩ ěn kãfór?” he tóg, Jesus ti, Pedro mỹ. Kỹ tóg ti mỹ: “hỹ, hã vê,” he mũ. “Ki kanhró ã tóg nĩ, isỹ ã to há pẽ nĩn ki,” he tóg, Pedro ti, Jesus mỹ. Kỹ Jesus tóg ti mỹ: “kỹ ù tỹ inh ki ge kỹ nýtĩ ag mỹ inh vỹ tómnĩ,” he mũ.

¹⁶ Kỹ tóg ti mỹ vỹ mãn mũ, Jesus ti, Pedro mỹ. “Simão!,” he mãn tóg. “João kósin!,” he tóg. “ã mỹ iso há nĩ?” he tóg. Kỹ tóg ti mỹ: “hỹ, hã vê,” he mãn mũ. “Ki kanhró ã tóg nĩ, isỹ ã to há nĩn ki,” he mãn tóg. Kỹ Jesus tóg ti mỹ: “kỹ ù tỹ inh ki ge kỹ nýtĩ ag mỹ inh vỹ tómnĩ,” he mãn mũ gé.

¹⁷ Kỹ Jesus tóg ti mỹ vỹ mãn mũ gé, vỹ tãgtũ han kỹ. “Simão!,” he tóg. “João kósin!,” he tóg. “ã mỹ iso há nĩ?” he tóg. Kỹ tóg Pedro mỹ e tĩ, ti

tỹ ti mỹ ke tãgtũ han kỹ. Ti ki jẽmẽ tãgtũ han tóg, hã kỹ tóg ti mỹ e tĩ. Kỹ tóg ti mỹ: “nén kar ki kanhró ã tóg nĩ,” he mũ. “Ki kanhró ã tóg nĩ, isỹ ã to há nĩn ki,” he tóg, Jesus mỹ, Pedro ti. Kỹ Jesus tóg ti mỹ: “kỹ ù tỹ inh ki ge kỹ nỹtĩ ag mỹ inh vĩ tómnĩ,” he mãn mũ.

18 “Ã mỹ sóg ki hã tó mũ, ha mẽ,” he tóg mũ. “Ã kyrũ kã ã tóg ã kur rĩnh kỹ ã tỹ hẽn ra tĩg sór mũ ên ra tĩg ja nĩgtĩ. Kejẽn ã kófa nĩnh ke vễ. Ên kã ã tóg ag mỹ ã nĩgé tỹ vẽn kri tỹ tam kenh mũ, kỹ ag tóg ã senh mũ, ha vemnĩ, kỹ ag tóg ã pére mũnh mũ, ã tỹ hẽ ra tĩg sór tũ ên ra,” he tóg, Jesus ti, Pedro mỹ.

19 Ti tỹ ti mỹ ag tỹ ti tén ke tó vễ. Hã ra ag tóg Topẽ tỹ tỹ ùn mág nĩ venh ke mũ, ag tỹ Pedro tén ke tugrĩn. Tag tó ti, Jesus ti, Pedro mỹ. Tag pãte tóg ti mỹ: “mũ jé ha, inh mré,” he mũ gé sir, Jesus ti.

Jesus tỹ João to Pedro mỹ vĩ

20 Ag mũn kỹ Pedro tóg vễsỹjãm êvãnh kỹ (tóg) ù tỹ Jesus nón kãtĩg mũ ên vэг mũ gé, Jesus tỹ ù to há tãvĩ ên. Ag jẽn rén ja ên tá tóg Jesus rã hã nĩ ja nĩ, ti mré tóg jagnẽ to grẽn ke kỹ nĩ ja nĩ, Jesus tỹ ù to há tãvĩ ên. Ên kã tóg Jesus ti mỹ: “ũ nỹ hỹn ã ven ke mũ, pã'i ag mỹ?” he ja nĩ. Ên hã vĩ Jesus nón tĩg mũ, Pedro tỹ ti mré tĩg kỹ.

21 Pedro tỹ ti tỹ ag nón kãtĩ mũ ve kỹ tóg Jesus mỹ: “jãvo ù tỹ êg nón kãtĩg mũ tag ti?” he mũ.

22 Kỹ Jesus tóg ti mỹ: “sỹ ti mỹ nén tó mũ vĩ vyr mỹ nĩ,” he mũ. “Kỹ sỹ ã mỹ nén tó mũ vĩ vyr mỹ nĩ gé,” he tóg mũ. “Sỹ ti mỹ: “ter ke tũ ã tóg nĩ, isỹ vĩn ke ve jé ã tóg ke mũ,” he sór mũ ra sóg ti mỹ tónh ke mũ vễ,” he tóg. “Ã hã mỹ sóg ã tũ tónh ke mũ, hã kỹ sóg ã mỹ: mũ jé ha, inh mré, he mũ,” he tóg, Jesus ti, Pedro mỹ. Ti tỹ ù tỹ ag mré kãtĩ mũ ên to ken hã vễ.

23 Jesus vĩ tag tugrĩn vẽnh kar tóg ti to: “ter ke tũ ti nĩ,” he tĩ, Jesus ki ge kỹ nỹtĩ kar ag. Hã ra Jesus pi(jé) ti to: “ter ke tũ ti nĩ,” he ja nĩgtĩ. Ti to tóg: “sỹ ti mỹ: ter ke tũ ã tóg nĩ, isỹ vĩn ke ve jé ã tóg ke mũ, he sór mũ ra sóg ti mỹ tag tónh ke mũ vễ,” he ja nĩ, Pedro mỹ, ù ên to. Hã kỹ ti to: “ter ke tũ ti nĩ,” he tũg nĩ.

João tỹ vẽnh kãmén

24 João vĩ tỹ inh nĩ. Inh hã vĩ tag ve kãn ja nĩ, hã kỹ sóg rãn. Ki hã tó sóg tĩ, vẽnh kar vĩ tag ki kanhró nỹtĩ.

25 Hã ra sóg Jesus tỹ nén hyn han mũ ên rãn kãn ja tũ nĩ. Ti tỹ nén hyn han mũ ên vĩ e tãvĩ nỹtĩ, e tãvĩ. Êg tỹ tag rãn kãn sór mũ ra êg tóg livro tỹ hẽn ri ke hyn han ke mũ vễ. Kỹ êg hỹn hẽ tá livro kar tag vin han ke mũ? Sĩ ti nĩ, êg ga ti, kỹ êg tỹ hẽ tá livro tag vin han ke tóg tũ tĩnh mũ, êg tỹ Jesus tỹ nén hyn han ja ên rãn kãn sór mũ ra.

Hã vễ.

APÓSTOLO AG TỠ NĒN HAN KĀME

¹ Teófilo, inh livro ve ki sóg ã mỷ Jesus tỡ nén han kar tó ja nĩ, ti tỡ nén han vén mũ ên ti, ti tỡ nén han rén ên ti ke gé. Ti tỡ ẽg kanhrăn mũ ên rán sóg huri ke gé.

² Kỡ sóg ti tỡ kanhkã ra tãpry mũ rán huri ke gé. ã tỡ kanhkã ra tãpry to hã tóg apóstolo ag mré vēmén ja nĩ ver, ã tỡ ùn kuprẽg mũ ag mré. Topẽ kuprĩg tỡ ti mỷ nén tó mũ ên tó tóg mũ ag mỷ, ag tỡ ki hã han jé.

³ ã ter kar kỡ Jesus tóg ag mỷ vẽn ven tỡ hẽn ri ke han ja nĩ, kurã tỡ 40 (ke) ki. Rĩr mãn kỡ tóg ag mỷ vẽn ven ja nĩ, ti tỡ ùn kuprẽg ja ên ag mỷ. Ag tỡ ti ve kỡ, ag tỡ ti mré vēmén kỡ ag tóg ti rĩr jẽ ki kanhró nỹtĩ, apóstolo ag. Ag mỷ tóg Topẽ tỡ tỡ ẽg pã'i nĩ kãmén mũ, Jesus ti.

⁴ Kejẽn tóg ag mré nĩ nĩ. Kỡ tóg ag mỷ: “ver cidade tỡ Jerusalém tá kãpa tũg nĩ,” he mũ. “Tá nỹtĩ kỡ Topẽ tỡ ãjag mỷ nén tó ja jãvãnh nĩ,” he tóg, “isỹ ãjag mỷ nén tó ja ên ti,” he tóg.

⁵ “João vỹ goj tỡ ẽg kygpe ja nĩgtĩ,” he tóg. “Hã ra kãnhmar ãjag tóg Topẽ kuprĩg tỡ jagrẽ venh ke mũ. Sỹ ãjag kypenh ken hã vẽ,” he tóg, Jesus ti. Kỡ tóg tĩ mũ sir.

Jesus tỡ kanhkã ra tĩg

⁶ Kejẽn ag tóg vẽn mãn mãn mũ sir, Jesus tỡ ùn vin mũ ag. Kỡ tóg ag mré nĩ nĩ, Jesus ti. Kỡ ag tóg ti mỷ: “Senhor,” he mũ. “ã mỷ ù ri ẽg pã'i mág fẽg mãn mũ', ẽg povo tỡ Israel tỡ pã'i mág?” he ag tóg ti mỷ.

⁷ Hã ra tóg ag mỷ: “vó,” he mũ. “Topẽ hã ki kanhro nĩ,” he tóg. “ãjag tũ pijé’,” he tóg. “Kurã ên ki kanhrăn ke tũ ãjag tóg nĩ, Topẽ tỡ ãjag pã'i mág fẽg mãn ke kurã ti. Topẽ hã ne kurã tag tónh ke mũ,” he tóg.

⁸ “Hã ra Topẽ kuprĩg vỹ tỡ ãjag jagrẽ nĩnh ke mũ. Kỡ ti hã vỹ ãjag tar han ke mũ, ãjag tỡ inh kãmén jé. Cidade tỡ Jerusalém tá ãjag tóg inh kãmén ke mũ, ga tỡ Judéia tá ke gé, ga tỡ Samaria tá ke gé, ga fyn ja tá hã ke gé mỷr,” he tóg, Jesus ti.

⁹ ã tỡ tag tó kar kỡ tóg vãhã kynh mỷ tãpry mũ sir ag rĩnve, kỡ kanhkã góg vỹ ti kri rũm ke mũ sir, ti ve mãn tũ ag tóg nĩ sir.

¹⁰ Hã ra ag tóg kanhkã tugnỹm mũ, ag tỡ ti tĩg ven kỡ, ti tỡ ùn vin mũ ag.

Kỡ vãhã ùn régre ag tóg tá nỹtĩ, kur kupri rĩnh kỡ. Topẽ tỡ jẽnẽ jafã ag vẽ, ùn régre ên ag.

¹¹ Kỡ ag tóg ag mỷ: “ha vé, Galiléia tá ke’,” he mũ. “ãjag hã ne tóg kanhkã tá ẽvãnh nỹtĩ nĩ’,” he ag tóg. “Jesus vỹ vỹn kenh mũ, ti tĩg ja ên ri ke han jé tóg ke mũ. Ti tỡ kanhkã ra tãpry vẽ, hã ra tóg tá kãtère mãn ke mũ gé,” he ag tóg, Topẽ

tỹ jĕnĕ jafã ag, Jesus tỹ ũn vin mũ ag mỹ.

Ag tỹ Matias fĕg

12 Kỹ Jesus tỹ ũn vin mũ ag tóg vỹnvỹn ke mũ sir, Jerusalém ra, krĩ tỹ Oliveiras tá kãmũ kỹ. Jerusalém kakó kã ti nĩ, 1 quilômetro tá ti nĩ hỹn, krĩ tỹ Oliveiras ti.

13 Ag tỹ Jerusalém tá junjun kỹ ag tóg ĩn to jãpry jafã to jãpry mũ, tá nỹtĩ jé, ĩn kri. Ũ tỹ tá nỹtĩ ag hã vĕ: Pedro, João, Tiago, André, Filipe, Tomé, Bartolomeu, Mateus, Tiago ũ hã vỹ: Alfeu kósin, he mũ, Simão ke gé, vĩ tar han tĩ tag ti, Judas ke gé, Tiago kósin tag ti.

14 Ag kar ĕn tóg Topĕ mré vĩ mũ, jagnĕ mré, ũn tỹtã fag mré hã, Maria fi mré hã, Jesus mỹnh ĕn fi, Jesus jãvy ag mré hã ke gé, ha mĕ.

15 Kejĕn Jesus mré ke tỹ hĕn ri ke ag vỹ tá nỹtĩ nĩ, ĩn to jãpry jafã ĕn tá, ũ tỹ 100 kri 20 (ke) hỹn.

16 Kỹ Pedro vỹ tóg jĕg nĕ mũ, kỹ tóg: “ha vé, inh kanhkã!,” he mũ. “Vãšỹ tóg rán kỹ nĩ, Judas to,” he tóg. “Topĕ kuprĩg tóg Davi krĩn ja nĩgtĩ, ti tỹ Judas to rán jé,” he tóg. “Hã ra tóg ki hã tó ja nĩ, vĕnh rán ki,” he tóg. “Ag jãmĩ tóg kãtĩg ja nĩ, Judas ti, ũ tỹ Jesus kãgmĩnh ke mũ ag jãmĩ.

17 Hã ra tóg tỹ ĕg mré ke ja nĩ, kỹ ti tỹ nĕn han mũ tóg ĕg tỹ nĕn han mũ ri ke ja nĩ gé,” he tóg, Pedro ti.

18 “Hã ra tóg Jesus kato jãnkamy mãn ja nĩ, kỹ tóg jãnkamy ĕn tỹ ĕpỹ kajãm ja

nĩgtĩ. Hã ra tóg ã nunh kã vĕnh jãján ja nĩ, kỹ tóg tam ke kỹ kutĕ ja nĩ, kỹ ti nug tóg jar ja nĩ, kỹ ti nug tóg kãkutĕ ja nĩ, kỹ tóg ter ja nĩ, Judas ti,” he tóg, Pedro ti.

19 “Kỹ Jerusalém tá ke kar ag tóg mĕg mũ sir, hã kỹ ag tóg ti japy to: Aceldama, he mũ, hã vỹ: ĕpỹ kyvénh, he mũ, ĕg vĩ ki,” he tóg, Pedro ti.

20 “Ĕg tỹ Topĕ mỹ jãn jãn jafã ki tag tóg rán kỹ nĩ, hã mĕ: ĕn jamã vỹ vag ke mũ, ũ pi(jé) ki ĕmãn mãn mũ’, he tóg, vĕnh rán ki, Judas to,” he tóg, Pedro ti. “Kỹ ũ vỹ ge nĩ gé, hã mĕ: ũ ũ tỹ ti jĕg ja kã jĕnh ke kỹ ti rãnrãj han ke vé, he tóg mũ gé, vĕnh rán ki,” he tóg, Pedro ti.

21 “Hã kỹ ĕg tỹ ĕg mré mũ tĩ ũ jãvãnh ke vé. Jesus mré tóg tĩg ja nĩgtĩ, ĕg tỹ ũn jãvãnh ke mũ ti, kỹ tóg Jesus tỹ ga mĩ tĩ ĕn ve ja nĩgtĩ gé.

22 João tỹ Jesus kype ve ja tóg nĩ gé. Jesus tỹ kanhkã ra tãpry ve ja tóg nĩ gé. Jesus tỹ nĕn han mũ kar ve ja tóg nĩ, ĕg tỹ ũn jãvãnh ke mũ ti. Kỹ tóg sir Jesus rĩr mãn tónh ke mũ ĕg mré,” he tóg, Pedro ti.

23 Kỹ ag tóg ũn régre ag vin mũ, hã vỹ: José, he mũ, ti jyjy ũ hã vỹ: Barsabás, he mũ. Fóg tỹ ti jiji hã vỹ: Justo, he mũ. Tĩ mré ag tóg Matias fĕg mũ gé.

24 Kỹ ag tóg Topĕ mré vĩ mũ, kỹ ag tóg tag tó mũ, ha mĕ. “Ĕg jóg!,” he ag tóg ti mỹ. “Ĕg tỹ nĕn to jykrĕn mũ ki kanhró ã tóg nĩ,” he ag tóg mũ. “Ã hỹn ũ tỹ hĕ kuprĕg, ũn régre tag ag kã,

²⁵ ti tỹ ěg mré ã rãnrãj tag han jé, ti tỹ tỹ ěg mré apóstolo jě jé? Judas vỹ ã rãnrãj tovãnh, kỹ tóg ã tỹ ra tĩg ke ěn ra vyr. Kỹ ũ tỹ hẽ nỹ ti jěg ja kã jẽnh mũ ha?" he ag tóg mũ, Topẽ mỹ.

²⁶ Kỹ ag tóg to jogar he mũ sir, hã ra Matias tóg Judas jěgja kã jě nĩ. Hã kỹ tóg tỹ ũ tỹ 11 (ke) ag mré ke nĩ sir, tỹ tóg apóstolo jě sir.

2

Topẽ kuprĩg tỹ tỹ ěg jagrẽ

¹ Vãhã tóg festa tỹ Pentecostes kurã tá krỹg mũ. Kỹ vẽnh kar vỹ vẽnh mãn kỹ nỹtĩ nĩ, Jesus ki ge kỹ nỹtĩ kar ěn ag.

² Kỹ vãhã kanhkã tá kóho ri ke tóg mẽ há tĩ, króg he mũ ěn ti. Kỹ ĩn tóg kóho ri ke ěn tỹ fór mũ. Hã ra ag tóg ĩn ěn ki nỹtĩ, Jesus ki ge kỹ nỹtĩ ag.

³ Kỹ ag tóg nén nẽ vég mũ, hã ra tóg tỹ pĩ gru hã pẽ nĩ, nén nẽ ěn ti. Vẽnh kãpópãm kỹ tóg nĩ nĩ, pĩ gru hã pẽ ěn ti. Kỹ tóg ag kri nĩ' nĩ' he kãn mũ, pĩ gru hã pẽ ěn ti.

⁴ Kỹ Topẽ kuprĩg tóg ag ki ge kãn mũ, kỹ ag tóg vẽnh vỹ ũ tugtó mũ, Topẽ kuprĩg tỹ ag krĩn kỹ, ti tỹ tỹ ag jagrẽ nĩn kỹ.

⁵ Hã ra Jerusalém tá ke ũ ag tóg Topẽ to há nỹtĩ gé. Israel ag vẽ gé, hã ra ag tóg povo tỹ hẽn ri ke mũ mogmog ja nĩ. Hã kỹ ag vỹ tóg tó tỹ hẽn ri ke nĩ.

⁶ Ag tỹ kóho ri ke ěn mẽ kỹ ag tóg vẽnh mãn mũ. Kỹ ag tóg ãjag vỹ e ěn ki Pedro ag tỹ nén tó mũ mẽg mũ.

⁷ Kỹ tóg ag mỹ e tĩ. Ag fe tỹ hẽn ri ke nĩn kỹ ag tóg: "ha vé, Galiléia tá ke ag vỹ mỹr," he mũ. "Galiléia tá ke ag vỹ vyr mỹ vỹ nỹtĩ.

⁸ Hã ra ěg tóg ěg vỹ pẽ ki ag vỹ jẽmẽg mũ," he ag tóg.

⁹ "Ěg kã ũ ag tóg Pártia tá kãmũ mũ, kỹ ũ ag tóg Média tá kãmũ mũ gé, ũ ag tóg ga tỹ Elão tá kãmũ mũ, ũ ag tóg ga tỹ Mesopotãmia tá kãmũ mũ, ũ ag tóg Judéia tá kãmũ mũ, ũ ag tóg Capadócia tá kãmũ mũ, kar kỹ Ponto tá, Ásia tá,

¹⁰ Frígia tá, Panfília tá, Egito tá, ga tỹ Líbia tá, cidade tỹ Cirene ěn mã tá. ũ ag tóg cidade tỹ Roma tá kãmũ mũ gé.

¹¹ ũ ag tóg tỹ Israel nỹtĩ, kar kỹ ũ ag tóg tỹ fóg tỹ Israel jykre han mũ nỹtĩ gé. ũ ag tóg goj vãso tỹ Creta tá kãmũ mũ, ũ ag tóg ga tỹ Arábia tá kãmũ mũ gé. Ěg kar tóg ěg vỹ pẽ ki ag tỹ Topẽ kãmén mũ mẽg mũ, ag tỹ Topẽ tỹ nén han ja kãmén mũ ti, Topẽ tỹ milagre hyn han ja ěn ti," he ag tóg.

¹² Ājag mỹ e tĩn kỹ ag tóg jagnẽ mỹ: "ne nẽ hỹn'?" he mũ. Ag fe tóg jũrũn ke mũ, ag tỹ ge ve ja tũ nỹtĩn kỹ.

¹³ ũ ag tóg hã ra nyg mũ. "Kronkron kỹ ag kãgter mũ mỹr," he ag tóg.

Pedro tỹ ag mỹ Topẽ vỹ tó

¹⁴ Kỹ Pedro tóg ũ tỹ 11 (ke) ag mré jěgnẽ mũ, kỹ tóg jamã hár(a) ag mỹ: "inh kanhkã'," he mũ. "Jerusalém tá ke'," he tóg. "Jẽmẽ há han ra, sỹ ãjag mỹ nén tó mũ ti," he tóg.

15 “Ājag hã tóg ěg to: kronkron kŷ ag kãgter mũ, he mũ. Hã tũ vễ hã ra. 9 horas vễ ver, meio dia to hãn sa mŷr,” he tóg. “Ag kronkron kŷ ag tóg rãkãnh kŷ kronkron kŷ kãgter mũgtĩ, ùn kronkron mũ ěn ag,” he tóg. “Hã kŷ ěg tóg kron ja tũ nĩ,” he tóg, Pedro ti.

16 “Hã ra tóg vãsŷ rãn kŷ nĩ, ěg tŷ ùri nén vэг mũ ti. Topẽ vĩ tó tĩ tŷ Joel tóg vãsŷ tag tó ja nĩ, ha mẽ:

17 “kurã tŷ ěgno to hã sóg inh kuprĩg jĕnĕnh mũ, vĕnh kar mŷ, ti tŷ tŷ Ājag jagrĕ nĩ jé,” he ja tóg nĩ, Topẽ ti. “Kŷ Ājag krĕ ag tŷ fag mrĕ Topẽ vĩ mẽ kŷ tónh ke vĕ. Kyrũ ag tŷ nén nĕ venh ke vĕ. Kófa ag tŷ vĕnh pétinh ke vĕ.

18 Sŷ inh camarada ag mŷ inh kuprĩg jĕnĕnh ke vĕ gé, fag mŷ ke gé. Kŷ fag tóg inh vĩ tónh ke mũ gé,” he tóg, Topẽ ti.

19 “Ājag tŷ nén han vãnh han jé sóg ke mũ gé, Ājag mŷ, kanhkã tá, ga tá ke gé, ěprã, kyvĕnh mŷr, pĩ mŷr, nĩja mŷr.

20 Kŷ rã tŷ kutyg ke vĕ, kysã kyvĕnh ke vĕ gé. Kar kŷ Topẽ kurã vĕ sir, kurã mág ěn ti.

21 Kŷ ù tŷ Topẽ mŷ nén kar to vĩ mũ ěn kren ke vĕ sir,” he tóg, Topẽ ti. Joel tŷ tón hã vĕ, vãsŷ,” he tóg, Pedro ti.

22 “Inh kanhkã', inh vĩ jĕmĕ ra,” he tóg. “Nazaré tá Jesus vĕ mŷr,” he tóg. “Ti hã tóg nén han vãnh hyn han ja nĩgtĩ, Topẽ jykre hyn han ja tóg nĩgtĩ, Topẽ tŷ ti jĕnĕnh kŷ. Hã ra Topẽ tóg Jesus mŷ tó ja nĩ, ti tŷ milagre ěn hyn han jé. Kŷ tóg Ājag rĩnve hyn han, Ājag

tŷ ve jé, Jesus to jykrén jé. Hã kŷ Ājag tóg vé,” he tóg, Pedro ti.

23 “Hã ra Topẽ tóg Ājag mŷ ti fĕg sór ja nĩ, Jesus ti. Kŷ tóg to jykrén kŷ Ājag mŷ ti fĕg ja nĩ. Jãvo Ājag tóg ka to ti sa ja nĩ, ti tén ja Ājag tóg nĩ. Kŷ ù tŷ ka to ti sãg mũ ěn ag jykre vŷ pãno tãvĩ nĩ.

24 Hã ra Topẽ tóg ti rĩn mãn ja nĩ, hã kŷ tóg vĕser jagĕgtar ěn tŷ tũ' he ja nĩ ti mŷ. Hã kŷ tóg vĕser jamã tá nĩg mág ja tũ nĩ, Jesus ti,” he tóg, Pedro ti.

25 “Hã kŷ Davi tóg Jesus jo tag tó ja nĩ, kŷ tóg Jesus tŷ Ā jóg mrĕ vĩ ri ke nĩ. Ti to tóg: “ěg jóg’,” he ja nĩ. “Ā vэг isóg nĩ nĩ,” he ja tóg nĩ. “Inh pĕgja tá Ā tóg nĩ nĩ, hã kŷ sóg krónh ke tũ nĩ,” he ja tóg nĩ, Davi ti.

26 “Hã kŷ inh fe tóg mrin ke mũ. Vĩ sér han isóg nĩ nĩ. Iser kŷ inh fár tóg nŷnh ke mũ, hã ra sóg to krĩ kufy tũ nĩ.

27 Inh kuprĩg vŷ vĕnh kuprĩg jamã tá nĩnh ke tũ nĩ. Inh fár vŷ vag ke tũ nĩ gé, sŷ tŷ Ā tŷ kuprĕg ja nĩn kŷ,” he ja tóg nĩ, Davi ti, Topẽ mŷ.

28 “Inh kanhrãn Ā tóg nĩ nĩ, isŷ kanhkã to ěpry ěn ve há han jé, kanhkã to ěmĩn ěn ti. Isŷ Ā mrĕ nĩn kŷ tóg inh mŷ sér tãvĩ tĩ,” he ja tóg nĩ. Davi tŷ Jesus tón hã vĕ,” he tóg, Pedro ti.

29 “Inh kanhkã’,” he tóg. “Ēg jóg'jóg tŷ Davi kãmén há han jé sóg ke mũ Ājag mŷ,” he tóg. “Vãsŷ ti ter mŷr, kŷ ag tóg vĕnh kej tá ti péju, hã ra ěg tóg vэг tĩ, ti kej ti, Davi kej ti,” he tóg.

30 “Ā tŷ ga mũ tĩg kŷ tóg hã ra Topẽ vĩ tó tĩ ja nĩgtĩ, Davi ti.

Topē tóg ti mý: “ã krē'krē ag kã ù vỹ tỹ pã'i tỹ rei nĩnh mũ,” he ja nĩgtĩ, Topē ti.

31 Topē vỹ tag kri fi kỹ tóg Cristo rĩr mãn ke tó ja nĩgtĩ gé, Davi ti. Hã kỹ tóg ã vỹ ên tó ja nĩgtĩ. Cristo pi(jé) vëser jamã tá nĩg mág han', kỹ ti fár vỹ vag ja tũ nĩ gé,” he tóg, Pedro ti.

32 “Cristo vë, hã vỹ: Jesus, he mũ. Topē vỹ ti rĩn mãn, kỹ êg kar tóg ti ve ja nĩgtĩ,” he tóg.

33 “Topē tóg ti mý: “kunĩg, inh pëgja tá nĩ,” he ja nĩ, Jesus ti mý. Kỹ êg jóg tóg ti mý ã tỹ êg mý nén tó ja fëg, hã vỹ: Topē kuprĩg, he mũ. Hã kỹ tóg êg mý tỹ jagrë han mũ, Topē kuprĩg tỹ, Jesus ti. Hã kỹ ãjag tóg ùri tag vég mũ, tag mëg mũ,” he tóg, Pedro ti.

34 “Davi hã tóg rĩr mãn ja tũ nĩ ver, kanhkã ra tóg tãpry ja tũ nĩ ver, ge ra tóg tag tó ja nĩ, ha mẽ: “êg jóg mág vỹ inh Senhor mý tag tó ja nĩ, hã vỹ: “nĩ ra ver, inh pëgja tá,” he ja tóg nĩ,

35 “sỹ ã kato vãsãnsãn mũ ag tỹ ã jakrëm vin jé, ag sigse jé,” he ja tóg nĩ. Davi tỹ tón hã vë,” he tóg, Pedro ti.

36 “Jesus tag hã vỹ, ãjag tỹ ka to ùn sãg mũ tag hã vỹ: tỹ êg Senhor nĩ, he mũ,” he tóg. “Topē vỹ ti to: “tỹ tóg Cristo nĩ,” he mũ. “Tỹ tóg vënh kar Senhor nĩ,” he tóg. Êg tỹ vënh vỹ tag kri finh ke vë. Êg povo tỹ Israel tỹ ti ki kanhrãn ke vë, êg vỹ tag kri nĩm ke vë,” he tóg, Pedro ti, ù tỹ vënh mãn kỹ nỹtĩ kar ag mý.

37 Ag tỹ ti vỹ jëmë kỹ ti jykre tóg ag kãra rã mũ sir. Kỹ ag tóg ti mý: “kỹ êg hỹn hë ri kenh mũ, vỹ?” he mũ, Jesus tỹ ùn vin mũ kar ag mý ke gé.

38 Kỹ Pedro tóg ag mý: “ãjag jykre tovãnh ra,” he mũ. “Kỹ êg tóg ãjag kygpenh ke mũ, Jesus Cristo jiji tó kỹ,” he tóg. “Kỹ Topē tóg ãjag mý ãjag tỹ ti vỹ mranh ja ên tỹ vënh pãte fón ke mũ. Kỹ ãjag tóg Topē kuprĩg tỹ jagrë nỹtĩnh mũ gé, Topē tỹ ãjag mý ti jënën kỹ.

39 Ti tỹ ãjag hã mý ti nĩm ke vë inhhã, ãjag krë mré hã ke gé. Ti tỹ ùn mý vënh vỹ jënëg mũ kar ag mý tóg nĩm tĩ, Topē ti, êg jóg mág ti, ag tỹ ver kuvar há tá mũ hã ra,” he tóg, Pedro ti.

40 Vỹ tỹ hën ri ke han tóg, Jesus kãmén kỹ. Ag jyvën tóg mũ gé, kỹ tóg ag mý: “Jesus mý: “inh kren han nĩ,” hemnĩ,” he mũ. “Êg kar vỹ vënh jykre pãno han kãn, ã jykre han vãnh nỹtĩn kỹ. Kỹ inh kren han nĩ, hemnĩ, Jesus mý,” he tóg, Pedro ti.

41 Û tỹ ti vỹ han mũ ag kygpég ag tóg mũ sir. Kurã ên kã ùn kygpe kỹ nỹtĩ ag vỹ tỹ ù tỹ 3 mil nỹtĩ hỹn, hën ri ke mũn.

42 Ên ag vỹ kurã kar ki Jesus tỹ ùn vin mũ ag vỹ jëmë jé vënh mãn tĩ, jagnë ve jé ke gé. Kỹ ag tóg Jesus jamĩ ko mũ sir. Kỹ ag tóg ti mré vỹ mũ gé, kurã kar ki.

Jesus ki ge mũ ag jykre ti

43 Kỹ Jesus tỹ ùn vin mũ ag tóg êg tỹ nén han vãnh tỹ hën

ri ke han tĩ nỹtĩgtĩ. Hã kỹ vẽn
kar tóg Topẽ kamẽg tĩ.

44 Jãvo ù tỹ Jesus ki ge kỹ
nỹtĩ ag tóg jagnẽ mré vẽn
jykre pir han mũgtĩ. Kỹ ag
kuge vỹ jagnẽ tũ ri ke nỹtĩ.

45 Û ag tóg ãjag kuge ù
vãvãm mũ gé, jãnkamy kato,
kỹ ag tóg ùn jãnkamy tũ ag mỹ
vẽn kãpópãm mũ.

46 Kurã kar ki ag kar tóg
Topẽ jo ãn ra mũ tĩ, ag tỹ ti mré
vĩ jé. ãjag ãn kãki ag tóg Jesus
jamĩ ko mũgtĩ gé. Jatun mỹ ag
tóg sir jẽgjẽg mũ. Kỹ tóg ag mỹ
sér tĩ sir.

47 Kỹ ag tóg Topẽ mỹ: “há
ti nĩ,” he ti gé. Jó vẽn kar
tóg ag to há nỹtĩ gé. Kỹ Topẽ
tóg kurã kar ki ù ag mỹ krĩ há
nĩm tĩ gé, kỹ ag tóg ti ki ge mũ,
ag krenkren jé. Hã kỹ ag tóg
komẽr hã e nỹtĩ.

3

Ûn grĩ tỹ há' he

1 Kejẽn Pedro tóg João mré
Topẽ jo ãn ra mũ mũ, meio dia
pãte 3 horas ki. Israel ag tỹ
Topẽ mré vĩ jafã vẽn, hã vỹ: 3
horas, he mũ.

2 Topẽ jo ãn tá ù tóg nĩ nĩ, ùn
grĩ. ã mũr mũ kã tóg ge nĩ.
Topẽ jo ãn jãnkã tá tóg nĩ nĩ,
jãnkã sĩnvĩ he mũ ãn tá. Tá tóg:
“inh mỹ nẽn ù nĩm,” he nĩgtĩ, ù
tỹ Topẽ jo ãn kãra ge mũ ag mỹ.

Ën va ag tóg kãmũ mũ, jãnkã
tá ti nĩm jé. Kỹ João mré Pedro
tóg Topẽ jo ãn tá junjun mũ.

3 Ûn grĩ tỹ Pedro ag ve kỹ tóg
ag mỹ nẽn ù to vĩ mũ.

4 Kỹ Pedro ag tóg ti tugnỹm
mũ. Kỹ Pedro tóg ti mỹ: “ẽg ki
ẽvãnh ra,” he mũ.

5 Kỹ tóg ag ki ẽvãnh mũ. “Ag
hỹn inh mỹ jãnkamy nĩm ke
mũ,” he tóg.

6 Hã ra Pedro tóg ti mỹ:
“jãnkamy tóg inh mỹ tũ tũ,” he
mũ. “Sỹ nẽn ma tĩ hã tỹ sóg
ã mỹ nĩm mũ, hã vỹ: Jesus
Cristo jyjy hã tóg kỹ, Nazaré tá
ke ẽn jiji tóg kỹ sóg ã mỹ: ha jẽg,
he mũ, ha mĩ tĩg, he sóg ã mỹ,”
he tóg, Pedro ti, ùn grĩ mỹ.

7 Kỹ tóg ti pẽgia tá ti kãgmĩ
kỹ ti fẽg mũ.

Kỹ vãhã ti pẽn tóg tar' he mũ
sir, ti pẽn nãgnãn ti.

8 Hũm hen kỹ tóg jẽ nĩ sir.
Jẽg há' he tóg mũ sir. Mĩ tóg
tĩ mũ sir. Ag mré tóg Topẽ jo
ãn kãra rã mũ sir. Tá tóg mĩ tĩ
kỹ hũm hũm he mũ. Topẽ mỹ
tóg vĩ há han mũ sir.

9 Kỹ vẽn kar tóg ti vэг mũ,
ti tỹ mĩ tĩg kỹ, ti tỹ Topẽ mỹ vĩ
há han kỹ.

10 Ag tỹ ti ve kỹ ag tóg ti ki
kanhró nỹtĩ. “Topẽ jo ãn jãnkã
tá nĩ ẽn hã vẽn mỹr,” he ag tóg
mũ. “Jãnkã sĩnvĩ he mũ ẽn tá
nĩ mũn hã vẽn mỹr,” he ag tóg
mũ. “Vẽn kar mỹ: inh mỹ
nĩm, he tĩ ẽn hã vẽn mỹr,” he ag
tóg ti to. Kỹ tóg ag mỹ e tĩ sir.
Ag fe tóg jũrũn ke mũ sir, ag tỹ
ti ven kỹ.

*Pedro tỹ Topẽ jykre kãmén
mũ*

11 Hã ra tóg Pedro mré João
mré tĩ mũ, ùn grĩ ja ẽn ti. Hã
kỹ vẽn kar tóg ag to vẽn
mãn mũ, Topẽ jo ãn krẽm, pã'i
tỹ Salomão he mũ ẽn sala tá.
Vẽn kar ag mỹ tóg e tĩ, ùn grĩ
ẽn tỹ há' hen kỹ.

12 ã tỹ ùn e ẽn ag ve kỹ Pe-
dro tóg ag mỹ: “inh kãnhkã',”

he mū. “Ājag fe hā ne tóg jūrūn ke mū,” he tóg. “Ēg tỹ vėsóg ki ti tỹ há' he tū vē. Topē tỹ ti tỹ tīg há' he vē mỹr. Ēg tỹ vēnh jykre kuryj han mū ra ěg tóg ge han ki kagtīg nỹtĩ vē,” he tóg, Pedro ti, ũn e ěn ag mỹ.

13 “Ēg jóg'jóg ve ag vỹ Topē to há ja nỹtĩgtĩ, Abraão ti, Isaque ti, Jacó ti ke gé. Topē ěn vē mỹr, ũ tỹ ti tỹ há' he mū ti,” he tóg. “Topē ěn vỹ ā kósin tỹ ũn mág han. Ti kósin hā vē, hā vỹ: Jesus, he mū. Hā ra ājag tóg fóg ag mỹ ti fēg ja nĩgtĩ. Fóg tỹ pā'i tỹ Pilatos vỹ: “ti kavān jé sóg ke mū,” he mū vē. Hā ra ājag tóg ti mỹ: “nejé,” he ja nĩgtĩ.

14 ũ tỹ vēnh jykre kuryj han mū to ājag tóg: “nejé,” he ja nĩgtĩ, Topē tỹ ũn kuprēg mū ěn to, Jesus ěn to. Hā ra ājag tóg ũ tỹ ũn tén mū to: “ti kyvān ra,” he ja nĩgtĩ.

15 ũ tỹ ěg rĩnrĩr han tĩ ěn tén ja ājag tóg nĩgtĩ mỹr. Topē tóg hā ra ti rĩn mān ja nĩ, ti ter mū hā ra, kỹ ěg tóg ti ve ja nĩgtĩ,” he tóg, Pedro ti, ũn e ěn ag mỹ.

16 “Kỹ ěg tóg Jesus ki ge mū. Hā kỹ Jesus tóg ũn grĩ ja tag tỹ tar' he mū, ājag tỹ ũn vėg mū tag ti, ājag tỹ ũn ki kanhrān mū tag ti. Jesus vỹ ti tỹ ā ki rā han. Kỹ ti tỹ Jesus ki rā kỹ tóg há' he mū sir, ājag rĩnve,” he tóg, Pedro ti.

17 “Inh kanhkā,” he tóg. “Ājag tỹ ki kagtīg nỹtĩn kỹ, hā kỹ ājag tóg Jesus tén ja nĩgtĩ. Hā kỹ ājag pā'i ag tóg ti tén ja nĩgtĩ,” he tóg.

18 “Hā kỹ Topē tóg vāsỹ rán

kỹ nĩ ěn han. Topē vĩ tó tĩ ag kar tóg vāsỹ Jesus jagtar ke ti tó ja nĩgtĩ, Topē tỹ ag mỹ: ha tó, hen kỹ. “Topē tỹ ũn jēnēg mū ěn tỹ jagtar ke vē, Cristo ti,” he ja ag tóg nĩgtĩ, Topē vĩ tó tĩ ag,” he tóg, Pedro ti.

19 “Kỹ ājag jykre tovānh nĩ. Topē jykre ki gemnĩ, Topē tỹ ājag tỹ ti vĩ mranh tỹ tũ' he jé.

20 Hā kỹ ājag tóg tỹ Topē mré ke nỹtĩ, kỹ tóg ājag krĩ tỹ kānhvy' henh ke mū, Topē ti. Kar kỹ tóg ājag mỹ ti jēnē mān mū gé, ti tỹ ājag mỹ ũn jēnēnh ke ěn ti, Cristo ti, hā vỹ: Jesus, he mū,” he tóg, Pedro ti.

21 “Ti tỹ kanhkā tá nĩ vē ver. Ti tỹ ā kurā pétēm kỹ tóg vāhā tá vỹn kenh mū, Topē tỹ nén kar han mān ke kurā ěn kā,” he tóg.

“Hā kỹ Topē tóg vāsỹ ā vĩ tó tĩ ag mỹ tó ja nĩgtĩ, ag tỹ vēnh kar mỹ ti vĩ tó jé, ti tũ ag kar mỹ.

22 Hā kỹ Moisés vỹ tag tó ja nĩ, ha mē: “Topē vỹ ājag mỹ ā vĩ tó tĩ ũ jēnēnh ke mū, ājag mré ke ũ, ti tỹ ājag mỹ Topē vĩ tó jé, inh ri kén. Ēn ti vĩ jēmēmnĩ,” he ja tóg nĩgtĩ, Moisés ti,” he tóg, Pedro ti.

23 “Ū tỹ ti vĩ jēmē jāvānh ěn ter ke vē,” he ja tóg nĩgtĩ, “ěn pi(jé) tỹ Topē tũ nĩ,” he ja tóg nĩgtĩ, Moisés ti,” he tóg, Pedro ti.

24 “Topē vĩ tó tĩ ag kar vỹ tó ja nĩgtĩ, ěg tỹ ũri vėg mū tag ti. Samuel vỹ tag tó vén ja nĩgtĩ, kar ti nón ke ag kar tóg tag tó ja nĩ gé vāhā,” he tóg, Pedro ti.

25 “Topē vĩ tó tĩ ěn krē vỹ tỹ ājag nỹtĩ,” he tóg. “Ājag jóg'jóg

ve ag hã mré tóg jykrén ja nĩgtĩ, Topẽ ti, Abraão hã mré. Hã ky tóg Abraão mĩ: “ã kósín ũ hã tũgrĩn sóg vẽnĥ kar to há nĩnh mũ,” he ja nĩgtĩ, Topẽ ti,” he tóg, Pedro ti.

²⁶ “Ājag hã mĩ tóg ã kósín jẽnẽ, ti rĩn mãn ky, Topẽ ti. Ājag hã mĩ tóg tó vén, ājag tỹ tỹ Israel nỹtĩn ky. Ājag hã mĩ tóg tó, ājag tỹ ājag jykre pãno tovãnh jé. Ti tỹ ājag krĩn sór vẽ, ājag tỹ tovãnh jé, ājag jykre pãno ẽn ti,” he tóg, Pedro ti, ũ tỹ Topẽ jo ĩn krẽm vẽnĥ mãn ky nỹtĩ ẽn ag mĩ.

4

Pã'i ag tỹ Pedro mré João to jũ

¹ Ag tỹ ver vẽnén ky nỹtĩ ra Topẽ tũ ki rĩr tĩ ag tóg tá jun-jun mũ. Topẽ jo ĩn to capitão vỹ ag mré tá jun mũ gé, Sادuceu ag ke gé, ũ tỹ: “ẽg hỹn rĩnrĩr mãn ke tũ nĩ ha, ẽg ter kar ky,” he mũ ẽn ag.

² Pedro ag to ag tóg jũgũ mũ, ag tỹ: “Jesus vỹ rĩr mãn,” hen ky. “Kỹ ẽg tóg ti ri kén rĩr mãn mũ gé, ẽg ter ky,” he ag tóg, Pedro ag. Hã ky pã'i ag tóg ag to jũgũ mũ.

³ Hã ky ag tóg Pedro ag sigség mũ, vese jafã kãtá ag tóg ag vãm mũ, ag tỹ kãtá nũgnũr pir han jé. Rãké ti nỹ ha, hã ky ag tóg: “ha ver kãtá nũgnũr,” he mũ.

⁴ Hã ra ũ tỹ hẽn ri ke ag tóg Pedro ag vĩ mẽ ja nĩgtĩ, ky ag tóg sir ti vĩ kri fig mũ. ũ tỹ 5 mĩl (ke) ag vẽ, Jesus ki ge ky nỹtĩ ag, ẽg tỹ ũn tỹtá fag mré tó tũ hã ra.

⁵ Tỹ vaj ky pã'i ag tóg vẽnĥ mãn mũ, kófa ag mré hã, Topẽ vĩ to professor ag mré hã. Jerusalém tá ag tóg vẽnĥ mãn mũ.

⁶ Topẽ tũ ki rĩr tĩ to pã'i mág jyjy hã vỹ: Anás, he mũ. Ag pã'i mág ũ jijin hã vỹ: Caifás, he mũ. Pã'i mág kanhkã ũ jyjy hã vỹ: João, he mũ, ky ũ jijin hã vỹ: Alexandre, he mũ. Pã'i mág mré ke kar ag vỹ tá vẽnĥ mãn ky nỹtĩ.

⁷ Vẽnĥ kju ki ag tóg Pedro ag vin mũ, ky ag tóg: “ũ nỹ ājag mĩ vẽnĥ jykre tag nĩm, ājag tỹ ũn grĩ ẽn tỹ há' he jé?” he mũ. “Ũ jykre tỹ ājag ti tỹ há' hé?” he ag tóg mũ, Pedro ag mĩ.

⁸ Kĩ vãhã Topẽ kuprĩg tóg Pedro krĩn mũ. Kĩ tóg: “ha vé,” he mũ.

⁹ “Nén ũ há to ājag tóg ẽg kugmĩg mũ, ẽg tỹ ũn grĩ tỹ há' he mũ ẽn to,” he tóg. “Kỹ ājag tóg vãhã ẽg jykre jẽmẽ sór mũ ha,” he tóg.

¹⁰ “Ājag mĩ sóg ẽg jykre tónĥ mũ, Israel kar tỹ ki kanhró nỹtĩ jé,” he tóg. “Jesus tũgrĩn tóg há' hé, Nazaré tá ke ẽn tũgrĩn tóg tar jẽ nĩ, ājag tỹ ũ tỹ ka to sãg mũ ẽn hã tũgrĩn. Topẽ tóg ti rĩn mãn ja nĩ, ũ tỹ cruz to ter mũ ẽn ti. ẽn vỹ ti tỹ há' hé, ũn grĩ ja ẽn ti,” he tóg, Pedro ti.

¹¹ “Jesus ẽn hã to tag tóg rán ky nĩ, Topẽ vĩ tỹ rán ky nĩ ẽn ki, ha mẽ: ājag tỹ pó tỹ ĩn han ky ājag tóg pó ũ fón, ti tỹ ājag mĩ kórég nĩn ky. Hã ra Topẽ tóg pó ẽn hã tỹ ĩn nũna han mũ,” he ja tóg nĩ, Topẽ vĩ ki,

Jesus to," he tóg, Pedro ti.

12 "Ū pi(jé) ěg kren han ke mũ'. Topê tóg Jesus fĕg inhã, ti hã tỹ ěg kren han jé, ti hã tỹ ěprã ke ag krenkren han kãn jé, kanhkã krĕm ke kar ěn ag. Ěg kren han ke mũ ũ venh ke tũ ěg nĩ mỹr," he tóg, Pedro ti, pã'i ag mỹ.

13 Pã'i ag tỹ Pedro vĩ mẽ kỹ tóg ag mỹ e ti. "Ěg kamĕg tũ ag tóg nĩgtĩ mỹr," he ag tóg, Pedro to, João to ke gé. "Vĕnh rán sĩ ag nỹtĩ vĕ mỹr, escola ki ge mág ja tũ ag nỹtĩ vĕ," he ag tóg. To jykrĕn kỹ ag tóg ag ki kanhró nỹtĩ. "Jesus mré ke ag vĕ," he ag tóg mũ, Pedro ag to. Kỹ tóg ag mỹ e ti.

14 Hã ra ũn grĩ ja tóg tá jĕ ag mré. Kỹ ag tỹ ne tỹ ag kato vĩnh ke tóg tũ tĩ sir.

15 Kỹ ag tóg Pedro ag mỹ: "ha ver kãpa jĕg," he mũ. Kỹ pã'i ěn ag tóg ver jagnĕ mré to jykrĕn mũ.

16 Kỹ ag tóg: "Ěg hỹn ag tỹ hĕ ri kenh mũ ha?" he mũ. "Jerusalém tá ke kar vĩ ag tỹ nĕn han mũ ki kanhró kar nỹtĩ. Kỹ ag jykre tóg vĕnh kar mỹ há nỹ. Kỹ ěg tỹ ag to: ag ón vĕ, hen kỹ tóg tỹ ũn nỹ sir," he ag tóg jagnĕ mỹ.

17 "Ag tỹ hã ra vĕnh kar mỹ Jesus tó kỹ tóg tỹ ũ nỹ gé," he ag tóg. "Kỹ ěg tỹ ag mỹ: ha tó mãn tũg, henh ke vĕ," he ag tóg. "Ājag tỹ ti tó mãn kỹ ěg tóg ājag vóg kónãn ke mũ ha, he jĕ ěg tóg ke mũ ag mỹ," he ag tóg jagnĕ mỹ.

18 Kỹ ag tóg Pedro ag jé prĕr mãn mũ. Kỹ ag tóg: "Ker ũ mỹ tó mãn hĕ," he mũ. "Ker Jesus

tỹ vĩ mãn hĕ," he ag tóg mũ ag mỹ.

19 Hã ra Pedro tóg João mré ag mỹ ke mũ. "Topê tóg ěg mỹ: "ha vĕnh kar mỹ tó," he ja nĩ. Ājag tóg hã ra: "ker tó hĕ," he mũ. Ěg hỹn ũ tỹ hĕ vĩ han mũ', Topê vĩ vó, ājag vĩ vó?" he tóg ag mỹ. "Ne nỹ hỹn Topê mỹ há nĩnh mũ?" he tóg. "Ěg mỹ tó," he tóg.

20 "Ěg pi(jé) tó tũg mũ', ěg tỹ nĕn vĕg mũ ti, Jesus tỹ ěg mỹ nĕn tó ja ěn ti," he tóg ag mỹ, Pedro ti.

21 Hã ra pã'i ag tóg: "ker tó hĕ', ker tó hĕ'," he mãn mũ gé. Kỹ ag tóg ag kygvãg mũ sir. Ājag tỹ ag vóg kónãn há ra ag tóg ag vóg kónãn tũ nĩ, vĕnh kar tỹ ag to há nỹtĩn kỹ, vĕnh kar tỹ Topê to: "há ti nĩ, ti hã ne tóg ũn grĩ ěn tỹ há' he mũ'," hen kỹ.

22 Hã ra ũn grĩ ja ěn tóg tĩ nĩ sir. 40 anos kãfór han tóg, kỹ Topê tóg ti tỹ há' hé.

Jesus mré ke ag tỹ Topê mré vĩ

23 Pedro ag tỹ kygvar kỹ mũ kỹ ag tóg ājag mré ke ag to mũ mũ. Kỹ ag tóg pã'i tỹ ājag mỹ nĕn tó ěn kãmĕn mũ, kófa ag tỹ: "ker Jesus tó hĕ'," he mũ ěn ti.

24 Kỹ vĕnh kar ag tóg tag jĕmĕ kỹ Topê mỹ vĩ há han mũ, jagnĕ mré. Kỹ ag tóg: "ěg jóg mág'," he mũ. "Tỹ ã tóg vĕnh kar kri ke nĩ," he ag tóg mũ. "Kanhkã han ã mỹr, ga ti, goj ti ke gé, mũ mũ ag kar ke gé," he ag tóg.

25 "Ěg jóg'jóg tỹ Davi krĩn ja ã tóg nĩgtĩ, ã camarada ěn ti.

Ā kuprīg tỹ ā tóg ti krīn ja nī. Kỹ tóg Jesus tó ja nīgtī, kỹ tóg: “fóg kar ag ne tóg jūgjũ mũ, kanhgág ag ke gé,” he ja nī. “Inh kanhkā tỹ Israel ag ne tóg nén ũ tũ to jykrén,” he ja tóg nī.

²⁶ “Nação kar ag pā'i ag vỹ vėnh génh kỹ nỹtī, ěg pā'i ag ke gé, Topě kato tēgtē jé, Topě tỹ ũn kuprēg mũ ěn ag kato,” he ja tóg nīgtī, Davi ti,” he ag tóg, Topě mỹ.

²⁷ “Hā ra tóg ki hā tó ja nī. Ěmā tag ki ag tóg vėnh génh kỹ nỹtī, ā kósin kato, ā tỹ ũn kuprēg mũ ěn kato, ũn kuryj nī ěn kato, hā vỹ: Jesus, he mũ,” he ag tóg. “Pāi mág tỹ Herodes vỹ ti kato tē mũ gé, pā'i tỹ Pilatos ke gé, ag tỹ ũ to: Pôncio, he mũ ěn, fóg ag kar, Israel ag kar ke gé,” he ag tóg. “Tag ag kar vỹ vėnh génh kỹ nỹtī, ā kósin kato,” he ag tóg.

²⁸ “Ā tỹ nén to jykrén mũ han ag tóg mũ sir, ā kato tēgtē mũ tag ag. Vāsỹ ā tóg to: ge tī jé tóg ke mũ, he ja nīgtī,” he ag tóg, Topě mỹ.

²⁹ “Pā'i ag tỹ ěg mỹ nén tó mē ā tóg, ag tỹ ěg mỹ: ker tó hē', he mũ tag ti. Kỹ ěg tỹ tar' hemnī, ěg tỹ ag kamēg tũ nīn jé, ěg tỹ ā vī tó jé, ěg tỹ tỹ ā camarada nỹtīn kỹ,” he ag tóg, Topě mỹ.

³⁰ “Kỹ ěg mré milagre hyn han nī gé. ũn kagyga ag tỹ há' hemnī, ěg tỹ nén han vānh han nī, ěg tỹ ā mỹ to vīn kỹ, ěg tỹ ā kósin tỹ Jesus jyjy tó kỹ, ěg tỹ ũn kuryj nī ěn tó kỹ,” he ag tóg, Topě mỹ.

³¹ Ag tỹ ti mré vī kar kỹ ga

tóg jūrũn ke mũ sir, ag tỹ tá nỹtī hā ra. Kỹ Topě kuprīg tóg ag krīn mũ gé. Kỹ ag tóg mũmēg vānh kỹ Topě vī kāmén mũ sir.

Jesus ki ge kỹ nỹtī ag jykre pir

³² ũ tỹ Jesus ki ge kỹ nỹtī ag tóg jykre pir han kỹ nỹtī. ũ pi(jé) ā kuge to: “isũ vė,” he tī. Ājag kuge kar to ag tóg: “ěg tũ vė,” he tī.

³³ Jesus tỹ ũn vin mũ ag tóg ěg Senhor tỹ Jesus rīr mān tugtó mũ, to tar pē nỹtīn kỹ. Kỹ Topě tóg ag ki rīr há han mũ gé sir.

³⁴ Ag mré ke ũ pi(jé) jagāgtar nỹtī' Ag kāmī ũ tóg ěpỹ nỹtī, kar ũ tóg ĩn nỹtī gé. Ājag tũ ěn funfón ag tóg mũ, kỹ ag tóg ti kaja ma kāmũ mũ.

³⁵ Jesus tỹ ũn vin mũ ag mỹ nīm jé, jānkamy ti. Kỹ ũn jagāgtar ag tóg jānkamy ěn to ājag tỹ nén ve sór mũ ěn mān mũ sir.

³⁶ Kỹ ũ tóg nī gé, ti jiji hā vỹ: José, he mũ. Jesus tỹ ũn vin mũ ag tóg ti to: Barnabé, he tī, hā vỹ: vėnh jyvėn krē, he mũ, hā vỹ: Barnabé, he mũ. Levi kósin'kósin ũ vė. Goj vāso tỹ Chipre tá ke vė.

³⁷ Ěn hā vỹ ěpỹ nī, kỹ tóg ā japỹ fón mũ, kỹ tóg Jesus tỹ ũn vin mũ ag mỹ ti kaja ma kātī mũ. Kỹ ag tóg jagnē mỹ kānhkrég mũ sir.

5

Ananias fag tỹ Topě mỹ ón

¹ Kỹ ũ tóg nī gé, ti jyjy hā vỹ: Ananias, he mũ. Jāvo ti prũ fi

jiji hã vỹ: Safira, he mũ. Ēn vỹ tóg ã japỹ fón mũ gé.

² Kĩ tóg ã prũ fi mỹ: “ti kaja vênh kápóv péju kỹ ěg tóg nĩm mũ,” he mũ. Ti vênh kápóv ù tỹ tóg Jesus tỹ ùn vin mũ ag mỹ nĩm mũ. “Ēg japỹ kaja kar hã vế,” he tóg mũ ag mỹ, ón kỹ.

³ Kĩ Pedro tóg ti mỹ: “Satanás hã ne tóg ã krĩn ja nĩ,” he mũ. “Hã kỹ ã tóg Topê kuprĩg mỹ ón. Hã kỹ ã tóg ti kaja vênh kápóv péju kỹ nĩm ja nĩ,” he tóg. “Hã ra ã tóg ti tỹ ã krĩn mũ ra: “nejé,” he ja tũ nĩ, Satanás mỹ,” he tóg.

⁴ “Ā japỹ vế (mỹr), ha mẽ,” he tóg. “Kỹ ti kaja vỹ tóg tỹ ã tũ nĩ gé sir,” he tóg. “Kỹ ã tỹ ma kãtĩ tũ nĩ hã ra tóg tỹ nén ù tũ nĩ vế,” he tóg. “Hã ra ã tóg ã ón ke to jykrén ja nĩgtĩ, ã tỹ ti kaja to ón jé,” he tóg. “Hã kỹ ã tóg ěg mỹ ón, hã ra ã tóg Topê hã mỹ ón mũ,” he tóg, Pedro ti.

⁵ Ananias tỹ ti vĩ mẽ kỹ tóg kutẽ mũ, ti ter vế sir. Û tỹ mẽg mũ ag kar mỹ tóg e tĩ, kỹ ag fe tóg jũrũn ke mũ.

⁶ Kĩ kyrũ ag tóg jęgjęg nęgnę kỹ ag tóg ti fi han mũ. Kỹ ag tóg ti va mũ mũ, kỹ ag tóg ti kénh mũ sir.

⁷ 3 horas tũg kỹ ti prũ fi tóg mĩ kãtĩ mũ gé. Hã ra fi tóg ã mén ter mẽ ja tũ nĩ ver.

⁸ Kĩ Pedro tóg fi mỹ: “ãjag mỹ ti kaja tag to fón, ãjag japỹ ti?” he mũ fi mỹ.

Kỹ fi tóg: “hỹ, ti kaja tag to ěg tóg fón,” he mũ, ón kỹ.

⁹ Kĩ Pedro tóg fi mỹ: “ãjag ne tóg jagnę mrę to jykrén ja nĩ gé,” he mũ. “Topê kuprĩg mỹ ãjag ón mỹr. Û tỹ ã mén

kénh mũ ag vỹ mĩ kãmũ jęg. Ā va ag tóg mũnh mũ gé,” he tóg fi mỹ, Pedro ti.

¹⁰ Kỹ fi tóg kutẽ kỹ hun ke mũ gé sir. Kyrũ ag tỹ junjun kỹ ag tóg fi ter vęg mũ gé, kỹ ag tóg fi kénh mũ mũ gé, fi mén mrę.

¹¹ Kỹ Jesus ki ge kỹ nỹtĩ kar ag fe tóg jũrũn ke mũ, ù tỹ mẽg mũ kar ag ke gé.

Hã kỹ Ananias fag tóg Topê mỹ ón tigrĩn kãgter mũ. Kỹ tóg vênh kar mỹ e tĩ sir.

Ag tỹ Jesus tỹ ùn vin mũ ag vóg kónãn

¹² Jesus tỹ ùn vin mũ ag tóg nén ve vãnh tỹ hẽn ri ke hyn han mũgtĩ, vênh kar mỹ. Jesus ki ge kỹ nỹtĩ kar ag vỹ kurã kar ki vênh mãn tĩ, pã'i tỹ Salomão he mũ ěn sala tá, Topê jo ĩn krēm.

¹³ Jesus ki ge tũ ag tóg venh kãmũ tũ nĩgtĩ, ag tỹ ag kamęg kỹ. Hã ra tóg vênh kar mỹ há tĩ sir, Jesus ki ge kỹ nỹtĩ ag jykre ti.

¹⁴ Kurã kar ki ù tóg to jykrén ke mũ, Jesus ki rã jé, ù tỹ hẽn ri ke ag, fag ke gé. Hã ki ag tóg e nỹtĩ sir, Jesus ki ge mũ ěn ag.

¹⁵ Kejën ag tóg ùn kagyga gé kãmũ mũ gé vãhã, ěpryn kri, ěmĩn kri. Tá ag tóg cama kri nỹtĩ, nỹg jafãn ki. Kỹ ag tóg Pedro jãvãnh mũ. “Ti kãnhvęg tỹ ěg mĩ tĩg kỹ ù tóg hẽn ri ke mũn tỹ há' henh ke,” he ag tóg.

¹⁶ Û tỹ hẽn ri ke ag tóg Jerusalém tá vênh mãn mũ, ěmã kar tá kãmũ ěn ag. Ûn kagyga ag gé(g) ag tóg kãmũ

mũ, ũn jagrē kórég ag ke gé. Kĩ ag tóg há' he kãn mũ sir.

17 Kĩ Topě tũ ki rĩr tĩ to pã'i mág tóg jũ tãvĩ nĩ, ti mré ke kar ag ke gé, Saduceu he mũ ěn ag kar.

18 Kĩ ag tóg Jesus tỹ ũn vin mũ ag sigség mũ, vese ja mág tá.

19 Hã ra kuty tá Topě tỹ jěně jafã tóg tere kỹ vese ja jãnkãn nugnón mũ, rugróm tóg mũ. Ag gé(g) tóg tĩ mũ, ag kygvãn kỹ, kỹ tóg ag mỹ:

20 “ha mũ jěg, Topě jo ĩn ra, ãjag tỹ vėnh kar mỹ Topě vĩ tó jé, Topě tỹ ěg rĩnrĩn mãn ke ěn ti,” he mũ, Topě tỹ jěně jafã ti, ag mỹ.

21 Ag tỹ ti vĩ mẽ kỹ ag tóg kusã pě ki Topě jo ĩn ra mũ mũ, tá Topě vĩ tó jé. Hã ra Topě tũ ki rĩr tĩ to pã'i mág tóg ã mré ke ag jěgněg mũ, ag tỹ kófa ag jé prěr jé, vėnh jyvėn tĩ kar ěn ag, povo tỹ Israel to pã'i ag ke gé. Kĩ ag tóg vese ja ra ũ jěgněg mũ, ag tỹ vėsigse ag taĩ kãmũ jé.

22 Polícia ag tỹ tá junjun mũ ra ag tóg vese ja kãtã tũgtũ nỹtĩ. Kĩ ag tóg vỹnvỹn ke mũ.

23 Kĩ ag tóg: “vese ja tóg nĩfėnh kỹ jě nĩ, nĩfėnh jãfa tỹ,” he mũ. “Kỹ ũ tỹ ki rĩr mũ ag tóg tá nỹtĩ gé, ti jãnkãn tá. ěg tỹ nón mũ ra tóg kuprã jě nĩ,” he ag tóg mũ, pã'i ag mỹ.

24 Topě jo ĩn to capitão tỹ mẽ kỹ tóg ti mỹ e tĩ, Topě tũ ki rĩr tĩ to pã'i mág ag mỹ ke gé. Kĩ tóg ag krĩ tũ tĩ sir.

25 Kỹ ũ tóg tá jun kỹ: “Topě jo ĩn krēm ag nỹtĩ, ãjag tỹ ũn sigség mũ ag,” he mũ. “Tá

ag tóg vėnh kar mỹ Topě vĩ tó nỹtĩ,” he tóg.

26 Kĩ capitão tóg polícia ag mré tĩ mũ, ag taĩ kãmũ jé. Koměr hã ag tóg vĩ mũ, ag mré. “Ěg vãsãnsãn kỹ ũ tỹ ag vĩ męg mũ ag tóg hėn ri ke mũn ěg pin ke mũ, pó tỹ,” he ag tóg, polícia ag.

27 Apóstolo ag tỹ ag mré junjun kỹ ag tóg pã'i ag jo ag vin mũ. Kĩ Topě tũ ki rĩr tĩ to pã'i mág tóg ag mỹ.

28 “ãjag mỹ ěg tóg: ker ěn jiji tó mãn hě', he ja nĩgtĩ’,” he mũ. “Ge ra ãjag tóg Jerusalém tá ke kar ag mỹ tugtó ja nĩgtĩ, ěn vĩ ti,” he ag tóg, Jesus vĩ to. “Ājag hỹn ti ter to ěg jagãgtar han sór mũ,” he ag tóg, pã'i ag.

29 Kĩ Jesus tỹ ũn vin mũ ag kar tóg ag mỹ tag tó mũ, ha mẽ. Pedro tóg ag mỹ tag tó mũ, ha mẽ: “Topě tỹ ěg mỹ nén tó mũ ěn han jé ěg tóg ke mũ (mỹr),” he tóg. “Ěprã ke ag tỹ ěg mỹ: “ke tũg nĩ,” he mũ hã ra ěg tóg ti tỹ ěg mỹ nén tó mũ ěn han mũ,” he tóg.

30 “Ěg jóg'jóg ag vỹ Topě to há nỹtĩgtĩ. Ag tỹ ũ to há nỹtĩ ěn vỹ Jesus ti rĩn mãn ja nĩgtĩ, ãjag tỹ ũn tén mũ ěn ti, ka to ũn sãg mũ ěn ti,” he tóg.

31 “Kỹ Topě tóg ti tỹ pã'i mág han mũ, ti tỹ ěg kren han tĩ han kỹ, ti tỹ ti mỹ: “kunĩg, inh pėgja tá nĩ,” hen kỹ. Jesus tỹ tóg ěg kar krĩn sór mũ, ěg povo tỹ Israel kar tỹ vėnh jykre pãno tovãnh jé, ti tỹ ag tỹ ã vĩ mranh tỹ vėnh pãte fón jé,” he tóg.

32 “Nén kar ěn ve ja ěg tóg nĩgtĩ, hã kỹ ěg tóg ti vĩ tó mũ

sir. Kŷ Topē kuprīg tóg ěg kanhrān mŷ gé. Topē vŷ ũ tŷ ti vī han mŷ kar ag mŷ ā kuprīg jēnēg mŷ,” he tóg, Pedro ti.

³³ Pā'i ag tŷ ti vī mē kŷ ag fe tóg gŷm ke mŷ, kŷ ag tóg ag kăgtén ke to jykrén mŷ, Jesus tŷ ũn vin mŷ ěn ag.

³⁴ Kŷ vāhā ũ tóg jĕg nē mŷ, Fariseu ũ, ti jyjy hā vŷ: Gamaliel, he mŷ. Topē vī to professor ũ vē, kŷ vēnh kar mŷ tóg há nŷ, ti jykre ti. Kŷ tóg: “ver ag kăpan nŷ,” he mŷ.

³⁵ Ag mŷ kar tóg ag mŷ: “inh kanhkā,” he mŷ. “To jykrén nŷ ver, ājag tŷ han tŷ jé,” he tóg.

³⁶ “Pedro ag jo ke ũ tóg jĕ ja nŷ gé, ti jiji hā vŷ: Teudas, he mŷ. Ti hā ne tóg vēsŷ tŷ pā'i mág han ja nŷ, kŷ ũ tŷ 100 tŷ 4 ag vŷ ti nón mŷ ja nŷgtŷ sir. Ti tén ja ag tóg nŷ jāvo, pā'i ag, kŷ ũ tŷ ti vī han mŷ ag tóg tāmŷ mŷ ja nŷ, kŷ tóg tŷ' he mŷ,” he tóg.

³⁷ “Kar kŷ ũ vŷ jĕ ja nŷ gé, ti jyjy hā vŷ: Judas, he mŷ. Galiléia tá ke ěn vē. Ag tŷ vēnh kar jyjji ránrán mŷ ra tóg tá jĕ ja nŷ, Judas ěn ti, kŷ ũ tŷ hĕn ri ke ag tóg ti nón mŷ ja nŷgtŷ gé. ěn tén ja ag tóg nŷ gé, pā'i ag, kŷ ũ tŷ ti vī han mŷ ag tóg krig' ke ja nŷ, vēnh pipin kŷ,” he tóg.

³⁸ “Isŷ nén to jykrén hā vē, ha mĕ: Pedro ag tovānh nŷ ver,” he tóg. “Ag mŷ: ha mŷ jĕg, hemnŷ ver,” he tóg. “Ag tŷ tŷ tŷ ěprā ke ag jykre nŷn kŷ tóg tŷ' hĕnh ke mŷ (mŷr), vēsóg ki, ha mĕ,” he tóg.

³⁹ “Ti tŷ hā ra tŷ Topē jykre

nŷn kŷ ājag tóg tŷ tŷ' hĕnh ke tŷ nŷ,” he tóg. “Ājag tŷ ge ra ag to jŷ nŷtŷn kŷ ājag tóg vāhā Topē kato tĕ mŷ,” he tóg, Gamaliel ti.

⁴⁰ Kŷ ag tóg ti mŷ: “hej,” he mŷ. Kŷ ag tóg Jesus tŷ ũn vin mŷ ag jé prĕr mán mŷ. Ag mrānmrān ag tóg mŷ. Kŷ ag tóg: “ker Jesus tó mán hĕ,” he mán mŷ ag mŷ. Kŷ ag tóg: “ha mŷ jĕg ge,” he mŷ.

⁴¹ Kŷ ag tóg mŷ mŷ, Jesus tŷ ũn vin mŷ ag. Ag mŷ tóg sér tŷ, ha mĕ. Ag tŷ Jesus ri ke jagĕgtar mŷ ra tóg ag mŷ sér tŷ, ag tŷ Jesus ri kĕn jagĕgtar ke ki krŷg kŷ.

⁴² Kurā kar ki ag tóg Topē jo ĩn tá Jesus tó tŷ, ti to: “Topē vŷ ti jĕnĕ,” hĕn kŷ. Vĕnh kar ĩn tá ag tóg ti kāmén mŷ gé, ũ tŷ ag kógfyn kŷ. To ag tóg krónh ke tŷ nŷgtŷ sir.

6

Ag tŷ ũ tŷ 7 (ke) ag vin

¹ Kŷ ũ tŷ hĕn ri ke ag tóg Jesus ki ge mŷ. Ũ ag tóg Grego vŷ tó tŷ, Jesus mré mŷ ũ ag. Kŷ ũ ag tóg Hebreu vŷ tó tŷ gé, ti mré mŷ ũ ag. Ag e nŷtŷn kŷ ũ tŷ Grego vŷ tó mŷ ag tóg kejĕn vŷ kónān mŷ, Hebreu vŷ tó tŷ ag kato. “Ũ tŷ Hebreu vŷ tó mŷ ag vŷ ěg ki króm tŷ nŷtŷ (mŷr),” he ag tóg. “Ag kă ũn mén ter ja fag vŷ kurā kar ki vējĕn há vég tŷ, ag tŷ fag mŷ vin kŷ,” he ag tóg. “Hā ra ěg kă ũn mén ter ja ěn fag kă ag tóg jatun nŷtŷ, fag tŷ ag vŷ tó tŷ nŷn kŷ. Hā kŷ fag tóg jagĕgtar nŷtŷ, ěg mré ke fag,” he ag tóg.

² Kĩ ù tỹ 12 ag tóg mēg mũ, Jesus tỹ ùn vin mũ ag. Kĩ ag tóg Jesus mré mũ kar ag jé prēr mũ. Kĩ ag tóg: “Ēg tũ hã vë, hã vỹ ěg tỹ tỹ Topë vĩ tó ti nỹ,” he mũ. “Ēg tỹ vëjën ki rĩr kỹ ěg tóg kutar nỹtĩ, kỹ ěg tóg ěg tỹ nén han ke ki rĩr há han ke tũ nĩ gé,” he ag tóg.

³ “Kỹ ù tỹ 7 (ke) ag vin nĩ, ùn kãme kórég tũ ag, ùn jykre há ag, ù tỹ Topë kuprĩg tỹ jagrë nĩ ěn ag,” he ag tóg. “Ēn mỹ ěg tóg vënh rãnrãj ěn nĩm mũ, ag tỹ vëjën ki rĩr jé,” he ag tóg.

⁴ “Ēg hã tóg hã ra Topë mré vĩ kỹ nỹtĩ, ti vĩ tó kỹ nỹtĩ. Ēg tỹ nén han ken hã vë,” he ag tóg, Pedro ag.

⁵ Ag vỹ vỹ vënh kar mỹ há nĩ ha, kỹ ag tóg Estêvão fëg mũ sir, ù tỹ Jesus ki rã kỹ jë ěn ti, kỹ Topë kuprĩg vỹ tỹ ti jagrë nĩ. Tĩ mré ag tóg Filipe fëg mũ gé, Prócoro ke gé, Nicanor ke gé, Timom ke gé, Pármenas ke gé, Nicolau ke gé, cidade tỹ Antioquia tá ke tag ti, fóg tỹ Israel jykre han mũ tag ti.

⁶ Ēn ag vin ag tóg mũ, Jesus tỹ ùn vin mũ ag jo. Kỹ ag tóg ag to Topë mré vĩ mũ, ag nĩgé tỹ ag mē kỹ. Hã kỹ ag tóg ag mỹ vënh rãnrãj ěn nĩm mũ, ag tỹ vëjën ki rĩr jé.

⁷ Kỹ Topë vĩ tóg vënh kar kri rũm ke mũ sir. Û tỹ Jesus mré mũ ag vỹ tóg hën ri ke nỹtĩ, Jerusalém tá. Kỹ Topë tũ ki rĩr tĩ ù ag tóg Jesus vĩ kri fi kỹ ti ki ge mũ gé sir.

Ag tỹ Estêvão se

⁸ Estêvão vỹ hã ra krĩ há nĩ, Topë tỹ ti mỹ vënh jykre nĩm

kỹ. Kỹ tóg ěg tỹ nén han vënh tỹ hën ri ke hyn han mũ, vënh kar mỹ.

⁹ Kỹ Israel ag vënh kanhrãn jafã ù tá ag tóg ti vĩ kafãn mũ, ùn kygvãn kỹ nỹtĩ he mũ ěn ag, cidade tỹ Cirene tá ke ag ke gé, cidade tỹ Alexandria tá ke ag ke gé, ga tỹ Cilícia tá ke ag ke gé, ga tỹ Ásia tá ke ag ke gé. Ēn ag kar vỹ ãjag tỹ Estêvão mré vĩn kỹ ti vĩ kafãn mũ.

¹⁰ Hã ra ag tỹ ti vĩ kafãn ke tóg tũ tĩ, ti krĩ há nĩn kỹ, ti tỹ Topë kuprĩg tỹ jagrë nĩn kỹ.

¹¹ Kỹ ag tóg ù ag krĩn mũ, ag tỹ ti kato vỹ jé, Estêvão kato. Kỹ ag tóg: “ti vỹ mē ěg (mỹr),” he mũ. “Moisés kato vỹ kónãn tóg (mỹr), Topë kato ke gé,” he ag tóg ón kỹ, Estêvão to.

¹² Hã kỹ vënh kar tóg ti to jũgũ mũ, Estêvão to, kófa ag mré hã, Topë vỹ to professor ag mré hã. Kỹ ag tóg ti kãgmĩ kỹ ti ség mũ. Kỹ ag tóg pã'i ag jo ti pére kãmũ mũ.

¹³ Û tỹ ón kỹ ti kato vĩnh ke mũ ag jé ag tóg prēr mũ gé, pã'i ag. Kỹ ag tóg ti kato: “Topë jo ãn kato tóg vỹ kónãn tĩ, Topë tỹ ěg mỹ nén tó ja ti kato ke gé,” he mũ ón kỹ. “Hã ra tóg ã vỹ kónãn to krónh ke tũ nĩgtĩ,” he ag tóg ón kỹ, Estêvão to.

¹⁴ “Ti vỹ mē ěg (mỹr),” he ag tóg. “Jesus kãmén tóg tĩgtĩ, Nazaré tá ke ěn ti,” he ag tóg. “Topë jo ãn kókén jé tóg ke mũ, Jesus ti,” he tóg nĩgtĩ, Estêvão ti, kỹ tóg Moisés tỹ ěg mỹ vënh jykre nĩm mũ ěn tỹ tũ' he sór mũ gé, ěg mỹ vënh jykre ù nĩm

kỹ,” he ag tóg. Ag tỹ Estêvão to ón hã vễ.

¹⁵ Kỹ pã'i kar ag tóg ti tugnỹm mũ, hã ra ti ve tóg sir Topê tỹ jẽnê jafã ve ri ke nĩ, Estêvão ti.

7

Estêvão tỹ vễnh kāmén

¹ Kỹ Topê tũ ki rĩr tĩ to pã'i mág tóg ti mỹ: “Ki hã ke mỹ?” he mũ.

² Kỹ Estêvão tóg ag mỹ: “ijóg’,” he mũ. “Inh kanhkã’,” he tóg. “Ëg jóg tỹ Topê vỹ tóg vễnh kar kãfór nĩ,” he tóg. “Tĩ hã ne ãg jóg'jóg tỹ Abraão mré vĩ ja nĩgtĩ, ti tỹ ver ga tỹ Mesopotâmia tá nĩ ki, ti tỹ ver ẽmã tỹ Harã ra tĩ tũ ki.

³ Kỹ tóg ti mỹ: “ã jamã tá kutẽ,” he ja nĩ. “Ã kanhkã ag kar ré kỹ tĩg,” he ja tóg nĩ ti mỹ. “Ga ù ra tĩg, isỹ tá ã mỹ: tag kã nĩmnĩ, he jé,” he ja tóg nĩ ti mỹ, Topê ti.

⁴ Hã kỹ tóg ga tỹ Caldéia tá kãkutẽ mũ, Hãra tá ẽmãn jé, Abraão ti. Ti panh ter kar kỹ Topê tóg ti mỹ: “ga tag ra tĩg sir,” he mũ.

Ëg jamãn hã vễ, Abraão jamã ja ti,” he tóg, Estêvão ti, pã'i ag mỹ.

⁵ “Ge ra Topê tóg Abraão mỹ ga ẽn nĩm ja tũ nĩ, ẽpỹ pir mré tó kỹ. Ti mỹ tóg hã ra: “ã tũnh ke vễ, kar kỹ, ã krẽ tũnh ke vễ gé,” he ja nĩ, Topê ti. Hã ra tóg ver kósin ja tũ nĩ, Topê tỹ ti mỹ: “ã krẽ tũnh ke vễ,” he mũ ra.

⁶ Kỹ Topê tóg ti mỹ: “ã krẽ ag tỹ fóg ù ag mré mũnh ke vễ, fóg ẽn jamã tá,” he mũ. “Fóg ẽn ag tỹ camarada han ke vễ,

ag vóg kónãn jé ag tóg ke mũ, prỹg tỹ 100 tỹ 4 ki,” he tóg, Abraão mỹ, Topê ti.

⁷ “Hã ra ù tỹ ag vóg kónãn mũ ẽn ag vóg kónãn jé sóg ke mũ gé, kar kỹ,” he tóg, Topê ti. “Isỹ ag vóg kónãn kar kỹ ã krẽ ag tóg tá kãpanh mũ. Kỹ ag tóg ga tag ki isũ ti han mũ,” he tóg, Topê ti. Ti tỹ Abraão mỹ ken hã vễ,” he tóg, Estêvão ti.

⁸ “Kỹ tóg ti mỹ vễnh jykre nĩm mũ, ti tỹ ã krẽ ag gré junun fár kym jé. Kỹ ti sinal vễ sir. Kar kỹ Abraão tóg Isaque han mũ. Ti tỹ kurã tỹ 8 han kỹ tóg ti mỹ kym mũ. Isaque tỹ Jacó han kỹ tóg ge han mũ gé, kỹ Jacó tóg ge han mũ gé, ti tỹ ã krẽ tỹ 12 ẽn ag han kỹ, ẽg tỹ ù to: ẽg jóg'jóg kar, he mũ ẽn ag,” he tóg.

⁹ “Hã ra ẽg jóg'jóg ẽn ag tóg ãjag jãvy tỹ José to jũgũ nỹtĩ, ãjag tỹ ti tũ to ẽn kỹ. Hã kỹ ag tóg ti vễne he mũ, José ti, ù tỹ ga tỹ Egito ra mũ mũ ag mỹ. Hã ra Topê tóg ti ki rĩr mũ.

¹⁰ Kỹ tóg ti jy nĩgãn mũ, ti tỹ vễnh jagtar vég mũ ra. Ti jykre há nĩn kỹ tóg Egito tá ke ag pã'i mág mỹ há tĩ, ag tỹ ù to: Faraó, he mũ ẽn mỹ. Hã kỹ tóg ti tỹ pã'i mág han mũ, Faraó ti, José ti tỹ. Ti tỹ tóg pã'i mág han mũ, ti tỹ Egito tá ke kar ag ki rĩr jé, Faraó mré ke kar ag ki rĩr jé gé sir.

¹¹ Kejẽn tóg prỹg han mũ, ga tỹ Egito mĩ hã, ga tỹ Canaã mĩ hã ke gé. Kỹ vễnh kar tóg kókĩnkĩr mũ, prỹg kã. Kỹ ẽg jóg'jóg ẽn ag tóg kókĩnkĩr mũ gé.

¹² Kỹ ù tóg Jacó mỹ: “Egito

tá ti vējēn nī inhhā,” he mū. KỸ tóg ēg jóg'jóg ag jēgnēg mū, Jacó ti, ag tỹ Egito ra mū vén jé.

13 Ag tỹ ra mū mǎn kỹ José tóg vāhā ag mỹ: “inh hā vē,” he mū, ā kāke ag mỹ. Hā kỹ Faraó tóg José kanhkā ki kanhró nī gé sir.

14 KỸ José tóg ā panh tỹ Jacó jé prēr mū, ti tỹ vēnh kar tatīn kātīg jé. Ū tỹ 70 kri 5 ag vē, ti kanhkā ag.

15 KỸ Jacó tóg Egito ra tī mū. Tá tóg ter mū kejēn. Kar kỹ ēg jóg'jóg ag vỹ tá kǎgter kǎn mū gé.

16 Ēmā tỹ Siquém tá ag tóg kénh kỹ nýtī, Abraão vỹ tóg vēnh kej ēn to jānkamy nīm ja nī, Emor krē ag mỹ, ěmā tỹ Siquém tá,” he tóg, Estêvão ti.

17 “Vāhā tóg kurā pétēm ke mū sir, Topē tỹ Abraão mỹ: “ā krē mỹ sóg ga ēn nīm mū,” he mū kurā ti. KỸ ag tóg Egito tá vēnh grun mū.

18 Kejēn ū tá pǎ'i tóg tỹ pǎ'i jē, Egito tá. Hā ra tóg José mē ja tū nī, pǎ'i tag ti.

19 Ēn tóg ēg kanhkā ag kǎ'ug mū, ag lograr ke tóg mū, ēg jóg ag vóg kónān tóg mū gé. KỸ tóg ag mỹ: “ājag krē kāsir ag vām ra, ag kǎgter jé,” he mū, pǎ'i ēn ti,” he tóg, Estêvão ti.

20 “Ti tỹ tag tó kar vāhā Moisés tóg mur mū, kỹ tóg Topē mỹ há tī. Hā ra ti han mū fag tóg kysā tāgtū hā ki ti ki rīr mū.

21 Kysā tāgtū tūg kỹ fag tóg sir ti fón mū. Hā ra Faraó ēn kósin fi tóg ti ve kỹ ti vāg mū,

ti jē'ŷn jé. KỸ tóg fi kósin ri ke nī, Moisés ti.

22 KỸ tóg nén kar ki kanhrān mū, Egito tá vēnh jykre kar ēn ki. KỸ ti jykre vỹ vēnh jykre tỹ hēn ri ke nī, kỹ ti vī vỹ vēnh vī tỹ hēn ri ke nỹ gé, Moisés ti,” he tóg, Estêvão ti.

23 “Vāhā tóg prỹg tỹ 40 han mū, Moisés ti. KỸ tóg ā kanhkā pē ag to jykrén mū, povo tỹ Israel to, ag tỹ nén han mū venh tīg jé.

24 KỸ tóg ū vég mū. Egito tá ke ū vég tóg mū, Moisés ti. Ti tỹ Israel vóg kónān vég tóg mū, nén ū tū to. KỸ tóg ti to jū kỹ Israel ēn kajām mū, ti tén tóg mū, Egito tá ke ēn ti.

25 “Inh kanhkā ag hỹn isỹ nén han mū to jykrén mū,” he tóg. “Hā kỹ ag tóg ki kanhró nýtī, Topē tỹ inh tugrīn ag kren han ke ti,” he tóg, Moisés ti. Hā ra ag tóg to jykrén tū nýtī, ti kanhkā ag,” he tóg, Estêvão ti.

26 “Tỹ vaj kỹ tóg ag to tīg mǎn mū, ā kanhkā ag to. KỸ ūn régre ag tóg jagnē to jū nýtī, Israel ag. KỸ Moisés tóg ag tỹ jagnē to há han sór mū. Hā jé tóg ag mỹ: “tỹ ājag tóg jagnē kanhkā nýtī vē,” he mū. “Ājag tỹ ne jé jagnē vóg kónān sór nē?” he tóg.

27 Ū tỹ ā régre vóg kónān mū ēn tóg ti vóg kỹ ti mỹ: “ā pi(jé) tỹ ēg pǎ'i nī,” he mū. “Ā pi(jé) ēg jyvēn mū,” he tóg.

28 “Ā hỹn isén sór mū, ā tỹ rāké tá Egito tá ke ēn tén ri ke han sór ā hỹn mū,” he tóg ti mỹ,” he tóg, Estêvão ti.

29 “Kỹ Moisés tóg ã tỹ ti vĩ mẽ kỹ tóg vãnh péju kỹ tĩ mũ. Kỹ tóg ga tỹ Midiã ra tĩ mũ. Povo ù ag mũ tóg tĩ mũ gé. Tá tóg prÿg kỹ kósın régre han mũ.

30 Prÿg tỹ 40 tũg kỹ Topê tỹ jẽnê jafã vĩ ti mỹ vãnh ven mũ, ti tỹ êmã tũ ja mũ tĩ mũ ra, krĩ tỹ Sinai tá. Vãnh grug ki tóg ti vég mũ, Moisés ti, Topê tỹ jẽnê jafã ên ti.

31 Ti tỹ ti ve kỹ tóg ti mỹ e tĩ. Kỹ tóg ra tĩ mũ, ti ve há han jé. Kỹ tóg vãnh vĩ mẽg mũ. Topê vĩ vễ.

32 Kỹ tóg ti mỹ: “tỹ sóg ã jóg'jóg ag Topê nĩ,” he mũ, “Abraão Topê, Isaque Topê, Jacó Topê,” he tóg, vãnh vĩ ti.

Hã ra Moisés tóg jũrũn ke mũ, ti kamêg kỹ. Kỹ tóg tá êvãnh jãvãnh nĩ.

33 Hã ra Topê tóg ti mỹ: “ã pẽn né kunũ ra, ã pẽn to ró ti,” he mũ. “Inh jo ã tóg jẽ nĩ (mỹr), hã ra sóg vãnh kar kãfór nĩ. Hã kỹ kunũ,” he tóg, Topê ti.

34 “Egito tá ke ag tỹ isũ ag vóg kónãn vég isóg nĩ nĩ. Ag vễkrênkrêr mẽg sóg nĩ nĩ. Kỹ sóg tere, sỹ ag kygvãn jé. Hã kỹ sóg ã jẽnêg mũ, ga tỹ Egito ra, ã tỹ ag kygvãn jé. Ha tũg,” he tóg, Topê tỹ jẽnê jafã ti, Moisés mỹ,” he tóg, Estêvão ti.

35 “Moisés ên hã jẽnê ja tóg nĩ, Topê ti, ti tỹ ã kanhkã ag kren han jé, ti tỹ tỹ pã'i nĩ jé. Hã to Topê tỹ jẽnê jafã tóg ti mỹ vãnh ven, vãnh gru ki. Hã ra ti kanhkã ag tóg ti to é he ja nĩgtĩ, ti mỹ: “ã pi(jé) tỹ êg pã'i nĩ,” hen kỹ, “ã pi(jé) êg jyvẽn mũ,” hen kỹ.

36 Moisés tóg sir êg tỹ nén han vãnh hyn han, ga tỹ Egito tá, goj kafã tũ tá ke gé, goj kusũg he mũ ên tá ke gé. Kỹ ag tóg êmã tũ mũ mũ mũ, prÿg tỹ 40 ki, ti kanhkã ag. Kỹ Moisés vĩ ag jo tĩ mũ, ti tỹ ga tỹ Egito tá ag kãpan kỹ. Hã ra tóg ag mũn ki êg tỹ nén han vãnh hyn han mũ gé,” he tóg, Estêvão ti.

37 “Moisés tóg ã kanhkã ag mỹ, povo tỹ Israel ag mỹ tóg tag tó ja nĩ: “Topê vĩ ãjag mỹ ã vĩ tó tĩ ù jẽnênh mũ, ãjag mré ke ù, ti tỹ ãjag mỹ Topê vĩ tó jé inh ri kén,” he ja tóg nĩgtĩ, Moisés ti.

38 Moisés ên hã ne tóg povo tỹ Israel ag mré êmã tũ mũ tĩ ja nĩgtĩ. Ag tỹ kejên pãnónh tỹ Sinai tá nỹtĩn kỹ tóg Topê tỹ jẽnê jafã mré vĩ mũ, Moisés ti. Kỹ tóg ti mỹ vãnh vĩ nĩm mũ, Topê ti, êg tỹ ti vĩ ên han kỹ êg tỹ êg rĩr krÿg ja tũ ve jé. Kỹ Moisés tóg êg jóg'jóg ag mỹ vãnh vĩ ên tugtó mũ. Hã ra tóg êg mỹ tó mũ gé,” he tóg, Estêvão ti.

39 “Moisés vĩ han vãnh ag nỹtĩ, êg jóg'jóg ag. Kỹ ag tóg ti tovãnh kỹ ga tỹ Egito ra mũ mãn sór mũ, kyrãgrã kỹ.

40 Kỹ ag tóg Moisés jãvy tỹ Arão mré vĩ mũ. Kỹ ag tóg ti mỹ: “êg mỹ vãnh kãggrã tỹ topê han, retrato tỹ, êg tỹ vãnh jo ag gé(g) mũ jé,” he ag tóg.

Hã ra Moisés vĩ ver pãnónh tỹ Sinai kri nĩ nĩ.

Kỹ ag tóg Arão mỹ: “Moisés tóg êg jo tũg ja nĩ,” he mũ. “Êg kãpan ja tóg nĩ, ga tỹ Egito tá, hã ran hẽ ra vyr hỹn'?” he ag

tóg ti mý. Ký tóg ag mý: “hej,” he mū.

⁴¹ Ký ag tóg monh sī kăggran mū. Ký ag tóg ti kăggrá ěn mý ag tóg ājag mĕg kugprūn mū, retrato ěn mý. Ag tỹ han mū tóg ag mý sīnvī tī. Ký tóg ag mý sér tī sir.

⁴² Hă ra Topĕ tóg vĕnh kaja jé ag tovănh mū gé, hă ký ag tóg rā to jănĵan mū, kysă to (mýr), krĭg kar to (mýr). Hă ký Topĕ vī tó tī ũ tóg ag to rán mū gé, ký tóg: “Israel’,” he mū. “Ājag tỹ ěmă tū ja mī mūn ký ājag tóg inh mý nĕn ũ pūn ja tū nĭgtī (mýr),” he tóg. “Prỹg tỹ 40 ki ājag tóg ěmă tū ja mī mū ja nĭgtī,” he tóg, “hă ra ājag tóg topĕ ũ ag mý kugprūn ja nĭgtī, inh mý pūn tū nĭn ký,” he tóg, Topĕ ti, ā vī tó tī tỹ.

⁴³ “Topĕ tỹ Moloque ĩn sī va ājag tóg mū ja nĭgtī, krĭg kăggrá ke gé, hă vỹ: Renfă, he mū, krĭg retrato ěn ti,” he tóg. “Vĕnh kăggrá ěn to ājag tóg jănĵan ja nĭgtī,” he tóg. “Hă ký sóg ājag vóg kónăn ký Babilônia tá ke ag jĕgnĕnh mū, ag tỹ ājag tatĭn mū jé, cidade tỹ Babilônia mă ra,” he tóg, Topĕ ti, ā vī tó tī tỹ,” he tóg, Estêvão ti.

⁴⁴ “Ĕg jóg ag tỹ ěmă tūg ja mī mūn ký ag tóg kur tỹ Topĕ pĕ jo ĩn han ja nĭ, ag tỹ tá Topĕ tū han jé, ti ĩn tá. Topĕ vỹ Moisés mý tó ja nĭ, ti tỹ kur tỹ Topĕ jo ĩn han jé, ký tóg ti tỹ nĕn han ke ven ja nĭ ti mý.

⁴⁵ Ag krĕ tóg sir ag ri kĕn ĩn tỹ kur ěn ma mū ja nĭgtī gé, ag tỹ Topĕ tỹ ājag mý ěmă tó mū ěn ra mūn ký. Moisés ter

kar Josué tóg sir ag jo tī mū, ký ag tóg ga ěn ra mū mū. Hă ra Topĕ tóg ga ěn tá ke ag kăpan mū, ěg jóg'jóg ag jo.

Kejĕn Davi tóg tỹ ag pă'i nĭ sir, prỹg tỹ hĕn ri ke kar ký. Hă ra ĩn tỹ kur ěn tóg ver jĕ nĭ.

⁴⁶ Topĕ vỹ Davi to há nĭ. Ký Davi tóg ti mý: “sỹ ā mý ĩn há han há tóg tī vĕ,” he mū. “Ā hă ne tóg tỹ ijóg'jóg tỹ Jacó Topĕ nĭ,” he tóg. “Ký tóg ā tỹ ĩn tỹ kur krĕm nĭn ký inh mý há tū nĭ,” he tóg ti mý, Davi ti.

⁴⁷ Hă ra Davi tóg han tū nĭ ver. Ti kósĭn tỹ Salomăo tóg ĩn ěn han mū,” he tóg, Estêvão ti.

⁴⁸ Ký tóg ag mý: “hă ra vĕnh kar kăfór ěn tóg ěg tỹ ti jo ĩn han mū ěn krĕm nĭ tū nĭgtī (mýr),” he mū. “Hă ký Topĕ vī tó tī ũ tóg ti to tag tó ja nĭ, ha mĕ.

⁴⁹ “Kanhkă tăn vỹ tỹ inh nĭ,” he tóg. “Inh nĭg ja ri ken hă vĕ,” he tóg. “Ký ga vỹ tỹ isũ nĭ gé. Sỹ tá vĕnhkán sór nĭn ký sóg kenh ke mū. Isũ kar vĕ. Ký ājag tỹ inh mý ĩn han sór ký ājag hĭn hĕ ri kenh mū?” he tóg. “Pĕtĕm ke tū ājag nĭnh mū, ājag tỹ inh mý vĕnhkán jafă han ken ki,” he tóg.

⁵⁰ “Inh hă ne tóg nĕn kar hĭn han ja nĭ inhhă,” he tóg, Topĕ ti, ā vī tó tī tỹ,” he tóg, Estêvão ti.

⁵¹ Ký tóg ag mý: “krĭ tū ājag nýtī (mýr),” he mū. “Ki kanhrăn jăvănh ājag tóg nýtī (mýr),” he tóg. “Ký ājag nĭgrĕg tóg kutu nĭ gé (mýr), Topĕ kuprĭg kato ājag tóg văsănsăn nýtī. Ājag jóg'jóg ag mrĕ ājag

tóg ti kato vāsānsān nýtī,” he tóg.

⁵² “Ājag jóg'jóg ag ne tóg Topē vī tó tī ag kar vóg kónān ja nīgtī', ag kāgtén ja ag tóg nīgtī'. Hā ra ēn ag tóg ũ týt vēnh jykre kuryj han mū ēn kāmén ja nīgtī, hā výt: Jesus, he mū. Ti kātīg ke jo ag tóg ti tó ja nīgtī, Topē vī tó tī ag. Jāvo ājag tóg ēn kato vī ja nīgtī, fóg mýt. Kýt ājag tóg ti tén ja nīgtī, Cristo ti,” he tóg, Estêvão ti.

⁵³ “Topē hā ne ājag mýt ā vī nīm ja nī', ā týt jēgnē jafā ag týt. Hā ra ājag tóg ti vī mrynhranh ja nīgtī,” he tóg. Estêvão týt pā'i ag mýt tón hā vē.

Ag týt Estêvão tén

⁵⁴ ũ týt tá nýtī ag týt ti vī mē kýt ag fe tóg gým ke mū. Kýt ag tóg ājag jā týt gyngyn he mū, týt ag tóg gangan ke mū.

⁵⁵ Hā ra Topē kuprīg tóg Estêvão krīn mū, kýt Estêvão tóg kanhkā ki ēvānh mū. Kýt tóg Topē vég mū, ti kókov ti. Jesus vég tóg mū gé, Topē pēgia tá tóg jē nī, Jesus ti.

⁵⁶ Kýt tóg: “ha vé,” he mū. “Kanhkā tá sóg vég mū,” he tóg. “Kýt ēprā ke fi kósin tóg Topē pēgia tá jē nī,” he tóg.

⁵⁷ Kýt ag tóg prēnprēr mū sir, ājag nīgrēg nīgfénh kýt. Ti to ag tóg vēnh génh mū sir, ag kar ti.

⁵⁸ Kýt ag tóg ti ség mū, cidade týt Jerusalém tá ag tóg ti kutēm mū gé. Kýt ag tóg ti pin mū, pó týt. Ājag kur vāvām ag tóg mū, kýt kyrū tóg ki rīr mū, ag kur ki. Kyrū ēn jiji hā výt: Saulo, he mū.

⁵⁹ Kýt ag tóg Estêvão pin mū sir, pó týt. Hā ra Estêvão tóg jamā hár(a): “!..inh Senhor'..!” he mū. “!..Jesus'..!” he tóg. “!..Inh kuprīg jāvānh ra..!” he tóg mū.

⁶⁰ Kýt tóg ā jakrī týt jē kýt prēr mū, jamā hár(a), kýt tóg: “!..inh Senhor'..!” he mū. “!..Ag týt inh pin týt vēnh pāte fón ne..!” he tóg mū. Kar kýt tóg hun ke mū sir.

8

Saulo týt ag vóg kónān

¹ Jāvo Saulo ēn mýt tóg há tī, ag týt ti tén kýt. Kurā ēn kā ag tóg Jesus ki ge mū kar vóg kónān jagy han mū, Jerusalém tá. ũ týt vēnh mān tī ag vóg kónān ag tóg mū gé, ũ týt Topē vī mē jē vēnh mān tī ag. Kýt ag tóg jagāgtar tāvī nýtī. Kýt ag tóg vēnh kápugpóv kān mū sir. Ga týt Judéia kar mī ag tóg mū mū, ga týt Samaria mī ke gé. Hā ra Jesus týt ũn vin mū ag hā tóg Jerusalém tá nýtī nī.

² ũ týt Topē to há tī ag tóg fe kaj nýtī, Estêvão ter kýt. Kýt ag tóg kygfýt mág kýt ti kénh mū.

³ Hā ra Saulo tóg Jesus ki ge kýt nýtī kar ag vóg kónān jagy han mū, ũ týt Topē vī mē jē vēnh mān tī ag. Ti týt ag tūt sór vē, Saulo ti. Hā jē tóg ĩn kar kāra rā tī. Ti týt Jesus ki rā kýt jē ũ ven kýt tóg vēse jan kātá ti fón ti, ũn gré ag, ũn tātá fag ke gé.

Samaria tá Topē vī tó

⁴ ũ týt vēnh kápugpóv mū ēn ag výt vēnh kar mýt vēnh vī sér tugtó mūgtī, Topē vī ti.

⁵ Kŷ Filipe tóg tĩ mũ gé. Ga tỹ Samaria ra tóg tĩ mũ, kŷ tóg cidade ũ ki ra mũ, Cristo kāmén jẽ.

⁶ Kŷ vĕnh kar tóg ti vĩ mĕgmĕg mũ. Jĕmĕ há han ag tóg mũ, Filipe vĩ ti. Hã ra Filipe tóg ěg tỹ nĕn han vĕnh hyn han mũ gé. Kŷ ag tóg vég mũ. Hã kŷ ag tóg jĕmĕ há han mũ.

⁷ Vĕnh jagrĕ kórég tỹ hĕn ri ke pan tóg mũ, Filipe ti. Ti tỹ ag pan kŷ ag tóg jamã hár(a) prĕr mũ, kŷ ag tóg kãpa mũ. Ũ grĩ ag tỹ há' he tóg mũ gé, ũn vagvá ag tỹ ke gé, ũn vygvá ag tỹ.

⁸ Kŷ tóg vĕnh kar mŷ sér tĩ sir, cidade ěn tá.

⁹ Kŷ Simão tóg nĩ nĩ, cidade ěn tá ke ũ. Kujá vĕ, Simão ěn ti. Kŷ tóg nĕn vĕnhmŷ hyn han tĩgtĩ. Kŷ tóg ga tỹ Samaria tá ke ag tỹ ti tỹ nĕn han ve kŷ tóg ag mŷ e tĩ. Vĕso tóg: “ag kãfór inh nĩ,” he tĩ, ag tỹ ti kamĕg jé.

¹⁰ Hã kŷ vĕnh kar tóg ti kamĕg mũ sir, ũn sanh ag, gĩr ag ke gé. Ti to ag tóg: “Topĕ jykre han tóg tĩgtĩ, Topĕ jykre mág (pĕ) ěn,” he tĩ, Simão ěn to.

¹¹ Kysã tỹ hĕn ri ke ki tóg nĕn vĕnhmŷ hyn han ti, kŷ tóg vĕnh kar mŷ e tĩ, hã kŷ ag tóg ti kamĕg tĩ sir.

¹² Vãhã ag tóg Filipe vĩ kri fig mũ, Samaria tá ke ag, ti tỹ Jesus Cristo tón kŷ. Topĕ tỹ tỹ ěg pã'i nĩ kāmén tóg mũ, Filipe ti. Ũ tỹ ã vĩ kri fig mũ ag kygpég tóg mũ, ũn gré ag, ũn tátã fag ke gé.

¹³ Kŷ Simão ěn tóg ti vĩ kri

fig mũ gé, kujá ěn ti. Kŷ Filipe tóg ti kypég mũ gé. Kŷ tóg Filipe mré nĩ nĩ. Kŷ tóg Filipe tỹ ěg tỹ nĕn han vĕnh hyn han mũ vég mũ, Topĕ jykre tỹ. Kŷ tóg ti mŷ e (pĕ) tãvĩ tĩ sir, Simão mŷ.

¹⁴ Kŷ vãhã Jesus tỹ ũn vin mũ ag tóg kejĕn mĕg mũ, Samaria tá ke ag tỹ Topĕ vĩ kri fig mũ ěn ti. Jerusalém tá ag tóg mĕg mũ, kŷ ag tóg João mré Pedro jĕnĕg mũ, ag tỹ ve jé.

¹⁵ Pedro ag tỹ tá junjun kŷ ag tóg ag to Topĕ mré vĩ mũ, Samaria tá ke ag to, Topĕ tỹ ã kuprĩg tỹ ag jagrĕn jé.

¹⁶ Tá ke ũ tóg tỹ jagrĕ tũ ja nĩ ver. Kygpe kŷ ag nŷtĩ inhhã, Jesus jiji tó kŷ, ěg Senhor jyjy tó kŷ.

¹⁷ Kŷ Pedro ag tóg ãjag nĩgé tỹ ag mĕgmĕg mũ, kŷ Topĕ kuprĩg tóg ag kãra rã mũ.

¹⁸ Hã ra Simão tóg vég mũ, Jesus tỹ ũn vin mũ ag tỹ nĕn han mũ ti. Ag tỹ ũ mĕ kŷ Topĕ kuprĩg tóg ag kãra rã mũ. ěn vég tóg mũ, Simão ti. Kŷ tóg ag mŷ jãnkamy ven mũ, Pedro ag mŷ.

¹⁹ Kŷ tóg ag mŷ: “inh mŷ vĕnh jykre tag nĩm nĩ, jãnkamy tag to,” he mũ. “Sŷ ũ mĕ kŷ Topĕ kuprĩg tóg ag kãra rãnh ke mũ. Sŷ vĕnh jykre ěn ki kanhrãh há tóg tĩ,” he tóg.

²⁰ Hã ra Pedro tóg ti mŷ: “ã jãnkamy mré ã nũgme ki kutĕnh mũ,” he mũ. “Topĕ tỹ nĩm ja vĕ (mŷr), hã ra ã tóg jãnkamy ti mãn sór mũ, vĕnh jykre ti,” he tóg.

21 “Ā pi(jé) Topě jykre tag ki kanhró nĩnh mũ', kŷ Topě tóg ã mŷ nĩm ke tũ nĩ,” he tóg. “Ā jykre pijé kuryj nŷ', Topě mŷ,” he tóg.

22 “Ā jykre pãno tag tovãnh ra,” he tóg. “Topě mré vĩ. Hẽn ri ke mũn tóg ã mŷ vẽnħ pãte fón mũ, ã tŷ vẽnħ jykre pãno to jykrén mũ tag ti,” he tóg. Pedro ti.

23 “Fe kórég tãvĩ ã nĩ (mŷr), kŷ ã jykre vŷ pãno nŷ gé sir,” he tóg, Pedro ti.

24 Kŷ Simão tóg ti mŷ: “iso Topě mré vĩ, inh jagtar jęg tũ nĩ jé, ã tŷ inh mŷ tó mũ tag ti,” he mũ.

25 Hã ra Pedro ag tóg mũ mãn gé, ag tŷ ěg Senhor tŷ Jesus vĩ tó kar kŷ. Ājag tŷ nén ve ja ěn tó kãn ag tóg, Jesus tŷ nén han ja ti. Kŷ ag tóg Jerusalém to vŷnvŷn ke mũ sir. Ag mũ kŷ ag tóg ga tŷ Samaria mĩ Topě vĩ há tugtó mũ gé.

Filipe tŷ ũn kypég mũ

26 Hã ra Topě tŷ jẽně jafã tóg Filipe mŷ vĩ mũ, kŷ tóg: “kanhkã tãpér ra tŷg, ěpŷ jagma tŷg, ěmĩn jagma,” he mũ. Jerusalém tán kãtĩ, Gaza mĩ, hã ra tóg ěmã tũ fĩn kutě mũ. ěpŷ ěn jagma tŷg, ěmĩn ěn jagma,” he tóg mũ, Topě tŷ jẽně jafã ti.

Kŷ tóg tĩ mũ sir, Filipe ti.

27 Tá jun kŷ tóg ga tŷ Etiópia tá ke vég mũ, pã'i fi rãnrãj han tĩ ti, pã'i tŷ rainha fi tŷ nén ũ kar vég tĩ ti, ũn kurĩ ěn ti. Pã'i fi jijin hã vŷ: Candace, he mũ. Fi krēm pã'i ěn tóg Jerusalém ra tŷg ja nĩ, ũn kurĩ ěn ti. Tá tóg Topě kurã mág ve

ja nĩ, festa mág ti, Jerusalém tá.

28 Hã ra tóg ã jamã ra vŷn ke mũ sir, carroça kãmĩ. Tŷg kŷ tóg Topě vĩ to ke mũ, Isaías tŷ rá ěn ti. Vãsŷ Topě vĩ tó tĩ vě, hã vŷ: Isaías, he mũ.

29 Kŷ Topě kuprŷg tóg Filipe mŷ: “carroça kukãm tŷg,” he mũ.

30 Kŷ Filipe tóg fũrũn tĩ mũ, kŷ tóg ti tŷ vẽnħ rá to ke męg mũ, Isaías tŷ rá ěn to, vãsŷ Topě vĩ tó tĩ tŷ rá ěn to. Kŷ tóg ti mŷ: “ã mŷ ã tŷ nén to ke mũ tag ki kanhró nĩ'?” he mũ.

31 Hã ra tóg: “vó,” he mũ. “Ũ tóg inh mŷ kãmén ja tũ nĩ ver,” he tóg. “Ā mŷ inh mŷ kãmén ke tũ nĩ'?” he tóg. “Tãpŷ ra, inh mré nĩ jé,” he tóg. Kŷ tóg ke mũ, Filipe ti.

32 Ti tŷ ken hã vě, ha mẽ: “ovelha ri ke han tóg, ũ ěn ti. Ovelha pére ěg mũgtĩ, ti tãnh jé, hã ra tóg vĩ tũ nĩgtĩ (mŷr). Cordeiro ri ke han tóg mũ gé. ěg tŷ ti kyki ronh mũ ra tóg jatun mŷ jé nĩ gé (mŷr).

33 Ũ ěn tŷ Topě vĩ mranh tũ hã ra ag tóg tĩ vóg kónãn, ag tŷ ti jyvẽn tũ ra. Ti mré ke ag jykre pãno tó kãn ke tũ ěg tóg nĩgtĩ (mŷr). Ti tén ja ag tóg (mŷr), kŷ tóg ter mũ sir,” he tóg, vẽnħ rá ti.

34 Kŷ ũn kurĩ ěn tóg Filipe mŷ: “ũ to ke ně hŷn'? Topě vĩ tó tĩ tŷ ne tó ně hŷn'?” he mũ. “Inh mŷ tó,” he tóg. “Ti tŷ veso ke mŷ', ũ to ke mŷ vó?” he tóg.

35 Kŷ Filipe tóg ti mŷ vẽnħ rá tag kãmén mũ sir. Jesus kãmén tóg mũ. Ti mŷ tóg vẽnħ vĩ há ěn tó mũ, Jesus to.

³⁶ Ge ag tóg mũ mũ, ěpřy jagma, ěmĩn jagma. Kĩ ag tóg goj tá junjun mũ. Kĩ ùn kurĩ ěn tóg: “tag ki tóg goj nĩ,” he mũ. “Ă tỹ ki inh kype jé tóg há nĩ, he tóg.

³⁷ Kĩ Filipe tóg ti mỹ: “ă tỹ ă fe tỹ ti ki rã kĩ nĩ nĩn kĩ tóg há nĩ,” he mũ.

Kĩ tóg: “ti ki sóg rã kĩ nĩ,” he mũ. “Jesus tóg tỹ Topě kósĩn nĩ (mỹr), Jesus Cristo ti,” he tóg, ùn kurĩ ti.

³⁸ Kĩ tóg carroça tĩn ti mỹ: “ver krỹg hé,” he mũ. Kĩ tóg Filipe mré goj ra tére mũ, kĩ tóg kãra rã mũ, ùn kurĩ ti. Kĩ Filipe tóg ti kypég mũ sir.

³⁹ Ag tỹ goj kãtá kãjãpřy kĩ Filipe tóg tũ' he mũ, Topě kupřĩg tỹ ti ma tĩg kĩ. Kĩ ùn kurĩ tóg ti ve mãn tũ nĩ sir. Hã ra tóg tĩ mũ, ă jamãn ra. Ti mỹ tóg sér tĩ sir.

⁴⁰ Hã ra Filipe tóg cidade tỹ Azoto tá nĩ nĩ. Kĩ tóg tĩg kĩ Jesus vĩ tó tĩ mũ, ěmã kar mĩ. Kĩ tóg kejẽn cidade tỹ Cesaréia tá jun mũ, Jesus kãme sér tó jé.

9

*Saulo tỹ Jesus ki rã
(Hk 22.6-16; 26.12-18)*

¹ Hã ra Saulo tóg ver ù tỹ ěg Senhor tỹ Jesus mré mũ mũ ag vóg kónãn sór mũ. Ag to tóg krĩ rỹ nĩ ver. Ti tỹ ag kãgtén sór vĕ. Hã to tóg Topě tũ ki rĩr tĩ to pã'i mág to tĩ mũ.

² Kĩ tóg ti mỹ permissão to vĩ mũ, ti tỹ cidade tỹ Damasco ra tĩg jé. Tá tóg permissão ěn tỹ pã'i ag mỹ ven sór mũ, ag tỹ ti mỹ: “ha ag venh tĩ gé,” he jé. Ti tỹ Jesus mré tĩ mũ ù ve

kỹ tóg ti se sór tĩ. Jerusalém ra tóg ag tatĩ tĩg sór tĩ, ti tỹ ùn ség mũ ag, ùn gré ag, ùn tãtá fag ke gé.

³ Hã jé tóg Damasco ra tĩ mũ. Ti tỹ kakó ke mỹr hã jĕngrĕ tar tóg vĕnh ven mũ, kanhkã tá. Rã kãfór tóg nĩ, hã ra tóg Saulo ki kómkóm ke mũ sir.

⁴ Kĩ Saulo tóg kutĕ mũ, ga kri tóg tá' ke mũ. Kĩ tóg vĕnh vĩ mĕg mũ. Kĩ tóg: “Saulo', Saulo',” he mũ. “Ă tỹ ne jé isũ ag vóg kónãn nĕ?” he tóg, vĕnh vĩ ti.

⁵ Kĩ Saulo tóg ěg Senhor mỹ: “ă tỹ ù nĕ?” he mũ.

Kĩ tóg ti mỹ: “tỹ sóg Jesus nĩ, ă tỹ ùn vóg kónãn sór tĩ ěn vỹ tỹ inh nĩ,” he mũ.

⁶ “Jĕg nĕ ra, cidade tag ki rã, tá ù tóg ă mỹ tónh mũ, ă tỹ nĕn han ke ti,” he tóg, vĕnh vĩ ti.

⁷ Ti mré mũ ag vỹ vĕnh vỹ tag mĕg mũ gé, hã ra ag tóg nĕn ù vĕg tũ nĩ. Kĩ ag kãne tóg jũrũn ke mũ.

⁸ Kĩ Saulo tóg jĕg nĕ mũ sir. Kĩ tóg tãmĩ ěvãnh sór mũ, hã ra tóg nĕn ù vĕg tũ nĩ. Kĩ ag tóg ti nĩgé kãgmĩ kĩ ti pére mũ mũ, cidade tỹ Damasco ra.

⁹ Kurã tãgtũ ki tóg ěvãnh tũ nĩ, kĩ tóg jĕg tũ (pĕ) nĩ gé, kron tũ (pĕ) ti nĩ gé, Saulo ti.

¹⁰ Damasco tá ke ù tóg nĩ nĩ, ti jyjy hã vỹ: Ananias, he mũ. Jesus mré tĩ ù vĕ. Kĩ Jesus tóg ti mỹ vĕnh ven mũ. Kĩ tóg: “Ananias',” he mũ.

Kĩ Ananias tóg ěg Senhor ti mỹ: “inh hã vĕ,” he mũ.

¹¹ Kĩ Jesus tóg ti mỹ: “jĕg nĕ ra,” he mũ. “Ěmĩn kuryj

he mū ěn ra tīg. Judas he mū ěn ĩn kĀra rĀ. Tá ũ tóg nĩ nĩ, ti jiji hĀ vỹ: Saulo, he mū. Cidade tỹ Tarso tá ke vē. Ěn mré vĭmĩnĩ,” he tóg. “Ha vé, inh mré tóg vĩ nĩ,” he tóg.

12 “Kỹ tóg ũ vég nĩ nĩ, ti jyjy hĀ vỹ: Ananias, he mū. Ā hĀ vē. Ā tỹ ti ĩn kĀra rĀnh ke vē. Ā tỹ Ā nĩgē tỹ ti mēnh ke vē. KỸ tóg ve mĀn ke mū, Ā tỹ ti mēn tỹ. Tag vég tóg nĩ nĩ, Saulo ti,” he tóg, Jesus ti, Ananias mỹ.

13 KỸ Ananias tóg ěg Senhor ti mỹ: “vēnh kar tóg ti kĀmēn tĩ hĀ ra, Ā tỹ inh mỹ tó mū tag ti,” he mū. “Jerusalém tá tóg Ā tũ ag vóg kónĀn,” he tóg.

14 “KỸ tóg permissĀo ma kĀtĩ mū, Topē tũ ki rĩr tĩ to pĀ'i mág tỹ ti mỹ han kỹ. KỸ tóg ũ tỹ Ā mré vĩ mū kar sigse sór mū, cidade tag ki,” he tóg, Ananias ti, Jesus mỹ.

15 KỸ ěg Senhor tỹ Jesus tóg ti mỹ: “ti venh tīg,” he mū. “Tĩ kuprēg isóg (mỹr), ti tỹ ijiji tó jé, fóg ag kar mỹ, kanhgág ag kar mỹ ke gé, povo tỹ Israel ag mỹ ke gé,” he tóg.

16 “Tĩ mỹ sóg ven mū, ti tỹ isugrĩn jagtar ke ti,” he tóg, Jesus ti.

17 KỸ Ananias tóg tĩ mū. Ti tỹ ĩn ěn tá jun kỹ tóg Ā nĩgē tỹ ti mēg mū, kỹ tóg ti mỹ: “Saulo’,” he mū. “Régre’,” he tóg mū. “Ěg Senhor vỹ inh jēnē, Jesus mỹr, sỹ Ā ve jé,” he tóg. “Tĩ ve Ā (mỹr), ěpřy kri, Ā tỹ tag ki jun mūn kĀ,” he tóg. “HĀ kỹ sóg kĀtĩ mū, Ā tỹ ve mĀn jé, Topē kupřĩg tỹ tỹ Ā jagrē nĩ jé,” he tóg, Ananias ti.

18 KỸ tóg vĀhĀ ti kanē tá pa mū, pirĀ fĀr ri ke. KỸ tóg ve há' he mĀn mū sir. KỸ tóg jēg nē mū sir. KỸ tóg ti kypég mū sir, Ananias ti.

19 KỸ tóg jēg mū gé sir, hĀ kỹ tóg tar' he mū sir. Damasco tá tóg nĩ nĩ ver, Jesus mrē mū tĩ ag mré.

20 KỸ tóg vēsỹmēr Jesus kĀmēn mū, Israel ag vēnh kanhrĀn jafĀ krēm. “Tỹ tóg Topē kósĩn nĩ,” he tóg mū, Jesus to.

21 Ũ tỹ ti vĩ mēg mū kar ag mỹ tóg e tĩ. “Jerusalém tá tóg ag vóg kónĀn, ũ tỹ Jesus tó mū ag,” he ag tóg. “KỸ tóg tag ki jun mū gé, ag sigse jé, Topē tũ ki rĩr tĩ tỹ pĀ'i mág ag mỹ ag taťĩ tīg jé,” he ag tóg, Saulo to. KỸ tóg ag mỹ e tĩ, ti tỹ Jesus to: Topē kósĩn vē,” hen kỹ.

22 HĀ ra Saulo tóg fe tar nĩ. KỸ tóg Israel ag kanhrĀn mū, cidade tỹ Damasco tá. Ag mỹ tóg Jesus kĀmēn mū. “Tỹ tóg Cristo nĩ, Jesus ti,” he tóg, ag mỹ Topē vĩ kĀmēn kỹ. KỸ tóg ag tỹ ti vĩ kafĀn sór mū hĀ ra ag mỹ vēnhmỹ tĩ sir.

*Saulo tỹ cidade tỹ
Jerusalém ra tīg*

23 KurĀ tỹ hēn ri ke tũg kỹ Israel ag tóg kejēn jagnē mré jykřén mū, Saulo tén ke to.

24 HĀ ra Saulo tóg mēg mū, ag tỹ ti to jykřén ěn to. Cidade ěn to ró jĀnkĀ tá ag tóg vĀjig nỹtĩ, ti jo, kurĀ kar ki, kuty tá ke gé, ag tỹ hēn ri ke mūn tá ti tén jé. KỸ tóg mēg mū sir, Saulo ti.

25 KỸ ti mré ke ag vỹ kuty tá kěj kĀkĀ ti nĩm kỹ ti tērem

mũ, cidade ẽn to ró to. Kĩ tóg Jerusalém ra tĩ mũ.

26 Ti tỹ Jerusalém tá jun kỹ tóg Jesus mré mũ ag mré nĩ sór mũ, Jesus mré mũ tĩ ag mré. Hã ra ag tóg ti kamẽg mũ. “Ti ón hỹn,” he ag tóg ti to, ti tỹ ag vóg kónãn jan kỹ.

27 Kỹ Barnabé tóg ti mré vĩ kỹ Jesus tỹ ùn vin mũ ag to ti pére tĩ mũ. Kỹ tóg ag mỹ ti tỹ Jesus ve ja ẽn kāmén mũ, ẽpry jagma. “Kỹ Jesus tóg ti mré vĩ ja nĩ gé,” he tóg. “Kar tóg Damasco tá ke ag mỹ Jesus kāmén ja nĩ gé, ti tỹ mũmẽg tũ nĩn kỹ,” he tóg, Barnabé ti.

28 Kỹ Saulo tóg ag mré tĩ nĩ ver, Jerusalém tá. Tá tóg Jesus kāmén mũ gé, ti tỹ mũmẽg tũ nĩn kỹ.

29 Kỹ tóg Israel ag mré vĩ mũ gé, ù tỹ Grego vĩ tó mũ ag mré ke gé. Ag tỹ ti vĩ kafãn kỹ tóg ag mré vĩ mũ. Hã ra ag tóg ti tén ke to jykrén mũ, Saulo tén ke to.

30 Kỹ Jesus mré ke ag tóg mẽg mũ gé, ag tỹ Saulo tén ke to jykrén mũ ẽn to. Kỹ ag tóg cidade tỹ Cesaréia ra ti pére mũ mũ. Tá junjun kỹ ag tóg cidade tỹ Tarso ra ti jẽnẽg mũ.

31 Jesus ki ge kỹ nỹtĩ ag kar vỹ jatun mỹ nỹtĩ nĩ sir, ù tỹ Topẽ vĩ mẽ jé vẽnh mãn tĩ ẽn ag. Jatun mỹ ag tóg nỹtĩ sir, ga tỹ Judéia tá, ga tỹ Galiléia tá ke gé, ga tỹ Samaria tá ke gé. Kỹ ag tóg jatun mỹ vẽnh kanhrãn mũ, Topẽ jykre tỹ. Topẽ vĩ ki ag tóg króm mũ, Topẽ kamẽg kỹ. Topẽ kuprĩg vỹ ag krĩn mũ. Kỹ ag krĩ vỹ kãnhv' he mũ. Kỹ ag tóg e nỹtĩ ge sir.

Enéias

32 Kejẽn Pedro tóg vẽnh kar ag vegvenh tĩ mũ. Kỹ tóg cidade tỹ Lida ra tĩ mũ gé, tá Topẽ tũ ag vegve jé.

33 Tá ù tóg nỹ nĩ, ti jijin hã vỹ: Enéias, he mũ. Grĩn kỹ tóg nỹ nĩ, ã cama kri. 8 anos han tóg, grĩ nỹ ki.

34 Kỹ Pedro tóg ti mỹ: “Enéias’,” he mũ. “Jesus Cristo vỹ ã han,” he tóg. “Jẽg nẽ ra, ã cama fi han ra,” he tóg.

35 Kỹ tóg vėsỹmér jẽg nẽ mũ. Kỹ cidade tỹ Lida tá ke kar ag vỹ ti vég mũ, cidade tỹ Saroná tá ke kar ag ke gé. Kỹ ag tóg ti ve kỹ Jesus ki ge mũ gé sir.

Dorcas fi

36 Cidade tỹ Jope tá ù fi tóg nĩ nĩ, Jesus mré tĩ mũ fi, fi jiji hã vỹ: Tabita, he mũ, hã vỹ: Dorcas, he mũ, fi jyty ti, fóg tỹ Grego vĩn ki. Ẽn fi hã vỹ nén kar há han mũ. Ẽn jagãgtar fag mỹ fi tóg nén vin tĩ.

37 Kejẽn fi tóg kaga nỹ nĩ, kỹ fi tóg ter mũ sir. Kỹ fag tóg fi kupe kỹ ãn to jãpry jafã tá fi fig mũ, kynh mỹ.

38 Jo Jope tóg Lida kakó kã nĩ, hã ra Pedro tóg Lida tá nĩ nĩ. Kỹ Jope tá ke ag tóg ti ki kanhró nỹtĩ, Pedron ki, Jesus mré mũ ag.

Kỹ ag tóg ùn régre ag jẽgnẽg mũ, ag tỹ ti mỹ: “kur kãtig mẽ han,” he jé.

39 Kỹ Pedro tóg vėsỹmér tĩ mũ. Kỹ tóg tá jun mũ. Hã ra Dorcas fi tóg ãn to jãpry jafã tá nỹ nĩ, ter kỹ. Pedro jun kỹ ag tóg ãn to jãpry jafã to jãpry mũ, ti mré. Kỹ ùn mén ter ja ẽn fag kar vỹ ti to kãmũ mũ. Kygfỹ

fag tóg mǔ. Ti mǔ fag tóg kur venven mǔ, fi tǔ fag mǔ kugrǔn ja ti, camisa, vestido ke gé, věnh kri fě ke gé. Dorcas fi tóg fag mǔ kugrǔn mẽ han ja nǔgtǔ.

⁴⁰ Kǔ Pedro tóg věnh kar mǔ: “ha pa jěg,” he mǔ. Kǔ tóg ā jakrǔ tǔ jěg kǔ Topě mré vǔ mǔ. Kǔ tóg vēser fi mǔ: “Tabita', nǔ ra,” he mǔ. Kǔ fi tóg mrin ke mǔ. Kǔ fi tóg nǔ mǔ, fi tǔ Pedro ven kǔ.

⁴¹ Kǔ tóg fi nǔgé kǔgmǔ kǔ fi fěg mǔ. Kǔ tóg věnh kar jé prěr mǔ, Topě tǔ kar, ũn mén ter ja ěn fag mré hǔ. Kǔ tóg fag mǔ fi ven mǔ.

⁴² Kǔ Jope tá ke kar ag vǔ mẽg mǔ sir, fi rǔr mǔn ěn ti. Kǔ ũ tǔ hěn ri ke ag vǔ Jesus ki ge mǔ sir.

⁴³ Kǔ Pedro tóg cidade tǔ Jope tá nǔ nǔ ver, Simão he mǔ ěn mré, ũ tǔ nén fár tǔ tǔnǔj ke tǔ ěn mré.

10

Capitão tǔ Cornélio

¹ Cidade tǔ Cesaréia tá ũ tóg nǔ nǔ, ti jiji hǔ vǔ: Cornélio, he mǔ. Soldado tǔ 100 to pǔ'i vē, ag tǔ ũ to: ga tǔ Itália tá ke ag, he mǔ ěn to capitão vē.

² ěn vǔ Topě to há nǔ, kǔ tóg Topě kaměg tǔ. Ti mré ke kar vǔ ge nǔtǔ gé. Povo tǔ Israel ag kǔmǔ ũn jagǔgtar ag jagǔgtǔn tóg tǔgtǔ, ti tǔ tǔ Israel ag mré ke tǔ hǔ ra. Topě mré tóg vǔ tǔ gé.

³ ěn tóg nén ně vég mǔ, 3 horas ki, ā nǔr tǔ ra. Kǔ tóg Topě tǔ jěně jafǔ jun vég mǔ.

Kǔ tóg ti mǔ: “Cornélio',” he mǔ, Topě tǔ jěně jafǔ ti.

⁴ Ti tǔ ti ve kǔ ti fe tóg jǔrǔn ke mǔ, kǔ tóg: “ne ně?” he mǔ.

Hǔ ra tóg ti mǔ: “Topě vǔ ā vǔ mẽg mǔ (mǔr),” he mǔ. “Ā tǔ ũn jagǔgtar ag mǔ nén nǔm tǔ vég tóg mǔ gé,” he tóg. “Hǔ kǔ tóg ā to jykrén mǔ,” he tóg.

⁵ “Kǔ ũ jěgněmnǔ, ag tǔ Jope ra mǔ jé. Tá ũ tóg nǔ nǔ, ti jiji hǔ vǔ: Simão, he mǔ, kǔ ti jyjy ũ hǔ vǔ: Pedro, he mǔ. ěn jé prěrnmǔ,” he tóg.

⁶ “Simão mré tóg nǔ nǔ, ũ tǔ nén fár tǔ tǔnǔj ke tǔ ěn mré, kǔ ti ĩn vǔ goj kafǔ tǔ fyr tá jě nǔ,” he tóg.

⁷ Kǔ Topě tǔ jěně jafǔ tóg tǔ mǔ, ti mǔ tó kar kǔ. Kǔ capitão ěn tóg ā camarada régre ag jé prěr mǔ, soldado pir mré, ũ tǔ Topě kaměg mǔ ěn ti. ũ tǔ ā rǔnrǔj han mǔ ěn jé tóg prěr mǔ.

⁸ Kǔ tóg ag mǔ ā tǔ nén ve ja tó mǔ, kǔ tóg cidade tǔ Jope ra ag jěgněg mǔ.

⁹ Tǔ vaj kǔ ag tóg cidade ěn to hǔ nǔtǔ, meio dia ki. Kǔ Pedro tóg ĩn kri kyjer ěn ra tǔpry mǔ, Topě mré vǔ jé.

¹⁰ Kǔ tóg kókǔr mǔ. Kǔ tóg fag mǔ vējén to vǔ mǔ. Fag tǔ ver ti mǔ han mǔ ra tóg nén ně vég mǔ, Pedro ti.

¹¹ Kǔ tóg ag tǔ kanhkǔ nón mǔ vég mǔ. Tá nén ũ tóg kǔtère mǔ. Kǔ tóg tǔ kur mág ve nǔ. Ti péno kygje kǔ tóg ga kri kǔtère mǔ, kur ti.

¹² Hǔ ra bicho kar tóg kur ěn kǔki nǔtǔ nǔ, fa tǔ 4 (ke) kar tóg nǔtǔ, ũ tóg ā nug kri mǔgtǔ gé, sēsǔ kar ke gé, jēsǔ kar.

13 Kǵ vĕnh vĭ tóg mĕ há tĩ, kǵ tóg: “tág’,” he mũ. “Tǎnh kǵ kó, vỹ,” he tóg.

14 Kǵ Pedro tóg ěg Senhor ti mỹ: “nejé,” he mũ. “Nén ũ jĕggry ko ja tũ sóg nĩ (mỹr),” he tóg. “Ĕg povo jykre tũ vĕ, ěg tỹ bicho ěn kon kǵ,” he tóg.

15 Kǵ tóg ti mỹ vĭ mǎn mũ sir jǎvo, vĕnh vĭ ti, kǵ tóg: “Topĕ tóg hǎ ra to: há ti nĩ, he mũ. Kǵ jĕggryg tũg nĩ,” he tóg.

16 Ge tǎgtũ han tóg, kǵ nĕn nĕ ěn tóg vég tũ’ he mũ sir, kanhkǎ tá.

17 Hǎ ra tóg Pedro mỹ e tĩ. Ti tỹ to jykrĕn tũ tóg tĩ, ti tỹ vég mũ to. Ti tỹ ver to jykrĕn mũ ra ag tóg junjun mũ, Cornélio tỹ ũn jĕgnĕg mũ ag. Ũ tóg ag mỹ: “Īn ěn vĕ,” he ja nĩ.

18 Kǵ ag tóg tá junjun mũ. Ró to jĕgĭĕ kǵ ag tóg jamǎ hár(a) ke mũ, kǵ ag tóg: “Simão Pedro ag mỹ ki nỹtĩ?” he mũ.

19 Hǎ ra Pedro tóg ver ǎ tỹ vég mũ ěn to jykrĕn nĩ nĩ. Kǵ Topĕ kuprĭg tóg ti mỹ ke mũ. “Ha vé, ũn régre ag vỹ ǎ jé prĕr mũ,” he tóg.

20 “Jĕg nĕ ra, kǎtĕre ra, tũg ra ag mré,” he tóg. “To jykrĕn tũg. Isỹ ag jĕgnĕ vĕ,” he tóg, Pedro mỹ, Topĕ kuprĭg ti.

21 Kǵ Pedro tóg ag to kǎtĕre mũ, kǵ tóg ag mỹ: “inh hǎ vĕ,” he mũ. “Inh jé prĕr ja ǎjag tóg nĩ,” he tóg. “ǎjag tỹ ne to kǎmũ nĕ?” he tóg ag mỹ.

22 Kǵ ag tóg ti mỹ: “Cornélio tỹ ěg jĕgnĕ vĕ,” he mũ. “Capitǎo vĕ, Cornélio ti. ũn jykre kuryj vĕ, kǵ tóg Topĕ kamĕg tĩ,” he ag tóg. “Israel

kar ag tóg ti to há nỹtĩ, ti to ag tóg vĭ há han tĩ. Topĕ tỹ jĕnĕ jafǎ vỹ ti mỹ ke ja nĩ, ti tỹ ǎ jé prĕr jé, ǎ tỹ ti ĩn ra tũg jé, ǎ tỹ ti mỹ Topĕ kǎmĕn jé,” he ag tóg, Pedro mỹ.

23 Kǵ Pedro tóg ag mỹ: “kǎge jĕg ra,” he mũ. Kǵ ag tóg tá nũgnũr mũ. Tỹ vaj kǵ tóg ag mré tĩ mũ. Kǵ Jope tá ke ũ ag tóg ti mré mũ mũ gé, Jesus mré ke ũ ag.

24 Tỹ vaj kǵ ag tóg Cesaréia tá junjun mũ. Tá Cornélio tóg ag jǎvǎnh mũ. Hǎ kǵ tóg ǎ kanhkǎ ag kar kógfyn ja nĩ, ag mỹ vĕnh vĭ jĕnĕ ja tóg nĩ, ǎ mré ke kar ag mỹ. Kǵ ag tóg kǎmũ ja nĩ, kǵ ag tóg tá nỹtĩ sir.

25 Pedro tỹ tá jun kǵ Cornélio tóg ti kato tĕ mũ, kǵ tóg ti jo mũg ke mũ. “Ti hỹn tỹ Topĕ nĩ,” he tóg, hǎ kǵ tóg ti jo mũg ke mũ, Cornélio ti.

26 Hǎ ra Pedro tóg ti fĕg mũ, kǵ tóg: “ke tũg ra,” he mũ. “Tỹ sóg ěprǎ ke nĩ gé,” he tóg ti mỹ.

27 Kǵ tóg ti mỹ vĭ há han mũ. Kǵ tóg kǎra rǎ kǵ ũn e ag vég mũ, ũn vĕnh mǎn kǵ nỹtĩ ag, Pedro ti.

28 Kǵ tóg ag mỹ: “Israel ag vỹ fóg mré nĩ tũ nĩgtĩ (mỹr),” he mũ. “Ĕg jykrĕn hǎ vĕ,” he tóg. “Kǵ ěg tóg fóg ĩn kǎra rǎ tũ nĩgtĩ gé (mỹr) sir. Tag ki kanhró ǎjag tóg nỹtĩ,” he tóg. “Hǎ ra Topĕ tóg inh kanhrǎn, ǎ jykre tỹ. Kǵ sóg vĕnh kar ĩn kǎra rǎnh mũ, jĕggry tũ nĩn kǵ,” he tóg.

29 “Hǎ kǵ sóg jatun mỹ kǎtĭg, vĕsỹmĕr, ǎjag tỹ inh jé prĕr kǵ. Kǵ sỹ ǎjag ki jĕmĕnh há tóg ti.

Ājag tỹ hē ri ke jé inh jé prēr nē?” he tóg ag mỹ, Pedro ti.

30 Kỹ Cornélio tóg ti mỹ: “4 dias vē ha ũri,” he mũ, “kỹ sóg Topē mré vīnh ke nĩ nĩ, jēg tũ nĩn kỹ. 3 horas vē. Inh ĩn krēm sóg Topē mré vīnh ke nĩ nĩ, kỹ sóg ũ vég nĩ nĩ. Ti kur tóg kókov nĩ.

31 Kỹ tóg inh mỹ: “Cornélio,” he mũ. “Topē vỹ ā vī mēg mũ. Ā tỹ ũn jagēgtar mỹ nén vin ěn ve tóg. To tóg jykrén, Topē ti,” he tóg.

32 “Kỹ Jope ra ũ jēnē. Tá Simão jé prēr, ũ tỹ Pedro he mũ ěn ti. Nén fár tỹ tãñaj ke tĩ ěn ĩn krēm tóg nĩ nĩ, hã vỹ: Simão, he mũ. Ti ĩn vỹ goj kafã tũ fyr tá jē nĩ,” he tóg inh mỹ, Topē tỹ jēnē jafã ti,” he tóg, capitão ti.

33 “Kỹ sóg vēsỹmēr ā to ũ ag jēgnē. Kỹ ā tóg kãtĩ mũ. Kỹ tóg há tĩ, ā kãtĩg ti. Hã to ěg tóg vēnh mãn, Topē jo. Topē tỹ ā mỹ nén tó ja kãmén ra ěg mỹ. ěg tỹ mēnh há tóg tĩ vē,” he tóg, Cornélio ti, Pedro mỹ.

Pedro tỹ Cornélio mỹ Topē vĩ tó

34 Kỹ Pedro tóg ag mỹ kãmén mũ, kỹ tóg: “vãhã tóg sỹ to jykrén mũ,” he mũ. “Topē mỹ nén ũ tũ vē, Israel he mũ ěn ag, fóg he mũ ěn ag ke gé, kanhgág ag ke gé, Israel jykre han tũ kar ag,” he tóg.

35 “Ũ tỹ ti kamēg mũ vỹ ti mỹ há nỹtĩ, Topē mỹ, ũ tỹ vēnh jykre kuryj han mũ ag kar, povo kar kãmĩ,” he tóg.

36 “Povo tỹ Israel mỹ tóg ā vĩ ěn jēnē ja nĩ, Topē ti. ěg

mỹ tóg tó, ěg tỹ jatu nỹtĩ jé, ti tỹ Jesus Cristo tugrĩn ěg to há nĩn kỹ. Jesus ěn vỹ tỹ vēnh kar Senhor nĩ,” he tóg.

37 “Vēnh vĩ ěn mē kãn ājag tóg huri. Judéia kar mĩ tóg rũm ke ja nĩ. João tóg vēnh kar mỹ: “ājag jykre tovãnh ra,” he ja nĩgtĩ. Kỹ tóg ag kygpe ja nĩ. Kar kỹ Jesus tóg Galiléia mĩ tĩg vén mũ, Nazaré tá ke ěn ti.

38 Kỹ Topē tóg Jesus mỹ ā kuprĩg jēnē ja nĩ. Kỹ tóg ti mỹ vēnh jykre nĩm ja nĩ. Ga kar mĩ tóg tĩg ja nĩgtĩ. Nén kar há han ja tóg nĩgtĩ. Japo tỹ ũn vóg kónãn mũ ag tỹ há’ he ja tóg nĩ gé. Topē hã ne ti mré han ja nĩgtĩ hã ra,” he tóg.

39 “Nén kar ěn ve ja ěg tóg nĩgtĩ, ti tỹ nén han mũ kar, ga tỹ Judéia tá, Jerusalém tá ke gé. ěn tỹ ag tóg cruz to ti sa ja nĩgtĩ, ti tén ja ag tóg nĩgtĩ.

40 Kurã tãgtũ tũg kỹ Topē tóg ěn rĩn mãn ja nĩgtĩ, kỹ tóg vēnh ven ja nĩgtĩ,” he tóg, Pedro ti.

41 “Hã ra vēnh kar vỹ ti ve ja tũ nĩ. ěg hã mỹ tóg vēnh ven ja nĩ. Hã to Topē tóg ěg kuprēg ja nĩgtĩ. Ti mré ěg tóg jēn ja nĩgtĩ, kron ja nĩgtĩ gé, ti tỹ ā ter kar rĩr mãn kỹ,” he tóg, Pedro ti.

42 “Kỹ tóg ěg mỹ: “vēnh kar mỹ inh kãmén nĩ,” he ja nĩgtĩ. “Topē vỹ ti tỹ vēnh kar kãfór han, hemnĩ,” he ja tóg nĩ ěg mỹ. “Kỹ tóg vēnh kar tỹ nén han mũ venh ke mũ sir. Ũ tỹ ũri rĩnrĩr mũ ag kar tỹ nén hyn han mũ ve jé tóg ke mũ, ũn ter mũ ag kar tỹ nén hyn han mũ kar ke gé, hemnĩ,” he ja tóg

nĩgtĩ ãg mĩ, Jesus ti,” he tóg, Pedro ti.

43 “Vāsỹ Topẽ vĩ tó tĩ ag kar vỹ ti kāmén ja nĩgtĩ, kỹ ag tóg: “ũ tỹ ti ki rã mũ mỹ tóg vẽn h pãte fón ke mũ, Topẽ ti, ti tỹ ti vĩ mranh mũ ti,” he ja nĩgtĩ. “Cristo tigrĩn tóg vẽn h pãte fón ke mũ,” he ja ag tóg nĩgtĩ, Topẽ vĩ tó tĩ ag,” he tóg, Pedro ti.

Topẽ kuprĩg tỹ tỹ ag jagrẽ nĩ

44 Pedro tỹ ver tag tó kỹ vãhã Topẽ kuprĩg tóg ag ki rã mũ, ã tỹ ti vĩ mẽg mũ ag ki.

45 Kỹ Israel ag tỹ Jesus ki ge kỹ nỹtĩ ag mỹ tóg e tĩ, ã tỹ Pedro mré kãmũ ag mỹ. “Topẽ kuprĩg tóg tỹ ag jagrẽ nĩ!” he ag tóg. “Ag tỹ tỹ fóg nỹtĩ ra tóg ag ki rã mũ!” he ag tóg.

46 “Vẽn h vĩ ã tũgtó ag mũ (mỹr),” he ag tóg. “Vẽn h vĩ ã ki ag tóg Topẽ mỹ: há ã tóg nĩ, he mũ,” he ag tóg.

47 Kỹ Pedro tóg: “ũ tóg ag to: ag kygpenh ke tũ ãg nĩ, henh ke tũ nĩ (mỹr),” he mũ. “Topẽ kuprĩg tỹ ag jagrẽ nỹtĩ. ãg ki rã ri ke han tóg ag ki, Topẽ kuprĩg ti. Kỹ ãg hỹn ag kygpenh mũ ha,” he tóg, Pedro ti.

48 Kỹ tóg ã mỹ: “ag kygpe ra ge, Jesus Cristo jiji tó kỹ,” he mũ sir.

ãjag kygpe kar kỹ ag tóg Pedro mỹ: “ver ãg mré nĩ,” he mũ. Kỹ tóg ag mré nĩ sĩ han kar kỹ tĩ mũ sir.

11

Pedro tỹ Jerusalém tá ã tỹ nén han mũ tó

1 Kỹ Jesus tỹ ãn vin mũ kar ag vỹ jẽmẽg mũ, fóg ag tỹ Topẽ vĩ kri fig mũ ti. Judéia kar mũ ag tóg jẽmẽg mũ, Jesus mré ke kar ag.

2 Kỹ Pedro tóg Jerusalém ra tĩ mũ. Kỹ tá Jesus ki ge mũ ag tóg ti mré vĩ mũ. Ti mré vĩ mũ ag tóg: “vẽn h kar vỹ ãjag gré junjun fár kym ke mũ, ãg jykre han jé, ag tỹ Topẽ jykre han sór kỹ,” he ag tóg tĩ. ãn ag vỹ Pedro mỹ vĩ mũ,

3 kỹ ag tóg: “ãn fár kym ja tũ ag mré ã tóg jẽg mũ (mỹr), ag ãn ki,” he mũ.

4 Kỹ Pedro tóg ag mỹ nén kar ãn kãmén mũ,

5 kỹ tóg: “cidade tỹ Jope tá sóg nĩ ja nĩ, kỹ sóg Topẽ mré vĩ nĩ ja nĩgtĩ. Ti mré vĩ kỹ sóg nén nẽ vég mũ,” he tóg. “Nén gé(g) tĩg jafã vẽ, kur mág ri ke. Ti péno kygje tóg kanhkã tá kãtére mũ. Kỹ tóg inh ki jun mũ.

6 Kỹ sóg kãki ãvãnh mũ, kỹ sóg bicho kar vég mũ, fa tỹ 4 ke ti nỹtĩ, nẽn tãn ag mré hã, ag nug kri mũ tĩ ag mré hã, sēsĩ kar mré hã, jēsĩ kar.

7 Kỹ sóg vẽn h vĩ mẽg mũ, kỹ tóg: “tág', vỹ,” he mũ. “Tãnh kỹ kó,” he tóg.

8 Kỹ sóg ti mỹ: “nejé,” he mũ. “Nén ã jẽggry ko ja tũ sóg nĩ,” he sóg ti mỹ. “ãg jykre tũ vẽ, ãg tỹ bicho ãn kon kỹ,” he sóg ti mỹ.

9 Kỹ tóg inh mỹ tó mãn mũ gé, kanhkã tá vẽn h vĩ ti, kỹ tóg: “Topẽ tóg hã ra to: há tĩ nĩ, he mũ. Kỹ jẽggry tũg nĩ,” he tóg, kanhkã tá.

10 Ge tãgtũ han tóg, kỹ nén

nē ěn tóg vég tũ' he mũ sir, kanhkã tá.

¹¹ Kĩ vės̄ymér ũn tãgtũ ag vỹ tá nỹtĩ, inh nĩ ěn rã. Cidade tỹ Cesaréia tá ag kãmũ ja nĩgtĩ, fóg tỹ iso ag jěgněn kỹ.

¹² Kĩ Topě kuprĩg tóg inh mỹ: “ha jatun mỹ ag mré tĩg,” he mũ. Kĩ tag ag tóg inh mré mũ mũ, ũ tỹ 6 (ke) tag ag, Jesus mré ke tag ag. Kĩ ěg tóg ěn ĩn kãra ge mũ sir.

¹³ Kĩ tóg ěg mỹ ã tỹ Topě tỹ jěně jafã ve ja tó mũ. Ti ĩn kãtã tóg něji jě ja nĩ, Topě tỹ jěně jafã ti. Kĩ tóg něji ti mỹ: “Jope ra ũ jěgně,” he mũ. “Tã Simão jé prěr, ũ tỹ Pedro he mũ ěn,” he ja tóg něji ti mỹ.

¹⁴ “Ěn vỹ ã mré vĩnh mũ. Ti vỹ tỹ ã tóg kren ke mũ, ã mré ke kar fag ke gé,” he ja tóg něji nĩ ti mỹ, Topě tỹ jěně jafã ti,” he tóg, Pedro ti.

¹⁵ “Kỹ sóg ag mỹ kãmén mũ. Isỹ tó sĩ han mũ ra Topě kuprĩg tóg ag ki rã mũ. Ti tỹ ěg ki rã ri ke han tóg mũ, kurã ěn kã.

¹⁶ Kĩ sóg Jesus vỹ to jykrén mũ, ti tỹ ěg mỹ: João tóg goj tỹ ag kygpe ja nĩgtĩ, hã ra Topě kuprĩg tóg ag kãra rãnh mũ, tỹ vėnh kype ri ke vė sir, he ěn to,” he tóg, Pedro ti.

¹⁷ “Kỹ Topě vỹ ag jagrěn mũ, ã kuprĩg tỹ, ti tỹ ěg jagrěn ri ke vė, ěg tỹ Jesus Cristo ki ge kỹ. Hã kỹ sóg Topě kato tẽ jãvãnh ja nĩ,” he tóg, Pedro ti.

¹⁸ Ag tỹ tag mẽ kỹ ag krĩ tóg kusa' he mũ. Kĩ ag tóg: “Topě vỹ fóg ag krĩn mũ gé, ag tỹ ãjag jykre tovãnh jé, ag tỹ ěg

rĩr krỹg ja tũ ve jé,” he ag tóg mũ.

Antioquia tá ke ag tỹ Topě vỹ kri fi

¹⁹ Ag tỹ Estêvão tén kar kỹ Jesus ki ge kỹ nỹtĩ ag tóg hěn ra mũ mũ, ag tỹ ag vóg kónãnh kỹ. Kĩ ag tóg ga tỹ Fenícia ra mũ mũ, goj vãso tỹ Chipre ra, cidade tỹ Antioquia ra ke gé. Ag mũn kỹ ag tóg Israel ag hã mỹ Topě vỹ tó mũ.

²⁰ Kejěn Chipre tá ke ũ ag tóg cidade tỹ Antioquia ra mũ mũ, Cirene tá ke ag ke gé. Ěn ag tóg fóg tỹ Grego vỹ tó mũ ag mỹ Jesus Cristo kãmén mũ, vėnh vỹ sér tag ti.

²¹ Kĩ Topě tóg ag mré ag krĩn mũ. Kỹ ũ tỹ hěn ri ke ag tóg Jesus ki ge mũ, Topě jykre han jé.

²² Kĩ Jerusalém tá ke ag tóg mẽg mũ, fóg ag tỹ Jesus vỹ kri fig mũ ti. Jerusalém tá Jesus ki ge kỹ nỹtĩ ag tóg mẽg mũ gé, ũ tỹ tá Topě vỹ mẽ jé vėnh mãn tĩ ag. Kỹ ag tóg Barnabé jěněg mũ, ti tỹ Antioquia ra tĩg jé.

²³ Ti tỹ tá jun kỹ ti fe tóg mrin ke mũ, Topě tỹ ag jagãgtãnh kỹ. Kĩ tóg ag jyvėn mũ, ag tỹ Jesus ki rã to krónh ke tũ nĩn jé, ag tỹ fe tar nỹtĩn jé.

²⁴ Barnabé vỹ tỹ ũn vỹ há nĩ, Topě kuprĩg vỹ tỹ ti jagrě nĩ. Kỹ ti jykre kar tóg Jesus ki rã ja nĩ. Kỹ ũ tỹ hěn ri ke ag vỹ Jesus ki ge mũ gé sir, ti tỹ ag jyvėn kỹ.

²⁵ Kĩ Barnabé tóg cidade tỹ Tarso ra tĩ mũ, Saulo jãvãnh jé, tá.

26 Ti tỹ ti ve kỹ tóg ti pére tĩ mũ, Antioquia ra. Kỹ ag tóg prỹgpir han, Antioquia tá. Jesus ki ge kỹ nỹtĩ ag tỹ vẽn h mǎn kỹ ag tóg ag kanhrǎn tĩ, Barnabé ti, Saulo ti ke gé. Kỹ ũn e vỹ Barnabé ag vĩ jēmēg tĩ. Kỹ ag tóg Antioquia tá ag tóg ũ tỹ Jesus mré mũ ag to: “Cristo mré ke ag,” he vén. Kỹ ag jiji vẽn sir, hǎ vỹ: Cristo mré ke ag, he mũ.

27 Kejēn Jerusalém tá ke ũ ag tóg Antioquia tá junjun mũ, Topē vĩ tó tĩ ag.

28 Ag kǎ ũ jijin hǎ vỹ: Ágabo, he mũ. Ēn vỹ kejēn Topē kuprĩg tỹ ti krĩn kỹ: “kejēn ěg tóg prỹg venh mũ, kǎnhmar,” he mũ, “ga kar mĩ hǎ,” he tóg. Kỹ tóg Cláudio tỹ pǎ'i tỹ imperador nĩn kỹ tóg ge nĩ.

29 Kỹ ag tóg prỹg nĩnh ken kỹ Jesus mré mũ ag tóg Judéia tá ke ag to jykrén mũ sir. Kỹ ag tóg: “ěg hỹn ag mỹ nén ũ jēnēnh mũ, ag tỹ kon jé,” he mũ. Kỹ vẽn h kar vỹ ag tũ kjuu vin han mũ, ag tỹ Judéia tá Jesus mré ke ag mỹ jēnē jé.

30 Kỹ ag tóg Barnabé jēnēg mũ, Saulo ke gé, ag tỹ gé(g) mũ jé, kófa ag mỹ vin jé, ũ tỹ Jesus ki ge kỹ nỹtĩ ag ki rĩr tĩ ag mỹ. Kỹ ag tóg ke mũ sir.

12

Ag tỹ Pedro se

1 Kejēn pǎ'i tỹ rei tỹ Herodes vỹ Jesus ki ge kỹ nỹtĩ ũ ag sigség mũ, ag vóg kónǎn jé.

2 Kỹ tóg soldado jēnēg mũ, ti tỹ Tiago tén jé, João kǎke ěn. Kyfé téj tỹ tóg ti tén mũ, rógro

téj tỹ, soldado ti, Herodes tỹ ti jēnēn kỹ.

3 Kỹ tóg Israel ag mỹ há tĩ, ti tỹ Tiago tén kỹ. Kỹ Herodes tóg Pedro kǎgmĩg mũ gé sir. Festa kǎki tóg ti kǎgmĩg mũ. Festa ěn ki ag tóg pǎo jēgjǎ tũ ko tĩ, Israel ag. Ag jykre vẽn.

4 Soldado ag tỹ Pedro ve kỹ ag tóg vèse ja kǎki ti fón mũ. Soldado tỹ 16 ag vỹ ti ki rĩr mũ, ũ tỹ 4 tỹ ti ki rĩr nỹtĩn kỹ ũ tỹ 4 ũ ag nỹtĩg ja ki nỹtĩ ke tĩ, jagnē ri kén. “Festa tỹ Páscoa kar kỹ sóg ag mỹ ti ven mũ, ag tỹ ti vóg kónǎn jé,” he tóg, Herodes ti.

5 Kỹ Pedro tóg se kỹ jē nĩ. Hǎ ra Jesus ki ge kỹ nỹtĩ ag tóg ti jo Topē mré vĩ kỹ nỹtĩ, ag tỹ to krónh ke tũ nĩn kỹ.

Pedro tỹ kavari nĩ

6 Tỹ vaj kỹ Herodes vỹ ag mỹ ti ven sór mũ. Tỹ kuty ěn kǎ Pedro tóg soldado régre ag kjuu ki nũr mũ. Ferro régre tỹ tóg se kỹ nỹ ag mré. Soldado ũ ag tóg vèse ja jǎnkǎ ki rĩr mũ.

7 Kỹ vǎhǎ Topē tỹ jēnē jafǎ tóg ti mré jē nĩ, kỹ tóg ĩn ěn krēm jēngrē nĩ, kuty hǎ ra. Ēn tóg Pedro ki pérén ke mũ, ti kǎvy ki. Ti rĩn tóg mũ, kỹ tóg ti mỹ: “kur nĩ,” he mũ. Kỹ ti nĩgē se ja tóg varan ke mũ, ferro ěn ti. Kỹ tóg kavari kỹ nĩ nĩ, kyvari kỹ, Pedro ti.

8 Kỹ Topē tỹ jēnē jafǎ tóg ti mỹ: “vēsóg fĩ ra,” he mũ. “Ā pēn né tu ra gé, Ā pēn to ró ti,” he tóg. Kỹ tóg ke mũ sir. Kỹ tóg ti mỹ: “Ā kur rỹ tu kỹ inh nón kǎtĩg,” he mũ.

9 Kỹ tóg kǎkutē mũ. Ti nón tóg tĩ mũ, Pedro ti. Hǎ ra tóg ti

mỹ tỹ nén ũ ve jê, ti tỹ vég mũ ti. Ti mỹ tóg tỹ ti vênhpéti ve tĩ, Topê tỹ jênê jafã tỹ nén han mũ ti.

¹⁰ Jãnkã ki rĩr vén mũ ên pátén ag tóg mũ, jãnkã ki rĩr mũ ũ ke gé. Kĩ ag tóg jãnkã mág tá junjun mũ, ferro tỹ han kũ jê ên, kyfé tỹ han kũ jê ên, ũn tỹ cidade to nón mũ ên. Jãnkã ên vỹ vêsógki rãm ke mũ ag jo. Kĩ ag tóg kãpa mũ sir. Êpry jagma ag tóg mũ mũ, êmĩn jagma. Kĩ vãhã Topê tỹ jênê jafã tóg tĩ mũ sir.

¹¹ Kĩ vãhã Pedro tóg mrin ke mũ, kũ tóg: “vãhã sóg ki kanhró nĩ,” he mũ. “Topê vỹ ã tỹ jênê jafã jênê ja nĩ, kũ tóg inh kren han mũ, pã'i tỹ Herodes jo. Israel kar ag tóg inh jagtar nĩnh ke jãvãnh mũ, hã ra sóg venh ke tũ nĩ,” he tóg, Pedro ti.

¹² To jykrén kũ tóg Maria fi ãn ra tĩ mũ, João mĩnh ên fi, ag tỹ ũ to: Marcos, he mũ ên mĩnh fi. Fi ãn krêm ag tóg vênh mãn kũ nỹtĩ nĩ, Topê mré ag vỹ nỹtĩ nĩ, ũ tỹ hên ri ke ag.

¹³ Kĩ tóg ãn to ró jãnkã tỹ tórón' tórón' ke mũ. Kũ fi camarada fi tóg venh kãtĩ mũ. Fi jyjy hã vỹ: Rode, he mũ.

¹⁴ Kĩ fi tóg Pedro vỹ ki kanhró nĩ, hã ra fi tóg ti mỹ nón tũ nĩ, róm tũ fi nĩ, jãnkã ti, fi fe tỹ mrin ke mũ ra. Fi tỹ ãn kãra rãn kũ fi tóg vênh kar mỹ: “Pedro vỹ ró to jê,” he mũ.

¹⁵ Kĩ ag tóg fi mỹ: “krĩ vênhmỹ ã nĩ,” he mũ. Hã ra fi tóg: “ti hã vê,” he mũ. Kĩ ag tóg fi mỹ: “ti ki rĩr tĩ ên vê hỹn,” he mũ.

¹⁶ Kĩ Pedro tóg ver re tá jê nĩ, jãnkã tỹ tórón' tórón' ke mãn kũ. Kĩ ag tóg ti mỹ róm mũ, jãnkã ti. Ti vég ag tóg mũ sir, kũ tóg ag mỹ e tĩ.

¹⁷ Kĩ Pedro tóg ag mỹ ã nĩgê tỹ ge mũ, ag tỹ katy' he jé. Kĩ tóg ag mỹ Topê tỹ ti kavãn tó mũ sir, Topê tỹ ti kyvãn kũ. Topê tỹ vêse ja kãtã ã kutêm kãmén tóg mũ sir. Kĩ tóg ag mỹ: “Tiago mỹ kemnĩ, Jesus mré ke kar ag mỹ ke gé,” he mũ. Kĩ tóg Jerusalém tá kutê kũ êmã ũ ra tĩ mũ sir.

¹⁸ Tỹ vaj kũ soldado ag fe tóg jũrũn ke mũ. “Pedro hỹn hê kãtã vyr, ti hỹn ne kãtã vyr?” he ag tóg mũ, ti jãvãnh kũ.

¹⁹ Kĩ Herodes tóg ũ ag jêgnêg mũ gé, ti kãgmĩ jé. Hã ra ag tóg ti vég tũ nĩ gé. Kĩ Herodes tóg Pedro ki rĩr mũ ag ki jêmêg mãn mũ. Kar kũ tóg soldado ũ ag mỹ: “ag kãgtén ra, ti ki rĩr mũ ag,” he mũ. Kĩ ag tóg ag kãgtén mũ sir.

Kar kũ Herodes tóg Judéia tá kutê kũ cidade tỹ Cesaréia ra tĩ mũ sir, tá nĩ jé.

Herodes ter

²⁰ Herodes tóg cidade tỹ Tiro tá ke ag to jũ mũ, cidade tỹ Sidom tá ke ag to ke gé. Ên ag tóg Herodes nĩgja tá junjun mũ. Kĩ ag tóg pã'i sĩ mré vỹ mũ, ti jiji hã vỹ: Blasto, he mũ. Herodes vỹ ti tỹ pã'i han ja nĩ. Ên mỹ ag tóg to vỹ mũ, ti tỹ ag jagfy vỹ jé, pã'i tỹ Herodes mré, ti tỹ ti fe tỹ há' he jé. Herodes krêm ke ag tóg ag mỹ vjêñ vêne he ja nĩgtĩ, Tiro tá

ke ag mǎ, Sidom tá ke ag mǎ ke gé. Herodes tǎ ag to jũ nǎn kǎ ag tóg tá vĕjĕn ve mǎn tũ nǎ sir. Hǎ kǎ ag tóg ti fe tǎ há' he sór mũ, ti tǎ ag mǎ vĕne he mǎn jé.

²¹ Kǎ Herodes tóg ag mǎ kurǎ nǎm mũ. Kǎ tóg ǎ kur sǎnvĩ ěn tu mũ, pǎ'i kur ěn ti. Kǎ tóg ǎ nǎgja kri nǎ kǎ ag mǎ vĩ mág han mũ.

²² Kǎ vĕnh kar tóg ti to: “ĕprǎ vĕnh vĩ pijé!,” he mũ. “Tǎ tóg Topĕ vĩ mĕ tĩ, ti vĩ ti,” he ag tóg mũ.

²³ Kǎ vĕsǎmĕr Topĕ tǎ jĕnĕ jafǎ tóg ti vóg kónǎn mũ sir, ti tǎ ag mǎ: “vó,” he tũ nǎn kǎ. “Inh pi(jé) tǎ Topĕ nǎ!,” he ja tũ tóg nǎ, hǎ kǎ tóg ti vóg kónǎn mũ sir. Kǎ ti nug ga vǎ ti kagrǎg mũ, hǎ kǎ tóg ter mũ.

Barnabé tǎ Saulo mré Topĕ vĩ tónh tǎg

²⁴ Jó ũ tǎ hĕn ri ke ag vǎ Topĕ vĩ mĕg mũ, kǎ ag tóg Jesus ki ge mũ.

²⁵ Kǎ Barnabé vǎ Saulo mré ǎgag tǎ nĕn gé(g) kǎmũ mũ ěn vin mũ, Jerusalém tá ke ag mǎ. Prǎg nǎn kǎ Jesus ki ge kǎ nǎtĩ ag tóg Jerusalém tá ke ag mǎ vĕjĕn jĕgnĕ ja nǎgtĩ. Ag mǎ vĕjĕn ěn vin kǎ ag tóg vǎnvǎn ke mũ sir, Barnabé ti, Saulo ti ke gé. João pére ag tóg mũ mũ, Marcos he mũ ěn ti.

13

¹ Antioquia tá ũ ag tóg nǎtĩ, Topĕ vĩ tó tĩ ũ ag, Jesus jykre tǎ vĕnh kanhrǎn nǎtĩ ag ke gé. Jesus ki ge kǎ nǎtĩ ag mré ag tóg nǎtĩ, ũ tǎ vĕnh mǎn tĩ ag mré, ag tǎ Topĕ vĩ mĕ jé.

Kǎ ũ jijin hǎ vǎ: Barnabé, he mũ, kar ũ jyjyn hǎ vǎ: Simão Negro, he mũ. Ũ tóg tǎ Lúcio nǎ, Cirene tá ke tag ti. Kǎ ũ tóg tǎ Manaém nǎ, pǎ'i tǎ Herodes mré mog mũ tag ti. Kǎ ũ tóg tǎ Saulo nǎ gé.

² Kejĕn ag tóg jagnĕ mǎ Topĕ jykre tó mũ, ag tǎ jĕg tũ nǎn kǎ. Kǎ Topĕ kuprǎg tóg ag mǎ: “Barnabé fĕg ra, Saulo mré,” he mũ, “ag tǎ inh rǎnhrǎj han jé, isǎ nĕn to jykrĕn mũ ěn ti, ag tǎ inh jykre tó jé, vĕnh kar mǎ,” he tóg, Topĕ kuprǎg ti.

³ Kǎ ag tóg jĕg tũ nǎn kǎ Topĕ mré vĩ mǎn mũ. ǎgag nǎgĕ tǎ ag tóg ag mĕg mũ, ag kymĕn ag tóg mũ, kǎ ag tóg: “ha mũ jĕg ge,” he mũ. Hǎ kǎ Topĕ kuprǎg tóg ag jĕgnĕg mũ sir.

Kujǎ tǎ Elimas

⁴ Topĕ kuprǎg tǎ ag jĕgnĕn kǎ ag tóg cidade tǎ Selĕucia ra mũ mũ. Tá junjun kǎ ag tóg goj vǎso tǎ Chipre ra mũ mũ, canoa mág kǎmĩ.

⁵ Kǎ ag tóg cidade tǎ Salamina tá junjun mũ. Tá ag tóg Topĕ vĩ kǎmĕn mũ, Israel ag tǎ vĕnh kanhrǎn jafǎ kǎtá. João Marcos vǎ ag mré tĩ mũ gé. Ag camarada vĕ, João Marcos ti.

⁶ Goj vǎso mĩ ag tóg pa mũ. Kǎ ag tóg cidade tǎ Pafos tá junjun mũ, Topĕ vĩ kǎmĕn kǎ. Tá ũ tóg nǎ nǎ, kujǎ ũ. Ón kǎ tóg Topĕ vĩ tó sór mũ. Israel ũ vĕ, ti jiji hǎ vǎ: Bar Jesus, he mũ.

⁷ Governador mré tóg nǎ nǎ. Governador jyjy hǎ vǎ: Sérgio Paulo, he mũ. Krĩ há ti nǎ,

Sérgio Paulo ti. Kŷ tóg Barnabé jé prēr mŷ, Saulo jé ke gé, ti tŷ Topē vī jēmē sór kŷ.

⁸ Kŷ kujá ěn tóg ag vī kato tē mŷ, governador tŷ Topē vī kri fig tŷ nī jé. Kujá ěn jiji ũ hā vŷ: Elimas, he mŷ, hā vŷ: kujá, he mŷ, ti jyjy ti.

⁹ Kŷ vāhā Topē kuprīg tóg Saulo krīn mŷ. Saulo jiji ũ hā vŷ: Paulo, he mŷ.

Kŷ Topē kuprīg tŷ ti krīn kŷ Paulo tóg kujá ěn ki kanē jŷ han kŷ ti ki ěvānh mŷ,

¹⁰ kŷ tóg: “tŷ ā tóg ũn ón mé nī,” he mŷ. “Jykre pāno ā nī (mŷr),” he tóg. “Japo kósín vŷ tŷ ā nī (mŷr), vēnh jykre kuryj kato tē ā nī (mŷr),” he tóg. “Topē japry vŷ kugryj nŷtī, ti jamīn ti, hā ra ā tóg tŷ pāno ke sór tī (mŷr), kŷ ā tóg vēnh jykre pāno to krónh ke tŷ nīgtī (mŷr),” he tóg.

¹¹ “Ha vé, Topē vŷ ā vóg mŷ, kŷ ā tóg kyvān ha,” he tóg. “Rā venh ke tŷ ā nīnh mŷ, kurā tŷ hēn ri ke ki,” he tóg, Paulo ti.

Kŷ tóg vēšymér ti mŷ kuty' he mŷ. Kyvó tóg nī sir. Kŷ tóg jēmīg mŷ. Ũ jé tóg prēr mŷ, ti tŷ ti pére tīg jé.

¹² Governador tŷ tag ve kŷ tóg ti mŷ e tī. Kŷ tóg Jesus ki rā mŷ. Topē jykre tóg ti mŷ tar ja nī.

Paulo tŷ cidade tŷ Antioquia tá Topē vī tó

¹³ Kŷ vāhā Paulo ag tóg Pafos tá pa mŷ. Canoa mág kāmī ag mŷ mŷ. Kŷ ag tóg ga tŷ Panfília tá junjun mŷ, cidade tŷ Perge tá. Hā ra João Marcos tóg kyrā mŷ. Ag ré kŷ

tóg Jerusalém ra vŷn ke mŷ, João Marcos ti.

¹⁴ Jó ag tóg Perge tá pa mŷ, ga tŷ Pisídia ra mŷ jé, cidade tŷ Antioquia ra. Tá junjun kŷ ag tóg vēnhkán ke kurā ki ag tóg Israel tŷ vēnh kanhrān jafā kára ge mŷ, tá ag nīgnī mŷ gé.

¹⁵ Ũ tóg tá Topē tŷ ěg mŷ vēnh jykre nīm ja ěn to ke mŷ, rán kŷ nī ěn to. Ti tŷ ěg jyvēn tó tóg mŷ gé, vāsŷ Topē vī tó tī ag tŷ rán ja ěn ti. Kar kŷ pā'i ag tóg Paulo ag jé prēr mŷ. Kŷ ag tóg: “kanhkā’,” he mŷ. “Ājag tŷ ěg jyvēn sór nŷtīn kŷ tóg há tī,” he ag tóg.

¹⁶ Kŷ Paulo tóg jēg nē mŷ. Ā nīgé tŷ tóg ag mŷ ge mŷ, ag tŷ katy' he jé. Kŷ tóg ag mŷ: “ha mē, Israel kar’,” he mŷ. “Jēmē ra ha, ũ tŷ Topē kamēg mŷ kar, ājag tŷ tŷ fóg nŷtī ra,” he tóg.

¹⁷ “Israel ag vŷ Topē kamēg tī. Topē tag tóg ěg jóg'jóg ag kuprēg ja nī. Ag tŷ tóg povo mág han, ag tŷ ver Egito tá ke ag mré nŷtīn kŷ. Tá tóg ag kāpan mŷ, ā jykre tar ěn tŷ, Topē ti,” he tóg.

¹⁸ “Ag to tóg fen mág mŷ, Topē tag ti, ag tŷ ěmā tŷg ja mī mŷn kŷ, prŷg tŷ 40 ěn ki.

¹⁹ Povo tŷ 7 tŷ tóg tŷ' he mŷ, ga tŷ Canaā tá. Kŷ tóg ěg jóg'jóg ag mŷ ag ga fig mŷ, tŷ ag tŷ nī jé.

²⁰ Kŷ tóg ag mŷ pā'i ag vin mŷ gé, ag jyvēn jafā ag, 100 tŷ 4 kri 50 anos ki. Kar kŷ Samuel vŷ tŷ Topē vī tó tī nī gé.

21 Kŷ ag tóg pā'i mág tŷ rei ve sór mŷ. Kŷ ag tóg Topē mŷ to vī mŷ. Hā kŷ Topē tóg Saulo fēg mŷ, Quis kósín ěn. Benjamim krē'krē ū vē, Saulo ti. 40 anos ki tóg tŷ pā'i mág tŷ rei nī.

22 Ti tŷ ěn kutēm kar tóg Davi fēg mŷ, Topē ti. Davi to tóg vī há han mŷ, Topē ti, kŷ tóg: “Davi ve sóg, Jessé kósín,” he mŷ. “Nén há han tóg tŷgtī. Kŷ sóg ti to há nī. Ěn hā vŷ inh jykre kar han mŷ,” he tóg, Topē ti, Davi to,” he tóg, Paulo ti.

23 “Davi kósín ū vē, hā vŷ: Jesus, he mŷ. Topē vŷ vāsŷ ti kātŷg ke tó ja nŷgtī. Kŷ tóg vāhā Jesus jĕnĕ ja nī, ěg povo tŷ Israel to, ti tŷ ěg kren han jé.

24 João vŷ ti kātŷg ke jo vēnh kar mŷ: “ājag jykre tovānh ra,” he ja nŷgtī, “isŷ ājag kygpe jé,” he ja tóg nŷgtī, ěg povo tŷ Israel kar mŷ.

25 João rānhraj tŷ tŷ' henh ken kŷ tóg ag mŷ: “iso ājag tóg Cristo he sór mŷ,” he ja nŷgtī, João ti. “Hā tŷ vē,” he ja tóg nŷgtī. “Inh pi(jé) tŷ Cristo nī,” he ja tóg nŷgtī. “Ha vé, inh nón tóg kātŷg, inh Senhor ti, hā vŷ: Jesus, he mŷ. Sŷ tŷ ti camarada nŷnh ke vē vē, sŷ ti pĕn né kunŷ jé, ti pĕn to ró ti, hā ra sóg tŷ ti krēm ke pĕ jĕ,” he ja tóg nī, João ti,” he tóg, Paulo ti.

26 “Inh kanhkā’,” he tóg. “Abraão krē’,” he tóg. “Ū tŷ Topē kamĕg mŷ', fóg kāmī’,” he tóg. “Topē vŷ ěg hā mŷ vēnh vī tag jĕnĕ, ěg krenkren

jé,” he tóg.

27 “Jerusalém tá ke ag vŷ Jesus ki kagtŷg ja nŷtŷgtī. Ti tŷ tŷ Topē kósín nŷn ki kagtŷg ja ag tóg nŷtŷgtī, ag pā'i ag ke gé. Hā kŷ ag tóg vāsŷ rán kŷ nī ěn han. Vĕnhkán ke kurā ki ag tóg vég tŷ, Topē vī tó tŷ ag tŷ nĕn rán ja ti. Hā ra ag tóg sir ag tŷ nĕn tó mŷ ěn ki króm, ājag tŷ Jesus to: ter jé tóg ke mŷ, hen kŷ.

28 Nĕn ū kórég han ja tŷ ti nī, kŷ ti ter ke tŷ vē vē, hā ra ag tóg Pilatos mŷ: “ěg tŷ ti tĕn há tóg tŷ vē,” he ja nŷgtī.

29 Ag tŷ ti to rán ja ěn ki króm kán kŷ ag tóg cruz ěn to ti tĕrem ja nŷgtī, vēnh kej kātā ag tóg ti fón ja nŷgtī.

30 Hā ra Topē tóg ti rŷn mán ja nŷgtī, ti ter mŷ ra.

31 Kŷ tóg ā mré ke ag mŷ vēnh ven ja nŷgtī sir, Jesus ti, ū tŷ ti mré Jerusalém ra mŷ ja ag mŷ, Galiléia tá kāmŷ kŷ. Ěn ag tóg ti kāmĕn mŷ sir, vēnh kar mŷ.

32 Vĕnh vī tag tó ěg tóg mŷ,” he tóg, Paulo ti.

33 “Ěg jóg'jóg ag vŷ Topē vī ěn mĕ ja nŷgtī. Hā ra tóg ūri han mŷ, Topē ti, ā tŷ vāsŷ nĕn tó ja ěn ti. Ěg jóg'jóg ag krē'krē ag mŷ tóg han mŷ, ti tŷ vāsŷ nĕn tó ja ěn ti, Topē ti. Hā kŷ tóg Jesus rŷn mán, ti ter kŷ. Kŷ tóg ti mŷ: “tŷ ā tóg inh kósín jĕ. Ūri sóg ā han,” he ja nŷgtī, Topē ti, Jesus mŷ. Topē mŷ jān jafā ki tóg rán kŷ nī, jān tŷ 2 ki,” he tóg, Paulo ti.

34 “Hā ra tóg ti tŷ ti rŷn mán ke tó ja nŷgtī gé, ti mur ke to hā. Ti vag ke tŷ ěn tó ja tóg

nĩgtĩ gé, kũ tóg: “sũ Davi mũ nén tó ja ěn ki króm jé sóg ke mũ,” he ja nĩgtĩ. “Ājag mũ sóg han mũ, sũ ti mũ nén tó ja ěn ti,” he ja tóg nĩgtĩ, Topě ti,” he tóg, Paulo ti.

35 “Kũ tóg tag tó ja nĩgtĩ gé: “ã tũ vỹ vag ke tũ nĩ,” he ja tóg nĩgtĩ gé, Topě ti,” he tóg, Paulo ti.

36 “Hã ra Davi vỹ ter ja nĩgtĩ, ã jóg'jóg ag nón. Kũ tóg vag ja nĩ inhhã. Topě tỹ ti mũ nén tó jan ki króm ja tóg nĩgtĩ, Davi ti. Ā mré ke ag mũ tóg han, Topě tỹ ti mũ nén tó ja ti. Hã ra tóg ter kũ vag ja nĩgtĩ inhhã, Davi ti.

37 Ti jãvo tóg vag ja tũ nĩ inhhã, Jesus ti, Topě tỹ ti rĩn mãn kũ,” he tóg, Paulo ti.

38 “Ha vé, inh kanhkã,” he tóg. “Jesus tag tugrĩn Topě vỹ ājag mũ vėnh pãte fón sór mũ, ājag tỹ ti vỹ mranh ja ti. Hã kũ sóg ājag mũ tó mũ,” he tóg.

39 “Ājag tỹ Moisés vỹ mēg mũ ra ājag jykre tóg kuryj ja tũ nĩ ver. Ājag tỹ hã ra Jesus ki ge kũ tóg ke mũ sir, Topě ti. Ājag kugrynh tóg mũ sir.

40 Hã ra ti to é he tũg nĩ. Ke tũ nĩ mũ ra ājag tóg venh ke mũ, vãsỹ nén rán kũ nĩ ěn ti, Topě vỹ tó tĩ tỹ nén tó ěn ti,

41 hã vỹ: “iso ājag tóg é he mũ (mỹr),” he mũ. “Sũ nén han ke ve jé ājag tóg ke mũ, kũ ājag kaně jur ke mũ, ājag fe tóg jũrũn kenh ke mũ gé,” he ja tóg nĩgtĩ, Topě ti. “Ājag tỹ kri finh ke tũ vė vė, ù tỹ ājag mũ tó mũ ra. Hã ra ājag tóg venh ke mũ,” he ja tóg nĩgtĩ, Topě vỹ tó tĩ ti,” he tóg, Paulo ti.

42 Ag tỹ Paulo vỹ mẽ kãn kũ ag tóg ĩn ěn kãtã pa mũ. ĩn kãtã pa kũ ag tóg ti mũ: “vėnh kãn ke kurã ù tá ěg mũ kãmén mãn nĩ,” he mũ.

43 Kũ Israel tỹ hėn ri ke ag tóg Paulo ag nón mũ mũ. Fóg ag tóg ag nón mũ mũ gé, fóg tỹ Israel jykre han mũ ag, ù tỹ Topě kamēg mũ ag. Kũ Paulo ag tóg ag jyvėn mũ, ag tỹ Topě to jykren kũ nỹtĩ jé, ag tỹ ti tỹ ěg jagãgtãn to jykren kũ nỹtĩ jé.

44 Vėnhkãn ke kurã ù tá cidade ěn tá ke kar ag vỹ vėnh mãn mũ, Topě vỹ jēmē jé.

45 Kũ Israel ag tóg ùn e ěn vėg mũ. Kũ ag tóg jũgũ mũ, vėnh kar tỹ Paulo ag to há nỹtĩn kũ. Hã kũ ag tóg Paulo vỹ kafãn mũ sir, ti tỹ ag mũ Topě vỹ tón kũ. Ti to ag tóg vỹ vỹ he mũ gé.

46 Hã ra Paulo ag tóg ag kamēg tũ nĩ. Ag mũ ag tóg: “ājag hã mũ ěg tóg tó vén, Topě vỹ ti,” he mũ, “ti tỹ ěg mũ: Israel ag mũ tó vén, hen kũ. Hã ra ājag tóg mẽ jãvãnh nỹtĩ,” he ag tóg. “Ěg rĩr krỹg ja tũ venh ke tũ ājag nĩ, ājag tỹ mẽ jãvãnh nỹtĩn kũ,” he ag tóg. “Hã kũ ěg tóg sir fóg ag hã mũ tónh ke mũ, Topě vỹ ti,” he ag tóg.

47 “Topě vỹ ěg mũ: “ājag tỹ sóg néj gru ri ke han mũ,” he mũ, “fóg kar ag tỹ ājag ki Topě ve jé, kanhgág ag ke gé. Ājag ki ag tóg mēnh ke mũ, Jesus tỹ ag krenkren han ke ti, ga fyn ja mũ hã,” he ja tóg nĩ ěg mũ, Topě ti,” he ag tóg, Paulo ag.

48 Fóg ag tỹ tag mẽ kũ tóg ag mũ sér tĩ sir. Kũ ag tóg Topě vỹ

to há nýtĩ, ti mý vĩ há han ký. Ký ag tóg Jesus ki ge mũ, Topẽ tỹ ùn kuprẽg mũ ag, ag tỹ ẽg rĩr krỹg ja tũ ve jé.

⁴⁹ Ký ga ẽn tá ke kar ag vỹ Topẽ vỹ jẽmẽg mũ.

⁵⁰ Hã ra Israel ag tóg ùn tãtã há ù fag mré vỹ mũ, fóg tỹ Israel jykre han mũ fag. Pã'i ag mré ag tóg vỹ mũ gé. Paulo ag kato ag tóg vỹ mũ. Ký ag tóg ag vóg kónãn mũ. “Ha mũ jẽg, ẽnã ù ra,” he ag tóg mũ sir, ag vóg kónãn kar ký.

⁵¹ Ký Paulo ag tóg ãjag pẽn kykũnhkũnh mũ, ag mỹ: “Topẽ tovãnh ãjag huri,” he jé. Ký ag tóg cidade tỹ Icônio ra mũ mũ sir.

⁵² Jesus mré mũ ag mỹ tóg hã ra sér tĩ. Topẽ kuprĩg vỹ tỹ ag jagrẽ nĩ, ký tóg ag mỹ sér tĩ sir.

14

Cidade tỹ Icônio tá Topẽ vỹ tó

¹ Ag tỹ cidade tỹ Icônio tá junjun ký ag tóg sir Israel tỹ vẽnhanhrãn jafã kãra ge mũ. Ký ag tóg ag mỹ Topẽ vỹ kãmén mũ. Ký Israel tỹ hẽn ri ke ag tóg Jesus ki ge mũ gé, fóg tỹ hẽn ri ke ag ke gé, ù tỹ Grego vỹ tó mũ ẽn ag.

² Ký Israel ag tóg, ù tỹ Jesus ki ge jãvãnh ag tóg fóg ag krĩn kónãn mũ sir, Jesus mré ke ag to.

³ Hã ra Paulo ag tóg tá nýtĩ mág han mũ. Ký ag tóg Topẽ vỹ tó mũ, ag tỹ ag kamẽg tũ nĩn ký, Topẽ vỹ kri fi ký. Ký Topẽ tóg ag mỹ ã jykre fig mũ, ag tỹ ẽg tỹ nẽn han vãnhan hyn han jé.

Hã ký vẽnhan kar tóg Topẽ jykre ki kanhró nýtĩ sir.

⁴ Ký vẽnhan kar tóg vẽnhan kãpugpóv ký nýtĩ nĩ. Ù ag tóg Israel ag to há nýtĩ, jó ù ag tóg Jesus tỹ ùn vin mũ ag tó há nýtĩ.

⁵ Ký Israel ag tóg fóg ag mré jykren mũ, fóg tỹ pã'i ag mré, ag tỹ Paulo ag vóg kónãn jé, ag tỹ pó tỹ ag pin jé.

⁶ Ký Paulo ag tóg jẽmẽg mũ, ký ag tóg cidade ù ra mũ mũ, cidade tỹ Listra ra, cidade tỹ Derbe ra ke gé. Ga tỹ Licaônia tá ti nýtĩ, cidade tag ti.

⁷ Cidade ẽn mũ mũn ký ag tóg tá Jesus vỹ há tugtó mũ sir.

Ag tỹ cidade tỹ Listra tá Paulo vóg kónãn

⁸ Cidade tỹ Listra tá ke ù tóg nĩ nĩ, ùn tĩg vãnhan. Ti pẽn vỹ grĩ nýtĩ. Ge pẽ tóg nĩ, ã mur mũn kã. Pẽn krój tóg nĩ.

⁹ Ẽn tóg sir Paulo vỹ mẽg mũ. Ký Paulo tóg ti tugnỹm mũ. Ký tóg ti tỹ Jesus vỹ kri fig mũ vэг mũ, Jesus tỹ ti tỹ há' he jé.

¹⁰ Ký tóg jamã hár(a) ti mỹ ke mũ, ký tóg: “jẽg nẽn ra,” he mũ. “Vẽnhrã hã jẽg,” he tóg ti mỹ, Paulo ti. Ký tóg vãhã hũm he mũ. Ký tóg mũ tĩ mũ.

¹¹ Ký tóg vẽnhan kar ẽn mỹ e tĩ, ag tỹ Paulo tỹ nẽn han mũ ven ký. Ký ag tóg ãjag vỹ ki jagnẽ mỹ ke mũ, vỹ tỹ Licaônica he mũn ki. Jamã hár(a) ag tóg: “topẽ ag vỹ ẽg tá junjun,” he mũ. “Ẽg ri ke ag nýtĩ, topẽ ag, ký ag tóg ẽg tá re mũ,” he ag tóg, Paulo ag to.

¹² Ký ag tóg Barnabé to: Júpiter, he mũ. Paulo to ag tóg:

Mercúrio, he mũ sir, ti vĩ mág to. Ón kÿ ag topê jygi vễ, hã vỹ: Júpiter, Mercúrio, he mũ.

Hã ra Paulo ag tóg ag vĩ ki kagtĩg nỹtĩ.

¹³ Júpiter jo ĩn vĩ cidade fyr tá jê nĩ, kÿ ti tũ ki rĩr tĩ tóg tá nĩ gé. Kÿ tóg monh gé(g) tĩ mũ, ka fej tỹ coroa ke gé, Júpiter tũ ki rĩr tĩ ên ti. Cidade to ró jãnkã mãra tóg gé(g) tĩ mũ. Tá tóg monh kugprũn sór mũ, Barnabé mỹ, Paulo mỹ ke gé. Ón kÿ ag tóg Paulo ag to: “topê ag vễ,” he mũ, hã kÿ ag tóg ag mỹ monh kuprũn sór mũ, tá ke kar ên ag.

¹⁴ Hã ra Paulo ag tóg mễg mũ, kÿ ag tóg ãjag kur janjãn mũ, jũgũ kÿ. Ủ tỹ vễnh mãn kÿ nỹtĩ ag to ag tóg pétê mũ. Prêr kÿ ag tóg ag mỹ:

¹⁵ “ne nễ?” he mũ. “Tỹ ẽg ẽprã ke nỹtĩ, ãjag ri ke,” he ag tóg. “Hã ra ẽg tóg ãjag mỹ kãmén sór mũ, ãjag tỹ ón kÿ topê tag ag tovãnh jé. Topê pẽ ki gemnĩ, ùn rĩr mũn ki. Kanhkã han tóg, ga ke gé, goj ke gé, mĩ mũ kar ên ke gé, Topê ti,” he ag tóg.

¹⁶ “Vãsỹ Topê tóg nação ag mỹ nén ù tó ja tũ nĩgĩ, kÿ ag tóg ãjag jykre mĩ mũgĩtĩ.

¹⁷ Ge ra tóg ag ki rĩr há han mũ, Topê ti, ag tỹ tag to vãhã ti ki kanhrãn jé. Hã jé tóg ta jênê, kÿ ãjag jakré tóg mogmog mũ. Kÿ ãjag tóg konh ke mũ. Kÿ ãjag fe tóg há' he mũ sir. ãjag mỹ tóg sér tĩ sir, ti tỹ ãjag mỹ vễjên han kÿ, Topê ti,” he ag tóg, Paulo ag.

¹⁸ Ag vĩ ki ag tóg ag mỹ nén ù kugprũn tovãnh mũ, Paulo ag

mỹ, vễnh kar ên ag. Hã ra ag tóg ag mỹ nén ù kugprũn kren ja nĩgĩ, tá.

¹⁹ Kar kÿ cidade tỹ Antioquia tá ke ag tóg tá junjun mũ, cidade tỹ Icônio tá ke ag ke gé. Israel ag vễ, tá junjun mũ ag. Ên ag vễnh kar krĩn kónãn mũ, kÿ ag tóg Paulo pin mũ, pó tỹ. “Ter ti huri,” he ag tóg mũ sir, ti pin kar kÿ. Kÿ ag tóg ti raran mũ sir. Cidade fyr tá ag tóg ti raran kÿ ti fón mũ sir.

²⁰ Kÿ Jesus mré mũ ag tóg ti venh kãmũ mũ, hã ra tóg jễg nễ mũ, Paulo ti. Cidade kãra tóg rã mũ.

Tỹ vaj kÿ tóg hã ra cidade tỹ Derbe ra tĩ mũ, Barnabé mré.

²¹ Tá ag tóg Jesus kãme há tó mũ gé, Derbe tá. Kÿ ù tỹ hên ri ke ag tóg Jesus ki ge mũ sir.

Paulo ag tỹ cidade tỹ Antioquia ra vỹnvỹn ke

Kar kÿ ag tóg cidade tỹ Lis-tra ra vỹnvỹn ke mũ, cidade tỹ Icônio ra ke gé, cidade tỹ Antioquia ra ke gé, Paulo ag.

²² Vỹnvỹn ke ki ag tóg Jesus mré mũ ag jyvẽn mũ sir, ag tỹ Jesus vĩ kri fi to krónh ke tũ nĩn jé, ag tỹ to fe tar nĩn jé ke gé. “Êg tỹ Topê tỹ tỹ ẽg pã'i nĩ ve sór nỹtĩn kÿ ẽg tóg ti venh ke jo vễnh jagãgtar jagy venh ke mũ,” he ag tóg, Jesus ki ge kÿ nỹtĩ ag mỹ, Paulo ag.

²³ Kÿ ag tóg ag mỹ kófa ag kuprễg mũ, ag tỹ Jesus ki ge kÿ nỹtĩ ag ki rĩr jé, ù tỹ Topê vĩ mẽ jé vễnh mãn tĩ ag ki. Ag to ag tóg Topê mré vĩ mũ gé, nén ù ko tũ nĩn kÿ. Kÿ ag tóg: “Topê vỹ ãjag ki rĩr há han

mũ,” he mũ. Kĩ ag tóg mũ mũ sir.

²⁴ Kĩ ag tóg ga tỹ Pisídia fĩn pa mũ. Ga tỹ Panfília tá ag tóg junjun mũ.

²⁵ Cidade tỹ Perge tá ag tóg Topẽ vĩ tó mũ gé sir. Kar kĩ ag tóg cidade tỹ Atália ra mũ mũ.

²⁶ Tá junjun kĩ ag tóg cidade tỹ Antioquia ra mũ mũ gé, canoa mág kāmĩ. Antioquia ěn tá ag tóg pa ja nĩ (mỹr). Tá ke ag tóg ag to Topẽ mré vĩ ja nĩgtĩ, ti tỹ ag jy nĩgãn jé, ag tỹ ti rãnrãj han kĩ. Vẽnh rãnrãj ěn han kãn ag tóg mũ (mỹr) sir, kĩ ag tóg Antioquia ra vỹnvỹn ke mũ.

²⁷ Tá junjun kĩ ag tóg Jesus ki ge mũ kar jé prẽr mũ, ag tỹ vẽn hãn jé. Kĩ ag tóg ag mỹ Topẽ tỹ nén han mũ kar kãmén mũ. “Fóg ag ne tóg Jesus ki ge mũ gé, Topẽ tỹ ag krĩn kĩ,” he ag tóg mũ ag mỹ.

²⁸ Kĩ ag tóg tá nỹtĩ, kysã tỹ hẽn ri ke ki. Jesus mré mũ ag mré ag tóg nỹtĩgtĩ.

15

Ag tỹ Topẽ jykre to jykren

¹ Kejẽn Judéia tá ke ù ag tóg tá junjun mũ, Antioquia tá. Tá junjun kĩ ag tóg Jesus mré ke ag mỹ kãmén mũ, kĩ ag tóg: “ãjag gré junun fár kym nĩ,” he mũ. “Moisés tỹ ěg mỹ nén tó mũ ěn han nĩ. Ke tũ nĩ mũ ra ãjag tóg krenkren ke tũ nĩ,” he ag tóg.

² Hã ra Paulo ag tóg: “ke tũ vẽ,” he mũ. Kĩ ag tóg jagnẽ vĩ kafãn mũ sir. Kĩ Jesus mré ke kar ag tóg Paulo ag mỹ ke mũ, ag tỹ Jerusalém ra mũ jé. “Tag

ag mré mũmnĩ, Jerusalém ra,” he ag tóg. “Tá Jesus tỹ ùn vin mũ ag mré vĩmnĩ, kófa ag mré. Ag mỹ: ěg hỹn hẽ ri kenh mũ, vẽn h gré junun fár kym ke to? hemnĩ,” he ag tóg.

³ Kĩ Paulo ag tóg: “ěg mũnh ke nẽ ha,” he mũ. Jesus ki ge kĩ nỹtĩ ag tóg ag mré mũ sĩ han, kĩ ag tóg mũ mũ. Kĩ ag tóg ga tỹ Fenícia fĩn pa mũ sir, ga tỹ Samaria fĩn ke gé. Ag mũn kĩ ag tóg Jesus mré ke kar ag mỹ fóg ag kãmén mũ, fóg ag tỹ Jesus ki ge mũ ag. Kĩ tóg vẽn kar mỹ sér tĩ sir.

⁴ Hã kĩ ag tóg Jerusalém tá junjun mũ. Kĩ tá Jesus ki ge kĩ nỹtĩ ag tóg vẽn hãn mũ, Jesus tỹ ùn vin mũ ag mré hã, kófa ag mré hã. Kĩ ag tóg ag mỹ Topẽ tỹ nén han mũ kar tugtó mũ.

⁵ Hã ra Fariseu ù ag tóg tá nỹtĩ gé, ù tỹ Jesus ki ge mũ ag. Ěn ag tóg ag mỹ ke mũ. “Ěg mỹ tóg há tĩ, ag tỹ ãjag gré junun fár kym kym ken kĩ,” he ag tóg mũ, fóg ag to. “Ag tỹ Moisés tỹ ěg mỹ vẽn h jykre nĩm ja ki kanhrãn kĩ tóg ěg mỹ há tĩ,” he ag tóg mũ sir, Fariseu ag, fóg ag to, ù tỹ Israel jykre han tũ ag to.

⁶ Kĩ vãhã Jesus tỹ ùn vin mũ ag vỹ kófa ag mré vẽn hãn mũ, vyr mỹ, to vēmén jé.

⁷ Kĩ ag tóg to vēmén mág han mũ sir. Kĩ kejẽn Pedro tóg jẽg nẽ kĩ ag mỹ: “inh kanhkã,” he mũ. “Vãsỹ Topẽ tóg inh kuprẽg ja nĩ, isỹ fóg ag mỹ Jesus ví há tó jé, ag tỹ jẽmẽ kĩ krenkren jé,” he tóg.

“Tag ki kanhró ājag tóg nýtī,” he tóg.

8 “Kỹ Topē tóg ag mý ā kuprīg jēnēg mū. Ag fe ki kanhró tóg nī, Topē ti, kỹ tóg ag mý ti jēnēg mū. Hā ki tóg ēg mý ven mū, ag tỹ Jesus ki ge kỹ nýtī ti, ēg ri kén,” he tóg.

9 “Hā kỹ Topē tóg ag to: vyr mý ke ag vē, he tũ nĩgtī. Ag tỹ ti ki ge kỹ nýtīn kỹ tóg ag fe tỹ jānhkri' he mū, fóg ag fe tỹ,” he tóg.

10 “Topē tỹ há vē (mỹr). To: vėnhmỹ ti nī, he tũg nī,” he tóg. “Ag mý ājag tóg vėnh jykre jagy ěn fi sór mū, ti tỹ ēg mý han jagy ja ra. Ēg jóg'jóg ag mý tóg han jagy ja nī, kỹ tóg ag mý ag tỹ ki króm tũ nĩnh ha mē tóg tĩ, ēg mý ke gé. Hā ra ājag tóg ag mý fi sór mū,” he tóg.

11 “Ke tũg nī. Jesus tỹ ēg jagāgtān kỹ tóg ēg kren han mū, ēg tỹ ti vĩ kri fi kỹ. Kỹ ēg tóg ag ri ke tāvĩ nýtī,” he tóg, Pedro ti.

12 Kỹ vėnh kar ag tóg ěmē kỹ nýtī nī. Kỹ ag tóg Barnabé tỹ ag mý nén tó mū mēg mū, Paulo tỹ ag mý nén kāmén ti ke gé. Ag tỹ ēg tỹ nén han vānh hyn han mū tó ag tóg mū gé. Ag tỹ Topē jykre ki fóg ag mý nén hyn han mū tó ag tóg mū gé sir.

13 Ag tỹ tó kãn kỹ Tiago tóg sir ag mý: “ha mē, inh kanhkã!,” he mū.

14 “Simão vĩ ēg mý tó ja nī, Topē tỹ nén han ve ti, Simão tỹ fóg ag mý Topē vĩ tó ve ti. Kỹ ag tóg tỹ Topē tũ nýtī sir, fóg tỹ ti vĩ mēg mū ag. Jesus mré

ke vĩ tỹ ag nýtī, ag tỹ ti ki ge kỹ nýtīn kỹ.

15 Hā ra tóg vāsỹ rán kỹ nī. Topē vĩ tó tĩ tóg tag rán ja nĩgtī, ha mē:

16 “kātīg jé sóg ke mū, he tóg, Topē ti. Davi krēm Israel ag tóg e pē ja nýtī ja nĩgtī. Hā ra Davi jykre tóg tũ' he mū. Kỹ tóg ĩn vag ri ke nī sir. ĩn tąg han jé sóg ke mū, hā vĩ: Davi krē'krē ũ vĩ tỹ pã'i nĩnh mǎn mū, he mū. Isỹ han ken hā vē.

17 Ti tỹ sóg ũn mág pē han ke mū, povo kar kāmĩ ke ag tỹ inh ki ge sór jé, fóg kar kāmĩ ke ag tỹ isũ nýtī jé, kanhgág kar kāmĩ ke ag ke gé, isỹ ũn kuprēg mū ag, he tóg.

18 Topē tỹ tón hā vē. ũ tỹ vāsỹ tag kāmén mū tỹ tón hā vē,” he tóg, Topē vĩ tó tĩ ti. Hā kỹ ēg tóg tag ki kanhró tāvĩ nýtī,” he tóg, Tiago ti.

19 “Isỹ nén to jykrén hā vē, ēg tỹ ag mý ēg jykre jagy ěn tó tũ nĩn jé, ũ tỹ fóg kar kāmĩ Topē jykre han sór mū ag mý, kanhgág ag mý ke gé,” he tóg.

20 “Ēg tỹ ag mý tónh ke, ha mē: vėnh kǎggrá to festa ko tũg nī, ā prũ tũ fi mré nỹ tũg nī, nén ũ tỹ vėsóki ter mū ko tũg nī, nén ũ kyvėnh ko tũg nī gé,” he tóg, Tiago ti.

21 “Moisés jykre tugtó ag tóg tĩ, ēg mré Israel ag, cidade kar ki. Vėnh kán ke kurā ki ag tóg ti tỹ rán mū to ke tĩ. Vāsỹ ag tóg ke ja nýtī, kỹ ag tóg ũri ke tāvĩ tĩ gé,” he tóg. “Hā kỹ ũ tỹ han sór mū tóg han tĩ, Moisés jykre ti,” he tóg, Tiago ti.

Apóstolo ag tỹ carta rán mū

22 Kǵ Jesus tǵ ũn vin mũ ag tóg to jykrén mũ, kófa ag ke gé, Jesus ki ge mũ ag kar ke gé, ũ tǵ Topê vĩ mẽ jé vènh mǎn tĩ ag. Kǵ ag tóg ũ ag kuprêg mũ, ag tǵ Antioquia ra mũ jé, Paulo mré, Barnabé mré. Ag tǵ ũn kuprêg mũ ag hǎ vê, hǎ vỹ: Judas, he mũ, ti jiji ũ hǎ vỹ: Barsabás, he mũ. Silas kuprêg ag tóg mũ gé. Ên ag tóg tǵ Jesus mré ke ag pǎ'i nỹtĩ.

23 Ag mẽ ag tóg vènh rán nĩm mũ gé. Ag tǵ rán hǎ vê, ha mẽ: “Jesus tǵ ũn vin mũ ag tǵ rán hǎ vê, kófa ag tǵ rán ke gé, Jesus mré ke ag. Êg tǵ cidade tǵ Antioquia tá ke ag mẽ rán hǎ vê, fóg tǵ Jesus mré ke ag mẽ, ga tǵ Sírĩa tá ke ag mẽ, ga tǵ Cilícia tá ke ag mẽ ke gé. Ājag mẽ há?

24 Êg kǎ ũ ag tǵ Ājag tá junjun mẽ êg tóg. Ājag krĩn ũ han ag tóg mũ, kǵ Ājag krĩ tóg kufy' he mũ. Hǎ ra êg tóg ag mẽ: ha vènh jykre tag tó, he ja tũ nĩgtĩ.

25 Kǵ êg tóg vènh mǎn, êg tǵ to jykrén jé. Kǵ êg kar tóg to jykrén kǵ tag ag kuprêg, êg tǵ Ājag to ag jègnê jé, ag tǵ Barnabé mré mũ jé, Paulo mré. Ag to êg há tǎvĩ nỹtĩ, Barnabé to, Paulo to ke gé.

26 Ag hǎ ne tóg fe tũmê nỹtĩgtĩ, fe tar kamê ag nỹtĩgtĩ'. Kǵ ag tóg êg Senhor tǵ Jesus Cristo vĩ tó mũgtĩ, ũ tǵ hèn ri ke tǵ ag tén sór mũ hǎ ra.

27 Êg tǵ ag to há nỹtĩn kǵ êg tóg Judas jènêg mũ, Silas ke gé, ag tǵ Ājag mẽ êg tǵ rán mũ tag ti kǎmên jé.

28 Topê kuprĩg vỹ êg mẽ tó, kǵ tóg êg mẽ há tĩ gé, êg tǵ Ājag mẽ vènh jykre jagy ên fig tũ nĩn jé. Tag hǎ han jé Ājag tóg ke mũ, ha mẽ:

29 vènh kǎgrá to festa ko tũg nĩ, nén ũ kyvènh ko tũg nĩ gé. Nén ũ tǵ vèsóg ki ter mũ ên ko tũg nĩ gé. Ājag prũ tũ fag mré nỹ tũg nĩ gé. Ājag tǵ tag ki króm kǵ tóg há tĩ. Jatun mẽ nỹtĩmĩ.” Vènh rán hǎ vê.

30 Kǵ ag tóg ag mẽ: “ha mũ jèg ge,” he mũ. Kǵ ag tóg mũ kǵ Antioquia tá junjun mũ. Tá ag tóg vènh kar jé prèr mũ. Jesus ki ge mũ kar jé ag tóg prèr mũ sir, ag tǵ to vènh mǎn jé. Kǵ ag tóg ag mẽ vènh rán ên nĩm mũ.

31 Kǵ ag tóg to ke mũ, vènh rán to. Kǵ tóg ag mẽ há tĩ, ag tǵ vènh jyvèn rá ên ven kǵ. Kǵ ag krĩ tóg kǎnhvy' he mũ sir.

32 Kǵ Judas vỹ Silas mré vènh kar jyvèn mũ gé. Topê vĩ tó tĩ ag vê. Hǎ kǵ ag tóg ag jyvèn tǵ hèn ri ke han mũ. Ag fe tǵ ag tóg tar' he mũ.

33 Tá ag tóg semana tǵ hèn ri ke han mũ. Kǵ Jesus mré ke ag tóg ag mẽ: “ha jatun mẽ mũ jèg,” he mũ, ag tǵ Jerusalém ra vỹnvỹn ke jé, ũ tǵ Ājag jègnêg mũ ên to.

34 Hǎ ra tóg Silas mẽ há nĩ, kǵ tóg tá nĩ nĩ sir, tĩ tũ tóg nĩ sir.

35 Kǵ Paulo tóg Barnabé mré Antioquia tá nĩ nĩ. Topê vĩ tǵ ag tóg ag kanhrǎn mũ, kǎmên kǵ. Hǎ ra ũ tǵ hèn ri ke ag tóg ag ri kén Topê vĩ tó mũ gé.

Paulo tỹ ã pir mỹ tĩg, Barnabé tỹ ã pir mỹ tĩg

³⁶Si há tũ ra Paulo tóg Barnabé mỹ: “mũ nỹ, ěg tỹ ěmã ěn kar mĩ mũ mãn jé, ěg tỹ Jesus vĩ tó ja tá,” he mũ. “Isỹ Jesus mré ke ag venh há tóg tĩ. Ag mỹ hěn ri ke mũn mũ há han mũ vỹ? he sóg tĩ,” he tóg, Paulo ti, Barnabé mỹ.

³⁷Kỹ Barnabé tóg João Marcos pére tĩg sór mũ.

³⁸Hã ra Paulo mỹ tóg kórég nĩ, Marcos tỹ ag ré kỹ tĩg ja nĩn kỹ, ga tỹ Panfília tá. “Ū tỹ ěg mré Topĕ rãnrãj han ja tũ ěn pére sóg tĩg mãn ke tũ nĩ ha,” he tóg, Paulo ti.

³⁹Hã to ag tóg jagnĕ to jũgiũ mũ. Kỹ ag tóg vĕnh kãpugpóv kỹ mũ mũ. Kỹ Barnabé tóg Marcos mré goj vãso tỹ Chipre ra tĩ mũ, canoa mág kãmĩ.

⁴⁰Jó Paulo tóg Silas kuprĕg mũ, ti tỹ ti mré tĩg jé. Kỹ tóg tĩ mũ sir. Jesus mré ke ag tóg Paulo to Topĕ mré vĩ mũ, ti tỹ ti jy nĩgãnjé.

⁴¹Kỹ ag tóg ga tỹ Sírĩa mĩ pa mũ, ga tỹ Cilícia mĩ ke gé. Jesus ki ge mũ kar jyvĕn tóg mũ, ã tĩg kỹ, Paulo ti.

16

Timóteo tỹ Paulo mré tĩg

¹Kỹ Paulo ag tóg cidade tỹ Derbe tá junjun mũ, cidade tỹ Listra tá ke gé. Kỹ tá ũ tóg nĩ nĩ, Jesus mré tĩ ũ, ti jyjy hã vỹ: Timóteo, he mũ. Tĩ mỹnh fi ne tóg tỹ Israel nĩ, hã ra fi tóg Jesus ki rã ja nĩgtĩ. Ti panh tóg tỹ fóg tỹ Grego nĩ, Timóteo panh ti.

²Ti to ag tóg vĩ há han mũ, Jesus mré ka ag, Listra tá ke ag, Icônio tá ke ag ke gé, Timóteo to.

³Kỹ Paulo tóg ti pére tĩg sór mũ, kỹ tóg ti gré junun fár kym mũ, Israel ag tugrĩn. Vĕnh kar tóg ti panh tỹ tỹ fóg tỹ Grego nĩ ki kanhró nỹtĩ, hã kỹ tóg ti fár kym ja tũ nĩ. Hã ra ag tỹ ra mũnh ke tá ag tóg e nỹtĩ, Israel ag, hã kỹ Paulo tóg ti fár kym mũ sir.

⁴Kỹ ag tóg cidade ěn mĩ mũ mũ. Kỹ ag tóg ag mỹ Jesus tỹ ũn vin mũ ag tỹ rá kãmén mũ sir, kófa ag tỹ Jerusalém tá nĕn rán ja ti, Jesus mré ke ag mỹ. Ag tỹ nĕn ki króm ke hã tỹ ag tóg ag mỹ kãmén mũ.

⁵Hã kỹ Jesus ki ge mũ ag tóg tar nỹtĩ sir, Jesus jykren ki. Vĕnh mãn ag tóg tĩ, ag tỹ Topĕ vĩ mĕ jé. E ag tóg nĩgtĩ sir, komĕr hã.

Paulo tỹ nĕn nĕ vég mũ

⁶Kỹ Paulo ag tóg ga tỹ Frígia mĩ pa mũ, ga tỹ Galácia mĩ ke gé. Kỹ ag tóg ga tỹ Ásia tá Topĕ vĩ tó sór mũ, hã ra Topĕ kuprĩg tóg ag mỹn nenh mũ.

⁷Kỹ ag tóg ga tỹ Mísia tá junjun mũ. Kỹ ag tóg ga tỹ Bitínia ra mũ sór mũ, hã ra Topĕ kuprĩg tóg ag mỹn nenh mũ gé.

⁸Kỹ ag tóg Mísia jy mũ kỹ cidade tỹ Trôade tá junjun mũ.

⁹Kỹ kutyg kỹ Paulo tóg nĕn nĕ vég mũ. Ga tỹ Macedônia tá ke vég tóg mũ, ti vĕnhpĕti ki. Kỹ tóg ti jo jĕ nĩ. Kỹ tóg ti mỹ: “Macedônia to kãtĩg, ěg kanhrãnjé,” he mũ ti mỹ, ga

tỹ Macedônia tá ke ěn ti. Kỹ Paulo tóg rĩr mũ sir.

10 Paulo tỹ nén nẽ ěn ve kar kỹ ěg tóg vėsỹmér Macedônia ra mũ sór mũ sir. “Jesus hỹn ěg mỹ: ha mũ jĕg, hé,” he ěg tóg. “Ag mỹ inh vĩn tó, he ti hỹn, Jesus ti,” he ěg tóg, Paulo tỹ nén nẽ ěn ve kỹ.

11 Kỹ ěg tóg cidade tỹ Trôade ki pa mũ. Vėsỹmér ěg tóg goj vãso tỹ Samotrácia ra mũ mũ. Tỹ vaj kỹ ěg tóg cidade tỹ Neápolis ra mũ mũ.

12 Tá pa kỹ ěg tóg cidade tỹ Filipos ra mũ mũ. Ga tỹ Macedônia ki cidade ve vĕ. Ěg tỹ tá junjun vén jan hã vĕ. Fóg tỹ Romano ag jamã ù vĕ. Tá ěg tóg kurã e sĩ ki nỹtĩ nĩ.

Lídia fi tỹ Jesus ki rã

13 Vĕnh kán ke kurã ki ěg tóg cidade to ró mãra mũ mũ, goj ra. “Tán hỹn Topĕ mré vĩ jafã nĩ,” he ěg tóg. Tá ěg tóg nĩgnĩ mũ sir. Ûn tãtã fag tóg tá nỹtĩ nĩ, kỹ ěg tóg fag mré vĩ mũ.

14 Tá ù fi tóg nĩ nĩ, fi jiji hã vỹ: Lídia, he mũ. Negociar he fi nĩ. Kur kósóg tỹ fi tóg negociar he nĩ. Tỹ fi cidade tỹ Tiatira tá ke nĩ. Topĕ kamĕg fi tóg tĩ. Ěn fi vỹ Paulo vĩ mĕg mũ sir. Kỹ Topĕ tóg fi mỹ krĩ há nĩm mũ, kỹ fi tóg Paulo vĩ jĕmĕ há han mũ.

15 Kỹ ěg tóg fi kypég mũ, fi mré ke kar mré hã. Kỹ fi tóg ěg mỹ: “isỹ Jesus ki rã kỹ jĕ ve ãjag (mỹr),” he mũ. “Ti tỹ ãjag mỹ gen kỹ inh ĩn ki gemnĩ,” he fi tóg. “Tá inh mré nỹtĩmnĩ,” he fi tóg. Vĩ ki fi tóg ěg kutãn mũ. Kỹ ěg tóg ke mũ.

Paulo ag tỹ Filipos tá se kỹ nỹtĩ

16 Ěg tỹ kejĕn Topĕ mré vĩ jafã ra mũ mãn kỹ ù fi tóg ěg kato tĕ mũ. Û camarada fi vĕ. Hã ra fi tóg jagrĕ kórég nĩ, kỹ fi jagrĕ tóg vĕnh kar mỹ ag tỹ nén venh ke tó tĩ. Fi patrão ag tóg fi tugnĩn jãnkamy mág vég tĩ, fi tỹ jãnkamy to vĕnh kar mỹ ag tỹ nén venh ke tón kỹ.

17 Ěn fi vỹ Paulo nón tĩ mũ, ěg nón, kỹ fi tóg jamã hár(a) prĕr mũ, kỹ fi tóg: “Topĕ pĕ camarada ag vĕ (mỹr),” he mũ. “Vĕnh kar kãfór camarada ag vĕ mỹr. Ag hã ne tóg ãjag mỹ vĕnh vĩ tó tĩ', ãjag tỹ to krenkren jé',” he fi tóg ěg to.

18 Kurã tỹ hĕn ri ke han fi tóg, vĩ tỹ ge han kỹ. Kỹ tóg Paulo mỹ tỹ ù nỹ, kỹ tóg kyrã kỹ fi jagrĕ mỹ: “Jesus Cristo jykre tỹ sóg ã mỹ tó mũ, ã tỹ fi tovãnh jé,” he mũ. Kỹ tóg vėsỹmér fi tovãnh mũ sir, fi jagrĕ kórég ěn ti.

19 Hã ra fi patrão ag mỹ tóg tỹ ù nỹ, ag tỹ fi tugrĩn ganho ve mãn tũ nĩn kỹ. Kỹ ag tóg Paulo ség mũ, Silas ke gé. Pã'i ag mỹ ag tóg ag ven mũ, cidade kjuju ki.

20 Pã'i ag mỹ ag ven kỹ ag tóg: “Israel tag ag ve ra ha,” he mũ. “Vĕnh kar jũgjũ han ag tóg mũ nĩ (mỹr), ěg jamã tag mĩ,” he ag tóg.

21 “Vĕnh jykre vĕnhmỹ tó ag tóg mũ (mỹr), ěg tỹ nén han ke tũ tó ag tóg mũ (mỹr). Tỹ ěg tóg Romano nỹtĩ, kỹ ag jykre tóg ěg mỹ tỹ ù nỹ,” he ag tóg.

22 Povo ěn kar tóg ag to kórég nỹtĩ, kỹ ag tóg ag kato vĩ

mũ.

Kỹ pã'i ag tóg polícia ag mý: “ag kur nũ ra,” he mũ. “Ag mrãnmrãn ra,” he ag tóg mũ gé.

²³ Ag mrãnmrãn tỹ hẽn ri ke han ag tóg mũ, ka téj tỹ. Kar ag tóg vèse ja kãki ag vãm mũ. Vèse ja ki rĩr tĩ mý ag tóg: “ag nĩgfénh há han nĩ, ag tỹ kãpa tũ nĩ jé,” he mũ.

²⁴ Ag tỹ ti mý tag tó to tóg vèse ja kuju tá ag vãm mũ, vèse ja mág ẽn kuju tá. Ka tỹ tóg ag sigség mũ sir.

²⁵ Meia noite ki Paulo tóg Silas mré Topẽ mré vĩ mũ. Tĩ mý ag tóg jãnjan mũ, Topẽ mý. Kỹ vèse ag kar vỹ jëmëg mũ sir.

²⁶ Kỹ vãhã ga tóg jũrũn ke mũ. Vèse ja krêm tóg jũrũn ke mũ. Kỹ vèsýmér jãnká kar vỹ nognor kãn tĩ mũ, rómróm kãn tóg mũ. Kỹ vèse ag kar ẽn ferro tóg kygvar kãn mũ, ag se ja ti.

²⁷ Kỹ tóg vèse ja ki rĩr tĩ nũnmãn mũ gé. hã ra vèse ja jãnká kar tóg nognor kỹ nýtĩ nĩ, rómróm kỹ tóg nýtĩ nĩ. Kỹ ù tỹ ag ki rĩr tĩ ẽn tóg ã kyfé téj, ã rógro ẽn kunũnh kỹ tóg vènh kusón sór mũ. “Vèse kar ag hỹn vènh pigju kãn,” he tóg. Hã kỹ tóg vènh kusón sór mũ.

²⁸ Hã ra Paulo tóg jamã hár(a): “ker vènh vóg kónãn hẽ’,” he mũ. “Ëg kar vỹ ki nýtĩ,” he tóg.

²⁹ Kỹ tóg néj gru to vĩ mũ, ù tỹ ag ki rĩr tĩ ẽn ti. Kỹ tóg Paulo ag se ja kãra vènhvãg rã mũ, jũrũn ke kỹ. Paulo jo tóg mũg

ke mũ, Silas jo ke gé, ag tỹ ti mý ti kãfór nýtĩn kỹ.

³⁰ Ag gé(g) tóg tĩ mũ, vèse ja kãtã kãkutẽ kỹ, kỹ tóg ag mý: “inh hỹn hẽ ri kenh mũ vỹ?” he mũ. “Topẽ vĩ mranh sóg, hã ra tóg ti tỹ inh kren han há tĩ,” he tóg, ù tỹ vèse ja ki rĩr tĩ ẽn ti.

³¹ Kỹ ag tóg ti mý: “Jesus Cristo ki rã ge,” he mũ. “Kỹ ã tóg kren mũ, ã mré ke kar ag mré hã,” he ag tóg ti mý, Paulo ag.

³² Kỹ ag tóg ti mý Jesus vĩ kãmén mũ, ti mré nýtĩ ag mý ke gé.

³³ Kỹ tóg ag ki rĩr mũ vèsýmér, kuty ke nỹ ra. Ag tỹ ag mrãnmrãn ja ẽn kupég tóg mũ ag mý. Kỹ ag tóg vènh kaja jé ti kypég mũ gé, ti mré nýtĩ ag mré, ag tỹ Jesus ki ge kỹ.

³⁴ Kỹ tóg ã ĩn ra ag tatĩn tĩ mũ. Ag jẽn tóg mũ. Ti fe tóg mrin ke mũ sir, ti tỹ Jesus ki rã kỹ. Ti mré nýtĩ ag kar mý tóg sér tĩ gé sir, ù tỹ vèse ja ki rĩr tĩ ẽn mré ke fag mý.

³⁵ Tỹ vaj kỹ pã'i ag tóg polícia ag jëgnëg mũ, ù tỹ vèse ja ki rĩr tĩ ẽn mý. “Ën ag mý: ha mũ jëg, hemnĩ,” he ag tóg ti mý.

³⁶ Kỹ ù tỹ vèse ja ki rĩr tĩ ẽn tóg Paulo mý ke mũ. “Pã'i ag vỹ inh mý vènh vĩ jẽnẽ, isỹ ãjag mý: ha mũ jëg, he jé. Hã kỹ jatun mý mũ jëg,” he tóg, Paulo ag mý.

³⁷ Kỹ Paulo tóg ti mý: “hã ra ag tóg vènh ó to ëg mrãnmrãn ja nĩ,” he mũ. “Vènh kar vỹ ag tỹ ëg mrãnmrãn ve kãn. Hã ra ag tóg ëg ki jëmë ja tũ nĩ,

ĕg jyvĕn ja tũ ag nĩ gé. Tỹ ĕg Romano nỹtĩ, hã ra ag tóg vĕse ja kãki ĕg vãm. Jó ag tóg vĕnh kar vatãnh tá ĕg mỹ: ha mũ jĕg, he sór mũ. Mũnh ke tũ ĕg nĩ. Ag hã tóg kãmũnh mũ, pã'i ag. Ēg tatĩ ag tóg mũnh mũ. Kỹ ĕg mũnh mũ ha," he tóg, Paulo ti.

³⁸ Kỹ polícia ag tóg pã'i ag mỹ tag tó mũ sir, kỹ tóg ag mỹ e tĩ. Ag tỹ Romano ù vóg kónãnh ke tũ vĕ vĕ, hã kỹ ag fe tóg jũrũn ke mũ, pã'i ag.

³⁹ "Ēg mỹ vĕnh pãte fón nĩ, ĕg tỹ ãjag se ja ti," he ag tóg mũ. Kỹ ag tóg ag tatĩ mũ mũ. "Ājag tỹ ĕg jamã ki pa kỹ tóg há tĩ," he ag tóg mũ sir ag mỹ.

⁴⁰ Ag tỹ vĕse ja ki pa kỹ ag tóg Lídia fi ĩn ra mũ mũ sir. Jesus mré ke ag vég ag tóg mũ. Kỹ ag tóg ag jyvĕn mũ. Kỹ ag tóg cidade ĕn ki pa mũ sir.

17

Cidade tỹ Tessalônica tá

¹ Kỹ ag tóg cidade tỹ Anfípõlis mũ pa mũ, cidade tỹ Apolônica mũ ke gé. Kỹ ag tóg cidade tỹ Tessalônica tá junjun mũ. Tá Israel tỹ vĕnh kanhrãnh jafã tóg nĩ.

² Kỹ Paulo tóg ã tỹ nĕn han tĩ ĕn han mũ sir. Israel tỹ vĕnh kanhrãnh jafã kãra tóg rã mũ. Ag mré tóg vĩ mũ, vĕnh kãnh ke kurã tãgtũ ki. Topĕ vĩ tó tóg mũ sir ag mỹ, Paulo ti, vãsỹ rán kỹ nĩ ĕn ti.

³ Ag mỹ tóg Cristo kãmĕn mũ, ti jagtar ti, ti ter kar rĩr mãn ja ĕn ti. "Jesus hã vĕ, hã vỹ: Cristo, he mũ," he tóg. "Cristo tóg vãsỹ rán kỹ nĩ, ti

jagtar ke ti, ti rĩr mãn ke ti ke gé, hã vỹ: Jesus, he mũ," he tóg, Paulo ti.

⁴ Kỹ tóg ù ag mỹ ge nĩ, Israel kãmĩ ù ag mỹ. Kỹ ag tóg Paulo mré mũgtĩ, Silas mré ke gé. Kỹ fóg tỹ Grego he mũ tỹ hĕn ri ke ag tóg to há nỹtĩ gé sir, ù tỹ Topĕ kamĕg mũ ag, ùn tãtã há fag ke gé.

⁵ Hã ra Israel ù ag mỹ tóg tỹ ù nỹ. Hã kỹ ag tóg ùn kórĕg ag mỹ: "kãmũ jĕg ra," he mũ, ùn rãnrãj vãnh ag mỹ. Vĕnh génh kỹ ag tóg vĕnh kar jũgjũ han mũ. Kỹ ag tóg Jasão he mũ ĕn ĩn jy nỹtĩ nĩ sir. Paulo ag kanĕg ag tóg mũ, ag jãvãnh kỹ, ag tỹ vĕnh kar jũgjũ ĕn ag mỹ ag ven jé.

⁶ Hã ra ag tóg ag vég tũ nĩ, Paulo ag. Kỹ ag tóg Jasão pére mũ mũ, Jesus mré ke ù ag mré ke gé. Pã'i ag mỹ ag tóg ag vin mũ. Kỹ ag tóg jamã hár(a) prĕr mũ. "Û tỹ mundo kar ki vĕnh kar jũgjũ han mũ ag tóg tag ki junjun mũ (mỹr)," he ag tóg mũ.

⁷ "Jasão tóg ag mỹ: kãge jĕg ra, hé. Hã ra ag kar tóg pã'i mág tỹ imperador vĩ mranh ja tĩgtĩ. "Vyr mỹ ĕg pã'i mág nĩ, hã vỹ: Jesus, he mũ," he ag tóg. "Kỹ ĕg pi(jé) imperador krĕm nỹtĩgtĩ," he ag tóg, Paulo ag," he ag tóg mũ. Ag tỹ Paulo to ón hã vĕ, pã'i ag mỹ.

⁸ Kỹ ù tỹ mĕg mũ ag vỹ fe ù nỹtĩ sir, cidade ĕn tá pã'i ù ag, cidade ĕn tá ke kar ag ke gé.

⁹ Kỹ pã'i ag tóg Jasão ag mỹ: "ĕg mỹ jãnkamy nĩm ké, ĕg tỹ to ve jé, ãjag tỹ imperador kato tĕnh ke tũ ti," he ag tóg. Ag tỹ

ag m̄y n̄im kar k̄y ag tóg: “ha m̄ũ j̄ẽg (ge),” he m̄ũ sir.

Cidade t̄y Beréia tá

10 Kut̄y ẽn k̄a Jesus mré ke ag tóg Paulo m̄y: “ha t̄ig, cidade t̄y Beréia ra,” he m̄ũ. Silas m̄y ag tóg ke m̄ũ gé. K̄y ag tóg m̄ũ m̄ũ.

Ag t̄y Beréia tá junjun k̄y ag tóg Israel t̄y v̄ẽnh kanhr̄an jaf̄a k̄ara ge m̄ũ, ag m̄y Top̄ẽ v̄i tó jé.

11 Beréia tá ke ag tóg jykre há n̄ȳt̄i. Ag pi(jé) Tessalônica tá ke ag ri ke n̄ȳt̄i'. K̄y ag tóg Paulo ag v̄i kri fig m̄ũ. Ag m̄y tóg há t̄i sir. Kur̄a kar ki ag tóg Top̄ẽ v̄i ki estudar he m̄ũ, ag t̄y to: “ki h̄a tóg tó t̄i,” hen k̄y.

12 K̄y ù t̄y h̄ẽn ri ke ag tóg Jesus ki ge m̄ũ, fóg t̄y Grego ag mré h̄a, ùn t̄atá há fag mré h̄a.

13 K̄y Israel ag tóg m̄ẽg m̄ũ, cidade t̄y Tessalônica tá. Paulo t̄y Beréia tá Top̄ẽ v̄i tó m̄ũ m̄ẽg ag tóg m̄ũ sir. K̄y ag tóg Beréia tá junjun m̄ũ, ag t̄y tá v̄ẽnh kar j̄ũḡũ han jé.

14 K̄y Jesus mré ke ag tóg Paulo m̄y: “ha t̄ig, canoa mág k̄am̄i,” he m̄ũ. H̄a ra Silas v̄y t̄i t̄ũ n̄i, Timóteo ke gé. Beréia tá ag n̄ȳt̄i.

15 K̄y ù ag tóg Paulo mré m̄ũ m̄ũ. Cidade t̄y Atenas ra ag tóg ti pére m̄ũ m̄ũ. Ag t̄y tá v̄ȳnv̄ȳn kenh ken k̄y Paulo tóg ag m̄y ke m̄ũ, ag t̄y Silas jé pr̄er jé, ag t̄y Timóteo jé pr̄er jé ke gé, ag t̄y v̄ẽs̄ymér cidade t̄y Atenas kuk̄am k̄am̄ũ jé.

Cidade t̄y Atenas tá

16 K̄y Paulo tóg Atenas tá n̄i n̄i, Silas j̄av̄anh k̄y, Timóteo

j̄av̄anh k̄y ke gé. H̄a ra tóg sir kr̄i ù n̄i, ti t̄y tá v̄ẽnh k̄aggrá t̄y h̄ẽn ri ke ven k̄y, ti t̄y ag t̄y to j̄an jaf̄a ẽn ven k̄y.

17 K̄y tóg Israel t̄y v̄ẽnh kanhr̄an jaf̄a ki Israel ag mré v̄i m̄ũ, fóg t̄y Israel jykre han m̄ũ ag mré ke gé. Kur̄a kar ki tóg cidade kuju tá v̄ẽnh kar mré v̄i m̄ũ gé sir, ù t̄y tá n̄ȳt̄i ag mré.

18 K̄y ù ag tóg ti mré v̄i m̄ũ, ù t̄y Epicuro t̄y n̄en rán ja to jykren m̄ũ ag, ù t̄y Estóico he m̄ũ ag t̄y n̄en rán ja to jykren m̄ũ ag ke gé. K̄y ag tóg ti to: “v̄i m̄ã p̄ẽ tóg n̄i, v̄i kam̄ẽ tóg n̄i,” he m̄ũ. “Ti h̄ȳn tóg ne tó?” he ag tóg. K̄y ù ag tóg ti to: “top̄ẽ ù tugtó ti h̄ȳn, kór há tá top̄ẽ,” he m̄ũ. H̄a ra Paulo tóg Jesus t̄y v̄ẽme sér tó m̄ũ. Jesus r̄ir m̄an tó tóg m̄ũ, Paulo ti.

19 K̄y ag tóg sór t̄y Areópago ra ti pére m̄ũ m̄ũ. Tá p̄ã'i ag tóg ag jyv̄ẽn t̄i, sór t̄y Areópago tá. K̄y p̄ã'i ag tóg ti m̄y: “ã t̄y v̄ẽnh jykre tag tó m̄ũ k̄am̄én há han ra ẽg m̄y,” he m̄ũ, ti m̄y.

20 “(Ge) m̄ẽ ja t̄ũ ẽg n̄ȳt̄i, ã t̄y ẽg m̄y tó m̄ũ tag ti. K̄y ẽg m̄y k̄am̄én há han n̄i,” he ag tóg, p̄ã'i ag.

21 H̄a ra Atenas tá ke ag tóg v̄ẽnh v̄i t̄ãg m̄ẽ to há n̄ȳt̄i, cidade ù tá k̄am̄ũ k̄y tá n̄ȳt̄i ag ke gé. Ag t̄y v̄ẽnh v̄i t̄ãg m̄ẽ k̄y ag f̄e tóg mrin ke t̄i.

22 K̄y Paulo tóg sór t̄y Areópago kri j̄ẽ k̄y ag m̄y: “Atenas tá ke’,” he m̄ũ. “Top̄ẽ t̄y h̄ẽn ri ke kam̄ẽg ãjag tóg t̄i (m̄ȳr). Tag ve sóg,” he tóg.

23 “Ājag jamā mĩ sóg tĩ, k̄y sóg ājag t̄y topē jo ĩn kāsir kar vigvé. K̄y sóg topē jo ĩn s̄i ũ vé, k̄y tóg to rán k̄y nĩ, hã v̄y: ěg t̄y topē ki kagt̄ig jo ĩn, he m̄ũ, ti rá ti. Topē ěn tóg sóg tĩ, ājag t̄y Topē ki kagt̄ig ěn. Ājag t̄y ti ki kagt̄ig nĩ ra ājag tóg ti m̄y nén ũ kugpr̄un tĩ,” he tóg.

24 “Topē ěn v̄y mundo kar han, mĩ m̄ũ kar ke gé. Kanhkã tãn v̄e m̄yr, k̄y tóg t̄y ga to pã'i nĩ gé. Hã k̄y tóg ěg t̄y ti jo ĩn han krēm nĩ tũ nĩgt̄i (m̄yr),” he tóg.

25 “K̄y ěg tóg ti ki r̄ir ke tũ nĩ gé, ti jagtar tũ n̄in k̄y. V̄enh kar r̄in tóg nĩgt̄i (m̄yr), Topē ti, k̄y tóg v̄enh kar t̄y hãmhã ke han tĩ. V̄enh kar t̄y nén precisar he kar n̄im tóg tĩ (m̄yr),” he tóg.

26 “K̄y tóg v̄enh kyvénh pir t̄y ěprã ke kar hyn han, nação kar (m̄yr), ga kar mĩ m̄ũ m̄ũ ag (m̄yr). T̄y ěg v̄enh kyvénh pir n̄yt̄i. K̄y tóg ěg m̄y ěg mur kurã n̄im m̄ũ gé, ěg ter kurã ti ke gé. ěg m̄y tóg ěg jamã n̄im m̄ũ gé, Topē ti,” he tóg.

27 “V̄enh kar hyn han tóg, Topē ti, ěg t̄y ti to há n̄in jé, ěg t̄y ti ki kanhró n̄yt̄i jé. Kór gy tũ ti nĩ, ti pi(jé) kuvar gy nĩ'. Kakó ti nĩ, Topē ti,” he tóg.

28 “Ti t̄y ěg han v̄e m̄yr, hã k̄y ěg tóg r̄inr̄ir n̄yt̄i nĩ, ti tigr̄in. Ti tugn̄in ěg tóg m̄ugt̄i (m̄yr), k̄y ěg tóg ti tigr̄in n̄yt̄i gé (m̄yr), Topē tigr̄in. Hã k̄y ājag kãmĩ v̄enhrãn tĩ ag tóg tó ja n̄igt̄i gé, k̄y ag tóg: t̄y ěg Topē kr̄e n̄yt̄i, he ja n̄igt̄i.

29 ěg t̄y t̄y ti kr̄e n̄yt̄in k̄y ěg tóg ti ki kanhró n̄yt̄i gé. Ouro

ri ke tũ ti nĩ, Topē ti. Ti pi(jé) prata ri ke nĩ'. Ti pi(jé) póg ri ke nĩ'. Ti pi(jé) t̄y v̄enh kãgrã nĩ', retrato ke gé, ti s̄inv̄i ra. ěprã ke t̄y nén to jykrén m̄ũ ri ke tũ ti nĩ, ěg t̄y nén han m̄ũ ri ke tũ ti nĩ. Topē v̄e (m̄yr), Topē,” he tóg, Paulo ti.

30 “Hã ra Topē tóg ěg to fe mág m̄ũ, ěg t̄y ti ki kagt̄ig n̄yt̄in k̄y. Hã k̄y tóg vãhã v̄enh kar m̄y v̄enh v̄i j̄en̄eg m̄ũ, ěg t̄y ěg jykre tovãnh jé.

31 Kurã n̄im tóg huri, k̄y tóg kurã ěn ki ěprã ke jykre kar tugn̄ym ke m̄ũ. Kurã ěn ki tóg v̄enh jykre kuryj han ke m̄ũ inhhã, Topē ti, ti t̄y ěg jykre tugn̄ym ke m̄un k̄y. Ũn pir kupr̄eg tóg, ti t̄y ti jagfy ěg kar jykre tugn̄ym jé. ěn tóg ter ja nĩ, hã ra Topē tóg ti ter k̄y ti r̄in m̄an ja nĩ, ěg t̄y ti ki kanhró n̄yt̄i jé, ũ t̄y Topē jagfy ěg jykre tugn̄ym ke ti,” he tóg, Paulo ti.

32 Ti t̄y ag m̄y ti ter kar r̄ir m̄an tón k̄y ũ ag tóg to é he m̄ũ. Jó ũ ag tóg: “kurã ũ kã ěg h̄en ri ke m̄un ã v̄i m̄e m̄an sór m̄ũ,” he m̄ũ.

33 Hã k̄y Paulo tóg tĩ m̄ũ, ag ré k̄y.

34 K̄y ũ ag tóg ti nón m̄ũ m̄ũ, k̄y ag tóg Jesus ki ge m̄ũ sir. Ag kã ũ v̄y t̄y Dionísio nĩ. Areópago tá ag jyv̄en tĩ ag kã ũ v̄e, Dionísio ti. K̄y ũ fi tóg Jesus ki rá m̄ũ gé. Fi jyjy hã v̄y: Damáris, he m̄ũ. K̄y ũ ag v̄y ti ki ge m̄ũ gé sir.

18

1 Kÿ Paulo tóg cidade tÿ Ate-nas ki kutē kÿ cidade tÿ Corinto ra tĩ mũ.

2 Tá Israel ù tóg nĩ nĩ, ti jiji hã vÿ: Áquila, he mũ. Ponto tá ke vë. Ûri tóg ga tÿ Itália tá kâtig ja nĩ, ã prũ fi mré. Fi jyjy hã vÿ: Priscila, he mũ. Pã'i mág tÿ imperador tÿ Cláudio he mũ tóg Israel kar ag mÿ: “cidade tÿ Roma ki pa jêg,” he ja nĩgtĩ. Hã kÿ fag tóg cidade tÿ Corinto tá junjun ja nĩgtĩ.

3 Kÿ Paulo tóg fag mré nĩ nĩ sir. Fag mré tóg rãnrãj mũ sir. Hã ra fag tóg kur tÿ ãn han mũgtĩ, Paulo kóm. Fag rãnrãj hã vë. Hã kÿ Paulo tóg fag mré rãnrãj mũ sir, ti tÿ fag mré nĩn kÿ.

4 Kÿ tóg vënhkán ke kurã kar ki ag mÿ Topê vĩ tó mũ, Israel tÿ vënh kanhrãn jafã krêm, Israel ag tÿ ti vĩ kri fi jé, fóg tÿ Grego ag ke gé.

5 Kÿ Silas vÿ Macedônia tá kãti mũ, Timóteo ke gé. Kÿ Paulo tóg Topê vĩ tó tâvĩ nĩ nĩ, ãn tÿ kur han mãn tũ tóg nĩ. Israel ag mÿ tóg Jesus kãmén mũ, ti tÿ tÿ Cristo nĩ ti.

6 Hã ra ag tóg ti kato vĩ mũ. Kÿ ag tóg Jesus to é he mũ. Kÿ Paulo tóg ã kur rũmrũm mũ, ag mÿ: “vënh hã ki ãjag tóg vãgfor kenh mũ, nũgme ki vár kÿ, inferno ki,” he jé. “Ãjag mÿ sóg tó, Jesus ti, hã ra ãjag tóg mẽ jãvãnh nÿtĩ. Kÿ ãjag tÿ vësóg ki vësÿrénh ke vë. ãn hã tóg fóg ag kar mÿ tónh tÿg ha, kanhgág ag kar mÿ ke gé,” he tóg mũ, Paulo ti.

7 Hã kÿ tóg tá kutē kÿ fóg ãn kãra rã mũ, ti jiji hã vÿ: Tício

Justo, he mũ. Topê kamêg ti tĩ. Ti ãn vÿ Israel tÿ vënh kanhrãn jafã rã jê gé. Kÿ Paulo tóg ti ãn kãra rã mũ sir.

8 Hã ra Israel tÿ vënh kanhrãn jafã to pã'i vÿ Jesus ki rã mũ, ti jyjy hã vÿ: Crispo, he mũ. Ti mré ke kar vÿ Jesus ki ge mũ gé, Corinto tá ke tÿ hën ri ke ag ke gé, ag tÿ Paulo vĩ mẽ kÿ. Kÿ ag tóg kygpe kÿ nÿtĩ sir.

9 Kejën Paulo tóg kuty kã nén nẽ vëg mũ. Topê tÿ ti mÿ vënh ven vë, kÿ tóg ti mÿ: “kamêg tũg ra,” he mũ. “ãn vĩ kãmén ra, ha mẽ kÿ nĩ tũg,” he tóg.

10 “Ã mré sóg nĩnh mũ. Û pi(jé) ã vóg kónãnh mũ,” he tóg. “Cidade tag ki ù tÿ hën ri ke ag vÿ tÿ isũ nÿtĩnh mũ,” he tóg, Topê ti.

11 Kÿ Paulo tóg prÿg pir kri kysã tÿ 6 ke ki tá nĩ nĩ. Ag mÿ tóg Topê vĩ kãmén tĩ nĩ sir, tá.

12 Kejën ù tÿ Gálio he mũ tóg tÿ Romano tÿ governador nĩ, ga tÿ Grécia ki. Kÿ Israel ag kar tóg Paulo kato vãsãnsãnh mũ. Kÿ ag tóg ti kãgmĩ kÿ pã'i mág mÿ ti ven mũ mũ.

13 Kÿ ag tóg governador mÿ: “tag tóg êg jykre tÿ tũ' he sór mũ,” he mũ. “Vënh kar tóg ti vĩ tũgnĩn Topê to jãnjãnh tĩ, vënh jykre tãg tÿ hã ra,” he ag tóg ti mÿ.

14 Kÿ Paulo tóg vĩ sór mũ, hã ra Gálio tóg Israel ag mÿ: “Israel,” he mũ. “Ti tÿ nén ù kórég han mũ ra sóg ãjag jagfÿ vĩ tĩ vë, ti tÿ crime han mũ ra, Paulo ti,” he tóg.

15 “Hã ra ãjag jykre to ãjag tóg ti to jũ mũ, ãjag jiji to, ãjag vënh rá to (mÿr). Isũ pijé', ãjag tũ tag ti'. ãjag hã ne tag to jykrén ke mũ inhhã'. Inh pi(jé) ãjag tũ to jykrén sór mũ,” he tóg, Gálio ti, pã'i mág ên ti.

16 Kÿ tóg ag mÿ: “ha mũ jëg,” he mũ sir, vï tar han kÿ.

17 Kÿ tá nÿtĩ ag tóg Sóstenes kãgmĩg mũ. Israel tÿ vënh kanhrãn jafã to pã'i vë. Ti kãgmĩ kÿ ag tóg ti mrãnmrãn mũ, pã'i mág ên ãn tá, hã ra Gálio tóg ki êmë sór tũ nĩ.

Paulo tÿ Antioquia ra vÿn ke

18 Kÿ Paulo tóg tá nĩ sir, kurã tÿ hën ri ke ki. Kÿ tóg kejën Jesus mré ke ag mÿ: “isĩg vë ha,” he mũ. Kÿ Áquila tóg ti mré tĩ mũ, ti prũ tÿ Priscila fi mré hã. Ag tÿ ga tÿ Síria ra mũnh ke vë. Cidade tÿ Cencreía tá ag tóg canoa mág ki ge sór mũ, va mũ jé. To hã tóg vënh jãrég mũ, Paulo ti, Topë mÿ promessa han kÿ.

19 Kÿ ag kar tóg canoa mág kãki cidade tÿ Éfeso ra mũ mũ. Hã ra Áquila fag vÿ tá nÿtĩ, mũ mãn tũ fag nĩ sir.

Kÿ Paulo tóg Israel tÿ vënh kanhrãn jafã kãra rã mũ, Israel ag mré vï jé.

20 Ag tÿ ti vï mẽ kÿ tá ke ag tóg ti mÿ: “ëg mré nĩ nĩ,” he mũ.

Hã ra tóg ag mÿ: “hã ra sóg ver tĩg mũ ha,” he mũ.

21 “Kãnhmar sóg vÿn kenh ke mũ hã ra, Topë tÿ inh vÿn kenh ke to há nĩn kÿ,” he tóg.

Kÿ tóg cidade tÿ Éfeso tá kutë mũ.

22 Kÿ tóg cidade tÿ Cesaréia tá jun mũ. Kÿ tóg cidade tÿ Jerusalém ra tĩg kÿ Jesus ki ge mũ kar vigvëg mũ, ù tÿ Topë vï mẽ jé vënh mãn tĩ ag. Kar kÿ tóg cidade tÿ Antioquia ra tĩ mũ.

23 Tá tóg nĩ sĩ han mũ. Kar kÿ tóg tá kutë kÿ ga tÿ Galácia mũ kutë mũ, ga tÿ Frígia mũ ke gé. Jesus mré mũ ag jyvën tóg mũ sir, ag tÿ tar nÿtĩ jé.

Apolo tÿ Topë vï tó

24 Kejën Israel ù tóg cidade tÿ Éfeso tá jun mũ, ti jiji hã vÿ: Apolo, he mũ. Cidade tÿ Alexandria tá tóg mur ja nĩ. Vï há ti nĩ. Topë vï tó tóg tĩ gé, vãsÿ rán kÿ nĩ ên to tóg tar nĩ.

25 Ên tóg Jesus japry ki kanhró nĩ, Jesus jamĩn ki. Mũmëg vãnh nĩn kÿ tóg Jesus vï tó tĩ mũ, ti tÿ to krónh ke vãnh nĩn kÿ. Hã ra tóg João tÿ ag kygpég mũ ên hã ki kanhró nĩ. Ëg tÿ Jesus jyjy tó kÿ kygpe kÿ nĩ tag ki kagtĩg tóg nĩ ver.

26 Ên tóg Israel tÿ vënh kanhrãn jafã krëm ag kanhrãn mũ sir, ti tÿ mũmëg vãnh nĩn kÿ. Áquila fag tÿ ti vï mẽg kÿ fag tóg ti mÿ: “ëg venh kãtĩg nĩ,” he mũ. Kÿ fag tóg ti mÿ Topë japry kãmén kãn mũ, Topë jamĩn ti.

27 Kar tóg ga tÿ Grécia ra tĩg sór mũ, Apolo ti. Kÿ Jesus mré ke ag tóg ti mÿ: “há ti nÿ, ha tĩg ge,” he mũ. Kÿ ag tóg Jesus mré mũ ag mÿ vënh rá jënëg mũ, ag tÿ ti mÿ: “kãrã ra,” hen jé. Tá jun kÿ tóg Jesus ki ge kÿ nÿtĩ ag jyvën mũ, kÿ ag tóg ti

tỹ ag jyvĕn to tar han kỹ nỹtĩ nĩ sir, Topĕ tỹ ũn jagăgtăn mũ ag.

²⁸ Israel ag mré tóg vĩ tĩ, Apolo ti, vĕnh kar jo. Ag mỹ tóg Topĕ vĩ tó tĩ, văsỹ răn kỹ nĩ ĕn ti. Kỹ tóg ag mỹ Cristo kămén mũ sir. “Cristo vỹ tỹ Jesus nĩ,” he tóg mũ ag mỹ, Apolo ti, ag mỹ Topĕ vĩ rá kămén kỹ.

19

Paulo tỹ cidade tỹ Ēfeso tá nĩ

¹ Kỹ Apolo tóg cidade tỹ Corinto tá nĩ nĩ sir. Hă ra Paulo tóg cidade tỹ Ēfeso tá jun mũ. Ga ĕn mĩ tóg tĩg ja nĩgtĩ, pănónh kri kyjer ĕn mĩ. Kỹ tóg Ēfeso tá jun mũ sir.

² Tá ũ ag tóg Jesus ki ge ja nĩgtĩ. Kỹ Paulo tóg ag mỹ: “ăjag mỹ Topĕ kuprĩg tỹ jagrĕ nỹtĩ, ăjag tỹ Jesus ki gen kă'?” he mũ. Kỹ ag tóg ti mỹ: “kỹ ne nĕ ge, Topĕ kuprĩg ti?” he mũ, Paulo mỹ.

³ Kỹ Paulo tóg: “ăjag tỹ kygpe kỹ ăjag hĕ ri ké?” he mũ. Kỹ ag tóg: “Joăo tỹ ag kygpe ri ke ti nĩ, ĕg kygpe ti,” he mũ.

⁴ Kỹ Paulo tóg: “Joăo tóg ag kygpe ja nĩgtĩ, ag tỹ ăjag jykre tovănh sór nỹtĩn kỹ,” he mũ. “Kỹ tóg vĕnh kar mỹ kămén ja nĩ gé, ag tỹ ũ tỹ ti nón kătĩ ĕn ki ge jé, hă vỹ: Jesus, he mũ,” he tóg, Paulo ti.

⁵ Ag tỹ tag mĕ kỹ ag tóg ti mỹ: “Jesus jiji tó kỹ ĕg kygpe ge,” he mũ.

⁶ Kỹ Paulo tóg ă nĩgé tỹ ag mĕg mũ, kỹ Topĕ kuprĩg tóg

ag ki ră mũ sir. Vĕnh vĩ ũ han ag tóg mũ sir. Kỹ ag tóg Topĕ vĩ tó mũ gé.

⁷ Ũ tỹ 12 ag hỹn, vĕnh vĩ ũ han mũ ĕn ag.

⁸ Kỹ Paulo tóg Israel tỹ vĕnh kanhrăn jafă kăra ră mũ. Ti tỹ mũmĕg vănh nĩn kỹ tóg Topĕ tỹ tỹ ĕg pă'i nĩ kămén mũ. Kysă tăgtũ ki tóg ag mỹ kămén mũ, ag tỹ hĕn ri ke mũn ti vĩ kri fi jé.

⁹ Hă ra ũ ag tóg ti vĩ to fe ũ nỹtĩ sir, ag tỹ kri fi jăvănh nỹtĩn kỹ. Kỹ ag tóg to é hen kỹ ag tóg to vĩ kónăn mũ, vĕnh kar jo. Kỹ Paulo tóg ag mré vĩ măn tũ nĩ sir. Jesus mré mũ ag mỹ tóg: “vyr mỹ ĕg nỹtĩ,” he mũ. Kỹ tóg escola krĕm ag kanhrăn mũ sir, kură kar ki. Escola to professor ĕn jiji hă vỹ: Tirano, he mũ.

¹⁰ Prỹg régre ki tóg tá nĩ nĩ, gen kỹ, Paulo ti. Hă kỹ ga tỹ Ásia tá ke ag kar vỹ Jesus vĩ mĕg mũgtĩ, Israel ag kar, fóg tỹ Grego he mũ ag kar ke gé.

¹¹ Kỹ Topĕ tóg Paulo mỹ vĕnh jykre nĩm mũ gé, kỹ tóg ĕg tỹ nĕn han vănh tỹ hĕn ri ke hyn han mũ.

¹² Kejĕn ag tóg Paulo kur tỹ ũn kagyga ag mĕgmĕg mũ, ag tỹ há' he jé. Paulo tỹ kur mĕ kar kỹ ag tóg tỹ ũn kagyga ag mĕgmĕg mũ. Kỹ ag tóg hághá' he mũ. Vĕnh jagrĕ kórég ag vỹ gen kỹ pa mũ gé, ũn kaga ag tỹ ti kur mĕ kỹ.

Kujá ag

¹³ Kỹ Israel ag kujá ag vỹ tá nỹtĩ gé. Kujá ĕn ag tóg ĕmă kar kri rŭm ke tĩ. Kejĕn ag tóg ăjag

tỹ vĕnh jagrĕ kórég ven kỹ ag tóg Jesus jyjy tó tĩ. Ón kỹ ag tóg tó tĩ. Kỹ ag tóg ũ mỹ: “Jesus jykre tỹ sóg ã kutĕm ke mũ, Paulo tỹ ũn kāmén tĩ ěn jykre tỹ,” he mũ, ũn jagrĕ kórég mỹ. Hã ra ag tỹ ón kỹ Jesus jiji tó vĕ. Ti mré ke pijé’.

14 ũ tỹ ge tó mũ ag vỹ tỹ Israel ag nỹtĩ. Topĕ tũ ki rĩr tĩ to pã’i mág krĕ ag vĕ, kỹ ti jiji hã vỹ: Ceva, he mũ, ag panh jyjy ti. ũ tỹ 7 ke ag vĕ, ti krĕ ěn ag.

15 Ag tỹ ũn jagrĕ kórég mỹ Jesus jiji tó kỹ vĕnh jagrĕ kórég ěn tóg ag mỹ: “Jesus ki kanhró sóg nĩ, Paulo mĕ inh huri ke gé, hã ra ãjag tóg tỹ ũ nỹtĩ?” he mũ ag mỹ, kujá ag mỹ.

16 Kỹ ũn jagrĕ kórég ěn tóg ag to hũm he mũ. Ag kygrĕg tóg mũ, hã ra ag tóg ti tỹ ě ě ri ke tũ nĩ. Kỹ ag tóg kator kỹ rinfig mũ sir, kygvĕnh kỹ.

17 Kỹ Éfeso tá ke ag kar tóg mĕg mũ, Israel kar, fóg tỹ Grego ag kar ke gé. Kỹ ag tóg mũmĕgmĕg mũ sir. Kỹ Jesus Cristo jiji tóg ag mỹ tar nĩ, ag mỹ tóg nén kar kãfór nĩ, Jesus Cristo jyjy ti.

18 Kỹ Jesus ki ge kỹ nỹtĩ ag tóg ãjag jykre kórég tugtó mũ sir, jagnĕ mỹ.

19 ũ ag tóg curandeiro tũ han ja nĩgtĩ, kujá tũ ke gé. Kỹ ag tóg ãjag vĕnh rán gé kãmũ mũ, curandeiro tỹ vĕnh rán ěn ti. Kỹ ag tóg kuprũn kãn mũ sir, vĕnh kar rĩnve. Ag tỹ ti kaja nĩkrén kỹ tóg kaja e ja nĩ, jãnkamy tỹ 50 mil hỹn.

20 Hã kỹ Topĕ vĩ tóg sir vĕnh kar kri rũm ke mũ. Kỹ ũ tỹ ě ěn ri ke ag tóg kri fig mũ sir.

Éfeso tá vĕnh génh

21 Kar kỹ Paulo tóg to jykrén mũ. Ga tỹ Macedônia mũ tóg kutĕ sór mũ, ga tỹ Grécia mũ, Jerusalém ra tĩg jé. “Isỹ Jerusalém ra tĩg kar kỹ sóg cidade tỹ Roma ra tĩg sór mũ gé,” he tóg, Paulo ti.

22 Kỹ tóg ga tỹ Macedônia ra ũn régre ag jĕgnĕg mũ, ti mré rãnrãj mũ ag, hã vỹ: Timóteo mré Erasto, he mũ. Ti hã tóg hã ra ga tỹ Ásia tá nĩ nĩ ver, Paulo ti.

23 Kejĕn vĕnh génh tóg kutĕ mũ, Jesus japry tugrĩn, ti jamĩn tugnĩn.

24 ũ tóg Éfeso tá nĩ nĩ, ũ tỹ prata tỹ ĩn sĩ kãggrá han mũ ti, ũ tỹ topĕ tỹ Diana he mũ fi jo ĩn sĩ ěn kãggrá han mũ ti, retrato ěn. ũ tỹ han mũ jiji hã vỹ: Demétrio, he mũ. Ti camarada tỹ ě ěn ri ke ag tóg vĕnh rãnrãj ěn ki nén há vég tĩ. Ag ganho vĕ.

25 Kỹ tóg ã camarada ag jé prĕr kãn mũ, Demétrio ti. ũ tỹ ã ri kén rãnrãj mũ ag jé prĕr tóg mũ gé. Ag vĕnh mãn kỹ tóg ag mỹ: “há vé,” he mũ. “Vĕnh rãnrãj tag ki ěg tóg nén ũ há vég mũgtĩ, ěg ganho ti. Tag ki ěg há nỹtĩ,” he tóg.

26 “Hã ra Paulo tag tóg cidade tag ki tóg ũ tỹ ě ěn ri ke krĩn mũ sir, ga tỹ Ásia mũ ke gé. Ag mỹ tóg: “vĕnh nĩgé tỹ han ja pi(jé) tỹ Topĕ nĩ,” he tĩ. Kỹ ag tóg ti vĩ kri fig mũ sir. Tag vég ěg mũ (mỹr),” he tóg.

27 “Kỹ ẽg tỹ nén tag tóg tũ' he sór mũ sir ti t McGrĩn, ẽg ganho ti. Hã ra Diana fi jo ın tóg tỹ nén ũ tũ nĩ ke gé, ti sĩnvĩ nĩ ra. Kỹ fi tóg tỹ nén ũ tũ nĩ gé sir, fi tỹ tỹ ũn mág nĩ ra. Ásia kar mĩ ag tóg fi to jãnjãn tĩ, ga kar mĩ ke gé. Hã ra tóg fi tỹ tũg' henh ha, Paulo ti, ti tỹ: “vẽnh kãggrá pi(jé) tỹ Topẽ nĩ', hen kỹ,” he tóg, Demétrio ti, ũ tỹ fi jo ın sĩ han mũ ẽn ti.

28 Ag tỹ tag mẽ kỹ ag fe tóg gỹm ke mũ sir. Kỹ ag tóg jamã hár(a) prẽr kỹ: “!..topẽ tỹ Diana fi vỹ kãfór ne..! !..Tỹ fi Éfeso ag tũ ne..!” he mũ sir, prẽnprẽr kỹ.

29 Kỹ cidade ẽn ki ag vẽnh génh vẽ sir, kỹ vẽnh kar tóg ın mág ẽn ra pêtẽ mũ, ın kri ın tũ ẽn ra. Gaio he mũ ti pére ag tóg mũ mũ, ti kãgmĩ kỹ, Aristarco ke gé. Macedônia tá ke ag vẽ. Ẽn ag tóg Paulo mré kãmũ ja nĩgtĩ. Ẽn ag kugmĩg ag tóg mũ, ag tỹ ın mág ẽn ra ag tatĩ mũ jé.

30 Kỹ Paulo tóg ra tĩg sór mũ, ag mré vĩ jé, hã ra ũ tỹ Jesus ki ge kỹ nỹtĩ ag tóg ti mỹ: “tĩ tũg ra,” he mũ.

31 Kỹ ga tỹ Ásia tá pã'i ag tóg ti mỹ vẽnh vĩ jẽnẽg mũ gé, ti tỹ ın mág ẽn ra tĩ tũ nĩ jé. Ti to ag tóg há nỹtĩ, pã'i ag.

32 Ỉn mág tá ag tóg vẽnh mãn kỹ nỹtĩ nĩ, ũ tỹ hẽn ri ke ag. Kỹ ũ ag tóg nén ũ tó tĩ, prẽnprẽr kỹ, jó ũ ag tóg nén ũ tó tĩ, prẽnprẽr kỹ. Kỹ vẽnh kar tóg vĩ vĩ he kãn mũ sir. Vẽnh mãn kỹ ag nỹtĩ, hã ra ag tóg: “ẽg tỹ hẽ ri ke jé vẽnh mãn nẽ hỹn'?” he mũ.

33 Kỹ Israel ag tóg vẽnh kar mỹ ũ ven mũ gé, Alexandre he mũ ẽn. Kỹ Alexandre tóg ả nĩgẽ tỹ ge mũ, ag tỹ katy' he jé. Kỹ tóg ag mỹ kãmén sór mũ.

34 Kỹ ag tóg vэг mũ sir, ti tỹ tỹ Israel nĩ ti, Alexandre ti. Hã ra ag tóg tỹ fóg nỹtĩ, tá vẽnh mãn kỹ nỹtĩ ag. Kỹ ag tóg Israel ag to jũgũ nỹtĩ nĩ. Ag tỹ ti tỹ tỹ Israel nĩ ẽn ven kỹ vẽnh kar tóg prẽr pir han mũ, hã vỹ: “!..Éfeso tá ke fi tỹ vẽnh kar kãfór ne..! !..Diana he mũ fi vỹ vẽnh kar kãfór ne..!” he mũ, prẽnprẽr kỹ. Hora régre han ag tóg mũ sir, ge nỹtĩ ki.

35 Governo mỹ rán tĩ ẽn tóg hã ra ag fe tỹ há' he mũ. Kar kỹ tóg ag mỹ: “Éfeso tá ke',” he mũ. “Vẽnh kar vỹ Diana fi ki kanhró nỹtĩ,” he tóg. “Éfeso tá ẽg tóg fi ki rĩr mũ. Fi kãggrá nẽji tóg kanhkã tá kãkutẽ ja nĩ. Vẽnh kar tóg tag ki kanhró nỹtĩ,” he tóg.

36 “Ủ tóg tag kato vĩ tũ nĩgtĩ (mỹr),” he tóg. “Hã kỹ jatu ké. Krĩ rỹg tũg ra,” he tóg.

37 “Tag ag tatĩ ảjag tóg kãmũ ja nĩgtĩ, hã ra ag tóg topẽ fi jo ın tá nén ũ péju ja tũ nĩgtĩ. Ẽg topẽ fi to ag tóg vĩ kónãn tũ nĩgtĩ (mỹr),” he tóg.

38 “Demétrio mỹ ag kato vĩ sór ke mũ'?” he tóg. “Vẽnh kãggrá han mũ ag mỹ ti mré ag vĩ kafãn sór mũ'?” he tóg. “Kỹ kófa ag mỹ tómnĩ ge, vẽnh jyvẽn ke kurã ẽn kã. Ag kato vĩmnĩ ge,” he tóg.

39 “Ảjag tỹ hã ra nén ũ tó sór kỹ ảjag tóg ẽg tũ ki kanhró nỹtĩ. Kurã nĩm jé ẽg tóg ke mũ,

kỹ ẽg vẽnh mẫi kỹ vẽnh mẫi ha,” he tóg.

40 “Hã ra ẽg tỹ ón kỹ vẽnh génh kỹ ù ag hỹn ẽg to: pã'i mág tỹ imperador kato ag tẽ sór mẫi, he mẫi. Nén ù tũ to ãjag tóg vẽnh mẫi mẫi (mỹr),” he tóg. “Ủ tỹ ẽg mỹ: ne nẽ? he mẫi ra ẽg tỹ ne tónh ke tóg tũ tĩ,” he tóg, governo mỹ rãn tĩ ti.

41 Kar kỹ tóg ag mỹ: “ha mẫi jẽg,” he mẫi. Kỹ ag tóg mẫi mẫi sir.

20

Paulo tỹ ga tỹ Macedônia mẫi tỹ

1 Vẽnh kar tỹ jatu ke mẫi kỹ Paulo tóg Jesus ki ge kỹ nỹtĩ ag jé prẽr mẫi. Ag jyvẽn tóg mẫi, kỹ tóg ag mỹ: “sỹ tĩ ma,” he mẫi. Kỹ tóg ga tỹ Macedônia ra tĩ mẫi.

2 Kỹ tóg ga ẽn mẫi tĩ mẫi, kỹ tóg fĩn kutẽ mẫi. Jesus ki ge kỹ nỹtĩ kar ag jyvẽn mág tóg mẫi. Kỹ tóg tỹ mẫi kỹ ga tỹ Grécia tá jun mẫi.

3 Tá tóg kysã tãgtũ tỹ mẫi. Kỹ tóg ga tỹ Sírĩa ra vỹn ke sór mẫi, canoa mág kãmĩ. Hã ra Israel ag tóg tá ti vóg kónãn sór mẫi. Kỹ tóg to jykrén kỹ ga tỹ Macedônia mẫi kutẽ mẫi, ga tỹ Sírĩa ra vỹn ken jé.

4 Ti mré ag tóg mẫi mẫi, hã vỹ: Sópatro, he mẫi, Pirro kósin tag ti, Beréia tá ke tag ti. Kỹ Tessalônica tá Artistarco tóg ti mré tĩ mẫi, Segundo ke gé. Derbe tá Gaio tóg ti mré tĩ mẫi, Timóteo ke gé. Ásia tá Tíquico tóg ti mré tĩ mẫi, Trófimo ke gé.

5 Ẽn ag kar vỹ ẽg jo mẫi mẫi, cidade tỹ Trôade ra. Tá ag tóg ẽg jãvãn mẫi sir.

6 Kỹ ẽg tóg cidade tỹ Filipos tá pa mẫi, festa tỹ pão jẽgja tũ ke kurã kar kỹ. Kỹ ẽg tóg kurã tỹ 5 (ke) tỹ kỹ Trôade tá junjun mẫi ag tá, ẽg jo mẫi ag tá. Tá ẽg tóg kurã tỹ 7 (ke) tỹ kỹ mẫi sir.

Cidade tỹ Trôade tá

7 Semana tỹ kurã ve ki ẽg tóg vẽnh mẫi mẫi sir, Domingo kã, Jesus jamĩ kó jé. Kỹ Paulo tóg tỹ vaj kỹ tỹ sór mẫi, hã kỹ tóg ag mré vẽnén mág mẫi. Kỹ ẽg tóg meia noite pêtẽm mẫi, vẽnén nỹtĩn ki.

8 Ẽn to jãpry jafã tá ẽg nỹtĩ, kỹ néj gru tỹ hẽn ri ke tá grug kỹ nỹtĩ nỹ.

9 Kỹ kyrũ tóg tá nĩ nĩ, ti jyjy hã vỹ: Êutico, he mẫi. Jãnkã ror kã tóg nĩ nĩ, janela kã. Hã ra tóg nũr mẫi sir. Nũr sér han tóg mẫi sir. Jó Paulo tóg vẽnén jẽ nĩ. Kỹ tóg ã nũr kỹ jãnkã ror ki kutẽ mẫi. Janela tãgtũ tá nĩ kỹ tóg ẽprã kutẽ mẫi. Kỹ tóg ter ja nĩ sir, ag tỹ re kỹ, ti ve jé.

10 Kỹ Paulo tóg tere mẫi gé sir. Ti kri tóg pãn h ke mẫi. Kỹ tóg ti kãgũg mẫi, ã nĩgnó tỹ. Kỹ tóg ag mỹ: “fe kaj tỹ ra,” he mẫi. “Ti kuprĩg vỹ ti kãkã nĩ nĩ,” he tóg.

11 Kỹ tóg tãpry mẫi, Paulo ti. Jesus jamĩ kãnhrég tóg mẫi sir, kỹ tóg ko mẫi gé. Ag mỹ tóg vẽnén mág han mẫi mẫi gé, kỹ tóg tỹ vaj mẫi. Vaj kỹ tóg tĩ mẫi, cidade ẽn ki kutẽ kỹ, Paulo ti.

¹² Hã ra ag tóg kyrũ ên pére kãmũ mũ. Rĩr tóg nĩ nĩ, kũ ag krĩ tóg há' he mũ sir.

Cidade tỹ Mileto ra

¹³ Kũ ěg tóg ti jo canoa mág kãra ge mũ, Paulo jo. Kũ ěg tóg cidade tỹ Assôs ra mũ mũ. Tá Paulo tóg ěg mré canoa kãra rã sór mũ gé, ti tỹ ěg mré tĩg jé. "Iso ra mũ jẽg, inh hã vỹ inh pẽn kã ra tĩ mũ," he ja tóg nĩgtĩ, Paulo ti.

¹⁴ ěg tỹ cidade tỹ Assôs tá pa kũ tóg ěg mré tĩ mũ gé, Paulo ti, canoa mág kãmĩ. Kũ ěg tóg cidade tỹ Mitilene tá junjun mũ.

¹⁵ Tá pa kũ ěg tóg tỹ vaj kũ goj vãso tỹ Quios kakãm krỹg mũ. Tỹ vaj kũ ěg tóg goj vãso tỹ Samos to hã nũgnũr mũ, kũ ěg tóg tỹ vaj kũ cidade tỹ Mileto tá junjun mũ sir.

¹⁶ Paulo tóg: "Éfeso ra ěg mũnh ke tũ nĩ," he ja nĩgtĩ. "Ěg tỹ Jerusalém kukãm mũnh ke vẽ, hã kũ ěg tóg Ásia ki nỹtĩnh ke tũ nĩ. Festa tỹ Pentecoste ki tóg sỹ Jerusalém tá nĩnh há tĩ," he ja tóg nĩgtĩ, Paulo ti.

Paulo tỹ Jesus mré ke ag mré vĩ

¹⁷ Mileto tá nĩ kũ tóg Éfeso ra vẽnh vỹ jẽnẽg mũ, Paulo ti, kófa ag mũ, Jesus ki ge kũ nỹtĩ to pã'i ag mũ, ag kãmũ jé.

¹⁸ Ag tỹ tá junjun kũ tóg ag mũ: "inh ve ja ãjag tóg (mỹr)," he mũ. "Inh kãtĩg ven kã ãjag tóg inh vé, isỹ ga tỹ Ásia tá jun vén kã," he tóg.

¹⁹ "Ěg Senhor tỹ Jesus tỹ inh mũ nẽn nĩm ja han isóg tĩ. Vẽnh kãfór han tũ sóg tĩ. Kejẽn

sóg fỹ tĩ gé, sỹ vẽnh jykre pãno ven kũ. Israel ag tóg iso jũgũ tĩ gé, kũ sóg vêsỹrénh tĩ gé," he tóg.

²⁰ "Nén há kar tó sóg tĩ ãjag mũ. Inh pi(jé) ãjag mũ tó tũ nĩgtĩ', sỹ nẽn ki kanhrãn mũ ti'. Ěg vẽnh mãn ki sóg tó ja nĩgtĩ, ãjag ĩn krẽm ke gé," he tóg.

²¹ "Israel ag mũ sóg tó ja nĩgtĩ, inh mré ke ag mũ, fóg tỹ Grego ag mũ ke gé, ag tỹ ãjag jykre tovãnh jé, Topẽ jykre han jé, Jesus Cristo ki rã jé, ěg Senhor ki. Tag tó ja sóg nĩgtĩ," he tóg, Paulo ti.

²² "Ha vé, Jerusalém ra sóg tĩ mũ, Topẽ kuprĩg tỹ inh mũ: ha tĩg, hen kũ. Isỹ tá nẽn venh ke ki kagtũg sóg nĩ ver," he tóg.

²³ "Hã ra Topẽ kuprĩg tóg inh mũ tag tó tĩ, ha mẽ: "ã se jé ag tóg ke mũ, ã vóg kónãn jé ag tóg ke mũ," he tóg tĩ. Isỹ ěmã ũ ki rã tóg inh mũ inh vêsỹrénh ke tó tĩ, Topẽ kuprĩg ti," he tóg.

²⁴ "Hã ra tóg inh mũ tỹ nẽn ũ tũ nĩ. Ag tỹ isén ke mũ ra tóg inh mũ tỹ nẽn ũ tũ nĩ gé. Sỹ inh rãnrãj kãn há tóg tĩ, Jesus Cristo tỹ inh mũ vẽnh rãnrãj nĩm ja ěn ti, hã vỹ: sỹ vẽnh kar mũ Jesus to vỹ sér ěn tó jé, he mũ, sỹ Topẽ tỹ ěg jagẽgtãn mũ ti tó jé, he mũ," he tóg.

²⁵ "Ha vé, inh ve mãn ke tũ ãjag tóg nĩ ha, ki kanhró sóg nĩ. Ũ tỹ hẽn ri ke ag mũ sóg Topẽ tỹ tỹ ěg pã'i nĩ tó ja nĩgtĩ, isỹ ag venh tĩg kũ. Hã ra ag kar ěn tóg inh ve mãn ke tũ nĩ ha," he tóg.

²⁶ "Hã kũ sóg ãjag mũ tó mũ. Ũ tỹ Jesus ki rã tũ nĩn kũ tóg

iso: inh mǝ tóg tó ja tũ nĩ, henh ke tũ nĩ,” he tóg.

27 “Ājag mǝ sóg tó kǎn, Topē jykre kar tó sóg ājag mǝ. Inh pi(jé) ājag mǝ nén ũ tó tũg ja nĩ,” he tóg.

28 “Vēnh ki rĩrmnĩ, vēso jykrén kǝ. Kǝ Jesus ki ge mũ kar ag ki rĩrmnĩ gé. Topē kuprĩg vỹ ājag tỹ ag to pǎ'i hyn han, kǝ ag ki rĩr há han nĩ. Ā kyvénh tỹ tóg ag kygǎm mũ mǝr, Jesus ti. Ti mǝ ag tóg tỹ ti mēg ri ke nỹtĩ, kǝ ājag tỹ ti mēg ěn jēn ke,” he tóg.

29 “Isĩg kǝ ũ ag tóg ājag to junjun ke mũ, kǝ ag tóg mĩg ri ke nỹtĩ, ti mēg mǎn sór kǝ, hǎ vỹ: Jesus ki ge kǝ nỹtĩ ag kókén sór mũ, he mũ,” he tóg.

30 “Ājag kǎmĩ ũ tóg vēnh ó tónh ke mũ gé, Jesus mré mũ ag tỹ ag mré mũ kónǎn han jé,” he tóg.

31 “Kǝ vēnh ki rĩr. Iso jykrén. Prỹg tǎgtũ ki sóg ājag jyvēn, kurǎ ki, kuty ki ke gé. Ājag kar jyvēn sóg (mǝr). Ājag jyvēn kǝ sóg fỹ tĩ gé kejēn,” he tóg.

32 “Hǎ ra sóg Topē mǝ: ag ki rĩr, he mũ, ājag to. Topē vỹ ǎ vỹ tỹ ājag ki rĩr ke mũ gé, ti tỹ ājag jagǎgtǎn kǝ. Ti hǎ vỹ ti ki rǎ to ājag tar han ke mũ, Topē ti. Ājag mǝ tóg ěmǎ há tǎvĩ nĩm ke mũ gé, kar kǝ, ti tũ kar ag mré hǎ,” he tóg, Paulo ti.

33 “Inh pi(jé) ājag mǝ: inh mǝ jǎnkamy nĩm, inh mǝ kur nĩm, he mũ,” he tóg.

34 “Isỹ nén ũ génh jé sóg rǎnrǎj ja nĩgtĩ (mǝr), inh nĩgé tỹ. Kǝ inh rǎnrǎj ki inh companheiro ag vỹ ājag tũ ti vigve

ja nĩgtĩ gé inh kóm,” he tóg.

35 “Hǎ ki sóg ājag mǝ Jesus jykre ti ven mũ. Ēg rǎnrǎj ki ěg tũ ven kǝ ěg tóg ũn krónhkrój ag mǝ nén ũ vin ke mũ gé, ěg tỹ ti jykre han kǝ. Ēg Senhor tỹ Jesus vĩ mĩ sóg ěkrég tĩ. Ti hǎ tóg ěg mǝ tag tó ja nĩgtĩ, kǝ tóg: “ũ tỹ ěg mǝ nén ũ nĩm kǝ tóg pǎgsĩ nỹ,” he ja nĩgtĩ. “Hǎ sĩ tóg nỹ. Ēg tỹ ũ mǝ ěg tũ nĩm hǎ kǝ tóg há nỹ,” he ja tóg nĩgtĩ, Jesus ti,” he tóg, Paulo ti. Paulo tỹ ag mǝ ken hǎ vē.

36 Ti tỹ tó kǎn kǝ tóg ǎ jakrĩ tỹ jē mũ, kǝ tóg Topē mré vĩ mũ, vēnh kar to.

37 Kǝ ag tóg kygfỹ' he mũ. Paulo nunh jǎgmỹ ag tóg ājag nĩgnó fón mũ, ti ki ag tóg nhun ke mũ.

38 Ag mǝ tóg e tĩ, ti tỹ ag mǝ: “inh ve mǎn ke tũ ājag nĩ ha,” hen kǝ. Kǝ ag tóg canoa mág ra ti mré mũ mũ sir.

21

Jerusalém ra

1 Vǎhǎ ěg tóg ag mǝ: “ěg mũ sór vē,” he mũ. Ēg tỹ ag ré kǝ mũ kǝ tóg ag mǝ jagy tĩ. Ge ra ěg tóg tá pa mũ. Kǝ ěg tóg canoa mág kǎmĩ mũ mũ, goj vǎso tỹ Cós kukǎm, vēsǝméri. Tỹ vaj kǝ ěg tóg goj vǎso tỹ Rodes tá junjun mũ. Kar ěg tóg cidade tỹ Pátara tá junjun mũ sir.

2 Tá ěg tóg canoa mág ũ vég mũ gé, ũ tỹ ga tỹ Fenícia ra tĩ mũ ěn. Kǝ ěg tóg kǎra ge kǝ kǎmĩ mũ mũ sir.

3 Goj vǎso tỹ Chipre vég ěg tóg mũ, ěg jakǎnh tá. Kǝ ěg tóg ga tỹ Sírĩa kukǎm mũ mũ.

Cidade tỹ Tiro tá ěg tóg krỹg mũ. Ag tỹ canoa tỹ nén rĩnh tĩ ěn tỹ tá vin han ke vễ, cidade tỹ Tiro tá.

⁴ Tá ěg tóg Jesus mré mũ ag vég mũ. Hã kỹ ěg tóg kurã tỹ 7 (ke) ki tá nỹtĩ nĩ. Topẽ kuprĩg tỹ ag krĩn kỹ ag tóg Paulo mỹ ke mũ, ti tỹ Jerusalém ra tĩg tũ nĩ jé, he ag tóg.

⁵ Ge ra ěg tóg kurã tỹ 7 (ke) tũg kỹ mũ măn mũ. Hã ra ag tóg ěg mré mũ sĩ han mũ, ajag prũ fag mré hã ke gé. Cidade tá ag tóg pa mũ ěg mré, kỹ ěg tóg goj fyr tá ěg jakrĩ tỹ nỹtĩn kỹ Topẽ mré vĩ mũ.

⁶ Kỹ ěg tóg: “ěg mũnh ken vễ ha,” he mũ. Kỹ ěg tóg canoa kãra ge mũ. Jó ag tóg ajag jamã ra vỹnvỹn ke mũ gé.

⁷ Kỹ ěg tóg cidade tỹ Tiro tá pa kỹ mũ măn kỹ cidade tỹ Ptolemaida tá junjun mũ. Jesus mré ke ag vég ěg tóg mũ sir tá. Ag mré ěg tóg kurã pir han mũ.

⁸ Tỹ vaj kỹ ěg tóg tá pa kỹ cidade tỹ Cesaréia ra mũ mũ, ěg pẽn kã. Tá ěg tóg Jesus vĩ tó tĩ ù ĩn krẽm nỹtĩ mũ, ti jiji hã vỹ: Filipe, he mũ. Û tỹ 7 (ke) ěn ag kã ù vễ, ù tỹ vễjẽn vẽn kãpópãm mũ ěn ag kã ù vễ.

⁹ Ti kósin fag vỹ tỹ 4 (ke) nỹtĩ, ùn mén ja tũ fag. ěn fag vỹ Topẽ vĩ tó mũgtĩ.

¹⁰ Si há tũ tá Judéia tá ke ù tóg kãtĩ mũ, ù tỹ Topẽ vĩ tó tĩ ti, ti jyjy hã vỹ: Ágabo, he mũ.

¹¹ ěn tóg ěg tá jun kỹ Paulo vėsógfĩn ja tỹ ã nĩgé sigség mũ, ã pẽn ke gé. Kỹ tóg: “Topẽ kuprĩg tỹ tón hã vễ, ha mẽ: ù tỹ vėsógfĩn ja tag tỹ tũ nĩ ěn vỹ

se kỹ jẽn h mũ,” he mũ. “Israel ag vỹ ti senh mũ, kỹ ag tóg fóg ag mỹ ti fẽg mũ, he tóg, Topẽ kuprĩg ti,” he tóg, Ágabo ti.

¹² ěg tỹ tag mẽ kỹ ěg tóg Paulo mỹ: “Jerusalém ra tĩ tũg nĩ,” he mũ. Kỹ tá ke ag tóg ge mũ sir ěg mré.

¹³ Hã ra Paulo tóg: “ajag hã ne tóg kygfỹ' he mũ!,” he mũ. “Inh fe kaj han ajag tóg mũ,” he tóg. “Ag tỹ ise sór nỹtĩn kỹ tóg inh mỹ tỹ nén ù tũ nỹ. Ag tỹ isén sór nỹtĩn kỹ tóg inh mỹ tỹ nén ù tũ nỹ gé, ag tỹ Jerusalém tá inh vóg kónãn sór kỹ, ěg Senhor tỹ Jesus tugnĩn,” he tóg, Paulo ti.

¹⁴ ěg vĩ mẽ jãvãnh tóg nĩ. Kỹ ěg tóg vĩ măn tũ nĩ sir. “Jesus tỹ nén han mũ vỹ tóg há nĩ,” he ěg tóg mũ sir.

¹⁵ Kar kỹ ěg tóg nén kar kãn mũ. Kỹ ěg tóg Jerusalém ra mũ mũ.

¹⁶ Cesaréia tá ke ù ag tóg ěg mré mũ mũ gé, Jesus mré ke ù ag. ěg mỹ ag tóg ù ven mũ, ěg tỹ ti ĩn krẽm nỹtĩ jé. Ti jiji hã vỹ: Menasom, he mũ. Goj vãso tỹ Chipre tá ke vễ. Vãsy tóg Jesus ki rã ja nĩgtĩ. ěg tỹ ti ĩn krẽm nũgnũr ke vễ.

Paulo tỹ Tiago mré vēmén

¹⁷ ěg tỹ Jerusalém tá junjun kỹ Jesus mré ke ag fe tóg mrin ke mũ sir.

¹⁸ Tỹ vaj kỹ Paulo tóg ěg mré Tiago venh tĩ mũ. Kỹ kófa ag kar tóg tá vẽn măn mũ gé.

¹⁹ Ag mỹ tóg: “ajag mỹ há?” he mũ. Kỹ tóg ag mỹ Topẽ tỹ nén han kar tugtó mũ. Tugtó kãn tóg mũ, Topẽ tỹ fóg kar

krīn mū ti, ti t̄y ag m̄y Topē vī tón k̄y.

²⁰ Ag t̄y mē k̄y ag tóg Topē m̄y vī há han mū. K̄y ag tóg Paulo m̄y: “régre’,” he mū. “Israel t̄y hēn ri ke ag v̄y Jesus ki ge k̄y n̄ytī, ū t̄y mil t̄y hēn ri ke ag. Ēn kar tóg Moisés t̄y ěg m̄y vēnh jykre nīm ja han (ka)mē n̄igtī’,” he ag tóg.

²¹ “Hā ra ū ag tóg ag m̄y ā to ón ja n̄igtī. Ā to ag tóg: “Israel kar krīn kónān tóg tī,” he tī. “Israel t̄y fóg mī mū kar krīn kónān tóg tī, ag t̄y Moisés t̄y ěg m̄y nén nīm ja tovānh jé,” he ag tóg tī ā to, ón k̄y. Ājag krē gré junun fár kym tūg nī, he ā nēji tī. Moisés t̄y ěg m̄y nén nīm ja hán mān tūg nī, he ā nēji tī,” he ag tóg, Paulo m̄y.

²² “K̄y ěg ne han mū ha?” he ag tóg. “Ū t̄y hēn ri ke ag v̄y vēnh mān ke mū, ag t̄y ā k̄atīg mēn k̄y,” he ag tóg, Paulo m̄y.

²³ “Tag hā han jé ā tóg ke mū, ha mē. Ū t̄y 4 (ke) ag v̄y ki n̄ytī ěg mré, Topē m̄y promessa han mū ag,” he ag tóg.

²⁴ “Ag m̄y: “inh mré n̄ytīm̄nī,” hemnī. Ag mré vēnh jānhkri han nī, ěg jykre ki. Ag t̄y vējārég mū k̄y ag jo kajām nī. Hā k̄y vēnh kar tóg ā jykre ki kanhró n̄ytī sir. Ū ěn ag t̄y ā to ón mū ve jé ag tóg ke mū, ā t̄y Moisés t̄y ěg m̄y nén nīm ja ěn han k̄y,” he ag tóg mū, Tiago ag, Paulo m̄y.

²⁵ “Jó ég tóg fóg ag t̄y Jesus ki ge mū ag m̄y vēnh rá jēnē ja n̄igtī, kanhgág ag m̄y ke gé. Ū t̄y Israel jykre han tū kar to

ěg tóg jykren, k̄y ěg tóg ag m̄y vēnh rá ěn jēnē ja nī. Ag m̄y ěg tóg: Moisés t̄y ěg m̄y nén nīm ja ěn han ke tū ājag nī, he ja n̄igtī. Ājag t̄y nén han ken hā vē, ha mē: vēnh k̄aggrá to festa ko tūg nī, retrato to festa ěn. Nén ū kyvénh ko tūg nī gé. Nén t̄y vēsóg ki ter ja ěn ko tūg nī gé. Ājag prū tū fag mré n̄y tūg nī gé, he ja ěg tóg n̄igtī ag m̄y, ū t̄y Israel jykre han tū ag m̄y,” he ag tóg, kófa ag, Paulo m̄y.

²⁶ K̄y Paulo tóg ū t̄y 4 (ke) ěn ag m̄y: “inh mré n̄ytīm̄nī,” he mū, ū t̄y promessa han mū ag m̄y. T̄y vaj k̄y tóg ag mré vēnh jānhkri mū, Israel ag jykre ki. K̄y tóg Topē jo ĩn to tūg k̄y ū t̄y ki r̄ir tī ag m̄y: “ag mré sóg vēnh jānhkri mū,” he mū sir. Ag m̄y tóg kurā nīm, Paulo ti, ag t̄y kurā ěn kā Topē m̄y ti tū pūn jé, ū t̄y 4 (ke) ag jo, Topē tū ki r̄ir tī ag. Kurā ěn to hā ag tóg vēnh jānhkri tī, kurā t̄y 7 (ke) ki, promessa han mū ag.

Ag t̄y Paulo se

²⁷ K̄y tóg kurā t̄y 7 (ke) ěn tū ken k̄y Israel t̄y Ásia tá ke ag tóg Topē jo ĩn tá ti vég mū sir, Paulo ti. K̄y ag tóg vēnh génh mág han mū. Ti kāmīg ag tóg mū, k̄y ag tóg prēnprēr mū sir.

²⁸ “!..Israel kar, kāmū jēg ra..!” he ag tóg. “!..Ūn gré ěn ve ra..! !..Ū t̄y vēnh kar krīn kónān mū ěn ve ra..! !..Ěg povo to tóg vī kónān mo..! !..Moisés t̄y ěg m̄y nén nīm ja to..! !..Topē jo ĩn to tóg vī kónān mo..! !..K̄y tóg fóg ag m̄y: Topē jo ĩn k̄ara ge jēg, he

ja ne..! !..Hã kÿ tóg Topê jo ãn kavénh mo..!" he ag tóg, prênprên kÿ, Paulo to.

²⁹ Fóg tÿ Trófimo ên ve ja ag tóg nĩgtĩ, Éfeso tá ke ên, Paulo mré tĩ mũ ên. Jerusalém tá ag tóg ti ve ja nĩgtĩ, kÿ ag tóg ón kÿ: "Paulo hÿn ti pére vyr, Topê jo ãn kãra," he mũ.

³⁰ Kÿ cidade ên tá ke kar ag vÿ vênh génh mũ sir, jũgũ kÿ. Ag tÿ Paulo kãgmĩ kÿ ag tóg Topê jo ãn kãtã ti kutêm mũ. Kÿ ù tÿ ki rĩr tĩ ag tóg Topê jo ãn nĩgfénh mũ sir.

³¹ Kÿ ag tóg ti rêg mũ, Paulo ti.

Hã ra soldado ag pã'i vÿ mêng mũ, major ti, Jerusalém tá ke kar ag tÿ vênh génh kÿ.

³² Kÿ tóg soldado ag jé prên kÿ, ag pã'i jé prên kÿ tóg ag to pétê mũ. Ag tÿ soldado ag ve kÿ, ag tÿ major ve kÿ ag tóg sir krÿg he mũ, Paulo rên kÿ.

³³ Hã ra major tóg tá jun mũ. "Ti kãgmĩ ra," he tóg, soldado ag mÿ. "Ti se ra, ferro régre tÿ," he tóg. "Û nê?" he tóg. "Ti tÿ ne han nê?" he tóg, vênh kar mÿ, major ti.

³⁴ Hã ra ù ag tóg ti mÿ nén ù tó, kÿ ù ag tóg ti mÿ nén ù tó, kÿ tóg ki kanhrãn tũ nĩ sir. Kÿ tóg soldado ag mÿ: "êg ãn kãra ti rãg," he mũ.

³⁵ Ag tÿ sãnsãn he jafã tá junjun kÿ ag tóg ti vãg mũ. Vênh kar tÿ ti to vênh génh kÿ ag tóg ti vãg mũ, ag tÿ ti kã kyn ke jé.

³⁶ Vênh kar tóg ag nón mũ kÿ: "!..ti rê ra..!" he mũ, prênprên kÿ.

Paulo tÿ ag mÿ vênh kãmén mũ

³⁷ Ag tÿ ãn kãra ti rãg sór kÿ Paulo tóg major mÿ: "sÿ ã mré vémén há tóg tĩ," he mũ. Grego vĩ ki tóg ti mÿ ke mũ. Fóg tÿ major vê, hã kÿ tóg Grego vĩ hã tó ti.

³⁸ Kÿ major tóg ti mÿ: "ã hã ne tóg Grego vĩ tó há nĩ," he mũ. "Kÿ ã mÿ tÿ Egito tá ke ên tũ nĩ', ù tÿ kurã ên kã vênh génh han mũ ên', ù tÿ mil tÿ 4 (ke) mré tĩ mũ ên, governo kato tẽ mũ ên ag mré, êmã tũ mĩ tĩ mũ ên?" he tóg, Paulo mÿ, major ti.

³⁹ Kÿ Paulo tóg ti mÿ: "hÿ," he mũ. "Tÿ sóg Israel nĩ," he tóg. "Tÿ sóg cidade tÿ Tarso tá ke nĩ. Ga tÿ Cilícia tá cidade mág kãfór vê, inh mur ja ti. Isÿ povo tag mré vĩnh há tóg tĩ," he tóg, Paulo ti, major mÿ.

⁴⁰ Kÿ tóg ti mÿ: "ha vĩ ge," he mũ.

Kÿ Paulo tóg sãnsãn he jafã kri jê kÿ ag mÿ ke mũ sir. Hebreu vĩ ki tóg ag mÿ ke mũ, kÿ tóg:

22

¹ "inh kanhkã'," he mũ. "Ijóg'," he tóg. "Isÿ ãjag mÿ inh jykre kãmén ke vê, ki êmê," he tóg ag mÿ.

² Kÿ ag tóg ti tÿ Hebreu vĩ ki ag mÿ vĩ mêng mũ sir, kÿ ag tóg katy' he mũ sir.

³ Kÿ tóg ag mÿ: "tÿ sóg Israel nĩ," he mũ. "Cidade tÿ Tarso tá inh mur, ga tÿ Cilícia tá. Cidade tag ki sóg hã ra mog mũ, kÿ Gamaliel tóg inh kanhrãn. Inh mÿ tóg êg jóg'jóg ag jykre tó kãn, kÿ sóg to tar ja

nĩ. Topě jykre to sóg tar tãvĩ ja nĩgtĩ, ãjag tỹ ũri han mũ ri kén,” he tóg. “Topě jykre hỹn, he sóg tĩ gé, ěg jykre ěn to, hã ra sóg kygně.

⁴ Hã kỹ sóg Jesus mré mũ ag to jũ tãvĩ ja nĩgtĩ. Ag kãgtén sór ja inh nĩgtĩ, ũn tãtá fag ke gé. Ag sigse ja sóg nĩgtĩ, vĕse ja kãki sóg ag vãm ja nĩgtĩ gé.

⁵ Topě tũ ki rĩr tĩ to pã'i mág vỹ ki kanhró nĩ, kófa ag kar ke gé. Ag hã tóg inh mỹ permissão han ja nĩgtĩ, sỹ cidade tỹ Damasco ra tĩg jé, tá ěg mré ke ag mỹ ven jé. Tá sóg Jesus mré ke ag sigse sór ja nĩ gé, Jerusalém ra ag tatĩ kãtĩg jé, tag ki ag vóg kónãn jé,” he tóg, Paulo ti.

Paulo tỹ ã tỹ Jesus ki rã kãmén
(Hk 9.1-19; 26.12-18)

⁶ “Isĩg kỹ sóg Damasco tá jun mũ. Kỹ tóg vãhã vĕnh jĕngrĕ tar tãvĩ tóg vãhã inh ki kómkóm ke mũ. Kanhkã tá ke vĕ, vĕnh jĕngrĕ tag ti. Rã tỹ ěg nĩno kã sa ra tóg ke mũ.

⁷ Kỹ sóg kutĕ mũ. Kỹ sóg vĕnh vĩ mĕg mũ, kỹ tóg inh mỹ: “Saulo', Saulo', ã tỹ ne jé isũ ag vóg kónãn nĕ?” he mũ, vĕnh vĩ ti.

⁸ Kỹ sóg ěg Senhor mỹ: “ã tỹ ũ nĕ?” he mũ. Kỹ tóg inh mỹ: “tỹ sóg Jesus nĩ, Nazaré tá ke ěn,” he mũ, “ã tỹ ũn vóg kónãn sór tĩ ěn hã vỹ tỹ inh nĩ,” he tóg inh mỹ.

⁹ Inh mré mũ ag vỹ vĕnh jĕngrĕ ěn vigvég mũ. Hã ra ag tóg ũ tỹ inh mỹ vĩ mũ mĕg tũ nĩ.

¹⁰ Kỹ sóg ěg Senhor ti mỹ: “kỹ sỹ hĕ ri kenh ke nĕ?” he

mũ. Kỹ tóg inh mỹ: “jĕg nĕ ra,” he mũ. “Damasco ki rã. Tá ũ tóg ã mỹ tó kãn mũ, ã tỹ nĕn han ke ti,” he tóg inh mỹ, vĕnh vĩ ti.

¹¹ Hã ra sóg nĕn ũ vég tũ nĩ, vĕnh jĕngrĕ ěn tar tãvĩ nĩn kỹ. Kỹ inh mré mũ ag tóg inh nĩgĕ kãgmĩ kỹ inh pére mũ mũ. Hã ki ěg tóg Damasco tá junjun mũ sir.

¹² Kỹ ũ tỹ Ananias he mũ ěn tóg inh venh kãtĩ mũ. Moisés tỹ ěg mỹ vĕnh jykre nĩm ja ěn han kãn tóg nĩgtĩ, Ananias ti. Damasco tá ke kar vỹ ti to vĩ há han mũgtĩ, Israel ěn ag kar.

¹³ Ěn tóg inh venh kãtĩ mũ, kỹ tóg iso jun kỹ inh mỹ: “régrĕ!,” he mũ. “Saulo',” he tóg mũ. “Inh ki ěvãnh ra,” he tóg. Kỹ sóg vĕsỹmĕr ti vég mũ sir.

¹⁴ Kỹ tóg inh mỹ: “ěg jóg'jóg ag tỹ Topě vỹ ã kuprĕg, vãsỹ,” he mũ, “ã tỹ ti jykre ki kanhró nĩ jé, ã tỹ ũn kuryj nĩ ěn ve jé, Cristo ěn. Ti hã tóg ã mré vĩnh mũ,” he tóg inh mỹ, Ananias ti.

¹⁵ “Ã tỹ vĕnh kar mỹ ã tỹ nĕn vég mũ tónh ke vĕ, ã tỹ nĕn mĕg mũ ti,” he tóg inh mỹ.

¹⁶ “Kỹ ěmĕ kỹ nĩ tũg nĩ. Jĕg nĕ ra, ã tỹ kype kỹ jĕ jé, Topě tỹ ã tỹ ti vĩ mranh tỹ tũ' he jé. Ti mré vĩ, ti jiji tó kỹ,” he tóg inh mỹ, Ananias ti,” he tóg, Paulo ti.

Paulo tỹ ã rãnrãj kãmén

¹⁷ “Isỹ Jerusalém ra vỹn ke kỹ sóg Topě jo ĩn krĕm ti mré vĩ mũ. Kỹ sóg nĕn nĕ vég mũ.

¹⁸ Ti hã vĕ, ěg Senhor hã vĕ. Kỹ tóg inh mỹ: “kur Jerusalém

tá kutě,” he mũ. “Ă vĩ mẽnh ke tũ ag nĩ, ă tỹ ag mỹ inh kāmén mũ ra,” he tóg inh mỹ.

19 Kĩ sóg ẽg Senhor ti mỹ: “hã ra ag tóg isỹ nén han ja ki kanhró nỹtĩ,” he mũ. “Ag sigse han ja isóg tĩgtĩ. Vẽnh kanhrãn jafã krêm sóg ag mrãnmrãn ja tĩgtĩ gé, ũ tỹ ă ki ge kỹ nỹtĩ ag,” he sóg ti mỹ.

20 “Kỹ sóg ag tỹ Estêvão tén kỹ, ag tỹ ũ tỹ ă vĩ tó mũ ẽn tén kỹ sóg tá jẽ ja nĩ gé, kỹ tóg inh mỹ há ja tĩ, ag tỹ ti tén kỹ. Ag kur ki sóg rĩr ja nĩgtĩ gé, ũ tỹ Estêvão tén mũ ag kur ki,” he sóg, ẽg Senhor mỹ.

21 Hã ra tóg inh mỹ: “vó, ha tĩg,” he mũ. “Kór há ra sóg ă jẽnẽnh mũ, kuvar há ra. Fóg kar to sóg ă jẽnẽnh mũ, kanhgág kar to ke gé,” he tóg inh mỹ,” he tóg, Paulo ti.

22 Hã ra vẽnũ kar ẽn ag tóg ẽmẽ kỹ nỹtĩ nĩ. Ag tỹ ti vĩ tag mẽ kỹ ag tóg prẽnprẽn mũ sir. “!..Ti tén ra..!” he ag tóg. “!..Ũ tỹ ge vỹ kórég ne..!” he ag tóg. “!..Ti rĩr nĩn kỹ tóg ẽg mỹ tỹ ũ nỹnh mo..!” he ag tóg.

23 Prẽnprẽn ag tóg mũ. Ăjag kur vãm ag tóg mũ, ga funfur han ag tóg mũ sir. Ag jũgũ vẽn.

24 Kỹ major vỹ: “ĩn kãra ti rãg,” he mũ. “Nén fãr tỹ ti mrãnmrãn, cavalo tỹ mrãn ke jafã ri ke ẽn tỹ. Hã tỹ ti ki jẽmẽ. Ag tỹ hẽ ri ke jé ă to vĩ kónãn nẽ? hemnĩ ti mỹ,” he tóg, major ti, soldado ag mỹ. Major tóg Paulo tỹ ag mỹ nén tó ja ẽn mẽ ja tũ nĩ, ti tỹ Hebreu ag vĩ ki kagtĩg nĩn kỹ. Hã kỹ tóg soldado ag mỹ: “ti ki jẽmẽ,” he mũ sir.

25 Kỹ ag tóg ti ség mũ, nén fãr tỹ, ag tỹ ti mrãnmrãn jé. Hã ra Paulo tóg capitão mỹ, ũ tỹ tá jẽ ẽn mỹ tóg: “mỹ ă mỹ kuryj, ag tỹ inh mrãnmrãn ke ti?” he mũ. “Tỹ sóg Romano nĩ, hã ra ag tóg nén fãr tỹ inh mrãnmrãn sór mũ, ũ tỹ inh ki jẽmẽg tũ ra, ag tỹ inh jyvẽn tũ ra,” he tóg, Paulo ti.

26 Kỹ tóg capitão mỹ e tĩ, kỹ tóg major mỹ tónh tĩ mũ. Ti mỹ tóg: “ă tỹ ne han ke nẽ ha?” he mũ. “Romano vẽn mỹr,” he tóg ti mỹ.

27 Kỹ major tóg ti to kãtĩ mũ, kỹ tóg ti mỹ: “kỹ ă mỹ tỹ Romano nĩ?” he mũ. Kỹ Paulo tóg: “hỹ,” he mũ.

28 Kỹ major tóg ti mỹ: “isỹ tỹ Romano nĩ jé sóg jãnkamỹ tỹ hẽn ri ke tỹ kajãm,” he mũ ti mỹ. Kỹ Paulo tóg ti mỹ: “inh mur kã sóg ge nĩ hã ra, inh panh ri kén,” he mũ.

29 Kỹ ag tóg ti tovãnh mũ sir, ũ tỹ ti mrãnmrãn ke mũ ẽn ag. Hã ra tóg major mỹ e tĩ, ti tỹ ti se kỹ. Ti tỹ ũn Romano senh ke tũ vẽn vẽn, hã kỹ tóg ti mỹ e tĩ.

Israel tỹ pã'i ag tỹ Paulo vĩ mẽg mũ

30 Tỹ vaj kỹ major tóg Israel ag ki jẽmẽ mãn sór mũ, ag tỹ hẽ ri ke kỹ Paulo to jũ mũ ti. Kỹ tóg ti kavãn mũ. Kỹ tóg Topẽ tũ ki rĩr tũ to pã'i mág ag jé prẽn mũ, vẽnũ jyvẽn tĩ kar ag ke gé. Kỹ tóg Paulo péré tĩ mũ, ag jo ti fẽg jé.

23

1 Kỹ Paulo tóg vẽnũ jyvẽn ti ag vẽn mũ, kỹ tóg: “inh

kanhkā’,” he mū. “Vēnh jykre há kar han isóg nīgtī (mýr), kurā kar ki, ūri ke gé, isý Topē mī ēkrén ký,” he tóg.

² Ký Topē tū ki rīr tī to pā’i mág tóg ke mū, ū tý Ananias he mū ēn vỹ: “tī jēnky ki tānh,” he mū, tī jy nýtī ag mý.

³ Ký Paulo tóg ti mý: “Topē vỹ ā tānh ke mū,” he mū. “Jykre régre ā nī, ký ā tóg tỹ ĩn to ró ri ke nī. Ēg tỹ tinta kupri tỹ to tīn ký ēg tóg ti kórég vég tū nīgtī, tinta krēm ti kórég ti,” he tóg. “Inh jyvēn sór ā tóg mū, Topē jykre ki, hā ra ā hā tóg Topē jykre mranh, ā tỹ ag mý: tī tānh ra, hen ký,” he tóg, Paulo ti.

⁴ Ký tá nýtī ag tóg ti mý: “ā hā tóg Topē camarada mý vī kónān, Topē tū ki rīr tī to pā’i mág mý,” he mū, Paulo mý.

⁵ Ký Paulo tóg: “mē’,” he mū. “Tī tỹ tỹ pā’i mág nīn ki sóg kagtīg ja nī, ke tū nī mū ra sóg ti to vī kónān ja tū nī vē,” he tóg. “Topē vī ki tag tóg rán ký nī nī, hā vỹ: ā povo tỹ pā’i mág to vī kónān tūg nī, he mū,” he tóg, Paulo ti.

⁶ Hā ra Paulo tóg ag vég mū, vēnh jyvēn tī ag. Ū ag tóg tỹ Saduceu nýtī, ký ū ag tóg tỹ Fariseu nýtī. Vyrmý ag jykre nýtī. Ký Paulo tóg jamā hár(a) ke ký ag mý: “inh kanhkā’,” he mū. “Tỹ sóg Fariseu nī, ký inh panh tóg tỹ Fariseu nī gé,” he tóg. “Topē vỹ ūn ter mū ag rīnrīn mǎn ke mū. Tag vỹ inh mý ki hā ke nī, hā ký ājag tóg iso jūgū mū,” he tóg, Paulo ti.

⁷ Tī tỹ tag tó kar ký vēnh jyvēn tī ag tóg vēnh kápugpóv

ký nýtī. Fariseu ag tóg Saduceu ag mré vī jūgū han mū, jagnē vī kafān ký.

⁸ Saduceu ag mý tóg tū tī, Topē tỹ ēg ter mū rīn mǎn mū tī. Topē tỹ jēnē jafā tóg ag mý tū tī gé. Ký vēnh kuprīg tóg ag mý tū tī gé. Hā ra Fariseu ag mý tóg nýtī, vēnh kuprīg, Topē tỹ jēnē jafā, tī tỹ ēg rīn mǎn mū ke gé. Hā ký ag tóg jagnē vī kafān mū sir.

⁹ Ký ag tóg jagnē to jūgū ký prēnprēr mū. Fariseu ag kāmī ū ag tóg jēg nē nē ký, Saduceu vī kafān ký ag tóg: “nén ū kórég han tū ti nī, Paulo ti,” he mū. “Hēn ri ke mūn ti hýn nén nē ve ja nī, vēnh kuprīg hēn ri ke mūn, ke tū nī ký Topē tỹ jēnē jafā,” he ag tóg, Fariseu ag, Topē vī to professor ag.

¹⁰ Ký vēnh génh tóg kutē mū ve nī. Ký major tóg Paulo to jykren mū. “Ag hýn gen ký ti janjān ke mū, tī jónjān ký,” he tóg, vēnh génh ven ký. Ký tóg soldado ag mý: “kur mū jēg, tī kǎgmī jé, ēg ĩn kāra ti rǎg jé,” he mū, major ti. Ký ag tóg ĩn kāra ti rǎg mū.

¹¹ Tỹ kuty ký Jesus tóg Paulo mré vī mū. “Kamēg tūg ra,” he tóg ti mý. “Jerusalém tá ā tóg inh vī tó há han. Ge jé ā tóg ke mū, cidade tỹ Roma tá,” he tóg, Paulo mý, Jesus ti.

Ag tỹ Paulo tén sór

¹² Tỹ vaj ký Israel ag tóg vēnh mǎn mū sir. Jagnē mré ag tóg jykren mū. “Paulo tén jé ēg tóg ke mū,” he ag tóg. “Jēn ke tū ēg nī, kron ke tū ēg nī gé, ēg tỹ Paulo tén ke jo, ke tū nī

mũ ra Topê jé ěg vóg kónãn,” he ag tóg.

13 Ũ tỹ 40 (ke) kăfór vĕ, jagnĕ mré jykrén mũ ag.

14 Ěn ag vỹ Topê tũ ki rĩr tĩ to pã'i mág ag mré vĩnh kãmũ mũ, kófa ag mré hã. “Jagnĕ mré ěg jykrén,” he ag tóg. “Nén ũ kãmĕnh ke tũ ěg nĩ, ěg tỹ Paulo tén ke jo, ke tũ nĩ mũ ra Topê jé ěg vóg kónãn,” he ag tóg.

15 “Kỹ major mré vĩnh mũmnĩ. Vĕnh jyvĕn tĩ ag mré mũmnĩ, âjag tỹ ti mré vĩ jé. Ti mỹ: ěg tỹ ti tỹ nĕn ũ kórég han mũ to jykrén mãn ke vĕ, hemnĩ, hã to ěg mỹ ti ven mãn nĩ, hemnĩ ti mỹ. Ti tỹ: hej, hen kỹ ěg tóg ti tén ke mũ, kỹ tóg âjag to jun ke tũ nĩ,” he ag tóg, pã'i ag mỹ.

16 Hã ra Paulo ve fi kósin tóg ag tỹ han sór mũ ěn mĕg mũ. Kỹ tóg soldado jo ĩn kãra rã kỹ Paulo mỹ tó mũ.

17 Kỹ Paulo tóg capitão ũ jé prĕr kỹ ti mỹ: “major mỹ kyrũ tag pére tĩg, ti tỹ ti mỹ nĕn ũ tó jé,” he mũ ti mỹ.

18 Kỹ tóg ti pére tĩ mũ sir, major to. Kỹ tóg ti mỹ: “ũ se kỹ jĕ ěn tóg, Paulo ěn tóg inh jé prĕr,” he mũ, “kỹ tóg inh mỹ: “kyrũ tag tỹ major mỹ ti pére tĩg,” he mũ. Ti tỹ nĕji â mré vĩ sór nĕ,” he tóg, capitão ti.

19 Kỹ major tóg ti nĩgé kăgmĩ kỹ ti pére tĩ mũ, vĕnh péju kỹ. Kỹ tóg ti mỹ: “ã hĕ ri ké?” he mũ.

20 Kỹ tóg ti mỹ: “Israel ag tóg to jykrén, ag tỹ ã mỹ to vĩ jé, ã tỹ vaj kỹ Paulo jĕnĕ jé, vĕnh jyvĕn tĩ ag to. Ón kỹ ag tóg ã

mỹ: “ti ve mãn jé ěg tóg ke mũ, ěg tỹ ti to jykrén mãn jé,” henh ke mũ. Hã ra ag ón vĕ,” he tóg, major mỹ.

21 “Ag mỹ: hej, he tũg nĩ. Ũ tỹ 49 (ke) ag tóg, ti jo vājig mũ. Jagnĕ mré ag jykrén, ag tỹ nĕn ũ konh ke tũ nĩ jé, kron ke tũ nĩ jé, ti tén ken jo. “Ke tũ nĩ mũ ra Topê jé ěg vóg kónãn,” he ag tóg. Ěn ag tóg ã tỹ ag mỹ: hej, henh ke jãvãnh mũ sir,” he tóg, kyrũ ti, major mỹ.

22 Kỹ major tóg ti mỹ: “ũ mỹ: ti mỹ sóg tó, he tũg nĩ,” he mũ. “Ha jatun mỹ tĩg,” he tóg ti mỹ.

Major tỹ Paulo jĕnĕnh ke, pã'i mág tỹ governador ra

23 Kỹ major tóg capitão régre ag mỹ: “kãmũ jĕg ra,” he mũ. Kỹ tóg ag mỹ: “âjag tũ kãnkã ra,” he mũ. “Cidade tỹ Cesaréia ra âjag mũnh mũ, kutu tag kã 9 horas ki. Kỹ soldado tỹ 200 (ke) ag vỹ mũnh mũ, cavalo kri mũ ag tỹ 70 (ke) ag ke gé, kỹ ũ tỹ 200 (ke) ũ ag vỹ rógro pu gég mũnh mũ,” he tóg.

24 “Kỹ cavalo ũ ag vỹ mũnh ke mũ gé, Paulo tỹ kri nĩ jé. Governador tỹ Félix to ti pére mũ jĕg, tĩ tỹ jatun mỹ tá jun jé,” he tóg, major ti, capitão ag mỹ.

25 Kỹ tóg pã'i mág tỹ Félix mỹ rán mũ, major ti, kỹ tóg:

26 “Cláudio Lísias tỹ rá vĕ,” he mũ. “Isỹ Governador tỹ Félix mỹ rán hã vĕ, ã tỹ inh kăfór nĩn kỹ. ã mỹ sóg: ã mỹ há? he mũ,” he tóg.

27 “Tag vỹ tỹ Israel ag vĕse jĕ. Ti tén kren ag tóg. Hã ra

sóg ti tỹ tỹ Romano nĩ jẽmẽ, kỹ sóg inh soldado ag mré ti kren han.

²⁸ Hã ra sóg ti kato tẽ mũ ag ki jẽmẽ sór mũ. Ag tỹ hẽ ri ke jé ti to jũgũ nẽ? he sóg. Hã kỹ sóg vẽn jyvẽn tĩ ag mỹ ti ven mũ.

²⁹ Kỹ sóg vég mũ. Ag jykre tugrĩn ag tóg ti to jũgũ mũ. Crime han tũ ti nĩ. Tĩ tỹ nén ũ to ter jé han tũ ti nĩ gé. Kỹ tóg ti tỹ nén ũ to se kỹ nỹ jé tóg han tũ nĩ gé.

³⁰ Hã ra sóg nén ũ mẽ gé. Ti to ag tóg vājig mũ sir, hã kỹ sóg vėsỹmér ti jẽnẽg mũ ã to. Tĩ kato vĩ mũ ag mỹ sóg: ti hã mré vĩmnĩ, he mũ gé,” he tóg.

Vẽn rá ki tóg tó ja nĩ, major ti, governador mỹ.

³¹ Kỹ soldado ag tóg han mũ sir, ti tỹ ag mỹ nén tó mũ ti. Paulo pére ag tóg mũ mũ. Kutu tá mũ kỹ ag tóg cidade tỹ Antipátride tá junjun mũ.

³² Tỹ vaj kỹ ag tóg kyrāgrā mũ, ajag jamā ra, ũ tỹ ajag pẽn kā mũ mũ ag. Cavalu kri mũ ag tóg ti pére mũ mũ inhhã.

³³ Ēn ag vỹ Cesaréia tá junjun mũ. Governador mỹ ag tóg vẽn rá ěn nĩm mũ. Kỹ ag tóg ti mỹ Paulo ven mũ.

³⁴ Kỹ pã'i mág ěn tóg vẽn rá vég mũ, kỹ tóg Paulo mỹ: “tỹ ã ga tỹ hẽ tá ke nĩ, ga tỹ ne tá?” he mũ. Kỹ tóg ti mỹ: “ga tỹ Cilícia tá,” he mũ.

³⁵ Kỹ tóg Paulo mỹ: “ã kato vĩ mũ ag tỹ junjun kỹ sóg ã ki jẽmẽn mũ,” he mũ. Kỹ tóg soldado ag mỹ: “pã'i mág tỹ Herodes tỹ vẽn jyvẽn jafã

krẽm ti nĩm,” he mũ, pã'i mág tỹ Félix ti.

24

Ag tỹ Paulo kato vĩ

¹ 5 dias tũg kỹ pã'i tỹ Ananias vỹ tá jun mũ, cidade tỹ Cesaréia tá. Topẽ tũ ki rĩr tĩ to pã'i mág vẽ. Kófa ag vỹ junjun mũ gé ti mré. Ũ vỹ vỹ káfór han tĩ gé, ti jiji hã vỹ: Tértulo, he mũ. Kỹ ag tóg pã'i mág tỹ governador mỹ Paulo tó mũ, on kỹ ti kato vỹ kỹ.

² Kỹ tóg Paulo jé prẽr mũ.

Kỹ Tértulo tóg ti kato vỹ mũ, kỹ tóg: “Félix!” he mũ. “Hã tãvĩ ã tóg jẽ,” he tóg ti mỹ. “Ēg ki ã tóg rĩr há tãvĩ han tĩ, kỹ ěg tóg jatun mỹ nỹtĩ. Ā tỹ nén to jykren mũ kar tóg ěg mỹ há tĩ,” he tóg, Félix mỹ.

³ “Hã kỹ ěg tóg ã to há (pẽ) tãvĩ nỹtĩ. Ā to ěg jykren há han tĩ. Kurã kar ki ěg tóg ã to vỹ há han tĩ,” he tóg.

⁴ “Kỹ ěg tóg ã mré nén ũ sĩ (pẽ) to vĩnh kãmũ mũ. Kutar ã nĩ, ěg ki rĩr há han kỹ, hã kỹ ěg tóg ã mỹ vỹ mág han sór tũ nĩ. Ēg to ã há nĩ, hã kỹ ã tóg ěg vỹ mẽ sór mũ,” he tóg.

⁵ “Tag ti vỹ vỹ kónãn tãvĩ han tĩ. Israel kar ag krĩn kónãn tóg tĩ, kỹ ag tóg tĩ tugrĩn vẽn kãpugpov kỹ nỹtĩ. Ga kar mĩ tóg ke tĩ. Kỹ tóg tỹ Nazaré tá ke ěn mré ke ag pã'i mág nĩ gé,” he tóg. Paulo to tóg ke mũ.

⁶ “Kỹ tóg Topẽ jo ĩn kãvẽn sór mũ gé, hã kỹ ěg tóg ti kãgmĩ. Ēg tỹ ěg jykre ki ti jyvẽn ke vẽ vẽ.

⁷ Hã ra Lísias tóg kãtĩ mũ, major ên ti. Kĩ tóg ti kãgmĩg mũ. Êg kuju ki tóg ti tỹ hãn ke mũ, jũ kỹ.

⁸ Kĩ tóg ti kato vĩ mũ ag mỹ ké, ag tỹ ã venh kãmũ jé. Ā tỹ vese tag ti ki jẽmẽ kỹ ã tóg venh mũ. Ki hã êg tóg ke tĩ. Ā mỹ ti tónh mũ,” he tóg, Tértulo ti. Ti tỹ Paulo to ón hã vë.

⁹ Kĩ Israel ag tóg ti mré tó mũ gé, pã'i ên ag. “Ti tỹ ki hã ke vë,” he ag tóg, Tértulo to.

Paulo tỹ vënh kãmén

¹⁰ Kĩ governador tóg Paulo mỹ ã nĩgé tỹ ven mũ, Paulo vĩ jé. Kĩ Paulo tóg: “prỹg tỹ hën ri ke ki ã tóg tỹ pã'i mág nĩ, Israel ag mỹ,” he mũ. “Hã kỹ tóg sỹ ã mỹ inh jykre tón kỹ tóg inh mỹ sér tĩ,” he tóg.

¹¹ “Kurã tỹ 12 pátén tũ tóg nĩ, sỹ Jerusalém tá jun ti. Sỹ tá Topẽ tũ han jé sóg ra tĩg ja nĩgtĩ. Vënh kar vỹ tá inh ve ja nĩgtĩ. Ag hỹn ã mỹ tónh mũ, ã tỹ ag ki jẽmën kỹ,” he tóg.

¹² “Hã ra sóg jatun mỹ isũ han tĩ ja nĩ. Topẽ jo ãn krêm sóg ù vĩ kafãn ja tũ nĩ. Vënh génh han ja tũ sóg nĩ gé, êg vënh kanhrãn jafã krêm. Cidade ki sóg nén ù kórég han ja tũ nĩ gé,” he tóg.

¹³ “Ag tỹ inh kato vĩ mũ pi(jé) tỹ ki hã ke nĩ'. Ā tỹ ve há nĩn kỹ ã tóg ki kanhró nĩnh mũ,” he tóg.

¹⁴ “Kỹ sóg ã mỹ ki hã tónh mũ ha,” he tóg. “Inh jóg'jóg ag tỹ Topẽ jykre han tĩ ên hã han isóg tĩ gé, kỹ sóg vãsỹ nén rán kỹ nĩ ên kri fig tĩ gé, ù tỹ Topẽ vĩ tó tĩ ag tỹ nén rán ja ên

ti, Moisés mré hã. Hã ra sóg vënh jykre tãg tag han mũ gé, Topẽ tỹ ùri êg mỹ nén tó mũ ti. Tag to ag tóg: “vyr mỹ vënh jykre vë,” he tĩ, pã'i ag.

¹⁵ Hã ra sóg ag ri kén Topẽ tỹ nén han ke ên ve sór mũ. Ti tỹ êg ter kar kỹ êg rĩn mãn ên ve sór isóg mũ. Ûn jykre kuryj ag rĩn mãn jé tóg ke mũ, ùn jykre pãno ag ke gé,” he tóg.

¹⁶ “Kỹ sóg tĩg há han sór mũ (mỹr), ù tỹ iso: nén ù kórég han ti huri, he tũ nĩn jé,” he tóg. “Topẽ rĩnve sóg tĩg há han sór mũ,” he tóg.

¹⁷ “Vãhã sóg Jerusalém tá jun mãn. Prỹg tỹ hën ri ke ki sóg tá jun ja tũ nĩ vë. Hã ra sóg ra vyr, sỹ inh povo ki ùn jagãgtar fag mỹ nén ù vin jé, sỹ Topẽ mỹ nén ù pũn jé gé,” he tóg.

¹⁸ “Vënh jãnhkrig ja sóg nĩ, êg jykre ki. Kỹ sóg Topẽ jo ãn kãra rã ja nĩ, jatun mỹ, vënh génh han tũ kỹ.

¹⁹ Hã ra Israel ag tỹ Ásia tá ke ag vỹ tá inh ve ja nĩgtĩ gé,” he tóg. “Ên ag tỹ ã jo nỹtĩn kỹ, ag tỹ inh kato vĩ kỹ tóg há tĩ vë, ag tỹ iso jykren mũ ra, ag tỹ iso jũ mũ ra,” he tóg.

²⁰ “Hã ra ù tỹ ki nỹtĩ ag tỹ ã mỹ inh jykre kórég tónh ke vë. Vënh jyvën tĩ ag vỹ inh ki jẽmẽ ja nĩ, kỹ tag ag vỹ tá nỹtĩ ja nĩ. Hã ra ag tóg tá isỹ nén ù vënhmỹ han ve ja tũ nĩ,” he tóg.

²¹ “Vënh vĩ pir tỹ sóg jamã hár(a) tó ja nĩ, isỹ ag rĩnve jën kỹ, hã vỹ: Topẽ tỹ ùn ter mũ rĩn mãn mũ ên kri sóg fig mũ, hã kỹ ãjag tóg ùri iso jũgũ mũ,

he ja sóg nĩ ag mý,” he tóg, Paulo ti.

²² Kĩ Félix tóg kurā ũ kã ti ve mǎn sór mũ, pã'i mág tỹ governador ên ti. Jesus japry ki kanhró tóg nĩ, Jesus jamĩn ki, ti jykre ki, Félix ti. Hã kỹ tóg: “major tỹ Lísias kãtĩg kỹ sóg ãjag ki jẽmẽ kãn mũ,” he mũ.

²³ Kĩ tóg capitão mý: “ti fẽg han ra,” he mũ. “Ti jagãgtãn ra hã ra,” he tóg. “Ti mré ke ag tỹ ti mý nén ũ nĩm sór kỹ tóg há nĩ. Ag mý nenh tũg nĩ,” he tóg, capitão mý, Félix ti. Ti tỹ Paulo to ken hã vẽ.

Félix tỹ Paulo ki jẽmẽ mǎn

²⁴ Si há tũ ra Félix vỹ Paulo vĩ mẽ mǎn sór mũ, ti prũ fi mré. Fi jyjy hã vỹ: Drusila, he mũ. Israel fi vẽ. Kỹ tóg Paulo jé prẽr mũ sir, Félix ti, ti tỹ fag mý Jesus Cristo ki rã kãmén jé.

²⁵ Kỹ Paulo tóg vẽn h jykre kuryj kãmén mũ sir. Vẽso jykrén ke kãmén tóg mũ. Topẽ tỹ kar kỹ vẽn kar tỹ nén han mũ tó tóg mũ. Kỹ Félix tóg ã kanẽ tỹ jũrũn' ke mũ sir, ti tỹ ã jykre pãno mĩ êkrén kỹ. Kỹ tóg ti mý: “ha ver tũg,” he mũ. “Kejẽn sóg ã ki jẽmẽ mǎn mũ gé, kar kỹ, inh kutar tũ nĩn kỹ,” he tóg, Félix ti, Paulo mý.

²⁶ Hã ra tóg Paulo ki jãnkamy mǎn sór mũ gé, ti tỹ ti kavãn jé, ti tỹ ti kyvãn jé. Hã jé tóg kãnhmar ti jé prẽr mǎn', kãnhmar ti jé prẽr mǎn' he tĩ, ti mré vēmén jé. Hã ra Paulo tóg ti mý ven tũg.

²⁷ Hã ki prỹg régre tóg tũg mũ sir. Kỹ Félix jẽgja kã ũ tóg jẽ mũ sir, hã vỹ: Pórcio Festo,

he mũ. Kỹ Félix tóg Israel ag tỹ ã to vĩ há han sór mũ, ag tỹ ti tỹ jykrén há han jé, ti nón. Hã kỹ tóg Paulo kavãg tũ nĩ. Se kỹ tóg jẽ nĩ.

25

Paulo tỹ pã'i mág tỹ Imperador ve sór

¹ Hã kỹ Festo vỹ tỹ governador nĩ sir. Ti tỹ 3 (ke) dias ên kã pã'i mág nĩn kỹ tóg cidade tỹ Cesaréia tá kutẽ kỹ cidade tỹ Jerusalém ra tĩ mũ.

² Kỹ Topẽ tũ ki rĩr tĩ to pã'i mág ag vỹ Israel há ag mré vỹ mág han mũ, Paulo kato. Kỹ ag tóg governador mý nén ũ to vĩ mũ.

³ “Á tỹ êg to há nĩn kỹ vẽn h vỹ jẽnẽmnĩ, Paulo tỹ Jerusalém mĩ kãtĩg jé, êg mĩ,” he ag tóg ti mý. Hã ra ag tóg ti kãtĩg kỹ ti tén sór mũ, êpry kri, êmĩn kri.

⁴ Hã ra Festo tóg ag mý: “Cesaréia tá tóg se kỹ jẽ, Paulo ti,” he mũ. “Jó sóg kãnhmar ra tũg mũ gé,” he tóg.

⁵ “Kỹ ãjag pã'i ag vỹ inh mré mũnh mũ gé. Tá sóg ãjag mré ti venh mũ, ti tỹ hẽn ri ke mũn nén ũ kórég han ja ên ti,” he tóg.

⁶ Kỹ tóg tá nĩ sĩ han mũ sir, 8 (ke) dias hỹn hẽn ri ke mũn, ke tũ nĩ kỹ 10 (ke) dias hỹn. Kỹ tóg Cesaréia ra vỹn ke mǎn mũ. Tỹ vaj kỹ tóg ã tỹ kri nĩn kỹ ag jyvẽn jafã kri nĩ mũ. Kỹ tóg soldado mý: “Paulo pére kãtĩ,” he mũ.

⁷ Ti katĩg kỹ Israel ag tóg ti jy nýtĩ, Jerusalém tá kãmũ ag. Paulo kato ag tóg vỹ tỹ hẽn ri ke han mũ. Ti jykre pãno

tugtó ag tóg mũ sir, ón kÿ, hã ra tóg ag mÿ ki krov tũ nĩ.

8 Kÿ Paulo tóg vãnh kāmén mũ sir, kÿ tóg: “Israel ag jykre mranh ja tũ sóg nĩ,” he mũ. “Topẽ jo ãn kavénh ja tũ sóg nĩ gé. Kÿ sóg ãg kar pã'i mág tÿ Imperador vĩ mranh ja tũ nĩ gé,” he tóg, Paulo ti.

9 Hã ra Festo tóg Israel ag mÿ nén ù há han sór mũ. Hã kÿ tóg Paulo mÿ: “mÿ ã tÿ Jerusalém ra tĩg jé há?” he mũ. “Sÿ tá ã jykre venh há tóg tĩ, ag tÿ ã kato vĩ ti,” he tóg, Festo ti.

10 Hã ra tóg Paulo mÿ ag tÿ tá ti tén ha mẽ tĩ, hã kÿ tóg: “ne jé,” he mũ. “Ëg pã'i mág tÿ Imperador jëgja kã ã tóg inh ki jëmëg mũ,” he tóg. “Hã kÿ ã tÿ tag ki inh jykre venh ke vë,” he tóg. “Israel ag to sóg jykre pãno han ja tũ nĩ (mÿr). Kÿ ã tóg ki kanhró nĩ (mÿr), ha mẽ,” he tóg.

11 “Isÿ crime han ra isÿ to ter ke vë vë. Kÿ sóg ne tónh ke tũ nĩ vë. Hã ra ag tóg ón kÿ inh kato vĩ mũ sir. Hã kÿ tóg ã tÿ ag mÿ inh fëg kÿ vënhmÿ tĩ. ã tÿ ag mÿ nén há han sór vë (mÿr), hã kÿ ã tóg ag mÿ ke mũ. Ëg pã'i tÿ Imperador hã tóg ã pin kÿ inh jykre venh ke mũ,” he tóg, Paulo ti.

12 Kÿ Festo tóg ã mré jykrén mũ ag mré vĩ mũ, kÿ tóg Paulo mÿ: “ã tÿ Imperador ve sór kÿ ã tóg Imperador venh tĩg mũ, cidade tÿ Roma ra,” he mũ, Paulo mÿ.

Pã'i tÿ Agripa tÿ Paulo mré vĩ

13 Si há tũ ra Israel ag pã'i mág tÿ Agripa vÿ cidade tÿ Cesaréia tá jun mũ, ti prũ tÿ Berenice fi mré. Fag tÿ Festo to pygsa ke vë.

14 Tá fag tóg kurã pir tũg mũ. Kÿ Festo tóg ti mÿ Paulo kāmén mũ. Kÿ tóg ti mÿ: “Félix vÿ vëse ù kavãn ja tũ nĩ,” he mũ.

15 “Kÿ Topẽ tũ ki rĩr tũ to pã'i mág ag tóg inh mÿ ti kāmén, Israel ag kófa ag ke gé. Jerusalém tá ag tóg inh mré ti kato vĩ, isÿ ag mÿ: té, ha ti vóg kónãn, he jé,” he tóg.

16 “Kÿ sóg ag mÿ: ãg jykre tóg ge tũ nĩ, he mũ. Ëg pi(jé): ti tén ra, henh mũ', kãnhmar', he sóg. Ti kato vĩ mũ ag tÿ ti kato nÿtĩn kÿ tóg vãnh kāmén tĩ, vëse ti. Kar ãg tóg ti vóg kónãn tĩ sir. Romano jykren hã vë, he sóg ag mÿ,” he tóg Festo ti.

17 “Hã kÿ ag tóg tag ki vãnh mãn mũ. Kÿ sóg vësÿmér ag vëg mũ, tÿ vaj kÿ. Inh nĩg jafã kri nĩ kÿ sóg Paulo jé prër mũ,” he tóg.

18 “Kÿ ag tóg ti kato vĩ mũ. Hã ra ag tóg isÿ nén to jykrén mũ tó tũ nĩgtĩ (mÿr), ti jykre kórég ti,” he tóg.

19 “Ag Topẽ jykre tó ag tóg mũ. Ûn ter mũ tó ag tóg mũ, ag tÿ ùn to: Jesus, he mũ ên ti. Hã ra Paulo tóg ti to: rĩr ti jë nĩ, he mũ,” he tóg.

20 “Kÿ sÿ ne to jykrén ke tóg tũ tĩ inh mÿ. Kÿ sóg Paulo mÿ: ã mÿ Jerusalém ra tĩg ke tũ nĩ? he mũ. Tá ag tóg ã jyvën há han mũ sir, he sóg ti mÿ,” he tóg.

21 “Hã ra Paulo tóg ãg pã'i mág tỹ Imperador ve sór mũ, ti tỹ ti jykre ve jé. Hã kỹ sóg soldado ag mỹ: ti fẽg han ra, he mũ. Kejẽn sóg Imperador ra ti jẽnẽn mũ, he sóg ag mỹ,” he tóg, Festo ti, pã'i tỹ Agripa mỹ.

22 Kỹ Agripa vỹ Festo mỹ: “sỹ ti vĩ mẽnh hã tóg ti,” he mũ.

Kỹ Festo tóg: “vaj kỹ ã tóg ti vĩ mẽnh mũ,” he mũ

23 Tỹ vaj kỹ Agripa vỹ kãtĩ mũ, Berenice fi mré. Kur sĩnvĩ rĩnh kỹ fag nỹtĩ, pã'i mág kur ti. Tenente ag mré fag tóg kãmũ mũ, ùn kãfór ag mré ke gé, cidade ãn tá ke ag. Ĩn mág kãra ag tóg ge mũ. Kỹ Festo tóg Paulo jé prẽr mũ sir. Kỹ ag tóg ti pére kãmũ mũ.

24 Kỹ Festo vỹ: “pã'i tỹ Agripa',” he mũ. “Tag ki ke kar',” he tóg. “Tag ti ve ra ha,” he tóg. “Israel kar ag tóg Jerusalém tá inh mré ti to vĩ. Tag ki ag tóg inh mré vĩ mũ gé ti to. Prẽnprẽr ag tóg, ti ter jé,” he tóg.

25 “Hã ra sóg vég mũ. Nén ù vẽnhmỹ han tũ tóg nĩ, ti tỹ to ter jé. Kỹ tóg pã'i mág tỹ Imperador ve sór mũ, hã kỹ sóg to jykrén mũ. Sỹ ti jẽnẽn ke vỹ,” he tóg.

26 “Hã ra sóg ti to nén rán ke ki kagtũg nĩ ver, sỹ Imperador mỹ nén rán jé. Hã kỹ sóg ti jé prẽr, ãjag tỹ ti ve jé, ã tỹ ti ve jé, pã'i tỹ Agripa',” he tóg. “Ãjag tỹ ti ki jẽmẽ kỹ sóg sỹ nén rán ke ki kanhró nĩnh mũ,” he tóg.

27 “Sỹ nén rán tũ ra ti jẽnẽ kỹ tóg vẽnhmỹ nỹnh mũ, sỹ ag tỹ

ti kato nén tó mũ ãn rán tũ ra,” he tóg, Festo ti.

26

Paulo tỹ vẽnh kãmén mãn

1 Kỹ Agripa vỹ Paulo mỹ: “ã tỹ vẽnh kãmén kỹ tóg há tĩ,” he mũ. Kỹ Paulo tóg ã nĩgé tỹ krỹg he mũ, kỹ tóg: “pã'i Agripa',” he mũ.

2 “Ã hã ne tóg Israel jykre kar ki kanhró nĩ'. Hã kỹ tóg inh mỹ há tĩ, sỹ ùri ã jy vĩ kỹ,” he tóg.

3 “Israel ag tỹ inh kato vĩ mũ to sóg kãmén kãn sór mũ ã mỹ,” he tóg. “Hã kỹ jatun mỹ inh vĩ jẽmẽnĩ,” he tóg.

4 “Israel kar vỹ inh ki kanhró nỹtĩ, vãsỹ, isĩ kã, isỹ inh mur ja tá nĩn kã, isỹ kar kỹ Jerusalém tá nĩn kỹ ke gé,” he tóg.

5 “Isĩ kã sóg ãg jykre han kãn mũ, tag ki kanhró ag nỹtĩ, ag tỹ tó sór kỹ,” he tóg. “Tỹ sóg Fariseu nĩ (mỹr), jó Fariseu ag vỹ ãg jykre kar to tar nỹtĩ (mỹr),” he tóg.

6 “Hã ra ag tóg inh kato vĩ mũ. Topẽ vỹ ãg jóg!jóg ag mỹ: “rĩr mãn jé ãjag tóg ke mũ, ãjag ter kỹ,” he ja nĩgtĩ. Ti vĩ tag kri sóg fig mũ, hã kỹ ag tóg inh kato vĩ mũ,” he tóg.

7 “Povo tỹ 12 (ke) vỹ tỹ ãg nỹtĩ. ãg kar vỹ Topẽ jykre hyn han tĩ, kuty ki, kurã ki ke gé. ãg tỹ ter kar rĩr mãn jé, hã jé ãg tóg ke tĩ, hã jé ãg tóg Topẽ jykre han tĩ, pã'i tỹ Agripa',” he tóg. “Sỹ Topẽ tỹ ãg mỹ tag tó kri fi kỹ Israel ag tóg inh kato vĩ mũ,” he tóg.

8 “Mý ājag mý vēnhmý, Topē tỹ ũn ter kar rĩn mǎn ke ti?” he tóg. “Vēnhmý ke tũg nĩ,” he tóg, Paulo ti.

9 “Hǎ ra sóg vāsỹ Jesus kato tē ja nĩ gé. Nazaré tá ke ěn mré ke ag vóg kónǎn jagy han ja sóg nĩ vē, vāsỹ,” he tóg.

10 “Jerusalém tá sóg ke ja nĩgtĩ. Jesus tũ ag sigse ja sóg nĩgtĩ gé. Topē tũ ki rĩr tĩ to pǎ'i mág ag vỹ inh mý tag to permissão han ja nĩgtĩ gé,” he tóg. “Ag tỹ Jesus mré ke ag kǎmĩ ũ tén ký tóg inh mý há ja tĩgtĩ gé,” he tóg.

11 “Ēg vēnh kanhrǎn jafǎ krēm isóg ag vóg kónǎn ja nĩgtĩ gé, ag tỹ Jesus ki ge tag tovǎnh jé, ag tỹ ti mý vĩ kónǎn jé. Ag to sóg jũ tǎvĩ ja nĩgtĩ gé, inh fe tỹ gỹm ken ký. Ký sóg cidade ũ ra ag nón tĩg ja nĩgtĩ gé, ag vóg kónǎn jé,” he tóg.

Paulo tỹ ā tỹ Jesus ki rǎ kǎmén
(Hk 9.1-19; 22.6-16)

12 “Hǎ ký sóg cidade tỹ Damasco ra tĩg ja nĩ gé. Topē tũ ki rĩr tĩ to pǎ'i mág ag vỹ inh mý permissão han ja nĩgtĩ, inh mý: ha tĩg, hen ký.

13 Ēpyr jagma sóg meio dia ki jēngrē tar vé, kanhkǎ tá. Rǎ kǎfór vē, ha mē, pǎ'i,” he tóg. “Jēngrē ěn vỹ inh ki kómkóm ké, inh mré mũ ag ki ke gé.

14 Ký ěg kar vỹ vǎr mũ, ga kri. Ký sóg vēnh vĩ mē. Inh mré tóg vĩ, Hebreu vĩ ki, ký tóg inh mý: “Saulo', Saulo',” he mũ. “Ā hǎ ne tóg isũ ag vóg kónǎn nĩ,” he tóg inh mý. “Ā vóg isóg mũ, ka junun kri

ferro ěn tỹ, monh vóg jafǎ ěn tỹ. Ký tóg ā tỹ inh kato nig ký, ā tỹ ka kato vāsǎn ký tóg kaga mág tĩnh mũ,” he tóg inh mý, vēnh vĩ tĩ,” he tóg, Paulo ti.

15 “Kỹ sóg ěg Senhor mý: “ā tỹ ũ nē?” he mũ. Ký tóg inh mý: “tỹ sóg Jesus nĩ,” he mũ. “Ā tỹ ũn vóg kónǎn sór tĩ ěn vỹ tỹ inh nĩ,” he tóg inh mý.

16 “Jēg ra, vēnh rǎ hǎ jēg,” he tóg. “Ā mý sóg vēnh ven, ā tỹ isũ han jé, ā tỹ nén vég mũ tag tó jé. Ā mý sóg vēnh ven mǎn ke mũ gé, kejēn. Tag kar tó jé ā tóg ke mũ,” he tóg inh mý.

17 “Ā povo mý sóg ā jēnēnh mũ, fóg kar ag mý ke gé, kanhgág kar ag mý ke gé. Hǎ ra sóg ā jy nĩgǎn mũ,” he tóg inh mý.

18 “Ag kanē nugnón sór inh mũ (mýr). Ag tỹ vēnh jykre pǎno han ký tóg ag kǎki kuty nĩ sir, hǎ ra sóg ag kǎki jēngrē han sór mũ. Satanás krēm ag nỹtĩ, Japo krēm. Hǎ ra sóg ag kygvǎn sór mũ, ag tỹ inh jykre han jé. Ag tỹ inh vĩ mranh tỹ sóg vēnh pǎte fón sór ke mũ (mýr), ag tỹ ũ tỹ inh ki ge ký nỹtĩ ag mré kanhkǎ tá nỹtĩnh ken jé, isỹ ũn kuprēg kar ag mré hǎ,” he tóg inh mý, Jesus ti,” he tóg, Paulo ti.

Paulo tỹ ā rǎnrǎj kǎmén

19 “Kỹ sóg ti vĩ mranh tũ nĩ, pǎ'i tỹ Agripa',” he tóg. “Kanhkǎ tá nĩ ký tóg inh mré vĩ ja nĩ, Jesus ti, ký sóg ti vỹ han.

20 Damasco tá ke ag mý sóg tó vén, kar Jerusalém tá ke ag mý ke gé, ga tỹ Judéia tá ke

ag kar mÿ ke gé. Israel kar ag mÿ sóg tó mÿ, kar sóg fóg ag mÿ tó mÿ gé sir, kanhgág ag mÿ ke gé. Ag mÿ sóg tó, ag tÿ ājag jykre tovānh jé, ag tÿ Topē jykre han jé sir, ag tÿ vēnh jykre kuryj han jé, vēnh kar tÿ ag tÿ ājag jykre tovānh ve jé,” he tóg, Paulo ti.

21 “Isÿ tag han to Israel ag tóg Topē jo ĩn krēm inh kāgmĭ ja nĭgtĭ, isén jé,” he tóg.

22 “Hā ra Topē tóg inh jy nĭgān mÿ. Hā kÿ sóg ũri jē mÿ. Ti vĭ tó inh mÿ (mÿr), ũn mág ag mÿ, ũn kāsir ag mÿ ke gé. Vāsÿ Topē vĭ tó tĭ ag tóg tó ja nĭgtĭ, isÿ nén tó mÿ tag, Moisés mré hā,” he tóg.

23 “Cristo jagtar ke tó ja ag tóg nĭgtĭ. Ā ter kar rĭr vén ke ti, ěg jo, he ja ag tóg nĭgtĭ, Cristo to. Kÿ tóg ěg povo mÿ jēngrēg tĭ ěn ri ke nĭ sir, fóg kar ag mÿ ke gé, kanhgág kar ag mÿ ke gé,” he tóg, Paulo ti.

24 Paulo tÿ gen kÿ tóg Festo mÿ e tĭ sir, Paulo tÿ vēnh kāmén kÿ. Kÿ Festo tóg jamā hár(a): “krĭ tū ā nĭ, Paulo’,” he mÿ. “Ā tÿ vēnh rá ve mág kÿ tóg ā krĭ tū (pē) tĭ,” he tóg, Festo ti.

25 Hā ra tóg ti mÿ: “inh krĭ vÿ há nĭ, Festo’,” he mÿ. “Hā tāvĭ ā jē nĭ vÿ,” he tóg ti mÿ. “Hā ra sóg ki hā tó mÿ (mÿr), to jykren há han kÿ,” he tóg.

26 “Tag kā nĭ vÿ ki kanhró nĭ, pā'i tÿ Agripa tag ti. Hā kÿ sóg ti ve kÿ mÿ'āg tū nĭ. Tó kån sóg mÿ. Mē ti huri, ki kanhró tóg nĭ. Vēnh kar tóg mē kån tĭ ha,” he tóg.

27 “Pā'i tÿ Agripa’,” he tóg. “Ā mÿ Topē vĭ tó tĭ ag tÿ nén tó mÿ kri fig mÿ?” he tóg. “Kri nĭm ā tóg mÿ, ki kanhró sóg nĭ,” he tóg.

28 Kÿ Agripa tóg Paulo mÿ: “vēme sĭ tÿ ā mÿ isÿ Cristo ki rā han sór mÿ?” he mÿ.

29 Kÿ Paulo tóg ti mÿ: “hÿ,” he mÿ. “Hā to sóg Topē mré vĭ mÿ,” he tóg. “Ā tÿ vēme sĭ hā ki Jesus ki rānh ken kÿ tóg há tĭ vē, ke tū nĭ kÿ vēme mág ki. Ā tÿ inh ri kén ke kÿ tóg há tĭ vē, ā, ā mré inh vĭ mēg mÿ ag ke gé. Isÿ se kÿ jē tag hā to sóg ā mÿ: inh ri kemnĭ, henh ke tū nĭ,” he tóg, Paulo ti.

30 Kÿ pā'i tÿ Agripa vÿ jēg nē mÿ sir, governador ke gé, Berenice fi ke gé, ag mré nÿtĭ kar ag ke gé.

31 Kÿ ag tóg kāpa mÿ. Kÿ ag tóg jagnē mré vĭ mÿ. “Nén ũ kórég han tū ti nĭ,” he ag tóg. “Véké tóg se kÿ jē. Ā tÿ nén han tū to tóg ter ke tū nĭ,” he ag tóg.

32 Kÿ Agripa tóg Festo mÿ: “ti tÿ kyvar kÿ jē hā vē vē, hā ra tóg pā'i mág tÿ Imperador ve sór mÿ,” he tóg mÿ.

27

Cidade tÿ Roma ra

1 Hā kÿ Festo tóg kejēn Paulo mÿ: “ā tÿ ga tÿ Itália ra tĭg ke nē ha,” he mÿ. Kÿ tóg pā'i mÿ ti fēg mÿ. Soldado ag capitão vē, pā'i ěn ti. Ũ tÿ Imperador mré ke ag he mÿ ěn capitão vē. Ti jiji hā vÿ: Júlio, he mÿ. Ti mÿ ag tóg vēse ũ ag vin mÿ gé.

² Kÿ ěg tóg canoa mág kãra ge mũ sir. Cidade tÿ Adramítio tá ke vĕ, canoa mág ěn ti. Ag tÿ ga tÿ Ásia fyr to mũ sór vĕ, canoa kãmĩ. Kÿ ěg tóg goj kãmĩ mũ mũ, tá pa kÿ. Aristarco tóg ěg mré tĩ mũ, cidade tÿ Tessalônica tá ke ěn ti, ga tÿ Macedônia tá ke ěn ti.

³ Tÿ vaj kÿ ěg tóg cidade tÿ Sidom tá krÿg mũ sir. Kÿ Júlio tóg Paulo mÿ vĩ há han mũ. Kÿ tóg ti mÿ: “ã mré ke ag venh tÿg, ag tÿ ã ki rĩr jé,” he mũ.

⁴ Tá pa kÿ kãka tóg ěg kato tĕ mũ. Kÿ ěg tóg goj vãso tÿ Chipre kakãm mũ mũ, ti tÿ ěg jakãnh tá nĩn kÿ.

⁵ Kÿ ěg tóg goj kafã tũ kãmĩ mũ mũ, ga tÿ Cilíncias fyr to, ga tÿ Panfília fyr to ke gé. Kÿ ěg tóg cidade tÿ Mirra tá junjun mũ sir, ga tÿ Lícia tá.

⁶ Tá capitão tóg canoa mág ũ vég mũ, cidade tÿ Alexandria tá canoa, ũ tÿ ga tÿ Itália ra tĩ mũ ěn. Kÿ tóg ěg mÿ: “kã ge jĕg,” he mũ, capitão ti.

⁷ Kãmĩ ěg tóg mũ mũ. Komĕr hã ěg tóg mũ mũ, kurã tÿ hĕn ri ke ki. Kÿ ěg tóg vãhã goj vãso tÿ Cnido tá junjun mũ. Hã ra kãka tóg ěg kato tĕ mũ gé. Kÿ ěg tóg tá fĩn rãm tũ nĩgtĩ. Kÿ ěg tóg goj vãso tÿ Creta kakãm mũ mũ, kãka tÿ ěg tÿ vĩrĩn ke kÿ. Krĩ tÿ Salmona kakãm mũ ěg tóg mũ, kãka krĕfĩn.

⁸ Kãmĩ tĩg tóg jagy tĩ, Creta fyr to hã tĩg kÿ. Kÿ ěg tóg vãhã komĕr hã ěg tóg canoa sag ja há he mũ tá junjun mũ. Cidade ũ vÿ tá kakó nĩ, ti jyjy

hã vÿ: Laséia, he mũ.

⁹ Hã ra ěg tóg komĕr hã mũ ja nĩgtĩ, hã kÿ kusa tóg kakó tĩ ha. Kÿ tóg goj kãmĩ tĩg kórég nĩ, kóho tigrĩn. Festa ũ pãtén tóg huri, Israel ag vãkre jafã ti. Hã kÿ Paulo tóg ag jyvĕn kÿ:

¹⁰ “goj tóg kãmĩ tĩg kórég tĩ ha, vÿ,” he mũ. “Kÿ ěg tóg jagãgtar mũ ha. Kÿ tóg inh mÿ canoa tÿ nĩnunh mÿ tĩg ha mĕ tĩ, kÿ ãjag tũ vÿ vãgfor mũ sir, jó ěg hĕn ri ke mũn kãgter ke mũ gé,” he tóg, Paulo ti.

¹¹ Hã ra capitão tóg canoa tÿ ũ tũn mũn vĩ mĕg mũ sir. Canoa vóg mũ vĩ mĕg tóg mũ gé, hã kÿ tóg Paulo vĩ mĕg tũ nĩ sir.

¹² Canoa sag ja ěn tóg há sĩ nĩ, hã kÿ ag tóg tá kusa fĩn pa vãnh nÿtĩ. Hã kÿ ũn e ag tóg tá pa sór mũ, ag tÿ cidade tÿ Fenice tá junjun jé, tá kusa fĩn pa jé. Goj vãso tÿ Creta tá cidade ũ vĕ, canoa sag ja ũ vĕ, Fenice ti. Tá rã krĕfĩn tá kãka vÿ króg he tũ nĩgtĩ. Hã kÿ ag tóg ra mũ sór mũ sir.

Kóho mág

¹³ Hã ra kãka sĩ tóg komĕr hã kraug he mũ sir. Kÿ tóg ag mÿ há tí. Hã kÿ ěg tóg tá pa kÿ Creta fyr ra mũ mũ sir, Creta fyr kakó ra, goj kãmĩ mũn kÿ.

¹⁴ Vãhã kóho jũ tóg canoa kato tĕ mũ sir, ti jiji hã vÿ: Nordeste, he mũ. Creta tán kãtĩ mũ.

¹⁵ Hã ra ěg tóg kóho jũ tag kato canoa vóg tÿ hĕ ri ke tũ nĩ, kÿ ěg tóg ti vóg tovãnh mũ sir. Kÿ kóho tóg canoa va tĩ mũ.

¹⁶ Kÿ ěg tóg goj vãso sĩ to hã mũ mũ, ti jyjy hã vÿ: Cauda,

he mũ. Hã ra ãg tóg canoa sĩ ãnğnğn kãmũ ja nĩ, ti se kỹ. Cauda tá ãg tóg canoa mág kri ti fi han sór mũ, hã ra ãg tóg to jagãgtar mũ, kóho to.

17 Vãhã ag tóg ti kãtãnfyn mũ, canoa vóg tĩ ag. Kar ag tóg canoa mág tógfĩn mũ, ti tỹ vãm ke tũ nĩ jé. Hã ra ag tóg rỹnrỹj kamẽg mũ, rỹnrỹj tỹ Sirte he mũ ãn, ga tỹ Líbia fyr tá. Hã kỹ ag tóg kur kunũg mũ sir. Kur ãn vỹ canoa kri sag tĩ, kãka tỹ ti tĩn jé. ãn kunũg ag tóg mũ sir.

18 Hã ra ãg tóg kóho jũ to jagãgtar' he mũ, kỹ ag tóg tỹ vaj kỹ canoa tỹ rĩg mũ ãn kuju vãm mũ sir, goj ki, ti kufy vẽn kãpãm ag tóg mũ sir.

19 Tỹ vaj ãn kỹ ãg tóg jagãgtar tãvĩ nỹtĩ, kỹ ãg tóg vãvãm kãn mũ sir, canoa kãki nỹtĩ ãn, ti tralha ti. ãg kar tóg ag mré vãvãm mũ sir.

20 Kurã tỹ hẽn ri ke ki ãg tóg rã vэг tũ (pẽ) nĩ, krĩg ke gé. Kóho jũ ãn tóg ãg kato tẽ mũ. Kỹ tóg ãg mỹ ãg kãgter ha mẽ tĩ. “ãg hỹn krenkren ke tũ nĩ ha,” he ãg tóg.

21 Hã ra ãg tóg jęg tũ (pẽ) ja nĩ, kurã tỹ hẽn ri ke ki. Kỹ Paulo tóg ag to tĩg kỹ: “ãgag tỹ inh vỹ kri fĩn ke vẽ vẽ,” he mũ. “ãg tỹ Creta tá kãpa tũ nĩ ra ãg jagẽgtar tũ nĩn ke vẽ vẽ, kỹ ãgag tỹ nẽn ù kren tũ nĩn ke vẽ vẽ,” he tóg.

22 “Hã ra ãgag fe ti tỹ rỹn kemnĩ. ãg kar vỹ krenkren mũ. Canoa hã vỹ tũ' henh mũ!” he tóg.

23 “Kuty tag kã Topẽ tỹ jẽnẽ jafã tóg inh mré vỹ mũ. Inh

Senhor hã vỹ, ù tỹ ti jẽnẽg mũ ti, hã vỹ: Topẽ, he mũ,” he tóg.

24 “Ti tỹ jẽnẽ jafã tóg inh mỹ: “kamẽg tũg nĩ, Paulo’,” he mũ. “Pã'i mág tỹ Imperador ve jé ã tóg ke mũ, kỹ Topẽ tóg ã mré mũ ag kar vin, ag tỹ ã mré krenkren jé,” he tóg inh mỹ,” he tóg, Paulo ti.

25 “Kỹ ãgag fe ti tỹ há' hemnĩ. Topẽ vỹ kri sóg fig mũ. Ti tỹ inh mỹ tó mũ vỹ ge nĩn mũ,” he tóg, Paulo ti.

26 “Jó ãg tỹ canoa tỹ goj vãso to tĩn há tóg tĩ,” he tóg.

27 Semana régre vỹ sir, ãg tỹ goj kafãn tũ mũ mũ kri, kóho tỹ ãg ran tĩ ki. Goj kafã tũ ãn jiji hã vỹ: Mediterrãneo, he mũ. Meio noite ki canoa vóg tĩ ag tóg: “ga hỹn kakó nĩ ha,” he mũ.

28 Kỹ ag tóg goj kãmun mũ sir. Kỹ tóg 36 (ke) metros he mũ. Kãnhmar ag tóg kãmun mãn, kỹ tóg 27 (ke) metros he mũ sir.

29 Kỹ ag tóg pãró kamẽg mũ, ãg tỹ ag mỹ kã ta kenh ha mẽ tĩn kỹ. Kỹ ag tóg canoa nér tá ti se jafã tỹ 4 (ke) vin mũ. Ferro ù vỹ, ti se jafã ti. Ti tỹ rỹnrỹj kãkã nỹ kỹ canoa tóg tá krỹg he mũ. Ti vin kỹ tóg ag tỹ kurã venh há tĩ, canoa vóg tĩ ag.

30 Kỹ ag tóg canoa sĩ ãn tẽrem mũ, goj ki. Canoa se jafã tỹ ag tóg kãki vin mũ, ag tỹ ón kỹ canoa krĩ tá vin jé. Hã ra ag tóg canoa mág ré kỹ ga ra mũ sór mũ.

31 Hã ra Paulo tóg vэг mũ. Kỹ tóg capitão mỹ, soldado ag mỹ tóg: “ag tỹ pa kỹ ãgag vỹ krenkren ke tũ nĩ,” he mũ.

32 Kŷ soldado ag tóg vāfe kym mũ sir, ag tŷ vāfe tŷ canoa sĭ térem kŷ. Kŷ canoa sĭ ěn tóg kutĕ mũ sir.

33 Tŷ vaj ken kŷ Paulo tóg vĕnh kar jyvĕn mũ, ag jĕn jé. Kŷ tóg: “semana régre vĕ (mŷr), ājag fe von kŷ,” he mũ. “Nén ũ kāmĕg tũ ājag nŷtĭ (mŷr) ver,” he tóg.

34 “Pāo ko ra, ājag tŷ tar há ki krenkren jé. Ũ vŷ ter ke tũ nĭ, kŷ ũ vŷ kaganh ke tũ nĭ gé,” he tóg, Paulo ti.

35 Ti tŷ tag tó kar kŷ tóg pāo mǎg mũ sir. Vĕnh kar rĭnve tóg Topĕ mré vĭ mũ, kŷ tóg kupān kŷ ko mũ sir.

36 Kŷ vĕnh kar tóg fe tar nŷtĭ sir. Kŷ ag tóg ko mũ gé sir.

37 276 (ke) ěg nŷtĭ, canoa mǎg ěn kĀki.

38 Ěg tŷ ko kar kŷ ag tóg goj ki trigo kugjĕg mũ, canoa tŷ kĀnhvy' hen jé.

39 Tŷ vaj kŷ ag tóg vég mũ sir, hā ra ag tóg goj vāso ěn ki kagtĭg nŷtĭ. Kŷ ag tóg tá rŷnhřŷj vég mũ sir, rĭnhřŷj ti. Tá kóho tóg há sĭ nĭ. Kŷ ag tóg tag ra canoa tĭn sór mũ.

40 Kŷ ag tóg ferro ěn kykym mũ sir, goj kĀki. Kŷ ag tóg canoa vóg jafā kygvāg mũ gé. Canoa krĭ tá ag tóg kur kujén mũ, kóho kato.

41 Hā kŷ ěg tóg rŷnhřŷj ěn to mũ mũ sir. Kŷ goj régre tóg jagnĕ ki jun nĭ. Kŷ canoa tóg rŷnhřŷj kĀra rā mũ sir. Ti krĭ tóg rĭnhřŷj krĕm rā mũ, kŷ tóg sir tar mũ sir. Kŷ ti nér tóg kam ke mũ sir, goj jũ kŷ. Kŷ tóg mráj mũ, canoa ti.

42 Kŷ soldado ag tóg vĕnh sigse ag kĀgtĕn sór mũ, ag mrogmro kŷ vĕnh pigju tũ nĭn jé, ag krenkren tũ nĭn jé.

43 Hā ra capitāo tóg Paulo kren han sór mũ. Kŷ tóg ag mŷ: “ke tũg ra,” he mũ. “Ājag tŷ tũgnũm há nĭn kŷ goj kĀra ge vĕn inhhā, ājag tŷ ga ra ge vĕn jé, tũgnũm kŷ,” he tóg.

44 “Ājag tŷ tũgnũm kórég kŷ kan kri nŷmnĭ, canoa mránhráj kri,” he tóg, capitāo ti.

Kŷ ag tóg ge mũ sir. Hā kŷ ěg kar tóg ga tá junjun mũ, krenkren kŷ.

28

Goj vāso tŷ Malta tá

1 Ěg tŷ ga tá nŷtĭn kŷ ěg tóg ga jĭji mĕg mũ, hā vŷ: Malta, he mu.

2 Tá ke ag tóg ěg jagāgtĀn mũ. Kŷ ag tóg pĭn han mũ. Ěg mŷ ag tóg: “kĀge jĕg ra,” he mũ, ta kutĕ kŷ, kusa jagy tĭn kŷ. Kanhgág ri ke ag vĕ, tá ke ag.

3 Kŷ Paulo tóg pĭnh tĭ mũ, kŷ tóg pĭ ki nĭn mũ. Hā ra pŷn tóg pĭ kĀkĀ nŷ ja nĭ. Rŷ mĕ kŷ tóg tim ke kŷ Paulo prǎg mũ, ti nĭgé ki.

4 Kŷ tá ke ag tóg pŷn ěn vég mũ, ti tŷ ti nĭgé to sa kŷ. Kŷ ag tóg jagnĕ mŷ: “ũ tĕn tĭ hŷn vĕ,” he mũ. “Goj tán kren, hā ra tóg ā tŷ nĕn han jan kajām mũ,” he ag tóg, Paulo to.

5 Hā ra Paulo tóg pŷn kĀvĕn mũ, pĭ ki tóg tŷ vĕn mũ. Hā ra tóg kaga tũ nĭ, ti nĭgé ti, Topĕ tŷ ti tŷ há' hen kŷ.

⁶ Hã ra ag tóg ti tugnȳm mũ, ti kãnhpar ve jé, ke tũ ñĩ k̄y ti ter k̄y kutê ve jé. Hã k̄y ag tóg ti vég nȳtĩ, hora t̄y h̄en ri ke ki. Hã ra tóg ke tũ ñĩ. K̄y ag tóg ti to jykr̄en mãn mũ. “Topê tũ m̄y vó?” he ag tóg mũ, òn k̄y, Paulo to. Ag m̄y tóg e tĩ, hã k̄y ag tóg ti to: “topê h̄yn,” he mũ.

⁷ Goj vãso tá ke ên ag kãfór v̄y t̄y Públio ñĩ. Tá tóg ìn ñĩ, ã jap̄y tá. Êg t̄y tón nȳtĩ tag tá tóg kakó ñĩ, ti ìn ti. K̄y tóg êg m̄y: “kãge jêg ra,” he mũ. Ti mré êg tóg kurã tâgtũ han mũ.

⁸ Hã ra Públio panh tóg kaga nȳ ñĩ. Jãgfa kyvénh han tóg, k̄y tóg to r̄ȳg ñȳ ñĩ gé. K̄y Paulo tóg ti venh rã mũ. K̄y tóg ti to Topê mré v̄i mũ. ã ñĩgé t̄y tóg ti m̄eg mũ, k̄y tóg há' he mũ sir.

⁹ Ti han k̄y v̄enh kagyga kar ag v̄y tá junjun mũ sir, goj vãso ên tá. K̄y tóg ag t̄y há' he kãn mũ, Paulo ti.

¹⁰ K̄y ag tóg êg ki r̄ir há han mũ. Êg t̄y kar k̄y canoa ù kãra ge k̄y ag tóg êg m̄y êg t̄y n̄en ve sór mũ kar ên vin mũ.

Romara

¹¹ Kysã tâgtũ tũg k̄y êg tóg canoa ù kãra ge mũ sir. Cidade t̄y Alexandre tá ke v̄é gé, canoa ên. Tá tóg kusa f̄in rã ja ñĩ, Malta tá. T̄i rá v̄y t̄y ti v̄egni kãggrá ñĩ, ti retrato ên ti. Òn k̄y Romano ag topê ù v̄é, ti v̄egni kãggrá ti.

¹² Tá pa k̄y êg tóg mũ k̄y cidade t̄y Siracusa tá kr̄ȳg mũ. K̄y êg tóg tá kurã tâgtũ tũg mũ.

¹³ Tá pa k̄y êg tóg cidade t̄y Régio tá junjun mũ. T̄y vaj k̄y kãka tóg êg vóg há han mũ.

Hã k̄y êg tóg kurã régre tũg k̄y cidade t̄y Pozuoli tá junjun mũ sir.

¹⁴ Tá êg tóg Jesus mré ke ag vég mũ, k̄y ag tóg êg m̄y: “êg mré semana tũg ñĩ ver,” he mũ. Kar k̄y êg tóg cidade t̄y Roma ra mũ mũ sir.

¹⁵ Roma tá ke ag tóg êg kãmũ m̄e ja ñĩ, Jesus mré ke ag. K̄y ag tóg êg venh kãmũ mũ. Cidade t̄y Ápio jamã he mũ ên tá ag tóg êg kato t̄egt̄e mũ, êmã t̄y Venda Tãgtũ he mũ ên tá ke gé. Paulo t̄y ag ve k̄y ti fe tóg mrin ke mũ. K̄y tóg Topê m̄y v̄i há han mũ. Ti kr̄i tóg kãnhvy' he mũ sir.

¹⁶ Êg t̄y cidade mág t̄y Roma tá junjun k̄y Paulo tóg vyr m̄y ñĩ ñĩ, v̄ese ù ag mré tóg ñĩ tũ ñĩ. Soldado pir hã tóg ti ki r̄ir mũ. Capitão tóg ti m̄y tag to: “hej,” he ja ñĩ.

Roma tá

¹⁷ Kurã tâgtũ tũg k̄y Paulo tóg Israel kãfór ag jé pr̄er mũ. Ag v̄enh mãn k̄y tóg ag m̄y: “inh kanhkã',” he mũ. “Se k̄y inh j̄e, Jerusalém tá, k̄y ag tóg tá fóg t̄y Romano ag m̄y inh f̄eg, is̄y n̄en ù han tũ hã ra, is̄y êg jykre mranh tũ hã ra, is̄y êg jóg'jóg t̄y êg m̄y v̄enh jykre ñim ja ên mranh tũ hã ra,” he tóg.

¹⁸ “Fóg t̄y Romano ag tóg inh kavãn sór mũ v̄é, ag t̄y inh ki j̄em̄e kar k̄y. Is̄y n̄en han ja tũ to sóg ter ke tũ ñĩ v̄é.

¹⁹ Hã ra Israel ag tóg inh kato v̄i, hã k̄y sóg sir pã'i mág t̄y Imperador ve sór mũ, ag t̄y is̄en tũ ñĩ jé. Hã ra sóg êg povo

kavénh sór tũ nĩ, Imperador jo,” he tóg.

²⁰ “Hã kÿ sóg ãjag jé prēr mũ, sÿ ãjag ki jēmē jé. Ęg povo tÿ Israel kar vÿ Cristo ve sór mũ. Sÿ Cristo tó hã to sóg se kÿ jē nĩ,” he tóg, Paulo ti.

²¹ Kÿ ag tóg ti mÿ: “ũ tóg ěg mÿ ã to vėnh rán han ja tũ nĩ, Judėia tá,” he mũ ti mÿ, pã'i ag. “Kÿ ěg kanhkã ũ tóg ěg ki jun ja tũ nĩ jé, ti tÿ ěg mÿ ã tÿ nén ũ kórég han mũ ěn tó jé,” he ag tóg.

²² “Hã ra tóg ěg tÿ ã ki jēmėnh há tĩ, ã tÿ nén to jykrén mũ ti. Vėnh jykre tãg tag kato ag tóg vĩ tĩ, vėnh kar ag, hã kÿ tóg ěg tÿ ã ki jēmėnh há tĩ,” he ag tóg ti mÿ, Israel mág ag.

²³ Kÿ ag tóg ti mÿ kurã nĩm mũ. Kÿ ũn e ag tóg vėnh mãn mũ sir, ti tÿ ĩn krēm nĩ ěn tá. Ag mÿ tóg Topē tÿ tÿ ěg pã'i nĩ kāmén mũ. Jesus kāmén tóg mũ, ag tÿ hėn ri ke mũn ti ki ge jé. Moisés tÿ ag mÿ vėnh jykre nĩm ja ěn tó tóg mũ sir ag mÿ, vãsÿ Topē vĩ tó tĩ ag vĩ ke gé. Vėnh rá ěn ki tóg ag mÿ Jesus ti ven mũ sir. Kusã ki ag tóg kãmũ ja nĩ, tÿ vēmén nÿtĩ ki ag tóg kutyg mũ.

²⁴ Kÿ tóg ũ ag mÿ ki hã tó ti, Paulo tÿ ag mÿ nén tó mũ ti, kÿ ag tóg kri fig mũ. Hã ra tóg ũ ag mÿ há tũ nĩ.

²⁵ Hã kÿ ag tóg vėnh kãpugpóv kÿ nÿtĩ. Kÿ ag tóg mũ mũ, Paulo tÿ ag mÿ tag tó kar kÿ, ha mē. Ag mÿ tóg: “Topē kuprĩg tóg tó há han ja nĩ, ti tÿ Topē vĩ tó tĩ tÿ Isaiás mÿ: ag mÿ tag tó, hen kÿ,” he tóg.

²⁶ “Ęg jóg'jóg ag mÿ tóg tag tó ja nĩ, hã mē: “povo tag mÿ tag tó, hã mē: mē jé ãjag tóg ke mũ, ón kÿ, hã ra ãjag tóg to jykrén ke tũ nĩnh mũ, hemnĩ,” he tóg.

²⁷ “Kÿ ag tóg ki kagtĩg nÿtĩnh mũ. Povo tag ag vÿ krĩ tũ nÿtĩ, nĩgrėg kutu ag tóg nÿtĩ gé, kanē kyvó ag tóg nÿtĩ gé, ag tÿ nén ũ ve sór tũ nÿtĩn kÿ, ag tÿ jēmē sór tũ nÿtĩn kÿ, ag tÿ to jykrén sór tũ nÿtĩn kÿ ke gé. Hã kÿ ag tóg inh ki ge sór tũ nÿtĩ gé, kÿ sóg ag tÿ há' henh ke tũ nĩ gé,” he tóg, Isaiás ti,” he tóg mũ, Paulo ti, Israel ag mÿ.

²⁸ “Hã kÿ sóg, ãjag mÿ tó mũ,” he tóg, Paulo ti. “Ājag tÿ mē jãvãnh nÿtĩn kÿ fóg ag vÿ mėnh mũ, kanhgág ag ke gé, Topē tÿ ag krenkren han sór mũ ti. Kÿ ag tóg ti mÿ: hej, henh mũ,” he tóg, Paulo ti, Israel ag mÿ.

²⁹ Paulo tÿ tag tó kar kÿ Israel ag tóg mũ mũ sir, jagnē vĩ kafãn kÿ.

³⁰ Paulo vÿ prÿg régre tũg mũ, ã ĩn krēm nĩn kÿ. Alugar hen kÿ tóg jē nĩ, ĩn ěn ti, kÿ tóg kajãm mũ, Paulo ti, ã jãnkamy tÿ. Kÿ tóg ũ tÿ ti mré vĩ sór mũ mÿ: “kãrã ra,” he ti.

³¹ Vėnh kar mÿ tóg Topē tÿ tÿ ěg pã'i nĩ kāmén mũ sir, fe tar han kÿ. Ęg Senhor tÿ Jesus Cristo kāmén tóg mũ sir. Ũ tóg ti mÿ: “vĩ tũg ra,” he tũ nĩ, ti se kÿ nĩ hã ra.

PAULO TỠ CARTA HAN: ROMA TÁ KE AG MỠ CARTA

¹ Paulo tỡ rá vễ. Isỹ cidade tỡ Roma tá ke ag mỡ rán ken hã vễ.

Tỡ sóg Jesus Cristo camarada nĩ, kỡ tóg inh fêg, isỹ tỡ apóstolo nĩ jé. Hã jé tóg inh jé prêr. Kỡ tóg inh kuprêg gé, isỹ vễnh kar mỡ vễnh vĩ sér kãmén jé, Topê tỡ êg mỡ vễnh vĩ jênê ja ên ti.

² Topê vỹ vãsỹ ã vĩ tó tĩ ag mỡ: “ha inh kósin kãme tó,” he ja nĩgtĩ, kỡ ag tóg ti kãme rán ja nĩgtĩ gé, ag tỡ Topê vĩ rán kỡ.

³ Topê kósin ên tó ja ag tóg nĩgtĩ, êg Senhor tỡ Jesus Cristo ti. Tỡ tóg vãsỹ pã'i mág tỡ Davi kósin nĩ, Jesus ti. Ti jóg'jóg ve hã vễ, Davi ti.

⁴ Ti tỡ tỡ Davi kósin nĩn kỡ tóg tỡ êprã ke nĩ, Davi ri ke, hã ra tóg tỡ Topê kósin nĩ gé, hã kỡ tóg ã ter kar kỡ rĩr mãn ja nĩ. Topê tỡ ti rĩn mãn to êg tóg ti tỡ tỡ Topê kósin nĩn ki kanhró nỹtĩ. Topê vỹ ti tỡ ùn mág han mũ gé sir, êg Senhor tỡ Jesus tỡ.

⁵ Topê hã ne isar han', Jesus tigrĩn. Ti hã ne inh fêg', isỹ tỡ apóstolo nĩn jé, isỹ fóg ag kar mỡ ti kãmén jé, kanhgág ag mỡ ke gé, ag tỡ ti ki ge jé, ti vĩ kri fi jé, ti vĩ kri nĩm jé, ti jiji mẽ kỡ.

⁶ Ủ tỡ inh vĩ mẽg mũ vỹ tỡ ãjag nỹtĩ gé.

Topê vỹ ãjag kuprêg, hã kỡ ãjag vỹ tỡ Jesus Cristo tũ nỹtĩ.

⁷ Kỡ sóg ãjag mỡ vễnh rá jênêg mũ, Topê tỡ ãjag to há nĩn kỡ. Cidade tỡ Roma tá ãjag tóg nỹtĩ. Topê ne ãjag kuprêg', hã kỡ ãjag vỹ tỡ ti tũ nỹtĩ. Hã kỡ sóg êg jóg tỡ Topê mỡ: “ag tar han nĩ, ag mỡ vễnh jykre kusa nĩm nĩ,” he tĩ, Topê mỡ, êg Senhor tỡ Jesus Cristo mỡ ke gé.

Paulo tỡ Roma tá ke ag ve sór

⁸ Ha mẽ, vễnh kar vỹ ãjag tỡ ti ki ge kỡ nỹtĩ tag mẽ huri, kỡ sóg ãjag to Topê mỡ vĩ há han tĩ, Jesus Cristo tigrĩn. Ti hã mré sóg vêmén tĩ.

⁹ Ti hã mỡ sóg rãnrãj tĩ, to krónh ke vãnh sóg nĩgtĩ, hã kỡ sóg ti kósin to vême sér ên tó tĩ. Ti hã mré sóg ãjag jagfy vĩ tĩ gé, kỡ tóg ki kanhró nĩ. Kurã kar ki sóg ãjag kãmén tĩgtĩ, ti mỡ.

¹⁰ Isỹ ti mré vêmén kỡ sóg ãjag tó tĩ. Ti mỡ sóg sỹ kejên ãjag ve sór mũ tó tĩ. Ti tỡ kejên sỹ ãjag venh ke to há nĩn kỡ tóg inh mỡ: hej, henh ke mũ.

¹¹ ãjag ve sór tãvĩ inh nĩgtĩ, sỹ ãjag mỡ Topê kuprĩg tỡ inh kanhrãn ja ên kãmén jé, ãjag tỡ inh vĩ jêmén kỡ tar nỹtĩ jé.

¹² Kỡ êg tóg jagnê tar han ke mũ sir, êg tỡ jagnê jykre ven kỡ, ãjag tỡ isỹ Jesus ki rã kỡ nĩ ven kỡ, isỹ ãjag tỡ ti ki ge kỡ nỹtĩ ven kỡ ke gé.

¹³ Inh kanhkã', inh mỡ tóg ãjag tỡ tag ki kanhró nỹtĩnh há tĩ, ha mẽ: ãjag venh tĩg ke to inh jykren tỡ hên ri ke han huri, hã ra tóg inh mỡ ki króm ja tũ nĩ ver. Isỹ ãjag mỡ Topê vĩ kãmén sór vễ, Roma ki ke ù

ag mý ke gé, ag kāmī ũ tỹ Topě ki ge jé. Fóg kar mý sóg ke tĩ, kỹ tóg inh mý sér tĩnh mũ, sỹ Roma tá tónh ke mũn kỹ ke gé.

14 Fóg tỹ Grego ag mý sóg Topě vĩ tó tĩ, fóg kar ag mý ke gé, kanhgág ag mý ke gé, ũ tỹ nén ũ ki kanhró ag mý, ũ tỹ nén ũ ki kagtĩg ag mý ke gé. Topě vĩ inh mý: “ha ag mý tó,” he ja nĩgtĩ.

15 Hã kỹ sóg Roma tá ti to sór mũ gé, Topě vĩ sér ěn ti.

Topě jykre tar

16 Inh pi(jé) Topě vĩ sér tag to mý'äg sór mũ'. Topě hã ne tag to ěg kren han tĩ', ěg tỹ kri fin kỹ. Topě jykre tar hã vễ. Judeu ag kren han sór tóg mũ, kar kỹ fóg kar ag ke gé, kanhgág ag ke gé.

17 Tag hã ki ěg tóg Topě jykre ki kanhró nỹtĩnh mũ, Topě vĩ sér hã ki. Ěg tỹ ti ki rã hã kỹ ěg tóg ti mý kuryj nỹtĩ. Hã kỹ tag tóg rán kỹ nĩ, ha mẽ: “ěg tỹ Topě ki rã hã tugnĩn ěg tóg ti mý kuryj nỹtĩnh ke mũ, kỹ ěg rĩnrĩr mản ke mũ,” he ja tóg nĩ, Topě vĩ rán ki.

Ěprã ke ag jykre pãno

18 Hã ra Topě tóg jũ nĩ gé, kanhkã tá. ũ tỹ ti ki ěkrég tũ ag to tóg jũ mũ. Topě vĩ ag mý tỹ nén ũ tũ nĩ, hã kỹ ag tóg vễnh jykre kuryj han sór tũ nĩgtĩ. Vễnh vĩ há tỹ ag tóg tũg' he sór tĩ gé, vễnh jykre kórég han sór kỹ.

19 Topě jykre há nỹtĩn hã ki kanhró ag tóg nỹtĩ vễ, ag tỹ ki kanhrãn sór kỹ. Topě vĩ ěg kar mý tag ven tĩ.

20 Ěg pi(jé) Topě vэг tĩ'. Hã ra tóg nén ũ kar han, ěg tỹ nén vэг mũ kar. Ěn vigve kỹ ěg tóg ti jykre mág nĩ ěn ki kanhró nĩ sir. “Ũ tỹ tag han mũ vĩ tỹ ũn mág nĩ,” he jé ěg tóg ke mũ. “Ěn jykre vĩ tar nĩ, ěn hỹn tóg tũ' henh ke tũ nĩ,” he jé ěg tóg ke mũ, ěg tỹ Topě tỹ nén han ja vigve kỹ. Hã ra ag tóg ki kanhrãn jãvãnh nỹtĩ, hã kỹ Topě tóg ag to jũnh ke mũ, hã ra ag tỹ ne tónh ke tóg tũ tĩnh mũ.

21 Ti tỹ tỹ Topě nĩn ki kanhró ag tóg nỹtĩ vễ, hã ra ag tóg ti to: “Topě vễ,” he tũ nĩgtĩ. Ti tỹ tỹ ũn mág nĩ tag tó sór tũ ag tóg nĩgtĩ. Ti mý ag: “inh mý tóg há tĩ,” he ja tũ nĩgtĩ gé, ti tỹ ag ki rĩr há han mũ ra. Hã kỹ ag tóg ag tỹ krĩ há ra ki kagtĩg nỹtĩ sir, ag krĩ há tóg tũ' he ja nĩgtĩ sir. Nén ũ há to jykrén mũ ki kagtĩg ag nỹtĩ ha.

22 “Ki kanhró mág inh nĩ,” he ag tóg tĩ, hã ra ag tóg krĩ vễnhmỹ nỹtĩ ha.

23 Kỹ ag tóg Topě pễ tag jęgja kã, ũn ter vãnh tag jęgja kã ag tóg sir ěprã ke kãggrã fэг mũ sir, ěprã ke ag kãgter tĩn ra. Sēsĩ kãggrã vin ag ke gé, bicho tỹ fa tỹ 4 ag kãggrã ke gé, pỹn kãggrã ke gé. Tag vĩ ag mý tỹ topě nỹtĩ sir.

24 Hã kỹ Topě tóg ag tovãnh mũ sir. Ag tỹ ãjag tỹ nén to ěn mũ ěn han sór nỹtĩn kỹ tóg ag tovãnh mũ, ag tỹ han jé. Jagně kavěnh ag tóg mũ sir.

25 Topě vĩ há kri fi vãnh ra ag tóg vễnh ó hã kri nĩm tĩ. Ag tỹ ũ tỹ nén ũ kar han ja ěn to:

“Topē vē,” henh ke vē vē, hã ra ag tóg ti tỹ nén han ja to: “Topē vē,” he sór mũ, ón kỹ. Ủ tỹ nén ù kar han mũ hã ne ã pir mỹ tỹ ùn mág nĩ, ti hã mỹ ěg tóg vĩ há han ke mũ. To krónh ke vãnh ěg nỹtĩ. Amém.

²⁶ Ag tỹ Topē tỹ nén han ja to: “Topē vē,” hen kỹ Topē tóg ag togvãnh gé, ag tỹ ãjag tỹ nén to én mũ ěn han jé, ěg kavénh tĩ ěn ti. Ag prũ fag tỹ ag mré nỹ tũg kỹ fag tóg jag(nē) hã mré ti vẽnhmỹ han mũ sir, mỹr, ha mẽ.

²⁷ Kỹ fag mén ag tóg ãjag prũ fag mré nỹ tovãnh kỹ jagnē to én mũ gé sir. Jagnē to én kỹ ag tóg jagnē mré nỹ kỹ ti kórég han mũ gé sir, jagnē kavénh kỹ. Hã kỹ ag tóg ag tỹ Topē tovãnh to jagãgtar nỹtĩnh mũ. Ti tỹ ag vóg kónãn hã vē.

²⁸ Ve ra ha. Topē ki ěkrén jãvãnh ag tóg nỹtĩ, ti to é he kỹ. Hã kỹ Topē tóg ag togvãnh ja nĩgtĩ gé sir, vẽnh kato, ag tỹ vẽnh jykre pãno han sór kỹ. “Ha han, ge kỹ sir,” he ja tóg nĩgtĩ.

²⁹ Vẽnh jykre pãno tỹ ag fór nỹtĩ ha, ti kórég tãvĩ tỹ. Nén kar to én (ka)mē ag nỹtĩ. Vẽnh jykre kuryj han vãnh ag nỹtĩ. Jagnē tũ to én (ka)mē ag nỹtĩ. Jagnē kãgtén ag tóg tĩ gé. Jagnē vĩ kafãn ag tóg tĩ gé. Jagnē mỹ un'ón ag tóg tĩ gé. Jagnē krĩn kónãn ag tóg tĩ gé. Jagnē to vĩ kónãn ag tóg tĩ gé.

³⁰ Jagnē to un'ón ag tóg tĩ gé. Topē kato tẽ mág ag tóg nỹtĩ. Jagnē vóg kónãn ag tóg tĩ. “Ag kãfór vỹ tỹ inh nĩ,” he ag tóg tĩ,

kỹ ag tóg vẽnso nén ù há tó tĩ, ón kỹ. “Inh hỹn vẽnh jykre pãno tỹ ne han mũ, ùri?” he ag tóg tĩ, kurã kar ki. ãjag mỹnh fag vĩ han vãnh ag tóg nỹtĩ gé, ãjag panh ag vĩ ti.

³¹ Krĩ tũ ag nỹtĩ. Ón kỹ ag tóg jagnē mré nén kar to jykren tĩ, ãjag tỹ ki króm ke tũ (hã) ra. Jagnē mré há nỹtĩ ki kagtĩg ag nỹtĩ, kỹ ag tóg jagnē jagãgtãn ki kagtĩg nỹtĩ gé.

³² Topē vỹ ù tỹ tag han mũ to: “kãgter jé ag tóg ke mũ,” he ja nĩgtĩ. Ag tỹ tag ki kanhró nỹtĩ ra ag tóg han mũ sir, kỹ ag tóg ù tỹ tag han mũ to há nỹtĩ gé, mỹr, ha mẽ.

2

Topē tỹ vẽnh jykre pãno to jũ

¹ Fóg mré kanhgág ag vỹ vẽnh jykre kórég tag hyn han kãn tĩ, kỹ ag tóg Judeu ag mỹ kórég nỹtĩ. Hã ra Judeu ag vỹ ti kórég han tĩ gé, ag tỹ ón kỹ ag to vĩ mũ ra. “Kórég ag nỹtĩ,” he ag tóg tĩ, hã ra ag tóg fóg jykre kórég ěn han tĩ gé, kanhgág jykre kórég ti ke gé. Hã kỹ ag tóg ãjag jykre tugnĩn ti kórég venh ke mũ gé.

² Topē vỹ ù tỹ tag han mũ vóg kónãn ke mũ, ti jykre kuryj nĩn kỹ, Topē ti. Ti tỹ ke há vē.

³ Ûn jykre kórég ag tóg ag mỹ kórég nỹtĩ, Judeu ag mỹ, hã ra ag tóg hã han tĩ gé. Kỹ ag hỹn hẽ ri kenh mũ, Topē tỹ ag vóg kónãn tũ nĩ jé? Ag vóg kónãn jé tóg ke mũ, ha vemnĩ.

⁴ Ver tóg ěg to há nĩ, ver tóg ěg to fen nĩnh mũ, ver tóg jũ vãnh nĩ, Topē ti. Ti tỹ ěg tỹ ěg

jykre kórég tovānh ve sór vē, hã ky tóg ver ěg to há tãvĩ nĩ. Hã ra tóg ag mỹ tỹ nén ũ tũ nĩ ve nĩ, Topě tỹ ěg to fen nĩnh ke mũ ti.

⁵ Kutu ag nỹtĩ, vėnh jykre pãno tovānh jãvānh ag nỹtĩ, hã ky Topě tỹ ag to jũ tóg koměr hã mág rã nĩ. Kejěn tóg Topě tỹ vėnh kar jykre venh ke kurã pétēm ke mũ sir. Kỹ ag tóg venh ke mũ, Topě tỹ ag vóg kónān ke ti, kỹ vėnh kar vỹ ti jykre kuryj venh ke mũ, ti tỹ ěg mỹ ki hã tó mũ ti.

⁶ Ti hã ne ěg mỹ nĩm ke mũ', ěg tỹ nén hyn han ja ěn kaja ti.

⁷ Ěn kã tóg ěg mỹ ěg rĩr krỹg ja tũ ven ke mũ, ũn jykre kuryj ag mỹ. Ěg tỹ ti jykre há to tar nỹtĩn kỹ tóg ěg mỹ ěg rĩr krỹg ja tũ ven ke mũ, ěg tỹ tá tỹ ũn mág nỹtĩ sór kỹ, ěg tỹ Topě hã tỹ ěg mỹ vĩ há han ke ve sór kỹ, ěg tỹ ěg rĩr krỹg ja tũ ve sór kỹ. Kỹ tóg ěg mỹ ven ke mũ.

⁸ Hã ra tóg ũ vóg kónān ke mũ gé. Ũ tóg ājag tỹ nén han sór mũ ěn hã han tĩ. Vėnh vĩ há kri fi vānh ag nỹtĩ, ag tỹ vėnh jykre pãno hyn han sór kỹ. Hã ky tóg ag vóg kónān ke mũ.

⁹ Ũ tỹ vėnh jykre pãno han mũ kar vỹ kaně junjur ke mũ, jagtar jagy hyn han kỹ. Ag tỹ tỹ Judeu nỹtĩ ra ag tóg jagāgtar ke mũ, kar kỹ fóg kar ag ke gé, kanhgág ag ke gé.

¹⁰ Ũ tỹ vėnh jykre kuryj han mũ tỹ tóg ũn mág hyn han ke mũ hã ra, to tóg vĩ há han ke mũ, ěg mỹ tóg vėnh jykre kusa nĩm ke mũ, ěg tỹ tỹ Judeu nỹtĩ

ra, kar kỹ fóg ag mỹ ke gé, kanhgág ag mỹ ke gé.

¹¹ Ha vé, Topě mỹ ti tỹ nén ũ tũ nĩ, Judeu ag, fóg ag, kanhgág ag. Ti mỹ ěg tóg tỹ ũn pir nỹtĩ.

¹² Ũ ag tóg Topě vĩ mẽ ja tũ nỹtĩ. Kỹ ag tóg ti kórég kar hyn han mũ sir. Kỹ ag tóg nũgme ki vár ke mũ sir, inferno ki, ag jykre kórég to. Ag jãvo Judeu ag vỹ Topě vĩ mẽ ja nĩgtĩ. Hã ra ag tóg ti kórég han tĩ gé. Kỹ Topě tóg ag vóg kónān ke mũ gé sir. "Isỹ ājag mỹ nén tó ja ěn han ja tũ ājag nỹtĩ," he jé tóg ke mũ.

¹³ Ha vé, ěg tỹ Topě vĩ mẽg mũ ra han tũ nĩn kỹ ěg Topě mỹ há tũ nỹtĩ. Ěg tỹ ti vĩ ki króm kỹ ěg tóg ti mỹ kuryj nỹtĩ.

¹⁴ Fóg ag mré kanhgág ag vỹ Topě vĩ mẽ ja tũ nĩ ver, ũ tỹ Judeu jykre han tũ kar ag. Ge ra vėnh jykre há tóg ag mỹ sér tĩ, ag tỹ Topě vĩ mẽ ja tũ (hã) ra. Kỹ ag tỹ vėnh jykre há han sór mũ tag vỹ ag mỹ ag tỹ ki króm han jafã nĩ.

¹⁵ Topě tỹ nén tó ja ěn vỹ ag kãkã nĩ, hã ky ag tóg han sór mũ, ag tỹ mẽ ja tũ ra. Hã ky tóg ag mỹ sér tĩ, ag tỹ nén ũ há han kỹ. Jãvo tóg ag mỹ e tĩ, ag tỹ ti kórég han kỹ. Ag tỹ Topě vĩ mẽ ja tũ ra ag tóg vėnh jykre há ki kanhró nỹtĩ.

¹⁶ Kejěn Topě tóg Jesus Cristo mỹ: "ag jykre ve kãn nĩ," henh ke mũ, ti kurã ěn kã. Kỹ vėnh kar jykre vỹ vėnh ven ke mũ, ag jykre kórég mré hã, ag tỹ vėnh kar vatánh tá nén han ja ti. Tag hã tó sóg tĩ, sỹ

věnh kar mý ti vī sér kāmén kŷ.

Judeu ag tŷ Topě vī mranh ja

17 Ha vé, Judeu ag mŷ tóg sér tī, ag tŷ tŷ Judeu nŷtīn kŷ. “Topě ne ěg jyvěň ja nŷgtī, kŷ ěg nŷgme ki vár ke tũ nŷ,” he ag tóg tī. “Topě to ěg há nŷtī,” he ag tóg tī gé.

18 Ti tŷ ěg ki nén ve sór mũ ki kanhró ag tóg nŷtī. Ti vī ki tóg rán kŷ nŷ, hã kŷ ag tóg ěn ve kŷ věnh jykre kuryj ki kanhró nŷtī.

19 “Ki kanhró ěg nŷtī,” he ag tóg tī, hã kŷ ag tóg ũ tŷ ki kagtīg ag mŷ tó tī, Judeu ag, ag tŷ ag mŷ ũn kyvó ag ri ke nŷtīn kŷ. Kuty mī ag tóg mũgtī, kŷ ag tóg ag mŷ jěngrě han sór tī, ag mŷ Topě vī tó kŷ.

20 ũ tŷ ki kagtīg ag kanhrãn ag tóg tī, gīr ag ke gé. “Topě vī vŷ há nŷ, věnh jykre há vě, ki hã tóg tó tī, hã to ěg Topě ki kanhrãn tī,” he ag tóg tī.

21 Ón kŷ ag tóg ũ ag kanhrãn tī, ājag tŷ ki kagtīg nŷtī (hã) ra. ũ mŷ ag tóg: “nén ũ péju(g) tũg nŷ,” he tī. Hã ra ag tóg ũ tũ péju(g) tī.

22 Ón kŷ ag tóg: “ã prŷ tũ fi mré nŷ tũg nŷ, ā mén tũ mré nŷ tũg nŷ gé,” he tī. Hã ra ag tóg fag mré nŷgnŷ tī. Ón kŷ ag tóg věnh kãggrá tŷ topě to: “Topě pijé,” he tī. Hã ra ag tóg věnh kãggrá ag jo ĩn krēm ag tũ péju(g) tī.

23 “Topě vŷ ěg jyvěň ja nŷgtī,” he ag tóg tī. Hã ra ag tóg tī vī mranh tī. Topě kavěnh ag tóg tī.

24 Hã kŷ tag tóg rán kŷ nŷ, Judeu ag to, Topě vī rán ki, ha mē: “ājag jykre kórég ve kŷ fóg ag mré kanhgág ag vŷ Topě jykre to: kórég ti hŷn nŷ,” he tī,” he ja tóg nŷgtī, Judeu ag to, Topě vī rán ki.

25 Há ti nŷ, ěg tŷ tŷ Judeu nŷtī ti, ěg tŷ Topě vī ki króm kŷ. ěg tŷ hã ra ti vī mranh kŷ tóg ěg mŷ nén ũ há han ke tũ nŷ, ěg tŷ tŷ Judeu nŷtī ra. Fóg ri ke vŷ tŷ ěg nŷtī, kanhgág ri ke, ěg tŷ ti vī mranh kŷ.

26 Kejěň fóg ũ tóg sir Topě vī ki króm mũ sir, kanhgág ũ hěň ri ke mũn. Kŷ tóg Topě mŷ tŷ Judeu ri ke nŷ sir, ti tŷ Topě vī ki króm to.

27 Hã kŷ fóg ag mré kanhgág ag vŷ Judeu ag jykre kórég tóňh ke mũ, ha vemnŷ, ag tŷ Topě vī ki króm kŷ. Topě vī mranh ag tóg tī, ag tŷ tŷ Judeu nŷtī ra, ag tŷ Topě vī rá vég nŷtī ra. Hã tó jé ag tóg ke mũ, fóg ag, kanhgág ag ke gé.

28-29 Ón kŷ ag tóg tŷ Judeu nŷtī, ag pi(jé) tŷ Topě tũ pě nŷtī. Ón kŷ ag gré junun fár vŷ kym kŷ nŷ, Topě tŷ ag mŷ: “kym ra,” he ja nŷn kŷ. Kŷ ag tóg tag tugnŷn jagně mŷ: “Topě tũ vŷ tŷ ěg nŷtī,” he tī. Hã ra ag pi(jé) tag tigrŷn tŷ Topě tũ nŷtī. Topě tũ ag vŷ ājag fe tŷ ti ki rã tī, kŷ ag jykre hã ne kym kŷ nŷ ri ke nŷ. Ag tŷ věnh jykre kórég tovãnh to ken hã vě. Topě kuprīg ne ěg jykre há han tī, kŷ Topě tóg ěg mŷ vī há han tī gé sir, ěg jykre há nŷtīn kŷ. Ti pi(jé) ěprã ke ri ke ón kŷ vŷ há han tī, ti ki ge kŷ nŷtī ag mŷ. ěg hã vŷ tŷ

Topê tũ pẽ nýtĩ'.

3

1 Kĩ Judeu ag hỹn inh mỹ: “kỹn mỹ há tũ nĩ, ãg tỹ tỹ Judeu ag krẽ nýtĩn kũ?” he sór mũ. “Ëg gré junun fár kym kũ nĩn kũn mỹ tỹ nén ù tũ nĩ?” he sór ag hỹn mũ.

2 Vó, há tãvĩ ti nĩ gé. Ëg hã mỹ tóg ã vĩ ti tó ja nĩgtĩ, Topê ti, ãg tỹ tỹ Judeu krẽ nýtĩn kũ.

3 Ëg kãmĩ ù tóg ti vĩ kri fig tũ nĩgtĩ. Hã ra Topê pi(jé) ag tugrĩn ã tỹ nén tó ja ãn han ke tũ nĩ', ag tỹ ti vĩ ki króm tũ ra tóg ã vĩ ki króm tĩ, Topê ti, ag jãvo.

4 Ti tỹ ãg mỹ tó ja ãn han ti tĩ, ón vãnh ti nĩgtĩ. Ëprã ke ag ne un'ón tĩ', hã ra tóg ón ke tũ pẽ nĩ, Topê ti. Hã kũ tag tóg rán kũ nĩ, Topê vĩ rán ki, hã vỹ: “vãnh kar vỹ venh ke mũ, ã tỹ ã vĩ han tĩ ti,” he mũ. “Û tỹ ã jykre tugnỹm kũ tóg venh ke mũ sir, ã tỹ ki hã tó ti ti,” he ja tóg nĩ, Topê to, Topê vĩ tỹ rán kũ nĩ ki. Hã ra tóg ge nĩ.

5 Kũ Judeu ag hỹn ón kũ inh mỹ: “kỹn hỹn há nĩ, ãg jykre pãno ti,” he sór mũ. “Vãnh kar vỹ ãg jykre pãno ve kũ Topê jykre kuryj nĩ ki kanhró nýtĩ, ti tỹ ãg jãvo vãnh jykre pãno to há tũ nĩn kũ. Hã kũ ãg jykre pãno tag vỹ tỹ nén ù há nĩ. Hã ra tóg to ãg vóg kónãn sór mũ, ãg jykre pãno to, ti tỹ tỹ nén ù há nĩ ra. Tag tugnĩn tóg jykre pãno nĩ ve nĩ, Topê ti,” he sór ag hỹn mũ, Judeu ù ag. Ëprã ke ag vỹ ón kũ vĩ tỹ ge han tĩ.

6 Hã ra tóg há tũ nĩ, ag vĩ tag ti. Topê jykre hã ne kuryj nĩ'.

Ti jykre há nĩn kũ tóg ãprã ke jykre to: “há tũ ti nĩ,” henh ke mũ. Jykre kuryj ti nĩ inhhã.

7 Hã ra Judeu ù ag tóg ón kũ: “vãnhmỹ ãg ki króm kũ nýtĩ vỹ,” he tĩ gé. “Ëg ón tugrĩn Topê tỹ tỹ ùn mág nĩ tag vỹ vãnh ven mũ, ti ón vãnh vỹ vãnh ven mũ ãg jãvo. Há ti nĩ, tag ti. Hã kũ ti tỹ ãg ón mũ tag to: “inh vỹ mranh ja ãjag tóg nĩgtĩ,” hen kũ tóg vãnhmỹn kũ tó mũ, Topê ti,” he ag tóg tĩ, ón kũ.

8 “Ti kórég han jé ãg tóg ke mũ, Topê tỹ ãg jykre kórég tỹ nén ù há han jé,” he ag tóg tĩ, ón kũ. Kũ ag tóg iso ón kũ: “tag tó ti tĩ, Paulo ti,” he tĩ gé. Û tỹ tag tó mũ ag vóg kónãn jé tóg ke mũ, Topê ti, ag ón mũ tag to, ti jykre kuryj nĩn kũ, ha vemnĩ.

Ëg kar tỹ Topê vĩ mranh kãn

9 Kũ isỹ Judeu ag to ne tó nẽ? Ëg mỹ fóg ag kãfór nýtĩ, ãg tỹ tỹ Judeu nýtĩn kũ? Vó, ag kãfór tũ ãg nýtĩ. Topê vĩ mranh kãn ãg mỹr, Judeu, fóg, kanhgág, ãg kar mỹr. Tag tó inh huri. Hã ra tóg ge nĩ.

10 Hã kũ tag tóg rán kũ nĩ gé, ha mẽ: “ùn jykre kuryj vỹ tũ tĩ, ùn jykre kuryj venh ke tũ pẽ ãg nĩgtĩ.

11 Vãnh jykre há han ki kagtĩg kar ãg nýtĩ, ù tỹ Topê jykre han sór mũ vỹ tũ tĩ.

12 Ëg kar vỹ Topê japry, Topê jamĩn tovãnh kãn kũ nýtĩ. Jykre kórég kar ãg nýtĩ. Vãnh jykre kuryj han vãnh ãg nýtĩ. Ûn jykre há venh ke tũ pẽ ãg nĩ.

13 Un'ón (ka)mě kar ěg nýtĭ, jagně to. Ěg tŷ vēser to nón kŷ vēser ger tóg kākutě tĭ. Ěg ón vŷ vēser ger tag ri ke nĭ. Jagně mŷ ěg tóg un'ón tĭ gé. Ěg vĭ jŷ tŷ ěg tóg jagně kăgtén ri ke han tĭ gé, kŷ tóg pŷn veneno ri ke nĭ, ěg vĭ jŷ tĭ.

14 Věnh vĭ jŷ tŷ ěg fór nýtĭ, kŷ ěg tóg věnh kar mŷ vĭ kónān tĭ.

15 Jagně kăgtén (ka)mě ěg nýtĭ, tag hă tóg ěg mŷ sér tĭ.

16 Ěg tŷ hěn mĭ mŷ kŷ ěg tóg nén ũ kar kókég tĭ, hă kŷ ěg mré ke fag vŷ jagtar nýtĭ, ěg to.

17 Ěg pi(jé) věnh jykre kusa ve sór tĭ'.

18 Topě kaměg sór vānh ěg nýtĭ," he ja tóg nĭgtĭ, Topě vĭ tŷ rán kŷ nĭ ki. Hă ra tóg ge nĭ.

19 Hă ra ěg kar vŷ tag ki kanhró nýtĭ, ha mẽ. Ěg hă mŷ ti rán kŷ nĭ, Topě vĭ ti, ěg tŷ ki króm jé. Hă ra ěg tóg mranh kăn. Kŷ Topě tŷ ěg mŷ: "ti kórég han ā," he mŷ ra tóg ěg tŷ ti mŷ ne tónh ke tóg tŷ tĭ, ěg kar ti. Hă jé tóg ěg mŷ ā vĭ jěně ja nĭgtĭ, ěg tŷ to ěg kórég nĭ tag ki kanhrān jé.

20 Topě vĭ ki króm kăn ja tŷ ěg tóg nýtĭ, hă kŷ ěg kuryj tŷ nýtĭ, Topě mŷ. Hă kŷ ěg tŷ Topě tŷ vāsŷ ěg jyvěn ja ěn mēg mŷ ra ěg tóg Topě vĭ mranh ki kanhrān mŷ, ti tŷ ěg mŷ: "tag han tŷg ra," hen kŷ. Ge ta ěg tóg mranh tĭ.

Topě tŷ ěg kren han sór

21-22 Văhă Topě jykre kuryj tóg věnh ven ja nĭgtĭ. Ti hă ne ěg mŷ věnh pāte fón mŷ sir', inhhă', ěg tŷ Jesus Cristo

ki ge kŷ, ěg tŷ ti tŷ ěg jyvěn ja ěn mranh ja (hă) ra. Ti jykre kuryj hă vē. Vāsŷ tóg tó ja nĭ, Topě ti, ti tŷ tag han ke ti. Ā jykre si ki tóg tó ja nĭ, kŷ ti vĭ tó tĭ ag, profeta ěn ag tóg tó ja nĭgtĭ gé, ti jykre tăg ke ti. Ũ tŷ ti ki ge kŷ nýtĭ kar mŷ tóg věnh pāte fón tĭ. Kŷ ěg kar tóg jagně ri ke nýtĭ ha, ěg tŷ ti ki ge kŷ.

23 Topě vĭ mranh kăn ěg, věnh jykre kuryj han tŷ ěg nýtĭ, Topě jykre kuryj tag han ki kagtĭg ěg nýtĭ.

24 Hă ra tóg ěg jagăgtān kŷ ěg mŷ věnh pāte fón sór mŷ. Fagrĭnh mŷ ke vē, kajām ke tŷ ěg tóg nĭ. Jesus Cristo tugnĭn tóg ěg kren han sór mŷ.

25 Topě ne Jesus fěg', ti hă tŷ ěg tŷ Topě vĭ mranh tŷ tŷg' hen jé, ti ter kŷ ti kyvėnh tŷ ěg jagfŷ ti ki kākutě kŷ. Kŷ ěg tóg ti ki ră kŷ há nýtĭ sir, Topě jykre kuryj hă vē sir. Jesus to ěg ki kanhrān mŷ, věnh jykre kuryj ti. Hă kŷ Topě tóg ěg tŷ vāsŷ ti vĭ mranh ja ěn to tóg ěg vóg ja tŷ nĭ ver, ěg to fen kŷ,

26 ti tŷ ũri ěg mŷ ā jykre tăg ven sór kŷ. Topě vŷ kuryj nĭ. Ti tŷ ěg mŷ věnh pāte fón kŷ ěg ti mŷ kugryj nýtĭ sir, ěg tŷ Jesus ki gen kŷ. Topě jykre kuryj hă vē sir.

27 Kŷ Judeu ag hŷn inh mŷ: "kŷ ěg mŷ Topě mŷ há tŷ nýtĭ, ěg tŷ ti vĭ ki króm sór mŷ ra?" he sór mŷ. Hŷ, hă vē. Kórég ěg nýtĭ, hă kŷ ěg tóg ti vĭ ki króm sór mŷ ra mranh tĭ. Ěg tŷ ti ki ge kŷ tóg ěg mŷ věnh pāte fón tĭ, kŷ ěg há nýtĭ.

28 Tag ki kanhró ěg nýtĭ, ha mẽ. Ěg tŷ Topě jykre si ěn han

sór mǔ ra ěg jykre pǎno vỹ ěg kǎkǎ nĩ nĩ. Ěg tỹ Jesus ki gen hǎ kỹ tóg ěg mỹ vĕnh pǎte fón ke mǔ hǎ ra.

²⁹ Topĕ pí(jé) Judeu ag tǎvĩ vég nĩ nĩ'. Fóg ag vég ti nĩ gé, kanhgág ag ke gé.

³⁰ Pir ti nĩ, Topĕ ti. Hǎ kỹ tóg ũ tỹ ti ki ge mǔ ag mỹ vĕnh pǎte fón tĩ, Judeu ag mré hǎ, fóg ag mỹ ke gé, kanhgág ag mỹ ke gé. Ěg tỹ ti ki ge to tóg ěg mỹ vĕnh pǎte fón tĩ, ěg kar mỹ.

³¹ Kỹ ěg mỹ ti ki ge kỹ (ěg mỹ) Topĕ tỹ vǎsỹ ěg mỹ vĕnh jykre nĩm ja ěn tỹ tũg' he tĩ, Topĕ tỹ Judeu ag jyvĕn ja ěn ti? Vó. Vǎhǎ ěg ki króm há han ki kanhró nỹtĩ, Topĕ tỹ ěg mỹ vĕnh jykre nĩm ja ěn ki.

4

Topĕ tỹ Abraão mỹ vĕnh pǎte fón

¹ Kỹ Judeu ag hỹn inh mỹ: “ěg jóg'jóg ve pĕ tỹ Abraão hỹn hĕ ri ke tĩ?” he sór mǔ.

²⁻³ “Nén ũ há kar han ti tĩ, Abraão ti, hǎ tugrĩn tóg tỹ Topĕ mỹ ũn há nĩ,” he sór ag hỹn mǔ, Judeu ag. Vó, hǎ tũ vĕ. Ti ki rǎ tugnĩn ke vĕ. Hǎ kỹ tag vỹ ti to rán kỹ nĩ, ha mĕ: “Abraão vỹ Topĕ ki rǎ, hǎ kỹ tóg tỹ Topĕ mỹ ũn há nĩ, ti tỹ ti ki rǎ tugrĩn,” he tóg mǔ, Topĕ vĩ rán ki. Ti tỹ nén ũ há han tugnĩn Topĕ mỹ tỹ ũn há nĩ ra tóg vĕso: “tỹ sóg ũn há nĩ, ag kar kǎfór,” henh ke mǔ vĕ, vĕsỹ ũn há han sór kỹ. Hǎ ra ěg vĕsỹ ũn há han ki kagtĩg nỹtĩ.

⁴ Hǎ vé, ěg rǎnhrǎj to ěg tóg ěg rǎnhrǎj kaja vég tĩ. Fagrĩnh mỹ ke tũ vĕ, ěg rǎnhrǎj kaja ti.

⁵ Topĕ jykre vỹ ge tũ nĩgtĩ. Ěg tỹ ti ki ge kỹ ěg tóg ti mỹ tỹ, ũn há nỹtĩ. Ěg tỹ ti ki ge tugrĩn tóg ěg mỹ vĕnh pǎte fón tĩ, ěg tỹ ti vĩ mranh ja ti. Ěg rǎnhrǎj pijé'. Topĕ tỹ nén han mǔn hǎ vĕ.

⁶ Hǎ kỹ vǎsỹ ěg pǎ'i tỹ Davi tóg tó ja nĩgtĩ gé. Ũ tỹ nén ũ kórég han tĩ ěn to tóg vĩ há han ja nĩ, Davi ti. Topĕ vỹ ěg mỹ vĕnh pǎte fón tĩ, ěg tỹ ti vĩ mranh ja ti. Topĕ tỹ ũn mỹ vĕnh pǎte fón ja ěn to Davi tóg tag tó ja nĩgtĩ, ha mĕ:

⁷ “Topĕ vỹ ěg ve há han ke mǔ, hǎ kỹ tóg ěg mỹ ěg tỹ ti vĩ mranh ja ěn tỹ vĕnh pǎte fón tĩ. Kỹ ěg ve mǎn ke tũ nĩ ha, ěg jykre pǎno ja ěn ti, ti tỹ vĕnh pǎte fón kỹ nĩn kỹ.

⁸ Topĕ vỹ ěg ve há han ke mǔ, hǎ kỹ tóg ěg mỹ ěg tỹ ti vĩ mranh ja ěn kaja kórég ěn ven ke tũ pĕ nĩ,” he ja tóg nĩgtĩ, Davi ti.

⁹ Kỹ Judeu ag hỹn inh mỹ: “Davi hỹn ũ tỹ hĕ to tag tó ja nĩgtĩ?” he sór mǔ. “Judeu jykre han mǔ ag to ke mỹ vó, ag jykre han tũ ag to ke mỹ vó?” he sór ag hỹn mǔ. Ěg kar to ke vĕ. Hǎ vĕ, Abraão to sóg: “ti tỹ Topĕ ki rǎ tugrĩn tóg tỹ Topĕ mỹ ũn há nĩ,” he ja nĩ.

¹⁰ Kỹ ti jykre tỹ Topĕ mỹ kuryj nĩ ěn kǎ ti mỹ Judeu ag jykre han kỹ tĩ nĩ', Abraão ti? Vó, ěn kǎ ti ěg jykre han tũ nĩ ver. Ěn kǎ ti ǎ gré junun fár kym ja tũ nĩ ver.

11 Topê vỹ ti mỹ vênh pãte fón, ti tỹ ti ki rã tugnĩn, ti tỹ ver Israel ag jykre ki kagtĩg nĩn kã. Ti mỹ vênh pãte fón kar kỹ Topê tóg ti mỹ ãg jykre tag nĩm ja nĩ, ti tỹ ã gré junun fár kym jé sir, vênh kar tỹ ti jykre há nĩ ki kanhrãn jé. Hã kỹ tóg tỹ ù tỹ Topê ki ge mũ kar jóg nĩ sir, Abraão ti, ag tỹ Judeu ag jykre han tũ ra, ag tỹ ãjag fár kym tũ ra ke gé. Topê ki ge kỹ ãg tóg Topê mỹ tỹ ùn há nỹtĩ, Abraão ri ke.

12 Kỹ tóg tỹ Judeu jykre han mũ ag jóg'jóg ve pẽ nĩ gé sir, Abraão ti, ag tỹ ti mré Topê ki ge kỹ. Judeu jykre han to hã tóg Topê ki rã, ãg jóg tỹ Abraão ti. Kỹ ãg tỹ Topê ki ge kỹ tóg tỹ ãg jóg pẽ nĩ gé sir, ãg tỹ tỹ Judeu krẽ nỹtĩ ra Topê ki ge kỹ nỹtĩn kỹ.

13 Topê vỹ Abraão mỹ: “ã krẽ vỹ ga kar mũ mũnh mũ, kỹ tóg tỹ ag tũ kar nĩnh mũ,” he ja nĩgtĩ. Ti tỹ Topê vĩ kri fi tugrĩn tóg ti mỹ tag tó. Vênh jykre si ki króm tugnĩn ke pijé'. Ti tỹ Topê ki rã kỹ tóg ti mỹ tỹ ùn há nĩ, hã kỹ Topê tóg ti mỹ tag tó ja nĩ.

Topê tỹ ù tỹ ti ki ge kỹ nỹtĩ ag to há

14-15 Ha vé, ãg tỹ Topê tỹ vãsỹ ãg mỹ vênh jykre nĩm ja ãn han sór mũ ra ãg tóg mranh tĩ, kỹ Topê tóg ãg vóg kónãn ke mũ vè sir. Hã kỹ ãg tóg ti tỹ ãg mỹ nén ù há tó ja ãn venh ke tũ pẽ nĩ vè sir. ãg vóg kónãn jé tóg ke mũ vè sir, kỹ tóg ãg mỹ nén ù há nĩm ke tũ nĩ vè sir. Kỹ tóg ãg mỹ: “ha inh ki rã,” henh ke tũ nĩ vè gé. Topê tỹ ãg vóg

kónãn ke mũ hã ne kã nĩ vè', ti vĩ mranh tugrĩn.

16 Hã ra tóg ãg mỹ: “ha inh ki rã, sỹ ãjag mỹ nén ù há ãn han jé, ãjag tỹ inh ki ge tugrĩn,” he ja nĩgtĩ. Ti tỹ ãg jagãgtãn hã vè. Topê tóg Abraão krẽ kar ag mỹ vin sór mũ, ã tỹ nén tó ja ãn. Ti pi(jé) Judeu jykre han mũ ag tãvĩ mỹ vin sór mũ'. ù tỹ Abraão ri ke Topê ki ge mũ ag mỹ tóg vin sór mũ gé, Topê ti. ãg kar jóg'jóg ve vỹ tỹ ti nĩ, Abraão ti.

17-18 Topê hã ne ti mỹ: “ã krẽ tỹ sóg povo e hyn han ke mũ,” he ja nĩ', hã kỹ tóg tỹ ãg kar jóg'jóg ve pẽ nĩ. Rán kỹ ti nĩ, Topê vĩ rán ki. Kỹ tóg ti vĩ tag kri fi ja nĩgtĩ, Abraão ti, ã tỹ gĩr ve vãnh nĩ ra, ti kófa nĩn kỹ. ùn ter mũ ag rĩnrĩr mãn han ki kanhró tóg nĩ, Topê ti. Kỹ tóg nén kar han ki kanhró nĩgtĩ gé. Nén ù tóg tũ tĩ ver, hã ra Topê tóg nén ù kar han tĩ, ã vĩ tỹ. Hã kỹ tóg Abraão mỹ ti kósin ke tó ja nĩgtĩ gé. Kỹ Abraão tóg ti vĩ kri fi ja nĩgtĩ. Ver tóg kósin ja tũ nĩ, ã kófa nĩ ra, hã ra tóg Topê vĩ kri fi ja nĩgtĩ, Topê tỹ ti mỹ: “ã krẽ tỹ sóg povo e hyn han ke mũ,” he ja tag to.

19-20 Topê tỹ ti mỹ tag tó kỹ tóg 100 (ke) anos pêtẽm, Abraão ti. Si há ti nĩ ja nĩgtĩ, ti prũ tỹ Sara fi ke gé. Gĩr han vãnh fag nỹtĩ, ãn kã. ãn hã kã Topê tóg ti mỹ ti krẽ e hyn han ke tó ja nĩgtĩ. Kỹ tóg ti vĩ kri fi ja nĩgtĩ, to krónh ke tũ ja tóg nĩgtĩ. “Hỹ mỹ vỹ?” he ja tũ ti nĩgtĩ, Topê vĩ tag to. Ti vĩ kri fi kỹ tóg Topê to: “ùn mág vỹ tỹ

ti nĩ," he ja nĩgtĩ.

²¹ "Topẽ vỹ ã tỹ nén tó ja han ki kanhró nĩ," he ja ti nĩ, Abraão ti, to krónh ke tũ nĩn kỹ.

²² Tag hã tugnĩn tóg Topẽ mỹ tỹ ùn há nĩ, ti tỹ ã fe tỹ ti ki rãn kỹ.

²³ Topẽ vĩ tó tĩ ù tóg Abraão to rán ja nĩ, Topẽ vĩ rãn ki, ti tỹ Topẽ mỹ tỹ ùn há nĩ ti.

²⁴ Hã ra tóg ãg to rán ja nĩ gé. Topẽ mỹ ãg tóg tỹ ùn há nỹtĩnh ke mũ gé, Abraão ri ke, ãg tỹ ti ki ge kỹ. Hã kỹ tóg ãg Senhor tỹ Jesus rĩn mãn ja nĩgtĩ, ti ter ja tá.

²⁵ ãg jagfy tóg ter ja nĩ, Jesus ti, ti tỹ ãg tỹ Topẽ vĩ mranh tỹ tũg' he jé. Hã jé Topẽ tóg ti fẽg ja nĩ. Kỹ tóg ti rĩn mãn ja nĩ gé, ti tỹ ãg mỹ vẽn h pãte fón jé, ãg tỹ ti vĩ mranh ja ti.

5

Topẽ tỹ ãg to jũ mãn ke tũ

¹ Kỹ tóg ãg mỹ vẽn h pãte fón mũ sir, ãg tỹ Jesus Cristo ki ge kỹ nỹtĩn kỹ. Kỹ ãg tóg jatun mỹ nỹtĩ, Topẽ tỹ ãg to jũ mãn tũ nĩn kỹ, ãg Senhor tỹ Jesus Cristo tũgrĩn.

² Ti hã tugnĩn Topẽ tóg ãg jagãgtãn tĩ. Tag tũgrĩn ãg tar nỹtĩ sir. Kỹ tóg ãg mỹ sér tĩ gé. Topẽ vỹ ãg tỹ ùn mág han ke mũ, ti tỹ tỹ ùn mág nĩ ãn ri ke han jé tóg ke mũ, kỹ tóg ãg mỹ sér tĩnh mũ sir.

³ Ver ãg tóg ti jagy vég tũ, tag ki. Hã ra tóg ãg mỹ sér tĩ gé, ãg tỹ ti jagy vég mũ ra. ãg tỹ ti jagy vég mũ tag ne ãg tar han ke mũ', komẽr hã.

⁴ ãg tar nỹtĩn kỹ ãg ti tovãnh sór tũ nĩ ki kanhró nỹtĩ sir. ãg tỹ ti tovãnh sór tũ nỹtĩn kỹ ãg tóg Topẽ tỹ ãg mỹ nén tó ja kar venh ke mũ, ti tỹ ãg mỹ nén ù há ven ke ãn ti, tá.

⁵ ãg pi(jé) venh ke tũ nĩ', Topẽ tỹ nén tó ja ãn ti. ãg mỹ tóg ãg kuprĩg jẽnẽ huri, ti tỹ tỹ ãg jagrẽ nĩ jé. ãg jagrẽ tag vỹ ãg mỹ: "Topẽ vỹ ã to há nĩ," he tĩ. Ti hã tũgrĩn ãg ki kanhró nỹtĩ, ãg tỹ Topẽ tỹ ãg mỹ nén tó ja ãn venh ke ki.

⁶ Jykre pãno ãg nỹtĩ, krój ãg nỹtĩ. ãg tỹ ver kórég nỹtĩ ãn kã Cristo ne ãg jagfy ter ja nĩgtĩ'.

⁷ Ti jãvo ãg kã ù tóg ãg jagfy ter ke tũ nĩ. ùn jykre há jagfy ter ke tũ ãg nỹtĩ.

⁸ ãg jãvo Cristo vỹ ãg jagfy ter ja nĩ, ãg tỹ tỹ Topẽ vĩ mranh jafã nỹtĩ ra. Hã ki ãg ki kanhró nỹtĩ, Topẽ tỹ ãg to há tãvĩ nĩ ti.

⁹ Kỹ Topẽ tóg ãg mỹ vẽn h pãte fón mũ sir, Jesus tỹ ãg jagfy ter ja tugnĩn, ti kyvẽn h tũgrĩn. Kỹ tóg Topẽ tỹ vẽn h kar to jũnh ke kurã ãn ki ãg kren han ke mũ gé, ha mẽ.

¹⁰ ãg tỹ ver ti kato tẽ nỹtĩ ra Topẽ kósin tóg ãg jagfy ter, kỹ Topẽ tóg ãg to há nĩ, ãg to jũ mãn tũ ti nĩ. Kỹ tóg ãg to há nĩ ha. Kỹ tóg kurã ãn kã ãg kren han ke mũ gé, ti rĩr jẽn kỹ, ti kósin ti.

¹¹ Kurã ãn kã tóg ãg kren han ke mũ, hã ra tóg ùri ãg to há nĩ gé, kỹ tóg ãg mỹ sér tĩ. ãg Senhor tỹ Jesus Cristo tũgrĩn ke vẽ. Ti hã ne Topẽ tỹ ãg to há nĩnh ke han'. Ti hã ne Topẽ tỹ ãg to jũ tỹ tũ' he mũ'.

Adão vỹ Topě vỹ mranh vén, Jesus vỹ ki króm kãn

¹² Ha vé, ùn pir vỹ Topě vỹ mranh vén, kỹ Topě vỹ mranh vỹ kã nĩ nĩ sir. Ti vỹ mranh tigrĩn tóg ter ja nĩ gé, ù tỹ ti vỹ mranh vén mũ ěn ti. Û tỹ ti vỹ mranh vén ja ěn ri ke ěg nỹtĩ, Topě vỹ mranh kãn ja ěg tóg nĩ gé, ěg tỹ tỹ ùn ve nón ke nỹtĩn kỹ. Kỹ ěg tóg kãgter kãn ke mũ gé, Topě vỹ mranh kỹ.

¹³ Topě tỹ ěg jyvěn to hã ag tóg ti vỹ mranh ja nĩgtĩ gé, hã ra ag tóg vẽn h jykre kórég to: “Topě vỹ mranh vỹ,” he ja tũ nĩ ver, ag tỹ Topě tỹ ěg jyvěn tĩ ěn mẽ ja tũ nĩn kỹ, Moisés tỹ Topě vỹ rán ja to hã.

¹⁴⁻¹⁵ Ge ra ag tóg kãgter ja nĩ, ěn to. Adão vỹ ter, ti nón ke ag vỹ kãgter, Moisés mur to hã. Adão ne Topě tỹ ti mỹ ka kaně to: “ko tũg nĩ,” he ja ěn ko ja nĩgtĩ'. Ti nón ke ag vỹ Topě vỹ mranh gé, hã ra ag pi(jé) Adão tỹ Topě vỹ mranh ja ěn ri ke hyn han ja nĩgtĩ'. Ge ra ag tóg kãgter. Kỹ ěg ùri kãgter tĩ gé, ěg tỹ ùn ve ěn nón Topě vỹ mranh kỹ.

Ûn pir tỹ Topě vỹ mranh vén ja tigrĩn ěg tóg kãgter kãn ke mũ. Ûn ve tỹ ěg jo vẽn h jykre kórég han jan hã vỹ. Ti jãvo ti nón ke ěn ti, Jesus hã vỹ ěg mỹ vẽn h jykre há nĩm ke mũ. Ti tugnĩn Topě vỹ ùn e tãvĩ jagãtãn ke mũ sir. ěg mỹ tóg nén tỹ hẽn ri ke hyn han ke mũ sir, kỹ tóg presente há tãvĩ ri ke nĩ sir, ùn pir tigrĩn, hã vỹ: Jesus Cristo, he mũ. Kỹ Jesus tỹ ěg mỹ vẽn h jykre há nĩm mũ ěn vỹ ùn ve tỹ ěg

mỹ vẽn h jykre kórég nĩm ja ěn kãfór nĩ.

¹⁶ Ûn pir tỹ Topě vỹ mranh vén ěn tugnĩn ěg kãgter kãn ke mũ. Topě vỹ mranh pir tigrĩn tóg ěg vóg kónãn kãn ke mũ. Hã ra tóg ěg mỹ presente ri ke han sór mũ ha. ěg jagãgtãn tóg tĩ, ěg tỹ ti vỹ mranh tỹ hẽn ri ke han ja ra, kỹ tóg ěg mỹ vẽn h pãte fón mũ gé sir.

¹⁷ Ûn pir tỹ Tope vỹ mranh vén ja tugnĩn ěg kar kãgter kãn ke mũ. Hã ra tóg ùn pir ù tigrĩn ěg jagãgtãn ke mũ ha, kỹ tóg ěg mỹ vẽn h pãte fón mũ. Kỹ tóg ěg kugrynh ke mũ. ěg mỹ presente ri ke han hã vỹ. Kỹ ěg tóg rĩnrĩr mãn ke mũ gé, kỹ ěg tóg tá tỹ ùn mág nỹtĩnh mũ sir, ùn pir tugnĩn, hã vỹ: Jesus Cristo, he mũ. Hã ki Jesus tỹ ěg mỹ vẽn h jykre há nĩm mũ tóg ùn ve tỹ ěg mỹ vẽn h jykre kórég nĩm ja ěn kãfór nĩ.

¹⁸ Hỹ, ùn pir tỹ Topě vỹ mranh vén ja tigrĩn Topě tóg ěg vóg kónãn kãn ke mũ sir. Ri ke ti nĩ, Jesus tỹ ěg kren han mũ ti. Ûn pir tỹ Topě vỹ ki króm kãn tugnĩn Topě tóg ěg kar jagãgtãn ke mũ sir, kỹ tóg ěg mỹ vẽn h pãte fón ke mũ, ěg kãgter mãn tũ nĩ jé, ěg kuprĩg ti.

¹⁹ Ûn pir tóg Topě vỹ han ja tũ nĩ, kỹ ěg kar vỹ Topě vỹ mranh tĩ sir, ti nón. Kar kỹ ùn pir vỹ Topě vỹ han kãn ja nĩgtĩ, kỹ Topě tóg ti tigrĩn ěg mỹ vẽn h pãte fón kãn ke mũ gé sir.

²⁰ Kỹ Topě tóg Moisés tỹ ěg jyvěn ja nĩgtĩ, hã kỹ tóg rán ja nĩ. Kỹ ěg tóg ti vỹ mẽ kỹ ěg

tỹ Topě vĩ mranh e han ja ěn ki kanhrãn mũ sir. Ěg tỹ ti vĩ mranh e tãvĩ nĩ ra Topě tóg ěg jagãgtãn kãfór han mũ gé sir,

²¹ ti tỹ ěg jykre kugrynh jé sir. Nũgme ki ěg tóg vár kãn ke mũ vễ, inferno ki, ěg tỹ Topě vĩ mranh to. Jagy ti nĩ. Hã ra Topě tóg ěg jagãgtãn kãn ke mũ, kỹ tóg ěg kugrynh ke mũ, kỹ ěg rĩr krỹg ja tũ venh ke mũ, nũgme ki vár ke tũ ěg nỹtĩ, inferno ki. Topě tỹ ěg jagãgtãn hã vễ, ěg Senhor tỹ Jesus Cristo tỹ ěg jagfy ter ja tugin ken hã vễ.

6

Jesus Cristo tỹ ěg jykre si tũg

¹ Kỹ Judeu ũ hỹn inh mỹ: “kỹn hỹn há nĩnh mũ, ěg tỹ Topě vĩ mranh kỹ,” he sór mũ. “Kỹ tóg ěg jagãgtãn kãfór han ke mũ gé, ěg tỹ mranh mág kỹ,” he sór ag hỹn mũ.

² Vó, há tũ pẻ ti nĩ. Kórég ti nĩ. Ti ki ge kỹ ěg tóg vễnh jykre tãg han tĩ, kỹ ěg jykre si tóg tũ tĩ ha, ti tỹ ěg jykre si tỹ tũ' hen kỹ.

³ Ha vé, vễnh kype kỹ ěg nỹtĩ. Batismo tag vỹ ge nĩ, ha mẽ. Ěg tỹ Cristo ki rã to ken hã vễ. Cristo vỹ ter ja nĩ. Ter kỹ tóg ěg jykre si tỹ tũ' hé.

⁴ Tũg kỹ tóg ti mrẻ vễnh kej kãkã nỹ ri ke han mũ gé, ěg jykre si ti. Kỹ Cristo vỹ rĩr mãn, ter kar kỹ, Topě tỹ ti rĩn mãn kỹ. Tar ti nĩ, Topě ti, hã kỹ tóg ti rĩn mãn. Ěg tỹ ti mrẻ rĩr mãn ri ke ti nĩ, hã vỹ: vễnh jykre tãg to tar nĩ, he mũ. Batismo to ken hã vễ.

⁵ Ěg jykre si tỹ tóg tũ' hé, ti ter kỹ, kỹ ěg jykre tãg tóg nỹ ha, ěg tỹ ti mrẻ rĩnrĩr nỹtĩn kỹ, ti rĩr mãn ěn ri ke.

⁶ Ti tỹ cruz to sa kỹ ěg jykre si tóg ti mrẻ to sa ri ke han gé, kỹ tóg tũ' he mũ, ěg tỹ ti vĩ mranh mãn tũ nĩ jé. Topě vĩ mranh jafã vỹ tỹ ěg nỹtĩ ja nĩgtĩ, hã kỹ tóg tỹ tũg' he ja nĩ, Jesus Cristo ti. Hã kỹ ěg tóg ũri Topě vĩ mranh tĩ ag ri ke tũ nỹtĩ ha.

⁷ Ěg jykre si tũg kỹ ěg tóg jykre kuryj nỹtĩ ha, ha mẽ, kỹ ěg tóg mranh sór mãn tũ nĩ ha.

⁸ Cristo vỹ ěg jykre si tỹ tũg' hé, ti ter kỹ. Kỹ tóg ěg mỹ vễnh jykre tãg han mũ gé, rĩr mãn kỹ, kỹ ěg tóg ti mrẻ jykre tãg ěn hã mũ mũnh mũ. Vễnh vỹ há to ken hã vễ.

⁹ Cristo ne rĩr mãn', ter kar kỹ. Kỹ tóg ter mãn ke tũ nĩ ha. Ũ vỹ ti tén mãn ke tũ pẻ nĩ ha.

¹⁰ Ter ja ti nĩ. Ti ter ja vỹ pir nĩ, ěg tỹ Topě vĩ mranh ěn tugin. Kỹ tóg rĩr jẻ nĩ sir, Topě mỹ, ti tỹ Topě tũ han kãn jé.

¹¹ Kỹ ti ri ke han nĩ. Topě vĩ mranh tũg nĩ, ãjag jykre si ter kỹ nỹn kỹ. Topě jykre hã han nĩ, ãjag tỹ ti tũ han kãn jé, ãjag tỹ Jesus Cristo ki ge kỹ nỹtĩn kỹ.

¹² Ěg jykre vỹ Topě vĩ mranh sór mũ, ěg jykre ter ke tag. Ěg jykre tỹ nẻn to ẻn mũ ěn han tũg nĩ, Topě vĩ mranh tũg nĩ.

¹³ Kejẻn ãjag tóg ãjag pẻn tỹ, ãjag nĩgẻ tỹ, ãjag nũnẻ tỹ, ãjag há ki nỹtĩ kar tỹ Topě vĩ mranh sór mũ. ãjag tỹ mranh

kỹ ājag tóg ājag há tỹ vĕnh jykre pāno han ja nỹtĩgtĩ, Topĕ kato tĕ ja nỹtĩgtĩ. Kỹ ke tũg nĩ. Topĕ mỹ vĕnh fĕg nĩ. Ājag jykre si ter kỹ, ājag jykre tąg nỹtĩn kỹ Topĕ mỹ vĕnh fĕg kån nĩ, ti jykre hā han sórnmĩ, ājag jykre tỹ, ājag há ki nỹtĩ kar tỹ. Ēg tỹ ti mỹ vĕnh fĕg kỹ ěg tóg ti jykre há han kån ke mũ sir.

¹⁴ Kỹ ěg tóg ũri Topĕ vĩ mranh tĩ ag ri ke tũ nỹtĩ ha, Topĕ tỹ ěg jagāgtān kỹ, ti tỹ ěg tar han kỹ. Ti tỹ ěg jyvĕn ja ěn tugnĩn tóg ěg vóg kónān ke mũ vĕ, ěg tỹ mranh kỹ, hā ra tóg ěg jagāgtān mũ ha.

Jesus Cristo tỹ ěg jykre tąg

¹⁵ Kỹ Judeu ag hỹn inh mỹ: “kỹ Topĕ vỹ ěg tỹ ti vĩ mranh mũ ra ěg vóg kónān mǎn ke tũ nĩ. Kỹ ěg hỹn jatun mỹ mranh mũ,” he sór mũ. “Ēg jagāgtān ti tĩ, hā kỹ tóg tỹ nĕn ũ tũ nĩ, ti vĩ mranh mũ ti,” he sór ag hỹn mũ. Hā tũ vĕ hā ra. Kórég ti nĩ, ěg tỹ ti vĩ mranh kỹ.

¹⁶ Ēg tỹ ũ mỹ vĕnh fĕg kỹ tóg tỹ ěg patrāo nĩ, kỹ ěg hā vỹ tỹ ti camarada nỹtĩ. Ri ke ti nĩ, ěg tỹ Topĕ vĩ mranh sór kỹ. Ti vĩ mranh jafā vỹ tỹ ěg nỹtĩ, ěn kǎ. Ēg tỹ Topĕ vĩ kri fig tĩ nĩn kỹ ěg tóg ti mỹ há nỹtĩ sir.

¹⁷ Vāsỹ ājag tóg tỹ Topĕ vĩ mranh jafā ja nỹtĩgtĩ. Hā ra ājag tóg ũri Topĕ vĩ kri fig tĩ ha, ājag fe tỹ ti ki ge kỹ. Ājag tỹ Topĕ vĩ mĕ ja ěn kri fig ājag tóg tĩ, kỹ sóg Topĕ mỹ vĩ há han tĩ, ājag to.

¹⁸ Topĕ vỹ ājag jykre kugryn, ājag tỹ tỹ ti vĩ mranh jafā tũ nỹtĩ jé, ũri. Kỹ ājag tóg

tỹ Topĕ krĕm ke nỹtĩ, ājag tỹ tỹ ti jykre kuryj mũ mũ jafā nỹtĩ jé, ũri.

¹⁹ Ājag mỹ sóg ěg tỹ tỹ ti vĩ ki króm jafā nỹtĩ tag tó mũ, comparaçāo han kỹ, ājag tỹ to ěg tỹ tỹ ũn há mỹ vĕnh fĕg ki kanhró nỹtĩ jé, hā vỹ: Topĕ, he mũ. Vāsỹ ājag tóg vĕnh jykre pāno han sór ja nỹtĩ, nĕn ũ kavĕj ti, nĕn ũ kórég kar ti. Tag han kỹ ājag tóg ũn kórég mỹ vĕnh fĕg ja nỹtĩ. ũri Topĕ mỹ vĕnh fĕg kån, ājag tỹ tỹ ti tũ nỹtĩ jé, vĕnh jykre kuryj hā han jé sir.

²⁰ Vāsỹ, ājag tỹ tỹ Topĕ vĩ mranh kỹ nỹtĩn kỹ vĕnh jykre há tóg ājag mỹ tũg ja nĩ.

²¹ Kỹ ājag ne han ja nỹtĩ, tempo ěn kǎ? Vĕnh jykre kórég tǎvĩ han ja ājag tóg nỹtĩ. Ājag tỹ ājag jykre si to jykrĕn kỹ tóg ājag mỹ'a tĩ, ũri. Vĕnh jykre tag tugnĩn ěg nũgme ki vár kån ke mũ vĕ, hā kỹ tóg ājag mỹ'a tĩ, ājag tỹ ti kórég han ja to jykrĕn kỹ.

²² ũri ājag tóg kygvar kỹ nỹtĩ, mỹr, ha mĕ, Topĕ vĩ mranh ja ěn tỹ tóg tũg' he ja nĩ. Topĕ mỹ ājag vĕnh fĕg kỹ nỹtĩ. Ājag tỹ nĕn han mũ vỹ tỹ ti tũ nĩ, ti jykre kuryj, kỹ ājag tóg ter ke tũ nĩ ha, ājag kuprĩg vỹ rĩr nĩ ha.

²³ Topĕ vĩ mranh tugrĩn ěg nũgme ki vár ke mũ vĕ. Topĕ tỹ ěg vóg kónān hā vĕ. Hā ra tóg ěg jagāgtān mũ, kỹ tóg ěg mỹ rĩr krỹg ja tũ ven ke mũ. Ti tỹ ěg mỹ presente han hā vĕ, hā vỹ: ěg tỹ ěg rĩr krỹg ja tũ venh ke, he mũ, ěg Senhor tỹ Jesus Cristo tugnĩn.

7

Vēnh prūg to comparação

¹ Inh kanhkā', Topē tȳ vāsȳ ěg mȳ vēnh jykre nīm ja ěn ki kanhró ājag tóg nȳtī, Moisés tȳ rán ja ěn ti. ěg rīr nȳtīn kȳ ěg tóg vēnh jykre ěn han kȳ nȳtī, ěg ter kȳ tóg ěg mȳ tū' he mū, vēnh jykre ěn ti.

² Rī ke ti nī gé, ěg prū fi mré. Fi mén rīr jēn kȳ fi tóg tȳ ti tū jē, fi mén tū. Ti ter kȳ fi tóg tȳ ti tū tū jē sir, ti tūg kȳ.

³ Fi mén rīr jēn kȳ fi tóg tȳ ti tū jē. Fi tȳ ti rīr tī ra ũ mré nȳ kȳ fi tóg ā mén tū mré nȳ mū. Ti ter kȳ fi tóg mén tū jē sir, kȳ, fi tȳ ũ mré tīg sór kȳ tóg sir há tī, fi mén vē sir, fi tȳ ũ mré tī mū ěn ti.

⁴ Rī ke ti nī, Topē tȳ vāsȳ ěg mȳ vēnh jykre nīm ja ěn ti. Cristo ter kȳ tóg ěg jykre si tȳ tūg' hé gé. Hā kȳ tóg ěg tȳ ti tȳ ěg jyvēn ja ěn mranh ja ra tóg ěg vóg kónān ke tū nī sir. Vāhā ěg tóg tȳ Cristo tū nȳtī ha, ũ tȳ ter kar kȳ rīr mān ja ěn tū vȳ tȳ ěg nȳtī. Kȳ ěg tóg ũri Topē jykre hā han sór mū ha, ti mȳ sér tī jé.

⁵ Vāsȳ ěg tóg ěg tȳ nén to én ja ěn hyn han tī ja nīgtī. Kȳ ěg tóg vēnh jykre kavéj han kān ja nīgtī, ěg jykre tȳ, ěg há ki nȳtī kar tȳ ke gé. ěg jykre kavéj tigrīn ěg nūgme ki vár ke mū vē. Topē tȳ ěg jyvēn mū jēmēn kȳ ěg tóg ki kanhrān mū, ěg tȳ ti vī mranh mū tag ki. Jérīn mȳ ěg tóg mranh mān', mranh mān' he mū sir.

⁶ Hā ra tóg ěg mȳ tū tī ha, ěg tȳ Topē tȳ vāsȳ ěg jyvēn jēmēg mū ra mranh mū ti, Cristo tȳ

ter kȳ ěg jykre si tȳ tūg' hen kȳ. Topē vī mranh sór tū ěg nȳtī ha. ěg kygvān ti huri, kȳ ěg tóg Topē tū hā han tī sir, Topē kuprīg tȳ ěg krīn kȳ. Kȳ ěg tóg Topē tȳ ěg jyvēn to kanē jur han mān ke tū nī ha. Ki króm sór ěg nȳtī ha. ěg kanē jur pijé'. Topē kuprīg tȳ ěg mȳ vēnh jykre tāg nīm jan hā vē.

Vēnh jykre kórég han kȳ ěg Topē vī mranh tī

⁷ Kȳ Judeu ag hȳn inh mȳ: “kȳ Topē tȳ vāsȳ ěg jyvēn mū ěn mȳ kórég nī?” he sór mū. Vó, kórég tū ti nī. ěg jyvēn ja tóg nīgtī, kȳ ěg tóg ti vī mē kȳ: “vēnh jykre kórég han kȳ inh hȳn tóg ti vī mranh tī,” he tī. Topē vȳ ěg mȳ: “nén ũ to én tūg nī,” he ja nī. Tag jēmēn kȳ ěg tóg ũ tū to én tag tȳ Topē vī mranh nī ki kanhró nȳtī.

⁸ Topē tȳ ěg jyvēn mū ra ěg tóg ti vī mranh sór mūgtī, Jérīn mȳ. Ti tȳ ěg mȳ: “tag han tūg ra,” he mū ra ěg tóg han sór tī, hā kȳ ěg tóg ũ tū to én sór tī. Topē tȳ ěg jyvēn tū ra ěg ki kanhrān ke tū nī vē, vēnh jykre pāno tȳ ti vī mranh nīn ki.

⁹ Vāsȳ ěg tóg Topē tȳ ěg jyvēn mū ěn mēg tū ja nȳtīgtī. Véké ěg tóg mū ja nȳtīgtī, jatun mȳ. Kȳ tóg vāhā ěg mȳ ā vī jēnē ja nī, Topē ti, ěg jyvēn kȳ. ěn mē kȳ ěg tóg ěg tȳ ti vī mranh ja ěn ki kanhrān ja nȳtīgtī, ěg tȳ to nūgme ki vár ke mū mré hā. Kȳ ěg tóg kanē jur nȳtī ha.

¹⁰ Topē vȳ tóg ěg jyvēn, ěg tȳ nūgme ki vár ke tū nȳtī jé. Jérīn mȳ ěg tóg ki vár ke mū,

ĕg tỹ ti tỹ ĕg jyvĕn kri fig tũ nĩn kỹ. Hã ve ĕg tóg, ĕg tỹ ti tỹ ĕg jyvĕn mẽ kỹ.

¹¹ Ēg tỹ Topĕ vĩ mranh kỹ ĕg tóg Topĕ tỹ ĕg jyvĕn mũ kato tĕ mũ. Kỹ ĕg nũgme ki vár ke mũ sir, ĕg tỹ: “ti hỹn tỹ nén ũ tũ nĩ, sỹ ti vĩ mranh mũ ti,” he mũ ra.

¹² Hã kỹ Topĕ tỹ vãsỹ ĕg jyvĕn mũ ĕn vỹ há nĩ, ti tỹ tỹ Topĕ tũ nĩn kỹ. Kỹ Topĕ tỹ vãsỹ ĕg mỹ vĕnh jykre nĩm ja ĕn vỹ kuryj nĩ gé. Há ti nĩ, Topĕ tũ vỹ tỹ ti nĩ gé.

¹³ Kỹ Judeu ag hỹn inh mỹ: “ĕg mỹ vĕnh jykre há tugnĩn nũgme ki vár ke mũ?” he sór mũ. Vó, ke tũ vĕ. Topĕ vĩ mranh tigrĩn ĕg nũgme ki vár ke mũ. Nén ũ há ja vĕ, Topĕ tỹ ĕg jyvĕn ja ti, hã ra ĕg tóg mranh. Ēg tỹ Topĕ tỹ ĕg jyvĕn mẽ kỹ ĕg tóg ĕg jykre kórég to: “ti vĩ mranh ja inh nĩgtĩ,” he tĩ. Hã ki ĕg tóg ki kanhrãn mũ, ĕg tỹ Topĕ vĩ mranh tag tỹ tỹ nén ũ kórég tãvĩ nĩn ki.

¹⁴ Topĕ tỹ ĕg jyvĕn mũ ĕn vỹ tỹ ti tũ nĩ, ti kuprĩg vỹ to ĕg kanhrãn tĩ. Jérĩn mỹ ĕg tóg ĕg tỹ nén to ĕn mũ ĕn han sór tĩ, ĕg krój nỹtĩn kỹ. Ti vĩ mranh kỹ ĕg tóg tỹ ti vĩ mranh jafã nỹtĩ.

Ēg tỹ ti kórég han sór tũ ra ĕg tóg han tĩ

¹⁵ Ēg jykre tóg inh mỹ e tĩ. Sỹ nén to há ĕn han tũ sóg nĩgtĩ. Sỹ nén to há tũ ĕn hã han sóg tĩ mỹr, kỹ tóg inh mỹ e tĩ.

¹⁶ Ēg tỹ ti kórég han sór tũ ra ĕg tóg han tĩ. Ti vĩ mranh mũ vỹ ĕg mỹ kórég nĩ, kỹ ĕg tóg

ki kanhró nỹtĩ, ti tỹ ĕg jyvĕn há han ja ĕn ki. Ge ra ĕg tóg mranh tĩ.

¹⁷ Ēg jykre si hã vĕ. Ēg tỹ ĕg jykre si tovãnh kãn ja tũ nĩn kỹ ĕg tóg ti vĩ mranh tĩ, ĕg tỹ mranh sór tũ (hã) ra. Ēg jykre tãg tũ vĕ, tag ti.

¹⁸ Ēg pi(jé) vĕnh jykre há to tar nỹtĩ¹. Vĕnh jykre kórég vỹ ver ĕg kãkã nĩ nĩ. Vĕnh jykre kuryj tóg ĕg mỹ sér tĩ, ge ra ĕg tóg ti pãno han tĩ, ĕg tỹ ũn há han sór mũ ra.

¹⁹ Hã kỹ ĕg pi(jé) vĕnh jykre há han tĩ', ĕg tỹ han sór mũ ra'. Ti kórég hã han ĕg tĩ, ĕg tỹ han sór tũ ra.

²⁰ Ēg tỹ nén han sór tũ ĕn han ĕg tóg tĩ, vĕnh vatánh tá. Ēg jykre si hã tigrĩn ĕg tóg Topĕ vĩ mranh tĩ, ĕg tỹ tovãnh kãn ja tũ nĩn kỹ.

²¹ Ha vé, ĕg jykre ti. ũn há hã han sór ĕg tóg mũgtĩ. Ge ra ĕg tóg ũn kórég hã han tĩ, ĕg jykre si tỹ ĕg kãkã nĩn kỹ.

²² Ēg tỹ to jykren há han kỹ ĕg tóg: “Topĕ tỹ ĕg jyvĕn mũ vỹ há nĩ,” he ti. Ēg mỹ tóg sér tĩ.

²³ Ēg tỹ hã ra ĕg jykre to jykren kỹ ĕg tóg vĕnh jykre kórég hã han mũgtĩ ver, vĕnh vatánh tá. Kỹ ĕg tóg sir vĕnh jykre há kato tĕ mũ, ĕg tỹ vĕnh jykre kórég han kỹ, vĕnh jykre há tỹ ĕg mỹ há nĩ (hã) ra. Ti vĩ mranh jafã vỹ tỹ ĕg nỹtĩ, ĕg tỹ Topĕ vĩ mranh to ĕn kỹ, ĕg tỹ to ĕn sór tũ ra. Ēg kãkã tóg nĩ nĩ, vĕnh jykre kórég ti.

²⁴⁻²⁵ Ēg tỹ to jykren há han kỹ Topĕ tỹ ĕg jyvĕn tĩ ĕn tóg ĕg mỹ há tĩ, kỹ ĕg tóg han sór

mũ. Ge ra ěg tóg ti vĩ mranh ja nĩgtĩ, kũ ěg tóg mranh mǎn', mranh mǎn' he tĩ sir, ěg tũ mranh sór tũ ra.

Jagy pẽ ti nĩ. Kórég ěg nỹtĩ, ěg tũ ĩn há han ki kagtĩg nỹtĩn kũ. Nũgme ki vár kǎn jé ěg tóg ke mũ mỹr. Ũ nỹ hỹn ěg kren han ki kanhró nĩ, vẽn jykre kórég tag to? Ěg Senhor tũ Jesus Cristo hǎ vẽ. Ti hǎ vỹ ěg kren han mũ. Kũ ěg tóg Topẽ mỹ: “há ti nĩ, ǎ kósin tũ ěg kren han mũ ti,” he tĩ. Hǎ kũ ěg tóg vėsóg ki ěg jykre si tũ tũg' he ki kagtĩg nỹtĩ. Jesus hǎ tugnĩn Topẽ tóg ěg mỹ vẽn pǎte fón tĩ, kũ ěg tóg ti mỹ há nỹtĩ.

8

Topẽ kuprĩg tũ ěg jagrẽ

¹ Kũ tóg, ěg tũ Jesus Cristo ki rǎ kũ Topẽ tóg ěg vóg kónǎn mǎn ke tũ nĩ ha.

² Vẽn jykre tǎg vỹ ěg kǎkǎ nĩ ha, Topẽ kuprĩg tugrĩn, ěg tũ Jesus Cristo ki ge kũ nỹtĩn kũ. Ti tũ tũ ěg jagrẽ nĩn kũ ěg rĩnrĩr nỹtĩ, kũ ěg kygvar kũ nỹtĩ sir, Topẽ vĩ mranh jan ki. Nũgme ki vár ke tũ ěg nỹtĩ ha.

³ Topẽ tũ vǎsỹ ěg jyvẽn mũ ra ěg krenkren ja tũ nĩ ver, ěg tũ ki króm kǎn ja tũ nĩn kũ, ěg krónhkrój nỹtĩn kũ. Hǎ kũ Topẽ tóg ǎ kósin jẽnẽ ja nĩ. Ũ tũ Topẽ vĩ mranh jafǎ ri ke tóg mur, ěg ri ke, hǎ ra tóg mranh ja tũ nĩ inhǎ. Kũ tóg ěg jagfy ter ja nĩ, ěg hǎ tũ ti vĩ mranh ja tugrĩn. Topẽ tũ ti vóg kónǎn hǎ vẽ, ěg nỹtĩg ja ki.

⁴ Vǎhǎ ěg tóg Topẽ tũ vǎsỹ ěg jyvẽn mũ ĩn ki króm há nỹtĩ, Topẽ kuprĩg tũ tũ ěg jagrẽ nĩn

kũ. Kũ ěg tóg ěg tũ nén to ĩn mũ ĩn han mǎn ke tũ nỹtĩ sir, ěg jagrẽ há tũ ěg tar han mũ tugnĩn.

⁵ Ěg tũ ěg tũ nén to ĩn mũ ĩn han sór kũ ěg tóg tũ Topẽ vĩ mranh jafǎ nỹtĩ. Ěg tũ hǎ ra Topẽ kuprĩg tũ jagrẽ nĩn kũ ěg tóg ti hǎ tũ ěg mỹ nén tó mũ ĩn han tĩ.

⁶ Ěg tũ nén to ĩn mũ ĩn han kũ ěg nũgme ki vár ke mũ vẽ. Ěg tũ Topẽ kuprĩg tũ ěg mỹ nén tó mũ ĩn han kũ ěg tóg vẽn jykre tǎg han kũ nỹtĩ, kũ ěg jatun mỹ mũgtĩ sir.

⁷ Ũ tũ ěg tũ nén to ĩn mũ ĩn han kũ tóg Topẽ kato tẽ mũ sir. Ti pi(jé) Topẽ jykre han tĩ'. Han ki kagtĩg tóg nĩgtĩ. Ěg jykre sin hǎ vẽ.

⁸ Ũ tũ ěg tũ nén to ĩn mũ ĩn han to tóg kórég nĩ, Topẽ ti.

⁹ Ag jǎvo ǎjag tóg Topẽ kuprĩg tũ ǎjag mỹ nén tó mũ ĩn hǎ han tĩ. Ěg tũ nén to ĩn mũ ĩn han vǎnh ǎjag nỹtĩ, Topẽ kuprĩg tũ tũ ǎjag jagrẽ nĩn kũ. Ũ tũ Cristo kuprĩg tũ jagrẽ tũ nĩ ĩn pi(jé) tũ ti tũ nĩ'.

¹⁰ Cristo tũ vỹ tũ ěg nỹtĩ, kũ tóg ěg kǎkǎ jẽ nĩ, Jesus Cristo ti, ǎ kuprĩg tũ. Kũ ěg há vỹ ter ke mũ, ěg tũ Topẽ vĩ mranh jan kũ. Hǎ ra ěg tóg ěg rĩr krỹg ja tũ venh ke mũ, Topẽ tũ ěg mỹ vẽn pǎte fón ja nĩn kũ.

¹¹ Topẽ kuprĩg vỹ tũ ěg jagrẽ jẽ ha. Topẽ vỹ Jesus rĩn mǎn, ti ter kar kũ. Ti tũ Jesus rĩn mǎn kũ tóg ěg há ter ke tag rĩn mǎn ki kanhró nĩ gé, ěg mỹ ěg há tǎg han kũ, ti kuprĩg tũ tũ ěg jagrẽ nĩn kũ.

12 Inh kanhkā', Topē tũ vỹ tỹ ěg nỹtĩ ha, ěg tỹ ti jykre hã han jé. Kỹ han tũg nĩ, ãjag tỹ nén to én mũ ti.

13 Ěg tỹ nén to én mũ ěn han kỹ ěg nũgme ki vár ke mũ. Topē tỹ ěg jagrẽ vỹ ěg tỹ nén to én mũ tag tỹ tũg' he sór mũ. Ěg tỹ ti mré tỹ tũg' hen kỹ ěg vẽn h jykre tãg han kỹ nỹtĩnh mũ.

14 Ěg tỹ Topē kuprĩg tỹ ěg mỹ nén tó tĩ ěn han kỹ ěg tóg tỹ Topē krẽ nỹtĩ, Jesus jãvy ěg nỹtĩ mỹr, ha mẽ.

15 Ěg tỹ tỹ Jesus jãvy nỹtĩnh kỹ ti pi(jé) ěg kanẽ jun ke mũ'. Ti kuprĩg vỹ tỹ ěg jagrẽ nĩ, kỹ ěg tóg tỹ Jesus jãvy nỹtĩ ha. Topē pi(jé) tỹ ěg patrão kórég ri ke nĩ'. Tỹ tóg ěg panh nĩ ha. Hã kỹ ěg tóg ti mỹ: "Aba," he tĩ, hã vỹ: "ěg jóg," he mũ, ěg vỹ ki. Ěg jagrẽ hã jamẽn kỹ ěg tóg ti mỹ: "ěg jóg mág," he tĩ.

16 Topē kuprĩg hã ne ěg mỹ tó tĩ', ěg tỹ tỹ Topē krẽ nỹtĩ ti, Jesus jãvy. Hã kỹ ěg ki kanhró nỹtĩ.

17 Ěg tỹ tỹ ti krẽ nỹtĩnh kỹ tóg ěg mỹ ã tũ nĩm kãn ke mũ gé, Topē ti. Jesus Cristo hã mỹ tóg nĩm kãn ke mũ, kỹ tóg ěg mỹ nĩm kãn ke mũ gé sir, ěg kãke mré. Hã jé ěg tóg ti mré jagãgtar ke mũ gé, ti tỹ vẽn h jykre há to jagtar ja ěn ri ke. Kỹ ěg tóg ti mré tỹ ùn mág nỹtĩnh ke mũ gé, ěg jagtar kar kỹ.

Kanhkã ve jé ěg tóg ke mũ

18 Ha vé, tag ki kanhró sóg nĩ, ha mẽ. Kanhkã tá tóg sér pẽ tĩnh mũ. Tá ěg tóg tỹ ùn mág nỹtĩnh mũ. Kỹ ěg tỹ ùri

ti tugnĩn jagãgtar mũ tag vỹ tỹ ěg mỹ nén ù tũ pẽ nĩgtĩ, ěg tỹ tỹ ùn mág nĩnh ke to jykren kỹ.

19 Topē vỹ ã krẽ tỹ tỹ ùn mág han ke mũ. Kỹ Topē tỹ ùn han mũ kar ag tóg tag hã ve sór mũ gé, bicho kar, ka kar, ěkré kar ke gé, nén kar ti.

20 Nén kar vỹ jagãgtar nỹtĩ, ùn ve tỹ Topē vỹ mranh tugrĩn. Vẽn h kókén ja tũ ti nĩ, Topē vỹ mranh ja tũ ti nĩ, hã ra tóg ùn ve tỹ Topē vỹ mranh ja tugnĩn jagtar nỹtĩ, Topē tỹ ěg mré ti vóg kónãn kỹ, nén kar ti.

21 Hã ra Topē tóg ã tỹ ùn han mũ kar ag mỹ: "kejẽn ãjag jagtar mãn ke tũ nỹtĩ ha," he ja nĩ. Kỹ Topē tỹ Jesus jãvy ag tỹ ùn mág hyn han ke kurã ěn kã tóg nén kar tỹ há' hen h ke mũ gé, kỹ tóg tũg mãn ke tũ nĩ ha, nén kar ti. Nén kar vỹ há nỹtĩnh mũ, Jesus jãvy há nỹtĩnh ke ěn ri ke.

22 Ver tóg Topē tỹ ùn han mũ kar ag mỹ jagy tĩ, kỹ tóg fag tỹ fag kósin mãn kỹ fag vẽnhrẽr ěn ri ke han tĩ, Topē tỹ ùn han kar ti, ti jagãgtar nỹtĩnh kỹ.

23 Nén ù kar tag vẽnhrẽr ri ke han ěg tóg tĩ gé, ěg tỹ ti jagy ven kỹ, ěg tỹ ti kuprĩg tỹ jagre nỹtĩ ra. Ěg jagrẽ to ěg tóg ki kanhró nỹtĩ, ěg tỹ tá tỹ ùn mág nỹtĩnh ke ti. Ge ra tóg ver ěg mỹ jagy tĩ, tag ti ki, kỹ ěg tóg ti mré nỹtĩ sór mũ. Kỹ ěg tóg venh ke mũ sir, ti tỹ ã krẽ pẽ mỹ nén nĩm ke mũ ěn ti. Hã jãvãnh ěg tóg mũ. Ěn kã tóg ěg mỹ ěg fár tãg han ke mũ, ěg fár ter ke tũ ti.

24 Krenkren kỹ ěg nỹtĩ, hã

ra ěg tóg ver vég tũ nĩgtĩ, ěg krenkren kũ nĩtĩ tag, ěg fár tãg tag. Ěg tỹ venh há tóg tĩ. Hã jãvãnh ěg tóg tĩ. Ěg tỹn jãvãnh mũ ra ěg tóg ver vég tũ nĩtĩ. Ěg tỹn ve kar kũ ěg tóg ti jãvãnh mãn ke tũ nĩtĩ ha.

²⁵ Hã ra ěg tóg ver vég tũ nĩtĩ, hã kũ ěg tóg ti jãvãnh mũ ver. To krónh ke tũ ěg tóg nĩtĩ, ti jãvãnh to.

Topě kuprĩg tỹ ěg jagfy vĩ

²⁶ Hã ra Topě kuprĩg vỹ ěg tar han tĩ, ěg krój nỹtĩn kũ. Kejẽn ěg ki kagtĩg nỹtĩ, ěg tỹ ne to vĩnh ken ki, ěg tỹ Topě mré vēmén kũ. Hã kũ tóg ěg jagfy vĩ tĩ, Topě kuprĩg ti. Kejẽn ěg jẽnger mág han tĩ, ěg tỹ nén ũ to vĩnh ken ki kagtĩg nỹtĩn kũ. Hã ra tóg ěg mré vĩ tĩ gé, ěg jagfy, Topě kuprĩg ti. Ti vĩ ki kagtĩg ěg nỹtĩ, hã ra tóg ěg jagfy vĩ' vĩ' he tĩ.

²⁷ Kũ Topě vỹ ěg tỹ nén ũ to jykrén mũ kar vég tĩ. Kũ tóg ã kuprĩg tỹ nén tó mũ tag ki kanhró nĩ gé. Ti jykre vỹ ti mỹ há nĩ, ti tỹ nén to vĩ mũ ti, ěg jagfy, Topě tũ kar ag jagfy. Topě tỹ nén ũ han sór mũ ěn hã to vĩ tóg tĩ, ti kuprĩg ti.

²⁸ Ha vé, Topě to há ěg nỹtĩ, hã kũ ěg tỹ nén vég mũ kar vỹ ěg tar han ke mũ, ěg tỹ ti jagy vég mũ mré hã. Topě hã vỹ ěg ki rĩr mũ, hã kũ nén ũ kar vỹ ěg tar han ke mũ, ti tỹ ěg kuprẽg ja nĩn kũ.

²⁹ Ěg tỹ ti ki ge tũg ki tóg: “inh ki tóg rãnh ke mũ, tag,” he ja nĩ, ki kanhró nĩn kũ. Kũ tóg ěg kuprẽg ja nĩ gé, ěg tỹ ti kósin ri ke pẽ nỹtĩ jé. Ti hã vỹ

tỹ Topě kósin pẽ nĩ inhhã, ti kósin ve, kũ tóg tỹ ěg kãke nĩ gé sir, kũ ti jãvy ag, ti ve fag vỹ e tãvĩ tãvĩ nỹtĩnh mũ ha. Ěg hã vẽ sir. Topě tỹ nén to jykrén hã vẽ.

³⁰ Hã jé tóg ěg kuprẽg, kũ tóg ěg mỹ vẽnũh vĩ jẽnẽ. Ti tỹ ěg mỹ vẽnũh vĩ jẽnẽ kũ tóg ěg mỹ vẽnũh pãte fón gé. Ěg mỹ vẽnũh pãte fón kũ tóg ěg tỹ ũn mág hyn han ke mũ gé, ti mré, tá.

Topě tỹ ěg to há

³¹ Tag tóg inh mỹ e tĩ, sỹ to jykrén ke tóg inh mỹ tũ tĩ. Topě vỹ tỹ ěg mré ke nĩ mỹr. Hã kũ ěg kato tẽ ũ pi(jé) ěg tỹ hẽ ri kenh mũ ha'.

³² Topě vỹ ã kósin pir fẽg ja nĩ, ti tỹ ěg jagfy ter jé. ã kósin pir nenh ja tũ tóg nĩ, hã kũ tóg ěg mỹ nén ũ há nenh ke tũ pẽ nĩ, ti tỹ ã kósin pir nenh ja tũ nĩn kũ.

³³ Topě tỹ ěg kuprẽg kũ tóg ũ tỹ ěg kato vĩ sór mũ ra tóg ag mỹ vẽnũhmỹ tĩ. Topě hã ne ěg mỹ vẽnũh pãte fón ja nĩgtĩ'.

³⁴ Kũ ũ ag tỹ ěg to: “kórég ag nỹtĩ,” he mũ ra ěg tóg Topě mỹ há nỹtĩ. Jesus Cristo hã tóg ter ja nĩ, ěg jagfy, kũ tóg rĩr mãn ja nĩ gé. Topě pẽgja tá tóg nĩ nĩ, ti rã hã, kũ tóg ěg jagfy vĩ tĩ.

³⁵ Kũ ũ pi(jé) Cristo tỹ ěg to jũ han ki kanhró nĩ'. Ti fe vỹ tỹ ěg nỹtĩ. Kejẽn ěg tóg nén ũ jagy venh ke mũ, ti tu-grĩn. Kejẽn ěg kanẽ jur ke mũ. Kejẽn ag tóg ěg vóg kónãn ke mũ. Kejẽn ěg tóg kókĩnkĩr ke mũ. Kejẽn ěg tóg kur venh ke tũ nĩ gé. Kejẽn ěg tóg kãgter kren ke mũ. Kejẽn ag tóg ěg kãmĩ ũ tén ke mũ. Jérĩn mỹ ěg

tóg Cristo tovānh ke tũ nĩ. Kĩ tóg ěg tovānh ke tũ nĩ gé, Jesus Cristo ti. Ěg to há nĩn kũ tóg nĩ nĩ.

³⁶Kejěn ěg tóg ti jagy tag vég tĩ, hã kũ tóg rán kũ nĩ, ha mě: “ěg tỹ ā to há nỹtĩ tugnĩn ag tóg ěg tén sór tĩ, kurā kar ki. Ag mỹ ěg tóg carneiro ri ke nỹtĩ. Carneiro tānh ěg tóg tĩ, ěg tỹ ko jé. Věnh měg ri ke ěg nỹtĩ, ag mỹ, ěg tỹ ā to há nỹtĩ tugrĩn,” he ja tóg nĩ, Topě vĩ rá ki. Hã ra tóg ge nĩ.

³⁷Hã ra tóg tỹ nén ũ tũ nĩ, ěg mỹ. Ti hã ne ěg tar han tĩ', ũ tỹ ěg to há tãvĩ nĩ tĩ. Hã kũ tóg ěg mỹ sér tĩ, ěg tỹ nén jagy vég mũ ra, ti tugrĩn.

³⁸Ha vé, tag ki kanhró sóg nĩ, ha mě. Nén ũ pi(jé) Topě tỹ ěg to há nĩ tag tỹ tũg' henh mũ', ha mě. Ěg ter mũ ra tóg ěg to há nĩ, ěg ter tũ ra ke gé. Topě tỹ jěně jafā ag vỹ Topě tỹ ěg kato tě han ki kagtĩg nỹtĩ gé. Japo ag vỹ ti tỹ ěg kato tě han ke tũ nĩ gé, ag tỹ han sór mũ ra. Pā'i kar ag vỹ tag han ki kagtĩg nỹtĩ gé. Ěg tỹ ũri nén ũ jagy vég mũ ra ěg tóg ti tovānh ke tũ nĩ, kũ tóg ěg to jũnh ke tũ nĩ gé, ěg tỹ kejěn nén ũ jagy tãvĩ vég mũ ra.

³⁹Kanhkā tãn ag vỹ ti tỹ ěg to jũ han ke tũ nĩ gé, nũgme tãn ag ke gé, ag tỹ ti tỹ ěg to jũ han sór mũ ra. Topě tỹ nén hyn han ja kar vỹ ti tỹ ěg to jũ (jé) han ke tũ pě nĩ. Ěg to há nĩ kũ tóg nĩ nĩ, ěg tỹ ěg Senhor tỹ Jesus Cristo ki ge kũ nỹtĩn kũ.

9

Topě tỹ Judeu ag kuprěg

¹Nén ũ tó sór inh mũ gé, ha mě. Cristo vỹ ki kanhró nĩ, sỹ tónh ke mũ tag. Sỹ ki hã ke vē, ón tũ sóg nĩgtĩ, kũ Topě kuprĩg vỹ inh mỹ: “ki hã ā tóg tó,” he tĩ gé.

²⁻³Ha mě, inh mré ke ag to sóg fe kaj tãvĩ nĩ, Judeu ag to, ag tỹ Jesus kato těn kũ. Fỹ sóg tĩ, sỹ ag mĩ ěkrén kũ, inh mỹ tóg věnh kaga jagy ri ke nĩ, ha mě. Kũ, Topě tỹ ag jagfy inh kato tě ra tóg inh mỹ há tĩ vē, Jesus tỹ ěg jagfy ter ri ke, ag tỹ ti ki ge jé. Ti tỹ ag jagfy isỹ Cristo mré ke tũ han ra tóg inh mỹ há tĩ vē. Tỹ ag tóg inh kanhkā pě nỹtĩ,

⁴isỹ tỹ ag mré Israel krě nĩn kũ. Tỹ ag tóg Topě krě ja nỹtĩ vē, kũ tóg ag mỹ ā jykre tar ven ja nĩ gé. Ag mré věnh jykre tỹ hěn ri ke han ja tóg nĩgtĩ, ag jyvěn ja tóg nĩgtĩ gé, kũ ti vĩ tó tĩ ag vỹ rán ja nĩgtĩ gé, Topě vĩ ti. Ti jo ĩn pě han ja ag tóg nĩgtĩ, Jerusalém tá, krěm nén ũ kar pũn jafā. Ag mỹ tóg ā tỹ nén han ke ti kāmén ja nĩgtĩ.

⁵Ěg jóg'jóg ve ag, ũ tỹ vāsỹ Topě mré věmén tĩ ag vỹ ag jóg'jóg ve nỹtĩ gé, kũ Cristo vỹ tỹ ag kã ũ nĩ gé, ag kanhkā, ti tỹ ga kri tĩg kũ. Ěg kri ke kar vē, Cristo ti, Topě ti. Ti hã mỹ ěg vĩ há han ke mũ, to ěg krónh ke vānh nỹtĩ, ga kri, kanhkā tá ke gé, ti mỹ vĩ há han to. Amém.

⁶Jesus kato tě ag tóg nỹtĩ ha, Israel ag, Topě tỹ ag jyvěn ja ra. Hã kũ tóg Topě tỹ ag mỹ tó há han ja tũ nĩ ve nĩ. Hã tũ vē hã ra. Ag hã ne to jykrén

há han ja tũ nĩ', ti tỹ ag mỹ tó há han ja ra. Ęg tỹ to jykrén há han kỹ ěg Israel ag jykre ki kanhrān mũ, ha mẽ: Israel krē ũ tóg tỹ Topē krē pē tũ nỹtĩ, ha mẽ.

⁷ Hã ra ag tóg: “Abraão vỹ tỹ ěg jóg'jóg ve nĩ,” he tĩ, “hã kỹ ěg tóg tỹ Topē krē nỹtĩ, Abraão tugnĩn,” he ag tóg tĩ. Kygnē kỹ ag tóg tag tó tĩ, ha mẽ. Topē tóg Abraão mỹ: “ã kósin tỹ Isaque krē vỹ tỹ ã krē pē nỹtĩnh mũ,” he ja nĩ.

⁸ Hã ra Abraão vỹ krē e han ja nĩgtĩ, kósin pir tũ ti nĩ. Hã kỹ Abraão krē ũ vỹ tỹ Topē krē tũ nỹtĩ, Abraão tỹ ag han ja ra. Ũ tỹ Topē ki ge kỹ nỹtĩ ag hã vỹ tỹ Topē krē nỹtĩ, Topē tỹ ũn kuprēg ja ag.

⁹ Topē vỹ Abraão mỹ: “prỹg tũg kỹ sóg ã venh kãtĩg mǎn ke mũ, kỹ Sara fi kósin vỹ kã nỹnh mũ sir, ha vemnĩ,” he ja nĩ. Topē tỹ Abraão mỹ Isaque mur ke tó jan hã vë, ti tỹ Isaque hã kuprēg jan kỹ.

¹⁰ Kỹ tóg ge nĩ gé, ěg tỹ Rebeca fi krē to jykrén kỹ, Isaque prũ fi. Krē vëgni han ja fi nĩ, kỹ ag tóg tỹ ěg jóg tỹ Isaque krē kar nỹtĩ, ũn vëgni ja ag.

¹¹⁻¹² Kỹ ag mur tũg ki, ag tỹ ver nén ũ han tũg ki Topē tóg ag mỹnh fi mỹ: “ũn mur vén ke mũ vỹ tỹ ũ tỹ ti nón mur ke mũ ěn krēm ke jënh ke mũ, ha vemnĩ,” he ja nĩ. Topē tỹ fi mỹ tó kã ag tóg nén ũ há mré nén ũ kórég han ja tũ nĩ ver. Ag mur tũg ki ke ja vë. Topē tỹ ěg mỹ ã jykre ven sór ja vë, hã kỹ tóg ag mur tũg ki tag tó

ja nĩ. Ā tỹ nén to jykrén mũ ěn han ti tĩ, Topē ti. Kỹ tóg ã tỹ ũn kuprēg sór mũ ěn hã kuprēg tĩ gé, ag tỹ ver nén ũ han tũg ki.

¹³ Hã kỹ tag tóg rán kỹ nĩ gé, Rebeca fi krē ěn ag to, ha mẽ: “Jacó to inh há nĩ, hã ra sóg ti jo mur ja tỹ Esaú to kórég nĩ,” he ja tóg nĩ, Topē vỹ rán ki.

¹⁴ Kỹ Judeu ag hỹn inh mỹ: “Topē jykre vỹ há tũ nĩ,” he sór mũ. “Kuryj tũ ti nĩ, ti tỹ vësóg ki nén to jykrén sór kỹ, ti tỹ ũn kuprēg mũ ěn to,” he ag hỹn tĩ. Hã tũ vë hã ra.

¹⁵ Hã kỹ tóg Moisés mỹ: “isỹ ũn jagãgtǎn sór mũ ěn hã jagãgtǎn jé sóg ke mũ,” he ja nĩ, Topē ti.

¹⁶ Ęg tỹ to vāsān tũ vë, ěg tỹ to tar nĩnh ke tũ vë. Topē tỹ vësóg ki ěg jagãgtǎn hã vë.

¹⁷ Hã kỹ ga tỹ Egito tá pã'i tỹ Faraó to tag tóg rán kỹ nĩ gé, ha mẽ. “Ũn tar vỹ tỹ inh nĩ,” he ja ti nĩ, Topē ti, Faraó mỹ. “Ā tỹ sóg ũn tar han, vënh kar tỹ isỹ tỹ ũn tar nĩ tag ki kanhró nỹtĩ jé, isỹ ã vóg kónān to, ã tar jé ra. Vënh kar tỹ inh jyjy mēnh ke vë, hã jé sóg ã fëg,” he ja ti nĩ, vāsỹ, Topē ti, Faraó mỹ.

¹⁸ Hã kỹ, Topē tỹ ũn jagãgtǎn sór nĩn kỹ tóg ti jagãgtǎn tĩ sir. Hã ra tóg ũ tỹ mẽ jāvānh ěn ti kutu kãfór han mũ sir, Faraó ri ke.

Topē tỹ ã tỹ nén han sór mũ ěn han tĩ

¹⁹ Kỹ Judeu ag hỹn inh mỹ: “kỹ ěg hỹn Topē tỹ ěg kuprēg tũ tigrĩn kutu nỹtĩnh mũ,” he sór mũ. “Ti tugnĩn ke vë. Kỹ ti tỹ ne jé ěg vóg kónān sór nē?”

he sór ag h̄yn m̄ũ, ón k̄y Topě to v̄in k̄y.

²⁰ Ha vé, ěpra ke v̄y t̄y ěg n̄yt̄i. Ti v̄i kaf̄an ke t̄u p̄ě ěg tóg n̄i. Ti kam̄eg jé ěg tóg ke m̄ũ. Ā t̄y nén han sór m̄ũ ěn han ti t̄i.

Ěg r̄anhr̄aj to jykrén n̄i. Kejēn ěg tóg nén ũ han t̄i, go'or t̄y. K̄y go'or tóg ěg m̄y: "is̄y kukr̄ũ kórég han t̄ug n̄i, is̄y kukr̄ũ s̄in̄v̄i han n̄i," he t̄u n̄igt̄i. Ěg v̄i kaf̄an ke t̄u ti n̄i, go'or ti. Ěg t̄y t̄y nén han sór m̄ũ ěn han ěg tóg t̄i, ti ki jēm̄ě v̄anh ěg n̄yt̄i.

²¹ Go'or ũ t̄y ěg kukr̄ũ s̄in̄v̄i han t̄i, ũ t̄y ěg kukr̄ũ kórég han t̄i. Ěg t̄y nén han sór m̄ũ ěn han ěg tóg t̄i.

²² Topě v̄y ěg r̄anhr̄aj tag ri ke han t̄i gé. Ti t̄y nén han sór m̄ũ ěn han ti t̄i, ěg t̄y, ěg t̄y ti m̄y go'or t̄y kukr̄ũ ri ke n̄yt̄in k̄y. Ū ag to tóg j̄ũ t̄i, ěg kar t̄y ag ki ti tar n̄i to jykrén jé, ti j̄ũ ěn ti, Topě ti. K̄y tóg k̄anhmar ag to j̄unh ke v̄ě v̄ě, h̄a ra tóg ver ag to fe mág n̄i, ag kórég t̄av̄i n̄yt̄i ra, ti t̄y ũ to j̄unh ke m̄ũ ag. H̄a ra tóg ag vóg kón̄an ke m̄ũ, ha vem̄n̄i.

²³ K̄y tóg ũ ag jaḡagt̄an m̄ũ gé, v̄enh kar t̄y ag ki Topě t̄y t̄y ũn há t̄av̄i n̄i to jykrén jé, ěg há kar k̄áfór. H̄a jé tóg ag kupr̄eg ja n̄igt̄i. Ti t̄y ag t̄y ũn mág han sór v̄ě, ti mré.

²⁴ Ěg h̄a v̄ě sir, ũn kupr̄eg k̄y n̄yt̄i tag ag. H̄a k̄y tóg ěg m̄y v̄enh v̄i j̄en̄ě. Judeu ag k̄am̄i tóg ěg m̄y v̄enh v̄i j̄en̄ě, fóg ag k̄am̄i ke gé, kanhgág ag k̄am̄i ke gé, ti t̄y ěg jaḡagt̄an sór k̄y.

²⁵ H̄a k̄y Oséias tóg tag tó ja

n̄i, ha m̄ě. "V̄as̄y ag v̄y t̄y inh mré ke t̄u ja n̄yt̄i, h̄a ra sóg ag m̄y: "inh mré ke v̄y t̄y ěgag n̄yt̄in m̄ũ ha, is̄ũ ag," he sór m̄ũ, he ti, Topě ti," he ja tóg n̄igt̄i, Oséias ti. "V̄as̄y sóg ag to há t̄u ja n̄igt̄i, h̄a ra sóg ag to há n̄inh m̄ũ ha," he ti.

²⁶ "V̄as̄y sóg ag m̄y: "ěgag pi(jé) t̄y is̄ũ n̄yt̄i'," he ja n̄igt̄i. H̄a ra sóg ag m̄y: "Topě kr̄ě v̄y t̄y ěgag n̄yt̄in m̄ũ," henh ke m̄ũ, "ũn r̄ir n̄i ěn kr̄ě v̄y t̄y ěgag n̄yt̄in m̄ũ," he jé sóg ke m̄ũ ag m̄y," he ti, Topě ti," he ja tóg n̄i, Oséias ti. Ti t̄y ũ t̄y ũri Cristo ki ge k̄y n̄yt̄i ag k̄am̄én h̄a v̄ě.

²⁷ K̄y Isaías v̄y Israel kr̄ě ag to tag tó, ha m̄ě: "e ag n̄yt̄i, Israel kr̄ě ag, r̄ynhr̄y e n̄i ěn ri ke, goj k̄am̄i pó r̄ynhryj e n̄i ěn ri ke. Ge ra ag pipir n̄yt̄in m̄ũ, ũn krenkren ke m̄ũ ag.

²⁸ Topě v̄y k̄anhmar ā t̄y nén tó ja ěn han ke m̄ũ, ga tag ki, k̄y tóg ag vóg kón̄an k̄an ke m̄ũ, ũn e ěn ag, ag kórég n̄yt̄in k̄y," he ja ti n̄i, Isaías ti.

²⁹ K̄y tóg tag tó ja n̄i gé, ha m̄ě: "ěg t̄ug k̄an kren ti, Topě ti, v̄enh kar kri n̄i ěn ti. H̄a ra tóg ěg k̄am̄i ũn pipir krenkren han ja n̄igt̄i. Cidade t̄y Sodoma tá ke ag t̄ug k̄an ja tóg n̄i, Topě ti, cidade t̄y Gomorra tá ke ag ke gé. K̄y tóg ěg t̄ug k̄an kren gé, ag ri kén, h̄a ra tóg ěg k̄am̄i ũ krenkren han m̄ũ," he ja tóg n̄i, Isaías ti.

³⁰ Oséias mré Isaías ag t̄y tó m̄ũ v̄y ge n̄i, ha m̄ě. Fóg ag, kanhgág ag pi(jé) v̄enh jykre kuryj nón m̄ũ ja n̄igt̄i'. Ge ra Topě tóg ag jaḡagt̄an k̄y ag m̄y v̄enh p̄ate fón m̄ũ ha, ag t̄y

Jesus ki rã kÿ.

³¹ Ag jãvo Israel krẽ ag vÿ ãjag jykre hã tÿ Topẽ tÿ ag jyvẽn ki króm sór ja nĩgtĩ. “Tĩ vĩ han ãg tĩ, kÿ tóg ãg to há nĩ,” he ag tóg tĩ. Hã ra ag tóg ki króm kãn ja tũ nĩ, hã kÿ Topẽ tóg ag to há tũ nĩ, jérĩn mÿ.

³² Hẽ ri ken kÿ hÿn'? Ag tÿ ti ki ge ja tũ nĩn kÿ, hã kÿ tóg ag mÿ vẽn pãte fón ja tũ nĩ gé. Ag tÿ vėsóg ki Topẽ jykre ki króm sór ja vẽ. Hã kÿ ag tóg ón kÿ ki króm ja nĩgtĩ. Hã kÿ ag tóg Cristo kato tẽ nÿtĩ.

Pó ri ke ti nĩ, Cristo ti, ãg tÿ tÿ krĩm ke jafã. Ag tÿ ti tÿ krĩm ke jan hã vẽ, hã vÿ: ti ki rã tũ, he mũ.

³³ Hã kÿ tag tóg rán kÿ nĩ, Jesus Cristo to, ha mẽ. “Pãnónh sĩ tÿ Sião pėnĩn cidade ki sóg pó nĩm mũ, ag tÿ tÿ krĩm ke jé. Kÿ ag tóg, pãró tag tÿ ag tóg krĩm ke kÿ vár ke mũ sir. Hã ra ù tÿ ti ki rã mũ vÿ ã tÿ nén ve sór mũ ěn venh ke mũ,” he ja ti nĩ, Topẽ vĩ rán ki, Jesus Cristo to.

10

Judeu ag tÿ Jesus ki ge kÿ krenkren ke

¹ Inh kanhkã', isÿ inh mré ke tÿ Israel tÿ krenkren han venh há tãvĩ tóg tĩ, hã jé sóg Topẽ mré vėmėn tĩ.

² Topẽ vĩ han jé ag tóg vãsãnsãn mũgtĩ, tag vėg isóg nĩ nĩ. Hã ra ag tóg ki kagtĩg nÿtĩ, kÿ ag tóg ãg tÿ nén han ke tũ ěn han tĩ.

³ Vėsóg ki ag tóg vẽn jykre kuryj to vãsãn sór tĩ. Hã ra ù tÿ ãg mÿ vẽn jykre kuryj nĩm sór mũ vÿ tÿ Topẽ ti nĩ. Tag ve

sór tũ ag nÿtĩ, Topẽ tÿ ãg mÿ nĩm ke tag. Hã kÿ ag tóg Topẽ kato vãsãnsãn mũ.

⁴ Cristo vÿ hur kãtĩg. Kÿ ãg tóg ti ki ge kÿ nÿtĩn kÿ ti mÿ há nÿtĩ ha. ãg tÿ Topẽ tÿ vãsÿ ãg jyvẽn ki króm tugnĩn ke pijé'. Jesus Cristo ki rã tigrĩn ke vẽ.

⁵ Ha vé, Moisés vÿ Topẽ jykre si to tag rán, ha mẽ. “Û tÿ vẽn jykre kuryj han kãn mũ vÿ rĩr nĩnh ke mũ, ù tÿ ge vÿ rĩr krÿg ja tũ venh ke mũ, ti tÿ Topẽ tÿ ãg jyvẽn tĩ ěn ki króm kãn tugnĩn,” he ja tóg nĩ, Moisés ti. Hã ra ãg tóg ki króm kãn ki kagtĩg nÿtĩ, hã kÿ ãg tóg ãg tÿ ki króm kãn sór mũ ra rĩr nĩnh ke tũ nĩ.

⁶ ãg tÿ Jesus ki rã tigrĩn ãg Topẽ mÿ há nÿtĩ. Kÿ ãg tóg: “ù nÿ hÿn kanhkã ra tĩg mũ, Cristo pėre kãtĩg jé?” henh ke tũ pė nĩ. Mur kÿ ti nĩ ha.

⁷ Kÿ ãg: “ù nÿ hÿn vẽn kuprĩg ag jamã ra tĩg mũ, Cristo rĩn mãn jé?” henh ke tũ pė nĩ gé. Rĩr mãn kÿ ti nĩ ha.

⁸ Tag tó jé ãg tóg ke mũ, ha mẽ: “jagy tũ ti nĩ, Topẽ vĩ ti, to jykrėn há ti nĩ. Kãnhmar ãg tónh ke mũ, kãnhmar ãg to jykrėn ke mũ, Topẽ vĩ to,” he jé ãg tóg ke mũ.

Topẽ vĩ tag hã tó sóg tĩ. “Jesus Cristo ki rã tugnĩn ãg krenkren ke mũ,” he sóg tĩ.

⁹ ãg krenkren jé ãg tóg Jesus to: “ãg Senhor vÿ tÿ ti nĩ,” henh ke mũ. Vẽn kar mÿ ãg tónh ke mũ. Kÿ ãg tóg ãg fe tÿ ti ki rãnh ke mũ gé. Topẽ tÿ ti ter kar kÿ ti rĩn mãn ja tag vÿ tÿ ãg mÿ ki hã ke nĩ, kÿ ãg kri

fig mũ. Kĩ ãg tóg krenkren ke mũ sir.

10 Æg tỹ ãg fe tỹ ti ki rã kỹ ãg tóg ti mỹ há nỹtĩ. Æg tỹ vẽn kar mỹ ti kãmén kỹ ãg krenkren ke mũ sir.

11 Hã kỹ tag tóg rán kỹ nĩ, ha mẽ: “ãg tỹ ti ki ge kỹ ãg tóg ãg tỹ nén ve sór mũ ên venh ke mũ,” he ja tóg nĩ, Topẽ vĩ rán ki.

12 Vẽn kar mỹ ke vẽn sir, vẽn vĩ tag. Judeu ag mỹ ke vẽn, kar kỹ fóg ag mỹ ke vẽn gé, kanhgág ag mỹ ke vẽn gé. Tỹ tóg ãg kar Senhor nĩ mỹr. Kỹ, ãg tỹ ti mỹ nén ù to vĩn kỹ tóg ãg mỹ nén ù tỹ hẽn ri ke nĩm ke mũ gé sir, ãg kar mỹ.

13 Tag hã vỹ rán kỹ nĩ gé, ha mẽ: “ãg tỹ ãg Senhor mỹ: “inh kren han nĩ,” hen kỹ ãg krenkren ke mũ, ãg kar,” he ja tóg nĩ, Topẽ vỹ tỹ rán kỹ nĩ ki.

14 Æg tỹ ti ki rã tũ nỹtĩ ra ãg tóg: “inh kren han nĩ,” he ki kagtĩg nỹtĩnh mũ vẽn. Æg tỹ ti vỹ mẽ ja tũ nỹtĩ ra ãg tóg ti ki ge ki kagtĩg nỹtĩnh mũ vẽn. Û tỹ ãg mỹ ti vỹ tó tũ nĩ ra ãg ti vỹ mẽnh ke tũ nĩnh mũ vẽn.

15 Topẽ tỹ ag jẽgnẽg tũ nĩ ra ag tóg ãg mỹ ti vỹ tónh ke tũ nĩnh mũ vẽn. Hã kỹ tag tóg rán kỹ nĩ, ha mẽ. “Û tỹ ãg mỹ Topẽ vỹ sér ma kãmũ ag junjun vỹ ãg mỹ sér pẽ tĩ,” he ja tóg nĩ, Topẽ vỹ tỹ rán kỹ nĩ ki. Topẽ tỹ ã vỹ tó tũ ag jẽgnẽ to ken hã vẽn.

16 Hã ra ù ag tóg kri fi jãvãnh nỹtĩ gé, ag tỹ ón kỹ mẽg mũ ra, Topẽ vỹ sér ti. Isaías vỹ ag to Topẽ mỹ tag tó ja nĩ. “Æg jóg mág', inh vỹ mẽ jãvãnh ag

nỹtĩ,” he ja tóg nĩ.

17 Hã kỹ tóg, ãg tỹ ti vỹ mẽ há han kar kỹ ãg tóg ti ki rã tĩ. Æg tỹ Cristo kãmé mẽ kỹ ãg ti ki rã tĩ.

18 Kỹ ãjag hỹn inh mỹ: “Judeu ag mỹ hẽn ri ke mũn mẽ ja tũ nĩ, hã kỹ ag mỹ ti ki ge ja tũ nĩ?” he sór mũ, ãjag tỹ inh carta tag ve kỹ. Vó, mẽ kỹ ag nỹtĩ vẽn. Tag vỹ rán kỹ nĩ, ha mẽ: “ga kar mũ ag tóg mẽ ja nĩgtĩ, ã vỹ ti. Ga fyr tá tóg jun gé, ã vỹ ti,” he ja ti nĩ, Topẽ vỹ rá ki.

19 Kỹ ãjag hỹn inh mỹ: “kỹ Judeu ag hẽn ri ke mũn to jykrén há han ki kagtĩg nỹtĩ, ag tỹ mẽg mũ ra?” he sór mũ, ãjag tỹ inh carta tag ve kỹ. Vó, ag tỹ to jykrén sór kỹ ag tóg to jykrén mũ vẽn. Moisés vỹ ãg mỹ tag kãmén, ha mẽ: “Topẽ tóg fóg mré kanhgág to tag tó sór mũ, ha mẽ,” he tóg. “Ag vỹ tỹ isũ tũ nỹtĩ ver, hã ra sóg ag tỹ isũ han sór mũ, ãjag tỹ ag ve kỹ ãjag tỹ inh ki rã to én jé,” he tóg. “Fóg mré kanhgág ag vỹ ãjag mỹ krĩ tũ nỹtĩ, hã ra sóg ag to há nĩ sór mũ, ãjag tỹ ag tugrĩn jũgũ jé, he tóg, Topẽ ti,” he ja tóg nĩgtĩ, Moisés ti, Judeu ag mỹ.

20 Kỹ Isaías tóg tag tó mũ gé, fóg ag to, kanhgág ag to, ha mẽ. “Û ag tóg inh jãvãnh ja tũ nỹtĩgtĩ, hã ra ag tóg inh vỹ jẽmẽg mũ ha. Topẽ hẽn ri ke tĩ? he ja tũ ag nỹtĩ, hã ra sóg ag mỹ inh vỹ jẽnẽg mũ ha, he tóg, Topẽ ti,” he ja ti nĩ gé, Isaías ti. Pã'i ag kamẽg vãnh kỹ tóg Judeu ag mỹ fóg ag mré

kanhgág ag tỹ Topě ki genh ke tó ja nĩ, Isaías ti.

²¹ Kỹ tóg Israel ag to tag tó ja nĩ gé sir, ha mẽ: “kurã kar ki sóg ãjag mỹ: kunĩg, he tĩ. Hã jé sóg ãjag mỹ inh nĩgé ven tĩ, ãjag tỹ gĩr mỹ ãjag nĩgé ven tĩ ẽn ri ke. Hã ra ãjag tóg inh vĩ mẽ jãvãnh nỹtĩ'. Inh vĩ kafãn kónãnh ãjag tóg mũ mỹr',” he ja tóg nĩ, Isaías ti, ti tỹ Judeu ag mỹ Topě vĩ tón kỹ.

11

Israel krẽ'krẽ pipir ag vĩ tỹ Topě tũ nỹtĩ

¹ Kỹ ãjag hỹn: “kỹ Topě mỹ ã povo tỹ Israel tovãnh kãn kỹ nĩ?” he sór mũ, ãjag tỹ inh carta tag ve kỹ. Vó, ag tovãnh kãn tũ ti nĩ. Hã vé, tỹ sóg Israel krẽ nĩ gé, hã ra sóg ti ki rã. Abraão krẽ'krẽ ù vĩ tỹ inh nĩ gé, ti kósin'kósin tỹ Benjamim krẽ'krẽ ù mỹr.

² Isovãnh ja tũ ti nĩ, Topě ti, hã kỹ tóg ã povo tovãnh kãn ja tũ nĩ. Nén kar han tũg ki tóg ẽg kuprẽg ja nĩ, ẽg tỹ tỹ ti tũ nỹtĩ jé.

Elias to jykrén nĩ. Ti kãme tóg rán kỹ nĩ, Topě vĩ rá ki. Elias tempo kã Israel ag tóg Topě kato tẽ mũ. Kỹ ag tóg Elias kato tẽ mũ gé, ti tén jé. Hã kỹ tóg Topě mỹ tó mũ, Elias ti, kỹ tóg:

³ “Senhor',” he mũ. “Ã vĩ tó ti ag kãgtén kãn ag huri, ã mỹ pũn jafã kókén ag huri ke gé. Inh pir mỹ sóg kren, kỹ ag tóg isén sór mũ ha ke gé. ã tovãnh kãn kỹ ag nỹtĩ,” he ja tóg nĩ, Elias ti, Topě mỹ, Israel ag to.

⁴ Hã ra Topě tóg ti mỹ: “krĩ kufy han tũg nĩ,” he mũ. “Û tỹ 7 mil (ke) vĩ ki nỹtĩ, ù tỹ isovãnh tũ ag, sỹ ùn kuprẽg ja ag. Tag ag vĩ vãnh kãggrá tỹ topě tỹ Baal mỹ: “Topě vĩ tỹ ã nĩ,” he ja tũ nĩ,” he ja tóg nĩ, Topě ti, Elias mỹ. Ti tỹ Israel pipir ag tỹ Topě tovãnh tũg ja ẽn tó vẽ.

⁵ Ge ti nĩgtĩ, ùri. Pir ag nỹtĩ, Israel tỹ Topě to há nỹtĩ ag. Ti kato tẽ kãn tũ ẽg mỹr. Topě vĩ ẽg jagãgtãn, kỹ tóg ẽg kuprẽg, hã kỹ ẽg tóg ti to há nỹtĩ, ẽg pipir nỹtĩ ra, ẽg tỹ tỹ Israel krẽ nỹtĩn kỹ.

⁶ Ẽg tỹ vėsóg ki han pijé', ẽg tỹ to vãsãn pijé'. Topě tỹ vėsóg ki ẽg jagãgtãn hã vẽ. Ke tũ nĩ mũ ra tóg: “vėsóg ki sóg ãjag jagãgtãn,” henh ke tũ nĩ vẽ. Hã ra tóg vėsóg ki ẽg jagãgtãn.

⁷ Ge ti nĩ, ha mẽ, Israel ag vĩ ve sór ja nĩgtĩ, Topě tỹ ẽg mỹ nén ù há ven ke ẽn ti, hã ra ag tóg venh ke tũ nĩ. Topě tỹ ùn kuprẽg mũ ag hã mỹ tóg ven tĩ, Topě ti. Jãvo ù ag tóg kutu nỹtĩ sir, ag tỹ Topě vĩ mẽ jãvãnh nỹtĩn kỹ.

⁸ Hã kỹ tag tóg rán kỹ nĩ, Israel ag to, ha mẽ: “Topě vĩ ag krĩ tũ han, hã kỹ ag tóg ti vĩ rá vэг mũ ra to jykrén tũ nỹtĩgtĩ. Mẽg tũ ag nỹtĩ, ãjag nĩgrẽg ra. Ùri ag tóg gen kỹ nỹtĩnh mũ ver;” he ja ti nĩ, Topě vĩ rán ki.

⁹ Kỹ Davi vĩ Judeu ag to tag tó ja nĩ gé, ha mẽ: “Topě mỹ festa han ag tóg tĩ. Hã ra ag tóg ón kỹ ti mỹ festa han tĩ, kỹ ag tóg to sigse kỹ nỹtĩnh mũ, ag festa to. Ag sigse kỹ tóg

ag vóg kónãn ke mũ, Topê ti. Krenkren ke tũ ag tóg nĩ.

¹⁰ Kutu ag nýtĩ, to jykrén ke tũ pê ag nýtĩ, kÿ ag tóg vënh kar vÿ jykre kufy hã venh ke mũ, hã to ag jagtar nýtĩnh mũ,” he ja tóg nĩ, Judeu ag to, Davi ti.

Judeu ag to é henh ke tũ êg tóg nĩ

¹¹ Kÿ ãjag hÿn inh mÿ: “kÿ Topê mÿ Judeu ag tÿ nũgme ki vár ke tag ve sór mũ, hã jén mÿ ag mÿ Jesus jënê ja nĩ, ag tÿ ti tÿ prãnh ke jé?” he sór mũ. Vó. Hã ra ag tóg Topê kato tẽgtẽ tí. Ti vĩ mranh ja ag tóg nýtĩgtĩ, hã kÿ Topê tóg fóg ag mré kanhgág ag krenkren han sór mũ, Judeu ag tÿ ag ve kÿ ti ki ge to én jé.

¹² Kÿ Judeu ag tÿ Topê vĩ mranh kÿ Topê tóg fóg mré kanhgág kar to há nĩ. Kÿ Judeu ag vÿ jagãgtar nýtĩ. Ag nýtĩg ja ki ù ag kar vÿ Topê tÿ ag to há nĩ vég mũ. Há ti nĩ, tag. Kÿ, Topê tÿ Judeu ag to há' he mãn nĩ ra tóg hã ra ga kri mũ kar mÿ há pê tâvĩ tĩnh mũ vë, mÿr, ha mẽ. Hã ra tóg ag to há tũ nĩ ver.

¹³ Kÿ sóg ãjag mÿ tag to sór mũ, ãjag tÿ tÿ fóg nýtĩnh kÿ, kanhgág ag mÿ ke gé. ãjag apóstolo vÿ tÿ inh nĩ, sÿ ãjag mÿ Topê vĩ to jé. Inh rãnhràj vÿ inh mÿ sér pê tí.

¹⁴ Isÿ ãjag mÿ Topê vĩ to kÿ inh mré ke ag hën ri ke mũn ãjag kóm Jesus ki ge sór mũ gé, kÿ ag krenkren ke mũ sir, Israel ag.

¹⁵ Ha vé, Topê tÿ inh mré ke ag tovãnh to tóg povo ù ag to há nĩ ha, ag to jũ mãn tũ tóg

nĩ sir. Topê tÿ Israel ag to há' he mãn mũ ra tóg vënh kar mÿ há pê tâvĩ tĩnh mũ vë, kÿ vënh kar vÿ rĩnrĩr mãn ke mũ vë, ùn kãgter mũ ag mré hã. Hã ra tóg ag to há tũ nĩ ver.

¹⁶ Êmĩ to jykrén nĩ. Êmĩ ku-par ko há nĩn kÿ tóg ko há kar nĩ. Ge ti nĩgtĩ gé, ka tÿ. Ti jãre há nĩn kÿ ka vÿ há kar nĩ. Israel ag vÿ tag ri ke nýtĩ. Ag jóg'jóg ve ag vÿ ka jãre ri ke nýtĩ. Topê mÿ ag há nýtĩ ja nĩgtĩ, hã kÿ ag krê vÿ Topê mÿ há nýtĩnh ke mũ gé.

¹⁷ Povo tÿ Israel vÿ ka tÿ oliveira há ri ke nýtĩ. Ti jãre vÿ há nĩ, hã ra ti pê ù tóg kórég nýtĩ. Hã kÿ tóg mrynhmranh kÿ vãvãm mũ, Topê ti, ti pê kórég ên ti. Ti tÿ Israel kórég ag togvãnh to ken hã vë, hã vÿ: ka pê kórég vãvãm, he mũ. Ka pê kórég tag nýtĩg ja ki tóg ka ù pê vin, vãnh kãmĩ ka tÿ oliveira pê tÿ, ùn kanën vãnh pê tÿ. ãjag hã vë sir, ãjag tÿ tÿ fóg nýtĩnh kÿ, kanhgág ag ke gé. Hã ra ka ù pê tag vÿ ka há jãre ên tÿ ti kume vég tí, kÿ tóg tÿ há' he mũ sir. ãjag tÿ Topê tÿ Israel jóg'jóg ve tÿ Abraão mÿ nén to ja ên vég mũ to ken hã vë, hã vÿ: ka há jãre kume vég mũ, he mũ.

¹⁸ Kÿ Israel ag to é he sór tũg nĩ, Topê tÿ ag vãm mũ ra, êg tÿ ka pê kórég vãm ri ke. Ag nýtĩg ja ki ãjag nýtĩ. Hã ra ka jãre vÿ tÿ Judeu ag jóg'jóg ve nýtĩ. ãjag jóg'jóg ve pijé', fóg pijé', kanhgág pijé'. Judeu ag vë. Kÿ Judeu ag to é he sór tũg nĩ.

¹⁹ Hën ri ke mũn ãjag tóg inh

mỹ: “hã ra tóg Judeu ag vãm, ãg to há nĩ jé,” he sór mũ. “Hã kỹ tóg ãg to há nĩ,” he ãjag hỹn mũ.

²⁰ Hỹ, ag vãm tóg. Hã ra ag tóg ti ki rã jãvãnh ja nỹtĩgtĩ, hã kỹ tóg ag vãm. Jãvo tóg ãjag to há nĩ, ãjag tỹ ti ki ge to. Hã kỹ ag to é he sór tũg nĩ. Topẽ kamẽg nĩ mỹr.

²¹ Israel krẽ ag tỹ ti ki ge jãvãnh tugnĩn tóg ag vãm. Ag jagãgtãn jãvãnh tóg nĩ ha. Kỹ tóg ãjag jagãgtãn ke tũ nĩ gé, ãjag tỹ ti ki ge to tar tũ nỹtĩn kỹ. Hã kỹ ti hã kamẽg nĩ.

²² Hã ki Topẽ tỹ tỹ ùn há nĩ tóg ve há tĩ, hã ra tóg ù ag vóg kónãn jagy han tĩ gé. Û tỹ ti vĩ mranh mũ ag vóg kónãn jagy han tóg tĩ, Topẽ ti. Hã ra tóg sir ãjag to há nĩ sir, ãjag tỹ ti tovãnh tũ nĩn kỹ. ãjag tỹ ti tovãnh kỹ tóg ãjag vãm ke mũ gé, ha vemní.

²³ Judeu ag tỹ ti ki ge kỹ tóg ag to há nĩ mãn ke mũ gé sir, kỹ tóg ka há ki ti pẽ mrynhmráj ja ên ki vin mãn ke ri ke nĩ sir.

²⁴ Ha vé, ãjag hã vĩ tỹ ka kanẽn vãnh pẽ ri ke nỹtĩ'. Hã ra tóg ka há ki ãjag vin, ãjag tỹ tỹ ka kanẽn vãnh pẽ nỹtĩ ra. Kỹ tóg, ti tỹ ka há ên pẽ mrynhmráj ja ên ki vin mãn sór nĩ ra tóg vin mãn mũ sir, ka há ên ki, hã vĩ: Judeu ag tỹ Jesus ki rã, he mũ. Ka há pẽ mrynhmráj ja ên ki vin mãn to ken hã vẽ. Ëg pi(jé) ka kanẽn vãnh pẽ tỹ ka kanẽn há ki vin tĩ'. Ëg tỹ ka há pẽ tỹ ki vin mãn tag vĩ jagy tũ nĩ vẽ. Hã kỹ tóg Topẽ mỹ jagy tũ tĩ,

ti tỹ Judeu ag to há nĩ mãn kỹ.

Topẽ tỹ Israel ag krenkren han sór

²⁵ Isỹ ãjag mỹ nén ù kãmén sór vẽ, ãjag tỹ mẽ ja tũ ù, ha mẽ. Sỹ ãjag mỹ kãmén sór vẽ, ãjag tỹ Judeu ag to é he tũ nĩ jé. Ha vé, Israel ù ag vĩ ver mẽ sór tũ nỹtĩ. Û ag tóg mẽ sór mũ, hã ra ù ag tóg mẽ jãvãnh nỹtĩ gé, vẽn kar tỹ Topẽ vĩ mẽ jé, Judeu tũ ag kar. Kejẽn ag tóg mẽ kãn ke mũ, fóg kar, kanhgág kar ke gé.

²⁶ Ag tỹ mẽ kãn ke ên kã Israel ag tóg krenkren ke mũ gé. Hã kỹ tag tóg ag to rãn kỹ nĩ, ha mẽ: “ag krenkren han tĩ vĩ jun ke mũ. Pãnónh sĩ tỹ Sião pénĩn cidade ên tá tóg vẽn ven ke mũ, ag krenkren han tĩ ti. Ên vĩ Jacó krẽ ag tỹ inh vĩ mranh ja ên tỹ vẽn pãte fón ke mũ, Israel krẽ en ag mỹ.

²⁷ Sỹ ag mré jykrén jan hã vẽ. Ag tỹ inh vĩ mranh tỹ sóg tũg' he mũ,” he ja tóg nĩ, Topẽ vĩ rá ki, Judeu ag to.

²⁸ Jesus kato tẽ ag tóg mũ ver, ti kãme sér mẽ jãvãnh ag nỹtĩ ver, hã kỹ ãjag tóg ag nỹtĩg ja ki Topẽ vĩ sér mẽg mũ. Hã ra ag jóg'jóg ve ag vĩ Topẽ to há nỹtĩ ja nĩgtĩ, hã kỹ Topẽ tóg ag krẽ'krẽ to há nĩnh ke mũ ge kejẽn, ti tỹ vãsỹ ag kuprẽg ja nĩn kỹ.

²⁹ Topẽ tỹ ù to há nĩn kỹ tóg ti to há nĩ, ti tỹ ù kuprẽg kỹ tóg kuprẽg kỹ jẽ nĩ gé. Tỹ tũg' henh ke tũ ti nĩ, Topẽ ti.

³⁰ Vãsỹ ãjag tóg Topẽ vĩ ki kagtĩg ja nỹtĩgtĩ gé. Hã ra Topẽ tóg ùri ãjag jagãgtãn, ãjag

tỹ ti ki ge jé, Judeu ag tỹ ti vĩ mranh ag nỹtĩg ja kã.

³¹ Kỹ ên ag tóg ti vĩ mranh mũgtĩ ver, Topẽ tỹ kar kỹ ag jagãgtãn jé, ti tỹ ãjag jagãgtãn ri ke.

³² Kỹ Topẽ tóg êg kar mỹ êg tỹ ti vĩ mranh mũ tag ven kãn sór mũ, êg tỹ to jykrén mãn jé. Ti tỹ êg jagãgtãn sór vê, êg tỹ ti ki ge jé, hã jé tóg êg mỹ êg tỹ ti vĩ mranh mũ ven sór mũ.

Topẽ jykre tỹ êg jykre kãfór nĩ

³³ Topẽ vĩ tỹ ùn mág pẽ nĩ, mỹr, ha mẽ. Ti jykre vĩ vênh kar kri nĩ kar nĩ. Ve kãn jãvãnh êg nỹtĩ, ti jykre ti, tá krỹg jãvãnh êg nỹtĩ. Nén ù kar ki kanhró ti nĩ mỹr, nén ù kar to jykrén há han kãn ti tĩ mỹr. Ti tỹ nén to jykrén mũ ve kãn ke tũ pẽ êg nĩ. “Ti hỹn hẽ ri ken kỹ tag han?” henh ke tũ êg tóg nĩ gé. To jykrén kórég êg tóg nỹtĩ.

³⁴ Û nỹ Topẽ tỹ nén to jykrén mũ ki kanhró nĩ? Ki kagtĩg kar êg nỹtĩ. Û nỹ Topẽ mỹ: “tag han ra, tag han tũg ra,” he tĩ? Û vĩ ti jyvẽn ke tũ pẽ nĩ.

³⁵ Û nỹ ti mỹ nén ù nĩm', Topẽ tỹ ti mỹ kajãm jé'? Nén kar vĩ tỹ ti tũ nỹtĩ mỹr, hã kỹ tóg êg hã mỹ nén ù kar nĩm tĩ, êg jagãgtãn kỹ.

³⁶ Topẽ hã ne nén kar hyn han'. Ti hã jamẽn kỹ êg tóg nỹtĩ, nén ù kar vĩ ti jamẽn kỹ nỹtĩ gé. Hã kỹ êg tóg tỹ ti tũ nỹtĩ gé, nén ù kar ti ke gé. Kỹ ti hã ne tóg tỹ ùn mág nĩ', ti pir mỹ. Ti hã mỹ êg tóg vĩ há han

tĩ, to krónh ke tũ êg nĩ, ga kri, kanhkã tá ke gé. Amém.

12

Topẽ mỹ êg vênh fêg ke mũ

¹ Inh kanhkã', Topẽ vĩ ãjag jagãgtãn. Hã kỹ sóg ãjag mỹ: “ti mỹ vênh fêg,” he mũ. Kỹ tóg êg tỹ ti mỹ nén ù pũn ri ke nĩ, êg tỹ ti mỹ vênh fêg kỹ. Judeu ag vĩ ãjag mễg tãnh kỹ pũn tĩ. Ag jãvo êg tóg ti mỹ êg rĩnrĩr nỹtĩn kỹ vênh fêg tĩ. Ti mỹ tóg sér tĩ, êg tỹ tag han kỹ, êg tỹ tỹ ti tũ nỹtĩn kỹ sir. Gen kỹ ãjag tóg Topẽ jykre han ke mũ.

² Êprã ke ag jykre han sór tũg nĩ. Topẽ vĩ ãjag krĩ tãg han sór mũ. Vênh jykre tãg han sór tóg mũ. Kỹ ãjag tóg nén há han ki kanhró nỹtĩnh mũ. Vênh jykre kuryj han jé ãjag tóg ke mũ. Kygnẽn h ke tũ ãjag tóg nĩ. Tag ve sór tóg mũ, Topẽ ti. Tag hã to tóg êg kanhrãn ke mũ.

³ Ha vé, Topẽ vĩ isar han, kỹ sóg ãjag jyvẽn há han ki kanhró nĩ. Hã kỹ sóg ãjag kar mỹ tag tó mũ. Vẽsỹ ùn mág han sór tũg nĩ. “Tỹ inh ùn mág tũ nĩn kỹ. Êg kar vĩ Topẽ ki ge kỹ nỹtĩ, kỹ tóg êg kar tỹ nén ù to tar han tĩ, êg kar tỹ ti rãnrãj han jé. Tag to jykrén kỹ jagnẽ to é he tũg nĩ.

⁴ Êg há to jykrén nĩ. Ti ki nỹtĩ vĩ e nỹtĩ, êg pẽn, êg nĩgnó, êg kanẽ, êg nĩgrêg, ti kar ti. Êg há ki nỹtĩ vĩ jagnẽ kóm rãnrãj nỹtĩ kar nỹtĩ, vyr mỹ.

⁵ Ge ti nĩgtĩ, êg mré. E êg nỹtĩ, hã ra êg tỹ Cristo ki ge kỹ nỹtĩn kỹ êg tóg êg há ri ke nỹtĩ,

kỹ ẽg tóg jagnẽ ki rĩr ke mũ sir, ẽg há ki nýtĩ tỹ jagnẽ ki rĩr tĩ ẽn ri ke.

⁶ Hã ra ù tóg nén ù han há nĩgtĩ, kỹ ù tóg nén ù ù han há nĩgtĩ gé, Topẽ tỹ to ẽg tar han kỹ. Ẽg kãmĩ ù mỹ tóg: “ag jyvẽn nĩ,” he tĩ, Jesus ti. Kỹ Topẽ tỹ ã mỹ nén tó mũ hã tỹ ẽg jyvẽn nĩ, ti tỹ ã mỹ: “ag jyvẽn nĩ,” hen kỹ.

⁷ Ẽg kãmĩ ù mỹ tóg: “ũn jagãgtar ag jagãgtãn nĩ,” he ti gé. Kỹ ẽg jagãgtãn há han to tar nĩmnĩ. Ẽg kãmĩ ù mỹ tóg: “inh vĩ kãmén nĩ,” he tĩ gé. Kỹ to krónh ke tũg nĩ.

⁸ Ẽg kãmĩ ù mỹ tóg: “ag mỹ ag tỹ nén han ke kãmén nĩ,” he tĩ gé. Kỹ ã rãnrãj tag ki rĩr há han nĩ. Ẽg kãmĩ ù mỹ tóg: “ã tỹ nén ù nĩm mág nĩ, inh mỹ,” he tĩ gé. Kỹ ón kỹ ti mỹ nĩm sór tũg nĩ. Ẽg kãmĩ ù mỹ tóg: “culto to pã'i vỹ tỹ ã nĩ,” he tĩ gé. Ẽ tỹ tỹ to pã'i nĩn kỹ to jykrén há han nĩ. Ẽg kãmĩ ù mỹ tóg: “ag jagãgtãn nĩ,” he tĩ gé. Kỹ ti tỹ ã mỹ ã tỹ ẽg jagãgtãn ke tag tó kỹ to mỹ sér nĩmnĩ. Ẽg tỹ jagnẽ ki rĩr to ken hã vẽ.

⁹ Jagnẽ to há tãvĩ nýtĩmnĩ. Ón kỹ jagnẽ to há nýtĩ sór tũg nĩ. Vẽnh jykre pãno to kórég tãvĩ nýtĩmnĩ, kỹ tovãnh kãn nĩ. Vẽnh jykre há hã mĩ mũmnĩ.

¹⁰ Jagnẽ to há pẽ tãvĩ nýtĩmnĩ, ãjag tỹ jagnẽ mré pafa ja ag to há ri ke nýtĩmnĩ, jagnẽ to. Jagnẽ mỹ komẽr hã vĩmnĩ, ẽg tỹ pã'i mỹ komẽr hã vĩ ẽn ri kemnĩ, jagnẽ mỹ.

¹¹ Topẽ jykre to krónh ke tũg

nĩ. Ti tỹ ãjag mỹ: “tag han ra,” he to jẽnjẽr ke tũg nĩ gé, to vãsãn nĩ. Ti kuprĩg tỹ ãjag mỹ nén tó mũ ẽn ki króm nĩ, kỹ tóg ãjag mỹ sér tũnh mũ. Ẽg Senhor tũ han nĩ.

¹² Topẽ vỹ ẽg mỹ nén ù há kar han ke mũ. Tag to mỹ sér nýtĩmnĩ. Kejẽn ãjag tóg nén ù jagy venh ke mũ, ti tugnĩn. Tag to krónh ke tũg nĩ. Topẽ mré vēmén kỹ nýtĩmnĩ.

¹³ Ẽjag mré Topẽ ki rã ù jagtar nĩn kỹ ti jagãgtãn nĩ. Ẽ tỹ ãjag to pasa ke kỹ ti mỹ: “inh mré nĩ,” hemnĩ.

¹⁴ Kejẽn ù tóg ãjag vóg kónãn sór mũ. Ẽn to Topẽ mỹ: “ti jagãgtãn nĩ,” hemnĩ. Ti to: “ti vóg kónãn nĩ,” he tũg nĩ.

¹⁵ Kejẽn tóg ù mỹ sér tĩ. Kỹ ti mré mỹ sér nýtĩmnĩ gé. Kejẽn ù tóg fỹ tĩ. Ti mré fỹmnĩ gé.

¹⁶ Jagnẽ mré vẽnh jykre pir hã han nĩ, hã vỹ: jagnẽ to há, he mũ. Vẽsỹ ùn mág han sór tũg nĩ. Tỹ ùn kãsir ag mré ke nýtĩmnĩ. “Ag mré ke vỹ tỹ inh nĩ,” hemnĩ, ùn kãsir ag to. Hẽn ri ke mũn ãjag kãmĩ ù tóg vẽnh kanhrãn mág to tar nĩ, ãjag kãfór. Ti jé: “ag kãfór inh nĩ, vẽnh kanhrãn mág ja tag to,” he tũg nĩ.

¹⁷ Kejẽn ù tóg ãjag mỹ nén ù kórég han tĩ. Ge ra ti mỹ nén ù há hã han nĩ. Vẽnh kar mỹ vĩ há tãvĩ han nĩ, ù tỹ ãjag to: “kygnẽ ti huri,” he tũ nĩ jé.

¹⁸ Vãsãn nĩ, ãjag tỹ ù to krĩ rỹ tũ nýtĩ jé, ãjag tỹ vẽnh kar to krĩ kuprã nýtĩ jé.

¹⁹ Inh kanhkã, ù tỹ ãjag mỹ nén ù kórég han mũ ra vẽnh kajãm sór tũg nĩ. Topẽ hã tóg

ã tỹ ti to jũnh ke ěn ki kanhró nĩ'. Hã ký tag vỹ rán ký nĩ, ha mẽ: “inh hã ne ãjag kajãm ke mũ', inh hã ne ag mỹ ven ke mũ', ag tỹ ãjag jykre kórég to jagãgtar ke ti, he ti, ěg Senhor ti,” he ja tóg nĩ, Topẽ vỹ tỹ rán ký nĩ ki.

²⁰ Ký ù tỹ ãjag kato tẽ mũ mỹ nén ù há kar han nĩ. Ti kókĩr nĩn ký ti mỹ vėjẽn ven nĩ. Ti hãghã ký ti mỹ goj ven nĩ. Gen ký ã tóg ti mỹ^a pẽ han ke mũ, ha vemnĩ, ã tỹ ti to há nĩn ký, ti tỹ ã to kórég nĩ ra.

²¹ Û tỹ vẽn h jykre pãno han mũ ag vỹ ěg kato tẽ tĩ. Ký ěg tóg ag ki rĩr ke mũ, vẽn h kaja jé. Ag jagtar nỹtĩn ký ěg tóg ag jagãgtãn ke mũ. ěg tỹ ag jagãgtãn ký ag jykre pãno tóg ag mỹ vẽn h mỹ nĩnh mũ, ag tỹ ěg jykre ve ký, ha vemnĩ.

13

Ěg pã'i ag

¹ ěg kri pã'i vỹ nỹgtĩ. Ký tóg ěg tỹ ag vỹ ki han há tĩ. Topẽ tỹ ag tỹ pã'i han hã vẽ, ag krĩn ký. Ti hã vỹ ù tỹ hẽ nỹ tỹ pã'i nĩnh ke to jykrén tĩ'.

² Ký ag kato tẽ sór tũg nĩ. Topẽ hã vỹ ag vin tĩ, pã'i ag krĩn ký, ký ag kato vãsãn tũg nĩ. Û tỹ ag kato vãsãnsãn mũ ag vóg kónãn jé ag tóg ke mũ, pã'i ag.

³ ěg tỹ vẽn h jykre há han ký ěg tóg pã'i ag vэг mũ ra kanẽ jur han ke tũ nĩ. Û tỹ vẽn h jykre kórég han mũ ag vỹ veso kanẽ jur tĩ, pã'i ag ve ký. Ký ěg hỹn hẽ ri kenh ke mũ, ag tỹ ěg kanẽ jun tũg jé? Vẽn h jykre há

tãvĩ han jé ěg tóg ke mũ, ký ag tóg ěg to vēmén há han ke mũ sir, pã'i ag.

⁴ ěg pã'i ag ne ěg jyvẽn tĩ', ěg tỹ vẽn h jykre há to tar nỹtĩ jé. Ag tỹ Topẽ tỹ ag mỹ nén tó mũn han hã vẽ. ã tỹ vẽn h jykre kórég han ký kanẽ jurmnĩ. ã vóg konãn jé ag tóg ke mũ, ha vemnĩ, hã jé Topẽ tóg ag vin. Topẽ tũ ag vẽ, ag tỹ ùn jykre kórég han mũ ag vóg kónãn jé, ag tỹ ag jykre pãno to ag jagãgtar han jé.

⁵ Hã ký ag vỹ ki króm nĩ, ag tỹ ãjag to jũ tũ nỹtĩ jé. ãjag kakã kavẽn h ti tĩ gé, ãjag tỹ pã'i ag vỹ ki króm tũ ěn ti. Hã ký ki króm sórmnĩ.

⁶ Ký governo mỹ imposto kajãm nĩ gé. Topẽ tỹ ag mỹ vẽn h rãnrãj nĩm ja ěn han ag tĩ, kurã kar ki, pã'i ag, governo mỹ rãnrãj tĩ ag. Ký ag mỹ kajãm nĩ.

⁷ Ký ãjag név(e) kajãm kãn nĩ, governo mỹ ke gé. ãjag tỹ pã'i ù mỹ imposto kajãm ken ký ti mỹ ven nĩ, jãnkamy ti. ãjag pã'i ag kamẽg nĩ, ag mỹ komẽr hã vĩmnĩ.

Topẽ jykre hã mũ mũmnĩ

⁸ ãjag név(e) kajãm kãn nĩ. Mré hã jagnẽ to há tãvĩ nỹtĩmnĩ gé. Jagnẽ to há nỹtĩ to krónh ke tũg nĩ. ěg tỹ jagnẽ to há nỹtĩn ký ěg tóg Topẽ tỹ ěg jyvẽn ja ěn ki króm kãn mũ sir.

⁹ Ha vé, Topẽ tóg ěg mỹ: “ã prũ tũ fi mré nỹ tũg nĩ, ký ã mén tũ mré nỹ tũg nĩ gé,” he ja nĩ. Ký tóg: “ù tén tũg nĩ, nén ù péju(g) tũg nĩ, ù to ón tũg nĩ,

14

nén ũ to én tũg nĩ gé,” he ja nĩ gé. Ti tỹ ěg jyvĕn vỹ e nỹtĩ. Hã ra ěg tỹ ti tỹ ěg jyvĕn kar tỹ tó pir han sór kỹ ěg tóg tag tónh ke mũ, ha mẽ: “ã régre ki rĩr nĩmni. Ā tỹ vĕnh ki rĩr há ri ke han nĩ, ã régre ki,” he jé ěg tóg ke mũ.

¹⁰ ěg tỹ ěg régre kar ki rĩr há nỹtĩn kỹ ěg tóg ag mỹ nén ũ kórég han ke tũ nĩ. Hã kỹ ěg tóg jagnĕ ki rĩr há nỹtĩn ki Topĕ tỹ ěg jyvĕn tĩ ěn ki króm kãn ke mũ.

¹¹ Vãsãn nĩ. Vĕnh jykre kórég tovãnh kãn nĩ. Ti tỹ ěg kren han ke kurã vỹ kakó pĕ tĩ ha. ěg tỹ ti ki ge vén kỹ tóg ver kór gy nỹ ja nĩ, kuvar gy nỹ ja tóg nĩ ver ěn kã, hã ra tóg ũri kakó tãvĩ tĩ ha.

¹² Ti kãtĩg to hã tóg ěg mỹ kuty ri ke nĩ. Kuty tag vỹ tũg ke nĕ ha, tỹ vaj ke ti nỹ ha. Ti tỹ kãnhmar kãtĩg ke to ken hã vĕ. Hã kỹ ag tỹ kuty kã nén han tĩ ěn han mãn sór tũg nĩ, vĕnh jykre kavĕj ěn ti. ěg tỹ kurã ki nén han jafã ěn han nĩ, vĕnh jykre kuryj ti, ěg tỹ vĕnh jykre há han kỹ vĕnh jykre kórég kato tĕ jé, tỹ tũg' he jé.

¹³ ěg tỹ kurã mĩ tũg há han tĩ ěn ri ke han nĩ. Ag tỹ baile ki nén ũ vĕnhmỹ han tĩ ěn han tũg nĩ. Kronkron tũg nĩ gé. Fag to én tũg nĩ, kỹ fag mré nỹ tũg nĩ, ag mré ke gé. Jagnĕ to jũ tũg nĩ gé, jagnĕ tũ to én tũg nĩ gé.

¹⁴ ěg Senhor tỹ Jesus Cristo jykre tãg hã han nĩ. ěg tỹ nén to én mũ ěn han sór mãn tũg nĩ. ěg jykre si tovãnh kãn nĩ.

Jesus ki ge kỹ nỹtĩ fag tỹ jagnĕ to há nỹtĩnh ke

¹ Ũ tóg krój nỹtĩ ver. Jesus jykre ũ tóg ver ag mỹ jagy tĩ, ag tỹ ti ki ge kỹ nỹtĩ ra. Ũ tỹ ge tovãnh tũg nĩ, ag mỹ: “ěg mré Topĕ vĩ mĕnh kãtĩg nĩ,” hemni. Ag vĩ kafãn tũg nĩ hã ra, ag tỹ kygnĕ kỹ: “tag tóg inh mỹ ge nĩ, ge nĩ,” he mũ ra.

² Ũ mỹ tóg nén kar ko há tĩ, hã ra ũ tóg nén ũ nĩ ko vãnh nĩn kỹ ěkre hã ko tĩ. “Vĕnh kãggrá mỹ ag tóg pũn ja nĩ, vĕnh mĕg ěn nĩ ti, ag tỹ ón kỹ topĕ kãggran ja ěn mỹ, hã kỹ sóg ti nĩ ko sór tũ nĩ,” he ag tóg tĩ, ũn krój ag.

³ Hã ra ãjag kãmĩ ũ ag tóg ge ra ko tĩ, vĕnh kãggrá tỹ ag mỹ tỹ nén ũ tũ nĩn kỹ. Ājag tỹ ko kỹ ũ tỹ ko vãnh ěn to é he tũg nĩ. Kỹ ãjag tỹ ko sór vãnh kỹ ũ tỹ ko mũ ěn to: “ti kórég han ti tĩ,” he sór tũg nĩ gé. Vĕjĕn to jagnĕ mỹ vĩ tũg nĩ. Ā mré tóg Topĕ ki rã kỹ jé gé, ũ tỹ ko mũ ti, kỹ ti to vĩ tũg nĩ.

⁴ Jesus mỹ rãnhraj tĩ vỹ tỹ ěg nỹtĩ, ěg kar, hã kỹ tóg vĕnhmỹ tĩ, ěg tỹ jagnĕ to vĩ sór kỹ. Ũ tỹ ěg mỹ vĩnh ke mũ vỹ tỹ ěg Senhor ti nĩ, ěg tỹ tỹ ti tũ nỹtĩn kỹ. Hã ra ěg kar vỹ há kutĕ kãn ke mũ, kurã ěn kã, ha vemni, ěg Senhor tỹ ěg tar han kỹ.

⁵ Ũ tóg vĕnh kãn ke kurã to: “kurã kórég,” he tĩ, kurã ũ to ke gé. Jãvo ũ tóg kurã kar to: “kurã há,” he tĩ gé. Há kar ti nỹtĩ, ãjag tỹ kurã han mũ ti.

Kỹ ãjag tỹ nén to jykrén mũ ãn hã han nĩ.

⁶ Ëg kar vỹ ãg Senhor jykre mũ mũ sór mũ, hã kỹ ù tóg kurã kórég han sór tĩ, ti jykre mũ tĩ jé, jãvo ù tóg kurã kórég han vãn nĩ, ti jykre mũ tĩ jé gé. Há kar ti nĩ.

Kỹ ù tỹ nén ù kar ko mũ vỹ ge nĩ gé. Ëg Senhor jykre mũ tĩ hã jé tóg ko tĩ gé. Ti hã mỹ tóg to vĩ há han tĩ, vễjên to, Topê hã mỹ. Û tỹ nén ù nĩ ko vãn ãn vỹ ãg Senhor jykre mũ tĩ hã jé ko vãn nĩ gé, ti tỹ ti mỹ há han tĩ gé. Kỹ tóg to Topê mỹ vĩ há han tĩ gé. Há kar ti nĩ, ãg tỹ nén ù nĩ ko mũ ti, ãg tỹ ko vãn ti ke gé.

⁷ Ëg pi(jé) ãg jykre han ke mũ', ãg tỹ ga kri mũn kỹ. Kỹ, ãg ter ken kỹ ãg pi(jé) ãg jykre ki ter ke mũ gé'.

⁸ Ëg tỹ ga kri mũn kỹ ãg tóg ãg Senhor jykre hã han ke mũ. Ti tũ han hã jé ãg tóg ga kri mũ nĩ. Kỹ, ãg ter ken kỹ ãg tóg ti jykre hã ki ter ke mũ gé'. Hã kỹ ãg tóg tỹ ti tũ kar nỹtĩ sir, ãg tỹ ga kri mũn kỹ ke gé. Ëg Senhor tỹ Jesus Cristo tũ vỹ tỹ ãg nỹtĩ.

⁹ Ëg tỹ tỹ ti tũ nỹtĩ hã jé tóg ter ja nĩ. Hã jé tóg rĩr mãn ja nĩ gé. Ti tỹ tỹ ãg Senhor nĩ hã jé tóg ter ja nĩ, vãn kar pã'i, ùn rĩnrĩr mũ ag pã'i, ùn kãgter ja ag pã'i ke gé.

¹⁰ Kỹ ãjag tỹ hẽ ri ke jé jagnẽ to vĩ sór nẽ? ãjag tỹ hẽ ri ke jé jagnẽ to é he nẽ? Topê hã vỹ ãg jykre ve kãn ke mũ, ãg kar, ti tỹ ãg jé prẽr ken kỹ.

¹¹ Hã kỹ tag tóg rán kỹ nĩ, ha mẽ. “Rĩr inh jẽ nĩ,” he tóg,

ãg Senhor ti. “Vãn kar vỹ inh krẽm grĩnh kenh ke mũ, ha vem nĩ. Vãn kar vỹ inh mỹ: “ũn mág vỹ tỹ ã nĩ,” henh ke mũ, he ti, Topê ti,” he tóg, Topê vĩ tỹ rán kỹ nĩ ki.

¹² Ëg kar vỹ Topê rĩn ja tá nỹtĩnh ke mũ, kỹ tóg ãg jykre tug nỹm ke mũ. Ëg hã ki tóg jẽmãn ke mũ, ãg tỹ nén han ja ãn to.

¹³ Hã kỹ jagnẽ to vĩ mãn tũg nĩ.

Ëg tỹ jagnẽ to fen ke

Jagnẽ to: “kórég ti nĩ,” he mãn tũg nĩ. ãjag tỹ nén ù han ken kỹ tag to jykrén nĩ, ha mẽ. “Isỹ tag han kỹ inh régre mỹ inh ve kỹ Topê vĩ mranh ke tũ nĩ vỹ?” he jé ãg tóg ke mũ. “Ti mỹ tỹ prãn kenh ke tũ nĩ vỹ, isỹ tag han kỹ?” he jé ãg tóg ke mũ.

¹⁴ Tag ki kanhró inh nĩ, ha mẽ: “vễjên pi(jé) ãg kavénh tĩ.” Jesus tỹ tón hã vẽ. Nén ù tũ vẽ, vễjên ti, ãg tỹ ko jãvã tãvĩ vẽ. Hã ra ù tóg nén ù nĩ to: “vãn kãggrã mỹ ag tóg pũn ja nĩ, vãn mẽg ãn nĩ ti, hã kỹ sóg ko kỹ Topê vĩ mranh tĩ,” he tĩ. Û tỹ tag tó mũ jykre kavénh ti tĩ, ti tỹ ge ra kon kỹ.

¹⁵ Inh mỹ tóg tỹ Topê vĩ mranh tũ nĩ, isỹ nén ù nĩ ko tag ti. Kỹ sóg ko' he mũ sir. Kỹ inh régre ù tóg isỹ ko mũ ve kỹ ko sór mũ gé sir, hã ra tóg ti hã mỹ Topê vĩ mranh ri ke nĩ. Kỹ tóg ko kỹ isugrĩn Topê vĩ mranh mũ sir. Kỹ tóg nũgme ki kutẽn ke mũ sir, ti tỹ ko kỹ Topê vĩ mranh kỹ. Kỹ tóg isỹ ti tén ri ke nĩ sir, Cristo tỹ ùn jagfy ter ja ãn ti. Isỹ tag han

kỹ tóg sỹ ti to há tũ ri ke nĩ, isỹ inh jẽn tugnĩn ti tén ri ke han kỹ.

¹⁶ Kỹ tag han sór tũg nĩ, ù tỹ ãjag tỹ nén han mũ to ãjag to vĩ tũ nĩ jé. Há ti nĩ vễ, ãjag tỹ kon kỹ, hã ra ù tỹ ãjag jẽn to ãjag to vĩn kỹ ko sór tũg nĩ.

¹⁷ Topê tỹ tỹ ẽg Senhor nĩn kỹ ẽg jẽn tóg tỹ nén ù tũ nĩ ha mỹr, kỹ ẽg tỹ nén ù nĩ ko tũ ra tóg ẽg mỹ tỹ nén ù tũ nĩ. Nén ù ù to ẽg jykren ke mũ ha, hã vỹ: vễnh jykre kuryj, he mũ, vễnh jykre kusa, he mũ, vễnh jykre sér, he mũ, Topê kuprĩg tỹ mỹr, ẽg jagrê tãg tí.

¹⁸ Ẽg tỹ gen kỹ Cristo jykre han kỹ tóg Topê mỹ há tĩ ha, ẽg jykre ti, kỹ tóg ẽg mré ẽprã ke ag mỹ há tĩ gé sir, ha vemnĩ.

¹⁹ Kỹ ẽg jé jagnê krĩ kuprãg hã to jykren. Ẽg jé jagnê tar han sór.

²⁰ Kỹ tóg ẽg tỹ nén ù nĩ ko to ẽg régre tỹ tỹ prãnh ke han kỹ tóg kórég nĩ, ẽg tỹ ù tỹ Topê ki rã kỹ nĩ ù tỹ tỹ prãnh ke han kỹ. Vějẽn kar vỹ há nĩ. Hã ra ù tóg vějẽn ù to jykren kónãn sór mũ, ti tỹ to Topê vĩ mranh kỹ. Ti tỹ ge ra kon kỹ tóg tỹ prãnh ke mũ sir.

²¹ Kỹ tóg kórég nĩ, ẽg régre tỹ ẽg tugnĩn Topê vĩ mranh kỹ. Hã jé nén ù nĩ ko tũg nĩ, ã régre tỹ to tỹ prãnh kenh (ka) mẽ tĩn kỹ. Ti rĩnve vinho kron tũg nĩ gé. Nén ù tỹ ã régre tỹ Topê vĩ mranh han ẽn tovãnh kãn nĩ.

²² Ẽ tỹ nén ù to: “kórég tũ ti nĩ,” hen kỹ Topê hã mỹ tómnĩ. Hã ra ã régre rĩnve han tũg nĩ, ti tỹ ã mỹ há nĩ ra, ã régre tỹ ã tugnĩn Topê vĩ mranh tũ nĩ

jé. Ẽ tỹ Topê tỹ ã mỹ nén tó hã han kỹ tóg há nĩ, kỹ ã tóg jatu nĩ, ha vemnĩ.

²³ Û tóg ko tĩ, hã ra tóg ã tỹ ko mũ tag to: “isỹ Topê vĩ mranh ja mỹ vỹ?” he mũ sir. Ti tỹ ge ra ko kỹ tóg to krĩ kufy nĩ sir, kỹ tóg Topê vĩ mranh mũ sir. Ẽg tỹ ti ki ge kỹ nỹtĩn kỹ ẽg tóg ti tũ hã han sór mũ sir. Ẽg tỹ nén ù to: “tag han kỹ inh mỹ ti vĩ mranh mũ vỹ?” hen kỹ ẽg han ke tũ nĩ, ke tũ nĩ mũ ra ẽg ti vĩ mranh mũ.

15

Ẽg tỹ ẽg mré ke ag to há nỹtĩnh ke

¹ Ha vé, tar ẽg nỹtĩ. Hã kỹ tóg ẽg tỹ ùn krój nỹtĩ ag to fen nỹtĩnh há tĩ. “Ẽn tóg inh mỹ há tĩ, hã kỹ sóg han sór mũ,” henh ke tũ ẽg tóg nĩ.

² “Mỹ inh régre mỹ há nĩ vỹ?” he jé ẽg tóg ke mũ. Ti tỹ ti mỹ há tũ nĩn kỹ ẽg han ke tũ nĩ. Ẽg tỹ ti tar han sór vễ, ẽg tỹ nén han mũ kar tỹ.

³ Cristo pi(jé) ã tỹ nén to én mũ ẽn han ja nĩgtĩ, hã kỹ tóg ẽg jagfy jagtar ja nĩgtĩ. Kỹ tóg Topê mỹ: “ã to ag tóg vĩ kónãn tĩ, ã kato tẽ ag, hã ra ag vĩ vỹ inh kri kutẽnh ke mũ,” he ja nĩ. Ti mur tũg ki Topê vĩ tó tĩ ù tóg ti vĩ tag rán ja nĩ, hã ra tóg ge nĩ.

⁴ Hã ra Topê tóg ẽg kanhrãn sór mũ, hã kỹ tóg ã vĩ tó tĩ ag mỹ: “ha rán,” he ja nĩgtĩ, hã kỹ ag tóg ránrán ja nĩgtĩ. Ẽn ve kỹ ẽg tar nỹtĩ, Jesus jykre mĩ mũ to, kỹ ẽg tỹ prãnh kenh ke tũ nĩ. Kỹ ẽg tóg ẽg tỹ kanhkã tá

nén venh ke ěn kã jatu' henh ke tũ nĩ gé.

⁵ Topě vỹ ěg to fen kỹ nĩ. Ti hã vỹ ājag tỹ jagně to fen han ke mũ, ti kóm, ājag tỹ ti mré jykre pir nỹtĩ jé, ājag tỹ Jesus Cristo ki ge kỹ nỹtĩn kỹ. Ěg tỹ to vãsãn han ki kanhró tóg nĩ, Topě ti.

⁶ Kỹ ājag tóg jagně mré ěg jóg tỹ Topě to: “ũn mág vỹ tỹ ti nĩ,” henh ke mũ gé. Věnh vỹ pir han jé ājag tóg ke mũ, ti to, ěg Senhor tỹ Jesus Cristo to ke gé.

Fóg ag mré kanhgág ag tỹ Topě vỹ měnh ke

⁷ Hã kỹ jagně to há nỹtĩmnĩ, Cristo tỹ ěg to há nĩ ri ke nỹtĩmnĩ, jagně to. Kỹ ũ tóg ājag jykre ve kỹ Topě to: “ũn mág vỹ tỹ ti nĩ,” henh ke mũ.

⁸ Tag to jykren nĩ, ha mě. Cristo vỹ Judeu ag ki rĩr jé kãtĩg ja nĩ, ti tỹ Topě tỹ vãsỹ ěg jóg'jóg ve ag mỹ nén tó ja ěn ki han jé. Ěn ve kỹ ěg tóg ki kanhrãn mũ, Topě tỹ věnh vỹ há hã tó tĩ ti.

⁹ Kỹ tóg povo ũ ag jagãgtãn gé, kỹ ag tóg ti tigrĩn Topě mỹ vỹ há han mũ gé sir, fóg ag, kanhgág ag ke gé. Hã kỹ Davi tóg tag rãn ja nĩ gé, ha mě: “tag tugnĩn sóg ã mỹ vỹ há han ke mũ, fóg ag rĩnve, kanhgág ag rĩnve ke gé. Ag rĩnve sóg ã mỹ jãn ke mũ, ã jé tó jé sóg ke mũ, ã jiji tó kỹ,” he ja tóg nĩ, Davi ti, Topě vỹ tỹ rãn kỹ nĩ ki.

¹⁰ Kỹ tag tóg rãn kỹ nĩ gé, ha mě. “Fóg', kanhgág', mỹ sér nỹtĩmnĩ, Judeu ag mré hã, ti tũ ag mré hã,” he tóg mũ gé, Topě vỹ tỹ rãn kỹ nĩ ki.

¹¹ Kỹ tag tóg rãn kỹ nĩ gé, ha mě. “Fóg', kanhgág', ěg Senhor mỹ vỹ há han nĩ. Topě to vỹ há han kãn nĩ, povo kar',” he ja tóg nĩ gé, Topě vỹ tỹ rãn kỹ nĩ ki.

¹² Kỹ Isaiás vỹ Cristo to tag tó ja nĩ gé, ha mě: “Jessé krě'krě ũ vỹ tỹ ũn mág jěnh mũ, Davi panh ěn krě'krě ũ, kỹ tóg tỹ povo kar ag pã'i mág jěnh mũ. Fóg ag vỹ kanhgág ag mré ti ki ge sór ke mũ,” he ja tóg nĩ, Isaiás ti. Ti tỹ Jesus tón hã vě.

¹³ Topě hã ne ěg mỹ ven ke mũ', nén ũ há kar, hã kỹ tóg ěg mỹ tó ja nĩ. Ti hã ki ājag tóg ge kỹ nỹtĩ. Ti hã vỹ ājag fe tỹ mrin kenh ke mũ, ti hã vỹ ājag krĩ kuprãg ke mũ'. Topě kuprĩg vỹ tỹ ājag jagrě nĩ, kỹ tóg nén kar han há nĩgtĩ. Ti hã vỹ ājag tar han ke mũ', ājag tỹ Topě tỹ ěg mỹ nén ũ há ven kenh ke ěn to tar nỹtĩ jé, ājag tỹ tag hã mĩ ěkren jé.

Paulo rãnrãj

¹⁴ Inh kanhkã', věnh jykre há han kỹ ājag tóg nỹtĩ. Isỹ ājag mỹ tó tũg ki ājag tóg ki kanhrãn ja nĩ. Vég isóg nĩ nĩ. Hã kỹ ājag tóg jagně jyvẽn ki kanhró nỹtĩ gé.

¹⁵ Inh věnh rá tag ki sóg ājag mỹ nén ũ tỹ hěn ri ke kãmén, ti tỹ inh mỹ sér tĩn kỹ, sỹ ājag vég tũ ra. Ājag mỹ sóg kãmén há han, ājag tỹ kã jatu tũ nĩ jé, ājag tỹ měg mũ tag kã. Topě ne tag to inh jěně', tag to tóg isar han'.

¹⁶ Inh jé prěr tóg, isỹ povo kar mỹ Jesus Cristo kãmén jé. Kỹ sóg ti tũ ki rĩr jě nĩ, Topě

vĩ sér tó sóg tĩ, fóg ag mỹ, kanhgág ag mỹ ke gé. Ag tỹ ti ki ge kỹ tóg ti mỹ sér tĩ, Topê kuprĩg tỹ ag tỹ ùn há han kỹ, ag tỹ tỹ Topê tũ nỹtĩn kỹ. Inh rãnrãj hã vễ.

17 Tỹ sóg Jesus Cristo rãnrãj han jafã nĩ, Topê tỹ isar han kỹ, kỹ inh rãnrãj tóg inh mỹ sér tĩ.

18 Kỹ sóg ãjag mỹ Cristo tỹ inh mỹ vễnh rãnrãj nĩm ja hã tỹ vēmén sór mũ. Fóg ag mré kanhgág ag tỹ ti ki ge jé tóg isar han tĩ, ti vĩ tó tag to. Inh vĩ mẽ kỹ ag tóg ti ki ge sór mũ, ag tỹ inh jykre ve kỹ ke gé. Jesus Cristo tỹ nén han mũn hã vễ.

19 Milagre hyn han sóg tĩ gé, Topê tỹ isar han kỹ. Ti kuprĩg tỹ inh krĩn kỹ sóg hyn han tĩ, milagre ti. Milagre hyn han kỹ sóg vễnh kar mỹ ti vĩ ti tó ja nĩgtĩ, Jerusalém tá, kỹ tá kãkutẽ kỹ sóg ga kar mĩ tĩg ja nĩgtĩ gé, ga tỹ Iliria mĩ hã. Vễnh kar mỹ sóg Cristo kãme sér tó ja nĩgtĩ.

20 Û tỹ tá jun tũ ra sóg tá jun vén ja nĩgtĩ, sỹ tá ti vĩ tó vén jé, ag tỹ vãhã Cristo kãme mẽ jé, ù tỹ mẽ ja tũ ag. Inh hã ne ag mỹ tó vén sór ja nĩgtĩ', isỹ ù rãnrãj ja ki rãnrãj tũ nĩ jé.

21 Hã kỹ tag tóg rán kỹ nĩ, ha mẽ: “ù tỹ ti vễme mẽ ja tũ ên ag vỹ ti ki kanhrãn ke mũ. Û tỹ ti vĩ mẽ ja tũ ag vỹ mẽnh ke mũ,” he ja tóg nĩ, Topê vĩ rá ki. Sỹ ti vĩ tag hã ki króm sór vễ.

Paulo tỹ Roma ra tĩg sór

22 Hã kỹ sóg ãjag tá jun ja tũ nĩ ver, sỹ ãjag venh há hã ra.

23 Hã ra sóg hur han kãn, tag ki inh rãnrãj ti. Vãỹ sóg to jykrén, sỹ ãjag venh tĩg jé.

24 Kỹ tóg hẽn ri ke mũn inh mỹ ki króm ke mũ ha. Sỹ ga tỹ Espanha ra tĩg sór vễ, kỹ sóg ãjag venh rãnh mũ, êpry kãkre ki, êmĩn kãkre ki. Kỹ tóg há tĩ, ãjag tỹ inh jagãgtãn ken kỹ, sỹ ãjag tá jun ken kỹ. ãjag tỹ inh jagãgtãn há han kỹ sóg tĩg há han ke mũ, Espanha ra. Hã ra sóg ãjag mré nĩ sĩ han sór mũ, ãjag tỹ isar han jé.

25 Hã ra sóg ver Jerusalém ra tĩg sór mũ. Sỹ tá Topê tũ ag mỹ jãnkamy ma tĩg ke vễ.

26 Ga tỹ Macedônia tá Jesus mré ke ag vỹ inh mỹ jãnkamy vin, ga tỹ Grécia tá Jesus mré ke ag ke gé, isỹ Jerusalém tá ùn jagãgtar nỹtĩ ag jagãgtãn jé, jãnkamy ên tỹ. Êg mré ke ag vễ gé, Jerusalém tá ùn jagtar nỹtĩ ag.

27 Macedônia tá ke ag mỹ tóg sér tĩ, ag tỹ Jerusalém tá ke ag mré jãnkamy vễnh kãpãm kỹ. Grécia tá ke ag mỹ tóg sér tĩ gé. Hã ra tóg inh mỹ há tĩ gé. Jerusalém tá ke ag vỹ Jesus ki ge vén, Judeu ag, kỹ fóg ag vỹ ag vĩ mẽ kỹ Jesus kãme mẽ ja nĩgtĩ. Hã kỹ fóg ag vỹ Judeu ag tũ mãn ja nĩ, hã vỹ: Topê vĩ, he mũ. Kỹ tóg há nĩ ha, ag tỹ mẽ kar kỹ ag mỹ ãjag tũ vễnh kãpãm kỹ, vễnh kaja jé, ag jãnkamy ti.

28 Isỹ tag han kãn kỹ, sỹ ag mỹ jãnkamy tag vin kar kỹ sóg cidade tỹ Roma tá nĩ sĩ han kar kỹ ga tỹ Espanha ra tĩg sór mũ ha.

29 Ha mẽ, isỹ ãjag ki jun ken

kỹ Cristo vĩ vĩ ãjag mỹ sér
tính mũ, ẽg tỹ jagnẽ mré ti to
vẽmẽn kỹ, isỹ ãjag mỹ ti vĩ tón
kỹ, ha vemnĩ. Tĩ vĩ sér to tóg
ẽg mỹ sér tính mũ.

³⁰ Inh kanhkã', ẽg Senhor
tỹ Jesus Cristo ki ge kỹ ãjag
tóg nỹtĩ, kỹ ãjag tóg jagnẽ to
há nỹtĩ gé, Topẽ kuprĩg tigrĩn.
Kỹ sóg ãjag mỹ tag to vĩ sór mũ
gé, ha mẽ. Iso Topẽ mré vĩmnĩ,
inh mré, to krónh ke tũg nĩ.

³¹ Judéia tá ag vĩ e nỹtĩ, ù
tỹ Jesus kato tẽ mũ ag, kỹ ag
tóg inh kato tẽ sór mũ gé. Kỹ
iso Topẽ mré vĩmnĩ, ti tỹ inh
jy nĩgãn jé, Jerusalém tá ù tỹ
Jesus ki ge kỹ nỹtĩ ag tỹ inh
mỹ vĩ há han jé gé, ti tỹ ag mỹ
há tĩ jé, sỹ jãnkamy ẽn tỹ ag
jagãgtãn sór mũ tag ti.

³² Tá kãtĩg kỹ sóg jatun mỹ
ãjag ki jun ke mũ. Kỹ tóg ẽg
kar mỹ sér tính mũ, sỹ ãjag to
pasanh tĩg ken kỹ, Topẽ tỹ isĩg
ke tag to há nĩn kỹ. Kỹ ãjag tóg
isar han ke mũ sir.

³³ Topẽ vĩ ẽg krĩ kuprãg tĩ.
Kỹ sóg ti mỹ to vĩ tĩ, ti tỹ ãjag
krĩ kãnhvy han jé. Amém.

16

Paulo tỹ ùn e mĩ ẽkrég tĩ

¹ ãjag mỹ sóg ẽg mré ke fi
tó sór mũ, Febe fi. Cidade tỹ
Cencreia tá fi tóg Jesus ki ge kỹ
nỹtĩ fag ki rĩr tĩgtĩ.

² Fi tỹ kejẽn ãjag ki jun kỹ
fi mỹ: "ha kãrã," hemnĩ. ãjag
mré fi tóg Jesus ki rã kỹ jẽ nĩ,
kỹ fi mỹ nẽn tỹ fi mỹ tũ ẽn ven
kãn nĩ. Û tỹ hẽn ri ke jagãgtãn
fi huri, inh ke gé.

³ Priscila fi mĩ sóg ẽkrég tĩ,
fi mẽn tỹ Áquila mĩ ke gé. Inh

mré fag tóg rãnhraj mág, Jesus
Cristo rãnhraj han kỹ.

⁴ Isugnĩn fag tóg kãgter
kren, inh jy nĩgãn jé. Tag hã
mĩ sóg ẽkrég tĩ, kỹ sóg fag to há
tãvĩ nĩ. Kỹ fóg kar kãmĩ Jesus
ki ge kỹ nỹtĩ ag vĩ tag tigrĩn
fag to há nỹtinh ke mũ gé, fag
tỹ inh jy nĩgãn kỹ.

⁵ Fag ãn krẽm ù ag tóg vẽn
mãn tĩ gé, culto han jé. Ẽn fag
ki sóg ẽkrég tĩ gé.

Iso há ù vĩ nĩ gé, hã vĩ:
Epêneto, he mũ. Ga tỹ Ásia tá
ù tỹ Jesus ki rã vén jan hã vẽ.
Ti mĩ sóg ẽkrég tĩ gé.

⁶ Kỹ Maria fi vĩ nĩ gé. ãjag
mỹ fi rãnhraj mág. Fi mĩ sóg
ẽkrég tĩ gé.

⁷ Kỹ sóg Adrônico mĩ ẽkrég
tĩ gé, Júnias mĩ ke gé. Inh
kanhkã ag vẽ. Inh mré ag
tóg sigse kỹ nỹtĩ ja nĩgtĩ gé.
Apóstolo ag kãmĩ ag tóg tỹ ùn
mág nỹtĩ. Vãsỹ ag tóg Jesus ki
ge jẽg, isỹ ti ki rã tũg ki.

⁸ Ampliãto mĩ sóg ẽkrég tĩ gé.
Ti to inh há tãvĩ nĩ, ẽg Senhor
tigrĩn.

⁹ Kỹ sóg Urbano mĩ ẽkrég tĩ
gé. Inh mré tóg Cristo rãnhraj
han tĩ. Kar kỹ iso há ù vĩ nĩ
gé, Estãquis ti. Ti ki sóg ẽkrég
tĩ gé.

¹⁰ Apeles mĩ sóg ẽkrég tĩ gé.
Cristo tovãnh jãvãnh ja ti nĩ.
Aristóbulo mré ke fag mĩ sóg
ẽkrég tĩ gé.

¹¹ Kar kỹ inh kanhkã ù vĩ
tã jẽ gé, Herodião ti. Ti ki sóg
ẽkrég tĩ. Kỹ sóg Narciso mré
ke fag mĩ ẽkrég tĩ, ù tỹ fag kãmĩ
ẽg Senhor ki ge kỹ nỹtĩ fag.

¹² Kỹ sóg Trifena fi ki ẽkrég
tĩ, Trifosa fi mĩ ke gé. Ẽg Sen-

hor mÿ fag rãnrãj mũgtĩ. Kÿ sóg iso há tãvĩ ù fi mũ ěkrég tí gé, hã vÿ: Pérside, he mũ. Ěg Senhor mÿ rãnrãj to fi tar tãvĩ nĩ.

13 Kÿ sóg Rufo mũ ěkrég tí. Topě ne ti kuprěg', ti mÿnh fi ke gé'. Inh mÿ fi tóg tÿ inh mÿnh ri ke nĩ, ti mÿnh fi.

14 Kÿ sóg Asíncrito mũ ěkrég tí, Flegonte mũ ke gé, Hermes mũ ke gé, Pátrobas mũ ke gé, Hermas mũ ke gé, ag mré Topě vĩ mẽ jé vėnh mãn tí ag mũ ke gé.

15 Kÿ sóg Filólogo mũ ěkrég tí, Júlia fi mũ ke gé, Nereu mũ ke gé, ti ve fi mré, Olimpas mũ ke gé, kÿ ag mré Jesus vĩ mẽ jé vėnh mãn tí ag mũ ke gé, Topě tú kar ag mũ.

16 Kÿ jagně ki nhun ke ri ke han nĩ, Jesus mré ke kar ki, jagně nĩgé kãgmĩ kÿ. Cristo ki ge kÿ nÿtĩ kar vÿ ãjag mũ ěkrég tí, ěmã kar ki ke ag.

Ón kÿ vėnh vĩ há mẽ sór tũg nĩ

17 Nén ù tó sór sóg mũ gé ver ãjag mÿ. Û ag tóg ãjag tÿ jagně to jũ han sór mũ. Ājag tÿ jagně vĩ kafãn kónãn mũ han sór ag tóg mũ. Ag pi(jé) ãjag tÿ Topě vĩ mẽ ja ěn ri ke tó tí'. Ěn ag vĩ mẽ sór tũg nĩ.

18 Ag pi(jé) ěg Senhor tÿ Cristo rãnrãj han sór tí'. Ag nug hã ki rĩr ag tóg tí'. Ag vĩ vÿ mẽ há tí, ón kÿ, kÿ ù tÿ hėn ri ke ag tóg kri fi sór mũ, ag vĩ kri, ag tÿ ag jykre kórég ki kagtĩg nÿtĩn kÿ, ù tÿ nén ù vėnhmÿ to jykrén tú ag. Inh mÿ tóg ag tÿ ù tÿ ge krĩn kónãn

ha mẽ tí. Kÿ ag vĩ mẽ sór tũg nĩ.

19 Ājag tÿ Topě vĩ kri nĩm mũ tag vÿ mẽ há tí. Vėnh kar vÿ mẽ, kÿ tóg inh mÿ sér tí sir, ãjag to. Kÿ tóg ãjag tÿ vėnh jykre há ki kanhrãn mág nÿtĩnh há tí. Ājag tÿ vėnh jykre pãno to jykrén tú pě nÿtĩn kÿ tóg há tí gé.

20 Topě vÿ ěg krĩ kuprãg tí. Kãnhmar tóg ěg mÿ Satanás tÿ tũg' henh ke mũ gé, ha vemnĩ, kÿ tóg ãjag vóg mãn ke tú nĩ ha.

Ěg Senhor tÿ Jesus mÿ sóg to vĩ tí, ti tÿ ãjag mÿ ã tÿ nén ù há ěn vin jé.

Paulo mré ke ag tÿ Roma ki ke fag mũ ěkrég tí

21 Inh mré Jesus rãnrãj han mũ tÿ Timóteo vÿ ãjag mũ ěkrég tí gé, Lúcio ti ke gé, Jasão ke gé, Sosípatro ke gé, inh kanhkã ag.

22 Û tÿ Paulo mÿ tag rán mũ vÿ tÿ inh nĩ, hã vÿ: Tércio, he mũ. Kÿ sóg ãjag mũ ěkrég tí gé, ãjag tÿ inh mré ěg Senhor ki ge kÿ nÿtĩn kÿ.

23 Gaio vÿ ãjag mũ ěkrég tí. Ti ĩn krēm sóg jě, kÿ ěg tóg ti ĩn krēm culto han tí. Erasto vÿ ãjag mũ ěkrég tí gé, ù tÿ cidade jãnkamy ki rĩr tí ěn ti. Ěg régre tÿ Quarto vÿ ãjag mũ ěkrég tí gé.

24 Ěg Senhor tÿ Jesus Cristo mÿ sóg to vĩ tí, ti tÿ ãjag kar tar han jé. Amém.

Topě mÿ ěg vĩ há han ke

25 Ha mẽ, ěg jé Topě mÿ vĩ há han. Ěg tar han ki kanhró tóg nĩ, ěg tÿ ti ki rã kar krónh

ke tũ nĩn jé. Sỹ ãjag mỹ Topě vĩ sér tó mũn hã vễ, Jesus Cristo kãmén kỹ. Vãsỹ ẽg tóg mẽ ja tũ nĩ, ti vĩ sér tag ti. Ẽg tỹ vãhã mẽ vễ, Topě tỹ ẽg mỹ to vênh jykre nĩm kỹ. Prỹg tỹ hẽn ri ke ki ag tóg mẽ ja tũ nỹtĩ, ẽg jo ke ag.

²⁶ Ủri hã ẽg tóg mẽg mũ. Vãsỹ Topě vĩ rán tĩ ag vỹ ẽg tỹ ủri mẽg mũ tag tó ja nĩgtĩ. Kỹ Topě tóg tag to: “povo kar mỹ kãmén nĩ, fóg ag mỹ, kanhgág ag mỹ, Judeu ag mré hã,” he ja nĩ, ẽg tỹ mẽ kãn jé, ti ki ge jé, ti vĩ kri fi jé, ti tỹ tỹ ẽg Senhor kar jẽ jé. Ẽ tỹ nén kar han tũg ki tóg nĩ nĩ, Topě ti, ù tỹ ti han ja tũ (hã) ra. Kỹ tóg tũ' henh ke tũ nĩ gé. Gen kỹ tóg nĩ nĩ.

²⁷ Ti hã ne ã pir mỹ nén ù kar ki kanhró nĩ', Topě ti. Jesus Cristo hã tóg ẽg mỹ Topě ven ke mũ. Kỹ ẽg tóg ti hã mỹ vĩ há han sór mũ, Topě hã mỹ, kỹ tóg krỹg henh ke tũ nĩ, ẽg tỹ ti mỹ vĩ há han mũ ti. Amém.

PAULO Tÿ CARTA HAN: CORINTO TÁ KE AG Mÿ CARTA VĒ

¹ Paulo tÿ rá vĕ. Isÿ cidade tÿ Corinto tá ke ag mÿ rán hã vĕ. Kÿ ěg régre tÿ Sóstenes vÿ inh mré rán mÿ gé. Topĕ hã ne inh kuprĕg', kÿ tóg inh jé prĕr, Jesus Cristo tÿ inh fĕg jé, sÿ tÿ ti apóstolo jĕ jé sir. Hã kÿ sóg ājag mÿ rán mÿ.

² Corinto tá ājag tóg vĕnh mãn tĩ, Topĕ vĩ mĕ jé. Topĕ tũ vÿ tÿ ājag nÿtĩ, ājag tÿ tÿ Jesus Cristo mré ke nÿtĩn kÿ. Ājag jé prĕr tóg, ājag tÿ tÿ ti tũ nÿtĩn jé.

Vĕnh kar mÿ ke vĕ gé, vĕnh rá tag ti, ũ tÿ hĕ tá ěg Senhor tÿ Jesus Cristo jiji tó tĩ ag mÿ. Ũ tÿ ti hã to: “ěg Senhor vĕ,” he tĩ ag mÿ ke vĕ gé. Ag Senhor vĕ, kÿ tóg tÿ ěg Senhor nĩ gé, Jesus ti.

³ Topĕ mÿ sóg to vĩ tĩ, ti tÿ ājag tar han jé, ti tÿ ājag krĩ kuprāg jé, ěg jóg mág ti, ěg Senhor tÿ Jesus Cristo jóg ti.

Topĕ tÿ ěg mÿ nén han mÿ vÿ há nĩ

⁴ Kurā kar ki sóg ājag to Topĕ mré vĩ tĩ. Ti mÿ sóg: “há ti nĩ, ā tÿ Jesus Cristo tugrĩn ag tar han kÿ,” he tĩ.

⁵ Ti tugnĩn ājag tóg ũn rico ag ri ke nÿtĩ, nén kar to mÿr, Topĕ vĩ to, vĕnh jykre há kar to. Ki kanhró ājag tóg nÿtĩ.

⁶ Cristo tÿ vĕme ki kanhró ājag tóg nÿtĩ mÿr, to tar ājag tóg nÿtĩ.

⁷ Hã kÿ Topĕ kuprĩg tÿ ěg mÿ nén nĩm tĩ ěn vÿ tũg' he vĕnh nĩgtĩ ājag mÿ. ěg Senhor tÿ Jesus Cristo vĕnh ven mãn ěn jāvĕnh ājag tóg mũgtĩ gé, ti kātĩg ke ti.

⁸ Ti hã vÿ ājag tar han mÿ', ājag tÿ ti tovĕnh tũ nĩ jé, ājag tÿ kygnĕg tũ nĩ jé. Kÿ ěg Senhor tÿ Jesus Cristo kātĩg mãn kÿ, ti kurā ki, kÿ tóg ājag tÿ kygnĕ ja tũ ěn venh ke mÿ sir.

⁹ Topĕ ne fagrĩnh mÿ vĩ vĕnh nĩgtĩ'. Ājag jé prĕr tóg, ājag tÿ tÿ ti kósin tÿ Jesus Cristo mré ke nÿtĩ jé, ājag tÿ tÿ ěg Senhor mré ke nÿtĩ jé gé.

Vĕnh kãpãm kÿ nÿtĩ tũg nĩ

¹⁰ Inh kanhkã', vĕnh vĩ pir han nĩ. ěg Senhor tÿ Jesus Cristo jiji ki sóg ājag jyvĕn sór mÿ, hã kÿ sóg ke mÿ. Vĕnh kãpãm sór tũg ra. Vĕnh jykre pir han sór ra. Nén pir hã to jykren nĩ. Vĕnh jykre pir hã han sór ra.

¹¹ Inh kanhkã, ājag to sóg vĕnh vĩ jagy mĕ. Cloe fi mré ke fag vÿ inh mÿ tó, kÿ fag tóg inh mÿ ājag tÿ vĕnh kãpãm sór mÿ kãmén, ājag tÿ jagnĕ to jũ sór mÿ ti.

¹² Tag mĕ sóg, ha mĕ: ājag kãmĩ ũ tóg nĕji: “tÿ sóg Paulo mré ke nĩ,” he tĩ. Kÿ ũ tóg nĕji: “tÿ sóg Apolo mré ke nĩ,” he tĩ gé. Jãvo ũ tóg: “tÿ sóg Pedro mré ke nĩ,” he tĩ, kÿ ũ tóg: “tÿ sóg Cristo mré ke nĩ,” he tĩ gé.

¹³ Cristo mÿ vĕnh kãpãm kÿ nĩ? Vó. Inh hã mÿ ājag jagfÿ cruz to sa? Vó. Inh jÿjÿ tó kÿ ājag mÿ vĕnh kygpe kÿ nÿtĩ', isÿ tÿ Paulo nĩn kÿ'? Vó, ke tũ vĕ.

14 Hã kÿ tóg inh mÿ há tĩ, ùri, sÿ ãjag kygpe ja tũ nĩ ti. Tag to sóg Topê mÿ: “há ti nĩ,” he tĩ.

15 Kÿ ãjag tóg iso: “ti jiji tó kÿ sóg kype kÿ nĩ,” he vãnh nÿtĩgtĩ. Crispo hã kype inh, kar kÿ Gaio ti ke gé.

16 Kar kÿ sóg Estéfanos fag kygpé gé. Kar inh ù kygpég tũ nĩ, hÿn, he sóg.

17 Cristo pi(jé) inh mÿ: “ha ag kygpenh tĩg,” he ja nĩ'. Inh mÿ tóg: “ha ag mÿ inh kãmén tĩg, ha inh vĩ tónh tĩg,” he ja nĩ. Kÿ sóg tó tĩgtĩ. Hã ra sóg ón kÿ tÿ vême kanhró han vãnh nĩgtĩ, ke tũ nĩ mũ ra Cristo tÿ cruz to sa ja ên tÿ nén ù tũ ri ke nĩ sir, isÿ inh vĩ kanhró tÿ ãjag krĩn sór mũ ra.

Jesus tÿ cruz to sa ja hã tó êg tĩ

18 ù mÿ êg tóg vãnh kagtĩg nÿtĩ ve nĩ, êg tÿ Jesus tÿ cruz to sa mũ ên tó kÿ. Hã ra ag tÿ nũgme ki vár ke vê. Ag jãvo tóg êg mÿ Topê tÿ há (r) nĩ, Jesus tÿ cruz to sa ti, hã kÿ êg krenkren kÿ nÿtĩ, Topê tÿ hã tigrĩn êg krenkren han kÿ.

19 Hã kÿ tóg rán kÿ nĩ, ha mē. “Ûn kanhró mág ag jykre tÿ sóg tũ' henh ke mũ, ha vemnĩ, ùn estudo mág ag tÿ nén to jykrén mũ tÿ sóg tũ' henh ke mũ,” he tóg, Topê ti.

20 Hã kÿ ón kÿ ùn kanhró mág ag pi(jé) tÿ nén ù nÿtĩ'. Ón kÿ vãnh rán tĩ ag pi(jé) tÿ nén ù nÿtĩ'. Ón kÿ ùn estudo mág ag pi(jé) tÿ nén ù nÿtĩ'. Êg tÿ tag ki nén ù ki kanhrân mũ to tóg: “nén ù tũ vê,” he ja nĩgtĩ, Topê ti. “Krĩ tũ ag nÿtĩ, ù tÿ tag

hã nón mũ sór mũ ag,” he tóg, Topê ti.

21 Topê tÿ nén to jykrén mũ vÿ ge nĩ, ha mē. Êg tÿ vêsóg ki Topê to jykrén sór mũ ra êg tóg ti ki kanhrân ja tũ nĩgtĩ, êg tÿ ga kri mũn kÿ. Hã kÿ Topê tóg êg tÿ ti vĩ jêmē kÿ kri fi kÿ êg kren han mũ. Hã kÿ tóg ag mÿ Topê krĩ tũ nĩ ve nĩ, ù tÿ ki kagtĩg ag mÿ.

22 Judeu ag ne êg tÿ nén han vãnh ve sór mũ', milagre ti, ag tÿ Topê jykre ki kanhrân jé. Kÿ fóg tÿ Grego ag ne ón kÿ ti jykre to vémén sór mũ'.

23 Ag jãvo êg tóg nén pir hã tó tĩ, hã vÿ: Cristo tÿ cruz to sa kÿ ter ja ti, he mũ. Judeu ù ag mÿ tóg jêggry tĩ, ti cruz ti, jãvo tóg Judeu tũ ag mÿ êg krĩ tũ nĩ ve nĩ, ag tÿ êg vĩ mē kÿ, fóg ù ag mÿ, kanhgág ù ag mÿ ke gé.

24 Judeu kãmĩ ù ag tóg kuprêg kÿ nÿtĩ jãvo, fóg kãmĩ ù ag tóg kuprêg kÿ nÿtĩ gé, kanhgág ag kãmĩ ke gé. Ag hã mÿ tóg há tĩ, Cristo tÿ cruz to sa kÿ ter ja ti, ùn kuprêg kÿ nÿtĩ ag mÿ. Êg hã vê. Topê jykre tar hã vê, Cristo tÿ cruz to sa ja ti. Topê krĩ há to ken hã vê, hã vÿ: Cristo ter ja ti, he mũ.

25 Topê krĩ tũ nĩ ve vÿ êprã ke krĩ há nĩ ve kãfór nĩ mÿr, ti hã ne ã pir mÿ krĩ há nĩ'. Kÿ Topê krój nĩ ve vÿ êprã ke ag tar nĩ ve kãfór nĩ gé. Topê hã ne ã pir mÿ tar nĩ'.

Topê vÿ êg kuprêg, êg tÿ tÿ nén ù tũ ra

26 Inh kanhkã', vêsó jykrén. Topê vÿ ãjag jé prêr. ãjag kãmĩ ti pipir nÿtĩ, ùn kanhró mág

ag, escola tỹ hẽn ri ke ki vẽnh kanhrãn ja ag. Ûn mág ag vỹ pipir nỹtĩ gé, ùn mág krẽ ag ke gé. Û tỹ ge kuprẽg mág tũ ti nĩgtĩ, Topẽ ti.

²⁷ Û tỹ ùn mág ag mỹ krĩ tũ nĩ ve ag hã kuprẽg ti tĩ mỹr, ùn vẽnh kagtĩg ag. Ti tỹ ùn krĩ há ag mỹ'a han sór vẽn. Kỹ tóg tag ki ùn krój nỹtĩ ag kuprẽg, ùn tar ag mỹ'a han jé.

²⁸ Hã jé Topẽ tóg ù tỹ tag ki jagtar nỹtĩ ag kuprẽg. Ûn mág ag tỹ ẽg ve kỹ ẽg tóg ag mỹ jagãgtar nỹtĩ. Nén ù tũ vỹ tỹ ẽg nỹtĩ. Hã ra Topẽ tóg ẽg kuprẽg mũ, ag tỹ tũ' hen jé, ùn mág ag vỹ tỹ.

²⁹ Hã kỹ ù tóg Topẽ mỹ: “ùn mág vỹ tỹ inh nĩ, há inh nĩ,” henh ke tũ pẽn nĩ, ẽg tỹ kejẽn ti ve kỹ. Hã jé Topẽ tóg ùn jagtar ag kuprẽg.

³⁰ Topẽ mré ke vỹ tỹ ẽg nỹtĩ, ha mẽ, ẽg tỹ tỹ Jesus Cristo mré ke nỹtĩn kỹ. Topẽ hã vỹ ẽg krĩ há han mũ', Jesus tugnĩn. Topẽ hã vỹ ẽg mỹ vẽnh pãte fón mũ', ti tigrĩn. Ti hã ne ẽg tỹ tỹ ti tũ nỹtĩ han mũ', ti tugnĩn. Ti hã ne ẽg krenkren han mũ'. Topẽ tỹ ti mỹ vẽnh jykre nĩm hã vẽn, ẽg tỹ tag han jé,

³¹ ù tỹ rán kỹ nĩ tag ti, hã vỹ: “ãjag tỹ ù to: ùn mág vỹ tỹ ti nĩ, he sór kỹ ẽg Senhor ti tómnĩ,” he mũ, Topẽ vỹ rán ki.

2

Paulo vỹ krój nĩ gé

¹ Inh kanhkã', ãjag ki sóg jun ja nĩ, sỹ ãjag mỹ Topẽ jykre tóg jé. Inh pi(jé) ãjag mỹ ón kỹ vẽnẽ kanhró han'. Inh

pi(jé) ãjag tỹ vẽnh vỹ ki kanhró jãvãn tóg'.

² Nén pir hã to sóg jykrén ja nĩgtĩ, sỹ ãjag mỹ tóg jé, hã vỹ: Jesus Cristo, he mũ, ti tỹ cruz to sa kỹ ter ja ẽn ti.

³ Krój ja inh nĩ, sỹ ãjag ki jun kỹ. Mũmẽg ja inh nĩ, kanẽ jur han ja inh nĩ, sỹ ãjag mré nĩn kỹ.

⁴ Isỹ ãjag mỹ Topẽ vỹ tóg kỹ inh pi(jé) vẽnh vỹ sĩnvĩ tỹ ãjag krĩn sór ja nĩgtĩ', inh pi(jé) inh krĩ há tỹ vẽnh vỹ kanhró tóg ja nĩgtĩ'. Topẽ kuprĩg tỹ inh jagrẽ nĩ hã tỹ sóg ãjag mỹ tóg ja nĩgtĩ', ti jykre tar tỹ.

⁵ Hã kỹ ãjag pi(jé) ẽprã ke jykre há ki ge jẽg', ẽprã ke vỹ kanhró ki'. Hỹ, hã ra ãjag tóg Topẽ jykre tar ki ge jẽg mỹr'.

Topẽ kuprĩg vỹ Topẽ tỹ nén to jykrén mũ ki kanhró nĩ

⁶ Jãvo sóg ù tỹ Jesus ki kanhró mág ag mỹ Topẽ vỹ kanhró tóg tĩ gé, ù tỹ to jykrén há ag mỹ. Hã ra ti pi(jé) tỹ ẽprã ke vỹ kanhró nĩ'. Ga kri ke ag jykre tóg tũ sóg nĩgtĩ, ùri ùn mág ag vỹ ti. Tũ' he jé tóg ke mũ, ùri ùn mág ag vỹ ti.

⁷ Topẽ vỹ kanhró tóg sóg tĩ mỹr'. Ẽn tỹ ẽg vẽnsóg ki ki kanhrãn ke tũ nĩ. Vãsỹ ẽg tóg ki kanhrãn ja tũ nĩ gé. Hã ra Topẽ tóg vãsỹ to jykrén mũ, mundo tỹ kã nĩ to hã tóg to jykrén mũ, ẽg tỹ ti vỹ ki kanhrãn jé, ẽg tỹ ti jykre ki kanhró tigrĩn tỹ ùn mág nỹtĩ jé.

⁸ Ûri ùn mág ag pi(jé) ki kanhró nỹtĩ', Topẽ jykre tag ki'. Ag tỹ ki kanhró nỹtĩ ra ag

pi(jé) Jesus tý ka to ti sanh mũ vë', ãg Senhor tý, ù tý vënh kar kãfór nĩ tag tý mÿr. Hã ra ag tóg ti ki kagtĩg nÿtĩn kÿ ag tóg cruz to ti sa ja nĩgtĩ.

⁹ Hã ra tóg rán kÿ nĩ, Topë jykre ti, hã vÿ: "Topë tóg ãg mÿ nén ù há tãvĩ kãn ja nĩ, ù tý ti to há kar mÿ mÿr," he mũ. "Û pi(jé) tag ve ja nĩ ver'. Û pi(jé) tag mē ja nĩ ver'. Ęprã ke ag pi(jé) to jykrén ja nĩ ver'. Topë hã ne to jykrén ja nĩgtĩ, ti tý ãg mÿ kãn ke ěn to," he ja tóg nĩgtĩ, Topë vĩ rán ki.

¹⁰ Kÿ tóg ãg hã mÿ tó ja nĩ. Ā kuprĩg tý tóg ãg kanhrãn ja nĩ, to. Ti kuprĩg vÿ nén kar to jykrén tĩgtĩ, Topë tý nén to jykrén mũ mré hã, ti tý vënh kar vatánh tá nén to jykrén mũ mré hã.

¹¹ Ge ti nĩ, ha mẽ. Ęprã ke tý nén to jykrén mũ ki kanhró ãg tóg nĩ. Kÿ ãg ne tý ki kanhrãn tĩ? Ęg krĩ tý ãg ki kanhrãn tĩ. Ęprã ke krĩ vÿ ěprã ke tý nén to jykrén mũ ki kanhrãn tĩ. Hã ra Topë kuprĩg vÿ Topë tý nén to jykrén mũ ki kanhrãn tĩ. Ęprã ke pi(jé) Topë tý nén to jykrén mũ ki kanhrãn tĩ', ti tý Topë kuprĩg tý jagrë tũ ra'.

¹² Hã ra Topë pi(jé) ãg mÿ ěprã ke kuprĩg tý ãg jagrë han'. Topë kuprĩg tý tóg ãg mÿ ãg jagrë han, ãg tý ti tý ãg mÿ nén nĩm mũ ki kanhró nÿtĩ jé. Ti hã vÿ ãg kren han sór mũ, ãg tý vënh krenkren han ki kagtĩg ra. Ti tý ãg mÿ nén nĩm to ken hã vë.

¹³ Hã tó sóg tĩ. Ęprã vënh kanhró pijé', sÿ ãgag mÿ tó mũ tag ti. Topë kuprĩg kanhró vë.

Hã kÿ sóg ti kuprĩg hã tý ti jykre kãmén tĩ.

¹⁴ Ęprã ke ag pi(jé) Topë kuprĩg to há nÿtĩ', ti jykre to'. Ag mÿ tóg tý Topë krĩ tũ nĩ ve nĩ. To jykrén há han ki kagtĩg ag nÿtĩ, ag tý Topë kuprĩg tý jagrë tũ nÿtĩn kÿ.

¹⁵ Û tý ti kuprĩg tý jagrë jë ěn hã ne nén kar to jykrén há han tĩ'. Kÿ ù pi(jé) ãg tý nén han mũ ěn ki kanhró nĩ', ti tý vég mũ ra, ti tý Topë kuprĩg tý jagrë tũ jën kÿ.

¹⁶ Hÿ, ù nÿ hÿn Topë tý nén to jykrén mũ ki kanhró nĩ? Û nÿ hÿn Topë kanhrãn mũ? Û tý ti kanhrãn mũ venh ke tũ ãg tóg nĩ. Jãvo Cristo hã ne ãg kanhrãn tĩ', ti tý ãg krĩ ri ke nĩn kÿ.

3

Topë camarada ag tý jagnë ri ke

¹ Inh kanhkã', inh pi(jé) ãgag mÿ Topë jykre tó kãn ja nĩ ver', sÿ ãgag mÿ tó sór mũ ra. Û tý Topë kuprĩg tý jagrë nÿtĩ tũ ri ke vÿ tý ãgag nÿtĩ, gĩr ri ke vÿ tý ãgag nÿtĩ, ãgag tý Cristo jykre to tar tũ nÿtĩn kÿ.

² Hã kÿ sóg ãgag mÿ leite ri ke hã ven ja nĩ, sÿ ãgag mÿ Topë vĩ tó kÿ. Inh pi(jé) ãgag mÿ vëjën tar ri ke ven ja nĩgtĩ', ãgag tý to tar tũ ja nÿtĩn kÿ ver. Kÿ ãgag tóg ùri to tar tũ nÿtĩ gé. Ver ãgag tóg ù tý Topë kuprĩg tý jagrë tũ nÿtĩ ve nĩ.

³ Hã kÿ ãgag tóg vënh kãpugpóv kÿ nÿtĩ, ãgag tý jagnë to jũ nÿtĩn kÿ. Hã ki ãgag tóg ěprã ke jykre han tĩ, hã ki ãgag tóg ti tý jagrë tũ nÿtĩ ve nĩ.

4 Kÿ ājag kāmī ũ ne tóg: “Paulo mré ke vỹ tỹ inh nĩ,” he tĩ'. Kÿ ũ tóg: “jāvo sóg tỹ Apolo mré ke nĩ,” he tĩ gé'. Ēprā ke jykre hā vē, ājag tỹ han mũ tag tĩ.

5 Ũ nỹ tỹ Apolo nĩ', jo ũ nỹ tỹ inh nĩ', hā vỹ: Paulo, he mũ? Topē camarada ri ke ěg nỹtĩ, kÿ ājag tóg ěg vỹ kri fi kÿ Jesus ki ge ja nĩgtĩ, ěg Senhor tỹ ājag krĩn kÿ. Ti hā vỹ ěg mÿ ěg rānrāj nĩm ja nĩ.

6 Topē vỹ krān inh, ājag kākī, kÿ Apolo vỹ ki gónh, hā ra ũ tỹ ti mog han mũ vỹ tỹ Topē nĩ.

7 Hā kÿ ũ tỹ krān mũ pi(jé) tỹ ũn mág nĩ'. Ũ tỹ ki gónh mũ pi(jé) tỹ ũn mág nĩ gé'. Pir ti nĩ, ũn mág ti, hā vỹ: Topē, he mũ, ũ tỹ ti mog han mũ ěn ti.

8 Ũ tỹ krān mũ vỹ ũ tỹ ki gónh mũ ěn ri ke nĩ. Kanhkā tá ěg tóg ěg rānrāj kaja venh ke mũ. Sÿ krān ja kaja ve jé sóg ke mũ, jāvo tóg ā tỹ ki gónh ja kaja venh ke mũ gé.

9 Topē hā mré ěg tóg rānrāj mũgtĩ. Topē japÿ ri ke ājag nỹtĩ.

Topē tỹ ěg rānrāj tugnÿm ke

Kÿ ājag tóg ti tỹ ĩn han mũ ri ke nỹtĩ gé.

10 ĩn tỹ kri jē jafā ri ke han inh, ĩn króggróg ri ke ti, sÿ ājag mÿ ti jykre tó kÿ, Topē tỹ to inh krĩn kÿ. Kÿ sóg to jykren há han, sÿ ĩn tỹ kri jē jafā ri ke ěn tar há han jē. Kÿ ājag kāmī tóg kri ĩn ri ke han mũ sir, ti tỹ isÿ ājag kanhrān nón ājag kanhrān kÿ. Kÿ ũ tỹ Topē vỹ tó mũ jé to jykren há han.

11 ĩn tỹ kri jē jafā ri ke ěn vỹ pir nĩ, hā vỹ: Jesus Cristo, he mũ, hā kÿ sóg ājag mÿ ri ke han, sÿ ti kāmén kÿ. Ũ venh ke tũ ěg tóg nĩgtĩ.

12 Kri ěg tóg ĩn ri ke hyn han tĩ. Ũ tóg ouro tỹ han mũ, ũ tóg prata tỹ han mũ, ũ tóg pó sĩnvĩ tỹ han mũ, ũ tóg ka tỹ han mũ, ũ tóg re tỹ han mũ, ũ tóg ěkre fár tỹ han mũ.

13 Kurā tỹ ěgno ki ěg tóg venh ke mũ, ĩn há ti, hā vỹ: ěg tỹ ũ mÿ ti vỹ kāmén há han ja ti, he mũ. Pĩ vỹ ěg rānrāj kókén ke mũ, kÿ ěg tóg pĩ ki ěg rānrāj jykre venh ke mũ.

14 Pĩ tỹ ti kókén vānh nĩn kÿ ěg tóg ti kaja venh ke mũ sir, ěg tỹ ĩn tỹ kri jē jafā kri han ja kaja ti.

15 Pĩ tỹ ěg rānrāj kókén kÿ ěg tóg ěg rānrāj ti kren ke mũ sir, ti tũg kÿ, ge ra ěg hā tóg kren ke mũ hā ra, ěg tỹ kanhkā ra mũn kÿ. Hā ra tóg ěg tỹ pĩ ki kren ri ke nĩ sir.

16 Ha mẽ, Topē ĩn ri ke ěg nỹtĩ, Topē kuprĩg tỹ ěg kākā jēn kÿ. Ājag mÿ tag ki kagtĩg? Ki kagtĩg nĩ ve ājag nỹtĩ.

17 Ũ tỹ Topē ĩn kókén mũ ěn kókén jé tóg ke mũ, Topē ti. Ti tũ vē mÿr, ti ĩn ti. Ājag hā vē, ti ĩn ti, ěg hā vē.

Ēg pi(jé) jagnē kāfór nỹtĩ'

18 Kygnē tũg nĩ, ājag tỹ vēso: “ki kanhró mág inh nĩ,” hen kÿ. Ājag tỹ ěprā ki kanhró mág nỹtĩn kÿ to: “nén ũ tũ vē,” hemnĩ, to: “sÿ nén ũ ki kagtĩg ri ke vē,” hemnĩ, ājag tỹ Topē jykre hā ki kanhrān jé.

¹⁹ Ęprã ki kanhró mág ag to Topê tóg: “nén ũ tũ vễ,” he tĩ. Vễnh kagtĩg ag tóg nỹtĩ, ti mỹ. Hã kỹ tag tóg rãn kỹ nĩ, ha mẽ: “ẽprã ke ag mỹ tóg ag tỹ ki kanhró mág nỹtĩ ve nĩ, hã ra Topê tóg hã ki ag mỹ ag krĩ tũ nỹtĩ ẽn ven ke mũ,” he tóg, Topê vĩ rá ki.

²⁰ Kỹ ti rá ũ vỹ ge nĩ gé, ha mẽ: “Topê vỹ ki kanhró nĩ, ũ tỹ ki kanhró mág ag tỹ nén to jykrén mũn ki. Nén ũ tũ vễ, ag tỹ nén to jykrén mũ ti. Kỹ tóg ki kanhró nĩ, Topê ti,” he tóg mũ gé, Topê vĩ rá ki.

²¹ Hã kỹ ẽprã ke jiji tó sór tũg nĩ. Ag pi(jé) tỹ ũn mág nỹtĩ'. Ājag mré ke kar ag vễ mỹr.

²² Inh hã vỹ tỹ ājag mré ke nĩ. Apolo vỹ tỹ ājag mré ke nĩ gé, Pedro ti ke gé. Mundo ki ke kar vỹ tỹ ājag tũ nĩ gé, ājag rĩnrĩr nĩ ti ke gé, ājag ter ke ti ke gé, ājag tỹ ũri vég mũ ti ke gé, ājag tỹ vãhã venh ke ti ke gé. Ājag tũ kar vễ mỹr,

²³ jãvo ājag hã ne tỹ Cristo tũ nỹtĩ', kỹ Cristo vỹ tỹ Topê tũ nĩ. Vyrmyndũ han sór tũg nĩ.

4

Apóstolo ag

¹ Ājag tỹ ẽg to jykrén kỹ tag to jykrén nĩ, ha mẽ. Cristo camarada vỹ tỹ ẽg nỹtĩ. Topê jykre tó ẽg tóg tĩ, ẽg tỹ vễsóg ki nén to jykrén vãnh ẽn. Ẽn ki rĩr ẽg tóg tĩ.

² Kỹ ẽg patrão tóg nén ũ pir ve sór nĩgtĩ, ẽg tỹ ti tũ ki rĩr mũn kỹ, hã vỹ: ẽg tỹ ki rĩr há han mũ, he mũ. Ge ti nĩ, Topê

tỹ ẽg ki nén ve sór mũ ti. Ti tũ ki rĩr há han jé ẽg tóg ke mũ.

³ Kỹ ājag tỹ isỹ nén han mũ to vĩ mũ ra tóg inh mỹ tỹ nén ũ tũ nĩ, ẽprã ke ag tỹ inh jykre to vĩ mũ ra. Kỹ isóg inh jykre to: há ti nĩ, he tũ nĩgtĩ gé.

⁴ Inh pi(jé) sỹ ti vĩ mranh mũ ki kanhró nĩ'. Hã ra sóg tag to: “hã kỹ inh jykre vỹ kuryj kar nĩ,” he tũ nĩgtĩ gé. Topê hã ne ẽg jykre tugnỹm tĩ', hã kỹ tóg ki kanhró kar nĩ, hã kỹ tóg tónh ke mũ.

⁵ Kỹ ũ jykre to vĩ sór tũg nĩ, kurã tỹ ẽgno to hã, ẽg Senhor kãtĩg ke to hã. Ti ha ne nén kar vễnh ven han ke mũ', ẽg tỹ vễnh vatánh tá nén han mũ mré hã, ẽg tỹ kuty tá nén han mũ mré hã. Kỹ tóg ẽg tỹ nén ũ to jykrén mũ ẽn vễnh ven han kãn ke mũ gé mỹr. Kỹ ẽg tóg mẽnh mũ sir, Topê tỹ ẽg mỹ vĩ há han ke ti. Vyrmyndũ ẽg mỹ tónh ke mũ, ẽg kar mỹ, ẽg tỹ nén han ja ti.

⁶ Inh kanhkã', Topê vĩ rãn ja pãtén sór tũg nĩ. Ũ tỹ ājag kanhrãn mũ to: “Topê vĩ tó tĩ ag kãmĩ kãfór vỹ tỹ ti nĩ,” he tũg nĩ. Ājag tỹ to jykrén há han jé, hã jé sóg vễnh hã to tag rãn, ājag mỹ, Apolo to ke gé, ẽg tỹ jagnẽ ri ke nỹtĩ tag ti.

⁷ Ẽg tỹ jagnẽ kãfór han sór kỹ ẽg tóg ón kỹ ke tĩ. Ha vé, Topê vỹ ẽg mỹ ẽg tũ vin kãn. Ẽg tỹ vễsóg ki mãn ja pijé'. Kỹ ājag tỹ ne jé to: “isũ vễ,” he sór nẽ? Tỹ tóg Topê tỹ ājag mỹ nĩm tũ nĩ ve nĩ, ājag tỹ to: “isũ vỹ ã tũ kãfór nĩ,” hen kỹ.

⁸ Tỹ ũn há nỹtĩ ve ājag nỹtĩ, vễnhmỹ. Rico nỹtĩ ve ājag nỹtĩ,

věnhmỹ. Tỹ ũn mág nỹtĩ ve
 ājag nỹtĩ věnhmỹ, inh jāvo. Hỹ,
 há ti nĩ vē, ājag tỹ tỹ ũn mág
 nỹtĩ ra. Kỹ sóg tỹ ājag mré ũn
 mág nĩnh mũ gé vē vē. Hã ra
 tóg ke tũ tĩ.

⁹ Jesus tỹ ũn fěg mũ vỹ tỹ
 inh nĩ, apóstolo vỹ tỹ inh nĩ.
 Hã ra tóg sỹ to jykren mũ
 ra tóg Topě tỹ isỹ ũn jykre
 kórég ag ri ke han nĩ ve nĩ, ũn
 kóněg ag ri ke, ag tỹ ũn kăgtén
 mũ ên ag ri ke. Věnh kar ne
 tóg isugnỹm tĩ', ěprã ke kar,
 Topě tỹ jěně jafã ag kar ke gé,
 mundo tag ki ke kar ag mỹr.

¹⁰ Krĩ tũ nĩ ve sóg nĩ mỹr,
 Cristo tugrĩn. Inh jāvo ājag
 tóg krĩ há nỹtĩ ve nỹtĩ, Cristo
 jykre ki. Krój inh nĩ, jāvo ājag
 tóg tar nỹtĩ ve nỹtĩ. Ājag to ag
 tóg vĩ há han tĩ, jāvo ag tóg iso
 é he tĩ.

¹¹ Hã kỹ sóg kókĩr mũ, ũri,
 kur tũ sóg nĩ gé, iso kry ag tóg
 mũ gé, jamã tũ sóg nĩ gé,

¹² ron sóg tĩ gé, sỹ inh
 rãnrãj ki ijěn ven jě. Ag tỹ iso
 é he mũ ra sóg ag mỹ nén ũ há
 tó tĩ, Topě tỹ ag mỹ han jé. Ag
 tỹ inh vóg kónãn kỹ sóg ag mỹ
 věnh nenh tũ nĩgtĩ.

¹³ Ag tỹ iso fé fé he mũ ra
 sóg koměr hã ag mỹ vĩ tĩ, ag jũ
 tỹ tũ' he jé. Vãfár ri ke inh nĩ,
 věnh kar mỹ, ag tỹ nén fón tĩ
 kar ri ke inh nĩ.

¹⁴ Inh pi(jé) ājag mỹ'a han
 sór mũ'. Hã ra sóg ājag mỹ tag
 rán, sỹ ājag jyvěn jé, ājag tỹ tỹ
 inh krě ri ke nỹtĩn kỹ, sỹ ājag
 to há tãvĩ nĩn kỹ.

¹⁵ Ũ tỹ ājag kanhrãn sór mũ
 vỹ e nỹtĩ, ũ tỹ Cristo jykre tỹ
 ājag kanhrãn sór mũ ag. Mĩl

kăfór ag nỹtĩ, hỹn. Hã ra sóg
 pir nĩ, sỹ ājag panh ri ke nĩn
 kỹ. Isỹ ājag mỹ Jesus Cristo
 kãmén kỹ sóg ājag panh ri ke
 nĩ, ti tỹ sỹ ājag hyn han ri ke
 nĩn kỹ.

¹⁶ Hã kỹ sóg ājag jyvěn mũ,
 ājag tỹ sỹ nén han mũ han jé.

¹⁷ Hã jé sóg Timóteo jěně,
 ājag to. Inh kósin ri ke ti nĩ,
 ti to inh há tãvĩ nĩ, kỹ tóg ěg
 Senhor jykre to tar nĩ. Ěn
 hã vỹ ājag mỹ tó mãn ke mũ,
 isỹ Jesus Cristo japry jagma tĩ
 ti, isỹ ti jamĩn jagma tĩ ti, isỹ
 igreja kar ki ke ag kanhrãn tĩ
 ti, ěmã kar mĩ hã.

¹⁸ Jãvo ājag kãmĩ ũ tóg vēsỹ
 ũn mág han sór mũ, iso: “kătĩg
 ke tũ pě ti nĩ,” hen kỹ.

¹⁹⁻²⁰ Hã ra sóg kãnhmar ājag
 to pasa ke kătĩg ke mũ, ha
 vemnĩ, ěg Senhor tỹ: “ha tĩg,”
 hen kỹ. Kỹ sóg ag jykre venh
 ke mũ, vēsỹ ũn mág han mũ
 ag. Ěg pi(jé) ũ vĩ tỹ Topě tỹ tỹ
 ěg pã'i nĩ ěn vėg tĩ'. Hã ra ti
 jykre tar hã tỹ ěg vėg tĩ. Hã kỹ
 inh pi(jé) ag vĩ mẽ sór mũ ver'.
 Ag jykre tar ve sór inh mũ, ũ
 tỹ vēsỹ ũn mág han mũ ag.

²¹ Kỹ isỹ ājag tá jun kỹ ne
 nỹ hỹn ājag mỹ há nĩnh mũ?
 Inh mỹ ka ma kătĩ mũ', ājag
 mrãnmrãn jé? Inh mỹ ājag mỹ
 vĩ há han ke mũ', koměr hã,
 ājag tỹ tỹ inh fe nỹtĩn kỹ? Ne
 nỹ hỹn há nĩ ājag mỹ? Ha to
 jykren.

5

Ũn prũg kónãn mũ

¹ Nén ũ tóg mẽ há tĩ ājag to,
 ke gé. Nén ũ věnhmỹ han ājag
 něji tĩ, hã ra tóg kórég pě nĩ,

ãjag kãmĩ ù tỹ nén han mũ ti. Tag mẽ inh, ha mẽ: ãjag kãmĩ ù tóg nêji ã panh prũ fi tỹ prũg mũ. Û tỹ Topẽ jykre ki kagtĩg ag pi(jé) ti ri ke han tĩ', ti jykre kórég tag ti'.

² Hã ra ãjag tóg to fe kaj tũ nýtĩgtĩ. Vēsỹ ùn mág han sór ãjag tóg mũgtĩ, vènh jykre kórég tag tỹ ãjag kãmĩ ù kãkã nỹ ra. ãjag ne tóg vēsỹrénh tũ nýtĩgtĩ', ãjag tỹ ù tỹ ti kórég tỹ ge han mũ ên kutêm jé, ãjag kãmĩ.

³ Ha mẽ, êg tỹ ti tỹ nén han ke to inh jykrén huri, sỹ ãjag mré nĩ tũ ra ver. Hã ra sóg ãjag to jykrén tĩ. Sỹ ãjag mré nĩ ri ke han sóg tĩ, sỹ ãjag mré ti to jykrén kỹ. Û tỹ vènh jykre pãno tỹ ge han mũ ên tỹ tag han nĩ, ha mẽ.

⁴ Vènh mãn jé ãjag tóg ke mũ, jó sóg ãjag mré nĩ ri ke han mũ, ãjag vènh mãn ki. Ên ki êg Senhor tỹ Jesus vỹ ãjag mẽ vènh jykre nĩm ke mũ. Kỹ ãjag tóg sir Jesus jyjy tó kỹ

⁵ ti fêg ke mũ, ùn jykre kórég ên ti, Satanás mẽ, ti tỹ ti fár kókén jé. Satanás tỹ ti fár kókén kỹ tóg hên ri ke mũn to jykrén mãn ke mũ, kỹ ti kuprĩg vỹ kren ke mũ, êg Senhor tỹ Jesus kurã ên kã.

⁶ ãjag tỹ vêsõ: “há êg nýtĩ,” he mũ ran pi(jé) há nĩgtĩ'. Ha mẽ, pão jãgja sĩ tỹ, fermento sĩ tỹ pão kar tóg són ke kỹ mog tĩ. Tag to jykrén.

⁷ Hã kỹ fón kãn nĩ, pão jãgja si ti, ãjag tỹ pão tãg han jé, ùn jãgja tũ ri ke ãjag nýtĩ, ãjag jykre ti, ti há nĩn kỹ. Kỹ vènh jykre kórég vãm kãn nĩ. Cristo

vỹ êg jagfy ter mẽr. Êg tỹ Páscoa kã cordeiro tãnh tĩ ên ri ke ti nĩ, Jesus ter ti.

⁸ Êg tỹ festa ên ko jé êg tóg pão jãgja si fón kãn tĩ. Kỹ kemnĩ gé, há vỹ: vènh jykre pãno tovãnh, he mũ, nén ù vènhmỹ han mãn tũg, he mũ, ãjag tỹ pão jãgja tũ ri ke nýtĩ jé, há vỹ: vènh jykre kuryj han nĩ, he mũ, vènh jykre pir han nĩ, he mũ gé.

⁹ Hã jé sóg ãjag mẽ rán ja nĩ, ãjag tỹ ù tỹ nén ù vènhmỹ han mũ ag mré mũ tũ nĩ jé.

¹⁰ Hã ra sóg ù tỹ Jesus ki ge tũ ag tó ja tũ nĩ, isỹ: “ag mré mũ tũg nĩ,” hen kỹ. Jykre pãno ag nýtĩ, êprã ke ag, há vỹ: nén kar to én (ka)mẽ, he mũ, nén ù péju tĩ he mũ vurmỹ topẽ han mũ, he mũ. ãjag tỹ tag ag mré vēmén sór tũ nĩn kỹ ãjag hỹn mundo tag tovãnh kỹ hê ra mũnh ke mũ. Inh pi(jé) tag tó ja nĩ'.

¹¹ Hã ra sóg ãjag mẽ ù tỹ ón kỹ tỹ êg régre nĩ ên rán mũ. Û tỹ: “tỹ inh ã mré Jesus ki rã kỹ nĩ,” he mũ ra nén ù vènhmỹ han tovãnh sór tũ nĩn kỹ ti mré tũg mãn tũg nĩ, ti tỹ nén kar to én (ka)mẽ nĩn kỹ, ti tỹ vurmỹ topẽ han kỹ, ti tỹ ù to vĩ kónãn (ka)mẽ nĩn kỹ, ti tỹ nén ù pigju(g) ti nĩn kỹ. Û tỹ ge mré nĩ sór tũg, nĩ, ti mré jên tũg nĩ gé.

¹² Êg pi(jé) êg mré ke tũ ag jykre tugnỹm ke mũ', Jesus ki ge tũ ag. ãjag tỹ êg mré ke ag jykre tugnỹm ke vè, ag jykre to: “tag vỹ há nĩ, tag vỹ kórég nĩ,” henh ke vè.

13 Topê hã ne ù ag jykre venh ke mũ', ãg mré ke tũ ag. Ëg mré ke tỹ vãnh jykre pãno han kỹ ãg ti jykre tónh ke mũ. Hã kỹ ù tỹ vãnh jykre kórég han mũ ên kutêm nĩ, ãjag kãmĩ.

6

Ëg tỹ pã'i ag mỹ ãg mré Jesus ki rã kỹ nýtĩ ù tónh ke tũ

1 Kỹ nén ù tóg vãnhmỹ tĩ gé. ãjag kãmĩ ù tóg ã mré ke to jũ kỹ Jesus mré ke tũ ag tỹ pã'i mỹ tó tĩ, pã'i ag jykre pãno ra. Ti pi(jé) Topê tũ ag mỹ tó tĩ'. Vãnhmỹ ti nĩ, tag ti.

2 Ëprã ke ag jykre tugnỹm jé ãjag tóg ke mũ mỹr, ãjag tỹ tỹ Topê tũ nýtĩn kỹ. ãjag mỹ tag mẽ ja tũ? Kỹ, ãjag tỹ ga kri ke kar jykre tugnỹm ken kỹ ãjag hỹn jagnê jykre tugnỹm há han ke mũ gé, jagnê to jũ tỹ tũ' henh ke jé ãjag tóg ke mũ gé. Ki ãjag tóg krýg mũ mỹr.

3 Topê tỹ jênê jafã ag jykre tugnỹm jé ãjag tóg ke mũ mỹr, ãjag mỹ tag mẽ ja tũ? Kỹ ãjag hỹn ãprã ke jykre tugnỹm há han ke mũ gé.

4 Ge ra ãjag tóg ãg mré ke tũ ag mỹ: "ha inh mỹ isũ ti vé," he tĩ, ù tỹ ãg mré vãnh mãn tĩ tũ ag mỹ, ag tỹ ga kri ãjag tũ ven jé.

5 Mỹ ãjag mỹ'a tũ? ãjag kãmĩ ù mỹ kri há tũ nĩ', ti tỹ ãjag jyvên jé ãjag tũ to, ãjag tỹ jagnê tũ to jykren mũ to?

6 Vãnhmỹ ti nĩ, irmão tỹ irmão ù tón kỹ, ù tỹ Jesus ki rã kỹ nĩ tũ mỹ, ti tỹ ãjag tũ ven jé.

7 ãjag tỹ jagnê tũ to jykren kónãn kỹ tóg vãnhmỹ pẽ nĩ, ãjag tỹ to jagnê to jũ kỹ mỹr. ãjag tỹ ne jé ãjag tũ tovãnh sór tũ nĩ nê? ãjag tỹ ne jé ù tỹ ãjag tũ mãn sór kỹ ti mỹ nenh ke nê? Ti hã tóg vãnh jykre pãno han mũ, ãjag tũ mãn sór kỹ. Ge ra ti mỹ nĩm nĩ. Kỹ ã tóg Topê vĩ mranh tũ nĩ, inhhã, ti tugrĩn.

8 Hã ra ãjag tóg ti mỹ nenh sór mũ. Kỹ ãjag tóg jagnê tũ to vãnh jykre kórég han tĩ gé mỹr, jagnê tũ mãn sór ãjag tóg mũ gé mỹr, ãjag mré ke tũ ên mỹr.

9 Ûn jykre pãno ag pi(jé) Topê tỹ tỹ ãg pã'i nĩ venh ke mũ'. ãjag mỹ tag mẽ ja tũ?

Ha mẽ, ker kygnê hẽ'. Û tỹ ùn mén tũ fag mré nỹ mũ ag pi(jé) venh ke mũ', Topê tỹ ãg pã'i nĩ ti. Û tỹ vyrmỹ topê han mũ ag pi(jé) venh ke mũ'. Û tỹ ã prũ ra ù fi mré nỹ mũ ên pi(jé) venh ke mũ', ù fi tỹ ã mén ra ù mré nỹ kỹ fi pi(jé) venh ke mũ'. Ûn gré tỹ ùn gré ù tỹ prũg mũ ên pi(jé) venh ke mũ'. Ûn gré tỹ ti tỹ prũg sór mũ mỹ nenh tũ ên pi(jé) venh ke mũ gé'.

10 Ûn tũ péju(g) tĩ ên pi(jé) venh ke mũ', ù tỹ nén kar to én (ka)mẽ pi(jé) venh ke mũ', ùn kron (ka)mẽ pi(jé) venh ke mũ', ù tỹ ãg to vĩ kónãn tĩ pi(jé) venh ke mũ', ù tỹ ãg vatánh tá ãg tũ mäg tĩ pi(jé) venh ke mũ'. Topê tỹ tỹ ãg pã'i nĩ venh ke tũ ag tóg nĩ, vãnh jykre tỹ ge han tĩ ag.

11 ãjag kãmĩ ù tóg vãnh jykre

tỹ ge han ja nĩgtĩ, vāsỹ, hã ra ãjag tóg vẽn kugpe kỹ nỹtĩ, ũri. Kyrũnh kỹ ãjag tóg nỹtĩ, ẽn tỹ, kỹ Topẽ tóg ãjag mỹ vẽn pãte fón ja nĩ sir, ẽg Senhor tỹ Jesus Cristo tigrĩn, Topẽ kuprĩg tugnĩn.

Ëg tỹ nén ũ vẽnhmỹ han ke tũ

12 Kỹ ãjag hỹn inh mỹ: “isỹ nén han sór mũ ẽn han jé sóg ke mũ. Topẽ vỹ ge ra inh jagãgtãn ke mũ,” he sór mũ. Vó. Nén ũ tóg ẽg mỹ nén ũ há han ke tũ nĩ, kỹ tóg ẽg tỹ ẽn han mũ ra há tũ nĩ. Ëg tỹ nén ũ han sór mũ ẽn tóg han há nỹtĩnh mũ vẽn, hã ra isỹ nén ũ kórég tỹ tãn nĩn kỹ tóg inh mỹ há tũ nĩ sir.

13 “Vẽjẽn vỹ tỹ ẽg nug tũ nĩ, kỹ ẽg nug vỹ tỹ vẽn nĩ,” he ãjag tóg tĩ. Hỹ, hã ra Topẽ vỹ tỹ tũ' henh ke mũ, vẽn tỹ, ẽg nug tỹ ke gé. Ëg han ja tóg nĩgtĩ, Topẽ ti. Hã ra ti pi(jé) ẽg tỹ tỹ ũn mén tũ mré nỹ jafã han'. Ëg Senhor tũ vẽn, ẽg, kỹ ẽg Senhor vỹ tỹ ẽg tãn nĩ sir.

14 Ëg Senhor rĩn mãn tóg, Topẽ ti, kỹ tóg ẽg rĩn mãn ke mũ gé, ti jykre tar tỹ.

15 Kỹ ẽg hã vỹ tỹ Cristo tũ nỹtĩ, ti mré ẽg tóg tỹ ũn pir ri ke nỹtĩ. ãjag mỹ tag mẽ ja tũ'? Kỹ ẽg tỹ Cristo tũ tỹ ũn mén tũ fi mré tỹ ũn pir ri ke han kỹ tóg vẽnhmỹ pẽ nĩgtĩ, fi mré nỹn kỹ. Ke tũg nĩ.

16 Ha mẽ, ũ tỹ ũn mén (ka)mẽ fi mré nỹ kỹ tóg fi mré tỹ ũn pir ri ke nĩ. Hã kỹ tóg vāsỹ tó ja nĩ. “Ũn pir ri ke fag nỹtĩ, jagnẽ mré nỹtĩ fag,” he ja tóg nĩ. ãjag mỹ tag mẽ ja tũ'?

17 Fag jãvo ẽg tỹ tỹ ẽg Senhor mré ke nỹtĩn kỹ ẽg tóg ti mré vẽn kuprĩg pir ri ke nỹtĩ gé sir.

18 Ëg tỹ ũn mén tũ mré nỹ kỹ, ẽg tỹ ũn prũg tũ mré nỹ kỹ ẽg tóg vẽn kavẽnh tĩ sir, ẽg tỹ Topẽ vỹ mranh tag tỹ. Ëg tỹ nén ũ ũ ki Topẽ vỹ mranh kỹ ẽg tóg vẽn kavẽnh tỹ ge han tũ nĩgtĩ. Hã kỹ ũn mén tũ mré nỹ tovãnh kãn nĩ, ũn prũ tũ mré nỹ tovãnh kãn nĩ gé.

19 Ëg hã vỹ Topẽ kuprĩg jo ĩn ri ke nỹtĩ. Ëg kãkã tóg jẽ nĩ, Topẽ kuprĩg ti, ti tỹ tỹ ẽg jagrẽ nĩn kỹ. Topẽ tỹ ẽg mỹ nén han hã vẽn. ãjag mỹ tag mẽ ja tũ? Hã kỹ ẽg pi(jé) tỹ vẽnh pã'i jẽ'. Topẽ krẽm ke vỹ tỹ ẽg nỹtĩ.

20 Ëg kajãm tóg mỹr, kaja e to. Hã kỹ vẽn kar mỹ Topẽ tỹ tỹ ũn há nĩ ven nĩ, ãjag tỹ ti jykre kuryj han mũn kỹ.

7

Ëg tỹ prũg há han to vẽnh jykre

1 ãjag tỹ inh mỹ vẽn rán jẽn nĩn kỹ ãjag tóg inh mỹ ãjag prũg ke ti tó ja nĩ. ãjag prũg tũ nĩn kỹ tóg há tĩ vẽn.

2 Hã ra tóg ãjag mỹ vẽnhmỹ tĩnh mũ, kỹ tóg inh mỹ ãjag tỹ ũn mén tũ fag to ẽn ha mẽ tĩ. Hã kỹ tóg há nĩ, ũ tỹ ũn pir fi tỹ prũg kỹ, fi tỹ tỹ ti prũ pẽ nĩ jé. Ũ fi tỹ ũn pir tỹ mén kỹ tóg há tĩ gé, ti tỹ fi mén pẽ nĩ jé gé.

3 Kỹ fi mén jé fi mỹ fi tũ han, fi mré nỹ kỹ, jãvo ti prũ fi jé ti tũ han, ti mré nỹ kỹ.

4 Fi pi(jé) tỹ vẽn nĩ', fi mén jẽn kỹ'. Fi mén tũ vẽn sir. Kỹ ti

hã vỹ ri ke nĩ gé. Ti pi(jé) tỹ vēsũ nĩ gé', ti prũ jẽn kỹ'. Fi tũ vễ, fi mén ti.

⁵ Hã kỹ jagně mỹ vễnh nenh tũg nĩ. Hẽn ri ke mũn ãjag kejẽn jagně mré to jykren sór mũ, ãjag tỹ kuty pipir ki jagně mré nỹ tũ nĩ jé, ãjag tỹ Topě mré vēmén jé vāsānsān jé. Kỹ tag pāte jagně mré nỹ mǎn nĩ sir, Satanás tỹ ãjag krĩn kónān tũ nĩ jé. ãjag tỹ ù mré nỹ sór kỹ tóg inh mỹ to ãjag tỹ Topě vĩ mranh ha mẽ tĩ, Satanás tỹ ãjag krĩn kỹ. Hã kỹ tóg ãjag tỹ kǎnhmar jagně mré nỹ mǎn kỹn há tĩ.

⁶ Tag kar tó sóg ãjag mỹ, ãjag krój nỹtĩn kỹ. Inh pi(jé) vễnh kar mỹ: “ha prũg, ha mén,” he sór mũ'.

⁷ Vễnh kar tỹ inh ri ke nỹtĩ ra tóg inh mỹ há tĩ vễ, isỹ prũ tũ nĩ tag ri ke. Hã ra Topě tóg vễnh kar tỹ vỹrmỹ nén ù to tar han tĩ, ěg tỹ ki króm jé. Hã kỹ ù tóg ã prũ tũ to tar nĩ, jó ù tóg ã prũ fi to tar nĩ. Topě tỹ nén han jan hã vễ.

⁸ Hã ra sóg ùn prũ tũ mỹ tag tó sór mũ, ha mẽ. ãjag tỹ inh prũ tũ ri ke nỹtĩ ra tóg há tĩ vễ, kỹ ùn mén ter ja fag tỹ mén mǎn tũ ra tóg há tĩ vễ gé.

⁹ ãjag tỹ hã ra prũg sór kỹ, ãjag tỹ mén sór kỹ tóg há tĩ gé, kỹ ãjag tóg vễnh prũg han mũ sir. ãjag tỹ prũ tũ nĩ ra fag to én kỹn pi(jé) há nĩ', ãjag tỹ ag to én kỹ ke gé'. Hã kỹ prũg nĩ, mén nĩ ãjag tỹ ù to én tũ nĩ jé.

¹⁰ ãjag kǎmĩ ù tóg prũ nỹtĩ, ù fag tóg mén nỹtĩ gé. ěg Senhor vỹ ãjag hã mỹ tag tó mũ, sỹ tónh ke tag, ha mẽ. Isỹ tó pijé',

ti tỹ tó hã nễ', ha mẽ. Ā mén fón tũg nĩ.

¹¹ Ā tỹ ge ra to fón kỹ mén mǎn tũg nĩ. Ā tỹ mén mǎn sór kỹ ã mén fón jan hã mré to jykren, ãjag tỹ jagně mré nỹtĩ mǎn jé sir. Kỹ ã prũ jẽn kỹ fi fón tũg nĩ gé. ěg Senhor tỹ tón hã vễ.

¹² Jǎvo inh hã tóg tag tó mũ ãjag mỹ, ha mẽ. ěg Senhor tỹ tó pijé', ha mẽ. ãjag kǎmĩ ù prũ fi tóg Jesus ki rǎ sór tũ nĩ, fi mén tỹ tỹ Jesus mré ke nĩ ra. Fi tỹ ti mré nĩ sór nĩn kỹ tóg fi mré nĩ ha sir. Fi tovǎnh sór tũg nĩ.

¹³ KỶ ã mén tỹ Jesus ki rǎ sór tũ ra ã mré nĩ sór kỹ ti mré nĩmĩ gé.

¹⁴ Topě tũ vỹ tỹ ã nĩ, ã mén tỹ ti ki rǎ sór tũ ra. Hã ra tóg ã mré nĩn kỹ tỹ ti tũ ri ke nĩ gé sir. Kỹ ã prũ fi tỹ Jesus ki rǎ sór tũ ra fi tóg tỹ Topě tũ ri ke nĩ gé sir, fi tỹ ã mré nĩn kỹ. Ke tũ nĩ mũ ra ãjag krẽ vỹ ti ki rǎ tũ krẽ ri ke nỹtĩnh mũ vễ, Topě mũ. Hã ra ag pi(jé) ri ke nỹtĩ'. Tỹ Topě tũ ri ke ag nỹtĩ gé sir, ãjag krẽ ti.

¹⁵ Hẽn ri ke mũn ã mén, ã prũ fi ã fón sór mũ, fi tỹ Jesus ki rǎ sór tũ nĩn kỹ. Kỹ fi mỹ, ti mỹ: “ha tĩ ge,” hemnĩ. Topě vỹ ěg krĩ kuprǎg sór mũ, hã jé tóg ěg kupręg. Hã kỹ ã pi(jé) tỹ ã mén krēm ke nĩ', ti tỹ ã tovǎnh sór kỹ, ã pi(jé) tỹ ã prũ fi krēm ke nĩ gé', fi tỹ ã tovǎnh sór kỹ, ã tỹ jesus ki rǎ tũgrĩn.

¹⁶ Hẽn ri ke mũn ti kejẽn kren ke mũ, ã jaměn kỹ, ã mén ti, hã ra ã pi(jé) ki kǎnhró nĩ', ti kren ke ti'. Hẽn ri ke mũn

fi kejën kren ke mü, ã jamën ky, ã prü fi, hä ra ã pi(jé) ki kanhró nĩ', fi kren ke ti'. Hä ky fi tĩg kamëg tũg nĩ, fi tĩg sór ky, ti tĩg sór ky ke gé.

Ëg tỹ Topë jykre hä mĩ mũnh

¹⁷ Topë tỹ ã jykre tỹ ã kuprëg ja ën hä mĩ tũg nĩ, ëg Senhor tỹ ã mỹ Vënh jykre nĩm ja ën hä mĩ. Hä tó sóg tĩ, ëg mré vënh mãn tĩ kar ag mỹ.

¹⁸ Topë vỹ ã kuprëg. Ä tỹ tỹ Israel mré ke nĩn ky ã gré junun fár vỹ kym ky nĩgtĩ. Ky tóg hä tĩ. Tỹ tũ' he sór tũg nĩ. Ä tỹ tỹ Israel mré ke tũ nĩn ky ã fár vỹ kym ky nĩ tũ nĩ. Ky tóg há tĩ gé. Kym sór tũg nĩ gé.

¹⁹ Nén ũ tũ vë, ti fár kym ke ti, ti fár kym ke tũ ti ke gé. Nén pir vỹ há nĩ, hä vỹ: ëg tỹ Topë vĩ ki króm, he mü, ëg tỹ ti tỹ ëg jyvën mü han, he mü.

²⁰ Topë tỹ hä tỹ ã kuprëg ky vënh jykre ën hä mĩ tũmnĩ.

²¹ Äjag kãmĩ ũ vỹ patrão nỹtĩ. Äjag kajãm tóg, äjag patrão ti, ëg tỹ ëg mëg kajãm ën ri ke, hä ky äjag tóg tỹ ti tũ nỹtĩ, fagrĩnh mỹ äjag tóg ti rãnrãj han ti. To krĩ kufy nỹtĩ tũg nĩ. Äjag tỹ hä ra äjag patrão tovãnh to vënh jykre há ve ky tovãnh nĩ, ti tỹ äjag tovãnh sór ky.

²² Ha vé, ëg Senhor vỹ äjag kuprëg, äjag patrão nỹtĩ ra. Äjag tỹ tỹ Cristo tũ nỹtĩn ky äjag tóg tỹ ũn patrão tũ ën ri ke nỹtĩ sir, äjag tỹ ëprã patrão krëm nỹtĩ ra. Ky äjag patrão vỹ ge nĩ gé. Ëg Senhor tỹ ti kuprëg ky tóg tỹ ti patrão jë

sir. Hä ky ũn patrão tũ ag vỹ Cristo ki ge ky tỹ Cristo krëm ke nỹtĩ. jãvo ũn patrão ag vỹ Cristo tugrĩn tỹ ũn patrão tũ ën ri ke nỹtĩ gé.

²³ Hỹ, ëg kygjãm ti mỹr, kaja e tỹ, Cristo ti. Hä ky ëprã ke ag krëm nỹtĩ sór tũg nĩ, tũ nĩ mü ra ag tóg äjag tỹ Cristo mré mü kamëg mü.

²⁴ Inh kanhkã', Topë tỹ hä tỹ äjag kuprëg ky vënh jykre ën hä mĩ mũmnĩ.

Ûn mén ja tũ fag tó vënh jykre

²⁵ Ûn mén ja tũ fag tó ja äjag tóg nĩgtĩ inh mỹ, äjag tỹ rán ki. Hä ra ëg Senhor pi(jé) fag to nén ũ tó ja nĩgtĩ'. Ky sóg to jykren ky äjag mỹ tag tó sór mü, ha më. Ëg Senhor tóg inh jagãgtãn, ky tóg isar han, sỹ to jykren há han jë.

²⁶ Ky sóg ëg tỹ ti jagy vég ti tag to jykren mü. To jykren ky tóg inh mỹ há tĩ, äjag tỹ ũri nén han mü tag tovãnh sór tũ nĩ jë.

²⁷ Ä mỹ prü jë? Ky fi fón sór tũg nĩ. Ä mỹ prü tũ jë? Ky prüg sór tũg nĩ gé.

²⁸ Ä tỹ ge ra prüg sór ky tóg há tĩ gé hä ra, Topë vỹ mranh ke tũ ã tóg nĩ, prüg ky. Ky ũn mén ja tũ fi mén ky tóg há tĩ gé sir. Topë vỹ mranh pijé'. Hä ra tóg jagy tĩnh mü. Krĩ kufy ve jë äjag tóg ke mü, tag ki, ëprã, äjag prüg ky, äjag mén ky ke gé. Hä ra tóg inh mỹ há tĩ vë, äjag krĩ kufy tũ nĩ ti.

²⁹ Inh kanhkã', inh vỹ tag jëmë ra, ha më. Kurã tỹ ëgno vỹ kãnhmar jun ke mü. Hä ky ũn mén fi jë ũn mén ja tũ fi ri

ke nĩ, ùn prũg ja tũ ri ke nĩ gé. Tag ki vẽn̄h jykre vẽn̄, fag tỹ jagnẽ mré nỹtĩg ti. Kãnhmar tóg tũ' henh ke mũ.

³⁰ Hã kỹ ù tỹ tag ki fỹ mũ jé ùn fỹ tũ ri ke nĩ. Û tỹ tag ki mỹ sér nĩ jé ùn mỹ sér vãn̄h ri ke nĩ. Û tỹ nén ù comprar he mũ jé ù tỹ nén ù comprar he tũ ri ke nĩ.

³¹ Û tỹ ga kri tỹ nén ù mág nĩ ẽn̄ jé ù tỹ nén ù tũ ẽn̄ ri ke nĩ. Tũg kãn̄ jé tóg ke mũ, ẽg tỹ tag ki nén vэг mũ ti.

³² Nén ù pir tóg inh mỹ há tĩ vẽn̄, hã vỹ: ãjag krĩ kuprã kỹ nỹtĩmĩ, he mũ, ãjag tỹ nén ù to krĩ kufy tũ nỹtĩ jé.

Ùn prũg tũ ẽn̄ vỹ ẽg Senhor tũ ki rĩr tĩgtĩ, kỹ tóg: “ẽg Senhor mỹn mỹ há nĩ vỹ, sỹ nén han mũ ti?” he tĩ.

³³ Jãvo ùn prũg mũ vỹ ẽg tỹ tag ki nén vэг tĩ ki rĩr nĩgtĩ, kỹ tóg: “inh prũ fi mỹn mỹ há nĩ vỹ, sỹ nén han mũ ti?” he tĩ gé.

³⁴ Kỹ tóg ẽg Senhor tũ ki rĩr tãvĩ han tũ nĩ sir, ùn prũ ẽn̄ ti. Kỹ fi vỹ ge nĩgtĩ gé, ùn mén ter ja fi, ùn mén ja tũ fi ke gé. Ẽg Senhor tũ ki rĩr fag tóg nĩgtĩ, fag tỹ tỹ ti tũ tãvĩ nỹtĩ jé, fag tỹ ti tũ ki króm há han jé, fag tỹ nén ù han kỹ, fag tỹ nén ù to jykrén kỹ ke gé. Ûn mén mũ fi tóg hã ra ẽg tỹ tag ki nén vэг tĩ ki rĩr nĩgtĩ, kỹ fi tóg: “inh mén mỹn mỹ há nĩ vỹ, sỹ nén han mũ ti?” he tĩ gé.

³⁵ Sỹ ãjag tũ to jykrén há han kỹ, hã kỹ sóg ãjag mỹ tag tó mũ. Inh pi(jé) ãjag mỹ vĩ tar han sór mũ', ãjag tỹ ti tỹ ãjag mỹ há tũ nĩ ẽn̄ han jé'. ãjag tỹ mũ há han kỹ tóg inh mỹ há

tĩ, ãjag tỹ ẽg Senhor tũ ki rĩr há han kỹ, nén ù tỹ ãjag kutãn tũ nĩ jé.

³⁶ Hẽn̄ ri ke mũn ti ãjag kãmĩ ù mỹ há tũ nĩ, ti kósin fi mén tũ nĩn kỹ. Hẽn̄ ri ke mũn tóg fi mỹ vẽn̄hmỹ nỹ ve nĩ, fi panh mỹ ke gé. Hẽn̄ ri ke mũn fi sanh há nĩ ha, hẽn̄ ri ke mũn fi jagtar ke mũ, fi mén ke tũ to. Kỹ tóg jatun mỹ fi tỹ ã tỹ nén han sór mũ ẽn̄ han mũ sir, fi panh ti. Há ti nĩ, fi mén ke ti. Topẽ vĩ mranh pijé'.

³⁷ Hẽn̄ ri ke mũn ù tóg to jykrén há han mũ hã ra, kỹ tóg fi mén sór tũ nĩ sir. Kỹ tóg tá krỹ nĩ, ã kósin fi ki rĩr ke ti. Kỹ tóg to jykrén mãn mũ ra tóg ti mỹ há tĩ, fi mén ke tũ ti. Tovãn̄h sór tũ ti nĩ. Kỹ tóg fi mén tũ nĩ sir. Tag vỹ há tãvĩ nĩ.

³⁸ Hã kỹ tóg ge nĩ, ha mẽ. Ti tỹ fi mén kỹ tóg há nĩ, ã kósin mén ja tũ fi. Ti tỹ fi mén tũ nĩn kỹ tóg há kãfór nĩ.

³⁹ Ûn tỹtã fag vỹ tỹ ãjag mén tũ nỹtĩ, ag rĩnrĩr nỹtĩn kỹ. Û fi mén ter kar kỹ fi hã ra ù tỹ mén sór mũ kỹ fi tóg mén mũ sir, jatun mỹ. Fi mén mãn vẽn̄ sir, Há ti nĩ. Hã ran jé tỹ ẽg Senhor mré ke nĩ, fi mén mãn ke ti.

⁴⁰ Fi tỹ mén mãn sór tũ nĩn kỹ tóg há kãfór nĩ sir, fi mỹ sér kãfór. Isỹ fag to jykrén hã vẽn̄. Hã ra sóg Topẽ kuprĩg tỹ jagrẽ nĩ, hã kỹ sóg ãjag mré to jykrén há han mũ gé.

8

Vẽn̄h kãgrã tỹ topẽ to vẽn̄h jykre

1 Kĩ sóg ãjag mĩ vễjẽn tó sór mũ gé. ãjag mễg tãnh kĩ ag tóg vễnh kãggrá tỹ topẽ mỹ pũn vẽn tĩ, pũn kar kĩ ag tóg açougue ki ãjag mỹ vễne he tĩ. Kĩ ãjag kãmĩ ù tóg: “inh mỹ açougue ki mãn kĩ konh mỹ vỹ?” he tĩ, hã kĩ sóg ãjag mỹ kãmén sór mũ.

Hã ra ãjag kãmĩ ù tóg: “ki kanhró ẽg nỹtĩ, to tar ẽg nỹtĩ,” he tĩ. “Jatun mỹ ẽg tóg konh ke mũ,” he ag tóg tĩ. Ẽg tỹ nén ù to: “ki kanhró mág inh nĩ,” hen kỹ tóg inh mỹ ẽg tỹ kãnhmar ù to: “ti pi(jé) inh ri ke nĩ, ti kãfór inh nĩ,” henh ha mẽ tĩ. Ẽg tỹ jagnẽ to há nỹtĩnh ke vễ. Ẽg tỹ jagnẽ to há nỹtĩnh kỹ ẽg tóg jagnẽ mỹ nén ù há tó tĩ, ẽg kar tỹ ki kanhrãn há han jẻ sir.

2 Ẽg tỹ nén ù to: “ki kanhró sóg nĩ, ã jãvo,” hen kỹ ẽg pi(jé) ki kanhrãn há han mũ ver'.

3 Ẽg tỹ Topẽ to há nỹtĩnh kỹ, kỹ tóg ẽg tỹ ti ki kanhrãn há han mũ sir Topẽ ti.

4 Kĩ sóg ãjag mỹ vễjẽn ẽn kãmén sór mũ, ag tỹ ón kỹ vễnh kãggrá tỹ topẽ mỹ pũn tĩ ẽn ti. Nén ù tũ vễ ón kỹ vễnh kãggrá tỹ topẽ ti. Pir ti nĩ, Topẽ ti. Topẽ ù vỹ tũ nĩ.

5 Nén ù e to ag tóg ón kỹ: “Topẽ vễ,” he tĩ, kanhkã tãn ù ag to, ga tãn ù ag to ke gé, Ừ tỹ ge vỹ e nỹtĩ, topẽ tỹ ge ti, Senhor tỹ ge ti.

6 Hã ta tóg ẽg mỹ pir nĩ, Topẽ ti, ẽg jóg mág ti, ag jãvo. Nén kar han ja ti nĩgtĩ mỹr vễnhmỹ, kỹ ẽg tóg ti hã ve sór mũ gé sir. Pir ti nĩ gé, ẽg Senhor ti, hã vỹ: Jesus Cristo,

he mũ. Nén ù kar vỹ nỹtĩ ti tugrĩn, kỹ ẽg ti tugnĩn krenkren ke mũ gé.

7 Hã ra ẽg kãmĩ ù ag tóg tag ki kagtĩg nỹtĩ ver. Tãg ti nĩ ver, ãjag tỹ ón kỹ vễnh kãggrá tỹ topẽ tovãnh mũ ti, kỹ tóg ver ag mỹ e tĩ. Hã kỹ ón kỹ vễnh kãggrá tỹ topẽ mỹ vễjẽn pũn ja ẽn tóg tỹ vễnh kãggrá tỹ topẽ ẽn tũ nĩ nễji ag mỹ. Kỹ tóg ag tũ vễjẽn ẽn ko kỹ tóg ag tỹ vễnh kãggrá tỹ topẽ ẽn tũ ko ri ke nĩ sir ag mỹ. Kỹ tóg ag mỹ há tũ tĩ sir, ag tỹ tag to krój nỹtĩnh kỹ ver. Kỹ tóg ag mỹ ag tỹ vễjẽn to vễnh kavẻnh ha mẽ tĩ.

8 Ẽg pi(jé) vễjẽn tugrĩn Topẽ to há nỹtĩ', ti to kórég nỹtĩ'. Ẽg tỹ ko tũ (hã) ra nén ù tũ vễ gé, vễnh kãggrá tỹ Topẽ mỹ pũn ja ẽn ti. Vễjẽn vễ mỹr.

9 Nén ù kar vỹ tỹ ẽg tũ nĩ.

Hã ra ùn krój tóg hẻn ri ke mũn Topẽ vĩ mranh ke mũ, ẽg tugrĩn, ti tỹ ẽg tỹ ti mỹ nén ù vễnhmỹ to tar nỹtĩ nĩ ve nĩn kỹ. Kỹ tag han sór tũg nĩ.

10 Ve ra ha. Tar ã tóg nĩ, ki kanhró ã tóg nĩ, vễnh kãggrá tỹ topẽ vỹ tỹ nén ù tũ nĩ ã mỹ. Hã kỹ ã tóg ti jo ãn krẻm rã kỹ ko mũ sir, ti festa ti, ã mrẻ ke ù tỹ ti mỹ festa han kỹ. Nén ù tũ vễ vễ. ã tỹ ti festa ko mũ ti. Hã ra ẽg mrẻ Jesus ki rã kỹ jẻ ù tóg tag to krój nĩ ver, kỹ tóg tá ã vẻg mũ sir, ã tỹ ti festa ko mũ ẽn kã. Kỹ tóg ã ve kỹ to jykrẻn mũ sir, ti festa ko sór jẻ, vễnh kãggrá tỹ topẽ mỹ festa ẽn, ti mỹ pũn ja ẽn ti. Hã ra vễnh kãggrá tỹ topẽ tóg

ti mý tar nĩ, ùn krój mý, ti tỹ Jesus ki rã ký nĩ (hã) ra.

¹¹ Ký tóg ã tỹ ko mũ tigrĩn vãfor ke mũ sir, ùn krój nĩ ti. Ti jãvo ã tóg ki kanhró nĩ, hã ra tóg ã tugnĩn tũ' henh ke mũ, ùn krój nĩ ti. Hã ra Cristo tóg ti jagfy ter ja nĩgtĩ.

¹² ã tỹ ti vĩ mranh hã vễ sir, ã régre krój ên to. Ti vóg kónãn ã tóg mũ sir, ti krój nĩn ký. Hã ki ã tóg Cristo vĩ mranh mũ sir, mýr, ha mẽ.

¹³ Hã ký sóg tag han sór tũ nĩ. Inh irmão tỹ isỹ nén ù nĩ ko to Topê vĩ mranh ký sóg nén ù nĩ ko sór mãn ke tũ nĩ ha, ón ký vễnh kãggrá tỹ topê mý pũn ja ên ti, ti tỹ mranh tũ nĩ jé sir, isugrĩn.

9

Paulo tỹ jãnkamy ve sór tũ

¹ Isỹ nén han mũ ve ra. Êprã ke ag tỹ inh mý nén tó mũ ên han sór tũ inh nĩgtĩ. Jesus hã vĩ inh fêg, isỹ tỹ apóstolo jê jé. Ti ve inh mýr, êg Senhor tỹ Jesus ti. Ký ãjag vĩ isugnĩn êg Senhor ki ge jêg. Inh rãnrãj kaja vĩ tỹ ãjag nỹtĩ.

² Hên ri ke mũn sóg ù mý tỹ apóstolo tũ nĩ. ãjag hã mý sóg tỹ apóstolo jê mýr, ãjag tỹ inh vĩ mẽ tigrĩn ti ki ge ký. Hã ki tóg ve há tĩ, êg Senhor tỹ inh fêg ja ti.

³ Ký ù tỹ kejên inh kato vĩ sór mũ mý sóg tag tó tĩ, ha mẽ.

⁴⁻⁵ Jesus tỹ ùn vin mũ ù ag ri ke inh nĩ, apóstolo ù ag ri ke, ù tỹ Jesus mré pygfa mũ ag ri ke, Pedro ri ke ke gé, isỹ vễjên to, inh prũ tũ to ag jykre han tũ ra. ãjag prũ fag pére ag mũ

tĩ, ag tỹ hên ra mũn ký. Isỹ ag ri ke ù tỹ Jesus ki rã ký jê ù fi tỹ prüg sór mũ ra sóg fi pére tũg ke mũ vễ gé, hã ra sóg ke sór tũ nĩ. Ký ag tóg ãjag jên ko tĩ, ag tỹ ãjag mý Topê vĩ tó to. Isỹ ag ri kén ãjag jên ko sór mũ ra sóg konh ke mũ vễ gé, hã ra sóg ko sór tũ nĩ.

⁶ Inh nĩgé rãnrãj ja kaja hã ko sór inh tĩ, Barnabé ti ke gé. Êg tỹ Topê vĩ tó tĩ ù ag ri kén êg nĩgé rãnrãj tovãnh sór mũ ra êg tóg tovãnh ke mũ vễ, hã ra êg tóg rãnrãj sór mũ.

⁷ Êg tỹ Topê tỹ êg mý vễnh rãnrãj nĩm kaja venh ken ký tóg há tĩ vễ. Soldado jykre ri ke ti nĩ. Ag pi(jé) ãjag tũ ko tĩ', ag tỹ vễnh génh han ký, soldado ag. ãjag vễnh génh hã to ag tóg vễjên vэг tĩ. Ký ù tỹ uva ki rĩr tĩ vĩ ti kanê ko tĩ gé. Ký ù tỹ ovelha ki rĩr tĩ vĩ fi leite kron tĩ gé. Hã ký tóg êg tỹ Topê vĩ tó to ganho ve sór mũ ra tóg há tĩ vễ, hã ra êg tóg ve sór tũ nĩ.

⁸ Êprã ke jykre ki êg tóg êg rãnrãj pẽ to êg jên vэг tĩ. Ký Topê vĩ tag tó ja nĩgtĩ.

⁹ Moisés vĩ tag rán ja nĩ, ha mẽ. “Monh tỹ êkré jãnkre ki rãnrãj ký ti jênky tógfĩn tũg nĩ, ti jên kamêg tũg nĩ,” he ja ti nĩ, Topê vĩ rá ki. Topê mý monh hã to jykren ký tag tó ja nĩ? Vó.

¹⁰ Êg to jykren hã ký tóg tag tó ja nĩ. Êg hã to tóg rán ký nĩ, êg tỹ êg rãnrãj to êg jên ve jé. Hã ký ù tỹ êpỹ ki rãnrãj mũ tóg to nén ù ve sór mũ, hã jé tóg rãnrãj jê nĩ. ù tỹ jãnkrég mũ vĩ to nén ù ve sór mũ gé, ã

rãnrãj to.

11 Isỹ ãjag mỹ kanhkã jykre tó ký tóg sỹ nén ù krãn ri ke nĩ, ký sỹ ãjag ki nén ù ve sór mũ ra tóg há tĩ vễ, ijẽn jé, hã ra sóg ve sór tũ nĩ.

12 Û ag tóg ãjag jẽn vэг tĩ, Topẽ vĩ to. Ký tóg sỹ ag ri kén ãjag ki jãnkamy ve sór mũ ra há tĩ vễ, sỹ ãjag mỹ Topẽ vĩ tó vén ký. Hã ra sóg ãjag jẽn ve sór tũ nĩ. Inh jagtar ra tóg inh mỹ tỹ nén ù tũ nĩ, ù tỹ isugrĩn Cristo kãme sér kato vĩ tũ nĩ jé, sỹ ti kaja ve tugnĩn Jesus to kórég tũ nĩ jé. Hã ký sóg ve sór tũ nĩ.

13 Û tỹ Topẽ ĩn krêm ti tũ ki rĩr tĩ ag vỹ tá ãjag jẽn vэг tĩ gé, ag tỹ Topẽ mỹ nén vin tĩ ên tỹ. Ký ù tỹ Topẽ mỹ nén ù pũn tĩ ên vỹ ti ke ko tĩ gé. ãjag mỹ tag mẽ ja tũ?

14 Hã ký êg Senhor vỹ tag tó ja nĩgtĩ gé, hã vỹ: “ù tỹ ti kãmén mũ ên vỹ tag to ãjag jẽn venh ke mũ,” he mũ.

15 Hã ra sóg ãjag jẽn ve sór ja tũ nĩ. Ký sóg ve sór tũ nĩ gé, ùri, hã ký sóg ãjag mỹ rán mũ. Isỹ ijẽn to inh nĩgé tỹ rãnrãj mũ hã to sóg tỹ ùn mág nĩnh mũ, kanhkã tá. Ký sóg tỹ tũ' he sór tũ nĩgtĩ. Iser jé tóg inh mỹ há tĩ, ù tỹ inh mỹ Topẽ vĩ kajãm sór mũ (hã) ra.

16 Jesus kãmén sóg tĩ. Inh rãnrãj hã vễ. Ti hã tóg inh mỹ tó, sỹ ti kãmén jé. Ký sóg ti tó tugrĩn tỹ ùn mág nĩnh ke tũ nĩ. Isỹ ti kãmén sór tũ ra Topẽ tóg inh vóg kónãn ke mũ vễ, isỹ inh rãnrãj han tũ nĩn ký.

17 Topẽ tỹ inh mỹ: “ha kãmén,” he tũ nĩ ra sóg

kanhkã tá to ganho venh ke vễ vễ, sỹ ti kãmén tĩ ti to. Hã ra tóg inh mỹ: “ha kãmén,” he ja nĩ, ký tóg sỹ ti rãnrãj ki rĩr há han mũ ve sór mũ sir inh ki, Topẽ ti.

18 Ký sóg kanhkã tá to ganho venh ke tũ nĩ, inh rãnrãj ja to. Hã ra sóg ganho ve sór mũ tá. Hã ký sóg êprã ke ag ki sỹ nén ve sór mũ ên ve sór tũ nĩ, ijẽn jé. ãjag tỹ inh mỹ nén vin ke ti ve sór tũ inh nĩ. Véké sóg ãjag mỹ tó tĩ, Topẽ vĩ ti, vễnh kar mỹ ke gé. ãjag tỹ inh mỹ kajãm tũ ra tóg inh mỹ há tĩ. Ký sóg tag hã to kanhkã tá inh ganho ti venh ke mũ.

Ûn e tỹ Jesus ki ge ký tóg Paulo mỹ há tĩ

19 Û pi(jé) inh kri ke nĩ'. Ge ra sóg vễsỹ vễnh kar krêm ke han, vễnh kar tỹ inh patrão ri ke nỹtĩ jé. “Hẽn ri ke mũn ù tóg Jesus ki rã sór mũ, isỹ tỹ ti krêm ke nĩn ký,” he sóg tĩ. Hã jé sóg vễsỹ ag krêm ke han tĩ, ù tỹ ti ki ge mũ ag e nỹtĩ jé, isugrĩn.

20 Judeu ag tugnĩn sóg vễsỹ Judeu han tĩ, Judeu ag tỹ Jesus ki ge jé. Isỹ ag jykre han sór tũ ra inh han ke tũ nĩ vễ, hã ra sóg han sór tĩ, isỹ ag to há nĩn ký. Ký sóg Judeu jykre han mũ ag tugrĩn ag jykre han tĩ, ù tỹ ag jykre han mũ ag tỹ Jesus ki ge jé, isugnĩn.

21 Ký fóg ag vỹ Judeu jykre han tũ nĩgtĩ, kanhgág ag ke gé. Ký sóg fóg ag tugrĩn fóg jykre han tĩ, kanhgág ag tugnĩn sóg kanhgág jykre han tĩ, ag tỹ isugrĩn Jesus ki ge jé. Inh pi(jé) Topẽ jykre tovãnh mũ

hã ra'. Cristo jykre han sóg tĩgtĩ mÿr. Judeu jykre hã tovãnh inh tĩ, fóg to, kanhgág to ke gé.

²² Kÿ sóg ùn krój ag mÿ komër hã vĩ tĩ, ag tÿ isugnĩn Jesus to vãsãnsãn mãn jé. Isÿ ùn jykre ve kÿ sóg ti jykre ri ke han tĩ, ag tÿ Jesus ki ge jé, isugrĩn.

²³ Tag kar han sóg tĩ, Jesus kãme tugnĩn, isÿ ti mré ti rãnhraj ki rĩr jé.

²⁴ Ha mẽ, ùn e tóg corrida han tĩ, hã ra ùn pir tóg ganhar ke tĩ inhhã. Ag ri ke han nĩ. Vãsãn ra, ajag tÿ ganhar ken jé, Jesus tÿ ãg mÿ nén ven ke ti.

²⁵ Ha vé, ù tÿ torneio han tĩ ag vÿ to jykrén mág tĩ, kÿ ag vãkrég tĩ gé, ag tÿ ganhar ken jé. Êprã jykre ki ag tóg ganhar ke sór tĩ, hã jé ag vãkrég tĩ, ti tÿ kãnhmar tũ' he mũ ra, ag ganho ti. Hã ra ãg tóg kanhkã tá ãg ganho venh ke mũ, ù tÿ tũg ke vanh ãn ti.

²⁶ Ge sóg tĩ gé, sÿ corrida ri ke han kÿ. Pétẽm sór inh nĩ, to krónh ke tũ sóg nĩ. Rará ri ke han sóg tĩ to. Inh pi(jé) véké rará tĩ'.

²⁷ Vẽnh hã to rá sóg tĩ, kÿ sóg isÿ nén to é n mũ ãn han ke tũ nĩ. Inh mÿ Topẽ tÿ inh fón ha mẽ tóg tĩ, isÿ ajag jyvẽn kar kÿ vẽnh jykre pãno han kÿ. Hã kÿ sóg vẽso rá tĩ, sÿ han tũg jé.

10

Ëg jo ke ag to jykrén nĩ

¹ Inh kanhkã', tag jẽmẽ ra, ajag tÿ ki kanhrãn jé. Ëg jóg'jóg ve ag vÿ Moisés mré

mũ ja nĩgtĩ. Kanhkã góg ãn krẽm ag tóg mũ kãn ja nĩgtĩ, kÿ ag tóg goj kusũg nig ãn kafã ra pa kãn ja nĩgtĩ gé.

² Ëg vẽnh kygpe ri ken hã vẽ, ag tÿ kanhkã góg krẽm mũ ja ti, ag tÿ goj kusũg nig kafã ra pa ja ti ke gé. Ën kã Moisés vÿ ag jãmĩ tĩg ja nĩgtĩ, Jesus tÿ ãg ki rĩr nĩ tag ri ke.

³ Kÿ ãg jóg'jóg ve ag tóg kanhkã tá vẽn ko kãn ja nĩgtĩ gé,

⁴ kanhkã tá goj tÿ ãganẽ ki kronkron kãn ja ag tóg nĩgtĩ gé, kanhkã tá goj tÿ vẽn kanẽ ti. Pãró tá ag tóg goj ve ja nĩgtĩ, hã ra tóg tÿ kanhkã tá ke nĩ ja nĩgtĩ. Cristo to ken hã vẽ. Ti hã vÿ ag mré ti ja nĩgtĩ. Kÿ tóg ag mÿ goj ãn ven ja nĩgtĩ.

⁵ Ge ra Topẽ tóg ãg jóg'jóg ve ag to jũ kãn ja nĩgtĩ, kÿ ag tóg kãgter kãn ja nĩgtĩ, ga kórég ãn tá. Hã ra tóg ùn pipir ag hã to há ja nĩgtĩ, Topẽ ti, kÿ ag hã tóg krenkren ja nĩgtĩ, ùn pipir ãn ag.

⁶ Hã ra tóg rán kÿ nĩ, ãg tÿ tÿ vẽnh kanhrãn jé, ãg tÿ nén ù kórég to é n tũ nĩ jé. To é n ja ag tóg nĩgtĩ, ãg jóg'jóg ve ag, kÿ ãg tag han ke tũ nĩ.

⁷ Hã kÿ ó n kÿ vẽnh kãggrá tÿ topẽ nó n mũ sór tũg nĩ. Tag han ja ag tóg nĩgtĩ gé, ãg jóg'jóg ve ag. Hã kÿ tag tóg rán kÿ nĩ, hã mẽ. "Povo kar vÿ nĩgnĩ mũ sir, ag tÿ vẽnh kãggrá tÿ topẽ to festa ko jé, ag kronkron jé sir, ag tÿ kar kÿ vẽnh gringrén jé fag mré," he ja tóg nĩgtĩ, Topẽ vĩ rán ki. Hã to Topẽ tóg ag to jũ ja nĩgtĩ gé.

⁸ Kÿ ãg ùn mèn tũ fag mré

n̄nh ke tũ nĩ gé. Tag han ja ag tóg nĩgtĩ gé, ěg jóg'jóg ve ag, k̄y kurã pir ki ù t̄y 23 mil (ke) ag v̄y kãgter ja nĩgtĩ, Topẽ t̄y ag tũg k̄y.

⁹ K̄y ěg Topẽ to: “ti h̄yn iso jũnh ke tũ nĩ, s̄y ti v̄i mranh mũ ra,” henh ke tũ nĩ gé. Ke ja ag tóg nĩgtĩ gé, ěg jóg'jóg ve ag, k̄y p̄yn tóg ag kãgtén ja nĩgtĩ, Topẽ t̄y ag to jũn k̄y.

¹⁰ K̄y ěg Topẽ to v̄i kónãn ke tũ nĩ gé. Ke ja ag tóg nĩgtĩ gé, ěg jóg'jóg ve ag, k̄y Topẽ t̄y jẽnẽ jafã tóg ag kãgtén ja nĩgtĩ.

¹¹ Hã ra Topẽ tóg ag vóg kónãn, ěg t̄y ag to v̄enh kanhrãn jé. Hã jé tóg rán k̄y nĩ gé, ti t̄y to ěg jyv̄en jé. ěg hã m̄yn kakó nĩ, kurã t̄y ěgno ti.

¹² Hã k̄y v̄eso jykrén. Ā t̄ig há han k̄y, ã t̄y ti v̄i mranh tũg k̄y tóg há tĩ. Hã jé v̄enh ki r̄ir, ã t̄y prãnh ke tũ nĩ jé.

¹³ Nén-Kórég v̄y ěg kr̄in sór mũ, ěg t̄y Topẽ v̄i mranh jé. Hã ra tóg ěprã ke jykre ki ěg kr̄in sór tũgtĩ, Japo ti. K̄y Topẽ tóg ti végtĩ, k̄y tóg ěg ki r̄ir tĩ. K̄y tóg kej̄en ti m̄y: “gen k̄y,” he tĩ sir, ti t̄y ěg kutãn tãv̄i han mũ ra ěg t̄y h̄e ri ke tũ nĩ jé. K̄y tóg ěg tar han ke mũ gé, ěg t̄y Nén-Kórég t̄y ěg kr̄in kónãn mũ ra ti kato t̄e jé, ěg t̄y ti m̄y: “hej,” he tũ nĩ jé.

V̄enh kãggrá t̄y topẽ jykre han sór tũg nĩ

¹⁴ Inh kr̄e', tag tugr̄in v̄enh kãggrá t̄y topẽ tovãnh p̄e han nĩ, ve sór tũg nĩ.

¹⁵ Ki kanhró ãjag tóg n̄ytĩ, hã k̄y ěg t̄y Jesus jamĩ ko tĩ ěn to jykrén nĩ, ha mẽ.

¹⁶ ěg t̄y Cristo ter ja mĩ ěkrén k̄y ěg tóg kron tĩ, ti kyv̄enh ri ke ěn ti. Copa ěn to Jesus tóg Topẽ mré v̄i há han ja nĩgtĩ, ag t̄y kron jé. K̄y ěg tóg to Topẽ mré v̄i kar k̄y kron tĩ sir. ěg t̄y kron k̄y ěg tóg t̄y ti mré ke n̄ytĩ sir, ěg t̄y ti kyv̄enh ri ke ěn kron k̄y. K̄y ti jamĩ v̄y ge n̄ytĩ gé. Kupãn k̄y ěg tóg ko tĩ, Cristo t̄y ěg m̄y tón k̄y. ěg t̄y kon k̄y ěg tóg t̄y ti mré ke n̄ytĩ gé sir, ěg t̄y ti nĩ ri ke ěn kon k̄y.

¹⁷ Ti jamĩ v̄y pir nĩ, k̄y ěg tóg ko kãn k̄y ěg tóg t̄y ùn pir n̄ytĩ gé, ti mré, ěg e hã ra. Jesus jamĩ ko to v̄enh jykre hã v̄e.

¹⁸ K̄y povo t̄y Israel ag to jykrén nĩ gé, ha mẽ, Israel kr̄e ag to. Topẽ m̄y ag tóg n̄en ù p̄un tĩ, ti p̄un jafã kri. P̄un k̄y ag tóg ko tĩ gé. Ag t̄y kon k̄y ag tóg t̄y ag t̄y ùn m̄y p̄un mũ ěn mré ke n̄ytĩ gé sir, ěg t̄y t̄y Jesus mré ke n̄ytĩ ri ke.

¹⁹⁻²⁰ K̄y ón k̄y v̄enh kãggrá t̄y topẽ to jykrén nĩ gé, ha mẽ. Ag t̄y v̄enh kãggrá t̄y topẽ m̄y n̄en ù p̄un k̄y ag tóg Nén-Kórég ag hã m̄y p̄un tĩ. Ag pi (jé) Topẽ p̄e m̄y p̄un tĩ'. Hã k̄y tóg inh m̄y há tũ nĩ, ãjag t̄y t̄y Nén-Kórég ag mré ke n̄ytĩn k̄y, ãjag t̄y ag tũ kon k̄y ke gé.

Inh pi(jé) ãjag m̄y: “v̄enh kãggrá t̄y topẽ v̄y n̄ytĩ, k̄y ag t̄y ag m̄y p̄un mũ ěn v̄y t̄y n̄en ù nĩ,” he sór tĩ'. Nén ù tũ v̄e, Topẽ tũ v̄e, ón k̄y v̄enh kãggrá t̄y topẽ ti.

²¹ Hã ra tóg v̄enh m̄y nĩ, ãjag t̄y ěg Senhor t̄y copa ki ke kron kar k̄y Nén-Kórég t̄y copa ki ke kron k̄y ke gé.

Věnhmỹ ti nĩ, ãjag tỹ ěg Senhor jěn ko kar Nén-Kórég ag jěn kon kỹ ke gé.

²² Ěg tỹ Nén-Kórég ag tũ kon kỹ ti hěn ri ke mũn ěg to jũnh ke mũ, ěg Senhor ti. Ti tỹ ěg to jũ nĩn kỹ tóg věnhmỹ nĩ. Ěg pi(jé) ti tỹ hě ri kenh mũ'. Hã kỹ ón kỹ věnh kaggrá tỹ topě ve sór tũg nĩ.

Ěg régre tũgrĩn ěg kejěn konh ke tũ nĩ

²³ Hã ra ãjag tóg inh mỹ: "isỹ nén han sór mũ ěn han jé sóg ke mũ, pi(jé) kórég nĩ'," he sór mũ. Há ti nĩ vē, tag ti. Hã ra ěg tỹ nén han mũ ũ tóg ěg mỹ nén ũ há han tũ nĩgtĩ. Nén ũ kar han há ěg tóg tĩ vē, hã ra ěg tỹ nén han mũ ũ tóg ěg tar han ke tũ nĩ, Jesus to.

²⁴ Kỹ ã tũ to jykrén tãvĩ han tũg nĩ, ã régre tũ to jykrén nĩ gé, ti mỹ há nĩ jé, ha mẽ.

²⁵ Kỹ ã tỹ nén ũ tãnh jafã ki nén ũ nĩ kajãm sór nĩn kỹn há tĩ, kỹ ag mỹ: "ũ mỹ ón kỹ věnh kãggrá tỹ topě mỹ ti nĩ tag pũn ja tũ?" he tũg nĩ. Jěmě tũg nĩ, jatun mỹ komnĩ.

²⁶ Topě tũ vē, ga ti, ga kri ke kar ti ke gé, hã kỹ jatun mỹ komnĩ.

²⁷ Kejěn ũ tỹ Jesus ki rã tũ ũ vỹ ã mỹ: "inh mré jěn kãtĩg," he mũ sir. Ā tũg sór kỹ ã tóg tũg mũ, kỹ ã tóg nén ũ kar konh ke mũ. Ti ki jěmě tũg nĩ, ũ tỹ hěn ri ke mũn ón kỹ věnh kãggrá tỹ topě mỹ nén ũ pũn ja ti, ã tỹ jatun mỹ ko jé.

²⁸ Hěn ri ke mũn ũ tóg sir ã mỹ: "vějěn tag ũ pũn ag, ón kỹ věnh kãggrá tỹ topě mỹ," he mũ. Kỹ ko tũg nĩ sir, ti tũgrĩn,

ũ tỹ ã mỹ tó mũ tũgnĩn, ti tỹ ã to jykrén kónãn tũ nĩ jé.

²⁹ Ā pi(jé) to jykrén mũ vē', hã ra ti hã tóg to jykrén mũ, hã kỹ tóg ã mỹ tó mũ. Há tũ ti nĩ inh mỹ, ũ tỹ iso jykrén kónãn kỹ, isỹ nén ũ tỹ inh mỹ kórég tũ han to.

³⁰ Topě mỹ sóg vējěn ěn to vĩ há han ja nĩgtĩ. Kỹ ũ tỹ tag to iso vĩ vĩ he mũ ra tóg inh mỹ kórég nĩ, sỹ Topě mỹ vĩ há han ja ěn to. Hã kỹ sóg ko sór tũ nĩ, ũ tỹ iso jykrén kónãn sór kỹ.

³¹ Hã kỹ Topě hã mỹ nén kar han nĩ, věnh kar tỹ Topě jykre há nĩ ve jé. Ā jěn kỹ ti jykre ki jěn nĩ. Ā kron kỹ ti jykre ki kron nĩ. Ā tỹ nén ũ han kỹ ti jykre hã ki han nĩ gé, věnh kar tỹ ti jykre há nĩ ve jé.

³² Ũ tỹ ã tũgrĩn Topě to jũ tũ nĩ jén há tĩ, Judeu ag, fóg ag, kanhgág ag, Topě tũ ag ke gé, ũ tỹ ěg mré ke ag. Kỹ věnh jykre há hã han nĩ.

³³ Ke sóg tĩ gé. Vãsãn sóg tĩ, věnh kar tỹ iso há nỹtĩ jé. Hã jé sóg isũ ki rĩr tãvĩ han tũ nĩgtĩ. Věnh kar tũ ki rĩr inh tĩ, ag tỹ Jesus ki ge jé.

11

¹ Inh jykre han sórmnĩ, isỹ Jesus jykre han ri ke.

Ũn tỹtã fag jykre

² Hỹ, ãjag mỹ sóg vĩ há han sór mũ mỹr. Isỹ ãjag mỹ nén tó mũ ěn to jykrén kãn ãjag tóg mũgtĩ mỹr'. Isỹ ãjag kanhrãn ěn ki króm sór ãjag tóg tĩ.

³ Hã kỹ sóg nén ũ ki ãjag kanhrãn sór mũ sir, ha mẽ. Cristo vỹ tỹ ag kri ke nĩ, kỹ ag vỹ tỹ ãjag prũ fag kri ke nỹtĩ,

kỹ Topê vỹ tỹ Cristo kri ke nĩ gé.

⁴ Kỹ ag kãmĩ ù tỹ kur tỹ vãnh kri fón kỹ Topê mré vĩ kỹ tóg há tũ nĩ, ti tỹ kur tỹ vãnh kri fón kỹ jẽn kỹ Topê vĩ tón kỹ. Ti mỹ'ag vê sir.

⁵ Ûn týtá fag tỹ hã ra kur tỹ vãnh kri fón tũ ra Topê mré vĩ kỹ tóg há tũ nĩ. Fag tỹ kur tỹ vãnh kri fón tũ ra Topê vĩ tó kỹ fag tóg ãjag kri ke ên mỹ'a han mũ sir, kỹ tóg fag mỹ'a tĩ gé sir, fag krĩ kator ri ke ti nĩ sir.

⁶ Hã kỹ tóg fag tỹ vãnh kri fón sór tũ kỹ fag krĩ kator ri ke nĩ. Hã ra tóg fag mỹ'a tĩ, fag gãnh ronh ke to, fag krĩ kator nĩnh ke to. Hã kỹ tóg há tĩ gé, fag tỹ kur tỹ vãnh kri fón ti.

⁷ Hỹ, hã vê. Ag kãmĩ ù tóg kur tỹ vãnh kri fón ke tũ nĩ, ti tỹ tỹ Topê ri ke nĩnh kỹ, êg tỹ ti tugrĩn Topê tỹ ti kri tỹ ùn mág nĩ ven kỹ. Hã ra êg tóg ùn týtá fag hã tugrĩn êg tóg ag tỹ fag kri tỹ ùn mág nỹtĩ vég tĩ.

⁸ Ha vé, Topê pi(jé) ùn ve fi tỹ ùn ve ti han ja nĩ'. Ûn ve tỹ tóg fi han ja nĩ mỹr.

⁹ Kỹn pi(jé) fi tugrĩn ti han'. Ti hã tugnĩn tóg fi han.

¹⁰ Hã kỹ ùn týtá fag tóg kur tỹ vãnh kri fón ke mũ, fag tỹ tỹ ag krêm ke nỹtĩn kỹ. Kỹ Topê tỹ jẽnê jafã ag tóg fag tỹ tỹ ag tũ nỹtĩ ki kanhró nỹtĩ sir, kur ên to.

¹¹ Hã ra êg kar vỹ êg Senhor ki ge kỹ nỹtĩ. Ti ki ge kỹ nỹtĩn kỹ ùn týtá fag pi(jé) ãjag pir mỹ tỹ nén ù nỹtĩ'. Ag mré ke fag nỹtĩ. Kỹ ag pi(jé) ãjag pir mỹ tỹ nén ù nỹtĩ gé'. Fag mré

ke ag nỹtĩ gé. Jagnê ki rĩr êg tóg tĩ ha.

¹² Hỹ, ùn týtá fi vỹ tỹ ti ki han kỹ nĩ. Hã ra ag kar tóg fag ki mur tĩ sir, jãvo êg kar vỹ tỹ Topê tỹ há (r) kar nỹtĩ.

¹³ Kỹ to jykrén, ãjag. Há tũ tóg nĩ, ùn týtá fag tỹ kur tỹ vãnh kri fón tũ ra Topê mré vēmén kỹ.

¹⁴ Fag kar vỹ kur tỹ vãnh kri fón tĩ, êg mré ke tũ fag mré hã. Hã kỹ êg vėsóg ki ki kanhró nỹtĩ, vãnh jykre tag ti. Há ti nĩ mỹr.

Ag mỹ'a tóg tĩ, ag gãnh téj ti. Vėsóg ki êg tag to jykrén tĩ.

¹⁵ Hã ra tóg fag mỹ sér tĩ, fag gãnh téj ti. Hỹ, fag gãnh vỹ tỹ fag krĩ kri fón ja ri ke nĩ.

¹⁶ Hẽn ri ke mũn ãjag kãmĩ ù mỹ tóg há tũ nĩ hã ra, fag krĩ kri fón ja ti. Kỹ tag to jykrén nĩ, ha mẽ: ã tỹ kri fón sór tũ tag pi(jé) tỹ êg jykre nĩ'. Topê tũ fag jykre pijé'. Igreja kar ki fag tóg kur tỹ vãnh kri fón tĩ, ha mẽ. Kỹ igreja krêm êg mỹ'a han sór tũg nĩ.

Santa Ceia to vãnh jykre

(Mt 26.26-28; Mc 14.22-24; Lc 22.17-20)

¹⁷ Kỹ sóg nén ù ki ãjag mỹ vỹ há han ke tũ nĩ gé. ãjag jykre ù tóg há tũ nĩ, ha mẽ. ãjag vãnh mãn kỹ ãjag nẽji, Jesus jamĩ ko kỹ ãjag nẽji jagnê jẽn vóg tĩ, kỹ ãjag nẽji jagnê kókég tĩ sir.

¹⁸ ãjag vãnh mãn kỹ ãjag nẽji jagnê kato tẽ tĩ, vãnh kãpãm kỹ, kỹ tóg inh mỹ ki hã ke ve nĩ, sỹ to jykrén kỹ. ãjag kãmĩ ù hỹn vãnh kãpãm sór tĩ, he sóg tĩ.

19 Hỹ, há ti nĩ vễ, ãjag tỹ vễnh kãpãm kỹ nỹtĩn kỹ. Kỹ ùn jykre há ag vỹ vễnh ven ke mũ, ãjag kãmĩ.

20 Kỹ, ãjag vễnh mãn kỹ ãjag pi(jé) ẽg Senhor jamĩ ko tĩ', Santa Ceia he mũ ẽn ti'.

21 Tỹ festa han kỹ ãjag kar nẽji vễnh fãn hã jé ko tĩ, ãjag fór sór kỹ. Tá jun kỹ ãjag nẽji kãnhmar ko tĩ. Kỹ ù ag nẽji vễnh fãn tĩ, vinho kron kỹ ag nẽji tỹ pépév tĩ, jó ù ag tóg kókĩnkĩr tĩ sir, ù tỹ kãnhmar tá junjun mũ ag tỹ ag tũ kaggran kỹ.

22 Ha mẽ, vễnhmỹ ti nĩ. Topẽ mré ke ag to é he mũ ve ãjag tóg nỹtĩ mỹr', ãjag tỹ ag tũ kaggran kỹ. ùn jagtar ag mỹ'a han ãjag tóg mũ mỹr', ãjag tỹ ag jẽn kaggran kỹ, ag junjun to hã. Tag tỹ inh hỹn hẽ ri kenh mũ? Inh mỹ ãjag mỹ vĩ há han ke mũ', tag to'? Vó', kenh ke tũ inh nĩ. Kórég ti nĩ, ãjag tỹ han mũ tag ti. ãjag ãn hã tá vễjẽn tỹ vễnh fãn nĩ.

23 Ha mẽ, ẽg Senhor tóg inh mỹ tó ja nĩ, sỹ ãjag mỹ tó mũ ti, ẽg tỹ ti ter to jykren kỹ tag han jé, ha mẽ. Kuty ẽn kã, Judas tỹ pã'i ag mỹ ẽg Senhor tỹ Jesus tó ja ẽn kã ẽg Senhor tóg ẽmĩ mãn ja nĩgtĩ, Jesus ti.

24 To tóg Topẽ mré vỹ ja nĩgtĩ. Kupãn kỹ tóg ag mỹ: "inh hã vễ," he ja nĩgtĩ. "ãjag jagfy sóg ter ke mũ. Kỹ inh mĩ ẽkren nĩ, ãjag tỹ pão tag kon kỹ," he ja tóg nĩgtĩ.

25 Ag tỹ ko kar kỹ tóg copa mãn ja nĩgtĩ gé sir. Kỹ tóg ag mỹ: "copa ki jẽ tag vỹ inh kyvénh ri ke nĩ," he ja

nĩgtĩ. "Inh jykre tãg to ken hã vễ, isỹ inh kyvénh tugrĩn ãjag mỹ vễnh pãte fón jé. Kỹ inh kyvénh tỹ inh ki kutẽ mũ ẽn mĩ ẽkren nĩ, ãjag tỹ copa kãkã nĩ tag kron kỹ," he ja tóg nĩgtĩ gé.

26 Hã kỹ ẽg tỹ ẽmĩ ẽn kon kỹ, ẽg tỹ copa kãkã nĩ ẽn kron kỹ ẽg tóg sir ẽg Senhor ter ti tó tĩ. Tag han ẽg tĩ, ti kãtĩg ken jo.

27 Hã kỹ vễnh jykre kórég ki ẽmĩ ẽn ko sór tũg nĩ, copa kãkã nĩ ẽn kron kónãn sór tũg nĩ gé, ẽg Senhor tũ ti. Ke tũ nĩ mũ ra tóg ẽg tỹ ti ter to é he ri ke nĩ, ẽg tỹ ti kyvénh kutẽ to é he ri ke ti nĩ, ẽg tỹ ẽg jykre kórég ra kron kỹ.

28 Hã kỹ ẽg jé ẽg jykre tugnỹm. Tugnỹm kar kỹ, ti há nĩ ve kar kỹ ẽg tóg ẽmĩ ẽn konh mũ, copa kãkã nĩ ẽn kron ke mũ gé.

29 Ẽg tỹ ón kỹ ko sór kỹ, ón kỹ kron sór kỹ, ti tỹ ẽg mỹ vễjẽn ù ri ke nĩn kỹ Topẽ tóg ẽg vóg kónãn ke mũ sir, ẽg tỹ ẽmĩ ẽn to ẽg Senhor ter mĩ ẽkrég tũ nĩn kỹ. Kỹ ẽg tóg Topẽ tỹ ẽg vóg kónãn hã jé tỹ nẽn ù tũ han kỹ ko' he mũ, kron' he mũ gé sir.

30 ãjag tỹ Jesus jamĩ ko to vễnh ki rĩr há han tũ nỹtĩn kỹ, hã kỹ ù ag tóg krónhkrój nỹtĩ, ãjag kãmĩ, kỹ ù ag tóg kaga nỹtĩ, kỹ ù tỹ hẽn ri ke ag tóg kãgter huri ke gé.

31 Ha vé, ẽg tỹ ẽg jykre tugnỹm kỹ ti mỹ tó kỹ tóg ẽg mỹ vễnh pãte fón ke mũ. Kỹ tóg ẽg jykre tugnỹm mãn ke tũ nĩ sir, ẽg vóg kónãn ke tũ tóg nĩ gé, ẽg Senhor ti.

32 Hã ra tóg kejën ãg vóg kónãn tí. Æg Senhor tý ãg kanhrãn sór vë, ti tý ãg tý kygnë to ãg vóg kónãn ký, ti tý ãg vãm tú nĩ jé, ù tý ti vĩ mranh mũ ag mré hã.

33 Inh kanhkã', tag to jykren, ký jagnë jãvãnh nĩ, ãjag tý vëjën tý Santa Ceia ko sór ký.

34 Æjag kãmĩ ù kókĩr nĩn ký tóg ã ãn tá ã jën tý vënh fãn ke mũ, ke tú nĩ mũ ra tóg ãjag vóg kónãn ke mũ, ãg Senhor ti, ãjag tý vënh mãn ký vënh fãnfãn ký.

Sỹ ãjag mẽ nén tónh ke ù tóg nỹtĩ ke gé, hã ra sóg rán ke tú nĩ. Sỹ ãjag mré nĩnh ken ký sóg ãjag mẽ kãmén ke mũ.

12

Topë vỹ ãg tar han mũ, ti kuprĩg tý

1 Ký sóg ãjag mẽ Topë kuprĩg tý ãg krĩn ke tag tó sór mũ, ãjag tý inh ki jëmën ký. Kejën tóg nén ù to ãg tar han tí, ãg tý han jé, Topë kuprĩg ti.

2 Ha vé, vãsỹ, ãjag tý Jesus ki ge tũg ki ãjag tóg òn ký vënh kãggrá tý topë nón mũ ja nĩgtĩ gé. Vĩ vãnh ti nỹtĩ, vënh kãggrá tý topë ti, hã ra Japo vỹ ãjag tý ag ki rã han ja nĩgtĩ.

3 Hã ký sóg tag to ãjag kanhrãn sór mũ, ha mẽ. Topë kuprĩg tý ãg krĩn ký ãg pi(jé) Jesus to: “Nén-Kórég ag pã'i mág,” he tí'. Jãvo ãg tý Jesus mẽ: “ãg Senhor,” hen ký Topë kuprĩg tóg ãg krĩn mũ sir, ke tú nĩ mũ ra ãg ti mẽ: “ãg Senhor,” he vãnh nĩ sir.

4 Ký Topë kuprĩg vỹ tý ùn pir nĩ, hã ra tóg ãg tar han tí, nén ù kar to. Vyrmỹ tóg ãg tãn tí', ãg tãn tí' he tí.

5 Ký ãg rãnhraj vỹ e nỹtĩ gé, ãg kar vỹ vyrmỹ rãnhraj nỹtĩ gé, hã ra tóg pir nĩ, ãg Senhor ti, ù tý ãg mẽ vënh rãnhraj nĩm tí ti.

6 Ký ãg tý ti jykre ki nén ù hyn han mũ vỹ e nỹtĩ, hã ra tóg pir nĩ, Topë ti, ù tý ãg tar han mũ ti.

7 Ký Topë kuprĩg vỹ ãg tar han kãn tí sir, ký tóg ù tý nén ù to tãn ký nĩ han tí, jó tóg ù tý nén ù ù to tãn ký nĩ han tí gé, ãg kar tý jagnë mẽ nén ù há han jé, ãg tý nén ù to tar nỹtĩ ãn tý.

8 Hã ký Topë kuprĩg tóg ù tar han tí, ti tý ãg mẽ ti vỹ kãmén há han jé sir. Û tar han tóg tí gé, ti tý Topë vỹ ki nén ù kar ki kanhró nĩ jé.

9 Ký Topë kuprĩg tóg ù tar han tí, ti tý ti ki fé mág to. Û tar han tóg tí gé, ti tý ùn kagyga tý há' he jé, Topë kuprĩg ãn ti mẽr.

10 Û tar han tóg tí gé, ti tý ãg tý nén han vãnh han jé, ù tar han tóg tí, ti tý ãg jyvën há han jé, ký tóg ù tar han tí, ti tý: “tag vỹ tý vënh jagrë há nĩ, tag vỹ tý vënh jagrë kórég nĩ,” he jé. Û tar han tóg tí, ti tý ãg tý vënh vỹ ki kagtũg ki Topë mré vëmén jé, ký tóg ù tar han tí, ti tý ãg tý vënh vỹ ki kagtũg mẽ ký ãg vỹ ki tó jé sir.

11 Hã ra tóg pir nĩ, Topë kuprĩg ti. Ti pir nĩ ra tóg nén ù e tag hyn han tí, ký tóg to ãg tar han tí. Ti hã ne to

vykrén ký: “tag tar han jé sóg ke mũ, tag to, jó sóg ù ên tar han ke mũ, ên to,” he tí'. Ký tóg vurmỹ ù tar han', vurmỹ ù tar han' he tí sir.

Nén ù pir ri ke ěg nýtĩ, ěg jagrě pir nĩn ký

12 Ěg há to jykren nĩ, ha mẽ. Ěg há vỹ tỹ ùn pir nĩ, hã ra ěg há ki nýtĩ vỹ e nýtĩ, ěg pěn, ěg nĩgé, ěg nĩgrěg, ti kar ti. Ký ěg há ki nýtĩ kar vỹ tỹ ěg há nĩ sir. Nén ù pir vě sir, ti e nýtĩ ra, ti tỹ ěg ki nýtĩ kar nĩn ký. Tag ri ke ěg nýtĩ gé. Cristo há ri ke ěg nýtĩ, ěg tỹ ti ki ge ký nýtĩn ký.

13 Topě kuprĩg vỹ tỹ ùn pir nĩ, ký ěg kar vỹ kygpe ký nýtĩ, ti kuprĩg tỹ, hã vỹ: Cristo há pir, he mũ. Ěg kãmĩ ù ag tóg tỹ povo tỹ Israel ag ki ke nýtĩ, ù ag tóg tỹ povo ù ag ki ke nýtĩ gé, ù ag tóg ěprã ke tỹ patrão nýtĩ, jó ù ag tóg patrão tũ nýtĩ. Hã ra Topě kuprĩg vỹ tỹ ùn pir nĩ, ěg jagrě ti, ký tóg tỹ ěg jagrě kar nĩ, ti pir nĩ hã ra. Nén ù pir vỹ tỹ ěg nýtĩ.

14 Ěg há vỹ ge nĩ, ha mẽ. Ěg há ki nýtĩ pi(jé) tỹ ùn pir nĩ'. E ti nýtĩ, ěg há ki nýtĩ ti. Ký ěg jé ěg rãnrãj to vĩ vĩ he tũ nĩ.

15 Hěn ri ke mũn ěg pěn tóg to jykren ký: “inh pi(jé) tỹ věnh nĩgé nĩ', hã ký sóg věnh há ki nýtĩ tũ nĩ,” he tí. Hã tũ vě hã ra. Ěg há ki nýtĩ ti nĩ, ěg pěn ti, ti tỹ tỹ ěg nĩgé tũ nĩ ra.

16 Ký ěg nĩgrěg tóg to jykren ký hěn ri ke mũn: “inh pi(jé) tỹ věnh kaně nĩ', hã ký sóg věnh há ki nýtĩ tũ nĩ,” he tí gé. Hã tũ vě mỹr.

17 Ěg há tỹ tỹ věnh kaně tãvĩ nĩ hã ra ěg ne tỹ jěměnh mũ vě? Ěg há tỹ tỹ věnh nĩgrěg tãvĩ nĩ hã ra ěg něn ù ger mẽnh ke tũ nĩ vě.

18 Topě hã ne ěg há ki nýtĩ hyn han kãn', ký tóg ti ki nýtĩ kar mỹ vurmỹ věnh jykre vin kãn ja nĩgtĩ, ti tỹ ã rãnrãj ên han jé. Topě tỹ něn to jykren jan hã vě.

19 Ký ti ki nýtĩ kar tỹ věnh jykre pir nĩ ra ěg há vỹ tũ nĩ vě.

20 Há ti nĩ, Topě jykre ti. Ěg há ki nýtĩ jykre e han ti, ti e tỹ ěg há pir han jé sir.

21 Hã ký ěg kaně pi(jé) ěg nĩgé mỹ: “ã pi(jé) inh mré rãnrãj tí',” he tí'. Ký ěg krĩ vỹ ge nĩgtĩ gé. Ěg pěn mỹ ti: “ã pi(jé) inh mré rãnrãj tí',” he tũ nĩgtĩ gé.

22 Ge tũ ti nĩ, ěg há jykre ti. Ěg há ki nýtĩ ù tóg rãnrãj krój han nĩ ve nĩ, hã ra ěg tóg jarĩn mỹ tỹ jagně mré rãnrãj kãn tí.

23 Ký ti ki nýtĩ ù tóg rãnrãj kufy han tí, ký ěg tóg hã ra ti ki rĩr há han tí sir. Ký ti ki nýtĩ ù tóg ěg mỹ sĩnvĩ tũ nýtĩ, hã ký ěg tóg kur krēm ti rãg tí.

24 Ů tỹ ěg mỹ sĩnvĩ nýtĩ tỹ ěg tóg kur krēm rãg tũ nĩgtĩ sir. Ký Topě tóg ěg mỹ věnh jykre nĩm, ěg tỹ ti ki nýtĩ tỹ věnh rãnrãj kufy han mũ ên ki rĩr há han jé sir. Ěg há jykre hã vě. Topě vỹ to jykren kãn, ký tóg ěg há ki nýtĩ han kãn,

25 ěg há tỹ věnh jykre pir han jé. Ký tóg ti mỹ há tí, ěg tỹ ěg mré Jesus ki ge ký nýtĩ kar ag ki rĩr há han ký. Ěg tỹ jagně

ki rĩr há han k̄y ěg kāmĩ ũ vỹ jagtar tũ nỹtĩnh mũ, ěg tỹ ěg há ki nỹtĩ jykre pir ri ke han kãn k̄y, jagně mỹ.

²⁶ Hỹ, ěg há ki nỹtĩ pir kaga nĩn k̄y tóg kaga kãn tũ sir. K̄y tóg ge nĩ gé, ěg mré. Jagně mré tóg ěg mỹ e tĩ. K̄y ũ tỹ ěg kāmĩ ũ mỹ vĩ há han k̄y tóg ěg kar mỹ sér tĩ gé sir.

²⁷ Ha mẽ, Cristo há ri ke ěg nỹtĩ, k̄y ěg kar vỹ ti há ki nỹtĩ ri ke nỹtĩ gé sir.

²⁸ K̄y Topě tóg ũ tỹ igreja ki ke kar mỹ věnh rãnhrāj vin kãn, ěg mỹ. ěg kāmĩ ũ ag vin tóg, ag tỹ tỹ apóstolo nỹtĩ jé. Tag pãte tóg ũ ag vin, ag tỹ jagně jykre ki kanhrãn k̄y jagně jyvěn jé. Tag pãte tóg ũ ag vin, ag tỹ tỹ ti vĩ tó jafã nỹtĩ jé. K̄y tóg ũ ag vin, ag tỹ ěg tỹ nén han vãn hyn han jé. K̄y tóg ũ ag vin, ag tỹ ũn kagyga tỹ há' he jé. K̄y tóg ũ ag vin, ag tỹ ũ jagãgtãn jé. K̄y tóg ũ ag vin, ag tỹ tỹ igreja krēm tỹ pã'i nỹtĩ jé. K̄y tóg ũ ag vin, ag tỹ ěg tỹ věnh vĩ ki kagtĩg ki Topě mré vēmén jé.

²⁹ ěg kar pi(jé) tỹ apóstolo nỹtĩ'. ěg kar pi(jé) tỹ věnh jyvěn jafã nỹtĩ'. ěg kar pi(jé) tỹ Topě vĩ kãmén jafã nỹtĩ'. ěg kar pi(jé) ěg tỹ nén han vãn hyn han tĩ'.

³⁰ ěg kar pi(jé) ũn kagyga tỹ há' he tĩ'. ěg kar pi(jé) ěg tỹ věnh vĩ ki kagtĩg tỹ Topě mré vēmén tĩ'. ěg kar pi(jé) věnh vĩ ěn mẽ k̄y ěg vĩ ki hã tó tĩ'.

³¹ K̄y Topě mỹ to vĩ mág, ti kuprĩg tỹ nén ũ há to ājag tar han jé, ājag kar tỹ jagně mré

rãnhrāj kãn jé sir.

Ājag tỹ nén han mũ ũ tóg há sĩ nĩ, k̄y ũ tóg há tãvĩ nĩ gé. K̄y sóg ājag mỹ nén ũ há tãvĩ kãmén sór mũ, ha mẽ.

13

Věnh kar to há nỹtĩmnĩ

¹ Hěn ri ke mũn ěg tóg ěprã ke ag vỹ tỹ hěn ri ke tó há nỹtĩgtĩ, Topě tỹ jěně jafã ag vỹ mré hã. ěg tỹ jarĩn mỹ věnh kar to há tũ nỹtĩn k̄y ěg tóg ón k̄y ke nĩ hã ra, ěg vỹ tag ti. ěg tỹ věnh kar to há tũ nỹtĩn k̄y ěg tóg ón k̄y vĩ há han tĩ, ferro tỹ véké kyr ri ke, sino tỹ kejěn ón k̄y kyr ěn ri ke.

² Hěn ri ke mũn ěg tóg věnh jyvěn há han tĩgtĩ. Topě hěn ri ke mũn nén ũ kar tó tĩ ěg mỹ, ěprã ke jykre ki kanhró kar ěg nỹtĩ hěn ri ke mũn. Hěn ri ke mũn ěg tóg Topě ki rã há han k̄y nỹtĩ, k̄y ěg ti vĩ to: “hỹ mỹ vỹ?” he tũ pě nĩgtĩ. K̄y ěg tóg pãnónh mỹ: “ha tĩg,” he tĩ, hã ra tóg sir tĩ tĩ. ěg tỹ jarĩn mỹ věnh kar to há tũ nỹtĩn k̄y tóg tỹ ón k̄y ke nĩ.

³ Hěn ri ke mũn ěg tóg ěg tũ vin kãn tĩ, ũn jagtar ag mỹ. Hěn ri ke mũn ěg tóg ũ tỹ Jesus kato tẽ mũ ag mỹ věnh fěg mũ, ag tỹ ěg pũn jé. ěg tỹ jarĩn mỹ věnh kar to há tũ nỹtĩn k̄y tóg ěg mỹ nén ũ há han ke tũ nĩ.

⁴ ěg tỹ věnh kar to há nỹtĩn k̄y ěg tóg věnh kar to fen nỹtĩ. Ag mỹ ěg tóg nén há kar han sór mũ. ěg pi(jé) jagně tũ to ěn ke mũ'. “Ā kãfór vỹ tỹ inh nĩ,” henh ke tũ ěg tóg nĩ. “Ūn mág

vỹ tỹ inh nĩ,” henh ke tũ ãg tóg nĩ gé.

⁵ Vẽnhmỹ mẽ han ke tũ ãg tóg nĩ gé, ãg tũ távĩ hã to jykrén ke tũ ãg tóg nĩ gé. “Ti hỹn ne ki kanhrãn ke tũ pẽ nĩ,” henh ke tũ ãg tóg nĩ gé. Kỹ ù tỹ ãg vóg kónãn mũ ra ãg tóg ti to jũnh ke tũ nĩ gé.

⁶ ãg tỹ vẽn h jykre pãno ven kỹn pi(jé) ãg mỹ sér tĩnh mũ'. ãg tỹ ù tỹ ki hã tó mũ mẽ kỹ tóg ãg mỹ sér tĩnh mũ.

⁷ ãg tỹ nén ù jagy vég mũ ra ãg pi(jé) to vĩnh ke mũ'. Nén ù kar to ãg tóg: “Topẽ vỹ tag han há nĩ,” henh ke mũ. Ti hã ki ãg tóg nén ù kar ve sór ke mũ. Vẽn kar ki ãg fe mág nỹtĩnh mũ, ãg tỹ vẽn kar to há nỹtĩn kỹ.

⁸ ãg tỹ vẽn kar to há nỹtĩ ãn vỹ krỹg ja tũ nĩnh mũ. Jãvo ãg tỹ jagnẽ jykre ki vẽn kanhrãn kỹ jagnẽ jyvẽn tĩ ãn vỹ krỹg ja nỹ. ãg tỹ ãg tỹ vẽn vĩ ki kagtĩg tỹ Topẽ mré vēmén tĩ ãn vỹ krỹg ja nỹ gé. ãg tỹ ãprã nén ù ki kanhró nỹtĩ ãn kar vỹ krỹg ja nỹ gé.

⁹ Ūri ãg tóg nén sĩ hã ki kanhró nỹtĩ. Nén sĩ tỹ ãg tóg jagnẽ jyvẽn tĩ, Topẽ tỹ ãg mỹ tó tỹ. ãg pi(jé) ki kanhrãn kãn kỹ nỹtĩ ver'.

¹⁰ Kãn hmar tóg vẽn ven ke mũ, ù tỹ nén ù kar ki kanhró kar nĩ ãn ti. Kỹ hã ãg tóg nén ù hyn han há távĩ han kãn ke mũ, kurã ãn kã.

¹¹ ãg mog mũ ri ke ti nĩ. Vãsỹ sóg sĩ ja jẽgtĩ. Kỹ sóg ùn kãsir ag tỹ nén tó tĩ ãn tó ja nĩgtĩ gé. Ūn kãsir ag mỹ ke ãn

tóg inh mỹ ke ja nĩgtĩ gé. Ūn kãsir tỹ nén to jykrén tĩ ãn to sóg jykrén ja nĩgtĩ gé. Kejẽn sóg sanh há jẽ sir. Kỹ sóg ùn kãsir jykre tovãnh kãn ja nĩgtĩ. ãn ri ke ti nĩ, ãg Senhor kãtĩg mãn ke ti. Ki kanhrãn kãn jé ãg tóg ke mũ, ãn kã.

¹² Ūri ãg tóg ve há han tũ nĩgtĩ ver, ãg Senhor jykre ti, kỹ tóg ãg tỹ vẽn ve jafã ki vẽn ve há han tũ ri ke nĩ. Kuty nĩ ve ti nĩ, ãg tỹ vẽn ve jafã ki nén vég mũ ti. Hã kỹ ãg tóg ve há han tũ nĩ ver. Kurã ãn kã ãg tóg nén kar ve há han kãn ke mũ hã ra. ãg hã vỹ tóg ti venh ke mũ. Ūri ãg tóg sĩn kỹ ti ki kanhró nỹtĩ. Kurã ãn kã ãg tóg ki kanhrãn kãn ke mũ, ti tỹ ãg ki kanhró kar ãn ri ke.

¹³ Hã kỹ tag vỹ krỹg ja tũ nỹ, ha mẽ. ãg tỹ Topẽ ki rã mũ vỹ krỹg ja tũ nỹ. ãg tỹ ti hã ki nén ù kar ve sór mũ vỹ krỹg ja tũ nỹ gé. ãg tỹ vẽn kar to há vỹ krỹg ja tũ nỹ gé. Kỹ nén ù pir tóg kãfór nĩ, hã vỹ: ãg tỹ vẽn kar to há nĩ, he mũ.

14

Topẽ vỹ ã kuprĩg tỹ ãg tar han tĩ, ãg tỹ jagnẽ ki rĩr jé

¹ Kỹ vẽn kar to há nỹtĩmnĩ. Kỹ Topẽ mỹ to vĩmnĩ gé, ti kuprĩg tỹ nén ù to ãjag tar han jé. Ti tỹ nén ù to ãg tar han tĩ ù vỹ kãfór nĩ, hã vỹ: ãg tỹ jagnẽ jykre ki kanhrãn kỹ jagnẽ jyvẽn tĩ, he mũ.

² ãg tỹ hã ra ãg tỹ vẽn vĩ ki kagtĩg ki vēmén kỹ ãg pi(jé) ãprã ke ag mỹ nén ù tó tĩ'. Topẽ hã mỹ ãg tóg tĩ, ãg tỹ tag tóg

kỹ. Ủ pi(jé) ki kanhró nĩ', ẽg tỹ vẽn hĩ ki kagtĩg ki vẽnén kỹ'. Topẽ kuprĩg hã tóg ẽg krĩn tĩ, ẽg tỹ vẽn hĩ ki kagtĩg ẽn tó jé. Kỹ ẽg tóg ki kagtĩg nỹtĩ, ẽg tỹ nén tó mũ ti.

³ Ẽg tỹ hã ra ẽg vĩ ki jagnẽ jyvẽn kỹ ẽg tóg ủ tỹ mẽg mũ kar jyvẽn tĩ sir. Tỹ ẽg tóg jagnẽ tar han tĩ, Topẽ to. Jagnẽ jyvẽn ẽg tóg tĩ, jagnẽ fe kaj tỹ ẽg tóg tũg' he tĩ gé, ẽg tỹ jagnẽ mỹ ẽg vĩ ki vẽnén kỹ.

⁴ Ủ tỹ ẽg tỹ vẽn hĩ ki katĩg ki vẽnén mũn vỹ vẽnhmỹ tỹ ùn tar jẽ sir, Topẽ to, ùn vẽnén mũ ti. Ủ tỹ ẽg vĩ ki vẽn hĩ jyvẽn tĩ ẽn tóg ẽg tar han kãn mũ sir, Topẽ to, ẽg mré vẽn hĩ mãn kỹ nỹtĩ ag kar.

⁵ Inh mỹn há tĩ vẽ, ăjag kar tỹ ẽg tỹ vẽn hĩ ki kagtĩg tỹ Topẽ mré vẽnén há hã ra. Ẽjag kar tỹ ẽg vĩ ki jagnẽ jykre to jagnẽ jyvẽn há nỹtĩ ra tóg hã ra tag kăfór nĩ. Kỹ tóg inh mỹ há kăfór nĩ vẽ, ăjag tỹ ke kãn mũ ra. Ủ tỹ ẽg vĩ ki tó mũ vỹ ủ tỹ ẽg tỹ vẽn hĩ ki kagtĩg ki vẽnén mũ ẽn kăfór nĩ, ủ tỹ ẽg vĩ ki jagnẽ jykre to vẽn hĩ jyvẽn tĩ ẽn, mỹr, ha mẽ. Kejẽn ủ tóg ẽg tỹ vẽn hĩ ki kagtĩg ki vẽnén tĩ. Kar kỹ ủ tóg ti vĩ ẽn mẽ kỹ ẽg vĩ ki tó mũ sir, ti tỹ nén tó ja ẽn ti. Tag vỹ há tĩ gé. Ủ tỹ vẽn hĩ mãn kỹ nỹtĩ kar vỹ ki kanhrãn kãn mũ sir, ti vĩ ti, kỹ ag tóg tỹ tar nỹtĩnh mũ sir.

⁶ Inh kanhkã', ha vé. Hẽn ri ke mũn sóg ăjag ki jun kỹ ẽg tỹ vẽn hĩ ki kagtĩg ki vẽnén mũ. Kỹ sóg ăjag mỹ nén ủ há han ke tũ nĩ ha, tỹ, ăjag tỹ inh vĩ ki kagtĩg nỹtĩnh kỹ. Jăvo isỹ ăjag

mỹ Topẽ tỹ inh mỹ nén tó mũ tỹ ẽg vĩ ki kãmén kỹ sóg tỹ ăjag tar han mũ sir, isỹ ăjag mỹ sỹ nén to jykren mũ kãmén kỹ, sỹ ăjag jyvẽn kỹ, sỹ ăjag mỹ Topẽ vĩ ki nén rãn kỹ nĩ ẽn kãmén kỹ. Kỹ sóg tỹ ăjag tar han mu sir, mỹr, ha mẽ, ăjag tỹ inh vĩ ki kanhrãn kỹ.

⁷ Vãn tỹ vākyn jafã to jykren nĩ, vākyn jafã ủ to ke gé. Ag tỹ kyn kórég kỹ ẽg tóg ki kagtĩg nỹtĩ sir, ag tỹ vākyn mũ ti.

⁸ Kỹ vākyn jafã tỹ trombeta vỹ ge nĩgtĩ gé. Ag tỹ ti kyr mẽ kỹ soldado ag vỹ vẽn hĩ kãn kãn tĩ, vẽn hĩ génh ke to. Ag tỹ tỹ kyn há han tũ nỹtĩnh kỹ ag pi (jé) vẽn hĩ génh ke to vẽn hĩ kãn ke mũ'.

⁹ Ge ti nĩ gé, ẽg vĩ ti. Ẽg tỹ ag tỹ ki kagtĩg ẽn tó kỹ ag tóg to jykren ke tũ nĩ gé, ẽg tỹ nén tó mũ to. Véke ẽg tóg vẽnén mũ sir, ẽg tỹ gen kỹ.

¹⁰ Vẽn hĩ vỹ e nỹtĩ, ga tag kri. Povo kar vỹ vỹrmỹ vĩ nĩ' he kar nỹtĩ. Ẽg vĩ pẽ ki ẽg tóg vẽnén ki kanhró nỹtĩ.

¹¹ Kỹ sóg kejẽn hẽ tá ke ủ vĩ mẽg tĩ. Sỹ ti vĩ ki kagtĩg nĩnh kỹ sóg ti jykre ki kanhrãn ke tũ nĩ, ùn vĩ mũ ti, kỹ tóg inh jykre ki kanhrãn ke tũ nĩ gé. Ge ti nĩ gé, ẽg tỹ vẽn hĩ ki kagtĩg ki vẽnén kỹ. Ki kagtĩg ẽg tóg nỹtĩ sir.

¹² Topẽ kuprĩg tỹ ăjag tar han mũ ve sór ăjag tóg nỹtĩ, nén ủ ủ to. Kỹ tóg há tĩ. Kỹ hã ra ẽg mré ke ag tar han jafã to ẽn nĩ, ẽn hã to Topẽ mré vĩmnĩ, hã vỹ: ẽg vĩ ki jagnẽ jyvẽn, he mũ.

13-14 Ęg tỹ vĕnh vĩ ki kagtĩg ki Topĕ mrĕ vĕmĕn kỹ ěg tóg to jykrĕn kỹ nĩ tũ ra Topĕ mrĕ vĕmĕn tĩ. Kỹ, ă tỹ vĕnh vĩ ki kagtĩg ki vĕmĕn to tar nĩn kỹ Topĕ mỹ to vĩmnĩ, ti tỹ ă tỹ nĕn tó ja ěn ki kanhrĕn kỹ ěg mỹ ěg vĩ ki kămĕn to ă tar han jĕ gé. Kỹ ă tóg: “tag tó ja inh nĩ, tag tó ja inh nĩ,” hĕnh ke mũ gé sir, kỹ tóg há tĩ.

15 Ęg tỹ to jykrĕn kỹ nĩ tũ ra Topĕ mrĕ vĕmĕn kỹ tóg há tĩ. Ęg tỹ hă ra to jykrĕn kỹ nĩn kỹ ti mrĕ vĕmĕn kỹ tóg há tĩ gé. Ęg tỹ to jykrĕn kỹ nĩ tũ ra Topĕ mỹ jăn kỹ tóg há tĩ. Ęg tỹ hă ra to jykrĕn kỹ nĩn kỹ ti mỹ jăn kỹ tóg há tĩ gé. Sỹ tag han kăn sór vĕ.

16 Ha vé, ă tỹ to jykrĕn kỹ nĩ tũ ra Topĕ to vĩ há han kỹ ă vĩ mĕg mũ ag vỹ ki kagtĩg nỹtĩ, ă vĩ ti, ă tỹ ěg tỹ vĕnh vĩ ki kagtĩg ki vĕmĕn kỹ. Kỹ tóg ag tỹ ă mrĕ: “hỹ, hă vĕ,” he sór mũ ra tóg vĕnhmỹ tĩ. “Ti ne tó mũ vỹ? Sỹ ki kagtĩg tóg tĩ,” he jĕ ag tóg ke mũ.

17 Tó há han ă tĩgtĩ, ă tỹ ěg tỹ vĕnh vĩ ki kagtĩg ki vĕmĕn kỹ. Hă ra ũ tỹ mĕg mũ ag vỹ ki kagtĩg nỹtĩ, kỹ ă pi(jé) ag tar han tĩ'.

18 Ęg tỹ vĕnh vĩ ki kagtĩg ki vĕmĕn to sóg tar pĕ nĩ inhă. To tar nĩn kỹ sóg ăjag kăfór nĩ.

19 Hă ra sóg tag tó sór tũ nĩ, ěg vĕnh măn kỹ nỹtĩn kỹ. Hĕn ri ke mũn sóg vĕnh vĩ tỹ mil (ke) han ke mũ, ěg tỹ vĕnh vĩ ki kagtĩg ki vĕmĕn kỹ. Hă ra sóg jĕrĩn mỹ ăjag tar han ke tũ nĩ. Hă kỹ sóg tag tó sór tũ nĩ. Sỹ nĕn to jykrĕn mũ hă tó sór

inh mũ, kỹ sóg inh vĩ pir tỹ ăjag tar han ke mũ.

20 Inh kanhkă', to jykrĕn há han nĩ. Gĩr tỹ nĕn ũ to jykrĕn tũ ěn ri ke nỹtĩ sór tũg nĩ. Vĕnh jykre păno hă to gĩr tỹ ti ki kagtĩg nĩ ěn ri ke nỹtĩmnĩ, ăjag tỹ ti kórĕg han tũ nĩ jĕ. Nĕn ũ há to jykrĕn kỹ tóg inh mỹ ăjag tỹ ũn sanh há ag tỹ nĕn ũ to jykrĕn há ěn ri ke nỹtĩnh há tĩ.

21 Ve ra, Topĕ vĩ rán ki tag vỹ rán kỹ nĩ, ha mĕ. “Inh povo tỹ inh vĩ mĕ jăvănh nỹtĩn kỹ sóg ag mỹ ũn vĩ ũ ag vĩ ki inh vĩ jĕnĕnh ke mũ. Povo tỹ vyrmỹ vĩ ag mỹ sóg: “ha ag mỹ inh vĩ ti tó,” hĕnh ke mũ, “ag vĩ tũ ki hă ra, ũ tỹ inh vĩ mĕ jăvănh ag mỹ,” he jĕ sóg ke mũ. Hă kỹ ag tóg mĕnh ke tũ nĩ, inh povo ti, ag tỹ ag vĩ tũ ki ag mỹ vĕmĕn kỹ,” he tóg, ěg Senhor ti, Topĕ vĩ rá ki.

22 Hă kỹ tóg tỹ ũ tỹ Topĕ ki ge jăvănh ag tỹ ki kagtĩg han jafă nĩ, ěg tỹ vĕnh vĩ ki kagtĩg tỹ vĕmĕn mũ ti. Ti ki ge kỹ nỹtĩ ag mỹ ke pijé'. Jăvo ěg tỹ jagnĕ jykre ki kanhrĕn kỹ jagnĕ jyvĕn tag vỹ tỹ ti ki ge kỹ nỹtĩ ag tar han jafă nĩ. Ti ki ge jăvănh ag mỹ ke pijé'.

23 Ha vé, kejĕn ěg mrĕ ke ag vỹ vĕnh măn kăn mũ. Kỹ vĕnh kar tóg hĕn ri ke mũn ěg tỹ vĕnh vĩ ki kagtĩg ki vĕmĕn mũ. Kỹ ũ tỹ ki kagtĩg tóg venh ke kătĩg mũ, ũ tỹ Jesus ki ră ja tũ ti hĕn ri ke mũn. Kỹ tóg ti tỹ ăjag tỹ vĕnh vĩ ki kagtĩg tag mĕ kỹ tóg ăjag to: “krĩ vĕnhmỹ ag nỹtĩ,” hĕnh ke mũ sir, ón kỹ.

24 Ăjag tỹ ěg vĩ ki jagnĕ jykre ki kanhrĕn kỹ jagnĕ jyvĕn kỹ

tóg hã ra há tĩ. Kĩ ù tỹ Jesus ki rã tũ vỹ jun mũ, ù tỹ ki kagtĩg. Kĩ tóg ãjag vỹ mẽnh mũ, kĩ tóg to jykrén ke mũ sir. Ājag vỹ to tóg: “hỹ, hã vễ,” henh ke mũ. Ti jykre pãno to tóg jykrén ke mũ gé.

²⁵ Ti tỹ nén ù to jykrén mũ vỹ vễnh ven kãn ke mũ, kĩ tóg ti mỹ e tĩnh mũ sir. Mũg ke jé tóg ke mũ. “Topễ vỹ tỹ ùn mág nĩ,” he jé tóg ke mũ. Kĩ tóg ki kanhró nĩnh mũ, tó jé tóg ke mũ sir, Topễ tỹ ãjag mré nĩ ti.

Culto ki vễnh jykre

²⁶ Kĩ ãjag vễnh mãn kĩ tag vỹ há nĩ, ha mẽ. Û tóg Topễ mỹ jãn ke mũ, ti mỹ cantar ken jé. Û tóg Topễ vỹ tỹ vễnh kanhrãn kĩ tónh ke mũ. Û mỹ tóg nén ù tónh mũ, Topễ ti, ti tỹ tỹ ãjag jyvễn jé. Û tóg ẽg tỹ vễnh vỹ ki kagtĩg ki vễmẻn ke mũ, ù tóg ti vỹ mẽ kĩ ẽg vỹ pẻ ki tónh ke mũ, ti tỹ nẻn tó mũ ẻn ti. Há kar ti nĩ, ãjag tỹ tag tỹ Topễ to tar nỹtĩ jẻ.

²⁷ Ājag tỹ ẽg tỹ vễnh vỹ ki kagtĩg ki vễmẻn sỏr kĩ ùn pipir ag hã tóg tónh ke mũ, hẻn ri ke mũn ùn rẻgre, ke tũ nĩnh kĩ ùn tãgtũ, jagnẻ ri ke. Û tỹ tó kĩ ù tóg vĩnh ke tũ nĩ sir. Ûn pir tỹ vễmẻn kĩ tóg há tĩ. Kĩ ù tóg ti vỹ mẽ kĩ ẽg vỹ pẻ ki tónh ke mũ gé sir, ti tỹ nẻn tó mũ ẻn ti.

²⁸ Kejẻn tóg ki tũ nĩ, ù tỹ ti tỹ nẻn tó mũ ẻn tỹ ẽg vỹ ki tónh ke mũ ti. Kĩ ẽg tóg ẽg tỹ vễnh vỹ ki kagtĩg tỹ vễmẻn ke tũ nĩ sir, vễnh kar rĩnve. Ājag ỉn hã tá vễmẻn nĩ, ẽg tỹ vễnh vỹ ki kagtĩg tỹ. ẻn tỹ igreja krẻm

vễmẻn tũg nĩ, ẽg tỹ vễnh vỹ ki kagtĩg tỹ, ù tỹ ti tỹ nẻn tó mũ tỹ ẽg vỹ ki tónh ke tũ nĩnh kĩ.

²⁹ Kĩ tóg ãjag tỹ jagnẻ jykre ki kanhrãn kĩ ẽg vỹ ki jagnẻ jyvễn ken kĩ tóg ge nĩ gé, ha mẽ. Ûn rẻgre vỹ tónh ke mũ, ke tũ nĩnh kĩ ùn tãgtũ, jagnẻ ri kẻn tón jẻ. Kĩ ag vỹ mẽg mũ ag vỹ to jykrén ke mũ, ag tỹ ti kygnẻ tũ ve jẻ.

³⁰ Hã ra hẻn ri ke mũn Topễ tóg ù mỹ nẻn ù tónh ke mũ gé. Kĩ ùn vễmẻn vẻn mũ tóg krỹg henh ke mũ ver, kĩ ù tóg ti ri kẻn tónh mũ sir, Topễ tỹ ti mỹ nẻn tó ja ti.

³¹ Hã kĩ ãjag kar vỹ jagnẻ jyvễn ke mũ, ãjag tỹ jagnẻ ri kẻn vễmẻn kĩ. Gen kĩ ãjag tóg jagnẻ kanhrãn ke mũ sir, jagnẻ krĩ kuprãg ke ãjag tóg mũ gé sir.

³² Topễ kuprĩg vỹ ẽg krĩn tĩ, ẽg tỹ jagnẻ jyvễn jẻ. Hã ra ti pí(jẻ) ẽg tỹ nẻn tó sỏr tũ ra ẽg kri gĩnh ke tĩ'.

³³ Hã kĩ tóg Topễ mỹ há tũ nĩ, ẽg tỹ ù vễmẻn jẻ ra ẽg tỹ nẻn tónh ke mũ ẻn tó sỏr kĩ. ẻg tỹ jagnẻ tỹ tó kar kĩ ẽg tỹ nẻn tónh ke tó kĩ tóg ti mỹ há tĩ, kĩ vễnh kar tóg jatun mỹ mẽnh ke mũ sir, ẽg tỹ nẻn tó mũ ti. Topễ jykre kusan hã vễ.

³⁴ Topễ tũ vỹ tỹ ẽg nỹtĩ. Kĩ ùn tỹtã fag vỹ vễmẻn ke tũ nĩ, igreja krẻm. Hẻ tá igreja krẻm fag vỹ jatun nỹtĩgtĩ, ẻmã kar mĩ, kĩ ãjag tóg fag ri ke jatun nỹtĩnh mũ gé. “Tỹ fag tóg ag krẻm ke nỹtĩ,” he ja tóg nĩ, Topễ ti, hã kĩ fag tóg vễmẻn ke tũ nĩ, igreja krẻm.

³⁵ Kÿ fag tóg ãjag tÿ Topê vÿ ki kanhrân há han tũ nÿn kÿ fag tóg ãjag ãn tá ãjag mén ki jëmênh mũ, ãjag tÿ ki kanhrân há han tũ ja ên ti. Êg mÿ'a tóg tÿ, fag tÿ igreja krêm vémén sór kÿ, kÿ ke sór tũg nÿ.

³⁶ Æjag hÿn tag ki króm sór tũ nÿ, vég isóg nÿ nÿ. “Êg há vÿ to jykrén há tâvÿ han tÿ, êg há vÿ tó vén, vènh kar jo, Topê vÿ ti,” he ãjag tóg tÿ, êg kãfór nÿtÿ sór kÿ. Hã ra tóg e nÿtÿ, Jesus ki ge mũ ag. Tó há han ag tóg tÿ gé. Ag mré vènh jykre pir han sórnmÿ.

³⁷ Æjag kãmÿ ù hÿn: “Topê vÿ inh mré vémén tÿ, ti kuprÿg tÿ inh krÿn tag to sóg tar tâvÿ nÿ,” he tÿ. Kÿn hÿn ki kanhró nÿ, sÿ ãjag mÿ Topê jykre tó mũ tag, ãjag tÿ igreja krêm vènh mãn ke to. Êg Senhor tÿ êg mÿ vènh jykre nÿm jan há vè, sÿ ãjag mÿ rán mũ tag ti.

³⁸ Û tÿ tag to: “nén ù tũ vè,” he mũ ra sóg ti to: “nén ù tũ vÿ tÿ ã nÿ,” he mũ gé.

³⁹ Inh kanhkã', Topê mÿ to vÿ mág, ti kuprÿg tÿ ãjag tar han jé, ãjag tÿ jagnê jykre ve kÿ jagnê jyvèn há han jé, êg vÿ ki. Û tÿ êg tÿ vènh vÿ ki kagtÿg ki vémén sór kÿ ti mÿ: “vÿ tũg ra,” he tũg nÿ gé.

⁴⁰ Hã ra ù vémén jê ra êg tÿ nén tónh ke mũ ên tó sór tũg nÿ. To jykre kusa nÿtÿmÿnÿ.

15

Jesus rÿr jê

¹ Inh kanhkã', sÿ ãjag mÿ Jesus kãme sér ên tó mãn ke vè, sÿ ãjag mÿ tó ja ên ti. Ên

kri fig ãjag tóg tÿ, kÿ ãjag tóg mÿ mũgtÿ.

² Ti vÿ kri nÿm kÿ ãjag tóg krenkren ke mũ, ãjag tÿ tovãnh tũ nÿn kÿ. Sÿ ãjag mÿ nén tó ja ên tÿ tũ' he tũg nÿ, ke tũ nÿ mũ ra ãjag tóg véké kri fi ja nÿnh mũ. Kÿ ãjag tóg tá nén ù venh ke tũ nÿ gé.

³ Sÿ ãjag mÿ Topê vÿ kãmén kÿ sóg ãjag mÿ sÿ nén mē ja ên há tó vén ja nÿgtÿ, há vÿ: Cristo vÿ êg jagfy ter ja nÿgtÿ, êg tÿ Topê vÿ mranh ja tugrÿn, he mũ. Tag vÿ rán kÿ nÿ, Topê vÿ rá ki.

⁴ Kÿ ag tóg vènh kej kãtá ti fi ja nÿgtÿ. Kurã tágtũ tũg kÿ tóg rÿr mãn ja nÿgtÿ gé. Tag vÿ rán kÿ nÿ gé, Topê vÿ rá ki.

⁵ Kÿ tóg Pedro mÿ vènh ven, kar kÿ ù tÿ 12 (ke) ag mÿ ke gé.

⁶ Kar kÿ tóg ù tÿ 500 (ke) kãfór ag mÿ vènh ven gé, vènh ven pir ki, ag vènh mãn kÿ nÿtÿ ên ki. Ên ag kãmÿ ùn pipir ag tóg kãgter ja nÿgtÿ, há ra ùn e ag tóg ver êg mré nÿtÿ.

⁷ Kar kÿ Tiago tóg ti vé gé, kar kÿ ti tÿ ùn vin mũ kar ag, ke gé, apóstolo kar ên ag.

⁸ Kar kÿ sóg vãhã ti vé gé, ag kar nón. Sÿ ti venh ke tũ vè vè, sÿ kãnhmar ti ki rá ja tũ nÿn kÿ.

⁹ Apóstolo ag krêm ke kar vÿ tÿ inh nÿ. Sÿ tá krÿg ke tũ vè vè, sÿ tÿ apóstolo nÿnh ke ti, isÿ Topê ki ge kÿ nÿtÿ ag vóg kónãn jan kÿ, fag ke gé.

¹⁰ Hã ra Topê tóg inh jagãgtãn, há kÿ tóg isÿ apóstolo han mũ. Kÿ ti pi(jé) fagrÿnh mÿ inh jagãgtãn'. Rãnrãj mág han inh mÿr, ag rãnrãj kãfór kar. Hã ra sóg

inh pir mý han tũ nĩgtĩ. Topẽ hã ne isar han tĩ', inh rãnrãj to'.

11 Hã ra ãg kar tóg Jesus tó tĩ. "Jesus vỹ rĩr jẽ," he ag tóg tĩ, apóstolo ù ag, kỹ sóg tag tó tĩ gé, ag mré. Kỹ ãjag tóg sỹ ti kãmén kỹ inh vỹ kri fig tĩ.

12 Ëg kar vỹ Cristo tỹ ter kar ti rĩr mãn ja ãn tó tĩ.

Jesus mré ãg rĩnrĩr mãn ke mũ gé

Cristo rĩr mãn mũ ra ãjag kãmĩ ù tóg ón kỹ: "ãg ter kar kỹ ãg rĩr mãn ke tũ nĩ ha," he tĩ'. Hã tũ vỹ.

13 Ëg tỹ ãg ter kar kỹ rĩr mãn ke tũ nĩ hã ra Cristo vỹ rĩr mãn ja tũ nĩnh mũ gé vỹ vỹ.

14 Cristo rĩr mãn ja tũ nĩ hã ra ãg tóg fagrĩnh mý ãjag mý ti kãmén ja nĩnh mũ gé vỹ vỹ. Kỹ ãjag tóg fagrĩnh mý kri fi ja nĩnh mũ gé vỹ vỹ.

15 Kỹ ãg tóg Topẽ to ón ja nĩnh mũ gé vỹ vỹ, ãg tỹ ti to: "Cristo rĩn mãn ja tóg nĩ," hen kỹ. Kỹ ãg kar vỹ ti to ón ja nĩnh mũ vỹ. Hã ra tóg Jesus rĩn mãn ja nĩ, Topẽ ti.

16 Hỹ, ùn kãgter mũ ag rĩnrĩr mãn ke tũ nĩ ra Cristo vỹ rĩr mãn ja tũ nĩnh mũ gé vỹ vỹ, ha mẽ.

17 Kỹ Cristo rĩr mãn tũ nĩ ra ãg tóg fagrĩnh mý ti ki ge ja nĩnh mũ gé vỹ vỹ. Kỹ ãg tóg Topẽ vỹ mranh ja ãn hã ki nỹtĩnh mũ vỹ ver, tỹ tũ' he ja tũ ti nĩnh mũ vỹ, ti rĩr mãn tũ nĩ hã ra.

18 Kỹ ù vỹ gé, ha mẽ: ti rĩr mãn tũ nĩ ra ù tỹ Cristo ki ge kar kỹ kãgter mũ ãn ag vỹ

nũgme ki vár kãn kỹ nỹtĩnh mũ gé vỹ vỹ, ha mẽ.

19 Hã kỹ tóg vẽnhmỹ tĩ, ãjag tỹ: "rĩr mãn ke tũ ãg nĩ," hen kỹ. Cristo pi(jé) ãg tỹ ga kri mũ tag tãvĩ ki rĩr nĩgtĩ'. Kanhkã tá ãg tóg junjun ke mũ. Ke tũ nĩ mũ ra ãg tóg ùn jagãgtar ag kãfór kar nỹtĩnh mũ vỹ, ãg tỹ fagrĩnh mý Jesus ki rã ja nỹtĩ ra. Hã tũ vỹ mỹr.

20 Cristo vỹ rĩr mãn, ter kar kỹ. Hã vỹ. ùn kãgter kỹ nỹtĩ ag kar kãmĩ ti rĩr mãn vén, Cristo ti, hã kỹ ãg tóg rĩnrĩr mãn ke mũ gé, ãg tỹ ti ki ge kỹ.

21 ùn pir tugrĩn ãg kar vỹ kãgter ke mũ, hã kỹ ãg tóg ùn pir tugnĩn rĩnrĩr mãn kãn ke mũ gé, ãg ter kar kỹ.

22 Adão tỹ Topẽ vỹ mranh tugrĩn ãg tóg kãgter kãn ke mũ, ãg tỹ tỹ ti krẽ nỹtĩn kỹ. Ri ke ti nĩ, Cristo tugnĩn ãg tóg rĩnrĩr mãn kãn ke mũ gé, ãg tỹ ti ki ge kỹ nỹtĩn kỹ.

23 Topẽ tỹ nén to jykrén mũn hã vỹ, Cristo tỹ ãg jo rĩr mãn tag ti. Hã kỹ tóg rĩr mãn vén. Kar kỹ ù tỹ Cristo ki ge kỹ nỹtĩ ag vỹ rĩnrĩr mãn ke mũ gé sir, ti kãtig mãn kỹ.

24-25 Kỹ vãhã kurã tỹ ãgno vỹ sir. Kurã ãn kã Jesus vỹ Topẽ mý: "ã hã ne ãg kri ke jẽ ha'," henh ke mũ, ti panh mý. ùri tóg tỹ pã'i mág nĩ ver, Cristo ti, kỹ tóg pã'i ù ag vỹ tỹ tũ' he kãn mũ, ùn jykre tar kar, ù tỹ ãg kãfór nỹtĩ kar. Tỹ tũ' he kãn jé tóg ke mũ, hã jé tóg ver tỹ pã'i mág nĩ, Cristo ti, ti tỹ ã kato tẽgtẽ mũ ag jykre sãn kãn jé, ti tỹ ag vỹ tỹ tũ' he kãn jé.

²⁶ Ęg tỹ Topẽ vĩ mranh tu-grĩn ěg kãgter kãn mũ. Hã ra tóg tỹ tũ' henh ke mũ gé, ěg ter mũ tỹ, kỹ ěg ter mãn ke tũ nĩ ha, kurã tỹ ěgno ěn kã. Ti tỹ ěg ter mũ tỹ tũ' hen kỹ tóg há kar nĩ sir.

²⁷ Hỹ, vẽn kar vỹ tỹ ti krẽm ke nỹtĩ, ti tỹ ag jykre sãn kỹ, ti tỹ ùn mág ag vỹ tỹ tũ' hen kỹ. Vẽn kar vỹ tỹ ti krẽm ke nỹtĩ, Cristo krẽm. Hã ra ùn pir vỹ tỹ ti krẽm ke tũ nĩ, hã vỹ: ù tỹ vẽn kar tỹ ti krẽm ke han ja ěn, he mũ, hã vỹ: Topẽ, he mũ.

²⁸ Vẽn kar tỹ ti krẽm ke nỹtĩn kỹ, kurã ěn kã tóg ti krẽm vẽn fẽg ke mũ gé, ti kósin ti, ã panh krẽm, ù tỹ vẽn kar tỹ ti krẽm vin ja ěn krẽm. Kurã ěn kã Topẽ tóg tỹ vẽn kar kri ke jẽn mũ, ã pir mỹ. Kỹ ù tóg ti ri ke jẽn ke tũ pẽ nĩ.

²⁹ Ęg rĩr mãn ke tũ nỹtĩ ra ãjag kã ù tóg fagrĩnh mỹ ùn ter mũ ag jagfỹ vẽn kygpenh mũ vẽn. Ag rĩr mãn tũ ra tóg vẽn mỹ tĩ vẽn, ãjag tỹ ag jagfỹ vẽn kygpenh ke ti. Hã tũ vẽn hã ra. Rĩr mãn jé ěg tóg ke mũ.

³⁰ Hã kỹ sóg kurã kar ki ti jagy vég tĩ gé, hã ra sóg ag mỹ vẽn nenh tũ nĩgtĩ, ù tỹ inh vóg kónãn sór mũ ag mỹ.

³¹ Kurã kar ki sóg ter kren' he tũgtĩ. Ki hã sóg tó tĩ, ki kanhró ãjag nỹtĩ. Ājag hã ki sóg tỹ ùn mág nĩ, Jesus Cristo ki, ěg Senhor ki.

³² Cidade tỹ Ęfeso tá sóg mĩg mré rará ri ke han mỹr, hã ra tóg inh mỹ nén ù há han ke tũ nĩ vẽn, ěg tỹ rĩr mãn' he tũ ra. Ûn kãgter mũ ag rĩnrĩr mãn

ke tũ ra ěg tóg jatun mỹ ěg tỹ nén to é n mũ han ke mũ vẽn, ěg tỹ: “mũ nỹ, jẽn jé, kron jé, ěg hỹn vaj kỹ ter ke mũ,” hen kỹ, Topẽ ki ge tũ ag ri kén ken kỹ.

³³ Hã tũ vẽn hã ra.

Kygnẽ tũg nĩ. Tag to jykrén nĩ, ha mẽ: ùn vĩ kórég ag vỹ jẽmẽ sór tũg nĩ. Vẽn jykre há pãno han ti tĩ, ag vỹ kórég ti.

³⁴ Krĩ há han ra, tag hã ne há nĩ'. Topẽ vĩ mranh tũg nĩ. Ājag kãmĩ ù vỹ Topẽ ki kanhró tũ nỹtĩ ver'. Tag to vẽn mỹ en nĩ.

Ęg rĩr mãn ke to vẽn jykre

³⁵ Kỹ ù tóg to jykrén kỹ inh mỹ: “Topẽ hỹn hẽ ri kenh ke mũ, ti tỹ ùn ter mũ ag rĩnrĩn mãn jé?” he sór mũ. “Ęg fár hỹn hẽ ri kenh ke mũ?” he sór ãjag hỹn mũ.

³⁶ Krĩ tũ ãjag nỹtĩ mỹr'. Nén ù fy jykre vỹ ěg ter ri ke nĩ, ha mẽ. Ęg tỹ krãn kỹ tóg kugnãnh tĩ, ti fár ti, jãvo tóg ti kãtá mur mãn mũ sir.

³⁷ Kỹ ti fy pi(jé) ti féj ri ke nĩ gé', ti tỹ han ke ti. Sĩ ti nĩ, trigo fy ti, nén ù kar fy ti ke gé.

³⁸ Topẽ hã ne ti pẽn han mũ', ti féj ke gé, ti fej ke gé. Ti hã ne to jykrén tĩ'. Kỹ tóg nén kar fy mỹ ti féj ù nĩm', ti féj ù nĩm' he tĩ.

³⁹ Kỹ nén ù fár vỹ ge nĩgtĩ gé. Ti pi(jé) pir nĩ gé'. Ęg fár vỹ vyrmỹ nĩ, kar kỹ bicho fár vỹ vyrmỹ nĩ gé, kar kỹ sēsĩ fár vỹ vyrmỹ nĩ gé, jēsĩ fár ti, kar kỹ pirã fár vỹ vyrmỹ nĩ gé.

⁴⁰ Kỹ kanhkã tãn ag vỹ vyrmỹ fár nỹtĩ gé, ěprã ke ag vỹ vyrmỹ fár nỹtĩ gé. Kỹ ěg ve vỹ ge nĩgtĩ gé. Kanhkã tá ke ag

ve vỹ vurmỹ nĩ, ěprã ke ag ve vỹ vurmỹ nĩgtĩ gé.

41 Rã jěngrě vỹ vurmỹ nĩ, kysã jěngrě vỹ vurmỹ nĩ gé, krĩg jěngrě vỹ vurmỹ nĩ gé. Kỹ krĩg ag vỹ jagně ri ke tũ nỹtĩ gé, ãjag jěngrě ki.

42 Ge ti nĩ, ěg ter kar kũ ěg rĩr mãn ke ti. Ter jé ěg tóg ke mũ, kũ tóg ěg tỹ nén ũ fy krãn ri ke nĩ sir, ěg fár tỹ ga ra rã mũ ti. ěg rĩr mãn kũ ěg pi(jé) ter mãn ke mũ'.

Kejěn tóg ěg mỹ'a tĩ, ěg ter ke to hã. Hã ra ěg tóg sĩnvĩ nỹtĩnh mũ, ěg rĩr mãn kũ.

43 Krój ěg nỹtĩ. Hã ra ěg tóg tar nỹtĩnh mũ, ěg rĩr mãn kũ.

44 Ũri ěg tóg tỹ ěprã ke nỹtĩ, kũ ěg fár vỹ tỹ ěprã ke fár nĩ. ěg rĩr mãn kũ ěg tóg Topě kuprĩg jamã tá fár nỹtĩnh mũ. ěprã ěg fár nỹtĩ, kũ ěg tóg tỹ ěprã ke nỹtĩ. Kũ ěg tóg ěg tỹ Topě kuprĩg jamã tá ěg fár ũ venh ke ki kanhró nỹtĩ sir. ěprã ke fár ve vén ěg tĩ. Kar kũ ěg tóg Topě kuprĩg jamã tá fár ũ venh ke mũ, ěprã ke fár ve kar kũ.

45-46 Hã kũ tag tóg rán kũ nĩ, ha mẽ: “ũn ve ti, Adão ti vỹ rĩr nĩ ja nĩgtĩ. Jãvo ũ tỹ ěgno ti, Cristo ti vỹ ã kuprĩg tỹ nén kar rĩnrĩr han,” he ja tóg nĩgtĩ, Topě vĩ rá ki.

47 Ũn ve ěn, Adão ěn vỹ ga tỹ há (r) nĩ, hã kũ ti jykre tóg tỹ ěprã ke jykre nĩ. Cristo vỹ tỹ kanhkã tá ke nĩ.

48 Ũn ve vỹ tỹ ěprã ke nĩ, kũ ti krě kar vỹ tỹ ěprã ke nỹtĩ gé, ti mré. Jãvo Cristo vỹ tỹ kanhkã tá ke nĩ. Kũ ti mré ke

kar vỹ tỹ kanhkã tá ke nỹtĩ gé, ti mré.

49 ěprã ke ěn ve ri ke ěg nỹtĩ, ěg kar tỹ Adão ve kũ. Kũ ěg tóg kanhkã tá ke ěn ve ri ke nỹtĩnh ke mũ gé, ěg tỹ Cristo ve kũ, ěg rĩnrĩr mãn ken kũ.

Jesus kãtĩg mãn ken kũ tóg ěg kar han mãn ke mũ

50 Inh kanhkã', sỹ ãjag mỹ tag tó há han sór vỹ, sỹ ki kanhrãn há han kũ, ha mẽ. ěg fár tỹ ěprã ke tag pi(jé) Topě tỹ tỹ ěg pã'i nĩ venh ke mũ'. Nén ter ke mũ ěn pi(jé) nén ũ ter vãn há venh ke mũ'. Topě vỹ ěg han mãn ke mũ, ěg tỹ ve jé.

51 Kũ sóg ãjag mỹ nén ũ tó sór mũ gé, ãjag tỹ mẽ ja tũ ti, ha mẽ. ěg kãmĩ ũ ag tóg ti jun ke pétěm mũ, kãgter ke tũ ag tóg nĩ. Kũ Topě tóg ěg kar han mãn kãn ke mũ, kurã ěn kã, ěg tỹ ti ki ge kũ nỹtĩnh kũ.

52 Kũ tóg ěg tỹ pan ke kar mĩn ke ěn ri ke nĩnh mũ, ti tỹ ěg han mãn ke ti, trombeta kyr rěn kã. Trombeta kyr ěn vỹ mẽ há tĩnh mũ, kũ ũn kãgter mũ ag vỹ rĩnrĩr mãn kãn ke mũ, ag tỹ kãgter mãn ke tũ nĩ jé sir. ěn kã tóg ěg han mãn ke mũ gé sir, ěg tỹ ti jun ke pétěm mũ ra kãgter ja tũ ra.

53 Ha vé, ti tỹ ěg fár kókrãnh mũ tag tỹ ũ han tũ ra ěg tóg venh ke tũ nĩnh mũ vỹ, kanhkã ti. Hã kũ tóg ěg fár ter ke mũ tag tỹ ũ han ke mũ, ti han mãn kũ, ti ter mãn tũ nĩ jé, kókrãnh mãn tũ nĩ jé. Kejěn tóg kenh ke mũ.

54 ěg fár kókrãnh mũ tag tỹ tóg ũ han ke mũ, ti kókrãnh

vānh nĩ jé sir. Ęg fár ter ke mũ tag tỹ ù han jé tóg ke mũ, ti ter vānh nĩ jé. Kurā ěn kã ěg tóg vēnh rá tag venh ke mũ gé, vāsỹ rán kỹ nĩ tag, hã vỹ: “tũg ti huri, ěg ter ke mũ ti, ěg ter pāte rēg kỹ,” he mũ. “Topē vỹ tỹ tũg' hé, ěg ter ke mũ tỹ.

⁵⁵ Kāgter kãn ja ěg tóg nĩgtĩ. Hã ra ěg tóg tag ve mǎn ke tũ nĩ ha. Nén ù tỹ ã préj tỹ ěg tugtǎn tỹ ěg tén ri ke ti nĩ, ěg ter ke mũ ti, hã ra Topē tóg tỹ tũg' hé,” he tóg, Topē vĩ rá ki.

⁵⁶ Topē vĩ mranh hã tigrĩn ěg tóg kǎgter tĩ. Nén ù tỹ ěg tugtǎg tĩ préj ri ken hã vē, hã vỹ: ěg tỹ Topē vĩ mranh, he mũ. Hã ra Jesus tóg tỹ tũg' he kãn, ěg tỹ Topē vĩ mranh tỹ. Kỹ tóg nén ù préj ěn tỹ préj tũ nĩ ri ke nĩ sir. Ter mǎn ke tũ ěg tóg nỹtĩ ha, kurā ěn kã. Topē vỹ ěg jyvēn tĩ. Ęg tỹ ti vĩ mranh hã tugnĩn ěg tóg kǎgter kãn ja nĩgtĩ.

⁵⁷ Hã ra Jesus tóg tỹ tũg' hé huri.

Topē hã mỹ sóg vĩ há han mũ, ti hã vỹ ěg tar han tĩ, ěg tỹ ti vĩ mranh mǎn tũg jé. Ęg Senhor tỹ Jesus Cristo tigrĩn tóg ěg tar han tĩ, Topē ti.

⁵⁸ Tag to jykrén kỹ tar nỹtĩmnĩ, Topē to, ājag tỹ ti ki rā tovānh tũ nĩ jé. Ājag to sóg há tǎvĩ nĩ, inh kanhkã'. Ęg Senhor rǎnhrāj han kãn sórmnĩ. Tag to jykrén nĩ, ha mẽ: ěg pi(jé) véké rǎnhrāj tĩgtĩ', ěg tỹ ěg Senhor rǎnhrāj han kỹ'. Ti kaja ve jé ěg tóg ke mũ mỹr, kanhkã tá.

Ęg tỹ ěg mré Jesus ki ge kỹ nỹtĩ ag jagāgtǎn ke

¹ Kỹ sóg ājag mỹ ājag tỹ ù tỹ Topē ki ge kỹ nỹtĩ ra jagāgtar nỹtĩ ag mỹ jǎnkamy jēnēnh ke ěn tó sór mũ gé sir, ājag tỹ inh ki nén jēmē sór mũ ti. Ga tỹ Galácia tá igreja krēm vēnh mǎn tĩ ag mỹ sóg tag tó ja nĩ, sỹ ājag mỹ tónh ke tag ti, ha mẽ.

² Domingo kar ki nén ù sĩ tỹ vyrmỹ nĩmnĩ, ājag ĩn tá. Ũ tỹ nén ù mág ěn tóg nén ù mág sĩ tỹ vyrmỹ nĩm ke mũ gé, kỹ ù tỹ nén ù sĩ ěn tóg nén ù sĩ tỹ vyrmỹ nĩm ke mũ gé. Ājag tỹ semana kar ki nĩm han kỹ tóg komēr hã mág mũ sir. Kỹ tóg kar kỹ nĩ, sỹ ājag ki jun mũ ra. Ājag tỹ inh kǎtĩg ken jo vyr mỹ nĩm han ja tũ nĩn kỹ tóg há tũ nỹ.

³ Kỹ ùn kuprēg nĩ gé, ag tỹ ājag tỹ nén ù ma mũ jé, Jerusalém ra, ājag tỹ tá ke fag mỹ nén ven sór mũ ti. Inh jun kỹ sóg ag jēgnēnh ke mũ, carta mré hã.

⁴ Ājag tỹ nén ù ěn éhé nĩn kỹ sóg hēn ri ke mũn ma tĩg sór mũ gé, kỹ sóg ag mré tĩg mũ gé.

Paulo tỹ nén han sór mũ

⁵ Kỹ tóg, isỹ ga tỹ Macedônia mĩ kutēnh ken kỹ sóg vǎhã ājag tá jun sór mũ sir. Isỹ Macedônia mĩ kutē sór vē.

⁶ Hã ra sóg ājag mré nĩg mág sĩ han sór mũ, ti tỹ inh mỹ ki króm ken kỹ. Hēn ri ke mũn sóg prỹg kusa fĩn rǎm ke mũ, ājag mré nĩ ki, kỹ ājag tóg sir inh jagāgtǎn kenh ke mũ, isỹ kar hēn ra tĩg ken kỹ.

⁷ Inh pi(jé) ājag ve sī han sór mū', hã ra sóg ver kutar nĩ, hã kŷ sóg kar hã ājag venh tīg sór mū. Sŷ ājag mré nĩ sór vē mŷr, ěg Senhor tŷ to há nĩn kŷ.

⁸ Ver sóg cidade tŷ Éfeso tag kã nĩ ki festa tŷ Pentecoste pétēm sór mū.

⁹ Tag ki ke ag tóg mẽ há han mū, inh vĩ ti, ũ tŷ hẽn ri ke ag. Hã ra tag ki ver ũ tŷ inh kato vãsãnsãn mū ag vŷ e nŷtĩ. Hã kŷ sóg Éfeso tag kã nĩg mág sĩ han sór mū, sŷ kar ājag venh tīg jé.

¹⁰ Hẽn ri ke mũn Timóteo tóg ājag ki jun ke mū. Kŷ ti vĩ jēmẽ há han nĩ, ti mŷ'ãg tũ nĩ jé, ti tŷ ājag mré nĩn kŷ. ěg Senhor rãnrãj han tóg tĩ mŷr, inh kóm.

¹¹ Kŷ ti to é he tũg nĩ, ti kyrũ hã ra. Kŷ ti tīg ken kŷ ti jagãgtãn nĩ gé, ti tŷ jatun mŷ inh ki jun jé. Sŷ ti jãvãnh vē, ěg régre ag mré hã.

¹² ěg régre tŷ Apolo mré sóg vēmén gé. Ti mŷ sóg to vĩ mū vē, ti tŷ ājag venh tīg jé, ěg régre tag ag mré hã, ũ tŷ ājag venh kãmũ tag ag mré. Hã ra tóg tīg jãvãnh nĩ ver. Ti tŷ ti mŷ ki króm ken kŷ ti nẽji kejẽn ājag venh tīg ke mū hã ra.

Jesus ki ge kŷ nŷtĩ ag tŷ jagnẽ mĩ ěkrén

¹³ Ājag kanẽ fãn nĩ. ěg Senhor ki rã tovãnh tũg nĩ. Krónh ke tũg nĩ, tar nŷtĩmnĩ.

¹⁴ Kŷ ājag tŷ nén ũ kar han kŷ vẽnũ kar to há nŷtĩmnĩ.

¹⁵ Kŷ sóg ājag mŷ nén ũ to vĩ sór mū gé, Estéfanos to mŷr. Estéfanos fag vŷ Jesus ki ge

vén ja nĩgtĩ, ājag jamã tá, ga tŷ Grécia tag tá. Kŷ fag tóg Topẽ tũ fag ki rĩr nŷtĩgtĩ, Topẽ tũ fag kar ki.

¹⁶ Hã kŷ sóg fag tó mū ājag mŷ. Kŷ fag vĩ jēmẽmnĩ. Kŷ Topẽ rãnrãj han mū ag kar vĩ jēmẽ kãn nĩ, ke gé, ěg mré rãnrãj mū ag kar vĩ ti.

¹⁷ Estéfanos tóg inh ki jun há han, Fortunato ke gé, Acaico ke gé. Ag tŷ inh ki junjun kŷ inh fe tóg mrin ke mū mŷr. Sŷ ājag venh há tĩn kŷ tóg inh mŷ sér pẽ tĩ, sŷ ag ve kŷ, ājag jẽgja kã ke vē mŷr, ag tŷ tŷ ājag mré ke nŷtĩn kŷ.

¹⁸ Inh mŷ ag tóg vĩ há han mū ājag to, kŷ ag tóg inh krĩ kusãg mū sir. Ag tŷ ājag krĩ kusãg ke vē gé. ũ tŷ ge to há tãvĩ nŷtĩmnĩ.

¹⁹ Ga tŷ Ásia tá igreja krēm vẽnũmnĩ tĩ ag vŷ ājag mĩ ěkrég tĩ. Kŷ Áquila mré Priscila fag vŷ ājag mĩ ěkrén mág tĩ gé, fag tŷ ājag mré ěg Senhor ki ge kŷ nŷtĩn kŷ. Fag ĩn krēm fag tóg culto han tĩ. Fag ĩn tá culto to kãmũ fag vŷ ājag mĩ ěkrég tĩ gé,

²⁰ kar kŷ ěg Senhor ki ge kŷ nŷtĩ fag kar ke gé. Jagnẽ to há tãvĩ nŷtĩmnĩ, kŷ jagnẽ ki nhun ke ri ke han nĩ, Jesus mré ke kar ki, ājag tŷ jagnẽ nĩgã kãgmĩ kŷ.

²¹ Sŷ vãhã vėsóg ki ājag mŷ rán vē, ũ tŷ inh vĩ rán ja pãte, inh, hã vŷ: Paulo, he mū.

²² Topẽ mŷ sóg to vĩ tĩ, ti tŷ ũ tŷ ěg Senhor to há tãvĩ tũ ěn ag vóg kónãn kãn jé. “Marana tá,” he sóg tĩ, hã vŷ: ha kãtĩg, Senhor, he mū, ājag vĩ ki.

²³ Ëg Senhor tỹ Jesus mỹ sóg
to vĩ tĩ, ti tỹ ãjag tar han jé.

²⁴ ãjag jé isỹ ãjag to há tãvĩ nĩ
ki kanhrãn, ãg tỹ Jesus Cristo
ki ge kỹ nỹtĩn kỹ.

Hã vễ.

PAULO TỠ CARTA HAN: CORINTO TÃ KE AG MỠ CARTA Ụ

¹ Paulo tỡ rá vễ, ẽg rẻgre tỡ Timóteo mrẻ. Jesus Cristo hã ne inh fẻg', isỷ tỡ ti apóstolo jẻ jẻ, Topẻ tỡ inh kuprẻg kỡ. Isỷ Topẻ tũ ag mỡ rãn vễ, ũ tỡ cidade tỡ Corinto tá vẻnh mãn tỡ ag mỡ, ũ tỡ Grẻcia tá vẻnhmãn tỡ ag mỡ ke gẻ.

² Ẽg jóg tỡ Topẻ jẻ ảjag tar han, ti jẻ ảjag krỡ kuprẻg, ẻg Senhor tỡ Jesus Cristo ti ke gẻ.

Topẻ tỡ Paulo krỡ tỡ kãnhvy' he

³ Topẻ mỡ sóg vỡ há han tỡ, ẻg Senhor tỡ Jesus Cristo panh ti mỡ, ẻg jóg mỡ, ũ tỡ ẻg jagẻgtãn tỡ ẻn mỡ. Ẽg vẻsỷrẻnh kỡ tóg ẻg krỡ tỡ kãnhvy' he tỡ, Topẻ ti. Ti hã mỡ sóg agradercer he tỡ mỡr.

⁴ Ti hã ne inh vẻsỷrẻnh mũ ra inh krỡ tỡ kãnhvy' he tỡ', inh jagtar tũn kỡ. Ti tỡ inh krỡ tỡ kãnhvy' he tũgrỡn sóg inh kanhkỏ ag krỡ tỡ kãnhvy' he ki kanhrỏ nỡ ha, inh kanhkỏ ũ tỡ nẻn ũ jagy vẻg mũ ra.

⁵ Cristo jagtar ja ẻn ri ke pẻ ve mág sóg mỡr, hã kỡ Cristo tóg inh krỡ kufy tỡ hẻn ri ke tỡ tũ' he tỡ gẻ sir.

⁶ Hã ra sóg ảjag jagfy jagtar nỡ, ảjag tỡ ti hã to tar nỹtỡn jẻ gẻ, ảjag krenkren jẻ. Topẻ tỡ isar han kỡ tóg inh kóm ảjag tar han ke mũ gẻ sir. ảjag tỡ inh kóm jagtar nỹtỡn kỡ ảjag

tóg inh kóm ti to krónh kenh ke tũ nỡ gẻ sir.

⁷ ảjag ki ẻkrẻn mág sóg tỡ, hã ra sóg ki kanhrỏ nỡ, Topẻ tỡ ảjag tar han ẻn ki. Ừri ảjag tóg hã ra inh mrẻ jagtar nỹtỡ, hã kỡ Topẻ tóg ảjag krỡ tỡ kãnhvy' he tỡ gẻ, ti tỡ inh krỡ tỡ kãnhvy' he tỡ ẻn ri ke han tóg tỡ, ảjag mỡ.

⁸ Inh kanhkỏ', ảjag mỡ sóg inh jagtar mág ja tỏ sỏr mũ. Ga tỡ ỏsia tá sóg nẻn ũ jagy tỏvỡ ve ja nỡ, tá ag tóg isỷ hẻn ri ke kren, kỡ sóg: “ừri inh hỡn kren mãn ke tũ nỡ ha,” he ja nỡ.

⁹ “Ag tỡ isỷ tũg' hẻnh ke hỡn,” he sóg mũ vễ. ẻn kỏ sóg Topẻ hã mũ ẻkrẻg mũ sir, isỷ vẻnhmỡ kren mãn ke tũ nỡn kỡ. “Ti hã ne inh kren han ki kanhrỏ nỡ,” he ja inh nỡ. “Ừn kỏgter mũ ag rỡnrỡn mãn ki kanhrỏ tóg nỡ, kỡ tóg inh kren han ki kanhrỏ nỡ gẻ,” he ja inh nỡ.

¹⁰ Kỡ tóg inh kren han ja nỡ, iser kren mũ ẻn kỏ, kỡ tóg kejẻn inh kren han mãn ke mũ gẻ. Ti hã mỡ sóg to vỡ tỡ, ti hã tỡ inh kren han jẻ.

¹¹ Kỡ iso vỏsỏn nỡ gẻ, iso Topẻ mrẻ vỡ kỡ, kỡ Topẻ tóg ảjag vỡ mẽnh mũ. Ti tỡ ảjag vỡ mẽ tũgrỡn inh jagẻgtãn kỡ ảjag tóg ti mỡ agradercer hẻnh ke mũ. Kỡ ũ tỡ hẻn ri ke ag vỡ Topẻ mỡ vỡ há han ke mũ, ti tỡ inh jagẻgtãn ke tũgrỡn.

Paulo tỡ Corinto tá ke ag venh kỏtũg ja tũ

¹² Ha vẻ, inh jykre tóg tỡ ừn há nỡ, ki kanhrỏ inh nỡ. Vẻnh kar mỡ sóg nẻn ũ há hã han

tĩ, vĕnh jykre kuryj, kŷ sóg ki hã tó tĩ gé, Topĕ jykre han kŷ. Inh pi(jé) isŷ vĕsóg ki nĕn to jykrĕn mŭ ěn hã han tĩ'. Topĕ hã ne isar han tĩ', isŷ ti jykre ki króm jé. Kŷ sóg ājag mŷ ti jykre hã kãmĕn ja nĭgtĩ gé.

13 Tag hã rán isóg tĩ gé, kŷ ājag tóg isŷ rá ve kŷ (ājag tóg) ki kanhrān ke mŭ gé sir. Ti pi(jé) mĕ jagy tĩ'. Ājag tŷ ki kanhrān kãn kŷ tóg há tĭnh mŭ.

14 Ājag tŷ ki kanhrān sĭ tag kãfór han kŷ tóg há tĭnh mŭ. Kŷ kurā ěn kã, ěg Senhor tŷ Jesus kurā ěn kã tóg ājag mŷ sér tĭnh ke mŭ, ājag tŷ inh ven kŷ. Kŷ tóg inh mŷ sér tĭnh ke mŭ gé, isŷ ājag ven kŷ.

15 Tag to jykrĕn kŷ sóg ājag ki jun kren ja nĭgtĩ. Isŷ ājag ki jun ke vĕ vĕ, isŷ ājag tar han jé. Isŷ vãsŷ ājag tar han ja ěn ri ke han mãn ke vĕ vĕ.

16 Kŷ sóg ājag ve kar kŷ (sóg) ga tŷ Macedônia ra tĭg ke mŭ vĕ. Kar kŷ, isŷ Macedônia tá kãtĭg mãn kŷ sóg ājag ve mãn ke mŭ vĕ gé, ājag tŷ inh jagãgtãn kŷ inh mŷ jãnkamy nĭmñĩ' he jé vĕ vĕ, isŷ ga tŷ Judéia ra tĭg há han ke to.

17 Hã ra tóg inh mŷ ki krov ja tũ nĩ, hã kŷ sóg kãtĭg ja tũ nĩ. Kŷ inh mŷ kanhir kŷ ājag mŷ: “kãtĭg jé sóg ke mŭ,” he ja nĩ? Vó. Inh jykre pijé', isŷ kanhir kŷ tó tĩ ěn ti. Kŷ sóg jykré régre han tũ nĭgtĩ gé. Ũn jykre régre ag tŷ: “hej,” he mŭ ra ag tóg han sór tũ nĩ. Ge tũ inh nĭgtĩ.

18 Topĕ hã ne ón vãnh nĩ', hã ra tóg ki kanhró nĩ, inh jykre pir nĩ ti.

19 Topĕ kósĩn jykre hã han sóg tĩ, Jesus Cristo jykre ti. Inh hã ne ājag mŷ ti kãmĕn ja nĩ', Silas mré, Timóteo mré ke gé. Ti pi(jé) ā tŷ: “hej,” he mŭ ra han ke tũ nĩ'. Han ti tĩ, nĕn ũ kar ti, Topĕ kósĩn ti.

20 Topĕ hã vŷ ěg mŷ ěg tŷ nĕn vĕnh ke ti tó ja nĭgtĩ, kŷ ěg tóg ti kósĩn hã tigrĩn vĕg mŭ sir, ti panh tŷ ěg mŷ nĕn tó mŭ ěn ti. Hã tó sóg tĩ, vĕnh kar mŷ, Topĕ ón vãnh ěn hã tó sóg tĩ. Kŷ ěg tóg ti hã mŷ vĩ há han ti sir, Topĕ hã mŷ, ěg tŷ ti tŷ ěg mŷ nĕn tó mŭ ěn to: “hã vĕ,” hen kŷ.

21 Topĕ hã ne Cristo ki isar han, ājag mré hã. Kŷ tóg ěg kuprĕg gé.

22 Kŷ tóg ěg nĭgjĕg kŷ ěg vin tĩ gé. Ā kuprĭg jĕnĕg tóg mŷ ěg mŷ. Ti tŷ ěg mŷ ā kuprĭg jĕnĕ tigrĩn ěg tóg ki kanhró nŷtĩ, ti tŷ ěg mŷ nĕn ũ kar vin ke mŷ ěn ti.

23 Ha vé, ki hã sóg tó mŭ, Topĕ ne ki kanhró nĩ'. Inh ón tĩ nĩ ra tóg inh vóg kónãn mŭ vĕ. Isŷ ājag to jũ tũ nĩ jé, hã jé sóg ājag tá jun ja tũ nĩ ver, cidade tŷ Corinto tá. Sŷ tá jun ra sóg ājag to jũnh ke mŭ vĕ.

24 Inh pi(jé) ājag to tar han sór mŷ'. Jesus hã ki ge kŷ ājag nŷtĩ, ti hã to tar ājag nŷtĩ. Ājag fe tŷ mrin ke han sór sóg mŷ vĕ, hã jé sóg ājag to vãsãn tĩ vĕ.

2

1 Hã kŷ sóg tag to jykrĕn ja nĩ, ha mĕ: “ag kanĕ jun mãn sór tũ inh nĩ,” he sóg, “hã kŷ sóg ag venh tĭg ke tũ nĩ ver,” he sóg ājag to.

² Ha mẽ, isỹ ãjag kanẽ jun kỹ ù nỹ hỹn inh fe tỹ mrin kenh mũ'? Isỹ ãjag kanẽ jun kỹ ù tỹ inh fe tỹ mrin kenh ke tóg tũ tĩ.

³ Hã kỹ sóg ãjag mẽ vẽn rá ẽn jẽnẽ gé, ãjag tỹ inh kanẽ jun tũ nĩn jé gé, sỹ ãjag ki jun kỹ. Inh jun kỹ tóg inh mẽ há tĩnh mũ, ãjag tỹ inh fe tỹ mrin kenh kỹ. Tag to sóg jykrén tĩ gé, ha mẽ. “Ag tỹ inh fe tỹ mrin ke kỹ tóg hỹn ag mẽ sér tĩ gé,” he sóg tĩ, ãjag to.

⁴ Sỹ ãjag mẽ carta ẽn rán mũn kỹ sóg to fy mág mẽr, ãjag tigrĩn sóg kanẽ jur, ãjag tigrĩn sóg vẽn mẽ en. Inh pi(jé) ãjag kanẽ jun sór ja nĩ'. Isỹ ãjag to há pẽ nĩn kỹ sóg ãjag mẽ vẽn rá ẽn han ja nĩgtĩ, ãjag tỹ isỹ ãjag to há nĩ tag ki kanhró nỹtĩn jé.

Ēg tỹ jagnẽ mẽ vẽn pãte fón ke

⁵ Ha mẽ, ãjag kãmĩ ù tóg ãjag kanẽ jur han ja nĩ. Ti pi(jé) isavĩn kanẽ jun ja nĩ'. ãjag kar kanẽ jun ja tóg nĩ. Hẽn ri ke mũn sóg tó há han ja tũ nĩ, isỹ: “ãjag kar,” he kỹ. ãjag kãmĩ ùn e kanẽ junjur han tóg hã ra, ti tỹ Topẽ vĩ mranh tigrĩn.

⁶ Kỹ ãjag tóg hur ti mẽ vĩ kónãn. Ha ti tovãnh, gen kỹ.

⁷ Vãhã ti mẽ vẽn pãte fón nĩ, ti mẽ vẽn vĩ há hã tómnĩ. Ke tũ nĩ (mũ) ra ti fe kaj tóg ti tén ke mũ, ha vemnĩ.

⁸ Hã kỹ sóg ãjag mẽ tag to vĩ sór mũ vãhã, ha mẽ: ti mẽ ven nĩ, ãjag tỹ ti to há nỹtĩ ti.

⁹ Isỹ ãjag tỹ inh vĩ kri fig mũ ẽn ve sór ja vẽn, hã jé sóg ãjag

mỹ vẽn rá ẽn jẽnẽ ja nĩ, mẽr, ha mẽ.

¹⁰ ãjag tỹ ù mẽ vẽn pãte fón kỹ sóg ti mẽ vẽn pãte fón tĩ gé. Kejẽn sóg vẽn pãte fón tĩ, ù mẽ. Kỹ sóg Cristo rĩnve ti mẽ vẽn pãte fón tĩ, ãjag jagãgtãn kỹ.

¹¹ Satanás tỹ ẽg tỹ hẽ ri ke tũ nĩn jé sóg vẽn pãte fón tĩ. Ti tỹ nén to jykrén mũ ẽn ki kanhró ẽg tóg nĩ mẽr, Satanás tỹ nén to jykrén mũ ti.

Paulo krĩ kufy

¹² Ha vé, isỹ cidade tỹ Trõade tá jun ja nĩn kỹ sóg tá ke ag mẽ Cristo kãme sér ẽn tó ja nĩgtĩ. Kỹ ag tóg jẽmẽ há han ja nĩgtĩ, ẽg Senhor tỹ ag krĩn kỹ.

¹³ Hã ra sóg ẽg mré ke tỹ Tito ve ja tũ nĩ tá. Isỹ tá ti venh ke vẽn vẽn, hã ra tóg ki tũ nĩ, isỹ tá jun mũ ra. Hã kỹ sóg ti to krĩ kufy nĩ ja nĩgtĩ. Hã kỹ sóg ag mẽ: “isĩg ke vẽn,” he kỹ tĩg ja nĩ sir, ga tỹ Macedõnia ra, ti nón.

Jesus vĩ tỹ nén ger há ri ke nĩ

¹⁴ Hã ra sóg Topẽ hã mẽ vĩ há han tĩ. Ti hã ne inh jẽnẽg tĩ', isỹ ẽmã kar mẽ tĩg jé, Cristo tigrĩn. Kỹ vẽn kar tóg ti tỹ tỹ ùn mág pẽ nĩ hã vэг tĩ, ag tỹ inh jykre jagma ẽvãnh kỹ. Hã kỹ vẽn kar tóg ti ki kanhrãn mũ sir, isỹ ag mẽ ti tón kỹ. Kỹ tóg ag mẽ nén ger há kri nĩ nĩ, ag tỹ ti vĩ mẽn kỹ.

¹⁵ Nén ger há tóg vẽn kar kri rũm ke tĩ. Rĩ ke ti nĩ, isỹ vẽn kar mẽ Cristo kãmén kỹ, ag tỹ Topẽ ki kanhrãn jé. Vẽn kar mẽ sóg ti vĩ tó tĩ, ùn

krenkren mũ ag mÿ, ùn vâgfor kÿ nÿtĩ ag mÿ ke gé.

¹⁶ Ùn vâgfor kÿ nÿtĩ ag tÿ inh vĩ mēg mũ ra kri fig tũ nĩn kÿ ag tóg nũgme ki vár ke mũ. Kÿ inh vĩ tóg ag mÿ nén ù ter ger gy ên ri ke nĩ. Ag jâvo ùn krenkren mũ ag tÿ inh vĩ jēmē kÿ ag tóg rĩnrĩr ke mũ, ag tÿ inh vĩ kri nĩm kÿ. Kÿ inh vĩ tóg ag mÿ ěg tÿ nén ger há mē kÿ ěg fe tÿ mrin ke ên kri nĩ nĩ. Hã ra ěg pi(jé) vēsóg ki vēnh rãnrãj tag han há nÿtĩgtĩ'.

¹⁷ Ha vé, ù ag vÿ Topē vĩ kãmén to ti kaja ve sór tĩ, jãnkamy ve sór to ag tóg Topē vĩ kãmén tĩ. Ke tũ nĩ kÿ ag tóg ti vĩ tó ên tugrĩn vēsÿ ùn mág han tĩ. Ag jâvo inh pi(jé) ti kaja ve sór tĩ', inh pi(jé) vēsÿ ùn mág han sór mũ'. Cristo ki rã kÿ sóg Topē rĩnve ti kãmén tĩ. Jykre pir han sóg tĩ gé mÿr. Kÿ ù tÿ inh jēnēg mũ vÿ tÿ Topē ti nĩ.

3

Vēnh jykre tãg

¹ Kÿ ājag hÿn iso: “tÿ sóg ùn há nĩ, he tóg tĩ, Paulo ti,” he sór tĩ. Hã tũ vē. Ù ag tóg ājag mÿ carta to vĩ tĩ, kÿ ag tóg: “ùn há vÿ tÿ ti nĩ, hemnĩ iso, carta ki,” he tĩ, “kÿ vēnh kar tóg vēnh rá tag ve kÿ isÿ tÿ ùn há nĩ ki kanhró nÿtĩnh mũ,” he ag tóg tĩ. Inh pi(jé) carta tÿ ge ma tĩg sór mũ'.

² Inh mÿ ājag tóg carta ri ke nÿtĩ. Ājag mĩ sóg ěkrég tĩ, kÿ sóg vēnh kar mÿ ājag kãmén tĩ. Inh hã ki ag tóg ājag jykre há vég tĩ, kÿ ag tóg isÿ tÿ ùn há nĩ

ên ki kanhrãn mũ sir. Hã ki ājag tóg carta ri ke nÿtĩ.

³ Ājag mÿ sóg Cristo jykre kãmén ja nĩ, kÿ ājag tóg mĩ mũgtĩ. Kÿ vēnh kar tóg ājag jykre ve kÿ (ag tóg) Cristo ki kanhró nÿtĩ, kÿ ājag tóg tÿ Cristo tÿ vēnh rá ri ke nÿtĩ, sÿ carta han ja ri ke. Hã ra ti pi(jé) caneta tÿ rán kÿ nĩ'. Topē kuprĩg tÿ tóg rán kÿ nĩ, ùn rĩr nĩ ên kuprĩg tÿ tóg rán kÿ nĩ, carta ên ti. Kÿ tóg pó tÿ rán jafã kri rán kÿ nĩ tũ nĩ gé. Ěg ki tóg rán kÿ nĩ, kÿ tóg tÿ ěg jykre nĩ sir, carta ri ke ên ti.

⁴ Topē hã vÿ Cristo tÿ isar han tĩ, hã kÿ sóg ājag ki carta tÿ ge han ki kanhró nĩ.

⁵ Inh pi(jé) vēsóg ki nén ù há to jykren ki kanhró nĩ'. Inh pi(jé) vēsóg ki nén ù há han ki kanhró nĩ gé'. Hÿ, Topē hã ne isar han tĩ', isÿ nén ù há han ke to.

⁶ Ti hã ne inh krĩn tĩ', isÿ ti jykre tãg kãmén jé, vēnh kar mÿ. Ti pi(jé) ěg mÿ vāsÿ nén rán kÿ nĩ ên tó mãn mũ'. Vãhã tóg ěg mÿ ā kuprĩg jēnēg mũ. Vēnh jykre tãg to ken hã vē, hã vÿ: “Topē kuprĩg tÿ ěg krĩn mũ,” he mũ. Ha vé, Topē kuprĩg vÿ ěg rĩn tĩ, jãvo vāsÿ Topē vĩ rán kÿ nĩ ên vÿ ěg tén ke ja nĩgtĩ, ěg tÿ mranh kÿ.

⁷ Topē vĩ tÿ vāsÿ rán kÿ nĩ ja ên vÿ pó kri rán kÿ nĩ ja nĩ, ù tÿ ěg tén mũ ên ti. Moisés tóg pó kri ti rán ja nĩ, Topē tÿ ti mÿ tón kÿ. Ti tÿ ti mÿ tó kar kÿ ti kakã tóg jēngrē nĩ ja nĩgtĩ, Moisés ti. Kÿ tóg Israel ag mÿ e ja tĩ, Moisés kakã ki ěvãnh tũ ja ag tóg nĩgtĩ sir, ti tÿ kakã

jěngrě nĩn kŷ. Hã ra tóg kejěn tũ' he ja nĩgtĩ gé, ti kakã jěngrě ti.

⁸ Kŷ ũ tŷ Topě kuprĩg kãmén mũ ěn hŷn tóg Moisés kakã jěngrě kãfór nĩ, ti sĩnvĩ kãfór ti nĩ.

⁹ Moisés vŷ Topě tŷ ěg vóg kónãn ke ěn tó ja nĩgtĩ. Hã ra Topě vĩ tag tóg ti kakã jěngrě han, ti sĩnvĩ han ti. Jãvo sóg Topě tŷ ěg mŷ věnh pãte fón ke ěn hã tó tí. Ti tŷ ěg to “jykre há ag nŷtĩ ha,” he mũ ěn tó sóg tí. Topě vĩ tag tugrĩn sóg Moisés sĩnvĩ kãfór pě nĩ.

¹⁰ Kŷ vãsŷ nén sĩnvĩ ěn tóg vãhã ěg mŷ sĩnvĩ tũ nĩ ha, vãsŷ jěngrě ěn tóg ěg mŷ jěngrě tũ nĩ ha, ěg tŷ ũ tãg tag sĩnvĩ ve kŷ, ěg tŷ ũ tãg jěngrě ven kŷ. Ũn tãg tag vŷ nén kar sĩnvĩ kãfór nĩ.

¹¹ Vãsŷ rán kŷ nĩ ja ěn tóg tũ' he ja nĩ. Kŷ ũ tŷ tũ' he mũ ěn tóg sĩnvĩ ja nĩgtĩ gé. Ti jãvo isŷ věnh jykre tó mũ tag vŷ tũ' henh ke tũ pě nĩ, hã kŷ tóg ũn si sĩnvĩ ěn kãfór nĩ.

¹² Ěg tŷ tag venh ke jãvãnh sóg mũ mŷr. Hã kŷ sóg jamã hár(a) tó mũ, inh pi(jé) sŷ ag mŷ tó jé to mŷ'ãg mũ'.

¹³ Moisés ri ke han tũ sóg nĩ. Kur tŷ tóg věnh kri fón ja nĩ. Kŷ tóg věnh pugrĩn ja nĩ, ti tŷ ã kakã jěngrě ěn péju jé. Hã ra tóg koměr hã tũ' he ja nĩ, ti jěngrě ěn ti. Hã kŷ tóg kur krēm věnh péju, Moisés ti, Israel ag tŷ ti jěngrě vэг tũ nĩ jé.

¹⁴ Hã ra ag tóg ũri ki kagtĩg nŷtĩ gé ver. Kyvó ri ke ag nŷtĩ, kutu, Israel ag. Ag tŷ vãsŷ rán kŷ nĩ ěn to ken kŷ tóg ag mŷ

Moisés věnh pugrĩn kŷ nĩ ěn ri ke nĩ, ti pãkrĩ ri ke. Ag tŷ ki kagtĩg to ken hã vě. Cristo hã tugrĩn ěg tóg vãsŷ nén rán kŷ nĩ ěn to jykrén há han mũ ha, hã ra ag tóg ki kagtĩg nŷtĩ jãvo.

¹⁵ Hã kŷ ag tóg Moisés tŷ nén rán mũ to ke ěn mĕg tí, hã ra ag tóg to jykrén tũ nĩgtĩ, kŷ tóg Moisés věnh pugrĩn ěn ri ke nĩ ag mŷ, ti pãkrĩ ěn ri ke.

¹⁶ Kejěn ũ tóg ěg Senhor ki rã mũ, ag kãki ũ. Kŷ tóg vãhã ag tŷ ti věnh pugrĩ vym ri ke nĩ.

¹⁷ Hã kŷ tag tóg rán kŷ nĩ, Topě vĩ rá ki, ha mĕ: Moisés tŷ ěg Senhor mré vĕmén kŷ tóg ã věnh pugrĩn tŷ vym ke ja nĩgtĩ,” he ja tóg nĩ, Topě vĩ rá ki. Topě kuprĩg to ken hã vĕ, ěg Senhor he mũ tag ti. Kŷ ěg Senhor kuprĩg hã ne ěg kygvãn ke mũ', ěg tŷ ti vĩ ki króm ke to.

¹⁸ Hã kŷ tóg ěg mŷ ti věnh pugrĩn tŷ vym ke ja ri ke nĩ, kŷ ěg tóg ěg Senhor sĩnvĩ ěn, jěngrě ěn ve há han tí. Ěg tŷ věnh ve jafã ki nén ũ ve há ěn ri ke tóg nĩ sir. Ěg tŷ ěg Senhor ki ěvãnh kŷ ěg tóg ti ri ke nŷtĩnh ke mũ gé. Koměr hã ěg tóg ve ũ han ke mũ, ti ve ěn ri ke, ěg tŷ ti tugnŷm kŷ, ěg tŷ ěg Senhor tugnŷm kŷ, ti kuprĩg ti.

4

Paulo krój nĩ

¹ Inh rãnrãj hã vĕ, Topě tŷ inh mŷ věnh rãnrãj nĩm jan hã vĕ. Kŷ tóg inh jagãgtãn mũ gé, isŷ ti rãnrãj to krónh ke tũ nĩ jé.

² Hỹ, ù ag tóg nén tỹ ěg mỹ'ąg han tí ěn han tí, kuty tá, ù tỹ ag vég tú nĩn jé. Věnh jykre tỹ ge tovānh kān inh huri mýr. Kỹ sóg ājag mỹ ón tú nĩgtĩ gé, ājag lograr henh ke tú sóg nĩ gé. Ón kỹ sóg: “Topě vỹ tag tó ja nĩ,” he tú nĩ gé. Ki hã sóg tó tí. Topě rĩnve sóg vēmén tí, hã kỹ sóg ón tú nĩgtĩ. Û tỹ isugnỹm mũ ěn vỹ ki kanhrān kān ke mũ, inh jykre ki.

³ Kỹ ù tóg kejēn ki kagtĩg nỹtĩ, isỹ Jesus kāme sér tó mũ ěn ki. Ag mỹ tóg nén ù péju kỹ nĩ ri ke nĩ. Û tỹ vāgfor kỹ nỹtĩ ag vē, hã kỹ ag tóg ki kanhrān tú nĩgtĩ.

⁴ Kyvó ag nỹtĩ, krĩ tú ag nỹtĩ. Jesus ki ge sór tú ag nỹtĩ, Satanás tỹ ag kyvó nĩm ti kỹ. Ěprā pā'i ag kri ke vỹ tỹ ti nĩ, Satanás ti. Ti tỹ ag kyvó nĩm ti kỹ ag tóg Cristo kāme tag to jykren tú nĩgtĩ. Ti jēngrē vég tú ag tóg nĩgtĩ, ti sĩnvĩ ti. Cristo hã vỹ tỹ Topě kānhvég ri ke nĩ, ti ve ri ke.

⁵ Inh pi(jé) inh jykre kāmén tí'. Jesus Cristo hã kāmén sóg tí, ti tỹ tỹ ěg Senhor nĩ ti. Jāvo sóg tỹ ājag camarada ri ke nĩ, isỹ Jesus to há nĩn kỹ.

⁶ Ha vé, ù tỹ kutyg mũ ra kurāg han mũ ěn tóg ěg ki kurā han mũ gé sir, Topě tí, ěg tỹ ki kanhrān jé, Topě tỹ tỹ ùn mág nĩn ki. ěg tỹ Cristo ve kỹ ěg tóg Topě ki kanhrān tí. Cristo vỹ tóg Topě ve hã pē nĩ. ěg ki kurā to ken hã vē, hã vỹ: Topě ki kanhró he mũ.

⁷ ěg tỹ tỹ ěprā ke nỹtĩ (hã) ra tóg ěg kanhrān sór tí, kỹ tóg ěg tỹ go'or tỹ kukrũ han kỹ kākĩ

jānkamy e vin ěn ri ke nĩ. ěg hã vỹ tỹ go'or tỹ kukrũ ěn ri ke nỹtĩ, ěg krój nỹtĩn kỹ, inh ke gé. Hã ra tóg ěg kanhrān tí, věnh kar tỹ ti hã tỹ tỹ ùn tar tāvĩ nĩ ěn ve je. Jānkamy ri ke to ken hã vē. ěg pi(jé) tar nỹtĩ'. Û tỹ ěg tar han mũ vỹ tỹ Topě ti nĩ.

⁸ Inh krój nĩ ra Topě tỹ isar han mũ vē, ha vé ha. Nén kar tóg inh kutān tí, hã ra inh pi(jé) to krĩ kufy han tí'. Kejēn tóg inh jykre tú tĩgtĩ, kỹ tóg isỹ: hỹ mỹ vỹ? he ja há tĩgtĩ, hã ra inh pi(jé) to krónh ke tí'.

⁹ Inh vóg kónān ag tóg tí, hã ra Topě pi(jé) isovānh tí'. Inh rỹnh ag tóg tí, hã ra ag pi(je) isén tí'.

¹⁰ Kurā kar ki sóg Jesus vēsýrénh ěn ri ke han tĩgtĩ. Hã tigrĩn věnh kar tóg Jesus rĩn nĩ tag venh ke mũ gé, inh vēsýrénh tigrĩn.

¹¹ Kurā kar ki sóg ter kren tí, Jesus tigrĩn. Hã ki Jesus rĩn nĩ tóg inh ki ve há tí, inh fār vag ke mũ ra.

¹² Iser kren kỹ ajag tóg tar nỹtĩ jāvo, rĩnrĩr ājag nỹtĩ.

¹³ Tag vỹ Topě vĩ ki rán kỹ nĩ, ha mẽ: “Topě vĩ kri nĩm inh, hã kỹ sóg tó,” he ja tóg nĩgtĩ, Topě vĩ rá ki. Topě vỹ tag hã vỹ inh jykre han tí, hã kỹ sóg tó tí gé. Kri fig sóg tí, hã kỹ sóg tó tí mýr.

¹⁴ Topě ne ěg Senhor tỹ Jesus rĩn mǎn ja nĩ'. ěn vỹ inh rĩn mǎn ke mũ gé, ki kanhró sóg nĩ. Kurā ěn kǎ tóg ājag mré inh jé prēr ke mũ, ěg tỹ ti mỹ věnh ven jé.

¹⁵ Ājag tigrĩn sóg ti jagy tag

ve kãn tĩ. Kĩ komẽr hã ãn e tóg Topẽ tỹ ag jagãgtãn tag mẽnh ke mũ. Vẽnh grun jé ãg tóg ke mũ, kũ ãn e tóg sir ti mẽ vĩ há han ke mũ. Kĩ Topẽ to vĩ há han mũ ag tóg e tãvĩ nỹtĩ sir. Topẽ tỹ tỹ ãn mág nĩn hã vẽ.

Ëg tỹ Jesus ki ge kũ nỹtĩn kũ ãg krenkren ke

¹⁶ Hã kũ sóg to krónh ke jãvãnh nĩ. Ha vé, inh fár tag tóg krój nĩ, komẽr hã tóg ter sór mũ, ti vag jé. Hã ra inh kuprĩg tóg tar nĩ jãvo. Kurã kar ki tóg vẽnhan mẽn tĩ, Topẽ tỹ isar han kũ, inh kuprĩg ti.

¹⁷ Tag ki sóg ti jagy vég tĩ, hã ra tóg inh mẽ kãnhvy nĩ. Tũ' he jé tóg ke mũ, tag ki ti jagy ti. Tá ãg tóg nẽn ã há tãvĩ venh ke mũ, ãg tỹ tag ki ti jagy ve ja tugrĩn, hã ra tóg tũ' he jãvãnh nĩ, ãg tỹ tá nẽn venh ke mũ ãn ti. Ki kagtĩg ãg nĩ ver, hã ra tóg há tãvĩ nĩnh mũ, ãg tỹ tag ki nẽn ã há ve kãfór ti nĩnh mũ, tá.

¹⁸ Hã ve sór inh nĩ, hã mẽ sóg ãkrég tĩ. Ver ãg tóg vég tũ nĩgtĩ, sỹ nẽn ve sór mũ tag ti. Hã kũ sóg ãg tỹ nẽn (ũ) vég mũ tag to jykren sór tũ nĩgtĩ. Ëg tỹ nẽn (ũ) vég mũ tag vỹ tũ' henh ke mũ. Ëg tỹ ãri nẽn (ũ) vég tũ ãn vỹ tũ' henh ke tũ nĩ, ãg tỹ tá nẽn venh ke mũ ãn ti.

5

¹ Ëg fár vỹ ãg pãjó ri ke nĩ. Tũ' he jé tóg ke mũ, ãg fár ti. Hã ra Topẽ ne ãg mẽ ãn tãg ri ke han ke mũ', kãnhkã tá'. Hã ra tóg ãg tỹ tag ki ãn han ri

ke tũ nĩ. Tũ' he jãvãnh tóg nĩ, Topẽ tỹ ãg jamã tãg han mũ ti.

² Tag ki ãg tóg vẽnsỹrénh tĩ, ãg fár tỹ ãg pãjó ri ke tag ki. Kũ tóg ãg tỹ kãnhkã tá ãg jamã tãg ãn venh há tĩ. Hã jé ãg tóg prẽr tĩ. Kũ tóg ãg tỹ kur tãg tu ri ke nĩ.

³ Ëg tỹ kur tu kũ ãg kator tũ nỹtĩ. Ëg kur ri ke ti nĩ, kãnhkã tá ãg jamã ti, ãg tỹ ãg fár tãg tun kũ.

⁴ Ha vé, ki hã sóg tó mũ. Tag ki, ãg tỹ ãg fár tỹ pãjó ri ke tag ki nỹtĩn kũ ãg tóg vẽnsỹrénh tĩ, ãg mẽ ãg ter jãvãnh tĩn kũ. Ëg mẽ tóg ãg rĩr hã tag tỹ kãnhkã tá jun há tĩ vẽ, kũ tóg ãg tỹ tag ki ãg kur kunũg tũ ra ãg tỹ kãnhkã tá jun kũ ãg kur tãg tu ri ke nĩnh mũ, ãg mẽ. Kũ ãg tỹ ãg fár tãg ve kũ ãg fár si tóg tũ' he mũ, ãg ter tũ ra. Tag hã tóg ãg mẽ há tĩnh mũ vẽ.

⁵ Ëg tỹ kãnhkã tá ãg fár tãg venh ke jé Topẽ tóg ãg mẽ vẽnhan jykre nĩm, kũ tóg ãg mẽ ã kuprĩg jẽnẽ gé. Hã ki ãg tóg ki kãnhró nỹtĩ, ãg tỹ tá nẽn (ũ) venh ke mũ ãn ki.

⁶ Hã kũ tóg inh mẽ sér tĩ. Ëg tỹ ver ga kri mũn kũ ãg tóg ãg Senhor vég tũ nĩgtĩ ver.

⁷ Ëg tỹ ti vég tũ ra ãg tóg ti vỹ kri fig tĩ.

⁸ Kũ sóg kãñ jur mẽn tũ nĩ ha. Isỹ inh fár tỹ pãjó ri ke tag tovãnh há tóg tĩ, sỹ ãg Senhor mré nĩ jé, inh jamã pẽ tá.

⁹ Hã kũ sóg vãsãn tĩ, inh jykre tỹ ti mẽ há nĩ jé. Isỹ tag kã nĩ kũ sóg vãsãn tĩ, kũ sóg tá vãsãn ke mũ gé, sỹ tá ti mré nĩnh ken kũ.

¹⁰ Ha vé, ěg kar vỹ Cristo mỹ vĕnh ven ke mũ, ti tỹ ěg jykre tugnỹm jé. Kỹ tóg ěg mỹ nĩm ke mũ, ěg tỹ tag ki nén (ũ) han mũ kaja ti. Ũ tỹ tag ki nén (ũ) há han mũ ěn tóg ã tũ kajan venh ke mũ gé, kỹ ũ tỹ tag ki nén (ũ) kórég han mũ ěn ag tóg ãjag vĕsỹrénh venh ke mũ gé sir.

Cristo tỹ ěg jykre si tỹ tũ' he

¹¹ Ha vé, ěg Senhor kamĕg sóg tĩ, hã kỹ sóg ěprã ke ag mỹ ki hã tó tĩ, ag tỹ ti ki ge jé. Topĕ hã ne inh ki kanhró kar nĩ'. Kỹ ãjag hỹn, ãjag tỹ nén to jykren há han kỹ (ãjag hỹn) inh ki kanhró nỹtĩnh ke mũ gé, he sóg tĩ.

¹² Inh pi(jé) ãjag mỹ: “ũn mág vỹ tỹ inh nĩ,” he sór tĩ'. Hã ra sóg ãjag mỹ vĕnh kãmén mũ, ti tỹ ãjag mỹ sér tĩ jé, sỹ ãjag mỹ nén (ũ) kãmén mũ ěn tugrĩn, ãjag tỹ iso: “jykre há tãvĩ ti nĩ,” he jé. Tag tómnĩ, ũ tỹ vĕsỹ tỹ ũn mág han sór mũ ag mỹ. Ũ tỹ ge jykre vỹ sĩnvĩ nĩ ve nĩ, hã ra tóg ěg tỹ ve há han kỹ (tóg) krój nĩ, ag jykre ti.

¹³ Ha vé, krĩ tũ inh nĕji nĩ. Topĕ jykre han tugrĩn sóg krĩ tũ nĩ ve nĩ. Kejĕn sóg krĩ há han tĩ gé. ãjag tugrĩn ke vĕ, inh krĩ há ti.

¹⁴ Cristo hã vỹ tỹ inh fe nĩ, hã kỹ sóg vĕnh kar to há nĩ. Tag to sóg jykren mũ, ha mĕ: vĕnh kar jagfy tóg ter ja nĩ, Cristo ti, kỹ ěg kar jykre si vỹ tũ' he mũ sir, ti jamĕn kỹ.

¹⁵ Ti hã ne vĕnh kar jagfy ter ja nĩ'. Hã kỹ ěg pi(jé) tỹ ěg tũ nỹtĩ', ũri'. Ti tũ vỹ tỹ ěg nỹtĩ, ti tỹ ěg jagfy ter ja nĩn kỹ, ti tỹ ěg

jagfy rĩr mãn ja nĩn kỹ ke gé. Kỹ ti hã ne ěg mỹ ěg tỹ nén han ke mũ ěn tó tĩ', ũri'.

¹⁶ Vãsỹ ěg tóg ěg tỹ vĕsóg ki nén (ũ) to jykren kỹ (ěg tóg) ěprã ke jykre to: “tag vỹ há nĩ, tag vỹ kórég nĩ,” he ja nĩgtĩ. Ũri ěg tóg vĕsóg ki tag to jykren mãn ke tũ nĩ ha. Cristo to ěg vĕsóg ki jykren mãn ke tũ nĩ gé, ěg tỹ vãsỹ vĕsóg ki ti to jykren' he ja ěn ri ke tũ vĕ ha, ũri.

¹⁷ Hĕ ri ken kỹ? Cristo tỹ ěg han mãn kỹ mỹr. Ti ki ge kỹ ěg nỹtĩ, hã kỹ tóg ěg han mãn ja nĩ. ěg jykre si tóg tũ tĩ ha, ěg tỹ nén han ja ěn tóg tũ tĩ ha ke gé. Ũri ěg tóg tỹ ũn tãg nỹtĩ ha, ěg krĩ, ěg jykre ti ke gé.

¹⁸ Topĕ tỹ nén han mũn hã vĕ. Topĕ kato vãsãn ěg tĩ vĕ, hã ra ěg tóg ũri tỹ Cristo mré ke nỹtĩ ha, Topĕ tỹ ěg han mãn kỹ, Cristo tugrĩn. Kỹ tóg ěg mỹ vĕnh rãnrãj tag nĩm mũ gé sir, ěg tỹ vĕnh kar mỹ: tỹ Cristo mré ke nỹtĩmnĩ, he jé.

¹⁹ Ha vé, Topĕ vỹ Cristo jĕnĕ, ti tỹ ěg tỹ tỹ ti mré ke nỹtĩ han jé, ěprã ke kar tỹ ti ki ge sór jé. Kỹ tóg ěg tỹ ti vĩ mranh tỹ tũ' he sór mũ gé sir, ěg tỹ ti kaja kórég vég tũ nĩ jé. Kỹ tóg ěg mỹ: ha vĕnh kar mỹ tó, isỹ ag to há nĩ sór mũ ti,” he ja nĩ gé.

²⁰ Cristo hã ne inh jĕnĕg mũ', isỹ ti jiji tó jé. Kỹ Topĕ tóg vĕnh kar jyvĕn tĩ, kỹ sóg hã tó jĕ nĩ. Hã kỹ sóg Cristo jyy tó kỹ (sóg) ãjag mỹ tag to vĩ sór mũ, ha mĕ: “Topĕ to há nỹtĩmnĩ, ti kato vãsãn mãn sór tũg nĩ,” he sóg mũ.

21 Jesus pi(jé) Topě vī mranh ja nīgtī'. Hã ra tóg ěg tỹ ti vī mranh ja ěn kajãm kãn. Kỹ tóg ěg mỹ Topě jykre kuryj ěn nĩm mũ sir, ěg jagfy kajãm kar kỹ.

6

1 Topě mré sóg rãnrãj tĩgtĩ. Hã kỹ sóg ãjag jyvẽn mũ, ãjag tỹ Topě vī ki króm jé. ãjag tỹ ti vī ki króm tũ nĩn kỹ tóg fagrĩnh mỹ ãjag jagãgtãn nĩ.

2 Ti hã ne tag tó ja nĩ', ha mẽ: sỹ ãjag jagãgtãn ke kurã ki sóg ãjag tỹ inh mỹ nén to vī mũ ěn han ke mũ. ãjag krenkren ke kurã ki sóg ãjag krenkren han ke mũ," he ja tóg nĩ, Topě ti. ãjag krenkren ke kurã vỹ hur jun, ha mẽ. Ūri tóg ěg krenkren han sór mũ, Topě ti.

3 Kỹ sóg nén ũ vẽnhmỹ han tũ nĩgtĩ sir, ũ tỹ iso vẽnh jykre kórég tó tũ nĩ jé, inh rãnrãj to.

4 Vẽnh jykre há mĩ sóg tĩ mỹr, isỹ tỹ Topě camarada jẽn kỹ, kỹ inh jykre tóg vẽnh kar mỹ ve há tĩ. Isỹ nén ũ jagy vég mũ ra sóg ti to krónh ke tũ nĩgtĩ, ijagtar nĩ ra, inh kanẽ jur mũ ra.

5 Kejẽn ag tóg inh mrãnmrãn tĩ, vẽnseja kãtã ag tóg inh fón tĩ, vẽnh kar tóg kejẽn inh kri rũv tĩ. Kejẽn sóg inh rãnrãj tỹ inh kutãn to jagtar tĩ, kejẽn sóg nũr tũ nĩgtĩ, kejẽn sóg vẽnjẽn vég tũ nĩgtĩ.

6 Isỹ ti jagy vég mũ hã ra ijykre tóg tỹ ũn há nỹ, Topě vī ki kanhró mág sóg nĩ, vẽnh kar to sóg fe nĩ, vẽnh kar mỹ sóg koměr hã vī tĩ, vẽnh kar tỹ isỹ tỹ Topě camarada jẽ tag ki

kanhrãn kãn jé. Topě kuprĩg vỹ tỹ inh jagrẽ nĩ, hã kỹ sóg vẽnh jykre kuryj to tar nĩ. Inh pi(jé) ón kỹ ũ to há nĩ'.

7 Ki hã tó sóg tĩ. Topě hã ne isar han'. Ti hã ne inh mỹ ã jykre kuryj nĩm', kỹ tóg tỹ isỹ tỹ rãrá jafã nĩ, Topě jykre há ěn ti. Inh kren han tóg, Topě ti, ti tỹ inh mỹ vẽnh jykre kuryj nĩm ti kỹ, kỹ ag tóg ti jykre hã tugrĩn (ag tóg) ãjag jykre kórég vég tĩ gé.

8 Kejẽn ag tóg inh mỹ vī há han tĩ, kejẽn ag tóg iso é he tĩ. Kejẽn ag tóg iso ti kórég kar tó tĩ, kejẽn ag tóg iso nén ũ há tó tĩ. Kejẽn ag tóg iso: "ti ón nẽ," he tĩ, hã ra sóg ón vãnh nĩgtĩ.

9 Ū tóg kãmĩ inh ki kagtĩg nĩ ve nỹtĩ, hã ra vẽnh kar tóg inh ki kanhró nỹtĩ. Ter kren tỹ hẽn ri ke han sóg tĩgtĩ, hã ra sóg rĩr tĩ nĩ ver. Inh vóg kónãn ag tóg tĩ, hã ra ag tóg isén ja tũ nĩ.

10 Inh fe kaj tóg tĩ, ge ra tóg inh mỹ sér tĩ. Jagtar sóg tĩ, hã ra sóg ũ tỹ hẽn ri ke ag jagãgtãn tĩ, ag mỹ Topě vī tón kỹ. Nén ũ tỹ isóg tũ tũ nĩ, hã ra Topě tỹ ěg mỹ nén nĩm mũ ěn kar vỹ tỹ isũ nỹtĩ.

11 ãjag hã mỹ sóg ijagtar tag kãmén mũ, tó kãn sóg mũ, ãjag mỹ, isỹ ãjag to há tãvĩ nĩn kỹ. ãjag hã to sóg fen mág kỹ nĩ.

12 Inh pi(jé) ãjag to kórég nĩ'. ãjag hã ne iso há tũ nĩ ve nỹtĩ'.

13 Inh krẽ ri ke ãjag nỹtĩ. Hã kỹ sóg ãjag mỹ tag to vī sór mũ, ha mẽ: "isỹ ãjag to há kóm iso há nỹtĩmĩ, iso fe mág nỹtĩmĩ," he sóg mũ.

Ū tỹ Jesus ki ge tũ ag pi(jé) tỹ ěg mré ke nỹtĩ'

14 Ū tỹ Jesus ki rã tũ mré jykren sór tũg nĩ. Tỹ ag ěg mré ke tũ nỹtĩ. Hã kỹ ũn jykre pãno ag mré jykren sór tũg nĩ gé, ãjag tỹ vĕnh jykre kuryj han kỹ nỹtĩn kỹ. Kurã pi(jé) tỹ kuty mré ke nĩ'.

15 Cristo pi(jé) Japo mré jykren tí'. Kỹ ũ tỹ ti ki rã kỹ jĕ pi(jé) ũ tỹ ti ki rã tũ mré jykren há nĩnh mũ'.

16 Kỹ Topĕ jo ĩn pi(jé) tỹ ón kỹ topĕ jo ke nĩ'. Ha vé, Topĕ jo ĩn vỹ tỹ ěg nỹtĩ, ũn rĩr mũ jo ĩn. Ti hã ne tag tó', ha mĕ: "ag ki sóg ijamã han ke mũ, ag mré sóg tũg ke mũ, ag Topĕ vỹ tỹ inh nĩnh mũ, kỹ ag vỹ tỹ inh povo nỹtĩnh mũ," he ja ti nĩgtĩ.

17 Hã kỹ ěg Senhor tóg tag tó, ha mĕ: "ag ré kỹ mũmnĩ, vyrmỹ nỹtĩmnĩ. Vĕnh jykre kavéj han tũg nĩ, kỹ sóg ãjag mỹ: ha kãmũ jĕg, henh ke mũ.

18 ãjag jóg vỹ tỹ inh nĩnh mũ, kỹ ãjag vỹ tỹ inh krĕ nỹtĩnh mũ," he tóg, ěg Senhor ti, ũ tỹ nĕn (ũ) kar han ki kanhrãn kỹ nĩ ěn ti," he ja tóg nĩgtĩ, Topĕ vĩ rán ki.

7

1 Inh kanhkã', inh fe vỹ tỹ ãjag nỹtĩ. Hã kỹ sóg ãjag mỹ tag tó mũ. ěg hã mỹ tóg tó mũ, Topĕ ti, ti tỹ tỹ ěg jóg mág nĩ tag ti, kỹ ěg tóg ti venh ke mũ. ãjag tỹ ti ve hã jé nĕn (ũ) kavéj ěn tovãnh kãn nĩ, ãjag jãnhkri nỹtĩ jé. Nĕn (ũ) kavéj han tũg nĩ, to jykren tũg nĩ gé. Komĕr hã jykre há tãvĩ nỹtĩ sórmnĩ. Topĕ tũ vỹ tỹ ěg nỹtĩ,

kỹ ti kamĕg nĩ, ti jykre kuryj ěn ri ke nỹtĩ sórmnĩ.

Paulo fe tỹ mrin ke

2 Iso fe mág han mãn nĩ, ha mĕ. Inh pi(jé) ũ mỹ vĕnh jykre pãno han sór tí', inh pi(jé) ũ krĩn kónãn sór tí', inh pi(jé) ũ tỹ nĕn ũ péju sór tí'.

3 Isỹ ãjag mỹ tag tó mũ jãvo sóg ãjag to kórég tũ nĩ. ãjag mré ke vỹ tỹ inh nĩ, kỹ ěg tóg jatun mỹ jagnĕ mré mũ mũ, jagnĕ mré kãgter ěg tóg ke mũ gé, hĕn ri ke mũn.

4 Inh mỹ ag tóg vĕnh vĩ há tónh ke mũ, he sóg tí ãjag to. Kỹ sóg vĕnh kar mỹ ãjag to: há ag nỹtĩ, he tí. Tag ki sóg ti jagy pĕ vég mũ, hã ra inh krĩ tóg kãnhvy nĩ, ãjag to, kỹ tóg sir inh mỹ sér pĕ tí.

5 Ha vé, isỹ ga tỹ Macedônia tá jun kỹ sóg nĕn ũ tỹ inh krĩ kuprãg ke ve ja tũ nĩ. Tá sóg ti jagy ve mãn gé. Iso rará ag tóg, tá, kỹ sóg vĕnhmỹ en mãn gé sir.

6 Hã ra Topĕ tóg inh mỹ Tito jĕnĕ, kỹ ti hã tóg inh krĩ tỹ kãnhvy' hé. ũn vĕsỹrĕnh mũ ěn mỹ tóg vĩ há han tí, Topĕ ti, hã kỹ tóg inh mỹ Tito jĕnĕ, ěn kã.

7 Ti tỹ inh ki jun kỹ tóg inh mỹ vĩ há han. Kỹ tóg inh mỹ ãjag tỹ iso vĩ há han ja tag tó mũ gé sir, ãjag tỹ inh ve sór mũ tag tó ti mũ, ãjag tỹ vĕnh jykre kórég to vĕnhmỹ en ěn kãmĕn ti mũ, ãjag tỹ inh jagfy vĕnh vĩ tó sór mũ tó ti mũ gé inh mỹ. Sỹ tag mĕ kỹ tóg inh mỹ sér gy tí sir.

8 Inh carta tỹ ãjag ki jun kỹ tóg ãjag fe kaj han, isỹ rá ti. Hã

ra tóg há tĩ. Ājag fe kaj han tóg, kurā pir ki, kŷ ājag tóg ājag jykre kórég ěn tovānh ja nĩ, hā kŷ tóg inh mŷ sér tĩ. Ūri tóg inh mŷ sér tĩ, isŷ carta rán kŷ jĕnĕ ja ěn mĩ ěkrén kŷ, hā kŷ sóg rán tũg sór ja tũ nĩ.

⁹ Inh mŷ tóg sér tĩ. Hĕ ri ken kŷ? Ājag fe kaj mŷ inh mŷ sér tĩ? Vó. Ājag tŷ ājag fe kaj tŷ ājag mŷ jagy tĩn kŷ ājag jykre kórég ěn tovānh kŷ tóg inh mŷ sér tĩ. Ājag fe kaj tugrĩn ājag tóg Topĕ mŷ vĕnh fĕg, kŷ inh carta tóg ājag mŷ nén (ũ) kórég kāmén ja tũ nĩ.

¹⁰ Ęg tŷ ěg fe kaj tugrĩn Topĕ mŷ vĕnh fĕg kŷ ěg tóg ěg jykre kórég tovānh kån ke mũ, kŷ ěg krenkren ke mũ. Tag vŷ ěg mŷ sér tĩ. Jāvo ěg tŷ fe kaj ra ěg jykre kórég tovānh tũ nĩn kŷ ěg ter pĕ han ke mũ sir.

¹¹ Ha vé. Ājag fe kaj tĩn kŷ ājag tóg ājag jykre tugnŷm mũ sir, Topĕ tŷ ājag krĩn kŷ. Vĕnh jykre kórég ěn to ājag tóg jũ mũ sir, kanĕ jur han ājag tóg mũ sir, kŷ ājag tóg: “vĕnh jykre kórég ěn han sór tũ ěg tóg nĩgtĩ,” he mũ sir. Inh ve sór ājag tóg mũ nĩ sir, vĕnh jykre kórég tŷ ājag tóg tũ' he sór mũ, ũn tŷ vĕnh jykre kórég han mũ ěn mŷ vĩ tar han sór ājag tóg mũ. Há kar ti nĩ. Hā ki tóg ājag tŷ ti mré ti jykre kórég ěn han ja tũ (tóg) ve há tĩ sir.

¹² Isŷ ājag mŷ carta ěn rán kŷ sóg ũ tŷ vĕnh jykre kórég han mũ ěn tó ja nĩ, ti tŷ ũn mŷ ti kórég han mũ ěn tó ja inh nĩ gé. Hā ra sóg tag to jykrén, sŷ rán kŷ, ha mĕ: “isŷ Corinto tá ke ag tŷ iso há nŷtĩ venh há

tóg tũ, ag tŷ ājag tŷ iso há nĩn ki kanhrān jé, Topĕ rĩnve,” he ja sóg nĩ, hā kŷ sóg carta ěn rán ja nĩ.

¹³ Hā kŷ inh krĩ tóg kånhvŷ' he mũ sir, isŷ ājag tŷ iso há nŷtĩn mĕn kŷ. Kŷ inh krĩ tŷ kånhvŷ' hen mré tóg inh mŷ sér pĕ tĩ gé sir, Tito tŷ ājag to vĩ há han kŷ. Ti krĩ tŷ kuprā' he ja ājag tóg nĩ, ti tŷ ājag mré nĩn kŷ, kŷ tóg ti mŷ há tĩ gé.

¹⁴ Ti mŷ sóg ājag kāmén ja nĩ, ājag tŷ ti mŷ vĩ há han ke tag tĩ. Ti tĩg ke to hā sóg ti mŷ ājag kāmén ja nĩ, hā ra ājag tóg ti mŷ ki hā han ja nĩ. Inh kavĕnh ja tũ ājag tóg nĩ. Ha vé, ājag mŷ sóg ki hā tó há han tĩ. Kŷ tóg ri ke nĩ ja nĩgtĩ, sŷ Tito mŷ ājag to vĩ há han ja nĩn kŷ. Ki hā han ja ājag tóg nĩgtĩ.

¹⁵ Kŷ tóg kurā kar ki ājag mĩ ěkrég tĩ, ājag to tóg há tāvĩ nĩ, Tito ti. Ājag tŷ inh vĩ kri nĩm mũ ěn mĩ tóg ěkrég tĩ, ājag tŷ inh kamĕg mũ ěn mĩ, kŷ ājag nĕji ti kamĕg ja nĩ gé, isŷ ti jĕnĕn kŷ. Hā tó tóg tĩ.

¹⁶ Kŷ tóg inh mŷ sér tĩ gé sir, ājag tŷ inh kavĕnh ja tũ nĩn kŷ, ājag tŷ inh vĩ ki króm kŷ.

8

Ęg tŷ jānkamy nĩm ke

¹ Kŷ sóg ājag mŷ Topĕ tŷ ga tŷ Macedônia tá ke ag tar han mũ tó sór mũ gé, Macedônia tá igreja krĕm vĕnhmān kŷ nŷtĩ ag, ũ tŷ tá vĕnh pānpin tĩ ag. Ājag jagāgtar hā ra ag tóg Jerusalém tá ke ag jagāgtān sór mũ, ag mŷ jānkamy jĕnĕn kŷ.

² Ha vé, ti jagy pē hã ve ja ag tóg nĩgtĩ, Macedônia tá ke ag, ag jykre há vēnh ven jé. Ge ra tóg ag mĩ sér tĩ. Jagãgtar ag nĩtĩ gé, tỹ nén (ũ) mág tũ ag nĩtĩ. Hã ra ag tóg, ag mĩ sér nĩn kũ (ag tóg) vin mág pē han ja nĩgtĩ, ag jagtar mág mũ ra. Ag tỹ Jerusalém ra jãnkamy jēnē sór vē.

³ Ha vé, ag jykre ve inh. Ājag tỹ nén (ũ) tỹ vēnh kãpãm ag tóg, ag jēn mré hã.

⁴ To ag tóg inh mĩ to vĩ mág, isỹ ag mĩ: “ājag tũ tỹ vēnh kãpãm tũg nĩ,” he tũ nĩn jé. Ag tỹ Topē tũ ag mĩ nén ũ há han sór vē. Tag hã ne ag mĩ sér tĩ, Topē tỹ tag to ag tar han kũ, hã kũ ag tóg inh mĩ: “ēg tỹ ag mĩ jãnkamy jēnē sór vē,” he mũ.

⁵ Kũ ag tóg vēnh jykre há han, isỹ ag ki vēnh jykre há ve sór mũ ěn kãfór. Ēg Senhor mĩ ag tóg vēnh vin, kar kũ ag tóg inh mĩ vēnh vin gé, Topē tỹ ag mĩ: “ha ti mĩ vēnh vin,” hen kũ.

⁶ Kũ sóg Tito mĩ ké, ti tỹ ājag ki jãnkamy ũ ve jé, ājag tỹ Jerusalém tá ke ag mĩ jãnkamy jēnēnh ke ti. Ājag ki tóg hur jãnkamy sĩ vé, kũ tóg ti tỹ ũri ve kãn há tĩ, ti tỹ ājag mĩ sér tĩ jé gé, Topē tỹ tag to ājag tar han kũ.

⁷ Ha vé, Jesus ki ge kũ ājag nĩtĩ. Vĩ há ājag nĩtĩ. Ki kanhrãn mág ājag nĩtĩ. ũ jagãgtãn sór ājag nĩtĩ. Jagnē to há ājag nĩtĩ. Tag kar ki ājag tóg ũn rico ri ke nĩtĩ. Kũ nén ũ há tag han sórmnĩ gé, Tito tỹ ājag ki nén venh ke mũ tag ti.

⁸ Inh pi(jé) ājag mĩ: “ker ag jagãgtãn tũg hē’,” he sór mũ. Sỹ ājag tỹ vēnh kar to há nĩtĩ ve sór vē, ājag tỹ ũ ag jagãgtãn mũn ki.

⁹ Ha vé, ěg Senhor tỹ Jesus Cristo vỹ ěg jagãgtãn ja nĩ gé. Tag ki kanhró ājag tóg nĩtĩ. Kanhkã tá ti rico nĩ ja nĩgtĩ, hã ra tóg Ā tỹ nén (ũ) ěn tovãnh kãn. Ā tỹ ěg jagfy jagtar tĩ jé tóg kãtĩg. Kũ ěg tóg ti jagtar tũgrĩn rico nĩtĩ sir.

¹⁰ Kũ sóg tag to jykrén, ha mẽ. Ano ti nĩ ha, ājag tỹ ag mĩ jēnēnh ke tỹ vyrmỹ vin han vén kri. Ājag hã ne to jykrén vén ja nĩgtĩ gé, Jerusalém tá ke ag mĩ jãnkamy jēnēnh ke to.

¹¹ Kũ ājag tỹ nén han vén ja ěn han kãn nĩ, ũri. To jykrén ja ājag tóg nĩgtĩ, kũ han kãn sórmnĩ gé. Ājag tỹ vyrmỹ nén vin ja ěn kri vin mãn nĩ, ag mĩ jēnēnh jé.

¹² Ājag tỹ nén nĩm kũ ti tỹ ājag mĩ sér nĩn kũ tóg Topē mĩ há tĩ. ũ tỹ nén ũ mág vỹ nĩm mág han ke mũ, ũ tỹ nén ũ sĩ vỹ sĩn kũ nĩm ke mũ. Topē pi(jé) ũ tỹ nén ũ sĩ tỹ nĩm mág ve sór mũ’.

¹³ Ti tỹ ājag tỹ ũ jagãgtãn tũgrĩn ājag mĩ tũ tĩn kũ tóg Topē mĩ ũ tĩ sir. Vēnh kar tỹ nén ũ sĩ ve kũ tóg há tĩ.

¹⁴ ũri ājag tũ tóg e nĩ, hã kũ tóg ājag tỹ ũn jagãgtar ag mĩ vēnh kãpãm há tĩ. Kejēn tóg ājag mĩ tũ’ henh ke mũ gé, kũ ag tóg sir ājag mĩ nén (ũ) vin ke mũ gé, vēnh kato. Kũ vēnh kar vỹ jagnē ri ke nĩtĩ sir. Tag hã vỹ há nĩ’.

¹⁵ Hã kÿ tag tóg rán kÿ nĩ, ha mẽ: “ũ tóg vĕjĕnh génh mág han ja nĩgtĩ, ũ tóg génh pir han ja nĩgtĩ gé. Kÿ ũ tÿ génh mág han mũ mÿ tóg kãfór ja tũ nĩgtĩ, hã ra ũ tÿ génh pir han mũ ěn mÿ tóg tũ' he ja tũ nĩgtĩ gé,” he tóg mũ, Topĕ vĩ rá ki. Jagnĕ ri ke ag tóg nÿtĩ ja nĩgtĩ. Hã kÿ tóg ěg tÿ ũ tÿ nén (ũ) pir nĩ ěn jagãgtãn há tĩ.

Tito to vĕme

¹⁶ Topĕ hã ne Tito fe han', ti tÿ ãjag to há tãvĩ nĩ jé. Kÿ sóg Topĕ mÿ vĩ há han tĩ sir, ti tÿ ti fe han kÿ.

¹⁷ Kÿ tóg kãnhmar inh mÿ: “hej,” hé, sÿ ti mÿ: “ha Corinto ra tĩg,” hen kÿ. Kãnhmar tóg tĩg sór ja nĩ, Tito ti.

¹⁸ Kÿ sóg ti mré ěg régre ũ jĕnĕ sór mũ gé. ěg régre tag vÿ Jesus kãmén tĩ, kÿ igreja krĕm vĕnhmãn kÿ nÿtĩ ag kar vÿ ti to vĩ há han tĩ, ũ tÿ ěmã kar ki Topĕ vĩ to vĕnh pãnpin tĩ ag.

¹⁹ Kÿ igreja krĕm ke kar vÿ ti hã kuprĕg, ti hã tÿ inh mré ěg tÿ ũn jagãgtar ag mÿ nén jĕnĕnh ke tag ki rĩr jé. ěg Senhor tÿ ũn mág nĩ tag vĕnh ven hã jé ěg tóg tag ki rĩr sór mũ, ěg tÿ ag jagãgtãn ke tag ti ki. Kÿ tóg inh mÿ há tĩ gé, sÿ inh pir mÿ ki rĩr tũ nĩn kÿ.

²⁰ Kÿ ũ tóg iso jykrén kónãn ke tũ nĩ gé, isÿ inh pir mÿ ki rĩr tũ nĩn kÿ. Jãnkamy e vĕ, ěg tÿ ma mũnh ke ti, kÿ tóg inh mÿ ũ tÿ tag to iso jykrén kónãn ha mẽ tĩ. Kÿ tóg inh mÿ há tĩ, ũ ag tÿ inh mré ki rĩr mũn kÿ.

²¹ Isÿ vĕnh jykre kuryj han sór vĕ, hã to sóg jykrén tĩ. ěg Senhor ne inh jykre ki

kanhró nĩ', kÿ tóg há tĩ gé, ěprã ke ag tÿ inh jykre há vĕg mũn kÿ.

²² Inh mré tĩg ke mũ tag vÿ Tito mré ãjag ki jun ke mũ, kar kÿ ěg régre ũ ke gé. ěg régre tag hã ne ěg Senhor tũ ki rĩr há han tĩgtĩ', tag ve tÿ hĕn ri ke han inh huri. Ti tũ ki rĩr nĩ vÿ ti mÿ sér tĩ. Kÿ tóg ãjag vĕme mẽ, hã kÿ tóg ãjag ve sór mũ. Ājag to tóg há tãvĩ nĩ, ti tÿ ãjag vĕme mĕn kÿ.

²³ Kÿ Tito ne ãjag venh kãtĩg ke mũ'. Inh mré rãnhraj jafã vĕ, Tio ti, kÿ tóg inh mré ãjag to vãsãn tĩ. Ti mré kãmũ tag ag vÿ tÿ ũn há nÿtĩ gé. ũ tÿ igreja krĕm vĕnhmãn kÿ nÿtĩ ag vÿ ag jĕgnĕ ja nĩ, ãjag to. Ag tÿ Cristo jykre há ěn han kÿ nÿtĩ vÿ ve há tĩ.

²⁴ Ag tÿ ãjag ki junjun kÿ ag ki rĩr há han nĩ, vĕnh kar tÿ ve jé, ãjag tÿ ag to há nÿtĩ ti, igreja krĕm vĕnh pãnpin tĩ ag kar tÿ ãjag jykre há ve jé. Vĕnh kar mÿ sóg ãjag to: “vĩ há tãvĩ han ag tóg tĩ,” he tĩ. Kÿ Tito ag mÿ vĩ há han nĩ, ke tũ nĩ (mũ) ra sóg ón ja nĩnh mũ.

9

Ag tÿ jãnkamy jĕnĕnh ke

¹ Kÿ ãjag tóg, ěg tÿ Jerusalém tá Topĕ ki ge kÿ nÿtĩ ag mÿ jĕgnĕnh ke tag ki kanhró (ãjag tóg) nÿtĩ, hã kÿ sóg tó sór tũ nĩ.

² Ag jagãgtãn sór ãjag tóg mũ, ki kanhró sóg nĩ. Hã kÿ sóg Macedônia tá ke ag mÿ tó tĩ. Ag mÿ sóg: “Grécia tá ke ag ne Jerusalém tá ke ag mÿ nén ũ jĕnĕ sór tĩ’,” he tĩ. “Kri prÿg tóg nÿ ha, ag tÿ nén ũ jĕnĕ sór

mũn kri," he sóg tĩ, ãjag to. Kĩ ag tóg ke sór mũ gé sir, ãjag kóm.

³ Hã kĩ sóg ãjag mỹ ěg régre ag jěgněg mũ, ãjag tỹ ki kanhrãn jé, sỹ ãjag kãmén mũ ti. Kỹ ãjag tỹ nén (ũ) nĩm sór mũ ěn vin kãn nĩ, ũri, kĩ sóg fagrĩnh mỹ vĩ ja tũ nĩnh mũ.

⁴ Hẽn ri ke mũn Macedônia tá ke ũ ag tóg inh mré kãmũ sór mũ. Kỹ tóg ãjag tỹ nén vin ja tũ nĩ kĩ inh mỹ'a tĩnh mũ, isỹ ón kĩ vĩ ja nĩnh kĩ. Kỹ tóg ãjag mỹ'a tĩnh mũ gé sir.

⁵ Hã kĩ sóg to jykrén, sỹ ãjag mỹ ěg régre tag ag jěgně jé, inh kãtĩg ke to hã, ãjag tỹ nén vin han kãn jé, ãjag tỹ nén (ũ) tỹ ěg mré ke ag jagãgtãn ke ti. Vãsỹ ãjag tóg tó ja nĩ, ãjag tỹ nén vin sór mũ ěn ti, kĩ ha vin han, kĩ tóg e nĩnh mũ, jãnkamy ti, kĩ tóg ve há tĩ, ti tỹ ãjag mỹ sér nĩ ti. Kỹ ũ tóg ãjag to: "ti mỹ ag mỹ há tũ ja, hã kĩ ag tóg nĩm sĩ han ja nĩ?" henh ke tũ nĩ.

⁶ Kỹ sóg tag tó sór mũ, ha mẽ: "ũ tỹ ti fy pir krãn kĩ tóg pin kĩ génh ke mũ gé sir. Ũ tỹ krãn mág mũ ěn hã tóg génh mág han ke mũ gé sir," he sóg tĩ.

⁷ Kỹ ãjag tỹ nén to jykrén mũ ěn hã vin nĩ, ãjag tỹ Jerusalém ra jěně jé. Ti tỹ ãjag mỹ sér tũ nĩnh kĩ tóg há tũ nĩ. Inh pi(jé) ãjag mỹ vĩ tar han mũ'. Mỹ sér nỹtĩmĩ, ãjag tỹ ěg mré ke ag jagãgtãn to, kĩ tóg Topě mỹ há tĩ sir. Ũ tỹ ge to tóg há tãvĩ nĩ.

⁸ Kỹ Topě tóg to tar nĩ gé, ãjag mỹ nén vin mág han ke to, ãjag tũ tỹ ãjag ki e nĩ jé, kurã kar ki, nén ũ tỹ ãjag mỹ tũ' he

tũ nĩ jé. Kỹ tóg, ãjag tũ tỹ ãjag ki mág nĩnh kĩ (tóg) ãjag tỹ ũ jagãgtãn', ũ jagãgtãn' henh há tũ sir.

⁹ Tag vĩ rán kĩ nĩ, ha mẽ: "ũn jagãgtar ag mỹ tóg vin mág tĩ, ti tỹ ěg mỹ vėnh vĩ há tó tóg tũ' henh ke tũ nĩ," he tóg, Topě vĩ rá ki.

¹⁰ Ha vé, Topě ne ěg mỹ nén (ũ) kar fy vin mũ', ěg tỹ krãn jé, kĩ tóg ěg mỹ pão han jafã nĩm mũ gé, ěg tỹ tỹ pão han kĩ kon jé. Kỹ tóg ãjag mỹ ãjag tỹ tỹ ũ jagãgtãn ke mũ ěn ven mũ gé, kĩ tóg nén ũ fy ri ke nĩ. Kaně há ri ke han jé tóg ke mũ gé, ãjag tỹ vėnh jykre kuryj tag han kĩ, hã vĩ: jagně jagãgtãn, he mũ.

¹¹ Tag ki ãjag tóg rico nỹtĩnh ke mũ, ãjag tỹ vėnh kar jagãgtãn kĩ. Kỹ ag tóg e nỹtĩnh mũ gé sir, ũ tỹ ěg tugrĩn Topě to vĩ há han mũ ag, ag tỹ ěg tỹ ag jagãgtãn tugrĩn Topě to vĩ há han kĩ.

¹² Kỹ tóg ge nĩ. ěg tỹ Topě ki ge kĩ nỹtĩ ag jagãgtãn kĩ ěg tóg ag jagãgtar tỹ tũ' he mũ. Tag tóg há tĩ. Hã ra ag tóg ěg tỹ ag jagãgtãn tugrĩn (ag tóg) Topě mỹ vĩ há han ke mũ gé sir.

¹³ Hã ki ag tóg ãjag tỹ Topě vĩ kri fig mũ vėg mũ, ãjag tỹ ag jagãgtãn ki. Kỹ ag tóg tag to Topě to vĩ há han ke mũ gé sir, ha vemnĩ. Cristo to vėme to ãjag něji há nỹtĩ. Hã ve jé ag tóg ke mũ, ãjag tỹ ag jagãgtãn mág kĩ, ãjag tỹ vėnh kar jagãgtãn kĩ ke gé.

¹⁴ Kỹ ag tóg ãjag to Topě mré vėmén ke mũ gé sir, ãjag to há tãvĩ nỹtĩnh kĩ. Topě tỹ ãjag

jagãgtãn há pẽ han mũ ên ve jé ag tóg ke mũ, hã kÿ ag tóg ãjag ve sór ke mũ gé sir.

¹⁵ Topẽ ne êg mÿ nén ù há tãvĩ vin tĩ mÿr'. Pi(jé) kaja nĩ', ti tÿ êg mÿ nén vin mũ ti. Êg jé ti mÿ to vĩ há han, ti mÿ agradecer hen kÿ.

10

Paulo tÿ nén to vĩ

¹ Ha vé, ãjag jyvẽn sór inh mũ, inh, hã vÿ: Paulo, he mũ. Sÿ ãjag mré nĩn kÿ sóg nẽji komêr hã vĩ tĩ, kÿ, isÿ kór há tá nĩn kÿ isóg nẽji vĩ jũ han tĩ ãjag mÿ. Cristo ne komêr hã vĩ tĩ'. Ûn há vë, Cristo ti. Ti jykre hã han sór inh nĩgĩ.

² Hã kÿ sóg ãjag mÿ tag to vĩ sór mũ, ha mẽ. Isÿ ãjag mÿ nén rán mũ tag jëmẽmnĩ. Kÿ sóg ãjag ki jun kÿ vĩ jũ han ke tũ nĩ. Vĩ jũ han jé sóg ke mũ, ha vemnĩ, ù tÿ inh kato vĩ mũ ag mÿ, ù tÿ iso: “ã tÿ vësóg ki nén to jykrén mũ ên hã han tóg tĩ,” he mũ ag mÿ.

³ Êprã ke vÿ tÿ inh nĩ, hã ra inh pi(jé) êprã ke jykre han kÿ vënh jykre kórég han to vãsãn tĩ'.

⁴ Vãsãn mág sóg tĩ, hã ra inh pi(jé) êprã ke ag jykre han kÿ vãsãn mũ'. Topẽ jykre tar ên hã han kÿ sóg hã to vãsãn tĩ, kÿ tóg soldado tÿ rárá jafã ri ke nĩ, Topẽ jykre tar ti. Tÿ sóg êg kato tẽ mũ ag vënh pigju jafã mág ên kókég tĩ, hã vÿ: isÿ ù tÿ êg vĩ kato vãsãnsãn mũ ag vĩ tÿ tũ' he mũ, he mũ.

⁵ Û tÿ Topẽ kato vĩ sór mũ ag vĩ tÿ sóg tũ' he tĩ gé. Vësÿ ùn mág han sór ag tóg nÿtĩ,

Topẽ kato vãsãn kÿ, êg tÿ Topẽ jykre ki kanhrãn mũ kato vãsãn kÿ. Tÿ tũ' he jé sóg ke mũ, Topẽ jykre tar hã tÿ. Êprã ke ag tÿ Topẽ vĩ kato tẽ mũ ag tÿ Cristo krêm ge han kãn sór sóg mũ, kÿ ag sigse kÿ nÿtĩ ri ke vë sir.

⁶ Kÿ, sÿ ãjag tÿ Topẽ vĩ kri nĩm mũ ve kÿ sóg ù tÿ kri fi sór tũ ag mÿ vĩ jũ han ke mũ sir, ha vemnĩ.

⁷ To jykrén há han nĩ, ha mẽ. “Tÿ sóg Cristo mré ke nĩ,” he ãjag tóg tĩ, ãjag kãmĩ ù. Kÿ to jykrén há han nĩ. Tÿ sóg Cristo mré ke nĩ gé, inh, ãjag kóm mÿr, ha mẽ.

⁸ Êg Senhor ne inh fëg', sÿ ãjag jyvẽn jé. Ti pi(jé) inh mÿ: “ha ag kókén,” hé'. Kÿ sóg ãjag mÿ tó, êg Senhor tÿ inh fëg ja ti. Isÿ vëso vĩ há han hã vë. Ge ra tóg inh mÿ'a tũ nĩ, isÿ vëso vĩ há han mũ ti.

⁹ Sÿ ãjag jyvẽn sór vë. Inh pi(jé) ãjag kanẽ jun sór mũ'. ãjag jyvẽn hã jé sóg ãjag mÿ rán.

¹⁰ Inh carta ki inh nẽji ãjag mÿ vĩ tar han tĩ, vĩ jũ, kÿ sÿ ãjag mré nĩn kÿ sóg nẽji krój nĩ ve nĩ, kÿ inh vĩ nẽji tóg tÿ nén ù tũ nĩ ve nĩ.

¹¹ Tag to jykrén, ha mẽ: isÿ rán mũ ri ke han jé sóg ke mũ, isÿ ãjag mré nĩnh ken kÿ, ha mẽ. ãjag vëg tũ sóg nĩ, isÿ carta tag rán kÿ. Isÿ ãjag mré nĩnh ken kÿ sóg inh vĩ tag ri ke han ke mũ, ha vemnĩ.

¹² ãjag kãmĩ ù tóg vëso vĩ há han sór tĩ. Inh pi(jé) ag ri ke nĩ', inh pi(jé) tÿ ag mré ke nĩ gé'. Vësóg ki to jykrén kÿ ag tóg nén ù to: “tag vÿ há nĩ,

tag vỹ há tũ nĩ,” he tĩ. Tag to jykren kỹ ag jykre tóg ag mỹ há nĩ ve nĩ. Topẽ jykre ve vén sór tũ ag tóg nĩ. Ag tỹ vėsóg ki nén to jykren hã tóg ag mỹ há tĩ. Krĩ tũ ag nỹtĩ.

¹³ Ag jãvo sóg Topẽ jykre vég tĩ, hã kỹ sóg ãjag mỹ: “inh jykre vỹ há nĩ,” he tĩ. Topẽ ne inh mỹ inh rãnrãj ti nĩm, kỹ tóg inh mỹ: “ha Corinto tá ke ag ki rĩr,” he ja nĩgtĩ gé.

¹⁴ Inh pi(jé) Topẽ tỹ inh mỹ vènh rãnrãj nĩm èn pãtén tĩ', kỹ sóg pãtén ja tũ nĩ gé, sỹ ãjag mỹ rán kỹ. Inh hã ne ãjag mỹ Cristo kãmén vén ja nĩgtĩ'.

¹⁵ Hã kỹ sóg isũ tỹ ãjag jyvèn tĩ. Û tũ pijé'. Inh pi(jé) ù rãnrãj to: “isỹ han ja vè,” he mũ'. Isũ hã ki sóg tỹ ùn mág nĩ. Kỹ sóg tag to jykren mũ gé, ha mẽ: ãjag tỹ Topẽ ki ge kỹ nỹtĩ to tar nỹtĩn kỹ sóg tỹ ùn mág tãvĩ nĩnh ke mũ gé, ãjag mré. Isũ hã vè, inh rãnrãj hã vè.

¹⁶ Kỹ sóg ãjag jamã mã ra tĩg sór mũ gé, sỹ Cristo kãmén jé, ù tỹ ag mỹ tó ja tũ èn ra. Sỹ tãtá ag mỹ kãmén kỹ sóg inhhã ki rãnrãj mũ sir, ù tỹ ag mỹ tá Topẽ vĩ kãmén ja tũ nĩn kỹ. Kỹ sóg inh rãnrãj hã tugnĩn tỹ ùn mág jènh mũ, ù rãnrãj tugrĩn ke tũ vè.

¹⁷ Hã ra tóg há tũ tĩ, èg vème tag ti. ãjag tỹ ùn mág nĩ tó sór kỹ èg Senhor ti tómnĩ.

¹⁸ Èg tỹ vèsó: “ùn há vỹ tỹ inh nĩ,” he mũ ra èg pi(jé) tỹ ùn há nỹtĩ'. Èg Senhor tỹ èg to: “ùn há vỹ tỹ ã nĩ,” hen hã kỹ èg tóg tỹ ùn há nỹtĩ.

11

Ón kỹ apóstolo ag

¹ Iso fe nỹtĩmnĩ. Krĩ tũ nĩ ve inh nĩ, isỹ vèsó kỹ. Hã ra ãjag tóg iso fe nỹtĩ, kỹ tóg há tĩ.

² ãjag to sóg há pẽ nĩ, Topẽ tỹ ãjag to há nĩ ri ke, hã kỹ sóg ãjag jyvèn tĩ. Kỹ ãjag tóg ùn mén ke mũ fi ri ke nỹtĩ, kỹ Cristo vỹ ãjag mén ke ri ke nĩ sir. Vènh prũg tag to sóg ãjag kãn sór mũ mỹr, ãjag jãnhkri nỹtĩ jé, tãtãg tỹ mén ja tũ jãnhkri ri ke.

³ Hã ra sóg ãjag to: “ag mỹ ti tovãnh sór tũ nĩ vỹ?” he mũ. Pỹn vỹ Eva fi mỹ ón, Japo ti, ti jykre (ka)mẽ nĩn kỹ, kỹ fi tóg ti vĩ kri nĩm. Kỹ tóg ãjag mỹ ón sór mũ gé, Japo ti, ãjag tỹ Cristo tovãnh jé, ãjag tỹ ti jykre pir tovãnh jé, ãjag tỹ ti to tar èn to krónh ke jé.

⁴ Hã kỹ ãjag tóg ù ag vĩ jèmẽ sór mũ, ag tỹ ãjag mỹ ón kỹ Jesus tó kỹ, ag tỹ isỹ ãjag mỹ nén tó mũ èn hã tũ tó mũ ra ãjag tóg jèmẽ sór tĩ. Ón kỹ jagrẽ vỹ ãjag mỹ há nĩ ve nĩ, Topẽ tỹ ãjag mỹ nĩm ja tũ èn. Ón kỹ topẽ vĩ vỹ ãjag mỹ mẽ sér tĩ ve nĩ, ãjag tỹ vãsỹ mẽ ja tũ èn. Vènhmỹ han sór ãjag tóg mũ.

⁵ Ón kỹ apóstolo ag ne ãjag mỹ vènh vỹ tag tó sór mũ'. Inh pi(jé) tỹ ag krèm ke nĩ', ha mẽ.

⁶ Vĩ sĩnvĩ han tũ inh nèji nĩ, ag vĩ sĩnvĩ ri ke han tũ inh nèji nĩ. Hã ra sóg nén tỹ hèn ri ke ki kanhró nĩgtĩ, tag ve ãjag tóg mỹr, ãjag tỹ inh vĩ mẽ tỹ hèn ri ke han mũ èn ki.

⁷ ãjag mỹ sóg Topẽ vĩ tó ja nĩgtĩ, kỹ sóg tag to ãjag ki ti

kaja ve sór ja tũ nĩ. Vēsỹ ùn sĩ han ja inh nĩ, sỹ ãjag mré nĩn kỹ, ãjag tỹ tỹ ùn mág nỹtĩ jé, isugrĩn. Tag tugrĩn inh mỹ Topê vĩ mranh'? Vó, vènh jykre há vé.

⁸ Êmã ù tá Jesus ki ge kỹ nỹtĩ fag ne inh mỹ fag jãnkamy vènh kãpãm, kỹ fag tóg inh mỹ ti jènẽ ja nĩ, sỹ ãjag mré nĩn kỹ. Fag tũ hã ko ja inh nĩgtĩ.

⁹ Kỹ, isỹ jãnkamy ve sór mũ ra sóg ãjag mỹ tó ja tũ nĩ gé. “Ti hỹn ag mỹ jagy tĩnh mũ,” he sóg tĩ, hã kỹ sóg ãjag mỹ to ja tũ nĩ. Ga tỹ Macedônia tá ãg régre ag ne inh ki junjun ja nĩgtĩ', sỹ ãjag mré nĩn kỹ, kỹ ag tóg inh mỹ jãnkamy ù ma kãmũ ja nĩ gé, sỹ to nén tỹ inh mỹ tũ nĩ ãn mãn jé. Gen kỹ sóg isũ vég tĩ hã ra, ti tỹ ãjag mỹ jagy tũ nĩn jé. Inh jykren hã vè. Tovãnh sór tũ inh nĩgtĩ.

¹⁰ Ki hã tó sóg tĩ, Cristo tỹ ki hã tó tĩ ãn ri ke han sóg tĩ. Kỹ sóg ãjag to: “ga tỹ Grécia tá ke ag vỹ jãnkamy to inh jykre ki kanhrãn kãn ke mũ, ag tỹ iso vĩvĩ he tũ nĩn jé,” he mũ. ãjag jãnkamy ve sór tũ pè inh nĩgtĩ.

¹¹ Hẽ ri ken kỹ? Inh mỹ ãjag to há tũ nĩgtĩ? Vó, ãjag to sóg há tãvĩ nĩ, kỹ Topê ne ki kanhró nĩ'.

¹² Hã ra sóg ãjag tũ ve sór tũ nĩ, sỹ ag vĩ tỹ tũ' hen jé, ón kỹ apóstolo ãn ag vĩ ti. Inh mỹ tóg ag tỹ ãjag mỹ: “Paulo ri ke inh nĩ. Inh mỹ ãjag tũ vènh kãpãm,” henh ha mẽ tĩ. Hã kỹ sóg ãjag tũ ve sór tũ nĩ.

¹³ Ón kỹ apóstolo vỹ tỹ ag nỹtĩ, mỹr, ha mẽ, ón kỹ ag tóg: “Topê rãnrãj han ãg tóg mũ,”

he tĩ. Ón kỹ ag tóg: “Cristo vỹ ãg tỹ apóstolo han,” he tĩ.

¹⁴ Satanás jykre hã vè. Vēsỹ tóg Topê tỹ jènẽ jafã ri ke han tĩ, ón kỹ, Satanás ti.

¹⁵ Kỹ Satanás mỹ rãnrãj tĩ ag tóg ón kỹ (ag tóg) jykre kuryj nỹtĩ ve nĩ gé. Hã ra Topê tóg ag vóg kónãn ke mũ, ag rãnrãj kórég to.

Paulo jagtar

¹⁶ Ha mẽ, tó mãn jé sóg ke mũ, sỹ tó ja ti. Inh pi(jé) krĩ tũ nĩ'. Isỹ ãjag mỹ krĩ tũ nĩ ve (hã) ra, ge ra iso hã nỹtĩmnĩ, sỹ vèso vènh vĩ há tón kỹ.

¹⁷ Sỹ ãjag mỹ sỹ nén ve ja ãn tó sór vè, kỹ tóg inh krĩ tũ nĩ ve nĩ. Sỹ vèso vĩ há han kỹ sóg krĩ tũ nĩ ve nĩ. ãg tỹ ãg Senhor jykre tó kỹ ãg tóg tag tó tũ nĩgtĩ, sỹ tónh ke tag.

¹⁸ Hã ra sóg tó sór mũ. Vènh kar tóg ãjag mỹ ag tỹ nén ve ja tó tĩ, kỹ sóg ãjag mỹ sỹ nén ve ja ãn tó sór mũ gé, ha mẽ.

¹⁹ Krĩ há ãjag nỹtĩ, ge ra ùn krĩ tũ ag tóg ãjag mỹ há nỹtĩ ve nĩ.

²⁰ Û tỹ ãjag mỹ: “tag han ra, tag han tũg ra,” hen kỹ tóg ãjag mỹ sér tĩ ve nĩgtĩ. Û tỹ ãjag tũ mãn sór kỹ tóg ãjag mỹ há tĩ ve nĩgtĩ, ù tỹ ãjag mỹ un'ón mũ ag tóg ãjag mỹ há nỹtĩ ve nĩgtĩ, ù tỹ vèso: “tỹ inh ùn mág nĩ,” he mũ ag vỹ ãjag mỹ há nỹtĩ ve nĩgtĩ gé, ù tỹ ãjag kakã ki tãnh tĩ ãn ag ke gé. Û tỹ ge vỹ ãjag mỹ há kar nỹtĩ ve nĩgtĩ.

²¹ Inh mỹ'a tóg tĩ, sỹ tag tó kỹ. Vènh jykre tag to sóg krój nĩ, tag han sór vãnh inh nĩgtĩ, ag tỹ han ri ke tag.

Hã ra ag tóg ãjag mÿ ag tÿ nén ve ja ên ti tó sór mÿ, ón kÿ apóstolo ên ag, ag tÿ nén ù há kar han mÿ tó ag tóg tÿ. Kÿ sóg ag ri ke tónh ke mÿ gé sir, ùn krÿ tÿ ag ri kén.

²² Hebreu vÿ tÿ ag nÿtÿ. Tÿ sóg Hebreu nÿ gé. Israel krê'krê vÿ tÿ ag nÿtÿ. Tÿ sóg Israel krê'krê nÿ gé. Abraão krê'krê vÿ tÿ ag nÿtÿ. Tÿ sóg Abraão krê'krê nÿ gé.

²³ Cristo camarada vÿ tÿ ag nÿtÿ. Tag to sóg ag káfór nÿ há ra. Ha vé, krÿ tÿ pē nÿ ve sóg nÿ, sÿ tÿ ag káfór nÿ tag tón kÿ.

Ha mē, isÿ tÿ Cristo camarada nÿ ti: inh rãnrãj e tag há to sóg ag káfór nÿ, ise kÿ nÿn e ja há to sóg ag káfór nÿ gé. Inh mrãnrãn káfór han ag tóg tÿ gé, ter kren tÿ hēn ri ke ve inh, ag káfór ke gé.

²⁴ Judeu ag ne inh mrãnrãn tÿ 5 (ke) han', ag tÿ ù mrãnrãn tÿ 39 (ke) han tÿ ên tÿ 5 (ke) han ag tóg isÿ, kurã tÿ hēn ri ke han tóg, ti tÿ 5 (ke) ên tá krÿg jé.

²⁵ Kar kÿ ag tóg ka tÿ inh mrãnrãn tÿ 3 (ke) han ja nÿgtÿ gé. Kurã tÿ hēn ri ke han tóg ke gé, ti tÿ 3 (ke) ên tá krÿg jé. Pó tÿ ag inh pin ja nÿgtÿ gé, isén jé, kurã pir ki. Kar kÿ sóg goj ki ter kren tãgtÿ han ke gé, ên kã sóg kejēn kuty pir ki kurã mré goj nig kãki nãgnãr, goj kafã tÿ kãki.

²⁶ Kuvar há ra tÿg tÿ hēn ri ke han inh, kÿ goj var tóg inh jagtar han. Êg tÿ péju(g) tÿ ag vÿ inh jagtar han tÿ. Inh mré ke ag vÿ inh vóg kónãn sór nÿgtÿ, fóg ag ke gé, cidade ki

ke ag ke gé, êmã tÿ tá ke ag ke gé. Goj kafã tÿ kri inh jagtar han. Ón kÿ êg kanhkã ag vÿ inh jagtar han tÿ gé.

²⁷ Rãnrãj mág to inh jagtar tÿ gé, to sóg ron tÿ, kÿ sóg nÿr tÿ tÿ hēn ri ke hyn han tÿ gé. Kejēn sóg kókÿr tÿ, kejēn sóg goj vég tÿ nÿgtÿ, vãkre tÿ hēn ri ke han sóg tÿ, kusa mēg sóg tÿ, inh kur tóg iso tÿg tÿ gé.

²⁸ Kÿ, isÿ kurã kar ki ti jagy tag vég mÿ mré há sóg igreja krēm vēnhmãn tÿ ag to krÿ kufy han tÿ gé.

²⁹ Û tÿ Cristo vÿ to krónh ken kÿ tóg inh mÿ jagy tÿ gé. Û tÿ Topē vÿ mranh kÿ sóg kanē jur tÿgtÿ gé.

³⁰ Kÿ, isÿ vēsó kÿ sóg isÿ nén ù jagy vég mÿ ên tó sór tÿ, inh krój nÿ ên ti.

³¹ Topē ne ki kanhró nÿ', êg Senhor tÿ Jesus jóg ti. Êg tÿ ti mÿ vÿ há han tóg tÿ' hēnh ke tÿ pē nÿ. Ti há ne ki kanhró nÿ'. Inh pi(jé) ón mÿ'.

³² Cidade tÿ Damasco tá sóg nÿ ja nÿgtÿ, kÿ pã'i mág tÿ rei tÿ Aretas ên krēm pã'i ù vÿ governo ki rÿr nÿ ja nÿgtÿ. Ên tóg ijo vãji ja nÿgtÿ. Ti polícia ag tóg ijo vãji ja nÿgtÿ, ag tÿ ise jé.

³³ Hã ra inh mré ke ag tóg kejē mág kãkã inh péju kÿ jãnkãror tÿ isérem, cidade to ró tÿ, há kÿ sóg kren. Isÿ ti jagy ve jan há vē.

12

Paulo tÿ nén nē ve

¹ Kÿ ãjag tÿ isÿ tÿ ùn mág nÿ tag mē sór kÿ, kÿ sóg ãjag mÿ

ẽg Senhor tỹ inh mỹ nén ven mũ ẽn tó sór mũ gé ver, ti tỹ inh mỹ nén kãmén mũ ti. Sỹ ãjag mỹ tónh ke tũ vễ vễ, hã ra ãjag tóg mẽ sór mũ.

² Ha vé, ù ki kanhró sóg nĩ, Jesus ki rã ù. 14 (ke) anos ti nĩ ha, ti tỹ kanhkã ra tĩg kri, kanhkã tãgtũ he mũ ẽn ra. Hẽn ri ke mũn tóg ã rĩr há ra vyr, hẽn ri ke mũn ti kuprĩg tóg ra vyr, inh pi(jé) ki kanhró nĩ'. Topẽ hã ne ki kanhró nĩ'.

³ Hã ra tóg ra vyr, hẽn ri ke mũn ã rĩr há ra, ti kuprĩg hẽn ri ke mũn, inh pi(jé) ki kanhró nĩ', Topẽ hã ne ki kanhró nĩ'.

⁴ Kĩ tóg ẽg tỹ hẽ tá Topẽ mré nỹtĩnh ke mũ ẽn ra vyr, Paraíso he mũ ẽn ra. Tá tóg vênh vĩ jẽmẽ, ẽprã ke tỹ nén tónh ke tũ ẽn mẽ tóg tá, kanhkã tá vênh jykre sĩnvĩ pẽ ẽn, ẽg tỹ tag ki nén ki kagtĩg ẽn.

⁵ Ẽn hã to sóg: “ũn mág vĩ tỹ inh nĩ,” he sór mũ. Isỹ vễsóg ki kanhkã ra tĩg pijé'. Isỹ ẽg tỹ ẽprã vэг tĩ ẽn tó kỹ sóg inh krój nĩ hã tó sór mũ.

⁶ Isỹ ùn mág nĩ tag tó kỹ sóg ki hã tó tĩ, vênh ó pijé'. Hã ra sóg tó tũ nĩ, ãjag tỹ iso: “vênh kar kãfór vĩ tỹ ti nĩ,” he tũ nĩ jé. Inh jykre vэг ãjag tóg mũgtĩ, inh vĩ mẽg ãjag tóg mũgtĩ, kỹ tag hã to jykrén nĩ, tag hã to ãjag tóg inh jykre ki kanhrãn ke mũ.

⁷ Kỹ Topẽ tóg, ti tỹ inh mỹ kanhkã ven kar kỹ (tóg) to jykrén gé, sỹ vễsỹ ùn mág han sór tũ nĩ jé. Hã jé tóg inh há tỹ nén ù jagy ki nĩ han tĩ gé, kỹ tóg sónh tỹ inh ki já ri ke nĩ. Satanás krêm ke ù vễ, kỹ tóg

isãnh tĩ, isỹ vễsỹ ùn mág han tũ nĩ jé.

⁸ Kỹ sóg ẽg Senhor mỹ to vĩ tãgtũ han, ti tỹ inh mỹ tỹ tũ' hen jé.

⁹ Hã ra tóg ke jãvãnh ja nĩ. Kỹ tóg inh mỹ: “ã jagãgtãn sóg tĩ,” he ja nĩ, “kỹ tóg há tĩ,” he ja tóg nĩ, ẽg Senhor ti. “Ã krój nĩ hã ki isỹ tỹ ùn tar nĩ ve há tĩ,” he ja tóg nĩ inh mỹ, ẽg Senhor ti. Hã kỹ inh krój nĩ tag tóg inh mỹ há tĩ. Inh krój nĩn kỹ sóg Cristo tar hã tỹ tar nĩ nĩ. Tag hã ne há tĩ'.

¹⁰ Hã kỹ inh krój nĩ tóg inh mỹ sér tĩ, ag tỹ iso vĩ kónãn ti ke gé, inh jagtar nĩ ti ke gé, ag tỹ inh vóg kónãn ti ke gé, inh kanẽ jur ti ke gé. Inh mỹ tóg sér kar tĩ, sỹ nén vэг mũ ti, sỹ Cristo hã tỹ fe nĩn kỹ. Inh krój nĩ ẽn kã sóg tar nĩ, mỹr, ha mẽ.

Paulo tỹ Corinto tá ke ag to nén to jykrén

¹¹ Ha vé ha, vễsỹ ùn krĩ tũ nĩ ẽn ri ke han sóg, ãjag tỹ inh kutãn kỹ. ãjag tỹ iso vĩ há han ke vễ vễ. Inh pi(jé) ù tỹ vễsỹ apóstolo han mũ ẽn ag krêm ke nĩ', isỹ tỹ nén (ũ) tũ hã ra, mỹr, ha mẽ.

¹² ãjag mỹ sóg sỹ tỹ apóstolo jẽ ven huri. Isỹ nén (ũ) jagy vэг mũ ra sóg to krónh ke tũ nĩgtĩ. Ẽg tỹ nén han vãnh hyn han ja inh nĩgtĩ, ãjag rĩnve, mi-lagre ti, Topẽ jykre ti ke gé. Hã ki ãjag tóg venh mũ, sỹ tỹ apóstolo jẽ ti.

¹³ Kỹ inh ãjag mỹ ne han ja tũ nĩ nễji, ãjag tỹ ẽmã ù tá Jesus to vênhmãn tĩ ag to: “ẽg kãfór ag nỹtĩ,” hen jé? Nén pir

hã han tũ inh nĩ, hã vỹ: ãjag jẽn ko ja tũ inh nĩ, he mũ, sỹ ãjag mré nĩn kỹ, kỹ tóg ãjag mỹ jagy nĩ ja tũ nĩ. Tag tỹ kórég kỹ inh mỹ vènh pãte fón nĩ.

14 Ha vé ha, sỹ ãjag ve mãn sór vè mỹr. Sỹ tag to jykre tãgtũ hã vè sir. Kỹ sóg inh jun kỹ ãjag mré nĩn kỹ (sóg) ãjag mỹ ti jagy nĩm sór tũ nĩ gé, ùri. Inh pi(jé) ãjag tũ mãn sór mũ'. Sỹ ãjag venh kãtĩg ke vè. Ēg krẽ pi(jé) ěg rico han tí', ěg tỹ ag jẽ'ỹn mũ ra. Ēg hã ne ěg krẽ mỹ nèn ù nĩm tí'.

15 Hã kỹ sóg isũ fón kãn ke mũ, ãjag tugrĩn, vènh fẽg jé sóg ke mũ gé, sỹ ãjag krenkren han jé. Ājag to sóg há tãvĩ nĩ. Hã kỹ tóg inh mỹ e tí, ãjag tỹ iso há tũ nỹtĩ ti.

16 Kỹ ãjag tóg ki kanhró nỹtĩ, isỹ ãjag mré nĩn kỹ ãjag mỹ ti jagy nĩm sór tũ nĩ ti.

Hã ra sóg nẽji ãjag vatánh tá ãjag krĩn tí, ãjag mỹ sóg nẽji ón tí.

17 Kỹ inh mỹ ãjag vatánh tá ãjag tũ mãg tí', sỹ ãjag mỹ inh mré ke ag jẽgnẽn kỹ'? Ke tũ sóg nĩgtĩ mỹr.

18 Tito mỹ sóg to vĩ, ti tỹ ěg régre ù ěn mré ãjag venh tĩg jé. Kỹ Tito mỹ inh mỹ ãjag tũ ma kãtĩg ja nĩ'? Ke tũ tóg nĩ, ki kanhró ãjag tóg nỹtĩ. Inh jykre hã han tóg tí, Tito ti. Isỹ nèn han mũ ěn hã han tóg tí.

19 Ājag hỹn iso: “ón kỹ tóg vènh jagfỹ vĩ mũ,” he mũ. “Tĩ tỹ ěg tỹ ã to há nỹtĩ ěn han sór vè,” he ãjag hỹn mũ iso. Hã tũ vè, kỹ Cristo vỹ ki kanhró nĩ, Topẽ ti ke gé. Ājag to sóg há pẽ

nĩ, hã kỹ sóg vĩ mũ, ãjag tỹ inh vĩ tugrĩn ti hã to tar nỹtĩ jé.

20 Tag hã to sóg jykrén mũ, ha mẽ: hèn ri ke mũn ěg tóg jagnẽ tỹ ùn mũ, sỹ ãjag ki jun kỹ. Hèn ri ke mũn ãjag tóg jagnẽ to jũ mũ, hèn ri ke mũn ãjag tóg jagnẽ tũ ki vè'ĩ mũ, hèn ri ke mũn ãjag tóg jagnẽ to krĩ rỹ nỹtĩ, vènh kar hèn ri ke mũn ãjag tũ hã mĩ ěkrén sór tí, hèn ri ke mũn ãjag tóg jagnẽ to vĩ kónãn mũ, hèn ri ke mũn ãjag tóg jagnẽ to vĩ vĩ henh mũ, hèn ri ke mũn ãjag tóg jagnẽ kãfór nỹtĩ sór mũ, hèn ri ke mũn ãjag tóg vènh jykre e han sór mũ.

21 Kỹ tóg inh mỹ'a tĩnh mũ, sỹ ãjag ki jun kỹ, kỹ Topẽ tỹ isỹ ùn sĩ han ri ke vè sir. Inh fỹnh ke vè, ãjag tỹ vãsỹ Topẽ vĩ mranh ja ěn tovãnh sór tũ nỹtĩn kỹ, nèn ù kavéj ěn ti, ã prũ tũ fi mré nỹ, ã mén tũ mré nỹ, fag to ěn tí ěn mỹr. Ājag tỹ ěn tovãnh tũ nĩn kỹ tóg inh mỹ'a tĩnh mũ.

13

Paulo tỹ ag jyvẽn mãn mũ

1 Sỹ ãjag ve tãgtũnh ke vè ha. Kỹ sóg ãjag jykre venh ke mũ. Ũ tỹ ãjag jykre kórég vèg mũ vỹ tónh ke mũ, ãjag tỹ ti kórég han ja ti. Ũn régre vỹ tugtónh ke mũ, ke tũ nĩn kỹ ùn tãgtũ.

2 Tag tó inh huri, kỹ sóg tó mãn sór mũ mỹr. Sỹ ãjag mré nĩ ja nĩn kỹ sóg ãjag mỹ tag tó ja nĩ, kỹ sóg ùri ãjag mỹ rán mũ sir, sỹ ãjag mré nĩ tũ nĩn kỹ, ha mẽ. Sỹ ãjag mré nĩ ja nĩn kỹ sóg komèr hã vĩ ja nĩ, ù tỹ Topẽ vĩ mranh ja ěn

ag mÿ. Inh jun mǎn kÿ inh pi(jé) komêr hǎ vĭ mǎn mÿ', ha vemñĭ. Vĭ tar han jé sóg ke mÿ mÿr.

³ Cristo vĭ mẽ sór ājag mÿ, inh ki. Mẽ jé ājag tóg ke mÿ. Ti pi(jé) krój nĭ'. Tar ti nĭ, hǎ kÿ sóg vĭ tar han ke mÿ gé.

⁴ Krój nĭ ve ja ti nĭ, ti tÿ cruz to sa kÿ. Hǎ ra tóg rĭr mǎn, Topẽ tÿ ti rĭn mǎn kÿ. Topẽ tar nĭ hǎ vĕ. Kÿ sóg krój nĭ gé, sÿ ti ki rǎ kÿ jĕn kÿ, hǎ ra sóg ti mré rĭr kÿ jĕ gé, ājag mÿ, Topẽ tar nĭn kÿ.

⁵ Ājag jykre tugnyĕm nĭ. “Inh mÿ Jesus ki rǎ há han mÿ vÿ?” hemnĭ, vēso jykrén kÿ. “Jesus Cristo mÿ inh kākā nĭ?” hemnĭ. Ājag tÿ tag to: “hÿ, hǎ vĕ,” he tÿ nĭn kÿ ājag pi(jé) tÿ ti tÿ nÿtĭ'. Ĕn kǎ ājag tóg ti tovǎnh kÿ mÿ nĭ sir.

⁶ Hǎ ra sóg ti tovǎnh ja tÿ nĭ. Ājag tÿ tag ki kanhrǎn kÿn há tĭ.

⁷ Ājag to sóg Topẽ mré vēmĕn tĭ, ājag tÿ nĕn ũ kórég han tÿ nĭ jé. Kÿ inh rǎnrǎj tóg Topẽ mÿ há tĭ sir, vēnh kar mÿ ke gé. Ag tÿ hǎ ra iso é he mÿ ra nĕn ũ há tǎvĭ han sórmnĭ, ha mẽ, kÿ ājag tÿ Jesus tÿ hǎ han ke mÿ tag ne há tǎvĭ nĭnh mÿ'.

⁸ Inh pi(jé) ũ tÿ ki hǎ tó mÿ kato tĕ sór mÿ'. Ũ tÿ ki hǎ tó mÿ tag ve sór inh nĭ mÿr.

⁹ Inh mÿ tóg sér tĭ, inh krój nĭn kÿ, kÿ tóg inh mÿ sér tĭ gé, ājag tar nÿtĭn kÿ. Hǎ jé sóg Topẽ mré vĭ tĭ, ti tÿ ājag mÿ vēnh jykre há ĕn nĭm jé, ājag tÿ há pĕ nÿtĭ jé.

¹⁰ Hǎ kÿ sóg ājag mÿ carta

tag rán, sÿ ājag vég tÿ nĭn kÿ. Kÿ sóg komêr hǎ vĭ sór mÿ, sÿ ājag mré nĭnh ken kÿ. Inh pi(jé) vĭ tar han sór mÿ', inh pi(jé) ĕg Senhor tÿ isar han kÿ inh vĭ tar tÿ ājag kókén sór mÿ'. Ājag tar han sór inh mÿ mÿr.

¹¹ Inh kanhkǎ', sÿ ājag mÿ rán kǎn hǎ vĕ. Hǎ ra sóg ver tag tó sór mÿ, ha mẽ: vēnh kǎn nĭ, ājag tÿ kygnĕg tÿ nĭ jé, inh vĭ jĕmĕmnĭ, vēnh jykre pir han nĭ, krĭ kuprǎ nÿtĭmnĭ. Topẽ ne ĕg to há nĭ', ti ne ĕg krĭ kuprǎg tĭ'. Ti hǎ ne ājag ki rĭr mÿ', ājag tÿ ti jykre tag han kÿ.

¹² Jagnĕ ki nhun ke ri ke han nĭ, Jesus mré ke kar ki, ājag tÿ jagnĕ nĭgé kǎgmĭ kÿ. Topẽ tÿ ki ge kÿ nÿtĭ kar vÿ ājag mÿ: “ājag mÿ há?” he sór mÿ.

¹³⁻¹⁴ Ĕg Senhor tÿ Jesus Cristo jé ājag tar han tĭ. Topẽ vÿ ājag to há nĭ. Ti kuprĭg vÿ tÿ ājag jagrĕ nĭ. Ti jykre hǎ mĭ mÿmnĭ. Hǎ vĕ.

PAULO TỠ CARTA HAN: GALÁCIA TÁ KE AG MỠ CARTA

¹ Paulo tỡ rá vễ, inh. Isỷ ga tỡ Galácia tá ke ag mỡ rán hã vễ. Jesus Cristo hã vỡ inh fễg, sỡ tỡ ti apóstolo jễ jé, ễg jóg tỡ Topễ ti ke gé. Ềprã ke tỡ inh fễg pijé'. Jesus Cristo hã ne inh fễg', Topễ tỡ ùn rĩn mãn mủ ti, ti ter kar kỡ.

² Sỡ inh mré ke ag mré ga tỡ Galácia tá ke ag mỡ rán hã vễ, ù tỡ Galácia tá Jesus to vễnhmãn tỡ ag mỡ.

³ Topễ mỡ sóg to vỡ tỡ, ti tỡ ấjag tar han jé, ễg jóg mág tỡ ấjag krỡ kuprãg jé, ễg pã'i tỡ Jesus Cristo ti ke gé.

⁴ Ti hã ne ù tỡ ấ tén mủ ag mỡ vễnh fễg', ti tỡ ễg tỡ Topễ vỡ mranh tỡ tỡ' he jé, kỡ tóg ễg kren han, ềprã ke jykre to. Ềprã ke jykre tỡ pãno nỡ kỡ tóg vễnh jykre tag ki ễg kunủ. Ềg jóg tỡ Topễ tỡ nén ve sór mủn hã vễ, ti hã ne Jesus mỡ tag tó ja nỡ'.

⁵ Kỡ ễg tóg Topễ to vỡ há han sór mủ, kỡ tóg tũg' he jãvãnh nỡ, ti to vỡ há tag ti. Hã vễ.

Jesus kãme pir nỡ

⁶ Ầjag ne tóg kãnhmar sỡ ấjag mỡ Cristo kãmén ja ễn tovãnh sór mủ', ti tỡ ễg jagfy ter ja kãmé ti. Ti kãmé ù nón mủ sór ấjag tóg mủ, Cristo tỡ ễg mỡ tó ja tỡ nón. Inh mỡ tóg e tỡ mỡr, ấjag jykre tag ti.

⁷ Cristo kãmé vỡ pir nỡ, kỡ ti kãmé ù tóg tỡ tỡ. Hã ra ù ag

tóg ấjag krỡ kufy han sór mủ, hã kỡ ag tóg Cristo kãmé ễn ki króm há han tỡ nĩgtỡ. Ủ tó sór ag tóg mủ mỡr, Cristo jykre to, hã vỡ: “ấjag krenkren jé ấjag tóg Cristo ki rã kar kỡ Judeu ag jykre han ke mủ gé, Topễ tỡ Moisés mỡ nén tó ja ễn ti,” he mủ.

⁸ Hã ra sóg ấjag mỡ tó há han ja nĩgtỡ, isỷ ấjag mỡ: “ti ki rã tãvỡ han jé ấjag tóg ke mủ,” hen kỡ. Ủ tỡ inh vỡ tag ri ke tó tỡ ag jé mủ kónãn. Hẽn ri ke mủn isóg ấjag mỡ tag tó tỡ nỡ, hẽn ri ke mủn sóg ti pãte nén ù tónh ke mủ. Kỡ inh jé tũg kónãn. Hẽn ri ke mủn kãnhkã tá Topễ tỡ jẻnẻ jãfã tóg isỷ tó ja ễn ri ke han ke tỡ nỡ, pãte tóg hẽn ri ke mủn nén ù tó sór mủ. Kỡ ti jé tũg kónãn.

⁹ Tag tó ja inh nỡ, kỡ sóg tó mãn mủ sir. Ủ tỡ ấjag mỡ Cristo kãmén kỡ, hã ra tóg ấjag mỡ isỷ tó ri ke han tỡ nỡ, isỷ tó pãte tóg ù tó sór mủ, kỡ ti jé tũg kónãn.

¹⁰ Vỡ tar han sóg tỡ, ềprã ke kórég ag to. Inh pi(jé) ón kỡ ag mỡ vỡ há han sór mủ', ag tỡ iso há nỡtỡ jé'. Ềprã ke ag tỡ iso há nỡ tag, ag tỡ iso kórég nỡ tag tóg inh mỡ tỡ nén ù tỡ nỡ.

Isỷ ềprã ke ag tỡ iso nén tó mủ to jykren nỡ ra inh hỹn Cristo tỡ ki rỡr tỡ nỡnh mủ vễ. Hã ra sóg ti hã to jykren tỡ. “Isỷ nén tó mủ hỹn ti mỡ há nỡ, ti mỡ kórég nỡ vó?” he sóg tỡ, ti tỡ inh mỡ vỡ há han jé, Topễ ti.

Paulo tỡ Topễ vỡ hã tó

¹¹⁻¹² Cristo kãmén ja inh nĩgtỡ, isỷ ấjag mỡ: “ti ki rã kỡ ễg krenkren ke mủ, ễg tỡ Moisés

jykre han tũ ra,“ hen kÿ. Ęprã ke tÿ véké nén ũ to jykrén ja pijé', sÿ ãjag mÿ nén tó mũ ti. Ęprã ke tÿ inh kanhrãn ja pijé'. Ũ pi(jé) inh mÿ: “tag tómnĩ,” he mũ'. Jesus Cristo hã ne inh kanhrãn', ti hã ne inh mÿ tag tó kãn'. Tag to jykrén nĩ, inh kanhkã'.

13-14 Isÿ vãsÿ nén han ja mẽ ãjag tóg huri. Tÿ sóg Judeu krē nĩ, hã kÿ sóg Judeu jykre han tĩ ja nĩgtĩ, Moisés tÿ ěg jóg'jóg ve ag mÿ Topě jykre tó ja ěn ti. Kÿ sóg inh povo jykre ki, Judeu jykre ki sóg vãsãn mág, hã kÿ sóg inh régre ag pátén, sÿ ěg jykre ki króm to tar tãvĩ nĩn kÿ. Ęg jóg'jóg ve ag jykre tãvĩ han sóg nĩgtĩ mÿ, tag hã mĩ sóg ěkrén ja nĩgtĩ. Kÿ sóg kygnē kÿ: “Jesus hÿn ón kÿ vēsÿ Topě han,“ he ja nĩ gé. Hã kÿ sóg ti ki ge kÿ nÿtĩ ag vóg kónãn tãvĩ han, isÿ ag tÿ tũ' he jé. Ag jagãgtãn vãnh ja inh nĩgtĩ.

15-16 Hã ra Topě tóg kejēn inh mÿ Jesus to: “inh kósín vÿ tÿ ti nĩ,“ hé, isÿ fóg ag mÿ, kanhgág ag mÿ ti kãmén jé, ũ tÿ mẽ ja tũ ag kar mÿ. Ti hã tóg inh mur to hã inh kuprēg, inh jagãgtãn kÿ. Kÿ, Jesus tÿ inh mÿ vēnh ven kar inh pi(jé) ěprã ke ũ mré vēmén', ti ki jēmē jé'.

17 Kÿ sóg Jerusalém ra tĩg ja tũ nĩ gé, sÿ ijo apóstolo ag mré vēmén jé. Ga tÿ Arábia ra sóg vyr, ěn kã, kar kÿ sóg tá kãtĩg kÿ cidade tÿ Damasco tá jun mãn.

18 Kÿ, 3 anos tũg kÿ sóg kejēn Jerusalém ra vyr, sÿ

apóstolo Pedro mré vēmén jé. Ti mré sóg kurã tÿ 15 (ke) han, tãvĩ.

19 Ęn kã inh pi(jé) apóstolo ũ ag vé'. Tiago hã ve inh, ěg Senhor jãvy ěn, isÿ Pedro mré vĩn kÿ.

20 Ājag mÿ sóg ki hã rán mũ. Inh pi(jé) ón mũ', Topě hã ne ki kanhró nĩ'.

21 Tag pãte sóg ga tÿ Síria ra vyr, ga tÿ Cilícia ra ke gé.

22 Isÿ ra tĩg jé sóg ga tÿ Judéia fĩn rãm. Kÿ Judéia tá Jesus to vēnh mãn tĩ ag inh ki kagtĩg nÿtĩ ja nĩgtĩ. Inh ve ja tũ ag nÿtĩ ver, Judéia tá Cristo ki ge kÿ nÿtĩ ag.

23 Iso vĩ hã mẽ ja ag tóg nĩgtĩ, hã vÿ: “ũ tÿ ěg vóg kónãn mũ ěn nēji Cristo tó mũ,“ he mũ. “Vãsÿ tóg ũ tÿ ti ki ge kÿ nÿtĩ ag tũg sór ja nĩ, hã ra tóg ũri ti kãmén mũ ha, nēji,“ he ja ag tóg nĩgtĩ iso.

24 Kÿ ag tóg isugrĩn Topě to vĩ há han ja nĩgtĩ, ag tÿ tag mẽ kÿ.

2

Paulo jykre tÿ apóstolo ũ ag mÿ há nĩ.

1 Tag pãte 14 anos tũg kar sóg Jerusalém ra tĩg mãn gé, Barnabé mré, kÿ Tito tóg ěg mré vyr gé.

2 Topě tÿ inh mÿ: “ha ra tũg,“ he ja vē. Tá jun kÿ sóg ag mÿ isÿ nén tó tĩ ěn kãmén kãn ja nĩ sir, sÿ fóg ag mÿ nén kãmén tĩ ěn ti. Vyr mÿ sóg tag to pã'i ag mré vēmén. Fóg ag mÿ sóg: “Jesus ki rã kÿ ěg krenkren ke mũ, ěg tÿ Moisés jykre han tũ ra,“ he tĩ. Kÿ sóg tag to pã'i

ag ki jēmē sór ja nī, sỹ ag mỹ: “mỹ há, fóg ag tỹ Moisés jykre han tũ ra, kanhgág ag ke gé?” he jé. Isỹ fagrĩnh mỹ rãnhrãj jãvãnh tóg tĩ, isỹ fagrĩnh mỹ carreira ri ke han jãvãnh tóg tĩ, hã kỹ sóg ag ki jēmēnh vyr.

³ Kỹ tóg ag mỹ há tĩ, sỹ fóg ag mỹ, kanhgág ag mỹ Jesus hã tó mũ ti, sỹ ag mỹ Moisés tó tũ ra, sỹ ag mỹ Judeu ag jykre tó tũ ra, sỹ ag mỹ: “ha ãjag gré fár junun kym,” he tũ ra. Hã kỹ ag tóg Tito mỹ: “ha kym,” he ja tũ nĩ gé. Fóg tỹ Grego vë, Tito ti, ù tỹ Jerusalém ra inh mré tĩ mũ ên ti. Hã kỹ tóg ã gré fár kym ja tũ nĩ, ti tỹ tỹ Judeu tũ nĩnh kỹ.

⁴ Hã ra ón kỹ Jesus ki ge kỹ nỹtĩ ag tóg ti kym sór ja nĩ. Ón kỹ ag tóg Jesus jykre ve sór ja nĩ. “Ti mỹ Moisés jykre tovãnh tũ'?” he ag tóg iso. Ag tỹ Moisés jykre krēm ãg vin mãn sór ja vë, kỹ tóg ãg patrão ri ke nĩ, Moisés jykre ên ti.

⁵ Hã ra sóg ag kato tẽ. Inh pi(jé) ag mỹ: “hỹ,” he ja nĩgtĩ'. Ag kato tẽ tãvĩ han ja inh nĩgtĩ ãjag jagfy, ãjag tỹ vënh vĩ há hã kri fi jé, Jesus kãme tỹ ãjag mỹ sér tĩ jé, ãjag tỹ Moisés jykre kufy ên han tũ nĩnh kỹ.

⁶ Kỹ pã'i ag tóg isỹ ag mỹ nén kãmén mũ ên to: “tó kãn ja tũ ã nĩ,” he ja tũ nĩ gé, ùn mág ag. Vãsỹ ag tóg tỹ pã'i tũ ja nỹtĩgtĩ, ùn mág tag ag, hã ra tóg inh mỹ tỹ nén ù tũ nĩ, ha mẽ. Topẽ mỹ ti tỹ nén ù tũ nĩ, ãg tỹ ãprã ke ag mỹ tỹ ùn mág nỹtĩ ti, ùn sĩ nỹtĩ ti ke gé.

⁷ Kỹ tóg pã'i tag ag mỹ há tĩ, sỹ fóg ag mỹ, sỹ kanhgág ag

mỹ Topẽ vĩ tónh ke ti, ùn gré fár junun kym ja tũ ên ag mỹ, Topẽ tỹ inh mỹ: “povo ù ag mỹ tónh tĩg,” hen kỹ. “Topẽ vỹ Pedro mỹ tó, ti tỹ Judeu ag mỹ tó jé, ùn gré fár junun kym kỹ nỹtĩ ên ag mỹ, hã ra ã tóg ù ag mỹ tónh ke mũ,” he ja ag tóg nĩ inh mỹ, Jerusalém tá ùn mág ag.

⁸ Topẽ ne Pedro ti tar han, ti tỹ tỹ Judeu ag apóstolo jẽ jé. Kỹ tóg isar han, isỹ tỹ ù ag apóstolo jẽ jé, ùn tỹ Judeu ag jykre han tũ kar ag.

⁹ Tag ve ag, Topẽ tỹ tag to isar han mũ ve ag, Tiago ti, Pedro ti, João ti ke gé. Igreja to pã'i vỹ tỹ ag nỹtĩ, kỹ ag tóg tỹ igreja nũna ri ke nỹtĩ. Ên ag ne inh nĩgé mẽ', Barnabé nĩgé ke gé. Hã kỹ ag tóg ãg mỹ: “há ti nĩ, ãjag rãnhrãj ti, ãjag tỹ nén han sór mũ ti,” he mũ. “Ha fóg ag mỹ tónh mũjãg, kanhgág ag mỹ, jãvo ãg tóg ù tỹ Judeu ag jykre han mũ ag hã mỹ tónh ke mũ,” he ag tóg mũ ãg mỹ, pã'i ag.

¹⁰ Kỹ ag tóg ãg mỹ to vĩ, ãg tỹ ag kãmĩ ùn vësýrénh mũ ag jagãgtãn jé, ãg tỹ ag mỹ nén ù jênẽ jé, fag mỹ ke gé. Tag han sóg tĩ mỹr. Inh pi(jé) kã jatun tĩ'.

Fóg ag tỹ Judeu ag ri ke nỹtĩ

¹¹ Kỹ kejẽn Pedro tóg cidade tỹ Antioquia tá jun ja nĩgtĩ. Hã ra tóg tá kygnẽ, kỹ sóg ti kato tẽ. Ti hã mỹ sóg ti kygnẽ ên tó.

¹² Kỹ Tiago tóg kejẽn ti mré ke ù ag jãgnẽ ja nĩgtĩ. Ag tỹ junjun tũ ki Pedro tóg fóg ag mré jẽn ja nĩgtĩ, Judeu tũ ag

mré. Hã ra Tiago tá ke ag tỹ junjun kỹ tóg sir Judeu tũ ag mré jẽn jãvãnh nĩ sir, ti tỹ Judeu ag kamẽg vẽ sir, ùn gré junun fãr kym tĩ ag jagfy. Kỹ Pedro tóg ón kỹ vurmỹ nĩ mũ sir, fóg ag vãm kỹ.

¹³ Kỹ ti mré Judeu ù ag tóg fóg ag vãm mũ gé sir. Kỹ vãhã Barnabé tóg fóg ag vãm mũ gé sir. Ki kanhró ti nĩ vẽ, Barnabé ti, ãg tỹ jatun mỹ fóg mré nĩnh ke ti, ãg tỹ tỹ Judeu nỹtĩ ra.

¹⁴ Ag kar vỹ kygnẽ kãn, Pedro nón. Jesus jykre pijé', vẽn vỹ sér pijé'.

Sỹ ag tỹ kygnẽ tag ve kỹ sóg vẽn kar rĩnve Pedro mỹ tag tó, ha mẽ. “Ha vé, Judeu vỹ tỹ ã nĩ,” he sóg ti mỹ. “Ã tỹ tỹ Judeu nĩ ra ã tóg fóg jykre han ja nĩgtĩ, fóg mré jẽn kỹ,” he sóg ti mỹ. “Kỹ ã tỹ ne jé ùri Judeu jykre han mãn sór nẽ? Ã tỹ ne jé fóg ag mỹ: Judeu ag jykre han nĩ, he sór nẽ?” he sóg ti mỹ.

Jesus ki ge kỹ nỹtĩ kỹ ãg povo pir ri ke nỹtĩ

¹⁵ Judeu krẽ vỹ tỹ ãg nỹtĩ, kỹ ãg tóg fóg ag tỹ Topẽ vỹ mranh tĩ ãn ri ke tũ nỹtĩ.

¹⁶ Hã kỹ ãg tóg Topẽ tỹ vãsỹ ãg jyvẽn tĩ ãn ki kanhró nỹtĩ. Hã ra ãg pi(jé) tag tigrĩn Topẽ mỹ há nỹtĩ'. ãg tỹ Jesus Cristo ki ge kỹ ãg ti mỹ há nỹtĩ. Hã kỹ ãg tóg Jesus Cristo ki ge kỹ nỹtĩ, ãg tỹ ti mỹ tỹ ùn há nỹtĩ jé, ti tỹ ãg tỹ ti ki ge kỹ nỹtĩ tag tigrĩn ãg mỹ vẽn pãte fón jé sir. ãg pi(jé) Topẽ tỹ vãsỹ ãg jyvẽn tĩ ãn ki króm ja nĩgtĩ', hã

kỹ ãg tóg ti mỹ tỹ ùn há tũ nỹtĩ, ãg tỹ ti tỹ vãsỹ ãg jyvẽn han sór mũ ra. Topẽ pi(jé) Moisés tỹ ãg mỹ vẽn jykre nĩm ja ãn tigrĩn ãg mỹ vẽn pãte fón ke mũ'. Jesus Cristo tigrĩn ke vẽ.

¹⁷ Kỹ tóg ge nĩ. ãg tỹ Cristo ki ge tigrĩn ãg tóg Topẽ mỹ tỹ ùn há nỹtĩ. ãg tỹ Topẽ vỹ mranh kỹ, hã kỹ tóg ãg mỹ vẽn pãte fón mũ, ãg tỹ tỹ Judeu nỹtĩn kỹ, kỹ tóg fóg ag mỹ vẽn pãte fón mũ gé, kanhgág ag mỹ ke gé.

Kỹ ãg hỹn iso: “ã tỹ tag tó kỹ ã tóg: Cristo vỹ Topẽ vỹ mranh tag to há nĩgtĩ, he tĩ,” he sór mũ. Vó, hã tũ vẽ.

¹⁸ Hã ra tag to jykrén, ha mẽ: ãg tỹ Topẽ tỹ vãsỹ vẽn jykre to: “vẽn jykre tag han mãn ke tũ ãg nĩ ha,” he kar kỹ: “vó, han mãn jé ãg tóg ke mũ, ge ra,” hen kỹ tóg vẽn mỹ tĩ sir. Vẽn jykre régre vỹ sir.

¹⁹ Topẽ tỹ vãsỹ ãg jyvẽn ja ãn ki kanhró ãg tóg nỹtĩ. Kỹ ãg tóg ti tỹ ãg jyvẽn mũ ãn mẽ kỹ: “vẽn jykre kórég han kỹ sóg Topẽ vỹ mranh tĩ,” he mũ sir. Ti vỹ ki króm ki kagtĩg ãg tóg nỹtĩ, ãg tỹ ki króm sór mũ ra. Hã ra Cristo vỹ ãg jykre si tỹ tũ' he ja nĩ. Ti mré tóg cruz to sa ja nĩ, ãg jykre si ti. Kỹ tóg ãg mỹ vẽn jykre tãg nĩm mũ sir, ãg tỹ tỹ Topẽ tũ nỹtĩ jé.

²⁰ ãg jykre si vỹ tũ' hé. Hã kỹ ãg tóg ti tũ hã han tĩ, ãg tỹ ver ga kri mũn kỹ. Topẽ kósin ki rã tigrĩn ãg tóg sir rĩnrĩr nỹtĩ. Ti fe vỹ tỹ ãg nỹtĩ, ãg kar vỹ tỹ ti fe nỹtĩ, kỹ tóg ãg jagfy ù tỹ ã tén tĩ ag mỹ vẽn fẽg, kỹ tóg ãg jagfy ter ja nĩ.

²¹ Ti ki ge kŷ nŷtĩ tigrĩn ěg tóg Topě mŷ há nŷtĩ. Topě tŷ ěg jagăgtăn hă vĕ. Ěg tŷ: “Topě jykre si ki króm kŷ inh hŷn Topě mŷ tŷ ũn há nĩ,” hen kŷ Cristo vŷ fagrĩnh mŷ ter ja nĩ. Kŷ ěg tóg Topě tŷ ěg jagăgtăn tag tŷ tũ' he mũ. Hă tũ vĕ mŷr.

3

Ěg tŷ Jesus ki ge kŷ ěg krenkren ke

¹ Galácia tá ke', ājag ne tóg krĩ tũ nŷtĩ ve nŷtĩ'. Ũ nŷ ājag krĩn kónăn, ājag tŷ Jesus Cristo tovănh sór jé? Ti tŷ ka to sa ja ěn tó kăn inh mŷr ājag mŷ, kŷ ājag tŷ ne jé văsŷ vĕnh jykre ěn han sór nĕ?

² Kŷ sóg ājag ki tag jĕmĕ sór mũ, ha mĕ: Topě ne ājag mŷ ā kuprĩg jĕnĕ'. Ājag tŷ văsŷ vĕnh jykre si ěn mũ mũ tigrĩn ājag mŷ jagrĕn kŷ nŷtĩ'? Vó, inh vĩ tigrĩn ājag tóg Cristo ki ge kŷ nŷtĩ, kŷ ājag tóg Cristo ki ge tigrĩn jagrĕn kŷ nŷtĩ.

³ Kŷ krĩ vĕnh mŷ han sór tũg nĩ. Topě kuprĩg tŷ ājag krĩn kŷ ājag Jesus ki ge ja nĩ. Kŷ: vĕsóg ki sóg ti jykre ki krov,” he tũg nĩ.

⁴ Ke tũ nĩ (mũ) ra ājag tóg fagrĩnh mŷ Topě kuprĩg tŷ jagrĕ nĩ ěn vé. Hă ra tóg inh mŷ fagrĩnh mŷ ke tũ nĩ.

⁵ Kŷ ũ tŷ ājag mŷ ā kuprĩg jĕnĕg mũ ěn vŷ ěg tŷ nĕn han vănh hŷn han ja nĩgtĩ gé. Ti mŷ ājag tŷ văsŷ vĕnh jykre si mũ mũ tigrĩn milagre ěn hŷn han'? Vó. Ājag tŷ Cristo kăme sér mĕ kŷ ti ki ge tigrĩn tóg milagre ěn hŷn han. Tag to jykren.

⁶ Kŷ Abraão to jykren nĩ gé. Topě ki tóg ră kŷ nĩ ja nĩ, kŷ tóg Topě mŷ tŷ ũn há nĩ sir, Abraão ti.

⁷ Tag to jykren há han nĩ. Ěg tŷ Abraão nón Topě ki ge kŷ nŷtĩ kŷ ěg tóg Abraão krĕ'krĕ ag ri ke nŷtĩ.

⁸ Topě vŷ fóg ag mré kanhgág ag krenkren han sór mũ, ag tŷ ti ki ge kŷ. Ũ tŷ Judeu jykre han tũ ag kar krenkren han sór tóg mũ. Hă tóg rán kŷ nĩ. Văsŷ tóg rán kŷ nĩ, Topě vĩ tŷ rán kŷ nĩ ki. Văsŷ tóg Abraão mŷ vĕnh vĩ sér tag tó ja nĩ, ha mĕ: “povo kar mŷ sóg vĩ há han ke mũ, ā tigrĩn,” he ja tóg nĩ, Topě ti, Abraão mŷ.

⁹ Ti mŷ tóg vĩ há han ja nĩ, Topě ti, Abraão mŷ, ti tŷ ti ki ră há han kŷ. Kŷ tóg ũ tŷ ti nón ti ki ge kŷ nŷtĩ ag mŷ vĩ há han ke mũ gé.

¹⁰ Ũ tŷ văsŷ vĕnh jykre si ěn ki króm tigrĩn kren sór mũ ag mŷ tóg vĩ kónăn ke mũ, Topě ti, ag tŷ ki króm sór mũ ra mranh kŷ, mŷr, ha mĕ. Hă kŷ tag tóg rán kŷ nĩ, ha mĕ. “Topě tŷ ěg jyvĕn mũ tóg e nŷtĩ, kŷ ti vĩ tóg rán kŷ nŷtĩ. Ěg tŷ ki króm kăn ke vĕ. Ũ tŷ mranh pir han mũ mŷ tóg vĩ kónăn ke mũ, Topě ti,” he tóg, Topě vĩ tŷ rán kŷ nĩ ki.

¹¹ Hă kŷ ěg tŷ Topě tŷ văsŷ ěg jyvĕn mũ ěn ki króm sór mũ ra ěg tóg ti mŷ tŷ ũn há tũ nŷtĩ, Topě ti mŷ, ěg tŷ ki króm kăn tũ nĩn kŷ. Hă kŷ tag tóg rán kŷ nĩ gé: “ěg tŷ Topě ki ge kŷ nŷtĩn hă kŷ ěg tóg ti mŷ tŷ ũn há nŷtĩ, kŷ ěg tóg krenkren ke mũ ha,” he ja tóg nĩ, Topě vĩ tŷ

rán kÿ nĩ ki.

12 Kÿ Topẽ tÿ vãsÿ ẽg jyvẽn tĩ ẽn vÿ ẽg tÿ ti ki rã ri ke tũ nĩ. Hã kÿ tóg tag tó ja nĩ, Topẽ ti, ha mẽ: “ãjag tÿ inh vĩ ki króm tigrĩn ãjag krenkren ke mũ,” he ja tóg nĩ. Hã ra ẽg tóg ki króm ki kagtĩg nÿtĩ, hã kÿ ẽg tóg ti jykre si ki króm sór mũ ra ki króm ja tũ nĩ, hã kÿ ẽg tóg krenkren ke tũ nĩ sir.

13 Jãvo ẽg tÿ Cristo ki ge kÿ ẽg krenkren ke mũ. Topẽ vÿ ẽg mÿ vĩ kónãn ke mũ vẽ, ẽg tÿ ti tÿ vãsÿ ẽg jyvẽn mũ ẽn mranh ja to. Hã ra Cristo tóg ẽg krenhan mũ, Topẽ tÿ ẽg mÿ vĩ kónãn tũ nĩ jé. Cristo hã ne Topẽ mÿ: “ha ag jagfy inh hã mÿ vĩ kónãn,” he ja nĩgtĩ'. Ti to tag tóg rãn kÿ nĩ, ha mẽ: “ũ tÿ cruz to sa mũ ẽn mÿ tóg vĩ kónãn mũ, Topẽ ti,” he ja tóg nĩgtĩ, Topẽ vĩ tÿ rãn kÿ nĩ ki.

14 Ti tÿ Cristo hã mÿ vĩ kónãn kÿ tóg ẽg hã mÿ vĩ há han mũ sir, ti tÿ Abraão mÿ vĩ há han ja ẽn ri ke. Fóg ag mÿ tóg vĩ há han mũ, kanhgág ag mÿ ke gé, Jesus Cristo tigrĩn. Kÿ tóg ẽg mÿ ã kuprĩg jẽnẽg mũ sir, ẽg tÿ ti ki rã ja tigrĩn. Tó ja ti nĩ, ti tÿ ẽg jagrẽn ke ti, kÿ tóg ke mũ, ẽg tÿ ti ki rã ja tigrĩn.

Abraão tÿ Topẽ vĩ kri nĩm kÿ tÿ ùn há nĩ

15 Inh kanhkã', ẽprã ke jykre to jykren. Kejẽn ùn régre ag tóg jagnẽ mré nén ù to jykren tĩ. To jykren kar kÿ ag tóg rãn tĩ, kÿ ag tóg ãjag jygi rãnrãn tĩ gé sir. Ag jygi rãnrãn kar kÿ ù tóg sir tÿ nén ù han mãn ke tũ nĩ. Rãn kÿ tóg nĩ nĩ,

kÿ ag tóg tÿ ti rá ù han tũ nĩgtĩ sir. Ẽprã ke jykre hã vẽ.

16 Kÿ Topẽ jykre vÿ ge nĩgtĩ gé. Topẽ vÿ Abraão mÿ tó ja nĩ, vãsÿ, ti tÿ ti mÿ nén ù há han ke ti, ti krẽ'krẽ mÿ ke gé. Kÿ tóg, ti tÿ ti krẽ'krẽ tó kÿ (tóg) Abraão krẽ'krẽ ag kã ùn pir hã tó ja nĩ. Ti pi(jé) Abraão mÿ: “ã krẽ'krẽ ag,” he ja nĩ'. “Ã krẽ'krẽ,” he ja ti nĩ, hã vÿ: Cristo, he mũ, hã vÿ: Abraão krẽ'krẽ ag kã ùn pir, he mũ.

17 Kÿ Topẽ tóg Moisés mur ke to hã Abraão mÿ ti tÿ ti krẽ'krẽ ag kã ù mÿ vĩ há han ke tag tó ja nĩ, ti tÿ Abraão mré jykren kÿ. Kÿ, tag pãte, 430 (ke) anos tũg kÿ tóg Moisés mÿ ti tÿ ẽg jyvẽn ke ẽn nĩm. Hã ra tóg ã tÿ Moisés mÿ vẽnhan jykre ẽn nĩm mũ ra tóg ã tÿ Abraão mÿ vẽnhan jykre tó ja ẽn tÿ tũ' he ja tũ nĩ.

18 Kÿ Topẽ tÿ Abraão mÿ: “ve jé ã tóg ke mũ, ã krẽ'krẽ mrẽ,” he ja ẽn tigrĩn tóg ve ja nĩ, Topẽ vĩ hã tigrĩn tóg ve ja nĩ, Abraão ti. Ti tÿ ẽg jyvẽn ẽn to ke tũ vẽ, ti tÿ ẽg mÿ: “ẽn ve jé ãjag tóg ke mũ,” hen kÿ ẽg tóg venh ke mũ, ti vĩ tũgnĩn.

19 Kÿ ãjag hÿn inh mÿ: “Topẽ tÿ ne jé Moisés mÿ ti tÿ ẽg jyvẽn ke ẽn tó ja nẽ?” he sór mũ. Ẽg tÿ: “venh jykre kórég han kÿ inh hÿn tóg Topẽ vĩ mranh,” he jé, hã jé Topẽ tóg Moisés mÿ ti tÿ ẽg jyvẽn ke ẽn nĩm ja nĩ, Jesus mur ke to hã. Abraão kósin tÿ Jesus mur ke tũg ki ke ja vẽ, Topẽ tÿ ẽg jyvẽn ja ẽn ti. Ti hã mÿ tóg vĩ há han sór ja nĩ, Topẽ ti, Jesus hã mÿ.

Topē tỹ Israel ag jyvēn kỹ tóg ã tỹ jēnē jafã ag mỹ tó ja nĩ. Kỹ Topē tỹ jēnē jafã ag tóg Moisés mỹ tó ja nĩ, Moisés tỹ Israel ag mỹ kãmén jé. Topē tỹ ãg jyvēn jafã ti nĩ ja nĩ, Moisés ti.

²⁰ Topē jēgja kã jēg kỹ tóg Israel ag mỹ vĩ ja nĩgtĩ, Moisés ti, Topē tỹ Israel ag mré jykrén kỹ. Kỹ Moisés tóg ag jyvēn, ag tỹ Topē vĩ ki króm jé. Topē tỹ ãg kren han kỹ tóg ge tũ nĩgtĩ. ã pir mỹ tóg ãg mỹ tó mũ, ti tỹ ãg kren han sór mũ ti, Topē ti. Û tóg ti jagfy ãg mré vĩ tũ nĩ sir.

Topē vỹ ãg jyvēn, ãg tỹ ti vĩ ki kanhrãn jé

²¹ Isỹ tag tó kỹ Topē hỹn ãjag mỹ tỹ ùn ón mé nĩ ve nĩ. “Topē tỹ ãg jyvēn mũ ra ãg tóg ti vĩ mranh tĩ. Hã kỹ tóg ãg vóg kónãn ke mũ. Kỹ tóg ãg kren han ke tũ nĩ,” he ãjag hỹn tĩ. Vó, Topē pi(jé) ón tĩ’. Hã ra Topē tỹ ãg jyvēn mũ ra ãg tóg ki króm tũ nĩgtĩ, hã kỹ ti tỹ ãg jyvēn tag tóg ãg kren han jãvãnh nĩ. Ti tỹ ãg jyvēn ãn tỹ ãg kren han mũ ra ãg tóg ti tỹ ãg jyvēn tugrĩn jykre kuryj nỹtĩnh mũ vè.

²² Hã ra tag tóg rán kỹ nĩ, ha mē: “vēnh kar vỹ Topē vĩ mranh kãn ja nĩgtĩ,” he ja tóg nĩ, Topē vĩ tỹ rán kỹ nĩ ki. Kỹ ãg tỹ Jesus ki ge hã kỹ ãg tóg krenkren ke mũ sir. Û tỹ ti ki ge kỹ nỹtĩ ag hã vỹ krenkren ke mũ.

²³ Kỹ, ãg tỹ Cristo ki rãnh ke to hã ãg tóg Topē tỹ vãsỹ ãg jyvēn mũ ãn krēm nỹtĩ ja nĩgtĩ, kỹ tóg ãg kanhrãn tĩ ja nĩgtĩ.

Ti tỹ ãg mrãnmrãn ri ke ja ti nĩgtĩ, ti vĩ ti. Krēm ãg tóg sigse kỹ nỹtĩ ja nĩgtĩ. ãg tỹ Cristo ki ge kỹ ãg tóg kygvar kỹ nỹtĩ sir. Cristo mur to hã ke ja vè, Topē tỹ vãsỹ ãg jyvēn ja ti.

²⁴ Kỹ tóg ãg jyvēn ja nĩgtĩ, ãg tỹ Cristo ki rãnh ke to jykrén jé. Cristo ki ge tugrĩn ãg tóg Topē mỹ tỹ ùn há nỹtĩ ha.

²⁵ Kỹ, ãg tỹ ti ki rã kar kỹ ãg tóg Topē tỹ vãsỹ ùn mỹ: ag jyvēn nĩ, he mũ ãn krēm ke tũ nỹtĩ ha.

²⁶ Topē krē vỹ tỹ ãg nỹtĩ ha, ãg tỹ Jesus Cristo ki ge kỹ.

²⁷ Ti jiji tó kỹ ãg kygpe kỹ nỹtĩ, kỹ ãg tóg ti ri ke nỹtĩ sir, tỹ ti hã ri ken hã vè.

²⁸ Hã kỹ ãg tóg tỹ jagnē hã nỹtĩ gé. Kỹ ãg tỹ ti ki ge kỹ Judeu ag vỹ fóg ag ri ke nỹtĩ, kỹ fóg ag vỹ kanhgág ag ri ke nỹtĩ gé. Û camarada ag vỹ ãjag patrão ri ke nỹtĩ. Ag vỹ fag ri ke nỹtĩ gé. Nén ù pir vỹ tỹ ãg nỹtĩ, ãg tỹ Jesus Cristo ki ge kỹ nỹtĩn kỹ.

²⁹ Kỹ, ãg tỹ tỹ Cristo mré ke nỹtĩn kỹ ãg tóg tỹ Abraão krē'krē ag ri ke nỹtĩ gé sir, ãg kar, kỹ ãg venh ke mũ sir, Topē tỹ Abraão mỹ nén to mũ ãn ti.

4

¹ Sỹ ãjag mỹ kãmén mãn ke vè, sỹ nén tó ja ãn ti. Ûn rico kósin vỹ ti tũ mãn kãn ke mũ, ti mog kỹ. Ti tỹ ver sĩ nĩn kỹ tóg nén ù venh ke tũ nĩ ver. Ti panh camarada ri ke tóg nĩ ver, ti sĩ nĩn kỹ. Hã ra ti panh tỹ nén kar vỹ tỹ ti tũ nỹtĩnh ke mũ.

² Ge ra ag tóg ver ti kanhrân tí, ti sí nîn ký. Ký ti kri ke ag ne ti tú to jykrén tí'. Gen ký tóg kejên ti panh tý ti mý kurã nîm ja ên pétêm ke mû. Ên kã tóg ã tú mân kãn ke mû sir.

³ Ge ti nîgtî êg mré, êg tý tý Topê krê nýtîn ký. Jesus mur ke to hã êg tóg gîr ri ke nýtî ja nîgtî. Nén kar tân kamêg ja êg tóg nîgtî, krîg tân mré hã. Êg sigse ri ke han ja ag nîgtî, nén tân ag.

⁴ Ký, ti kurã tá krÿg ký Topê tóg ã kósin jênê. Êprã ke fi ki tóg mur. Moisés tý êg jyvên tí ên ki króm kãn ja tóg nîgtî.

⁵ Êg kren han jé tóg mur, ti tý Moisés tý êg jyvên ja ên to êg kygvãn jé sir, êg tý vãhã tý Topê krê pẽ nýtî jé sir. Tý êg ti krê tú ja nýtîgtî vê, hã ra Topê tóg êg jê'ÿn sór mû ha sir.

⁶ Ký êg tóg tý ti krê nýtî sir. Êg tý tý ti krê nýtîn ký tóg êg mý ã kuprîg jênêg mû sir, ti tý tý êg jagrê nî jé. Ti kósin kuprîg ri ke ti nî, Topê kuprîg ti. Êg jagrê tag tý êg tóg sir Topê to: "êg jóg mág," he tí.

⁷ Hã ký êg tóg tý ù camarada ri ke tú nýtî ha. Topê krê vÿ tý êg nýtî ha. Ký, êg tý tý ti krê nýtîn ký êg tóg ti tý nén mân ke mû gé sir, ti tý êg mý nén nîm ke ti. Topê tý êg mý nén han hã vê.

Paulo tý krî kufy nî

⁸ Vãsÿ ãjag tóg Topê ki kagtîg ja nýtîgtî. Ký ãjag tóg ón ký vênh kãgrá hã to: "êg Topê vê'," he ja nîgtî. Vênh kãgrá pí(jé) tý Topê nî'. Vênh kãgrá

hã nón mûn ký ãjag tóg sigse ký nýtî ja nîgtî.

⁹ Uri ãjag tóg Topê ki kanhró nýtîjãvo. Hã ra tóg vãsÿ ãjag ki kanhró nî ja nî vê, Topê ti, ha mē. Ký ãjag tý ne jé tý nén kar tân ag mré ke nýtî mân sór nê? Krój ti nýtî, nén kar tân ti, to êg jagtar' he nýtî ja nîgtî, sigse ký êg nýtî ja nîgtî, êg tý tý ag mré ke ja nýtîn ký. ãjag mý sigse ký nýtî mân sór mû'?

¹⁰ Kurã to ãjag tóg jykrén sór mû, kurã kórég to, kar ký kysã kórég to ke gé, prÿg kórég to ke gé.

¹¹ Inh kanê jur tóg tí, sÿ tag mē ký. Inh hÿn fagrînh mÿ ag mÿ Jesus kãmén, he sóg tí, mÿr.

¹² Inh kankã, inh ri ke nýtî sórmnî. ãjag mré ke vÿ tý inh nî, ký inh ri ke han sórmnî. Tag hã to sóg vî mû, ãjag mÿ. ãjag pí(jé) inh jû han'.

¹³ Sÿ ãjag ki jun vén mû ên mî êkré, sÿ ãjag mÿ Topê vî to vén mû ti. Ên kã sóg kaga nÿ ja nîgtî.

¹⁴ Ký tóg ãjag mÿ e tí ja nîgtî, ãjag tý inh kaga ven ký. Ge ra ãjag tóg iso é he ja tú nîgtî, ti pí(jé) ãjag mÿ jêgry ja nîgtî', inh kaga ti. Inh mÿ vî há han ja ãjag tóg nîgtî, sÿ tý Topê tý jênê jafã nîn ký, ãjag mÿ. ãjag tý Jesus Cristo ki rîr mû ên ri ke han ja ãjag tóg nîgtî isÿ.

¹⁵ Ên kã tóg ãjag mÿ sér pẽ tí ja nîgtî. Hã ký ãjag tóg inh jagãgtân ja nîgtî. Isÿ ãjag mÿ ãjag kanê to vî ra ãjag hÿn inh mÿ vin ke mû vê. Ký ti tý ne jé ãjag mÿ sér tú tí nê, uri?

16 Ājag mǝ sóg ki hǎ tó mǝ. Inh mǝ tag tugrĭn ājag mǝ kórég nĭ ha'? Inh mǝ tóg e tĭ, tag ti.

17 Ū ag tóg ājag mǝ vĭ há han sór mǝ. Ag ón vē hǎ ra. Ag tǝ ājag tǝ inh kato tē han sór vē, hǎ kǝ ag tóg ón kǝ vĭ há han sór mǝ, ājag tǝ ag hǎ nón mǝ jé sir, isovǎnh kǝ.

18 Há ti nĭ vē, nén ũ há tǝ ājag mǝ sér nĭnh kǝ. Isǝ ājag mré nĭnh kǝ nén ũ há ěn tóg ājag mǝ sér nĭ ja nĭgtĭ. Kǝ ājag tǝ tag tovǎnh tǝ nĭ kǝ tóg há tĭ, inh mǝ. Kǝ nén ũ há hǎ to tar nĭtĭmnĭ.

19 Inh krĕ', ājag mǝnh ri ke vǝ tǝ inh nĭ. Ēg mǝnh fi ne kaga tĭ', ěg tǝ fi ki mur ken kǝ. Fi kaga tag ri ke han mǎn inh, ājag to. Ājag tǝ Cristo hǎ ri ke nĭtĭn kǝ tóg há tĭ, sǝ tag hǎ ve sór vē, hǎ jé sóg ěg mǝnh fi kaga ěn ri ke han mǎn mǝ, ājag tugrĭn.

20 Sǝ ājag mré nĭnh há tóg tĭ, sǝ ājag mré vēmĕn jé, sǝ ājag mǝ kǎmĕn há han jé sir. Sǝ komĕr hǎ ājag mǝ kǎmĕn há tóg tĭ. Hǎ ra sóg kanĕ jur mǝ, ājag to, hǎ kǝ sóg vĭ mǝ.

Agar fi mré Sara fag to vēnh jykre

21 Ājag kǎmĭ ũ tóg Moisés tǝ ěg jyvĕn ja ěn han sór mǝ. Ājag hĭn mĕ kǎn ja tǝ nĭ, vǎsǝ vēnh jykre ěn ti, hǎ kǝ ājag tóg han sór mǝ. Ājag tǝ mĕ há han kǎn ja nĭ ra ājag hĭn han sór ke tǝ nĭ vē. Hǎ mĕ, vǎsǝ vēnh jykre ěn ti, ājag tǝ nĕn han sór mǝ ěn ti.

22 Tag vǝ rán kǝ nĭ, ha mĕ. Abraão vǝ kósin régre nĭ ja nĭgtĭ. Ū mǝnh fi vǝ tǝ ti camarada fi nĭ, kǝ ũ mǝnh fi vǝ tǝ ti prǝ pĕ fi nĭ.

23 Kǝ Abraão tóg ā camarada fi mré nĭ ja nĭ, ti tǝ ver kófa tǝ ra, kǝ ti kósin tóg fi ki mur mǝ sir. Hǎ ra tóg ā prǝ pĕ fi ki (tóg) ā kófa ra kósin mǝ gé sir. Topĕ tǝ ti mǝ: “ā kófa nĭ ra ā tóg kósin ke mǝ,” he jan hǎ vē.

24 Topĕ tóg tag han, ěg tǝ ti jykre ki kanhrǎn jé. Ti tǝ ěg mǝ comparaçáo han hǎ vē, fag to, ha mĕ. Topĕ tǝ ěg mré jykrĕn mǝ ri ke fag nĭtĭ, Abraão prǝ fag. Agar fi vǝ tǝ Abraão camarada ja nĭgtĭ. Ti mré ke pĕ tǝ fi vē. Kǝ fi tóg ri ke nĭ, Topĕ tǝ krĭ tǝ Sinai tá Moisés mǝ ti tǝ ěg jyvĕn ěn tó ja ti. Tag vǝ Agar fi ri ke nĭ, ti camarada fi ri ke. Ū tǝ vēnh jykre ěn han mǝ vǝ tǝ ũ camarada ri ke nĭtĭ, fi kóm. Tǝ ag tóg sir Topĕ mré ke tǝ nĭtĭ, ũ tǝ Judeu jykre han mǝ ag.

25 Kǝ Agar fi vǝ krĭ tǝ Sinai ri ke nĭ, ga tǝ Arábĭa tá. Hǎ ra fi tóg cidade tǝ Jerusalém ri ke nĭ gé, hǎ vǝ: Judeu ag jykre han mǝ ag kar, he mǝ, hǎ vǝ: Jerusalém, he mǝ. Tǝ ag Topĕ mré ke tǝ nĭtĭ, ũ tǝ Judeu ag jykre han mǝ ag.

26 Hǎ ra ěg jamǎ vǝ kanhkǎ tá nĭ, Jerusalém tǎg to ken hǎ vē, hǎ vǝ: kanhkǎ, he mǝ. Ēg mǝnh ri ke vē sir, Abraão prǝ pĕ fi ri ke vē sir, Jerusalém tǎg, he mǝ tag ti.

27 Tag to tag tóg rán kǝ nĭ, ha

mě: “kurĩ ã tóg nĩ, krĕg vānh ã tóg nĩ. Ge ra mĩ sér tĩmnĩ, jamā há ra prĕrmnĩ, ã mĩ sér tĩn kĕ, gĩr ũ tỹ ã ki mur ja tũ ra. Ā krĕ vỹ e tāvĩ nỹtĩnh mũ, ũn krĕg mũ fi krĕ e káfór ti nỹtĩnh mũ, ã krĕ ti, ã mén tỹ ã fón mũ ra. Ũ tỹ fi mén mré tĩ mũ fi krĕ káfór ti nỹtĩnh mũ, ã krĕ ti,” he ja tóg nĩ, Topĕ vĩ tỹ rán kĕ nĩ ki.

²⁸ Kĕ ĕg tóg Isaque ri ke nỹtĩ. Topĕ tóg Isaque to Abraão mỹ: “ã kófa nĩ ra ã tóg kósin ke mũ,” he ja nĩ. Kĕ ĕg tóg Cristo ki ge kĕ nỹtĩ kĕ tỹ Topĕ krĕ nỹtĩ, Topĕ tỹ: “inh krĕ vỹ tỹ āĕag nỹtĩnh mũ,” hen kĕ. Topĕ vĩ tag tugrĩn ĕg tóg Isaque ri ke nỹtĩ.

²⁹ Kĕ Abraão kósin ve vỹ ti prũ pĕ fi kósin vóg kónān ja nĩgtĩ. Abraão vỹ ã kófa tũ ra ã kósin ve ĕn han, hā ra tóg Topĕ kuprĩg tugrĩn ã prũ pĕ fi kósin han, ã kófa pĕ ra. Kĕ ti kósin ve vỹ ĕgno vóg kónān mũ. Hā kĕ ĕg tóg tag vég tĩ gé, ũri. Judeu jykre han mũ ag vỹ ĕg vóg kónān sór tĩ gé ver.

³⁰ Kĕ Abraão krĕ ag to tag vỹ rán kĕ nĩ, ha mẽ: “ã camarada fi fón nĩ, fi kósin mré,” he ja tóg nĩ. “Ā camarada fi kósin pi(jé) ã prũ pĕ fi kósin mré ã tũ mān ke mũ'. Ā pir mỹ ti mān ke mũ, ã prũ pĕ fi kósin ti,” he ja tóg nĩgtĩ, Topĕ vĩ tỹ rán kĕ nĩ ki, Abraão krĕ to.

³¹ Kĕ ĕg tóg ti prũ pĕ fi kósin ri ke nỹtĩ. ĕg pi(jé) tỹ ti camarada fi kósin ri ke nỹtĩ, ĕg tỹ Jesus ki ge kĕ nỹtĩn kĕ.

Jesus tỹ ĕg kygvān ja

¹ Kĕ Jesus tóg ĕg kygvā, vēnh jykre si to, ĕg kygvar kĕ nỹtĩ jé sir. Hā kĕ Judeu ag jykre ĕn han sór tũg nĩ. Ũ tỹ tag to āĕag krĩn sór mũ ĕn ag kato tĕmnĩ, ag nón mũ sór tũg nĩ, āĕag tỹ vēnh jykre ĕn krĕm sigse kĕ nỹtĩ mān tũ nĩn jé sir.

² Hā kĕ sóg āĕag mỹ kāmén mũ, inh, hā vỹ: Paulo, he mũ. Sỹ āĕag mỹ nĕn tónh ken hā vē, ha mẽ: āĕag tỹ āĕag gré junun fār kym kĕ, āĕag tỹ Judeu ag jykre han jé, kĕ Cristo vỹ āĕag mỹ nĕn ũ há han ke tũ nĩ.

³ Ha vé, sỹ tag tó mān ke vē gé, ha mẽ. Āĕag tỹ āĕag fār kym kĕ āĕag han kān ke mũ sir, Moisés tỹ ĕg mỹ vēnh jykre nĩm ja ĕn ti.

⁴ Hā ra āĕag tóg Cristo tovānh ke mũ, āĕag tỹ Moisés tỹ ĕg jyvĕn tĩ ĕn han sór kĕ, āĕag tỹ Moisés jykre tugrĩn Topĕ mỹ tỹ ũn há nỹtĩ sór kĕ. Topĕ vỹ ĕg jagāgtān sór mũ. Āĕag tỹ Moisés jykre han sór kĕ āĕag tóg ti tỹ ĕg jagāgtān tag to é he mũ sir.

⁵ Āĕag jāvo ĕg tóg ĕg tỹ Jesus ki gen kĕ Topĕ mỹ tỹ ũn há nỹtĩnh mũ. ĕg tỹ ti ki ge kĕ nỹtĩn kĕ ĕg tóg Topĕ kuprĩg tỹ jagrĕ nỹtĩ. ĕg jagrĕ tag tugnĩn ĕg tóg Topĕ mỹ tỹ ũn há nỹtĩ.

⁶ Ha vé, ĕg tỹ Jesus Cristo ki ge kĕ nỹtĩn kĕ tóg tỹ nĕn ũ tũ tĩ sir, ũn gré junun fār kym ja ti, ũn tỹ kym ja tũ ti ke gé. Ti ki ge kĕ ĕg tóg nỹtĩ, kĕ ĕg tóg tỹ nĕn ũ pir nỹtĩ ha, jagnĕ to há ĕg nỹtĩ ha.

⁷ Ha vé, mũ há han ja āĕag

nĩgtĩ. Ājag tỹ ne jé tovãnh sór nẽ? Ājag tỹ ne jé vẽnh vĩ há kri nĩm sór tũ nĩ nẽ?

⁸ Topẽ tỹ ājag krĩn pijé'. Ti hã ne ājag jé prẽr ja nĩgtĩ'.

⁹ Tag to jykrén: fermento sĩ vỹ ěg tỹ pão kujãgja kỹ kri rũm ke tĩ, kỹ tóg tỹ sónsón ke kãn tĩ, tỹ nĩ kãn tóg tĩ, pão ti. Topẽ vỹ kujãgja vỹ ge nĩ, ha mẽ. Ke tũg nĩ.

¹⁰ Ěg Senhor tũ vỹ tỹ ājag nỹtĩ. Hã kỹ sóg ājag to: “ag hỹn ti tovãnh ke tũ nĩ,” he tĩ, “ag hỹn ti japry, ti jamĩn jagma mũ mãn ke mũ,” he sóg tĩ. Ũ tỹ ājag krĩn mũ ěn ne vėsỹrénh ke mũ', ājag krĩn kónãn ja tag to, ti tỹ tỹ pã'i nĩ ra.

¹¹ Inh pi(jé) ěg gré junun fár kym to: “ke ra,” he tĩ'. Isỹ ag mré tag tó ra ag hỹn inh vóg kónãn ke tũ nĩ vẽ. Isỹ ag mré tag tó ra ag hỹn iso jũnh ke tũ nĩ vẽ. Ěg tỹ ěg fár kym tugrĩn krenkren tĩ ra ěg tóg Jesus tỹ ka to sa ja ěn to krenkren ke tũ nĩ vẽ, kỹ tóg ag mỹ sér tĩ vẽ, isỹ vẽnh jykre si tó tĩ ra. Hã ra sóg tó tũ nĩgtĩ.

¹² Ũ tỹ tag tó mũ ag jé ājag grãfy kym kãn, ũ tỹ ājag krĩn kónãn mũ tag ag.

¹³ Hã ra Topẽ tóg ěg jé prẽr, ti tỹ ěg kygvãn jé. Ti tỹ ěg kygvãn kỹ ěg kygvar kỹ nỹtĩ ha. Ge ra ěg tóg ěg tỹ vėsóg ki nén to jykrén mũ ěn han sór ke tũ nĩ, ti kórég nĩn kỹ. Ěg tũ hã han ke tũ ěg nĩ. Ěg tỹ jagnẽ to há nỹtĩ tag hã ne há nĩ'. Jagnẽ ki rĩr to ken hã vẽ.

¹⁴ Ha vé, Topẽ tỹ ěg jyvẽn e ěn ki króm kãn jé ěg tóg ke mũ, ěg tỹ nén ũ pir han kỹ, hã vỹ:

“ã régre ki rĩr há han nĩ, ã tỹ vẽnh ki rĩr há ri ke han nĩ, ã régre ki,” he mũ.

¹⁵ Jãvo ājag tóg mĩg ri ke jagnẽ mãn sór mũ, jagnẽ to jũn kỹ. Jagnẽ tỹ tũ' he jé ājag tóg ke mũ, ge kỹ, ha vemnĩ.

Ěg tỹ ěg tỹ nén to ěn mũ ěn han ke tũ

¹⁶ Hã kỹ sóg ājag mỹ: “Topẽ kuprĩg tỹ ājag mỹ nén tó mũ ěn hã han nĩ,” he sór mũ. Kỹ ājag tóg ājag tỹ nén to ěn mũ ěn han ke tũ nĩ.

¹⁷ Ěg tỹ nén to ěn mũ vỹ Topẽ kuprĩg tỹ ěg mỹ nén tó mũ ěn kato tẽ nĩ, kỹ Topẽ kuprĩg vỹ ěg tỹ nén to ěn mũ ěn kato tẽ nĩ gé. Jagnẽ to rará ag tóg tĩ, hã kỹ ěg tóg ěg tỹ nén han sór mũ ěn han ke tũ nĩ.

¹⁸ Ěg tỹ hã ra Topẽ kuprĩg tỹ ěg mỹ nén tó mũ ěn han kãn kỹ tóg ěg se mãn ke tũ nĩ sir, Topẽ tỹ vãsỹ ěg jyvẽn ja ěn ti.

¹⁹ Ěg tỹ vėsóg ki nén to jykrén mũ ěn vỹ kórég nĩ, kỹ vẽn kar vỹ ki kanhró nỹtĩ. Ěg tỹ vėsóg ki nén to jykrén to ken hã vẽ, hã vỹ: mén tũ mré nỹ, he mũ, prũ tũ mré nỹ, he mũ, nén ũ kavéj han tĩ, he mũ, ěg tỹ nén to ěn mũ kar han tĩ, he mũ,

²⁰ ěg tỹ vẽn kãgrá to: Topẽ vẽ, he tĩ, he mũ, kujá jykre han tĩ, he mũ, curandeiro jykre han tĩ, he mũ, jagnẽ kato vãsãn tĩ, he mũ, jagnẽ to ājag fe tỹ gỹm ke (ka)mẽ, he mũ, jagnẽ tũ to jykrén kónãn tĩ, he mũ, vėsỹ ũn mág han sór mũ, he mũ, vẽn kãpãm kỹ nỹtĩ sór mũ, he mũ, jagnẽ vỹ kato tẽ mũ, he mũ,

²¹ jagně tũ to én tĩ, he mũ, kronkron tĩ, he mũ, krĩn tũ, he mũ, vėnh jykre pãno han tĩ tỹ hėn ri ke ke gé. Tag to sóg ājag jyvėn huri, hã ra sóg tó mãn sór mũ. Ũ tỹ tag han mũ ag pi(jé) Topě tỹ tỹ ěg pã'i nĩ venh ke mũ'.

²² Topě kuprĩg tỹ ěg kanhrãn mũ vỹ tag ri ke tũ nĩ. Há kar ti nĩ. Ti tỹ ěg kanhrãn to ken hã vė, hã vỹ: jagně to há, he mũ, mỹ sér tĩ, he mũ, krĩ kuprã, he mũ, jagně to fe há nỹtĩ, he mũ, koměr hã vĩ, he mũ, jagně jagãgtãn tĩ, he mũ, jagně mỹ ón vãnh, he mũ,

²³ vėsỹ ũn mág han sór tũ, he mũ, vėso jykrén tĩ, he mũ. Topě pi(jé) tag kato tẽ tĩ', ti tỹ vãsỹ ěg jyvėn ti vỹ tag ri ke ja nĩgtĩ gé.

²⁴ Ěg tỹ tỹ Jesus Cristo tũ nỹtĩn kỹ, kỹ ěg tóg tỹ ti tỹ ka to sa ja ěn ri ke nỹtĩ. Hã kỹ ěg tóg ěg tỹ nén to én mũ ěn han mãn sór ke tũ nĩ ha sir, ěg tỹ nén ki vė'ĩ mũ ěn han mãn sór ke tũ ěg nĩ ha.

²⁵ Ěg tỹ Topě kuprĩg tỹ jagrě nỹtĩn kỹ, kỹ ěg tóg ti tỹ ěg mỹ nén tó mũ ěn han kãn ke mũ sir, ti kuprĩg tỹ ěg mỹ nén tó mũ ěn ti.

²⁶ Kỹ ěg tóg sir tỹ ũn mág nỹtĩ sór ke tũ nĩ, jagně jũ han mãn sór ke tũ ěg nĩ, jagně tũ mãn sór ke tũ ěg nĩ gé. Vėnh jykre há hã han jé ěg tóg ke mũ.

6

Ěg tỹ jagně jagãgtãn ke

¹ Inh kanhkã', kejėn ājag kãmĩ ũ tóg kygněg tĩ, vėnh vatánh tá. Kỹ ũ tỹ kygněg mũ

ėn mỹ: "kygně ā mỹr," hemnĩ, ājag tỹ Topě kuprĩg tỹ jagrě nỹtĩn kỹ. Koměr hã ti mỹ tómnĩ, ti tỹ kygněg mũ ěn ti. Kỹ vėso jykrén há han nĩ gé, ājag tỹ ti tỹ kygně ěn ri ke han tũ nĩ jé, ti kóm.

² Jagně ajudar hemnĩ, ājag mré ke ũ tỹ jagtar nĩn kỹ. Cristo tỹ ěg jyvėn mũn hã vė.

³ Kejėn ũ tóg vėsóg ki vėsỹ ũn mág han sór tĩ. Hã ra tóg tỹ nén ũ tũ nĩ. Kygněg ti tĩ, ũ tỹ tag to jykrén mũ ti. Vėnh hã mỹ tóg ón mũ sir.

⁴ Ājag jykre tugnỹm nĩ. Ti há nĩn kỹ tóg há tĩ, kỹ tóg tỹ ũn há nĩ, ũ tỹ vėnh jykre há han mũ ěn ti. Jagně mỹ: inh jykre há vỹ ā jykre há kãfór nĩ, he tũg nĩ.

⁵ Topě hã ne ěg ki ěg jykre há ěn vėg tĩ', kar kỹ tóg ěg mré ke ag jykre ki kanhró nĩ gé, Topě ti.

⁶ Kejėn ũ tóg ājag mỹ Topě vĩ kãmén mũ. Ti mỹ ājag tỹ nén ũ nĩmnĩ, ti tỹ ājag mỹ kãmén mũ kaja ti.

⁷ Kygně tũg nĩ, ěg tỹ Topě to é he kỹn pi(jé) há nĩ'. Ěg tỹ ón kỹ: vėnh jykre há kãgmĩ kỹ inh nĩ ha, hen kỹ tóg ěg kren han ke tũ nĩ. Topě vỹ ěg jykre ki kanhró nĩ.

⁸ Ge ti nĩgtĩ, ěg tỹ nén han mũn ti. Ěg tỹ ěg tỹ nén to én mũ ěn han kỹ ěg tóg ter ke mũ sir. Kỹ tog ěg tỹ mandioca ko vãnh krãn kỹ ti nin ko kỹ ti tỹ ěg tén ěn ri ke nĩ sir. Ěg tỹ Topě kuprĩg tỹ ěg mỹ nén tó mũ ěn han kỹ ěg tóg rĩr krỹg ja tũ ěn venh ke mũ, kỹ tóg ěg jakrě tỹ

kanēn há han kǵ ěg tǵ ko ěn ri ke nǵ sir.

⁹ Hǵ kǵ nén ũ há han to krónh ke tǵg nǵ. Ve jé ěg tóg ke mũ, ti kanē há ěn ti, Topē tǵ ěg mǵ nén ũ há han ke ti, ěg tǵ Topē jykre há tovǵnh tǵ nǵn kǵ.

¹⁰ Hǵ kǵ ěg tóg vĕnh kar jagǵgtǵn ke mũ. Kǵ tóg há tǵvǵ nǵ, ěg tǵ ěg mré Jesus ki ge kǵ nǵtǵ ag jagǵgtǵn ti.

Paulo tǵ ag jyvĕn mǵn

¹¹ Ha vé, rá mág han sóg tǵ, sǵ vĕsóg ki ājag mǵ rán kǵ.

¹² Ũ ag tóg ājag kutǵn tǵ, ājag tǵ ājag gré junun fǵr kym jé. Ag tǵ vĕnh mǵ nén ũ há han sór vĕ, ha mĕ. Judeu ag tóg ěg vóg kónǵn tǵ, ěg tǵ fóg ag mǵ: “ājag gré junun fǵr kym nǵ,” he tǵ to. Ũ tǵ ājag kutǵn mũ ag vǵ Judeu tǵ ag vóg kónǵn ěn ve sór tǵ nǵ. Cristo tǵ cruz to sa ja ra ag vĕsǵrĕnh sór tǵ nǵ, hǵ kǵ ag tóg ājag mǵ: “ha ājag fǵr kym nǵ,” he mũ. Ag vǵ jĕmĕ tǵg nǵ.

¹³ Ha vé, ag tǵ ājag gré junun fǵr kym ja ra ag tóg Topē tǵ vǵsǵ ěg jyvĕn tǵ ěn han kǵn ja tǵ nǵgtǵ. Hǵ ra ag tóg ājag mǵ ājag tǵ vĕnh kym ke ti tó mũ, ag tǵ vĕnh kar mǵ ājag tǵ nén han mũ tó jé sir. Tag ki ag tóg tǵ ũn mág nǵtǵ sór mũ, vĕsóg ki.

¹⁴ Ag jāvo sóg tǵ ũn mág nǵ sór tǵ nǵ. Nén pir tóg inh mǵ sér tǵ, hǵ vǵ: ěg pǵ'i tǵ Jesus Cristo tǵ cruz to sa ja ěn, he mũ. Kǵ ěprǵ ke jykre inh mǵ tǵ tǵ ha. Jesus tǵ cruz to sa kǵ tóg inh mǵ tǵ tǵ' he ja nǵ, ěprǵ ke jykre tǵ, Jesus ti. Kǵ

sóg han sór tǵ nǵ ha. Jāvo sóg cruz to sa ri ke han kǵ nǵ gé, ěprǵ ke jykre mǵ sóg hur tǵg. Sǵ han tǵ to ken hǵ vĕ.

¹⁵ Ũ ag tóg ājag fǵr kym tǵ, jāvo ũ ag tóg kym tǵ nǵ gé. Hǵ ra tóg tǵ nén ũ tǵ nǵ gé. Topē mǵ ěg há nǵtǵ, ěg tǵ ti ki ge kǵ nǵtǵn kǵ. Topē vǵ ěg han mǵn, kǵ ěg tóg tǵ ũn tǵg nǵtǵ ha. Tag hǵ ne há nǵ'.

¹⁶ Ũ tǵ vĕnh jykre tǵg tag han mũ ag krǵ kuprǵg ti tǵ, Topē ti, ũ tǵ ge jagǵgtǵn ti tǵ. Topē tǵ ag hǵ vĕ ha. Israel pĕ ag hǵ vĕ sir.

¹⁷ Kǵ inh kutǵn mǵn tǵg nǵ, inh vĕsǵrĕnh han mǵn tǵg nǵ. Jesus vĕsǵrĕnh ja ěn ri ke han inh mǵr, hǵ kǵ sóg ti ri kén kygven kǵ nǵ ha.

¹⁸ Inh kanhkǵ', ěg pǵ'i tǵ Jesus Cristo jé ājag tar han, ti jé ājag krǵ kuprǵg. Hǵ vĕ.

PAULO Tÿ CARTA HAN: ÉFESO TÁ KE AG Mÿ CARTA

1 Paulo tÿ rá vĕ. Isÿ cidade tÿ Éfeso tá ke ag mÿ rán hã vĕ. Jesus Cristo vÿ inh fĕg', sÿ tÿ ti apóstolo jĕ jé, Topĕ tÿ isÿ apóstolo han kÿ. Hã kÿ sóg ājag mÿ carta tag rán mÿ. Topĕ tÿ vÿ tÿ ājag nÿtĭ, kÿ ājag tóg cidade tÿ Éfeso tá Jesus to vĕnhmãn tĭ. Jesus Cristo tovãnh tÿ ājag tóg nÿtĭ.

2 Ēg jóg tÿ Topĕ jé ājag tar han, ti jé ājag krĭ kuprĕg, Ēg Senhor tÿ Jesus Cristo ti ke gé.

Cristo tÿ Ēg mÿ vĭ há han mÿ

3 Ēg kar jé Topĕ mÿ vĭ há han, Ēg jé ti mÿ agradecer hé, Ēg Senhor tÿ Jesus Cristo panh mÿ. Ēg tÿ Cristo ki ge kÿ nÿtĭnh kÿ tóg Ēg mÿ kanhkã ti ven sór mÿ, Topĕ ti. Tá tóg Ēg mÿ nĕn (ũ) há kar ven sór mÿ gé, kÿ nĕn ũ tóg Ēg mÿ tÿ' hĕnh ke tÿ pĕ nĭ, tá. Hã jé tóg Ēg mÿ ā kuprĭg jĕnĕ, Ēg tÿ ti tigrĭn nĕn (ũ) há kar ve jé.

4 Vãsÿ tóg Ēg kuprĕg ja nĭ, ā tÿ nĕn (ũ) kar han ke to hã tóg Ēg kuprĕg ja nĭ, Topĕ ti, Ēg tÿ tÿ ti tÿ nÿtĭ jé, Cristo tigrĭn. Ēg tÿ ti ri ke nÿtĭ jé tóg Ēg kuprĕg, Ēg tÿ kygnĕg tÿ nĭ jé. Ti fe vÿ tÿ Ēg nÿtĭ.

5 Hã kÿ tóg Ēg kuprĕg, Ēg tÿ tÿ ti krĕ nÿtĭ jé, Jesus Cristo tigrĭn. Ti hã ne vĕsóg ki Ēg kuprĕg ke to jykrĕn ja nĭgtĭ'.

6 Ēg tÿ ti mÿ vĭ há han jé tóg Ēg kuprĕg. Ũn mág vÿ tÿ ti nĭ, Ēg jagãgtãn tóg tĭ, hã kÿ tóg há tĭnh mÿ, Ēg tÿ ti mÿ agradecer hĕnh kÿ. Ti kósĭn pir tigrĭn Ēg tóg tÿ ti fe pĕ nÿtĭ.

7 Ti hã ne Ēg kren han tĭ', ti kyvĕnh tÿ Ēg jagfy kãkutĕ ja nĭnh kÿ. Tÿ tóg Ēg tÿ Topĕ vĭ mranh ja ĕn tÿ tÿ' he ja nĭgtĭ, ā kyvĕnh tÿ. Topĕ tÿ Ēg mÿ nĕn ũ há han hã vĕ.

8 Hã ra tóg tÿ' hĕnh ke tÿ nĭ, ti tÿ Ēg mÿ nĕn nĭm ja tag tĭ. Krĭ há ti nĭ, nĕn kar to jykrĕn há han ti tĭ, Topĕ ti.

9 Vãsÿ tóg to jykrĕn ja nĭgtĭ, kÿ tóg ũri Ēg mÿ tó mÿ sir, ti tÿ Cristo tigrĭn nĕn han sór mÿ ti.

10 Cristo tÿ tóg ũn mág han sór mÿ, vĕnh kar kri ke, kanhkã tãn ag kri ke, ga kri mÿ ag kri ke gé, kÿ vĕnh kar vÿ tÿ ti krĕm ke nÿtĭnh mÿ. Povo pir ri ke ag nÿtĭnh mÿ, kurã ĕn kã. Ti kurã ki tóg ti tÿ ũn mág han sór mÿ ha, Topĕ ti.

11 Ēg tÿ Cristo ki ge kÿ nÿtĭ kÿ Ēg tóg venh ke mÿ gé, Topĕ tÿ ā tÿ ag mÿ nĕn ven ke mÿ ĕn ti. Ēg tÿ ĕn ve jé Topĕ tóg Ēg kuprĕg ja nĭ, ti tÿ Ēg kuprĕg to jykrĕn kÿ. Nĕn kar to tóg jykrĕn há han tĭ, vĕsóg ki, kÿ tóg Ēg kuprĕg to jykrĕn ja nĭ gé,

12 Ēg tÿ Jesus hã pin kÿ ti ki ĕvãnh jé. Ēg tÿ ti ki ĕvãnh kar kÿ Ēg tóg vãhã Topĕ mÿ vĭ há han ki kanhró nÿtĭ. Ti hã ki ĕvãnh kÿ Ēg tóg Topĕ to: “ũn mág vÿ tÿ ti nĭ,” he' he tĭ sir.

13 Ti kãme mĕ ja ājag tóg

nĩgtĩ gé, vėnh vĩ há ěn, ti tỹ ěg krenkren han sór mũ káme. Ti káme ěn mẽ kỹ ājag tóg ti ki ge jėg. Kỹ Topě tóg ājag mũ ā kuprĩg jėnė. Tỹ tóg ājag jagrėn há han. Ti tỹ ājag nĩgiėg hã vė, ā kuprĩg tỹ.

14 Ěg jagrė tugrĩn ěg tóg ki kanhró nỹtĩ, ti tỹ ěg mũ ā tỹ ěg mũ nén tó ja ěn ven kãn ke ti. Kejėn ěg tóg venh ke mũ, ha vemnĩ, ěg tỹ tỹ ti tũ nỹtĩn kỹ, kỹ tóg ěg mũ sér tĩnh mũ. Kỹ ěg tóg ti mũ vĩ há han ke mũ, ti tỹ tỹ ũn mág jėn kỹ.

Paulo tỹ Topě mré vĩ mũ

15 Ājag tỹ ěg Senhor tỹ Jesus ki ge mẽ kỹ inh nĩ, ājag tỹ jagnė to há nỹtĩ ti ke gé, ājag tỹ ũ tỹ Jesus ki ge kỹ nỹtĩ ag kar to há nỹtĩ ti.

16 Hã kỹ sóg ājag to Topě mũ: “há ti nĩ,” he tĩ. Ajag to ti mré vėmėn to krónh ke vãnh inh nĩgtĩ.

17 Ěg Senhor tỹ Jesus Cristo panh mré sóg vėmėn tĩ, ěg jóg mré, ũn mág pė ěn mré. Tĩ mré vėmėn kỹ sóg ti mũ: “ā kuprĩg tỹ ag krĩn nĩ,” he tĩ, “ā kuprĩg tỹ ag mũ vėnh kámėn há han nĩ, ag tỹ ā ki kanhrãn há han jé,” he sóg tĩ.

18 “Ha ag mũ krĩ há nĩm. Ha ag kanė tar han, ag tỹ ve há han jé. Ag kuprėg ja ā tóg nĩ, ā tỹ ag mũ nĩm jé, ā tỹ nén tó ja ěn ti. Ag tỹ tỹ ā tũ nỹtĩn kỹ ā tóg ag mũ ā tũ vin ke mũ, ā tỹ nén tó mũ ěn ti, hã ra tóg e tãvĩ nỹtĩ, ā tỹ ag mũ nén vin ke mũ ěn ti.

19 Tar tãvĩ ā tóg nĩ gé, kỹ ā tóg ag mũ nén kar há han tĩ tag ki, tá ke gé, ag tỹ ā ki ge kỹ

nỹtĩn kỹ. Ag mũ tag kámėn nĩ,” he sóg tĩ, Topě mũ.

20 Ti tar tãvĩ nĩn kỹ tóg Cristo ter kar kỹ ti rĩn mãn ja nĩgtĩ gé. Kỹ tóg ti mũ: “ha inh pėgja tá nĩ,” he ja nĩ gé, kanhkã tá.

21 Ti tỹ tóg pã'i mág han, kỹ tóg tỹ pã'i kar ag kri ke jė, kanhkã tãn kar ag kri ke, ěg tỹ ũn vėg tũ kar ag kri ke, ũn tar ag, ũn mág ag. Tỹ tóg ag kri ke kar jė, Cristo ti, kỹ ti jiji vỹ vėnh kar ag jygji kãfór nĩ gé, ěg tỹ ũri ũn tó mũ ag jygjy, ěg tỹ kar kỹ ũn tónh ke ag jygji mré hã.

22 Kỹ Topě tóg ti krėm vėnh kar vin kãn. Kỹ tóg tỹ vėnh kar kri ke jė sir, Cristo ti. Kỹ tóg tỹ ěg kri jė nĩ sir, ěg tỹ tỹ ti tũ nỹtĩn kỹ.

23 Jãvo ěg tóg ti há ri ke nỹtĩ gé sir, kỹ ěg tóg tỹ ũn pir nỹtĩ jagnė mré, Jesus ti mré ke gé. Ěg há vỹ ā pir mũ tỹ nén ũ tũ nĩ. Ěg krĩ mré tóg tỹ nén ũ pir nĩ, ěg há ti. Ri ke ti nĩ, ěg tỹ Jesus mré tỹ ũn pir nỹtĩ ti. Tĩ hã vỹ nén kar rĩr han tĩ, Jesus ti.

2

Ti ki ge kỹ ěg rĩnrĩr nỹtĩ

1 Vãsỹ ājag tóg nũgme ki vár ke mũ vė, ājag tỹ ti vĩ ki króm ja tũ nĩn kỹ, ājag tỹ ti vĩ mranh ja nĩn kỹ.

2 Ěn kã ājag tóg ěprã ke ag jykre pãno jagma mũ ja nĩgtĩ, Nėn-Kórėg pã'i mág ěn tỹ ājag krĩn kỹ, ũ tỹ nén ũ ũ tãn ag kri pã'i ěn tỹ ājag krĩn kỹ. Tỹ ti krĩg tãn ag kri pã'i nĩ gé. Ěn

vỹ tỹ ù tỹ Topê vĩ mranh tĩ ag jagrê nĩ mỹr.

³ Vāsỹ ãg tóg tỹ ti tũ nỹtĩ ja nĩgtĩ gé, ti krê ag ri ke. Ên kã ãg tóg ãg tỹ nén to én mũ ên han ja nĩgtĩ, ãg tỹ nén to jykrén mũ kar ên ti. Kỹ Topê tóg ãg vóg kónãn mũ vê, ti tỹ ag vóg kónãn ke ên ri ke.

⁴ Hã ra Topê tóg ãg jagãgtãn pẽ han. ãg to tóg há tãvĩ nĩ, kỹ ãg tóg tỹ ti fe nỹtĩ.

⁵ ãg tỹ ti vĩ mranh ja nĩn kỹ ãg tóg vêsêr ri ke nỹtĩ ja nĩgtĩ, hã ra tóg ãg rĩnrĩn mũn ja nĩgtĩ, Cristo mré. Ti tỹ ãg jagãgtãn kỹ tóg ãg krenkren han ja nĩgtĩ.

⁶ Cristo mré tóg ãg rĩnrĩn mũn ja nĩgtĩ gé. Kanhkã tá tóg ãg tỹ ùn mág han ke mũ, Jesus Cristo mré hã.

⁷ Tag ve kỹ vênh kar vĩ ki kanhró nỹtĩnh mũ, Topê tỹ Jesus Cristo tugrĩn ãg to há tãvĩ nĩn ki. Hã jé tóg ãg mỹ nén ù há ên ven ke mũ. Tũ' he jãvãnh ti nĩ, ti tỹ ãg mỹ nén ven ke ti. Ti tỹ Jesus Cristo to há nĩn kỹ tóg ãg mỹ nén ù há kar ven ke mũ.

⁸ Ha vé, ti tỹ ãg jagãgtãn kỹ tóg ãg kren han ja nĩgtĩ, ãg tỹ ti ki ge kỹ nỹtĩn kỹ. ãg tỹ vêsóg ki vênh kren han pijé'. Topê tỹ ãg kren han ja vê mỹr. Kỹ tóg ti tỹ ãg mỹ presente han ri ke nĩ.

⁹ ãg vãsãn pijé'. ãg tỹ ãg vãsãn to kren tĩ ra ãg Topê mỹ: "há inh nĩ, vãsãn ja inh nĩ, hã kỹ sóg kren mũ," henh mũ vê. Hã ra ãg pi(jé) ãg vãsãn to kren ke mũ'. Ti tỹ ãg jagãgtãn vê mỹr.

¹⁰ Ti hã ne ãg han mũn ja nĩgtĩ'. Jesus Cristo tỹ tóg ãg han ja nĩgtĩ, ãg tỹ vênh jykre há han jé. Topê vĩ ãg mỹ vênh jykre há tag nĩn kãn, ãg tỹ vênh jykre tag jagma mũ jé.

ãg tỹ Cristo mré tỹ ùn pir nỹtĩ

¹¹ ãjag tỹ vãsỹ nén han tĩ ja ên mũ êkré. Fóg vĩ tỹ ãjag nỹtĩ, Judeu ag tỹ ù to: "ùn gré junun fár kym ja tũ ag," he mũ ên ag vĩ tỹ ãjag nỹtĩ. Jãvo Judeu ag vĩ ãjag gré junun fár kym tĩ. Hã ra ãg fár vĩ tỹ êprã ke nĩ.

¹² ù tỹ kym tĩ ag jãvo ãjag tóg vãsỹ Cristo ki kagtĩg ja nỹtĩgtĩ, kỹ ãjag pi(jé) tỹ Israel ag mré ke nỹtĩ ja nĩgtĩ', vãsỹ. Topê tỹ Israel jóg'jóg ve ag mré nén ù to jykrén mũ ên ki kagtĩg ja ãjag tóg nỹtĩ gé, Topê ki kagtĩg ja ãjag tóg nỹtĩgtĩ gé, kỹ ãjag tóg Topê tỹ ãg mỹ nén ven ke mũ tag ki kagtĩg ja nỹtĩgtĩ gé.

¹³ Ên kã tóg ãjag mỹ kuvar gy nĩ ja nĩgtĩ, Topê ti. ùri tóg ãjag mỹ kakó nĩ ha, Topê ti, ãjag tỹ Jesus Cristo ki ge kỹ nỹtĩn kỹ. Ti tỹ ãg jagfy ã kyvênh kujên ja tugrĩn tóg ãjag mỹ kakó nĩ ha.

¹⁴ ùri ãg tóg tỹ povo pir ri ke nỹtĩ, Judeu ag, fóg ag, kanhgág ag. Topê hã ne ãg tỹ jagnê to há nỹtĩ tag han'. Jagnê fyn kỹ ãg tóg nỹtĩ ja nĩgtĩ, hã ra tóg vãfynyn ên kókén, Jesus ter kỹ. ãg tỹ tóg povo pir ri ke han, ãg tỹ jagnê kato vãsãn mũn tũ nĩ jé.

¹⁵ Topê tỹ vãsỹ Judeu ag jyvên tĩ ên tỹ tũ' he ja tóg nĩgtĩ,

ti tỹ ag jyvẽn kar ẽn tỹ. Ā ter tigrĩn tóg tỹ tũ' he ja nĩgtĩ, ti tỹ ẽg mỹ ũ tãg nĩm jé sir. Nén ũ régre tỹ tóg ũn pir han ja nĩgtĩ, ũ tãg, ẽg tỹ jagnẽ kato vãsãn mãn tũ nĩ jé. Topẽ tỹ nén to jykrén mũn hã vẽ. Cristo tigrĩn tóg ẽg tỹ ũn pir han, ẽg tỹ tỹ vẽnh kanhkã pir nỹtĩ jé.

¹⁶ Cristo vỹ Ā ter kỹ Topẽ tỹ ẽg kar to há nĩ han, Judeu mré Judeu tũ ag to. Ti tỹ cruz to sa kỹ tóg Topẽ tỹ ẽg kato tẽ ẽn tỹ tũ' he kãn ja nĩgtĩ.

¹⁷ Jesus tỹ nén han jan hã vẽ. Kỹ tóg Topẽ tỹ ẽg to há nĩ tag tó ja nĩ, ājag mỹ, ājag tỹ tỹ Judeu tũ ra, ẽg mỹ ke gé, ẽg tỹ tỹ Judeu nỹtĩn mỹ.

¹⁸ Ti tigrĩn ẽg tóg ẽg jóg tỹ Topẽ mré vēmén tĩ ha, ājag, ājag tỹ tỹ Judeu tũ ra, ẽg ke gé, ẽg tỹ tỹ Judeu nỹtĩ ag ke gé. Ti kuprĩg vỹ tỹ ũn pir nĩ, hã tỹ ẽg kar tóg ti mré vēmén tĩ.

¹⁹ Hã kỹ ājag kórég tũ nỹtĩ ha. Ājag pi(jé) tỹ ẽmã ũ tá ke nỹtĩ ha', ti mỹ, ājag tỹ tỹ fóg nỹtĩ ra, ājag tỹ tỹ kanhgág nỹtĩ ra ke gé. Ēg mré ke vỹ tỹ ājag nỹtĩ ha, Topẽ tũ vỹ tỹ ājag nỹtĩ ha. Topẽ krẽ vỹ tỹ ājag nỹtĩ ha.

²⁰ Topẽ jo ĩn ri ke vỹ tỹ ẽg nỹtĩ. Tĩ nũna runrur ri ke vỹ tỹ apóstolo nỹtĩ, Topẽ ví tó tĩ ag mré. Tĩ nũna téj ri ke vỹ tỹ Jesus Cristo nĩ. Tĩ kuge ri ke vỹ tỹ ājag nỹtĩ, ẽg mré.

²¹ ĩn nũna tigrĩn ĩn tóg jẽ nĩ, kỹ tóg komẽr hã kar kỹ jẽn h mũ. Ti kar kỹ jẽ kỹ tóg tỹ ẽg Senhor tũ jẽ sir.

²² Cristo vỹ komẽr hã ti han mũ, ĩn kar ri ke ti, hã vỹ: ẽg, he mũ. Kỹ Topẽ kuprĩg vỹ krẽm

ẽmãn nĩ, ẽg kãkã. Ũ tỹ Jesus ki ge mũ ag to ken hã vẽ.

3

Paulo tỹ fóg mré kanhgág ag mỹ Jesus kãmén

¹ Hã kỹ sóg Topẽ mré ví tĩ, inh, hã vỹ: Paulo, he mũ. Se kỹ inh jé, Jesus Cristo tigrĩn. Isỹ ājag to há jẽn kỹ sóg se kỹ jẽ, isỹ ũ tỹ Judeu jykre han tũ kar ag to há jẽn kỹ.

² Ājag hỹn tóg Topẽ tỹ isar han, mũ ẽn mẽ. Isỹ ājag ki rĩr jé tóg isar han, isỹ ũ tỹ Judeu jykre han tũ ag ki rĩr jé.

³ Topẽ ne inh mỹ Ā tỹ vãsỹ nén to jykrén mũ ẽn tó', hã ra ẽg tóg ki kagtĩg ja nỹtĩgtĩ. Vãhã tóg inh mỹ tó mũ ha', hã kỹ sóg ājag mỹ kãmén sĩ han huri, Topẽ tỹ nén ũ tãg to jykrén mũ ẽn ti.

⁴ Ājag tỹ inh vẽnh rán tag ve kỹ ājag tóg venh ke mũ sir, inh jykre ti. Cristo vỹ nén ũ tãg han jé kãtĩg ja nĩ, ẽn ki kanhró sóg nĩ.

⁵ Ti tỹ inh mỹ tag tó to hã ag tóg ki kagtĩg ja nỹtĩgtĩ, ẽg jóg'jóg ag, ẽprã ke kar ag. Ũri tóg ẽg mỹ tó mũ, Topẽ ti, Ā kuprĩg tỹ. Apóstolo ag mỹ tóg tó mũ ha, ũri, ti tũ ag mỹ, ẽg jyvẽn tĩ ag mỹ ke gé.

⁶ Ti tỹ ẽg mỹ nén ũ tãg tó mũn hã vẽ, ha mẽ. Vãsỹ Topẽ tóg Judeu ag hã mỹ ví há han ja nĩ. Ũri tóg fóg ag mỹ, kanhgág ag mỹ ví há han mũ ha, Judeu ag mré. Ēg kar vỹ tỹ Jesus Cristo há ri ke nỹtĩ ha, ẽg tỹ ti ki ge kỹ nỹtĩn kỹ. Topẽ tỹ Judeu ag mỹ nén tó mũ ẽn, ẽg tỹ Jesus Cristo tigrĩn nén

venh ke mũ ãn ve kãn jé ag tóg ke mũ gé, ãg mré, fóg ag, kanhgág ag. Ủ tỹ Jesus ki ge kỹ nỹtĩ ag hã vỹ venh ke mũ.

7 Tag to Topẽ tóg inh mỹ: “ha fóg kar ag mỹ, kanhgág kar ag mỹ tónh tũg,” he ja nĩgtĩ, kỹ tóg tag to isar han. Ti tar nĩn kỹ tóg isar han, inh rãnhrãj to.

8 Topẽ tũ kãsir ag kar jakrẽm inh nĩ, hã ra tóg isar han, sỹ fóg ag mỹ, kanhgág ag mỹ Cristo kãmén jé. Cristo tũgrĩn tóg ãg mỹ nén (ũ) há tãvĩ han ke mũ, Topẽ ti. Hã tóg tĩ, vẽn h kar mỹ.

9 Vẽn h kar mỹ sóg kãmén tĩ, Topẽ tỹ nén han ke ti, ti tỹ ã tỹ vãsỹ nén to jykrén mũ tag han ke ti. Vãsỹ tóg to: “tag han jé sóg ke mũ,” he ja nĩgtĩ. Ti tỹ nén kar han tũg ki tóg to jykrén ja nĩgtĩ. Ti hã ne nén kar han'. Kỹ tóg, ã tỹ ãn han ke to jykrén mũ ra tóg ã mỹ tóg ja tũ nĩ ver.

10 Ủri tóg ve há tĩ ha, ti tỹ vãsỹ nén to jykrén mũ ãn ti. Kanhkã tãn ag mỹ tóg ve há tĩ ha, tá pã'i ag mỹ, Topẽ krĩ há tag vỹ ve há tĩ ha, ti jykre há pẽ ãn ti. Ag tỹ ã tỹ Jesus ki ge kỹ nỹtĩ ag ve kỹ ag tóg Topẽ jykre ki kanhró nỹtĩ, kanhkã tãn ag.

11 Vãsỹ tóg to jykrén, Topẽ ti, ti tỹ ãg pã'i tỹ Jesus Cristo tũgrĩn nén (ũ) han sór mũ ãn ti.

12 Ti hã ki ãg ge kỹ nỹtĩ, hã kỹ ãg tóg jatun mỹ Topẽ mré vẽnén tĩ ha. ãg kanẽ jun mãn ke tũ ti nĩ ha, Topẽ ti.

13 Hã kỹ sóg ãjag mỹ: “sỹ ãjag jagfy jagtar nĩ tag to jykrén tũg nĩ,” he mũ. Inh jagtar mĩ ãkrén kỹ Jesus to krónh ke sór tũg nĩ gé. ãjag jagfy ke vẽn, isỹ nén vэг mũ tag. Inh jagtar tag tũgrĩn ãjag tóg nén ã há venh ke mũ, ha vemnĩ.

Cristo tỹ ãg to há nĩ

14 Hã jé sóg Topẽ mré vẽnén tĩ. ãg jóg vẽn mỹr.

15 Ti tũgrĩn ãg tóg rĩnrĩr nỹtĩ, ãprã ke kar, kanhkã tá ke kar ke gé, kỹ tóg ãg ki rĩr tũgtĩ.

16 Kỹ sóg ti hã mỹ to vĩ tĩ, ti tỹ ã jykre tỹ ãjag tỹ tar' he jé, ti kuprĩg tỹ. Nén ã kar vỹ tỹ ti tũ nỹtĩ, tar ti jẽ gé, hã kỹ sóg ti hã mỹ to vĩ tĩ,

17 ti tỹ Cristo tỹ ãjag ki ãmã han jé, ãjag tỹ ti ki ge nỹtĩn kỹ. Ti tỹ ãg to há nĩ vỹ tỹ ga ri ke nĩ, ãg tỹ ti ki jãrén jé, ka jãrén ri ke. Kỹ ãg tóg ti to tar nỹtĩ sir. Hã jé sóg ti mỹ ãjag tóg tĩ gé.

18 Topẽ tỹ ãg kren han mũ vỹ ãg tỹ nén ve vãn h ri ke nĩ, ge ve ja tũ ãg nĩgtĩ. Kỹ sóg Topẽ mré vẽnén tĩ, ti tỹ ãjag mỹ tag kãmén kãn jé, ti tũ kar ag mỹ ke gé. Nén (ũ) tég gy ri ke ti nĩ, nén (ũ) tãpér mág ri ke, kãgnó tég gy ri ke ti nĩ, nén (ũ) krỹg ja tũ ri ke ti nĩ, Topẽ tỹ ãg kren han mũ tĩ. Hã kỹ ãg tóg vẽn sóg ki to jykrén kãn ke tũ nĩ.

19 Cristo vỹ ãg to há tãvĩ nĩ, tag to jykrén kãn ke tũ ãg tóg nĩ gé. Kỹ sóg Topẽ mỹ: “ha ag mỹ tag kãmén,” he tĩ, ãjag tỹ ti hã tỹ krĩn kỹ nỹtĩ jé.

20 Ha vé, Topẽ hã ne tar tãvĩ nĩ'. Hã kỹ tóg ãg tỹ ti mỹ nén (ũ) to vĩn kỹ (tóg) ãg tỹ ti mỹ

nén (ũ) to vĩ mũ ẽn kãfór han ki kanhró nĩ. Kĩ tóg ẽg tỹ nén (ũ) to jykrén mũ kãfór han ki kanhró nĩ gé.

²¹ Kĩ ẽg tóg ti hã mỹ vĩ há han ke mũ, ẽg tỹ ti ki ge kỹ nỹtĩn kỹ, ẽg tỹ Jesus Cristo ki ge kỹ nỹtĩn kỹ. Ẽg tỹ ti mỹ vĩ há han vĩ tũ' henh ke tũ nĩ. Hã vễ.

4

Ẽg tỹ Cristo mré tỹ ùn pir nỹtĩ

¹ Kĩ sóg ăjag jyvẽn sór mũ ha. Se kỹ inh jé nĩ, ẽg Senhor tugrĩn, kỹ sóg ăjag jyvẽn sór mũ. Mũ há han sórmnĩ. Topẽ vĩ ăjag kuprẽg, kỹ ăjag tỹ vễnh jykre há han ke hã to vãsãn nĩ.

² Ăjag régre to: “ti kãfór vĩ tỹ inh nĩ,” he sór tũg nĩ. Jagnẽ mỹ komẽr hã vĩmnĩ. Jagnẽ to fe nỹtĩmnĩ. Jagnẽ to há nỹtĩmnĩ. Jagnẽ ajudar hemnĩ.

³ Topẽ kuprĩg vĩ tỹ ùn pir nĩ, kỹ tóg ăjag mỹ vễnh jykre pir nĩm tĩ. Vãsãn nĩ, ăjag tỹ vễnh jykre pir ẽn hã han jé, ăjag tỹ krĩ kuprã nỹtĩn jé.

⁴ Topẽ kuprĩg pir ẽn vĩ tỹ ẽg kar jagrẽ nĩ, kỹ ẽg kar vĩ tỹ Cristo há ri ke nỹtĩ, jãvo tóg tỹ ẽg krĩ ri ke nĩ, Cristo ti. Ẽg kar mỹ ti nén ù há han ke mũ, jagnẽ ri ke, ti tỹ ẽg kuprẽg kỹ.

⁵ Kỹ ẽg Senhor vĩ tỹ ùn pir nĩ gé. Ẽg kar vĩ ti ki ge kỹ nỹtĩ. Ti jiji hã tỹ ẽg kygpe kỹ nỹtĩ gé.

⁶ Ẽg jóg tỹ Topẽ vĩ tỹ ùn pir nĩ gé, ẽg kar jóg ti. Ti hã ne tỹ vễnh kar krĩg mỹ ke nĩ'. Ẽg kar tỹ tóg ă tỹ ùn han sór mũ ẽn han tĩ, kỹ tóg ẽg kãkã nĩ gé, ẽg jóg ti.

⁷ Cristo vĩ ẽg tar han tĩ gé, ẽg kar, ti rãnrãj to. Û mỹ tóg vễnh rãnrãj ù nĩm', nĩm' he tĩ.

⁸ Hã kỹ tag tóg rán kỹ nĩ, ha mễ: “ti tỹ kanhkã ra tãpry kỹ tóg ùn sigse kỹ nỹtĩ ẽn ag tatĩn vyr. Kỹ tóg ẽprã ke ag tar han mũ gé, ag tỹ ti rãnrãj han ke to,” he ja tóg nĩgtĩ, Tope vĩ rán ki.

⁹ Ha vé, ti tãpry kỹ tóg ă tỹ kanhkã ra tĩg ke to hã tóg tẻre ja nĩ gé, ẽprã.

¹⁰ Ûn tẻre mũ ẽn vĩ tãpry mãn ja nĩ gé, kỹ tóg kanhkã pătén kỹ tĩ mũ sir. Kanhkã pătén kỹ tóg kanhkã kri nĩ nĩ sir. Kanhkã kri nĩn kỹ tóg nén (ũ) kar ki kanhró nĩ sir, ti tỹ ẽmã kar vẻg nĩn kỹ.

¹¹ Ti hã ne ă rãnrãj kar to ẽg tar han tĩ'. Û ag vin kỹ tóg ag tỹ apóstolo hyn han. Û tỹ tóg ti tỹ ẽg jyvẽn tĩ nĩnh ke han. Û mỹ tóg: “ũ tỹ inh vĩ mẽ ja tũ ag mỹ inh vĩ tónh tĩg nĩ,” he mũ. Û tỹ tóg igreja krẽm pã'i han, ù mỹ tóg: “ũ tỹ igreja krẽm vễnh mãn tĩ ag mỹ inh vĩ kãmén nĩ,” he mũ gé.

¹² Tag to tóg ẽg tar han tĩ, ẽg tỹ jagnẽ tar han jé sir, ti rãnrãj to, ẽg tỹ tỹ ti jãvy nỹtĩn kỹ, ti ve fag ke gé. Ẽg tỹ ẽg rãnrãj tag ki króm kỹ Cristo há ẽn vĩ tar pẻ nĩ ha, ẽg tỹ tỹ ti há nỹtĩn kỹ.

¹³ Ti tỹ ẽg kar tỹ vễnh jykre pir han mũ ve sór vễ, ẽg tỹ ti ki ge kỹ nỹtĩn kỹ, ẽg tỹ Topẽ kósĩn ki kanhró nỹtĩn kỹ. Kỹ ẽg kar vĩ ẽg rãnrãj to tar nỹtĩ sir, ẽg tỹ jagnẽ mré tỹ ùn pir nỹtĩn kỹ. Kỹ ẽg Cristo tỹ ẽprã

ke jykre kãfór nĩ ěn ri ke nýtĩ sir, kýt ěg tóg koměr hã ti týt nén kar han mũ mré ti týt nén to jykrén mũ ki kanhrãn kãn ke mũ gé sir, kýt ěg tóg ũn sanh há kanhró ri ke nýtĩ sir.

14 Ěg týt gĩr ri ke nýtĩn kýt tóg ti mýt há tũ nĩ. Gĩr ag ne ki kagtĩg nýtĩ'. Kýt ag tóg, ag týt nén ũ mẽ kýt ag tóg kãnhmar nén ũ nón tĩ', nén ũ nón tĩ', he' he tĩ. Ěg týt ti vĩ to gĩr týt ki kagtĩg ěn ri ke nýtĩn kýt tóg ěg týt ũn ón mũ vĩ kri nĩm ja há (tóg) tĩ, ěg týt ki kagtĩg nýtĩn kýt. Ũ ag tóg Topě vĩ to ón tĩ. Ag týt ěg týt ājag mré kygně han sór vē. Vĩ há nĩ ve ag tóg nýtĩ, kýt tóg ěg týt ag vĩ kri fi ja há tĩ sir.

15 Kýt tóg há tĩnh mũ, ěg týt Topě týt ki hã tó mũ ěn hã han kýt. Kýt ěg tóg jagně to há tãvĩ nýtĩnh mũ gé. Hã týt ěg tar nýtĩnh mũ. Ti ki mog ri ke vē sir, ti týt týt ěg kri nĩ nĩn kýt, Cristo ti.

16 Ěg týt týt ti mré ke nýtĩn kýt ěg tóg týt ti há týt týt ũn pir ěn ri ke nýtĩ. Ěg kar výt rãnhřãj ke mũ, ěg týt ti jykre pir to tar nýtĩ jé. Ěg kar výt týt jagně mré ke nýtĩ. Ěg kar týt Topě týt ěg mýt nén nĩm ja ěn to vãsãnsãn kýt ěg tóg ũn sanh há tar ri ke nýtĩ sir. Mog jé ěg tóg ke mũ, ěg týt jagně to há nýtĩn kýt.

Cristo týt ěg mýt vēnh jykre tãg nĩm

17 Kýt sóg ājag jyvěn sór mũ, ěg Senhor týt ěnh mýt: “ha ag jyvěn,” hen kýt. Hã kýt sóg ājag mýt: “ũ týt Topě ki kagtĩg ag jykre han sór tũg nĩ,” he mũ. Kórég ti nýt, ag jykre ti, mýt.

Ag týt vēsóg ki nén to jykrén mũ ěn hã han ag tóg tĩ.

18 Kutý mĩ ag mũgtĩ, ki kagtĩg ag nýtĩ. Hã ra ag tóg ki kanhrãn sór tũ nĩ gé. Hã kýt ag tóg Topě týt ěg mýt vēnh jykre nĩm ěn ki kagtĩg nýtĩ.

19 Kýt ag tóg vēnh jykre há to é he tĩ. Mýt'ãg vãnh ag nýtĩ. Ag vēnh kavěnh výt ag mýt há tĩ. Věnh jykre kórég týt ag kókég mũ ra tóg ag mýt sér tĩgtĩ, kýt ag tóg to krónh ke jãvãnh nýtĩ. Ke tũg nĩ, ag jãvo.

20 Cristo jykre výt ge tũ nĩgtĩ, ki kanhró ājag tóg nýtĩ.

21 Ti kãme ki kanhró kar ājag nýtĩ ha, ti jykre ke gé. Ājag mýt ag tóg kãmén kãn, Jesus jykre ti, ěg týt ti ki ge kýt nýtĩn kýt nén han ke mũ ěn ti.

22 Ti ki ge kýt nýtĩn kýt ěg tóg ěg týt vãsýt nén han ja ěn ri ke han mãn ke tũ nĩ ha. Tag mẽ ājag huri. Ājag jykre si ěn tovãnh kãn jé ājag tóg ke mũ. Ājag týt ājag jykre si jagma mũn kýt ājag tóg ājag týt nén to ěn mũ ěn hã han mũ ja nĩgtĩ ver. Hã ra ěg tóg tag hã to ter ke mũ.

23 Kýt Topě mýt to vĩmnĩ, ti týt ājag mýt ājag jykre kuryňh kãn jé, ti týt ājag fe jãnhkrig jé.

24 Věnh jykre tãg hã han sórmnĩ, Topě týt ěg mýt vēnh jykre tãg nĩm mũ ěn ti. Kýt ěg tóg ti ri ke nýtĩnh mũ, kuryňj ěg nýtĩnh mũ ha, há ěg nýtĩnh mũ, ti há ri ke. Kýt ěg vēnh vĩ há hã han ke mũ.

25 Hã kýt jagně mýt ón mãn tũg nĩ. Ki hã tómnĩ, jagně mýt. Jagně mré ke výt týt ěg nýtĩ, ěg týt Cristo há ri ke nýtĩn kýt.

26 Ājag fe tỹ gỹm ke mũ ra Topẽ vĩ mranh tũg nĩ. Ājag tỹ jagnẽ to jũ nỹtĩn kỹ kurã ù jãvãnh sór tũg nĩ. Kutyg ke to hã tỹ há' hemnĩ.

27 Japo tỹ ājag krĩn sór mũ ra ti vĩ jẽmẽ tũg nĩ.

28 Vãsỹ ājag kãmĩ ù vĩ ù tỹ nén ù pigju (ka)mẽ ja nĩgtĩ. Kỹ ẽn han mãn tũg nĩ. Ājag rãnrãj nón ājag mũnh ke mũ ùri. Ājag nĩgé tỹ nén ù há han nĩ, ājag tỹ ājag rãnrãj to nén (ũ) kar ve jé. To vãsãn nĩ, ti tỹ ājag mỹ kén jé, ājag tỹ ājag tỹ nén ù tỹ ùn jagãgtar ag jagãgtãn jé.

29 Vẽnh vĩ kórég tó sór tũg nĩ. Nén ù há hã tỹ vẽnén nĩ, ājag tỹ ājag vĩ tỹ jagnẽ tar han jé, ājag tỹ jagnẽ jykre kurynh jé.

30 Topẽ kuprĩg fe kaj han sór tũg nĩ gé. Topẽ vĩ ẽg mỹ ã kuprĩg jẽnẽ, ti tỹ hã tugrĩn ẽg nĩgĩẽg jé, ẽg krenkren ke to. Ti tỹ tỹ ẽg jagrẽ nĩn kỹ ẽg tóg ki kanhró nỹtĩ, ẽg tỹ Topẽ tỹ ẽg krenkren han ke kurã ẽn tá krỹg mũn ki.

31 Jagnẽ to jykrén kónãn tũg nĩ. Jagnẽ to krĩ rỹ han tũg nĩ. Ājag fe tỹ gỹm ke (ka)mẽ nỹtĩ tũg nĩ. Féfẽn tũg nĩ. Jagnẽ to vĩ kónãn tũg nĩ. Vẽn jykre pãno tovãnh kãn nĩ.

32 Jagnẽ to vĩ há han nĩ. Jagnẽ mỹ komẽr hã vĩmnĩ. Jagnẽ mỹ vẽn pãte fón nĩ, Topẽ tỹ Cristo tugrĩn ẽg mỹ vẽn pãte fón ja ri kén.

5

Ēg jykre tãg

1 Topẽ tỹ vẽn jykre han ti ẽn hã han nĩ, ājag tỹ tỹ ti fe nỹtĩn kỹ, ti krẽ.

2 Jagnẽ to há kar nỹtĩmnĩ, Cristo tỹ ẽg to há nĩ ri ke. Ēg jagfy tóg vẽn fẽg. Ēg tỹ Topẽ mỹ nén (ũ) pũn ri ke ti nĩ, ti tỹ ẽg jagfy vẽn fẽg mũ ẽn ti. Topẽ mỹ nén ger há pũr ri ke ti nĩ, kỹ tóg Topẽ mỹ há ti sir.

3 Topẽ tỹ vĩ tỹ ājag nỹtĩ. Hã kỹ vẽn jykre pãno tỹ vẽnén sór tũg nĩ, ājag tỹ han sór tũ nĩ jé. Ēg prũ tũ mré nỹ, ẽg mén tũ mré nỹ, tỹ vẽnén sór tũg nĩ, ājag tỹ nén e hã tỹ vãsãn (ka)mẽ tỹ vẽnén sór tũg nĩ gé.

4 Kỹ jagnẽ mỹ vĩ kónãn tũg nĩ, jagnẽ to vĩ kónãn tũg nĩ gé. Fagrĩnh mỹ vĩ tũg nĩ gé. Nén ù kavėj tỹ vẽnén tũg nĩ gé. Ēg tỹ tag tó kỹn pi(jé) há nĩ', ẽg tỹ tỹ Topẽ krẽ nỹtĩn kỹ. Ēg tỹ nén tónh ken hã vẽ, ha mẽ: “ã tỹ inh mỹ nén jẽnẽg mũ kar tóg inh mỹ há nỹtĩ,” he jé ẽg tóg ke mũ, Topẽ mỹ agradercer hen kỹ.

5 Tag to jykrén, ha mẽ: ù tỹ ã prũ tũ fi mré nỹ mũ ẽn, ù fi tỹ ã mén tũ mré nỹ mũ ẽn fi pi(jé) Cristo tỹ tỹ ẽg pã'i nĩ venh ke mũ'. Û tỹ ã tỹ nén e hã tỹ vãsãn mũ ẽn pi(jé) venh ke mũ'. Ēg tỹ vẽn kãgrá to jãn ẽn ri ke ti nĩ, ẽg tỹ ẽg tỹ nén e hã tỹ vãsãn mũ ẽn ti. Û tỹ ge pi(jé) Cristo venh ke mũ', Cristo tỹ tỹ ẽg pã'i nĩ ẽn ti.

6 Û tóg ón kỹ ājag mỹ vẽn vĩ há tó sór tĩ. Û tỹ ge vĩ jẽmẽ tũg nĩ, ke tũ nĩ mũ ra Topẽ tóg ājag to jũnh ke mũ. Ti vĩ mranh vẽn

mÿr, ký tóg ũ tÿ ge to jũnh ke mũ.

⁷ Hã ký ag vĩ jẽmẽ sór tũg nĩ.

⁸ Vãsÿ ãjag tóg vẽnĥ jykre ki kuty hã han ja nĩgtĩ gé. Hã ra Topẽ tóg ãjag mÿ vẽnĥ jykre ki kurã ěn nĩm, ãjag tÿ ti ki gen ký. Ký vẽnĥ jykre ki kurã tag hã han sórmnĩ.

⁹ Ěg tÿ vẽnĥ jykre ki kurã hã han ký ěg tóg jagnẽ mÿ vĩ há han ke mũ, vẽnĥ jykre kuryj. Ki hã tó jé ěg tóg ke mũ gé, jagnẽ mÿ.

¹⁰ Vẽnĥ jykre tÿ ěg Senhor mÿ há nÿ ěn hã han sórmnĩ. Ěn hã to jykrén mág nĩ.

¹¹ Kejẽn ãjag tóg ũ vég tĩ, hã ra tóg vẽnĥ jykre ki kuty han tĩ. Ký ti mré han sór tũg nĩ. Ti mÿ: “kórég ti nĩ, tovãnh nĩ,” hemnĩ.

¹² Vẽnĥ péju ký ag tóg han tĩ, vẽnĥ jykre kórég ti. Ěg mÿ'a tóg tĩ, ěg tÿ ag tÿ nén han tĩ ěn ve ký.

¹³ Kejẽn tóg ag tÿ nén han mũ kri kurãg tĩ, ký tóg ve há tĩgtĩ, ag tÿ nén han mũ ti. Kurã ki ěg tóg ti kórég nĩ ěn vég tĩ.

¹⁴ Ký tóg há nĩ ha, ěg tÿ vẽnĥ jykre kórég to: kórég ti nĩ, hen ký. Ký ěg tóg tovãnh sór ke mũ. Hã ký ěg tóg tag tó tĩ, ha mẽ: “Topẽ vĩ mranh sór mãn tũg nĩ. Nũgme ki kutẽ sór mãn tũg nĩ. Ký Cristo vÿ ã mÿ jẽngrẽ han ke mũ,” he ěg tóg tĩ, ěg jãn ký.

¹⁵ Ějag tÿ nén han mũ to jykrén nĩ. Krĩ tũ nĩ sór tũg nĩ, vẽnĥ jykre há ki vẽnĥ kanhrãnh ký mũmnĩ.

¹⁶ Kurã kren tũg sórmnĩ. Nén ũ jagy ve jé ěg tóg ke mũ,

hã ký tóg há tĩ, ěg tÿ kurã kren tũ nĩn ký.

¹⁷ Ěg Senhor vÿ ěg tÿ nén ũ há han mũ ve sór tĩ. Ký ti tÿ nén (ũ) ve sór mũ tag hã to jykrén nĩ, ãjag tÿ tag hã han jé.

¹⁸ Vinho tÿ vėsén tũg nĩ, tÿ vẽnĥ pẽnman tũg nĩ. Vẽnĥ jykre kórég vẽ, ěg tÿ nén ũ fa tÿ vėsén mũ ti, tÿ vẽnĥ pẽnman mũ ti. Tope kuprĩg tÿ ěg fãn tag hã ne há nĩ'.

¹⁹ Jagnẽ mré vēmén ký Topẽ tÿ jãn nĩ, ti jé tómnĩ, ěg Senhor jé ti. Ti kuprĩg vÿ ěg kanhrãnh tĩ gé, ěg tÿ ěg Senhor mÿ nén tó sór mũ to, ěg tÿ ti tÿ jãn há han jé. Ěg tÿ ti mÿ: “há kar ti nĩ,” henh ke vẽ gé.

²⁰ Ěg jóg tÿ Topẽ mÿ ěg tóg tónh ke mũ, ti hã mÿ ěg tóg: “ã tÿ ěg mÿ nén ven mũ vÿ há kar nÿtĩ,” henh ke mũ, ěg tÿ ěg Senhor tÿ Jesus Cristo jyjy tón ký.

²¹ Ěg tÿ Cristo kamẽg ký tóg há tĩ, ký tóg ěg tÿ jagnẽ jykre mĩ mũn ký (tóg) há tĩ gé, ěg tÿ tÿ ti mré ke nÿtĩn ký.

Ũ tÿ jagnẽ mré nÿtĩ fag jykre

²² Ũn tÿtá fag jé ãjag mén ag jykre mĩ mũjẽg. Fag mÿ tóg ěg Senhor ri ke nĩ, fag mén ti.

²³ Fi krĩ vẽ, fi mén ti. Cristo vÿ tÿ ti ki ge ký nÿtĩ kar ag kri ke nĩ, ký ěg tóg tÿ ti há ri ke nÿtĩ, ti tÿ ěg kren han ký.

²⁴ Hã ký ěg tóg tÿ ti krẽm ke nÿtĩ, Cristo krẽm ke. Ge ti nĩgtĩ, ũn tÿtá fag jykre ti. Fag mén krẽm ke vÿ tÿ fag nÿtĩ, fag tÿ ãjag mén vĩ han jé.

25 Kÿ sóg fag mén ag mÿ tag tó sór mÿ gé. Ājag prÿ to há tãvĩ nÿtĩmnĩ. Cristo vÿ ěg to há nĩ, ěg tÿ tÿ ti tũ nÿtĩn kÿ. ěg jagfy tóg vĕnh fĕg,

26 ěg tÿ tÿ ti tũ nÿtĩ jé. Kÿ tóg ěg kykũnh, goj tÿ ěg kygpe kÿ, ti vĩ tÿ ke gé.

27 Ti tÿ ěg há nÿtĩ ve sór vĕ, ěg tÿ vĕnhmÿ nÿtĩnh ke tũ vĕ, ěg kaga ri ke nÿtĩnh ke tũ vĕ, ěg kórég nÿtĩnh ke tũ vĕ gé, ěg sĩnvĩ tãvĩ nÿtĩnh ke vĕ, ěg tÿ tÿ ti tũ nÿtĩn kÿ. Cristo prũnh ke ri ke vÿ tÿ ěg nÿtĩ.

28 Tag ri ke han nĩ, ājag prÿ tÿ. Fag to há nÿtĩmnĩ. “Inh há ri ke vÿ tÿ fi nĩ,” hemnĩ, fag to. Ũ tÿ ā prÿ fi to há nĩn kÿ tóg vĕso há nĩ sir.

29 Vĕnh ki rĩr há han ěg tóg tĩ, jĕg ěg tóg tĩ, ěg tar nÿtĩ jé. ěg pi(jé) vĕnh kókén sór tĩ'. Cristo vÿ ěg tÿ ge tĩ gé. ěg ki rĩr há han tóg tĩ gé.

30 Ti há vÿ tÿ ěg nÿtĩ, ěg kar, ěg tÿ ti ki ge kÿ nÿtĩn kÿ.

31 Tag vÿ rán kÿ nĩ, ha mĕ: “ũn gré tóg ā prÿ fi to ā panh ré kÿ tĩ mũ, ā mÿnh fi ré kÿ ke gé. Ā prÿ fi mré tóg tĩnh mũ. Fi mré tóg tÿ ũn pir nĩ sir, ti prÿ fi mré,” he ja tóg nĩgtĩ, Topĕ vĩ rán ki.

32 Tag vÿ tÿ nén ũ sĩnvĩ pĕ nĩ. Kÿ tóg Cristo to rán kÿ nĩ gé, ti tÿ ũ tÿ ti ki ge kÿ nÿtĩ ag mré tÿ ũn pir nĩn kÿ.

33 Hã ra tóg ěg mÿ rán kÿ nĩ gé, ěg tÿ ěg prÿ fag to há nÿtĩ jé, ěg tÿ vĕnh ki rĩr há han mũ tag ri ke. Kÿ tóg fag mÿ rán kÿ nĩ gé, fag tÿ ājag mén vĩ kÿ jĕmĕn jé.

6

Ěg han mũ fag to vĕnh jykre

1 Kÿ sóg ājag krĕ mÿ tag tó mũ, ha mĕ. “Ājag han mũ fag vĩ kri fimnĩ,” he sóg mũ, ag mÿ. Há ti nĩ, ěg Senhor jykren ha vĕ.

2 Ājag han mũ fag kamĕg nĩ. Topĕ tÿ ěg mÿ tag tó kÿ tóg ěg mÿ nén ũ há tó mũ gé, hã vÿ:

3 “ā han mũ fag kamĕg nĩ, ā tÿ tĩg há han jé, ā tÿ ga kri tĩg mág han jé,” he ja tóg nĩ, Topĕ ti.

4 Kÿ sóg ũn sanh ag mÿ: “ājag krĕ mÿ vĩ tar pĕ han tũg nĩ, ag tÿ ājag to jũ tũ nĩ jé,” he mũ gé. Ājag krĕ jyvĕn nĩ, ag mÿ ěg Senhor jykre kãmĕn nĩ, ag tÿ mĩ mũn jé.

Camarada ag tÿ ājag patrão mré nÿtĩ jykre

5 Ājag kãmĩ ũ ag tóg patrão krĕm nÿtĩ gé, fagrĩnh mÿ ti mÿ ti rãnrãj han tĩn kÿ. Ājag patrão vĩ kri fimnĩ. Ti kamĕg nĩ, ti to jũrn kemnĩ. Ti rãnrãj ki rĩr há han nĩ, ājag tÿ Cristo rãnrãj ki rĩr tĩ ěn ri ke.

6 Ũ tóg kejĕn ti patrão tÿ ti mÿ vĩ há han hã jé (tóg) ti patrão tũ ki rĩr tĩ, ón kÿ. Tag han tũg nĩ. Ājag patrão tũ ki rĩr pĕ han nĩ, ājag tÿ tÿ Cristo camarada nÿtĩn kÿ, Topĕ jykre tÿ ājag mÿ sér nĩn kÿ.

7 Ājag patrão rãnrãj ki rĩr kÿ mÿ sér nÿtĩmnĩ. Ājag tÿ ěg Senhor rãnrãj ki rĩr vĕ, ājag tÿ ājag patrão rãnrãj ki rĩr kÿ.

8 Ha vé, ěg tÿ nén ũ há han kÿ ěg tóg ti kaja venh ke mũ, kanhkã tá. ěg Senhor vÿ ěg

mỹ ti kaja ven ke mũ, ti camarada ag mỹ, ag patrão mỹ ke gé, ti ki ge kỹ nỹtĩ kar ag mỹ.

⁹ Ājag kãmĩ ù vỹ tỹ patrão nỹtĩ, kỹ ājag camarada vỹ nỹtĩ, ājag krēm. Ag to há nỹtĩmnĩ. Ag mỹ vĩ kónãn tũg nĩ. Ēg Senhor vỹ kanhkã tá nĩ. Ājag pã'i vễ, ājag camarada pã'i vễ gé hã ra, ù tỹ kanhkã tá nĩ ti. Ti mỹ ěg tóg tỹ ùn pir nỹtĩ, tag ki ùn mág mré ùn kãsir ag.

Topẽ tỹ ěg tỹ Japo katõ vãsãnsãn jafã vin sór

¹⁰ Kỹ sóg ājag mỹ tag tó sór mũ gé ver, ha mẽ. Ēg Senhor ki ge kỹ nỹtĩ to tar nỹtĩmnĩ. Tar ti nĩ, kỹ tóg ěg tar han ki kanhró nĩ gé.

¹¹⁻¹² Tag ki ěg vễnh génh han tĩ, ěg tỹ Japo kato vãsãnsãn kỹ nỹtĩn kỹ. Hã ra Topẽ tóg ěg mỹ ěg tỹ ti kato vãsãnsãn jafã nĩm tĩ. Kỹ mãn nĩ, Topẽ tỹ ěg mỹ ti kato vãsãnsãn jafã nĩm mũ ěn ti, kỹ Japo tóg ěg tỹ hẽ ri kenh ke tũ nĩ. Tar jé ěg tóg ke mũ ha. Ēg pi(jé) ěprã ke ag kato vãsãnsãn tĩ', ěg pi(jé) ěg mré ke ag kato vãsãnsãn tĩ'. Pã'i ag nỹtĩ, ù tỹ ěg kato vãsãnsãn mũ ag, hã ra ěg tóg ag vég tũ nĩgtĩ. Kuty tân ag vễ, ga to pã'i ag vễ gé. Kanhkã krēm ag ěmã nỹtĩ gé. Kórég kar ag nỹtĩ.

¹³ Kỹ mãn kãn nĩ, Topẽ tỹ ěg mỹ nén tỹ ag kato vãsãnsãn jafã vin sór mũ ěn ti, ājag tỹ ag kato vãsãnsãn to tar nỹtĩ jé. Kejẽn ag tóg ěg kato vãsãn mág han ke mũ. Kurã ěn kã ag tóg ěg tỹ hẽ ri kenh ke tũ nĩ, Topẽ tỹ ěg tar han kỹ, ti tỹ ěg

mỹ ěg tỹ ag kato vãsãnsãn jafã ěn vin kỹ.

¹⁴ Hã kỹ tar nỹtĩmnĩ. Ēg Senhor vỹ ón vãnh nĩ. Ti ón vãnh vỹ ěg vễsóg fĩn ja mág ri ke nĩ. Tỹ vễsóg fĩn ri ke han nĩ, ti ón vãnh ri ke han to ken hã vễ. Vễnh jykre kuryj vỹ tỹ soldado tỹ camisa tỹ ferro ri ke nĩ. Ēn tu ri ke han nĩ, vễnh jykre kuryj han to ken hã vễ.

¹⁵ Ēg tỹ Topẽ vĩ sér tó sór mũ vỹ ěg pẽn né, ěg pẽn to ró ri ke nĩ, ěg tỹ vễnh kar mỹ Topẽ tỹ ěg krĩ kuprãg ke mũ tónh ke mũ tag ti. Ēn rĩnh ri ke han nĩ, vễnh kar mỹ Topẽ vĩ kãmén to ken hã vễ.

¹⁶ Ēg tỹ ti ki rã kỹ tóg soldado tỹ vễjy ven jafã ma tĩ ěn ri ke nĩ. Satanás tỹ ěg kato vãsãn kỹ tóg ti tỹ no tỹ ěg to pễg grug ri ke nĩ. Ēg tỹ vễjy ven jafã tỹ vễjy ven kỹ tóg tỹ nhyn ke tĩ, ti no gru ěn tỹ. Ēg tỹ Jesus ki rã to ken hã vễ.

¹⁷ Ēg kren han ke vỹ soldado sãpe ri ke nĩ, sãpe tỹ ferro ěn ri ke. Kỹ Topẽ vĩ vỹ rógro ri ke nĩ gé. Topẽ kuprĩg vỹ ěg mỹ kãmén tĩ', Topẽ vĩ ti. Topẽ tỹ ěg mỹ Japo kato vãsãnsãn jafã vin ke mũn hã vễ.

¹⁸ Kỹ Topẽ mré vễmén nĩ gé, ti mỹ nén kar to vĩmnĩ. Ti kuprĩg vỹ ěg jagfy vĩ tĩ gé. Topẽ mré vĩ to krónh ke tũg nĩ. Ēg tỹ to krónh ken kỹ tóg ěg nũr ri ke nĩ sir. Ke tũg nĩ. Ēg mré ti ki ge kỹ nỹtĩ kar to vĩmnĩ.

¹⁹ Kỹ inh jagfy ti mré vễmén nĩ gé. Topẽ vĩ tó sóg tĩ. Kỹ inh mré to vĩmnĩ, sỹ tó há han jé,

isỹ inh kato vãsãnsãn mũ ag kamẽg tũ nĩ jé, isỹ vẽnũ kar mỹ Topẽ tỹ nén han sór mũ ẽn kãmén há han jé, vẽnũ vĩ sér ẽn.

²⁰ Topẽ vĩ inh mỹ tag nĩm ja nĩ, sỹ han jé, hã ra sóg ver se kỹ jẽ. Kỹ tóg sỹ ag kamẽg tũ nĩnh há tĩ, sỹ Jesus kãme tó kãn jé, sỹ ti tỹ inh mỹ: “ha ag mỹ kãmén,” he mũ tag tó kãn jé.

Paulo tỹ Tíquico jẽnẽnũ ke

²¹ Kỹ tóg inh mỹ há tĩ, ãjag tỹ isỹ nén ve ja tag mẽ kãn jé, isỹ nén han mũ mré hã. Hã jé sóg ãjag mỹ Tíquico ti jẽnẽnũ ke mũ. Ëg régre ù vẽnũ gé, iso há tavĩ ti nĩ, Tíquico ti. Ëg Senhor rãnrãj han ti tĩ, ti to krónh ke tũ ti nĩgtĩ.

²² Ti hã vĩ ãjag mỹ inh kãmén ke mũ, ti tỹ ãjag fe tỹ há' he jé. Hã jé sóg ti jẽnẽnũ ke mũ.

²³ Ëg jóg tỹ Topẽ jé ãjag krĩ kuprãg, Ëg régre kar ag mré hã. Ti jé ãjag tỹ jagnẽ to há kar han. Ti jé ãjag tỹ ti ki rã há han, Ëg jóg tỹ Topẽ ti, Ëg Senhor tỹ Jesus Cristo ti ke gé.

²⁴ Topẽ jé ãjag tar han, ù tỹ Ëg Senhor tỹ Jesus Cristo to há nỹtĩ ag kar, kỹ tóg tũ' he jãvãnh nĩ, Ëg tỹ ti to há nỹtĩ ti.

Hã vẽnũ.

PAULO TŶ CARTA HAN: FILIPOS TÁ KE AG MŶ CARTA

¹ Paulo tŷ rá vē, inh. Isŷ cidade tŷ Filipos tá ke ag mŷ rán hã vē. Kŷ Timóteo vŷ inh mré ājag mŷ jēnēg mŷ gé, vēnh rá tag ti, inh mré Jesus Cristo mŷ rānrāj tŷ tag ti. Isŷ ājag mŷ ti rá tag jēnē vē, ājag tŷ tŷ Jesus Cristo ki ge kŷ nŷtŷn kŷ. Kŷ sóg ājag pā'i ag mŷ jēnēg mŷ gé, ũ tŷ ājag ki rŷr tŷ ag mŷ ke gé.

² Ēg jóg tŷ Topē jé ājag tar han, ti jé ājag krŷ kuprāg, ěg Senhor tŷ Jesus Cristo ke gé.

Paulo tŷ Topē mré vŷ

³ Ājag to sóg Topē mré vŷ há han tŷ, sŷ ājag mŷ ěkrén kŷ.

⁴ Sŷ ājag to Topē mré vŷ kŷ inh fe tóg mrin ke tŷ. Inh mŷ tóg sér tŷ, sŷ ājag mŷ ěkrén kŷ.

⁵ Ājag tŷ inh mré Jesus kāmén kŷ tóg inh mŷ há tŷ, ājag tŷ inh mré ti to tar nŷtŷn kŷ. Kŷ sóg Topē mŷ vŷ há han tŷ, ājag to. Isŷ ājag mŷ ti vŷ tó vén kŷ ājag tóg kānhmar inh mré ti kāmén ja nŷgtŷ, kŷ ājag tóg ũri ti vŷ tó há han tŷ gé. Tovānh tŷ ājag nŷ. Kŷ tóg inh mŷ sér tŷ.

⁶ Tag ki kanhró sóg nŷ, ha mẽ. Topē vŷ ājag krŷn rā nŷ, komēr hã, nén ũ há kar to. Kŷ tóg ājag krŷn tŷgtŷ sir, ti tŷ komēr hã ājag krŷn kān jé, Jesus Cristo kātŷg mǎn ke kurā to hã. Ti hã vŷ ājag krŷn ke mŷ, Topē ti.

⁷ Tag to sóg jykrén, sŷ ājag mŷ ěkrén kŷ. Hã ra tóg há

nŷ. Inh fe vŷ tŷ ājag nŷtŷ. Inh hã mré tóg ājag tar han tŷ, ěg Senhor ti. Hã kŷ ājag tóg inh mré jagāgtar nŷtŷ, inh se kŷ jē tag ti to. Isŷ vāsŷ kavár kŷ jē ja nŷn kŷ sóg ag mŷ Topē vŷ kāmén ja nŷgtŷ, kŷ ājag tóg inh mré to tar nŷtŷ ja nŷgtŷ gé, pā'i ag tŷ inh ki Jesus jēmén kŷ ke gé. Kŷ ājag tóg ũri inh mré ti to tar nŷtŷ gé.

⁸ Sŷ ājag kar venh há tóg tŷ, kŷ Topē vŷ ki kanhró nŷ. Inh mŷ ājag tóg tŷ inh fe pē nŷtŷ, ěg tŷ Jesus Cristo mŷ tŷ ti fe pē ěn ri ke ājag nŷtŷ, inh mŷ.

⁹ Sŷ Topē mré vŷn kŷ sóg ti mŷ tag tó tŷ, ājag to, ha mẽ. “Jagnē to há ag nŷtŷ,” he sóg tŷ, Topē mŷ. “Ag tŷ komēr hã jagnē to há kar nŷtŷ han nŷ,” he sóg tŷ ājag to, Topē mŷ. “Ag kanhrān nŷ gé, ag tŷ komēr hã ā jykre ki kanhrān kān jé, ag tŷ ki króm kān jé,” he sóg tŷ, ājag to.

¹⁰ “Ā tŷ ag kanhrān kŷ ag tóg nén (ũ) há kar ki kanhró nŷtŷnh ke mŷ. Kŷ ag tóg to jykrén há han ke mŷ, ag tŷ nén ũ ve sór kŷ. “Tag vŷ há pe nŷ, tag vŷ há sŷ nŷ,” he jé ag tóg ke mŷ, ā tŷ ag kanhrān kŷ,” he sóg tŷ ājag to, Topē mŷ. Ājag tŷ tag to jykrén há nŷtŷn kŷ ājag tóg jānhkri nŷtŷnh ke mŷ, kŷ ājag tóg mŷ'āg mǎn ke tŷ nŷ, Cristo kātŷg mǎn ke kurā ěn kã.

¹¹ Kŷ ājag tóg vēnh jykre há han kān ke mŷ sir, Jesus Cristo tŷ ājag mŷ ā jykre há ěn nŷm kŷ. Hã jé sóg Topē mŷ ājag tó tŷ. Ti tŷ ājag krŷ kugrynh kŷ vēnh kar tóg ti tŷ tŷ ũn mág nŷ

venh ke mũ. Kĩ ag tóg ti mũ vĩ há han ke mũ gé sir.

Jesus tỹ inh jykre

12 Inh kanhkã', inh jagtar mũ ra Jesus kãme tóg vênh kar kri rùm ke mũ. Tag to jykrén.

13 Vênh kar tóg mẽ kãn, ti vĩ ti, polícia ag mré hã, ù tỹ palácio ki rĩr tĩ ag mré hã. Cristo tugrĩn sóg se kỹ jẽ, hã vég ag tóg mũ.

14 Kỹ Jesus mré ke tỹ hên ri ke ag vĩ fe tar nỹtĩ gé sir, ẽg Senhor jykre to, inh se kỹ jẽ tag tugrĩn. Hã kỹ ag tóg Topê vĩ tó tĩ sir, ag tỹ to fe tar nỹtĩn kỹ, ag mũmẽg vãnh nỹtĩn kỹ.

15 Û ag tóg iso jũ nỹtĩ, ha kỹ ag tóg Jesus tó tĩ, ag tỹ inh ri ke han sórn kỹ. Kỹ ù ag tóg iso há nỹtĩ, hã kỹ ag tóg ti tó tĩ sir.

16 Topê vĩ hã to sóg se kỹ jẽ, sỹ pã'i ag mũ ti kãmén jé. Topê tỹ inh mũ vênh rãnrãj nĩm hã vễ. Hã vég ag tóg tĩ, ù tỹ iso há nỹtĩ ag, kỹ ag tóg ti vĩ tó tĩ, ù tỹ iso há nỹtĩ ag.

17 Û ag tóg hã ra iso jũ nỹtĩ, hã kỹ ag tóg ón kỹ Cristo kãmén tĩ, ag tỹ inh vĩ kãfór han sór kỹ. Ag tỹ inh kato tẽ mũ ag tỹ iso jũ han sór v egtĩ gé, ag tỹ inh se tỹ hên ri ke han sór vễ. Hã jé ag tóg Cristo vĩ tó tĩ.

18 Hã ra sóg ag to vênh mũ nĩ sór tũ nĩ. Cristo tó ag tóg mũ mũr. Û tóg ón kỹ tó tĩ, jo ù tóg tó há han tĩ. Ag kar vĩ ti tó tĩ, kỹ tóg há tĩ. Hã kỹ tóg inh mũ sér tĩ, kỹ sóg inh mũ sér tỹ tũ' he sór tũ nĩ.

19 Hã ra sóg kren ke mũ gé, ha vemnĩ. Ki kanhró sóg nĩ. Ảjag hã ne iso Topê mré vĩ tĩ',

kỹ Jesus Cristo vĩ isar han tĩ gé, ả kuprĩg tỹ. Hã kỹ sóg kren ke mũ.

20 Kỹ sóg tag jãvãnh mũ, ha mẽ. Hên ri ke mũn ag tóg inh kyvãn ke mũ, hên ri ke mũn ag tóg isén ke mũ. Isỹ tag to jykrén kónãn tũ nĩ jé, hã jé sóg ti mré vĩ tĩ. Isar han jé tóg ke mũ, sỹ nén ù kamẽg tũ nĩ jé, sỹ ti kavênh tũ nĩ jé, inh mũ' ảg tũ nĩ jé. Vênh kar tỹ isugrĩn Jesus tỹ tỹ ùn mág nĩ ven kỹ tóg inh mũ sér tĩ.

21 Inh jykre hã vĩ tỹ Cristo ti nĩ, hã kỹ sóg iser kỹ ti venh tĩg ke mũ, kỹ tóg sér tĩ.

22 Kỹ sóg hã ra inh kren kỹ ti rãnrãj hã han ke mũ. Hã kỹ sóg sỹ nén han sór mũ ki kagtĩg nĩ.

23 Inh kren ke mũ inh mũ hán tĩ vĩ, iser ke vó? he sóg tĩ. Iser kỹ sóg Cristo mré nĩ nĩ, kỹ tag tóg inh mũ há pẽ nĩ, isỹ ti venh há tĩn kỹ.

24 Jãvo isỹ ảjag mré nĩn kỹ sóg ảjag tar han ke mũ, kỹ tag tóg inh mũ há kãfór nĩ.

25 Hã tóg inh mũ ge nĩ. Kren jé sóg ke mũ, he sóg tĩ, kỹ sóg ảjag kar mré nĩnh ke mũ. Ảjag ve jé sóg ke mũ, ảjag tỹ komẽr hã inh vĩ mẽ kỹ ti vĩ kri fi kãn jé. Kỹ tóg ảjag mũ sér tĩnh mũ, ha vemnĩ.

26 Isỹ ảjag mré nĩ mãn ken kỹ tóg inh mũ há tĩnh mũ. Kỹ ảjag fe tóg mrin ke tãvĩ han ke mũ, ảjag tỹ inh ve mãn kỹ. Ảjag mũ sóg tỹ ùn mág jẽ, Jesus Cristo tugrĩn.

27 Ha vé, Cristo jykre hã han nĩ, tag hã to vãsãnsãn nĩ. Hên ri ke mũn sóg ảjag venh

kātīg ke mū, hēn ri ke mūn sóg ājag venh kātīg ke tū nī. Inh kātī tū ra jagnē mré vēnh jykre pir han kŷ nŷtīmñī, Jesus kāme hā tómnī, ti ki ge kŷ nŷtīmñī. Sŷ tag mēnh há tóg tī, ājag to.

28 Ū tŷ ěg kato vāsānsān mū ag kamēg tūg nī, hā tugññ ag tóg ājag tŷ nūgme ki vār ke ki kanhró nŷtī, inferno ki. Hā tugññ ājag tóg ājag krenkren ke mū ěn ki kanhró nŷtī gé sir. Topē vŷ ěg tar han ke mū, ěg tŷ ag tŷ hēn ri ke jé gé, ū tŷ ěg kato vāsānsān mū ěn ag tŷ.

29 Cristo ki ge kŷ ājag nŷtī, kŷ ājag tóg ti tugrñ jagāgtar nŷtīnh ke mū gé. Hā jé tóg ājag kuprēg.

30 Hā kŷ ājag tóg inh kóm ti jagy vég tī gé. Ag tŷ vāsŷ inh kato vāsānsān ěn ve ja ājag tóg nŷgtī gé. Ūri sóg hā vég tī ver. Kŷ inh kóm tar nŷtīmñī.

2

Topē kósín tŷ tŷ ěprā ke nī

1 Ha vé, sŷ ājag jyvēn sór mū, ha mē. Ājag tŷ Jesus jykre han kŷ nŷtī tag vŷ ājag tar han tī. Ti tŷ ājag to há nī tag vŷ sér tī. Ti kuprīg vŷ tŷ ājag jagrē nī. Kŷ ājag tóg jagnē to há nŷtī gé, jagnē jagāgtān ājag tóg tī gé.

2 Kŷ inh jagāgtān nī gé, inh fe tŷ mrin kemñī gé, inh mŷ sér tī jé. Jagnē mré vēnh jykre pir hā han nī, ha mē. Jagnē to há tāvī nŷtīmñī. Ājag tŷ nén ū to jykrén kŷ jagnē mré to jykrén nī, ājag tŷ vēnh jykre pir hā han jé.

3 Vēsŷ ūn mág han sór tūg nī, jagnē káfór han sór tūg nī. “Tŷ

inh ūn sī nī,” hemñī. Jagnē to: “inh káfór ti nī,” hemñī gé.

4 Ājag tŷ ājag tū ki rŷr mré hā jagnē tūn ki rŷrññ gé.

5 Jesus Cristo kóm ti jykre han nī gé, jagnē mŷ. Ti tŷ vēnh jykre han hā vē, ha mē.

6 Topē hā pē ja ti nī mŷr, Jesus tī, ti tŷ ti mré nñ kŷ. Hā ra tóg tá nī kŷ: “isū vē, kanhkā ti, hā kŷ sóg ěprā ke ag to tŷg ke tū nī,” he ja tū nī.

7 Kanhkā tá ā tŷ nén tovānh kān sór ja ti nī, kŷ tóg ěg ri ke nī jé kātīg sór ja nī, hā kŷ tóg kātīg ja nī. ěprā ke jagtar ri ke tóg nī, ti tŷ ěprā ke fi ki mur kŷ. ěg tŷ ěprā ti ve kŷ tóg tŷ ěg hā pē nī, ti tŷ kanhkā tá tŷ Topē hā pē ja ra.

8 Vēsŷ ūn mág han ja tū tóg nī, kŷ tóg ā jóg vī hā han ja nŷgtī. Ti vī han kŷ tóg ter ja nī, cruz to sa kŷ tóg ter ja nī, mŷr, ha mē.

9 Hā kŷ Topē tóg ti tŷ vēnh kar káfór han sir, kŷ tóg ti jijin mū sir, kŷ ti jyjy tag tóg vēnh kar jyjji káfór nī.

10 ěg tŷ ti jyjy mē kŷ vēnh kar ag tóg ti krēm mūgmūg ke kān mū sir, kanhkā tá ke kar ag, ěprā ke kar ag ke gé, vēnh kuprīg kar ag ke gé.

11 Kŷ vēnh kar ag tóg: “Jesus Cristo vŷ tŷ pā'i mág nī,” henh ke mū sir. Tag hā tugrñ ag tóg sir Topē to: “tŷ tóg ěg káfór kar nī,” he mū. Tag to jykrén nī, ājag tŷ ti kóm han jé, Jesus Cristo kóm.

ěg tŷ ěprā ke ag mŷ jēngrē há han

12 Inh kanhkā', ājag ki sóg fe nī. Inh vī han ājag tóg mūgtī,

sỹ ãjag mré nĩn kỹ, hã ra sóg ũri ãjag mré nĩ tũ nĩ. Ge ra inh vĩ kri fi há han nĩ. ãjag krenkren ke vễ, kỹ Topê jykre há han nĩ. Topê kamêg nĩ, ãjag fe tỹ jũrũn kemnĩ. “Ti mỹ êg to jũnh ke tũ nĩ vỹ?” hemnĩ. Kỹ ti jykre há han nĩ.

13 Ti hã ne tóg ãjag krĩn há han tĩ', ti jykre tỹ ãjag mỹ sér tũn jé, ãjag tỹ hã mĩ hã mũn jé.

14 ãjag tỹ ti jykre han kỹ ti jykre to vĩ vĩ he tũg nĩ, ti tỹ kejẽn ãjag mỹ jagy ra. Kỹ jagnẽ mỹ jagnẽ vĩ kafãn tũg nĩ gé, ti jykre to.

15 Hã tugnĩn ù tóg ãjag to jykrén kónãn ke tũ nĩ, ãjag tỹ kygnêg tũ nĩn kỹ. Kỹ ãjag tóg jãnhkri nỹtĩ. Kỹ ãjag tóg tỹ Topê krê nỹtĩ gé, ãjag tỹ ti jykre há ri ke nỹtĩn kỹ. Êprã ke kar vỹ jykre pãno nỹtĩ, Topê vĩ mranh kỹ ag tóg nỹtĩ, ãjag tỹ ùn mré ga kri mũ ag. Kỹ ãjag tóg ag mỹ jẽngrê ri ke nỹtĩ, ãjag tỹ ag mỹ Topê vĩ kãmén kỹ, ù tỹ êg rĩnrĩr han mũ ên vĩ ti.

16 ãjag tỹ tag han kỹ sóg tỹ ùn mág jẽnh ke mũ gé, ãjag tugrĩn, Cristo kãtĩg mãn ke kurã ên kã. Kỹ sóg ãjag to: “inh pi(jé) fagrĩnh mỹ ag to vãsãn', inh pi(jé) fagrĩnh mỹ ag mỹ Topê vĩ kãmén',” henh ke mũ.

17 Hẽn ri ke mũn ag isén ke mũ, kỹ inh kyvénh tỹ inh ki kutê kỹ tóg êg tỹ Topê mỹ nén ù pũn ri ke nĩnh mũ. ãjag tỹ ti kĩ ge kỹ nỹtĩ tugrĩn ke vễ. Ge ra tóg inh mỹ sér tũnh mũ. Inh fe tóg mrin kenh ke mũ, ãjag kóm.

18 Kỹ tóg inh mỹ ti tỹ ãjag mỹ sér tũnh há tĩ gé, iser ke ti.

Timóteo mré Epafrodito

19 Sỹ ãjag mỹ Timóteo jẽnẽnh há tóg tĩ, êg Senhor tỹ to: “hej,” hen kỹ. Sỹ ti jẽnẽnh ke vễ, ti tỹ tá vỹn ke kỹ inh mỹ ãjag kãmén jé. Kỹ inh krĩ tóg ãjag to kãnhvy' henh ke mũ sir, isỹ ãjag vễmé há mẽn kỹ.

20 Ti hã ne tóg ãjag mĩ êkrén mág tĩ', Timóteo ti. Û tóg ti ri ke tũ pe nĩ, ti tỹ ãjag to há nĩn ki.

21 Ag kar vỹ: “inh rãnrãj vỹ inh kutãn mũ,” he kãn mũ. Hã kỹ ag tóg Jesus rãnrãj han tũ nĩgtĩ.

22 Hã ra ãjag tóg Timóteo ki kanhró nỹtĩ. Inh kósĩn ri ke ti nĩ. Êg krê ag vỹ êg mré êg rãnrãj han tĩ. Kỹ Timóteo vỹ inh mré Topê vĩ tó tỹ rãnrãj tũgtĩ, ti tỹ tỹ inh kósĩn ri ke nĩn kỹ.

23 Ti hã jẽnê jé sóg ke mũ, ãjag to. Hã ra sóg ver ag tỹ inh mỹ nén tónh ke jãvãnh sór mũ, ù tỹ inh ség mũ ag. Isỹ ag tỹ inh mỹ nén tó mũ mẽ kar kỹ sóg vãhã ti jẽnẽnh ke mũ.

24 Hẽn ri ke mũn sóg kãnhmar ãjag venh tũg ke mũ gé. Êg Senhor tỹ Jesus hã ne ki kanhró nĩ'.

25 Hã ra tóg sỹ vễsỹmér ù jẽnẽnh há tĩ, ãjag to. Hã kỹ sóg Epafrodito mỹ: “ha ag to vỹn ké,” he mũ. ãjag hã ne ti jẽnê ja nĩgtĩ', ti tỹ inh ki rĩr jé. Kỹ tóg inh mỹ há tĩ. Inh mré tóg Topê rãnrãj han tĩ mỹr. Kỹ tóg inh mré Topê vĩ to jagtar nĩ gé.

26 Hã ra tóg ãjag mĩ êkrég mũ, Epafrodito ti. Kĩ tóg ãjag to krĩ kufy jagy nĩ sir, ãjag tĩ ti kaga mẽ ja ěn tigrĩn.

27 Kaga ja tóg nĩgtĩ mĩr, kĩ tóg ter kren ja nĩgtĩ. Hã ra Topẽ tóg ti jagãgtãn, kĩ tóg há' he mũ sir. Ti ter ra sóg ijagtar tag krĩg mĩ vėsýrénh mág ke mũ vễ, hã ra Topẽ tóg ti jagãgtãn, kĩ tóg inh jagãgtãn gé.

28 Hã kĩ sóg ti mĩ: “ha tĩg, ã tĩg to fũrũn,” he mũ sir, ãjag fe tĩ mrin ke jé, ãjag tĩ ve kĩ. Hã kĩ inh jagtar tóg pãgsĩ' henh mũ gé sir.

29 Ti jun kĩ ti to mĩ sér nĩtĩmnĩ, ãjag tĩ ti ve mãn kĩ, ěg Senhor tĩ ti jy nĩgãn kĩ. Kĩ ti mĩ: “há tóg tĩ,” hemnĩ, ãjag mĩ sér tĩn kĩ, ti kãtĩg kĩ.

30 Cristo rãnrãj tigrĩn tóg ter kren mĩr. Hã ra tóg tovãnh ja tũ nĩ, ã ter kren mũ ra. Hã kĩ tóg inh ki rĩr há han. ãjag jęgja kã jęg kĩ tóg inh ki rĩr há han. Ũ tĩ ge mĩ vĩ há han nĩ.

3

Jesus tĩ ěg kurynh pẽ han

1 Inh kanhkã', vãhã sóg ãjag mĩ nén ũ tónh ke mũ gé sir, ha mẽ. ěg Senhor ki ãjag ge kĩ nĩtĩ, hã kĩ mĩ sér nĩtĩmnĩ. Tag rãn inh huri, hã ra sóg rãn mãn mũ. Sỹ ãjag mĩ tag to sóg krónh ke sór tũ nĩ. ãjag mĩ tóg há tĩ, sỹ ti tĩ ãjag mĩ sér nĩ to ãjag jyvẽn kĩ.

2 Vẽn ki rĩr. Ón kĩ Topẽ vĩ tó tĩ ag vỹ junjun ke mũ, vẽn jykre pãno han mũ ag,

ha vemnĩ. Inh mĩ ag tóg cachorro ri ke nĩtĩ. Ón kĩ ag tóg ãjag gré junun fár kym sór mũ. Hã kĩ vẽn ki rĩr.

3 “Ěg fár kym hã tigrĩn ěg tóg tĩ Topẽ krẽ nĩtĩ,” he ag tóg tĩ, ón kĩ. Hã tũ vễ. Topẽ kuprĩg vỹ tĩ ěg jagrẽ nĩ, kĩ ěg tóg ěg jagrẽ tag tigrĩn Topẽ mĩ vĩ há han tĩ. Kĩ Jesus Cristo vỹ ěg mĩ tĩ ũn mág nĩ, ěg tĩ ti ki ge kĩ nĩtĩn kĩ. Hã tigrĩn ěg tóg tĩ Topẽ krẽ pẽ nĩtĩ. Ěg tĩ ěg fár kym mũ ra tóg tĩ nén ũ tũ nĩ sir. Ěg fár vễ mĩr, kĩ tóg ěg kren han ke tũ nĩ.

4 Ěg fár tĩ ěg kren han ki kanhró nĩ ra sóg tĩ inh kren han sór mũ vễ. Moisés jykre hã tĩ ěg kren han ke ki kanhró nĩ ra sóg hã tĩ inh kren han sór mũ vễ. Hã ra tóg ge tũ nỹ.

5 Vãsỹ inh jykre hã vễ, ha mẽ. Isỹ kurã tĩ 8 (ke) han kĩ ag tóg inh gré junun fár kym, isỹ tĩ povo tĩ Israel krẽ nĩn kĩ, ěg jóg'jóg ve tĩ Benjamim krẽ'krẽ ag kã ũ. Kĩ inh han mũ fag vỹ tĩ Hebreu pẽ nĩtĩ. Inh mog kĩ sóg tĩ Fariseu nĩ, hã ra Fariseu ag tóg Judeu ag jykre to tar tãvĩ nĩtĩ.

6 Sỹ ěg jykre to tar pẽ nĩn hã kĩ sóg Jesus ki ge kĩ nĩtĩ ag vóg kónãn. Topẽ tĩ Moisés mĩ vẽn jykre nĩm ja ěn ki króm kãn ja sóg nĩgtĩ mĩr. Vẽn jykre ěn mranh ja tũ sóg nĩgtĩ, ěn kã sóg tĩ ũn kuryj ja nĩgtĩ.

7 Hã kĩ sóg ag mĩ tĩ ũn há pẽ ja nĩgtĩ. Hã ra sóg ũri tag kar to: “nén ũ tũ vễ, inh kókén jé tóg ke mũ,” he mũ sir. Sỹ

Cristo ki rã kÿ sóg ãn tovãnh kãn mũ sir.

⁸ Kÿ, hã vë. Inh jykre si kar tóg inh mũ kórég nÿ, ùri, ti tÿ inh kókén kÿ. Nén pir hã ne há nÿ, hã vÿ: isÿ ãg Senhor tÿ Jesus Cristo ki kanhró nÿ jé, he mũ. ãg tÿ nén ki kanhró kar kãfór ti nÿ, ãg tÿ ti ki kanhró nÿ ti. Tag to sóg inh jykre si ãn fón kãn. Inh mũ tóg vënh jãgfa prénhpréj ãn ri ke nÿ, inh jykre si ãn ti, isÿ Cristo hã ki rã kÿ jën kÿ.

⁹ Kÿ sóg ti hã ki rã kÿ jë sir. Ûri sóg Moisés jykre ki króm tigrÿn vësÿ ùn mág han mãn sór tũ nÿ ha. Jesus ki rã hã tigrÿn sóg tÿ ùn mág jë ha. Hã tigrÿn Topë tóg iso: “há ti jë ha,” he mũ. Jesus ki rã tigrÿn ke vë ha.

¹⁰ Sÿ ti ki kanhrãn kÿ jë tag hã tóg inh mũ há nÿ. Ti hã vÿ ã ter kar kÿ rÿr mãn, kÿ sóg ti mré rÿr mãn sór mũ gé. Hã jé sóg ti mré jagtar sór mũ gé, iser kÿ sóg ti ter ri ke han sór mũ gé.

¹¹ Sÿ rÿr mãn há tóg tÿ mÿr, iser kar kÿ. Hã jé sóg ti ri ke han sór tÿ.

Vënhvó to comparaçaõ

¹² Ver sóg ki kanhrãn kãn ja tũ nÿ, ver sóg tá krÿg ja tũ nÿ. Hã ra sóg vãsãn tÿ, sÿ komër hã ti ki kanhrãn kãn jé, ti tÿ inh ki kanhró nÿ ãn ri ke, isÿ tÿ ti tũ jën kÿ, Cristo ti.

¹³ Inh kanhkã', ver sóg tá krÿg ja tũ nÿ. Hã ra sóg tag han mũ, ha mẽ. Vësÿjãm sóg mũ êkrén mãn tũ nÿ ha, vãsãn mãn', vãsãn mãn', he jé sóg ke mũ ha, isÿ kejën tá krÿg jé.

¹⁴ Ag tÿ jagnë mré pétë ri ke han sóg tÿ mÿr. Jagnë mré ag tóg pétë tÿ, ù tóg ganhar he sór tÿ. ãn ri ke han sóg tÿ. Inh ganho vÿ tÿ isÿ rÿr krÿg ja tũ venh ke ti nÿ. Hã jé Topë tóg ãg kuprëg, Jesus Cristo tigrÿn.

¹⁵ Û tÿ Jesus to sygsanh mũ ag jé inh kóm han kãn. Û tÿ hã ra to: “hã tũ vë,” hen kÿ Topë jé ti kanhrãn.

¹⁶ Kÿ ãjag tÿ ti jykre mëg mũ tag hã jagma mũmnÿ, ãjag tÿ tá junjun jé.

¹⁷ Inh kanhkã', inh jykre hã han kãn nÿ. Kÿ ù tÿ inh jykre ri ke han mũ ãn jykre tugnÿm nÿ gé, ãjag tÿ ag mré hã han jé.

¹⁸ Û ag tóg ón kÿ Jesus Cristo ki ge kÿ nÿtÿ, hã ra ag tóg ti jykre kato vãsãnsãn mũ, Jesus tÿ ãg jagfy cruz to ter mũ ra. Ag kãmén inh huri mÿr, ãjag mÿ. Tó tÿ hën ri ke han isóg huri. Hã ra sóg ãjag mÿ ag tó mãn ke mũ gé sir. Inh fe kaj tóg tÿ, kÿ sóg fÿ mũ sir, ag jykre to.

¹⁹ Nũgme ki ag tóg vár ke mũ, inferno ki, ha mẽ. Jën há tãvÿ han sór ag tóg mũ, tag hã tóg ag mÿ sér tÿ. Nén tÿ ãg mÿ'a han tÿ tag hã tóg ag mÿ sér tÿ. ãg tÿ tag mũ vég tÿ ãn hã to ag tóg jykrén sór tÿ.

²⁰ Ag jãvo ãg jamã vÿ tÿ kanhkã ti nÿ. Kanhkã tá tóg kãtÿg ke mũ, ãg kren han ke mũ ti, hã vÿ: ãg Senhor tÿ Jesus Cristo, he mũ. Ti hã jãvãnh ãg tóg nÿtÿ.

²¹ Ti hã ne tóg ãg han mãn ke mũ', ã kãtÿg kÿ'. ãg tÿ ga kri mũn kÿ ãg tóg ver krój nÿtÿ, ãg

tỹ tỹ êprã ke nýtĩn kỹ. Ti tỹ êg han mãn kỹ, ti tỹ êg mỹ êg fár tãg han ken kỹ, kỹ êg tóg ti ri ke nýtĩnh mũ, ti mág ri ke, ti tar ri ke, ti sĩnvĩ ên ri ke. Ti hã tóg êg tỹ ù tãg han mãn ke mũ, ti tỹ tỹ ùn tar nĩn kỹ. Ti tar tugnĩn tóg nén kar tỹ ã krêm ke han mãn ke mũ gé.

4

Paulo tỹ êg jyvẽn

¹ Inh kanhkã', tỹ ãjag tóg inh mỹ inh jãvy ri ke nýtĩ, kỹ tóg sỹ ãjag venh há tĩgtĩ, sỹ ãjag to há nĩn kỹ. ãjag hã tugnĩn inh fe tóg mrin ke tĩ, ãjag hã tigrĩn sóg tỹ ùn mág jẽ. ãjag to sóg há pẽ nĩ. Hã kỹ tar nýtĩmnĩ, êg Senhor jykre to.

² Vãhã sóg Evódia fi jyvẽn sór mũ, Síntique fi ke gé, ha mẽ. “Jagnẽ mré vẽnh jykre pir hã han nĩ,” he sóg mũ, ãjag mỹ. “Jesus mré ke vỹ tỹ ãjag nýtĩ, kỹ jagnẽ kato vãsãn tũg nĩ,” he sóg tĩ.

³ Kỹ sóg ã mỹ ke mũ gé, vỹ. Inh ri kén ã tóg êg Senhor rãnrãj han tĩ. Kỹ fag jyvẽn nĩ, fag tỹ jagnẽ to há nýtĩ jé. Inh mré fag tóg vẽnh kar mỹ Jesus kãmén tĩ, kỹ fag tóg Clemente mré Topẽ vĩ ti tó tĩ gé, inh mré ti tó mũ kar ag mré ke gé. Fag jygjy vỹ rãnrãn kỹ nýtĩ, Topẽ livron ki, hã kỹ fag tóg rĩr krỹg ja tũ venh ke mũ. Hã kỹ tóg tỹ ù nỹ, fag tỹ jagnẽ to jũ ti.

⁴ Êg Senhor mré ke vỹ tỹ êg nýtĩ, kỹ mỹ sér nýtĩmnĩ. Tag tó inh huri, hã ra sóg tó mãn ke mũ sir, ha mẽ. Mỹ sér nýtĩmnĩ mỹr, ha mẽ.

⁵ Vẽnh kar to fe nýtĩmnĩ. Êg Senhor kãtĩg mãn ke vỹ kako tĩ ha, ha mẽ.

⁶ Krĩ kufy nýtĩ tũg nĩ. Nén kar tómnĩ, Topẽ mỹ, ti mré vĩn kỹ. Kỹ ti mỹ nén kar to vĩmnĩ gé, ãjag tỹ nén ve sór mũ kar to. Kỹ ti mỹ nén kar to: “há ti nĩ,” hemnĩ gé, ãjag tỹ ti mỹ agradecer hen kỹ.

⁷ Kỹ Topẽ vỹ ãjag krĩ tỹ kuprã' henh ke mũ. Êg tỹ nén kar to jykrén há ra êg tóg vėsóg ki êg krĩ kuprãg ki kagtĩg nýtĩ. Ti hã ne êg fe tỹ há' he tĩ', ti hã ne êg krĩ kuprãg tĩ', kỹ tóg kuprã pẽ nĩgtĩ sir, ti tỹ êg krĩ tỹ kuprã' hen kỹ, êg tỹ Jesus Cristo ki ge kỹ nýtĩn kỹ.

⁸ Inh kanhkã', vãhã sóg ãjag mỹ nén ù tó sór mũ gé. Nén ù há hã to jykrén nĩ, hã vỹ: “ki hã tó,” he mũ. Êg tỹ nén ù to: “há ti nĩ,” he ên hã to jykrén nĩ. Vẽnh jykre kuryj hã to jykrén nĩ, nén ù jãnhkri hã to jykrén nĩ. Nén ù sĩnvĩ kar to jykrén nĩ gé, ki hã ke kar to. Tag kar to êg tóg: sér ti tĩ, he tĩ, hã kỹ to jykrén mág han nĩ.

⁹ ãjag kanhrãn mág sóg huri, sỹ ãjag mỹ ti jykre kãmén kỹ. Kỹ ãjag tóg inh jykre tugnỹm ja nĩ gé. ãjag tỹ isỹ nén han mũ ên hã han nĩ. Kỹ ù tỹ êg krĩ kuprãg mũ ên hã vỹ ãjag tar han ke mũ, Topẽ ti.

Paulo tỹ ag mỹ agradecer he

¹⁰ Ha vé, inh fe tóg mrin ke mũ, ãjag tỹ inh mỹ nén ù jẽnẽn kỹ. Kỹ sóg to Topẽ mré vĩ há han', vĩ há han' he mũ. Inh mĩ ãjag tóg êkrég mũgtĩ, hã kỹ ãjag

tóg inh mÿ nén ù jēnē mǎn. Vāsÿ ājag tÿ inh mÿ ne jēnēnh ke tóg tũ tĩ, hǎ kÿ ājag tóg inh mÿ nén ù jēnē ja tũ nĭgtĩ. Vǎhǎ tóg jun, ājag tÿ inh mÿ nén jēnēg mũ ti.

11 Hǎ ra sóg ājag mÿ isÿ nén ve sór mũ ěn ti tó ja tũ nĩ. Sÿ nén vég mũ kar vÿ inh mÿ há nÿ.

12 Isÿ nén ù vég tũ (hǎ) ra tóg inh mÿ há nÿgtĩ gé. Isÿ nén ù e vég mũ ra tóg inh mÿ há nÿgtĩ gé. Nén kar tag ve sóg huri. Kejēn sóg tógá nĭgtĩ, kejēn sóg kókĭr nĭgtĩ. Kejēn sóg nén ù kar vég tĩ, kejēn sóg nén ù vég tũ nĭgtĩ.

13 Nén kar to sóg tar nĩ, ěg Senhor tÿ isar han kÿ.

14 Hǎ ra tóg há nÿ, ājag tÿ inh jagǎgtǎn kÿ, ājag tÿ inh jagtar nĩ tag to jykrén kÿ.

15 Vāsÿ ājag tóg inh mÿ ù nĭm ja nĭgtĩ gé, isÿ ājag mÿ Jesus kǎmén vén kÿ. Sÿ ga tÿ Macedônia ki kutē kÿ ājag hǎ tóg inh mÿ nén ù jēnē ja nĭgtĩ, ājag pir mÿ, ājag, hǎ vÿ: Filipos tá ke ag, he mũ. Û pi(jé) ājag mré isÿ nén vég mũ to jykrén ja nĭgtĩ', isÿ nén vég tũ ěn to ke gé. Ājag pir mÿ ājag tóg inh mré to jykrén inh hǎ, tag ki kanhró ājag tóg nÿtĩ.

16 Isÿ cidade tÿ Tessalônica tá nĭn kÿ ājag tóg inh mÿ nén ù jēnē mǎn ja nĭgtĩ gé, kar kÿ ājag tóg ù jēnē mǎn', ù jēnē mǎn' he ja nĭgtĩ gé, ājag tÿ inh ki rĭr há han jé.

17 Hǎ ra sóg isÿ jǎnkamy venh ke ěn to jykrén sór tũ nĭgtĩ. Ājag tũ mág nÿtĩ kÿ tóg inh mÿ há tĩ.

18 Nén kar vÿ inh ki junjun há han, kÿ sóg ve kǎn mũ, sÿ nén ve sór mũ ěn ve kǎn inh huri. Epafrodito vÿ inh mÿ vin kǎn, ājag tÿ inh mÿ nén jēnēg mũ ti. Topē mÿ nĭm ja vĕ, ājag tÿ inh mÿ nén nĭm ja ti, kÿ tóg ti mÿ sér tĩ sir. Ti mÿ tóg ājag tÿ ti mÿ nén ger há pũn ěn kri nĩ nĩ sir, ājag tÿ inh mÿ nén jēnēg mũ ěn ti.

19 Ěg jóg tÿ Topē vÿ ājag mÿ nĭm kǎn ke mũ, ājag tÿ nén ve sór mũ ěn ti. Ti hǎ ne tóg nén kar tÿ tũ nĩ', kanhkǎ tá nĩ ěn ti', hǎ kÿ tóg ājag mÿ nén kar nĭm ke mũ, Jesus Cristo tugrĭn.

20 Ěg kar jé ěg jóg tÿ Topē to: "tÿ ti ùn mág nĩ, tÿ ti ùn tar nĩ," hé, kÿ ěg tÿ ti mÿ vĭ há han vÿ tũ' henh ke tũ nĩ. Hǎ vĕ.

Paulo tÿ ag mĩ ěkrén

21 Û tÿ Jesus Cristo ki ge kÿ nÿtĩ kar ag mĩ sóg ěkrég tĩ. Ěg kanhkǎ tÿ tag ki inh mré nÿtĩ ag vÿ ājag mĩ ěkrég tĩ gé.

22 Kar kÿ tag mĩ ù tÿ Topē ki ge kÿ nÿtĩ kar ag vÿ ājag mĩ ěkrég tĩ gé, pǎ'i tÿ imperador ĩn tÿ palácio krĕm nÿtĩ ag kar ke gé.

23 Ěg pǎ'i tÿ Jesus Cristo jé ājag tar han. Hǎ vĕ.

PAULO TỸ CARTA HAN: COLOSSOS TÁ KE AG MỸ CARTA

1 Paulo tỹ rá vễ. Topẽ vỹ inh fêg, sỹ tỹ Jesus Cristo apóstolo jê jé. Hã kỹ sóg ãjag mỹ carta tag rán mũ. Kỹ êg régre tỹ Timóteo vỹ inh mré rán mũ gé.

2 Êg tỹ cidade tỹ Colossos tá Topẽ tũ ag mỹ rán hã vễ, êg kanhkã ag mỹ, ù tỹ Cristo ki ge tovãnh tũ ag mỹ. Êg jóg tỹ Topẽ jé ãjag tar han, ti jé ãjag krĩ kuprãg.

Topẽ kuprĩg tỹ êg tar han

3 Êg Senhor tỹ Jesus Cristo panh mỹ sóg vĩ há han tĩ, ãjag to, ti mỹ sóg agradecer he tĩ, kurã kar ki, sỹ Topẽ mré vēmén kỹ.

4 ãjag tỹ Jesus Cristo ki ge tag mẽ inh, kỹ ãjag tóg nễji jagnê to há tâvĩ nỹtĩ gé, Topẽ ki ge kỹ nỹtĩ ag kar to ke gé.

5 Topẽ tỹ kanhkã tá êg mỹ nén (ũ) ven ke mũ ên hã to jykren ãjag tóg tĩ nễji. Ti tỹ êg mỹ nén ù ven ke mũ mẽ ãjag tóg huri. ãjag tỹ Cristo kãme sér ên mẽ kỹ ãjag tóg tag mẽ gé.

6 Ga kar mĩ tóg tĩ ha, vễnh vĩ há tag, hã kỹ tóg ãjag ki jun ja nĩ gé. Vễnh vĩ há tag tóg Topẽ mỹ êkré kanẽ ri ke han tĩ, vễnh kar tỹ ti ki ge kỹ. Hã kỹ ãjag tóg ti ki ge gé, ãjag tỹ ti vĩ mẽ vén kỹ. Ên kã ãjag tóg Topẽ tỹ êg jagãgtãn ki kanhrãn ja

nĩ, kỹ ãjag tóg ki kanhró nỹtĩ ha.

7 Û tỹ ãjag mỹ tó vén mũ vỹ tỹ Epafras nĩ. Jagnê to há tâvĩ êg nỹtĩ, Epafras mré. Inh mré tóg Cristo rãnrãj han tĩgtĩ. ãjag ki rĩr há han tóg tĩ, ãjag mỹ ti vĩ kãmén kỹ. To krónh ke tũ ti nĩgtĩ.

8 Ti hã vỹ inh mỹ ãjag tỹ êg to há nỹtĩ tag tó, Topẽ kuprĩg tỹ ãjag tỹ êg to há nỹtĩ han mũ ên ti.

9 Epafras vĩ mẽ kỹ sóg ãjag jagfỹ Topẽ mré vēmén tĩ sir. Ti mỹ sóg to vĩ tĩ, ãjag tỹ ti tỹ ãjag ki nén ve sór mũ ên ki kanhrãn kãn jé, ti tỹ ãjag mỹ krĩ há nĩm jé, ti tỹ ã kuprĩg tỹ ãjag kanhrãn jé.

10 Kỹ ãjag tóg êg mré êg Senhor jykre ki tỹ króm kenh ke ki kanhró nỹtĩnh mũ gé, ãjag jykre tỹ ti mỹ há nỹn jé. Êg tỹ vễnh jykre há han kỹ êg tóg ti mỹ êkré kanẽ há ên ri ke han tĩ. ãjag tỹ tag han kỹ tóg há tĩ. Kỹ ãjag tóg Topẽ ki kanhrãn há han ke mũ gé sir.

11 Kỹ ãjag tóg tỹ ùn tar nỹtĩnh mũ gé sir. Ti hã ne ãjag tar han tĩ', ti tar nĩn kỹ. Kỹ ãjag tóg ti to krónh ke tũ nĩgtĩ. Vễnh kar to ãjag fe nỹtĩnh mũ.

12 Kỹ tóg ãjag mỹ sér tĩnh mũ gé. Kỹ ãjag tóg êg jóg mỹ vĩ há han ke mũ. Ti hã ne ãjag tỹ há' he mũ', ãjag tỹ kanhkã ve jé. Ti tỹ êg krĩn ken kỹ êg tóg kurã krỹgja tũ ên venh ke mũ, kỹ ãjag tóg venh ke mũ gé, êg mré.

13 Êg kygva tóg huri, hã kỹ êg tóg tỹ kuty tân ag krêm ke tũ nỹtĩ ha. Topẽ kósin krêm ke

vỹ tỹ ẽg nỹtĩ, ũri, Topẽ tỹ ũ to: inh fe, he mũ ẽn krẽm.

¹⁴ Ti hã ne ẽg kren han mũ', ti hã tugrĩn Topẽ tóg ẽg mỹ vẽn pãte fón mũ, ẽg tỹ ti vĩ mranh ja ti.

Jesus tugrĩn nén kar tóg vẽn ven ke mũ

¹⁵ Topẽ ri ke pẽ ti nĩ, ti kósin ti. Ẽg pi(jé) Topẽ vég tĩ'. Ẽg tỹ ti kósin ve kỹ ẽg tóg Topẽ ki kanhró nỹtĩ. Ẽ panh kósin ve vĩ tỹ ti nĩ. Topẽ tỹ nén (ũ) kar hyn han kỹ tóg ả panh mré nĩ nĩ, ti kósin ti.

¹⁶ Ẽ kósin tugrĩn tóg ả tỹ nén (ũ) kar hyn han tĩ ẽn nĩm ja nĩgtĩ gé, Topẽ ti. Kanhkã tá ke ẽn hyn han kãn ja ti nĩgtĩ, Topẽ ti, ả kósin tugrĩn, ga kri ke kar hyn han ja ti nĩgtĩ gé, ẽg tỹ nén vég tĩ kar hyn han ja ti nĩgtĩ gé, ẽg tỹ nén ve vãn kar hyn han ja ti nĩgtĩ gé. Pã'i kar hyn han ja ti nĩgtĩ gé, ũn tar ag kar, ũn mág ag kar hyn han ja ti nĩgtĩ, ũn kãsir kar ag mré hã. Ẽ kósin tugrĩn tóg nén ũ kar hyn han ja nĩ, kỹ tóg ti hã mỹ hyn han kãn ja nĩ, nén (ũ) kar ti.

¹⁷ Nén kar tỹ vẽn ven tũg ki tóg kã nĩ nĩ, Cristo ti. Ti tugrĩn nén kar tóg vãnã vẽn ven kãn tĩ.

¹⁸ Ti ki ge kỹ nỹtĩ kar ag krĩ ri ke ti nĩ, kỹ ẽg tóg ti há ri ke nỹtĩ. Ẽn ve vĩ tỹ ti nĩ, kỹ tóg rĩr mãn gé, ti ter kar kỹ, ẽg rĩr mãn ken jo. Nén (ũ) kar kri ke vĩ tỹ ti nĩ.

¹⁹ Topẽ mỹ tóg sér tĩ, ti kósin tỹ ti ri ke pẽ nĩn kỹ, ti tỹ tỹ ti ve pẽ nĩn kỹ.

²⁰ Kỹ tóg ti ter tugrĩn vẽn kar to há nĩ ha, Topẽ ti, Jesus tỹ cruz to sa tugrĩn, ti kyvénh jamẽn kỹ. Kỹ Topẽ tóg ẽg to jũ tũ nĩ ha, ũ tỹ ga kri mũ ag to, kanhkã tãn ag to ke gé.

²¹ Hã kỹ tóg ả jag to há nĩ ha, ke gé. Vãsỹ ả jag tóg vẽn jykre kórég hã han ja nĩgtĩ, hã kỹ ả jag tóg Topẽ kato vãsãnsãn ja nỹtĩgtĩ.

²² Hã ra ti kósin tóg ẽg ri ke mur ja nĩ, kỹ tóg ẽg jagfy ter ja nĩ, hã kỹ Topẽ tóg ả jag to há nĩ ha, ả jag tỹ tỹ ti tũ nỹtĩ jé, ả jag tỹ há pẽ nỹtĩ jé, kỹ ả jag jykre si ẽn tóg tũ tĩ ha.

²³ Hã jé ti ki ge tovãn tũg nĩ. Tar nỹtĩm nĩ, ti to krónh ke tũg nĩ. ả jag tỹ Jesus kãme sér ẽn mẽ kỹ ả jag tóg Topẽ tỹ ẽg mỹ nén (ũ) vin ke mũ ẽn kãme mẽ ja nĩgtĩ gé. Tag hã mĩ ẻkrén nĩ, tovãn tũg nĩ. Ga kri mũ kar ag vĩ mẽg mũ ha, Jesus kãme sér ẽn. Inh rãnhrãj hã vẽ, sỹ ag mỹ tónh ke ti, inh, hã vĩ: Paulo, he mũ.

Paulo tỹ vễsỹrẻnh mág ja

²⁴ ả jag jagfy sóg vễsỹrẻnh mũ. Hã ra tóg inh mỹ sér tĩ. Cristo vĩ vễsỹrẻnh mág, ẽg tỹ ti ki ge jé, kỹ ẽg tóg ti vễsỹrẻnh ẻn ri ke han ke mũ gé, ũ tỹ hẻn ri ke ag tỹ ẽg tugrĩn ti vĩ ki króm sór jé.

²⁵ Topẽ ne inh mỹ: “ha vẽn kar mỹ inh vĩ ti tó,” he ja nĩgtĩ', sỹ ti rãnhrãj ki rĩr jé, sỹ ả jag mỹ tó jé gé, ti vĩ ti. Ti tỹ ả jag mỹ vẽn vĩ jẻnẻ vẻ.

²⁶ Topẽ tóg vãsỹ ả tỹ nén han ke to jykren ja nĩgtĩ, ả tỹ nén (ũ) kar hyn han tũg ki tóg to jykren ja nĩgtĩ. Hã ra tóg ẻn

kã ù mÿ tó ja tũ nĩ ver. Vãhã tóg ù tÿ ti ki ge mũ ãn ag mÿ tó mũ, ti tÿ vãsÿ nén to jykrén ja ãn ti.

²⁷ Ëg hã mÿ tóg tó mũ ha, ti tÿ povo kar mÿ nén ù há tãvĩ vin sór mũ ti, hã kÿ tóg to hã ù mÿ tó jã tũ nĩ ver, ti tÿ ãg hã mÿ tó sór kÿ. Ti tÿ ãg mÿ nén vin ken hã vë, ha mẽ: Cristo vÿ ãjag kãtã jamãn nĩ ha, hã kÿ ãjag tóg ãg tÿ kanhkã tá nén venh ke ãn ti venh ke mũ gé sir, ãg mré, ù tÿ ti ki ge kÿ nÿtĩ ag.

²⁸ Cristo jykre tag hã tó inh tĩ, vënh kar mÿ. Vënh kar kanhrãn há han sóg tĩ, Topẽ tÿ inh mÿ krĩ há nĩm jan tugrĩn. Kÿ sóg vënh kar jyvën tĩ gé, ag tÿ ti ki ge há han jé, ag tÿ kygnë sór tũ nĩ jé. Kÿ ag tóg há pë nÿtĩnh mũ, ag tÿ Cristo ki ge kÿ.

²⁹ Hã to sóg vãsãn tĩ, kÿ sóg to ron tĩ gé. Ti hã ne isar han tĩ, ti tar nĩn kÿ.

2

¹ Ha vé, ãjag jagfy sóg vënh rãnrãj mág pë to vãsãn tĩ, Laodicea tá ke ag jagfy ke gé, ù tÿ inh ve ja tũ ag jagfy ke gé. Inh mÿ tóg há tĩ, ãjag tÿ isÿ vãsãn tag mẽn kÿ.

² “Ag tÿ tag mẽ kÿ ag hÿn tóg nén ù kamëg ke tũ nĩ, kÿ ag hÿn jagnë to há kar nÿtĩnh mũ,” he sóg tĩ. Kÿ ãjag tóg ki kanhrãn ke mũ gé, Topẽ tÿ nén to jykrén mũ ãn ti. Inh mÿ tóg ãjag tÿ tag ki kanhrãn kãn há tĩ, inh mÿ tóg ãjag tÿ to krĩ há nÿtĩnh há tĩ. Topẽ tÿ nén to jykrén jan hã vÿ tÿ Cristo nĩ.

³ Ëg tÿ ti ki kanhrãn kÿ ãg tóg Topẽ ki kanhró nÿtĩnh ke mũ gé. Ti pãte ãg tóg vënh vĩ sér ù ve mãn ke tũ nĩ, ti hã tugrĩn ãg tóg Topẽ ki kanhrãn kÿ nÿtĩ.

⁴ Tag kãmén sóg mũ ãjag mÿ, ù tÿ ãjag krĩn kónãn tũ nĩ jé. Û tÿ ãjag krĩn kónãn sór mũ vĩ tóg há nĩ ve nĩ, hã ra tóg tÿ hã tũ nĩ.

⁵ ãjag vég tũ sóg nĩ. Hã ra sóg ãjag ki ãkrég tĩ, kÿ tóg sÿ ãjag ve ãn ri ke tĩ inh mÿ. Inh mÿ tóg sér tĩ, ãjag tÿ Cristo ki ge tovãnh tũ nĩn kÿ, ãjag tÿ ti to tar tãvĩ nÿtĩn kÿ.

Cristo jykre

⁶ Ha vé, Jesus Cristo ki ge kÿ ãjag nÿtĩ, ãg Senhor ki. Kÿ ti jykre hã han nĩ.

⁷ Ti hã vÿ ãg mÿ ga ri ke nĩ. Ti ki jãre han nĩ, ka jãre ãn ri ke han nĩ. Kÿ tóg ãg mÿ ãn tÿ kri jë jafã ri ke nĩ gé, ãn nũna tÿ kri gunh kÿ fëg ãn ri ke ti nĩ gé. Ti ki ge tovãnh tũg nĩ. Tag hã mẽ ãjag, ãjag tÿ ti vĩ mẽ vén kÿ. Kÿ to tar nÿtĩmnĩ, Topẽ mÿ vënh vĩ há tó kÿ.

⁸ Ha vé, vëso jykrén. Inh mÿ tóg ù tÿ ón kÿ ãjag krĩn kónãn sór ha mẽ tĩ. Û tóg krĩg tãn tó tĩ, ù tóg nén ù tãn tó tĩ gé. Nén kórég mré ke ag vë, nén ù tãn kar ti. Kÿ ù tóg ãprã ke jykre tó tĩ gé. Cristo jykre tũ vë, ãprã ke jykre kar ti. Hã kÿ ù tÿ ãjag mÿ tag tó sór mũ ag vĩ jëmë tũg nĩ.

⁹⁻¹⁰ Cristo vÿ tÿ nén (ũ) kar kri ke nĩ, pã'i kar kri ke vÿ tÿ ti nĩ. Ti fãr vÿ ãg ri ke ja nĩgtĩ, ti tÿ ga kri tĩ mũn kÿ, hã ra tóg tÿ Topẽ jë nĩ, ti fãr kãkã ti jë nĩ,

Topē ti. Topē pē hã vë sir. Kÿ ãjag tóg há nÿtĩ gé sir, ãjag tÿ ti ki ge kÿ, há tâvĩ.

11 Kÿ, ãg tÿ ãg gré junun fár kym mũ vÿ ge nĩ, ha mẽ. Ti ki ge kÿ ãg tóg ãg jykre si tovãnh mũ sir. Judeu ag tóg ãjag gré junun fár kym ja nĩgtĩ, vënh kar tÿ ag tÿ Topē jykre hã han mũ ãn ki kanhró nÿtĩ jé. Ūri ãg tóg ãg jykre si tovãnh mũ, vënh kar tÿ ãg tÿ Topē jykre han mũ ki kanhró nÿtĩ jé. ãg tÿ ti mré ter ri ke ti nĩ, ãg tÿ ãg jykre si tovãnh mũ ti, kÿ ãg tóg ãg tÿ nén ũ to én mũ ãn han mãn ke tũ nĩ. ãg tÿ Cristo mÿ vënh fëg to ken hã vë.

12 Ti mré ter ri ke han kÿ ãg tóg vënh kej kãkã nÿ ri ke han mũ gé, ti mré. Vënh kype to ken hã vë, batismo to ken hã vë, hã vÿ: ti mré vënh kej kãkã nÿ ri ke han mũ, he mũ. Kÿ ãg tóg ti mré rĩr mãn ri ke han mũ gé sir, ãg tÿ goj kãtã kãkutē kÿ. ãg jykre si tÿ tóg hur tũ' hé, kÿ ãg rĩr mãn vë sir. Topē vÿ Cristo rĩn mãn, ti ter kÿ. ãg tÿ ti ki ge kÿ tóg ãg rĩn mãn mũ gé sir.

13 Vãsÿ ãjag tóg vëser ri ke nÿtĩ ja nĩgtĩ. ãjag tÿ ti vĩ mranh tugrĩn, ãjag tóg ãjag kãgter ra mũ ja nĩgtĩ, ãjag gré junun fár kym tũ ja tugrĩn. Hã ra tóg ãjag rĩn mãn ja nĩgtĩ, Cristo mré Topē ti. ãjag mÿ tóg hur vënh pãte fón, ãjag tÿ vënh jykre kórég han ja ãn ti tÿ.

14 ãg név(e) rá ãn tÿ tóg tũ' hé huri, ãg mÿ. Rãn kÿ tóg nĩ ja nĩgtĩ, ãg név(e) ãn ti, hã vÿ:

ãg tÿ ti vĩ mranh, he mũ. Tag to tóg ãg to jũ ja nĩ vë. Hã ra Cristo tóg tÿ tũ' hé. Cruz to tóg ti sa, ãg név(e) ãn ti, kÿ tóg tÿ tũ' hé. Kajãm kãn tóg huri.

15 Kÿ tóg Japo pã'i kar ag tÿ tũ' he ja nĩgtĩ gé, ũn tar ja ãn ag tÿ. Cruz to sa kÿ tóg ag tar tÿ tũ' hé, ũ tÿ ti kato vãsãnsãn mũ ãn ag tÿ, kÿ ãg kar tóg ag vënh ke mũ, kÿ ãg tóg ag to é henh ke mũ sir. Cristo tóg ag pan kar kÿ ag tatĩn tĩg kãn ke mũ, nũgme ki ag vãm jé. Tag ve jé ãg tóg ke mũ.

16 Kÿ ũ tÿ vëjën há to ãjag mÿ: “ã tÿ tag kon kÿ Topē tóg ã to jũnh mũ,” hen kÿ hã ra kri nĩm tũg nĩ. Kurã kórég tó sór ag tóg tĩ gé, festa kar, kysã tãg ke gé, vënh kãn ke kurã ke gé.

17 Vãsÿ ke ja vë, vënh jykre tag, Cristo kãtĩg ke jo ke ja vë, tag. Cristo kãtĩg kÿ ãg tóg vënh jykre tãg vëg nÿtĩ ha, kÿ ãg ti si tovãnh mũ sir.

18 Ū tóg ãjag mÿ Topē tÿ jënē jafã ag tó sór mũ gé. “Topē tÿ jënē jafã vëg sóg tĩ, tag hã tóg inh mÿ sér tĩ,” he ag tóg tĩ. “Isÿ tÿ nén ũ tũ (hã) ra sóg vëg tĩ. Kÿ sóg kanhkã tãn tag ag mÿ jãn sór tĩ,” he ag tóg tĩ, ón kÿ. Hã ra ag tóg tag hã to (ag tóg) tÿ ũn mág nÿtĩ sór mũ, ãjag kãfór nÿtĩ sór ag tóg mũ.

19 Ag pi(jé) Cristo jykre han sór mũ'. Cristo jykre hã tóg ã pir mÿ tar nĩ. ãg krĩ ri ke ti nĩ, Cristo ti, kÿ ãg tóg ti há ri ke nÿtĩ, ãg tÿ ti ki ge kÿ nÿtĩn kÿ. ãg krĩ vÿ ãg tÿ nén (ũ) han sór mũ ãn han tĩ, ãg kujej tÿ, ãg mó tÿ ke gé. Kÿ ãg há tóg mog mũ sir, ti tÿ ãg krĩ mré

věnh jykre pir han kŷ. Kŷ ěg tóg Cristo jykre han ke mũ, ti tŷ ěg krŷ ri ke nŷn kŷ. Hã ra ag tóg tag han sór tũ nŷ, ũ tŷ ãjag krŷn kónãn tŷ ag.

Jesus mré ěg rŷnrŷ nŷtŷnh

²⁰ Hã kŷ ãjag tóg Cristo mré ter ri ke han. Krŷg tân kórég ag pi(jé) ãjag tŷ hē ri ke mãn mũ ha', nén ũ ũ kar tân kórég ag ke gé. Kŷ ag jykre ěn vŷ ãjag mŷ tũ' hé. ãjag tŷ ne jé han mãn sór nē? Ke tũg nŷ. ãjag pi(jé) tŷ ag mré ke nŷtŷ'. ãjag tŷ ne jé ag tŷ ãjag mŷ vŷ jēmē sór nē, ag tŷ ón kŷ vĕjĕn há to:

²¹ “tag vóg tũg nŷ, Topĕ mŷn kórég nŷ, tag ko tũg nŷ, ěn vóg tũg nŷ,” hen kŷ? Ag vŷ tag jēmē tũg nŷ.

²² Ěprã ke ag jykre vĕ, tag ti. Tag mŷ ke vĕ, ěg tŷ nén (ũ) vóg mũ ti. Tũg kãn jé tóg ke mũ, kejĕn, hã kŷ ěg tóg Topĕ vŷ hã jēmĕg tŷ.

²³ Ag jykre vŷ há nŷ ve nŷ. Krŷ há nŷ ve ag nŷtŷ. Kanhkã tân to ag há nŷtŷ, ag to ag jãn tŷ, kŷ ag tóg vĕsŷ vĕnh kar krĕm ke nŷtŷ sór ve nŷ gé, vĕsãvŷn vóg kónãn ag tóg tŷ gé. Tag hã to jykren kŷ ag tóg vĕsŷ ũn mág han sór mũ jãvo. ãjag tŷ nén to ěn mũ ěn han ag tóg tŷ, vĕnh jykre tag han kŷ, hã kŷ ag vŷ jēmē sór tũg nŷ.

3

¹ Ha vé, Cristo mré ãjag tóg rŷnrŷ mãn. Hã kŷ ti jykre hã han sórmnŷ. Kanhkã tá tóg nŷ nŷ, Topĕ pĕgja tá ti nŷ, Cristo ti. Kŷ ti hã mŷ ěkrén nŷ, ãjag tŷ ti mré tá junjun ti jé.

² Ũ tŷ kynhmŷ nŷ ěn jykre hã han sórmnŷ. Ěprã vĕnh jykre to jykren tũg nŷ.

³ Ter jé ěg tóg ke mũ, ěg fár tag ti. Hã ra ěg tóg Cristo mré Topĕ ki vĕnh pĕju ri ke han. Ti tŷ ěg jy nŷgãn to ken hã vĕ, ěg ter pĕ han tũ nŷ jé, ěg tŷ ti mré rŷnrŷ nŷtŷ jé.

⁴ Kejĕn tóg vĕnh ven ke mũ, Cristo ti, ěg rŷnrŷ han mũ ti. Kŷ vĕnh kar tóg venh ke mũ, ěg tŷ ti mré rŷnrŷ nŷtŷ ti, ěg tŷ tŷ ũn mág nŷtŷ ti.

Ěg jykre si mré ěg jykre tãg

⁵ ãjag jykre si tovãnh nŷ, ãjag tŷ nén to ěn mũ ěn mŷ vĕnh nenh nŷ. Ěg jykre si hã vĕ, ha mĕ: ěg prũ tũ mré nŷ, ěg mén tũ mré nŷ, nén vĕnh mŷ kar han, Topĕ tŷ nén ũ to: “han tũg nŷ,” he mũ ra to ěn mũ, ã tŷ nén e hã tŷ vãsãn (ka)mĕ. Vĕnh kãgrá to jãn ěn ri ke ti nŷ, ěg tŷ ěg tŷ nén e hã tŷ vãsãn sór kŷ.

⁶ Tag tigrŷn Topĕ tóg ěg to jũ mũ, ti vŷ mranh hã vĕ.

⁷ Tag han ja ãjag tóg nŷtŷgtŷ, vãsŷ, ãjag tŷ vĕnh jykre kórég tag mŷ mŷn kŷ.

⁸ Hã kŷ tag tovãnh kãn.

Fe gŷv (ka)mĕ han tũg nŷ. Jagnĕ to krŷ rŷ han tũg nŷ. Ũ to jykren kónãn tũg nŷ. Ũ mŷ vŷ kónãn tũg nŷ, ũ to vŷ kónãn tũg nŷ gé.

⁹ Jagnĕ mŷ ón tũg nŷ gé. ãjag jykre si ěn tovãnh kãn nŷ, kŷ tóg ěg tŷ ěg kur si nŷnh ri ke nŷ.

¹⁰ Kŷ vĕnh jykre tãg hã han kãn nŷ gé, kŷ tóg ěg tŷ kur tãg tu ri ke nŷ. Ěg tŷ tóg ũ tãg

han sór mũ, Topê ti, ãg tỹ tỹ ti kãnhvæg ri ke nỹtĩ jé, ù tỹ ãg han mũ kãnhmæg ãn ri ke, ãg tỹ ti ki kanhrãn pẽ han jé.

11 Kĩ ãg tóg tỹ ùn pir nỹtĩ ha, fóg ag, Judeu ag, ù tỹ Judeu jykre han mũ ag, ù tỹ ag jykre han tũ ag ke gé, kanhgág ag, kanhgág jũ ag, patrão krẽm ke ag, ag patrão mré hã. ãg tỹ Cristo ki ge kũ ãg tóg tỹ ùn pir nỹtĩ, kũ Cristo hã vỹ tỹ ãg kar krĩg mũ ke nĩ.

12 Topê vỹ ãjag kupræg, ãjag tỹ tỹ ti tũ nỹtĩ jé, ti tỹ ãjag to há tãvĩ jẽn kũ. Kũ ti jykre hã han nĩ. Jagnẽ jagãgtãn nĩ. Jagnẽ mũ vĩ há han nĩ. Vẽsỹ ùn mág han sór tũg nĩ. Komẽr hã vĩmnĩ. Jagnẽ to fen mág nỹtĩmnĩ.

13 Jagnẽ to jũ tũg nĩ. Jagnẽ mũ vẽn pãte fón nĩ, ù tỹ ãjag mũ vĩ kórég han kũ. ãg Senhor vỹ ãg mũ vẽn pãte fón tĩ gé, kũ jagnẽ mũ vẽn pãte fón nĩ, ti ri kén.

14 ãjag tỹ jagnẽ fe ri ke nỹtĩn kũ tóg há kar tĩ. Kũ ãjag tóg vẽn jykre pir han ke mũ.

15 Cristo jé ãjag krĩ kuprãg, kũ ãjag tóg krĩ kãnhvy nỹtĩnh mũ ha. ãg krĩ kuprã nĩn kũ ãg tóg jatun mũ jagnẽ mré nỹtĩnh mũ, ãg tỹ Cristo há ri ke nỹtĩ jé. Hã jé tóg ãg jé prẽr, Topê ti. Kũ ti mũ tag to agradecer hemnĩ.

16 Cristo vĩ hã tỹ jagnẽ mũ tómnĩ, hã ki kanhrãn sómnĩ. Tag tỹ jagnẽ jyvẽn nĩ, tag hã to krĩ há han nĩ. Kũ Topê mũ vĩ há han nĩ gé. Ti mũ jãn nĩ, ti jé hã tómnĩ, ti kuprĩg tỹ ãjag mũ nén tó mũ ti. Ti hã mũ vĩ há

han nĩ, ti mũ: “inh mũ tóg há tĩ, ã tỹ inh mũ nén han mũ ti,” hemnĩ.

17 ãjag tỹ nén ù han kũ ãg Senhor mré vẽnén kar kũ han nĩ, ãjag tỹ ti jykre hã han jé. ãjag tỹ nén ù tó sór kũ ti hã mũ tó vén nĩ gé. ãg Senhor tỹ Jesus jykre hã han jé ãg tóg ke mũ, kũ ãg tóg ti hã tugrĩn (ãg tóg) ãg jóg tỹ Topê mũ vẽn vĩ há tónh ke mũ gé sir, ti mũ agradecer hen kũ.

ãg jykre tãg

18 Kũ sóg ùn mén nỹtĩ fag jyvẽn sór mũ. ãjag mén jykre mũ mũmnĩ. ãg Senhor jykren hã vỹ.

19 ãjag mén jyvẽn sór sóg mũ gé. ãjag prũ to há tãvĩ nỹtĩmnĩ. Fag mũ vĩ tar han tũg nĩ.

20 Kũ sóg ãjag krẽ mũ tag tó sór mũ gé. ãjag han mũ fag vĩ jẽmẽmnĩ. ãg Senhor vỹ tag ve sór mũ, ãjag ki.

21 Kũ sóg ùn sanh ag mũ: ãjag krẽ mũ vĩ tar pẽ han tũg nĩ, ag tỹ ãjag to jũ tũ nĩ jé, he mũ gé. Krõnh ke jé ag tóg ke mũ, ãjag tỹ ag mũ vĩ tar pẽ han kũ.

22 ãjag kãmĩ ù tóg patrão mũ rãnrãj tĩ, fagrĩnh mũ. ãjag jyvẽn kũ sóg ãjag mũ: ãjag patrão vĩ ki hã han nĩ, he mũ. ù tóg kejẽn ã patrão tỹ ti mũ vĩ há han hã jé tóg ã patrão tũ ki rĩr tĩ, ón kũ. Tag han tũg nĩ. ãjag patrão tũ ki rĩr pẽ han nĩ, ãjag tỹ ãg Senhor kamæg kũ. Vẽn jykre pir hã han nĩ, ãjag patrão mũ.

23 Ti rānhrāj ki rīr kŷ mŷ sér nŷtīmñī. Ājag tŷ ěg Senhor tŷ Jesus rānhrāj han ri ke ti nī, ājag patrāo rānhrāj han mŷ ti.

24 Ęg Senhor vŷ ājag mŷ ājag rānhrāj kajām ke mŷ, ājag tŷ ti tŷ kar ag mré tá junjun ken kŷ. Tá ti vin han kŷ nŷtī, ti tŷ ājag mŷ nén vin ke mŷ ěn ti. Ājag patrāo pē vŷ tŷ ěg Senhor tŷ Cristo nī. Ti hā mŷ ājag tóg rānhrāj tī.

25 Ũ tŷ vĕnh jykre pāno han mŷ ěn vóg kónān jé tóg ke mŷ, Topē ti, ag tŷ tŷ ũn mág nŷtī (hā) ra. Topē mŷ ěg tóg jagnē ri ke kar nŷtī, tag ki ũn mág ag mré ũn kāsir ag. Vĕnh kar vóg kónān jé tóg ke mŷ, vĕnh jykre pāno to, Topē ti.

4

1 Ājag kāmī ũ vŷ tŷ patrāo nŷtī, kŷ sóg patrāo hā jyvĕn sór mŷ ha. Ājag camarada ag vŷ ājag rānhrāj han tī. Kŷ ag mŷ vĕnh jykre kuryj han nī. Ag ki rīr há han nī. Patrāo ũ vŷ tŷ ājag krīg mŷ ke nī, hā vŷ: ěg Senhor, he mŷ, kanhkā tá nī ti. Tag to jykren.

Paulo tŷ ěg jyvĕn

2 Topē mré vĕmén tovānh tŷg nī. Ti mŷ: “inh mŷ tóg há tī,” hemñī gé. Mŷmĕg nī, ājag tŷ ti mré vĕmén to krónh ke tŷ nī jé.

3 Kŷ ti mré iso vĕmén nī gé. Topē vī tó sóg tī. Kŷ ti mŷ to vīmñī, ag tŷ inh vī mĕ há han jé, sŷ ag mŷ Cristo kāmén kŷ, sŷ ag mŷ Topē tŷ nén han sór mŷ ěn kāmén kŷ. Tag tugrīn sóg se kŷ jĕ.

4 Hā ra sóg tó há han sór mŷ, Topē tŷ inh mŷ vĕnh rānhrāj tag nīm kŷ. Hā jé iso ti mré vĕmén nī.

5 Ũ tŷ ěg jāvo Jesus ki ge tŷ ag mŷ vī há han nī. Kurā kren tŷg sórmñī.

6 Nén ũ há tŷ vĕmén nī, vĕnh kar mŷ sér tī jé, ag tŷ ājag vī mĕn kŷ. Kŷ ājag tóg vĕnh kar mŷ kāmén há han ki kanhró nŷtīnh mŷ.

Paulo tŷ ag mī ěkrén

7 Sŷ ājag mŷ Tíquico jĕnĕ vĕ, ti tŷ ājag mŷ isŷ nén (ũ) vĕg mŷ kāmén kán jé, isŷ nén (ũ) han mŷ ti ke gé. Ęg régre vĕ, Tíquico ti. Ęg to há tāvī ti nī. Ęg Senhor rānhrāj han ti tī, to krónh ke tŷ ti nĭgtī.

8 Ti hā vŷ sŷ nén vĕg mŷ tó kán ke mŷ, hā jé sóg ti jĕnĕg mŷ, ti tŷ ājag fe tŷ mrin ke jé.

9 Ti mré sóg ājag mré ke tŷ Onésimo jĕnĕg mŷ gé. Ęg régre vĕ gé, ěg to há ti nĭgtī gé, Topē ki rā to krónh ke tŷ ti nĭgtī. Ag hā ne ājag mŷ tónh ke mŷ', cidade tag ki nén kutĕ mŷ ti.

10 Aristarco vŷ inh mré se kŷ jĕ gé. Ājag mī tóg ěkrég tī. Marcos vŷ ājag mī ěkrég tī gé, Barnabé kanhkā ěn ti. Marcos to sóg ājag mŷ vĕnh vī jĕnĕ huri, ājag tŷ ti mŷ: “ha kārā,” he jé, ti tŷ kejĕn ājag tá jun ti kŷ.

11 Josué vŷ ājag mī ěkrég tī gé, ag tŷ ũ to: Justo, he mŷ tag ti. Judeu ag vĕ, Aristarco mré Marcos mré Josué ti. Inh mré ag tóg rānhrāj tī, Topē vī ki. Ag jāvo Judeu ũ ag vŷ inh mré rānhrāj jāvānh nŷtī gé. Kŷ ũ

tãgtũ tag ag tóg inh fe tỹ mrin ke tĩ, ag tỹ inh mré rãnrãj kỹ.

¹² Epafras vỹ ãjag mũ êkrég tĩ gé, ãjag mré ke tag ti. Jesus Cristo rãnrãj han kỹ tóg jẽ nĩ. ãjag to tóg Topẽ mré vēmén tĩ, to tóg vãsãn tĩ, to krónh ke tũ ti nĩgtĩ, ãjag tỹ kygnëg tũ nĩn jé, ãjag tỹ Topẽ tỹ ãg ki nén ve sór mũ ãn hã han sór jé, ãjag tỹ tag hã to tar nỹtĩ jé.

¹³ ãjag hã ki tóg êkrég tĩ, tag vég sóg tĩ, kỹ tóg Laodicéia tá ke ag mũ êkrég tĩ gé, Hierápolis tá ke ag mũ ke gé.

¹⁴ Lucas vỹ ãjag mũ êkrég tĩ gé, médico ãn ti, ù tỹ ãg to há tãvĩ ãn ti, kar kỹ Demas ti ke gé.

¹⁵ Laodicéia tá ãg régre ag mũ tómnĩ, sỹ ag mũ êkrég mũ ti. Nínfa fi mũ sóg êkrég tĩ gé, fi ãn tá vënh mãn jafã ãn ki.

¹⁶ ãjag tỹ vënh rán tag to ke kar kỹ Laodicéia tá Topẽ ki ge kỹ nỹtĩ ag mũ jënëmnĩ, kỹ tá ke ag tũ to kemnĩ gé, vënh kato, sỹ ag mũ carta jënëg mũ ti.

¹⁷ Kỹ Arquipo mũ: ãg Senhor tỹ ã mũ nén (ũ) tó mũ ãn han nĩ, to krónh ke tũg nĩ," hemnĩ.

¹⁸ Vãhã sóg vësóg ki ãjag mũ rán ke mũ ha', inh, hã vỹ: Paulo, he mũ. Isỹ se kỹ jẽ tag kã jatu' he tũg nĩ. Topẽ jé ãjag tar han tĩ. Hã vë.

PAULO TÏ CARTA HAN: TESSALÔNICA TÁ KE AG MÏ CARTA VE

¹ Paulo tÏ rá vĕ. Isÿ cidade tÏ Tessalônica tá ke ag mÏ rán hã vĕ. Tessalônica tá ãjag tóg vĕnh mǎn tĩ, Topĕ vĩ mĕ jé. Topĕ tũ vÏ tÏ ãjag nÏtĩ, ěg jóg mág ti. Jesus Cristo tũ vÏ tÏ ãjag nÏtĩ gé, ěg Senhor ti. SÏ ãjag mÏ vĕnh rá jĕnĕ vĕ, kÏ Silas vÏ jĕnĕg mũ gé inh mré, Timóteo ke gé. Topĕ mÏ sóg to vĩ tĩ, ti tÏ ãjag tar han jé, ti tÏ ãjag mÏ vĕnh jykre kusa nĩm jé.

Vĕnh kar tÏ Tessalônica tá ke ag jykre vĕg tĩ

² Kurã kar ki sóg ãjag to Topĕ mré vĩ tĩ. Ti mÏ sóg: “há ti nĩ, ã tÏ ag krĩn há han kÏ,” he tĩ, kurã kar ki.

³ SÏ ti mré vĩn kÏ sóg ãjag mĩ ěkrég tĩ. Ājag tÏ ti ki ge kÏ nÏtĩn kÏ ãjag tóg nĕn ũ há kar han mũgtĩ. Ājag tÏ ti to há nÏtĩn kÏ ãjag tóg rǎnhrǎj mág han mũgtĩ. Ājag tÏ ěg Senhor tÏ Jesus Cristo ve sór kÏ ãjag tóg to krónh ke tũ nĩgtĩ. Tag mĩ sóg ěkrég tĩ, kurã kar ki, sÏ Topĕ mré vĩn kÏ, ěg jóg mág mré.

⁴ Inh kanhkã', tÏ ěg tóg Topĕ fe nÏtĩ, ti tÏ ěg kuprĕg ja nĩn kÏ. Tag ki kanhró ěg tóg nÏtĩ.

⁵ SÏ ãjag mré nĩn kÏ sóg ãjag mÏ Topĕ vĩ sér tó ja nĩgtĩ. Inh pí(jé) inh jykre tÏ vĕmén ja

nĩgtĩ'. Topĕ jykre hã tÏ sóg vĕmén tĩ, Topĕ kuprĕg tÏ inh krĩn kÏ. Ti hã vÏ ěg tar han tĩ. Ki hã tó sóg mũ ãjag mÏ, tag ki kanhró ãjag tóg nÏtĩ. Isÿ ãjag mré nĩn kÏ ãjag tóg inh ve ja nĩgtĩ, hã kÏ ãjag tóg inh jykre ki kanhró nÏtĩ. SÏ ãjag to há nĩn kÏ, hã kÏ sóg ãjag mÏ tó ja nĩ.

⁶ Inh ri ke han sór ãjag tóg mũ, ěg Senhor ri ke ke gé. SÏ ãjag mÏ nĕn tó ja ěn kri fig ãjag tóg tĩ. KÏ ãjag tóg to vĕsÏrĕnh jagy han tĩ, ũri, pǎ'i ag tÏ ãjag to kórég nÏtĩn kÏ. Hã ra Topĕ kuprĕg vÏ tÏ ãjag jagrĕ nĩ, hã kÏ ãjag krĩ tóg kǎnhvy' he mũ, ãjag vĕsÏrĕnh mũ (hã) ra, ěprǎ.

⁷ Hã kÏ vĕnh kar tóg ãjag tÏ nĕn han mũ mĕg mũ sir, ga tÏ Macedônia tá, ga tÏ Grécia tá ke gé, ag tÏ ãjag kóm han kǎn jé sir, ũ tÏ Jesus ki ge kÏ nÏtĩ kar ag ke gé.

⁸ Vĕnh kar vÏ ãjag tÏ nĕn han mũ mĕgmĕ kǎn huri. Topĕ vĩ tó ãjag tóg mũ, hã kÏ ag tóg ga tÏ Macedônia tá mĕgmĕ, ga tÏ Grécia tá ke gé, ěmǎ kar mĩ hã. Ājag tÏ Topĕ ki ge mũ mĕgmĕ kǎn ag tóg huri. Isÿ ag mÏ tó sór kÏ ag tóg: “mĕ ěg huri,” he tĩ.

⁹ KÏ ag tóg inh mÏ kǎmén mũ, sÏ ãjag mÏ Topĕ vĩ tó ja ěn ti. “Ā vĩ kri fig ag nĕji mũ, Tessalônica tá ke ag,” he ag tóg tĩ inh mÏ, ãjag to. “Topĕ ki ge kÏ ag nĕji nÏtĩ, vĕnh kǎggrá tÏ topĕ tovǎnh kÏ, ag tÏ Topĕ vĩ hã han jé sir, ũn rĩr mũ vĩ ti, hã vÏ: Topĕ pĕ, he mũ,” he ag tóg tĩ ãjag to.

¹⁰ “Ti kósin nĕji vÏn kĕnh ke

mũ, kanhkã tá. Ti kãtĩg jãvãnh ag nẽji mũ,” he ag tóg tĩ. “Topẽ nẽji ti rĩn mãn, ti ter kar kũ, Jesus ti. Ên nẽji ãg krenkren han mũ, ãg tũ Topẽ jũ vóg tũ nĩ jé, Jesus kãtĩg jãvãnh ag nẽji mũ, Tessalônica tá ke ag,” he ag tóg tĩ ãjag to.

2

Paulo tũ ag mũ Topẽ vĩ tó há han

¹ Inh kanhkã', inh ve ãjag tóg, isũ ãjag mré nĩ ja nĩn kã. Isũ ãjag mũ Topẽ vĩ tó kũ ãjag tóg Topẽ ki rá. Tó há han ja sóg nĩ.

² Cidade tũ Filipos tá ag tóg inh vóg kónãn ja nĩgtĩ. Tá ag tóg iso é he ja nĩgtĩ. Tá kãkutẽ kũ sóg ãjag tá jun ja nĩgtĩ. Tag ki kanhró ãjag tóg nũtĩ. Ge ra sóg ãjag mũ tó, Topẽ vĩ sér ti. ãjag kamẽg ja tũ sóg nĩ, Topẽ tũ isar han kũ, sũ inh jagtar jagy ên ve ja ra.

³ Sũ ãjag jyvẽn kũ sóg ãjag mũ ki há tó ja nĩgtĩ, kygnẽ ja tũ inh nĩ. Nén ã vẽnhmũ tó ja tũ sóg nĩgtĩ gé. ãjag tũ nén ã to én ja tũ sóg nĩgtĩ gé.

⁴ Topẽ há ne inh jykre ve kũ inh mũ: “ha inh vĩ ti tó,” he ja nĩ'. Há kũ sóg tó mũ sir. Êprã ke ag tũ iso vĩ há han tũ ra tóg inh mũ tũ nén ã tũ nũ. Topẽ tũ iso vĩ há han ke tag há tóg inh mũ há nĩ'. Há jé sóg ti vĩ há ki króm sór mũ. Ti há ne ãg jykre ve kũ ãg ki kanhró nĩ', Topẽ ti.

⁵ Há kũ sóg ãjag mũ ón kũ: “há ãjag tóg nũtĩ,” he ja tũ nĩgtĩ. Tag ve ãjag mũr. ãjag tũ nén ã to én ja tũ sóg nĩgtĩ gé. ãjag

ki sóg ganho ve sór ja tũ nĩ gé. Topẽ há ne tag vé'.

⁶ Kũ êprã ke ag tũ iso vĩ há han tũ ra tóg inh mũ tũ nén ã tũ nũ mũr. ãjag tũ inh mũ vĩ há han tũ ra tóg inh mũ tũ nén ã tũ nũ gé.

⁷ Cristo há vũ inh jẽnẽ ja nĩ, há kũ tóg, sũ ãjag mũ vĩ tar han há tóg tĩ vẽ. Há ra sóg ke ja tũ nĩ. Komẽr há sóg vĩ ja nĩgtĩ. ãg tũ ãg krẽ kãsir mré vĩ ri ke han ja sóg nĩgtĩ. Gĩr mũnh fi tũ komẽr há vĩ ên ri ke han ja sóg nĩgtĩ.

⁸ ãjag to sóg há tãvĩ nĩ, há kũ sóg ãjag mũ Topẽ vĩ sér tó kãn sór ja nĩgtĩ. Kũ tóg inh mũ tũ nén ã tũ nĩ gé, sũ ãjag jagfũ ter ke ti.

⁹ Inh kanhkã', inh rãnrãj to jykrén nĩ. Inh rãnrãj vũ inh kutãn tĩ. Kuty ki sóg inh rãnrãj han tĩ, kurã ki ke gé, isũ vějẽn comprar he jé. Há kũ sóg ãjag jẽn ko ja tũ nĩgtĩ. Topẽ vĩ há tó ja sóg nĩ, ãjag kanhrãn kũ. Tag to jykrén.

¹⁰ Isũ nén han mũ ve kãn ãjag tóg, kũ Topẽ vũ inh vóg tĩ gé. Topẽ jykre há han isóg tĩ, vẽn jykre kuryj ti, nén ã vẽnhmũ han vãn sóg nĩgtĩ. ãjag rĩnve sóg han, ãjag tũ Jesus ki ge kũ nũtĩn kũ.

¹¹ Gĩr panh vũ ã kósin jyvẽn tĩ, kũ tóg kejẽn ti jyvẽn tar han tĩ gé. Kũ tóg kejẽn vĩ há han tĩ gé, ti fũn kũ. Ti ri ke han ja sóg mũr, ãjag mũ.

¹² Há kũ sóg ãjag fe tar han. ãjag jyvẽn ja sóg nĩgtĩ, kũ sóg ãjag jyvẽn tar han ja nĩgtĩ gé kejẽn, kũ sóg ãjag fe tũ há' he ja nĩgtĩ gé, sũ ãjag jyvẽn tar han

kar kÿ. Ājag tÿ Topē jykre ki króm jé, hã jé sóg ājag mÿ ke ja nĭgtĭ. Ti hã ne ājag kuprēg', ājag tÿ ti tÿ tÿ ēg pã'i nĭ ve jé, ājag tÿ ti jykre mág ve jé, ti jykre tÿ ēg kãfór nĭ ěn ti.

13 Ājag tÿ Topē vĭ mē kÿ ājag tóg to: “hej,” he ja nĭgtĭ. Ājag mÿ sóg tó, ti vĭ ti, kÿ tóg ājag mÿ há ja nĭgtĭ. Tag to sóg Topē mÿ: “ã hã ne tóg ag krĭn', kÿ tóg inh mÿ sér tĭ,” he tĭ. Kurã kar ki sóg ti mÿ tó tĭ. Isÿ ājag mÿ Topē vĭ tó kÿ ājag tóg to: “Topē vĭ vē,” he ja nĭgtĭ. Hã ra tóg ge nĭ. Hã kÿ tóg ājag jykre kugrynh mÿ sir, Topē vĭ ti, ājag tÿ ti vĭ kri fin kÿ.

14 Inh kanhkã', ga tÿ Judéia tá ke ag kóm ājag tóg vēsÿrénh mÿ. Tá ũ ag tóg vēnh mãn tĭ, Topē vĭ mē jé, ag tÿ Jesus Cristo ki ge kÿ nÿtĭn kÿ. Kÿ ag mré ke ag tóg ag vóg kónãn tĭ, Israel ag. Ge ti nĭ gé, ājag mré ke ag tÿ ājag vóg kónãn ti. Hã kÿ ājag tóg ag kóm vēsÿrénh mÿ gé.

15 Israel pã'i ag vÿ Jesus tén, ēg Senhor ti. Topē vĭ tó tĭ ag kãgtén ag tóg tĭ gé. Kÿ ag tóg ēg vóg kónãn tĭ gé sir. Hã ki ag tóg Topē jũ han tĭ. Ēprã ke kar ag kato vãsãnsãn ag tóg tĭ.

16 Hã kÿ ag tóg inh mÿ: “ker fóg ag mÿ vĭ hē',” he tĭ. “Ker kanhgág ag mÿ Topē vĭ tó hē', ag krenkren tũ nĭ jé,” he ag tóg tĭ inh mÿ. Hã ki ag tóg Topē vĭ mrynhmranh kãn tĭ. Kÿ ag tóg ti vĭ mranh kãn kÿ nÿtĭ ha. Hã kÿ Topē tóg ag to jũ mÿ sir. Kÿ tóg ag vóg kónãn kãn ke mÿ gé sir, vēnh kaja jé.

Paulo krĭ kufy

17 Inh kanhkã', isÿ ājag vég tũ nĭn kÿ tóg inh mÿ e tĭ. Hã kÿ sóg fe kaj nĭ. Tãg ti tĭ ver, sÿ ājag ve ja ti. Hã ra inh pi(jé) ājag kã jat'u he mÿ'. Ājag ve sór tãvĭ inh nĭ, kÿ sóg ājag to kãtĭg kren.

18 Isÿ ājag to kãtĭg ke vē vē, hã ra Satanás vÿ inh kato tē. Kar kÿ sóg to jykrén mãn, hã ra Satanás vÿ inh kato tē mãn. Hã kÿ sóg ājag to jun ja tũ nĭ, inh, hã vÿ: Paulo, he mÿ.

19 Ājag hã to sóg jykrén mÿ, Jesus tÿ ājag hã ki inh jykre ve jé, ti kãtĭg mãn kÿ, ēg Senhor ti. Ājag tÿ ti vĭ ki króm kÿ tóg vég mÿ, inh rãnhřãj ti, Jesus ti. Ājag hã to inh fe tóg mrin ke mÿ, ājag hã ki sóg tÿ ũn mág nĭnh mÿ, Jesus mÿ. Hã kÿ sóg ājag to jykrén tĭ.

20 Ājag hã tugrĭn sóg tÿ ũn mág nĭ, ājag hã tugrĭn tóg inh mÿ sér tĭ.

3

1 Ājag to jykrén mág sóg tĭ, hã kÿ sóg Timóteo jĕnĕ ja nĭ, ti tÿ ājag ve jé, ēg tÿ cidade tÿ Atenas tá nÿtĭn kÿ. Ti mÿ sóg: “ha inh ré kÿ tĭg,” he ja nĭ, “sÿ inh pir mÿ tag kã nĭ jé,” he ja sóg nĭ. “Ag hÿn ne han mÿ? he sóg mÿ, kÿ ag venh tĭg, inh mÿ,” he ja sóg nĭ ti mÿ, isÿ ājag to krĭ kufy ja nĭn kÿ.

2 Timóteo vÿ tÿ Jesus mré ke nĭ. Topē camarada ri ke tóg nĭ. Cristo kãmén ti tĭgtĭ, inh ri ke. Kÿ tóg ājag tá jun kÿ ājag jyvĕn ja nĭ, ājag fe tÿ há' he ja tóg nĭ, ājag tÿ Jesus ki rã

tovãnh tũg jé. Hã jé sóg ti jěně ja nĩ.

³ “Hěn ri ke mũn ag hỹn krĩ kufy nỹtĩ, ag jagãgtar mũn kỹ,” he ja sóg nĩgtĩ ājag to. “Ag mré ke ag ne tóg ag vóg kónãn mũ’, Topě jykre to,’” he ja sóg nĩgtĩ. Hã ra sóg ājag mỹ tó ja nĩ, ěg jagãgtar ke ti, Topě jykre to.

⁴ Isỹ ājag mré nĩ mũ ěn kã sóg ājag mỹ tó, ěg jagãgtar ke ti, ti tugrĩn. Hã ra tóg ge nĩ. Hã to ājag tóg jagãgtar tĩ, vėsỹrénh tĩ sir.

⁵ Hã kỹ sóg Timóteo jěně, isỹ ājag to krĩ kufy ja nĩn kỹ. “Ag mỹ Topě tovãnh tũ nĩ vỹ?” he ja sóg nĩ. “Ěg krĩn kónãn tĩ ěn mỹ ag krĩn tũ nĩ vỹ, Japo ti?” he ja sóg nĩ mỹr. “Tĩ tỹ ag krĩn kónãn kỹ sóg tagrĩnh mỹ ag mỹ tó ja nĩ mỹr’,” he ja sóg nĩ ājag to. Hã kỹ sóg Timóteo jěně ja nĩ.

Timóteo tỹ Paulo krĩ kuprãg

⁶ Hã ra tóg sir inh ki jun mãn mũ, Timóteo ti, ājag ve kar kỹ. Ūri tóg jun. Ājag kãmén tóg mũ, tó há han tóg mũ, kỹ inh fe tóg mrin ke mũ sir. “Jesus ki ge to tar ag nỹtĩ,” he tóg mũ. “Jagně to há ag nỹtĩ, ã mĩ ěkrég ag tóg tĩ. Ā ve sór ag tóg tĩ. Ā tỹ ag ve sór ri ke han ag tóg tĩ,” he tóg mũ inh mỹ, Timóteo ti.

⁷ Kỹ inh krĩ tóg kãnhvy’ he mũ sir ājag to. Inh jagtar mũ ra inh fe tóg há’ he mũ sir, ājag tỹ Jesus ki ge kỹ nỹtĩn kỹ.

⁸ Ājag tỹ ti to tar nỹtĩn kỹ tóg inh mỹ inh rĩr mãn ri ke nĩ, kỹ sóg mrin ke ri ke han mũ sir.

⁹ Topě mỹ sóg vĩ há han mũ sir ājag to. Inh fe vỹ mrin ke mũ, sỹ ājag tỹ nén han mũ ěn mě kỹ. Hã kỹ sóg Topě mỹ vĩ há han mũ sir, ājag tỹ inh fe tỹ mrin ken kỹ.

¹⁰ Kuty kar ki sóg ti mré vēmén tĩ, kurã kar ki ke gé. Sỹ ājag ve sór nĩn kỹ sóg Topě mỹ isĩg ke to vĩ tĩ, sỹ ājag tar han sór kỹ, ājag tỹ ti ki rã to tar nỹtĩ jé.

¹¹ Topě tỹ kejěn inh mỹ: “ha ag venh tũg,” hen kỹ tóg inh mỹ sér tĩnh mũ, ěg jóg mág tỹ inh mỹ tag tó kỹ, Jesus ti ke gé, ěg Senhor ti.

¹² Ěg Senhor mỹ sóg to vĩ tĩ, ti tỹ ājag tỹ jagně to há tãvĩ han jé. Jagně to há ājag nỹtĩ, kỹ sóg ti mỹ to vĩ tĩ, ti tỹ tag to ājag tar tãvĩ han jé, ājag tỹ vėnh kar to há nỹtĩ to tar nỹtĩ jé gé, isỹ ājag to há nĩ ri ke.

¹³ Kỹ sóg ti mỹ to vĩ tĩ gé, ti tỹ vėnh jykre há to ājag tar han jé. Kejěn ěg Senhor tỹ Jesus vỹ kãtĩg mãn ke mũ, ã tũ kar ag mré. Ěg jóg tỹ Topě tỹ ũri ājag tar han kỹ ājag tóg kurã ěn kã ti rĩnja tá jãnhkri nỹtĩnh mũ, ājag tỹ kygně ja tũ nĩn kỹ.

4

Jesus jykre mĩ ěg mũnh ke mũ

¹ Inh kanhkã’, vãhã sóg ājag mỹ nén ũ tó sór mũ gé. Ěg Senhor tỹ Jesus rĩnve sóg ājag jyvėn sór mũ. Ājag mỹ sóg ti jykre tó huri, ājag tỹ ti japry jagma, ti jamĩn jagma mũ há han jé, ājag tỹ Topě mỹ há nỹtĩ jé. Tag han ājag tóg mũgtĩ. Gemnĩ. To tar nỹtĩmnĩ.

² Tag kāmén sór isóg mũ ãjag mỹ, ẽg Senhor tỹ Jesus tỹ inh mỹ: “tag tómnĩ,” he ja nĩn kỹ.

³ Topẽ vỹ ãjag to jykrén, ãjag tỹ ti jykre hã han jé. Kỹ ãjag prũ tũ fag mré nỹ tũg nĩ, ãjag mén tũ ag mré nỹ tũg nĩ gé.

⁴ ãJag tỹ ãjag prũ fi mré nỹ kỹ fi mré nỹ há han nĩ, Topẽ jykre han jé. Kỹ ẽprã ke ag vỹ ãjag to jykrén kónãn ke tũ nĩ gé. Fi tỹ prũg kónãn tũg nĩ.

⁵ Fi to én kónãn tũg nĩ gé, ãjag prũ fi to. Û tỹ Jesus ki rã tũ ag jykre han tũg nĩ. Û tỹ Topẽ jykre ki kagtĩg nỹtĩ ag jykre han tũg nĩ, ãjag prũ fi to. Fi tỹ prũg há han nĩ.

⁶ ãJag régre tỹ nén ù to én tũg nĩ. Ti tũ vẽ mỹr, kỹ ti tũ ki Topẽ vĩ mranh tũg nĩ. Topẽ hã ne tag to jũ tĩ'. Kỹ ãjag régre tỹ nén ù vóg tũg nĩ. ãJag tỹ ti tũ vóg kỹ Topẽ vỹ ãjag vóg ke mũ gé, ti kajãm jé. Tag tó sóg huri ãjag mỹ, tag to sóg ãjag mỹ vĩ tar han huri, hã ra sóg ãjag mỹ tó mãn mũ gé.

⁷ Ẽg tỹ vẽnħ kavénħ kỹ ẽg tóg Topẽ jykre han tũ nĩgtĩ mỹr. Ti jykre vỹ kuryj nỹ. Ẽg tỹ tỹ ti tũ nỹtĩ hã jé tóg ẽg kuprẽg.

⁸ Ẽprã ke vỹ pijé', sỹ ãjag mỹ nén tó mũ tag tĩ'. Topẽ vỹ vẽ mỹr. ãJag tỹ inh vỹ tag han tũ nĩn kỹ ãjag tóg Topẽ vĩ mranh mũ. Ti hã ne tóg ã kuprĩg tỹ inh jagrẽ han ja nĩ', kỹ tóg tỹ ãjag jagrẽ han ja nĩ gé.

⁹ Nén ù to ãjag tar nỹtĩ, hã vỹ: jagnẽ to há, he mũ. Hã kỹ sóg tag to ãjag mỹ rán mág han ke tũ nĩ. Topẽ vỹ ãjag kanhrãn, ãjag tỹ jagnẽ

jagãgtãn ken ki. Ki hã han ãjag tóg tĩ.

¹⁰ Ga tỹ Macedônia tá ke kar ag to ãjag há nỹtĩ, Jesus mré ke kar ag to ke gé. To tar nỹtĩmnĩ, to krónħ ke tũg nĩ, ãjag tỹ tỹ Jesus mré ke nỹtĩn kỹ. Hã jé sóg ãjag jyvẽn mũ.

¹¹ Vãsãn nĩ, ãjag tỹ jatun mỹ nỹtĩ jé, jatun mỹ ãjag rãnrãj hyn han jé. ãJag rãnrãj pẽ ẽn to tar nỹtĩmnĩ, hã jé sóg ãjag jyvẽn ja nĩ. Kỹ sóg to ãjag jyvẽn mãn mũ, ãjag rãnrãj to.

¹² Kỹ nén ù vỹ ãjag mỹ tũ' henħ ke tũ pẽ nĩ. Hã ki vẽnħ kar tóg ẽg jykre há ki kanhró nỹtĩnħ mũ. ãJag tỹ ãjag rãnrãj to nén ù kar ve kỹ tóg há tĩ, ù tỹ ãjag mỹ nén ù nĩm tũ nĩ jé, fagrĩnħ mỹ.

Jesus mré ke ter kỹ fỹ mág tũg nĩ

¹³ Inh kanhkã', sỹ nén ù ki ãjag kanhrãn há tóg tĩ gé, ha mẽ. Ẽg mré ke ù ag tóg kãgter kỹ nỹtĩ. Kỹ fỹ mág tũg nĩ ag jé. Jesus ki ge tũ ag ri ke han tũg nĩ. Ag ter kỹ ag tóg nén ù há venħ ke tũ nĩ. Hã kỹ ag tóg fỹ mág tĩ, Jesus ki ge tũ ag. Hã ra tóg ẽg mỹ ge tũ nĩ.

¹⁴ Jesus vỹ ter ja nĩ, kar kỹ tóg rĩr mãn ja nĩ. Tag ki kanhró ẽg tóg nỹtĩ. Hã ri ke ti nĩ, Jesus ki ge mũ ag kãgter ti. Topẽ vỹ ẽg han mãn ke mũ, Jesus tugrĩn, ẽg tỹ ti mré nỹtĩ jé sir.

¹⁵ Ẽg Senhor vỹ inh kanhrãn, hã kỹ sóg tó mũ. Ti jẽnky ki tóg kutẽ, sỹ tónħ ke tag ti, ha mẽ. Ver ẽg rĩnrĩr nỹtĩ. Hẽn ri ke mũn ẽg kãgter kãn

ke tũ nĩ, ti kãtĩg ken jo. Kĩ ěg tóg ti kãtĩg venh mũ sir. Hã ra ěg tóg ùn kãgter mũ ag jo mũnh ke tũ nĩ. Ag hã mré ěg tóg mũnh ke mũ.

¹⁶ Ti kãtĩg vỹ ge nĩnh mũ, ha mẽ. Tere jé tóg ke mũ, ěg Senhor ti, kanhkã tá. Kĩ vènh vỹ tóg mẽ há tĩnh mũ. Topẽ tỹ jẽnẽ jafã ag pã'i mág vỹ prẽr ke mũ sir. Topẽ tỹ vãkyn jafã vỹ mẽ há tĩnh mũ, trombeta ěn ti. Kĩ ùn kãgter mũ ag vỹ rĩnrĩr mãn mũ sir, Jesus mré ke ag.

¹⁷ Kar kũ ěg tóg ag mré jãprynh mũ gé, ěg tỹ ti kãtĩg ke jo ter tũ hã ra. Ag mré ěg tóg jãprynh mũ, ùn rĩnrĩr mãn mũ ag mré. Kanhkã góg kãmĩ ěg tóg jãprynh mũ, kũ ěg tóg ěg Senhor kato tẽgtẽnh mũ sir, kanhkã krẽm. Hã kũ ěg tóg ti mré nỹtĩnh mũ sir, ěg Senhor mré, ěg tỹ kanhkã ra mũnh kũ. Ti ré kũ ěg mũ mãn ke tũ nĩ sir.

¹⁸ Tag tómnĩ jagnẽ mỹ, ãjag krĩ tỹ kãnhvy' he jé, ùn kãgter mũ ag to.

5

Jesus tỹ kãnhmar kãtĩg mãn ke

¹ Inh kanhkã', ti kãtĩg ke ki kanhró ěg tóg nỹtĩ, hã ra ěg tóg ti kurã hã ki kagtĩg nỹtĩ, ti prỹg ke gé. Tag mẽ ãjag tóg huri, hã kũ sóg ãjag mỹ tó mág ke tũ nĩ ha.

² Vãhãnh kãtĩg, ěg Senhor ti, hã ra tóg tỹ nén ù péju mé kãtĩg ri ke nĩnh mũ, ti kãtĩg ti. Ěg vatánh tá tóg ěg tũ mág tĩ, nén ù péju mé ti. Kĩ tóg ge nĩnh mũ, ěg Senhor kãtĩg ti.

³ Ti to há tũ ag vỹ: "jatun mỹ ěg nỹtĩ," henh ke mũ. "Ũ vỹ ěg vóg ke tũ nĩ," he jé ag tóg ke mũ. Ag tỹ tag tó mũ ra tóg vãhã kãtĩ mũ, ěg Senhor ti. Kĩ ag tóg nũgme ki vár mũ sir. Ag tỹ to jykrén tũ hã ra ti kãtĩg kũ ag tóg krenkren ke tũ pẽ nĩ, ha vemnĩ.

⁴ Inh kanhkã', ãjag hã ne tóg tỹ Jesus mré ke nỹtĩ'. Hã kũ tóg ãjag ki kuty tũ nĩ. Kĩ ãjag tóg ki kanhró nỹtĩ, kũ ti kãtĩg vỹ ãjag mỹ nén ù péju mé kãtĩg ri ke tũ nĩ, ãjag tỹ ti ki kanhró nỹtĩnh kũ.

⁵ Ti krẽ vỹ tỹ ãjag nỹtĩ, hã kũ tóg ãjag ki kurã nĩ, ãjag tỹ ki kanhró nỹtĩnh kũ. Kuty tũ ti nĩ, ěg ki. Ti kãtĩg ke ki kanhró ěg tóg nỹtĩ, hã kũ tóg ěg ki kurã nĩ sir.

⁶ Kũ ti kãtĩg ke kã jatu ke tũg nĩ. Vẽso jykrén nĩ, ãjag tỹ ti kãtĩg ke to vènh preparar ken jé, ãjag tỹ kã jatu ke tũ nĩ jé.

⁷ Ũn nũgnũr mũ ag vỹ kuty kũ nũgnũr tĩ, kũ ag tóg ti kãtĩg ke kã jatu nỹtĩ. Kĩ ùn kronkron mũ ag vỹ kuty kũ pémév nỹtĩ, kãgter ag nỹtĩ gé. Kĩ ag tóg vẽso jykrén tũ nỹtĩ. Kuty tá vènh jykrén hã vè.

⁸ Ěg jé kurã tá vènh jykre há ěn ti han jãvo. Ěg jé vẽso jykrén kũ ti ki rã to krónh ke tũg. Ěg jé jagnẽ to há to krónh ke tũg gé.

Kũ ěg tóg vènh génh jafã ag tar ri ke nỹtĩ. Kĩ tóg ěg mỹ soldado kur ri ke nĩ sir, ti ki rã ti, jagnẽ to há ti ke gé. Soldado tỹ camisa tỹ ferro ri ke ti nĩ, ěg tỹ ti ki rã kũ jagnẽ to há to tar nỹtĩnh kũ. To tar nỹtĩnh kũ

ĕg krenkren ke mũ, nũgme ki vār ke tũ ĕg nĩ. Tag mĩ ĕkrén nĩ. Kĩ tóg ĕg mĩ soldado tỹ sāpe tỹ ferro ri ke nĩ sir, ĕg tỹ ti ve sór mũ to tar nĩ ti. To tar nỹtĩn kũ ĕg tóg vĕnh prepararar ke kũ nỹtĩ, vĕnh kãn kũ ĕg nỹtĩ, ti kãtĩg ke to.

9 Topĕ vỹ ĕg kuprĕg, ĕg tỹ ti jũ vĕg tũ nĩ jé, ĕg krenkren jé, ĕg tỹ nũgme ki vār tũ nĩ jé, Jesus Cristo tugnĩn, ĕg Senhor ti.

10 Ti hã ne ĕg jagfy ter ja nĩ', ĕg tỹ ti tugrĩn rĩnrĩr nỹtĩ jé, ti mré nỹtĩ jé sir. Ēg tỹ ti kãtĩg ke jo kãgter mũ ra ĕg tóg ti mré nỹtĩnh mũ, ti kãtĩg kũ. Ēg kãgter tũ ra ĕg tóg ti mré tá nỹtĩnh ke mũ gé, ti kãtĩg kũ. Jagnĕ ri ke ĕg nỹtĩnh mũ.

11 Tag tómnĩ jagnĕ mỹ. Tỹ jagnĕ krĩ tỹ kãnhvy' hemnĩ gé, ũn ter mũ to. Kũ tỹ jagnĕ jyvĕn nĩ gé, ājag tar nỹtĩ jé. Tó ājag tóg mũgtĩ, kũ tó há han nĩ.

Vĕnh jykre há ti

12 Inh kanhkã', nén ũ tó jé sóg ke mũ gé. Ājag kãmĩ ũ ag tóg tỹ ājag pã'i nỹtĩ, igreja to, Jesus mré ke ũ ag. Ājag jyvĕn ag tóg tĩ, ājag to ag tóg vãsãn tĩ.

13 Ēn ag kamĕg nĩ. Ag mỹ vĩ há han nĩ, ag to há tãvĩ nỹtĩmnĩ, ag tỹ ājag ki rĩr kũ. Jagnĕ krĩ rỹg tũg nĩ.

14 Inh kanhkã', tag ti tó jé sóg ke mũ gé, ha mĕ. Ũ tỹ vĕnhmỹ mĕ ag jyvĕn tar han nĩ. Ũ tỹ kãnhmar krónh ke tĩ ag mré komĕr vĩmnĩ. Ũn fe krónhkrój ag fe tỹ tar' hemnĩ. Vĕnh kar mỹ komĕr hã vĩmnĩ.

15 Ũ tỹ ājag mỹ nén ũ kórég han mũ ra ti mỹ nén ũ kórég han tũg nĩ jāvo, vĕnh kajãm tũg nĩ. Nén ũ há tãvĩ han nĩ jagnĕ mỹ, vĕnh kar mỹ ke gé.

16 Kurã kar ki ājag fe tỹ mrin kemnĩ.

17 Kurã kar ki ĕg jóg mág mré vĩmnĩ, ājag tỹ ti to krónh ke tũ nĩn jé.

18 Nén ũ kar to ti mỹ: "inh mỹ tóg há tĩ," hemnĩ gé. Topĕ jykren hã vĕ. Jesus Cristo nón ĕg tóg ti jykre han ke mũ. Ēg tỹ nén ũ vĕg mũ kar to ĕg tóg: "inh mỹ tóg há nĩ," henh ke mũ, Topĕ mỹ.

19 Topĕ kuprĩg tỹ ājag krĩn sór kũ ti mỹ: "vó," he tũg nĩ.

20 Kejĕn Topĕ kuprĩg tóg ũ krĩn tĩ, kũ tóg Topĕ vĩ tó mũ sir. Ēn to é he tũg nĩ.

21 Ũ tỹ ājag mỹ vĩn kũ to: "vĕnh vĩ há mỹ?" hemnĩ. Ti tỹ tỹ ājag mỹ vĕnh vĩ há nĩn kũ jĕmĕmnĩ.

22 Ti há tũ nĩn kũ jĕmĕ tũg nĩ, ājag tỹ nén ũ kórég han tũg jé. Nén ũ kórég han sór tũg nĩ.

23 Topĕ vỹ ājag krĩ kuprãg tĩ. Ti mỹ sóg to vĩ tĩ, ti tỹ ājag tar han jé, ājag tỹ tỹ ti tũ nỹtĩ to tar nỹtĩ jé. Ti mỹ sóg to vĩ tĩ gé, ti tỹ ājag tỹ kygnĕ kamĕg jé, ti tỹ ājag jykre há han jé, ājag fe ti ke gé, ājag krĩ ti ke gé. Ēg Senhor tỹ Jesus Cristo kãtĩg mãn kũ tóg ĕg jykre tugnỹm ke mũ sir, hã jé tóg ĕg jykre há han sór mũ.

24 Ũ tỹ ĕg kuprĕg mũ vỹ ĕg jykre há han sór mũ, hã vỹ: Topĕ, he mũ. Fagrĩnh mỹ vĩ vãnh ti nĩgtĩ.

²⁵ Inh kanhkã', iso Topě
mré vïmnĩ gé.

²⁶ Jagně ki nhun ke ri ke
han nĩ, Jesus mré ke kar ki,
jagně nĩgé kãgmĩ kÿ.

²⁷ Ěg Senhor rĩnve sóg ãjag
mÿ tag tó mũ, ha mẽ. “Jesus ki
ge kÿ nÿtĩ kar ag tÿ isÿ nén rán
mũ tag mẽ kãn ke vễ,” he sóg
mũ mÿr. Hã kÿ sóg: “ag kar
mÿ to kemnĩ,” he mũ.

²⁸ Ěg Senhor tÿ Jesus Cristo
mÿ sóg to vĩ tĩ, ti tÿ ãjag tar han
jé.

Hã vễ.

PAULO TÏ CARTA HAN: TESSALÔNICA TÁ KE AG MÏ CARTA Û

¹ Paulo tÏ rá vĕ. Isÿ cidade tÏ Tessalônica t'a ke ag mÏ rán hã vĕ. Tessalônica tá ãjag tóg Topĕ vĭ mĕ jé vĕnhmãn tĭ. Topĕ tũ vÿ tÏ ãjag nÿtĭ, ĕg jóg mág ti. Jesus Cristo tũ vÿ tÏ ãjag nÿtĭ gé, ĕg Senhor ti. Sÿ ãjag mÏ vĕnh rá jĕnĕ vĕ. Kÿ Silas vÿ jĕnĕg mũ gé inh mré, Timóteo ke gé.

² ĕg jóg tÏ Topĕ mÏ sóg to vĭ tĭ, ti tÏ ãjag tar han jé, ti tÏ ãjag krĭ kuprãg jé gé. ĕg Senhor tÏ Jesus Cristo mÏ sóg tag to vĭ tĭ gé.

Cristo tÏ ù tÏ ĕg vóg kónãn mũ ag vóg kónãn ke

³ Inh kanhkã', isÿ kurã kar ki ãjag to Topĕ mré vĭ vĕ, ãjag to sóg ti mÏ vĭ há han tĭ. ãjag jykre tóg inh mÏ sér tĭ. ãjag hã ne tóg ti vĭ to tar tâvĭ nÿtĭ', kri fi kÿ. Jagnĕ mré ãjag tóg há tâvĭ nÿtĭ gé, ãjag kar ti. Hã kÿ sóg Topĕ mÏ vĭ há han tĭ, ãjag to.

⁴ Hã kÿ sóg Topĕ tũ kar ag mÏ ãjag tó tĭ, ĕg vĕnhmãn kÿ. "Ti vĭ kri fi to ag tar nÿtĭ, ag tÏ ag vóg kónãn mũ ra," he sóg tĭ ãjag to. "Ag jagãgtar mũ ra ag tóg ti to tar nÿtĭ," he sóg tĭ. Isÿ tag tó tóg inh mÏ sér tâvĭ tĭ.

⁵ Hã tugrĭn ĕg tóg Topĕ jykre kuryj ki kanhró nÿtĭ, ãjag tÏ ti tovãnh tũ nĭn kÿ. Kÿ ti tÏ nĕn

han mũ vÿ kugryj kar nÿtĭ, ti tÏ nĕn tó mũ kar ke gé. Jagtar ãjag tóg mũ, hã ra ãjag tóg ti tovãnh tũ nĭgtĭ. Ti tÏ tÏ ĕg pã'i nĭ ve jé ãjag tóg ke mũ, kanhkã tá krÿg he jé ãjag tóg ke mũ, ti tugnĭn, ha vemnĭ. Hã kÿ ãjag tóg sir ti tugrĭn jagtar mũ sir.

⁶ Ha vé, ù tÏ ãjag jagãgtar han mũ ĕn jagãgtar han jé tóg ke mũ gé, vĕnh kaja jé, Topĕ ti. Hã ki ĕg tóg ti jykre kuryj ki kanhrãn mũ sir. Tag to jykren.

⁷ Ag jãvo tóg ãjag tar han mũ sir, ãjag jagtar mũ hã ra, kÿ tóg sir ãjag jagãgtar tÏ tũg' he mũ gé sir, ĕg kar mÏ, ĕg Senhor tÏ Jesus Cristo tÏ kanhkã tá kãtĭg kÿ. Kanhkã tãn ag mré tóg kãtĭg ke mũ, kÿ ĕg tóg ti venh mũ sir.

⁸ TÏ tóg pi gru ve kãtĭg ke mũ. Kÿ tóg ù tÏ Topĕ ki kanhrãn jãvãnh ag vóg kónãn ke mũ sir, vĕnh kaja jé, ù tÏ ĕg Senhor tÏ Jesus vĭ sér mranh mũ ĕn ag.

⁹ Ag vóg kónãn jé tóg ke mũ, kÿ ag vĕsÿrĕnh vÿ tũ' henh ke tũ nĭ. ĕg Senhor mré ag nÿtĭnh ke tũ nĭ sir. Ti jykre há ĕn venh ke tũ ag nĭ, ti tÏ tÏ pã'i mág pĕ nĭ ĕn ti, ùn mág tâvĭ ĕn.

¹⁰ ã kãtĭg kÿ tóg ag vóg ag vóg kónãn ke mũ. Kÿ tóg vãhã ã tũ ag tÏ ùn mág han ke mũ sir. Kÿ vĕnh kar tóg ĕg tugrĭn ti jykre ve kãn ke mũ, ĕg tÏ ti ki ge kÿ nÿtĭn kÿ. ãjag hã tóg inh vĭ kri fi, sÿ ãjag mÏ ti vĭ tón kÿ. Hã kÿ ãjag tóg kurã ĕn venh ke mũ.

¹¹ Hã jé sóg ãjag to Topĕ mré vĭ tĭ, kurã kar ki. Ti mÏ sóg:

“ag tar han nĩ,” he tĩ. “Nén ũ há han sór ag tóg mũ, ã ki ge kũ nýtĩ ag, ã jykre han sór ag tóg mũ, kũ ag tar han nĩ, ag tỹ kygněg tũ nĩ jé. Ag kuprěg ã tóg, ag tỹ kurã ěn ve jé, kũ ag tar han nĩ, ag tỹ kurã ěn tá krỹg jé,” he sóg tĩ (mỹr), Topě mỹ.

¹² Ti tỹ ãjag kri tỹ ũn mág nĩ jé, hã jé sóg ti mỹ tó mũ. Ti tỹ ěg kri tỹ ũn mág nĩn kũ tóg ěg tỹ ũn mág han mũ gé. Topě tỹ ěg mỹ ã tỹ nén ũ há nĩm ěn hã vė, ěg Senhor tỹ Jesus Cristo tỹ ke gé.

2

Jesus kato tẽ mág mũ ěn tỹ vėnh ke

¹ Inh kanhkã', sỹ ãjag jyvėn há tóg tĩ sir. Kãnhmar ti kãtĩg mũ, ěg Senhor tỹ Jesus Cristo ti, kũ ěg tóg vėnh mãn mũ, ti tỹ ěg gé(g) tũg jé sir. Kũ ěg tóg ti mré nýtĩ.

² Ha ra tóg ver kór gy sĩ tĩ, kuvar gy sĩ ti nĩ ver. Kũ ũ tỹ ãjag mỹ: “Topě kuprĩg tóg inh mỹ: ũri ke vė, hé,” he mũ ra kri fi tũg nĩ, ãjag fe tỹ jũrũn ke tũg nĩ. Ũ tỹ ãjag mỹ: “Paulo vỹ inh mỹ tó, kũ tóg: ũri ke vė, hé,” he mũ ra kri nĩm tũg nĩ gé. Ũ tỹ ãjag mỹ vėnh rá ven mũ ra, to: “Paulo tỹ rá vė mỹr,” he mũ ra kri fi tũg nĩ gé.

³ Ag jykre tugnỹm ra, ũ tỹ ãjag krĩn kónãn sór mũ ag. Ũri ke tũ vė ver, ti kãtĩg ke ti. Ũ tỹ hėn ri ke ag vỹ ti tovãnh ke mũ ver, ti kãtĩg ke to hã. Ti kato tẽgtẽ jé ag tóg ke mũ ver. Kũ ũ tóg ver vėnh ven ke mũ gé, hã vỹ: ũ tỹ Topě vĩ mranh tĩ ěn,

he mũ, ũ tỹ nũgme ki kutėnh ke mũ ěn ti, he mũ.

⁴ Ti ve pė vė, Topě vĩ mranh mũ ti, hã kũ Topě vỹ nũgme ki ti fón ke mũ. ěn vỹ tóg Topě kato tėnh ke mũ ver, vėnh kãggrá tỹ topě kato ke gé. Nén kar to: topě, he mũ kar kato tóg tėnh ke mũ ver. “Topě kar kãfór vỹ tỹ inh nĩ,” he jé tóg ke mũ. Kũ tóg vãhã sir Jerusalem tá Topě ĩn krēm rãnh mũ, Topě nĩg ja ěn tá tóg nĩnh mũ, kũ tóg vėso: “tỹ sóg Topě nĩ,” henh ke mũ, ón kũ.

⁵ Isỹ ãjag mré nĩn kũ sóg ãjag mỹ tag tó ja nĩ. Mĩ ěkrén nĩ, sỹ ãjag mỹ tó ja ěn ti.

⁶ Mĩ ěkrén kũ ãjag tóg ki kanhró nýtĩ sir, ũ tỹ ver ti ki rĩr mũ ěn ki. Ti kũ ti ki rĩr nĩn kũ tóg ver vėnh ven tũ nĩ, ũ tỹ ón kũ: “tỹ sóg Topě nĩ,” he mũ ěn ti. Ti kurã ki tóg vėnh ven ke mũ sir vãhã.

⁷ Ũri ũ tỹ hėn ri ke ag tóg vėnh jykre pãno han mũgtĩ, Topě vĩ mranh kũ. Hã ra ag tóg ver vėnh pigju kũ han ti, kũ ěg tóg ve hã han tũ nĩ, ag jykre pãno ti. Kũ Ũ tỹ ón kũ: “tỹ sóg Topě nĩ,” he mũ ěn tóg vėnh ven tũ nĩ gé ver. Ũ tỹ ti ki rĩr nĩ ěn tóg ver ti ki rĩr mũ, ti vėnh ven tũ nĩ jé ver.

⁸ Ti tỹ ti ki rĩr tovãnh kũ tóg vėnh ven ke mũ sir vãhã, ũn jykre pãno ěn ti. Hã ra ěg Senhor tỹ Jesus vỹ ti tén ke mũ, ã jėnger tỹ. Kũ tóg ti tỹ tũ' he mũ sir, ã vėnh ven ti kũ, Jesus ti. Ā jun kũ tóg ti tỹ tũ' he mũ.

⁹ Hã ra ũn jykre pãno ěn vỹ tóg Satanás jykre han mũ,

Nén-Kórég tỹ ti krĩn kỹ. Kỹ tóg ón kỹ vėnh jykre tar hyn han mũ, ẽg tỹ nén han vánh ẽn (mỹr). Kujá ag jykre ri ke han jé tóg ke mũ.

¹⁰ Vėnh kar lograr he jé tóg ke mũ gé. Jykre kuryj nĩ ve tóg nĩnh mũ, hã ra tóg pãno nỹ. Kỹ ũ tỹ nũgme ki vár ke mũ ag vỹ ti vỹ kri fi kãn ke mũ, ag tỹ Topẽ vĩ kri fig tũ nỹtĩn kỹ. Vėnh vĩ há to ag tóg há tũ nỹtĩ, hã kỹ ag tóg krenkren ke tũ nĩ. Hã kỹ ag tóg ki rom ke mũ sir, nũgmen ki, infernon ki.

¹¹ Hã jé Topẽ tóg ag mũ vėnh ó jėnėnh ke mũ, ón kỹ vėnh jykre ẽn ti, ag tỹ vėnh ó ẽn kri fi jé, ag tỹ kri nĩm sór nỹtĩn kỹ.

¹² Topẽ tỹ ag jykre tugnỹm kỹ tóg nũgme ki ag vãm ke mũ. Vėnh vĩ há kri fi jãvánh ag tóg nỹtĩ (mỹr). Vėnh jykre pãno há to ag tóg hã tãvĩ nỹtĩ (mỹr), hã kỹ tóg ag vãm ke mũ, nũgme ki, Topẽ ti.

Topẽ tỹ ẽg kuprẽg, ẽg krenkren jé

¹³ Jãvo sóg ăjag to Topẽ mré vĩ há han tĩ, kurã kar ki (mỹr). Tỹ ăjag tóg Jesus mré ke nỹtĩ, ẽg Senhor mré ke ag. Kỹ tóg ăjag to há tãvĩ nĩ. Topẽ vỹ ăjag kuprẽg, nén kar há(r) ven ki, ăjag krenkren jé, nũgme to, inferno to. Ăkuprĩg tỹ tóg ăjag tỹ ă tũ han ja nĩ. Ăjag tỹ tag ve jé ăjag tóg ti vĩ kri fig mũ, vėnh vĩ há ẽn kri.

¹⁴ Isỹ ăjag mũ Jesus vĩ tón kỹ Topẽ vỹ ăjag kuprẽg, ăjag tỹ ẽg Senhor tỹ Jesus Cristo mré tỹ ũn mág nỹtĩ jé.

¹⁵ Inh kanhkã', tar nỹtĩmnĩ, sỹ ăjag kanhrãn to, ăjag kỹ ti

króm jé. Isỹ ăjag mũ Jesus jykre tó mũ ẽn to tar nỹtĩmnĩ, sỹ ăjag mũ nén rán mũ tag to ke gé.

¹⁶ Ễg Senhor tỹ Jesus Cristo hã vỹ ẽg to há tãvĩ nĩ, ẽg jóg tỹ Topẽ ke gé. Kỹ tóg ẽg krĩ kuprãg mũ sir, ẽg tỹ to krónh ke tũ nĩn jé. Ti hã ne tóg ẽg mũ ă tỹ nén ũ há ẽn ven ke mũ. Hã ve sór ẽg tóg mũ.

¹⁷ Ti mũ sóg to vĩ tĩ, ti tỹ ăjag fe tỹ há' he jé, ti tỹ ăjag tỹ nén ũ há han jé, ăjag tỹ ki hã kãmén jé ke gé.

3

Topẽ tỹ ẽg jy nĩgãn

¹ Inh kanhkã', vãhã sóg ăjag mũ nén ũ to vĩ mũ gé. Iso Topẽ mré vĩmnĩ, ẽg Senhor vĩ tỹ vėnh kar kri rũm ke jé, kãnhtar (mỹr), vėnh kar tỹ ti vĩ to há nỹtĩ jé ke gé, ti mũ vĩ há han jé (mỹr), ag tỹ ăjag ri ke nỹtĩ jé.

² Ti mũ to vĩmnĩ, ti tỹ iij nĩgãn jé, vėnh jykre pãno han mũ ag jo, ũn jykre pãno ag jo ke gé. Ũ ag tóg Jesus ki ge jãvánh nỹtĩ, hã kỹ ag tóg iso kórég nỹtĩ sir.

³ Hã ra ẽg Senhor vỹ ă tỹ nén tó ja ẽn han ke mũ. Ăjag tar han jé tóg ke mũ. Ăjag jy nĩgãn jé tóg ke mũ gé, Japo jo, Nén-Kórég ẽn jo.

⁴ Ăjag hỹn inh vĩ han ke mũ, kỹ tóg inh mũ há tĩ. Topẽ vỹ ăjag krĩn ke mũ, ăjag tỹ sỹ ăjag mũ nén tó mũ ẽn ki króm jé. Ki króm ăjag tóg mũ (mỹr), kỹ ăjag tóg to krónh kenh ke tũ nĩ sir.

⁵ Ěg Senhor je ājag krīn, ājag tỹ ti to há nỹtĩ jé, ti tỹ ěg to há ri ke. Ti jé ājag krīn, ājag tar nỹtĩ jé, ājag jagāgtar hā ra. Cristo vỹ ge ja nĩ gé. Kỹ ti nón gemnĩ.

Ěg tỹ vĕnh rānhrāj to tar nỹtĩnh ke

⁶ Inh kanhkā', vāhā sóg ājag jyvĕn mũ gé sir, ājag jyvĕn tar han sóg mũ gé. Ěg Senhor tỹ Jesus Cristo jykre tỹ sóg ājag mỹ tag tó mũ, ha mẽ: Jesus mré ke ũ ag tóg vĕnhmỹ mẽ han sór nỹtĩ. Inh vĩ mranh sór ag nỹtĩ, sỹ ājag mỹ nén tó ja ěn ti. Ěn mré vĩ mǎn tũg nĩ.

⁷ Sỹ ājag mré nĩn kỹ sóg vĕnhmỹ mẽ han ja tũ nĩ. Tag ve ājag (mỹr), kỹ ājag tóg inh kóm han ki kanhrān ke mũ.

⁸ Fagrĩnh mỹ sóg ājag mré rāgró ko ja tũ nĩgtĩ (mỹr). Kajām ja sóg nĩgtĩ (mỹr), sỹ ājag mré nén ko ja ti. Kuty kar ki sóg rānhrāj ja nĩgtĩ, kurā kar ki ke gé. Kỹ sóg inh rānhrāj to ron mág ja nĩgtĩ. Sỹ ājag tũ kagrāg tũ nĩ jé, hā jé sóg rānhrāj mág ja nĩgtĩ. Hā ve ājag mỹr.

⁹ Sỹ ājag tũ konh ke vĕ vĕ, hā ra sóg ājag tỹ nén han ke mũ ěn han sór ja nĩgtĩ ājag mỹ, ājag tỹ to ki kanhrān jé, ājag tỹ inh kóm han jé sir inh nón.

¹⁰ Isỹ ver ājag mré nĩn kỹ sóg ājag mỹ tag tó ja nĩ gé, ha mẽ: “ũn rānhrāj vānh ěn vỹ ne konh ke tũ nĩ,” he ja sóg nĩgtĩ ājag mỹ.

¹¹ Ājag kāmĩ ũ ag nĕji tag han vānh nỹtĩ. Rānhrāj vānh

ag nĕji nỹtĩ, hā ra ag nĕji vĕnh kar to vĩ vĩ he tĩ.

¹² Ěn jyvĕn sór sóg nĩ, ěg Senhor tỹ Jesus Cristo jykre tỹ. Ag jyvĕn tar han jé sóg ke mũ, ha mẽ: “rānhrāj ra, jatun mỹ. Ājag tũ hā ko ra, ājag rāgró ti. Ũ jĕn ko tũg ra,” he sóg mũ sir ājag mỹ.

¹³ Inh kanhkā', nén ũ há tāvĩ han kǎn sórmnĩ. To krónh ke tũg nĩ.

¹⁴ Hĕn ri ke mũn ũ tóg isỹ rá tag kri finh ke tũ nĩ. Ěn jykre vĕg nĩmnĩ, kỹ ti mré vĕmén tũg nĩ, ti mỹ'āg jé sir, ti tỹ to jykrén mǎn jé.

¹⁵ Hā ra ti kato vāsān tũg nĩ, ti to kry nĩ tũg nĩ. Jesus mré ke vĕ mỹr, kỹ ti jyvĕn nĩ, ti tỹ to jykrén mǎn jé.

¹⁶ Ha mẽ, ěg Senhor mỹ sóg to vĩ tĩ, ti tỹ ājag krĩ kuprāg jé, ājag jagtar hā ra. Ti hā ne tóg ěg krĩ kuprāg tĩ'. Ěg Senhor jé ājag mré nĩgtĩ.

¹⁷ Sỹ vāhā vĕsóg ki ājag mỹ rán vĕ, ũ tỹ inh vĩ rán ja pāte, inh hā vỹ Paulo nĩ. Isỹ rán mũn hā vĕ. Ge inh nĩgtĩ, isỹ ũ mỹ vĕnh rá jĕnĕn kỹ.

¹⁸ Ěg Senhor tỹ Jesus Cristo mỹ sóg to vĩ tĩ, ti tỹ ājag tar han jé.

Hā vĕ.

PAULO Tÿ CARTA HAN: TIMÓTEO Mÿ CARTA VE

¹ Paulo tÿ rá vĕ. Topĕ ne inh kuprĕg ja nĭ', ěg kren han tĭ ti. Isÿ tÿ Jesus Cristo apóstolo jĕ jé tóg inh fĕg ja nĭ. Ti hã ve sór ěg tóg mŭ, Jesus Cristo ti.

² Isÿ inh kósin tÿ Timóteo mÿ rán hã vĕ. Tÿ ã inh kósin pĕ ri ke nĭ, ã tÿ isugrĭn Topĕ vĭ kri fin kÿ.

Ěg jóg tÿ Topĕ mÿ sóg to vĭ tĭ, ti tÿ ã tar han jé, ti tÿ ã jagãgtãn jé, ti tÿ ã krĭ kuprã han jé, ěg Senhor tÿ Jesus Cristo ti ke gé.

Ěg tÿ vyrmÿ vĕnh vĭjĕmĕ sór ke tŭ

³ Isÿ cidade tÿ Éfeso tá kãkutĕ kÿ ga tÿ Macedônia ra tŭg kÿ sóg ã mÿ to vĭ, ã tÿ ver Éfeso tá ke ag ki rĭr jé. ã mÿ sóg tó, ã tÿ tá nÿtĭ ag jyvĕn jé. Ón kÿ ag tóg Topĕ jykre kãmén sór tĭ. Tag to ag mÿ: “han tŭg nĭ,” hemnĭ.

⁴ Topĕ jykre tovãnh kÿ ag tóg vyrmÿ nĕn ũ ũ to jykren sór mŭ, hã vÿ: kanhkã tãn tÿ ó, he mŭ, kar ag tóg gufã ag jiji tó sór mŭ gé. Ag tÿ nĕn tó mŭ ěn tó kãn ke tŭ ěg tóg nĭ. Tag to jagnĕ vĭ kafãn mŭ vÿ kutĕ tĭ. Ěg pi(jé) tag tÿ Topĕ jykre han tĭ'. Topĕ jykren hã vĕ, hã vÿ: vĕnh kar tÿ ti ki rã, he mŭ.

⁵ Ěg tÿ Topĕ jykre han kÿ ěg tóg jagnĕ to há tãvĭ nÿtĭ, ěg fe kar tÿ, kÿ ěg tóg jagnĕ mÿ

vĕnh jykre pir han tĭ gé, ti ki rã há han jé ěg tóg ke mŭ gé.

⁶ Tá ke ũ ag tóg vĕnh jykre há tag togvãnh, kÿ ag tóg véké vĕmén mŭ nĭ ha. Ag tÿ kygnĕn hã vĕ.

⁷ Topĕ tÿ vãsÿ ěg jyvĕn tĭ ěn tÿ ag tóg ãjag kanhrãn sór tĭ, ag tÿ ki kagtŭg (hã) ra. Ón kÿ ag tóg tó tĭ, ag tÿ ki kagtŭg nÿtĭn kÿ. Topĕ vĭ kãmén sór ag tóg tĭ, to ag tóg: “tag to ke vĕ,” he tĭ, ag tÿ ki kagtŭg nÿtĭn kÿ.

⁸ Ag jãvo ěg tóg ki kanhró nÿtĭ, Topĕ tÿ vãsÿ ěg jyvĕn tĭ ěn há nĭ ti. Ěg tÿ to jykren há han kÿ ěg tóg ti há nĭ vég tĭ.

⁹ Topĕ pi(jé) ũ tÿ ti vĭ ki króm mŭ ag tugrĭn ěg jyvĕn ja nĭgtĭ'. Ũ tÿ vĕnh jykre kuryj han vãnh ěn ag tugnĭn ken hã vĕ, ũ tÿ ti vĭ han sór tŭ ag tugrĭn, ũ tÿ Topĕ to é he mŭ ag tugrĭn, ũ tÿ ti vĭ mranh mŭ ag tugrĭn, ũ tÿ ti ki kanhrãn sór vãnh ag tugnĭn, ũ tÿ vĕnh jykre pãno han mŭ ag tugrĭn ke gé. Ũ tÿ ge ag vÿ ãjag panh tén tĭ, ãjag mÿnh tén ag tóg tĭ, jagnĕ kãgtén ag tóg tĭ,

¹⁰ ãjag prŭ tŭ fag mré ag tóg nÿ tĭ, ãjag mén tŭ ag mré fag tóg tĭ, jagnĕ ki vÿn ke ag tóg tĭ, jagnĕ vĕne he ag tóg tĭ, jagnĕ mÿ ag tóg ón tĭ, jagnĕ to ag tóg ón tĭ gé, vĕnh jykre pãno kar han ag tóg tĭ, Topĕ tÿ nĕn ũ to: “kórég ti nĭ,” he mŭ ěn han kãn ag tóg tĭ.

¹¹ Ũ tÿ tag han mŭ tugnĭn tóg ěg jyvĕn ja nĭ, Topĕ tĭ, ěg tÿ han tŭg jé. Ti hã vÿ ěg mÿ vĕnh vĭ sér tó ja nĭgtĭ', ti hã vÿ inh mÿ to: “ha vĕnh kar mÿ tónh tŭg,” he ja nĭ'. Topĕ hã ne

ã pir mÿ há nĩ'. Jãvo ag tóg ti vĩ tag kato tẽ tĩ.

Topẽ tÿ ãg jagãgtãn sór

¹² Ëg Senhor tÿ Jesus Cristo ne isar han tĩ', hã kÿ sóg ti hã mÿ vĩ há han tĩ. Ti hã ne iso jykrén kÿ inh kuprêg', sÿ ti rãnrãj han jé, kÿ tóg vég mÿ, sÿ to tar nĩ ti, ti tÿ isar han kÿ.

¹³ Sÿ tá krÿg ke tũ vẽ vẽ, isÿ ti rãnrãj han jé. Vãsÿ sóg ti mÿ vĩ kónãn ja nĩgtĩ, ti vóg kónãn ja sóg nĩgtĩ, ti to jũ pẽ han ja sóg nĩgtĩ gé. Hã ra sóg ti ki kagtũg nĩ ja nĩgtĩ, kÿ sóg ti ki rã sór ja tũ nĩgtĩ gé. Hã kÿ tóg inh jagãgtãn, sÿ ti ki rã jé.

¹⁴ Inh jagãgtãn há tãvĩ han tóg, ãg Senhor ti, hã kÿ sóg ti ki rã há han, kÿ sóg ti to há tãvĩ nĩ gé, Jesus Cristo to.

¹⁵ Tag vÿ tÿ vãnh vĩ há nĩ, ha mẽ, kÿ vãnh kar tÿ tag to há nÿtĩ ran jé há tĩ vẽ, hã vÿ: Jesus Cristo vÿ ga kri mur, ti tÿ Topẽ vĩ mranh tĩ ag kren han jé, he mÿ. Topẽ vĩ mranh tĩ ag kar kórég kãfór vÿ tÿ inh nĩ.

¹⁶ Hã kÿ tóg inh jagãgtãn ja nĩ gé. Jesus Cristo tÿ vãnh kar mÿ ven sór vẽ, ti tÿ Topẽ vĩ mranh tĩ ag jagãgtãn sór mÿ ti. Hã kÿ tóg inh jagãgtãn, sÿ ù tÿ ti vĩ mranh mÿ ag kãfór han ja hã ra. Kÿ vãnh kar tóg inh ve kÿ Topẽ tÿ ag to há ki kanhró nÿtĩnh mÿ. Vãnh kar vÿ ãg rĩr krÿg ja tũ venh ke mÿ, ãg tÿ ti ki ge kÿ.

¹⁷ Topẽ hã ne ã pir mÿ tÿ pã'i mág nĩ'. ã tÿ nén kar han to tóg nĩ nĩ, kÿ tóg ter ke tũ nĩ gé. Ti vég tũ ãg tóg nĩgtĩ. ã pir mÿ tóg tÿ Topẽ nĩ. Kÿ ãg tóg ti

hã mÿ vĩ há han ke mÿ, ti to ke gé. Ti mÿ vĩ há han ke tag tóg tũg' henh ke tũ nĩ gé. Amém.

Timóteo rãnrãj

¹⁸ Timóteo', inh kósin vÿ tÿ ã nĩ. Sÿ ã mÿ ã rãnrãj tag nĩm vẽ. Vãsÿ ã tóg mẽ ja nĩ, Topẽ vĩ tó tĩ ag tÿ ã to nén tó ja ti. Kÿ ag vĩ mĩ êkré. Soldado tÿ ã rãnrãj to vãsãn ri ke han kÿ ã jẽ nĩ, Topẽ vĩ tó kÿ. Topẽ vĩ tó tĩ ag vĩ vÿ ã tar han ke mÿ, ã tÿ ã rãnrãj to vãsãn há han jé.

¹⁹ Ti ki rã to krónh ke tũg nĩ. ã fe kavénh sór tũg nĩ. ù ag tóg ãjag fe kavénh ja nĩgtĩ. Hã ra ag tóg kykũnh sór ja tũ nĩgtĩ, ag fe kavéj ti. Hã kÿ ag tóg ti ki rã kÿ tĩ tovãnh tĩ, kÿ tóg ãg barco tÿ goj ki pun ke ri ke nĩ.

²⁰ Ag kãmĩ ù vÿ tÿ Himeneu nĩ, Alexandre ti ke gé. Topẽ to é he ag tóg mÿ ha ùri, hã kÿ sóg Satanás mÿ ag vin, ti tÿ ag vóg kónãn jé. Satanás tÿ ag vóg kónãn tugrĩn ag hÿn ki kanhrãn ke mÿ, ãg tÿ Topẽ to é henh ke tũ ti.

2

Igreja krêm vãnh jykre

¹ ã tÿ ã tũ ag jyvén kÿ ag mÿ ag tÿ Topẽ mré vémén ke hã tómnĩ. Ag mÿ: “Topẽ mré vémén e han nĩ,” hemnĩ. “Ti mÿ nén ù kar to vĩmnĩ, vãnh kar jagfy vĩmnĩ, ti mré, ti mÿ nén ù kar to: “há ti nĩ,” hemnĩ gé,” hemnĩ ag mÿ.

² Pã'i mág ag jagfy Topẽ mré vĩmnĩ gé, pã'i kar ag to ke gé. Kÿ ag tóg jatu nÿtĩ. Kÿ ãg tóg jatun mÿ ag krêm nÿtĩn kÿ ãg rãnrãj nón mũnh ke mÿ gé,

ĕg tỹ Topĕ to há nỹtĩn kỹ, ĕg tỹ jagnĕ to há nỹtĩn kỹ ke gé.

³ Topĕ mỹ tóg há nĩ, tag ti, ũ tỹ ĕg kren han tĩ ti mỹ, ti mỹ tóg sér tĩ.

⁴ Ti tỹ tag han sór vĕ, ha mĕ: ĕprā ke ag krenkren han sór tóg mũ, vĕnh kar tỹ ti tỹ ki hā tó mũ tag mĕ han kãn jé.

⁵ Pir ti nĩ, Topĕ ti. Pir ti nĩ gé, ũ tỹ Topĕ mré ĕg jagfy vĩ mũ ti, hā vỹ: ĕg mré ke tỹ Jesus Cristo, he mũ, ũ tỹ ĕg ri ke mur ja ĕn ti.

⁶ Ti hā ne vĕnh fĕg', ti tỹ vĕnh kar kygãm jé. Topĕ tỹ ti mỹ kurā nĩm ĕn kã ke ja vĕ. Kỹ vĕnh kar vỹ mĕnh ke mũ, ũ tỹ ve ja ag vĩ ti.

⁷ Hā kỹ tóg inh mỹ: “ha vĕnh kar mỹ tónh tĩg,” he ja nĩ. Sỹ tỹ ti apóstolo jĕ jé tóg inh kuprĕg, hā kỹ sóg tó mũ. Ki hā sóg tó mũ. Inh pi(jé) ón mũ'. Fóg ag to tóg inh jĕnĕ, kanhgág ag to ke gé, sỹ ag mỹ vĕnh vĩ há tó jé, ag tỹ Topĕ ki ge jé gé.

⁸ Kỹ tá Jesus ki ge kỹ nỹtĩ ag mỹ tómnĩ, ag kar tỹ igreja krĕm Topĕ mré vĕmĕn jé. Hā ra tóg há tũ nĩ, ũ tỹ ã jykre pãno tovãnh sór tũ nĩn kỹ, ti tỹ Topĕ mré vĕmĕn mũ (hã) ra. Ag tỹ Topĕ mré vĕmĕn kỹ ag tóg ãjag jũ tovãnh ke mũ, ag tỹ ũn kato tĕ mũ ag tovãnh jé ag tóg ke mũ gé. Tag tómnĩ ag mỹ.

⁹⁻¹⁰ Kỹ ũn tỹtá fag vĩ ge nỹtĩnh mũ gé, ãjag tỹ vĕnh mãn kỹ nỹtĩn kỹ. Fag sĩnvĩ han jafã vĩ tỹ fag jykre kuryj nĩ. Fag tũ hã vĕ. Tag han kỹ ĕg tóg vég mũ, fag tỹ Topĕ to há nỹtĩ ti. Kur to mỹ'ãg tĩ ra rãnh ke tũ fag nĩ hã ra. Fag tỹ ãjag kur

tỹ vĕsĩ tãvĩ han tĩ to ken hã vĕ, fag gãnh to ke gé. Pi(jé) há nĩ', fag tỹ brinco mág tỹ vĕso vin kỹ, jãnka e tỹ vĕso sa kỹ, kur kaja e tu kỹ, fag tỹ nĕn kar kaja e génh kỹ tóg há tũ nĩ, fag tỹ tỹ vĕsĩ tãvĩ han kỹ. Fag kur há vỹ há nĩ, kur sĩnvĩ ti.

¹¹ Ājag tỹ vĕnh mãn kỹ nỹtĩn kỹ fag vĩ vĩnh ke tũ nĩ. Mĕ tãvĩ han jé fag tóg ke mũ, fag tỹ tỹ ag krĕm ke nỹtĩn kỹ.

¹² Fag tỹ ag mỹ vĕnh jykre nĩm kỹ tóg há tũ nĩ. Fi tỹ fi mén krĩn sór nĩn kỹ tóg kórég nĩ gé. Fag tỹ ĕmĕ kã nỹtĩn kỹ tóg há tĩ.

¹³ Tag to jykrĕn nĩ, ha mĕ. Topĕ tỹ ũn han vén mũ vĩ tỹ Adão nĩ, kar kỹ Eva fi. Ti tỹ tỹ fi kri ke to ken hã vĕ.

¹⁴ Kỹ Japo tỹ ũn krĩn kónãn mũ fi vĩ tỹ fi nĩ ja nĩgtĩ. Adão pijé'. Fi hã ne Topĕ vĩ mranh vén', kỹ tóg fi nón mranh ja nĩgtĩ gé, Adão ti. Hã kỹ tóg há tũ nĩ, fag tỹ ag krĩn sór kỹ.

¹⁵ Hã ra fag krenkren ke mũ gé, fag krĕ mré hã. Kỹ tóg há nĩ, fag tỹ Jesus tovãnh sór tũ nỹtĩn kỹ, fag tỹ ti to há nỹtĩn kỹ, jagnĕ to há ke gé, fag tỹ tỹ ti tũ nỹtĩn kỹ. Fag krĩ há nỹtĩn kỹ tóg há tĩ.

3

Igreja to pã'i mág

¹ Sỹ ke há vĕ, ha mĕ. ũ tỹ igreja to tỹ pã'i mág nĩ sór kỹ tóg vĕnh rãnhraj mág han ke mũ.

² Hã ra igreja to pã'i mág vĩ ge jĕnh mũ, sỹ ã mỹ ti jykre kãmĕn ke vĕ, ha mĕ. ũ tỹ kygnĕ tũ vĩ há nĩ, ũ tỹ prũ

pir han ky nĩ, ũ tỹ nén ũ há to jykren mũ, ũ tỹ vễso jykren mũ, ũ tỹ kór há tá ke ag mỹ: “inh mré nĩnh kãtĩg,” he tĩ, ũ tỹ ag kanhrãn há han tĩ,

³ ũ tỹ vinho kron (ka) mẽ tũ, ũ tỹ ã fe tỹ gỹm ke vãnh, ũ tỹ vễnh kar mỹ komêr hã vĩ tĩ, ũ tỹ vễnh kar krĩ kuprã nĩ ve sór tĩ, ũ tỹ rico nĩ sór vãnh,

⁴ ũ tỹ ã ãn krêm nỹtĩ fag ki rĩr há han tĩ, ũ tỹ ã krê jyvễnh há han tĩ, ti krê ag tỹ ti kamêg jé.

⁵ ũ tỹ ã ãn krêm nỹtĩ fag ki rĩr há han tũ nĩ tóg igreja krêm ke ag ki rĩr há han ke tũ nĩ gé.

⁶ ũ tỹ Jesus ki rã tãg tóg tỹ pã'i jễnh ke tũ nĩ ver, ke tũ nĩ mũ ra tóg inh mỹ ti tỹ: “tỹ sóg ũn mág nĩ,” henh ha mẽ tĩ, kỹ tóg inh mỹ ti tỹ Japo jykre han ha mẽ tĩ, Japo tỹ ti krĩn kỹ. Kỹ Topê tóg ti vóg kónãn ke mũ.

⁷ Vễnh kar tỹ igreja to pã'i to vĩ há han kỹ tóg há tĩ, ũ tỹ Jesus ki ge tũ ag mré hã. Kỹ tóg mỹ'ãg ke tũ nĩ, ti tỹ kygnêg tũ nĩn kỹ. Kỹ tóg Japo jykre han mãn sór ke tũ nĩ gé. Hã kỹ ũn há tãvĩ vỹ tỹ pã'i jễnh mũ.

Igreja to pã'i kãsir

⁸ Kỹ igreja to pã'i kãsir ag vỹ nỹtĩ gé. ũ tỹ ge ag vỹ vễnh jykre há han kỹ nỹtĩnh mũ gé, vễnh vĩ pir han kỹ nĩ, vinho kron mág tũ, nén ũ to én ke tũ, rico nỹtĩ sór ke tũ.

⁹ Topê vỹ êg mỹ vễnh vĩ jễnê, êg tỹ ti ki rã jé, êg tỹ ti vĩ tag to krónh ke tũ nỹtĩ jé, êg tỹ êg fe kavẻnh tũ nĩ jé gé. Ag tỹ ti vĩ tag to tar nỹtĩnh ke vê, igreja to pã'i kãsir ag.

¹⁰ ũ tỹ Jesus ki rã tãg nĩ kỹ tóg ver tỹ pã'i nĩnh ke tũ nĩ, êg tỹ ver ti jykre ven jé. Ti tỹ kygnêg tũ nĩn kỹ tóg há tĩ, ti tỹ tỹ pã'i nĩnh ke ti.

¹¹ Kỹ ag prũ fag vỹ ge nỹtĩnh mũ gé. Fag tỹ nén ũ há han kãn kỹ tóg há tĩ. Kỹ tóg há tĩ gé, fag tỹ ũ mỹ vĩ kónãn tũ nĩn kỹ, fag tỹ nén ũ há kar to jykren kỹ, fag tỹ fag rãnrãj ki rĩr há han kỹ.

¹² Igreja to pã'i sĩ vỹ prũ pir han kỹ nĩnh mũ gé, kỹ tóg ã krê kanhrãn há han ke mũ gé, kỹ tóg ã ãn krêm nỹtĩ fag ki rĩr há han ke mũ gé.

¹³ ũ tỹ ã rãnrãj tag ki rĩr há han kỹ tóg tỹ ũn mág jễnh mũ. Jesus Cristo ki rã kỹ tóg jễnh mũ, kỹ tóg Topê to kanê jur mãn ke tũ nĩ, jatun mỹ tóg nĩnh mũ.

Jesus kãme

¹⁴ ã mỹ sóg vễnh rá tag han mũ, hã ra sóg kãnhrmar ã ve sór mũ.

¹⁵ Hã ra sóg hẻn ri ke mũn kãtĩg vãnh han ke mũ, kỹ ã tóg Topê jo ãn krêm vễnh jykre ki kanhró nĩnh mũ. Hã jé sóg ã mỹ rãn mũ. Topê vỹ rĩr jê. Ti tũ vỹ tỹ êg nỹtĩ, ũ tỹ ti ki ge kỹ nỹtĩ ag. Êg hã vỹ vễnh vĩ há hã tó tĩ, Topê vĩ to, vễnh kar tỹ mẽ jé. ãn nũna tugrĩn ãn vỹ tar jê. Jãvo êg tugrĩn vễnh kar vỹ vễnh vĩ há ẻn mẽnh ke mũ.

¹⁶ Ha vé, Topê tỹ ùri êg mỹ nén tó mũ tag vỹ tỹ nén ũ há tãvĩ nĩ. Vãsỹ ag tóg mẽ ja tũ nĩ, êg tỹ ùri mẽg mũ tag ti. Ti jykren hã vê, ha mẽ: Jesus Cristo vỹ êg ri ke mur, ga kri, kỹ Topê tóg ti

tỹ ũn mág han, tá, ti tỹ
jykre kuryj nĩn kỹ.

Kỹ tóg ã tỹ jěgně jafã ag mỹ ti
ven, kỹ ti mré mũ tí ag
vỹ povo kar mỹ ti tó.

Hã kỹ ga kri mũ ag vỹ ti
ki ge mũ, kỹ Topě tóg
kanhkã tá ti tỹ ũn mág
han.

Ěg tỹ Jesus kãmén hã vē.

4

Ón kỹ Topě kãmén tí ág

¹ Ha vé, Topě kuprĩg vỹ ěg
mỹ nén ũ jagy tó tí, ha mẽ.
Jesus kãtĩg mãn ke tỹ kakó ěn
kã ũ ag něji ti tovãnh ke mũ,
ag tỹ vėnh ó hã ki rã jé, Nén-
Kórég ag jykre ki, Japo tỹ ag
kanhrãn mũn ki.

² Ū tỹ Japo mré ke ag vỹ
un'ón tí, hã ra ag tóg ag vỹ jěmě
kỹ Jesus tovãnh ke mũ. Jykre
régre han ag tóg tí, Japo mré
ke tag ag. Ājag fe kygvėnh ja
ag nỹtĩgtĩ, kỹ ag tóg ki kagtĩg
nỹtĩ ha, ag tỹ un'ón mũ ti.
“Vėnh vỹ há vē,” he ag tóg tí,
vėnh ó to.

³ “Prũg tũg ra, mén tũg ra,”
he ag tóg tí. “Tag ko tũg ra,”
he ag tóg tí gé, Topě tỹ nén
han ja to. Ěg tỹ Cristo ki ge
há han kỹ, ěg tỹ ti vỹ kri fi kỹ
ěg tóg ti hã mỹ to vỹ há han ke
mũ, vějěn to, kỹ ěg tóg nén kar
konh ke mũ.

⁴ Topě tỹ nén han mũ kar vỹ
há nĩ. Kỹ ěg tỹ ti mỹ: “há ti nĩ,
ã tỹ ěg mỹ vějěn tag ven mũ
ti,” hen kỹ ěg jatun mỹ konh
ke mũ. “Tag konh ke tũ inh
nĩ,” henh ke tũ ěg tóg nĩ.

⁵ Topě vỹ vỹ nén kar jãnhkri
han tí, kỹ ěg tóg to Topě mré

vėmén tí gé, kỹ ěg tóg jatun mỹ
konh ke mũ.

*Ěg mré ke kar ag kanhrãn
nĩ*

⁶ Tag kar tómnĩ, ěg mré ke
kar ag mỹ. Ag mỹ kãmén kỹ
ã tóg Jesus Cristo rãnhraj han
há han mũ. Topě vỹ vỹ ã mỹ tỹ
vějěn ri ke nĩnh mũ, kỹ ã tóg tỹ
tar jě, ã tỹ ti jykre mĩ tĩn kỹ. Ki
kanhró ã tóg nĩ, Topě jykre ti,
ěg tỹ ti ki rã kỹ nỹtĩ ti.

⁷ Ū tóg vyrmỹ nén ũ to
jykrén sór tí, tỹ vėnh ó han kỹ,
Topě vỹ ki rán kỹ nĩ tũ ěn. Tag
jěmě sór tũg nĩ. Vėnh jykre
kuryj hã mĩ tĩg nĩ, tag hã to tar
nĩmnĩ.

⁸ Kejěn ěg tóg vãkrég tí. Ěg tỹ
vãkre to tar nỹtĩn kỹ tóg há sĩ
nĩ. Ěg tỹ jãvo vėnh jykre kuryj
kar to tar nỹtĩ tag vỹ há tãvĩ nĩ
sir. Tag to ěg tóg tag mĩ mũ há
han tí, kar ěg tóg tá mũ há han
ke mũ gé.

⁹ Tag vỹ tỹ vėnh vỹ há nĩ,
vėnh jykre kuryj ti. Vėnh
jykre kuryj tỹ vėnh kar mỹ há
nĩ ra tóg há tí vē.

¹⁰ Vėnh jykre kuryj ve jé sóg
rãnhraj mũ, tag ve jé sóg vãsãn
mũ. Topě hã ki ěg tóg nén ũ
kar vég tí, hã kỹ sóg ti hã to
vãsãn mũ. Rĩr ti nĩ, ěg jóg tỹ
Topě ti. Ti hã ne ěg kren han
tĩ', vėnh kar ag, ũ tỹ ti ki ge kỹ
nỹtĩ ag.

¹¹ Tag kãmén nĩ, tag to vėnh
kar mỹ: “tag han ra,” hemnĩ.

¹² Kyrũ ã tóg jě. Ū jé ã to é
he tũg, ã kyrũ jěn kỹ. Nén kar
há ěn han nĩ, ag tỹ ve jé, ag
tỹ ã kóm han sór jé, ã vỹ ri ke
ěn ti, ã tỹ nén han mũ ri ke, ã
tỹ vėnh kar to há nĩ ri ke, ã tỹ

Jesus ki rã ký jě ri ke, ã tỹ nén ù jãnhkri han ja ri ke ke gé.

¹³ Inh kãtĩg ke to hã ã tỹ nén han tĩ ěn han tĩmnĩ ver. Ag mỹ Topě vĩ rán to kemnĩ, ag jyvěn nĩ, ag kanhrãn nĩ gé.

¹⁴ Ěg jyvěn tĩ ag ne ã mỹ tó', Topě tỹ nén to ã tar han ke ti, Topě kuprĩg tỹ ag krĩn ký, igreja to pã'i ag tỹ ãjag nĩgé tỹ ã kri fi ja ěn kã.

¹⁵ Ag tỹ ã mỹ nén tó ja ěn tovãnh tũg nĩ. To jykren nĩ, to tar nĩmnĩ, věnh kar tỹ ã tỹ to tar nĩ ěn ve jé.

¹⁶ Věso jykren nĩ, ký ã tỹ Topě vĩ tỹ ag kanhrãn ke ěn to jykren nĩ gé, ã tỹ kygně tũg jé. Tag to tar nĩmnĩ. Á tỹ tag han ký ã kren ke mũ, ký ù tỹ ã vĩ mēg mũ ag vỹ krenkren ke mũ gé.

5

¹ Ůn si há ag mỹ vĩ tar han tũg nĩ. Koměr hã ag jyvěn nĩ, ěg tỹ ù tỹ ěg han mũ ěn mré vĩ ri ke han nĩ, ã tỹ ũn si há ag mré vēmén ký. Á tỹ kyrũ ag jyvěn ký ěg tỹ ěg jãvy ag jyvěn ri ke han nĩ.

² Á tỹ ũn si há fag jyvěn ký ěg tỹ ěg mỹnh fi jyvěn ri ke han nĩ. Á tỹ tátãg fag jyvěn ký ěg tỹ ěg ve fi jyvěn ri ke han nĩ. Á tỹ fag jyvěn ký věnh ki rĩrnmnĩ, ã tỹ fag to én tũ nĩ jé.

Ů tỹ hě nỹ ũn mén ter ja fag ki rĩr ke mũ

³ Ů fag mén vỹ ter, hã ra tóg tũ tĩ, ù tỹ fag ki rĩr ke ti. Ěn fag ki rĩrnmnĩ.

⁴ Ůn mén ter ja ù fag krě vỹ nỹtĩ, fag krě'krě mré hã. Ký

fag krě hã vỹ fag ki rĩr ke mũ'. Ag tỹ ãjag mré ke fag jagãgtãn ký tóg há tĩ, ù tỹ ag han mũ fag. Ag tỹ gĩr nỹtĩ kã fag tóg ag jě'ỹn ja nĩgtĩ, ký ag tóg věnh kaja jé fag jě'ỹn mũ ha. Topě jykren hã vě, tag vỹ ti mỹ há nĩ.

⁵ Hã ra ũn mén ter ja ù fag vỹ krě tũ nỹtĩ, ký ù tỹ fag jě'ỹn ke tóg tũ tĩ gé. Ký Jesus ki ge mũ kar ag vỹ fag jě'ỹn ke mũ, fag tỹ Topě hã ki nén ù kar ve sór ký, ti mré vēmén ký, ti hã mỹ nén ù kar to vĩ ký. Fag tỹ tag to krónh kenh ke tũ vě, kurã mré hã, kuty mré hã ke gé.

⁶ Fag tỹ hã ra ag to kanhir sór ký fag tóg věnh jykre pãno han mũ, ký fag tóg mũ kónãn ke mũ.

⁷ Tag tómnĩ, fag mỹ, fag tỹ tỹ prãnh ke tũ nĩ jé.

⁸ Á rãnrãj jafã tá ke ag kãmĩ ù tóg kejěn ã mré ke fag ki rĩr tũ nĩ, ã ĩn krěm nỹtĩ fag. Ěn vỹ Jesus ki rã tovãnh ja nĩ, ti tỹ fag ki rĩr ja tũ tũgrĩn. Kórég tãvĩ ti nĩ, tag ti. Ů tỹ Jesus ki rã ja tũ kórég kãfór ti nĩ.

Ů tỹ hě fag tỹ igreja ki rĩr ke

⁹ Tá ũn mén ter ja fag vỹ ãjag jiji ránrán sór mũ, fag tỹ igreja ki rĩr jé. Ůn si há fag jiji rán nĩ, ù tỹ 60 anos kãfór nỹtĩ fag, ũn mén pir han ký nỹtĩ ja fag.

¹⁰ Věnh kar tỹ fi jykre há ki kanhró nỹtĩn ký fi jyjy rán nĩ, fi tỹ fi krě ki rĩr há han ja nĩn ký, fi tỹ kór há tá ke fag mỹ: "ĩnh mré nĩnh kãtĩg," he ja nĩn ký, fi tỹ ã ĩn krěm Topě tũ ag ki rĩr há han ja nĩn ký, fi tỹ věnh kar jagãgtãn ja nĩn ký, ũn

vēsyrénh mũ ag, fi tỹ nén ù há kar to tar ja nĩn kỹ. Û tỹ ge fi jiji rán nĩ.

11 Ûn mén ter ja ù fag vỹ si há tũ nỹtĩ ver, kỹ fag jyjy rán tũg nĩ. Fag tỹ ù to én kỹ fag tóg Cristo tovãnh kỹ mén sór mũ.

12 Kỹ tóg vẽnhmỹ tĩnh mũ, fag tỹ fag jiji rán ja nĩn kỹ, hã vỹ: “mén mãn ke tũ inh nĩ ha, sỹ Cristo tũ hã ki rĩr jé,” he mũ. Fag mén sór kỹ fag tóg fag vỹ tag mranh mũ sir.

13 Kỹ fag tóg rãnrhãj tũ nỹtĩn kỹ fag tóg ãn kar mũ pasa he sór mũ, ha vemnĩ, kỹ fag tóg fagrĩnh mỹ vēmén ke mũ gé sir. Vẽn kar tỹ nén han mũ tỹ fag tóg vēmén sór mũ, ha vemnĩ. Nén tó vãn h tó jé fag tóg ke mũ gé. Kỹ tóg há tũ nĩnh mũ.

14 Hã kỹ tóg há tĩnh mũ, fag mén mãn kỹ, ùn mén ter ja tỹ gĩr fag. Fag tỹ krẽ ve kỹ tóg há tũ. Fag tỹ fag ãn ki rĩr há han kỹ tóg há tĩ gé. Kỹ ù tỹ ẽg mỹ fag to vỹ sór mũ ra tóg ag mỹ vẽnhmỹ tĩnh mũ, ha vemnĩ.

15 Ha vé, ù fag vỹ Cristo tovãnh huri, ùn mén ter ja tỹ gĩr ù fag, kỹ fag tóg Satanás jykre han mũ sir. Kỹ tóg kórég nĩ.

16 Tá ke fag kãmĩ ù ãn krẽm ùn mén ter ja ù fag vỹ nỹtĩ. Fag hã vỹ fag jẽ'ỹn ke mũ. Fag tỹ fag mỹ: “Jesus ki ge mũ ag tỹ ã jẽ'ỹn kỹ tóg inh mỹ há tĩnh mũ vẽ,” henh ke tũ vẽ. Ke tũ nĩ mũ ra Jesus ki ge kỹ nỹtĩ ag vỹ ù tỹ hèn ri ke fag ki rĩr ke mũ, kỹ fag jẽn vỹ fag kã kyn kenh mũ, fag tỹ e nỹtĩn kỹ. Jesus ki ge mũ ag vỹ ùn mén ter ja tỹ

ge hã ki rĩr ke mũ, hã vỹ: ùn kanhkã tũ, ùn krẽ tũ, he mũ.

Jesus ki ge kỹ nỹtĩ ag tỹ igreja to pã'i ag jẽ'ỹn ke

17 Tá ke ag kãmĩ ù tóg tỹ pã'i nỹtĩ, igreja to. Ag tỹ ag rãnrhãj ki rĩr há han kỹ ag tóg ẽg mỹ tỹ ùn mág tãvĩ nỹtĩ. Igreja to pã'i ag kãmĩ ù tóg igreja ki ké ag kanhrãn tĩ, Topẽ vỹ tỹ, kỹ ag tóg to krónh ke tũ nĩgtĩ. Tag ag vỹ tỹ ẽg mỹ ùn mág tãvĩ nỹtĩ. Ag tỹ igreja krẽm ùn kanhrãn tĩ ag jé ag mỹ kajãm mág, ù tỹ ag kanhrãn tĩ ag mỹ.

18 Tag vỹ rán kỹ nĩ, ag to, ha mẽ: “monh tỹ ẽkrẽ jãnkre ki rãnrhãj kỹ ti jẽnky tógfĩn tũg nĩ, ti jẽn kamẽg tũg nĩ,” he ja tóg nĩ, Topẽ vỹ rán ki. Kỹ tag vỹ rán kỹ nĩ gé: “ùn rãnrhãj mũ ẽn tóg ti kaja venh ke mũ, ã rãnrhãj kaja ti,” he ja tóg nĩ gé, Topẽ vỹ rá ki. Ti tỹ ẽg tỹ Topẽ vỹ tó tĩ ag mỹ kajãm to ken hã vỹ, ẽg tỹ Jesus ki ge kỹ nỹtĩn kỹ.

19 Û tóg kejẽn ã mỹ igreja to pã'i jykre kórég tó sór mũ. Ûn régre ag tỹ ti jykre kórég ve ja nĩn kỹ ã mỹ tó kỹ ag vỹ jẽmẽmnĩ, ke tũ nĩn kỹ ùn tãgtũ ag vỹ ti. Ûn pir vỹ jẽmẽ sór tũg nĩ.

20 Pã'i ù tỹ kygnẽ kỹ vẽnh kar rĩnve ti jyvẽn nĩ, vẽnh kar tỹ ti mré ẽg tỹ kygnẽg tĩ ẽn kamẽg jé.

21 Tag han ra, ha mẽ. Ker han tũg hẽ'. Topẽ vỹ ã tỹ nén han mũ vég tĩ, Jesus Cristo ti ke gé, Topẽ tỹ jẽnẽ jafã ag ke gé, Topẽ tỹ ùn kuprẽg ja ag. Ti hỹn ã mỹ jagy nỹ, sỹ ã mỹ tó mũ tag. Hã ra vẽnh kar mỹ

věnh jykre pir han nĩ. Ũ to: “ti tỹ iso há nĩn kỹ sóg ti mỹ vĩ tar han sór tũ nĩ, ti tỹ kygně ja ra,” he sór tũg nĩ. Ge ra ti jyvěnh tar han nĩ.

²² Kỹ kãnhmar ũ kri ã nĩgé fi sór tũg nĩ gé. Ti tỹ ã tỹ Topě vĩ mranh ja ěn tovãnh kãn ja tũ nĩn kỹ ã tóg ti mré mranh mũ, ã tỹ ge ra ti kri ã nĩgé fi kỹ, ti vĩ mranh tỹ ver ti kãkã nĩn kỹ. Kỹ veso jykrén nĩ gé, ã jãnhkri kar jě jé.

²³ Goj tãvĩ kron sór tũg nĩ. Sĩn kỹ vinho kron nĩ. Věnh kagta vế ã mỹ, ã kaga nĩn kỹ, ã tỹ fe kórég (ka)mě nĩn kỹ.

²⁴ Ũ ag tóg Topě vĩ mranh pě han tĩ, kỹ věnh kar tóg ag vég tĩ. Topě vĩ ag vóg kónãn ke mũ, ag tỹ ti vĩ mranh pě han to. Ũ ag tóg věnh péju kỹ mranh tĩ. Ag tỹ Topě vĩ mranh mũ ěn vĩ věnh ven ke mũ gé kejěnh, ha vemnĩ.

²⁵ Ge ti nĩ gé, věnh jykre há mré. Věnh kar vĩ vég mũ, ũ tỹ věnh jykre há han mũ ti. Kejěnh ũ tóg nén ũ há han tĩ, hã ra tóg věnh péju kỹ han tĩ. Věnh ven jé tóg ke mũ gé, ti tỹ han mũ tag ti.

6

Patrão camarada jykre

¹ Tá ke ag kãmĩ ũ tóg tỹ patrão camarada nỹtĩ. Kỹ ũ ag patrão vĩ Cristo ki kagtĩg nĩ. Ti camarada ag mỹ kemnĩ, ag tỹ ãjag patrão kaměg jé, ag tỹ ag patrão tũ ki rĩr há han jé. Kỹ ũ tóg ěg to vĩnh ke tũ nĩ, Topě to, ti vĩ to, ag tỹ věnh jykre há han kỹ.

² Ũ ag patrão vĩ Cristo ki rã ja nĩ. Ti camarada ag mỹ kemnĩ, ag tỹ ti to é he tũg jé. “Inh mré ke vĩ tỹ ti nĩ, inh patrão ti, ti tỹ Cristo ki rã kỹ. Kỹ inh hỹn ti vĩ han ke tũ nĩ,” he tũg nĩ. Ti tỹ ěg mré Jesus ki rã kỹ Jesus vĩ ti to há nĩ. Kỹ tóg ũn vėsỹrénh mũ ag jagãgtãn tĩ, ag patrão ti. Kỹ tóg há tĩ, ti camarada ag tỹ ti tũ ki rĩr há tãvĩ han kỹ. Tag tómnĩ, věnh kar mỹ. Tag tỹ ag jyvěnh nĩ.

Ón kỹ Topě kãmén tĩ ag

³ Ũ ag tóg vurmỹ jykrén kỹ nén ũ tó sór tĩ. Topě vĩ rán kỹ nĩ ěn tó sór tũ ag nĩgtĩ. Ěg Senhor tỹ Jesus Cristo tỹ nén tó mũ ěn tovãnh kỹ ag nỹtĩ ha, věnh vĩ há ěn, Topě jykre ěn.

⁴ “Ũn mág vĩ tỹ ěg nỹtĩ,” he ag tóg tĩ. Hã ra ag tóg jykre tũ nỹtĩ. “Topě hỹn tóg tag tó sór mũ, ti tỹ ěn tó kỹ,” he ag tóg tĩ, ón kỹ, ag tỹ ũ tỹ ag mỹ věnh vĩ há tó mũ ag kato tẽ sór kỹ. Kaga ag nỹtĩ, krĩ věnhmỹ ag nỹtĩ, hã kỹ ag tóg fagrĩnh mỹ vĩ mũgtĩ. Ag vĩ tugnĩn jagně tũ ki vế tỹ vĩ kutě tĩ, jagně to jũ ke gé, jagně to vĩ kónãn, jagně to jykrén kónãn,

⁵ jagně to féfén ke gé. Krĩ tũ nĩ ve ag nỹtĩ. Věnh vĩ há ki kagtĩg ag nỹtĩ. Kỹ ag tóg ón kỹ Topě kãmén to ricon sór nỹtĩ.

⁶ Hỹ, Topě to ěg rico nỹtĩnh mũ, ěg tỹ ěprã ricon sór tũ nỹtĩn kỹ.

⁷ Ha vé, ěg mur kỹ ěg tóg tỹ nén ũ tũ mur, kỹ ěg ter ken kỹ ěg tóg nén kar tovãnh kỹ tũg mũ gé.

⁸ Kÿ tóg há tĩ, ěg tÿ ũri vĕjĕn mrĕ ěg kur ven kÿ, tag tãvĩn.

⁹ Ěg tÿ rico nÿtĩ sór kÿ tóg inh mÿ ěg tÿ Topĕ vĩ mranh ha mĕ tĩ. Kãnhmar ěg tóg nĕn ũ to ěn', nĕn ũ to ěn' he tĩ, kÿ tag tóg inh mÿ ěg kókĕn ha mĕ tĩ. Kÿ ěg tag to nŭgme ki vár ke mŭ. Pi(jé) há nĩ'.

¹⁰ Ěg tÿ jãnkamy mág to ěn kÿ ěg tóg nĕn ũ kórĕg kar han sór tĩ. Ka jãre kórĕg ri ke ti nĩ, ěg tÿ jãnkamy mág ve sór mŭ ti. Vĕnh jykre kórĕg vĕ. Tag to ũ ag tóg Jesus ki rã tovãnh huri, kÿ ag tóg vĕsÿrénh mŭ ha, ag tÿ jãnkamy mág to há nÿtĩ tugnĩn.

Ã rãnrãj ki rĩr há han nĩ

¹¹ Ag jãvo ã há vÿ tÿ Topĕ tũ nĩ. Kÿ vĕnh jykre kórĕg tag tovãnh kãn. Ā tÿ nĕn han ken há vĕ, há vÿ: vĕnh jykre kuryj, he mŭ, Topĕ kamĕg mŭ, he mŭ, ti ki rã kÿ tĩ, he mŭ, vĕnh kar to há nĩ, he mŭ, vĕnh kar to fen nĩ, he mŭ, komĕr há vĩ, he mŭ gé.

¹² Ěg tÿ ti ki rã kÿ ěg tóg ti jykre to vãsãnsãn ke mŭ, ěg tÿ ka kunũnh sór kÿ to vãsãn ri ke. To tar nĩmnĩ, ã tÿ ěg rĩr krÿg ja tũ ve jé. Tag há to tóg ã jé prĕr, Topĕ ti. Kÿ ã tóg vĕnh kar mÿ tó ja nĩ gé, kurã ěn kã. Ũn e ag vÿ ã vĩ ěn mĕgmĕ. Kÿ to tar nĩmnĩ.

¹³ Sÿ ã jyvĕn sór vĕ, kÿ Topĕ vÿ mĕnh mŭ. Ti há ne nĕn kar rĩnrĩr han tĩ', Topĕ ti. Kÿ Jesus Cristo vÿ inh vĩ mĕnh mŭ gé. Ti há ne vĕnh kãmĕn há han', pã'i tÿ Põncio Pilatos ěn mÿ.

¹⁴ Sÿ tag tó sór vĕ, ã mÿ, ha mĕ: ã rãnrãj ki rĩr há han nĩ.

To krónh ke tŭg nĩ, to kygnĕ sór tŭg nĩ gé. Tag han kÿ ěg Senhor tÿ Jesus Cristo tÿ vÿn ke ěn jãvãnh nĩ.

¹⁵ Ti kurã ki Topĕ vÿ ti mÿ: "ha tĩg," henh ke mŭ. Topĕ vÿ ã pir mÿ tÿ nĕn ũ kar kri ke nĩ. Kÿ ěg tóg ti há mÿ vĩ há han ke mŭ. Pã'i kar kri tóg tÿ pã'i nĩ. Ũn mág kar kri tóg tÿ ũn mág nĩ.

¹⁶ Ti há ne ã pir mÿ ter ke tũ nĩ'. Ti há ne jĕngrĕ kãkã nĩ nĩ', tá ěg jun ke tũ nĩ. Ěprã ke ũ vÿ ti ve ja tũ nĩ gé, kÿ ěg tóg ti venh ke tũ nĩ gé, ěg tÿ tÿ ěprã ke nÿtĩn kÿ. Ti há ne tÿ ũn mág nĩ'. Ti há ne tar nĩ'. Tŭg' he jãvãnh ti nĩ, ti tÿ tÿ ũn mág nĩ ti. Amém.

Ěprã ũn rico ag

¹⁷ Ěprã ũn rico ag mÿ tómnĩ, ag tÿ vĕso: "tÿ inh ũn rico mág nĩ," he tũ nĩ jé. Kÿ tóg há tũ nĩ gé, ag tÿ: "isÿ nĕn ũ kar tÿ tũ nĩn kÿ isóg nĕn ũ jagy venh ke tũ nĩ," hen kÿ. Ag rico vÿ kãnhmar tŭg' henh mŭ. Ag jé Topĕ há ki nĕn ũ kar ve sór. Ti há vÿ ěg mÿ nĕn ũ kar nĩm tĩ, ěg fe tÿ mrin ken jé.

¹⁸ Ũn rico ag jé vĕnh jykre kuryj han, ag jé ãjag tũ tÿ vĕnh kãpãm, ag jé ũn jagãgtar ag jagãgtãn to krónh ke tŭg.

¹⁹ Ag tÿ nĕn ũ há kar han kÿ ag tóg kanhkã tá rico nÿtĩnh mŭ, kanhkã tá ag tóg vin han ke mŭ, ãjag tũ ti. Kÿ ag tóg ěg rĩr krÿg ja tũ venh ke mŭ gé. Ā tÿ ěprã ũn rico ag mÿ tónh ken há vĕ.

²⁰ Timóteo', ã tÿ Topĕ vĩ mĕ ja ěn kã jatu tŭg nĩ, ki króm nĩ, to jykrĕn kÿ. Ũ ag tóg fagrĩnh

mỹ vēmén mág han sór tĩ, ón
 kỹ vĩ (ka)mẽ han kỹ. Ón kỹ ag
 tóg: “vẽnh vĩ há vĩ jagnẽ kato
 tẽ tĩ,” he tĩ, kỹ ag tóg Topẽ vĩ tỹ
 jagnẽ kato tẽ ẽn tó sór tĩ. Hã
 ra ag tóg fagrĩnh mỹ vĩ tĩ. Ag
 vĩ mẽ sór tũg nĩ.

²¹ “Ki kanhró ẽg nỹtĩ,” he ag
 tóg tĩ, hã ra ag tóg Topẽ ki rã
 tovãnh huri. Kórég ag nỹtĩ.

Topẽ mỹ sóg to vĩ tĩ, ti tỹ ãjag
 tỹ ã to tar han jé.

Hã vễ.

PAULO TŶ CARTA HAN: TIMÓTEO MŶ CARTA Ū

1 Paulo tŷ rá vĕ. Topĕ ne inh fĕg', isŷ tŷ Jesus Cristo apóstolo jĕ jé. Inh mŷ tóg tó, isŷ vĕnh kar mŷ ěg tŷ Jesus Cristo tugrĭn rĭnrĭr nŷtĭnh ke tag tó jé. Topĕ tŷ ěg mŷ nĕn han sór mŭn hã vĕ.

2 Isŷ inh kósin tŷ Timóteo mŷ rán hã vĕ, isŷ ũ to há tãvĭ nĭ ěn mŷ. ěg jóg tŷ Topĕ mŷ sóg to vĭ tŷ, ti tŷ ă tar han jé, ti tŷ ă jagãgtãn jé, ti tŷ ă krĭ kuprãg jé ke gé. ěg Senhor tŷ Jesus Cristo mŷ sóg tag to vĭ tŷ gé.

Paulo tŷ Topĕ mŷ vĭ há han

3 Topĕ mŷ sóg vĭ há han tĭ. Ti hã mŷ sóg rãnrãj tĭ, inh jóg'jóg ve ag ri kĕn. To kygnĕ sór vãnh inh nĭgtĭ.

Ā tó sóg tĭ, sŷ Topĕ mrĕ vĕmén kŷ. To krónh ke tŷ inh nĭgtĭ, kurã kar ki, kuty ki ke gé.

4 Isĭg kŷ ă tóg fŷ ja nĭ. Hã mĭ sóg ěkrég tĭ, hã kŷ sóg ă ve sór tãvĭ nĭ, inh fe tŷ mrin ke jé.

5 Jesus ki rã há han ă tóg nĭ, ă fe kar tŷ, ă vóvó tŷ Lóide fi ri ke, ă mŷnh tŷ Eunice fi ri ke. Fag ri ke han kŷ ă tóg ti ki rã gé, ki kanhró sóg nĭ.

6 Hã kŷ sóg ă jyvĕn sór mŷ. Topĕ vŷ ă mŷ vĕnh rãnrãj nĭm, isŷ inh nĭgé tŷ ă kri fi ja nĭn kŷ. ěn to tar nĭmnĭ.

7 Topĕ vŷ ěg mŷ ă kuprĭg jĕnĕ, ěg kanĕ jur tŷ nĭ jé, ěg tar

nŷtĭ jé, ěg tŷ jagnĕ to há nŷtĭ jé, ěg tŷ vĕso jykrĕn jé.

8 Hã kŷ ěg Senhor to mŷ'ãg tŷg nĭ. Ti kãmĕn nĭ, kŷ inh kãmĕn nĭ gé, isŷ ti tugnĭn se kŷ jĕ tag ti. Kŷ ă tŷ ti tugrĭn vĕsŷrĕnh ke tag kamĕg tŷg nĭ gé inh mrĕ. Topĕ vĭ to ěg vĕsŷrĕnh tĭ, hã ra Topĕ tóg to ěg tar han tĭ gé.

9 Ti hã ne ěg kren han', ti hã ne ěg kuprĕg', ěg tŷ tŷ ti tŷ nŷtĭ jé. ěg tŷ vĕsóg ki to vãsãn pijé'. Ti hã ne to jykrĕn', kŷ tóg ěg jagãgtãn kŷ ěg kuprĕg, Jesus Cristo tugnĭn. ěg tŷ ti ri ke há nŷtĭ jé tóg ěg kuprĕg. Hã ra tóg nĕn kar han ke to há tag to jykrĕn ja nĭgtĭ.

10 Kŷ tóg ũri hã ěg mŷ tó, ěg kren han tĭ tŷ Jesus Cristo jĕnĕn kã. ěn vŷ ěg ter ke tag tŷ tŷg' hé, kŷ tóg ěg rĭnrĭr han mŷ sir, ěg tŷ ěg rĭr krŷg ja tŷ ve jé sir, ěg tŷ ti vĭ sér kri fi kŷ.

11 Kŷ tóg inh mŷ: “vĕnh kar mŷ inh vĭ tónh tŷg,” he ja nĭ gé, sŷ tŷ ti apóstolo jĕ jé, sŷ ti vĭ tŷ vĕnh kar kanhrãn jé.

12 Hã kŷ sóg se kŷ jĕ ha. Hã ra sóg mŷ'ãg ke tŷ nĭ. Ti ki rã kŷ sóg jĕ ha, ti ki kanhró sóg nĭ, sŷ ũn ki rã ja ěn ti. Nĕn ũ kar to tóg tar nĭ, hã kŷ tóg inh ki rĭr há han ki kanhró nĭ gé, sŷ ti mŷ vĕnh fĕg kŷ, isŷ kurã tŷ ěgno pétĕm há han jé.

13 Isŷ nĕn tŷ ă kanhrãn ja ěn kã jatŷ tŷg nĭ. Vĕnh vĭ há vĕ, sŷ ă mŷ nĕn tó ja ti. Tag ki króm kŷ inh ri kĕn kãmĕn nĭ. Ti ki rã to tar nĭmnĭ, vĕnh kar to há nĭmnĭ gé, Jesus Cristo tŷ nĕn han ja ěn ri ke han nĭ.

14 Ti tỹ ã mỹ vãnh rãnhrãj nĩm ja ěn ki rĩr há han nĩ, ũ tỹ Topẽ vĩ tỹ ũ han tũ nĩ jé. Topẽ kuprĩg vỹ ěg kãki jamã nĩ. Ěn vỹ ã tar han ke mũ, ã tỹ ti vĩ tó há han ke to.

15 Ha vé, ga tỹ Ásia tá ke kar ag vỹ isovãnh kãn, Fígelo ke gé, Hermógenes ke gé. Tag mẽ ã hỹn huri.

16 Topẽ mỹ sóg to vĩ tĩ, ti tỹ Onesíforo mré ke fag jagãgtãn jé, ũn tũg mũ ěn ti. Iso há tãvĩ ti nĩ ja nĩgtĩ. Iso mỹ'ãg tũ ja ti nĩgtĩ, ise kỹ jẽ (hã) ra.

17 Ti tỹ cidade tỹ Roma tag ki jun kỹ tóg inh jãvãnh tãvĩ han ja nĩ, kỹ tóg kejẽn inh ve ja nĩ.

18 Ěg Senhor hỹn ti jagãgtãn ke mũ, ti tỹ kurã tỹ ěgno ki ti kren han jé, kỹ tóg inh mỹ sér tĩnh mũ. Ki kanhró ã tóg nĩ, ti tỹ Ěfeso tá inh ki rĩr há han ja ti. Sỹ ã mỹ Onesíforo jykre tón hã vẽ.

2

Ěg vãsãn ke

1 Inh kósin', Jesus Cristo ne ã tar han ke mũ', kỹ krónh ke tũg nĩ.

2 Inh vĩ mẽ ã, sỹ ũn e ag kanhrãnrãn kỹ. Tag tómnĩ gé, ũ ag mỹ. ũ tỹ krónh ke tũ ag mỹ tómnĩ, ũ tỹ ã kóm ag kanhrãn ke to jykre há nỹtĩ ag mỹ.

3 Ěg tỹ Jesus tigrĩn vėsỹrénh ke to tar nĩmnĩ inh mré, Timóteo'. Jesus Cristo soldado ri ke ěg nỹtĩ.

4 Soldado jykre tag to jykrén nĩ. Ag pi(jé) vyr mỹ jykrén tĩ', soldado ag. Ājag

pã'i vĩ ki hã han ag tóg tĩ, ãjag pã'i tỹ ag to há nĩ jé. Hã kỹ ag tóg vyr mỹ ganho ve sór tũ nĩgtĩ. Soldado ag ri ke han nĩ gé, Timóteo'.

5 Kỹ ũ ag tỹ corrida han mũ ag jykre to jykrén nĩ gé. Ag corrida vỹ to vãnh jykre nĩ. Corrida to vãnh jykre ěn hã han ag tĩ, ag tỹ ganhar ken jé. ũ tỹ corrida han mũ ag ri ke han nĩ, Timóteo'.

6 Kỹ ěpỹ ki rĩr tĩ ag vỹ rãnhrãj mág han tĩ gé, hã kỹ ag tóg krãn kỹ ti kanẽ ko tĩ. Ag ri kén ã tóg venh ke mũ gé, ã tỹ nén ve sór mũ ti, ã rãnhrãj mág kỹ, ha vemnĩ.

7 Tag to jykrén há han nĩ, sỹ ã mỹ tó mũ tag to. Kỹ ěg Senhor vỹ ã tỹ to jykrén há tãvĩ han ke mũ sir.

8 Jesus Cristo mẽ ěkrén nĩ. Ti ter kar kỹ tóg rĩr mãn. Ti jóg'jóg ve vỹ tỹ Davi ja nĩgtĩ. Hã tó sóg tĩ, ti kãmén kỹ.

9 Hã kỹ sóg se kỹ jẽ, ferro tỹ mỹr. "Ti hỹn tỹ ũn jykre pãno nĩ," he ag tóg tĩ iso, hã kỹ ag tóg ferro tỹ isé. Hã ra Topẽ vĩ pi(jé) se kỹ nĩ nĩ'. Tãmĩ tóg tĩ ha.

10 Hã kỹ sóg ise kỹ jẽ (hã) ra ti to tar nĩ, Topẽ tỹ ũn kuprẽg mũ ag jagfy, ag krenkren jé, ag tỹ Jesus Cristo ki ge tigrĩn, ag tỹ ti tugnĩn kankã tá jun-jun jé.

11 Vãnh vĩ há vẽ, tag ti, ha mẽ: ěg tỹ ti tigrĩn kãgter mũ ra ěg tóg ti mré rĩnrĩr mãn ke mũ gé.

12 Ěg tỹ ti tigrĩn nén ũ jagy kar to tar nỹtĩn kỹ ěg tóg ti mré tỹ ũn mág nỹtĩnh ke mũ

gé. Ęg tỹ ti tovãnh kỹ tóg ěg tovãnh ke mũ gé.

¹³ Ęg tỹ ti to krónh ke tĩ ra tóg ěg to krónh kenh ke tũ nĩ jãvo. Ti pi(jé) ón tĩ', hã kỹ tóg ěg to krónh kenh ke tũ nĩ gé, ti tỹ: "krónh ke tũ inh nĩ," hen kỹ.

Ęg tỹ Topẽ rãnrãj han há han ke

¹⁴ Tag tómnĩ, vẽn kar mỹ. Tỹ ag jyvẽn nĩ, kỹ ag jyvẽn tar han nĩ gé. Topẽ vỹ ă vĩ mẽn h mũ. Ag mỹ: "ěg kato tẽ mũ ag vĩ kafãn sór tũg nĩ," hemnĩ. "Jagnẽ vĩ kafãn pi(jé) ěg tar han mũ'. Ũ tỹ tag mẽ kỹ tóg krónh ke sór mũ," hemnĩ ag mỹ.

¹⁵ Vãsãn ra, Topẽ tỹ ă rãnrãj to: "há ti nĩ," he jé, ă tỹ ă rãnrãj to mỹ'ăg tũ nĩ jé. Topẽ vĩ to vãsãn nĩ, ă tỹ ki kanhrãn há han jé, ă tỹ vẽn kar mỹ tó há han jé gé.

¹⁶ Ũ tỹ kanhir kỹ nén ũ kórég tó kỹ jẽmẽ sór tũg nĩ, ũn vĩ (ka)mẽ ěn vĩ ti. Ũ tỹ tag tó mũ ag vỹ Topẽ to kórég tãvĩ nỹtĩ, kỹ ag vỹ vỹ ag kókén ke mũ, kỹ tóg ag jykre pãno pẽ han mũ.

¹⁷ Vẽn vĩ tỹ ge vỹ ěg kar kókén ke mũ, komẽr hã, ti tỹ vẽn kar kri rũm ken kỹ. Vẽn kaga kórég tỹ vẽn kar kri rũm ke ri ke ti nĩ.

Ũ tỹ vẽn vỹ tỹ ge han mũ vỹ tỹ Himeneu nĩ gé, Fileto ke gé.

¹⁸ Tag ag vỹ un'ón tĩ, Topẽ vĩ to. "Rĩr mãn ri ke han ěg huri, ěg tỹ Cristo ki gen kỹ, hã kỹ ěg rĩnrĩr mãn ke tũ nỹtĩ ha, ěg ter kar kỹ, Jesus kãtĩg mãn kỹ," he ag tóg tĩ. Ag tỹ tag tó kỹ ag tóg

ũ ag tỹ Jesus to krónh ke han tĩ, kỹ ag tóg Cristo tovãnh mũ ha ag tũgrĩn.

¹⁹ Ęg tỹ ĩn han kỹ ěg tóg ti tỹ kri jẽ jafã ěn tar han tĩ. Ęn ri ke ti nĩ, Topẽ jykre ti. Jesus Cristo kãme vỹ há nĩ, kỹ tóg tũg' henh ke tũ nĩ, ũ ag tỹ ón kỹ to vĩ mũ (hã) ra. Ęg tỹ ti ki ge kỹ nỹtĩn kỹ tag vỹ ěg to rán kỹ nĩ, ha mẽ: "ěg Senhor vỹ ă tũ ag ki kanhró nĩ," he tóg mũ.

Kar kỹ tag vỹ rán kỹ nĩ gé, ha mẽ: "vẽn jykre pãno tovãnh kãn ra, ăjag tỹ: inh Senhor vỹ tỹ ti nĩ, Jesus ti, he jé," he tóg mũ. Cristo jykre to ken hã vẽ. Ón vãn h ti nỹgtĩ.

²⁰ Ha vé, ĩn mág krẽm kukrũ vỹ e nỹtĩ. Ũ vỹ ouro tỹ há nỹtĩ, ũ vỹ prata tỹ há nỹtĩ. Kỹ ũ vỹ ka tỹ há nỹtĩ gé, ũ vỹ go'or tỹ há nỹtĩ gé. Kukrũ há vỹ tỹ vẽn ěn né nĩ, kỹ ũn kórég vỹ tỹ vãfãr né nĩ gé.

²¹ Kỹ tóg ge nĩ, ũ tỹ kanhir kỹ nén ũ kórég tó (ka)mẽ ěn ag. Kukrũ kórég ri ke ag nỹtĩ. Hã kỹ Topẽ tóg ag mỹ: "inh rãnrãj han ra," henh ke tũ nĩ sir. Ęg tỹ ti kórég tovãnh kãn kỹ ěg tóg kukrũ há ri ke nỹtĩ, kỹ Topẽ tóg ěg mỹ: "inh rãnrãj han nĩ," henh ke mũ gé sir. Ti tũ vỹ tỹ ěg nỹtĩn mũ, kỹ tóg ěg mỹ ă rãnrãj nĩm sór mũ, ěg tỹ han jé. Kỹ ěg tóg vỹsỹmér han sór mũ sir, ti tỹ ěg mỹ tó kỹ, kỹ tóg Topẽ mỹ sér tĩ.

²² Kyrũ ag vỹ nén ũ kar to ěn (ka)mẽ nỹtĩ. Ęn tovãnh kãn. Vẽn jykre há hã mĩ tũg sórmnĩ. Jesus ki rã hã to jykren nĩ, vẽn kar to há

nĩmnĩ, krĩ kuprã nĩmnĩ, ù tỹ ãg Senhor mré ke ag to, ùn jãnhkri ag to, vẽn kar to ke gé.

²³ Û ag tóg ón kỹ: “Topẽ hỹn tag tó sór mũ, ti tỹ ãn tó kỹ,” he sór ti. Topẽ tỹ nén tó vãnh ãn tó sór ag tóg tĩ. Tag tugrĩn jagnẽ to jũ tóg kutẽ tĩ, hã kỹ ag mré to jykrén sór tũg nĩ.

²⁴ Û tỹ Topẽ mỹ rãnhraj tĩ jé vãnh kar to há nĩ. Ti tỹ kãnhmar ag to jũn kỹ tóg tỹ ù nỹ. Ti tỹ komẽr hã vỹ kỹ tóg há tĩ, ag kanhrãn jé, vãnh kar to fe há nĩn kỹ.

²⁵ Û tóg ti vỹ kafãn sór mũ. ãn mỹ tóg vỹ há han ke mũ. Komẽr hã tóg ag mỹ Topẽ vỹ tónh ke mũ, Topẽ tỹ ag jagãgtãn jé, ag tỹ ãjag jykre tovãnh kỹ, vãnh vỹ há hã nón mũ jé.

²⁶ Kỹ ag krĩ há nỹtĩnh mũ. Japo tũ vỹ tỹ ag nỹtĩ ja nĩgtĩ, ti tỹ ag se jan kỹ, ag tỹ ti rãnhraj han jé. Ag tỹ ti tovãnh kỹ Topẽ tóg ag krenkren han ke mũ. Kỹ tóg ag tỹ Japo jykre tag to vãnh nenh to ag tar han ke mũ, ãg ke gé. Kỹ tóg há tĩ.

3

Kurã tỹ ãgno to hã vãnh jykre

¹ Tag to jykrén, ha mẽ. Ga tỹ tũ' henh ke to hã ãg tóg nén ù jagy ve kãn ke mũ. Vãnh kar tỹ vãnh jykre pãno han mũ ve jé ãg tóg ke mũ.

² ãjag jykre hã han sór jé ag tóg ke mũ. Nén ù kar to é n jé ag tóg ke mũ, ag rico nỹtĩ jé. “Tỹ inh ùn mág nĩ, tag han inh tĩ, ag han inh tĩ,” he jé ag tóg

ke mũ. Jagnẽ to vỹ kónãn jé ag tóg ke mũ. ãjag panh vỹ ki hã han ke tũ ag tóg nĩ. “Kórég ti nĩ,” he jé ag tóg ke mũ, ù tỹ ag mỹ nén ù há nĩm mũ ra. Topẽ to ag é henh ke mũ gé.

³ Jagnẽ to jykre kórég ag nỹtĩnh mũ, ãjag krẽ to ke gé. Jagnẽ mỹ vãnh pãte fón ke tũ ag nĩ gé. Jagnẽ to ag un'ón ke mũ. Vẽso jykrén ke tũ ag tóg nĩ. Ag tỹ ù vóg kónãn kỹ tóg ag mỹ sér tĩnh mũ. Vãnh jykre há kato tẽ jé ag tóg ke mũ.

⁴ ãjag régre ag vatánh tá ag tóg ag to vỹ kónãn ke mũ gé. Û tỹ ãjag jykre kórég to ag vóg kónãn ke tag kamẽg vãnh ag nỹtĩ. Vẽso ag tóg: “vãnh kar kãfór vỹ tỹ inh nĩ,” henh ke mũ gé. Ag tỹ Topẽ to há nỹtĩnh ke vẽ vẽ, hã ra ag tóg ãjag tỹ nén to é n mũ ãn hã han sór ke mũ.

⁵ Ón kỹ ag tóg Topẽ to há nĩ ve nỹtĩnh mũ, hã ra ag tóg ti jykre han sór ke tũ nĩ, ti tỹ ãg tar han tĩ tag vỹ ag mỹ há tũ nĩnh mũ. Û tỹ ge ag tovãnh nĩ, vỹ.

⁶ Ag kãmĩ ù ag vỹ ĩn kar mĩ mũnh mũ, kỹ ag tóg ùn tỹtã jykre tũ fag mré vẽnén sór ke mũ, ù tỹ Topẽ vỹ mranh tĩ fag, ùn é n sór (ka)mẽ fag. ãn fag mỹ ag tóg vĩnh mũ, fag tỹ ag vỹ ki han jé.

⁷ Ón kỹ fag tóg vãnh kanhrãn to tar nỹtĩnh mũ, hã ra fag tóg vãnh vỹ há ki kagtĩg nỹtĩ, hã kỹ fag tóg ag vỹ ki han mũ, ù tỹ fag mỹ ón mũ ag vĩn ki.

⁸ Û tỹ fag mré vẽnén mũ ãn ag vỹ Topẽ vỹ kato tẽ nỹtĩ,

věnh vī há ěn kato. Vāsý Janes vỹ Moisés vī kato tē ja nīgtī, Jambres ti ke gé. Ag ri ke ag nýtī, Topē vī kato tē ag tóg tí, ũ tỹ fag nón mū ěn ag. Věnh jykre pāno han (ka)mē ag tóg nýtī, krī tũ ag nýtī. Ón ký ag tóg Jesus ki ge nýtī ve nī, ag tỹ ón ký ti vī tón ký.

⁹ Hã ra ũn e vỹ ag vī kri finh ke tũ nī, ha vemnī. Věnh kar vỹ ag krī tũ tag venh ke mū, ha vemnī. Janes mré Jambres ri ke han jé ag tóg ke mū. Věnh kar vỹ ag krī tũ ki kanhró ja nýtīgtī gé, Janes mré Jambres ti.

Ěg tỹ Topē to tar nýtīn ký ěg nén jagy věnh ke mū

¹⁰ Ag jāvo ā tóg inh vī kri fi há han tí, Timóteo'. Isỹ nén han mū ěn ri ke han ā tóg tí gé. Isỹ nén ve sór mū ěn ve sór ā tóg tí gé. Isỹ Jesus ki rã ri ke han ā tóg tí gé. Isỹ koměr hã vī ri ke han ā tóg tí gé. Isỹ věnh kar to há nī ri ke han ā tóg tí gé.

¹¹ Ag tỹ inh vóg kónãn ve ja ā nī gé, isỹ nén ũ jagy végt tī ěn ti. Inh vóg kónãn tỹ hěn ri ke han ja ag tóg, Antioquia tá, Icônia tá, Listra tá ke gé. Ter kren pē han inh, tá. Hã ra ěg Senhor tóg inh jy nīgãn.

¹² Ha vé, ěg tỹ Jesus Cristo jykre mī mūn ký ěg kar tóg ag tỹ ěg vóg kónãn venh mū.

¹³ Ěg jāvo ũn jykre pāno ag vỹ koměr hã věnh jykre pāno han kãn ký nýtī, ũn un'ón mū ag ke gé. Ũ ag lograr ke ag tóg tí, hã ra ag tóg ag lograr ke tí gé, věnh kato.

¹⁴ Ag jāvo isỹ ā mỹ nén tó ja ěn mī tīg nī, ā tỹ nén mē ja kar ěn mī, ā tỹ ki rã ký jē ěn mī. Isỹ ā kanhrãn ja ěn to tar nīmnī. Inh jykre ki kanhró ā tóg nī.

¹⁵ Ā sī kã ā tóg Topē vī mē, ā kóněg kã. Ěn kã ā tóg Topē vī tỹ rán ký nī ěn mē. Topē vī tỹ rán ký nī ěn to jãn ký ā tóg ki kanhrãn mū, ěg tỹ Jesus Cristo ki rã tugnīn krenkren ke mū ti.

¹⁶ Ũ tỹ hěn ri ke ag vỹ Topē vī ránrãn ja nīgtī. Hã ra Topē kuprīg tóg ag mỹ tó ja nīgtī, ag tỹ nén rán ke ti, hã ký ag tóg ránrãn. Ti vī rán ký nī to ken ký ěg tóg věnh vī há ki kanhrãn mū, ký ěg tóg kãmén há han ke mū gé. Ěg mỹ tóg ěg tỹ kygně ja ěn ven tí, ký ěg tóg jagně mỹ ven tí gé. Tỹ Topē tóg ěg jyvěn mū gé, ti vī rán ký nī ki, ký ěg tóg jagně jyvěn ke mū gé. Ký ěg tóg věnh jykre kuryj ki kanhrãn tí gé, ti vī rán ký nī ki, ěg tỹ jagně mỹ tó jé.

¹⁷ Topē tũ vỹ tỹ ěg nýtī. Ti pi(jé) ěg tỹ věnh kygně ve sór mū'. Ěg tỹ kygněg tũ nýtīn ký ěg tóg nén ũ kar há han to tar nýtī. Ti tỹ tag ve sór vē, hã jé tóg ěg mỹ ā vī jěně ja nīgtī.

4

¹ Inh kósin', sỹ ā jyvěn ke vē, ha mē, ký Topē vỹ mēnh mū, Jesus Cristo ti ke gé, ũ tỹ věnh kar jykre tugnỹm ke mū ěn ti, ũn rīnrīr nýtī ag jykre, ũn kãgter nýtī ag jykre ke gé. Vỹn ke mãn jé tóg ke mū, ha vemnī, ký tóg tỹ pã'i mág jěnh mū, ha vemnī. Ěg Senhor rīnve sóg ā mỹ:

² “Topē vī kāmén ra,” henh mū. Kejēn ag tóg mē sór tī, kejēn ag tóg mē sór tū nīgtī. Ge ra ag mý kāmén nī. Ag jyvēn nī, ag mý ag tỹ vēnh kygnē ja ēn tómnī, ag jyvēn tar han nī, ag tỹ mē jāvānh ký. Ag jyvēn to krónh ke tūg nī, ag tỹ kejēn Jesus ki rā sór jé. Topē vī tó há han nī.

³ Kurā tỹ ěgno to hā ag tóg jēmē sór ke tū pē nīnh mū, vēnh vī há ti, ha vemnī. Ký ag tóg vēnh vī kórég nón mū sór mū, ag tỹ nén to én mū ěn ti. Ũ tỹ ón ký ag mý tónh ke mū ěn vỹ vēme sér tónh ke mū, ký tóg ag mý sér tīnh mū.

⁴ Vēnh vī há jēmēnh ke tū ag nī, hā ký ag tóg vēnh ó jēmēnh ke mū sir.

⁵ Ag jāvo nén ũ kar to jykrén há han nī. Ā tỹ nén ũ jagy ve ký kato tar nīmnī. Cristo to vēme sér ěn kāmén nī, vēnh kar mý. Ā rānhraj ki rīr há han nī gé.

⁶ Ag hýn kānhmar isén ke mū, Jesus Cristo tugrīn. Hā ra tóg inh mý tỹ nén ũ tū nī. Jesus tugnīn ke vē, iser ke ti, hā ký tóg inh mý tỹ nén ũ tū nī.

⁷ Kejēn ěg tóg rará tī, ký ěg tóg vāsān tī. ěg tỹ rará to vāsān ri ke han inh, Topē rānhraj han ký. ěg tỹ carreira han ký ěg tóg vāsān tāvī han tī gé, ěg tỹ ganhar he jé. Vēnhvó tāvī han ěg tóg tīgtī. Tag ri ke han inh, isý Topē rānhraj han ký. Ti rānhraj han kān inh huri. Ti ki rā tovānh ja tū inh nīgtī.

⁸ Ũ tỹ carreira ki ganhar

he mū ěn vỹ ka féj tỹ coroa ganhar he tī. ěn ri ke nīm jé tóg ke mū inh mý, Topē ti, inh jykre kuryj to. Nīm han ký tóg nī nī, Topē tỹ inh mý nén nīm ke mū tī, ag tỹ coroa vég mū ěn ri ke ti. Kurā ěn kā tóg inh mý nīm ke mū, ěg Senhor ti. Vēnh kar mý ti nīm ke mū gé, ũ tỹ ti kātīg jāvānh ký nýtī ag kar mý.

Paulo tỹ nén ve ja

⁹ Kuri inh venh kātīg.

¹⁰ Demas vỹ isovānh ký vyr. ěprā vēnh jykre han sór ti nī, hā ký tóg isovānh ký Tesalônica ra vyr. Crescente vỹ Galácia ra vyr, ký Tito vỹ Dalmácia ra vyr.

¹¹ Lucas vỹ inhhā inh mré nī nī. Marcos pére kātīg, ti tỹ inh rānhraj han jé. Tag to tóg tar nī.

¹² Tíquico jēnē inh, ti tỹ ěfeso ra tīg jé.

¹³ Ký, ā kātīg ký inh mý inh capa ma kātīg. Trôade tá ti nī, Carpo ĩn krēm. Ký inh mý inh livro gé kātīg gé, livro grīngrīn ký nýtī ěn mré hā, nén ũ fār ki rán ký nýtī ěn mré. Isý livro ěn venh há pē tóg tī.

¹⁴ Alexandre, ũ tỹ ferro tỹ nén ũ kar han tī ěn vỹ iso kórég tāvī nī. ěg Senhor vỹ ti jykre kórég to ti vóg kónān ke mū.

¹⁵ Ti kamēg ra. Inh vī kato tē mág han tóg.

¹⁶ Fóg tỹ pā'i vỹ inh ki inh jykre jēmē pin huri. ěn kā ũ tóg inh mré ve ja tū nī. Isovānh kān ag tóg. Topē mý

sóg to vĩ tĩ, ti tỹ ag mỹ vẽn
pãte fón jé.

¹⁷ Ag jãvo ẽg Senhor vỹ isar
han, ti tỹ inh mré tag kã jẽ nĩn
kỹ. Hã kỹ vẽn kar vỹ ti vĩ
mẽ huri, isỹ ag mỹ kãmén kỹ.
Povo kar ag vỹ hur mẽ kãn.
Kỹ ẽg Senhor tóg inh jy nĩgãn,
ag tỹ mĩg mỹ inh fón tũ nĩ jé.

¹⁸ Inh jy nĩgãn mãn jé tóg ke
mũ gé, Nén-Kóreg tỹ isỹ hẽ ri
ke tũ nĩ jé. Inh ki tóg rĩr há
han ke mũ, sỹ kanhkã ra tĩg
há han jé, ti nĩgja ra. Ti hã mỹ
ẽg vĩ há han ke mũ'. Kỹ tóg
tũg' henh ke tũ nĩ, ẽg tỹ ti mỹ
vĩ há han ke ti. Amém.

¹⁹ Priscila fi mré fi mén
tỹ Áquila mĩ sóg ẽkrég tĩ,
Onesíforo mré ke fag mĩ ke
gé.

²⁰ Erasto vỹ Corinto tá nĩ
nĩ. Jãvo Trófimo tóg Mileto tá
kaga nỹ ja nĩ, isỹ tá kãtĩ mũn
kã.

²¹ Kur kãtĩg mẽ han, prỹg tỹ
kusa tá krỹg tũ ki. Êubulo vỹ ã
mĩ ẽkrég tĩ, Prudente ti ke gé,
Lino ti ke gé, Cláudia fi ke gé,
ẽg régre kar ag mré hã. Ẽn ag
vỹ ã mỹ abraços jẽnẽg tĩ.

²² Ẽg Senhor mỹ sóg to vĩ tĩ,
ti tỹ ã tar han jé, ti tỹ ãjag kar
tar han jé gé.

Hã vẽ.

PAULO TỸ CARTA HAN: TITO MỸ CARTA

1 Paulo tỹ rá vễ. Sỹ Tito mỹ rán hã vễ. Topẽ mỹ sóg rãnhrãj tĩgtĩ, kỹ Jesus Cristo vỹ inh fẽg, sỹ tỹ ti apóstolo jẽ jé. Topẽ tóg êprã ke ù ag kuprẽg, ag tỹ ti ki ge jé. Kỹ tóg inh mỹ: “ha isỹ ùn kuprẽg ja ag mỹ tónh tĩg,” he ja nĩ. “Ag mỹ inh vĩ ti kãmén nĩ, sỹ ki hã tó mũ ên ti, ag tỹ ã vĩ jẽmẽ kỹ inh ki ge há han jé,” he ja tóg nĩ.

2 Topẽ vỹ êg mỹ: “rĩr krỹg ja tũ ve jé ãjag tóg ke mũ,” he ja nĩ. Hã ve sór êg tóg mũ. Topẽ tỹ nén tón hã vễ, vãsỹ, hã ra tóg ón tũ nĩgtĩ.

3 Vãhã tóg êg mỹ ã vĩ tag jẽnẽ ja nĩ, ti tỹ êg mỹ jẽnẽnh ke kurã ki. Jesus tỹ tóg êg mỹ jẽnẽ ja nĩ. Hã to Topẽ tóg inh mỹ: “ha vẽnũ kar mỹ tónh tĩg,” he ja nĩ, êg kren han tĩ ên ti.

4 Hã kỹ sóg ã mỹ tó mũ, Tito'. Inh kósín pẽ vĩ tỹ ã nĩ, ã tỹ inh mré Jesus ki rã kỹ jẽn kỹ. Êg jóg tỹ Topẽ mỹ sóg to vĩ tĩ, ti tỹ ã tar han jé, ã krĩ kuprã nĩ jé ke gé. Êg kren han tĩ tỹ Jesus Cristo mỹ sóg tag to vĩ tĩ gé.

Tito tỹ Creta ki ke ag ki rĩr

5 ã mỹ sóg: “ha ver goj vãso tỹ Creta tá jẽ,” he ja nĩgtĩ, ã tỹ tá isỹ nén han kãn ja tũ ên han kãn jé. Hã kỹ sóg ã mỹ: “cidade kar ki igreja to pã'i vin,” he ja nĩ. ã tỹ ù kuprẽg

kỹ, ti tỹ tỹ pã'i jẽ jé, kỹ tag to jykrén nĩ, ha mẽ.

6 ùn kãmé kórég tũ jãvãnh jé ã tóg ke mũ, ùn prũ pir han kỹ nĩ ti. Ti krẽ tỹ Jesus ki rã kỹ tóg há tĩnh mũ, ag tỹ nén ù vẽnũmỹ han tũ nĩn kỹ, ãjag panh vĩ jẽmẽn kỹ.

7 Ha vé, ù tỹ tỹ igreja to pã'i jẽ sór kỹ tóg tỹ ùn jykre há jẽnũ mũ, ù tỹ Topẽ tũ ki rĩr há han mũnh ke mũ ti. Ti tỹ ã mré ke ag to: “ag kãfór vĩ tỹ inh nĩ,” henh ke tũ vễ. ùn fe tỹ gỹm ke (ka)mẽ vĩ há tũ nĩ, ù tỹ vinho kron (ka)mẽ ti, ùn jũ (ka)mẽ ti. Kỹ tóg ã tỹ rico kenh ke hã to én ke tũ nĩ gé.

8 Ti tỹ ù tỹ kuvar há tá kãmũ ag mỹ: “inh mré jẽ,” hen kỹ tóg há tĩ, ti tỹ vẽnũ jykre há to há nĩn kỹ, ti tỹ vẽso jykrén kỹ, vẽnũ jykre kuryj han kỹ, Topẽ vĩ hã ki króm kỹ, ti tỹ vẽnũ kanhrãn kỹ tĩg kỹ.

9 Topẽ vĩ mẽ ja tóg nĩ. Kỹ ti tỹ tag kã jatũ tũ nĩn kỹ tóg há tĩ gé. Kỹ tóg ù tỹ ã vĩ mẽg mũ ag kanhrãn há han ke mũ gé, ag jyvẽn há han jé tóg ke mũ gé. ù tỹ ti vĩ kafãn mũ mỹ tóg tó há han ke mũ gé, ti tỹ kã jatũ tũ nĩn kỹ.

10 Ha vé, ù tỹ hẽn ri ke ag tóg mẽ jãvãnh nỹtĩ. Véké ag tóg ón kỹ vẽnén tĩ. Ag tỹ ù lograr he sór vễ. Judeu ag vĩ tag to tar nỹtĩ, ha mẽ.

11 Êg tỹ ag vĩ tỹ tũg' henh ke vễ. Ha vé, ù fag ne ag vĩ kri fi sór mũ', kỹ fag tóg Topẽ vĩ tovãnh sór mũ, fag mén mré hã, fag krẽ mré hã. Un'ón ag tóg tĩ, ù tỹ fag kanhrãn sór mũ ag. Hã ra ag tóg hã to nén ù ve

sór mũ, jänkamy ti, ag tỹ rico nỹtĩ jé.

¹² Ag kãmĩ ù vỹ ki hã tó ja nĩ, ag jyvẽn tĩ ù, ti tỹ ag kato tẽ kỹ tag tón kỹ, ha mẽ: “Creta tá ke ag vỹ tỹ ùn ón mé nỹtĩ,” he ja tóg nĩgtĩ. “Mĩg jũ ri ke ag nỹtĩ. Rãnrãj vãnh ag nỹtĩ, hã ra ag tóg jẽn mág tãvĩ han sór tĩ,” he ja tóg nĩgtĩ.

¹³ Hã ra tóg ge nĩ. Hã kỹ ag jyvẽn tar han nĩ, ag tỹ Topẽ ki rã to tar nỹtĩ jé.

¹⁴ Ag mỹ: “Judeu ag tỹ vẽn ó tó mũ jẽmẽ sór tũg nĩ,” hemnĩ. Kỹ ag tóg ag mỹ ẽprã ke jykre tó sór mũ gé, ù tỹ Topẽ vĩ há mẽ vãnh ag. Ẽgmré ke ag mỹ ké, ag tỹ ù tỹ ge vỹ jẽmẽ tũg jé.

¹⁵ Ha vé, ù tỹ vẽn jykre kuryj han mũ mỹ tóg kuryj kar tĩ, jãvo ù tỹ vẽn jykre pãno han mũ mỹ tóg pãno kar tĩ gé, ù tỹ ti ki ge tũ ag mỹ. Ag krĩ vỹ kórég nĩ, kỹ ag tóg ãjag jykre pãno to: “há ti nỹ,” he tĩ, jãvo ag tóg vẽn jykre há to: “kórég ti nỹ,” he tĩ gé.

¹⁶ “Topẽ ki kanhró ẽg tóg nĩ,” he ag tóg tĩ, ón kỹ. Hã ra ag tóg ti jykre han vãnh nỹtĩ. Ag tỹ ti jykre han vãnh ki ẽg tóg vég tĩ, ag ón mũ ti. Û tỹ ge to ti kórég nĩ, Topẽ ti, ag tỹ ti vỹ ki króm sór tũ pẽ nỹtĩn kỹ. Nén ù há han ki kagtĩg ag nỹtĩ.

2

Vẽn kar jyvẽn há han nĩ

¹ Ag jãvo Topẽ vỹ kãmén há han nĩ, ã tỹ ag jyvẽn kỹ, Tito'.

² Kófa ag mỹ: “nén ù há hã to jykren nĩ,” hemnĩ. “Goj fa kron sór tũg nĩ. Nén há kar hã

han sórmnĩ. Vẽso jykren nĩ. Ti ki rã há han kỹ nỹtĩmnĩ. Jagnẽ to há nỹtĩmnĩ. Ti tovãnh sór tũg nĩ,” hemnĩ, kófa ag mỹ.

³ Kỹ kófa fag jyvẽn nĩ gé. “Vẽso jykren nĩ,” hemnĩ fag mỹ. “Û to vỹ kónãn tũg nĩ. Vinho to ẽn sór tũg nĩ. Vẽn jykre há hã han nĩ, vẽn kar tỹ ve jé.

⁴ Kỹ ãjag tóg tátãg fag kanhrãn há han ke mũ,” hemnĩ fag mỹ. “Fag kanhrãn nĩ, fag tỹ ãjag mén to há nỹtĩ jé, fag krẽ to,

⁵ fag tỹ vẽso jykren jé, nén ù vẽnhmỹ han sór tũg jé, fag tỹ ãjag ãn ki rĩr há han jé, vẽn kar mỹ vỹ há han jé, fag tỹ ãjag mén vỹ mranh sór tũg jé, hemnĩ, tátãg fag mỹ,” hemnĩ, kófa fag mỹ. Fag tỹ tag han kỹ ù tóg Topẽ vỹ to é henh ke tũ nĩ, fag tũgrĩn.

⁶ Kyrũ ag jyvẽn nĩ gé. Ag mỹ: “nén ù kar to jykren há han nĩ, ãjag tỹ ẽg tỹ nén to ẽn tĩ ẽn han tũ nĩ je,” hemnĩ.

⁷ Tag han nĩ gé, Tito', vẽn kar tỹ ã jykre há tag ve kỹ ã kóm vẽn jykre há han sór jé gé. ã tỹ ag kanhrãn kỹ ki hã tómnĩ. Kanhir kỹ vỹ tũg nĩ.

⁸ Topẽ vỹ tó há han nĩ, ù tỹ ã to: “kygnẽ ti huri,” he tũ nĩ jé. Kỹ ù tỹ ẽg kato tẽ mũ ag vỹ nén ù tónh ke tũ nĩ. Kỹ tóg ag mỹ' a tĩnh mũ, ag tỹ ón kỹ ẽg kato vỹ ja nĩn kỹ.

⁹ Û mỹ rãnrãj tĩ ag jyvẽn nĩ gé. Ag mỹ: “ãjag patrão vỹ han nĩ,” hemnĩ. “Tĩ mỹ há ẽn han nĩ, ti tỹ ãjag mỹ vỹ há han jé. Ti vỹ kafãn tũg nĩ.

10 Ti tũ péju(g) tũg nĩ. Ti tũ ki rĩr há han nĩ, ti tỹ ã to vĩ kónãn tũ nĩ jé. Ā tỹ ti tũ ki rĩr há han kỹ tóg Topě vĩ to vĩ há han ke mũ, ěg kren han tĩ ěn vĩ to, ā patrão ti, ti tỹ Topě vĩ mẽ kỹ,” hemnĩ, ũ mỹ rãnrãj tĩ ag mỹ.

11 Topě tóg ěg jagãgtãn sór mũ, ěprã ke kar ag, kỹ tóg ěg kren han sór mũ. Hã jé Jesus tóg kãtĩg ja nĩ.

12 Kỹ tóg ěg kanhrãn sór mũ gé, ěg tỹ ti kato tẽ tũ nĩ jé, ěg tỹ nén ũ to én sór tĩ ěn han tũ nĩ jé gé, ěg tỹ ga kri mũn kỹ. ěg kanhrãn sór tóg mũ, ěg tỹ veso jykren jé, vẽnh jykre kuryj han jé, Topě jykre ti.

13 Ti kãtĩg ve sór ěg nỹtĩ, hã kỹ tóg ěg mỹ sér tĩ. Tỹ ti pã'i mág tãvĩ nĩ, Topě ti. Tar tãvĩ ti nĩ, ěg kren han tĩ tỹ Jesus Cristo ti ke gé. Ti ve jé ěg tóg ke mũ, kỹ tóg sĩnvĩ tĩnh mũ, sér pẽ. Hã kỹ tóg há tĩ, ěg tỹ tag ki mũ há han kỹ.

14 ěg jagfỹ tóg ter ja nĩ, ti tỹ ěg jykre kórég ěn kókén jé. Kỹ tóg ěg kykũg mũ, ěg jãnhkri nỹtĩ jé. Kỹ ěg tóg tỹ ti tũ nỹtĩnh mũ sir, vyr mỹ. ěg pi(jé) tỹ ũ tũ nỹtĩ ha'. Ti tũ vỹ tỹ ěg nỹtĩ, ěg tỹ vẽnh jykre há to tar nỹtĩ jé.

15 Tag kar tómnĩ, Tito'. Tỹ ag jyvẽn tar han nĩ gé kejẽn. Ā tũ vẽ mỹr, ā tỹ ag jyvẽn ke ti, kỹ ũ jé ã to é he tũg.

3

Topě jykre

1 Ag mỹ: “governo vĩ jẽmẽmnĩ, ěg pã'i vĩ ti,” hemnĩ. “Ag vĩ ki króm nĩ. Ag tỹ nén

ũ há to: han nĩ, hen kỹ han sórmnĩ, vẽsỹmér,” hemnĩ.

2 “Ū to vĩ kónãn tũg nĩ,” hemnĩ ag mỹ. “Ū vĩ kafãn tũg nĩ. Vẽnh kar mỹ vĩ há han nĩ. Vẽnh kar mỹ koměr hã vĩmnĩ,” hemnĩ ag mỹ.

3 Ha vẽ, vãsỹ ěg tóg kórég nỹtĩ ja nĩgtĩ gé. Ki kagtũg nỹtĩ ja ěg nĩgtĩ. Ti vĩ mranh ja ěg tóg nĩgtĩ gé. Vãgfor mũ ja ěg tóg nĩgtĩ, kỹ ěg tóg ũ tỹ ón kỹ ěg mỹ vẽnh jykre tó mũ ěn vĩ han ja nĩgtĩ gé. ěg tỹ nén to én mũ ěn han kãn ja ěg tóg nĩgtĩ, nén ũ vẽnhmỹ kar ěn ti. Vẽnh jykre pãno han ja ěg tóg nĩgtĩ. Jagně tũ to én ja ěg tóg nĩgtĩ. ěg jykre kórég tag vỹ vẽnh kar mỹ kórég nĩ ja nĩgtĩ. Jagně to jũgũ (ka)mě (pẽ) ja ěg tóg nỹtĩgtĩ.

4 Vãhã ěg tóg ki kanhró nỹtĩ, Topě tỹ ěg jagãgtãn kỹ, ěg kren han tĩ ti. Ti tỹ ěg to há nĩ mẽ ěg tóg vãhã.

5 ěg pi(jé) vẽnh jykre kuryj han ja nĩgtĩ'. Hã ra tóg ge ra ěg jagãgtãn ja nĩgtĩ, hã kỹ tóg ěg kren han mũ sir. ěg han mãn ja tóg nĩ, ěg kygpe kỹ nỹtĩnh kỹ. Ā kuprĩg tỹ tóg ěg han mãn, kỹ ěg tag nỹtĩ ha.

6 ěg mỹ tóg ã kuprĩg jẽně, ti tỹ tỹ ěg jagrě nĩ jé. Jesus Cristo hã tugrĩn tóg ti jẽně, ěg kren han tĩ ěn hã tugrĩn.

7 Hã kỹ tóg ěg mỹ vẽnh pãte fón mũ sir. Ti tỹ ěg jagãgtãn hã vẽ. Kỹ tóg ěg mỹ ã tũ tovãnh sór mũ. Hã tó ja ti nĩ. Rĩr krỹg ja tũ ve jé ěg tóg ke mũ. ěg tỹ tag ve jé tóg ěg mỹ ã kuprĩg jẽně.

⁸ Tag vỹ ki hã ke nĩ. Hã kỹ vãnh kar mỹ tómnĩ, ag jyvẽn to krónh ke tũg nĩ. Ủ tỹ Topẽ ki ge mũ ag jyvẽn há han nĩ, ag tỹ vãnh jykre há hã han sór jé. Kỹ ag tóg tag hã to vãsãn ke mũ. Tag vỹ há nĩ. Kỹ tóg ẽg mỹ nén ù há han ke mũ gé, vãnh jykre há ti.

⁹ Judeu ù ag tóg véké ón kỹ vēmén sór tĩ. Tag jēmẽ sór tũg nĩ. Ājag gufã ag jiji tó sór ag tóg tĩ. Jagnẽ vĩ kafãn ag tóg tĩ. Kỹ ag tóg Topẽ tỹ vãsỹ ẽg jyvẽn tĩ ẽn to jagnẽ vĩ kafãn mũ gé. Tag kar vỹ ẽg mỹ nén ù há han ke tũ nĩ. Nén ù tũ vễ, tag ti, hã kỹ jēmẽ sór tũg nĩ.

¹⁰ Ủ tỹ vurmỹ vãnh jykre han sór kỹ ti mỹ: “ke tũg ra,” hemnĩ. “Ke tũg ra,” he régre han nĩ, ti tỹ kãnhmar ã vỹ jēmẽg tũ nĩn kỹ. Tag pãte ti tovãnh nĩ, ti tỹ mẽ jãvãnh nĩn kỹ.

¹¹ Ti jykre vỹ pãno tãvĩ nĩ. Topẽ vỹ mranh ti tĩ. Topẽ vỹ ù tỹ ge to: “kórég ti nĩ,” he tĩ.

Tito tỹ ne han ke ti

¹² Kejẽn sóg ã mỹ Ártemas jēmẽ sór mũ, ke tũ nĩ kỹ Tíquico ti. Ti tỹ ã tá jun kỹ, vėsýmér inh kukãm kãtĩg, cidade tỹ Nicópolis ra. Tá sóg kusa fĩn rãm ke mũ.

¹³ Zenas ki rĩr há han nĩ gé, lei to estudo han tĩ ẽn ti, kar kỹ Apolo ti ke gé. Kỹ, ag tỹ mũ mãn ken kỹ ag mỹ vin nĩ, jãnkamy tỹ ag mỹ tũg ke mũ ẽn ti.

¹⁴ Kỹ, ẽg mré ke kar ag jyvẽn há han nĩ, ag tỹ vãnh rãnhraj há to tar nỹtĩ jé. Kỹ ag tóg ùn jagtar ag mỹ vin ke mũ gé,

ãjag tỹ nén ù vãnh kãpãm kỹ. Tag ne há nỹnh mũ'. Ẽg tỹ Topẽ jykre han to ken hã vễ, kỹ tóg ẽg tỹ Topẽ mỹ nén ù kanẽ han ri ke nĩ sir.

¹⁵ Inh mré nỹtĩ kar ag vỹ ã mĩ ẽkrég tĩ. Kỹ ẽg mré Jesus ki ge mũ kar ag mỹ: “ãjag mĩ ti ẽkrég tĩ, Paulo ti,” hemnĩ, ẽg to há nỹtĩ kar ag mỹ.

Topẽ mỹ sóg to vỹ tĩ, ti tỹ ãjag kar tar han jé.

Hã vễ.

PAULO TỠ CARTA HAN: FILEMOM MỠ CARTA

¹ Paulo tỡ rá vễ, inh, isỡ se kỡ jẻ ra rá vễ. Kỡ ẻg rẻgre tỡ Timóteo vỡ inh mrẻ rỏn mỗ gẻ. Isỡ Filemom mỡ rỏn hỏ vễ. ỏ to hỏ tỏvỡ sỏg nỡ, Filemom'. Inh mrẻ ỏ tỏg Cristo rỏnhrỏj han tỡ gẻ.

² Kỡ sỏg ẻg rẻgre tỡ ỏfia fi mỡ rỏn mỗ gẻ, Arquipo mỡ ke gẻ, inh mrẻ Cristo rỏnhrỏj to vỏsỏn tỡ tag ti, kar kỡ sỏg ử tỡ Filemom ỡn krẻm vẻnh mỏn tỡ ag mỡ rỏn mỗ gẻ, ử tỡ Topẻ vỡ mẻ jẻ vẻnh mỏn tỡ ag mỡ.

³ ẻg jỏg tỡ Topẻ mỡ sỏg to vỡ tỡ, ti tỡ ỏjag tar han jẻ, ti tỡ ỏjag krỡ kuprỏg jẻ, ẻg Senhor tỡ Jesus Cristo panh ẻn ti.

Filemom jykre

⁴ Isỡ Topẻ mrẻ vẻmẻn kỡ sỏg ỏ mỡ ẻkrẻg tỡ, Filemom', kỡ sỏg ỏ to Topẻ mỡ vỡ hỏ han tỡ.

⁵ ẻg Senhor tỡ Jesus ki rỏ hỏ han kỡ ỏ tỏg nẻji nỡ, hỏ kỡ ỏ tỏg nẻji Jesus ki ge kỡ nỡtỡ ag to hỏ tỏvỡ nỡ gẻ. Tag mẻ inh.

⁶ Hỏ kỡ sỏg Topẻ mỡ to vỡ tỡ, ti tỡ ỏ krỡn hỏ han jẻ, ỏ tỡ ti jykre hỏ mỡ tỡg ki kanhrỏ hỏ nỡ jẻ, ỏ tỡ ẻg mrẻ Cristo ki rỏ kỡ jẻn kỡ. Kỡ tỏg ỏ krỡ tỡ hỏ' hẻnh ke mỗ, ỏ tỡ komẻr hỏ ti vỡ ki krỏm ki kanhrỏn kỏn jẻ. ẻg tỡ Cristo ki ge kỡ nỡtỡn kỡ ẻg tỏg vẻnh jykre sẻr to tar nỡtỡ.

⁷ Jỏvy', inh fe tỡ mrin ke ja ỏ nỡ, inh fe tỡ hỏ' he ja ỏ nỡ, ỏ tỡ iso hỏ tỏvỡ nỡn kỡ. Kỡ Topẻ ki

ge kỡ nỡtỡ kar ag vỡ ỏ jykre ki kanhrỏ kar nỡtỡ. Kỡ ag fe tỏg mrin ke mỗ gẻ.

Paulo tỡ Onẻsimo jagfy vỡ

⁸ Kỡ sỏg ỏ mỡ: “tag han jẻ ỏ tỏg ke mỗ,” hẻnh ke mỗ vẻ,

⁹ hỏ ra sỏg ỏ mỡ vỡ tar han sỏr tỡ nỡ. Komẻr hỏ sỏg ỏ mỡ to vỡ sỏr mỗ, ỏ tỡ iso hỏ nỡ tugrỡn tag han jẻ, sỡ ỏ mỡ nẻn to vỡ sỏr mỗ tag ti. Ha vẻ, kỏfa inh nỡ ha, inh, hỏ vỡ: Paulo, he mỗ. Jesus Cristo tugnỡn sỏg se kỡ jẻ ha.

¹⁰ ỏ mỡ sỏg inh kỏsin tỡ Onẻsimo jagfy vỡ sỏr mỗ. Inh kỏsin ri ke ti nỡ ha, ti tỡ isugrỡn Cristo ki rỏ kỡ, isỡ tag kỏ se kỡ jẻ hỏ ra.

¹¹ Vỏsỡ tỏg ỏ tỡ ki rỡr tỡ vẻ, hỏ ra tỏg ỏ mỡ nẻn ử hỏ han ja tỡ nỡgtỡ. ửri tỏg hỏ nỡ ha, kỡ tỏg ỏ tỡ ki rỡr hỏ han ke mỗ ha, ti tỡ inh ki rỡr hỏ han mỗ tag ri ke.

¹² Sỡ ỏ mỡ ti jẻnẻnh ke vẻ. Inh fe vỡ tỡ ti nỡ.

¹³ Hỏ kỡ sỏg ti jẻnẻ sỏr ja tỡ nỡ vẻ, ti tỡ ỏ jẻgia ki inh ki rỡr jẻ, isỡ Jesus kỏme sẻr tugrỡn se kỡ jẻn ki.

¹⁴ Hỏ ra sỏg ỏ mỡ ti jẻnẻnh ke mỗ, isỡ ỏ mỡ: “mỡ hỏ, ti tỡ inh ki rỡr mỗ tag ti?” he ja tỡ nỡn kỡ. Isỡ ti tỡg kamẻg mỗ ra tỏg ỏ tỡ inh ki rỡr mỗ ri ke nỡ vẻ, hỏ ra ỏ tỏg ki kagtỡg nỡ vẻ, ỏ tỡ inh mỡ nẻn ử hỏ han mỗ tag ti. Hỏ kỡ sỏg ỏ mỡ ti jẻnẻnh ke mỗ, ỏ tỡ ỏ tỡ nẻn han sỏr mỗ ẻn han jẻ, vẻnh jykre hỏ ẻn ti.

¹⁵ ỏ camarada ja vẻ, Onẻsimo ti, hỏ ra tỏg ỏ tovỏnh kỡ vẻnh pẻju kỡ vyr. Vẻnh pẻju sỡ han tỏg, hỏ ra tỏg ỏ to vỡn

ke mǎn ke mũ ha, isỹ ti jēnēn kỹ. Tĩg mǎn ke tũ ti nĩ ha.

16 Ti tỹ vēnh péju kỹ ti mũ ěn kǎ tóg tỹ ǎ camarada jē vē, hǎ ra tóg tỹ ǎ jǎvy jē ha, ũri. ǎ to há tǎvĩ tóg jē ha, ti tỹ Cristo ki rǎ kỹ jēn kỹ. Ti to sóg há tǎvĩ nĩ gé, kỹ tóg ǎ tỹ ti to há nĩ jé há tĩ gé. ǎ camarada vỹ tỹ ti nĩ, hǎ ra tóg tỹ ǎ jǎvy nĩ gé, kỹ tóg ǎ tỹ ti to há pē nĩn kỹn há tĩ.

17 Kỹ, ǎ tỹ iso há nĩn kỹ ti mỹ komēr hǎ vĩmnĩ, ǎ tỹ komēr hǎ inh mỹ vĩ ěn hǎ han nĩ, ti mỹ, ti tỹ inh jēgja ki ǎ to jun kỹ.

18 Ti mỹ ǎ tỹ nén ũ péju kỹ ma vyr'? Ti mỹ ǎ mỹ név(e) jē'? Kajǎm jé sóg ke mũ, ti jagfy.

19 Vēsóg ki sóg ǎ mỹ rán mũ, inh, hǎ vỹ: Paulo, he mũ. Kajǎm jé sóg ke mũ, ti név(e) ti, ki hǎ sóg tó mũ. Hǎ ra ǎ tóg inh mỹ név(e) jē gé, ǎ tỹ isugrĩn Jesus ki ra kỹ.

20 Ha vē, jǎvy!. Inh fe tỹ mrin kemnĩ, inh mỹ han nĩ, sỹ ǎ mỹ nén to vĩ mũ tag ti, ěg tỹ jagnē mré ěg Senhor ki ge kỹ nỹtĩn kỹ. Inh fe tỹ há' hemnĩ, ǎ tỹ tỹ inh mré ke nĩn kỹ, ǎ tỹ inh mré Cristo ki rǎ kỹ jēn kỹ.

21 Isỹ ǎ mỹ nén to vĩ mũ tag han já ǎ tóg ke mũ, ki kanhró sóg nĩ. Hǎ kỹ sóg ǎ mỹ rán mũ. Isỹ ǎ mỹ nén to vĩ mũ tag kǎfór han jé ǎ tóg ke mũ gé, ki kanhró sóg nĩ.

22 Kỹ inh jo inh nũr jafǎ ti kǎn nĩ gé. Topē vỹ kǎnhmar ǎjag vĩ mēnh ke mũ, hǎ kỹ sóg ǎjag venh kǎtĩg ke mũ, ha vemnĩ.

Ũ tỹ Filemom tá ke ag mũ ěkrég tĩ ag

23 Epafras vỹ ǎjag mũ ěkrég tĩgtĩ. Inh mré tóg se kỹ jē, Jesus Cristo tugrĩn.

24 Marcos vỹ ǎjag mũ ěkrég tĩ gé, Aristarco ti ke gé, Demas ti ke gé, Lucas ti ke gé. Inh mré ag tóg rǎnhraj mũgtĩ, tag ag.

25 Ěg Senhor tỹ Jesus Cristo jé ǎjag tar han kǎn. Hǎ vē.

HEBREU AG MỸ CARTA

Topê kósin

¹ Topê vỹ vāsỹ ãg jóg'jóg ve ag mré vēmén (ka)mẽ ja nĩgtĩ. Ag mỹ tóg tó mǎn', tó mǎn', he ja nĩgtĩ. Ti vĩ tó tĩ ag mỹ tóg tó ja nĩgtĩ, vāsỹ, ag tỹ vēnh kar mỹ ti vĩ kāmén jé.

² Ūri tóg kakó tĩ ha, kurã tỹ ãgno ti, kỹ tóg ũri ã kósin jēnē, ti tỹ ãg mỹ Topê vĩ tó jé. Ti mré tóg nén ũ kar hyn han ja nĩgtĩ, Topê ti, ã kósin mré. Kỹ tóg ti mỹ nén ũ kar tag vin ke mũ gé. Ti hã mỹ tóg vin sór mũ, Topê ti, ã tũ kar ěn ti.

³ Ęg tỹ Topê kósin ve kỹ ãg tóg Topê tỹ tỹ ũn mág nĩ ki kanhró nỹtĩ. Ti ri ke pẽ ti nĩ, ti hã pẽ, tỹ ti Topēn hã ve nĩ, ti kósin ti. Ti vĩ vỹ tar nĩ, tỹ tóg ãg tỹ nén kar vég mũ tag ki rĩr tĩ, ã vĩ tỹ. Ti hã vỹ ãg tỹ Topê vĩ mranh ěn tỹ tũg' he tĩ, kỹ tóg ãg jãnhkrig kỹ ãg fēg ke mũ. Ęg jagfy ter kar kỹ tóg Topê pēgja tá nĩ nĩ, ũn tỹ vēnh kar tar kãfór nĩ ěn pēgja tá, ti kósin ti.

Topê kósin tỹ Topê tỹ jēgnē jafã ag kãfór nĩ

⁴ Topê kósin vỹ Topê tỹ jēgnē jafã ag kãfór nĩ, kanhkã tãn ag. Ti jiji vỹ ag jygy kãfór nĩ gé. Hã kỹ ãg tóg vég tĩ, ti tỹ ag kãfór nĩ ti.

⁵ Topê pi(jé) ã tỹ jēnē jafã ag kã ũ mỹ: “inh kósin vỹ tỹ ã nĩ,” he ja nĩgtĩ'. “Ūri hã sóg ã mỹ: tỹ inh ã panh nĩ, he mũ,” he ja tũ ti nĩ, Topê ti, ã tỹ jēgnē jafã

ag kã ũ mỹ. Kỹ tóg ag kã ũ to: “ti panh vỹ tỹ inh nĩnh mũ, kỹ tóg tỹ inh kósin nĩnh mũ,” he ja tũ nĩ gé. ã kósin hã to tóg tag tó ja nĩ, Topê ti.

⁶ ã kósin ve ěn jēnē ja ti nĩ, ãg to, Topê ti. Á tỹ ti jēnēn kỹ tóg tag tó gé, ha mẽ: “isỹ jēgnē jafã ag vỹ ti krēm mũg ke kãn mũ, ha vemnĩ,” he ja ti nĩ, Topê ti.

⁷ Hã ra ti tỹ jēgnē jafã ag to vēnh jykre tag tóg rán kỹ nĩ, ha mẽ: “Topê vỹ ã tỹ jēgnē jafã ag tỹ kãka ri ke han, kỹ tóg ag tỹ pĩgru ri ke han mũ gé, Topê ti,” he tóg mũ gé, Topê vĩ rán ki, kanhkã tãn ag to.

⁸ Kỹ tóg ã kósin mỹ tag tó, ha mẽ: “Topê vỹ tỹ ã nĩ. Á tỹ tỹ pã'i mág nĩ vỹ tũg' henh ke tũ pẽ nĩ. Vēnh jykre kuryj han ã tĩ, ã krēm ke kar ag mỹ.

⁹ Vēnh jykre kuryj to ã há nĩ. Vēnh jykre pãno to ã jũ nĩ. Hã kỹ sóg ã kuprēg, isỹ tỹ Topê nĩn kỹ, isỹ tỹ ã pã'i nĩn kỹ. Á tỹ sóg ũn mág han, ã krēm ke kar ag kãfór ã tóg nĩ. Á tỹ tỹ pã'i mág nĩ tũgrĩn ã fe tóg mrin kenh ke mũ, vēnh kar fe tỹ mrin ke kãfór,” he ja tóg nĩ gé, Topê ti, ã kósin ti mỹ.

¹⁰ Kỹ tóg ti mỹ tag tó gé, ha mẽ: “ãg tỹ nén (ũ) kar han ve ki ã tóg ga han, kanhkã ti ke gé, ã nĩg tỹ.

¹¹ Tũg' he kãn jé tóg ke mũ, ã tỹ nén han ja tag ti, jãvo ã hã tóg tũg' henh ke tũ pẽ nĩ. Á tỹ nén han ja tóg ã sinsin kỹ kũgnãnh ke mũ, kur ri ke.

¹² Ti kãnhpēn jé ã tóg (ke) mũ, ãg tỹ kur kónhpēn ri ke.

Ĕg kur kunũg ěg tĩ, ěg tỹ ũ kãra rãg jé. Tag ri ke han jé ã tóg ke mũ, ã tỹ han ja kar tag ti tỹ, ã tỹn kókén kỹ. Hã ra ã hã tóg tũg' henh ke tũ nĩ. Sin ke tũ pẽ ã tóg nĩ jãvo, kófãn ke tũ pẽ a tóg nĩ jãvo," he ja tóg nĩ, Topẽ ti, ã kósin ti mỹ.

¹³ Hã ra Topẽ pi(jé) ã tỹ jěgně jafã ag mỹ: "inh pẽgja tá nĩ," he ja nĩ'. "Nĩ ra ver, inh pẽgja tá, sỹ ã kato vĩ mũ ag tỹ ã krẽm vin jé, kỹ ag se vẽ sir," he ja tũ ti nĩ, ti tỹ jěgně jafã ag mỹ. Æ kósin hã mỹ tóg tag tó.

¹⁴ Topẽ tỹ jěgně jafã ag vỹ vẽn kuprĩg ri ke nỹtĩ, hã ra ag tóg Topẽ rãnrãj ti han tĩ. Topẽ vỹ ag jěgněg tĩ, ag tỹ ti tũ ag jy nĩgãn jé, ũn krenkren ke mũ ěn ag jy.

2

Ĕg tỹ Topẽ vĩ to é henh ke tũ

¹ Hã kỹ tóg há tĩ, ěg tỹ ti vĩ mẽ kỹ ti jykre hã han kỹ, ěg tỹ tỹ prãnh ke tũ nĩ jé.

² Topẽ tỹ jěgně jafã ag vỹ vãsỹ Topẽ vĩ ma kãmũ ja nĩgtĩ. Hã ra ag tóg ki hã tó ja nĩgtĩ. Ũ tỹ ag vĩ ki krov tũ ěn vóg kónãn ja ti nĩgtĩ, Topẽ ti. "Ũ tỹ ag vĩ mẽ sór tũ ěn ag vóg kónãn jé sóg ke mũ," he ja ti nĩ, hã kỹ tóg hã ra ke ja nĩgtĩ.

³ Kỹ ěg tóg ũri kren ke tũ nĩ gé, ěg tỹ ti to é hen kỹ, ti tỹ ěg kren han sór mũ ra. Nén ũ mág pẽ vẽ mỹr, Topẽ tỹ ěg krenkren han sór mũ tag ti. Ĕg pã'i vỹ ã mré mũ tĩ ag mỹ tó vén, ti tỹ ěg kren han sór mũ tag ti. Ũ tỹ ti vĩ mẽg mũ ag vỹ ěg mỹ tó ja nĩgtĩ gé, ti tỹ

ěg kren han sór tag ti, hã kỹ ěg tóg ki kanhró nỹtĩ ha.

⁴ Kỹ Topẽ vỹ ũ tỹ ěg mỹ ti vĩ tó mũ ěn ag vĩ to: "há ti nĩ," he ja nĩ gé, hã kỹ tóg ag tar han, ag tỹ ěg tỹ nén ũ han vãn ěn hyn han jé, milagre ti, ěg tỹ vėsóg ki nén han ki kagtũg ěn. Tag to ag tar nỹtĩ, Topẽ tỹ ag tãn kỹ, ũ tỹ ti vĩ tó tĩ ag. Kỹ tóg ag mỹ ã kuprĩg jěně gé. Ti hã ne to jykrén kỹ: "tag tar han jé sóg ke mũ, ěn to, kỹ sóg ũ ěn tar han ke mũ, ũ ũ to," he ja nĩ, ti vĩ tó tĩ ag to, Topẽ ti.

Topẽ kósin tỹ ěg tỹ ũn mág han ke

⁵ Topẽ vỹ nén (ũ) kar ěn han mãn ke mũ, kỹ tóg tỹ ũ tãg nỹtĩnh mũ. Ĕn kri pã'i vỹ tỹ ěg nỹtĩnh mũ, ěg tỹ tỹ ěprã ke nỹtĩ ra. Ti tỹ jěgně jafã ag pi(jé) tỹ ga tãg kri pã'i nỹtĩnh mũ'.

⁶ Hã kỹ ti vĩ tó tĩ ũ vỹ tag rán ja nĩ, ti vĩ rán ki, ha mẽ. Topẽ mỹ tóg: "tỹ ěg tóg nén ũ tũ nỹtĩ vẽ, ěg tỹ tỹ ěprã ke nỹtĩn kỹ, hã ra ã tóg ěg hã mĩ ěkrén kỹ nĩ nĩ," he ja nĩ. "Tỹ ěg tóg nén ũ tũ nỹtĩ vẽ, ěg tỹ tỹ ěprã ke krẽ nỹtĩn kỹ, hã ra ã tóg ěg ki rĩr tĩ.

⁷ Kỹ ã tóg prỹg pipir ki ã tóg ěg tỹ ũn kãsir han ja nĩ, kỹ ěg tóg ěn kã ã tỹ jěgně jafã ag krẽm nỹtĩ. Tag pãte ã tóg ěg tỹ ũn mág han ke mũ, ũn tar, pã'i mág tỹ ũn há nĩ ěn ri ke, ěg tỹ vẽn kar kri nỹtĩ jé.

⁸ Kỹ ã tóg ěg krẽm nén (ũ) kar vin kãn ke mũ," he ja tóg nĩ, Topẽ mỹ, Topẽ vĩ tó tĩ ti.

Ha vé, Topẽ vỹ ěg krẽm nén (ũ) kar vin ja nĩ, ěg tỹ tỹ nén (ũ) kar pã'i nỹtĩ jé. Kỹ nén (ũ) kar vỹ ěg krẽm nỹtĩ. Ĕg krẽm

nýtĩ tũ vỹ tũ tĩ. Hã ra ěg tóg ver vég tũ nĩgtĩ, nén (ũ) kar tỹ ěg krēm nýtĩ ti. Ver tóg nén ũ ũ tỹ ěg tũ tũ nýtĩ ven nĩ.

⁹ Hã ra ěg tóg Jesus hã tỹ tỹ ũn mág nĩ ěn vég tĩ, ũri, ti tỹ tỹ ũn há nĩ ěn, pã'i mág ri ke. Prỹg pipir ki Jesus tóg Topě tỹ jěgně jafã ěn ag krēm ke ja nĩ, kanhkã tân ěn ag krēm, kỹ tóg ěg kar jagfy ter ja nĩ, Topě tỹ ěg jagãgtãn kỹ. Kỹ tóg ũri tỹ ũn mág pě nĩ nĩ, ti tỹ ěg jagfy ter ja ěn tugrĩn.

¹⁰ Topě vỹ tỹ nén (ũ) kar kri ke nĩ, kỹ nén (ũ) kar vỹ ti tugrĩn rĩnrĩr nýtĩ. Hã kỹ tóg vėnhmỹ tũ nĩ, Topě tỹ Jesus mỹ: “ã jagtar tugrĩn ã tóg tỹ ũn há tãvĩ nĩnh mũ,” hen kỹ. Hã jé Jesus tóg jagtar nĩ ja nĩgtĩ, ti tỹ tỹ ũn há tãvĩ nĩn jé. Kỹ tóg ũn e krenkren han mũ sir. ěg jo tóg tĩg mũ sir, Topě krē kar ag jo, ěg tỹ ti ri ke há nýtĩ jé gé, ěg tỹ Topě jamã sĩnvĩ ěn tá junjun jé, ti mré.

¹¹ Ha vé, Jesus vỹ ěg tar han tĩ, ěg tỹ Topě vĩ mranh mãn sór tũ nĩ jé. Kỹ ũ tỹ ěg tar han mũ vỹ ěg mré jóg pir nĩ, Jesus ti. Hã kỹ tóg ěg to: “inh jãvy ag, inh ve fag,” he mũ. ěg to tóg mỹ'ãg tũ nĩ.

¹² ěg to tóg: “inh jãvy ag mỹ sóg ã jiji tónh ke mũ, jóg!” he ja nĩ. “Ag rĩnve sóg ã tỹ tỹ ũn há nĩ ěn kãmén ke mũ, ã jé tó jé sóg ke mũ, ag to sóg mỹ'ãg ke tũ nĩ,” he ja tóg nĩ, Jesus ti, ěg to.

¹³ Kỹ tóg: “Topě ki sóg rã kỹ jě,” he mũ gé. Kỹ tóg: “inh mré ke ag hã vė, Topě tỹ inh mỹ

ũn vin mũ ag kar hã vė, fag ke gé,” he ja nĩ gé.

¹⁴ Jesus mré ke ěn ag hã vỹ tỹ ěprã ke ag nýtĩ, fag ke gé. Hã kỹ Jesus vỹ ag mré ke tỹ ěprã ke nĩ ja nĩ gé, hã kỹ tóg ěg jagfy ter ja nĩ. Ti tỹ Japo tũg ke vė, ã ter tugrĩn. Japo vỹ ěg tén sór to tar nĩ, hã ra Jesus vỹ ti tỹ tũ' henh ke mũ.

¹⁵ Kỹ tóg ěg krenkren han ke mũ, ěg tỹ ěg ter ke kaměgměg kỹ. ěg ter ke tugrĩn ěg tóg nén (ũ) tỹ ěg tén ke mũ kar kaměg tĩ, nén (ũ) tỹ ěg vóg kónãn tĩ kar ke gé. Hã ra Jesus tóg ěg krenkren han mũ, kỹ ěg tóg nén ũ kaměg mãn ke tũ nĩ ha.

¹⁶ Ti pi(jé) Topě tỹ jěgně jafã ag krenkren han mũ', kanhkã tân ag'. Abraão krē ag hã krenkren han tóg mũ, ag jóg mré hã, hã kỹ tóg rán kỹ nĩ.

¹⁷ Hã jé tóg ã jãvy ag ri ke nĩ ja nĩgtĩ, Jesus ti. Tỹ tóg ěg hã pě ja nĩgtĩ. ěg tỹ nén (ũ) kar han mũ ve kãn ja ti nĩgtĩ, ěg jagtar mré hã. Hã kỹ tóg ěg jagfy vėnh fěg, kỹ tóg ěg tỹ Topě vĩ mranh tỹ tũ' he ja nĩ. Topě tũ ki rĩr tĩ to pã'i mág tỹ vėnh rãnrãj han mũ ěn ri ke han ja ti nĩ, Jesus ti. Ti tỹ ěg jagfy Topě tũ ki rĩr nĩn kỹ tóg ěg jagãgtãn tĩ. Ki rĩr há han tóg tĩ gé, ti tỹ ěg mré tỹ ěprã ke ja nĩn kỹ.

¹⁸ ěg mré tóg jagtar ja nĩgtĩ, Jesus ti. Japo vỹ ti tỹ Topě vĩ mranh han sór ja nĩgtĩ gé, ěg ri ke, hã ra tóg mranh ja tũ nĩ inhhã. Hã kỹ tóg ki kanhró nĩ, ěg tỹ nén (ũ) vég mũ kar ki. Hã kỹ tóg tag kar to ěg tar han ki

kanhró nĩ inhhã.

3

Jesus tỹ tỹ Moisés kri ke nĩ

¹ Inh kanhkã', Topẽ tũ vỹ tỹ ãjag nỹtĩ. Kỹ tóg ãjag kuprẽg, ãjag tỹ kanhkã tá ve jé. Hã kỹ Jesus mĩ êkren nĩ. Topẽ vỹ ti fẽg. Kỹ tóg êg mỹ Topẽ tũ ki rĩr tĩ to pã'i mág ên ri ke nĩ, êg tỹ ti ki rã kỹ. Ti hã kãmén êg tóg tĩ gé.

² Ū tỹ ti fẽg mũ ên rãnrãj han tóg tĩ, Moisés ri ke. Moisés vỹ Topẽ tũ kar ki rĩr há han ja nĩgtĩ gé, Topẽ povo kar ki, ti ãn krẽm ke kar fag ki.

³ Hã ra Jesus vỹ Moisés kãfór nĩ. Ū tỹ ãn han tũ vỹ ũ tỹ ãn ki rĩr tĩ ên kãfór nĩ. Ri ke ti nĩ, Jesus tỹ Moisés kãfór nĩ ti. Êprã ke vỹ tỹ ti nĩ, Moisés ti, kỹ Jesus vỹ ti kãfór nĩ.

⁴ Gĩr kar vỹ panh nỹtĩ gé. Ū tỹ vẽn kar han mũ vỹ tỹ Topẽ ti nĩ.

⁵ Moisés vỹ Topẽ tũ ag ki rĩr ja nĩgtĩ, kỹ tóg ki rĩr há han ja nĩgtĩ. Topẽ camarada vỹ tỹ ti nĩ ja nĩgtĩ, kỹ tóg Topẽ ãn krẽm ke fag ki rĩr nĩ ja nĩgtĩ. Hã ra tóg Cristo tỹ nén han ke ên kãmén ja nĩ gé, Moisés ti.

⁶ Cristo vỹ tỹ Topẽ kósin nĩ, kỹ tóg Topẽ tũ ag ki rĩr há han tĩ, hã ra ag tóg tỹ ti tũ nỹtĩ, ti ãn krẽm ke kar ên ag, ã tỹ ãn ki rĩr tĩ ag, fag ke gé. Êg hã vẽ, ti tũ vỹ tỹ êg nỹtĩ, ti ãn krẽm ke vỹ tỹ êg nỹtĩ, êg tỹ ti to tar nỹtĩn kỹ, êg tỹ ti kãmén há han kỹ, ti tỹ êg mỹ sér nĩn kỹ, êg tỹ tá nén venh ke ti.

Êg tỹ vẽnkhán ke

⁷ Tag tóg tóg mũ, Topẽ ti, ã kuprĩg tỹ, ha mẽ: “Ãjag tỹ ũri inh ví mẽ kỹ vẽn kutu han tũg nĩ,” he tóg.

⁸ “Ãjag jóg'jóg ve ag vỹ vẽn kutu han ja nĩgtĩ, kỹ ag tóg inh kato vãsãn ja nĩgtĩ, ag tỹ ga kórég ki nỹtĩn kỹ,” he tóg, Topẽ ti.

⁹ “En kã ag tóg iso ví pãtigtén ja nĩgtĩ gé. “Êg tỹ ti ví mranh mũ ra tóg êg vóg konãn ke tũ nĩ,” he ja ag tóg nĩgtĩ, ag tỹ isỹ nén han mũ ên ve ja ra, isỹ prỹg tỹ 40 (ke) ên ki ag ki rĩr há han mũ ra.

¹⁰ Hã kỹ sóg ag to jũ ja nĩ. Ag to sóg: “kórég ag nỹtĩ,” hé. “Vẽn jykre há to jykrén tũ ag tóg nỹtĩgtĩ,” he sóg. “Inh japry ve sór ja tũ ag tóg nỹtĩ, ãn jamĩn ti,” he sóg.

¹¹ Kĩ sóg ag to jũ nĩn kỹ (sóg) ag to ví jũ han kỹ tag tóg, ha mẽ. “Sỹ ag vẽnkhán han ke vẽ vẽ, hã ra ag tóg iso ví jũ han ja nĩ, hã kỹ ag tóg vẽnkhán han ke tũ nĩ ha. Hã kỹ ag ri ke han tũg nĩ, ãjag tỹ ũri inh ví mẽ kỹ, he sóg mũ,” he tóg, Topẽ ti.

¹² Inh kanhkã, tag to jykrén, ãjag tỹ Topẽ kato vãsãn sór tũ nĩ jé, ãjag tỹ ti ví mranh sór tũ nĩ jé gé, ãjag tỹ Topẽ tovãnh sór tũ nĩ jé. Ti hã ne êg rĩnrĩr han ki kanhró nĩ', Topẽ ti. Hã kỹ ti tovãnh tũg nĩ.

¹³ Jagnẽ jyvẽn nĩ, kurã kar ki, ũri mỹr. Ájag tỹ jagnẽ jyvẽn to tar nỹtĩn kỹ ãjag tóg Topẽ to tar nỹtĩnh ke mũ gé, ha vemnĩ, kỹ ãjag kãmĩ ũ vỹ vẽn kutu han ke tũ nĩ. Êg tỹ ti ví mranh kỹ êg tóg kutu nỹtĩ, ha mẽ, ti ví mranh tỹ êg mỹ sĩnvĩ nĩn kỹ.

14 Ha mẽ, Cristo tũ vỹ tỹ ẽg nỹtĩ, ẽg tỹ ti tovãnh sór tũ nỹtĩn kỹ. Ẽg tỹ ti ki rã ve kã ẽg tóg ti to tar nỹtĩ ja nĩgtĩ. Ẽg tỹ ẽn ri ke ti to tar nỹtĩn kỹ ẽg tóg tỹ ti tũ nỹtĩ.

15 Hã kỹ tóg ẽg mỹ: “ãjag tỹ ùri inh vĩ mẽ kỹ vẽnħ kutu han tũg nĩ,” he mũ. ãjag jóg'jóg ve ag vỹ tóg vẽnħ kutu hyn han' he ja nĩgtĩ, kỹ ag tóg inh kato vãsãnsãn, isỹ ag jykre ve sór ja nĩn kỹ. Ag ri ke han sór tũg nĩ,” he tóg mũ ẽg mỹ.

16 Û tỹ hẽ nỹ hỹn ti vĩ mẽ kỹ ti kato vãsãnsãn ja nĩgtĩ? Û tỹ ga tỹ Egito tá kã pa ja ẽn ag hã ja vẽ, ha mẽ, Moisés tỹ tá ag tatĩn kãtĩg kỹ.

17 Kỹ Topẽ hỹn ù tỹ hẽ to jũ ja nĩgtĩ, prỹg tỹ 40 (ke) ẽn ki? Û tỹ ti vĩ mranh ja ẽn ag hã to tóg jũ ja nĩ, hã kỹ ag tóg ga kórég ẽn ki tũ' he kãn.

18 Kỹ Topẽ hỹn ù tỹ hẽ to: “vẽnħkãn ke tũ ag nỹtĩ ha,” he ja nĩgtĩ? Û tỹ ti vĩ han sór tũ ẽn ag to ke ja vẽ, mỹr, ha mẽ.

19 Ag tỹ ti tovãnh kỹ, hã kỹ ag tóg ag tỹ nén ve sór ja ẽn ve ja tũ nĩ sir, mỹr, ha mẽ.

4

1 Topẽ vỹ ẽg mỹ tag tó ja nĩgtĩ gé. Ti tỹ ẽg vẽnħkãn han sór vẽ, kỹ ti vĩ to é he tũg nĩ. Vẽnħ ki rĩr há han nĩ, ãjag tỹ to krónh ke tũ nĩn jé.

2 Mẽ ẽg huri, Topẽ tỹ ẽg mỹ nén han sór mũ ẽn ti, ù tỹ ga kórég mũ mũ ẽn ag tỹ mẽ ri ke han ẽg tóg huri. Hã ra ag tóg véke mẽ ja nĩgtĩ, kri fi ja tũ ag nỹtĩgtĩ, ag tỹ mẽg mũ ra. Hã

kỹ tóg ag mỹ nén ù há han ja tũ nĩ, Topẽ vĩ ti.

3 Ẽg tỹ ti ki ge hã kỹ ẽg tóg vẽnħkãn ke mũ. Hã kỹ Topẽ vỹ tag tó, ha mẽ: “ag to jũ nĩn kỹ sóg ag to vĩ jũ han kỹ tag tó, ha mẽ. “Sỹ ag vẽnħkãn han ke vẽ vẽ, hã ra ag tóg vẽnħkãn ke tũ nỹtĩ ha,” he ja ti nĩ. Topẽ vỹ vãsỹ vẽnħkãn ja nĩgtĩ, ti tỹ nén (ũ) kar pẽ han han ti kỹ. Kỹ nén (ũ) kar vỹ hyn han kỹ nỹtĩ ha.

4 Hã kỹ kurã tỹ 7 (ke) ẽn to tag tóg rán kỹ nĩ, ha mẽ. Topẽ tỹ nén kar hyn han kãn ja to tag tóg rán kỹ nĩ, ha mẽ: “kurã tỹ 7 (ke) ki Topẽ vỹ vẽnħkãn, ã rãnrhãj han kãn kỹ,” he tóg mũ, Topẽ vĩ rán ki.

5 Hã ra tóg Israel ù ag to tag tó ja nĩ gé, hã vỹ: “kỹ ag tóg vẽnħkãn ke tũ nỹtĩ ha,” he mũ gé.

6 Hã kỹ ù ag tóg vẽnħkãn ke mũ. Vãsỹ Topẽ tóg ẽg jóg'jóg ve ag mỹ ag vẽnħkãn ke tag tó ja nĩgtĩ vẽ, hã ra ag tóg ti vĩ jẽmẽ ja tũ nĩgtĩ, hã kỹ ag tóg vẽnħkãn ke tũ nỹtĩ ha. Kỹ Topẽ tóg ù ag kuprẽg ja nĩgtĩ, kỹ tóg ag hã mỹ ag vẽnħkãn ke ti nĩm mũ sir, ẽg hã mỹ.

7 Kurã tãg nĩm ja ti nĩ gé, ẽg vẽnħkãn ke to, hã vỹ: “ùri,” he mũ. Hã kỹ Davi tóg kurã tãg tag to tag rán ja nĩ, ha mẽ. Ag tỹ ga kórég ẽn tá kãpa kar kỹ, ag tỹ ga há tá junjun kar kỹ Davi tóg tag rán ja nĩ gé, ha mẽ: “ãjag tỹ ùri ti vĩ mẽ kỹ vẽnħ kutu han tũg nĩ,” he ja tóg nĩ. Kurã tãg to ken hã vẽ.

8 Josué vỹ Israel ag mré ga

há ěn ra tĩg ja nĩgtĩ. Hã ra ag tóg tá vĕnhkán pĕ han ja tũ nĩgtĩ ver, hã kĩ Davi vỹ ag mỹ kurã ũ tóg ja nĩ, ag vĕnhkán pĕ han ke ěn ti tóg ja ti nĩgtĩ.

⁹ Ha mẽ, Topĕ povo vỹ vĕnhkán ke mũ, ha vemnĩ, ti tỹ ag mỹ kurã nĩv ki.

¹⁰ Ũ tỹ vĕnhkán pĕ ěn vĕg mũ vỹ ã rãnrãj ki vĕnhkán ke mũ, Topĕ tỹ ã rãnrãj ki vĕnhkán mũ ěn ri ke, kurã tỹ 7 (ke) ěn ki.

¹¹ Hã kĩ vãsãnsãn, ãjag tỹ tỹ prãnh ke tũ nĩ jé, ãjag tỹ ga kórég kri mũ ja ěn ag nón ti vỹ mranh tũ nĩ jé, ãjag tỹ ãjag vĕnhkán ke ěn ve jé.

¹² Topĕ vỹ hã tigrĩn ěg tóg rĩnrĩr nỹtĩ. ã vỹ hã tỹ tóg nĕn kar hyn han tĩ. Rógro jã régre vỹ nĕn (ũ) kym há nỹgtĩ. Hã ra Topĕ vỹ vỹ ti tỹ nĕn (ũ) kym há kãfór han tĩ, kỹ ti vỹ tóg ěg kãra rã tĩ, ěg nĩ ti kãra, ěg kukã ti kãra ke gé, ěg krĩ ti kãra ke gé, ěg kuprĩg ti kãra tóg rã tĩ gé. Kỹ tóg ěg tỹ nĕn (ũ) to jykrĕn mũ kar ki kanhró nĩ, ěg tỹ nĕn (ũ) han sór mũ ki kanhró kar ti nĩ gé, Topĕ ti.

¹³ Nĕn (ũ) kar ki kanhró tóg nĩ, Topĕ ti, ã tỹ nĕn han mũ kar ki kanhró tóg nĩ. Nĕn ũ tóg ti mỹ vĕnh péju kỹ nĩ tũ pĕ nĩ. Ũ tóg ti vatánh tá nĕn ũ han ke tũ pĕ nĩ gé. Ki kanhró kar ti nĩ, ũ tỹ ěg jykre tugnỹm ke mũ ěn ti.

Jesus tỹ ěg jagfy vĩnh ke

¹⁴ Ti to tar nỹtĩmnĩ, ha mẽ. Ti ki rã kỹ ãjag nỹtĩ, kỹ ti to tar nỹtĩmnĩ. ěg jagfy Topĕ tũ ki rĩr ti to pã'i mág vỹ nĩ nĩ, hã vỹ:

Jesus, he mũ, Topĕ kósin, he mũ. ěn vỹ kanhkã tá jun huri.

¹⁵ Ti pí(jé) ěg krój nỹtĩ tag ki kagtĩg nĩ'. Ki kanhró tóg nĩ mỹr. ěg ri kĕn tóg jagtar nĩ ja nĩgtĩ gé, kỹ Japo vỹ ti tỹ Topĕ vỹ mranh han sór ja nĩgtĩ gé, hã ra tóg inhhã mranh ja tũ nĩgtĩ.

¹⁶ Hã kỹ ěg tóg Topĕ mré vĕmĕn ke mũ, jatun mỹ. Mũmĕg vãnh nỹtĩ jé ěg tóg ke mũ. ěg jagãgtãn jé tóg ke mũ, Topĕ ti, kỹ tóg ěg tar han ke mũ gé, ěg krój nỹtĩn kỹ.

5

¹ ěprã ke tỹ Topĕ tũ ki rĩr ti to pã'i mág jykre vỹ ge nỹgtĩ, ha mẽ. ã mré ke ag jagfy tóg vỹ tĩ, Topĕ mré, kỹ tóg ag jagfy Topĕ mỹ nĕn ũ pũn tĩ gé, kỹ tóg ag mĕg tãnh kỹ pũn tĩ gé, ag tỹ Topĕ vỹ mranh ja tigrĩn.

² Hã ra tóg tỹ ěprã ke nĩ gé, ag mré, ag krój ri ke tóg nĩ gé, hã kỹ tóg ag krój nỹtĩ ra ag jagãgtãn há han tĩ, ũ tỹ Topĕ vỹ mranh sór tũ ra mranh mũ ěn ag.

³ Mranh tóg tĩ gé, Topĕ tũ ki rĩr ti to pã'i mág ěn ti, hã kỹ tóg ã tỹ mranh mũ ěn to Topĕ mỹ tãnh kỹ pũn tĩ gé, ã mré ke ag tũ ěn mré.

⁴ Hã ra tóg vĕso: “inh hỹn Topĕ tũ ki rĩr sór mũ, kỹ inh hỹn tỹ tag to pã'i mág nĩnh mũ,” hĕnh ke tũ pĕ nĩ. Topĕ hã ne ũ to: “isũ ki rĩr ti to pã'i mág vỹ tỹ ã nĩnh mũ,” he tí', ti tỹ vãsỹ Arão kuprĕg vĕn ěn ri ke.

⁵ Hã kỹ Cristo vỹ vĕsóg ki tag to jykrĕn ja tũ nĩ gé. Ti

pi(jé) vēsý pā'i han ja nĩgtĩ', vēsý Topē tũ ki rĩr tĩ ěn to pā'i mág han sór ja tũ tóg nĩgtĩ'. Topē hã ne ti mý: “inh kósin vỹ tỹ ã nĩ,” he ja nĩ. “Ūri sóg ã mý: tỹ inh ã panh nĩ, he mũ,” he ja ti nĩ, Topē ti, Jesus mý.

⁶ Kỹ tóg ti mý tag tó gé, kỹ tóg rán kỹ nĩ gé, Topē vỹ tỹ rán kỹ nĩ ki, ha mẽ: “isũ ki rĩr jé ã tóg ke mũ. Tũ' henh ke tũ ti nĩnh mũ, ã tỹ isũ ki rĩr nĩ ti, Melquisedeque tỹ isũ ki rĩr mũ ěn ri ke,” he ja ti nĩ gé, Cristo mý, Topē ti.

⁷ Jesus vỹ, ã tỹ ga mũ tĩg kỹ jagtar nĩn kỹ (tóg) Topē mý to vĩ', to vĩ' he ja nĩgtĩ, ti tỹ ti kren han jé, ti ter tũ nĩ jé. Kỹ tóg fỹ gé, Topē mré vēmén kỹ. Vēsýrénh jagy han tóg. Kỹ Topē vỹ ti vỹ jēmē ja nĩ, Jesus tỹ ti mý to vĩn kỹ. Topē mý tóg tỹ ũn há nĩ, Jesus ti, hã kỹ tóg ti vỹ jēmē ja nĩ.

⁸ Topē kósin vỹ tỹ ti nĩ, Jesus ti, hã ra tóg ã jagtar tugrĩn (tóg) Topē tỹ nén tó mũ ki kanhrãn kãn ja nĩ, ti tỹ Topē vỹ hã han jé.

⁹ Ti tỹ vėnh kanhrãn kãn kỹ tóg ěg kren pē han ki kanhró nĩ ge sir. Ěg jagfy tóg ter ja nĩ, kỹ tóg ěg kren han mũ, ěg tỹ ti vỹ ki króm kỹ.

¹⁰ Topē vỹ ti mý: “inh mý isũ ag ki rĩrmnĩ, to pā'i mág vỹ tỹ ã nĩ, Melquisedeque ěn ri ke,” he ja nĩ. Hã kỹ tóg tỹ pa'i nĩ, Jesus ti.

Ěg tỹ ti to krónh kenh ke tũ

¹¹ Sỹ ãjag mý tag kãmén kãn sór mũ ra tóg jagy tĩ. Tó jagy ti tĩ, tag ti. Kỹ ãjag tóg mẽ há

han tũ nĩgtĩ gé. Ājag pi(jé) krĩ há nỹtĩ ver'.

¹² Ājag tỹ ũ ag kanhrãn ke vė vė, ãjag tỹ vāsý Topē vỹ mẽ ja nỹtĩn kỹ. Hã ra ãjag tóg ver ki kagtĩg nỹtĩ. Ājag kã ũ tỹ ãjag mý Jesus kãmén vén ěn tó mãn kỹ tóg há nỹnh mũ vė. Gĩr kãsir ri ke ãjag nỹtĩ. Gĩr kãsir ag vỹ leite hã kron tĩ, ãjag tỹ ver kãsir nỹtĩn kỹ.

¹³ Jãvo ũn sanh ag hã vỹ vėjėn kufy ko tĩ'. Gĩr tỹ leite kron mũ ri ke ãjag nỹtĩ, ãjag tỹ Jesus kãme ěn ki kanhrãn kãn tũ nỹtĩn kỹ ver.

¹⁴ Ū tỹ to jykrén há han mũ ěn vỹ ũn sanh há ri ke nĩ, kỹ tóg ki kanhró nĩ. “Tag vỹ há nĩ, tag vỹ há tũ nĩ, tag vỹ kuryj nĩ, jãvo tag vỹ kygnē kỹ nĩ,” he jé tóg ke mũ, ũ tỹ ki kanhrãn há han mũ ěn.

6

¹ Ājag tỹ ver gĩr kãsir ri ke nỹtĩ ra sóg ãjag mý Jesus kãmén vén ja ěn tó sór tũ nĩ ha. Sỹ ãjag mý ũn sanh ag tũ kãmén sór vė ha, ãjag tỹ ver to tar nỹtĩ tũ ra. Jesus kãmén vén jã ěn hã vė, gĩr tỹ ã pafa ja kron ěn ri ken hã vė, ha mẽ: vėnh jykre kórég tovãnh jé ěg tóg ke mũ, ěg tỹ nén to ter ke mũ ěn tovãnh kãn jé ěg tóg ke mũ. Topē ki rã jé ěg tóg ke mũ.

² Ū tỹ ti ki rã mũ ěn kype jé ěg tóg ke mũ, kỹ ěg tóg ti kri ěg nĩgé finh ke mũ gé, ti tỹ ěg mré Jesus ki rã kỹ jē jé. Kar kỹ ěg tóg ěg ter kar kỹ rĩr mãn ěn to jykrén ke mũ gé, Topē tỹ ěg jykre tugnỹm ke ěn to. Vėnh

kāme tag kar vỹ gĩr tỹ ã pafa ja kron ên ri ke nĩ.

³ Tag tó mǎn sór tũ inh nĩ ha, ājag tỹ vǎsỹ mē ja tag. Sỹ ājag mỹ tag pāte Jesus kāmén sór vē, kỹ tóg ũn sanh tỹ vējēn kufy ko ên ri ke nĩ. Topē tỹ tag to isar han kỹ sóg ājag mỹ kāmén há han ke mũ.

⁴ Ha mē, ěg kāmĩ ũ ag tóg ag tỹ Topē ki rǎ kar kỹ (ag tóg) ti tovǎnh pē han ja nĩgtĩ. Kỹ ag tóg ti ki ge mǎn ke tũ nỹtĩ ha. ěg tỹ Topē ki ge kỹ tóg ěg kanhrǎn ke mũ, vēnh jykre há ki. Topē vỹ ěg mỹ kanhkǎ tá vēnh jykre há ên nĩm mũ. ěg mỹ tóg ã kuprĩg jēnēg mũ gé.

⁵ Topē vĩ há nĩ ên vég ěg tóg tĩ. ěg tỹ kanhkǎ tá nén venh ke ên ve sĩ han ěg tóg tĩ, ěprǎ, ěg tỹ Topē ki ge kỹ.

⁶ Ũ tỹ ti jykre tag ve kar kỹ ti tovǎnh pē han kỹ tóg vēnhmỹ nĩ. Kỹ tóg ti ki rǎ mǎn ke tũ nĩ ha, ã jykre kórég tovǎnh mǎn ke tũ ti nĩ ha, ũ tỹ ti tovǎnh pē han mũ ên ti. Ha vé, ěg tỹ ti ki rǎ há han kar kỹ ti tovǎnh kỹ ěg tóg ti tỹ cruz to sa mǎn ri ke han mǎn mũ sir, Topē kósín ti. ěg tỹ vēnh kar tỹ ti to é he han mǎn vē sir.

⁷ ěpỹ ri ke ti nĩ, ha mē. Ta tỹ ti kri kutē kỹ ga mrǎn kỹ ěg jakré tóg mog há han tĩ, ěg tỹ ga há ki ti krǎn ti kỹ. ěg tỹ ěpỹ há ri ke nỹtĩn kỹ, ěg tỹ Topē mỹ vēnh jykre há han kỹ tóg ěg ve há han mũ, Topē ti.

⁸ ěpỹ ũ tóg hǎ ra kórég nĩ. Kỹ sónh hǎ tóg ki munmur tĩ, vǎnh ti ke gé, kỹ tóg mogmog kónǎn tĩ sir, ěg jakré ti. ěg tỹ ěpỹ kórég ên ri ke nỹtĩn kỹ

Topē vỹ ěg tovǎnh ke mũ sir, kỹ tóg ěg mỹ vĩ kónǎn han ke mũ, kỹ ěg kejēn pũr ke mũ, kurǎ ên kǎ.

⁹ Ha mē, vĩ tar han inh huri. Hǎ ra ājag tóg ti jagy tag venh ke tũ pē nĩ, ki kanhró inh nĩ. Ājag to sóg há nĩ. Krenkren jé ājag tóg ke mũ, ki kanhró inh nĩ.

¹⁰ Rǎnhrǎj há han ājag tóg tĩ. Ti to ājag há tǎvĩ nỹtĩ. Ti tũ ki rĩr há han ājag tóg tĩ gé. Topē vỹ tag vég tĩ, ājag rǎnhrǎj há tag. Ti pi(jé) kǎ jatu nĩgtĩ'. Vēnh jykre vēnhmỹ han tũ pē ti nĩgtĩ, Topē ti.

¹¹ Hǎ ra sóg ājag mỹ tag tó, ājag tỹ ti to tar tǎvĩ nỹtĩ jé, ājag tỹ ti to krónh ke tũ nĩ jé. Kỹ ājag tóg venh ke mũ, ājag tỹ nén (ũ) ve sór mũ ên ti.

¹² Ājag tỹ ti to krónh ken kỹ tóg kórég nĩ. Ũ tóg ěg jo Topē ki rǎ ja nĩgtĩ, hǎ ra ag tóg ti tovǎnh ja tũ pē nĩgtĩ, kỹ ag tóg hur vé, Topē tỹ ěg mỹ nén ven sór mũ ên ti. Tag ag ri ke han nĩ, ũ tỹ ěg jo ti tovǎnh jǎvǎnh ên ag ri ke han nĩ.

Topē tỹ ã vĩ ên han kǎn ke

¹³⁻¹⁴ Topē vỹ Abraão mỹ: “ã to vĩ há han jé sóg ke mũ, ã krē e han jé sóg ke mũ,” he ja nĩ. Kỹ tóg ti mỹ: “ã pi(jé) tag venh ke tũ nĩ', inh hǎ vỹ ki kanhró nĩ,” he ja nĩ gé. Ũ tỹ ti kǎfór nĩ ra tóg ên to: “ti hǎ vỹ ki kanhró nĩ,” henh ke vē vē. Hǎ ra ũ tóg Topē kǎfór nĩ tũ nĩ, hǎ kỹ tóg: “inh hǎ vỹ ki kanhró nĩ,” he ja nĩ, Topē ti.

¹⁵ Kỹ Abraão vỹ Topē tỹ ti mỹ nén tó ja tag to tar nĩ ja nĩgtĩ gé. Jatun mỹ tóg ã kósín

ke ên jāvānh ja nīgtī, hā kŷ tóg kejēn ti vé.

¹⁶ Ēprā ke ag vŷ, ag tŷ jagnē mŷ vī há han sór kŷ ag tóg jagnē mŷ: “inh kri nī ên vŷ ki kanhró nī, sŷ ā mŷ nén han ke ti,” he tī. Tag tó kŷ ag tóg jagnē jū tŷ tū' he tī. Ū tŷ tag tó kŷ ag tóg ki kanhró nŷtī, ti tŷ ki hā tó ja ti. Ēprā ke ag jykre hā vē.

¹⁷ Vēnh jykre tag han ja ti nī, Topē ti, ti tŷ ěg mŷ ā vī jēnēn kŷ. Ti tŷ ěg mŷ nén tó ja ên ve jé ěg tóg ke mŷ. ěg tŷ tag ki kanhrān há han hā jé tóg ěg mŷ: “ki kanhró inh nī,” he ja nī. Tó ū han mǎn ke tū ti nī ha. Ā tŷ tó ja ên hā han jé tóg ke mŷ, ti tŷ: “ki kanhró inh nī,” hen kŷ.

¹⁸ Ti vī régre to ěg tóg ki kanhrān há han tī. ěg mŷ tó kar kŷ tóg: “ki kanhró inh nī,” he ja nī gé. Ti vī régre hā vē. Hā kŷ ěg tóg venh ke mŷ, ti tŷ ěg mŷ nén tó ja ti. Tó ū han mǎn ke tū ti nī ha, hā ra tóg ón ja tū nī gé, ti tŷ ón ki kagtŷ nŷn kŷ. Ti tŷ ěg mŷ nén tó ja ên ve sór ěg tóg mŷ, hā vŷ: kanhkā, he mŷ, hā kŷ tóg ěg hā mŷ tó ja nī, Topē ti.

¹⁹ ěg tŷ kanhkā ve sór kŷ ěg tóg to krónh ke tū nīgtī. ěg tŷ kanhkā tá ūn ve sór mŷ hā vŷ ěg tar han tī, ěg tŷ tŷ prānh ke tū nī jé. Tá jun jé ěg tóg ke mŷ, ha vemnī, Topē jamā tá.

²⁰ Jesus vŷ tá jun vén, ěg jo, kŷ tóg ěg mŷ Topē to ěpry ti han, Topē to ěmŷn ti. ěg jagfy tóg tŷ Topē tū ki rŷr tī to pā'i mág nī, Melquisedeque ên ri ke. Kurā krŷg ja tū ti nī, ti tŷ

tŷ pā'i nī ti. Kŷ tóg ěg jo Topē rŷnja tá nī nī, ěg tŷ ti nón tá junjun jé gé.

7

Melquisedeque kǎme

¹ Melquisedeque ên vŷ tŷ pā'i mág nī ja nīgtī, cidade tŷ Salém kri, kŷ tóg Topē tū ki rŷr nī ja nīgtī gé, ū tŷ vēnh kar kri ke nī ên tū ki. Abraão vŷ pā'i tŷ 4 (ke) ên mré vēnh génh han ja nī. Ti tŷ ag kǎgtén kar kŷ Melquisedeque ên vŷ ti kato tē, kŷ tóg ti mŷ: “Topē vŷ ā ve há han, kŷ tóg ā ve há han mǎn ke mŷ gé,” he mŷ.

² Kŷ Abraão vŷ ti mŷ dízimo ên nŷm mŷ sir, ā tū tŷ 10 (ke) kar ki tóg ūn pir nŷm mŷ sir, Melquisedeque mŷ, ti tŷ ūn kato tē mŷ ên ag tū mǎn ja tŷ dízimo ên ti. Ti jiji to ken hā vē, hā vŷ: vēnh jykre kuryj to pā'i, he mŷ, hā vŷ: Melquisedeque, he mŷ. Kŷ tóg tŷ cidade tŷ Salém to pā'i nī, hā vŷ: ūn krŷ kuprā ên ag pā'i, he mŷ.

³ Panh tū ti nī, mŷnh tū ke gé, jóg'jóg ve tū ti nī gé. Ū ki mur já tū ti nī, kŷ tóg ter ja tū nī gé. Topē kósin ri ke ja ti nī. Topē tū ki rŷr kŷ tóg nī nī, ti kurā vŷ krŷg ja tū nī, Melquisedeque kurā ti.

⁴ Pā'i mág pē vē, Melquisedeque ti, hā kŷ Abraão vŷ ti mŷ ā tū tŷ dízimo nŷm ja nī gé. Hā ki ěg tóg ki kanhró nŷtī, ti tŷ Abraão kǎfór nī ti, Melquisedeque ti.

⁵ Ū tŷ Israel ag kǎmŷ dízimo mǎg tī ag vŷ tŷ Levi krē nŷtī, ū tŷ Topē tū ki rŷr tī ên ag. Ājag

mré ke ki ag tóg dízimo ên mǎg tĩ, ag kar tỹ tỹ Abraão krê'krê nỹtĩ ra.

⁶ Hã ra Melquisedeque pi(jé) tỹ Abraão mré ke nĩ ja nĩgtĩ'. Ge ra Abraão tóg ti mỹ dízimo ên nĩm ja nĩ, kỹ tóg ti mỹ: “Topê vỹ ã ve há han,” he mũ gé, Melquisedeque ti, Abraão mỹ, Topê tỹ Abraão mré vēmén kar kỹ, Topê tỹ ti mỹ: “ã kófa ra ã kósin ke mũ,” he kar kỹ.

⁷ Kỹ tóg Abraão kǎfór nĩ, Melquisedeque ti, ti tỹ ti mỹ: “Topê vỹ ã ve há han,” hen kỹ. Ti kri ke vỹ tỹ ti jê.

⁸ Levi krê'krê ên vỹ tỹ êprǎ ke nỹtĩ gé, ù tỹ ãjag mré ke ki dízimo mǎg tĩ ên ag. Hã ra Melquisedeque vỹ ter ja tũ nĩ nẽji, hã kỹ tóg rán kỹ nĩ, Topê vỹ tỹ rán kỹ nĩ ki. Ûn ter tũ vỹ Abraão ki dízimo mǎn ja nĩ, hã vỹ: Melquisedeque, he mũ.

⁹ Kỹ, Abraão tỹ ti mỹ dízimo nĩm ên kǎ tóg ã krê'krê kósin tỹ Levi jagfy ti mỹ dízimo nĩm ja nĩ gé, Melquisedeque mỹ. Hã kỹ Levi krê'krê ag vỹ ãjag mré ke ag ki dízimo ve ja nĩgtĩ gé sir.

¹⁰ Abraão tỹ Melquisedeque mỹ dízimo nĩm ên kǎ Levi vỹ mur ja tũ nĩ ver, hã kỹ ti jóg'jóg ve tỹ Abraão vỹ ti jagfy dízimo nĩm ja nĩ. Nĩm kar kỹ tóg kejên Levi vovo han mũ sir, Abraão ti, Melquisedeque tỹ ti mré vēmén kar kỹ.

¹¹ Topê tỹ Levi krê'krê ag mỹ: “isũ ki rĩrmnĩ,” he ên kǎ tóg ag mỹ tag to vênh jykre nĩm ja nĩgtĩ gé, ag tỹ ki rĩr ke to. Ag hã tỹ ki rĩr há han ke

vê vê, hã ra ag tóg ki rĩr kǎn jǎ tũ nĩ, hã kỹ Topê tóg ù tỹ ki rĩr ke mũ ù jênê ja nĩ, ù tỹ Melquisedeque ri ke ên, hã vỹ: Jesus Cristo, he mũ. Ag tỹ ki rĩr há han ja nĩ ra Topê hỹn ti jênênh ke tũ nĩ vê, kỹ Arão krê'krê ên ag hã vỹ ki rĩr nỹtĩnh ke vê vê.

¹² Kỹ, Jesus tỹ Topê tũ ki rĩr kỹ Topê vỹ ti mỹ tag to vênh jykre tǎg han ja nĩ gé.

¹³⁻¹⁴ Hã kỹ tóg ki rĩr nĩ sir. Ti pi(jé) tỹ Levi krê'krê ag kǎ ù nĩ', êg Senhor tỹ Jesus ti. Judá krê'krê ag kǎ ù vỹ tỹ ti nĩ. Ge ra tóg Topê tũ ki rĩr mũ. Judá krê'krê ù tóg Topê tũ ki rĩr ke tũ tĩ vê, ag tỹ Topê mỹ nén ù pũn ke tũ vê vê. Ag rǎnrǎj tũ vê vê, tag, Judá krê'krê ag, kỹ Moisés tóg ag to nén ù tó ja tũ nĩ gé, ti tỹ Topê tũ ki rĩr ke tag rán kỹ. Hã ra Jesus tóg Topê tũ ag ki rĩr jê, ti tỹ tỹ Judá krê'krê ag kǎ ù nĩ ra. Topê tỹ ti mỹ vênh jykre tǎg nĩm hã vê.

Jesus tỹ Melquisedeque ri ke nĩ

¹⁵ Levi krê'krê ag vỹ Topê rǎnrǎj han kǎn ki kagtĩg ja nĩgtĩ. Hã kỹ Topê tóg ã tũ ki rĩr ke ù jé prêr, ù tỹ Melquisedeque ri ke ên, hã vỹ: êg Senhor tỹ Jesus, he mũ. Hã ki êg tóg vég tĩ, Levi krê'krê ag tỹ ti rǎnrǎj han ki kagtĩg nỹtĩ ti.

¹⁶ Kỹ êg Senhor tỹ Jesus pi(jé) êprǎ ke ag jykre ri ke han kỹ Topê tũ ki rĩr mũ', kỹ êprǎ ke ù vỹ: “ha ki rĩr,” he ja tũ nĩ gé. Topê tỹ ti mỹ nén tó jan hã vê. Ter mǎn ke tũ ti nĩ

ha, hã kÿ tóg ki rÿr há han mũ
ha.

17 Ti to tag tóg rán kÿ nÿ,
Topê vÿ tÿ rán kÿ nÿ ki, ha mẽ:
“isũ ki rÿr jé ã tóg ke mũ. Tũ'
henh ke tũ (pê) ti nÿ, ã tÿ isũ ki
rÿr nÿ ti, Melquisedeque tÿ isũ
ki rÿr nÿ ên ri ke,” he ja ti nÿ.

18 Tag tó kÿ tóg Moisés jykre
ên tÿ tũ' he mũ, ti krój nÿn kÿ,
ti tÿ êg há han măn ki kagtÿg
nÿn kÿ.

19 Hÿ, Moisés jykre ên vÿ êg
tar han ki kagtÿg ja nÿgtÿ, êg tÿ
Topê vÿ ki króm han ki kagtÿg
ja tóg nÿgtÿ, kÿ êg ti jykre han
sór mũ ra kanhkã tá jun ke tũ
nÿ, êg tÿ Moisés jykre han mũ
ra. Vãhã Topê tóg êg mÿ vênh
jykre tãg nÿm ja nÿ, ù tÿ Moisés
jykre kãfór nÿ ên, hã vÿ: Jesus
jykre, he mũ. Kÿ êg tóg Jesus
tugrÿn Topê nÿgja tá junjun ke
mũ.

20 Tag to Topê tóg vÿ kãfór
han ja nÿ. Moisés tÿ Levi
krê'krê mÿ: “Topê tũ ki
rÿr mÿnÿ,” hen kÿ tóg vÿ kãfór
han ja tũ nÿ.

21 Hã ra Topê tóg Jesus mÿ
tag tó. Ti mÿ tóg: “isũ ag ki rÿr
jé ã tóg ke mũ,” he ja nÿ. “Tũg
ke tũ ti nÿ, ã tÿ isũ ag ki rÿr tÿ
ên ti. Vÿ kãfór han inh mÿr. Tó
ũ han măn ke tũ sóg nÿ, vênh
jykre ù han măn ke tũ sóg nÿ,”
he ja tóg nÿ, êg jóg mág ti, ã
kósin mÿ.

22 Hã kÿ Jesus jykre vÿ
Moisés jykre kãfór nÿ, Jesus tÿ
êg mÿ vênh jykre tãg nÿm mũ
ên.

23 Nén ù ki tóg sir Moisés
jykre ri ke tũ nÿ, Jesus jykre ti,
ha mẽ. Moisés jykre ki Topê
tũ ki rÿr tÿ ag vÿ e ja nÿgtÿ.

Ăjag kã ù ter kÿ ag tóg jagnê
jêgja kã ù fêg' he ja nÿgtÿ, ti tÿ
Topê mÿ ti tũ ki rÿr jé. Hã kÿ ag
tóg e ja nÿgtÿ, Moisés jykre ki
Topê tũ ki rÿr tÿ ag.

24 Hã ra Jesus vÿ ter măn ke
tũ nÿ inhhã, Topê tũ ki rÿr tóg
nÿ nÿ, ù tóg ti jêgja kã jênh ke tũ
nÿ.

25 Hã kÿ tóg ã tÿ ùn ki rÿr
nÿ mũ ag kar krenkren han
tÿ, ù tÿ ti tugrÿn Topê jamã tá
junjun ke mũ ên ag kar. Rÿr
tóg nÿ nÿ, kÿ tóg êg jagfy Topê
mré vémén tÿ. Kurã krÿg ja tũ
ti nÿ, Jesus ti.

26 Êg to ti há nÿ, Jesus ti, ti tÿ
êg jagfy Topê tũ ki rÿr nÿn kÿ.
Topê kósin vÿ tÿ ti nÿ. Kygnê
ja tũ pè ti nÿ. Nén ù kórég
venh ke tũ êg nÿ, ti ki. Topê vÿ
mranh tÿ ag mré ke tũ vè. Kÿ
tóg tÿ kanhkã tãn kar ag kri ke
nÿ gé sir, ùri.

27 Êprã ke ag tÿ Topê tũ ki
rÿr nÿtÿn kÿ ag tóg ãjag tÿ Topê
vÿ mranh ja tugrÿn Topê mÿ
nén ù pÿn vén tÿ, kurã kar ki,
kar kÿ ag tóg ãjag mré ke ag tÿ
Topê vÿ mranh tugrÿn ag jagfy
Topê mÿ nén ù pÿn tÿ gé sir.
Jesus vÿ Topê vÿ mranh ja tũ
nÿ inhhã. Hã kÿ tóg, ã tÿ vênh
fêg kÿ tóg ag tÿ Topê mÿ nén
ù pÿn ri ke han. Vênh fêg pir
han tóg, kÿ tóg ã tÿ vênh fêg
pir ên ki êg tÿ Topê vÿ mranh
e ja ên tÿ tũ' he kãn.

28 Moisés tÿ êprã ke ag mÿ:
“Topê tũ ki rÿr,” hen kÿ ag tóg
ki rÿr mũ, hã ra ag tóg kygnê
mág kÿ nÿtÿ ja nÿgtÿ gé, ag tÿ
tÿ êprã ke nÿtÿn kÿ. Hã ra Topê
tóg vênh jykre tãg han kÿ tóg ã
kósin mÿ: “ki rÿr jé ã tóg ke mũ,

tag to sóg vī kāfór han mǔ,” he ja nī. Ū tǔ kygnē ja tǔ pē ēn mǔ tóg tag tó ja nī, hā kǔ tóg kygnēnh ke tǔ pē nī gé.

8

Jesus hā tǔ ěg jagfy Topē tǔ ki rǔr

¹ Ha mē, sǔ ājag mǔ nén kāmén ja ti. Tag tó sór ja inh nī, ha mē. Ěg jagfy Topē tǔ ki rǔr tǔ to pā'i mág hā vǔ nī nī. Topē pēgja tá tóg nī nī, kanhkā tá.

² Topē nǔg jafā pē tá tóg ti tǔ ki rǔr mǔ. Topē nǔgja pē ēn pi(jé) tǔ ěprā ke ag tǔ há nī'. Topē hā tǔ há vē, ēn ti. Ěn tá tóg nī nī, ěg jagfy, Topē tǔ ki rǔr nī ēn ti.

³ Topē tǔ ki rǔr tǔ to pā'i mág jykren hā vē, ha mē. Topē mǔ ag tóg nén ū nī pǔn tǔ, nén ū ū ke gé. Kǔ ū tǔ ěg jagfy Topē tǔ ki rǔr tǔ to pā'i mág tag vǔ Topē mǔ nén (ŭ) nǔm ke mǔ gé, Jesus ti, hā vǔ: vēnh fēg, he mǔ.

⁴ Ti tǔ ver tag mǔ ga kri mǔ ag mré ga kri tǔ ra Topē tóg ti mǔ vēnh rānhrāj tag nǔm ke tǔ nī vē, ti tǔ Topē tǔ ki rǔr jé. Ěprā ū tǔ Topē tǔ ki rǔr mǔ ag vǔ nǔtǔ ver, ū tǔ Judeu ag jykre ki Topē tǔ ki rǔr mǔ ū ag.

⁵ Topē jo ĩn krēm ag tóg nén ū nī pǔn tǔ, Moisés tǔ ag mǔ vēnh jykre nǔm kǔ. Topē vǔ Moisés mǔ tó ja nī, ti tǔ kur tǔ Topē jo ĩn han jé. Ti mǔ tóg: “ā mǔ sóg ā tǔ nén han ke mǔ ēn ti ven kǎn huri,” he mǔ. “Ā tǔ pānónh kri nī ēn kǎ sóg ā mǔ ven kǎn. Sǔ ā mǔ nén ven mǔ ēn hā han nī,” he ja tóg nī,

Topē ti, Moisés mǔ, hā kǔ tóg han. ĩn ēn krēm ag tóg ūri nén ū ū pǔn tǔ, Judeu ag jykre ki, Topē tǔ ki rǔr tǔ ag. Hā ra tóg tǔ kanhkā tá vēnh jykre tag hā pē tǔ nī ver. Nén sǔ ki tóg ri ke nī, ag tǔ nén han mǔ ti, kanhkā tá vēnh jykre ri ke sǔ ti nī. Jesus hā vǔ kanhkā tá vēnh jykre pē ēn han kǎn mǔ.

⁶ Hā kǔ Jesus rānhrāj vǔ ěprā ke ag rānhrāj kāfór nī. Topē vǔ ěg mǔ Jesus jēnē, ti tǔ ěg mǔ vēnh jykre tǔg nǔm jé, kǔ tóg ti tǔ Moisés tǔ ěg mǔ vēnh jykre há nǔm ēn há kāfór nī. Kǔ tóg ěg mǔ nén ū há tāvǔ han ke mǔ, Topē ti, ti tǔ Jesus jēnē kǔ. Hā kǔ Jesus rānhrāj vǔ Moisés rānhrāj kāfór nī, Jesus tǔ ěg mǔ vēnh pāte fón ken kǔ.

⁷ Topē mǔ tóg pāgsǔ ja nī, ā tǔ Moisés mǔ vēnh jykre nǔm ja ēn ti, hā kǔ tóg vēnh jykre tǔg han to jykrén ja nī.

⁸ Ā povo jykre ve kǔ tóg ti mǔ kórég nī, hā kǔ tóg tag tó, ha mē. “Kǎnhmar sóg povo tǔ Israel mǔ vēnh jykre tǔg nǔm ke mǔ, Judá krē'krē ag mǔ ke gé,” he ja tóg nī, ěg jóg mág ti.

⁹ Vēnh jykre tǔg tag vǔ isǔ ag jóg'jóg ve ag mǔ vēnh jykre nǔm ja ēn ri ke tǔ nǔnh mǔ. Ag jóg'jóg ve ag mǔ sóg vēnh jykre ū nǔm ja nī gé, isǔ ga tǔ Egito tá ag kǎpan kǔ. Ag nǔgē kǎgmǔ kǔ sóg ag tatǔn kǎtǔ mǔ, ag ga pē ra. Hā ra ag tóg isǔ ag mǔ vēnh jykre nǔm ja ēn mranh, hā kǔ sóg sir ag togvǎnh ja nī,” he tóg, ěg jóg mág ti.

¹⁰ “Hā ra sóg vāhā ag mǔ vēnh jykre tǔg han sór mǔ,

povo tỹ Israel ag mỹ, ha mẽ,” he tóg, ãg jóg mág ti. “Ăjag krĩ tỹ ag tóg isỹ ag jyvẽn mũ ãn ki kanhrãn ke mũ, kỹ ag tóg han sór ke mũ gé, ti tỹ ag fe kãkã nĩn kỹ. Ag Topẽ vỹ tỹ inh nĩnh mũ, kỹ ag tóg tỹ inh krẽ nỹtĩnh ke mũ gé, ãn kã.

¹¹ Kỹ ù tóg ã mré ke ag kanhrãn mãn ke tũ nĩ ha. “Ëg jóg mág vỹ ge nĩgtĩ, ge ti nĩgtĩ,” he mãn ke tũ ag nỹtĩ ha, jagnẽ mỹ. Ag kar vỹ inh ki kanhró nỹtĩnh mũ, ãn kã, ùn kãsir ag, ùn mág ag ke gé, ãn kã.

¹² Ag tỹ inh vỹ mranh mũ (hã) ra sóg ge ra ag jagãgtãn ke mũ. Vẽn h pãte fón jé sóg ke mũ, ag tỹ inh vỹ mranh ja ãn ti,” he ja tóg nĩ, Topẽ ti.

¹³ Kỹ, Topẽ tỹ vẽn h jykre tãg han kỹ vẽn h jykre ve ãn vỹ ti mỹ tỹ vẽn h jykre si nĩ sir. Hã ra nén (ũ) si kar ãn vỹ kejẽn tũ' henh ke mũ, kãnhmar.

9

Vãsỹ Topẽ jykre mré ùri Topẽ jykre

¹ Topẽ tỹ ag mỹ vẽn h jykre ve ãn nĩm kỹ tóg ag mỹ ag tỹ nén han ke ãn kãmén ja nĩ. Ag tỹ ti jo ãn han tó ja ti nĩ, kar kỹ tóg ag tỹ ti jo ãn krẽm ti mré vémén ke tó ja nĩ gé, ag tỹ ti mỹ nén (ũ) pũn ke ti ke gé.

² Kỹ ag tóg kur tỹ ãn ãn han, ti tỹ tỹ Topẽ jo ãn jẽ jé. Hã ra tóg vẽn h kãpãm kỹ nĩ, kur tỹ ke gé, kỹ ag tóg ãn vãfynyn ki jun vén mũ ãn to ag tóg: “Topẽ mré vỹ jafã,” he tĩ. ãn tá mesa kri vela tỹ kri vin jafã vỹ jẽ, kar kỹ mesa ti ke gé, mesa tỹ kri pão vin jafã ãn.

³ Tag pãte tóg kur nĩ, jãnkã tỹ kur, kỹ kur ãn pãte ãn vãfynyn ù vỹ nĩ gé, ùn sĩ. ãn to ag tóg: “Topẽ nĩg jafã,” he tĩ, ãn vãfynyn ãn to.

⁴ Tá tóg Topẽ mỹ kri nén (ũ) pũn jafã nĩ, ouro tỹ há ti. Kri ag tóg nén ù ger há pũn tĩ, ouro ãn kri. Kar kỹ Topẽ caixa vỹ tá nỹ gé. Ti to tĩr hã vỹ tỹ ouro nĩ. Caixa ãn kãkã ouro tỹ pẽnky vỹ nĩ, kỹ kanhkã tá vẽn h vỹ pẽnky ãn ki nĩ, Topẽ tỹ ag mỹ pão jẽnẽ ãn ti, ag tỹ ga kórég kri mũn kỹ. Kar kỹ Arão vãtó vỹ kã nỹ gé, ti kãtó ti, kãtó féj mũ ãn ti. Caixa ãn kãkã tóg nỹ nĩ, vãtó ãn ti. Kar kỹ Topẽ tỹ Moisés mỹ vẽn hrã nĩm ja ãn vỹ kãki nỹtĩ gé, caixa ãn kãki. Pó régre ki tóg rãnrán ja nĩ, Moisés ti, Topẽ tỹ ãg jyvẽn mũ ãn ti. Pó régre ãn tóg caixa kãki nỹtĩ gé.

⁵ Caixa ãn kri tóg nỹtĩ, Topẽ tỹ jẽgnẽ jafã régre ag kãggrã, querubim he mũ ãn, ù tỹ Topẽ rĩnja tá nỹtĩ ãn. Fẽr ag nỹtĩ, kỹ ag fẽr tóg krỹg he kỹ nỹtĩ. Ag fẽr fẽnja krẽm Topẽ vỹ ãg mỹ vẽn h pãte fón tĩ, ãg tỹ ti vỹ mranh ja ti. Hã ra sóg tag kãmén kãn sór tũ nĩ ver.

⁶ Kỹ tóg vãfynyn régre nĩ, ãn tỹ kur ãn ti, Topẽ tũ ãn ti. Ti vãfynyn ve ki ag tóg kãra ge tĩ, Topẽ tũ ki rĩr tĩ ag, kurã kar ki. Tá ag tóg ãjag rãnhrãj ti han tĩ.

⁷ Ti vãfynyn ù ãn tá tóg kãra rã pin' he tĩ, prỹg kar ki, ag to pã'i mág ti, ti tãvĩ. Ag mẽg kyvẽn h ma tóg tĩ tĩ, Topẽ mỹ ven jé, Topẽ tỹ ti mỹ vẽn h pãte fón jé, povo kar mỹ ke gé, ag tỹ Topẽ vỹ mranh ja ãn ti, ag tỹ

mranh sór tũ ra mranh ja ěn ti.

⁸ Topě kuprīg vỹ ěg mỹ kāmén mũ, ũri, vĕnh jykre si ěn ti. Kur tỹ ĩn vāfyryn vỹ ge nĩ, ha mẽ. Ti vāfyryn ve ěn tỹ ver ĩn krĕm nĩn kỹ ěg tóg ti vāfyryn ũ tá jun ke tũ nĩ ver, Topě nĩgjafā tá.

⁹ Ěg tỹ ũri vég mũ tag ki kanhrān jé, hā jé Topě tóg vĕnh jykre tag han ja nĩgtĩ, ěg tỹ to comparaçāo han jé. Topě jo ĩn ěn tá ag tóg Topě mỹ nĕn ũ pũn tĩ, kỹ ag tóg ag mẽg ti tānh kỹ pũn tĩ gé. Ag tỹ Topě mỹ sĩnvĩ nỹtĩ sór vĕ, hā jé ag tóg ti mỹ nĕn (ũ) pũn tĩ. Hā ra ag tóg ti mỹ pũn mũ ra (ag tóg ti mỹ) sĩnvĩ tũ nỹtĩ, ag jykre tỹ ver kórég nĩn kỹ.

¹⁰ Kỹ, ag tỹ ti mỹ pũn há han jé ag tóg vĕnh jykre tỹ ge han tĩ gé, ha mẽ: vĕjĕn to ag tóg jykrĕn tĩ, kỹ ag tóg vĕjĕn ũ to: “tag konh ke tũ ěg nĩ, tag kron ke tũ ěg nĩ,” he tĩ, ti tỹ ag mỹ tó kỹ nĩn kỹ. Kỹ ag tóg goj tỹ vĕnh kygpe tỹ hĕn ri ke han han tĩ gé. Tag ki vĕnh jykre kar vĕ, ěprā. Kỹ Topě tỹ vĕnh jykre tåg han kỹ ěn vỹ tóg tũ' he mũ sir.

¹¹ Vāhā Cristo vỹ hur kātīg, kỹ tóg tỹ ěg jagfy Topě tũ ki rĩr to pā'i mág nĩ ha, kỹ tóg ěg kren pĕ han mũ. Ti tỹ Topě jo ĩn kāra rā vỹ ĩn si ěn mág kāfór nĩ gé. Há tāvĩ ti nĩ, Jesus tỹ hĕ tá Topě tũ ki rĩr nĩ ěn ti. Ěprā ke tỹ ĩn há pijé', tag ki ĩn pijé', kanhkā tá ke vĕ.

¹² Kỹ, Jesus tỹ ěn kāra rā kỹ tóg rā pir han, Topě nĩgjafā pĕ ěn kāra, Topě tỹ ěg mỹ vĕnh pāte fón jé. Kỹ tóg, ā tỹ kāra rā

kỹ ti pi(jé) ag mẽg kyvénh ma vyr', cabrito ěn, monh tāgy ěn. Ā kyvénh hā tỹ tóg ěg kren pĕ han, Jesus ti.

¹³ Ũ ter kỹ ũ tỹ ti va mũ mũ ěn ag vỹ, ag tỹ Topě jo ĩn kā ra ge sór kỹ ag vỹ Topě tũ ki rĩr tĩ ag mỹ: “ha ěg to tỹ kó kó hé, ěg mẽg kyvénh tỹ,” he tĩ. Ag tỹ ag to tỹ kó kó he kar kỹ ag tóg jānhkri nỹtĩ sir, ag tỹ cabrito kyvénh tỹ ag to tỹ kó kó hen kỹ, ke tũ nĩn kỹ monh kyvénh tỹ, ke tũ nĩn kỹ monh fi pũr tỹ mrĕj tỹ. Ag tỹ ag jānhkri han jan hā vĕ.

¹⁴ Hā ra Cristo vỹ ā kyvénh hā tỹ ěg jānhkri pĕ han. Topě kuprīg tỹ ti krĩn kỹ tóg Topě mỹ vĕnh fĕg, Cristo ti. Kygnĕ ja tũ pĕ ti nĩ, hā kỹ tóg há kar nĩ, ti tỹ vĕnh fĕg kỹ. Ti kyvénh vỹ ěg jānhkri pĕ han mũ, ěg jykre mré tóg ěg kuryj han mũ, kỹ ěg tóg vĕnh jykre kórég han mǎn ke tũ nĩ sir, ěg tỹ ěg jykre si tugrĩn ter ke mũ ěn ti. Vāhā ěg tóg Topě tũ han há nĩgtĩ, ũn rĩr nĩ ěn tũ ti.

Cristo tỹ ěg mỹ vĕnh jykre tåg ma kātīg

¹⁵ Hā kỹ Cristo vỹ ěg mỹ vĕnh jykre tåg ma kātīg. Ter ja tóg nĩ, Topě tỹ ěg mỹ vĕnh pāte fón jé, ěg tỹ ti jykre ve mranh ěn ti. Ti ter kar kỹ Topě tóg ũ ag kuprĕg huri, ag tỹ Topě tỹ kanhkā tá ěg mỹ nĕn ven ke ěn ki kanhrān jé. Jesus tỹ ěg mỹ han hā vĕ.

¹⁶ Kejĕn ũ tóg ā ter ke to hā: “iser kar kỹ ěn vỹ isũ tag mǎn ke mũ, ũ ěn vỹ isũ ũ mǎn ke mũ gé,” he tĩ. Rán tóg tĩ, tag, kỹ tóg tógfīg tĩ, vĕnh rá ti. Kỹ

ag tóg ag tỹ vėnh rá ěn ve sór mũ ra ag tóg ti ter kar kỹ hã vėg tĩ.

17 Ti tỹ ver ter tũ nĩn kỹ ag tóg vėnh rá ěn venh ke tũ nĩ. “Iser kar kỹ,” he tóg, hã kỹ ũ tóg ver ti tũ mǎg tũ nĩ, ti tỹ ver ter tũ nĩn kỹ, ũ tỹ rán mũ ěn ti.

18 Ri ke ti nĩ, Topě tỹ ěg mỹ vėnh jykre nĩm ja ěn ti, ti si mré hã. Ag měg ter kar kỹ ke ja vė.

19 Hã kỹ Moisés vỹ povo kar mỹ Topě tỹ ti mỹ nén tó ja ěn kāmén, Topě tỹ nén to ag jyvėn mũ ěn ti. Ti tỹ ag mỹ kāmén kar kỹ tóg monh tǎgy tǎnh kỹ ti kyvénh mǎn ja nĩ, cabrito tǎnh kỹ ke gé. Goj mǎn kỹ tóg ki kujėn ja nĩ gé, kỹ tóg tỹ kujǎjǎg mũ, goj mré tóg ti kujǎjǎg mũ sir, carneiro kyki kusũg mré hã tóg tỹ kujǎjǎg mũ sir, re no fej mré hã. Kỹ tóg livro kri tỹ kó he mũ, to tỹ krig ke tóg mũ gé, povo kar to tóg tỹ kó kó he mũ gé, ag tỹ jǎnhkri kỹ nỹtĩ jé.

20 Ag to tỹ krig ke kar kỹ tóg ag mỹ: “Topě tỹ ěg mỹ nén han ke mũ to vėnh kyvénh hã vė,” he mũ, “Topě tỹ ěg mỹ vėnh jykre nĩm mũ to vėnh kyvénh hã vė,” he tóg mũ, Moisés ti.

21 Kar kỹ tóg ĩn tỹ kur to tỹ krig ke mũ gé, pėnky kar to tóg tỹ kó he mũ gé, ag tỹ Topě tũ han jafǎ kar to. Vėnh kyvénh ěn tỹ tóg kri tỹ kó he kǎn mũ, ag kar jǎnhkri nỹtĩ jé.

22 Ha vé, ag tỹ vǎsỹ Topě jykre ěn ki nén ũ tỹ jǎnhkri' he sór kỹ ag tóg nén ũ kyvénh hã tỹ jagně jǎnhkrig tĩ. Pir ti

nĩ, ag tỹ nén ũ kyvénh tũ ra tỹ jǎnhkri' ke mũ ti. Hã kỹ ěg tóg ki kanhró nỹtĩ. ěg tỹ Topě vỹ mranh kỹ tóg ěg mỹ ěg měg ter hã tigrĩn vėnh pǎte fón ja nĩgtĩ, vǎsỹ vėnh jykre ěn ki.

Cristo tỹ ěg jagfy ter pir han

23 Vėnh jykre ěn vỹ kanhkǎ tá vėnh jykre ri ke sĩ nĩ, hã kỹ vėnh měg kyvénh vỹ nén kar ěn jǎnhkri han ja nĩgtĩ. ěg tỹ hã ra kanhkǎ ve jé tóg há tũ nĩ, ěg měg tỹ ěg jagfy ter mũ ti. ěg měg vỹ ěg tỹ kanhkǎ tá jun han ki kagtũg nĩ.

24 Cristo hã vỹ ěg tỹ tá jun han ke mũ. Kỹ tóg ěprǎ ke tỹ Topě jo ĩn kǎra rǎ ja tũ nĩgtĩ gé, kanhkǎ jykre ri ke sĩ ěn kǎra rǎ ja tũ ti nĩ. Kanhkǎ pě ra tóg vyr, kỹ tóg Topě rĩnja tá nĩ nĩ, Topě mré vėmén jé, ěg jagfy.

25 Kỹ ěprǎ ke ěn tóg ěprǎ Topě tũ ki rĩr tũ to pǎ'i mǎg ěn tóg prỹg kar ki ag tỹ ĩn vǎfynyn to: Topě nĩgjafǎ, he mũ ěn kǎra tóg rǎ tĩ, ag měg kyvénh mǎn kỹ tóg ra rǎ tĩ. Hã ra Cristo vỹ vėnh fěg pir han.

26 Ti tỹ prỹg kar ki vėnh fěg mũ ra tóg ter tỹ hėn ri ke han ke vė vė, Topě tỹ ga han kar kỹ. Hã ra tóg vǎsỹ vėnh ven ja tũ nĩ. Ūri, kurǎ tỹ ěgno to hã tóg vėnh ven pir han, kỹ tóg vėnh fěg pir han, ěg tỹ Topě vỹ mranh ěn tỹ tũ' he jé, ǎ ter tigrĩn.

27 ěprǎ ke ag vỹ ter pir han tĩ gé. ěg ter kar kỹ Topě vỹ ěg jykre tugnỹm ke mũ.

28 Tag ri ke ti nĩ, Cristo tỹ vėnh fěg mũ ti. Vėnh fěg pir han tóg, ǎ tỹ ũn e tỹ Topě vỹ

mranh tỹ tũ' he jé. Kejën tóg kătĩg măn ke mũ. Hã ra tóg ẽg tỹ Topẽ vĩ mranh ja tigrĩn ter măn ke tũ nĩ, ti kătĩg măn kỹ. Ẽg jé prẽr jé tóg kătĩg ke mũ, ti tỹ ù tỹ ti kătĩg jāvãnh mũ ag jé prẽr jé.

10

¹ Ẽg tỹ Judeu ag jykre ve kỹ ẽg tóg ve sĩ han tĩ, Topẽ tỹ ẽg mỹ nén han sór mũ ti. Prỹg kar ki ag tóg Topẽ mỹ tãnh kỹ pũn', tãnh kỹ pũn' he tĩ. Hã ra ag mẽg tỹ ag jagfy ter mũ ra tóg ag jykre há han ki kagtĩg ja nĩgtĩ.

² Ag tỹ Topẽ mỹ nén (ũ) pũn mũ ra ag tóg Topẽ vĩ mranh măn', mranh măn' he tĩ. Ag tỹ mranh tũ nĩ ra ag tóg ti mỹ pũn măn ke tũ nĩ vễ, ti tỹ ag mỹ vễnh pãte fón jé. Hã ra ag tóg ki kanhró nỹtĩ, ag tỹ ti vĩ mranh tĩ tag, hã kỹ ag tóg ti mỹ nén pũn tovãnh tũ pẽ nĩgtĩ, ti tỹ ag mỹ vễnh pãte fón tovãnh tũ nĩ jé.

³ Prỹg kar ki ag tóg Topẽ mỹ pũn tigrĩn (ag tóg) ag tỹ ti vĩ mranh ja ẽn mĩ ẽkrég tĩ.

⁴ Hỹ, monh kyvénh vỹ ẽg tỹ Topẽ vĩ mranh tỹ tũg' henh ke tũ pẽ nĩ, cabrito tỹ ẽg jagfy ter mũ ẽn ti ke gé.

⁵ Hã kỹ Cristo tóg, ã tỹ ga kri mur ken kỹ (tóg) Topẽ mỹ: “ag tỹ ãjag mẽg tãnh kỹ pũn mũ ra tóg tỹ nén ù tũ nĩ ã mỹ,” he ja nĩ. “Ag tỹ ã mỹ nén ù ù pũn mũ ra tóg ã mỹ tỹ nén ù tũ nĩ gé. Hã ra ã tóg inh mỹ inh fár ti nĩm, isỹ ag jagfy ter jé.

⁶ Ag tỹ ã mỹ ag mẽg pũn mũ ra tóg ã mỹ sér tũ nĩ, ag tỹ ã mỹ

nén ù ù pũn mũ ra. Ag tỹ ã vĩ mranh tag tỹ tũ' he ki kagtĩg tóg nĩ, ag tỹ ã mỹ nén pũn mũ tag.

⁷ Hã kỹ sóg ã mỹ: “ha vé, sỹ ã mỹ vễnh fẽg ke vễ,” he mũ, “isỹ ã tỹ inh ki nén ve sór mũ ẽn tỹ ã mỹ han jé,” he sóg mũ. Hã kỹ tóg rán kỹ nĩ, iso, ã vĩ rá ki,” he tóg, Cristo ti, Topẽ mỹ.

⁸ Ti mỹ tóg tag tó vén, ha mẽ. “Ag tỹ ãjag mẽg tãnh kỹ pũn mũ ra tóg tỹ nén ù tũ nĩ ã mỹ. Ag tỹ ã mỹ ãjag mẽg pũn mũ ra tóg ã mỹ sér tũ nĩ, ag tỹ ã mỹ nén ù ù pũn mũ ra. Ag tỹ ã vĩ mranh tag tỹ tũg' he ki kagtĩg tóg nĩ, tag,” he vén tóg. Hã ra tóg rán kỹ nĩ, Judeu ag tỹ Topẽ mỹ tag pũn jé. Ge ra Jesus tóg tag to: “nén ù tũ vễ,” he ja nĩ.

⁹ Tag tó kar kỹ tóg Topẽ mỹ: “ha vé, sỹ ã mỹ vễnh fẽg ke vễ, isỹ ã tỹ inh ki nén ve sór mũ ẽn tỹ ã mỹ han jé,” he mũ gé, Topẽ mỹ. Ẽ tỹ tag tó kỹ tóg vễnh jykre si ẽn tỹ tũ' he mũ, ùn tãg han jé.

¹⁰ Jesus tỹ Topẽ vĩ ki króm ja tigrĩn ẽg tóg ùri tỹ Topẽ krẽ nỹtĩ ha. Jesus Cristo vỹ ẽg jagfy ter ja nĩ, vễnh fẽg kỹ. Ti ter pir ki tóg ẽg név(e) kajãm kãn, kỹ Topẽ tóg ẽg mỹ vễnh pãte fón kãn mũ sir.

¹¹ Ẽprã ke ag tỹ Topẽ tũ ki rĩr tĩ ag vỹ kurã kar ki ãjag rãnhraj han tĩ, Topẽ tũ ki rĩr jé. Kurã kar ki ag tóg Topẽ mỹ ãjag mẽg tãnh kỹ pũn tĩ, hã ra ag tỹ Topẽ mỹ nén pũn mũ ẽn pí(jé) ag tỹ Topẽ vĩ mranh tỹ tũ' he ja nĩgtĩ.

¹² Ag jãvo Jesus Cristo vỹ vễnh fẽg pir han, ã ter tigrĩn

tóg ãg tỹ Topẽ vĩ mranh ẽn tỹ tũ' he kãn. Tag han kar kỹ tóg Topẽ pẽgja tá nĩ nĩ.

13 Tá tóg nĩ nĩ. Topẽ vỹ ti kato vãsãnsãn mũ ag tỹ ti pẽn krẽm vin ke mũ. Ag sigse kỹ nỹtĩ to ken hã vẽ. Tag hã jãvãnh tóg nĩ nĩ, Jesus ti.

14 Ti tỹ vẽn h fẽg pir ẽn tugrĩn tóg Topẽ krẽ kar ag krenkren han kãn huri, kỹ ãg Topẽ mỹ sĩnvĩ nỹtĩ.

15 Topẽ kuprĩg vỹ ãg mỹ tag tó tĩ gé. Tag tó tóg mũ, ha mẽ.

16 “Tag pãte sóg ag mỹ vẽn jykre tãg han ke mũ,” he tóg, ãg jóg mág ti. “Vẽn jykre tãg ẽn hã vẽ, ha mẽ. Isỹ nẽn to ag jyvẽn mũ ẽn tỹ sóg ag fe kãkã nĩm ke mũ, kỹ tóg sỹ ag krĩ ki rãn ri ke nĩnh mũ sir, kỹ ag tóg han sór ke mũ,” he tóg.

17 Tag tó kar kỹ tóg tag tó gé, ha mẽ. “Ag tỹ inh vĩ mranh ja ẽn mũ ẽkrẽn mãn ke tũ inh nĩ ha, ag jykre pãno ẽn mũ ẽkrẽn mãn ke tũ pẽ inh nĩ ha,” he tóg mũ gé.

18 Ha vé, Topẽ tỹ ãg mỹ vẽn pãte fón kỹ ãg tóg ti mỹ nẽn ù pũn mãn ke tũ nĩ ha, ti tỹ ãg mỹ vẽn pãte fón kãn kỹ nĩn kỹ, ãg tỹ ti vĩ mranh ja kar ẽn ti.

Ãg tỹ Topẽ to krónh ke tũ

19 Inh kanhkã, Jesus tỹ ãg jagfy ter tugrĩn ãg tóg jatun mỹ Topẽ nĩgãfã tá jun ke mũ.

20 Jesus tỹ ãg jagfy ter ẽn tóg ti tỹ kur tỹ jãnkã ẽn fĩn rãm ri ke nĩ, ãg tỹ ti nón fĩn rãm ri ke han jé, ãg rĩnrĩr nỹtĩ jé. Topẽ jo ãn krẽm kur tỹ jãnkã nĩfe ẽn vỹ jaran ke kỹ sa nĩ, Jesus ter

kỹ. Kỹ ãg tóg rã genh há nỹtĩ ha.

21 ãg jagfy Topẽ tũ ki rĩr tĩ to pã'i mág vỹ nĩ nĩ, hã vỹ: Jesus, he mũ. Topẽ jamã tá ke ẽn ag kar kri ke vỹ tỹ ti nĩ.

22 Kỹ jatun mỹ Topẽ mrẽ vẽnẽn nĩ. Ti ki rã há han nĩ, ãjag fe tỹ ti ki gemnĩ, ãjag tỹ ti nĩgãfã tá junjun jé. Ón kỹ ti ki ge sór tũg nĩ. ãg jãnhkri han tóg, ãg jykre pãno kar tỹ tóg tũ' hé, ãg tỹ to jykrẽn mãn tũ nĩ jé. ãg tỹ jãnhkri han tóg, ãg tỹ goj jãpri tỹ vẽn kype ẽn ri ke, kỹ ãg há nỹtĩ.

23 Ti tỹ ãg mỹ nẽn tó mũ ẽn mũ ẽkrẽn nĩ, to krónh ke tũg nĩ, sỹ ãjag mỹ nẽn tó mũ ẽn to. Ve jé ãg tóg ke mũ, ti tỹ ãg mỹ nẽn tó mũ ẽn ti. Û tỹ ãg mỹ tó ja ẽn vỹ ón vãn h nĩgtĩ, hã kỹ to krónh ke tũg nĩ.

24 Jagnẽ mũ ẽkrẽn nĩ, ãjag tỹ jagnẽ jyvẽn jé. “Vẽn kar to há nĩmnĩ,” hemnĩ jagnẽ mỹ. “Nẽn ù há kar han nĩ,” hemnĩ gé jagnẽ mỹ.

25 Û ag tóg culto venh kãmũ vãn h nỹtĩgtĩ. Tag han tũg nĩ. Culto venh kãmũmnĩ. Kỹ jagnẽ jyvẽn nĩ, ãjag tar nỹtĩ jé. Kakó ti nĩ, ti kãtĩg mãn ke kurã ti. Ve há ti tĩ ha, tag.

26 Ha vé, Topẽ vĩ mẽ kãn ãg huri. ãg tỹ ti ki rã kar kỹ culto venh kãtĩg tũ nĩ' hen kỹ, ãg tỹ ge ra Topẽ vĩ mranh sór kỹ mranh tĩ kỹ tóg ù tỹ ãg jagfy kajãm mãn ke tóg tũ tĩ.

27 Hỹ, ãg tỹ mranh sór kỹ mranh kỹ Topẽ vỹ ãg vóg kónãn pẽ han ke mũ. Pĩ tỹ tóg ag tỹ tũ' henh ke mũ, Topẽ ti, ù tỹ ti kato vãsãnsãn mũ ag.

28 Ū tỹ Moisés tỹ ěg jyvĕn mũ ěn mĕ jāvānh nĩ ěn tĕn ja ag tóg nĩgtĩ, Israel ag, ũn régre ag tỹ ti jykre pāno ve ja tag tugrĩn, ke tũ nĩn kỹ ũn tāgtũ ag. Ti jagāgtān ja tũ ja ag nĩgtĩ, ũn jykre pāno ěn.

29 Hā ki ěg tóg vég mũ, Topĕ tỹ ěg vóg kónān pĕ han ke mũ ti, ěg tỹ Topĕ kósin to é he kỹ, ěg tỹ ti vĩ mranh sór kỹ. ěg tỹ mranh sór kỹ ěg tóg ti kyvĕnh to é he tĩ, ti jykre to. Ti tỹ ěg jānhkri han ja ěn to é he ěg tóg tĩ sir. ěg mỹ tóg tỹ nĕn ũ tũ nĩ sir, Topĕ kuprĩg tỹ ěg jagāgtān ja ěn ti. Ū tỹ tag han mũ vóg kónān jé tóg ke mũ, Topĕ ti, ha vemnĩ.

30 Hā kỹ tóg tag tó, ha mĕ: “ũn jykre pāno ag vóg kónān jé sóg ke mũ, ag tỹ kajām jé, ag tỹ nĕn ũ kórég han mũ kar,” he tóg, Topĕ ti. Ū tỹ tag tó mũ ki kanhró ěg tóg nĩ mỹr. Hā ra tóg tag tó gé, ha mĕ. “Á mré ke ag jykre tugnỹm jé tóg ke mũ, ěg jóg mág ti,” he ja tóg nĩ gé.

31 Rĩr ti nĩ, Topĕ ti. Ti tỹ ěg to jũ nĩn kỹ tóg jagy tāvĩ tĩ, nĕn ũ jagy kar káfór ti nĩ.

Ěg tỹ to tar nỹtĩnh ke

32 Ājag tỹ vāsỹ ti mỹ vĕnh fĕg vĕn ja ěn kurā mĩ ěkrĕn nĩ. ěn kā ag tóg ājag kato vāsānsān mág, kỹ ājag tóg ag to vĕsỹrĕnh, kysā tỹ hĕn ri ke ki, ājag tỹ Topĕ vĩ mĕ vĕn ěn kā. Hā ra ājag tóg to krónh krónh ke ja tũ nĩgtĩ.

33 Ājag kā ũ to ag tóg vĩ kónān mág' he ja nĩgtĩ, ěn kā, Topĕ kato vāsānsān mũ ag, kỹ ag tóg ājag vóg kónān gé, hā

ra vĕnh kar vỹ vé, ag tỹ ājag vóg kónān ja ti. Ājag kā ũ vóg kónān ja ag tóg nĩgtĩ, kỹ tóg ājag kar mỹ jagy tĩ ja nĩgtĩ, ag mré, ājag tỹ tỹ ag mré Jesus ki ge nỹtĩn kỹ.

34 Kỹ ag tóg ājag kā ũ sigse ja nĩ gé. Kỹ ājag tóg ũn sigse kỹ nỹtĩ ěn ag jagāgtān ja nĩgtĩ, ag tỹ ājag mré Jesus ki ge kỹ nỹtĩ kỹ. Pā'i ag tỹ ājag tỹ nĕn gég mũ ra tóg ājag mỹ sér nĩ ja nĩgtĩ. Ājag tỹ kanhkā tá nĕn ũ há tāvĩ ěn venh ke hā mĩ ājag tóg ěkrĕn ja nĩgtĩ, ag tỹ ājag tỹ nĕn génh kỹ, Jesus tugrĩn. Ājag tỹ kanhkā tá nĕn venh ke ěn vỹ tũ' hĕnh ke tũ pĕ nĩ.

35 Kỹ ũri to krónh ke tũg nĩ gé. Ājag tỹ ti to tar nỹtĩn kỹ ājag tóg nĕn ũ há tāvĩ venh ke mũ, ha mĕ. Ājag vĕsỹrĕnh ja ěn kaja ri ke ve jé ājag tóg ke mũ.

36 Ěg tỹ ti tũ han to tar nỹtĩnh ke vĕ, ěg tỹ ti tovānh ke tũ pĕ nỹtĩnh ke vĕ. Tag hā vỹ há nĩ. Kỹ ājag tỹ Topĕ tỹ ěg mỹ nĕn tó mũ ěn han kān kỹ nỹtĩn kỹ ājag tóg venh ke mũ, ti tỹ ěg mỹ nĕn (ũ) ven ke mũ ěn ti.

37 Hā kỹ tag vỹ rán kỹ nĩ, Topĕ vĩ rán ki, ha mĕ: “kānhmar pĕ ti jun ke mũ, ũn kātĩg ke mũ ěn ti. Kātĩg mé han jé tóg ke mũ, ha vemnĩ.

38 Kỹ ũ tỹ inh ki ge kỹ nỹtĩ ěn ag hā vỹ krenkren ke mũ, inh mré ke ěn ag, isỹ ũn mỹ vĕnh pāte fón mũ ěn ag. Jāvo ũ tỹ isovānh mũ ěn vỹ inh mỹ kórég nĩnh mũ,” he tóg, Topĕ ti.

39 Ěg pi(jé) ti tovānh ke mũ', kỹ ěg tóg ũ tỹ ti tovānh mũ ěn

ag vāgfor ěn ri ke han ke tũ nĩ gé. Ti ki rā kŷ ěg tóg nŷtĩ, hã kŷ ěg krenkren ke mũ.

11

Ů tŷ ěg jo Topě ki ge kŷ nŷtĩ ag

¹ Topě ki rā to ken hã vĕ, hã vŷ: ti tŷ ěg mŷ nĕn tó mũ ěn kri nĩm, he mũ. Ti tŷ nĕn ũ to: “ve jé ājag tóg ke mũ,” he mũ ěn kri fi jé ěg tóg ke mũ, ěg tŷ ver vég tũ ra.

² Ti si ag vŷ kri nĩm kŷ ti ki ge ja nĩgtĩ gé. Hã kŷ ag tóg Topě mŷ tŷ ũn há ja nŷtĩgtĩ, vāsŷ ke ag, ha mẽ.

³ ěg tŷ Topě ki rā kŷ ěg tóg ki kanhró nŷtĩ, ti tŷ ā vĩ tŷ ěg tŷ nĕn vég mũ kar hyn han ja ti. Ti vĩ vég tũ ěg tóg nĩgtĩ, kŷ tóg ěg tŷ nĕn vég tũ tŷ tóg ěg tŷ vég mũ hyn han ja nĩgtĩ, Topě ti, ā vĩ tŷ tóg nĕn kar hyn han ja nĩgtĩ.

⁴ Kŷ Abel vŷ Topě ki rā kŷ nĩ ja nĩgtĩ gé, hã kŷ tóg Topě mŷ pũn há han, ti tŷ ti mŷ ā mẽg pũn kŷ. Jāvo ti kãke tŷ Caim vŷ ti ki rā ja tũ nĩ, kŷ tóg Topě mŷ nĕn ũ pũn tĩ (hã) ra (tóg) ti mŷ pũn kónãn. Abel tŷ Topě ki rā kŷ tóg Topě mŷ pũn há han ja nĩ, Abel tŷ ti mŷ pũn mũ ěn ti. Topě tŷ Abel to: “inh mŷ tóg tŷ ũn jykre kuryj nĩ,” he ja vĕ, hã kŷ ti tũ tóg pũr há han. Ter ti huri, Abel ti, hã ra ěg tóg ti tŷ nĕn han ja tugrĩn Topě ki ge ki kanhrãn mũ sir.

⁵ Enoque vŷ Topě ki rā kŷ nĩ ja nĩgtĩ gé, hã kŷ Topě vŷ ti jé prĕr, ti tŷ kanhkã ra tĩg jé, ti rĩr ra, ti ter tũ ra. Ti ve mãn tũ ag tóg, Topě tŷ ti jé prĕr kar kŷ, hã ra tóg ā ter tũ ra kanhkã

ra vyr. Topě tŷ ti jé prĕr to hã tag vŷ ti to rán kŷ nĩ Topě vĩ tŷ rán kŷ nĩ ki, ha mẽ: “Topě tŷ ti jykre ve kŷ ti fe tóg mrin ke mũ,” he ja ti nĩ, Enoque to.

⁶ ěg tŷ Topě ki ge tũ nŷtĩn kŷ tóg ěg to há nĩnh ke tũ nĩ, Topě ti. ěg tŷ Topě ra mũ sór kŷ ěg tóg tag to jykren ke mũ, ha mẽ. “Topě vŷ nĩ,” he jé ěg tóg ke mũ. Kŷ ěg tóg ti to: “ěg tŷ ti to mũ kŷ tóg ěg mŷ nĕn ũ há ěn nĩm ke mũ, ti tŷ ěg mŷ nĕn tó ja ěn ti,” henh ke mũ gé. Tag tó kŷ ěg tóg ti to mũnh ke mũ, kŷ tóg ěg mŷ han ke mũ, ha vemnĩ.

⁷ Noé vŷ Topě ki rā kŷ nĩ ja nĩgtĩ gé, hã kŷ Topě vŷ ti mŷ tó ja nĩ, ag kar tŷ kar kŷ ti jagy venh ke ti, hã vŷ: ta kutĕ, he mũ. Kŷ tóg Topě vĩ kri fi kŷ canoa mág ěn han mũ, kŷ tóg han kãn kar kŷ (tóg) ki rā kŷ (tóg) kren mũ, ti prũ fi mré, ti krĕ mré ke gé. Topě ki rā kŷ tóg ũ tŷ Topě kato vāsãnsãn mũ ag mré tĩg mãn ja tũ nĩ. Hã kŷ Topě vŷ ti mŷ ũn jykre kuryj ag tŷ nĕn venh ke ěn ven, ti tŷ ũ tŷ ti ki rā kŷ nŷtĩ ag mŷ nĕn ven ke ěn tĩ.

⁸ Abraão vŷ Topě ki rā kŷ nĩ ja nĩgtĩ gé, hã kŷ tóg Topě vĩ kri nĩm ja nĩgtĩ. Topě tóg ti mŷ: “ha tĩg,” he mũ, kŷ tóg tĩg ja nĩ, ga ũ ra, Topě tŷ ti mŷ ga nĩm ke mũ ěn ra. Ā tŷ ki kagtĩg ra tóg ra tĩg ja nĩ. Ā jamã tá kãkutĕ kŷ tóg ā tŷ ki kagtĩg ěn ra vyr, Abraão ti.

⁹ Topě ki rā kŷ jé kŷ tóg ga ěn mĩ tĩg ja nĩgtĩ. Topě tŷ ti mŷ ga ěn nĩm sór ja vĕ, hã ra tóg tŷ ā tũ tũ ra tóg mĩ tĩg ja nĩgtĩ,

tá. Kur tỹ ĩn krēm ěmãn kỹ tóg ga ěn mĩ tĩg ja nĩgtĩ, ti kósın tỹ İsaque mré, İsaque kósın tỹ Jacó mré ke gé. Tĩ krē'krē ag vỹ ti mré ga ěn venh ke ja nỹtĩ gé, hã kỹ Topě tóg Abraão mỹ tó ja nĩ, hã ra ag tóg ver vég tũ nĩ.

¹⁰ Ge ra tóg tovãnh ja tũ nĩgtĩ. Cidade tỹ Topě tũ ěn ve sór ja ti nĩ, ũ tỹ tũg ke tũ pě ěn. Topě hã vỹ cidade ěn han. To jykrén kỹ tóg han. Tĩ pi(jé) ěprã ke ag cidade ri ke nĩ'. Ěn ve sór kỹ tóg ti tovãnh ja tũ pě nĩ, hã kỹ tóg vé, Abraão ti.

¹¹ Sara fi vỹ Topě ki rã kỹ nĩ ja nĩgtĩ gé, hã kỹ fi tóg ã kófa pě ra (fi tóg) kufyg ja nĩgtĩ, Topě tỹ fag tỹ tag to tar han kỹ, Sara fi, fi mén tỹ Abraão mré. Ũ tỹ fag mỹ: “kósın ve jé ãjag tóg ke mũ,” he mũ ěn vĩ kri fi kỹ fag tóg ve ja nĩgtĩ.

¹² Hã kỹ ũn pir ěn, ũn kófa pě ěn krē'krē vỹ e tãvĩ nỹtĩ, krĩg e ěn ri ke, goj fyr mĩ rỹnhryj e ěn ri ke, goj kafã tũ fyr ěn mĩ rynhryj e ěn ri ke.

¹³ Topě ki ge kỹ nỹtĩn kỹ ag kãgter, Abraão, İsaque, Jacó. Topě vỹ ag mỹ ga ěn tó ja nĩ, hã ra ag tóg ve ja tũ nĩ ver. ãjag tỹ ve pě han tũ ra ag kãgter. Ve sĩ han ja ag tóg nỹtĩgtĩ, Topě tỹ ag mỹ ga tó ja ti, hã ra ag tóg ve pě han ja tũ nĩ kỹ tóg ag mỹ ěg tỹ kór há tá nén ũ vég mũ ri ke nĩ ja nĩgtĩ. Ag tỹ venh ke to tóg ag mỹ sér gy tĩ hã ra. “Tag ki, ga kri ěg tóg ũn pygsa mũ ěn ri ke han tĩ, ěg jamã vỹ tỹ tag ki ke tũ nĩ,” he ag tóg tĩ.

¹⁴ Ag jamã pě jãvãnh kỹ ag

tóg ga kri mũ ja nĩgtĩ, hã kỹ ag tóg: “ěg jamã pě tũ vě, tag ki,” he ja nĩgtĩ.

¹⁵ Ag pi(jé) ãjag jamã si ěn ra vỹn vỹn ke sór ja nĩgtĩ', hã kỹ ag tóg vỹn vỹn ke ja tũ nĩ.

¹⁶ Ěmã há pě ěn ve sór ja ag tóg nĩgtĩ, kanhkã tá. Hã kỹ ag tóg Topě mỹ há ja nỹtĩ, ti pi(jé) ag to mỹ'ãg ke mũ'. Hã kỹ tóg věso: “Abraão Topě, İsaque Topě, Jacó Topě vỹ tỹ inh nĩ,” he tĩ, Topě ti. Cidade han tóg, ag mỹ, kanhkã tá.

¹⁷ Abraão vỹ Topě ki rã kỹ nĩ ja nĩgtĩ gé, hã kỹ tóg İsaque nenh ja tũ nĩgtĩ. Topě mỹ tóg ti fěg, Topě tỹ ti mỹ ti kósın to vĩn kỹ. Tĩ kósın pir ja vě, hã ra tóg ti tãnh kren, Topě mỹ.

¹⁸ Topě tóg Abraão mỹ: “ã kósın tỹ İsaque krē vỹ e nỹtĩnh mũ,” he ja nĩgtĩ.

¹⁹ Kỹ tóg, ti tỹ ti tãnh kren kỹ tóg: “Topě hỹn ti rĩn mãn ki kanhró nĩ, isỹ ti tén kỹ,” he mũ. Hã kỹ tóg ti ve mãn gé. Tĩ tỹ ti tãnh kren kỹ tóg Topě mỹ ti tỹ ti tãnh ri ke nĩ ja nĩgtĩ, hã ra tóg ti ve mãn, Topě tỹ ti mỹ: “tĩ tãnh tũg ra,” hen kỹ.

²⁰ İsaque vỹ Topě ki rã kỹ nĩ ja nĩgtĩ gé, hã kỹ tóg Jacó mỹ vĩ há han, Esáu mỹ ke gé, ti tỹ ag mỹ ag tỹ nén venh ke ěn tó kỹ.

²¹ Jacó vỹ Topě ki rã kỹ nĩ ja nĩgtĩ gé, hã kỹ tóg ã ter ke to hã (tóg) José krē régre ěn ag mỹ vĩ há han gé. Kỹ tóg ã vátó to jě kỹ (tóg) Topě krēm mũg ke mũ, kỹ tóg Topě mỹ: “Topě vỹ tỹ ã nĩ,” he ja nĩ.

²² José vỹ Topě ki rã kỹ nĩ ja nĩgtĩ gé, hã kỹ tóg ã ter ke nỹ ra tóg ã ter ken jo (tóg)

Israel ag mÿ kāmén ja nĭgtĭ, ag krê'krê ag tÿ ga tÿ Egito tá kâpanh ke ên ti. Kÿ tóg ag tÿ kâpanh ke ên tó kÿ (tóg) ag mÿ to vĭ ja nĭ, ag tÿ ti kuka gé kāmũnh jé, ag kāmũnh ken kÿ.

23 Moisés han mÿ fag vÿ Topê ki ge kÿ nÿtĭ gé, hã kÿ fag tóg Moisés péju, ti mur kar kÿ, kysã tágtũ ki. Fag mÿ tóg sĭnvĭ nĭ ja nĭgtĭ, gĭr sĭ ti. Kÿ fag tóg pã'i mág kamêg sór ja tũ nĭ, pã'i mág tÿ: “gĭr gré ag kãgtén kãn nĭ,” he mÿ ra.

24 Moisés vÿ Topê ki rã kÿ nĭ ja nĭgtĭ gé, hã kÿ tóg, ã mog kar kÿ (tóg): “inh pi(jé) tÿ Faraó kósin fi kósin nĭ,” he ja nĭgtĭ.

25 Ti tÿ Topê povo ag mré jagtar nĭ ra tóg ti mÿ tÿ nén ũ tũ nĭ ja nĭgtĭ. Hã ra tóg Egito tá ke ag mré rico nĭ sór ja tũ nĭgtĭ. Topê vĭ mranh kÿ ag tóg ón kÿ rico nÿtĭ ja nĭgtĭ, Egito tá ke ag.

26 Êg tÿ Cristo tugrĭn jagtar nÿtĭ tag tóg ti mÿ êg rico nÿtĭ tag há kãfór nĭ ja nĭgtĭ, hã kÿ Egito tá ke ag rico tag tóg ti mÿ kórég ja nĭgtĭ, Moisés mÿ. Topê tÿ kanhkã tá êg mÿ nén ũ há nĭm ke ên hã to tóg jykrén ja nĭgtĭ.

27 Moisés vÿ Topê ki rã kÿ nĭ ja nĭgtĭ, hã kÿ tóg ga tÿ Egito tá kãkutê ja nĭgtĭ, pã'i jũ kamêg vãnh nĭn kÿ. Topê vég tũ êg tóg nĭgtĭ, hã ra tóg Topê hã ki êkrén kÿ nĭ ja nĭgtĭ. Ti vĭ tóg ti mÿ ti tÿ ti vég nĭ ri ke nĭ ja nĭgtĭ. Hã kÿ tóg krónh ke ja tũ nĭgtĭ, Moisés ti.

28 Moisés vÿ Topê ki rã kÿ nĭ ja nĭgtĭ, hã kÿ tóg Israel ag

mÿ festa tÿ Páscoa ên nĭm. Ag mÿ tóg: “ĭn jãnkã to tĭn, ovelha kyvénh tÿ,” he mÿ, “Topê tÿ jêñê jafã tÿ ãjag krê ve ag kãgtén tũ nĭ jé,” he ja tóg nĭgtĭ, Moisés ti, Israel ag mÿ. Hã kÿ ag tóg festa tÿ Páscoa ên han tĭ, ũri.

29 Israel ag vÿ Topê ki ge kÿ nÿtĭ ja nĭgtĭ gé, hã kÿ ag tóg goj kusũg he mÿ ên kã rêgrêg há han inhhã, êg tÿ ga kri mÿ ên ri ke han ag tóg. Mrinmrér ja tũ ag tóg nĭgtĭ. Egito tá ke ag tÿ ag nón kã rêgrêg sór mÿ ra tóg ag kri rũm ke mÿ sir, goj ên ti, kÿ ag tóg nÿgnÿr kÿ kãgter kãn mÿ sir.

30 Israel ag vÿ Topê ki ge kÿ nÿtĭ ja nĭgtĭ gé, hã kÿ cidade tÿ Jericó jy ró ên vÿ vêsóg ki kórég kãn ja nĭgtĭ. Ag tÿ pénĭn mÿ tÿ 7 (ke) han kar kÿ tóg vêsóg ki kórég ja nĭ, ag tÿ kurã tÿ 7 (ke) ki pénĭn mÿ kar kÿ.

31 Raabe fi vÿ Topê ki rã kÿ nĭ ja nĭgtĭ gé. Ũn mén (ka)mê vÿ tÿ fi nĭ ja nĭgtĭ, hã ra fi tóg Topê ki rã. Hã kÿ fi tóg Israel ag mÿ: “ha kãge jêg,” he ja nĭ, ũ tÿ fi jamã venh kãmũ mÿ ag. Hã kÿ ag tóg fi tén ja tũ nĭ gé. Cidade tá ke kar kãgtén ja ag tóg nĭgtĭ, ag tÿ Topê vĭ mē sór ja tũ tugrĭn, hã ra fi tóg inhhã kren ja nĭgtĭ.

32 Inh hÿn ũ tónh ke mÿ gé ver'. Isÿ ag tó kãn sór mÿ ra tóg inh mÿ vênhmÿ tĭ. E ag nÿtĭ, e tâvĭ, Gideão ti, Baraque ti, Sansão ti, Jefte ti, Davi ti, Samuel ti, Topê vĭ tó tĭ kar ag.

33 Topê ki ge kãn kÿ ag nÿtĭ, hã kÿ ag tóg pã'i ag mré vênh génh han, hã ra ag tóg pã'i ên

ag tỹ hẽn ri ke kãn. Vẽnh jykre kuryj han ag tóg tĩ, vẽn kar mỹ. Kỹ Topẽ tóg ag mỹ ã tỹ ag mỹ vẽn jykre há tó mũ ẽn tỹ ag mỹ ven mũ sir. Mĩg tỹ ù mãn sór mũ ra tóg ti tỹ hẽ ri ke ja tũ nĩgtĩ gé, mĩg ti.

³⁴ Pĩ gru jagy ẽn vỹ ag tỹ hẽ ri ke ja tũ nĩgtĩ gé, ù tỹ Topẽ ki ge kỹ nỹtĩ ag. Û tỹ rógro tỹ ag tén sór mũ ra tóg ag tỹ hẽ ri ke ja tũ nĩgtĩ gé. Ag krój nỹtĩ ra ag tóg tar gy nỹtĩ ja nĩgtĩ. Vẽn génh han kỹ ag tóg rará há han, kỹ ag tóg ag kato vãsãnsãn mũ ag tỹ pétẽ han gé.

³⁵ Ûn týtá ù fag vỹ, ãjag krẽ ter kar kỹ fag vỹ ag ve mãn, ag tỹ ag rĩn mãn kỹ, Topẽ ki ge kỹ nỹtĩ ẽn ag.

Hã ra ag kato vãsãnsãn mũ ag vỹ ag to jũ mág, kỹ ag tóg ag kãmĩ ù ag vóg kónãn gé. Kỹ ag tóg ag kygrẽg gé, ù tỹ Topẽ ki ge kỹ nỹtĩ ag, ag tỹ Topẽ to jũ kỹ, ù tỹ ag kygrẽg mũ ag. Ag mỹ ag tóg: “ãjag tovãnh jé ẽg tóg ke mũ, ãjag tỹ Topẽ tovãnh kỹ,” he ja nĩgtĩ, hã ra ag tóg Topẽ tovãnh sór ja tũ nĩ. Ag tỹ kãnhkã tá rĩnrĩn nỹtĩ sór ja vẽ, hã kỹ ag tóg Topẽ tovãnh ja tũ nĩ.

³⁶ Ag kãmĩ ù ag to ag tóg é he mũ gé, kỹ ag tóg ag mrãnmrãn gé, ag sigse ag tóg, ke gé, kỹ ag tóg vese jafã kátá ag vãm gé.

³⁷ Pó tỹ ag pin kỹ ag tóg ag kãgtén gé, rãnran jafã tỹ ag tóg ag rãnran gé, serrote tỹ. Rógro tỹ ag tóg ag kãgtén gé, Topẽ ki ge kỹ nỹtĩ ag. Ag tỹ hẽ mĩ mũn kỹ ag tóg carneiro fár tỹ kur rĩnh ja nĩgtĩ, cabrito fár tỹ kur

ke gé, ag tỹ Topẽ ki ge tigrĩn jagtar nỹtĩn kỹ. Vẽjẽn ve ja tũ ag tóg nĩgtĩ kejẽn, jagãgtar ag tóg nỹtĩ, ag vóg kónãn ja ag tóg nĩgtĩ gé.

³⁸ Ag mré ke ag vỹ kórég pẽ nỹtĩ ja nĩgtĩ, hã kỹ ag tóg ùn há tag ag to kórég nỹtĩ ja nĩgtĩ. Kỹ ag tóg ga kórég kri mũ ja nỹtĩgtĩ, ag jo pétẽ kỹ, sór kri ag mũgtĩ, kỹ ag tóg pãnónh nor kãki nỹtĩ ja nĩgtĩ gé, ga nor kãki ke gé, ù tỹ Topẽ ki ge kỹ nỹtĩ ag. Ẽprã ke ag vỹ ag to jũ mág nỹtĩ ja nĩgtĩ.

³⁹ Ag tỹ Topẽ ki ge kỹ nỹtĩn kỹ tóg hã ra ag to há nĩ, Topẽ ti. Hã ra ag tóg tag ki ve ja tũ nĩ ver, ag tỹ nẽn ve sór mũ ẽn ti, Topẽ tỹ ag mỹ nẽn tó ja ẽn ti.

⁴⁰ Topẽ vỹ ẽg to jykrén ja nĩ gé, hã kỹ tóg ver ag mỹ ven ja tũ nĩ. Ti tỹ ẽg mré ag mỹ ven sór vẽ, ẽg tỹ jagnẽ mré kãnhkã tá junjun jé.

12

Topẽ tỹ ẽg kãnhrãn sór mũ

¹ Ha vé, e tãvĩ ag nỹtĩ, ù tỹ ẽg jo Topẽ tovãnh tũ ag. Ẽg pẽnĩn ag e nỹtĩ, ẽg ve kỹ. Kỹ tóg há tĩ, ẽg tỹ Topẽ japry jagma mũ há han ke ti, ti jamĩn jagma. Ẽg tỹ corrida han ri ke ti nĩ. Ẽg tỹ tỹ vaj kỹ corrida han ken kỹ ẽg tóg vẽnkhãn há han ke mũ. “Sỹ tag han kỹ inh mỹ corrida to krónh kenh ke tũ nĩ vỹ?” he ẽg tĩ. “Ne nỹ isar han mũ, corrida to?” he ẽg tóg tĩ gé. Ẽg tỹ nẽn han ke mũ ẽn tovãnh ẽg tóg tĩ, ẽg tỹ corrida to krónh ke tũ nĩ jé. Topẽ jykre ri ke ti nĩ, tag ti. “Tag mỹ Topẽ to

isar han mũ vỹ?" hemnĩ, ãjag tỹ nén han ke mũ ên kar to. ãjag tỹ nén han ke mũ tigrĩn ti to tar nỹtĩn kỹn há tí. ãjag tỹ nén han ke mũ ên tigrĩn ti to krónh kenh ha mẽ tĩn kỹ han tũg nĩ, tovãnh nĩ. Ti vỹ mranh sór tũg nĩ gé. Tag vỹ êg kókén pẽ han tí. ãjag tỹ nén han tí tag kar tovãnh kỹ ãjag tóg ti jykre hã to krónh kenh ke tũ pẽ nĩ.

² Jesus hã mũ êkrén nĩ, ti jykre hã tỹ krĩn kỹ nỹtĩmnĩ. Ti hã vỹ êg tỹ Topẽ ki rã han, kỹ tóg êg tỹ ti tovãnh ke tũ han ên ki kanhró nĩ gé. Cruz to sa kỹ tóg ter mỹr, ag tỹ ti to é he mũ ra tóg ti mỹ tỹ nén ù tũ tí. Ti tỹ kar kỹ nén venh ke ên mũ tóg êkrén ja nĩ, nén tỹ ti mỹ sér nĩnh ke ên mũ. Hã kỹ tóg ùri Topẽ pẽgja tá nĩ nĩ.

³ Jesus mũ êkrén nĩ. Êprã ke kar ag vỹ ti kato vỹ ja nĩgtĩ, ù tỹ Topẽ vỹ mranh mũgtĩ ên ag, ge ra tóg Topẽ to krónh ke ja tũ nĩgtĩ, Jesus tí. Ti ki êkrén kỹ to krónh krónh ke tũg nĩ, to: "ron inh mũ," he tũg nĩ gé.

⁴ Ha vé, Topẽ vỹ mranh tũg nĩ. ãjag tỹ ti vỹ mranh sór mũ tag kato vãsãnsãn nĩ, ke tũ nĩ (mũ) ra ãjag tóg to ter mũ.

⁵ ãjag mỹ Topẽ tỹ êg jyvẽn ên kã jatu'? Êg jyvẽn kỹ tóg tag tó, ha mẽ. ã krẽ mỹ tóg tag tó, Topẽ tí, ha mẽ: "inh kósin, isỹ ã vóg kónãn kỹ inh mỹ vẽn nenh tũg nĩ," he tóg. "Isỹ ã mỹ vỹ tar han mũ ra to krónh ke tũg nĩ.

⁶ Isỹ ã to há nĩn kỹ, hã kỹ sóg ã mỹ vỹ tar han tí. ã kanhrãn

jé ke vẽ. Isỹ ã mỹ: "inh kósin vỹ tỹ ã nĩ," hen kỹ sóg ã mrãnmrãn tí gé, ã kanhrãn tí jé," he tóg, Topẽ vỹ tỹ rán kỹ nĩ kí.

⁷ Hã kỹ ti tỹ ãjag mrãnmrãn tag to tar nỹtĩmnĩ. ãjag kanhrãn jé ke vẽ. Topẽ tỹ ãjag mỹ: "inh krẽ," he vẽ. Êg panh vỹ êg mrãnmrãn kỹ êg kanhrãn ja nĩgtĩ gé. Vẽn kar jykren hã vẽ. Topẽ vỹ ã krẽ kar mrãnmrãn kỹ ag kanhrãn tí.

⁸ Kỹ, ti tỹ ãjag mrãnmrãn tũ nĩ ra ãjag pí(jé) tỹ ti krẽ pẽ nỹtĩnh mũ vẽ'.

⁹ Ha vé, êg han mũ fag vỹ êg mrãnmrãn tí, êg kanhrãn jãvãnh nĩn kỹ, kỹ êg tóg fag kamẽg tí. Kỹ êg tóg Topẽ kamẽg kãfór han ke mũ, ù tỹ êg rĩnrĩr han mũ ti, êg jóg mág tí.

¹⁰ Kỹ ù tỹ êg han mũ tóg êg to ã jykre fi ja nĩgtĩ. To jykren kỹ tóg êg mrãnmrãn tí kejẽn, êg sĩn kã. Kejẽn tóg ã tỹ kygnẽ kỹ nĩ ra êg kanhrãn sór tí gé, êg panh tí. Hã ra Topẽ tỹ êg mrãnmrãn kỹ tóg to jykren há han tí inhhã. Ti tỹ êg kãnrãn há han sór vẽ, êg tỹ ti ri kén kygnég tũ nĩ jé, êg tỹ ti ri kén há tãvĩ nỹtĩ jé.

¹¹ Ti tỹ êg mrãnmrãn ên kã tóg êg mỹ sér tũ nĩ ver. Ên kã tóg êg mỹ jagy tí. Kar kỹ êg tóg vãhã vég tí, ti há nĩ ja tí, êg tỹ kanhrãn há han kar kỹ. Ti tỹ êg mrãnmrãn hã kỹ êg tóg vẽn jykre há han ên kí kanhrãn mũ sir, jagnẽ krĩ kuprãg kí êg kanhrãn mũ gé sir.

Ĕg tỹ jagnē tar han ke

12 Krónh ke ve ājag tóg nĩ, kỹ ājag tóg tỹ ũn kaga tũg kórég ěn ri ke nỹtĩ. To tar' he mǎn nĩ, ājag tỹ mũ há han mǎn jé.

13 Topē japry kuryj hǎ jagma ěvǎnh nĩ, kỹ ũ tỹ ājag mỹ to krónh ke ha mẽ ěn ag vỹ ājag mré to tar' he mǎn mũ gé. Topē jykre tovǎnh sór nĩ ve ājag nỹtĩ, hǎ ra tóg ājag tar han mǎn sór mũ.

14 Věnh kar mré věnh jykre kuryj han sórmnĩ. Kỹ Topē vỹ ki króm kỹ kygnē sór tũg nĩ. Ĕg tỹ tag to vǎsǎn tũ nĩn kỹ ěg pĩ(jé) ěg jóg mág venh ke mũ'.

15 Věnh ki rĩr há han nĩ, ājag kǎmĩ ũ tỹ Topē tỹ ěg jagǎgtǎn mũ tag to é he tũg jé. Ājag kǎmĩ ũn pir tỹ věnh jykre kórég to tar nĩn kỹ tóg ěg mỹ ti tỹ ũn e ag krĩn kónǎn ha mẽ tĩ, ag tỹ ti jykre kórég ěn ri ke nỹtĩ jé. Kỹ tóg ěg jakré kǎmĩ vǎnh jagy ri ke nĩ. Ĕg jakré kókég ti tĩ, věnh jykre kórég tỹ ěg kókén ri ke.

16 Věnh ki rĩr há han nĩ gé, ājag kǎmĩ ũ tỹ Esaú jykre kórég ěn ri ke han tũ nĩ jé, ũ tỹ Topē kato vǎsǎn tũ nĩ jé. Esaú vỹ Topē to é he ja nĩgtĩ, kỹ tóg vėjěn tigrĩn ā panh tỹ ti mỹ vỹ há han ke ěn kren. Ā jǎvy mỹ tóg tovǎnh, ti panh tỹ ti mỹ vỹ há han ke ěn ti, ā jěn ke pir tigrĩn mỹr. Ti tỹ ā panh tỹ ti mỹ vỹ há han ke ěn to é he hǎ vē.

17 Kar kỹ tóg mẽ sór ja nĩ, ti panh tỹ ti mỹ vỹ há han ke ti, hǎ ra tóg mẽg tũ nĩ sir. Kỹ tóg fỹ ja nĩgtĩ, ti panh tỹ ti mỹ vỹ há han jé, vǎhǎ tóg ti mỹ e nĩ

ja nĩgtĩ, hǎ ra tóg sir rǎké ja nỹ. Měg tũ tóg nĩ sir, ti panh tỹ ti mỹ vỹ há han ke ti. Tag ri ke han sór tũg nĩ.

Topē jũ tỹ jagy pē

18 Vǎsỹ Topē vỹ ěg jóg'jóg ve ag mỹ ā jykre nĩm ja nĩgtĩ. Pǎnónh tỹ Sinai tá ag tóg jun-jun ja nĩgtĩ. Pĩ ve ag tóg, tá, kỹ tóg tá kuty nĩ ja nĩgtĩ gé, kuty pē, kóho jũ ke gé.

19 Kỹ trombeta ěn vỹ kyr ja nĩgtĩ gé. Kỹ Topē vỹ ag mỹ vỹ ja nĩ gé. Ag tỹ ti vỹ mẽ kỹ ag tóg jũrũn ke ja nĩgtĩ, kỹ ag tóg ti mỹ to vỹ mũ, ti tỹ ag mỹ vēmén tũ nĩ jé, ti tỹ ag kǎnhmỹ Moisés hǎ mré vēmén jé, ěgno ki.

20 Ag mỹ tóg: “ājag mẽg ũ tỹ pǎnónh tag rǎ hǎ jun kỹ ti tén nĩ,” he ja nĩ, “pó tỹ ti pin kỹ, ājag krē ke gé, ājag prũ fag ke gé, ājag tỹ tá nén vég mũ kar ěn ti. Ti tỹ pǎnónh tag vóg tigrĩn ti tén nĩ,” he ja tóg nĩ, Topē ti. Hǎ tóg ag mỹ e ja tĩgtĩ.

21 Topē tỹ ag mré vēmén kỹ tóg ag mỹ e tǎvĩ nĩ ja nĩgtĩ, Moisés mré hǎ, hǎ kỹ tóg: “jũrũn ke inh, mũmėg kỹ,” he mũ gé, Moisés ti.

22 Hǎ ra tóg ag tỹ nén ve ja ěn ri ke tũ nĩ, ěg tỹ ũri Topē rĩnja tá jun ke ti. Pǎnónh ěn ri ke tũ ti nĩ, ěg tỹ kanhkǎ tá nén venh ke ti. Ĕg tỹ kanhkǎ tá jun ken kỹ ěg ter mǎn ke tũ nĩ gé, ěg tỹ kanhkǎ tá pǎnónh tỹ Siǎo he mũ ěn tá jun ken kỹ. Topē jamǎ tá ke vē, ũn rĩr mũ ěn jamǎ tá ke vē, hǎ vỹ: Jerusalém, he mũ, kanhkǎ tá cidade ěn ti. Topē tỹ jėgnē jafǎ ag vỹ tá nỹtĩ. E tǎvĩ ag nỹtĩ, e

tãvĩ, ti tỹ jěgně jafã ag. Festa mág pě vě, tá.

²³ Kỹ Topě krě sanh kar ag vỹ tá nỹtĩnh ke mũ gé, ùn tỹ Jesus ki ge kỹ nỹtĩ ag kar. Ag jygjy vỹ kanhkã tá rán kỹ nỹtĩ. Kỹ Topě vỹ tá nĩ gé, ù tỹ vėnh kar jykre tugnỹm ke ti. Kỹ ù tỹ ěg jo Topě ki ge kỹ nỹtĩ ag kuprĩg vỹ tá nỹtĩ gé, ù tỹ ěg jo tá junjun mũ ěn ag.

²⁴ Kỹ Jesus vỹ tá nĩ gé, ù tỹ ěg mỹ vėnh jykre tăg nĩm mũ ěn ti, ù tỹ ěg jagfy ter mũ ěn ti, kỹ ěg tóg ti kyvėnh tugrĩn jãnhkri nỹtĩ, Topě tỹ ěg mỹ vėnh pãte fón ti kỹ. Topě tỹ Abel kyvėnh ven kỹ tóg jũ mũ, ù tỹ ti tén ja ěn to. Topě tỹ Jesus kyvėnh ven kỹ tóg jãvo ěg mỹ vėnh pãte fón mũ. Ěg tũn hã vě, Jesus tỹ ěg mỹ vėnh jykre nĩm jan hã vě, hã kỹ tóg Moisés jykre kãfór nĩ, Jesus ti.

²⁵ Hã kỹ jěmě há han nĩ. Ũ tỹ ãjag mỹ Topě vĩ tó mũ ěn vĩ jěmě há han sórmnĩ. Ěg jóg'jóg ve ù ag vỹ Topě vĩ mẽ sór ja tũ nĩgtĩ, ti tỹ ag jyvėn mũ ra. Hã kỹ ag krenkren ja tũ nĩ. Kỹ ěg krenkren ke tũ nĩ gé, ěg tỹ ù tỹ kanhkã tá nĩ ěn to ěg mré vėmėn sór mũ ěn vĩ jěmě sór tũ nĩn kỹ, ti tỹ ěg jyvėn mũ ti.

²⁶ Vãsỹ tóg, ã tỹ ěg jóg'jóg ve ag mré vėmėn kỹ tóg ga tỹ ragra ke han ja nĩgtĩ. Ũri tóg ěg mỹ tag tó, ha mẽ. “Ga tỹ ragra ke pir han mãn jé sóg ke mũ,” he tóg. “Ěn kã kanhkã vỹ ragra ke mũ gé, ha vemnĩ,” he tóg.

²⁷ Ti tỹ: “ke pir han mãn jé sóg ke mũ,” hen kỹ ěg tóg ki kanhró nỹtĩ, ti tỹ ã tỹ nén han

ja tag tỹ tũ¹ he sór mũ ti, ti tỹ ga tỹ ragra kenh ken ki. Nén ù tỹ ragra kenh ke tũ ěn hã tóg nĩnh ke mũ inhhã, hã vỹ: “Topě jamã, he mũ.

²⁸ Kỹ tóg há tí, ěg tỹ Topě mỹ: “há ti nĩ, ã tỹ ěg mỹ nén han mũ ti,” hen kỹ. Ěg jamã tăg vỹ inhhã ragra kenh ke tũ pě nĩ, ti tỹ ěg mỹ ěg jamã nĩm ke ěn ti. Kỹ tóg há nĩnh mũ gé, ěg tỹ Topě rãnrãj han há han kỹ, ti tỹ ti mỹ sér nĩ jé. Ti kamėg jé ěg tóg ke mũ gé, ěg tỹ tóg jũrũn kenh mũ.

²⁹ Topě vỹ pĩ tỹ nén ù kar kugprũg mũ ri ke nĩ.

13

Topě tỹ ěg jyvėn

¹ Jesus ki ge kỹ nỹtĩ ag tỹ jagně to há nỹtĩ to krónh ke tũg nĩ.

² Ũ tỹ kuvar há tá ãjag to pasa ken kỹ ti mỹ: “inh mré jě,” hemnĩ. Ěg jo ke ù ag tóg, ag tỹ ù ag to: “inh mré nỹtĩ,” hen kỹ (ag tóg) Topě tỹ jěně jafã ag mỹ: “inh mré nỹtĩ,” he ja nĩgtĩ, ag tỹ ag ki kagtĩg (hã) ra. Hã kỹ tag han nĩ.

³ Ũn sigse kỹ nỹtĩ ag ki rĩrmnĩ. Ĥjag tỹ kejėn Jesus tugrĩn sigse kỹ nỹtĩnh ke tag mĩ ěkren nĩ, hã kỹ jagně ki rĩr há han nĩ. Ag tỹ ùn vóg kónãn mũ ag ki rĩrmnĩ gé. Kejėn ag tóg ãjag vóg kónãn ke mũ gé, Jesus tugrĩn, hã kỹ ag ki rĩr há han nĩ.

⁴ Ũ prũ fi to én tũg nĩ, ù mén to én tũg nĩ gé. Ĥjag prũ nỹtĩn kỹ ù fi mré nỹ sór tũg nĩ, ãjag mén nỹtĩn kỹ ù mré nỹ sór

tũg nĩ gé. Topẽ vỹ ù tỹ vẽn
jykre kórég han (ka)mẽ ên ag
to jũnh ke mũ, ù tỹ fag mré nỹ
sór (ka)mẽ ên ag to, fag tỹ ag
mré nỹ sór (ka)mẽ ên fag to ke
gé.

⁵ Rico nỹtĩ sór tũg nĩ gé. Ājag
tỹ nén vég mũ ên vỹ há nĩ.
Topẽ vỹ êg mỹ tag tó, ha mẽ:
“ājag kã jatu' henh ke tũ pẽ sóg
nĩ, ājag ki sóg rĩr nĩ nĩ,” he tóg,
Topẽ tĩ.

⁶ Hã kỹ tag tómnĩ, ha mẽ:
“êg jóg mág vỹ inh ki rĩr ke
mũ,” hemnĩ. “Ti hã kamẽg
isóg mũ. Ēprã ke ù vỹ inh vóg
ke tũ pẽ nĩ, ti tỹ inh ki rĩr nĩn
kỹ,” hemnĩ, Topẽ vỹ kri fi kỹ.

⁷ Û tỹ ājag mỹ Topẽ vỹ tó vén
mũ ên mĩ êkrén nĩ. Ga kri mũn
kỹ ag tóg Topẽ tovãnh ja tũ pẽ
nĩgtĩ, ājag tỹ ti tovãnh tũ ra ag
tóg kãgter ja nĩ. Ag ri ke han
sórnmĩ, ti ki rã ên tovãnh sór
tũg nĩ gé, ag ri ke han nĩ.

⁸ Jesus Cristo hã vỹ ter tũ nĩ.
Ti tỹ vãsỹ nén to jykrén mũ ên
hã han ti tĩ, ùri, kỹ tóg hã han
mãn ke mũ gé. Tỹ ù han ke tũ
ti nĩ, kỹ tóg kurã krỹg ja tũ nĩ
gé.

⁹ Û tỹ ón kỹ ājag mỹ nén ù ù
tó sór mũ ên vỹ jẽmẽ tũg nĩ, ag
tỹ ón kỹ Topẽ to nén ù ù tó mũ
ra. Ājag krĩn kónãnh jé ag tóg ke
mũ. Ājag tỹ tỹ prãnh ke han
sór jé ag tóg ke mũ. Topẽ vỹ
ājag tar han ki kanhró nĩ, ājag
jagãgtãn kỹ. Û tóg: “ã tỹ vễjẽn
tag kon kỹ ã tóg Topẽ jykre to
tar nĩ,” he tĩ. Ag ón vẽ. Vễjẽn
vỹ êg tỹ ti jykre to tar nĩ han
ke tũ pẽ nĩ. Topẽ hã ne êg tar
han ki kanhró nĩ'.

¹⁰ Ha mẽ, Moisés jykre ki
Topẽ mỹ nén ù pũn tĩ ag pi(jé)
êg mré Jesus jamãnh ên konh ke
mũ'.

¹¹ Ag tỹ Topẽ tũ ki rĩr tĩ to
pã'i mág ên vỹ ag mẽg ù tãnh
kỹ ti kyvénh ma tĩ tĩ, ag tỹ to:
“Topẽ nĩgjafã,” he mũ ên ra. Ti
tỹ ag mẽg kyvénh ên tỹ êg tỹ
Topẽ vỹ mranh mũ tỹ tũg' he
sór vẽ vẽ. Hã ra ag tóg ājag
jamã jy ró pãnh to ag tóg ājag
mẽg tãnh kỹ pũn tĩ.

¹² Hã kỹ Jesus tóg cidade jy
ró ên pãnh to ter ja nĩ gé, ti tỹ
êg jagfy ter kỹ, êg jãnhkri han
jé.

¹³ Kỹ êg tóg ti jagtar ri ke
han ke mũ gé. Û tỹ ti ki ge
jãvãnh ag jykre han tũ êg tóg
nĩ, kỹ êg tóg ag mré han ke
tũ nĩ gé. Jesus tỹ cidade jy
ró pãnh to ter ja ên mĩ êg tóg
êkrén kỹ nỹtĩ, kỹ êg tóg ù tỹ ti
ki ge tũ ag mré ag jykre han
ke tũ pẽ nĩ.

¹⁴ Tag ki, ga kri êg tóg
êg jamã pẽ venh ke tũ nĩ.
Kanhkã tá êg tóg ve sór mũ, êg
jamã ti.

¹⁵ Êg tỹ Jesus tugrĩn Topẽ
mỹ vỹ há han kỹ tóg há tĩ. Êg
tỹ nén vég mũ kar to êg tóg ti
mỹ: “êg mỹ tóg há tĩ, êg mỹ tóg
sér tĩ,” henh ke mũ. Êg tỹ ti
mỹ nén ù pũn mũ ri ke tóg nĩ,
presente ri ke tóg nĩ, êg vỹ tag.
“Êg jóg vẽ,” he jé êg tóg ke mũ
gé, ti to. Ti mỹ vỹ há han ke to
krónh ke tũg nĩ.

¹⁶ Jagnẽ ki rĩrnmĩ gé, jagnẽ
mré nén kar han kỹ. Tag to
krónh ke tũg nĩ gé. Êg tỹ Topẽ
mỹ nén ù pũn ri ke ti nĩ, êg tỹ
ti mỹ presente han ri ke ti nĩ,

ĕg tỹ jagnĕ ki rĩr tĩ ti, kỹ tóg ti mỹ sér tĩ.

17 Ũ tỹ ājag kanhrān tĩ ĕn ag vĩ jĕmĕmnĩ, ag tỹ ājag mỹ nĕn tó mũ ĕn ki króm nĩ. Ājag ki rĩr ag tóg nĩgtĩ, ājag tỹ Topĕ tovānh tũ nĩ jé, kỹ Topĕ vỹ ag rānhrāj tugnỹm ke mũ. Ājag tỹ ag vĩ jĕmĕn kỹ tóg ag mỹ kufy tũ nĩnh mũ, ag rānhrāj ti, kỹ tóg ag mỹ sér tĩnh mũ. Ti tỹ ag mỹ kufy nĩn kỹ tóg há tũ nĩ gé, ājag mỹ.

Ĕg tỹ Topĕ mré vĕmĕn ke

18 Inh jagfy Topĕ mré vĕmĕn nĩ. Nĕn ũ kórĕg han ja tũ inh nĩ, ki kanhró sóg nĩ. Isỹ nĕn ũ kuryj han sór vĕ mỹr, tag hā to sóg jykrĕn tĩ.

19 Kỹ inh jagfy Topĕ mré vĕmĕn nĩ, Topĕ tỹ kānhmar ājag to inh jĕnĕ mān jé. Ti mỹ tag to vĩn kỹ krónh ke tũg nĩ.

20 Topĕ mré sóg vĕmĕn tĩ ājag to. Ĕg krĩ kuprāg ti tĩ. Kỹ tóg Jesus ti, ĕg Senhor ti rĩn mān ja (ti) nĩ gé, ti tỹ ĕg jagfy ter kar kỹ. Ĕg jagfy ter kỹ tóg ũ tỹ mé ki rĩr tĩ ĕn ri ke nĩ, hā ra tóg ĕn kāfór nĩ gé, ti tỹ ĕg ki rĩr há han nĩn kỹ. Ĕg jagfy ter kỹ tóg ĕg mỹ vĕnh jykre tāg ĕn nĩm ja nĩ, ũ tỹ tũ' he vānh ĕn.

21 Topĕ hā mỹ sóg to vĩ mũ, ti tỹ ājag tar han jé, ājag tỹ nĕn (ũ) tỹ ti mỹ há nĩ ĕn hā han jé. Ti há vỹ Jesus Cristo mỹ: “ag tar han nĩ,” he ja nĩ. Ti hā mỹ ĕg tóg vĩ há han ke mũ, Jesus Cristo mỹ, kỹ tóg tũ' hĕnh ke tũ nĩ, ĕg tỹ ti mỹ vĩ há han ke ti. Amĕm.

22 Inh kanhkā, sỹ ājag mỹ tag tó sór ja vĕ. Jatun mỹ

mĕ sórmnĩ, sỹ ājag jyvĕn mũ tag. Inh pi(jé) vĕnh rānrān mág han. Vĕnh rānrān sĩ han sóg ājag mỹ.

23 Ha mĕ, ĕg régre tỹ Timóteo vỹ se kỹ jĕ mān tũ nĩ ha. Ti kava ag huri. Ti tỹ kānhmar ki jun kỹ tóg inh mré ājag vĕnh kātĩg ke mũ.

24 Ājag pā'i kar ag mũ sóg ĕkrĕg tĩ, Topĕ ki ge kỹ nỹtĩ kar ag mũ ke gé. Tag ki ke ag, ga tỹ Itália ki Topĕ ki ge kỹ nỹtĩ ag vỹ ājag mũ ĕkrĕg tĩ gé.

25 Topĕ jé ājag tar han kān. Hā vĕ.

TIAGO TỸ CARTA

¹ Tiago tỹ rá vĕ. Isỹ Israel ag mỹ rán hã vĕ. Ęg povo tỹ 12 (ke) vỹ tỹ ãjag nỹtĩ. Povo kar mĩ ãjag tóg mũgtĩ, fóg ag kar mĩ, kanhgág ag mĩ ke gé. Sỹ ãjag mỹ vĕnh rá jĕnĕ vĕ. Tỹ sóg Topĕ mỹ rãnrãj tĩ nĩ, ěg Senhor tỹ Jesus Cristo mỹ. Hã kỹ sóg ãjag mỹ rán kỹ jĕnĕg mũ sir. Ājag mĩ sóg ěkrég tĩ.

Ęg tỹ Topĕ vĩ to: hỹ mỹ vỹ? henh ke tũ

² Inh kanhkã', ãjag tỹ Jesus tugrĩn nĕn ũ jagy ve kỹ to vĕnhmỹ nỹtĩ tũg nĩ. Mỹ sér nỹtĩmnĩ hã ra.

³ Topĕ tỹ ãjag tỹ ti ki rã há han ja ve sór vĕ, hã kỹ ãjag tóg tag kar vég tĩ. Kỹ ti tovãnh sór tũg nĩ, kỹ ãjag tóg ti to tar nỹtĩnh mũ, ãjag tỹ nĕn ũ jagy vég mũ ra ti tovãnh tũ nĩn kỹ. Tag to jykrén.

⁴ Ājag tỹ nĕn ũ jagy vég mũ ra to tar nỹtĩmnĩ, ãjag tỹ komĕr hã há nỹtĩ jé, Topĕ jykre ki króm há han kỹ. Komĕr hã ãjag tóg kygnĕnh ke tũ nĩ, nĕn ũ kar ki, ãjag tỹ ti to krónh ke tũ nĩn kỹ.

⁵ Ājag tỹ nĕn ũ to jykrén tũ nĩn kỹ Topĕ mỹ to vĩmnĩ, ti tỹ ãjag kanhrãn jé. Ęg kanhrãn jé tóg ke mũ, Topĕ ti. To tóg: “han ke tũ inh nĩ,” henh ke tũ nĩ, vĩ tar han ke tũ ti nĩ, ěg tỹ ti mỹ nĕn ũ to vĩn kỹ. Ęg to tóg fe há nĩ, hã kỹ tóg ěg kanhrãn tag to há nĩ.

⁶ Ājag tỹ ti mỹ nĕn ũ to vĩn kỹ: “Ęg mỹ tóg han tĩ, Topĕ ti,” hemnĩ. “Ti mỹ inh mỹ han mũ vỹ?” he tũg nĩ. Ājag tỹ: “ti mỹ inh mỹ han mũ vỹ?” hen kỹ ãjag tóg venh ke tũ nĩ, ãjag tỹ ti mỹ nĕn to vĩ mũ ěn ti. Kỹ ãjag tóg goj ri ke nỹtĩ. Gøj tóg kejĕn fagrĩnh mỹ krém krém ke tĩ, kãka tỹ ti kã nĩ kỹ. Kỹ tóg ra tĩg, tá kãtĩg ke mũ. Ęn ri ke tóg nĩ, ũ tỹ Topĕ vĩ kri fig tũ ěn ti.

⁷⁻⁸ Fagrĩnh mỹ tóg Topĕ mỹ nĕn ũ to vĩ tĩ, ti tỹ: “ti mỹ inh mỹ han mũ vỹ?” hen kỹ. Venh ke tũ tóg nĩ sir. Krĩ régre ti nĩ. Nĕn ũ to jykrén kỹ tóg kãnhmar nĕn ũ hã to jykrén mãn mũ gé, vĕnh jykre pir han vãnh nĩn kỹ. Ki kagtĩg tóg nĩ, hã kỹ tóg venh ke tũ nĩ gé sir.

Ũn jagtar ag mré ũn rico ag jykre

⁹ Ęg Senhor tỹ Jesus mré ke ũ ag tóg jagãgtar nỹtĩ. Hã ra ag tóg ěg Senhor ki ge kỹ nỹtĩn kỹ ũn rico ri ke nỹtĩ, ag tỹ tỹ Topĕ krĕ nỹtĩn kỹ. Kỹ tag to jykrén nĩ, ãjag mỹ sér tĩ jé, ãjag jagtar nỹtĩn kỹ.

¹⁰ Kỹ ěg Senhor tỹ Jesus mré ke ũ ag tóg rico nỹtĩ hã ra. Ag tỹ ěg Senhor ki ge kỹ nỹtĩn kỹ ag tóg ũn jagãgtar ri ke nỹtĩ, Topĕ mỹ. “Ter jé ěg tóg ke mũ, kỹ tóg ěg mỹ há tĩ, Topĕ tỹ ěg jagãgtãn ken kỹ, ũn jagtar ag ri ke,” hemnĩ, ãjag rico nỹtĩn kỹ. Re fej ri ke ěg tóg nỹtĩ, ěg kar.

¹¹ Rã tỹ jun ke kỹ tóg rỹ jagy tĩ. Kỹ tóg tugtóg tĩ, re ti, kỹ ti fej tóg kógungun tĩ gé.

Kỹ ti sīnvĩ ěn tóg tũ' henh mũ sir. Ěn kăgter ri ke ěg tóg nỹtĩ gé. Kỹ ũn rico ag tóg ke tĩ gé, kăgter kỹ. Kỹ ag há ěn tóg tũ' he mũ gé sir, ag rănhrăj tỹ ag mỹ sér nĩ ra.

Ěg tỹ Topě vĩ mranh sór mũ

12 Kejěn ũ tóg Jesus tugrĩn ěg to jũ nĩ. Ěg tỹ hă ra Topě tovănh tũ nĩn kỹ tóg há tĩ. Kỹ ěg Senhor tóg ěg mỹ ěg rĩr krỹg ja tũ ven ke mũ, ěg tỹ ěg jagăgtar mũ ra ti tovănh tũ nĩn kỹ. Kỹ tóg ěg tỹ carreira ki ka féj tỹ coroa ganhar he mũ ěn ri ke nĩ sir. Ěg Senhor vỹ ěg mỹ: “rĩr krỹg ja tũ ve jé âjag tóg ke mũ, âjag tỹ iso há nỹtĩn kỹ,” he ja nĩgtĩ, hă kỹ tóg ěg mỹ tỹ presente han ke mũ.

13 Ājag tỹ Topě vĩ mranh sór mũn kỹ to: “Topě vỹ inh krĩn, sỹ ti vỹ mranh jé,” he tũg nĩ. Topě pi(jé) věnh jykre păno han ja nĩgtĩ'. Kỹ ũ pi(jé) to Topě krĩn kónăn tĩ gé'. Kỹ tóg ěg krĩn kónăn tũ nĩgtĩ gé (mỹr), Topě ti.

14 Ěg tỹ Topě vĩ mranh sór kỹn ge nĩ, hă nỹ ve nĩ, kỹ ěg tóg to é n tĩ.

15 Ěg tỹ to é n kỹ ěg tóg to jykrén mág nĩ. Kỹ ěg tóg sir han sór mũ. Ěg tỹ han sór kỹ ěg tóg han mũ. Kỹ ěg tỹ ti vỹ mranh vě sir. Kar kỹ ěg tóg mranh măn', mranh măn', he mũ gé, věnh jykre păno vě sir. Hă ra ěg tóg to nũgme ki văr ke mũ, inferno ki.

16 Inh kanhkă', âjag to sóg há tâvĩ nĩ. Hă kỹ sóg âjag mỹ: “kygně tũg nĩ, Topě to,” he mũ.

17 Topě hă ne ã pin kỹ ěg mỹ nén ũ há kar han tĩ'. Nén ũ há tâvĩ han tóg tĩ, Topě ti, ěpră ke ag mỹ, hă vỹ: ěg, he mũ. Ti hă tóg jěngrě hyn han'. Ră tỹ ěg ki kupũn tũ nĩn kỹ tóg fěnja tĩ. Hă ra Topě tóg tag han tũ nĩgtĩ (mỹr). Ti pi(jé) kejěn ěg ki rĩr tũ nĩgtĩ'. Ěg ki rĩr tóg nĩ nĩ hă ra.

18 Ti hă tóg ěg han măn', ěg tỹ ti ki ge kỹ. Ti tỹ ěg han măn sór kỹ tóg ěg han măn. Ěg to tóg ã vĩ há jěně. Věnh vĩ há tag tỹ tóg ěg han măn mũ sir. Ti tỹ ěg han măn kỹ ěg tóg ti tỹ nén han mũ kar kri ke nỹtĩ, ěg tỹ tỹ ti krě nỹtĩn kỹ.

Ěg tỹ Topě vĩ ki króm ke

19 Inh kanhkă', tag to jykrén mág nĩ. Ũ tỹ nén ũ há kămén kỹ jěmě há han nĩ. Kănhmar vỹ tũg nĩ. Kănhmar jũ tũg nĩ gé.

20 Ěg jũ nỹtĩn kỹ ěg tóg Topě jykre han tũ nĩgtĩ (mỹr), ti jykre kuryj ti. Hă kỹ jũ tũg nĩ.

21 Hă kỹ nén tỹ ěg kavěnh tĩ ěn tovănh kăn nĩ, věnh jykre păno mré hă. Ěg kókég tóg tĩ, ěg făn tóg tĩ, věnh jykre păno ti. Tovănh ra. Jatun mỹ Topě vỹ měmnĩ. Topě hă ne ã vỹ tỹ ěg kanhrăn'. Ěg tỹ kri fi kỹ ěg tóg krenkren ke mũ.

22 Kỹ Topě vỹ han kỹ nỹtĩmnĩ. Ājag tỹ měg mũ (hă) ra ki króm tũ nĩn kỹ âjag tóg krenkren ke tũ nĩ. Ón kỹ âjag tóg: “kren jé sóg ke mũ,” henh ke mũ.

23 Ěg tỹ jěměg mũ (hă) ra ki króm tũ nĩn kỹ ěg tóg tag ri ke nỹtĩ, ha mě. Kejěn ũ tóg věnh vég mũ, ki věnh ve jafăn

ki (mÿr, ha mē). Kÿ tóg ã kakã vэг mÿ sir.

²⁴ Æ kakã ve kar kÿ tóg to jykren mãn tũ nĩ. Kÿ tóg ki kagtĩg' he mÿ. Tĩg tóg mÿ, kÿ tóg ã kakã ki kagtĩg' he mÿ. Kÿ tóg fagrĩnh mÿ vєnh ven ja nĩ sir. Ge ęg nÿtĩ, ęg tÿ Topę vĩ jēmęg mÿ (hã) ra ki króm tũ nĩn kÿ. Kÿ ęg tóg fagrĩnh mÿ mę ja nĩ sir.

²⁵ Ęg tÿ ti vĩ to jykren mág kÿ tóg hã ra ęg mÿ sér tĩnh mÿ. Topę vĩ vÿ há nĩ, ti jykre ti. Ęg jykre pãno tÿ tũg' he tóg tĩ, ęg tÿ han mãn tũ nĩn jé. Kÿ ęg tóg ęg tÿ ti vĩ jēmę kÿ nÿtĩn kÿ to jykren ke mÿ. Kã jatun ke tũ ęg tóg nÿtĩ sir. Kÿ ęg tÿ ki króm kÿ Topę tóg ęg mÿ vĩ há han ke mÿ sir, ęg tÿ nєn han mÿ kar to.

²⁶ Ũ ag tóg Topę to: “ti to sóg há nĩ,” he tĩ. Hã ra ag tóg ũ to vĩ kónãn tĩ, ãjag vĩ to jykren tũ nĩn kÿ. Kÿ ag tóg ón kÿ: “ti to sóg há nĩ,” he ja nĩgtĩ. Kygnęg ęg tóg tĩ, ęg tÿ gen kÿ. Hã kÿ ęg tóg ón kÿ: “ti to sóg há nĩ,” he tĩ, ęg tÿ ũ to vĩ kónãn kÿ.

²⁷ Ęg tÿ ęg jóg tÿ Topę to há nÿtĩn kÿ, kÿ ęg tóg tag han mÿ, ha mę: ũn panh ter mÿ kar jagãgtãn kãn ęg tóg tĩ, ũn mєn ter ja fag ke gé, ũn jagãgtar fag. Fag ki rĩr jé ęg tóg ke mÿ, fag mÿ há tĩ jé. Kÿ ęg tóg nєn ũ vєnhmÿ han ke tũ nĩ gé sir. Topę kato tę mÿ ag jykre han ke tũ ęg tóg nĩgtĩ gé. Hã kÿ ęg tóg ti mÿ kavėj tũ nÿtĩ sir. Hã kÿ ęg tóg ón kÿ: “Topę to sóg há nĩ,” he tũ nĩgtĩ gé.

2

Ęg tÿ jagnę to vєnh jykre pir han ke

¹ Inh kanhkã', ęg Senhor tÿ Jesus Cristo ki ãjag ge mÿ mÿr. Pã'i kar kãfór vę (mÿr), ęg Senhor tÿ Jesus Cristo ti. Ge ra ãjag ne tóg ũn rico ag to há nÿtĩ', kÿ ũn jagãgtar ag tóg ãjag mÿ tÿ nєn ũ tũ nÿtĩ. Ke tũg nĩ.

² Hєn ri ke mÿn ũn rico vÿ Topę vĩ jēmєnh kãtĩg mÿ, ãjag vєnhmãn kÿ. Ti kur vÿ há tãvĩ nĩ, kÿ ti nĩgé kãnĩm ja vÿ tÿ ouro nĩ. Kÿ ũn jagtar vÿ kãtĩg ke mÿ gé, kur kórég tu kÿ.

³ Kÿ ãjag hÿn tóg ũn rico mÿ: “ha tag kã nĩ, vєnh nĩg ja há kri,” he tĩ. Jó ũn jagtar mÿ ãjag hÿn tóg: “ha tã tá ję,” he tĩ, ke tũ nĩn kÿ: “ha inh mré nĩ, hã ra ęprã nĩ, gan kri,” he ãjag hÿn tĩ.

⁴ Hã ki ãjag tóg ũn rico to há nĩ ve nĩ, ti tũ tugrĩn. Jãvo ãjag tóg ũn jagtar to é he mÿ ve nĩ, ti jagtar nĩn kÿ. Ke tũg nĩ. Æjag tÿ jagnę ri ke nÿtĩ to jykren nĩ, ke tũ nĩ mÿ ra ãjag tóg vєnh jykre pãno han mÿ.

⁵ Inh kanhkã', jēmę há han ra. Æjag to sóg há nĩ (mÿr), hã kÿ sóg ãjag jyvєn mÿ. Topę vÿ ũn jagãgtar ag kupręg, ag tÿ ti to ricon jé, ti ki ge kÿ. Ga mĩ mÿn kÿ ag tóg jagãgtar nÿtĩ. Ęg Senhor ki ge kÿ ag tóg há nÿtĩ jãvo. Topę tÿ tÿ ęg pã'i nĩ ve jé ag tóg ke mÿ, ag tÿ ti to há nÿtĩn kÿ. Topę hã ne tag tó ja nĩgtĩ', ęg tÿ ti vєnh ke ti, kÿ tóg han ke mÿ, ã tÿ tó ja ęn ti.

⁶ Jãvo ãjag tóg ũn jagãgtar ag to é he tĩ. Ũn rico ag to ãjag tóg vĩ há han tĩ. Hã ra ũn rico ũ ag tóg ãjag to kórég nÿtĩ gé. Kÿ ag

tóg ãjag fóg mÿ ãjag to vÿ kónãn tÿ, ãjag fóg tÿ ãjag jé prÿr jé. Kÿ ãjag tóg to jagtar nÿtÿ sir, ag tÿ ãjag to vÿ kónãn tÿ ên to. Hã kÿ tóg sir vÿnhmÿ nÿ, ãjag tÿ ùn jagãgtar to é he ti.

⁷ Kÿ ùn rico ù ag tóg êg Senhor to é he tÿ gé. Ti to ag tóg vÿ kónãn tÿ gé, hã ra êg tóg tÿ ti mré ke nÿtÿ. Hã kÿ ag tóg êg to vÿ kónãn mÿ gé, ti to vÿ kónãn kÿ.

⁸ Topê tÿ vãsÿ êg mÿ vÿnh jykre nÿm ja ên ki króm nÿ, hã vÿ: “ã régre to há nÿmnÿ, ã tÿ vÿso há nÿ ri ke nÿmnÿ, ã régre tÿ,” he ja tóg nÿgtÿ êg mÿ, Topê ti. Kÿ tóg rán kÿ nÿ. ãjag tÿ tag han kÿ tóg há nÿ.

⁹ ãjag tÿ hã ra ùn rico to há nÿtÿn kÿ, ùn jagtar to kórég nÿtÿn kÿ, kÿ ãjag tóg ti vÿ mranh mÿ sir, ti tÿ êg jyvÿn ja ti. Kÿ Topê tóg ãjag to jykren kónãn mÿ, ãjag tÿ ti vÿ mranh kÿ.

¹⁰ Ha vé, hÿn ri ke mÿn êg kãmÿ ù tóg Topê tÿ êg mÿ vÿnh jykre nÿm ja kar ki króm tÿ. Hã ra tóg sir nÿn pir ki ti vÿ mranh mÿ. Kÿ ti tÿ ti vÿ mranh kãn vÿ sir, ti vÿ pir mranh kÿ.

¹¹ Topê tóg êg mÿ: “ã prÿ tÿ fi mré nÿ tÿg nÿ, kÿ ã mén tÿ mré nÿ tÿg nÿ gé,” he ja nÿgtÿ. Kÿ tóg êg mÿ: “jagnê tén tÿg nÿ,” he ja nÿgtÿ gé. Hÿn ri ke mÿn êg tóg êg prÿ tÿ fag mré nÿ tÿ nÿgtÿ. Êg tÿ hã ra jagnê tén kÿ êg tóg ti vÿ mranh kãn mÿ, ti tÿ êg jyvÿn ja ti.

¹² Kÿ tag to jykren nÿ, ãjag tÿ nÿn ù han ke to jykren kÿ. Êg Senhor vÿ êg jykre kar vég

tÿ, ti tÿ êg tÿ ti jykre ki króm mÿ ve sór kÿ. Kÿ ãjag jykre to jykren nÿ, ãjag vÿ to ke gé.

¹³ Êg tÿ jagnê jagãgtãn tÿ nÿn kÿ tóg êg jagãgtãn ke tÿ nÿ gé, êg Senhor ti, ti tÿ êg jykre tugnÿm ken kÿ, kurã ên kã. Êg tÿ hã ra jagnê jagãgtãn kÿ tóg êg jagãgtãn ke mÿ gé, ti tÿ êg jykre tugnÿm ken kÿ. Kÿ ti pi(jé) êg vóg kónãn mÿ sir’.

Ti ki rã há

¹⁴ Inh kanhkã’, ù tóg kejÿn: “ti ki sóg rã kÿ nÿ,” he tÿ, Topê to. Hã ra tóg ti vÿ han tÿ nÿgtÿ. Kÿ tóg ón kÿ ti ki rã kÿ nÿ ja nÿ. Kren ke tÿ tóg nÿ sir.

¹⁵ Kejÿn Jesus mré ke ù tóg kur vég tÿ nÿgtÿ, vÿjÿn vég tÿ tóg nÿgtÿ gé, Jesus mré ke ù fi ke gé.

¹⁶ Kÿ ãjag kãmÿ ù tóg hÿn ri ke mÿn ti mÿ, fi mÿ tóg: “tág!,” he mÿ. “Ha tÿg, jatun mÿ. ã jé kusa mÿg tÿ nÿ, ã jé kókÿr tÿ nÿ,” he tóg mÿ. Hã ra tóg fag mÿ nÿn ù nÿm tÿ nÿ. Kÿ tóg fagrÿnh mÿ fag mÿ: “ã jé jagtar tÿ nÿ,” he ja nÿ.

¹⁷ Ge ti nÿ, êg tÿ ón kÿ: “ti ki rã kÿ sóg jÿ,” hen kÿ. Êg tÿ ti vÿ han tÿ nÿ kÿ êg tóg fagrÿnh mÿ: “ti ki sóg rã kÿ nÿ,” he mÿ sir. Nÿn ù tÿ vÿ.

¹⁸ ãjag kãmÿ ù tóg hÿn ri ke mÿn: “ù tóg Jesus ki rã kÿ nÿ, jãvo ù tóg ti jykre han tÿ,” he sór mÿ, ãjag tÿ ti jykre han sór tÿ nÿtÿn kÿ. Tag to sóg ãjag mÿ: “inh hÿn ne tigrÿn ki kanhrãn mÿ, ã tÿ ti ki rã ja ti?” he mÿ. “ã tÿ ti jykre ki króm vãn kÿ sóg ki kagtÿg nÿ. “Ti mÿ Jesus ki rã kÿ jÿ nÿ vÿ?” he jé sóg ke

mũ ã to. Ājavo sóg ti jykre han tĩ inhhã. Hã to ã tóg ki kanhró nĩ, sỹ ti ki rã kỹ jẽ ti,” he jé sóg ke mũ, ãjag tỹ inh ki jẽmẽn kỹ.

19 “Topẽ vỹ tỹ ùn pir nĩ,” he ãjag tóg tĩ gé. Ājag tỹ ki hã tó vẽ. Kỹ Japo ag vỹ tag tó tĩ gé. “Pir tóg nĩ, Topẽ tĩ,” he ag tóg tĩ gé, Nén-Kóreg ag. Ag tỹ ti pir ki kanhró (hã) ra ag tóg krenkren ke tũ nĩ, ag tỹ ti jykre han tũ nĩn kỹ. Hã kỹ ag tóg kamẽgmẽg kỹ jũrũn ke tĩ sir, ag tỹ Topẽ to jykrén kỹ, Japo ag. Hã kỹ ãg tóg ãg tỹ Topẽ kãmén há (hã) ra krenkren ke tũ nĩ gé, ãg tỹ ti jykre han tũ nĩn kỹ.

20 Ājag tỹ tag to jykrén tũ nĩn kỹ ãjag tóg krĩ tũ (pẽ) nỹtĩ (mỹr). Ęg tỹ ti vĩ ki króm tũ nĩn kỹ ãg tóg ón kỹ ti ki ge kỹ nỹtĩ. Nén ù tũ vẽ sir, ãg tỹ ti ki ge kỹ nỹtĩ tag ti. Ęg mỹ tóg nén ù há han ke tũ nĩ.

21 Ęg jóg!jóg ve tỹ Abraão to jykrén nĩ. Topẽ tóg ti mỹ: “ã kósin tỹ Isaque tãnh kỹ pũn, inh mỹ,” he ja nĩ. Kỹ tóg ti mỹ: “hej,” he ja nĩ sir, Abraão ti. Hã kỹ tóg Topẽ mỹ há nĩ sir, Abraão ti, ti tỹ ti vĩ ki króm to há ja nĩn kỹ. Kỹ tóg ti to: “inh ki rã há han ja ti nĩ,” he mũ, Topẽ ti, Abraão to.

22 Ve ra ha. Ti tỹ Topẽ ki rã kỹ jẽn kỹ, hã kỹ tóg tĩ mỹ: “hej,” he ja nĩ, Abraão ti. Kỹ tóg, ti tỹ ti mỹ: “hej,” hen kỹ (tóg) ti ki rã kỹ jẽ ãn to tar nĩ sir, Topẽ vĩ ki króm ke to. Ge ti nĩ (mỹr).

23 Rán kỹ tóg nĩ gé, Abraão ti, kỹ tóg: “Topẽ vĩ kri tóg fi, Abraão ti,” he mũ, Topẽ vĩ tỹ

rán kỹ nĩ ki. “Hã kỹ ãg jóg mág tóg ti to: “inh ki rã há han ja ti nĩ,” he ja nĩgtĩ. Kỹ Topẽ tóg ti to: “ũ tỹ iso há nĩ ãn,” he tĩ,” he tóg, Topẽ vĩ tỹ rán kỹ nĩ ki, Abraão to.

24 Hã ki ãjag tóg vэг mũ. Ęg tỹ ti vĩ han kỹ tóg ãg to: “inh ki rã há han ja ti nĩ,” henh ke mũ gé. Ęg tỹ ón kỹ ti ki rã kỹ nỹtĩn kỹ ãg tóg hã ra ti mỹ há tũ nỹtĩ, Topẽ mỹ, ãg tỹ ti vĩ ki króm tũ nĩn kỹ.

25 Raabe fi to jykrén nĩ gé, ùn mén jafã ãn fi to. Ęg povo vỹ ù ag jẽgnẽ ja nĩ, ag tỹ fi jamã ve jé, cidade mág ãn ti. Kỹ fi tóg ag mỹ: “kãge jẽg ra,” he ja nĩ. Kỹ fi tóg ag kanhrãn ja nĩ sir, fi jamãn ki, ag tỹ ãpry ù mũ kãpa jé, ãmĩn ù mũ, ag kato tẽ ag tỹ ag vэг tũ nĩ jé. Tag to fi tóg kren mũ (mỹr), fi tỹ tag han to. Kỹ Topẽ tóg fi to: “inh ki rã há han fi,” he ja nĩ sir, fi tỹ ti vĩ kri fi to.

26 Ge ti nĩ gé, ãg mỹ. Ęg tỹ ti ki ge kỹ nỹtĩn kỹ ãg tóg ti vĩ kri fig mũ, Raabe fi ri ke. Ęg tỹ ti vĩ han tũ nĩn kỹ tóg ãg mỹ nén ù há han ke tũ nĩ gé, ãg tỹ ón kỹ ti ki ge mũ tigrĩn, ãg fár tỹ kuprĩg tũ ra ter kỹ nỹ ãn ri ke ti nĩ.

3

Ęg tỹ ãg nũnẽ tỹ Topẽ vĩ mranh ke tũ

1 Inh kanhkã', kãnhmar jagnẽ mỹ: “sỹ ã kanhrãn há tóg tĩ, ã tỹ kygnẽ to,” he tũg nĩ. Ęg kar vỹ kygnẽg tĩ. Kỹ Topẽ vỹ ãg tỹ kygnẽ to ãg vóg kónãn mág mũ, ãg tỹ kãnhmar ãg mré

Jesus ki ge kŷ nŷtĩ ag kanhrãn sór kŷ.

² Ęg kar vŷ kygnĕ (ka)mĕ nŷtĩ. Ũ tŷ ã vĩ ki kygnĕg tũ pĕ nĩn kŷ tóg kuryj kar nĩ sir. Ęg pi(jé) ne ki kygnĕg tĩ', Ęg tŷ Ęg vĩ ki kygnĕg tũ nĩn kŷ.

³ Cavalo to jykrĕn nĩ. Freio tŷ Ęg tóg ti jĕn kãra fig tĩ. Kŷ Ęg tóg tŷ ti vóg tĩ sir, cavalo ti, kŷ tóg ã tĩg ke ĕn ra tĩ mũ sir, ũ tŷ cavalo kri nĩ ĕn ti.

⁴ Kŷ canoa mág to jykrĕn nĩ gé. Ęhé tóg nŷ, hã ra kãka vŷ ti tĩn tĩ. Kŷ ag tóg ti vóg jafã tŷ ti vóg tĩ. Kŷ tóg ag mŷ ki ke tĩ. Ti vóg mũ ag mũnh ke ra tóg tĩ mũ sir. Ti vóg jafã sĩ ra tóg ki ke mũ, canoa mág ti.

⁵ Ge tóg nĩ, Ęg nũnĕ ti. Sĩ ti nĩ (mŷr), hã ra Ęg tóg tŷ vĩ mág han tĩ gé.

Pĩ ri ke tóg nĩ. Ti sĩ ra tóg kejĕn vãnh pũn tĩ (mŷr), nĕn kar ti.

⁶ Ęn ri ke tóg nĩ, Ęg nũnĕ ti. Tŷ Ęg tóg vĕnh jykre pãno tó tĩ. Kŷ Ęg tóg Ęg vĩ tag to kavéj kar nŷtĩ, Ęg tŷ Ęg vĩ tag to ti vĩ mranh kŷ. Ęg kãsir nŷtĩ ra Ęg tóg vĕnh jykre pãno tó tĩ, Ęg sanh há nŷtĩ ra ke gé, Ęg kófa ra ke gé. Japo tŷ Ęg krĩn hã vĕ, Ęg tŷ Ęg vĩ ki Topĕ vĩ mranh jé.

⁷ Ha mĕ, bicho kar vŷ tŷ Ęg mĕg nŷtĩ. Ũ ag vŷ mĩg tŷ mĕg nŷtĩ, kŷ ũ ag vŷ sĕsĩ tŷ mĕg nŷtĩ, ũ ag vŷ pŷn tŷ mĕg nŷtĩ, ũ ag vŷ goj ki ke kar tŷ mĕg nŷtĩ gé. Ti kar kanhrãn Ęg tóg tĩ mŷr, ha mĕ.

⁸ Hã ra Ęg pi(jé) Ęg nũnĕ kanhrãn tĩ'. Ti kanhrãn ki kagtĩg Ęg nŷtĩ. Vĕnh jykre pãno tãvĩ tó sór Ęg tóg tĩ. Kŷ tóg

veneno ri ke nĩ, Ęg vĩ ti. Tŷ Ęg tóg jagnĕ kãgtĕn ri ke han tĩ, Ęg nũnĕ tŷ, jagnĕ mŷ vĩ kónãn kŷ.

⁹ Tŷ Ęg tóg Topĕ mŷ vĩ há han tĩ, Ęg jóg mág mŷ, Ęg nũnĕ tŷ. Kŷ Ęg tóg tŷ ĕprã ke ag mŷ vĩ kónãn tĩ gé. Hã ra Topĕ tóg Ęg han, Ęg tŷ ti ri ke nŷtĩ jé. Kŷ Ęg tŷ jagnĕ mŷ vĩ kónãn kŷ Ęg tŷ Topĕ mŷ vĩ kónãn ri ke vĕ sir.

¹⁰ Ęg jĕn kãtã tóg kãkutĕ tĩ, Ęg vĩ há ti, Ęg vĩ kónãn ti ke gé. Pir ti nĩ, Ęg jĕnky ti, hã ra Ęg tóg tŷ vĩ régre han tĩ. Tag vŷ kórég tãvĩ nĩ, inh kanhkã'.

¹¹ Goj tŷ vĕnh kanĕ to jykrĕn nĩ, ĕganĕ to. Ti há nĩn kŷ tóg há nĩ, goj ti. Ti kajã nĩn kŷ tóg kajã nĩ. Ti pi(jé) tŷ goj régre nĩ', goj tŷ Ęg kanĕ ti. Pir tóg nĩ.

¹² Kŷ ka kanĕ to jykrĕn nĩ gé. Ka tŷ pĕnva ki Ęg tóg jymi vég tũ nĩgtĩ (mŷr). Kŷ Ęg tóg vãnh tŷ jóhó ki pĕnva vég tũ nĩgtĩ gé. Pir ti nĩ, ka kanĕ ti. Ge ti nĩ gé, goj ti. Ti kajã nĩn kŷ tóg kajã nĩ gé. Kŷ gemnĩ gé, ãjag nũnĕ tŷ. Vĩ pir han nĩ.

Topĕ tŷ Ęg mŷ krĩ há nũm

¹³ Ājag mŷ krĩ há nŷtĩ'? Ājag mŷ Topĕ vĩ ki kanhró nŷtĩ'? Kŷ tóg há tĩ. Kŷ vĕnh jykre há kar han kŷ nŷtĩmnĩ. Hã ki vĕnh kar vŷ ãjag krĩ há venh ke mũ sir. Hã ra tŷ vĩ mág han tũg nĩ. Tŷ vĕnh kãfór han tũg nĩ gé.

¹⁴ Ājag tŷ ũ to fe kórég nĩn kŷ tóg tŷ ũ nŷ jãvo, ãjag tŷ jagnĕ kãfór nŷtĩ sór kŷ, jagnĕ to jũ (ka)mĕ nŷtĩn kŷ, ãjag tŷ vĕsŷ ũn mág han sór kŷ. Ājag tŷ tag han kŷ vĕso: "krĩ há inh nĩ,

Topê vî ki kanhró inh nĩ,” he tũg nĩ. Vênh ó vê, tag ti.

¹⁵ Topê tỹ êg kanhrãn ja pijé', êg tỹ ù to fe kórég nĩ ti, jagnê kãfór han sór mũ ti, jagnê to jũ (ka)mê ti ke gé. Êprã vênh jykre vê (mỹr), Topê kato tê ti. Japo jykre vê (mỹr), êg fe jũ tag ti.

¹⁶ Êg tỹ jagnê kãfór han sór kỹ êg tóg jagnê kato têgtê mũ sir, êg tỹ vêsỹ ùn mág han sór kỹ. Kỹ êg tóg vî mê han kỹ jagnê to vênh jykre pãno han kãn mũ sir.

¹⁷ Êg tỹ hã ra Topê tỹ êg kanhrãn mũ han kỹ êg tóg tag han tĩ, ha mê: jãnhkri êg nỹtĩ, kavéj tũ (mỹr). Jagnê to êg tóg krĩ kusa nỹtĩ. Jagnê mỹ êg tóg komêr hã vî tĩ gé. Û tỹ êg mré vĩn kỹ êg tóg ti vî mênh mũ, ti vî há nĩn kỹ. Jagnê jagãgtãn êg tĩ sir. Nén kar há han êg tĩ. Topê vî to êg tar nỹtĩ. Jykre régre tũ êg nỹtĩ.

¹⁸ Êg tỹ ti jykre tag han kỹ êg tóg jagnê krĩ kuprãg mũ sir, êg tỹ jykre kuryj nỹtĩ jé sir, ha mê.

4

Êg pi(jé) tỹ Topê kato têgtê mũ ag mré ke nỹtĩ'

¹ Ājag hã ne tóg jagnê to jũgiũ nỹtĩ'. Hê ri ken kỹ hỹn'? Ājag tỹ nén ù vênhmỹ han sór nỹtĩn kỹ, hã kỹ ājag tóg jagnê to krĩ rỹ nỹtĩ. Jykre pãno ājag tóg nỹtĩ (mỹr), kỹ ājag tóg vênh jykre há kato tê nỹtĩ sir.

² Nén ù to én mũ (hã) ra ājag tóg mãn sór mũ, hã kỹ ājag tóg végtũ nĩ (mỹr). Hã kỹ ājag tóg jagnê kãgtén sór mũ sir, jagnê

tỹ nén ù mãn jé. Jagnê tỹ nén ù to én kỹ ājag tóg jagnê kato têgtê ti. Ājag tỹ Topê mỹ to vî tũ nĩn kỹ, hã kỹ ājag tóg végtũ nĩgtĩ.

³ Ājag tỹ ti mỹ to vî mũ ra ājag tóg venh ke mũ vê, hã ra ājag tóg vî há han tũ nĩgtĩ gé, hã kỹ tóg ājag mỹ han tũ nĩgtĩ sir, Topê ti. Ti mỹ ājag tóg to vî mũ, ājag tỹ nén to én mũ ên mãn jé. Hã ra tóg ti mỹ tỹ ù nỹ, ājag tỹ nén to én mũ ên ti. Hã kỹ tóg ājag mỹ han tũ nĩ sir, Topê ti.

⁴ Êg tỹ Topê ki rã kar kỹ vênh jykre pãno to én kỹ êg tóg ti kato tê mũ sir. Ûn tỹtã kórég fi ri ke êg nỹtĩ, êg tỹ ge kỹ. Ā mén kavénh fi tóg tĩ, ù to én kỹ. Êg tỹ êprã vênh jykre to én kỹ êg tóg Topê kato tê mũ sir. Tag ki kanhrãn nĩ, to jykrén mág han nĩ.

⁵ Topê vî tag to jykrén nĩ, ù tỹ vãsỹ rán kỹ nĩ ên to, ha mê: “Topê kuprĩg vỹ tỹ êg jagrê nĩ, Topê tỹ tỹ êg jagrên kỹ. Kỹ tóg êg ki rĩr mũ sir. Kỹ êg tỹ nén ù vênhmỹ to há nĩn kỹ tóg fe kaj nĩ, Topê kuprĩg ti,” he tóg, Topê vî rá ki. Ti pi(jé) véké tag to ja nĩ'. Kỹ tag to jykrén nĩ.

⁶ Hã ra tóg êg tar han tĩ, Topê kuprĩg ti, êg tỹ nén ù vênhmỹ han sór tag kato tê jé. Êg jagãgtãn kỹ tóg êg tar han tĩ. Kỹ tóg tag to mũ sir, ha mê: “Topê vỹ ù tỹ: “ùn mág vỹ tỹ inh nĩ,” he mũ ên ag to kórég nĩ, hã ra tóg ù tỹ: “nén ù tũ vỹ tỹ inh nĩ,” he mũ ên ag jagãgtãn tĩ,” he tóg, ti vî rá ki.

⁷ Hã kỹ Topê mỹ: “hej,” hemnĩ, ti tỹ ājag krĩn kỹ. Japo

mỹ: “nejé,” hemnĩ, ti tỹ ãjag krĩn sór kỹ. Kỹ tóg ãjag tovãnh ke mũ sir, Japo ti, ãjag tỹ ti mỹ: “nejé,” hen kỹ.

⁸ Topẽ mré vĩ kỹ nỹtĩmnĩ, kỹ tóg ãjag to há nĩ sir, ãjag mré ti nĩ nĩ gé, ěg jóg mág ti. Ti vĩ mranh tĩ vỹ tỹ ěg nỹtĩ. Kỹ ti vĩ mranh tovãnh nĩ. Jykre régre ěg nỹtĩ gé. Kỹ vẽn h jykre pir han kỹ nỹtĩmnĩ, hã vỹ: Topẽ jykre, he mũ.

⁹ ãjag tỹ Topẽ vĩ mranh kỹ mỹ jagy nỹtĩmnĩ. Vēsýrénh nĩ, fỹmnĩ, ny mãn tũg nĩ. Fe kaj nỹtĩmnĩ. To krĩ kufy nỹtĩmnĩ. Mỹ sér tũ nỹtĩmnĩ, ãjag tỹ Topẽ vĩ mranh kỹ.

¹⁰ Ěg Senhor mỹ: “kórég inh nĩ, isỹ vẽn h jykre pãno han kỹ,” hemnĩ. Kỹ ti hã vỹ ãjag mỹ vĩ há han ke mũ sir, kỹ ãjag fe vỹ mrin ke mũ sir.

Ěg tỹ jagnẽ to vĩ kónãh ke tũ

¹¹ Inh kanhkã', jagnẽ to vĩ kónãh tũg nĩ. ãjag tỹ jagnẽ to vĩ kónãh kỹ ãjag tóg Topẽ jykre to vĩ kónãh mũ sir, kỹ ãjag tóg to: “nén ũ tũ vẽ,” he mũ sir, Topẽ tỹ ěg mỹ vẽn h jykre nĩm ja ěn to. ãjag tỹ hã ra ti jykre to vĩ kónãh kỹ ãjag tóg ti ki króm ke tũ pẽ nĩ sir.

¹² ũ tỹ ěg mỹ ã jykre nĩm ja ěn vỹ pir nĩ, kỹ tóg ěg jykre tugnỹm ke mũ gé sir. Ti hã tóg: “ẽn vỹ kren ke mũ, ěn vỹ kren ke tũ nĩ,” henh ke mũ, ã pir mỹ, Topẽ ti. Hã kỹ tóg vẽn hmỹ nỹ, ãjag tỹ jagnẽ to vĩ kónãh kỹ.

Ěg tỹ vēsý ũn mág han sór ke tũ

¹³ ãjag kãmĩ ũ tóg vēsóg ki ãjag tỹ nén han ke to jykrén sór tĩ, Topẽ ki jẽmẽ sór tũ nĩn kỹ. “Hẽn ri ke mũn sóg vaj kỹ ěn ra tĩ mũ, ke tũ nĩn kỹ vaj ũn kỹ,” he ãjag tóg tĩ. “Cidade ěn ra sóg tũg mũ, tá sóg nĩnh mũ. Tá sóg prỹg pir tũg' he mũ. Kỹ sóg negociar henh ke mũ, sỹ rico nĩ jé,” he ãjag tóg tĩ (mỹr).

¹⁴ Hã ra ãjag pi(jé) ãjag tỹ nén venh ke ki kanhró nỹtĩ', ha mẽ. Ne ve jé ěg ke mũ, vaj kỹ? Ha'. Ki kagtũg ěg nỹtĩ. Ěg mỹ vaj kỹ ter ke tũ nĩ vỹ? Ha'. Krũj sĩ ri ke ěg nỹtĩ. Ve sĩ han ěg tĩ, krũj sĩ ti. Ěg tỹ ki ěvãnh mãn mũ ra tóg tũ' he mũ sir. Ge ěg nỹtĩ. Kãnhmar ěg tóg tũg' he tĩ, ěg ter kỹ.

¹⁵ ãjag tỹ ãjag tỹ nén han ke to jykrén kỹ Topẽ mũ ěkrén nĩ, ũ tỹ ěg mỹ ěg ter ke kurã tónh ke ěn mũ. “Ti mỹ sỹ nén han ke to há nĩ vỹ?” hemnĩ.

¹⁶ Hã ra ãjag tóg vēsý ũn mág han sór mũ, ãjag tỹ: “tag han jé sóg ke mũ,” hen kỹ. Há tũ ti nĩ, ěg tỹ vēsý ũn mág han sór kỹ.

¹⁷ Kỹ tag tóg vẽn hmỹ nỹ gé, sỹ tónh ke tag, ha mẽ. Kejẽn ěg tóg nén ũ há to jykrén tĩ, ěg tỹ han jé. Hã ra ěg tóg han tũ nĩgĩ. Kỹ ěg tỹ Topẽ vĩ mranh ũ vẽ gé sir, ěg tỹ nén ũ há han sór mũ (hã) ra han tũ nĩn kỹ.

5

Ũn rico ag vēsýrénh ke

¹ Vãhã sóg ũn há ag to tag tóg mũ sir, ũn rico ag to, ũ tỹ Jesus ki ge jãvãnh ěn ag to, ha mẽ. Ag mỹ sóg: “ha mẽ,” he mũ. “Kygfỹ ra. Vēsýrénh mág han

ra. Vēnh jagtar jagy ve jé ājag tóg ke mū.

² Ājag tỹ nén ũ vỹ vag kãn ke mū. Ājag kur sīnvī ēn vỹ tãryj kãn ke mū gé, ti ga tỹ kon kỹ.

³ Kỹ ājag jānkamy vỹ vēso jāgfanh ke mū. Ājag tỹ ũn jagāgtān vānh ja tugrīn tóg vēso jāgfanh ke mū. Tag ve kỹ vēnh kar vỹ ājag jykre kórég venh ke mū. Kỹ ājag tóg to jagtar ke mū, kỹ tóg pĩ tỹ ěg pũn ri ke nĩ, ājag jagtar ke ti, ājag vēsỹrénh ke ti. Ājag hã ne tóg ājag tỹ nén ũ génh mág', ěg tỹ kãnhmar kurã tỹ ěgno tá krỹg he mū (hã) ra, Topẽ tỹ ěg jykre tugnỹm ke kurã ēn tá.

⁴ Ājag camarada ag vỹ ājag jakré tá rãnhãj mū, hã ra ājag tóg ag mỹ kajãm tũ nĩgtĩ. Hã ra ěg Senhor vỹ végtĩ. Ājag camarada vēsỹrénh mẽ ti (mỹr). Vēnh kar pã'i vē (mỹr), ěg Senhor ti, nén kar pã'i vē gé.

⁵ Ājag tỹ nén ve sór mū kar ve ājag huri, vējēn mág, kur sīnvī, ājag tỹ nén to én mū kar ēn ti. Tag tãvĩ to ājag tóg jykrén tĩ, ājag tỹ ga kri mũn kỹ. Tãg gy ājag nỹtĩgtĩ, ěg tỹ ěg mẽg jēn há han tĩ ri ke, ěg tỹ tĩ tãnh jé. Kakó ti nĩ, Topẽ tỹ ājag tãnh ke ti, mẽr, ha mẽ.

⁶ Kỹ ājag tóg ũn jykre kuryj ag vóg kónãn tĩ gé. Ag kãgtén ājag tóg tĩ, hã ra ag tóg ājag kato tē tũ nĩgtĩ, ājag kato vĩ tũ ag tóg nĩgtĩ gé. Jykre kórég ājag nỹtĩ," he sóg mū, ũn rico ag mỹ.

Ěg tỹ ěg Senhor kãtĩg mãn jãvãnh ke

⁷ Inh kanhkã', ěg Senhor kãtĩg ke jãvãnh nĩ, jatun mỹ, ag jãvo. Ěg tỹ ěkrãn kar kỹ ěg tóg ti mog jãvãnh tĩgtĩ, jatun mỹ. Kỹ ta tóg kri kutē mū, kỹ tóg kri kutē mãn mū gé sir. Kỹ vãhã ěg tóg ti kanē végt mū.

⁸ Tag ri ke han nĩ, jatun mỹ ti kãtĩg jãvãnh nĩ, ěg Senhor ti. Tĩ jãvãnh to tar nỹtĩmnĩ. Kãnhmar ti kãtĩ mū, ěg Senhor ti, ha vemnĩ.

⁹ Inh kanhkã', jagnē vĩ to vĩ vĩ he tũg nĩ. Ke tũ nĩ mū ra ěg Senhor tóg ājag jykre ve kỹ ājag vóg kónãn ke mū. Ha vé, vãhã ti vēnh ven ke kãtĩg mū kãnhmar, ũ tỹ ěg jykre tugnỹm ke mū ēn ti.

¹⁰ Vãsỹ Topẽ vĩ tó tĩ ag to jykrén. Topẽ vĩ tó ag tóg tĩ, kỹ ũ tỹ mẽ jãvãnh ja ēn ag tóg ag vóg kónãn. Ge ra ag tóg jatun mỹ Topẽ vĩ tó ja nĩgtĩ, ag tỹ ag vóg kónãn mū ra. Ag ri ke han nĩ, vãsỹ Topẽ vĩ tó tĩ ag ri ke.

¹¹ Ag jykre to jykrén nĩ. Ājag jagtar nỹtĩ ra ag tóg to krónh ke ja tũ nĩgtĩ gé. Hã kỹ Topẽ tóg ag mỹ vĩ há han mū sir, ti vĩ tó tĩ ag mỹ.

Topẽ mré ke tỹ Jó kãme mẽ ājag huri. Ā jagtar ra tóg to krónh ke ja tũ nĩ gé. Kỹ vãhã Topẽ tóg ti ki rĩr há han mū, ti jagtar kỹ. Hã ki ājag tóg ěg Senhor jykre végt mū sir. Ěg jagāgtān tóg mū, ti tỹ ěg jagtar nỹtĩ ven kỹ. Kỹ tóg sir ěg jagāgtān tovãnh tũ nĩgtĩ.

¹² Inh kanhkã', ón kỹ vĩ tũg nĩ. Ón kỹ: "hej," he tũg nĩ. Ki hã tómnĩ, ājag tỹ: "hej," hen kỹ, Topẽ tỹ ājag vóg kónãn tũ nĩ jé. Kỹ ón kỹ: "Topẽ vỹ ki

kanhró nĩ,” he tũg nĩ gé. Ón kÿ: “ũ tÿ kanhkã tá nĩ ěn vÿ ki kanhró nĩ,” he tũg nĩ gé. Ón kÿ: “ũ tÿ ga kri nĩ ěn vÿ ki kanhró nĩ,” he tũg nĩ gé. Ki hã tómnĩ. Ón tũg nĩ, jagně mÿ.

Ěg tÿ ũn kaga ag to Topě mré vĭnh ke

¹³ Ājag tÿ nén ũ jagy ven kÿ Topě mré vĭmnĩ. Ājag mÿ sér tĭn kÿ Topě mÿ jãn nĩ, kÿ ti jé tómnĩ.

¹⁴ Ājag kaga nÿtĭn kÿ igreja to pã'i ag jé prĕrmnĩ, Jesus tũ ki rĭr tĭ ag. Ěn ag vÿ ũn kaga to Topě mré vĭnh ke mũ, kÿ ag tóg azeite tÿ ũn kaga to tĭn ke mũ, ěg Senhor jiji tó kÿ.

¹⁵ Ag tÿ ěg Senhor mré vĭn kÿ tóg ũn kaga ěn tÿ há' henh ke mũ sir, ěg Senhor ti, ag tÿ ti tÿ há' henh ke to: “hÿ mÿ vÿ?” he tũ nĭn kÿ. Ěg Senhor vÿ ti tÿ há' henh ke mũ sir. Ũn kaga tÿ ti vĭ mranh kÿ Topě vÿ ti mÿ vĕnh pãte fón ke mũ gé sir.

¹⁶ Hã jé jagně mÿ tó, ājag tÿ Topě vĭ mranh ja ti. “Tĭ vĭ mranh inh, tag han kÿ,” hemnĩ jagně mÿ. Kÿ jagně to Topě mré vĭmnĩ gé, ti tÿ ājag tÿ há' he jé, ti tÿ ājag kaga tÿ tũg' he jé. Ěg tÿ vĕnh jykre kuryj han kÿ tóg ěg vĭ mĕ kÿ han mũ sir, Topě tĭ, ěg tÿ ti mÿ nén to vĭ', to vĭ' hen kÿ. Nén há kar ve jé ěg tóg ke mũ sir, ěg tÿ ti mÿ to vĭn kÿ, ěg Senhor mÿ.

¹⁷ Topě mré ke tÿ Elias mĭ ěkrén nĩ. Ěg mré tóg ěprã ke ja nĭgtĭ, Elias ti. Hã ra tóg Topě mré vĭ', vĭ' he ja nĭgtĭ, ta kutĕ tũ nĩ jé. Kÿ tóg kutĕ tũ ja nĭgtĭ,

ta ti, prÿg tãgtũ kri kysã tÿ 6 ki.

¹⁸ Kÿ tóg Topě mré vĭ mãn ja nĭgtĭ, Elias ti, kÿ tóg kutĕ ja nĩ sir, ta ti. Kÿ nén kar tóg gan kri mur mãn ja nĩ, kÿ tóg kanĕn mãn ja nĭgtĭ gé sir. Topě tÿ ti vĭ han hã vĕ. Tag mĭ ěkrén nĩ.

¹⁹ Inh kanhkã', kejĕn ěg mré ke ũ tóg prãnh ke tĭ, vĕnh vĭ há tovãnh kÿ. Kÿ ti jyvĕn nĩ, ti tÿ kygnĕ mãn tũ nĩ jé.

²⁰ Kÿ ũ tÿ ti mré vĭ mũ ěn tóg ti kren han mũ sir, nũgme to, ti tÿ ā jykre kygnĕ ja ěn tovãnh kÿ. Kÿ Topě vÿ ti tÿ ā vĭ mranh ja ěn tÿ vĕnh pãte fón mũ sir. Tag to jykren nĩ.

Hã vĕ.

PEDRO TỸ CARTA HAN VÉN

1 Pedro tỹ ãjag mỹ carta rán hã vê, Jesus Cristo tỹ inh fêg hã vê, sỹ tỹ ti apóstolo jê jé. Sỹ Topê tỹ ùn kuprêg mũ ag mỹ rán hã vê. Êg mré ke tũ ag kãmĩ ãjag tóg mũgtĩ, ù tỹ Jesus ki ge tũ ag kãmĩ, Ponto tá, Galácia tá, Capadócia tá, Ásia tá, Bitínia tá ke gé.

2 Topê vỹ ãjag kuprêg. Vãsỹ tóg to jykren ja nĩ, ãjag kuprêg ke to, êg jóg tỹ Topê ti. ãjag mỹ tóg ã kuprĩg jênê, hã kỹ ãjag tóg tỹ ti tũ nỹtĩ, ãjag tỹ Jesus Cristo ví kri fi jé, ti tỹ ã kyvénh tỹ ãjag kygpe jé, ãjag tỹ ti ri ke há nỹtĩ jé. Topê jé ãjag tar han mãn', han mãn' hé, kỹ ãjag jé krĩ kãnhvy nỹtĩ.

Topê tỹ êg mỹ nén ù há ven ke

3 Topê mỹ sóg ví há han tĩ, êg Senhor tỹ Jesus Cristo panh mỹ. Êg jagãgtãn tãví han tóg tĩ. Jesus Cristo rĩn mãn tóg, ti ter kar kỹ, kỹ tóg Jesus tugrĩn êg mur mãn ri ke han tĩ gé. Kỹ tóg êg mỹ sér tĩ,

4 Êg tỹ kãnhkã mĩ êkren kỹ. Tá êg tóg nén ù sĩnvĩ kar venh ke mũ. Tá êg tũ vỹ tũ' henh ke tũ pẽ nĩ. Kómóg ke tũ tóg nĩ, tá êg tũ ti, tá ù tóg ti kókén ke tũ nĩ gé.

5 Topê ki ãjag tóg ge kỹ nỹtĩ, kỹ tóg ãjag ki rĩr há han nĩ nĩ. Nén ù kar han há tóg nĩ, kỹ tóg êg ki rĩr há han tĩ gé, Topê ti. ãjag krenkren han jé tóg ke

mũ, ãjag tỹ ti tỹ êg mỹ nén nĩm ke mũ ên ve jé. Nĩm han kỹ tóg nĩ nĩ, ti tỹ êg mỹ nén ven ke ên ti. Kurã tỹ êgno ki êg tóg ên venh ke mũ.

6-7 Ver tóg ãjag mỹ jagy tĩ. Ge ra mỹ sér nỹtĩmĩ. Kãnhmar tóg tũ' henh ke mũ, nén tỹ êg mỹ jagy nĩ tag ti. Topê tỹ êg jykre ve sór vê, hã kỹ êg tóg ver nén ù jagy ve vén tĩ. Êg tỹ ti jagy to tar nỹtĩn kỹ tóg vég mũ, êg tỹ ti ki rã há han kỹ nỹtĩ ti. Ha vé, ouro rỹg êg tóg tĩ, pĩ rỹ jagy ki, êg tỹ ti há nĩ ên ve jé. Ge ti nĩ, êg mré. Tũ' he jé tóg ke mũ, ouro ti. Ouro kãfór ti nĩ, êg tỹ ti ki rã ti. Êg tỹ nén ù jagy ve to tar nỹtĩn kỹ tóg ve há tĩ, êg tỹ ti ki rã há han kỹ nỹtĩ ti. Kỹ tóg êg to ví há han ke mũ, Cristo ti. Êg tỹ tóg ùn mág han ke mũ, ùn tar, Jesus tỹ vênh kar mỹ vênh ven ke kurã ên kã.

8-9 Ti to há ãjag nỹtĩ, ãjag tỹ ti ve ja tũ (hã) ra. Ti ki ge kỹ ãjag nỹtĩ, ãjag tỹ ti vég tũ ra. Hã kỹ ãjag tóg krenkren ke mũ. ãjag krenkren ke ên hã tóg ãjag mỹ sér pẽ tĩnh mũ, sér gy ti tĩnh mũ, ha vemnĩ. ãjag fe tóg mrin ke tãví han ke mũ, kurã ên kã, ha vemnĩ.

10-11 Topê ví tó tĩ ag tóg vãsỹ tó ja nĩgtĩ, Topê tỹ ùri êg krenkren han mũ tag ti. Topê kuprĩg vỹ ag kãnhrãn ja nĩ. Ag mỹ tóg Cristo tỹ êg jagfy jagtar jagy han ke kãmén ja nĩ. Kỹ tóg ag mỹ ti tỹ kar kỹ tỹ ùn mág jênh ke tó ja nĩ gé, ti tỹ êg jagfy vêsỹrénh kar kỹ tỹ ùn mág nĩnh ke ti. Kỹ ag tóg tag ve sór ja nĩgtĩ, vãsỹ Topê ví tó

tĩ ag. “Kurã tỹ hẽ kã kenh ke nẽ hỹn?” he ja ag tóg nĩgtĩ, Cristo jagtar ke to. “Tĩ tỹ hẽ ri kenh ke nẽ?” he ja ag tóg nĩgtĩ gé. Tag ve sór tãvĩ ja ag tóg nỹtĩgtĩ.

12 Hã ra Topẽ tóg ag mỹ: “inh pi(jé) ãjag hã mỹ tag ven ke mũ,” he ja nĩ. “Ãjag nón ke ag hã mỹ ke vẽ, ag hã ne ãjag tỹ nén tó mũ venh ke mũ,” he ja tóg nĩ, Topẽ ti, vãsỹ ti vĩ tó tĩ ag mỹ. Ti tỹ ag mỹ ãjag tó jan hã vẽ. Hã kỹ ãjag tóg hur mẽ, ti mré ke ù ag tỹ ãjag mỹ Jesus kãme sér kãmén kỹ. Topẽ kuprĩg vỹ ag tar han ja nĩ, Topẽ tỹ ag mỹ ã kuprĩg jẽnẽn kỹ, kanhkã tá, hã kỹ ag tóg ãjag mỹ ti kãmén kãmũ ja nĩ. Ha vé, Topẽ tỹ jẽnẽ jafã ag tỹ ki kanhrãn há tóg tĩ, ãjag tỹ ti kãme mẽg mũ tag ti, hã ra ag tóg ki kagtĩg nỹtĩ.

Ëg tỹ Topẽ vĩ ki króm kãn ke

13 Hã kỹ Topẽ tỹ ãg mỹ nén tó mũ hã han sórmnĩ. Vẽnh ki ãmẽmĩ, Jesus tỹ ãg mỹ nén nĩm ke mũ ãn hã mĩ êkrén nĩ. Jesus tỹ vẽn ven ke kurã ãn kã ãg tóg venh ke mũ sir, ti tỹ ãg mỹ nén nĩm ke mũ ãn ti.

14 Vãsỹ ãjag tóg ãjag tỹ nén to én mũ ãn han ja nĩgtĩ, ãjag tỹ Topẽ vĩ mẽ ja tũ nỹtĩn kỹ. Ûri Topẽ vĩ hã ki króm nĩ, ãjag tỹ vãsỹ nén han ja ãn tovãnh kãn nĩ.

15 Topẽ jykre hã han nĩ, kỹ tóg vẽn ven mũ, ãjag tỹ tỹ ti tũ nỹtĩn ti. ãjag tỹ ti jykre hã han jé Topẽ tóg ãjag kuprẽg. Há tãvĩ ti nĩ, Topẽ ti, kỹ ti jykre ri ke han nĩ.

16 Tag tó ja ti nĩ, ha mẽ: “Ûn há pẽ vỹ tỹ inh nĩ, kỹ inh ri ke nỹtĩ sórmnĩ, vẽn jykre há hã han kỹ nỹtĩmĩ,” he ja tóg nĩ, Topẽ ti.

17 Ëg tỹ Topẽ mré vẽnén kỹ ãg tóg ti mỹ: “ãg jóg,” he tĩ. Hã kỹ ãg tóg ti kamẽg ke mũ, ti tỹ tỹ ãg jóg nĩn kỹ. Ha vé, ãg kar tỹ nén han mũ vэг ti nĩgtĩ, kỹ tóg vẽn kar jykre ki kanhró kar nĩ, Topẽ ti, kỹ tóg vẽn kar jykre tónh ke mũ. Ver ãg tóg ù tỹ ti ki kagtĩg ag kãmĩ mũgtĩ. Ëg tỹ ag kãmĩ mũn kỹ ãg tóg Topẽ vĩ ki króm há han ke mũ.

18 Kaja e to tóg ãg kygjãm ja nĩ, ki kanhró ãjag tóg nỹtĩ. ãjag jo ke ag vỹ ãjag jo vẽn jykre kórég han ja nĩgtĩ, ãjag tỹ ag nón han jé. Hã ra tóg kaja e to ãjag kygvãn ja nĩgtĩ, ãjag tỹ vẽn jykre kórég ãn han mãn tũ nĩ jé. Kaja e to tóg ãg kygjãm. Ouro to ke pijé'. Prata to ke pijé', ti kaja ãn ti. Tũ' he jé tóg ke mũ, ouro mré prata ti.

19 Hã ra tóg ã kyvénh hã to ãg kygjãm, kỹ tóg tũ' he jãvãnh nĩ, ti kyvénh ti. Nén ù kaja kãfór kar ti nĩ, ti kyvénh ti. Ûn há tãvĩ vỹ tỹ ti nĩ, ù tỹ ã kyvénh tỹ ãg kygjãm mũ ãn ti, hã vỹ: Cristo, he mũ. Kygnẽ ja tũ pe ti nĩ. Kỹ tóg ovelha hã tãvĩ ri ke nĩ, ti tỹ ãg jagfy ter kỹ.

20 Topẽ vỹ ti kuprẽg, ti tỹ ãg jagfy ter jé. ã tỹ nén ù kar han tũ ki tóg ti kuprẽg, vãsỹ. Hã ra tóg ùri ga kri mur ja nĩ, ãjag tỹ ti vĩ mẽ jé, kurã tỹ ãgno to hã.

21 Ti tũgrĩn ãjag tóg Topẽ ki ge kỹ nỹtĩ. Ti rĩn mãn ja tóg nĩ, Topẽ ti, kỹ tóg ti tỹ ùn mág han

ja nĩ gé, kanhkã tá. Kĩ Topẽ ki rã há han nĩ. Ājag krenkren han jé tóg ke mũ, ha vemnĩ.

22 Topẽ vĩ pẽ ki króm ājag tóg tĩ, hã kĩ ājag tóg jãnhkrig kĩ nỹtĩ ha, ũri. Ājag mré ke kar ag to ājag tóg há tãvĩ nỹtĩ gé. Kĩ jagnẽ to há nỹtĩ to tar nỹtĩmnĩ gé. Ón kĩ jagnẽ to há nỹtĩ tũg nĩ.

23 Topẽ vĩ ājag han mãn, kĩ tóg ěg mur mãn ri ke nĩ. Ā vĩ tỹ tóg ěg han mãn ja nĩ. Rĩr ti nĩ, ũn vĩ mũ ti, hã vĩ: Topẽ, he mũ. Tũ' henh ke tũ ti nĩ. Ti tỹ ěg han mãn kĩ tóg tỹ ěg panh pir nĩ, ũn ter ke tũ ěn ti. Ěg panh ter mũ ěn ri ke tũ ti nĩ.

24 Hã kĩ tag tóg rãn kĩ nĩ, ha mẽ: “ěprã ke ag vĩ re ri ke nỹtĩ, re fej sĩnvĩ ěn ri ke. Hã ra tóg kãnhmar tóg tĩ, re ti, kĩ ti fej tóg kãgter kãn tĩ. Kĩ ěprã ke ag tóg kãnhmar kãgter tĩ gé, re fej ri ke.

25 Jãvo Topẽ vĩ vĩ tũ' henh ke tũ pẽ nĩ,” he tóg, Topẽ vĩ tỹ rãn kĩ nĩ ki. Tag mẽ ājag. Topẽ vĩ sér to ken hã vẽ.

2

Jesus tỹ pó há ri ke nĩ

1 Hã kĩ ājag jykre kórég tovãnh kãn nĩ. Ón mãn tũg nĩ. Ũ lograr he mãn tũg nĩ. Ũ tũ to ěn mãn tũg nĩ. Ũ to vĩ kónãn mãn tũg nĩ gé.

2 Nẽnẽ vĩ leite kron (ka)mẽ nĩgtĩ. Topẽ vĩ vĩ ěg mẽ gĩr sĩ pafa mũ ěn ri ke nĩ. Kãnhmar vẽnĩ vĩ há ěn mẽ mãn', mẽ mãn' hemnĩ. Kĩ ājag tóg mog há han ke mũ, ājag krenkren jé.

3 Hã kĩ tag tóg ti to rãn kĩ nĩ, ha mẽ: “ki kanhrãn sĩ han ājag tóg huri, ěg Senhor tỹ tỹ ũn há tãvĩ nĩn ki,” he ja tóg nĩ, Topẽ vĩ rá ki.

4 Ěg Senhor to kãmũ jěg. Pó ri ke ti nĩ, ĩn han mũ ag tỹ pó fón mũ ěn ri ke ti nĩ. Hã ra tóg rĩr jě, ěg Senhor ti. Ag tỹ ti fón mũ ra tóg Topẽ mẽ há tãvĩ nĩ, pó kar ag há kãfór.

5 Kĩ ěg tóg pó ri ke nỹtĩ gé. Kĩ Topẽ kuprĩg vĩ ěg tỹ Topẽ jo ĩn ri ke han ke mũ, pó tỹ ĩn ěn ri ke. Kĩ ti tỹ ājag mẽ něn han sór mũ ěn to ti mẽ vẽnĩ něn tũg nĩ, ti mẽ: “hej,” hemnĩ. Jesus Cristo vĩ ājag tar han sór mũ, ājag tỹ ti tũ ki rĩr há han jé. Vãsy Topẽ tũ ki rĩr tĩ ag tỹ ti mẽ něn ũ kar pũn ja ěn ri ke tóg nĩ sir, ěg tỹ Jesus tũ han kĩ. Ājag tỹ ti tũ ki rĩr há han kĩ tóg ti mẽ há tĩnh mũ.

6 Hã kĩ tag tóg rãn kĩ nĩ, ha mẽ. “Pó há kuprěg inh, kĩ sóg tỹ ĩn nũna ri ke han, Sião tá. Ũ tỹ ti ki rã kĩ tóg venh ke mũ, Topẽ tỹ něn tó mũ ěn ti,” he tóg, Topẽ vĩ rá ki.

7 Ājag hã to tóg rãn kĩ nĩ, ti vĩ tag, ājag tỹ ti ki ge kĩ nỹtĩn kĩ. Ũ tỹ ti kato vãsãnsãn mũ ag to tag tóg rãn kĩ nĩ gé, ha mẽ. Ag to tóg: “pó tỹ ĩn han jafã fón ag tóg, pó tỹ ĩn han tĩ ag,” he mũ. “Ag mẽ tóg kórég ja nĩ, pó ěn ti. Hã ra Topẽ tóg pó ěn hã tỹ ĩn nũna han mũ,” he tóg, Topẽ vĩ rá ki.

8 Kĩ tag tóg rãn kĩ nĩ gé, ha mẽ. “Pó ěn tỹ ag tóg krĩm ke tĩ. Pãró vẽ sir, pó ěn ti, kĩ ag tóg pãró tỹ krĩm krĩm ke kĩ vár mũ sir,” he tóg mũ gé, Topẽ vĩ

rá ki. Û tỹ Topě vĩ kri fi sór tũ ag hã vỹ tỹ krĩmkrĩm ke tĩ. Topě tỹ nén han hã vễ gé.

⁹ Ājag hã kuprěg tóg, Topě ti, ājag tỹ tỹ pã'i mág nỹtĩ jé, ti tũ ki rĩr tĩ to, ājag tỹ tỹ ti povo nỹtĩ jé, vyr mỹ. Ājag kuprěg tóg, Topě ti, ājag tỹ ti tỹ nén han mũ kãmén jé, ti jykre tar ti, ājag tỹ tỹ ti tũ nỹtĩn kỹ. Vãsỹ ājag tóg kuty mĩ mũ ja nĩgtĩ, hã ra tóg ājag tatĩ kãtĩg, ājag tỹ ũri kurã mĩ mũ jé, ti tỹ ājag mỹ jěngrě nĩm kỹ.

¹⁰ Ājag pi(jé) vãsỹ tỹ ũ tũ ja nỹtĩgtĩ'. Ũri ājag tóg tỹ Topě povo nỹtĩ, ti tũ. Ājag pi(jé) vãsỹ Topě tỹ ājag jagãgtãn sór mũ tag mẽ ja nĩgtĩ'. Ũri tóg hã ra ājag jagãgtãn, Topě ti.

Jesus tỹ vễnh jykre pãno to ěg kygvãn

¹¹ Inh kanhkã', tag ki ěg tóg ěg mré ke tũ ag jamã mĩ mũgtĩ. ěg jamã pijé', ga tag ti'. Hã kỹ sóg ājag jyvěn mũ. Ājag tỹ nén ũ to én mũ ěn han sór tũg nĩ. Ājag kókén jé tóg ke mũ, kỹ ājag tóg ěg Senhor tovãnh sór ke mũ, ha vemnĩ.

¹² Jesus ki ge kỹ nỹtĩ tũ ag kãmĩ ājag tóg nỹtĩ, hã kỹ vễnh jykre há tãvĩ han nĩ. Ājag to ón sór ag tóg tĩ, ājag to ag tóg: "jykre pãno ag nỹtĩ," he sór tĩ. Kỹ vễnh kar tỹ ājag jykre há ve kỹ ag ón ěn tóg ve há tĩnh mũ. Ājag jykre há ve kỹ ag tóg: "Topě jykre vỹ há nĩ," henh ke mũ, hěn ri ke mũn, Topě tỹ ag kutãn kỹ.

¹³ ěg Senhor to há ājag tóg nỹtĩ. Ti to há nỹtĩn kỹ ěprã ājag

pã'i ag vĩ ki króm nĩ gé. Pã'i mág pẽ tỹ imperador ěn vĩ ki króm nĩ, vễnh kar ag mỹ tỹ ũn mág ěn vĩ ti.

¹⁴ Ti krēm pã'i ag vĩ ki króm nĩ gé, governador ag. Pã'i mág pẽ ěn tỹ vin mũ ag vễ, governador ag, ag tỹ ũn jykre pãno ag vóg kónãn jé, ag tỹ ũn jykre há ag to vĩ há han jé gé.

¹⁵ Û tỹ ki kagtĩg ag vỹ ājag to vĩ kónãn tĩ. Kỹ nén ũ há tãvĩ hã han nĩ, kỹ ag tỹ ājag kato ne tónh ke vỹ tũ tĩnh mũ, ha vemnĩ. Tag vỹ há nĩ, Topě mỹ.

¹⁶ Cristo vỹ ěg kygvã, vễnh jykre pãno to. Kỹ vễnh jykre pãno han mãn sór tũg nĩ. To: "inh kava ti huri, Cristo ti, hã kỹ sóg jatun mỹ han ke mũ, isỹ nén to én mũ kar ti," he tũg nĩ. Topě tũ vỹ tỹ ěg nỹtĩ, kỹ ti jykre hã han nĩ. Hã jé tóg ěg kygvã, ěg tỹ tỹ ti tũ nỹtĩ jé.

¹⁷ ěprã ke ũ to é he tũg nĩ. ěg mré Jesus ki ge kỹ nỹtĩ ag kar to há nỹtĩmnĩ. Topě kaměg nĩ. ěprã ke tỹ pã'i mág tỹ imperador ěn kaměg nĩ gé.

ěg tỹ Cristo ri kén jagtar nỹtĩnh ke

¹⁸ Ājag kãmĩ ũ ag tóg patrão mỹ rãnrãj tĩ, fagrĩnh mỹ. Ājag patrão vĩ ki króm nĩ, ag kaměg nĩ. Ājag kãmĩ ũ patrão vỹ há nĩ, koměr hã tóg vĩ tĩ, ājag to jykren há han tóg tĩ. Ājag tỹ ti to há nỹtĩn kỹ tóg há tĩ. Ājag kãmĩ ũ patrão tóg kórég nĩ. ěn to vĩ há han nĩ gé, ti kaměg nĩ gé.

¹⁹ Kejěn tóg fagrĩnh mỹ ājag to jũnh ke mũ, ājag patrão kórég ti. Ājag tỹ Topě jykre

han sór mũ to tóg ãjag to jũnh ke mũ. Ge ra ti to jũ tũg nĩ, kỹ Topẽ tóg ãjag mỹ vĩ há han ke mũ.

²⁰ Kejẽn ãjag patrão tóg ãjag tỹ kygnẽ to ãjag mrãnmrãn tí. Tag vỹ tỹ nén ù tũ nĩ. Ti tỹ ãjag jykre há to ãjag mrãnmrãn kỹ Topẽ tóg ãjag mỹ vĩ há han ke mũ.

²¹ Hã jé Topẽ tóg ãjag kuprẽg.

Cristo vỹ ẽg jagfy vësýrénh gé, mýr, ha mẽ. Ti vësýrénh tigrĩn ẽg tóg ti kóm tar nýtĩnh mũ, ẽg tỹ kejẽn ti kóm jagtar nýtĩnh ken kỹ.

²² Nén ù kórég han ja tũ ti nĩ. Û pi(jé) ti ón venh mũ', ti ón vãnh nĩn kỹ.

²³ Ag tỹ ti mỹ vĩ kónãn mũ ra tóg ag mỹ vĩ kónãn ja tũ nĩ. Ag tỹ ti vësýrénh han mũ ra tóg ag mỹ vĩ ja tũ nĩ gé. Topẽ há mũ tóg ẽkrén ja nĩgtĩ. "Ti há ne ag jykre tugnỹm ke mũ', inh jykre ti ke gé," he ja ti nĩ. "Ti há ne ag vóg kónãn ke mũ'," he ja ti nĩ, Cristo ti.

²⁴ Ha vé, Cristo vỹ ẽg tỹ Topẽ vĩ mranh ja ẽn kajãm ja nĩgtĩ, cruz to tóg ter ja nĩgtĩ. Hã tigrĩn ẽg jykre si tóg tũ tí ha, ti tỹ ẽg jykre si tỹ tũ' henh kỹ. Vẽnh jykre há há han jé ẽg tóg vẽn h fẽg kỹ nýtĩ. Ti vësýrénh tigrĩn ẽg tóg tỹ ùn há nýtĩ.

²⁵ Vãsỹ ẽg tóg vẽn mẽg tỹ carneiro vãgfor ri ke nýtĩ ja nĩgtĩ. Hã ra tóg hur ẽg tatĩn, ẽg vãgfor ja ra, Jesus ti. Kỹ ẽg tóg ti mré mũ mũ sir, carneiro fag tỹ pastor mré mũ ri ke. Ti há ne ẽg ki rĩr nĩ ha'.

3

Fag tỹ ag mré vẽn h jykre há han ke

¹ Sỹ ùn týtá fag jyvẽn hã vẽn, ha mẽ. ãjag mén vĩ han nĩ. ãjag kãmĩ ù fag mén ag vỹ ver Topẽ ki rã sór ja tũ nĩ. Ge ra ti mré ti vĩ ki króm nĩ, ti tỹ tỹ ã mén nĩn kỹ. Ti tỹ ã jykre há ve kỹ tóg hẽn ri ke mũn ti ki rã sór ke mũ, ã tỹ ti mỹ nén ù to tũ ra.

² Topẽ kamẽg kỹ ti jykre há han nĩ, ãjag jãnhkri nýtĩ jé. Kỹ ãjag mén ag vỹ ãjag jykre há venh ke mũ.

³ Vësĩnvĩ han sór tũg nĩ, ãjag gãnh tỹ, pó sĩnvĩ kaja e tỹ ke gé, kur kaja e tỹ ke gé. Ẽg tỹ vësĩnvĩ han sór ke tũ vẽn.

⁴ ãjag jykre há sĩnvĩ han nĩ, há vỹ: komẽr há vĩ, he mũ, vĩ mág tũ, he mũ. Vẽn h jykre sĩnvĩ tag vỹ há nĩ, Topẽ mỹ, kỹ tóg tũ' henh ke tũ nĩ gé.

⁵ Gen kỹ fag tóg nýtĩ ja nĩgtĩ gé, ẽg mýnh'mýnh ve fag, Topẽ tũ fag, ù tỹ Topẽ ve sór ja fag. Fag mén jykre há mũ fag tóg mũ ja nĩgtĩ,

⁶ Sara fi ke gé. Abraão jykre mũ fi tóg tí ja nĩgtĩ, há kỹ fi tóg ti to: "inh pã'i vẽn," he ja nĩgtĩ. Kỹ vẽn h jykre há há han nĩ. Û tỹ ãjag tỹ vẽn h jykre há han kamẽg mũ ra ge ra han nĩ. Kỹ ãjag tóg tỹ Sara fi krẽ'krẽ fag ri ke nýtĩ.

⁷ Kỹ sóg ag jyvẽn sór mũ gé. ãjag prũ fag ki rĩr há han nĩ, ha mẽ. Fag pi(jé) ãjag tar ri ke nýtĩ'. Hã ra Topẽ tóg fag mỹ rĩr krỹg ja tũ ẽn nĩm ke mũ gé, ti tỹ ãjag mỹ rĩr krỹg ja tũ nĩm ẽn ri ke. ãjag tỹ ãjag prũ fag ki

rĩr há han kŷ ājag tóg jatun mŷ
Topě mré vēmén ke mŷ.

*Ěg tŷ kejĕn Cristo jykre to
jagtar ke*

⁸ Vāhā sóg ājag mŷ tag tó sór
mŷ, ha mē. Jagně mré vĕnh
jykre pir han nĩ. Ū fŷ kŷ ti
mré fŷmnĩ, ū mŷ sér tĩn kŷ ti
mré mŷ sér nŷtĩmnĩ. Jagně to
há tāvĩ nŷtĩmnĩ. Jagně mré
koměr hā vĩmnĩ. Jagně káfór
han sór tŷg nĩ.

⁹ Ū tŷ ājag mŷ nén ū kórég
han mŷ ra ti mŷ nén ū kórég
han tŷg nĩ. Ū tŷ ājag mŷ vĩ
kónān mŷ ra ti mŷ vĩ kónān
tŷg nĩ gé. Vĕnh kajām sór
tŷg nĩ. Hŷ, vĕnh kar to Topě
mŷ: “ag ve há han nĩ,” hemnĩ.
Topě vŷ ājag ve há han sór mŷ,
hā jé tóg ājag kuprĕg.

¹⁰ Hā kŷ tag tóg rán kŷ nĩ, ha
mē: “ājag mŷ jatun mŷ nŷtĩ sór
mŷ, nén ū kar tŷ ājag mŷ sér
tĩ jé? Kŷ vĩ kónān mǎn tŷg nĩ.
Ōn mǎn tŷg nĩ gé.

¹¹ Vĕnh jykre pāno han mǎn
tŷg nĩ, vĕnh jykre há hā han
nĩ, vĕnh kar krĩ tŷ kǎnhvy' he
sórmnĩ gé, tag hā to vāsān nĩ,
ti tŷ ājag mŷ sér tĩ jé.

¹² Ěg Senhor vŷ ū tŷ vĕnh
jykre kuryj han mŷ ag ki rĩr
há han mŷ. Ag tŷ ti mŷ nén
ū to vĩn kŷ tóg ag vĩ mĕg mŷ,
Topě ti. Hā ra tóg ū tŷ vĕnh
jykre pāno han mŷ kato tē tĩ,
Topě ti,” he tóg, Topě vĩ rá ki.

¹³ Ū vŷ ājag mŷ nén ū kórég
han ke tŷ nĩ, ājag tŷ vĕnh kar
mŷ nén ū há han sór kŷ.

¹⁴ Kejĕn ājag tóg hā ra vĕnh
jykre há tŷgrĩn vĕsŷrĕnh ke
mŷ, Topě vĩ tŷgrĩn. Kŷ mŷ

sér jagy nŷtĩmnĩ. Ěprā ke ag
kamĕg tŷg nĩ. Ag vĩ jĕmĕ sór
tŷg nĩ, ag tŷ ājag tŷ ti tovānh
han sór mŷ ra.

¹⁵ “Cristo vŷ tŷ inh pā'i nĩ,
kŷ sóg ti hā kamĕg nĩ,” hemnĩ.
Tag hā mĩ ěkrén nĩ. Kejĕn ū tóg
ājag mŷ: “ne to ke nē, hā vŷ:
Cristo ki rā, he mŷ?” he tĩ. Ěn
mŷ kāmén kǎn nĩ.

¹⁶ Ū tŷ ge mŷ koměr hā
vĩmnĩ. Topě vŷ vĕg nĩ nĩ,
ājag tŷ ti mŷ nén tó mŷ ěn ti.
Fe kavĕj nŷtĩ sór tŷg nĩ. Kŷ
ājag tóg ū tŷ Cristo jykre to vĩ
kónān sór mŷ ag vĩ tŷ tŷ' hĕnh
ke mŷ, ha vemnĩ.

¹⁷ Kejĕn ājag tóg vĕnh jykre
há to jagtar ke mŷ, Topě tŷ
tag to jykren kŷ. Hā ra tóg há
nĩ. Ājag tŷ vĕnh jykre kórég to
jagtar nŷtĩn kŷ tóg kórég nĩ.

¹⁸ Cristo hā to jykren nĩ, ha
mē. Ter ja tóg nĩ, ěprā ke ag tŷ
Topě mŷ név(e) nŷtĩ tŷgrĩn. Ā
ter pir ki tóg kajām kǎn. Jykre
kuryj tóg nĩ, Jesus ti, hā ra tóg
ŭn jykre pāno ag jagfy ter ja
nĩ. Ti tŷ Topě mŷ ěg tatĩn tŷg
sór vĕ. Ti tén ja ag tóg nĩ, hā
ra Topě kuprĕg vŷ ti rĩn mǎn.

¹⁹ Topě kuprĕg vŷ ti tar han,
kŷ tóg vĕnh kuprĕg ag jamā ra
vyr gé, ag mŷ Topě vĩ sér tó jé,
vĕnh kuprĕg sigse kŷ nŷtĩ ag
mŷ.

²⁰ Vāsŷ ag tóg ti vĩ mē sór ja
tŷ nŷtĩ, vĕnh kuprĕg sigse kŷ
nŷtĩ ěn ag. Noé tŷ ga kri tŷg kŷ,
ti tŷ barco mág han mŷ ěn kǎ
ke ja vĕ. Ěn kǎ Topě tóg ver
ag to fe nĩ ja nĩ, kŷ tóg ag vóg
kónān jāvānh ja nĩ ver. Noé
tŷ barco han kǎn ja ra tóg ag
vóg kónān mŷ sir, Topě ti. Kŷ

ũ tỹ 8 (ke) ag tãvĩ vỹ krenkren mũ, barco ên kãki. Goj var kỹ barco tóg kri tĩ nĩ, kỹ tóg ag krenkren han, barco ti.

²¹ Goj tỹ ãjag tóg kygpe kỹ nỹtĩ, ãjag krenkren jé. Barco tỹ goj kri tĩg ri ken hã vë, hã vỹ: batismo, he mũ. ãjag mro pijé'. Vënh jykre to ken hã vë. Topë tỹ êg tỹ êg fe kavéj tỹ jãnhkri han to ken hã vë. Êg tỹ Topë mỹ vënh fëg to ken hã vë, hã vỹ: batismo, he mũ. Topë vỹ Jesus Cristo rĩn mãn ja nĩ, hã kỹ tóg êg krenkren han ke mũ gé.

²² Kanhkã tá tóg nĩ nĩ, Jesus ti, kỹ tóg Topë pëgja tá nĩ nĩ. Tá tóg tỹ ùn mág nĩ, Topë tỹ jëgnë jafã ag kri, ùn tar kar ag kri, êg tỹ kanhkã tá ùn vég tũ kar ên ag mré hã. Vënh kar kri ke vỹ tỹ ti nĩ, Jesus ti.

4

Vënh jykre tãg

¹ Ha vé, Cristo vỹ jagtar nĩ ja nĩ, vësýrénh kỹ. Kỹ tag to tar nỹtĩmnĩ gé, ãjag tỹ ti kóm jagtar nỹtĩn kỹ. Tag vỹ ki hã ke mũ, ha mẽ: ù tỹ êprã jagtar kỹ tóg Topë vĩ mranh tũ nĩgtĩ.

² Hã kỹ ùri Topë vĩ hã han sórmnĩ, ti vĩ tovãnh tũg nĩ, ãjag tỹ ga kri mũn kỹ. ãjag tỹ nén to én mũ ên han sór tũg nĩ.

³ Vãsỹ ãjag tóg ù tỹ Topë ki kagtĩg ag jykre han ja nĩgtĩ, prỹg tỹ hën ri ke ki, mỹr, ha mẽ. Ên kã ãjag tóg ãjag prũ tũ fag to én (ka)më han ja nĩgtĩ, ãjag mén tũ ag to ke gé. ãjag tỹ nén to én mũ ên han ãjag tóg nĩgtĩ. Kronkron mũ

ja ãjag tóg nĩgtĩ, krĩ tũ ja ãjag tóg nỹtĩgtĩ. Vënh mãn kỹ ãjag tóg kronkron kỹ kãgter mũ ja nỹtĩgtĩ gé, vënh kãggrã mỹ festa kórég ên han ja ãjag tóg nĩgtĩ gé.

⁴ Ûri ãjag tóg tag han mãn sór tũ nỹtĩ ha, hã kỹ tóg ag mỹ e tĩ, ù tỹ vënh jykre kórég to tar nỹtĩ ag mỹ. Ag mỹ tóg e tĩ, ãjag tỹ ag mré ag jykre pãno han mãn sór tũ nỹtĩn kỹ, ãjag tỹ ag krĩ tũ jãvo krĩ há nỹtĩn kỹ. Hã kỹ ag tóg ãjag to vĩ kónãn tĩ, ùri.

⁵ Hã ra Topë tóg ag jykre vég nĩ nĩ. Vënh kar jykre tugnỹm ti tĩ mỹr, kỹ tóg ag mỹ ag jykre to: “tag vỹ há nĩ, ên vỹ kórég nĩ,” henh ke mũ, ùn rĩr mũ ag jykre to, ùn kãgter mũ ag jykre to ke gé.

⁶ Û tỹ hën ri ke ag tóg Jesus mur ke to hã kãgter ja nĩgtĩ. Ên ag mỹ tóg vënh vĩ sér tónh vyr gé, Cristo ti, vënh kuprĩg ag jamã ra, ag krenkren jé. Ag tỹ han ja to Topë tóg ag vóg kónãn, ag tỹ ãjag tỹ ga kri mũgtĩ kã vënh jykre han mũ ên to. Hã ra Topë tóg ag rĩnrĩn mãn sór ja nĩ gé, hã kỹ tóg ag kãgter mũ ra ag mỹ vënh vĩ jënëg mũ gé, ag tỹ kanhkã tá junjun jé.

⁷ Kakó ti tĩ ha, ga tag tỹ tũg' henh ke kurã ti. Vëso jykrén nĩ, krĩ há han nĩ, ãjag tỹ Topë mré vëmén há han jé.

⁸ Kỹ jagnë to há tãvĩ nỹtĩmnĩ. Tag to krónh ke tũg nĩ. Êg tỹ jagnë to há nỹtĩn kỹ êg tóg jagnë mỹ vënh pãte fón ke mũ, êg tỹ Topë vĩ mranh mũ ti, ti e nỹtĩ hã ra.

⁹ Ū tỹ kuvar há tá ãjag to pasa kỹ ti mỹ: “inh mré jẽ,” hemnĩ. Ti to vĩ tũg nĩ, ti to mỹ sér nỹtĩmnĩ.

¹⁰ Kỹ, Topẽ vỹ ẽg tar han tĩ. Ū tóg nẽn ũ to tar nĩ, jãvo ũ tóg nẽn ũ ũ to tar nĩgtĩ gé. Ẽn ki rĩrmnĩ, ãjag tỹ nẽn ũ to tar nỹtĩ ẽn hã ki rĩrmnĩ, vẽn kar tỹ ãjag tugrĩn tar nỹtĩ jé. Ẽg tỹ Topẽ tỹ nẽn to ẽg tar han mũ ẽn ki rĩr há han ke vẽ, tag vỹ Topẽ mỹ há nĩ. Ẽg tar pẽ han ti tĩ, Tope ti.

¹¹ ãjag kãmĩ ũ vēmén kỹ Topẽ vĩ hã tỹ vēmén nĩ. Ū tóg Topẽ tũ ag ki rĩr tĩgtĩ, kỹn jé Topẽ mỹ to vĩ, ti tỹ to ti tar han jé. ãjag tỹ ãjag rãnhraj tag ki rĩr há han kỹ Jesus ki ge kỹ nỹtĩ kar ag vỹ Topẽ mỹ vĩ há han ke mũ. Jesus Cristo hã vỹ tỹ ũn mág nĩ, ti hã vỹ tar nĩ, kỹ tóg tũg' henh ke tũ pẽ nĩ. Amém.

Ag tỹ Jesus tugrĩn ẽg vóg kónãn ke

¹² Inh kanhkã', ãjag to sóg há tãvĩ nĩ. Nẽn ũ jagy pẽ vég ãjag tóg mũ. Ge ti nỹgtĩ, kỹ to jykrén tũg nĩ. Ẽg kar vỹ tag végtĩ, Jesus tugrĩn.

¹³ Mỹ sér nỹtĩmnĩ. ãjag jagtar kỹ ãjag tóg Cristo tỹ ẽg jagfy jagtar mũ ẽn ri ke végtĩ. ãjag tỹ ti ri ke jagtar kỹ ãjag tóg ti mré tỹ ũn mág nỹtĩnh ke mũ gé, ti tỹ tỹ ũn mág nĩnh ke kurã ẽn kã. Ẽn kã tóg ãjag mỹ sér gy tĩnh mũ, ha vemnĩ.

¹⁴ Hỹ, tá tóg ãjag mỹ sér tãvĩ tĩnh mũ, ag tỹ ũri ãjag mỹ vĩ kónãn han mũ ra, ãjag tỹ Cristo ki rã kỹ nỹtĩ tugrĩn. Ag

tỹ ãjag to vĩ kónãn tugrĩn ãjag tóg ki kanhró nỹtĩnh ke mũ, Topẽ kuprĩg tỹ tỹ ãjag jagrẽ nĩ ti. Ti kuprĩg vỹ ãjag tỹ ũn mág han ke mũ, Topẽ tỹ tỹ ũn mág nĩ ẽn ri ke.

¹⁵ Ū ag tóg ãjag tỹ ũ tén tugrĩn jagtar nỹtĩ, ãjag tỹ ũ tũ péju tugrĩn ke gé. Kỹ ũ ag tóg ãjag tỹ crime han tugrĩn jagãgtar nỹtĩ gé, ãjag tỹ vẽn kar to vĩ tugrĩn ke gé. ãjag tỹ ag mré vẽn jykre pãno tugrĩn jagtar kỹ tóg Topẽ mỹ há tũ nĩ. ãjag tỹ ti vĩ mranh ke tũ vẽ vẽ.

¹⁶ ãjag tỹ hã ra Cristo tugrĩn jagtar kỹ tóg ti mỹ há tĩ. Tag to mỹ'ãg tũg nĩ. Tag to Topẽ mỹ vĩ há han nĩ, ãjag tỹ tỹ Cristo mré ke nỹtĩn kỹ.

¹⁷ Topẽ vỹ vẽn kar jykre tugnỹm kãn ke mũ, kurã kakó ki. Hã ra tóg ũ tỹ ti ki ge kỹ nỹtĩ ag jykre tugnỹm vén ke mũ. Ti tỹ ẽg jykre tugnỹm kỹ ẽg tóg nẽn ũ jagy ve kren ke mũ. Kỹ ũ tỹ ti ki ge tũ ag vỹ nẽn ũ jagy pẽ ẽn ve kãn ke mũ, ha vemnĩ, ũ tỹ ti vĩ kato tẽ mũ ag.

¹⁸ Hã kỹ tag tóg rãn kỹ nĩ, ha mẽ: “ũ tỹ Topẽ vĩ há han sór mũ ag vỹ ter kren ke mũ. Kỹ ũ tỹ ti vĩ mranh tĩ ag vỹ kren ke tũ pẽ nĩ, ũ tỹ ti kato tẽ mũ ag,” he ja tóg nĩ, Topẽ vĩ tỹ rãn kỹ nĩ ki.

¹⁹ Topẽ tỹ ẽg to: “tag vỹ ti jagy venh ke mũ,” hen kỹ ẽg tóg venh ke mũ. Kỹ, ẽg jagtar mũ ra ẽg vẽn jykre há hã han kỹ nỹtĩnh ke mũ. Ū tỹ ẽg han mũ ẽn to jykrén jé ẽg tóg ke mũ, Topẽ to. Ti pi(jé) ẽg tovãnh ke mũ'. Ẽg mré tóg nĩ

nĩ.

5

Pedro tỹ ẽg jyvẽn

¹ Vãhã sóg ù tỹ Jesus ki ge kỹ nỹtĩ ag to pã'i ag jyvẽn sór mũ, ha mẽ. Ājag ri ke inh nĩ, isỹ tỹ ājag kóm ù tỹ Jesus ki ge kỹ nỹtĩ ag to pã'i jẽn kỹ. Cristo jagtar ve ja inh nĩ gé hã ra. Ti vẽnh ven mãn ke kurã ẽn kã sóg tỹ ùn mág jẽn h ke mũ gé.

² Kỹ sóg ājag mỹ tag tó sór mũ, ha mẽ. Ājag krêm ke ag ki rĩr há han nĩ. Û tỹ carneiro ki rĩr tĩ ẽn tỹ ã mẽg ki rĩr há han tĩ ẽn ri ke han nĩ. Topẽ tỹ ājag mỹ vẽnh rãnrãj nĩm jan hã vẽ. Ājag rãnrãj tỹ ājag mỹ sér tĩn kỹ tóg há tĩ. Ājag tỹ ājag rãnrãj han sór tũ nĩn kỹ tóg ù tĩ. Kỹ ājag ganho mĩ ẽkrén sór tũg nĩ gé. Topẽ tũ vẽ, ājag rãnrãj ti, hã kỹ ki rĩr há han sórmnĩ.

³ Kỹ ājag krêm ke ag ki rĩrmnĩ, ag mỹ koměr hã vĩmnĩ. Ag rĩnve vẽnh jykre há hã han kỹ nỹtĩmnĩ, ag tỹ ājag jykre há ve kỹ ājag kóm han sór jé.

⁴ Kãnhmar ti kãtĩg mãn ke mũ, ẽg pã'i mág ti, ẽg ki rĩr tĩ ti. Kỹ tóg ājag tỹ ùn mág han ke mũ. Ājag mỹ tóg krĩ tógfĩ ri ke vin ke mũ, ājag tỹ tỹ ùn mág nỹtĩn kỹ, hã ra tóg kórég vãn h nĩ, ẽg krĩ tógfĩ ẽn ti.

⁵ Kỹ sóg kyrũ ag jyvẽn sór mũ. Ājag mỹ sóg: “ùn sanh tỹ ājag mỹ nén ù tó mũ ẽn han nĩ,” he sór mũ.

Kỹ sóg vẽnh kar jyvẽn sór mũ gé. Vẽnh kar mỹ sóg: “jagnẽ to é he tũg nĩ,” he mũ. “Jagnẽ ki rĩr há han nĩ, jagnẽ

mỹ nén ù há kar han nĩ,” he sóg mũ. Tag vỹ rán kỹ nĩ, Topẽ vỹ rá ki, ha mẽ. “Topẽ vỹ ù tỹ jagnẽ to é he mũ ag kato tẽ tĩ. Hã ra tóg ù tỹ: “ùn sĩ vỹ tỹ inh nĩ,” he mũ ẽn to há nĩ,” he tóg, Topẽ vỹ rá ki. Hã kỹ vēsỹ ùn mág han sór tũg nĩ.

⁶ Topẽ vỹ tar nĩ, kỹ tóg kejẽn ẽg mỹ nén ù jagy jẽnẽg tĩ. Ti kato tẽ tũg nĩ hã ra, ti tovãn h sór tũg nĩ gé. Kỹ tóg ã kurã ki ājag tỹ ùn mág han mãn ke mũ, ha vemnĩ.

⁷ Ājag krĩ kufy nĩn kỹ ti hã mỹ tómnĩ, kỹ tóg ājag mỹ ājag krĩ kuprãg ke mũ. Ti hã vỹ ẽg ki rĩr nĩgtĩ.

⁸ Vẽnh ki rĩrmnĩ. Nũr ri ke han tũg nĩ. Ha vé, ẽg kato vãsãn tĩ ẽn, Japo ẽn tóg ẽg to vājig tĩgtĩ. Mĩg kókĩr ri ke ti nĩ, ti tỹ ẽg mãn sór kỹ.

⁹ Hã kỹ ti kato vãsãnsãn nĩ, Jesus Cristo ki rã tovãn h tũg nĩ gé, ù tỹ ājag tỹ ti tovãn h han sór mũ ra. Ha vé, ẽg kanhkã kar ag vỹ jagtar tĩ, ājag kóm, ga kri ke kar ag. Ag mĩ ẽkrén kỹ tar nỹtĩmnĩ.

¹⁰ Kurã pipir ki ājag tóg jagtar tĩ. Kar kỹ Topẽ vỹ ājag tỹ ùn há tãvĩ han ke mũ, ājag tỹ kygnẽ mãn tũg jé. Ti hã vỹ ẽg tar han tĩ, ẽg tỹ ti to krón h ke tũ nĩ jé. Ti hã vỹ ājag tỹ ùn há han ke mũ gé, kỹ ājag tóg ti tovãn h ke tũ pẽ nĩ. Ẽg to há pẽ ti nĩ, Topẽ ti. Ẽg kuprẽg tóg mỹr, ẽg tỹ Cristo tugrĩn kanhkã ve jé, ẽmã sĩnvĩ pẽ ẽn ti, ù tũg vãn h ẽn ti.

¹¹ Topẽ hã vỹ ã pir mỹ tar nĩ'. Ti hã vỹ tũ' hen h ke tũ nĩ'. Amém.

Pedro tỹ ag mĩ ěkrén

¹² Tó sĩ han sóg ājag mỹ, kỹ Silas tóg inh mỹ ājag mỹ rán mũ, inh vĩ ti. Ěg kanhkã vỹ tỹ ti nĩ, Silas ti, Jesus tovãnh jãvãnh ti nĩgtĩ, kỹ tóg iso há nĩ gé. Isỹ ājag tar han sór vễ, hã kỹ sóg ājag mỹ inh vĩ jẽnễg mũ. Sỹ ājag mỹ: “Topẽ vỹ ěg tar han ke mũ mỹr,” he mũ gé. Ti to krónh ke tũg nĩ.

¹³ Cidade tỹ Babilônia tá ěg nỹtĩ, kỹ tag ki ù tỹ ājag mré Jesus ki ge kỹ nỹtĩ ag vỹ ājag mĩ ěkrég tĩ. Ājag mré tóg ěg kuprễg, Topẽ ti. Kỹ inh kósin tỹ Marcos vỹ ājag mĩ ěkrég tĩ gé.

¹⁴ Jagně ki nhun ke ri ke han nĩ, jagně nĩgé kãgmĩ kỹ, ājag tỹ tỹ jagně mré ke nỹtĩn kỹ.

Cristo mré ke vỹ tỹ ājag nỹtĩ. Topẽ jé ājag krĩ tỹ kãnhvy' hé. Hã vễ.

PEDRO TỸ CARTA HAN MÃN

¹ Simão Pedro tỹ ãjag mỹ carta rán hã vễ. Jesus Cristo tỹ inh fễ vễ, sỹ ti rãnhrãj han jé, sỹ tỹ ti apóstolo jễ jé. Isỹ ù tỹ inh mré Jesus Cristo ki ge kỹ nỹtĩ kar ag mỹ rán hã vễ. Topễ vỹ ẽg kuprẽg, ùn jykre kuryj ẽn vỹ ẽg kuprẽg, ẽg tỹ ẽg krenkren han mũ tỹ Jesus Cristo ki ge jé. Nén ù sér vễ, ti ki ge mũ ti.

² ãjag to sóg Topễ mré vĩ tĩ, ãjag tỹ ẽg Senhor tỹ Jesus Cristo ki kanhrãn há han jé, Topễ ki ke gé, ãjag tỹ komẽr hã ti ki kanhrãn kãn jé. Kỹ tóg ãjag tar han ke mũ. Kỹ tóg ãjag krĩ tỹ kãnhvy' henh ke mũ gé.

Topễ tỹ ẽg kuprẽg

³ Topễ ki kanhró ẽg tóg nỹtĩ. Ẽg kuprẽg tóg, ti tỹ ẽg tar han jé, ti tar nĩ ẽn ri ke. Kỹ tóg ẽg tỹ ùn mág han ke mũ gé, ti tỹ tỹ ùn mág nĩ ẽn ri ke. Ẽg tỹ tag ki kanhró há han kỹ ẽg tóg ti to tar nỹtĩ, ẽg tỹ ti jykre jagma mũ há han jé.

⁴ Kỹ Topễ tóg ẽg mỹ nén ù há to ja nĩgtĩ gé. Ừ tóg ẽg mỹ vễnh vĩ há tỹ ge tónh ke tũ nĩ. Topễ tỹ ẽg mỹ vĩ há han ri ke venh ke tũ ẽg tóg nĩ. Tag to ti ẽg mỹ, ha mẽ. Ẽprã ke kar vỹ nũgme ki vár ke mũ, ãjag tỹ nén to ẽn mũ ẽn han tugrĩn. Ag jãvo ẽg tóg krenkren ke mũ, kỹ ẽg tóg Topễ ri ke nỹtĩnh ke mũ, mỹr, ha mẽ.

⁵ Hã kỹ vãsãn, ãjag tỹ ti ki rã to tar nỹtĩ jé, ãjag tỹ ti ki rã tugrĩn vễnh jykre há hã han jé. Vễnh jykre há han kỹ vễnh kanhrãn kỹ mũmĩ gé.

⁶ Vễnh kanhrãn kỹ mũ kỹ vễso jykren nĩ gé. Vễso jykren kỹ ti tovãnh tũg nĩ gé. Ti tovãnh tũ nĩn kỹ ti jykre hã mũ mũmĩ gé.

⁷ Ti jykre hã mũ mũn kỹ jagnễ to há tãvĩ nỹtĩmĩ gé, ẽg kanhkã kar ag to. Ẽg kanhkã to há nỹtĩn kỹ ẽprã ke kar ag to há nỹtĩmĩ gé.

⁸ ãjag tỹ tag han kãn kỹ tóg há tĩ. Kỹ ãjag tóg ẽg Senhor tỹ Jesus Cristo ki kanhrãn há han ke mũ gé, kỹ ãjag tóg vễnh jykre há to krónh ke tũ nĩ gé. Kỹ ãjag tóg komẽr hã ti ki kanhrãn kãn ke mũ, ha vemnĩ.

⁹ Ừ tỹ vễnh jykre há han sór tũ nĩn kỹ tóg ùn kyvó ri ke nĩ, ùn ẽvãnh kórég, ùn kutu ri ke ti nĩ sir. Ẽn vỹ ẽg Senhor ki kagtĩg nĩ. Vãsỹ Topễ vỹ ti kykũnh ja nĩ, ti tỹ Topễ vĩ mranh ja ẽn to. Hã ra tóg kã jatun kỹ nĩ ha, hã kỹ tóg ti kórég han mãn sór mũ.

¹⁰ Inh kanhkã', Topễ vỹ ãjag kuprẽg. Kỹ vãsãnsãn, vễnh kar tỹ ãjag jykre há tugrĩn ki kanhró nỹtĩ jé, ti tỹ ãjag kuprẽg mũ ẽn ti. Kỹ ãjag tóg tỹ prãnh kenh ke tũ nĩ, ha vemnĩ.

¹¹ Kanhkã ve jé ãjag tóg ke mũ, ha vemnĩ, ẽg Senhor tỹ Jesus Cristo tũ ti, ẽg krenkren han tĩ ẽn tũ ti. Tũ' henh ke tũ ti nĩ, ti tỹ tá tỹ ùn mág nĩ ti.

¹² Hã kỹ sóg ãjag mỹ tóg mãn',

tó mǎn' he mũ. Ki kanhró ãjag tóg nýtĩ, vènh vĩ há to tar ãjag tóg nýtĩ, ãjag tỹ mềg mũ ên to.

¹³ Ge ra sóg ãjag jyvèn mǎn sór mũ, ãjag tỹ kǎ jatun tũ nýtĩ jé. Isỹ ãjag mré nĩ mũ ên kǎ sóg ãjag mỹ tag tó, ãjag jyvèn mág inh. Kỹ kǎ jatun nýtĩ tũg nĩ.

¹⁴ Ha vé, kǎnhmar sóg iser kỹ inh fǎr tovǎnh kỹ tĩg ke mũ, ki kanhró sóg nĩ. Êg Senhor tỹ Jesus Cristo vĩ inh mỹ isỹ kǎnhmar tĩg ke ti tó.

¹⁵ Hǎ kỹ sóg vènh rán tag to fũrũn mũ, ãjag tỹ iser kar kỹ kǎ jatun tũ nýtĩ jé.

Pedro tỹ Jesus ve ja

¹⁶ Ha vé, inh pi(jé) ãjag mỹ ón mũ', isỹ ãjag mỹ êg Senhor tỹ Jesus Cristo kǎtĩg vèn mũ ên tón kỹ, isỹ ti jykre tar tón kỹ. Ti ve inh, sỹ ãjag mỹ nén tó mũ ti. Ti ve inh, ti tỹ tỹ ùn mág pẽ nĩ ti.

¹⁷⁻¹⁸ Ti jóg tỹ Topẽ vĩ ti tỹ ùn mág han. Ti tỹ tóg ùn tar han gé. Êg tỹ Jesus mré pǎnónh kri nýtĩ ên kǎ êg tóg kanhkǎ tá vènh vĩ ên mềg mũ, êprǎ nýtĩn kỹ. Kỹ tóg ti to tag tó, ù tỹ vènh kar kri ke ên ti, Topẽ ti, ha mẽ. “Inh kósin pir hǎ vễ,” he ja tóg nĩ, Topẽ ti, Jesus to. “Inh fe pẽ vễ,” he ja tóg nĩ. Topẽ tỹ pǎnónh ki kǎtére mũ ên kri ke ja vễ. Ên tá sóg Jesus tỹ tỹ ùn mág jẽ vé.

¹⁹ Hǎ kỹ êg tóg ù tỹ vǎsỹ Topẽ vĩ tó tĩ ag vĩ kri fig mũ, tovǎnh tũ êg nýtĩ. Kri nĩmnĩ gé, ãjag. Lampiǎo grug ri ke ti nĩ êg mỹ, ag vĩ ti. Lampiǎo grug vĩ êg mỹ kuty tá jẽngrẽ han ti. Kurǎ ke kǎtǎ êg tóg

lampiǎo grug ve mǎn sór tũ nýtĩ. Kurǎ ke kǎtǎ krĩg mág hǎ vĩ êg fe tỹ mrin ke tĩ. Jesus to ken hǎ vễ, hǎ vĩ: krĩg mág, he mũ.

²⁰ Kỹ, ãjag tỹ Topẽ vĩ rá to ken kỹ tag to jykrén nĩ, ha mẽ: êg pi(jé) vėsóg ki to jykrén ke mũ', Topẽ vĩ rá to', Topẽ tỹ ǎ vĩ tó tĩ ag mỹ nén tó mũ ên to'. Topẽ hǎ ne to êg krĩn ke mũ'.

²¹ Kỹ Topẽ vĩ tó tĩ ag pi(jé) vėsóg ki ãjag krĩ ki to jykrén kỹ rán ja nĩgtĩ gé'. Topẽ kuprĩg tỹ ãjag krĩn mũ ên hǎ rán ja ag tóg nĩgtĩ, hǎ kỹ tóg tỹ Topẽ vĩ nĩ, vènh rán ki.

2

Ón kỹ Topẽ vĩ tó tĩ ag

¹ Hǎ ra ù ag tóg ón kỹ Topẽ vĩ tó ja nĩgtĩ gé, vǎsỹ, Israel ù ag. Tag ve jé ãjag tóg ke mũ gé. Û ag tóg ón kỹ ãjag mỹ Topẽ vĩ kǎmén sór ke mũ, ha vemnĩ. Ên ag vĩ vĩ ón kỹ ãjag mỹ mẽ há tĩ mẽ tĩnh ke mũ, hǎ ra tóg ãjag kókén ke mũ. Êg Senhor tovǎnh jé ag tóg ke mũ, ù tỹ êg kygjǎm ja ên ti. Hǎ ra Topẽ vĩ vǎhǎ ag tỹ tũ' henh ke mũ.

² Ge ra ù tỹ hèn ri ke ag tóg ag jykre pǎno han ke mũ, ag mré. Kỹ ù tỹ ag mré vènh jykre pǎno han mũ ên ag tugrĩn Topẽ jykre kato vĩ vĩ henh ke vễ, tag tỹ mẽ há' henh ke vễ sir, ti tỹ ki hǎ tó mũ ra.

³ Ag tỹ jǎnkamy mág ve sór vễ, hǎ kỹ ag tóg ón kỹ vễme sĩnvĩ tó sór mũ, ag tỹ ãjag lo-grar he jé. Hǎ ra ù tỹ ag vóg kónǎn ke mũ ên tóg ag vэг

tĩ. Ag tỹ tũ' he jé tóg ke mũ, kãnhmar, ha vemñĩ.

⁴ Topẽ tỹ jẽgnẽ jafã ù ag vỹ Topẽ vĩ mranh. Ën ag vóg kónãn tóg huri, Topẽ ti. Ag pi(jé) krenkren'. Nũgme ki tóg hur ag vãm, Topẽ ti. Tá ag tóg sigse kỹ nỹtĩ, ferro tỹ corrente tỹ. Tá tóg kuty nỹ. Tá ag tóg Topẽ tỹ vẽn kar jykre tugnỹm ke kurã ãn jãvãnh nỹtĩ.

⁵ Kỹ Noé mré ke ag vỹ nỹtĩgtĩ gé. Topẽ vỹ ag vóg kónãn ja ñĩ gé. Goj var tỹ tóg ù tỹ ti vĩ mranh mũ ag tỹ tũ' he kãn. Ag pi(jé) krenkren'. Û tỹ 8 (ke) ag tãvĩ vỹ krenkren, ãn kã, hã vỹ: Noé, he mũ, ù tỹ vẽn kar mỹ: “Topẽ vĩ kri fimñĩ,” he mũ ãn ti, kar kỹ ti mré ke tỹ 7 (ke) ãn ag ke gé. Ti mré ga kri mũ ù ag vỹ tũ' he kãn.

⁶ Topẽ vỹ cidade tỹ Sodoma tá ke ag, cidade tỹ Gomorra tá ke ag vóg kónãn ja (tóg) nĩgtĩ gé, kỹ cidade ãn tá ãn tóg kugpũr kãn ja ñĩ. Ëg tỹ tag ve kỹ ãg tóg Topẽ tỹ ùn jykre pãno ag vóg kónãn ke ãn ki kanhró nỹtĩ gé.

⁷ Cidade ãn tá ùn pir vỹ kren, hã vỹ: Ló, he mũ. Ën vỹ jykre há ñĩ ja nĩgtĩ, kỹ ti mré ke ag jykre kórég vỹ ti mỹ e ñĩ ja nĩgtĩ, tag to tóg krĩ kufy han ja nĩgtĩ.

⁸ Kurã kar ki tóg ag kãmĩ ag jykre pãno ve ja nĩgtĩ, kỹ ti krĩ tóg kufy jagy ñĩ ja nĩgtĩ, ti tỹ ag jykre kórég ve kỹ, ag vĩ kórég ke gé. Ën vỹ ã pir mỹ kren, Ló ti.

⁹ Û tỹ Topẽ to: “ùn mág vỹ

tỹ ti ñĩ,” he mũ ag krenkren han ki kanhró tóg ñĩ, Topẽ ti. Hã ra tóg ù tỹ vẽn jykre pãno han mũ ag vóg kónãn ke mũ, ti tỹ vẽn kar jykre tugnỹm ke kurã ãn kã.

¹⁰ Û ag vóg kónãn mág pẽ han jé tóg ke mũ, Topẽ ti, hã vỹ: ù tỹ ãjag tỹ nén to éñ mũ han tĩ ãn ag, he mũ, ùn vẽn kavénh tĩ ag, he mũ, ù tỹ: “Topẽ pi(jé) tỹ ãg Senhor ñĩ,” he mũ ãn ag, he mũ.

Ón kỹ Topẽ vĩ tó tĩ tag ag vỹ ãg vĩ kafãn tĩ. “Inh hã tóg ki kanhró ñĩ,” he ag tóg tĩ. Kỹ ag tóg kanhkã tãn ag kamẽg vãn nỹtĩ gé. Ag to ag tóg vĩ kónãn tĩ, kanhkã tãn ag to, ón kỹ Topẽ vĩ tó tĩ ag.

¹¹ Topẽ tỹ jẽgnẽ jafã ag vỹ tag han tũ nĩgtĩ, ha mẽ. Kanhkã tãn ag to ag tóg vĩ kónãn tũ nĩgtĩ, Topẽ rĩnve, Topẽ tỹ jẽgnẽ jafã ag. Ag tỹ ù tỹ ón kỹ Topẽ vĩ tó tĩ ag tar kãfór nỹtĩ ra ag tóg kanhkã tãn ag to vĩ tũ nĩgtĩ.

¹² Ag jãvo ù tỹ ón kỹ Topẽ vĩ tó tĩ ãn ag vỹ krĩ tũ nỹtĩ, vãn kãmĩ sã ag jykre tũ ri ke ag nỹtĩ. Vãn kãmĩ tóg tĩgtĩ, sã ti, ãg tỹ ti to vãjig kỹ ti tén jé. Hã jé tóg mur tĩ. Tag ri ke ag nỹtĩ, ù tỹ ón kỹ Topẽ vĩ tó tĩ ag. ãjag tỹ kanhkã tãn ag ki kagtĩg nỹtĩn kỹ ag tóg ag to vĩ kónãn tĩ. Hã kỹ Topẽ tóg ag tỹ tũ' henh ke mũ, ãg tỹ sã tén tĩ ãn ri ke.

¹³ Ag tỹ ãjag jykre pãno kajãm hã vẽ. Kurã ki ag tóg ag tỹ nén to éñ mũ ãn han tĩ, mỹr, ha mẽ. Kỹ ag tóg ãjag mré jẽg tĩ gé, ãjag tỹ festa han kỹ. Ha

ra ag tóg nén tỹ ěg mỹ'a han tĩ ěn hã han tĩ, ag tỹ ãjag mré jěn kỹ. Ājag kavěnh ag tóg tĩ. Jykre régre ag nỹtĩ, ón kỹ ag há nĩ ve nỹtĩ.

¹⁴ Ūn tỹtá fag kar to én ag tóg tĩ, fag ki ěvãnh kỹ. Topě vĩ mranh sór ag tóg tĩ, ti vĩ mranh to ag tóg krónh ke tũ nĩgtĩ. Ūn krój ag krĭn kónãn ag tóg tĩ, ag tỹ ag mré mranh jé. Ag topě vỹ tỹ jãnkamy nĩ. Topě vỹ ag vóg kónãn ke mũ, ha vemnĩ.

¹⁵ Topě japry ti, ti jamĭn ti tovãnh ag tóg, vãgfor kỹ ag nỹtĩ. Beor kósin tỹ Balaão ěn ri ke han ag tóg tĩ. ěn vỹ jãnkamy to há tãvĩ nĩ ja nĩgtĩ. Hã kỹ tóg ã jykre kórég ěn to jãnkamy ve sór mág ja nĩ.

¹⁶ Hã ra Topě tóg ti mỹ vĩ tar han, ti tỹ ti vĩ mranh kỹ. Hã kỹ ti měg fi tóg ã vĩ vãnh ra ti mỹ vĩ ja nĩgtĩ, ěg tỹ jagně mré věmén ri ke han ja fi tóg nĩgtĩ, ti měg fi. Ti mỹ vĩ kỹ fi tóg ti tỹ věnh jykre kórég han ke mũ ra tỹ tũ' he mũ, ti mỹ, ũ tỹ Topě vĩ tó tĩ ěn mỹ, ti tỹ ón kỹ Topě vĩ tó tĩ sór mũ ěn kã.

¹⁷ Ón kỹ Topě vĩ tó tĩ ag vỹ goj nĩhỹg ja ki goj tũ ěn ri ke nỹtĩ. Kanhkã góg ri ke ag tóg nỹtĩ gé, kãka tỹ vějo kanhkã góg ag vóg kỹ tỹ tũ' he ěn ri ke ag nỹtĩ, ũ tỹ ón kỹ Topě vĩ tó tĩ ag. Topě vỹ kuty tãvĩ tá ag vin han ke mũ.

¹⁸ “Ūn mág vỹ tỹ inh nĩ,” he ag tóg tĩ, ón kỹ. Krĭ tũ ag nỹtĩ. Nén ũ věnhmỹ kar to én ag tóg tĩ, nén ũ tỹ ěg kavěnh tĩ ěn to én ag tóg tĩ. Věnh jykre pãno han kỹ ag tóg ũ tỹ ũri Topě ki

ge sór mũ ag krĭn kónãn tĩ, ũ tỹ ũri ěg tỹ kygně kỹ han tĩ ěn tovãnh sór mũ ag.

¹⁹ “Jatun mỹ ěg tóg ěg tỹ nén han sór mũ ěn han kãn ke mũ,” he ag tóg tĩ, ón kỹ. “Topě vỹ ěg to jũnh ke tũ nĩ,” he ag tóg tĩ, ón kỹ. Hã ra ag tóg ěprã věnh jykre hã mĩ mügtĩ, nén tỹ ěg kavěnh tĩ ěn hã han ag tóg tĩ. Kỹ tóg tỹ ag jagrě nĩ, ěprã věnh jykre ti. ěg tỹ nén ũ tovãnh sór mũ ra tovãnh ki kagtĩg nỹtĩ ěn vỹ tỹ ěg jagrě nĩ sir, mỹr, ha mě.

²⁰ ěg Senhor tỹ Jesus Cristo ki kanhró ja ag tóg nỹtĩ vě, ěg kren han mũ ěn ti. Ti tugrĭn ag tóg ěprã věnh jykre kavěj kar tovãnh ja nĩgtĩ vě, ěg tỹ nén tugrĭn ter ke mũ tovãnh ja ag tóg nĩgtĩ vě. Hã ra ag tóg ãjag tỹ nén tovãnh mũ ěn han mãn mũ, kỹ tóg tỹ ag jagrě nĩ mãn mũ sir. Kỹ tóg ũri kórég kãfór nĩ, ag mỹ.

²¹ Ag tỹ Topě japry ěn, ti jamĭn ěn sãn ja tũ nĩ ra tóg há tĩ vě. Hã ra ag tóg ti sãn sĩ han kar kỹ kyrãgrã mũ. Topě tỹ ag mỹ věnh vĩ há jěněg mũ ěn tovãnh ag tóg.

²² Ag to ěg tóg tag tó tĩ, ha mě: “cachorro vỹ ã tũgtũv ěn ko mãn tĩ,” he ěg tóg tĩ. “Porco tóg ã věnh kype há han kỹ jě ra óré mĩ věsĩn mãn tĩ, kỹ tóg věnh kavěnh mãn tĩ,” he ěg tóg tĩ gé. Ū tỹ věnh jykre kórég tovãnh kar kỹ han mãn tĩ ag to ken hã vě.

3

Jesus kãtĩg mãn

¹ Inh kanhkã', âjag to sóg há tãvĩ nĩ. Ājag mỹ sóg vẽn h rá ũ han huri, kỹ sóg âjag mỹ rán mãn mũ ha. Inh vẽn h rá kar kĩ sóg âjag jyvẽn tĩ, âjag tỹ nén jãnhkri hã to jykrén kỹ nýtĩ jé, âjag tỹ tag kã jatu nýtĩ tũ nĩ jé.

² Topê vĩ tó tĩ ag vỹ vãsỹ Topê vĩ tó ja nĩgtĩ. Ēn mĩ êkrén nĩ. Kỹ apóstolo ag vỹ âjag mỹ tó ja nĩgtĩ gé, êg Senhor tỹ nén to êg jyvẽn mũ ti, êg kren han tĩ ên vĩ ti. Ēn mĩ êkrén nĩ gé.

³⁻⁴ Tag to jykrén nĩ, ha mẽ. Kurã tỹ êgno to hã êprã ke ũ ag vỹ âjag to é henh ke mũ, ha vemnĩ. “Ti mỹ kãtĩg mãn mũ vỹ?” he jé ag tóg ke mũ. “Ti tỹ vãsỹ kãtĩg mãn ke vễ vễ, hã ra êg jo ke ag vỹ vãsỹ tũg, ti tỹ ã kãtĩg mãn ke tó mũ ra ag tóg kãgter. Kãtĩg ke tũ ti nĩ. Ga vỹ nĩnh mũ, tũ' henh ke tũ ti nĩ, ga ti, ha vemnĩ,” he jé ag tóg ke mũ, êg to é he kỹ, ha vemnĩ. Ũn jykre kórég ag vễ, ũ tỹ tag tó mũ ag. Ājag tỹ nén to én mũ ên hã han ag tóg tĩ.

⁵ Topê tỹ vãsỹ nén han mũ ên ki kagtĩg ag tóg nýtĩgtĩ, ag tỹ ki kanhrãn sór tũ nýtĩn kỹ. Topê tỹ vãsỹ nén han jan hã vễ, ha mẽ. Kanhkã han tóg, vãsỹ, ga ti ke gé. Ā vĩ tỹ tóg nén kar hyn han ja nĩgtĩ, Topê ti. Ga ên vỹ goj tỹ vẽn h kãpãm kỹ nỹ ja nĩ, kỹ ũ tóg goj kri nỹ ja nĩ gé.

⁶ Ga ên kri ke kar ag vỹ hur tũg, goj tỹ, goj var mũ ên tỹ.

⁷ Kỹ êg tỹ ũri nén vэг mũ tag vỹ tũ' henh ke mũ gé, ha vemnĩ. Topê vỹ ti tỹ tũ' henh ke to kurã nĩm huri, kỹ tóg pĩ tỹ ti tỹ tũ' henh ke mũ, Topê

tỹ: “tãg',” hen kỹ. Kurã ên kã Topê vỹ ũ tỹ ti vỹ mranh mũ ag tỹ tũ' he kãn ke mũ gé. Ag vóg kónãn ke kurã vễ sir.

⁸ Inh kanhkã', tag to jykrén nĩ, ha mẽ. Topê kurã vỹ êg kurã ri ke tũ nĩ. Kurã pir vỹ ti mỹ prỹg tỹ mil (ke) ri ke nĩ, kỹ prỹg tỹ mil (ke) vỹ ti mỹ kurã pir ri ke nýtĩ gé.

⁹ Kỹ tóg ã tỹ êg mỹ nén tó mũ ên tovãnh ke tũ nĩ, Topê ti. Ũ tóg: “han sór tũ ti nĩ, hã kỹ êg tóg vэг tũ nĩgtĩ,” he tĩ, ón kỹ. Hã ra ag tóg hã tũ tó tĩ. Ti tỹ ver êg to fe nĩ vễ, hã kỹ tóg kãtĩg vãn h han. Ti pi(jé) êg kãmĩ ũ tỹ nũgme ki kutế mũ ve sór mũ'. Hã kỹ tóg ver êg mỹ kurã ũ nĩm mãn', kurã ũ nĩm mãn' he mũ, kỹ vẽn h kar jé âjag jykre kórég tovãnh, ag krenkren jé.

¹⁰ Hã ra tóg kãtĩg mãn ke mũ, ha vemnĩ. Vãhã tóg kãtĩg ke mũ, kỹ tóg ũ tỹ êg tũ péju(g) tĩ tỹ êg vatãnh tá kãtĩg ri ke nĩnh ke mũ. Ēn kã kanhkã tóg tov kỹ kréj ke kỹ vár ke mũ. Kanhkã tá nén kar vỹ jonh ke kãn ke mũ gé, krĩg kar ag, pĩ ên tỹ ag tỹ kréj ken kỹ. Kỹ vãhã ga vỹ tũ' henh ke mũ, ga kri ke kar ag ke gé.

¹¹ Ge kỹ nén (ũ) kar vỹ tũ' henh ke mũ. Hã mĩ êkrén kỹ vẽn h kãn sórmnĩ. Topê tỹ êg mỹ nén tó mũ ên hã han nĩ. Topê mỹ vẽn h vin nĩ.

¹² Topê kurã ên jãvãnh nĩ, Topê rãnhrãj to vãsãnsãn nĩ, ti kurã ên tỹ kãnhmar tá krỹg jé. Kurã ên kã kanhkã vỹ pũr ke mũ, kỹ kanhkã tá nén kar vỹ

jonh ke kãn ke mũ gé, krĩg kar ag.

¹³ Topẽ vỹ ã tỹ ãg mũ nén tó mũ ẽn han kãn ke mũ. Kanhkã tãg han jé tóg ke mũ, ga tãg ke gé. Tá tóg vẽn jykre kuryj tãvĩ nĩ. ãg tỹ ga tãg tag, kanhkã tãg tag venh ha pẽ tóg tĩ.

¹⁴ Inh kanhkã', ãjag to sóg há tãvĩ nĩ. Topẽ kurã tag jãvãnh kỹ ãjag tóg nỹtĩ. Kỹ vãsãnsãn nĩ, ãjag tỹ kygnẽ tũg jé. Vãsãnsãn nĩ, ãjag tỹ Topẽ mũ jãnhkri nỹtĩ jé, ãjag tỹ ti há ri ke nỹtĩ jé. Kỹ ãjag tóg ti kato vãsãnsãn tũ nĩ.

¹⁵ Ha vé, ti tỹ ver ãg to fe nĩn hã kỹ ãg tóg ãg jykre kórég tovãnh kỹ krenkren ke mũ. Tag rán tóg huri ãjag mũ, ãg kanhkã tỹ Paulo ti. Ti to sóg há tãvĩ nĩ, Paulo to. Topẽ vỹ ti mũ krĩ há tãvĩ nĩm.

¹⁶ Kỹ tóg, ti tỹ ù mũ carta han kỹ tóg isỹ nén rán mũ tag ri ke han tĩ gé. Ti vỹ tóg inh vỹ ri ke pẽ nĩ. Carta e han tóg huri, Paulo ti, kỹ ti carta ù vỹ to jykren jagy tĩ gé. Kỹ ù ag tóg ti carta to ke mũ ra ki kagtĩg nỹtĩn kỹ ti to vỹ kónãn sór mũ. ù tỹ ki kagtĩg ag vẽ, ùn krój ag vẽ, ù tỹ Paulo tỹ rá to vỹ kónãn mũ ag. Topẽ vỹ rá ù to ag tóg vỹ kónãn tĩ gé, ẽn ag. Tag tigrĩn ag tóg kãgter ke mũ, ha vemnĩ.

¹⁷ Inh kanhkã', ãjag mũ sóg rán kãn huri. Hã kỹ vẽn ki rĩr há han nĩ. Ker ù tỹ ãjag mũ ón kỹ kri nĩm hẽ'. Ke tũ nĩ mũ ra ag tóg ãjag lograr henh ke mũ, ù tỹ ãjag fe kavénh sór mũ ag, ùn jykre pãno ag. ãjag tỹ ag vỹ kri fi tigrĩn ãjag tóg vãgfor ke

mũ, ha vemnĩ. ãg tỹ kãgnó ki tĩr ri ke han jé ãjag tóg ke mũ, ha vemnĩ.

¹⁸ ãg Senhor ki kanhrãn ke hã to tar nỹtĩmĩ. Ti tỹ ãg tar han mũ tag hã ve sórmĩ, ãg kren han tĩ tỹ Jesus Cristo ti. Ti hã mũ ãg tóg vỹ há han ke mũ, ùri, kar kỹ kanhkã tá ke gé, kỹ tóg tũ' henh ke tũ pẽ nĩ. Amém.

JOÃO TỸ CARTA HAN VÉN

Topě vř

¹ Topě tỹ ver nén kar han tũg ki tóg nř nř, Topě vř ti, hã vř: Jesus Cristo, he mũ. Topě tỹ Jesus mré nén ũ kar hyn han kỹ tóg rřr nř, Topě vř ti. Sř ājag mř Jesus Cristo tag kãmén ke vē. Mě inh, ti vř ti. Ti ve inh ke gé, inh kaně tỹ. Ti ki inh ěvãnh, ti vóg inh, inh nřgě tỹ.

² Ěg rřnrřn tĩ ěn vř vėnh ven, hã kỹ sóg ti vé. Ti hã tó sóg tĩ, hã kỹ sóg ājag mř ti kãmén mũ. Ā tỹ nén kar han tũg ki tóg kã nř nř, ũ tỹ ti han ja tũ hã ra. Ěn kã tóg ā panh mré nř ja nř sir. Hã ra tóg ěg mř vėnh ven.

³ Kỹ sóg ti vé. Ti vř mẽ sóg ke gé. Hã kỹ sóg ājag mř ti kãmén mũ ha, ājag tỹ inh mré ti ki kanhrãn jé. Ěg jóg tỹ Topě mré ke vř tỹ ěg nřtĩ, ti kósın tỹ Jesus Cristo mré ke ke gé, kỹ ěg tóg tỹ jagně mré ke nřtĩ gé.

⁴ Ājag mř sóg tag rán kỹ jėně sór mũ, ti tỹ ājag mř sér tĩ jé, ājag mř há tãvř tĩ jé ke gé.

Topě vř jėngrė ri ke nř

⁵ Ha vé, ti tỹ ěg mř nén tó mũn hã vē, ha mẽ. Ti vř mẽ kỹ sóg ājag mř tó sór mũ, ha mẽ. Topě vř jykre kuryj nř, hã kỹ tóg kurã ri ke nř, jėngrė ri ke, ki kuty tũ pė ti nř, Topě ti.

⁶ Kỹ, ěg tỹ: “ti mré ke vř tỹ inh nř,” hen kỹ ěg tóg kuty ki vėnh jykre kórég ěn han ke tũ

nř, ke tũ ra ěg ón kỹ: “ti mré ke vř tỹ inh nř,” he tĩ. Vėnh ó vē sir. Kỹ ěg tóg ón kỹ nén ũ kar han tĩ gé.

⁷ Ěg tỹ ti kóm kurã ki vėnh jykre há ěn han kỹ ěg tóg jagně to há nřtĩ. Jagně mré ke vř tỹ ěg nřtĩ, ěg tỹ vėnh jykre há han kỹ. Kỹ ti kósın tỹ Jesus vř ěg kykũnh ke mũ sir, ā kyvėnh tỹ, ěg tỹ ti vř mranh ja (hã) ra.

⁸ Ũ tóg kejėn: “inh pi(jé) Topě vř mranh tĩ,” he sór mũ. Ti ón vē. Hã ra tóg ti hã mř tỹ vėnh vř há mẽ tĩ, ti ón mũ ti.

⁹ Ěg tỹ Topě vř mranh kỹ ěg tóg ti mř tónh ke mũ. “Ā vř mranh inh, tag han kỹ,” he jé ěg tóg ke mũ. Kỹ tóg ěg mř vėnh pãte fón ke mũ sir. Tag tó ja ti nř, kỹ tóg han ke mũ. Kuryj ti nř mřr. Kỹ tóg ěg kykũnh ke mũ sir, ěg jykre pãno tỹ tũg' he jé.

¹⁰ Ěg tỹ: “inh pi(jé) ti vř mranh ja nřgtĩ,” hen kỹ ěg tóg Topě to: “ti ón vē,” he mũ. Kỹ ěg pi(jé) ti vř ki kanhrãn há nřtĩ'.

2

Jesus vř ěg tar han ke mũ

¹ Inh krė, sř tag rán vē ājag mř, ājag tỹ ti vř mranh sór tũ nř jé. Kejėn ājag kãmĩ ũ tóg Topě vř mranh tĩ hã ra. Kỹ ũ tóg ti jagfy vřnh ke mũ ha, ěg jóg tỹ Topě mř, hã vř: Jesus Cristo, he mũ, ũn jykre kuryj jė ěn ti.

² Ti hã tóg ũ tỹ ti tén ke mũ ag mř vėnh fėg', ti tỹ ěg jagfy ter jé, ti tỹ ěg tỹ Topě vř mranh tỹ tũ' hen jé. Hã kỹ tóg ěg mř

věnh pãte fón sór mũ. Hã ra tóg ěg tăvĩ mỹ vễnh pãte fón sór tũ nĩ. Ěprã ke kar mỹ ke vễ, mỹr'.

³ Ha vé, ěg tỹ Topẽ vĩ kri fi kỹ ěg tóg vễso: “vãhã inh ti ki kanhró nĩ,” henh ke mũ.

⁴ Ũ tóg kejẽn: “ti ki kanhró sóg nĩ,” he tí. Hã ra tóg ti tỹ ěg mỹ nén tó ja ěn han tũ nĩgtĩ. Ti ón vễ. Ti pi(jé) Topẽ tỹ ki hã tó mũ ki kanhró nĩ'.

⁵ Ěg tỹ hã ra Jesus vĩ kri fi kỹ ěg tóg Topẽ to há nỹtĩ. Kỹ ěg tóg ti to há tăvĩ nỹtĩ ha ke gé. Tag han kỹ ěg tóg ti ki kanhrãn mũ, kỹ ěg tóg ti ki ge kỹ nỹtĩ ha, ha mẽ.

⁶ Ũ tóg ti to: “ti ki sóg rã kỹ jẽ,” he tí. Kỹ tóg ti jykre han kãn mũ sir. Jesus Cristo tỹ nén han ja han kãn tóg mũ. Kỹ tóg ti ki rã kỹ jẽ sir.

Ěg tỹ jagnẽ to há nỹtĩnh ke

⁷ Ājag to sóg há tăvĩ nĩ. Inh pi(jé) ājag mỹ nén ũ tăg rãn sór mũ'. Nén ũ si rãn sór inh mũ, ha mẽ. Vãsỹ Topẽ tóg ěg jyvẽn ja nĩgtĩ, ěg tỹ jagnẽ to há nỹtĩ jé. Cristo mur tũg ki tóg ěg mỹ tag tó ja nĩgtĩ, kỹ ājag tóg vãsỹ mẽ ja nĩgtĩ gé.

⁸ Hã ra tóg tăg nĩ gé, sỹ ājag mỹ rãn mũ tag ti. Cristo vỹ ěg mỹ tó mãn ja nĩ, ěg tỹ jagnẽ to há nỹtĩ jé, kỹ tóg ki króm ja nĩ, kỹ ěg tóg ti nón ki króm sór mũ gé. Ki hã tó ja ti nĩ, kỹ tóg nén ũ tăg ri ke nĩ, Cristo tỹ Topẽ nón tó mãn kỹ. Ha vé, koměr hã tóg kurãg tí. Kurã kãtĩg kỹ ti kuty tỹ tũg' he tí, koměr hã. Jesus tỹ ěg mỹ: “jagnẽ to há

nỹtĩmnĩ,” he to ken hã vễ, hã vỹ: kurã, he mũ.

⁹ Ũ tóg kejẽn: “inh hỹn kurã mĩ tũg mũ ha,” he tí, hã ra tóg Ā rėgre to jũ nĩ, Ā irmão to. Ěn vỹ kuty mĩ tí nĩ ver.

¹⁰ Ũ tỹ Ā rėgre to há nĩ ěn hã vỹ kurã mĩ tũg ke mũ. Ěn vỹ Ā rėgre tỹ prãnh ke han ke tũ pẽ nĩ.

¹¹ Ũ tỹ Ā rėgre to jũ nĩ ěn vỹ kuty mĩ tí mũ. Kuty to vễnh jykre han kỹ tóg jẽ nĩ ver. Kỹ tóg Ā tỹ hẽ ra tũg ke tag ki kagtũg nĩ gé. Kyvó ri ke ti nĩ, ti tỹ kuty mĩ tũn kỹ.

¹² Inh krẽ, sỹ ājag mỹ rãn vễ. Ājag tỹ Topẽ vĩ mranh ja ěn vỹ vễnh pãte fón kỹ nĩ nĩ, Jesus Cristo tugrĩn.

¹³ Ājag kãmĩ ke ũ vỹ sanh há nỹtĩ. Sỹ ājag mỹ rãn vễ gé. Ũ tỹ Ā tỹ nén kar han mũ to hã kã nĩ ěn ki kanhró ājag tóg nỹtĩ. Ājag kãmĩ ke ũ vỹ kyrũ nỹtĩ. Sỹ ājag mỹ rãn vễ gé. Nén-Kórég vỹ ājag tỹ hẽ ri ke ja tũ nĩgtĩ.

¹⁴ Inh krẽ, sỹ ājag mỹ rãn vễ. Ěg jóg mág ki kanhró ājag tóg nỹtĩ. Ājag kãmĩ ke ũ vỹ sanh há nỹtĩ. Sỹ ājag mỹ rãn vễ. Ũ tỹ Ā tỹ nén kar han mũ to hã kã nĩ ěn ki kanhró ājag tóg nỹtĩ. Ājag kãmĩ ke ũ vỹ kyrũ nỹtĩ. Sỹ ājag mỹ rãn vễ. Tar ājag nỹtĩ. Topẽ vĩ ki kanhró ājag tóg nỹtĩ. Nén-Kórég vỹ ājag tỹ hẽ ri ke ja tũ nĩgtĩ.

¹⁵ Ěg tỹ tag ki nén ũ kórég vėg mũ tag ki vễ'ĩ sór tũg nĩ, tag ki vễnh jykre ki vễ'ĩ sór tũg nĩ gé. Ěg tỹ tag to há nỹtĩn kỹ ěg tóg ěg jóg mág to há tũ nỹtĩ.

16 Ēprā vēnh jykre pi(jé) tỹ Topē jykre nĩ'. Ēprā vēnh jykre hā vē, ha mē: nén ũ kar to én ěg tóg tĩ. ěg tỹ nén ũ ve kỹ ěg tóg ěn mǎn sór tĩ. Kỹ ěg tóg: “ũn mág vỹ tỹ inh nĩ, isũ to, isỹ nén ũ kar to,” he tĩ gé. Topē jykre pijé'. Ēprā vēnh jykre hā vē.

17 Hā ra tóg kǎnhmar tũ' henh ke mũ, ěg tỹ nén vég mũ tag ti, ti tũg kỹ ěg tỹ ne to én ke tóg tũ tĩ gé. Ũ tỹ Topē vĩ han tĩ ěn vỹ tũ' henh ke tũ nĩ jāvo.

Ũ tỹ Cristo kato tē

18 Inh krē', kurā tỹ ěgno vỹ kakó tĩ ha. Kurā ěn kakó nĩn kỹ Cristo kato tē pē ěn vēnh ven ke mũ. Tag mē ājag huri. Hā ra ag tóg hur vēnh vinven, ũ tỹ ti kato tē mũ tỹ hēn ri ke ag. Hā ki ěg ki kanhró nỹtĩ, kurā tỹ ěgno kakó nĩ ti.

19 ěg mré ke ag vē vē, ũ tỹ ti kato tē mũ tag ag, hā ra ag tóg ón kỹ tỹ ěg mré ke ja nỹtĩgtĩ. Ag tỹ tỹ ěg mré ke pē nỹtĩ ra ag tóg ver ěg mré mũnh ke mũ vē. Hā ra ag tóg ti tovǎnh kỹ ti kato tē mũ ha. Hā ki tóg ve há tĩ, ag tỹ tỹ ěg mré ke tũ nỹtĩ ti.

20 Ājag kar vỹ vēnh vĩ há ki kanhró nỹtĩ. Jagrē ājag nỹtĩ, ũn jykre há ěn kuprĩg tỹ, hā kỹ ājag tóg ki kanhró nỹtĩ.

21 Hā kỹ sóg ājag mỹ rán mũ, ājag tỹ ki kanhró nỹtĩn kỹ. Ājag pi(jé) ki kagtĩg nỹtĩ'. Ũ tỹ vēnh vĩ há tó mũ ěn pi(jé) ón tĩ'.

22 Kỹ ũn nỹ hỹn ón tĩ'? Ũ tỹ ge vỹ ón pē han tĩ, ha mē: ũ tóg Jesus to: “ti pi(jé) tỹ Cristo nĩ,” he tĩ. “Topē tỹ ti jēnē pijé',

Topē kósin pijé',” he ag tóg tĩ gé, Jesus to. Ũ tỹ Cristo kato tē mũn hā vē. ěg jóg to ag tóg ón tĩ, ti kósin to ke gé.

23 Ũ tỹ Jesus to: “ti pi(jé) tỹ Topē kósin nĩ',” hen kỹ tóg ěg jóg mág ki kagtĩg nĩ gé. Kỹ ũ tỹ Jesus to: “Topē kósin vỹ tỹ ti nĩ,” hen kỹ tóg ěg jóg mág ti ki kanhró nĩ gé.

24 Vǎsỹ ājag tóg ti vĩ mẽ vén. ěn kǎ jatu tũg nĩ, ěn hā mĩ ěkren nĩ. Ājag tỹ tag to tar nỹtĩn kỹ ājag tóg Topē kósin ki ge kỹ nỹtĩ, ti panh ki ke gé. Hā kỹ ājag tỹ nén mẽ vén ja ěn tovǎnh tũg nĩ.

25 Ti hā vỹ ěg mỹ tó ja nĩ, ěg tỹ ěg rĩr krỹg ja tũ venh ke ti.

26 Ũ ag tóg ājag krĩn kónǎn sór mũ, ājag mỹ ón kỹ, ti vĩ tó kỹ. Hā kỹ sóg ājag mỹ vēnh rán tag han mũ.

27 Hā ra ājag tóg jagrē nỹtĩ, Topē kuprĩg tỹ. Kỹ tóg ājag kanhrǎn mũ sir, Topē kuprĩg ti. Ti hā vỹ ěg kanhrǎn tĩ, kỹ ũ vỹ ěg kanhrǎn mǎn ke tũ nĩ ha. Nén kar kǎmén ti tĩ, ěg mỹ, ěg jagrē ti. Vēnh vĩ há hā tó ti tĩ. Ti pi(jé) ón tĩ'. Ti tỹ ājag mỹ tó mũ ěn hā mĩ mũmnĩ, ti tỹ ājag mỹ: “Jesus hā ki ge kỹ nỹtĩmnĩ,” hen kỹ.

28 Inh krē', ti ki ge kỹ nỹtĩmnĩ. Kỹ tóg há tĩ. Kǎnhmar ti kǎtĩg ke mũ, kǎnhmar ti vēnh ven ke mũ. Kỹ ěg tóg mỹ'ǎg ke tũ nĩ, ti kǎtĩg kỹ, ěg tỹ ti ki ge kỹ nỹtĩn kỹ. ěg mỹ'ǎg kỹ ěg tóg ti kǎtĩg kỹ vēnh pigju sór mũ. Hā kỹ ke tũg nĩ.

29 Ti hā ne vēnh jykre kuryj hā mĩ tũg ja nĩgtĩ'. Kỹ ũ tỹ vēnh

jykre kuryj han mũ vỹ tỹ ti kósin nĩ. Tag mĩ ěkrén.

3

Jesus jãvy ag

¹ Ha vé, ěg jóg mág tóg ěg to há tãvĩ nĩ, hã ký tóg ěg to: “inh krẽ,” he mũ sir. Ti krẽ vỹ tỹ ěg nỹtĩ, Jesus jãvy. Hã ký ěprã ke ũ ag vỹ ěg jykre ki kagtĩg nỹtĩ. Ag pi(jé) Topě ki kanhró nỹtĩ', hã ký ag tóg ěg jykre ki kagtĩg nỹtĩ gé, ěg tỹ tỹ ti krẽ nỹtĩn ký.

² Ājag to inh há tãvĩ nĩ. Ūri ěg tóg tỹ Topě krẽ nỹtĩ. Kãnhmar ěg tóg ti mré nỹtĩnh mũnh mũ. Ký ěg hỹn hẽ ri ke nỹtĩnh mũ, kanhkã tá? Ha'. Kar ký ěg venh ke mũ, ti kãtĩg kar ký. Ěn kã ěg tóg tỹ ti hã pẽ nỹtĩnh mũ, ěg tỹ ěg kanẽ tỹ ti ve ký. Ti ve pẽ han jé ěg tóg (ke) mũ, kurã ěn kã.

³ Ěg tỹ tag hã ve sór vẽ. Hã ký ěg vẽnh jãnhkrig ke mũ, ěg tỹ ti jãnhkri nĩ ěn ri ke nỹtĩ jé, vẽnh jykre pãno tovãnh kãn ký.

⁴ Ěg tỹ ti vỹ mranh ký ěg tóg mranh mũ sir, ti tỹ ěg mỹ nén tó ja ti. Hỹ, mranh ký ěg tóg mranh tĩ, ti tỹ ěg jyvẽn ja ti.

⁵ Hã ra Cristo vỹ kãtĩg ja nĩ, ti tỹ ěg tỹ ti vỹ mranh ja tỹ tũg' he jé. Tag ki kanhró ěg tóg nỹtĩ. Ti pi(jé) mranh ja nĩgtĩ', Topě vỹ ti, inhhã.

⁶ Ěg tỹ ti ki ge ký nỹtĩn ký ěg tóg mranh mãn sór tũ nĩ ha. Ū tỹ ver mranh mãn sór ký tóg ti ve ja tũ nĩ, ti ki kagtĩg nĩ sir.

⁷ Inh krẽ', ker ũ vỹ jẽmẽ hẽ', ũ tỹ Ājag krĩn kónãn sór mũ vỹ ti. Ū tỹ vẽnh jykre kuryj han

mũ ěn hã vỹ kuryj nĩ, Topě kuryj nĩ ěn ri ke.

⁸ Ū tỹ Topě vỹ mranh mũ ěn vỹ tỹ Japo mré ke nĩ. Japo hã ne Topě vỹ mranh tĩgtĩ'. Topě tỹ nén ũ kar han mũ ěn kã Japo ne ti vỹ mranh vén', ký tóg ũri ti vỹ mranh tĩ nĩ gé. Hã ra Topě kósin vỹ Japo tỹ nén han mũ kókén ja nĩ, hã jé tóg mur ja nĩ.

⁹ Ěg tỹ tỹ Topě krẽ nỹtĩn ký ěg tóg Topě vỹ mranh mãn sór vãnh nỹtĩ ha, ěg tỹ Topě kuprĩg tỹ jagrẽ nỹtĩn ký. Topě vỹ mranh mãn sór ke tũ ěg nĩ ha, ěg tỹ tỹ ti krẽ nỹtĩn ký.

¹⁰ Ěg tỹ ag jykre tugnỹm ký ěg tóg ũ tỹ tỹ Topě krẽ mré Japo krẽ ki kanhró nỹtĩ. Ū tỹ vẽnh jykre kuryj han jãvãnh ěn pi(jé) tỹ Topě krẽ nỹtĩ', ũ tỹ Ā régre to há tũ nĩ ěn pi(jé) tỹ Topě krẽ nỹtĩ gé'.

Ěg tỹ jagnẽ to há nỹtĩnh ke

¹¹ Tag mẽ Ājag tóg, Ājag tỹ Topě vỹ mẽ vén ký, hã vỹ: “jagnẽ to há nỹtĩmnĩ,” he mũ.

¹² Ěg pi(jé) Caim jykre han ke mũ'. Satanás mré ke ja vẽ, Caim ti, hã ký tóg Ā jãvy tén. Ne nỹ hỹn ti jũ han, ký tóg ti tãnh? Jykre kórég ja ti nĩ, jãvo ti jãvy vỹ jykre há ja nĩ. Hã ký tóg Ā jãvy tãnh, ti jykre há ěn to. Hã ký jagnẽ jykre vég mũ ra jagnẽ to jũ tũg nĩ.

¹³ Inh kanhkã', ũ tỹ Topě ki rã tũ ag pi(jé) ěg to há nỹtĩnh mũ'. Tag jé Ājag mỹ kórég nỹ tũg hã ra.

¹⁴ Ha vé, jykre tãg ěg nỹtĩ, ký ěg tóg ěg rĩr krỹg ja tũ venh ke mũ. Ěg jykre si tovãnh ěg huri.

Tag ki kanhró ěg nýtĩ, ěg tỹ ũ tỹ ěg mré ti ki rã kỹ nýtĩ kar ag to há nýtĩn kỹ. ũ tỹ ěg mré Jesus ki rã mũ to há tũ nĩ ěn vỹ venh ke tũ nĩ, ěg rĩr krỹg ja tũ ti.

¹⁵ ěg tỹ ũ to kórég tí nĩn kỹ ěg ti tén ri ke han huri. Kỹ ěg tỹ ũ tén kỹ ěg pi(jé) ěg rĩr krỹg ja tũ venh ke mũ', tag ki kanhró ājag nýtĩ.

¹⁶ Cristo vỹ ěg tỹ jagně to há nĩ tag tỹ ěg kanhrãn. Věnh fěg tóg, ũ tỹ ti tén ke mũ ag mỹ, ti tỹ ěg jagfỹ ter jé. Hã kỹ ěg tóg ěg mré ke jagfỹ ter ke tag to tar nýtĩnh ke mũ gé, ũ tỹ ag jagfỹ ěg tén sór kỹ.

¹⁷ Ha vé, ũ tóg tag ki nén ũ mág vég tí. Jãvo ti mré Jesus ki rã kỹ nĩ ũ tóg tỹ nén ũ tũ nĩ. Hã ra tóg ti jagãgtãn sór tũ nĩ. ěn vỹ Topě to há tũ nĩ gé.

Kaně jur ke tũ ěg nĩ

¹⁸ Inh krě', ājag vỹ tãvĩ tỹ jagně to há nýtĩ tũg nĩ, krĩg mỹ. Jagně ki rĩrmnĩ. Jagně to há tãvĩ nýtĩ to ken hã vē.

¹⁹ Kỹ ěg tóg ki kanhró nýtĩ, ěg tỹ tỹ ũ tỹ ki hã tó mũ ěn krě nýtĩn kỹ. Kỹ Topě tóg ěg kaně jun mãn ke tũ nĩ ha. Jatu ěg nýtĩ ha, ěg tỹ jagně to ha pě nýtĩn kỹ.

²⁰ Kejěnh ěg tóg ěg kygně ja to ěkrég tí. Hã ra Topě tóg ki kanhró kar nĩ. ěg kãfór tóg nĩ, Topě ti, hã kỹ tóg kãnhmar ěg vóg kónãn ke tũ nĩ.

²¹ Inh krě', kejěnh ěg tóg Topě jykre ki króm há han tí. Kỹ ěg tóg: "inh hỹn kygně ja tũ nĩ," he tí. Kỹ ěg tóg jatun mỹ Topě mré vēmén tí sir.

²² Kỹ tóg ěg mỹ nĩm ke mũ, ěg tỹ ti mỹ nén to vỹ mũ ti. Ti tỹ ěg mỹ nén tó mũ ěn hã han ěg tóg tí, nén tỹ ti mỹ há nĩ hã ki króm ěg tóg tí, hã kỹ ěg tóg jatun mỹ ti mỹ nén ũ to vỹ tí.

²³ Ti tỹ ěg mỹ nén tó mũn hã vē, ha mē: "inh kósin tỹ Jesus Cristo ki gemnĩ, kỹ jagně to há nýtĩmnĩ," he ja ti nĩ ěg mỹ. ěg tỹ tag han mũ hã ve sór ti mũ.

²⁴ ěg tỹ ti vỹ ki króm kỹ ěg tóg sir ti ki ge kỹ nýtĩ. Kỹ Topě tóg tỹ ěg mré ke nĩ sir. Ā kuprĩg jěnh ja tóg nĩ ěg mỹ, kỹ ti kuprĩg tóg ěg mỹ tó tí, Topě tỹ tỹ ěg mré ke nĩ ti.

4

Topě kato tẽ mũ ag kuprĩg ti

¹ Ājag to há tãvĩ sóg nĩ, ha mē. Kãnhmar ũ vỹ jěmě sór tũg nĩ, ti tỹ: "Topě kuprĩg vỹ tỹ inh jagrě nĩ," he mũ ra. Koměr hã ti vỹ tugnỹm, ājag tỹ ve jé, ti tỹ Topě kuprĩg tỹ jagrě nĩ ti. Ón kỹ Topě vỹ tó tí ag vỹ mũ mũgtĩ, ũ tỹ hěnh ri ke ag, ha mē.

² ũ tỹ Topě kuprĩg tỹ jagrě nĩ ěn vỹ tag tó tí, ha mē: "Jesus Cristo ti, Topě kósin ti vỹ ěg ri ke han kỹ mur ja nĩ," he ti tí, ũ tỹ Topě ki rã kỹ jě ti.

³ ũ tỹ Jesus to tag tó tũ nĩn kỹ tóg Topě kuprĩg tỹ jagrě tũ nĩ. Cristo kato tẽ tí ěn kuprĩg tỹ tóg jagrě nĩ, ha mē. ěn vỹ vēnh ven ke mũ, ũ tỹ ti kato tẽ mũ ti. Tag mē ājag huri. Hã ra tóg hur jun, kỹ tóg mũ tí ha.

⁴ Inh krě', Topě tũ vỹ tỹ ājag nýtĩ. Ón kỹ Topě vỹ tó tí ag fĩn rãm ājag huri. Ha vé, Topě

kuprĩg tỹ ẽg jagrẽ vỹ ag jagrẽ kãfór nĩ. Hã kỹ ẽg tóg ẽg kato tẽ ag fĩn rãm kãn huri.

⁵ Topẽ ki rã tũ ag vẽ, hã kỹ ag tóg ù tỹ Topẽ ki ge tũ ag jykre tó tĩ, kỹ ù tỹ Topẽ ki ge tũ ag vỹ ag vỹ jẽmẽg tĩ.

⁶ Ag jãvo ẽg tóg tỹ Topẽ tũ nỹtĩ. Kỹ ù tỹ Topẽ ki kanhró nĩ ẽn vỹ ẽg vỹ mẽnh mũ. Ti tũ tũ ag vỹ ẽg vỹ mẽ sór tũ nỹtĩ. Hã ki ẽg tóg ki kanhró nỹtĩ, vẽnh jagrẽ tỹ vẽnh vỹ há tó mũ ti, vẽnh jagrẽ tỹ ag tỹ kygnẽ han tĩ ẽn ti ke gé.

Topẽ vỹ ẽg to há nĩ vén

⁷ Ājag to sóg há tãvĩ nĩ, ha mẽ. Jagnẽ to há nỹtĩm nĩ. Ẽg tỹ jagnẽ to há nỹtĩn kỹ ẽg tóg Topẽ jykre han tĩ. Ti hã vỹ ẽg to há nĩ vén. Ẽg tỹ jagnẽ to há nỹtĩn kỹ ẽg tóg tỹ Topẽ krẽ nỹtĩ, Jesus jãvy, kỹ ẽg tóg Topẽ ki kanhró nỹtĩ gé.

⁸ Ẽg tỹ jagnẽ to há tũ nỹtĩn kỹ ẽg tóg Topẽ ki kagtĩg nỹtĩ, kỹ ẽg ti ki rã ja tũ nĩ. Topẽ jykre vẽ, hã vỹ: ẽg to há, he mũ, ti tỹ ẽg to há nĩ sór nĩn kỹ. Hã kỹ ẽg tóg jagnẽ to há nỹtĩn ke mũ gé.

⁹ Tag to ẽg tóg ki kanhró nỹtĩ, Topẽ tỹ ẽg to há nĩn ki, ha mẽ: ã kósin pir jẽnẽ ja tóg nĩgtĩ, Topẽ ti, ti tỹ ga kri mur jé, ẽg tỹ ti kósin tũgrĩn rĩr krỹg ja tũ ẽn ve jé.

¹⁰ Ẽg pi(jé) ti to há nỹtĩ ja nĩgtĩ'. Ti hã ne ẽg to há nĩ vén', hã kỹ tóg ã kósin jẽnẽ, ti tỹ ẽg jagfỹ ter jé, ti tỹ ẽg tỹ ti vỹ mranh tỹ tũg' he jé. Ti tỹ ẽg to há nĩn hã vẽ.

¹¹ Ha vé, inh krẽ', Topẽ vỹ ẽg to há tãvĩ nĩ. Hã kỹ tóg há nĩ gé, ẽg tỹ jagnẽ to há nỹtĩn kỹ.

¹² Û pi(jé) Topẽ vég tĩ'. Ẽg tỹ jagnẽ to há nỹtĩn kỹ tóg há ra ẽg ki ẽmãn mũ ha, Topẽ ti. Kỹ ẽg tóg ti to há tãvĩ nỹtĩn mũ gé sir, ẽg tỹ jagnẽ to há nỹtĩn kỹ.

¹³ Topẽ vỹ ã kuprĩg tỹ ẽg jagrẽ han. Ẽg jagrẽ tag to ẽg tóg ti tỹ ẽg ki ẽmãn mũ tag ki kanhró nỹtĩ, ẽg tỹ ti ki ge kỹ nỹtĩ tag ti ke gé.

¹⁴ Topẽ vỹ ã kósin jẽnẽ, ti tỹ ga kri mur jé, ti tỹ ẽg kren han jé. Tag ve sóg, hã kỹ sóg tó mũ.

¹⁵ Û tóg Jesus to: "Topẽ kósin vẽ," he tĩ. Topẽ vỹ ti kãkã ẽmãn nĩ, ù tỹ tag tó mũ ẽn kãkã, kỹ tóg Topẽ ki rã kỹ jẽ nĩ gé.

¹⁶ Topẽ vỹ ẽg to há nĩ, tag ki kanhró ẽg tóg nỹtĩ. Kỹ ẽg tóg ti vỹ kri fig mũ gé, ti tỹ ẽg mỹ: "ãjag to sóg há nĩ," hen kỹ.

Topẽ vỹ ẽg to há nĩ. Kỹ, ẽg tỹ ti to há nỹtĩn kỹ ẽg tóg ti ki ge kỹ nỹtĩ, kỹ Topẽ vỹ ẽg ki ẽmãn ha.

¹⁷ Topẽ vỹ ẽg tar han sór mũ, ẽg tỹ ti to há tãvĩ nỹtĩn jé. Ẽg tỹ ti to há nỹtĩ ki kygnẽg tũ nĩn kỹ ẽg tóg kurã ẽn kã kanẽ jur ke tũ nĩ, ti tỹ ẽg jykre tũgnỹm ke kurã ẽn kã. Cristo tỹ ga kri tĩg kỹ nẽn han mũ ẽn ri ke han jé ẽg tóg (ke) mũ, hã kỹ ẽg tóg kanẽ jur ke tũ nĩ.

¹⁸ Ẽg tỹ Topẽ to há nỹtĩn kỹ ẽg kanẽ jur ke tũ pẽ nĩ. Ha vé, ẽg tỹ Topẽ to há nỹtĩn kỹ kygnẽg tũ nỹtĩn kỹ ẽg tóg mũmẽg ki kagtĩg nỹtĩ gé. Topẽ tỹ ẽg vóg kónãn ke to ẽg tóg ti

kamëg ke mũ. Ęg mũmëg vỹ
 ẽg vësỹrenh han mũ.

¹⁹ Ti hã vỹ ẽg to há nĩ vén
 inhhã, hã kỹ ẽg tóg ùri ti to há
 nỹtĩ ha.

²⁰ Û tóg kejën: “Topẽ to sóg
 há nĩ,” he tĩ. Hã ra tóg ù tỹ ẽg
 mré Jesus ki rã kỹ jẽ to kórég
 nĩ. Ti ón vë. Ęg régre mré ẽg
 mũgtĩ, gan kri. Ęg tỹ ẽg régre
 to há tũ nỹtĩn kỹ ẽg hỹn hẽ ri
 kenh ke mũ, ẽg tỹ Topẽ to há
 nỹtĩ jé, ẽg tỹ ùn vég tũ ẽn to?
 Ęg tỹ ẽg régre to há tãvĩ nỹtĩn
 kỹ, hã kỹ ẽg tóg Topẽ to há nỹtĩ
 gé.

²¹ Tag tó ja tĩ nĩ, ẽg mỹ, ẽg
 tỹ ti vỹ ki króm jé, Topẽ ti, ha
 mẽ: “ãjag tỹ Topẽ to há nĩ sór
 kỹ ãjag régre to há nỹtĩmũ gé,”
 he ja ti nĩ.

5

*Û tỹ Jesus ki rã tũ ag jykre
 fĩn rãm ẽg huri*

¹ Ęg tỹ Jesus to: “Cristo vỹ
 tỹ ti nĩ, Topẽ kósĩn vỹ tỹ ti nĩ,”
 hen kỹ ẽg tóg tỹ ti jãvy nỹtĩ. Kỹ
 ẽg tỹ ẽg jóg mág to há nỹtĩn kỹ
 ẽg tóg ti krẽ ù ag to há nỹtĩnh
 ke mũ gé, ù tỹ ẽg mré ti ki ge
 kỹ nỹtĩ ag to.

² Ęg hỹn hẽ ri kenh ke mũ,
 ẽg tỹ Jesus jãvy ù ag to há nỹtĩ
 jé? Topẽ to ẽg há nỹtĩnh mũ,
 kỹ ẽg tóg ti vỹ ki króm ke mũ
 gé. Jagnẽ to há to ken hã vë.

³ Ęg tỹ Topẽ to há nỹtĩ sór
 kỹ ẽg tóg ti vỹ ki króm ke mũ
 gé. Ti to há nĩ to ken hã vë. Ti
 vỹ pi(jé) kufy nĩ', ẽg tỹ nén ki
 króm ke ti.

⁴ Jesus jãvy ag ne ù tỹ ti ki ge
 tũ ag jykre fĩn rãm tĩ'. Ęg hỹn

hẽ ri kenh mũ, ẽg tỹ ti ki ge tũ
 ag jykre fĩn rãm jé? Topẽ ki rã
 jé ẽg tóg ke mũ. Ęg tỹ ti ki rã
 kỹ ẽg tóg hur fĩn rãm.

⁵ Ęg tỹ Jesus to: “Topẽ kósĩn
 vỹ tỹ ti nĩ,” hen kỹ ẽg tóg fĩn
 rãm ke mũ, ù tỹ ti ki ge tũ ag
 jykrén fĩn.

Jesus vỹ tỹ Topẽ kósĩn nĩ

⁶ Jesus Cristo tỹ ga kri tĩg kỹ
 tóg goj tỹ vënh kype kỹ jẽ, kỹ
 ti kyvénh tóg ti ki kãkutẽ gé, ti
 ter kỹ. Kỹ tóg nén ù régre han
 ja nĩ. Nén ù pir pijé'. Ti vënh
 kype tãvĩ pijé'. Ti vënh kype
 vỹ nĩ, kar kỹ ti kyvénh ti ke gé,
 ti tỹ ẽg jagfy ter tag ti. Kỹ Topẽ
 kuprĩg vỹ ẽg mỹ ti kãmén tĩ gé.
 Ti pi(jé) ón tĩ', Topẽ kuprĩg ti.

⁷ Kỹ ẽg ù tãgtũ tugrĩn ti tỹ tỹ
 Topẽ kósĩn nĩ ki kanhró nỹtĩ,

⁸ Topẽ kuprĩg tugrĩn, kar kỹ
 ti vënh kype ja tugrĩn, kar kỹ
 ti kyvénh tugrĩn ke gé, ti tỹ ẽg
 jagfy ter kỹ. Nén ù pir hã tó ag
 tĩ ti to, hã vỹ: “Topẽ kósĩn vỹ tỹ
 ti nĩ,” he mũ.

⁹ Ęprã ke ag tỹ ẽg mỹ nén
 ù tó kỹ ẽg tóg ag vỹ kri fig tĩ.
 Topẽ vỹ ẽprã ke ag vỹ kãfór nĩ,
 kỹ ti vỹ vỹ ki hã ke tãvĩ nĩ gé.
 Kỹ ù tỹ ẽg mỹ Topẽ kósĩn tó mũ
 vỹ tỹ Topẽ ti nĩ, hã kỹ tóg tỹ
 vënh vỹ há nĩ.

¹⁰ Ęg tỹ Topẽ kósĩn ki rã kỹ
 ẽg tóg ti ki kanhró nỹtĩ. Ti ki
 rã kỹ ẽg tóg to jykrén há han
 ke mũ. Topẽ hã vỹ ã kósĩn
 kãmén tĩ. Ęg tỹ ti vỹ to: “vënh
 vỹ há vë,” he sór tũ nĩn kỹ ẽg
 tóg ti to: “ti ón vë,” he mũ sir,
 ẽg tỹ ti vỹ kri fi sór tũ nĩn kỹ.

¹¹ Tag tó ti tĩ, Topẽ ti, ha mẽ.
 “ãjag tỹ rĩr krỹg ja tũ venh ke

han jé sóg ke mũ. Inh kósin ter ja to ãjag tóg rĩr krỹg ja tũ venh ke mũ,” he tóg, Topê ti.

12 Ęg tỹ ti kósin ki ge kỹ Ęg tóg Ęg rĩr krỹg ja tũ venh ke mũ. Ęg tỹ jãvo ti ki ge tũ nĩn kỹ Ęg tóg rĩr krỹg ja tũ venh ke tũ nĩ.

Topê vỹ Ęg vỹ jẽmẽg tĩ

13 Ājag hã ne Topê kósin ki ge kỹ nỹtĩ'. Kỹ ãjag tóg Ęg rĩr krỹg ja tũ venh ke mũ. Sỹ tag tó sór vẽ, ãjag mỹ, hã kỹ sóg rán mũ.

14 Ęg tỹ ti mré vẽnhykre pir han kỹ Ęg tóg jatun mỹ ti mré vēmén ke mũ gé. Kỹ Ęg tóg ti mỹ nén ũ kar to vỹ tĩ. Nén tỹ ti mỹ há nĩ Ęn hã to vỹ jé Ęg tóg ke mũ. Ęg tỹ ti mỹ nén tỹ ti mỹ há nĩ Ęn hã to vỹ kỹ tóg Ęg vỹ mẽnh ke mũ sir.

15 Ti tỹ Ęg vỹ mẽ kỹ tóg Ęg mỹ han ke mũ gé sir. Ęn kã ti pí(jé) han ke tũ nĩ', Ęg tỹ ti mỹ nén to vỹ mũ ti.

16 Kejẽn Ęg tóg Ęg mré Jesus ki rã kỹ jẽ ũ vég tĩ, hã ra tóg Topê vỹ mranh mũ. Hã ra tóg Topê tovãnh sór tũ nĩ. Topê tovãnh sór tũ ra tóg kygnẽ kỹ mranh mũ, Topê vỹ ti. Kỹ Ęg tóg Topê mré vēmén ke mũ, ti to, kỹ Topê vỹ ti krĩn ke mũ, ti tỹ ti jykre kórég tovãnh jé, ti tỹ Ęg rĩr krỹg ja tũ ve jé. Ęg kãmĩ ũ tóg kejẽn Topê tovãnh pẽ han mũ. Ęn to sóg ãjag mỹ: “ti to Topê mré vēmén,” he sór tũ nĩ.

17 Ęg tỹ vẽnhykre vẽnhy sĩ han kỹ Ęg tóg ti vỹ mranh tĩ. Ęg tỹ sĩn kỹ mranh mũ ra tóg kórég nĩ, kỹ tóg hã ra Ęg mỹ vẽnhy pãte fón sór mũ, kỹ Ęg tóg

ti tovãnh pẽ han ke tũ nĩ. Ęg tỹ ti tovãnh pẽ han kỹ Ęg nũgme ki vár ke mũ, infernon ki.

18 Ęg tỹ tỹ Jesus jãvy nỹtĩn kỹ Ęg tóg ti vỹ mranh mãn sór tũ nĩ. Ęg jy nĩgãn ti tĩ, Topê kósin ti, Satanás tỹ Ęg vóg tũ nĩ jé.

19 Ęg hã ne tỹ Jesus jãvy nỹtĩ'. Tag ki kanhró Ęg tóg nỹtĩ. Jãvo ěprã ke ũ ag vỹ tỹ Satanás krẽm ke kar nỹtĩ.

20 Topê kósin vỹ kãtĩg ja nĩgtĩ. Tag ki kanhró Ęg tóg nỹtĩ. Ęg nĩgrẽg róm tóg, Ęg tỹ Topê ki kanhrãn jé, Topê pẽ ti. Ti ki ge kỹ Ęg nỹtĩ, Ęg tỹ ti kósin tỹ Jesus Cristo ki ge kỹ nỹtĩn kỹ. Ti hã vỹ tỹ Topê pẽ nĩ, Jesus Cristo panh ti. Ti hã vỹ Ęg tỹ Ęg rĩr krỹg ja tũ venh ke han tĩ.

21 Inh krẽ', vẽnhy kãggrã tỹ topẽ jykre han sór tũg nĩ. Hã vỹ, sỹ ãjag mỹ nén rán sór mũ ti.

JOÃO TỸ CARTA HAN MÃN

1 João kófa tỹ rá vễ. Isỹ fi mỹ rán hã vễ, Topẽ tỹ fi kuprẽg kỹ, fi krẽ mỹ ke gé, hã vỹ: Topẽ ki ge kỹ nỹtĩ kar, he mũ. Ājag to sóg há tãvĩ nĩ, ha mẽ. Kỹ ù tỹ vễnh vĩ há kri fig mũ kar vỹ ājag to há nỹtĩ gé inh mré.

2 Vễnh vĩ há vỹ ěg kãkã nĩ nĩ, tovãnh ke tũ pẽ ěg tóg nĩ. Hã kỹ ěg tóg jagnẽ to há nỹtĩ.

3 ěg jóg tỹ Topẽ mré sóg vēmén tĩ, ti tỹ ājag jagãgtãn jé, ti tỹ ājag tar han jé, ti tỹ ājag krĩ kuprãg jé ke gé. Jesus Cristo mỹ sóg tag to vĩ tĩ gé, ěg jóg mág kósin mỹ. Ti vĩ kri fig ěg tóg tĩ, vễnh vĩ há kri, kỹ ěg tóg jagnẽ to há nỹtĩ gé.

Ěg tỹ jagnẽ to há nỹtĩnh ke

4 Ā krẽ kãmĩ ù vỹ vễnh vĩ há nón mũ mũ, jỹ, kỹ tóg inh mỹ sér pẽ tĩ, sỹ tag mẽ kỹ. ěg jóg tỹ ěg mỹ nén tó ja ěn han kãn sór ag nẽji mũ.

5 Kỹ sóg ã mỹ rán mũ, jỹ. Ā mỹ sóg: “jagnẽ to há nỹtĩmnĩ,” he mũ. Nén ù tãg pijé', sỹ ã mỹ nén rán mũ tag ti. Vãsỹ ěg tóg tag mẽ, ěg tỹ ti ki rã vén kỹ.

6 Ěg tỹ Topẽ to há nỹtĩnh kỹ ěg tóg Jesus tỹ ěg mỹ nén tó ja ěn han kãn ke mũ sir. Ti tỹ ěg mỹ nén tó vén hã vễ, hã vỹ: “jagnẽ to há nỹtĩmnĩ,” he mũ.

Ũ ag tóg Jesus to ón tĩ

7 Ũ tỹ hẽn ri ke ag vỹ mĩ mũgtĩ, hã ra ag tóg Jesus

Cristo to ón tĩ. Ti to ag tóg: “ti pi(jé) ěg ri ke mur ja nĩ', ěprã ke fi kósin pijé',” he tĩ. Ag ón vễ. Cristo kato tẽ ag vễ.

8 Vễnh ki rĩrmnĩ, ājag tỹ ag vĩ kri fig tũ nĩ jé, ājag rãnrãj tỹ ājag mỹ tũ' he tũ nĩ jé. Vãsãn nĩ, ājag tỹ tá ti kaja ve jé, Topẽ tỹ ěg mỹ nén nĩm sór mũ ti.

9 Ũ tóg Cristo kãme pãtén sór mũ, ti vễme pãte tóg ù tó sór mũ. Ti tovãnh to ken hã vễ. Ũ tỹ ge pi(jé) Topẽ ki rã kỹ jẽ ha'. Ěg tỹ Jesus kãme mĩ mũn kỹ ěg tóg ěg jóg mág ki rã kỹ nỹtĩ, ti kósin ki ke gé.

10 Kejẽn ù tóg ājag tá jun tĩ, hã ra tóg tag tó tũ nĩgtĩ. Kỹ ti mỹ: “inh mré nĩnh kãtĩg,” he sór tũg nĩ gé. Ti mỹ: “Topẽ vỹ ã ve há han,” he tũg nĩ gé.

11 Ěg tỹ ù tỹ ge mỹ: “Topẽ vỹ ã ve há han,” hen kỹ ěg tóg ti jykre to: “há ti nĩ,” he mũ gé. Kỹ tóg ěg tỹ ti mré ón mũ ri ke nĩ sir, ěg tỹ ti mỹ vĩ há han kỹ.

12 Sỹ ājag mỹ nén rán sór mũ vỹ ver e tĩ, hã ra sóg rán kỹ jẽnẽ sór tũ nĩ. Sỹ ājag ki jun sór vễ, kỹ sóg ājag mỹ tó sór mũ, ājag mré vēmén sór isóg mũ, ěg tỹ jagnẽ fe tỹ mrin ke jé.

13 Ā régre fi krẽ vỹ ã mĩ ěkrég tĩ. Topẽ tỹ ùn kuprẽg mũ fi vễ. Hã vễ, sỹ ājag mỹ nén rán sór mũ ti.

JOÃO TỸ CARTA Ữ HAN MÃN

¹ João kófa tỹ rá vễ. Sỹ inh mré ke tỹ Gaio mỹ rán hã vễ.

² Ầ to sóg há tãvĩ nĩ. Hỹ, há tãvĩ sóg nĩ, ầ to. Ầ to sóg Topễ mré vēmén tĩ, ti tỹ ầ mỹ nén há kar nĩm jé, ầ kaga tũ nĩ jé ke gé. Topễ to tar ầ tóg jễ, tag ki kanhró, sóg nĩ.

³ Ầ mré ke ag tóg inh ki junjun, kỹ ag tóg inh mỹ tó, ầ tỹ vễnh vĩ há nón tĩ mũ ti, ầ tỹ to tar nĩ ti. Kỹ tóg inh mỹ sér pễ ti.

⁴ Inh krễ tỹ vễnh vĩ há nón mũn kỹ tóg inh mỹ sér tãvĩ tĩ, nén ừ tỹ inh mỹ sér nĩ kar kãfór, hã kỹ tóg inh mỹ sér tĩ, ầ tỹ vễnh vĩ há nón tĩg kỹ.

⁵ Ầ to sóg há tãvĩ nĩ, Gaio'. Ềg mré ke ag ki rĩr há han ầ tóg nĩgtĩ, ừ tỹ kór há tá kãmũ mũ ag mré hã.

⁶ Tag tó ag tóg tag ki, igreja krēm, ầ mré ke ag. Ag to há tãvĩ ầ nễji nĩ. Ag ki rĩr mãn nĩ gé, ag tỹ ầ ki junjun kỹ, kỹ ag mỹ nĩm nĩ, nén ừ tỹ ag mỹ tũ ền ti.

⁷ Topễ rãnrãj han ag tóg tĩ. Jesus Cristo jyjy tó kỹ ag tóg hễn ra mũgtĩ, kỹ ag tóg ừ tỹ ti ki ge kỹ nỹtĩ tũ ag tũ mãn vãnh nĩgtĩ.

⁸ Hã kỹ tóg há tĩ, ềg tỹ ừ tỹ ge ki rĩr há han kỹ, ềg mré ke ag. Ềg tỹ ag ki rĩr há han kỹ tóg ềg tỹ ag mré Topễ vĩ há tó mũ ri ke nĩ sir.

⁹ Ầ jamã tá igreja krēm vễnh mãn tĩ ag mỹ sóg vễnh rá jễnễ, hã ra Diótrêfes vỹ inh vĩ mễ jãvãnh nĩ. Ag kri tỹ ừn mág jễ sór ti nĩ, Diótrêfes ti.

¹⁰ Isỹ tá jun kỹ sóg ti mỹ tónh ke mũ, ti jykre pãno ti, vễnh kar rĩnve. Ồn kỹ tóg iso féfén tĩ. Hã ra tóg nén ừ kórég ừ han tĩ gé, hã kỹ tóg ềg mré ke ag tỹ ầjag tã junjun kỹ tóg ag mỹ: “inh mré nĩnh kãmũ jễg,” he vãnh nĩgtĩ. Kỹ tóg ừ ag tỹ ag mỹ: “inh mré nĩnh kãmũ jễg,” he sór mũ ra tóg ag tỹ ag mỹ vĩ há han kamềg tĩ gé. Ag mỹ tóg: “igreja krēm ầjag tóg rã mãn ke tũ nĩ ha,” he tĩ, ag tỹ ềg mré ke ag mỹ vĩ há han sór kỹ. Jykre kórég tãvĩ ti nĩ, Diótrêfes ti. Hã kỹ sóg ti kato tễnh ke mũ, ha vemnĩ.

¹¹ Ti jãvo sóg ầ to há tãvĩ nĩ, Gaio'. Ừ tỹ nén ừ kórég han mũ ra ti kóm han sór tũg nĩ. Nén ừ há hã han sórmnĩ. Ềg tỹ nén ừ há kar han kỹ ềg tóg tỹ Topễ krễ nỹtĩ gé. Ừ tỹ ti kórég han mũ vỹ Topễ ki kagtũg nĩ.

¹² Demétrio vỹ tỹ ừn jykre há nĩ, hã ra. Vễnh kar vỹ ti to vĩ há han tĩ. Ki hã ag tóg tó tĩ, ag tỹ ti to vĩ há han kỹ, hã kỹ sóg ag mré tó mũ gé. Isỹ vễnh vĩ há hã tó mũ ki kanhró ầ tóg nĩ.

¹³ Sỹ ầ mỹ nén rán sór mũ vỹ ver e tĩ, hã ra sóg rán kỹ jễnễ sór tũ nĩ.

¹⁴ Kãnhmar sóg ầ venh ke kãtĩg mũ. Kỹ ềg tóg jagnễ mré vēmén ke mũ.

¹⁵ Ầ jé jatun mỹ nĩ nĩ. Tag ki inh mré ầ to há nỹtĩ ag vỹ ầ mĩ ềkrég tĩ. Kỹ ầ jamã tá inh mré

ke kar mǝ: “ãjag mǝ tóg ěkrég
tǝ,” hemñĩ iso. Vyrmǝ ag mǝ
tómñĩ, sǝ ag mǝ ěkrég mǝ ti.

Hã vǝ, sǝ ã mǝ nén rán sór
mǝ ti.

JUDAS TÝ CARTA

¹ Judas tý rá vě, Tiago jávy ti. Jesus Cristo mý sóg rãnhřãj tĩgtĩ. Isý ũ tý ěg jóg tý Topě tý kuprĕg ja ag mý rán hã vě, ti tý ũ to há ag mý. Ti tý ājag kuprĕg ký tóg ājag jy nĩgãn tĩ gé, Jesus Cristo tugrĩn.

² Topě mré sóg vĕmén tĩ, ti tý ājag jagãgtãn pĕ han jé, ti tý ājag krĩ kuprã pĕ han jé, ti tý ājag tý jagnĕ to há tãvĩ han jé ke gé.

Ū tý Topě to un'ón mũ ag

³ Inh krĕ', ājag mý sóg Topě tý ěg kar kren han tag tónh ke nĩ vě, inh vĕnh rá tag ti ki. Hã ra vãhã ũ ag tóg ājag krĩn kónãn sór mũ ha, hã ký sóg ājag mý: "Topě ki rã to tar nýtĩmnĩ," he mũ. Topě tý ěg mý nĕn tó mũ vỹ pir nĩ, hã vỹ: Topě jykre to tar nĩ, he mũ. Ā tũ ag kar mý tóg tag tó ja nĩ. Ū tý tag kato vĩ ký ti vĩ jĕmĕ sór tũg nĩ.

⁴ Ha vé, ũ ag tóg Topě to un'ón tĩ, ājag krĩn kónãn jé. Ūn jykre pãno ag vē, hã ra ag tóg jykre há nĩ ve nýtĩ, hã ký ājag tóg ag vĩ kri fi sór mũ. Hã ra ag tóg ón ký: "ěg jóg tý Topě vỹ ěg jagãgtãn mũ, hã ký ěg jatun mý vĕnh jykre vĕnhmỹ kar han ke mũ," he tĩ, ũ tý ājag krĩn kónãn mũ ag. ěg Senhor tý Jesus Cristo to ag tóg: "ti vĩ han ke tũ ěg nĩ," he tĩ. Ti hã ne tý ěg kri ke nĩ', Jesus ti. Hã ra ũ tý ti vĩ han sór tũ ag tóg rán ký nýtĩ gé. Vãsý ag tóg ag to

rán ja nĩgtĩ, Topě vĩ rán tĩ ag, ký ag tóg Topě tý ũ tý ge ag vóg kónãn ke mũ ěn tó ja nĩgtĩ.

⁵ Ha vé, vãsý ěg Senhor vỹ ga tý Egito tá ā povo tý Israel mré kãkutĕ ja nĩgtĩ, ag tý ājag ga ra mũ jé. Hã ra ag kãmĩ ũ ag tóg ti vĩ kri fi vãnh ja nýtĩgtĩ. Hã ký Topě vỹ ag tý tũg' he kãn, ũ tý ti vĩ kri fi jãvãnh ja ag. Tag mĕ ājag huri. Ki kanhró ājag nýtĩ. Hã ra sóg rán mãn sór mũ, ājag tý mĩ ěkren jé.

⁶ Ký kanhkã tãn ag vỹ ge ja nĩgtĩ gé. Ag kãmĩ ũ ag tóg Topě tý ag mý nĕn nĩm ja ěn tovãnh. Ājag jamã tovãnh ag tóg. Ký Topě vỹ ag sigsé, ký tóg ěmã kuty tá ag vin han. Ag se vỹ tũg' henh ke tũ nĩ. Topě tý ěg kar jykre tugnỹm ke kurã ěn kã tóg ag jykre tugnỹm ke mũ gé.

⁷ Kar ký cidade tý Sodoma mĩ ěkren nĩ gé, cidade tý Gomorra mĩ ke gé, ti pĕnĩn ěmã kãsir mĩ ke gé. ěn tá ke ag ne vĕnh jykre pãno tãvĩ han tĩ ja nĩgtĩ', kanhkã tãn ag ri ke. Jagnĕ mré nỹ kónãn tãvĩ han ja ag tóg nĩgtĩ, ký ag tóg ũ ag to ěn ja nĩgtĩ gé, ag mré ke tũ ag, ũn gré tý ũn gré ũ mré nỹ sór ký. Ký Topě vỹ pĩ nhyr vãnh ki ag vãm ja nĩgtĩ, ěg tý ag to jykrĕn ký to ki kanhró nýtĩ jé.

⁸ Ký ũ tý Topě to ón mũ ag vỹ vĕnh jykre kórĕg han mũ ěn ag ri ke han tĩ gé. Topě vĩ mranh ký ag tóg nĩgtĩ. Ag vĕnh pétĩ tóg ag mý sér tĩ. Hã ra ag tóg vĕnh kavĕnh tĩ, ājag jykre pãno tugrĩn. "ěg pi(jé) tý ũ krĕm ke nýtĩ'," he ag tóg tĩ. Ký ag tóg ěg tý ũn vég tũ ag to

vĩ kónãn tĩ gé, ù tỹ kanhkã tá tỹ ùn mág nỹtĩ ag mỹ.

⁹ Topê tỹ jẽnê jafã to pã'i tỹ Miguel vỹ tag han ja tũ nĩgtĩ, ha mẽ. Satanás mré tóg rará, ti tỹ Moisés ter ma tĩg sór kỹ, Miguel ti. Hã ra tóg Satanás mỹ vĩ kónãn ja tũ nĩgtĩ, ti tỹ tỹ pã'i nĩ ra. Ti mỹ tóg: “ĕg Senhor jé ã vóg kónãn,” he ja nĩgtĩ, Miguel ti.

¹⁰ Hã ra ùn ón tĩ tag ag vỹ kanhkã tãn ag to vĩ kónãn tĩ, ag tỹ ag ki kagtĩg (hã) ra. Bicho ri ke ag nỹtĩ, ag tỹ ãjag tỹ nén to én mũ ěn han mũn kỹ. Krĩ tũ ag nỹtĩ, hã kỹ ag tóg nén ù vẽnhmỹ kar han tĩ. Hã ra Topê vỹ ag vóg kónãn ke mũ.

¹¹ Ag ve kónãn ti tĩ, Topê ti. Caim tỹ Topê vĩ kato tẽ ja ěn ri ke han ag tóg mũ. Ag tỹ rico nỹtĩ sór kỹ ag tóg vẽnh jykre kórég tó tĩ, Balaão tỹ vẽnh jykre kórég tó ja ěn ri ke. Coré ri ke ag tóg Topê kato tẽ tĩ, hã ra ag tóg tag to nũgme ki vár ke mũ.

¹² Ājag tỹ Jesus ki ge kỹ jagnê to há nỹtĩn kỹ ãjag tóg igreja krêm festa han tĩ. Ēn kã ag tóg ãjag mré jẽn tĩ gé, ù tỹ Topê to ón tĩ ag. Hã ra ag tóg ki ãjag kavénh tĩ gé. Jatun mỹ ag tóg jẽn mág tĩ. Mý'ãg vãn h ag nỹtĩ. Û to jykrén vãn h ag tóg nỹtĩ gé. Ājag jẽn mág hã mũ ag tóg ĕkrég tĩ. Kejẽn kãka tóg kanhkã góg tatĩn kãtĩg mũ, hã ra tóg kutê tũ nĩgtĩ. Tag ri ke ag nỹtĩ, véké ag tóg vĩ tĩ. Ka ù tóg kanĕn vãn h nỹtĩ. Ēn kunũg ĕg tóg tĩ, ti jãre mré hã, kỹ tóg kanĕn mãn ke tũ pẽ nĩ sir. Ter ti nĩ ha. Tag ri ke ag tóg nỹtĩ

gé, ù tỹ Topê to ón mũ ag.

¹³ Kejẽn goj kafã tũ tóg krêm ke mũ, kỹ tóg jĕngéj nĩ. Tag ri ke ag nỹtĩ gé. Ti jĕngéj vỹ tỹ ag jykre pãno nĩ. Vẽn h ven ti tĩ. Krĩg tĩ tĩ ri ke ag tóg nỹtĩ gé. Sĩnvĩ nĩ ve tóg nĩ, hã ra tóg ón kỹ tĩ tĩ, krĩg tĩ tĩ ti. Tag ri ke ag nỹtĩ. Topê vỹ kuty ki ag vãm ke mũ, kỹ ag tóg tá kãpa mãn ke tũ pẽ nĩ, ù tỹ Topê to ón mũ ag.

¹⁴ Ag hã to tóg rán ja nĩ, Enoque ti. Adão krĕ tỹ ki krĕg mãn tỹ 7 (ke) vỹ tỹ ti nĩ, Enoque ti. Ti hã vỹ ag to: “ha vé, ĕg Senhor vỹ jun ke mũ, ti tỹ jẽnê jafã ag mré hã,” he ja nĩ. “E tãvĩ ag nỹtĩ, ti tỹ jẽnê jafã ag.

¹⁵ Ti kãtĩg kỹ tóg ĕprã ke ag jykre tugnỹm kãn ke mũ. Kỹ tóg ùn jykre pãno ag vóg kónãn ke mũ, ag jykre pãno to, ag tỹ Topê kato tẽ to, ag tỹ ti to vĩ kónãn to. Û tỹ ti vĩ mranh tĩ ag vỹ ti mỹ vĩ kónãn pẽ han tĩ, hã kỹ tóg ag vóg kónãn ke mũ,” he ja tóg nĩ, Enoque ti.

¹⁶ Topê to ón mũ ěn ag tỹ nén ù jagy ve kỹ tóg ag mỹ kórég nĩ, hã kỹ ag tóg: “Topê ne tóg jykre kórég nĩ,” he tĩ. Ājag tỹ nén to én mũ ěn hã han ag tóg tĩ. Hã ra ag tóg ón kỹ vĩ mág tĩ. Kỹ ag tóg vẽn h kar mỹ vĩ há han tĩ, ón kỹ, ag tỹ ãjag vĩ há to nén ù ve jé, ag tỹ to rico nỹtĩ jé.

Ĕg tỹ apóstolo ag vĩ jĕmĕnh ke

¹⁷ Ag jãvo apóstolo ag vĩ mũ ĕkrén nĩ, inh krĕ'. Ĕg Senhor tỹ Jesus Cristo hã vỹ apóstolo

ag vin ja nĩgtĩ, hã kũ ag vĩ mĩ ěkren há han nĩ.

¹⁸ “Kurã tũ ěgno to hã ag tóg ājag to é henh ke mũ,” he ja ag tóg nĩgtĩ, apóstolo ag. “Ājag tũ nén ũ kórég to én mũ ěn hã han sór ag tóg mũgtĩ, ũ tũ ājag to é henh ke mũ ěn ag,” he ja ag tóg nĩgtĩ. Apóstolo ag tũ tó jan hã vē.

¹⁹ Ag hã vē, sũ ājag mũ ũn tó mũ ag. Ũ tũ Topě to ón mũ ěn ag hã vē. Ěg tũ jagně kato tē han sór ag tóg mũ. Ag tũ nén ũ to én mũ tag hã ne ag mũ há tĩ'. Ag pi(jé) Topě kuprĩg tũ jagrě nỹtĩ'.

²⁰ Ag jāvo ājag tóg Topě jykre ki ge kũ nỹtĩ, Topě tũ ki, kũ to jagně tar han nĩ, inh krě'. Topě kuprĩg tũ ājag krĩn kũ Topě mré vēmén nĩ.

²¹ Topě vỹ ājag to há tãvĩ nĩ. Ti tovãnh tũg nĩ. Ěg Senhor tũ Jesus Cristo tũ ājag jagãgtãn ke tag hã ve sórmnĩ, kũ ājag tóg ěg rĩr krỹg ja tũ venh ke mũ.

²² Ũ ag tóg tag to tar tũ nỹtĩ ver, “hỹ mũ vỹ?” he ag tóg tĩ. Tag ag jagãgtãn nĩ.

²³ Ag kren han nĩ, pĩ jo ag jy nĩgãn kũ. Kũ ũ ag tóg ājag tũ nén to én mũ kar ěn han tĩ. Ag jagãgtãn nĩ gé. Hã ra vēso jykrén nĩ gé, ājag tũ ag jykre pãno nón mũ sór tũ nĩ jé. Kavėj ag nỹtĩ, ag jykre kórég to. Kũ ag kavėj tag to én sór tũg nĩ. Věso jykrén tãvĩ han nĩ.

Topě tũ tũ ũn mág nĩ

²⁴ Topě vỹ ěg tũ prãnh ke tũ han ki kanhró nĩ. Kũ tóg ěg tũ ũn há tãvĩ han ki kanhró nĩ gé, ti tũ kejěn ěg jé prěr ken kũ, ěg

tũ ti rĩnja tá nỹtĩ jé. Tá tóg sĩnvĩ pě nĩ, sér pě.

²⁵ Pir ti nĩ, Topě ti, ěg kren han tĩ ti. Ěg Senhor tũ Jesus Cristo tugrĩn tóg ěg kren han tĩ. Ti hã ne tóg tar nĩ', ti hã ne tóg tũ ũn mág nĩ', ti hã ne tóg tũ pã'i nĩ', ti hã ne tóg tũ vēnh kar kri ke nĩ'. Vãsũ tóg kã nĩ nĩ, nén ũ kar han tũg ki, ũri ke gé, hã ra tóg tũg' henh ke tũ pě nĩ gé, ti tũ tũ ũn mág jé ti.

Amém.

JOÃO TỸ ËG TỸ NÉN VENH KE MŨ RÁ

¹ Topě vỹ Jesus Cristo mỹ nén (ũ) tỹ hên ri ke ven, ãg tỹ kãnhmar nén venh ke mũ ti, kỹ Jesus vỹ ãg mỹ ven, ãg tỹ tỹ ti camarada nỹtĩn kỹ. Kỹ tóg ã tỹ jênê jafã jênê, ti tỹ ti camarada tỹ João mỹ tó jé gé.

² Ve kãn ja ti nĩ, João ti, Topě tỹ ti mỹ nén ven mũ ti, Jesus Cristo tỹ ti mỹ nén ven mũ ti ke gé. Ti tỹ ve kỹ tóg rãn ja nĩ, João ti, hã vỹ nĩ.

³ Ũ tỹ vênh rá tag to ke mũ ag mỹ tóg vỹ há han ke mũ, Topě ti, ũ tỹ vênh vỹ tag mễg mũ ag mỹ ke gé. Topě tỹ tó mũn hã vễ, ãg tỹ ti vỹ ki króm jé. Kãnhmar ãg tóg tag ki rãn kỹ nĩ tag ve kãn ke mũ, kakó tãvĩ tóg tí ha.

João tỹ ãmã tỹ 7 (ke) tá Jesus mré ke ag mỹ ti vỹ tó

⁴ João tỹ rá hã vễ. Isỹ ga tỹ Ásia tá Jesus mré ke ag mỹ rãn hã vễ, cidade tỹ 7 (ke) ki ke ag mỹ.

Topě jé ãjag tỹ tar' hé, kỹ ãjag jé krĩ kãnhvy nỹtĩ. Topě vỹ nĩgtĩ. Vãsy tóg nĩ ja nĩgtĩ, kỹ tóg ũri nĩ nĩ, hã ra tóg kãtĩg ke mũ gé. Ti kuprĩg vỹ ti mré nĩ gé, kỹ tóg tỹ ũ tỹ 7 (ke) ve nĩ, ti kuprĩg ti. Topě nĩgja tá tóg nỹtĩ, ti kuprĩg tỹ tỹ ũ tỹ 7 (ke) ve ên ti. Ti kuprĩg ên jé Topě mré ãjag krĩ tỹ kãnhvy' hé,

⁵ Jesus Cristo mré ke gé. Jesus vỹ Topě vỹ tó há han ja

nĩgtĩ, to tóg krónh ke ja tũ nĩgtĩ. Kỹ tóg ã ter kar kỹ rĩr mãn vén ja nĩ. Kỹ ãg rĩnrĩr mãn ke mũ gé, ti nón. Kỹ Jesus tóg ãpã pã'i ag kri tỹ ũn mág jé gé.

Ëg to há tãvĩ ti nĩ, Cristo ti. Ti kyvénh tóg ãg jagfy ti ki kãkutê, tỹ tóg ãg krenkren han, ãg tỹ Topě vỹ mranh ja to.

⁶ Kỹ tóg ãg tỹ pã'i han ke mũ gé, ti krêm. Topě tũ ki rĩr jé ãg tóg ke mũ gé, ti jóg tũ ki. Ti hã ne ã pir mỹ tỹ ũn mág nĩ', Jesus ti. Ti hã ne ã pir mỹ tar nĩ', ũri, kỹ tóg tũ' henh ke tũ nĩ, ti tar nĩn kỹ. Hã vễ.

⁷ Ha vé, kãtĩg mãn jé tóg ke mũ, kãnhkã góg kãmĩ. Vênh kar vỹ ti venh ke mũ, ên kã, ũ tỹ ti kusón mũ ag mré hã. Kỹ povo kar vỹ ti tugrĩn jagtar kãn ke mũ. Jagtar jé ag tóg ke mũ, vễsyrénh jé ag tóg ke mũ, ha vemnĩ. Hã vễ.

⁸ "Ũn ve vỹ tỹ inh nĩ, hã ra sóg tỹ ãgno nĩnh ke mũ gé," he tóg, ãg pã'i mág ti. Vãsy tóg nĩgtĩ, kỹ tóg ver ũri nĩ gé, kỹ tóg kãtĩg ke mũ gé, ũ tỹ nén (ũ) kar han ki kãnhrãn mũ ên ti.

João tỹ Jesus ve

⁹ ãjag mré ke vỹ tỹ inh nĩ, inh, hã vỹ: João, he mũ. Jesus mré ke vỹ tỹ inh nĩ, ãjag mré. Jagtar inh nĩ gé, ãjag jagãgtar ri ke inh nĩ gé, hã ra sóg ãjag kóm to krónh ke tũ nĩgtĩ gé, kỹ sóg ãjag mré Topě tỹ tỹ ãg pã'i nĩ venh ke mũ gé. Goj vãso tá inh nĩ nĩ, ti jyjyn hã vỹ: Patmos, he mũ. Kĩ sóg se kỹ nĩ nĩ, isỹ Topě vỹ tó ja tugrĩn. Jesus vỹ ãg mỹ ki hã tó ja nĩ.

Ti vī ěn tó ja inh nī, vēnh kar mý, hã tigrĩn isóg se ký jě.

10 Domingo ũ kã Topě kuprĩg tóg inh mý nén nē ven. Inh pãñĩ tá sóg jamã hár(a) vēnh vī mẽ, ký tóg trombeta kyr mẽ ja nī, vēnh vī ěn ti.

11 Ký tóg inh mý: “rán nī, ã tỹ nén vég mũ tag ti,” he ja nī. “Livro ki rán nī. Inh mré ke ag mý livro tag jěñěmnĩ, cidade tỹ Éfeso ra, cidade tỹ Esmirna ra, cidade tỹ Pérgamo ra, cidade tỹ Tiatira ra, cidade tỹ Sardes ra, cidade tỹ Filadélfia ra, cidade tỹ Laodicéia ra ke gé,” he ja tóg nī, inh pãñĩ tá inh mý vēnh vī tó mũ ěn ti.

12 Ký sóg vēsýjãm ěvãnh, sý ũ tỹ inh mré vī mũ ěn ve jé. Isý vēsýjãm ěvãnh ký sóg néj tỹ kri vin jafã tỹ 7 (ke) vé, vela tỹ kri vin jafã ěn, ouro tỹ tóg hyn han ký nýtĩ.

13 Néj tỹ kri vin jafã ag kuju kã ũ tóg jě nī, hã ra tóg tỹ ěprã ke nī ve nī. Kur téj tu ký tóg jě nī, ouro tỹ tóg vēsóg fĩn ký jě nī gé, ti fe kri, ũ tỹ tỹ ěprã ke nī ve ěn ti.

14 Gãnh kupri pě tóg jě, vēnh mẽg tỹ carneiro kyki kupri ri ke tóg nī, ti gãnh ti, kukryr kó ri ke. Kaně gru tóg jě nī, pĩ gru ri ke.

15 Pěn jěngrě tóg jě nī, ouro jěngrě ri ke. Ěg tỹ pĩ ki ouro vãm ký ti tỹ jonh ke ký jěngrě sĩnvĩ han ěn ri ke ti nī, ti pěn ti. Ti vī vỹ goj krog tỹ óóh he ěn ri ke nī.

16 Krĩg tỹ 7 (ke) génh ký tóg jě nī. Ā pęgia tỹ tóg krĩg tỹ 7 (ke) génh ký jě nī. Ký rógro jã vỹ ti jěnkã tá kãkutě mũ. Jã

régre ti nī, rógro ti, jã há. Ti kakã vỹ kókov nī, rã tỹ ěg nĩno kã sa ký kókov ěn ri ke ti nī, ũ tỹ tỹ ěprã ke nī ve ěn kakã ti.

17 Sý ti ve ký sóg ti pěn krēm kutě mũ, ga kri. Ter ve han inh. Hã ra tóg ã pęgia tỹ inh mẽg mũ, ký tóg inh mý: “inh kaměg tũg nī,” he mũ. “Ūn ve vỹ tỹ inh nī, ěgno ke gé.

18 Rĩr inh jě nī. Ter ja inh nī, hã ra sóg rĩr jě nī, ký sóg ter mãn ke tũ pě nī. Isý ũ mý: “ter jé ã tóg ke mũ,” hen ký tóg ter ke mũ. Isý ũ mý: “ter ke tũ ã tóg nī,” hen ký tóg ter ke tũ nī gé, ký tóg vēser jamã venh ke tũ nī gé,” he tóg.

19 “Rán nī, ã tỹ nén vég mũ tag ti, ěprã ke ag tỹ ũri nén vég mũ ti, ag tỹ kar ký nén venh ke mũ ti ke gé,” he tóg.

20 “Krĩg ag vég ã tóg jě nī, inh nĩgé kãki. Ký ã tóg néj tỹ kri vin jafã ag vég mũ gé, ouro tỹ vela tỹ kri vin jafã tỹ 7 (ke) tag ag. Nhỹ ã mý kãmén, ã tỹ nén vég mũ tag ti. Krĩg tỹ 7 (ke) tag ri ke ag nýtĩ, Topě tỹ jěgně jafã ag. Inh ki ge ký nýtĩ ag ki ag tóg rĩr tĩ, Topě tỹ jěgně jafã tag ag. Sý ã mý cidade tỹ 7 (ke) tó mũ ěn tá ag nýtĩ, inh mré ke ag, ag tỹ ũn ki rĩr mũ ag. Kar ký néj tỹ kri vin jafã ri ke ti nýtĩ, ũ tỹ inh ki ge ký nýtĩ tag ag,” he tóg, ũ tỹ tỹ ěprã ke nī ve ěn ti.

2

Jesus tỹ Éfeso tá igreja tá ke ag mý ã vĩ jěñě

1 “Ū tỹ cidade tỹ Éfeso tá inh mré ke ag ki rĩr mũ ěn mý tag rán nī, ha mẽ,” he tóg, ũ tỹ tỹ

ēprā ke nī ve ēn ti. “Ū tỹ ā mỹ vēnh vī jēnēg mū vỹ krīg tỹ 7 (ke) génh kỹ jē nī, ti pēgia tá ti nīgé kākī, hemnī. Kỹ tóg néj tỹ kri vin jafā tỹ 7 (ke) kāmī tī mū gé, hemnī.

² Ājag tỹ nén han mū ki kanhró sóg nī, he ti, hemnī iso. Vāsān ājag tóg tī. Iso krónh ke tū ājag tóg nýtī. Ūn jykre pāno ag tóg ājag mỹ kórég nýtī. Ājag kāmī ū tóg ón kỹ: apóstolo vỹ tỹ ēg nýtī, he ja nýtī. Ag jykre tugnȳm kỹ ājag tóg ag ón mū tag to ag pan.

³ Iso tar ājag tóg nýtī. Isugrīn ājag tóg jagtar, ge ra ājag tóg iso krónh ke ja tū nī.

⁴ Hā ra sóg nén ū sī tó sór mū, ājag mỹ. Ājag tỹ nén han mū ū tóg inh mỹ há tū nī. Ājag tỹ inh ki ge vén kỹ ājag tóg iso há tāvī nýtī ja nītī, kỹ tóg há tī ja nī, hā ra ājag tóg ūri krónh ke mū.

⁵ Ājag tỹ vāsỹ iso tar ēn mī ēkren nī. Ājag jykre kórég tovānh nī. Ājag tỹ inh ki ge vén ēn ri ke han mǎn nī, iso há tāvī nýtī mǎn nī. Ājag tỹ tag han sór tū nýtīn kỹ sóg ājag ki jun kỹ (sóg) ājag tỹ néj tỹ kri vin jafā ēn ma tīg ke mū, ha vemnī.

⁶ Nén ū tóg hā ra há nī, ājag tỹ nén han mū ū ti. Nicolaítas he mū ēn ag jykre to ājag tóg kórég tāvī nýtī, isỹ ag jykre to kórég kóm, he tóg, hemnī, Éfeso tá ke ag mỹ, vēnh rán ki,” he tóg inh mỹ, ū tỹ tỹ ēprā ke nī ve ēn ti.

⁷ “Ū nīgrēg nýtī ag tỹ tỹ jēmē jé, Topē kuprīg vī ti. Ū tỹ inh

ki ge kỹ nýtī ag hā mỹ tóg tó tī, Topē kuprīg ti,” he tóg. “Ū tỹ isovānh tū ēn vỹ ka kanē há konh ke mū, ka tỹ ēg rīnrīr han mū ēn kanē, Topē jakré ēn kanē,” he tóg, ū tỹ tỹ ēprā ke nī ve ēn ti. Ti tỹ Éfeso tá ke ag mỹ vēnh vī jēnēg mūn hā vē.

Jesus tỹ Esmirna tá igreja tá ke ag mỹ ā vī jēnē

⁸ Kỹ tóg: “Ū tỹ cidade tỹ Esmirna tá inh ki ge kỹ nýtī ag ki rīr mū ēn mỹ tag rán nī, ha mē,” he mū gé, ū tỹ tỹ ēprā ke nī ve ēn ti. “Ū tỹ ā mỹ vēnh vī jēnēg mū vỹ tỹ ūn ve nī, hā ra tóg tỹ ēgno nī gé, hemnī. Ter ja ti nī, hā ra tóg rīr mǎn, hemnī iso.

⁹ Isugrīn ag tóg ājag to kórég nýtī, kỹ ājag tóg jagāgtar nýtī. Ki kanhró sóg nī. Ge ra ājag tóg inhhā rico ri ke nýtī. Ājag to ag tóg vī kónān tī, ū tỹ ón kỹ: “Judeu vỹ tỹ ēg nýtī, Topē tū vỹ tỹ ēg nýtī,” he mū ag. Ag pi(jé) tỹ Topē tū nýtī’. Satanás tū vỹ tỹ ag nýtī.

¹⁰ Ājag jagtar han jé ag tóg ke mū, isugrīn. Mūmēg tūg nī hā ra. Japo vỹ ājag kato vāsān ke mū, kỹ ag tóg vēseja kátá ājag vām ke mū. Japo tỹ ājag jykre ve sór hā vē. Kurā tỹ 10 (ke) ki ke vē, ag tỹ ājag vóg kónān ke ti. Isovānh tūg nī, ag tỹ ājag tén sór mū ra. Kỹ ājag tóg rīr krỹg (ja) tū venh ke mū, kỹ tóg ājag mỹ sér tīnh mū, he tóg, hemnī, vēnh rán ki,” he tóg, ū tỹ tỹ ēprā ke nī ve ēn ti, inh mỹ.

¹¹ “Ū nīgrēg nýtī ag tỹ tỹ jēmē jé, Topē kuprīg vī ti. Ū tỹ

inh ki ge kŷ nŷtĩ ag hã mŷ tóg tó tĩ, Topẽ kuprĩg ti,” he tóg. “Ũ tŷ isovãnh tũ ên vŷ nũgme ki vár ke tũ nĩ,” he tóg, ũ tŷ tŷ êprã ke nĩ ve ên ti. Ti tŷ Esmirna tá ke ag mŷ vênh vĩ jênẽg mũn hã vê.

Jesus tŷ Pérgamo tá igreja tá ke ag mŷ ã vĩ jênẽ

12 Kŷ tóg: “ũ tŷ cidade tŷ Pérgamo tá inh ki ge kŷ nŷtĩ ag ki rĩr mũ ên mŷ tag rán nĩ, ha mẽ,” he mũ gé, ũ tŷ tŷ êprã ke nĩ ve ên ti. “Ũ tŷ ã mŷ vênh vĩ jênẽg mũ vŷ rógro jã régre vyn kŷ jê nĩ, ùn jã há ên, hemnĩ iso.

13 Satanás nĩgja tá ãjag tóg êmã nŷtĩ, ki kanhró sóg nĩ. Iso tar ãjag tóg nŷtĩ. ãjag régre tŷ Antipas tén ja ag tóg nĩ, ti tŷ inh jyjy tó tugrĩn. Ge ra ãjag tóg iso: “ti ki kagtĩg sóg nĩ,” he ja tũ nĩ, ãjag tŷ Satanás jamã tá nŷtĩ ra.

14 Hã ra sóg nén ũ tó sór mũ gé, ãjag mŷ, ti tŷ inh mŷ há tũ nĩn kŷ. ãjag kãmĩ ũ ag tóg Balaão jykre han sór mũ. Balaão vŷ Balaque mŷ kãmén ja nĩ, ti tŷ Israel krê ag krĩn kónãn jé, Topẽ vĩ mranh ke to. Ti tŷ ag krĩn kónãn kŷ ag tóg vênh kãggrá to festa ko ja nĩgtĩ. Ag tŷ ón kŷ vênh kãggrá to: topẽ, he mũ ên mŷ festa ja vê. Ên ko kŷ ag tóg ãjag prũ tũ fag mré nŷgnŷ! he ja nĩgtĩ gé. Tag han sór ag tóg mũ gé, Balaão kóm, ãjag kãmĩ ũ ag, kŷ tóg inh mŷ kórég nŷ.

15 Kŷ ãjag kãmĩ ũ ag tóg Nicolaitas he mũ ên ag jykre han sór mũ gé.

16 Tovãnh nĩ, ãjag jykre tag. Ke tũ nĩ mũ ra sóg ãjag ki jun ke mũ, sŷ ũ tŷ vênh jykre tag han mũ ag kato vãsãnjé, rógro tŷ inh jênkã tá kãkutê mũ ên tŷ, hemnĩ, vênh rán ki,” he tóg, inh mŷ, ũ tŷ tŷ êprã ke nĩ ve ên ti.

17 “Ũ nĩgrêg nŷtĩ ag tŷ tŷ jêmẽ jé, Topẽ kuprĩg vĩ ti. Ũ tŷ inh ki ge kŷ nŷtĩ ag hã mŷ tóg tó tĩ, Topẽ kuprĩg ti,” he tóg.

“Ũ tŷ isovãnh tũ mŷ sóg kanhkã tá vėjên ên nĩm ke mũ, vėjên tŷ péju kŷ nĩ ên. Ag mŷ sóg pó kupri nĩm ke mũ gé. Kri vênh jyjy tãg tóg rán kŷ nĩ. Ũ pi(jé) vênh jiji tag ki kanhró nĩnh mũ'. Ũ tŷ pó kupri ên mãg mũ ên hã tóg ki kanhró nĩnh mũ, ã pir mŷ, ti jyjy tãg ki, he tóg, hemnĩ,” he tóg, ũ tŷ tŷ êprã ke nĩ ve ên ti. Ti tŷ cidade tŷ Pérgamo tá ke ag mŷ vênh vĩ jênẽg mũn hã vê.

Jesus tŷ Tiatira tá igreja tá ke ag mŷ ã vĩ jênẽ

18 Kŷ tóg: “ũ tŷ cidade tŷ Tiatira tá inh ki ge kŷ nŷtĩ ag ki rĩr mũ ên mŷ tag rán nĩ, ha mẽ,” he mũ gé, ũ tŷ tŷ êprã ke nĩ ve ên ti. “Ũ tŷ ã mŷ vênh vĩ jênẽg mũ vŷ tŷ Topẽ kósin nĩ, hemnĩ,” he tóg. “Ti kanê vŷ pĩ gru ri ke nĩ, ti pên vŷ ouro jêngrê ri ke nĩ gé, hemnĩ iso.

19 ãjag tŷ nén han mũ vég sóg tĩ. Iso há tãvĩ ãjag tóg nŷtĩ, inh ki rã pẽ han kŷ ãjag tóg nŷtĩ. Inh rãnhrãj han ãjag tóg mũgtĩ, to krónh ke tũ ãjag tóg nĩgtĩ. Vãsŷ ãjag tóg inh jykre to tar nŷtĩ ja nĩgtĩ, kŷ ãjag tóg ùri to tar kãfór nŷtĩ gé.

20 Hã ra sóg nén ù sĩ tó sór mũ gé, ãjag mỷ, ti tỹ inh mỷ há tũ nĩn kỹ. Jezabel fi vĩ kamẽg ja tũ ãjag tóg nĩgtĩ, hã kỹ fi tóg ón kỹ vĩ ti nĩ. Inh camarada ag krĩn kónãn fi tóg tĩ, ag tỹ fi mré nỹ jé, ag tỹ vãnh kãggrá mỷ nén (ũ) nĩ pũn mũ ên ko jé gé.

21 Fi tovãnh isóg mũ vễ, fi tỹ ã jykre tugnỹm jé, hã ra fi tóg ã jykre kórég tovãnh sór tũ nĩ.

22 Fi kagãg jé sóg ke mũ. Û tỹ fi jykre han mũ ag vóg kónãn jé sóg ke mũ gé, ag tỹ fi jykre kórég tovãnh jãvãnh nỹtĩn kỹ.

23 Fi krẽ kãgtén kãn jé sóg ke mũ gé. Kỹ inh ki ge kỹ nỹtĩ kar ag vĩ inh jykre ki kanhró nỹtĩnh mũ. Vãnh kar tỹ nén to jykrén mũ ên ve kãn sóg tĩ, vãnh kar tỹ nén han sór mũ ên ke gé. ãjag tỹ nén han mũ ên ri ke han jé sóg ke mũ, ãjag mỷ, ha vemnĩ.

24 ãjag kãmĩ ù ag tóg hã ra fi jykre han ja tũ nĩgtĩ, ãjag tỹ Tiatira tá nỹtĩ ra. ãjag pi(jé) fi tỹ vãnh jykre han mũ han ja nĩ. Ag tỹ nén to: “Satanás jykre jagy,” he mũ ên han sór ja tũ ãjag nĩgtĩ. Hã kỹ sóg ãjag mỷ nén ù jagy tónh ke tũ nĩ gé.

25 ãjag tỹ nén han mũ to tar nỹtĩmnĩ, gen kỹ inh kãtĩg mãn ke tag jãvãnh nỹtĩmnĩ.

26 Û tỹ isovãnh tũ ên ag tỹ sóg pã'i hyn han ke mũ, povo kar kri, ù tỹ inh vĩ ki króm mũ ag tỹ, ù tỹ iso krónh ke tũ ên ag tỹ ke gé. Inh panh vĩ isỹ pã'i han, hã kỹ sóg ãjag tỹ pã'i han ke mũ gé, inh kóm,

27 ãjag tỹ inh kóm tỹ povo kri pã'i nỹtĩ jé. Kỹ ãjag tóg ag

to vãsãn ke mũ, ferro tỹ ag mrãnmrãn kỹ, êg tỹ go'or tỹ kukrũ gãm mũ ên ri ke.

28 Tar ãjag tóg nỹtĩnh mũ, kỹ sóg ãjag mỷ krĩg mág nĩm ke mũ gé, he tóg, hemnĩ, ag mỷ, vãnh rán ki,” he tóg, ù tỹ tỹ êprã ke nĩ ve ên ti.

29 “Û nĩgrẽg nỹtĩ ag tỹ tỹ jẽmẽ jé, Topẽ kuprĩg vĩ ti. Û tỹ inh ki ge kỹ nỹtĩ ag hã mỷ tóg tó tĩ, Topẽ kuprĩg ti,” he tóg, ù tỹ tỹ êprã ke nĩ ve ên ti. Tĩ tỹ cidade tỹ Tiatira tá ke ag mỷ vãnh vĩ jẽnẽg mũn hã vễ.

3

Jesus tỹ Sardes tá igreja tá ke ag mỷ ã vĩ jẽnẽ

1 Kỹ tóg: “ù tỹ cidade tỹ Sardes tá inh ki ge kỹ nỹtĩ ag ki rĩr mũ ên mỷ tag rán nĩ, ha mẽ,” he mũ gé. “Û tỹ ã mỷ vãnh vĩ jẽnẽg mũ vĩ Topẽ kuprĩg tỹ jagrẽ nĩ, ti kuprĩg tỹ 7 (ke) nĩ ve ên tỹ, kỹ tóg krĩg tỹ 7 (ke) mãn kỹ jẽ nĩ gé, hemnĩ iso,” he tóg. “ãjag tỹ nén han mũ ki kanhró sóg nĩ. Vãnh kar vĩ ãjag to: “há ag nỹtĩ, tar ag nỹtĩ,” he tĩ, hã ra ãjag tóg iso krónh ke ja nĩ, hã kỹ ãjag tóg ùn kãgter mũ ri ke nỹtĩ.

2 Nũr tovãnh nĩ, tar nỹtĩmnĩ, ke tũ nĩ mũ ra ãjag kãgter pẽ han kãn ke mũ. ãjag jykre tugnỹm inh, hã ra tóg há tũ nĩ ver. Topẽ vĩ ãjag tỹ nén han mũ to há tũ nĩ ver.

3 Vãnh vĩ sér mẽ ãjag mỷr, kỹ to jykrén há han nĩ. To tar nỹtĩmnĩ, to vãsãn nĩ. ãjag nũgnũr kỹ sóg ãjag krĩg mỷ jun ke mũ, ù tỹ êg tỹ nén pēju(g) tĩ tỹ êg nũr krĩg mỷ jun mũ ri

ke han jé sóg ke mũ. Inh jun ke kurã ki kagtĩg ãjag tóg nýtĩ mÿr.

⁴ ãjag kãmĩ ù ag tóg hã ra vënh kavënh ja tũ nĩ, Sardes tá. Tag ag vÿ kur kupri ên rĩnh ke mũ, inh mré ag nýtĩnh ke mũ.

⁵ Û tÿ isovãnh tũ ên ag vÿ kur kupri ên rĩnh kãn ke mũ. Ag jygjy kykũnh ke tũ inh nĩ, inh livro ki. Ûn rĩnrĩr ke mũ ag jygji vÿ ki ránrán kÿ nýtĩ, inh livro ên ki. Ên ag jygjy tó jé sóg ke mũ, inh panh mÿ, ti tÿ jëgnë jafã kar ag mÿ ke gé, he tóg, hemnĩ, vënh rán ki,” he tóg, inh mÿ, ù tÿ tÿ êprã ke nĩ ve ên ti.

⁶ “Û nĩgrëg nýtĩ ag tÿ tÿ jëmë jé, Topë kuprĩg vĩ ti. Û tÿ inh ki ge kÿ nýtĩ ag hã mÿ tóg tónh ke mũ, Topë kuprĩg ti,” he tóg, ù tÿ tÿ êprã ke nĩ ve ên ti. Ti tÿ cidade tÿ Sardes tá ke ag mÿ vënh vĩ jënëg mũn hã vë.

Jesus tÿ Filadélfia tá igreja tá ke ag mÿ ã vĩ jënë

⁷ Kÿ tóg: “ù tÿ cidade tÿ Filadélfia tá inh ki ge kÿ nýtĩ ag ki rĩr mũ ên mÿ tag rán nĩ, ha mẽ,” he mũ gé. “Û tÿ ã mÿ vënh vĩ jënëg mũ vÿ tÿ ùn há pë nĩ, ùn tar tãvĩ, kÿ tóg ki hã tó tĩ, hemnĩ. Davi ên tÿ jãnkã róm jafã vyn kÿ tóg jë nĩ, jãnkã nón jafã ên ti, chave ên ti, hemnĩ. Ti tÿ jãnkã ù róm kÿ ù tóg nífënh mãn ke tũ nĩ, kÿ ti tÿ jãnkã ù nífënh kÿ ù tóg nón mãn ke tũ nĩ gé, hemnĩ, iso,” he tóg.

⁸ “ãjag tÿ nén han mũ ki kanhró sóg nĩ. Tÿ nén mág tũ ãjag nýtĩ. Hã ra ãjag tóg isÿ ãjag

mÿ nén tó mũ ên ki króm kÿ nýtĩgtĩ, isovãnh ja tũ ãjag tóg nĩgtĩ. ãjag mÿ sóg êg tÿ jãnkã róm tĩ ên ri ke han, kÿ ù tÿ ãjag jo nífënh ke tóg tũ tũ.

⁹ Ha mẽ, sÿ nén tónh ke ti. ãjag mÿ sóg ù ag jëgnënh mũ, Satanás mré ke ù ag. Ón kÿ ag tóg: “Judeu vÿ tÿ êg nýtĩ, Topë mré ke vÿ tÿ êg nýtĩ,” henh ke mũ. Ag ón hã vë. Ag tÿ ke sór tũ ra ag tóg ãjag krëm mũg kenh ke mũ, ãjag mÿ: “êg kãfór ãjag tóg nýtĩ,” hen kÿ, ha vemnĩ. ãjag to há tãvĩ sóg nĩ. Hã kÿ ãjag kato vãsãnsãn mũ ag vÿ tag venh ke mũ, ha vemnĩ.

¹⁰ Inh vĩ ki króm ãjag tóg mũ mÿr, sÿ ãjag mÿ: “isovãnh tũg nĩ,” hen kÿ. Hã kÿ sóg ãjag jy nĩgãnh ke mũ, ga kri ke kar ag tÿ nén ù jagy venh ke kurã ên kã. Ti jagy tãvĩ ve jé ag tóg ke mũ, êprã ke kar ên ag, isÿ ag jykre tugnÿm ken kÿ.

¹¹ Kãnhmar inh kãtĩg ke mũ. ãjag tÿ inh ki ge kÿ nýtĩ tag tovãnh tũg nĩ, ke tũ nĩ mũ ra ù ag tóg ãjag jëgja kã jë kÿ nén tÿ ãjag mÿ sér tĩnh ke mũ ên venh ke mũ inhhã.

¹² Û tÿ isovãnh tũ ên ag tÿ sóg ãn nũna ri ke han ke mũ, kanhkã tá, Topë jo ãn ri ke ên tá. Tá ag pa mãn ke tũ nýtĩ ha. Ag kri sóg Topë jiji rán ke mũ gé, Topë jamã jyjy ti ke gé. Cidade tÿ Jerusalém tãg to ken hã vë. Kanhkã tá tóg kãtérenh kenh ke mũ, Topë tá, Jerusalém tãg tag ti. Kar kÿ sóg ag kri inh jiji tãg rán ke mũ gé, he tóg, hemnĩ, vënh rán ki,” he tóg inh mÿ, ù tÿ tÿ êprã

ke nĩ ve ěn ti.

13 “Ů nĩgrĕg nŷtĩ ag tŷ tŷ jĕmĕ jĕ, Topĕ kuprĩg vĩ ti, ũ tŷ inh ki ge kŷ nŷtĩ ag hã mŷ tóg tóh ke mũ, Topĕ kuprĩg ti,” he tóg, ũ tŷ tŷ ěprã ke nĩ ve ěn ti. Ti tŷ cidade tŷ Filadélfia tá ke ag mŷ vĕnh vĩ jĕnĕg mũn hã vĕ.

Jesus tŷ Laodicéia tá igreja tá ke ag mŷ ã vĩ jĕnĕ

14 Kŷ tóg: “ũ tŷ cidade tŷ Laodicéia tá inh ki ge kŷ nŷtĩ ag ki rĩr mũ ěn mŷ tag rán nĩ, ha mĕ,” he mũ gé. “Ů tŷ ã mŷ vĕnh vĩ jĕnĕg mũ jyjn hã vŷ: “ki hã tó mũn hã vĕ,” he mũ, hemnĩ,” he tóg. “Ki hã tóg tó tĩ, nén ũ kar ki. Ón vãnh ti nĩgtĩ, hemnĩ. Ti hã tigrĩn Topĕ tóg nén (ũ) kar han ja nĩgtĩ, hemnĩ iso,” he tóg.

15 “Ājag tŷ nén han mũ ki kanhró sóg nĩ. Ājag pi(jé) goj rŷ jagy ri ke nŷtĩ, kŷ Ājag pi(jé) goj kusa ri ke nŷtĩ gé'. Ājag tŷ goj rŷ jagy ěn ri ke nŷtĩ ran há tĩnh mũ vĕ, Ājag tŷ goj kusa ěn ri ke nŷtĩ ran há tĩnh mũ gé vĕ vĕ.

16 Hã ra Ājag tóg goj rŷ mĕ ri ke nŷtĩ, Ājag tŷ iso krój nŷtĩn kŷ. Hã kŷ sóg Ājag vãm sór mũ, ěg tŷ rĕrĩr tá goj rŷ mĕ ěn pra kŷ kujĕn ěn ri ke han jĕ sóg ke mũ, Ājag tŷ, ha vemnĩ.

17 Vĕso Ājag tóg: “rico ěg nŷtĩ, há ěg nŷtĩ, nén ũ tóg ěg mŷ tũ' he tũ pĕ nĩ,” he tĩ. Hã tũ tó Ājag tóg tĩ. Jagãgtar Ājag tóg nŷtĩ, mŷr, ha mĕ. Tŷ nén tũ Ājag tóg nŷtĩ, jykre kórĕg Ājag tóg nŷtĩ, kur tũ Ājag tóg nŷtĩ, kyvó Ājag tóg nŷtĩ, Ājag tŷ há nŷtĩ ve ra.

Hã ra Ājag tóg ki kagtĩg nŷtĩ, Ājag kórĕg nŷtĩ tag ki.

18 Hã kŷ sóg Ājag mŷ: “inh ki mãn kãmũ jĕg, ouro há ěn ti,” he sór mũ, Ājag tŷ rico nŷtĩ jĕ. Kur kupri kajãm nĩ, Ājag tŷ kator nŷtĩ tũ nĩ jĕ, Ājag mŷ'ãg tũ nĩ jĕ. Vĕnh kagta kajãm nĩ, Ājag kanĕ mŷ, Ājag tŷ ve há han mãn jĕ.

19 Isŷ ũ to há nĩ ěn mŷ sóg vĩ tar han tĩ, ti kanhrãn jĕ. Vĕso jykren kŷ Ājag jykre kórĕg togvãnh nĩ.

20 Mĕ há han nĩ, sŷ Ājag mŷ nén tó mũ tag. Re tá inh jĕ nĩ, jãnkã tá, kŷ sóg tŷ tórón' tórón' ke mũ, tŷ tag' tag' ke sóg mũ. Ů tŷ inh vĩ mĕg mũ mŷ tóg há tĩ, kŷ tóg inh mŷ nón ke mũ, jãnkã ti, kŷ sóg ti ĩn kãra rãnh ke mũ. Kŷ sóg ti mrĕ jĕn ke mũ, kŷ tóg inh mrĕ jĕn ke mũ gé, ha mĕ.

21 Ů tŷ isovãnh tũ ěn mŷ sóg: “inh mrĕ nĩ,” he sór mũ, kŷ tóg inh ri ke tŷ ũn mág nĩnh ke mũ. Inh panh mrĕ sóg tŷ ũn mág nĩ ha, isŷ ti tovãnh ja tũ nĩn kŷ, kŷ tóg tá inh mrĕ nĩnh ke mũ gé, he tóg, hemnĩ, vĕnh rán ki,” he tóg, ũ tŷ tŷ ěprã ke nĩ ve ěn ti.

22 “Ů nĩgrĕg nŷtĩ ag tŷ tŷ jĕmĕ jĕ, Topĕ kuprĩg vĩ ti, ũ tŷ inh ki ge kŷ nŷtĩ ag hã mŷ tóg tóh ke mũ, Topĕ kuprĩg ti,” he tóg, ũ tŷ tŷ ěprã ke nĩ ve ěn ti. Ti tŷ cidade tŷ Laodicéia tá ke ag mŷ vĕnh vĩ jĕnĕg mũn hã vĕ.

4

Ag tŷ kanhkã tá Topĕ mŷ vĩ há han

1 Kÿ sóg kynhmÿ êvãnh, kÿ sóg kanhkã jãnkã vé, hã ra tóg róm ke kÿ jẽ nĩ. Kÿ sóg vênh vĩ ên jẽmẽ mãn, vênh vĩ tÿ trombeta kyr ri ke ên, kÿ tóg inh mÿ: “ha kãtãpÿ,” he mũ. “Ã mÿ sóg ven sór mũ, ãjag tÿ kar kÿ nén venh ke mũ ti,” he tóg, vênh vĩ ti.

2 Kÿ vãhã Topẽ kuprĩg tóg inh krĩn mũ, kÿ sóg nén nén vég mũ. Kanhkã tá tóg nĩgia sĩnvĩ jẽ nĩ, kÿ ù tóg kri nĩ nĩ.

3 Ti kakã tóg jẽngrẽ nĩ, pó sĩnvĩ jẽngrẽ ên ri ke, pó tÿ jaspẽ jẽngrẽ ên ri ke, pó tÿ sardônio jẽngrẽ ên ri ke. Nĩgia sĩnvĩ ên vÿ ta no ri ke nĩ, kÿ tóg jẽngrẽ jẽ gé, ta no ên ti, pó tÿ esmeralda jẽngrẽ ên ri ke.

4 Nĩgia sĩnvĩ ên pẽnĩn nĩgia sĩnvĩ ù tóg nÿtĩ gé, ù tÿ 24 (ke) ti nÿtĩ. Nĩgia ên kri kófa ag tóg nĩgnĩ kÿ nÿtĩ, kófa tÿ 24 (ke) ag. Kur kupri rĩnh kÿ ag tóg nÿtĩ, ouro tÿ krĩ tógfĩ rĩnh kÿ ag tóg nÿtĩ gé.

5 Nĩgia sĩnvĩ ên tá ta tÿ kómkóm ke ri ke ên tóg vênh ven mũ, kÿ ta tÿ tÿrÿr he ri ke ên tóg mẽ há tĩ gé, vênh vĩ ke gé. Tĩ jo pĩ jónhkó gru tÿ 7 (ke) tóg nÿtĩ gé. Topẽ kuprĩg to ken hã vẽ, ù tÿ 7 (ke) nĩ ve ên, hã vÿ: pĩ jónhkó gru tÿ 7 (ke), he mũ.

6 Nĩgia sĩnvĩ kakãm nén ù tóg nÿ nĩ, kÿ tóg vidro tÿ goj nĩ ve nĩ, goj jãpÿri, goj kókov (pẽ).

Kÿ nĩgia sĩnvĩ ên pẽnĩn ù ag tóg nÿtĩ, ù tÿ 4 (ke) ag, ùn kanẽ e tãvĩ ag. Ag kakã ki ag tóg kanẽ e nÿtĩ, kar kÿ ag pãnĩ tá ke gé.

7 Ag kãmĩ ù tóg mĩg ve ri ke

nĩ, kÿ ù tóg monh tãg ve ri ke nĩ gé, kÿ ù tóg êg kakã ve ri ke nĩ, jãvo ù tóg kónhkó mág tẽ tĩ ve ri ke nĩ.

8 Ag kar vÿ fẽr tÿ 6 (ke) nÿtĩ. Kÿ ag tóg ãjag fẽr ki kanẽ e nÿtĩ gé, fẽr ven ja tá, ti kãtã ke gé. Kurã kar ki ag tóg jãn tĩ, kuty kar ki ke gé, jãn to krónh ke jãvãnh ag tóg nÿtĩ. Ag jãn hã vẽ, ha mẽ: “ùn mág', mág', mág' vÿ tÿ ti nĩ, êg jóg tÿ Topẽ ti, ù tÿ nén kar han ki kanhró nĩ ên ti. Vãsÿ tóg nĩ ja nĩgtĩ, kÿ tóg ùri nĩ gé, jãvo tóg kãtĩg ke mũ gé,” he ag tóg tĩ, jãn kÿ, nén nẽ tÿ 4 (ke) ên ag.

9 Gen kÿ ag tóg Topẽ mÿ jãn tĩ, ti tÿ tÿ ùn mág nĩ ên hã tÿ ag tóg jãn tĩ. Ti mÿ vĩ há han ag tóg tĩ. Ti mÿ ag tóg: “nén kar hyn han há ã tóg nĩ,” he tĩ. ù tÿ nĩgia sĩnvĩ ên kri nĩ mũ mÿ ag tóg jãn tĩ, ùn rĩr nĩ ên mÿ. Tĩ rĩr nĩ vÿ tũg' henh ke tũ pẽ nĩ.

10 Ag tÿ ti mÿ jãn kÿ kófa tÿ 24 (ke) ên ag vÿ mũgmũg ke tĩ, ù tÿ nĩgia sĩnvĩ kri nĩ ên krẽm. Mũgmũg ken kÿ ag tog ti mÿ: “Topẽ vÿ tÿ ã nĩ,” he tĩ, ùn rĩr nĩ ên mÿ. Tĩ rĩr nĩ vÿ tũg' henh ke tũ pẽ nĩ. Kÿ ag tóg ãjag krĩ tógfĩ ên vin tĩ, nĩgia sĩnvĩ ên krẽm.

11 Ti mÿ ag tóg tag tó tĩ, ha mẽ: “êg Senhor vÿ tÿ ã nĩ, Topẽ vÿ tÿ ã nĩ. Nén ù kar hyn han ja ã nĩgtĩ. To jykrén kÿ ã tóg nén ù kar hyn han ja nĩgtĩ, hã kÿ tóg ki nÿtĩ, ã tÿ nén hyn han mũ kar ên ti. ã hã ne ã pir mÿ tá krÿg he mũ', kÿ vênh kar vÿ ã mÿ vĩ há han ke mũ, ã to: “ùn mág vÿ tÿ ti nĩ,” hen kÿ, kÿ ag tóg ã vĩ ki króm tĩ gé,” he ag tóg tĩ, kófa ag, ù tÿ nĩgia

sĩnvĩ kri nĩ ěn mĩ.

5

Jesus tỹ livro mǎn

¹ Kĩ sóg livro vég mũ, livro ěn vỹ grĩn kĩ nỹ. Ủ tỹ nĩgja sĩnvĩ kri nĩ ěn vỹ livro ěn mǎn kĩ nĩ nĩ, ti pĕgja tỹ. Kátá tóg rán kĩ nĩ, ti ven ja tá ke gé. Tógfĩn kĩ tóg nĩ nĩ, livro ti. Tógfĩn ja tỹ 7 (ke) tóg nĩ. Ti tógfĩn kri tóg go'or nĩ gé, ủ tỹ kygvǎg tũ nĩ jé.

² Kĩ sóg Topĕ tỹ jĕnĕ jafǎ éhé tǎvĩ vég mũ gé. Vĩ tóg mũ, jamǎ hár(a), kĩ tóg: “ủ nỹ hỹn tá krỹg mũ, ti tógfĩn kavǎn ti jé?” he mũ.

³ Hǎ ra ag tóg ủ tỹ tá krỹg mũ vég tũ nĩ, kanhkǎ tá, ěprǎ, vĕnh kuprĩg ag kǎmĩ ke gé. Kĩ ủ tỹ livro kavǎn ke tóg tũ tĩ, ti rá ve jé.

⁴ Kĩ sóg fỹ mũ. Inh mỹ tóg e tĩ, ủ tỹ livro kavǎn ke tũ tĩn kĩ, ěg tỹ ti rá ven jé.

⁵ Kĩ kófa ag kǎ ủ tóg inh mỹ: “fỹ tũg ra,” he mũ. “Povo tỹ Judeu kǎmĩ ùn pir tóg mĩg tar ri ke nĩ, Davi krĕ'krĕ ag kǎ ùn pir ěn vỹ tóg vĕnh kar tỹ hĕn ri ke ja nĩ. ěn vỹ ti tógfĩn tỹ 7 (ke) ěn kygvǎn ki kanhró nĩ, kĩ tóg livro ki rá ěn venh ke mũ,” he tóg inh mỹ, kófa ti.

⁶ Kĩ sóg nĩgja sĩnvĩ ěn jo cordeiro vég mũ, mé krĕ ěn ti. Nén nĕ tỹ 4 (ke) ag vỹ ti pĕnĩn nỹtĩ, kófa ag ke gé, cordeiro ěn pĕnĩn ag nỹtĩ. Kĩ tóg tỹ ag tỹ tǎnh kĩ rĩr mǎn ěn ri ke jé. Nĩka tỹ 7 (ke) ti nĩ, kanĕ tỹ 7 (ke) ke gé, cordeiro ěn ti. Topĕ kuprĩg to ken hǎ vĕ, ủ tỹ 7 (ke) nĩ ve ěn ti, hǎ vỹ: nĩka tỹ 7

(ke) mrĕ kanĕ tỹ 7 (ke), he mũ. Topĕ vỹ ti jĕnĕ ja nĩ, ti tỹ ga kar mĩ tĩg jé, Topĕ kuprĩg ti.

⁷ Kĩ cordeiro ěn vỹ ủ tỹ nĩgja sĩnvĩ kri nĩ ěn tá jun mũ, kĩ tóg ti ki livro ěn mǎg mũ, ủ tỹ ǎ pĕgja tỹ livro mǎn kĩ nĩ ěn ti ki.

⁸ Kĩ nén nĕ tỹ 4 (ke) ěn ag vỹ mũgmũg ke kǎn mũ, kófa tỹ 24 (ke) ag ke gé, cordeiro ěn krĕm ag tóg mũgmũg ke kǎn mũ sir. Kófa ag vỹ vǎkyn jafǎ tỹ harpa génh kĩ nỹtĩ. Pĕnky tỹ ouro génh kĩ ag nỹtĩ gé. Pĕnky ěn kǎki tóg fór nĩ, ti pũn kĩ ger há han jafǎ ěn tỹ, hǎ vỹ: ěg tỹ Topĕ mrĕ vĕmĕn tĩ, he mũ.

⁹ Cordeiro ěn mỹ ag tóg jǎn mũ, Jesus jé tag tó ag tóg mũ, ha mĕ. “ǎ hǎ ne tá krỹg mũ!” he ag tóg mũ. “ǎ hǎ ne livro mǎn kĩ ti tógfĩ kygvǎg mũ ha'. ǎ tén ja ag tóg, kĩ ǎ tóg ter kĩ ěprǎ ke ag kygjǎm, Topĕ mỹ, pǎ'i ag kar krĕm ke ag kǎmĩ, vĕnh vĩ kar tó tĩ ag kǎmĩ, nação kar ag kǎmĩ, povo kar ag kǎmĩ ǎ tóg ủ ag kygjǎm ja nĩgtĩ.

¹⁰ ǎ tỹ ùn kygjǎm mũ ag mỹ ǎ tóg vĕnh rǎnrǎj nĩm ja nĩ gé, ag tỹ ǎ mỹ ǎ tũ ki rĩr jé, ag tỹ tỹ Topĕ camarada nỹtĩ jé. Kĩ ag tóg ěprǎ ke ag krĩg mỹ tỹ ùn mǎg nỹtĩnh mũ,” he ag tóg, kófa ag, jǎnjǎn kĩ.

¹¹ Kĩ sóg Topĕ tỹ jĕgnĕ jafǎ tỹ hĕn ri ke vég mũ gé, mil tỹ mil tỹ hĕn ri ke. Ag e tǎvĩn ra ěg tóg ag nĩgrĕn ke tũ nĩ. Nĩgja sĩnvĩ ěn jo ag tóg nỹtĩ, nén nĕ tỹ 4 (ke) ěn mrĕ, kófa ag mrĕ ke gé.

12 Jānjān kǎn ag tóg mǔ gé, jamā hár(a), kǔ ag tóg: “cordeiro tag tén ja ag tóg nǐ, hǎ kǔ tóg ũri tǔ ũn mág jē,” he mǔ. “Tǔ tóg vĕnh kar kri ke jē ha, rico tóg jē ha, ki kanhró tóg jē ha, tar tóg jē ha, tǔ tóg ũn mág jē ha, sĭnvĭ tóg jē ha, vĕnh kar vǔ ti mǔ vĭ há han mǔ ha,” he ag tóg, Topĕ tǔ jĕgnĕ jafā ag.

13 Kǔ vāhā kanhkā tǎn kar ag vǔ jānjān mǔ, ěprā ke kar ag ke gé, vĕnh kuprĭg kar ag ke gé, goj ki ke kar ag ke gé. Ag kar vǔ jānjān mǔ ha, jamā hár(a), kǔ ag tóg: “ŭ tǔ nĭgia sĭnvĭ kri nǐ mǔ ěn mǔ ěg tóg vĭ há han ke mǔ ha, cordeiro ěn mǔ ke gé,” he mǔ. “Ājag pir mǔ ag tóg tǔ ũn mág nǔtĭ, ājag pir mǔ ag tóg sĭnvĭ nǔtĭ, vĕnh kar kri ke vǔ tǔ ag nǔtĭ, kǔ ag tóg tǔg' hĕnh ke tǔ pĕ nǐ,” he ag tóg mǔ sir, vĕnh kar pĕ ti.

14 Kǔ nĕn nĕ tǔ 4 (ke) ěn ag vǔ tóg vĭ mǔ gé sir. “Hǎ vĕ,” he ag tóg mǔ. Kǔ kófa ag tóg mǔgmǔg ke kǎn mǔ sir, “Topĕ vǔ tǔ ě nǐ,” hĕn kǔ.

6

Jesus tǔ livrô tógfĭ kygvān

1 Kǔ sóg cordeiro tǔ ti tógfĭ ve kavān vég mǔ sir, ti tógfĭ tǔ 7 (ke) ěn ag kǎ ũn ve ěn ti. Kǔ sóg nĕn nĕ tǔ 4 (ke) ag kǎ ũ vĭ mĕg mǔ gé sir. Ti vĭ vǔ ta tǔ tǔrǔr he ri ke nǐ. “Tág',” he tóg.

2 Kǔ sóg vĕsĭjām ěvānh kǔ cavalo kupri vég mǔ. ũ tǔ kri nǐ vǔ vyj tǔ no rĕr tǔ pĕg jafā vyn kǔ nǐ nǐ. Ti mǔ ag tóg krĭ tógfĭ jun mǔ, ti tǔ tǔ ěprā ke kri

ke jĕn kǔ. Kǔ tóg vĕnh kar ag tǔ ě krĕm ke han tǔ mǔ.

3 Kǔ cordeiro vǔ ti tógfĭ ũ kavāg mǔ gé. Ti tógfĭ régre tá krĭg vĕ sir. Kǔ nĕn nĕ ag kǎmĭ ũ tóg: “tág',” he mǔ gé.

4 Kǔ cavalo kusŭg vǔ jun mǔ. ũ tǔ kri nǐ mǔ ěn mǔ ag tóg rógro tĕj jun mǔ, ti tǔ ěprā ke ag tǔ jagnĕ kato vāsānsān han jé, ěprā ke ag tǔ jagnĕ kǎgtĕn jé sir.

5 Kǔ cordeiro ěn tóg ti tógfĭ ũ kavāg mǔ gé. Ti tógfĭ tǎgtŭ tá krĭg vĕ sir. Kǔ nĕn nĕ ag kǎmĭ ũ tóg: “tág',” he mǔ gé. Kǔ sóg vĕsĭjām ěvānh kǔ cavalo sá vég mǔ sir. ũ tǔ kri nǐ ěn vǔ ěg tǔ nĕn ũ kar kufyg jafā mǎn kǔ nǐ nǐ, ěg tǔ nĕn ũ kar kǎmun jafā ti.

6 Kǔ sóg nĕn nĕ tǔ 4 (ke) ěn kǎ vĕnh vĭ ũ jĕmĕg mǔ gé, kǔ tóg: “trigo tǔ quilo pir mǎn jé ag tóg ke mǔ, por dia kaja to,” he mǔ, “ke tǔ nĭn kǔ ag tóg cevada tǔ quilo tǎgtŭ mǎn ke mǔ, por dia kaja ěn to. Azeite vóg tǔg nǐ hǎ ra, vinho vóg tǔg nǐ gé, ěn vǔ kaja pir nĭnh mǔ,” he tóg mǔ, vĕnh vĭ ti.

7 Kǔ cordeiro ěn tóg ti tógfĭ ũ kavāg mǔ gé. Ti tógfĭ tǔ 4 (ke) tá krĭg vĕ sir. Kǔ nĕn nĕ ag kǎmĭ ũ tóg: “tág',” he mǔ gé.

8 Kǔ sóg cavalo ũ vég mǔ, hǎ ra tóg vĕser jógtánh ri ke nǐ. ũ tǔ kri nǐ ěn tóg ěg tén tĭ, kǔ vĕnh kuprĭg ag vǔ ti nón kǎmŭ mǔ gé, ti kǎtĭg ěn kǎ. Ag tǔ ěprā ke ag tǔ vĕnh kǎpóv tǔ 4 (ke) ag kǎ ti vĕnh kǎpóv pir ag kǎgtĕn ke vĕ, rógro tǔ, ag kókĭr tǔ ke gé, vĕnh kaga tǔ ke gé, mĭg tǔ ke gé.

⁹ Kÿ cordeiro vÿ ti tógfĩ ù kavãg mũ gé. Ti tógfĩ tÿ 5 (ke) tá krÿg vê sir. Kÿ sóg nÿgia sÿnvĩ ên krêm êvãnh kÿ êprã ke ag kuprÿg vigvég mũ, ag tÿ Topê vÿ tigrÿn ùn kãgtén mũ ag kar kuprÿg ti. Topê vÿ tó to krónh ke ja tũ ag tóg nÿtĩ, hã kÿ ag tóg ag kãgtén ja nÿgtĩ, ù tÿ ag vÿ jêmê sór tũ ên ag.

¹⁰ Ên ag vÿ jamã hár(a) tag tó mũ, ha mẽ: “kake’,” he ag tóg mũ. “Ûn mág vÿ tÿ ã nĩ. ã tÿ nén tó mũ ên han ã tóg tĩ. Hã ra êg tóg hur ã tÿ nén han ke mũ jãvãnh mág. ã mÿ kãnhmar êprã ke ag jykre tugnÿm sór tũ, ã tÿ ag vóg kónãnh jé, ag tÿ êg kãgtén ja tag tigrÿn?” he ag tóg mũ, ag tÿ Jesus tigrÿn ùn kãgtén mũ ên ag.

¹¹ Kÿ ag tóg ag mÿ kur kupri junjun mũ sir, kÿ ag tóg ag mÿ: “toreg ver’,” he mũ. “Û ag tóg nÿtĩ gé, ag tÿ ùn kãgtén mũ ù ag. Ag tÿ ãjag kãgtén ja ri ke han ke vê, ãjag mré ke ù ên ag tÿ. Topê vÿ ag nÿgkré, kÿ tóg ki kanhró nĩ, ag tÿ ù tÿ hên ri ke kãgtén ke mũn ki. Ag tÿ ãjag mré ke ên ag kãgtén kãnh kar kÿ tóg ag jykre tugnÿm kãnh ke mũ, ha vemnĩ,” he tóg, ag tÿ ùn kãgtén mũ ên ag mÿ.

¹² Kÿ sóg cordeiro ve mãnh mũ, kÿ tóg livro tógfĩ ù kavãg mũ gé. Ti tógfĩ tÿ 6 (ke) tá krÿg vê sir. Kÿ ga tóg jũrũn ke mũ ha. Rã vÿ kuty’ he mũ, êg tÿ ù ter kÿ kur sá tu tĩ kuty ên ri ke. Kysã vÿ kusũg’ he mũ gé.

¹³ Kÿ krÿg vÿ vár kãnh ke mũ gé. Kejên kãka tóg ka tÿ vyryn vyryn ke tĩ, kÿ ti kanê tóg vár

kãnh tĩ, ti tánh ra. Ge ti nÿgtĩ, krÿg vár kãnh ke mũ tag ti.

¹⁴ Kÿ kãnhkã vÿ tũg’ he mũ gé, êg tÿ livro grÿn ên ri ke ti nĩ, kãnhkã tũg ti. Pãnónh vÿ tũg kãnh mũ gé, goj vãso kar ke gé.

¹⁵ Êprã ke ag vÿ pãnónh nor krêm vênh pigjunh mũ, pãró vãso krêm, pãnónh vãso krêm ke gé, pã’i ag, vênh kar kri ke ag, soldado ag pã’i ag mré hã, ùn rico ag mré hã, ùn tar ag mré hã, ùn camarada ag mré hã, ag patrão ag mré hã, êprã ke kar ag mÿr, ha mẽ.

¹⁶ Kÿ ag tóg pãnónh mÿ vÿ mũ, pãró mÿ ke gé. “Ha êg kri vár, ha êg kri tÿ tam ké,” he ag tóg mũ, ón kÿ, pãró mÿ. “Ha êg pigju. Cordeiro ên vÿ êg to jũ mũ, kÿ ù tÿ nÿgia sÿnvĩ kri nĩ ên vÿ êg ki êvãnh mũ. Ag jo êg pigju,” he ag tóg mũ ón kÿ, êprã ke kar ag, pãnónh kar mÿ.

¹⁷ “Ag tÿ êg to jũnh ke vê. Pétêm ti huri, kurã kórég tag ti. Krenkren ke tũ êg tóg nĩ,” he ag tóg mũ, êprã ke kar ag, cordeiro ên jũ kamêg kÿ.

7

Topê tÿ jênê jafã tÿ ùn e ag ránrán

¹ Kÿ sóg ga fyr mĩ êvãnh kÿ Topê tÿ jêgnê jafã tÿ 4 (ke) ag vigvég mũ. Ga péno tÿ 4 (ke) ki ag jêgêg kÿ nÿtĩ. Kãka tÿ 4 (ke) vÿ tá nÿtĩ gé. Kÿ ag tóg kãka tÿ 4 (ke) ên ag ki rÿr nÿtĩ, kãka tÿ hê kátá mũ tũ nĩ jé. Kÿ kãka tóg tũ tĩ, ga kri, goj kri ke gé, ka kãmĩ ke gé.

² Rã jur ja tá sóg Topê tÿ jênê jafã ù kãtÿg vég mũ gé. Topê tÿ

ĕg ránrán jafã ma tóg kãtĩ mũ. Kĩ tóg kanhkã ra tãpry mũ. Kĩ tóg Topẽ tỹ jĕgnĕ jafã tỹ 4 (ke) ĕn ag mỹ vĩ mũ. Topẽ vĩ ag mỹ: “ga mré goj kókén nĩ,” he ja nĩ, ù tỹ 4 (ke) ĕn ag mỹ.

³ Kĩ ù tỹ vĕnh rán jafã ma kãtĩ mũ ĕn tóg ag mỹ: “toreg ver,” he mũ. “Ga vóg tũg nĩ ver, goj ke gé, ka ke gé,” he tóg. “Ēg tỹ ver Topẽ camarada ag ránrán sór vĕ, vĕnh rán jafã tag ti tỹ, ag kakã ki,” he tóg, Topẽ tỹ jĕnĕ jafã ti, ù tỹ 4 (ke) ĕn ag mỹ.

⁴ Kĩ tóg ag rán tĩ mũ. Û tỹ 140 mil (ke) ag hã vĕ, fag mré hã, ti tỹ Israel krĕ'krĕ ag kar kãmĩ ùn ránrán mũ ag. Tĩ número mĕ inh.

⁵ Judá krĕ tỹ 12 mil (ke) tóg rán kỹ nỹtĩ, Rubem krĕ tỹ 12 mil (ke) ke gé, Gade krĕ tỹ 12 mil (ke) ke gé,

⁶ Aser krĕ tỹ 12 mil (ke) ke gé, Naftali krĕ tỹ 12 mil (ke) ke gé, Manassés krĕ tỹ 12 mil (ke) ke gé,

⁷ Simeão krĕ tỹ 12 mil (ke) ke gé, Levi krĕ tỹ 12 mil (ke) ke gé, Issacar krĕ tỹ 12 mil (ke) ke gé,

⁸ Zebulom krĕ tỹ 12 mil (ke) ke gé, José krĕ tỹ 12 mil (ke) ke gé, Benjamim krĕ tỹ 12 mil (ke) ke gé. Ēn ag ránrán kãn tóg mũ, Topẽ tỹ jĕnĕ jafã ti.

Ûn e tỹ Topẽ mỹ vĩ há han

⁹ Tag pãte sóg ùn tỹ hĕn ri ke ag vigvég mũ. E tãvĩn ag nỹtĩ, e tãvĩn, kỹ ù tỹ ag nĩgrĕn ke tóg tũ tĩ. Tỹ ag ĕprã ke ja nỹtĩ. Nação kar kãmĩ ke ù ag vĩ tá nỹtĩ, pã'i kar krĕm ke ù ag ke

gé, povo kar kãmĩ ù ag ke gé, vĕnh vĩ kar tó tĩ ag kãmĩ ù ag ke gé. Kur kupri rĩnh kỹ ag tóg nỹtĩ, ùn e ĕn ag. Nĩgja sĩnvĩ ĕn pĕnĩn ag tóg jĕgĕg kỹ nỹtĩ, cordeiro rĩnve tá, tãnh féj génh kỹ ag tóg nỹtĩ.

¹⁰ Ēn ag vĩ jamã hár(a): “Topẽ hã vĩ ĕg krenkren han mũ,” he mũ. “Û tỹ nĩgja sĩnvĩ kri nĩ ĕn vĩ ĕg krenkren han mũ, cordeiro ti ke gé,” he ag tóg mũ, jamã hár(a), ùn e ĕn ag.

¹¹ Topẽ tỹ jĕgnĕ jafã kar ag vĩ nĩgja sĩnvĩ ĕn pĕnĩn nỹtĩ gé, ùn e ĕn ag mré. Kófa ĕn ag pĕnĩn ag nỹtĩ, nĕn nĕ tỹ 4 (ke) ĕn ag pĕnĩn ke gé. Nĩgja sĩnvĩ ĕn krĕm ag tóg mũgmũg ke mũ, kỹ ag tóg ù tỹ kri nĩ ĕn mỹ: “Topẽ vĩ tỹ ã nĩ,” he mũ.

¹² Kỹ ag tóg: “ha vé, vĕnh kar jé Topẽ hã mỹ vĕnh vĩ há tó,” he mũ. “Topẽ hã vĩ sĩnvĩ jĕ, Topẽ hã vĩ ki kanhró nĩ, Topẽ hã mỹ ĕg tóg vĕnh vĩ há tó tĩ. Tỹ tóg ùn mág jĕ, vĕnh kar kri tóg jĕ, tar tóg jĕ, Topẽ ti, ùri, kỹ tóg tũ' hĕnh ke tũ nĩ gé. Hã vĕ,” he ag tóg mũ, Topẽ tỹ jĕgnĕ jafã ag.

¹³ Kỹ kófa ĕn ag kã ù tóg inh mỹ: “ag tỹ hĕ ri ke nĕ hỹn, hã kỹ ag tóg kur kupri rĩnh kỹ nỹtĩ?” he mũ.

¹⁴ Kỹ sóg ti mỹ: “inh pi(jé) ki kanhró nĩ,” he mũ. “Ã hỹn tóg ki kanhró nĩ,” he sóg ti mỹ. Kỹ tóg inh mỹ: “nĕn ù jagy mág pĕ ve ja ag tóg nỹtĩ, cordeiro tugrĩn,” he mũ. “Ag vóg kónãn jagy han ja ag tóg. Ag kur kygfa ag, cordeiro kyvĕnh tỹ, kỹ tóg kupri nỹtĩ, ag kur ti.

15 Kÿ ag tóg Topě nĭgja sĭnvĭ pĕnĭn nÿtĭ. Ti rĕnhrĕj han ag tóg tĭ, kurĕ kar ki, kuty ki ke gé, ti ĭn krĕm. Ũ tÿ nĭgja sĭnvĭ kri nĭ ĕn vÿ ag jy nĭgĕn mŭ.

16 Ag pi(jé) kókir mĕn ke mŭ', ag pi(jé) og'og sór mĕn mŭ'. Rĕ vÿ ag ki hupŭn mĕn ke tŭ nĭ ha, nĕn ũ gru ke gé,

17 cordeiro tÿ ag ki rĭr kÿ, ũ tÿ nĭgja sĭnvĭ tá jĕ ĕn ti. Ag tatĭ tŭg jĕ tóg ke mŭ, goj nĭhÿg ja ra, goj tÿ ag rĭnrĭr han mŭ ĕn ra tóg ag tatĭ tŭg ke mŭ. Topě vÿ ag kygfÿ tÿ tŭg' henh ke mŭ," he tóg inh mÿ, kófa ti, ũn e ĕn ag to.

8

Jesus tÿ livro tógfĭ tÿ ĕgno kavĕn

1 Kÿ cordeiro vÿ livro tógfĭ tÿ ĕgno kavĕg mŭ. Ti tógfĭ tÿ 7 (ke) tá krÿg hĕ vĕ. Kÿ tóg katy' he mŭ, kanhkĕ tá, meia hora ki.

2 Kÿ sóg Topě tÿ jĕgnĕ jafĕ tÿ 7 (ke) ag vég mŭ. Ag mÿ ag tóg trombeta tÿ 7 (ke) junjun mŭ. Topě nĭgja sĭnvĭ jo ag tóg nÿtĭ.

3 Kÿ Topě tÿ jĕnĕ jafĕ ũ tóg tá jun mŭ gé, kÿ tóg ouro tÿ pĕnky ma kĕtĭ mŭ, ĕg tÿ pĕnky ki Topě mÿ ti ger há pŭn jafĕ ĕn ti. Nĭgja sĭnvĭ ĕn to tóg jĕ mŭ, Topě tÿ jĕnĕ jafĕ ti. Kÿ ag tóg ti mÿ ka jĕnjo ger há tÿ hĕn ri ke jun mŭ, ti tÿ Topě mÿ pŭn jĕ, Topě nĭgja to jĕn kÿ. Ēprĕ ke tÿ Topě ki ge kÿ nÿtĭ kar ag tóg Topě mré vĕmĕn tĭ. Ag vĭ ja ĕn mré tóg ti ger há ĕn pŭn sór mŭ, Topě mÿ, Topě tÿ jĕnĕ jafĕ ti.

4 Kÿ tóg sir pŭn mŭ, Topě kato jĕn kÿ. Kÿ ti ger há ĕn tóg kynhmÿ tĕpry mŭ sir, Topě tŭ ag tÿ ti mré vĕmĕn ja ĕn mré hĕ.

5 Kÿ Topě tÿ jĕnĕ jafĕ ĕn tóg pĕnky ĕn fĕn mŭ, prĕnh gru tÿ. Topě mÿ nĕn ũ kar pŭn jafĕ tá tóg prĕnh gru ĕn mĕg mŭ, kÿ tóg pĕnky kĕkĕ nĭm mŭ. Kÿ tóg ga kri ti fón mŭ sir, pĕnky ti, prĕnh gru tÿ kĕkĕ nĭn kÿ. Kÿ ta tóg kómkom ke kÿ tÿrÿr he mŭ, jŭ kÿ tóg mrĕrĕn ke mŭ gé, ga kri. Kÿ ga tóg jŭrŭn ke mŭ gé sir.

Ag tÿ trombeta kynkyn

6 Kÿ Topě tÿ jĕgnĕ jafĕ tÿ 7 (ke) ĕn ag tóg vĕnh kĕn mŭ sir, ag tÿ trombeta kynkyn jĕ.

7 Kÿ ũn tóg ĕ tŭ kyn vĕn mŭ. Kÿ nĕfy tóg ĕprĕ ke ag kri vĕr mŭ, pĭ mré hĕ, vĕnh kyvĕnh mré hĕ ke gé. Kÿ ka vĕnh kĕpóv tĕgtŭ ag kĕ ti vĕnh kĕpóv pĭr tóg kugpŭr kĕn mŭ, ga vĕnh kĕpóv pĭr ke gé. Re vÿ pŭr kĕn pĕ han mŭ sir.

8 Kÿ Topě tÿ jĕgnĕ jafĕ tÿ 7 (ke) ĕn ag kĕ ũ tóg trombeta kyn mŭ gé. Trombeta régre tá krÿg vĕ sir. Kÿ nĕn ũ tóg goj kafĕ tŭ ki kutĕ mŭ, hĕ ra tóg tÿ pĕnónh gru nĭ ve nĭ, pĕnónh mĕg tĕvĭ. Kÿ goj vĕnh kĕpóv tĕgtŭ ag kĕ ti vĕnh kĕpóv pĭr tóg vĕnh kyvĕnh ri ke nĭ ha.

9 Goj ga vĕnh kĕpóv tĕgtŭ ag kĕ ti vĕnh kĕpóv pĭr tóg kĕgter kĕn mŭ gé. Goj kri mŭ mŭ ĕn, barco ĕn vĕnh kĕpóv tĕgtŭ ag kĕ ti vĕnh kĕpóv pĭr tóg tŭ' he kĕn mŭ gé, pĕnónh ĕn tugrĭn.

10 Kÿ Topě tÿ jĕgnĕ jafĕ tÿ 7 (ke) ĕn ag kĕ ũ tóg trombeta

kyn mũ gé. Trombeta tăgtũ tá krÿg vễ sir. Kÿ krÿg mág pễ tóg kanhkã tá kãtẻre mũ, hã ra tóg gru nĩ, pĩ gru ẻn ri ke. Kÿ tóg ẻganẻ vẻnh kãpỏv tăgtũ ag kã ti vẻnh kãpỏv pir kri kutẻ mũ, goj nĩhÿg vẻnh kãpỏv tăgtũ ag kã ti vẻnh kãpỏv pir kri ke gé.

¹¹ Krÿg ẻn jyjyn hã vÿ: “Fa,” he mũ. Kÿ goj ẻn tóg fa nĩ sir. Kÿ ẻprã ke tÿ hẻn ri ke ag kãgter mũ, goj kỏrẻg ẻn kron kÿ.

¹² Kÿ Topẻ tÿ jẻgnẻ jafã tÿ 7 (ke) ẻn ag kã ù tóg trombeta kyn mũ gé. Trombeta tÿ 4 (ke) tá krÿg vễ sir. Kÿ nẻn ù tóg rã kỏkẻg mũ, kÿ jẻngrẻ tóg sỉ' he mũ ha, kysã jẻngrẻ ti ke gé, krÿg kar jẻngrẻ ti ke gé. Jẻngrẻ vẻnh kãpỏv tăgtũ ag kã ùn pir tóg tũg' he mũ ha. Kÿ kurã tóg sỉ nÿ ha, jãvo kuty tóg kuty tãvỉ nÿ ha.

¹³ Kÿ sỏg kỏnhkỏ mág vẻg mũ, ti tẻ tũn kÿ, kynhmÿ. ẻn vÿ jamã hár(a) prẻr mũ. “!..Jagy ti tũnh mũ, jagy ti tũnh mũ, jagy ti tũnh mũ, ẻprã ke ag mÿ..! !..Topẻ tÿ jẻgnẻ jafã tăgtũ ù ag vÿ ảjag tũ ti kynkyn ke mũ ha, kÿ tóg kỏrẻg tãvỉ nÿnh mũ ha, ẻprã ke ag mÿ..!” he tóg mũ, kỏnhkỏ mág ti.

9

¹ Kÿ Topẻ tÿ jẻgnẻ jafã tÿ 7 (ke) ẻn ag kã ù tóg trombeta kyn mũ gé. Trombeta tÿ 5 (ke) tá krÿg vễ sir. Kÿ sỏg krÿg vẻg mũ. Kanhkã tá tóg kãtẻre ja nĩ, ẻprã, krÿg ẻn ti. Kÿ ag tóg ti mÿ nũgme nỏn jafã fig mũ, chave ti, krÿg ẻn mÿ.

² Kÿ tóg rỏm mũ sir, nũgme ti, hã ra nÿja tóg tá tũmtũm ke mũ, nÿja tar pẻ. Kÿ rã tóg kuty' he mũ, nÿja ẻn to. Ga kri tóg kuty' he kãn mũ.

³ Nÿja ẻn kãtã tóg vãhã kãpa mũ, tÿ ópã tÿ hẻn ri ke nÿtỉ ve ti, hã ra tóg pÿn kakrã tar ri ke nÿtỉ, tÿ ópã nÿtỉ ve ẻn ti.

⁴ Ti pi(jẻ) re ko tỉ', ti pi(jẻ) ka fẻj ko tỉ', ti pi(jẻ) ẻkrẻ ko tỉ gẻ'. Ti tÿ ẻprã ke ag mÿ vẻnh kaga han kãtỉg vẻ. ẻprã ke ù ag tóg tÿ Topẻ tÿ rágrã tũ nÿtỉ, ag kakã ki. ẻn ag mÿ vẻnh kaga han jẻ ag junjun mũ, tÿ ópã nÿtỉ ve ẻn ag.

⁵ Ag pi(jẻ) ẻprã ke ag kãgtẻn mũ hã ra'. Kysã tÿ 5 (ke) ki ag tóg ẻprã ke ag mÿ vẻnh kaga nĩm mũ. Ag tÿ ag vỏg kÿ tóg pÿn kakrã tÿ ẻg tugtãn ri ke nĩ, ti kaga ti.

⁶ Kÿ ẻprã ke ag tóg ter sỏr mũ ha, ti kaga jagy to, hã ra ag tóg ter ke tũ nĩ, kysã tÿ 5 (ke) ẻn ki. Ag tÿ ter sỏr mũ ra ag tóg ter ke tũ pẻ nĩ.

⁷ Ópã ẻn tóg tÿ cavalo nÿtỉ ve nĩ, cavalo tÿ vẻnh gẻnh mũnh ke ri ke tóg nÿtỉ. Ouro tÿ krỉ tógfỉ ag tóg nÿtỉ. Ag kakã vÿ ẻg kakã ri ke nĩ.

⁸ Ag gãnh vÿ fag gãnh tẻj ri ke nĩ gé. Ag jã vÿ mÿg jã ri ke nĩ.

⁹ Ag fe fár tóg ferro tÿ camisa ri ke nĩ. Ag fẻr tÿ rãnrãnh he tóg mẻ há tỉ, kÿ tóg cavalo tÿ hẻn ri ke tÿ carroça tÿ hẻn ri ke nÿgnÿn ri ke nĩ, ag tÿ vẻnh gẻnh mũnh ken kÿ.

¹⁰ Ag my kã tóg nĩ, ag prẻj ti, pÿn kakrã prẻj ri ke ti. Ag my

tỹ ag tóg ěprã ke ag vóg kónãñ tĩ, kysã tỹ 5 (ke) ki.

11 Ũ tỹ nũgme ki rĩr tĩ ěn, ũ tỹ Topě tỹ jěně jafã ri ke nĩ ěn vỹ tỹ ag pã'i mág nĩ, ópã ěn ag pã'i mág. Hebreu ag vĩ ki ti jiji vỹ: Abadom, he mũ, kỹ tóg Grego ag vĩ ki: Apolião, he mũ, hã vỹ: nén ũ kar kókég tĩ, he mũ, ěg vĩ ki, hã vỹ: Apolião, he mũ.

12 Nén jagy ve ve inh huri, sỹ nén jagy régre venh ke ně ha.

13 Kỹ Topě tỹ jěgně jafã tỹ 7 (ke) ěn ag kã ũ tóg trombeta kyn mũ gé. Trombeta tỹ 6 (ke) tá krỹg vě sir. Kỹ sóg věnh vĩ měg mũ. Topě mỹ nén ũ pũn jafã tỹ ouro tá tóg mě há tĩ, věnh vĩ ti. Mesa ěn péno tỹ 4 (ke) ki, mesa tỹ Topě jo jě ěn ki tóg mě há tĩ, věnh vĩ ti.

14 Věnh vĩ ěn tóg ũ tỹ ũri kyn mũ ěn mỹ: “Topě tỹ jěgně jafã tỹ 4 (ke) ěn kygvãñ tĩg,” he mũ. “Ũ tỹ goj mág tỹ Eufrates tá sigse kỹ nỹtĩ ěn ag kygvãñ tĩg,” he tóg.

15 Kỹ tóg ag kygvãñ tĩ mũ, ũ tỹ 4 (ke) ěn ag. Tá ag tóg jãvãñ nỹtĩ ja nĩgtĩ, ag tỹ ěprã ke tỹ hěn ri ke ag kãgtén jé. Topě vỹ ag mỹ ag tỹ prỹg ki ag kãgtén ke, kysã ki ag kãgtén ke, kurã ki ag kãgtén ke, hora ki ag kãgtén ke mũ ěn nĩm ja nĩ. ěprã ke věnh kãpóv tăgtũ ag kã ũñ pir ag kãgtén kãñ jé ag tóg ke mũ, Topě tỹ jěgně jafã tỹ 4 (ke) ěn ag.

16 Ag krěm soldado ag número mě inh, ũ tỹ cavalo kri mũgtĩ ag. 200 mil (ke) ag nỹtĩ, ag krěm soldado ag.

17 Kỹ sóg ag věg mũ, soldado tỹ cavalo kri mũ mũ ag. Ferro tỹ camisa ag nỹtĩ, kỹ ũ ag tóg kusũg nỹtĩ, pĩ kusũg ri ke, ũ ag tóg tánh nỹtĩ, pó tỹ safir tánh ri ke, ũ ag tóg māréro nỹtĩ, pó tỹ enxofre māréro ri ke. Cavalo krĩ vỹ mũg krĩ ri ke nỹtĩ. Ag jěnkã tá pĩ gru tóg kãkutě mũ, nĩja ke gé, pó tỹ enxofre nĩja ke gé, vãn pũr nĩja ri ke ěn ti.

18 Tag tỹ ag tóg ěprã ke ag kãgtén ke mũ, pĩ tỹ, nĩja tỹ, pó tỹ enxofre nĩja tỹ ke gé, cavalo ag.

19 Nén tỹ cavalo jěnkã tá kãkutě mũ ěn vỹ ěprã ke ag kãgtén ke mũ, kỹ ag my vỹ ag kãgtén ke mũ gé. Ag my vỹ tỹ pỹn hã ve nĩ, pỹn krĩ. ěn tỹ ag tóg ěprã ke ag kókén ke mũ gé, ag my tỹ.

20 ěprã ke ũ ag tóg hã ra krenkren ke mũ ver. Ag kãgtén kãñ ke tũ ag tóg nĩ ver. Kỹ ũñ krenkren mũ ag pi(jé) Nén-Kóreg ag tovãñ mũ', věnh kãggrã tovãñ tũ ag nỹtĩ, ouro tỹ věnh kãggrã ěn, prata tỹ věnh kãggrã ěn, ferro kusũg tỹ věnh kãggrã ěn, pó tỹ věnh kãggrã ěn, ka tỹ věnh kãggrã ěn ke gé. Ver ag tóg tag kar to: “Topě vỹ tỹ ti nĩ,” he tĩ gé. Ag tỹ věsóg ki věnh kãggrã hyn han mũ ra tóg ag mỹ tỹ Topě nĩ ve nĩ, ti kaně tũ ra, ti nĩgrěg nor tũ ra, ti tỹ ã pěn tỹ tĩg vãñ (hã) ra.

21 Ag pi(jé) ag jykre tovãñ sór mũ', ěprã ke krenkren mũ ěn ag. Jagně kãgtén ag tóg mũgtĩ, kujã jykre han ag tóg mũgtĩ, curandeiro jykre ěn ti. Ājag prũ tũ fag mré ag tóg

nÿgnÿ mÿgtĩ, ãjag mén tũ ag mré fag tóg nÿgnÿ mÿgtĩ gé, jagnē tÿ nén ũ pigju(g) ag tóg mÿgtĩ gé, ěprã ke ag.

10

Livro sĩ

¹ Kÿ sóg Topē tÿ jēnē jafã tar ũ vég mũ. Kanhkã tá tóg kãtére mũ, ěprã. Kanhkã góg vÿ ti kri rũm kÿ nÿ nĩ. Ti krĩ kri ta no tóg vênh ven mũ. Ti kakã vÿ rã ri ke nĩ, ti fa vÿ pĩ gru ri ke nÿtĩ, ti fa jēngrē ti.

² Livro sĩ mãn kÿ tóg jē nĩ, livro tÿ jén ke kÿ tóg ma jē nĩ. Ā pēgja tÿ tóg goj kafã tũ sãn mũ, kÿ tóg ã jakãnh tÿ ga sãn mũ.

³ Prēr tóg mũ sir, jamã hár(a), kÿ tóg tÿ mĩg kyr mē tĩ, ti prēr ti. Kÿ ta tÿ tÿrÿr he tÿ 7 (ke) vÿ ti vĩ kafã mũ, jamã hár(a).

⁴ Kÿ sóg ta tÿ tÿrÿr he mũ vĩ ěn rán sór mũ. Hã ra ũ tÿ kanhkã tá vĩ mũ tó inh mÿ: “rán tũg nĩ,” he mũ. “Ta tÿ tÿrÿr he mũ ěn vĩ tó sór tũg nĩ, ũ mÿ,” he tóg.

⁵ Kÿ Topē tÿ jēnē jafã ěn, ũ tÿ goj mré ga kri jē mũ ěn tóg ã nĩgé tÿ kanhkã ki ven mũ, ã pēgja tÿ.

⁶ Kÿ tóg: “sÿ ki hã tónh ke vē,” he mũ. “Topē vÿ ki kanhró nĩ, sÿ ki hã tó mũn ki,” he tóg. “Ũn rĩr nĩ ěn vÿ ki kanhró nĩ, ũn ter vãnh ěn vÿ ki kanhró nĩ, ũ tÿ kanhkã han mũ ěn vÿ ki kanhró nĩ, ũ tÿ ga han mũ ěn ti, ũ tÿ goj han mũ ěn ti, ũ tÿ ũn rĩnrĩr nÿtĩ kar ag hyn han mũ ěn ti. ěn hã vÿ isÿ ki hã tó mũ ki kanhró nĩ,” he

tóg. “Ha vé, ã tÿ nén han ke mũ ěn tovãnh mãn ke tũ ti nĩ ha, Topē ti.

⁷ Ti tÿ jēgnē jafã tÿ 7 (ke) ěn ag kã ũ vÿ trombeta kyn ke mũ, kÿ tóg ũ tÿ 7 (ke) tá krÿg ke mũ. Ti tÿ kyn kÿ Topē vÿ ã tÿ nén han sór mũ ěn han ke mũ ha, ã tÿ vãsÿ to jykren mũ ěn ti. Hã tó ja ti nĩ, ti rãnhraj han tĩ ag mÿ, ti vĩ tó tĩ ag mÿ ke gé, Topē ti,” he tóg, Topē tÿ jēnē jafã ti.

⁸ Kÿ kanhkã tá ke ũ tóg inh mré vēmén mãn mũ. Inh mÿ tóg: “ha tĩg,” he mũ. “Livro sĩ tÿ jén ke kÿ nĩ ěn mãn tĩg,” he tóg. “Ũ tÿ goj mré ga sãn kÿ jē ěn ki livro mãn tĩg,” he tóg, kanhkã tá ke ěn ti.

⁹ Kÿ sóg ti ra tĩ mũ, kÿ sóg ti mÿ livro to vĩ mũ. Kÿ tóg inh mÿ: “té, ko ra,” he mũ. “Mÿg ri ke ti nĩ, ã tÿn kon kÿ. Ko kar kÿ tóg hã ra fa nĩnh mũ, ha vemnĩ,” he tóg.

¹⁰ Kÿ sóg livro sĩ ěn mãn kÿ ko mũ. Kÿ tóg mÿg ri ke nĩ. Isÿn ko kar kÿ tóg fa nĩ sir.

¹¹ Kÿ ũ tóg inh mÿ: “Topē tÿ nén hyn han ke mũ tó mãn jé ã tóg ke mũ,” he mũ. “Ti tÿ povo kar ag tÿ nén hyn han ke mũ tó jé ã tóg ke mũ, ti tÿ nação kar ag tÿ nén hyn han ke mũ ěn ti, ti tÿ pã'i krēm ke kar ag tÿ nén hyn han ke mũ ěn ti, ti tÿ pã'i kar ag tÿ nén hyn han ke mũ ěn ti ke gé,” he tóg, vênh vĩ ti.

11

Ũ tÿ Topē vĩ tó tĩ ag

¹ Kÿ ag tóg inh mÿ vãn jun mũ, vãn tÿ nén ũ kãmun jafã ti.

Kỹ ũ tóg inh mỹ: “tág’;” he mũ. “Topê jo ĩn kāmun nĩ, Topê mỹ nén ũ pũn jafã mré hã. Ũ tỹ krēm Topê mré vēmén kỹ nỹtĩ ěn ag nĩgrén nĩ gé.

² Topê jo ĩn vãso ěn kāmun tũg nĩ hã ra. Fóg ag tũ vë, kỹ kāmun tũg nĩ. Kysã tỹ 42 (ke) ki fóg ag tóg cidade ěn kókén ke mũ, Topê tỹ cidade ũ to: isũ vë, he mũ ěn ti.

³ Ũ tỹ inh vĩ tó tĩ régre ag jëgnë jé sóg ke mũ. Ęg tỹ nén ũ tỹ ěg mỹ e nĩn kỹ kur kórég rĩg tĩ ěn rĩnh jé ag tóg ke mũ, sacco ěn, ũn régre ěn ag. Isỹ ag mỹ nén tónh ke mũ ěn tó jé ag tóg ke mũ, kurã tỹ 1260 (ke) ěn ki,” he tóg inh mỹ, ag kãmĩ ũ ti.

⁴ Topê vĩ tó tĩ régre ěn ag vỹ Topê vĩ to tar nỹtĩ, ka tỹ oliveira tar nĩ ěn ri ke ag nỹtĩ. Topê vĩ tó ag tóg tĩ, kỹ ag tóg néj gru ri ke nỹtĩ, néj tỹ kri fëg jafã ěn kri nỹtĩn kỹ. Ũ tỹ ěprã ke ag kri ke ěn rã hã ti nỹtĩ, vela tỹ kri fëg jafã régre ěn ag. Tag ri ke ag nỹtĩ, Topê vĩ tó tĩ régre ěn ag.

⁵ Ũ tỹ ag kato vãsãn kỹ ag tóg pĩ tỹ ag jënkã tá kãkutë mũ ěn tỹ ag tỹ tũ' he tĩ, ũ tỹ ag kato vãsãnsãn mũ ag tỹ. Hã kỹ ag kãgter kãn' he tĩ, ũ tỹ ag vóg kónãn sór mũ ag.

⁶ Ag tỹ Topê vĩ tón kỹ ag tóg ag tỹ ta kutë kamëg sór kỹ ti kutë kamëg tĩ, kỹ tóg kutë tũ nĩgtĩ. Kỹ, ag tỹ goj tỹ vënh kyvënh ri ke han sór kỹ ag tóg tỹ vënh kyvënh ri ke han tĩ gé. Ag tỹ ga kri ke ag vóg kónãn sór kỹ ag tóg ag vóg kónãn tĩ gé. Nén ũ jagy tỹ hën ri ke han ag tóg tĩ, Topê vĩ tó tĩ régre ěn

ag.

⁷ Kejën ag tóg kãmén kãn mũ sir, Topê tỹ ag mỹ nén tó mũ ěn ti. Kỹ nũgme tá mĩg tóg kãkutë mũ, kỹ tóg ag to rá ke mũ. Ag tỹ hë nỹ ri ken kỹ tóg ag kãgtén mũ, mĩg ěn ti.

⁸ Ājag kãgter kỹ ag tóg cidade kuju tá vár kỹ nỹtĩ nĩ, ěg Senhor tỹ cidade tá ka to sa ja ěn tá. Cidade ěn tá ke ag jykre tóg cidade tỹ Sodoma tá ke ag jykre ri ke nĩ, ga tỹ Egito tá ke ag jykre ri ke ti nĩ gé.

⁹ Kurã tãgtũ mré kurã kuju ki ag tóg vëser ěn vigvëg mũ. Vënh kar ag vỹ ag vigvëg mũ, povo kar ag, pã'i krēm ke kar ag, vënh vĩ kar tó tĩ ag kar ke gé. Ag pi(jé) ga krēm ag pigjunh ke mũ', vëser ěn ag.

¹⁰ Ęprã ke kar ag mỹ tóg sér tĩ, ag kãgter ti. Festa mág han ag tóg mũ. Jagnë mỹ ag tóg presente jëgnëg mũ. Topê vĩ tó tĩ tag ag vỹ ěprã ke ag vóg kónãn jagy han ja nĩgtĩ, hã kỹ ag kãgter tóg vënh kar mỹ sér gy tĩ sir.

¹¹ Kurã tãgtũ kri kurã kuju tũg kỹ Topê tóg hã ra ag rĩn mãn mũ sir, ti kuprĩg tỹ. Kỹ vënh kar ag tóg jũrũn ke pë han mũ sir.

¹² Kỹ kanhkã tá vënh vĩ tóg ag mỹ mẽ há tĩ, Topê vĩ tó tĩ régre tag ag mỹ. Kỹ tóg ag mỹ: “kunĩg,” he mũ. Kỹ ag kato vãsãnsãn mũ ag vỹ ag tỹ kanhkã ra jãpry vëg mũ sir, kanhkã góg kãmĩ.

¹³ Kỹ ga tóg jũrũn ke mũ sir. Cidade tá ĩn kókég tóg mũ, ga tỹ jũrũn ke ti. ĩn vënh kãpov tỹ 10 (ke) ag kã ũn pir kókén

kān tóg mũ. Ēprā ke tỹ mil tỹ 7 (ke) vỹ kągter mũ, ěn kã. Ũn kągter tũ ag kanē tóg jur mũ. Ag mũmēg vỹ ag kągten kren mũ. Kỹ ag tóg Topē to: “ũn mág vỹ tỹ ti nĩ,” he mũ vāhã. “Tar ti nĩ, ũ tỹ kanhkã tãn ag kri nĩ ěn ti,” he ag tóg mũ vāhã.

¹⁴ Nén jagy ũ vỹ hur tũ' hé. Nén jagy ũ tóg ver kã nĩ nĩ.

Trombeta tỹ ěgno kyr

¹⁵ Kỹ Topē tỹ jēgnē jafã tỹ 7 (ke) ěn ag kã ũ tóg trombeta kyn mũ gé sir. Trombeta tỹ 7 (ke) tá krỹg vĕ. Kỹ kanhkã tá vĕnh vỹ tỹ hĕn ri ke tóg mĕ há nỹtĩ. “Vāhã tóg ěprā ke kar ag kri tỹ ũn mág jĕ, Topē ti, ěg Senhor ti ke gé,” he ag tóg, ũ tỹ kanhkã tá vỹ mũ ag. “Vāhã ag tóg nén ũ kar ki rĩr nỹtĩ ha, Topē ti, ā kósin mré, kỹ tóg tũ' hĕnh ke tũ nĩ, ag rãnhrāj ti,” he ag tóg, ũ tỹ kanhkã tá vỹ mũ ag.

¹⁶ Kỹ kófa tỹ 24 (ke) ěn ag, ũ tỹ Topē mré ājag nĩgja kri nĩgnĩ kỹ nỹtĩ ěn ag vỹ ti krĕm mũgmũg ke kãn mũ. Kỹ ag tóg Topē mý: “Topē vỹ tỹ ā nĩ,” he mũ sir.

¹⁷ Jãn ag tóg mũ gé sir, ha mĕ. “Topē, pã'i mág, nén ũ kar han há ā tóg nĩ,” he ag tóg mũ, jãn kỹ. “Vāsỹ ā tóg nĩ nĩ, kỹ ā tóg ũri nĩ nĩ gé. ěg mý tóg sér tĩ, ā tỹ tỹ pã'i mág nĩn kỹ, ā tỹ vĕnh kar ki rĩr kỹ tóg sér pĕ tĩ. Ā tar nĩ kỹ ā tóg pã'i ũ ag pan kãn.

¹⁸ Ag to jũ jĕ ā tóg ke mũ ha. Ũn kągter ja ag jykre tugnỹm kãn jĕ ā tóg ke mũ ha. Povo kar vỹ ā kato vāsãnsãn ja nĩgtĩ,

kỹ ā tóg ag kato vāsãn mũ ha. Ā kurã vỹ hur jun, kỹ ā tóg ā rãnhrāj han tĩ ag mý ag rãnhrāj kaja ti ven ke mũ, ā vỹ tó tĩ ag mý ke gé, ā tũ kar ag mý, ũn mág ag mý, ũn kãsir ag mý, ũ tỹ ā kamĕg nỹtĩ kar ag mý ā tóg ag rãnhrāj kaja ven ke mũ ha. Ā kurã vỹ hur jun, kỹ ā tóg ũ tỹ ěprā ke ag kókén ja ěn ag kókén kãn ke mũ ha,” he ag tóg mũ, kófa tỹ 24 (ke) ěn ag.

¹⁹ Kỹ ũ tóg Topē jo ĩn nón mũ, ĩn tỹ kanhkã tá jĕ ěn. Kỹ Topē jo ĩn jãn kã róm kỹ jĕ kỹ Topē caixa ěn tóg ve há' he kỹ nỹ nĩ, Topē tỹ ā tũ ag mré jykren kỹ ag mý caixa fig mũ ěn ri ke ti. Kỹ ta tóg kóm kóm ke mũ, tỹrỹr he ke gé. Ga vỹ ragra ke jagy han mũ sir, kỹ nãfy vỹ vár mũ gé sir, nãfy mág.

12

Mĩg fĕr kãme

¹ Kỹ kanhkã tá nén ũ vĕnh mý tóg vĕnh ven mũ. Ũn týtá fi vỹ tóg vĕnh ven mũ. Kỹ rã tóg fi mý tỹ fi kur nĩ. Kysã sãn kỹ fi tóg jĕ nĩ. Fi krĩ tógfi vỹ krĩg tỹ há nĩ, krĩg tỹ 12 (ke) tỹ.

² Kufy fi tóg jĕ nĩ, hã ra fi tóg kaga mũ, kỹ fi tóg jagtar nĩ sir.

³ Kỹ kanhkã tá nén ũ ũ tóg vĕnh ven mũ gé. Mĩg fĕr kusũg tóg vĕnh ven mũ. Ā pir ra tóg krĩ tỹ 7 (ke) nĩ, nĩka tỹ 10 (ke) ti nĩ gé. Ti krĩ tógfi tóg nỹtĩ, ti krĩ tỹ 7 (ke) to.

⁴ Ā my tỹ tóg krĩg tỹ hĕn ri ke kókég mũ, kỹ tóg ěprā vár mũ, krĩg tỹ hĕn ri ke ti. Krĩg vĕnh kãpóv tãgtũ ag kã ũn pir kókén

kān tóg mũ. Kĩ tóg ũn týtá ěn fi jo tá jě nĩ, fi kósín tỹ mur ken kỹ, mĩg fěr kusũg ěn ti. Ti tỹ fi kósín mǎn sór vĕ, ti mur kỹ.

⁵ Kĩ tóg mur mũ sir, fi kósín ti, hǎ ra tóg gré nỹ. Tỹ tóg pǎ'i mág pĕ jĕnh ke mũ, ěprǎ ke kar kri. Ag kri jĕn kỹ tóg ag mỹ vĩ tar gy han ke mũ. Ti mur kỹ ag tóg kanhkā ra ti va mũ mũ, Topĕ nĩgja sĩnvĩ ěn ra, mĩg fěr jo.

⁶ Kĩ ũn týtá ěn fi tóg ga kórég ra vĕnhvǎg tĩ mũ, mĩg fěr jo vĕnh péju kỹ. Tá Topĕ tóg fi mỹ fi tỹ ki vĕnh péjunh ke han ja nĩ. Tá ũ tóg fi mỹ vĕjĕn vin tĩ, kurā tỹ 1260 (ke) ki.

⁷ Kĩ kanhkā tá vĕnh génh tóg kutĕ mũ. Topĕ tỹ jĕgnĕ jafǎ ag to pǎ'i mág tỹ Miguel vỹ mĩg fěr ěn kato vǎsǎn mũ, ā krĕm ke ag mré. Kĩ mĩg fěr ěn tóg ā krĕm ke ag mré Miguel to rǎrá mũ gé sir.

⁸ Hǎ ra ag tóg ti tỹ hĕn ri ke mũ sir, kanhkā tá ke ag, mĩg fěr ěn ti tỹ. Kĩ ag tóg kanhkā tá ti kutĕm mũ, ti mré ke kar ag mré hǎ.

⁹ Mĩg fěr ěn kutĕm ag tóg mũ sir. Pỹn ve tỹ ũn ve fag krĩn kónǎn ěn hǎ vĕ, Japon hǎ vĕ, Satanás hǎ vĕ, ěprǎ ke ag tỹ Topĕ kato vǎsǎnsǎn han mũ ěn hǎ vĕ, hǎ vỹ: mĩg fěr, he mũ. Ag tỹ kanhkā tá ti kutĕm kỹ ag tóg ga kri ti fón mũ sir, ti krĕm ke kar ag mré hǎ. Kĩ ag tóg ga kri mũgtĩ ha, Japo ag.

¹⁰ Kĩ sóg kanhkā tá vĕnh vĩ ũ mĕg mũ gé. Jamǎ hár(a) tóg vĩ mũ, kỹ tóg: “tág!” he mũ. “Ěg krenkren han tóg huri, Topĕ ti. Vǎhǎ vĕnh kar

tóg vé, Topĕ tỹ tỹ ũn mág pĕ nĩ ti. Vǎhǎ Cristo tóg vĕnh kar mỹ ā tỹ tỹ ũn tar nĩ ěn ven huri. Ag tỹ ũn kutĕm mũ ěn tóg ěg mré ke ag kato vĩ kónǎn ja nĩgtĩ, Topĕ mỹ, kurā ki, kuty tá ke gé. Hǎ ra tóg kutĕm kỹ jĕ ha.

¹¹ Ěg mré ke ag vỹ ti tỹ hĕn ri ke ja nĩgtĩ, cordeiro kyvĕnh ěn tigrĩn, vĕnh vĩ há ěn tigrĩn, ag tỹ vĕnh kar mỹ Topĕ vĩ tó tĩ ěn tigrĩn. Ag kā ũ kǎgtĕn ja ag tóg nĩgtĩ, hǎ ra tóg ag mỹ tỹ nĕn ũ tũ nĩ ja nĩgtĩ, ag tỹ Jesus tigrĩn ag kǎgtĕn mũ ra. Hǎ kỹ ag tóg Japo tỹ hĕn ri ke ja nĩ.

¹² Ti kutĕm kỹ jĕn kỹ tóg kanhkā tǎn kar mỹ sér tĩ ha. Hǎ ra tóg ga kri mũ ag mỹ jagy tĩnh mũ, goj kri mũ ag mỹ ke gé. Japo vỹ ag mré jĕ ha, ga kri, ag tỹ kanhkā tá ti kutĕm kỹ. Kĩ tóg jũ jagy han kỹ kǎnĕ tĩ. Ti kurā vỹ kakó nĩ ha. Tag tigrĩn tóg jũ jagy han kỹ kǎnĕ tĩ nĩ, Japo ti,” he tóg, ũ tỹ kanhkā tá vĩ mũ ti.

¹³ Kĩ mĩg fěr ěn tóg ěprǎ jĕ mũ. Kĩ tóg ũn týtá ěn fi vóg kónǎn sór mũ, ũ tỹ gĩr vĕg mũ ěn fi.

¹⁴ Kĩ ag tóg fi mỹ fěr mág junjun mũ, kónhkó mág fěr ěn ri ke. Kĩ fi tóg tỹ ga kórég ěn ra tĕ tĩ mũ. Tá fi tóg vĕnh péju kỹ nĩ nĩ, prỹg tǎgtũ kri prỹg kuju ki. Kĩ pỹn kórég ěn tóg tá fi vóg tũ nĩ ha, fi vĕnh péju ja tá.

¹⁵ Kĩ tóg goj var ri ke han mũ, pỹn ti. Ti jĕnkā tá tóg kǎkutĕ mũ, goj var ti. Ti tỹ ũn týtá ěn fi nǎr han sór vĕ.

¹⁶ Hǎ ra ga tóg fi mỹ goj ěn tỹ gym ke mũ, goj tỹ mĩg fěr

jĕnkā tá kākutē mū ěn tỹ, kỹ fi tóg ga tugrĭn kren mū sir.

¹⁷ Kỹ mĭg fĕr tóg jũ kỹ tĩ mũ, ũn tỹtá ěn fi tovānh kỹ. Kỹ tóg fi krĕ kato vāsān jé tĩ mũ gé, hā vỹ: ũ tỹ Topĕ vĩ ki króm mũ ag, he mũ, fi krĕ ag, hā vỹ: ũ tỹ Jesus to krónh ke tũ ag, he mũ, ũn tỹtá ěn fi krĕ ag.

¹⁸ Kỹ mĭg fĕr ěn tóg goj fyr ra tĩ mũ.

13

Mĭg régre ag kāmē

¹ Kỹ mĭg ũ tóg goj mág kātá kākutē mũ. Ā pir ra tóg krĭ tỹ 7 (ke) nĩ, nĩka tỹ 10 (ke) ti nĩ gé. Ti krĭ tógfi tóg ti nĩka kri nỹtĩ, kỹ ti jygji tóg ti krĭ kri ránrán kỹ nỹtĩ, ti tỹ tỹ pā'i mág nĭn kỹ, goj kātá mĭg ěn ti. Hā ra Topĕ to vĩ kónān vĕ sir, ti krĭ to ránrán kỹ nỹtĩ ěn ti.

² Goj kātá mĭg ěn tóg mĭg rá ri ke nĩ. Ti pĕn tóg urso pĕn ri ke nỹtĩ. Ti jĕnky tóg mĭg kusũg jĕnky ri ke nĩ. Kỹ mĭg fĕr ěn tóg goj kātá mĭg tỹ pā'i mág pĕ han mũ, ti tỹ ag nĭgja kri nĩ jé, ti tỹ ā jykre tar ěn han jé ke gé, mĭg fĕr jykre ěn ti.

³ Ti krĭ ũ fynh ja ag tóg nĩ, kỹ tóg ter kren, hā ra tóg há' he mān, goj kātá mĭg ěn ti. Ĕprā ke kar ag vỹ ti vég mũ, kỹ tóg ag mỹ e kar tĩ. Ti vĩ kri fig ag tóg mũ.

⁴ Mĭg fĕr ěn to ag tóg: “Topĕ vĕ,” he tĩ, ĕprā ke kar ag, ti jykre tar tugrĭn, ti tỹ goj kātá mĭg ěn tar han ja tugrĭn. Goj kātá mĭg ěn to ag tóg: “Topĕ vĕ,” he tĩ gé. “Ũ tóg ti ri ke tũ pĕ nĭgtĩ,” he ag tóg tĩ. “Ũ tóg ti

tar káfór tũ nĩ,” he ag tóg tĩ gé, ĕprā ke ag, mĭg ěn to.

⁵ Goj kātá mĭg ěn vỹ vĩ vĕnhmỹ han jĕ nĩ. Ā vĩ tỹ tóg Topĕ kato vāsān mũ. Kysā tỹ 42 (ke) ki tóg tar jĕ nĩ, vĕnh kar kri.

⁶ Kỹ tóg Topĕ to vĩ kónān mũ, Topĕ jyjy to ke gé, ti jo ĩn to ke gé, kanhkā tĕn kar ag to tóg vĩ kónān mũ gé.

⁷ Kỹ tóg Topĕ tỹ ũn kuprĕg mũ ag kĕgtĕn to vāsān mũ gé, kỹ tóg ag tỹ hĕn ri ke mũ gé sir, goj tĕn tỹ mĭg ěn ti. Hā ra Topĕ tóg ver ti to fen nĩ. Kỹ povo kar ag, naçāo kar ag, pā'i krĕm ke kar ag, ũ tỹ vyr mỹ vĩ nỹtĩ ěn ag kar vỹ mĭg ěn vĩ hā jĕmĕg mũ.

⁸ Ĕprā ke kar ag vỹ ti to: “Topĕ vĕ,” he' he tĩ. Ag jāvo ũ ag jygji tóg ránrán kỹ nỹtĩ, Topĕ livron ki. Ũ tỹ rĭr krỹg ja tũ venh ke mũ ěn ag vỹ ki ránrán kỹ nỹtĩ. Topĕ tỹ nĕn ũ kar han ke to hā tóg ag jygji ránrán ja nĭgtĩ, livro ěn ki. Cordeiro tỹ ag jagfy ter ja ěn tũ vĕ, livro ěn ti. Ũ tỹ ki ránrán kỹ nỹtĩ ag vỹ mĭg ěn jykre han tũ nĭgtĩ.

⁹ Ũn nĭgrĕg nỹtĩ ag tỹ tỹ jĕmĕ jé.

¹⁰ Topĕ tỹ ā ki ge kỹ nỹtĩ ũ ag to: “nĭgfĕnh kỹ ag nỹtĭnh mũ, isugrĭn,” hen kỹ ag tóg nĭgfĕnh kỹ nỹtĭnh mũ, cadeia ki. Ti tỹ ag to: “rógro tỹ ag tóg ag kĕgtĕn ke mũ,” hen kỹ ag tóg rógro tỹ ag kĕgtĕn ke mũ sir. Ũ tỹ Topĕ mỹ vĕnh vin mũ ěn ag jé to krónh ke tũg, ag jé Topĕ tovānh tũg.

11 Kÿ sóg mĩg ù vég mũ gé. Ga kátá tóg kãkutẽ mũ. Nĩka régre ti nĩ, cordeiro nĩka ri ke. Ti vĩ tóg hã ra mĩg fẽr ẽn vĩ ri ke nĩ.

12 Goj kátá mĩg ẽn rĩnve tóg ã tỹ han mũ kar hyn han tĩ, ã jykre tar ẽn ti, ga kátá mĩg ti. Kÿ tóg ẽprã ke kar ag to vãsãn mũ, ag tỹ goj kátá mĩg ẽn to: “Topẽ vẽ,” he jé, ùn ter kren mũ ẽn to.

13 Ga kátá mĩg tag vỹ nén ve vãn h tỹ hẽn ri ke hyn han mũ. Pĩ tỹ kanhkã tá kãtére han tóg tĩ, ẽprã ke kar ag rĩnve.

14 Ti tỹ ẽg tỹ nén han vãn h tỹ hẽn ri ke hyn han kÿ tóg ẽprã ke kar mỹ ón mũ, ag tỹ ti kamẽg jé. Goj kátá mĩg ẽn rĩnve tóg milagre tỹ hẽn ri ke hyn han mũ. Kÿ tóg ẽprã ke ag mỹ ke mũ, ag tỹ goj kátá mĩg kãggrá han jé. Ag tỹ mĩg ẽn fynh mũ ra tóg ter ja tũ nĩ, hã kÿ tóg vẽn h kar mỹ: “ha ti kãggran,” he mũ, ga kátá mĩg ẽn ti.

15 Kÿ tóg goj kátá mĩg kãggrá ki hu he mũ, kÿ tóg rĩr mũ, ti kãggrá ti, kÿ tóg vĩ mũ gé. Kÿ tóg ù tỹ ti to: “Topẽ vẽ,” he jãvãn ẽn ag kãgtén kãn mũ sir, ti kãggrá rĩr jẽ ẽn ti.

16 Ga kátá mĩg ẽn tóg tỹ ẽprã ke kar ag kri ke nĩ, ùn mág ag kri, ùn kãsir ag kri ke gé, ùn rico ag kri ke gé, ùn jagãgtar ag kri ke gé, ù tỹ tỹ camarada nỹtĩ ag kri ke gé, ag patrão ag kri ke gé. Kÿ tóg ag kar to vãsãn mũ, ag tỹ ãjag pẽgja tá ãjag nĩgẽ pãnĩ ki ti jiji rãnran jé, ke tũ nĩ kÿ ti número ti. ãjag kakã ki ag tóg ti jyjy rãnran mũ gé.

17 Û tỹ gen kÿ rãnran kÿ nỹtĩ ag hã tóg nén ù comprar he tĩ, nén ù vender he tĩ gé inhã. Ûn rá tũ ag vỹ nén ù comprar he mãn ke tũ nỹtĩ ha. Vẽn h rá tag vỹ tỹ ga kátá mĩg ẽn jyjy nĩ, ke tũ nĩn kÿ ti número ti. Ti número vỹ ti jiji tó tĩ gé.

18 Ûn krĩ há ag hã tóg ti número to jykrén há han ke mũ. Ûn krĩ tũ ẽn ag pi(jé) to jykrén ke mũ', ti número to. Ẽprã ke jyjy vẽ, ti número ti, hã vỹ: 666, he mũ.

14

Ûn krenkren kÿ nỹtĩ ag jãn

1 Kÿ sóg ki ẽvãn h kÿ cordeiro ẽn ve mãn mũ. Pãnónh kri tóg jẽ nĩ, pãnónh tỹ Sião he mũ ẽn kri, cordeiro ẽn ti. Ûn e ag tóg ti mré tá nỹtĩ, ù tỹ 144 mil (ke) ag. Cordeiro ẽn jyjy tóg ag kakã ki rãn kÿ nĩ, ù tỹ ti mré tá nỹtĩ ag kakã ki. Cordeiro ẽn jóg jiji vỹ ag ki rãn kÿ nĩ gé.

2 Kÿ sóg kanhkã tá nén ù mẽg mũ. Tỹ tóg sa krog mẽ tĩ, tỹ tóg ta tỹ tỹrÿr he ri ke tĩ gé. Kÿ tóg tỹ ag tỹ vãykn jafã tỹ harpa kyn ẽn ri ke tĩ gé, ti kyr ti.

3 Vẽjãn tãg tó ag tóg mũ gé, nén nẽ tỹ 4 (ke) ẽn ag rĩnve, kófa ag rĩnve ke gé, nĩgja sĩnvĩ ẽn tá. Û tỹ 144 mil (ke) ag vỹ Topẽ jé tãg tag tó há nỹtĩ, ẽn ag tãvĩ. Ẽprã ke ja ag vẽ, hã ra ag tóg krenkren kÿ nỹtĩ, ù tỹ ti jãn tãg tó mũ ẽn ag.

4 Jãnhkri ag nỹtĩ. Ag pi(jé) fag vóg ja nĩgtĩ', cordeiro mré mũ ja ag tóg nĩgtĩ, ag tỹ tỹ

ĕprã ke ra. Ĕprã ke ag kãmĩ tóg ag kygãm ja nĩ, cordeiro ti. Kĩ ag tóg tỹ Topẽ tũ nỹtĩ, cordeiro tũ ke gé. Ag mỹ ag tóg há pẽ nỹtĩ.

⁵ Ag pí(jé) ũ mỹ ón ja nĩgtĩ'. Kynẽ ja tũ pẽ ag tóg nĩgtĩ.

Topẽ tỹ jẽnẽ jafã tãgtũ ag

⁶ Kĩ sóg Topẽ tỹ jẽnẽ jafã ũ vég mũ gé. Kanhkã krẽm tóg tẽ tĩ mũ. Kĩ tóg Topẽ vĩ ma kãtĩ mũ, Topẽ vĩ ěn vỹ tũg' henh ke tũ nĩ. Ti tỹ ĕprã ke kar ag mỹ Topẽ vĩ tónh ke vẽ, nação kar ag mỹ, povo kar mỹ ke gé, pã'i krẽm ke kar ag mỹ, vyr mỹ vĩ nỹtĩ kar ag mỹ ke gé.

⁷ Kĩ tóg prẽr mũ sir. "Topẽ hã kamẽg nĩ, ti hã to: ũn mág vỹ tỹ ti nĩ, hemnĩ," he tóg, Topẽ tỹ jẽnẽ jafã ěn ti. "Ti kurã vỹ hur jun. Ĕprã ke ag jykre tugnỹm jé tóg ke mũ ha. ũ tỹ kanhkã han mũ mỹ: "Topẽ vỹ tỹ ã nĩ," hemnĩ, ũ tỹ ga han mũ ěn mỹ, ũ tỹ goj han mũ ěn mỹ, goj nĩhỹg mré hã. Ĕn hã mỹ: "Topẽ vỹ tỹ ã nĩ," hemnĩ," he tóg, Topẽ tỹ jẽnẽ jafã ěn ti.

⁸ Ti nón Topẽ tỹ jẽnẽ jafã ũ tóg jun mũ gé, kũ tóg: "kókén kũ tóg nỹ nĩ," he mũ. "Cidade tỹ Babilônia vỹ kókén kũ nỹ ha," he tóg. "Ĕprã ke kar to tóg vãsãn ja nĩ, Babilônia to pã'i ti, ag tỹ ti mré ãjag prũ tũ fag mré nỹgnỹ jé, fag tỹ ti ri ke ãjag mén tũ ag mré nỹgnỹ jé, kũ tóg vẽn kar tỹ ti mré vinho fa pẽ kron ri ke nĩ," he tóg, Topẽ tỹ jẽnẽ jafã ũ ěn ti.

⁹ Kĩ Topẽ tỹ jẽnẽ jafã ũ tóg ag nón kãtĩ mũ gé. Ĕn vỹ prẽr

kỹ: "!'..ĕprã ke ũ ag tóg mĩg to: topẽ vẽ, he ja nĩgte..!" he mũ, prẽr kũ. "!'..Ti kãggrá to ag tóg: topẽ vẽ, he ja nĩgte..! Ājag kakã ki ag tóg ti rá han ja nĩgte..! Ag nĩgẽ pãnĩ ki ag tóg ránrán kũ nỹtĩ gé..!"

¹⁰ Ĕn ag vỹ Topẽ tỹ ag to jũ jagy han venh ke mũ ha..! Kỹ tóg ag tỹ vinho kron ri ke nỹ nĩ ha..! Topẽ vỹ jũ jagy han kũ jẽ ha..! Kỹ ti tỹ ag to jũnh ke tóg kar kũ nỹ ha..! Kỹ tóg ěg tỹ vinho tỹ copo fãn kũ fẽg ěn ri ke nĩ ha..! ti tỹ ag to jũnh ke ti..! Topẽ tỹ vẽn kãn kũ jẽ to ken hã vẽ..! ũ tỹ mĩg to: topẽ vẽ, he ja ěn ag vỹ jagãgtar mág venh ke mũ ha..! cordeiro rĩnve..! Topẽ tỹ jẽgnẽ jafã ag kar rĩnve ag jagtar kãn kũ nỹtĩ ha..! Pĩ ki ag tóg jagãgtar ke mũ ha..! pó tỹ enxofre pũr nĩja ki ke gé, vãn pũr nĩja ri ke ěn ki..!

¹¹ Ag tỹ pĩ ki jagãgtar mũ ěn nĩja tóg kanhkã to tãpry mũ ha..! Tũg' henh ke tũ ti nĩ, pĩ ěn ti..! ũ tỹ mĩg to: topẽ vẽ, he mũ ěn ag vỹ vẽnhkánkán ke tũ pẽ nĩ..! ũ tỹ ti kãggrá to: topẽ vẽ, he mũ ěn ag kar ti..! ũ tỹ ti jyjy tỹ ránrán kũ nỹtĩ ěn ag kar ti..! Vẽnhkán ke tũ ag nỹtĩ ha..! kurã ki, kuty mré hã..!" he tóg, prẽr kũ, Topẽ tỹ jẽnẽ jafã ũ ěn ti.

¹² ũ tỹ Topẽ ki ge kũ nỹtĩ ag jé ti to krónh ke tũg, ag jé Topẽ tovãnh tũg, ũ tỹ Topẽ vĩ kri fig mũ ag, ũ tỹ Jesus to tar nỹtĩ ag.

¹³ Kĩ sóg kanhkã tá vẽn vĩ ũ mẽg mũ gé. Kĩ tóg: "tag rán nĩ, ha mẽ," he mũ, ũ tỹ kanhkã tá vĩ mũ ti. "ũ tóg ěg Senhor ki

ge ký nýtí, gen ký ag tóg kăgter ja nĩ. Ěn ag mĩ tóg sér tăvĩ tí ha,” he tóg, ũ tĩ kanhkă tá vĩ mũ ti. Ký Topě kuprĩg tóg: “hĩ,” he mũ gé. “Ag rănhrăj kaja vég ag tóg mũgtĩ, ký ag tóg ag rănhrăj to vênhkán ký nýtí ha,” he tóg, Topě kuprĩg ti, ũn kăgter mũ ag to, ũ tĩ ěg Senhor ki ge ký nýtí ag to.

Topě tĩ jěně jafă ag tĩ ěpră ke ag vóg kónăn

¹⁴ Ký sóg kanhkă góg kupri vég mũ gé sir. ũ tóg kanhkă góg ěn kri nĩ nĩ, tĩ tóg ěpră ke nĩ ve nĩ. Hă ra tóg kri tógfĩ tĩ ouro nĩ nĩ, ký tóg ěg tĩ tĩ trigo kre jafă vyn ký nĩ nĩ gé. Jukén ký tóg nĩ, trigo kre jafă ěn ti.

¹⁵ Ký Topě tĩ jěně jafă ũ tóg kătĩ mũ gé, Topě jo ĩn kătá. Ký tóg ũ tĩ kanhkă góg kri nĩ ěn mĩ: “trigo kre jafă tĩ krenh tĩg nĩ,” he mũ. “Tĩ ti krenh ke kură vė. Vėnh kăn ký ag nýtĩ nĩ, ěpră ke ag,” he tóg.

¹⁶ Ký ũ tĩ kanhkă góg kri nĩ ěn tóg trigo kre jafă ěn tĩ krenh tí mũ.

¹⁷ Ký sóg Topě tĩ jěně jafă ũ vég mũ gé. Topě jo ĩn kătá tóg kăkutě mũ. Uva kre jafă vyn ký tóg tá kăkutě mũ.

¹⁸ Ký Topě tĩ jěně jafă ũ tóg jun măn mũ gé. Topě jo ĩn kătá tóg kăkutě mũ gé, Topě mĩ nén ũ pũn jafă ěn tá. Topě tĩ jěně jafă tag vỹ pĩ ki rĩr tĩgtĩ. Ký tóg ũ tĩ uva kre jafă văg mũ ěn mĩ: “uva kre jafă tĩ krenh tĩg,” he mũ. “Ga kri ti nýtĩ, uva kaně ti. Ěn krenh tĩg. Ră há ti nýtĩ ha,” he tóg.

¹⁹ Ký tóg tí mũ, Topě tĩ jěně jafă ěn ti. Uva kaně krég tóg mũ sir. Ký tóg uva jěgmĩ jafă ki ag văm mũ, hă vỹ: Topě tĩ vėnh kar to jũ, he mũ, hă vỹ: uva jěgmĩ jafă, he mũ.

²⁰ Cidade fyr tá tóg jě nĩ, uva jěgmĩ jafă ěn ti, ký ag tóg uva jěgmĩg mũ sir, Topě tĩ jěně jafă ěn ag. Ký ag tóg tá ag kyvėnh kujěg mũ, ěpră ke ag kyvėnh ti, ký tóg tăra tí mũ, 300 (ke) quilômetros ra, ag kyvėnh ti. Tĩ tóg goj mág nỹ ve nĩ, ag kyvėnh ti. Cavalô tĩ kă jě ra tóg pun kenh ke mũ vė.

15

Topě tĩ jěně jafă ag tĩ ěpră ke ag vóg kónăn măn

¹ Ký sóg kanhkă tá nén ũ vég mũ gé. ĩnh mĩ tóg e tí, isỹ nén ně ěn ve ký, ký tóg ĩnh kaně jun mũ. Topě tĩ jěně jafă tĩ 7 (ke) ag vigve ĩnh. Ga kri ke ag vóg kónăn jé ag tóg ke mũ, vógvóg tĩ 7 (ke) ki. Ag tĩ ga kri ke ag vóg kónăn kar ký Topě tóg jũ măn ke tũ nĩ ha.

² Ký sóg goj tĩ vidro kăki pĩ gru vég mũ. Ký sóg ũ ag vigvég mũ gé, ũ tĩ mĩg ěn kato văsănsăn mũ ěn ag. Ag pi(jé) âjag tĩ tĩ ěpră ke nýtĩ ra mĩg kăggră ěn to há nýtĩ ja nĩgtĩ', ag pi(jé) vėnh ki ti número răn ja nĩgtĩ', ti jyjy ti'. Ag pi(jé) mĩg vĩ kri nĩm ja nĩgtĩ'. Hă ký ag vỹ goj tĩ vidro jo nýtĩ, ký ag tóg văkyn jafă tĩ harpa vyn ký nýtĩ nĩ, Topě tĩ ag mĩ harpa vin mũ ěn.

³ Ký ag tóg Topě mĩ rănhrăj tĩ tĩ Moisés tĩ jé ěn tó mũ, tí

tỹ jãn ti. Cordeiro ên mỹ ag tóg jãn mũ, ha mẽ: “Topê kósin vỹ tỹ ã nĩ, pã'i mág vỹ tỹ ã nĩ, vãnh kar kri ke vỹ tỹ ã nĩ,” he ag tóg mũ, cordeiro mỹ, jãn kỹ. “Nén ù há tãvĩ han ja ã tóg nĩ, ge ve ja tũ ãg tóg nỹtĩ. Á jykre vỹ kuryj tãvĩ nỹ, ki hã tó ã tóg tĩgtĩ. Povo kar kri ã tóg jẽ nĩ.

⁴ Vãnh kar ag vỹ ã kamẽg tĩ, pã'i mág kar ag. Vãnh kar ag vỹ ã jiji to: “Ûn mág vỹ tỹ ti nĩ,” he tĩ. Á hã ne ã pir mỹ há nĩ. Povo kar tóg ã tá junjun ke mũ, kỹ ag tóg ã mỹ: “Topê vỹ tỹ ã nĩ,” henh ke mũ. Á jykre kuryj ên ve kãn jé ag tóg ke mũ, povo kar ag,” he ag tóg mũ, jãnjãn kỹ, ù tỹ mĩg kato vãsãnsãn mũ ên ag.

⁵ Kar kỹ sóg kanhkã tá Topê jo ãn vég mũ. Ti jãnkã nón ag tóg mũ, kur tỹ ãn ên róm kỹ, Topê nĩg jafã ên.

⁶ Kỹ Topê tỹ jẽgnẽ jafã tỹ 7 (ke) ên ag tóg tá kãpa mũ, ù tỹ ga vóg kónãn ke mũ ên ag. Kur kupri jãnhkri rĩnh kỹ ag tóg kãmũ mũ, pyrfé tỹ kur rĩnh kỹ, kỹ ag tóg ouro tỹ vêsógfĩn kỹ nỹtĩ gé, ãjag fe kri.

⁷ Kỹ nén nẽ tỹ 4 (ke) ên ag kãmĩ ù tóg ag mỹ ouro tỹ pénky junjun mũ, Topê tỹ jẽgnẽ tỹ 7 (ke) ên ag mỹ. Pénky tỹ 7 (ke) junjun ag tóg mũ, ag mỹ. Fór ti nỹtĩ, pénky ti, Topê jũ tỹ. Topê vỹ tũ' henh ke tũ pẽ nĩ. Ti jũ tỹ tóg fórt nỹtĩ, pénky ti.

⁸ Kỹ Topê jo ãn ên krẽm tóg nĩja nĩ. Topê tá tóg tũmtũm ke kãtĩ mũ, nĩja ên ti, Topê tỹ tỹ ùn mág nĩn kỹ, ti tar nĩn kỹ.

Topê tỹ jẽgnẽ jafã tỹ 7 (ke) ên ag tỹ ga vóg kónãn ke to hã ù tóg Topê jo ãn ên kãra rãnh ke tũ nĩ.

16

Topê jũ

¹ Kỹ sóg vãnh vĩ ù jẽmẽg mũ, Topê jo ãn ên kãtã. Topê tỹ jẽgnẽ jafã tỹ 7 (ke) ên mỹ tóg vĩ mũ, ùn vĩ mũ ên ti, kỹ tóg: “pénky tỹ funfór ên tỹ ga kri kugjẽn mũjẽg,” he mũ.

² Kỹ Topê tỹ jẽnẽ jafã ù tóg tĩ mũ, ti pénky ki nĩ ên tỹ ga kri kujẽn jé. Kỹ ù tỹ mĩg ên jiji tỹ rãnrãn kỹ nỹtĩ ên ag kar vỹ fugfóm jagy han mũ, kaga jagy. Û tỹ mĩg kãggrã to: “Topê vỹ tỹ ti nĩ,” he mũ ag kar vỹ fugfóm kãn mũ.

³ Kỹ Topê tỹ jẽnẽ jafã ù tóg goj kafã tũ ki ã pénky ki nĩ ên kujẽg mũ gé. Kỹ goj tóg vãnh kyvãnh ri ke nĩ ha, ag tỹ ù tãnh mũ kyvãnh ên ri ke. Kỹ goj kãmĩ mũ kar ag vỹ kãgter mũ ha.

⁴ Kỹ Topê tỹ jẽnẽ jafã ù tóg ã pénky ki nĩ ên kujẽg mũ gé, pénky tãgtũ vẽ sir. Goj mág mré goj kãsir kar ki tóg kujẽg mũ, ti tũ ti, goj nĩhỹg kar ki ke gé. Kỹ tóg vãnh kyvãnh kar nỹtĩ ha, goj kar ti.

⁵ Kỹ ù tỹ goj ki rĩr tĩ ên tóg: “Ûn há vỹ tỹ ã nĩ,” he mũ, Topê mỹ. “Vãsỹ ã tóg nĩ ja nĩgtĩ, kỹ ã tóg ùri nĩ nĩ gé,” he tóg mũ, Topê mỹ. “Vãnh jykre há han kỹ ã tóg nĩ nĩ.

⁶ Û tỹ ã ki ge kỹ nỹtĩ ag kãgtén ag tóg, ù tỹ ã vĩ tó tĩ ag mré hã. Kỹ ã tóg ag mỹ vãnh kato vãnh kyvãnh nĩm mũ sir,

ag tỹ kron jé. Ag tỹ ag tỹ ag kãgtén kajãm hã vễ,” he tóg, Topễ mỹ, Topễ tỹ jẽnễ jafã ti.

7 Kỹ sóg vễnh vĩ ù jẽmễg mũ gé. Topễ mỹ nén ù pũn jafã tá tóg vĩ mũ, ùn vĩ mũ ti, kỹ tóg: “Topễ vĩ tỹ ã nĩ, pã'i vĩ tỹ ã nĩ, vễnh kar kri ke vĩ tỹ ã nĩ,” he mũ. “Kuryj ti nĩ, ã jykre ti, kỹ ã tóg ki hã tó tĩ, kỹ ã tóg ki hã ag vóg kónãn tĩ gé,” he tóg mũ, ùn vĩ mũ ẽn ti.

8 Kỹ Topễ tỹ jẽnễ jafã ù tóg ã pénky ki nĩ ẽn kujễg mũ gé. Pénky tỹ 4 (ke) vễ sir. Rã ki tóg ã tũ kujễg mũ. Kỹ rã tóg vễnh kar kri hupũn jagy han mũ, kỹ ag jagtar mũ.

9 Kỹ ag tóg kugpũr mũ sir, vễnh kar, rỹ jagy tỹ. Kỹ ag tóg Topễ to vĩ kónãn mũ sir, ti tỹ ag vóg kónãn tugrĩn. Ge ra ag tóg ãjag jykre tovãnh sór tũ nỹtĩ, Topễ mỹ ag tóg vễnh vin sór tũ nỹtĩ.

10 Kỹ Topễ tỹ jẽnễ jafã ù tóg ã tũ kujễg mũ gé. Pénky tỹ 5 (ke) vễ sir. Mĩg ẽn nĩgja kri tóg ã tũ kujễg mũ. Kỹ tóg kuty nỹ, mĩg ẽn krẽm ke kar ag mỹ. Kỹ tóg vễnh kar mỹ e tãvĩ tĩ. Kaga jagy han ag tóg mũ, ag fugfóm to. ãjag kaga jagy tugrĩn ag tóg ãjag nũnễ kyprãg mũ.

11 Kỹ ag tóg Topễ tỹ kanhkã tá nĩ ẽn mỹ vĩ kónãn mũ, ag kaga to, ag tỹ ti jagy vếg mũ kar to. Ge ra ag tóg ãjag jykre kórég tovãnh sór tũ nỹtĩ.

12 Kỹ Topễ tỹ jẽnễ jafã ù tóg ã tũ kujễg mũ gé. Pénky tỹ 6 (ke) vễ sir. Goj tỹ Eufrates ki tóg ã tũ kujễg mũ. Kỹ tóg tóg kãn mũ, goj tỹ Eufrates ti. Hã kỹ pã'i tỹ rã jur ja tá kãmũ ẽn

ag tóg kãmũ mũ ha, kỹ goj tóg ja ẽn vĩ tỹ ag japry nỹ ha, ag jamĩn.

13 Kỹ sóg vễnh kuprĩg tãgtũ vếg mũ, hã ra tóg tỹ pėjo ve nỹtĩ, vễnh kuprĩg ag. ù tóg mĩg fẽr ẽn jẽnkã tá kãkutễ mũ, ù tóg goj kãtã mĩg ẽn jẽnkã tá kãkutễ mũ, ù tóg ỏn kỹ Topễ vĩ tó tĩ ẽn jẽnkã tá kãkutễ mũ gé.

14 Japo ag vễ, vễnh kuprĩg tỹ tỹ pėjo nỹtĩ ve ẽn ag, hã ra ag tóg ẽg tỹ nén han vãnh hyn han mũ. Kỹ ag tóg ẽprã ke to pã'i kar ag mré vẻmén mũ gé, ag tỹ vễnh gẻnh ke to vễnh mãn jẻ, Topễ tỹ ag mỹ kurã nĩv ẽn ki. Topễ hã ne tỹ ùn mág nĩ'.

15 “Ha vé, ãjag tỹ nén ù pẻju(g) tĩ ẽn kãtig ri ke ti nĩnh mũ, inh kãtig mãn ke ti. ãjag nũgnũr tũ nỹtĩn kỹ tóg há tĩ, ãjag kur kynkar kỹ nỹtĩn kỹ tóg há tĩ. Kỹ mỹ sẻr nỹtĩmnĩ. Kỹ ãjag tóg kator nỹtĩnh ke tũ nĩ. Mỹ'ãg'ãg ke tũ ãjag nỹtĩ, ù ag tỹ ãjag vếg mũ ra,” he tóg, ẽg Senhor ti, ẽg mỹ.

16 Japo tag ag vĩ pã'i kar tỹ vễnh mãn han mũ, ẽmã tỹ Armagedom tá, Hebreu vĩ ki ẽmã ẽn jyjy vễ.

17 Kỹ Topễ tỹ jẽnễ jafã ù tóg ã tũ kujễg mũ gé. Pénky tỹ 7 (ke) hã vễ. Kanhkã krẽm tóg ã tũ kujễg mũ. Kỹ nĩgja sĩnvĩ ẽn tá, Topễ jo ĩn kãkã nĩgja ẽn tá vễnh vĩ tóg mễ há ti, kỹ tóg: “nén kar tóg kar kãn kỹ nỹ ha,” he mũ, vễnh vĩ ti.

18 Kỹ ta tóg kómkóm ke mũ, tỹrỹr he tóg mũ gé, kỹ ga vĩ ragra ke jagy han mũ gé. Ga tỹ ragra ke tỹ ge ve ja tũ ẽg tóg

nýtí. Ěg tý ga mĩ mũn kã tóg ragra ke tý ge han ja tũ nĩ.

¹⁹ Cidade mág ěn tóg vĕnh kãpóv kŷ nŷ ha, vĕnh kãpóv tãgtũ tý. Kŷ ga kar mĩ cidade tóg kókén kŷ nýtí nĩ. Topĕ pi(jé) cidade tý Babilônia kã jatu ja nĩgtĩ'. Cidade ěn ki ke ag to tóg jũ tãvĩ han mũ, Topĕ ti, ag to tóg fe gŷv han mũ. Hã kŷ tóg ag vóg kónãn jagy han mũ, kŷ tóg ěg tý vinho kron ri ke nĩ.

²⁰ Kŷ goj vãso kar tóg tũ nýtí ha ke gé, pãnóh kar tóg tũ nýtí gé.

²¹ Kŷ nãfy tóg vár mũ gé. Éhé tãvĩ ti nĩ, nãfy ěn ti, ũn pir tóg quilo tý hĕn ri ke nĩ, kukryr tý nãfy ěn. Ěprã tóg vár mũ. Kŷ ěprã ke ag tóg Topĕ mŷ vĩ kónãn mũ gé sir, nãfy tag to, ti jagy tãvĩ nĩn kŷ.

17

Ūn týtã kórég fi

¹ Kŷ Topĕ tý jĕnĕ jafã ũ tóg inh ki jun mũ, ũ tý pĕnky mãn mũ ja ěn ag kã ũ. Kŷ tóg inh mŷ: “kunĩg,” he mũ. “Nhŷ ã mŷ cidade mág ti ven, cidade tý goj tý hĕn ri ke tá nŷ ěn ti. Cidade ěn ki ke ag vŷ ũn mén (ka)mĕ fi ri ke nýtí, kŷ Topĕ vŷ ag vóg kónãn ke mũ, ũn mén (ka)mĕ fi ri ke ěn ag.

² Pã'i kar vŷ fi mré nŷ ja nĩgtĩ, ũn mén (ka)mĕ ěn fi mré. Ěprã ke kar mŷ tóg sér tí, fi jykre ti, kŷ tóg ag tý kronkron kŷ kãgter ri ke nĩ, ag tý ũn mén (ka)mĕ ěn fi mré nŷ tý,” he tóg inh mŷ, Topĕ tý jĕnĕ jafã ti.

³ Kŷ Topĕ kuprĩg tóg inh krĩn mũ, kŷ sóg nĕn nĕ ve kŷ ga kórég ra tí mũ. Topĕ tý jĕnĕ jafã ěn vŷ inh pére tí mũ. Tá ũn týtã fi tóg nĩ nĩ. Fi mĕg tý mĩg kri fi tóg nĩ nĩ, hã ra tóg kusũg jĕ, fi mĕg ti. Vĕnh jygji tóg fi mĕg kri ránrán kŷ nýtí, kŷ tóg vĕnh kri tý rũm ke kŷ jĕ, vĕnh jygjy rágrã tý. Vĕnh jygjy ěn tóg Topĕ to vĩ kónãn kŷ nýtí. Fi mĕg vŷ ã pir ra krĩ tý 7 (ke) nĩ, nĩka tý 10 (ke) ti nĩ gé.

⁴ Ūn týtã ěn fi vŷ kur kusũg tu kŷ nĩ nĩ, kur kósóg pĕ. Ouro tu fi tóg nĩ gé, pó sĩnvĩ, pérola. Ouro tý copo mãn kŷ fi tóg nĩ nĩ. Hã ra tóg nĕn ũ kórég kar tý fór jĕ, nĕn ũ kavéj kar tý, copo ti. Fi tý vĕnh jykre pãno han mũ to ken hã vĕ.

⁵ Fi jiji vŷ fi kakã ki rán kŷ nĩ, ũ tóg ã vĩ ki fi jyjy tag mĕ ja tũ nĩ ver. Hã ra tóg: “Babilônia hã vĕ,” he mũ, fi jiji ti. “Ūn mág vŷ tý inh nĩ,” he tóg. “Ūn mén (ka)mĕ kar fag mŷnh vŷ tý inh nĩ, ũ tý nĕn ũ kavéj kar han tí ag mŷnh vŷ tý inh nĩ, ěprã, ag tý inh jykre han kŷ,” he tóg mũ, fi jyjy ti.

⁶ Hã ra fi tóg kron kŷ ter nĩ, fi tý ũ tý Topĕ ki ge kŷ nýtí ag kyvĕnh kron kŷ. Ū tý hĕn ri ke ag kãgtén ja ag tóg nĩgtĩ, Jesus tugrĩn, ag tý Jesus tovãnh sór tũ tugrĩn, hã ra fi tóg ag kyvĕnh kron kãn ja nĩ.

Inh mŷ tóg e tí, sŷ fi ve kŷ.

⁷ Kŷ Topĕ tý jĕnĕ jafã tóg inh mŷ: “mŷ ã mŷ e?” he mũ. “Nhŷ ã mŷ fi kãmén, fi mĕg tý mĩg ti ke gé, fi mĕg krĩ tý 7 (ke) ěn, fi mĕg nĩka tý 10 (ke) ěn,

fi tỹ kri nĩ jafã ěn ti,” he tóg, Topẽ tỹ jẽnẽ jafã ti.

8 “Fi męg tag vỹ vãsỹ ję ja nĩgtĩ. Ũri tóg ki tũ nĩ, hã ra tóg kãnhmar nũgme tá kãkutęnh ke mũ, Topẽ tỹ ti kókén pę han ję. Kỹ tóg ěprã ke ag mỹ e tĩnh mũ, ag tỹ fi męg tag venh ken kỹ, ũn jygjy tỹ Topẽ livro ki rãn kỹ nỹtĩ tũ ag mỹ. Topẽ tỹ nén (ũ) kar han to hã tóg ag rãn ja tũ nĩ, kỹ ag tóg rĩnrĩr ke tũ nỹtĩ. Ěn ag mỹ tóg e tĩnh mũ, ag tỹ fi męg tỹ mĩg ven kỹ. Vãsỹ tóg nĩ ja nĩgtĩ, kỹ tóg ver ki tũ nĩ, hã ra tóg kejẽn kãtĩg mãn ke mũ ha.

9 Topẽ tỹ ũn kanhrãn mũ ěn ag hã vỹ fi męg to jykrén ke mũ. Ti krĩ tỹ 7 (ke) vỹ tỹ pãnónh tỹ 7 (ke) nỹtĩ. Pãnónh ěn kri fi tóg nĩ nĩ, ũn tỹtã kórég ěn fi. Pã'i tỹ 7 (ke) to ke vę gé, hã ra, ti krĩ tỹ 7 (ke) ěn ti.

10 Pã'i tỹ 5 (ke) vỹ hur tũg, ũn pir vỹ ũri nĩ nĩ, ũn pir ũ vỹ kar kỹ kãtĩg ke mũ gé. Ti kãtĩg ken kỹ tóg nĩg sĩ pę han ke mũ, ũ tỹ ěgno ěn ti.

11 Fi męg tag, ũ tỹ vãsỹ nĩ ja kar kỹ ũri kã nĩ tũ ěn vỹ tỹ pã'i ũ nĩ gé. Pã'i tỹ 8 he mũ vỹ tỹ ti nĩ. Pã'i tỹ 7 (ke) ěn mré ke vỹ tỹ ti nĩ gé. Topẽ vỹ ti tỹ tũ' henh ke mũ gé.

12 Ti nĩka tỹ 10 (ke) vỹ tỹ pã'i tỹ 10 (ke) nỹtĩ gé. Ěn ag vỹ ver kãmũ tũ nỹtĩ. Fi męg mré ag tóg tỹ pã'i nỹtĩnh ke mũ, hã ra ag tóg nĩg sĩ pę han ke mũ gé.

13 Jagnẽ mré ag tóg vęnh jykre pir han ke mũ, pã'i tag ag, fi męg ěn mré. Fi męg mỹ ag tóg vęnh vin ke mũ.

14 Cordeiro ěn kato ag tóg vãsãnsãn ke mũ. Hã ra cordeiro tóg ag tỹ hęn ri kenh ke mũ, ti mré ke ag mré, ũ tỹ ti tovãnh ja tũ ag mré, ũn kupręg kỹ nỹtĩ ag mré. Kỹ cordeiro ěn vỹ tỹ pã'i kar kri ke ję. Pã'i mág ag kar kri tỹ pã'i ti ję mỹr,” he tóg inh mỹ, Topẽ tỹ jẽnẽ jafã ti.

15 Kỹ tóg inh mỹ: “goj ve ja ã nĩ gé,” he mũ. “Goj ěn tá fi tóg nĩ, ũn tỹtã kórég ěn fi. Povo kar to ken hã vę, hã vỹ: goj, he mũ, ěprã ke kar to ken hã vę, nação kar to ken hã vę, vyrmỹ vĩ nỹtĩ ag kar to ken hã vę gé, hã vỹ: goj, he mũ,” he tóg.

16 “Kỹ fi męg vỹ ti nĩka tỹ 10 (ke) ěn mré (tóg) fi to kórég tãvĩ nỹtĩnh ke mũ. Fi tũ kunũnh kãn ję ag tóg ke mũ, fi kur mré hã, kỹ fi tóg kator nĩnh ke mũ, ũn kórég ěn fi. Fi nĩ ko ję ag tóg ke mũ gé, kỹ ag tóg fi pũn ke mũ gé.

17 Ag tỹ ki kagtũg ra Topẽ tóg ag krĩn tĩ, ag vatánh tá, kỹ ag tóg Topẽ tỹ ag mỹ fi to vęnh jykre nĩv ěn hã han tĩ. Topẽ tỹ ag krĩn kỹ ag tóg jagnẽ mré vęnh jykre pir hã han tĩ, kỹ ag tóg fi męg mỹ vęnh vin tĩ gé, pã'i tỹ 10 (ke) ěn ag. Gen kỹ ag tóg nén kar kãnkãn ke mũ ěn pétęm ke mũ, Topẽ tỹ vãsỹ tó ja ěn kar ti,” he tóg, Topẽ tỹ jẽnẽ jafã ti.

18 “Kỹ ũn tỹtã kórég ěn fi, ã tỹ ũn vęg mũ ěn fi vỹ tỹ cidade mág ěn nĩ. Ěprã pã'i kri ke kar fi nĩ,” he tóg inh mỹ, Topẽ tỹ jẽnẽ jafã ěn ti.

Babilônia tŷ tũ' he

¹ Kar kŷ sóg Topě tŷ jěně jafā ū vég mŷ gé. Kanhkā tá tóg kátére mŷ. Tar pě tóg jě, jěngrě tóg jě gé, kŷ ti jěngrě tóg kurā han mŷ, ěprā, Topě tŷ jěně jafā ěn ti.

² Ěn vŷ prěr mŷ. “!..Kókén kŷ ti nŷ ha..!” he tóg mŷ, prěr kŷ. “!..Babilônia vŷ kókén kŷ nŷ, cidade mág ěn ti..!” he tóg. “!..Japo ag, vėnh jagrě kórég ag vŷ tá ěmā nŷtŷ ha..! Jěsŷ kavěj kar, sěsŷ kórég kar vŷ tá nŷtŷ ha, cidade jy ró ěn kāmŷ..!”

³ Ěprā ke kar vŷ cidade ěn jykre han ja nŷgte..! Kŷ tóg ag tŷ ū mré nŷ kónān ěn ri ke ne..! Vinho kron mág ri ke ti ne..! cidade ěn jykre ti..! Ěprā pā'i ag vŷ tá vėnh jykre han ja nŷgte..! Kŷ tóg ūn tŷtá kórég fi mré nŷ ri ke nŷ, ag jykre kórég ti..! Nén ū vender he tŷ ag vŷ cidade ěn tugrŷn rico nŷtŷ ja nŷgte..! tá ke ag tŷ rico tāvŷ ja nŷtŷn ká..! Hā ra tóg kókén kŷ nŷ ha..!” he tóg, prěr kŷ, Topě tŷ jěně jafā ti.

⁴ Kŷ sóg kanhkā tá vėnh vŷ ū měg mŷ gé, ū tŷ Topě ki ge kŷ nŷtŷ ag mŷ tóg: “mŷ jé ha,” he mŷ, ū tŷ kanhkā tá vŷ mŷ ěn ti. “Cidade tá kāpamŷnŷ, ke tũ nŷ mŷ ra ājag tóg ag mré Topě vŷ mranh ke mŷ, kŷ Topě tóg ag mré ājag vóg kónān ke mŷ gé, ti tŷ cidade kókén ken kŷ,” he tóg, ū tŷ kanhkā tá vŷ mŷ ti, ū tŷ Topě ki ge kŷ nŷtŷ ag mŷ. Cidade ěn kókén ke to hā tóg ag mŷ tó mŷ.

⁵ “Topě vŷ ag jykre pāno ve kān, kŷ tóg kā jatu tũ nŷ. Ag tŷ Topě vŷ mranh vŷ e tāvŷ nŷtŷ,

kŷ ti pānŷ tóg kanhkā pétēm mŷ, ag tŷ Topě vŷ mranh pānŷ ti.

⁶ Ag tŷ ājag mŷ nén han ja ěn ri ke han nŷ, ag mŷ,” he tóg, ū tŷ Topě ki ge kŷ nŷtŷ ag mŷ. “Ag tŷ ājag mŷ ti kórég pir han kŷ ag mŷ ti kórég régre han nŷ, vėnh kato. Ājag mŷ ag tóg ti kron jafā kórég ven ja nŷ. Ag mŷ ti kron jafā kórég ven régrég nŷ.

⁷ Sŷnvŷ ja ag nŷtŷ, tŷ nén ū mág ja ag nŷtŷ. Ag jagtar han nŷ, ag sŷnvŷ tag to. Ag jagtar han nŷ, ag tŷ nén ū mág tag to, ū tŷ nén ū mág tũ ag jagtar han nŷ gé, ag mré. “Ūn mág vŷ tŷ ěg nŷtŷ,” he ag tóg mŷ. “Ū pi(jé) ěg jagtar han ke mŷ,” he ag tóg mŷ.

⁸ Hā ra ag tóg vāhā venh ke mŷ, ag jagāgtar ke ti, ag vėšŷrénh ke ti, ag vānhprāg ti, kŷ tóg ag tŷ vėnh kaga jagy han ri ke nŷ sir. Kurā pir ki ag tóg tag ve kān ke mŷ, kŷ ag tóg pŷ ki kāgter ke mŷ. Topě hā vŷ ag vóg kónān ke mŷ, pā'i mág ti. Tar pě ti jě nŷ mŷr, Topě ti,” he tóg, ū tŷ kanhkā tá vŷ mŷ ti, ū tŷ Topě ki ge kŷ nŷtŷ ag mŷ.

⁹ Kŷ ěprā pā'i ag vŷ venh ke mŷ, cidade nŷja ti. Cidade ki ke ag mré tóg ag mŷ sér nŷ ja nŷgtŷ. Ag mré ag tóg nén (ŷ) kar vigve ja nŷgtŷ, kŷ tóg ag tŷ fag mré nŷ ri ke nŷ ja nŷ, ag tũ mág ěn ti. Cidade pŷr nŷja ve jé ag tóg ke mŷ ha, kŷ ag tóg fŷnh mŷ, jagtar ke mŷ.

¹⁰ Kuvar há tá ag tóg nŷtŷnh ke mŷ, ag kaně jur kŷ, ag tŷ cidade ki ke ag vānhprāg jagy mě kŷ. Kŷ ag tóg jagtar kŷ:

“jagy tãvĩ tóg tí,” henh ke mũ sir, pã'i ag. “Éhé tãvĩn ja ti nĩ, cidade tỹ Babilônia tag ti, tar pẽ ja ti nĩ. Hã ra ag tóg hora pir ki ti kókén kãn,” he jé ag tóg ke mũ, pã'i ag.

11 Kỹ nén (ũ) vender he nỹtĩgtĩ ag vỹ jagtar kỹ fỹnh ke mũ gé, cidade tũ to. Tá ag tóg nén (ũ) tỹ hẽn ri ke ve ja nĩgtĩ,

12 ouro ti, prata ti, pó sĩnvĩ ti, pérola ti, pyrfé tỹ kur ti, kur tỹ seda ti, kur kusũg ti, kur kusũg sá ti, ka kaja e ti, elefante jã tỹ nén han mũ ti, ka sĩnvĩ tỹ nén han mũ ti, ferro tỹ nén han mũ ti, ferro kusũg tỹ nén han mũ ti, pó tỹ mármore tỹ nén han mũ ti,

13 canela ti, vễjẽn ger há ti, ka jẽnjo pũn kỹ ger há tỹ incenso ti, ka jẽnjo pũn kỹ ger há tỹ mirra ti, vẽnh mĩ tĩn jafã ti, vinho ti, azeite ti, farinha ti, trigo ti, monh ti, carneiro ti, cavalo ti, carroça ti, ùn gré ag, ùn tỹtã fag mré hã. Tag kar tỹ ag tóg negocio hyn han tĩ ja nĩgtĩ, vender he nỹtĩgtĩ ag, hã ra tóg tũ tĩ ha.

14 Kỹ nén ù vender he nỹtĩgtĩ ag tóg jagtar kỹ tag tónh ke mũ, ha mẽ. “Nén kar ve ja ẽg tóg nĩgtĩ, cidade tá, kỹ tóg ẽg mỹ sér nĩ ja nĩgtĩ. Riqueza ẽn tóg tũ' he kãn. Û tóg nén kar ẽn to én mãn ke tũ nĩ ha. Ve mãn ke tũ ẽg tóg nĩ ha, nén (ũ) kar ẽn ti,” he jé ag tóg ke mũ, nén (ũ) vender he nỹtĩgtĩ ag.

15 Kỹ ag tóg kuvar há tá nỹtĩnh mũ. Cidade ẽn tá negocio han to ag tóg vẽnh han ja nĩgtĩ, hã kỹ tóg ag mỹ e tĩ. Tãtã

nỹtĩn kỹ ag tóg jũrũn ke mũ, ag tỹ cidade tá ke ag jagãgtar ve kỹ. Fỹ jé ag tóg ke mũ, vễsỹrẻnh jé ag tóg ke mũ.

16 Kỹ ag tóg: “jagy tãvĩ tóg nĩ,” henh ke mũ. “Hã tãvĩ ja ag nỹtĩ, cidade tag ki ke ja ag. Kur sĩnvĩ rĩnh ja ag tóg nỹtĩ, pyrfé tỹ kur, kur kusũg, kur kusũg sá. Ouro rĩnh ja ag tóg nỹtĩ, pó sĩnvĩ, pérola.

17 Hora pir ki ag tóg tũ' he kãn ja nĩ, ag tỹ nén (ũ) kar mré hã,” he jé ag tóg ke mũ gé, nén ù vender he nỹtĩgtĩ ag.

18 Kỹ barco to pã'i ag vỹ nỹtĩnh ke mũ gé, goj kri mũ mũ kar ag, barco ki rĩr tĩ kar ag, ù tỹ goj kri rãnrãj mũ kar ag ke gé. Tãtã nỹtĩ kỹ ag tóg cidade nĩja ẽn ve kỹ (ag tóg) prẻnprẻr mũ sir. “Cidade ẽn ri ke ve mãn ke tũ ẽg tóg nĩ ha,” he jé ag tóg ke mũ.

19 Kỹ ag tóg ga funfur tỹ vẽnh kri vãm ke mũ sir, ag mỹ e tĩn kỹ. Fỹ jé ag tóg ke mũ, vễsỹrẻnh jé ag tóg ke mũ. “Jagy tãvĩ tóg tĩ,” he jé ag tóg ke mũ. “Hã tãvĩ ja ag nỹtĩ, cidade tag ki ke ja ag. Vẽnh kar vỹ ag tũ mãn kỹ vẽnh hyn han ja nĩgtĩ, ù tỹ barco kãmĩ goj kri mũgtĩ ag. Kỹ tóg jagy tãvĩ tĩ. Hora pir ki tóg tũ' he kãn ja nĩ,” he jé ag tóg ke mũ gé, goj kri mũgtĩ ag.

20 “Kanhkã tá nỹtĩ kar'. Mỹ sér nỹtĩmnĩ. Topẽ ki ge kỹ nỹtĩ kar', mỹ sér nỹtĩmnĩ. Apóstolo kar', Topẽ vĩ tó tĩ kar', mỹ sér nỹtĩmnĩ. Tũ' he kãn ag huri, cidade ẽn tá ke kar ag. Topẽ vỹ hur ag vóg kónãn, ag tỹ ảjag vóg kónãn ja tugrĩn.”

21 Kÿ Topě tÿ jěně jafā tar ũ tóg pó mág vāg mŭ. Kra tÿ pó ri ke ti nĭ, pó mág ěn ti. Kÿ tóg goj nig ki ti fón mŭ, jŭ kÿ, kÿ tóg: “isÿ pó fón mŭ tag ri ke ti nĭnh mŭ, cidade tÿ Babilônia kókén ti,” he mŭ. “Kókén kân kÿ tóg nĭ. Ũ tóg ti ve măn ke tŭ nĭ ha, cidade ti.

22 Kāki ag tóg harpa kyn măn ke tŭ nÿtĭ ha, tÿnh măn ke tŭ ag nĭ ha, vãn tÿ vākÿr ěn kyn măn ke tŭ ag nĭ ha, trombeta ti ke gé. Vākÿr mẽ măn ke tŭ ěg nĭ ha, cidade tÿ Babilônia tá. Ũ tóg ki rānhrāj măn ke tŭ nĭ ha, ũ tóg ki nĭ măn ke tŭ nĭ ha. Ũ tóg ki tynyn măn ke tŭ nĭ gé.

23 Ũ tóg ki lampião grug măn ke tŭ nĭ ha. Ũ tóg ki vĕnh prŭg to festa han măn ke tŭ nĭ gé. Há tāvĭ ja ag nÿtĭ, tá nén (ŭ) kar vender he nÿtĭgtĭ ěn ag, kÿ vĕnh kar vÿ ag vĭ jĕmĕ ja nĭgtĭ. Povo kar krĭn kónān ja ag tóg nĭgtĭ, kujá tÿ ěg mÿ ón tĭ ěn ri ke han ja ag tóg nĭgtĭ.

24 Topě vĭ tó tĭ ag kăgtén ja ag tóg nĭgtĭ, cidade ěn tá ke ag, Topě ki ge kÿ nÿtĭ ag kăgtén ja ag tóg nĭgtĭ. Ěn hā tá tóg vĕnh ven ja nĭ, ag tÿ ũn kăgtén mŭ kyvĕnh kar ti. Hā kÿ ag tóg ag kar kyvĕnh kajām kân ke mŭ,” he tóg mŭ, Topě tÿ jěně jafā tar ěn ti.

19

1 Kÿ sóg kanhkā tá nén ũ mẽg mŭ gé sir, hā ra tóg ũ tÿ hĕn ri ke ag jān mẽg nĭ. Jān kÿ ag tóg cidade ěn to tag tó mŭ, ha mẽ. “Topě mÿ vĭ há han nĭ. Topě ne ěg krenkren han

ki kanhró nĭ'. Ti hā ne tÿ ũn mág nĭ'. Ti hā ne tar jĕ'.

2 Ti tÿ nén han mŭ vÿ kuryj kar nÿ. Ũn tÿtá kórég ěn fi vóg kónān tóg huri. Ěprā ke kar kókén ja fi tóg nĭ, fi jÿkre pāno tÿ. Topě vÿ fi vóg kónān, fi tÿ ti rānhrāj han tĭ ag kăgtén ja nĭn kÿ,” he ag tóg, kanhkā tăn ag, cidade tÿ Babilônia to.

3 Kÿ ag tóg jān măn kÿ tag tó mŭ gé, ha mẽ. “Topě mÿ vĭ há han nĭ. Cidade ěn pŭr nĭja vÿ kanhkā ra tăpÿr mŭ. Tŭ' hĕnh ke tŭ ti nĭ, nĭja ěn,” he ag tóg mŭ gé, jān kÿ, kanhkā tăn ěn ag.

4 Kÿ kófa tÿ 24 (ke) ěn ag tóg mŭg ke kân mŭ, nén nĕ tÿ 4 (ke) ěn ag mré hā. Topě mÿ ag tóg: “Topě vÿ tÿ ā nĭ,” he mŭ, ũ tÿ nĭgja sĭnvĭ kri nĭ ěn mÿ. Kÿ ag tóg: “hā vĕ,” he mŭ gé. “Topě mÿ vĭ há han nĭ,” he ag tóg mŭ, jamā hár(a).

Cordeiro vĕnh prŭg

5 Kÿ nĭgja sĭnvĭ ěn tá vĕnh vĭ tóg mẽ há tĭ gé. “Ũ tÿ Topě mÿ rānhrāj tĭ',” he tóg. “Ũ tÿ Topě kamĕg tĭ',” he tóg. “Ũn mág',” he tóg. “Ũn kāsir',” he tóg. “Topě mÿ vĭ há han, ājag kar,” he tóg, vĕnh vĭ ěn ti.

6 Kÿ sóg ũ tÿ hĕn ri ke ag jān mẽg mŭ gé. Tÿ tóg sa krog vĭ mẽ tĭ, tÿ tóg ta tÿ tÿrÿr he mẽ tĭ gé, ag jān ti. Jān kÿ ag tóg tag tó mŭ, ha mẽ. “Topě mÿ vĭ há han nĭ,” he ag tóg. “Ũ tÿ nén ũ kar han ki kanhró nĭ ěn tóg tÿ pā'i mág pĕ jĕ, ěg pā'i mág ti, Topě ti.

7 Kÿ tóg ěg mÿ sér tāvĭ tĭ. Vĭ sér han jĕ ěg tóg ke mŭ ha. “Tÿ

ti ùn mág pē jē,” he jé ěg tóg ke mũ gé. “Cordeiro tỹ vāhā prũg ke nē ha. Ti prũnh ke fi vỹ vēnh kãn huri.

⁸ Ā kur kupri ěn tu kỹ fi tóg jē nĩ, fi kur jēngrē ěn,” he ag tóg, ùn e ag, jãnjan kỹ. Fi jykre tãg to ken hã vē, hã vỹ: fi kur kupri jēngrē, he mũ, fi tỹ Topē jykre há ěn han kỹ nĩ hã vē. Ũ tỹ Topē ki ge kỹ nỹtĩ kar ag to ken hã vē, hã vỹ: cordeiro prũnh ke, he mũ.

⁹ Kỹ Topē tỹ jēnē jafã tóg inh mỹ: “inh vỹ tag rãn nĩ,” he mũ. “Ũ tỹ hēn ri ke ag tóg cordeiro prũg tỹ festa konh ke mũ. Topē vỹ ũ tỹ ti festa ko mũ ag kar ve há han mũ,” he tóg. Kỹ tóg: “Topē tỹ tón hã vē,” he mũ gé. “Hã ra Topē tóg ón vānh nĩgtĩ,” he tóg, Topē tỹ jēnē jafã ti.

¹⁰ Kỹ sóg ti krēm mũg ke mũ, sỹ ti mỹ: “Topē vỹ tỹ ã nĩ,” he jé. Hã ra tóg inh mỹ: “ke tũg ra,” he mũ, Topē tỹ jēnē jafã ěn ti. “Topē mỹ rãnhrãj han jafã vỹ tỹ inh nĩ, ã ri ke, ã kanhkã ag ri ke, ũ tỹ Jesus tỹ ki hã tó mũ ki króm mũ ěn ag kar ri ke sóg nĩ, Topē rãnhrãj han kỹ,” he tóg. “Topē hã mỹ: Topē vỹ tỹ ã nĩ, hemnĩ,” he tóg inh mỹ, Topē tỹ jēnē jafã ěn ti.

Topē vỹ tó tĩ ag vỹ Jesus tỹ ki hã tó mũ ěn hã kãmén tĩ.

Ũ tỹ cavalo kupri kri nĩ

¹¹ Kỹ sóg kanhkã róm kỹ nỹ vég mũ. Cavalo kupri vỹ tá jē nĩ. Ũ tỹ ti kri nĩ jyjyn hã vỹ: “ùn ón vānh,” he mũ. “Ũ tỹ nén (ũ) há to krónh ke vānh,” he tóg mũ gé, ti jiji ti. Ti hã

vỹ jykre kuryj nĩ, ũ tỹ cavalo kupri kri nĩ ěn ti, kỹ tóg ki hã tó tĩ gé. Nén ũ há hã to tóg vāsãn ti gé.

¹² Ti kanē vỹ tỹ pĩ gru ve nĩ. Ti krĩ tógfĩ vỹ e nỹtĩ. Ti kri ti jyjy tóg rãn kỹ nĩ, hã ra ũ pi(jé) ti jiji ki kanhró nỹtĩ'. Ti hã vỹ ã pir mỹ ã jyjy ki kanhró nĩ'.

¹³ Ti kur vỹ kyvénh nĩ. Ti to ag tóg: “Topē vỹ,” he tĩ.

¹⁴ Kanhkã tá soldado ag tóg ti nón kãmũ mũ. Cavalo kupri kri ag tóg kãmũ mũ, kanhkã tân ag, ti soldado ag. Kur kupri rĩnh kỹ ag tóg kãmũ mũ.

¹⁵ Ũ tỹ ag jo tĩ mũ ěn jēnkã tá rógro jã rēgre tóg kãkutē mũ. Rógro tag tỹ tóg povo kar ag tỹ hēn ri kenh ke mũ. Tỹ ag kri jē kỹ tóg vēnh jykre tar han ke mũ, ag to. Uva jēgmĩ jafã tá tóg jēgmĩnh ke mũ, uva ti, hã vỹ: Topē tỹ vēnh kar to jũ jagy han mũ, he mũ, hã vỹ: uva jēgmĩ, he mũ.

¹⁶ Ti kur ki tag tóg rãn kỹ nĩ, ha mẽ. “Pã'i kar ag kri pã'i,” he tóg, vēnh rãn ki. “Ũn mág kar ag kri ke,” he tóg mũ gé, vēnh rãn ki. Ti kre ki tóg rãn kỹ nĩ gé.

¹⁷ Kỹ sóg Topē tỹ jēnē jafã ũ vég mũ gé. Rã kri tóg jē nĩ. Kỹ tóg sēsĩ kar jé prēr mũ, jēsĩ tỹ kanhkã krēm tēgtē tĩ ag kar. Jamã hár(a) tóg ag mỹ: “!..kuneg.!” he mũ. “!..Vēnh mãn kãmũ jeg..!” he tóg. “!..Topē tỹ festa konh kãmũ jeg..!”

¹⁸ Pã'i kãgter konh kãmũ jeg..! Soldado to pã'i ag, soldado ag, cavalo ag, ũ tỹ cavalo kri mũgtĩ ag, ũ tỹ tỹ ca-

marada nýtĩ ag, ag patrão ag, ùn mág ag, ùn kāsir ag, ěprã ke kar ag kãgter mũ nĩ konh kãmũ jeg..!" he tóg, Topě tỹ jěně jafã ti, sēsĩ ag kar jé prěr kỹ.

¹⁹ Kỹ sóg goj kátã mĩg ěn ve mãn mũ gé, ěprã pã'i kar ag ke gé, ag soldado ag mré hã. Věnh mãn kỹ ag tóg nýtĩ, ag tỹ ù tỹ cavalo kupri kri nĩ ěn kato vãsãnsãn jé, ag tỹ ti krěm ke ag kato vãsãnsãn mág han jé.

²⁰ Kỹ ag tóg mĩg ěn ség mũ, ù tỹ ón kỹ Topě vĩ tó tĩ ěn ag mré hã, ù tỹ mĩg rĩnve nén ve vãnh tỹ hěn ri ke hyn han ja ěn ti. Ti tỹ milagre hyn han tigrĩn ù tỹ hěn ri ke ag tóg ti vĩ kri nĩm ja nĩgtĩ. Ti tỹ ag krĩn kónãn hã vĕ, ù tỹ ti rá tỹ ránrãn kỹ nýtĩ kar ag, ù tỹ ti kãggrã to: "Topě vĕ," he mũ kar ag. Kỹ ù tỹ mĩg ěn ség mũ ag tóg pĩ gru fir ki ti fón mũ, pĩ mág pĕ ki, ù tỹ ón kỹ Topě vĩ tó tĩ ěn mré hã. Ag rĩnrĩr hã ra ag tóg pĩ grug fir ěn ki ag vãm mũ, ag sigse kỹ. Pó tỹ enxofre pũr nĩja ěn ki ag tóg vãm mũ, vãn pũr nĩja ri ke ěn ki.

²¹ Ag soldado ag kãgtén ag tóg mũ gé sir, rógro tỹ, rógro tỹ ù tỹ cavalo kupri kri nĩ ěn jěnkã tá kãkutĕ mũ ěn ti. Kỹ jĕsĩ kar ag tóg vĕnh fãn mũ sir, ùn kãgter mũ ag nĩ kon kỹ.

20

Satanás tỹ prỹg tỹ mil (ke) ki se kỹ jĕ

¹ Kỹ sóg Topě tỹ jěně jafã ù vĕg mũ gé sir. Kanhkã tá tóg kãtĕre mũ, Topě tỹ jěně jafã ti.

Nũgme jãnkã nĩfĕnh jafã vyn kỹ tóg kãtĕre mũ, ti chave ti. Ferro tỹ corrente vãg tóg mũ gé.

² Ěn vỹ mĩg fĕr ěn ség mũ, hã vỹ: pỹn ve tỹ ùn ve fag krĩn kónãn mũ, he mũ, hã vỹ: Japo, he mũ, hã vỹ: Satanás, he mũ, mĩg fĕr ěn ti. Ěn se kỹ tóg ferro tỹ ti mrĩnh mũ sir. Kỹ tóg se kỹ jĕ nĩ, prỹg tỹ mil (ke) ki.

³ Nũgme ki tóg ti fón mũ sir, mĩg fĕr ti tỹ, Topě tỹ jěně jafã ěn ti, kỹ tóg nũgme jãnkã nĩfĕnh há han mũ sir, chave tỹ. Kỹ mĩg fĕr ěn tóg povo ag krĩn kónãn mãn ke tũ nĩ ha ver, prỹg tỹ mil (ke) ki. Prỹg tỹ mil (ke) tag tỹ tũ' hen kỹ ag tóg ver ti kavãn sĩ han mãn ke mũ, mĩg fĕr ti.

⁴ Kỹ sóg nĩgja sĩnvĩ tỹ hěn ri ke vigvĕg mũ. Û tỹ kri nĩgnĩg kỹ nýtĩ ag vỹ tỹ pã'i nýtĩ, ag tỹ vĕnh kar jykre tugnỹm ke to pã'i. Kỹ sóg ěprã ke kuprĩg tỹ hěn ri ke ag vigvĕg mũ gé, ag tỹ ùn kãgtén ja ěn ag kuprĩg. Ag tỹ vĕnh kar mỹ Jesus kãmén ja tigrĩn ag tóg ag kãgtén ja nĩ, ag tỹ Topě vĩ tó tigrĩn. Mĩg ěn to ag tóg: "Topě vĕ," he ja tũ nĩgtĩ, ti kãggrã to ke gé. Mĩg rá ěn tỹ ag tóg vĕnh rán ja tũ nĩ gé, ag kakã ki, ag nĩgé pãnĩ ki ke gé. Ěn ag vỹ tỹ Cristo mré pã'i nýtĩnh ha, prỹg tỹ mil (ke) ěn ki.

⁵ Vĕser ù ag vỹ ver rĩnrĩr mãn ke tũ nĩ. Prỹg tỹ mil (ke) ěn tỹ tũ' hen kỹ ag tóg kejĕn rĩnrĩr mãn kãn ke mũ. Û tỹ Cristo mré tỹ pã'i nýtĩ tag ag vỹ rĩnrĩr vĕn ke mũ.

⁶ Û tỹ rĩnrĩr vĕn mũ mỹ tóg

vĩ há han ke mũ, Topê ti. Topê tũ vỹ tỹ ag nỹtĩ. Kãgter mãn ke tũ ag tóg nỹtĩ ha. Topê tũ ki rĩr jé ag tóg ke mũ, Cristo tũ ki ke gé. Prỹg tỹ mil (ke) ki ag tóg tỹ pã'i nỹtĩnh mũ, Cristo mré hã.

Satanás kutê

⁷ Kejen prỹg tỹ mil (ke) ên tóg tũ' he mũ. Kỹ ag tóg Satanás ên kavãn sĩ han mãn ke mũ.

⁸ Kỹ tóg tĩ mũ, povo tỹ Gogue ag mré Magogue ag krĩn kónãn jé, tãtã, ga fyr tá, Satanás ti. E tãvĩ ag nỹtĩ, goj fyr tá rỹnhřj ri ke ên ag, goj kafã tũ fyr tá rĩnhřj ri ke ên ag. Ag vênh mãn kãn han jé tóg ke mũ, Satanás ti.

⁹ Kỹ ag tóg tá kãmũ mũ, ùn e tãvĩ ên ag. Û tỹ Topê ki ge kỹ nỹtĩ ag kato ag tóg kãmũ mũ, cidade ên kato, Topê tỹ cidade to há nĩ ên kato. Ag tỹ ag tỹ tũ' he kãn sór vê. Hã ra pĩ tóg kanhkã tá kãtêre mũ, kỹ tóg ag kãgtén mũ. Û tỹ Topê ki ge kỹ nỹtĩ ag tỹ tũ' he sór mũ ên ag kãgtén tóg mũ, pĩ ti.

¹⁰ Japo ên, ù tỹ ag mỹ ón mũ ên fón pẽ han ag tóg mũ, pĩ grug fir ên ki, pĩ mág pẽ ên ki, pó tỹ enxofre pũr nĩja ên kãki, vãn pũr nĩja ri ke ên kãki. Gøj kãtã mĩg ên vỹ tá nĩ ha, pĩ grug fir ên kãkã, kar kỹ ón kỹ Topê vĩ tó tĩ ên ti ke gé. Pĩ grug fir ên kãki ag tóg nỹtĩ, tá kãpa mãn ke tũ pẽ ag tóg nỹtĩ ha. Tá ag jagtar tãvĩ nỹtĩ ha.

Vênh kar jykre tugnỹm ke kurã

¹¹ Kỹ sóg nĩgja mág pẽ vég mũ gé, nĩgja kupri. Û tóg kri nĩ nĩ. Ti rĩnve ga tóg tũ'

he mũ vãhã, kanhkã ti ke gé. Vênh ven mãn tũ tóg nỹtĩ ha, kanhkã mré ga ti.

¹² Kỹ sóg vêser kar vigvég mũ, ùn mág ag, ùn kãsir ag ke gé. Nĩgja kupri ên jo ag tóg nỹtĩ. Kỹ livro vỹ tá nỹtĩ gé. Livro ên kygvãg ag tóg mũ. Vênh kar jykre vỹ livro ên ki rãnrán kỹ nỹtĩ. Kỹ livro ù vỹ tá nĩ gé, ên kavãg ag tóg mũ gé. Û tỹ rĩr krỹg ja tũ venh ke mũ ag jygjy vỹ livro ên ki rãnrán kỹ nỹtĩ. Kỹ Topê tóg vêser kar jykre tugnỹm ke mũ, kỹ tóg ag mỹ ag tỹ nén venh ke mũ ti tónh ke mũ. Ag tỹ ãjag tỹ nén han ja kajãm ke vê, ag tỹ ãjag jykre tỹ livro ki rãnrán kỹ nỹtĩ ên kajãm kãn ke vê.

¹³ Û tỹ goj ki kãgter mũ ag vỹ tá nỹtĩ gé, ù tỹ vêser jamã tá nỹtĩ ag kar ti. Vênh kar vỹ tá nỹtĩ. Ag tỹ nén han mũ kar kajãm kãn jé ag tóg ke mũ ha.

¹⁴ Kỹ ù vỹ ter mãn ke tũ nĩ ha. Êg ter ke tag vỹ hur tũg. Û tỹ pĩ grug fir ên kãki vár ke tag ag vỹ kãgter ri ke han ke mũ, kỹ tóg ag kãgter pẽ han ri ke nĩ sir, ag tũg pẽ han tũ ra.

¹⁵ Kỹ ùn jygji rãn kỹ nỹtĩ tũ ên ag vỹ pĩ grug fir ên kãki vár kãn ke mũ, ùn jygji tỹ Topê livro ki rãnrán kỹ nỹtĩ tũ ên ag.

21

Kanhkã tãg mré ga tãg

¹ Kỹ sóg kanhkã tãg vég mũ gé, ga tãg ke gé. Kanhkã ve ên tóg hur tũg, ga ve ên ke gé, goj ti ke gé.

² Kỹ sóg Topê tỹ cidade tag, Jerusalém tãg tag vég mũ

gé. Kanhkā tá tóg kátére mũ, Topẽ tá, cidade tãg tag ti. Cidade s̃nvĩ han ja ag tóg nĩgtĩ, k̃y tóg ag t̃y tá vẽn prũg to festa han ke nĩ ve nĩ. Cidade s̃nvĩ tóg ùn prũnh ke fi s̃nvĩ ri ke nĩ, fi t̃y ã mén ke ti jãvãnh k̃y.

³ Nĩgja kupri ên tá vẽn vĩ tóg mẽ há tĩ, k̃y tóg: “Topẽ jamãh hã vễ,” he mũ. “Topẽ t̃y êprã ke ag mré êmãh hã vễ,” he tóg. “Ag mré tóg nĩ nĩ ha, ti tũ vỹ t̃y ag ñyťnh ke mũ ha. Topẽ vỹ ag mré ñnh mũ ha, k̃y tóg t̃y ag Topẽ nĩ sir.

⁴ Ag kanẽ var t̃y tũ' he kãn jé tóg ke mũ ha. Û tóg ter mãn ke tũ pẽ nĩ ha, hã k̃y ù tóg fe kaj nĩ mãn ke tũ nĩ gé, jagtar ke tũm, kaganh ke tũm. Tũg ti nĩ ha, vẽn jykre si kar ti. Vẽn ven mãn ke tũ ti nĩ ha, vẽn jykre si ti,” he tóg, vẽn vĩ ên ti.

⁵ K̃y ù t̃y nĩgja kupri kri nĩ ên tóg: “nén (ũ) kar han mãn jé sóg ke mũ ha,” he mũ. K̃y tóg inh m̃y: “inh vĩ tag rán nĩ,” he mũ gé. “S̃y ki hã tó vễ. Vẽn ven kãn jé tóg ke mũ, s̃y ã m̃y nén tó mũ tag ti,” he tóg.

⁶ K̃y tóg: “hỹ, vẽn ven kãn ti huri,” he mũ gé. “Ûn ve vỹ t̃y inh nĩ, k̃y sóg t̃y êgno nĩ gé. Is̃y nén (ũ) kar han to hã sóg nĩ nĩ, k̃y sóg nén (ũ) kar tũg mũ ra ñnh mũ gé. Û tóg goj kron sór mũ. Ên m̃y sóg goj ven tĩ, kaja tũ ra. Is̃y ti m̃y goj ven mũ ên vỹ ti ter tũ han ke mũ.

⁷ Û t̃y isovãnh tũ ên m̃y sóg ñm ke mũ, presente tag ti, ha mẽ: ti Topẽ vỹ t̃y inh ñnh mũ, k̃y tóg t̃y inh kósin ñnh mũ

gé,” he tóg inh m̃y, ù t̃y nĩgja kupri kri nĩ ên ti.

⁸ Hã ra ù ag tóg pĩ grug fir kãki, pĩ mág pẽ ên kãki vár ke mũ, hã vỹ: ùn mũmẽg (ka)mẽ ag, he mũ, ù t̃y isovãnh mũ ag, he mũ, ù t̃y vẽn jykre pãno t̃y vẽn kavénh tĩ ag, he mũ, ù t̃y ù tén tĩ ag, he mũ, ù t̃y ã prũ tũ fag mré ñygñy mũ ag, he mũ, ù t̃y ã mén tũ mré ñygñy mũ fag, he mũ, kujá ag, he mũ, curandeiro ag, he mũ, ù t̃y vẽn kãggrá jykre mĩ mũ mũ ag, he mũ, ùn ón mũ ag, he mũ gé. Pĩ grug fir ên kãki tóg ag vãm kãn ke mũ, pó t̃y enxofre pũr nĩja ên kãki, vãn pũr nĩja ri ke ên kãki. K̃y tóg ag kãgtén pẽ han ri ke nĩ sir,” he tóg, ù t̃y nĩgja kupri kri nĩ ên ti.

Jerusalém tãg

⁹ K̃y Topẽ t̃y jẽnẽ jafã ù tóg inh ki jun mũ, ù t̃y pénky kãkã nĩ ên t̃y ga kri ke ag vóg kónãh mũ ên ag kã ù. Inh m̃y tóg: “kunĩg,” he mũ. “Cordeiro prũnh ke fi venh kãtĩg,” he tóg inh m̃y.

¹⁰ K̃y Topẽ kuprĩg tóg inh krĩn mũ sir, k̃y sóg nén nẽ vэг mũ. Topẽ t̃y jẽnẽ jafã ên tóg inh pére tĩ mũ, pãnónh téj (gy) kri. Pãnónh kri jẽ k̃y tóg inh m̃y Topẽ t̃y cidade tãg ven mũ sir, cidade t̃y Jerusalém, he mũ tag ti, ù t̃y kanhkã tá kátére mũ tag ti, Topẽ tá.

¹¹ S̃nvĩ pẽ tóg nĩ, Topẽ s̃nvĩ ên ri ke ti nĩ, kókov tóg nĩ gé, pó t̃y jaspe kókov ri ke. Pó t̃y tonh vỹ t̃y ti nĩ, jaspe ti, k̃y tóg pó kókov fĩn êvãj ên ri ke nĩ.

¹² Cidade jy ró tóg téj gy nỹ, vënh ra hã tóg téj gy jẽ gé. Ró ki jãnkã tỹ 12 (ke) vỹ nỹtĩ. Kỹ Topẽ tỹ jëgnẽ jafã tỹ 12 (ke) ag vỹ ki rĩr nỹtĩ, jãnkã ki. Ki vënh jygjy tóg ránrán kỹ nỹtĩ, jãnkã ki, Israel jóg'jóg ve tỹ 12 (ke) ên ag jygji ti.

¹³ Rã jur ja kãtã tóg jãnkã tãgtũ nĩ. Rã pur ja kãtã tóg jãnkã tãgtũ ù nĩ gé, kanhkã tãpér kãtã tóg jãnkã tãgtũ ù nĩ gé, kanhkã tãpér ù kãtã tóg jãnkã tãgtũ ù nĩ gé.

¹⁴ Pó tỹ 12 (ke) kri tóg hyn han kỹ nĩ nĩ, cidade ti. Pó ên ki vënh jygjy tóg ránrán kỹ nỹtĩ gé, apóstolo tỹ 12 (ke) ên ag jygji ti, cordeiro tũ ên ag jygji ti.

¹⁵ Kỹ ù tỹ inh mré vĩ mũ ên, Topẽ tỹ jënẽ jafã ên tóg ti kãmun jafã vyn kỹ jẽ nĩ, ti kãmun jafã tỹ ouro ti. Kỹ tóg cidade kãmun sór mũ, cidade jy ró ti, ti jãnkã ti ke gé.

¹⁶ Péno tỹ 4 (ke) ti nĩ, cidade ti, kỹ ti tãpér vỹ ti téj ri ke nĩ. Kỹ Topẽ tỹ jënẽ jafã ên vỹ kãmun mũ sir, cidade ti, ti kãmun jafã tỹ. Quilômetro tỹ 2 mil kri 200 (ke) ti nĩ, ti tỹ téj e kỹ nỹ ki, ti tãpér ki ke gé, ti tỹ vënh ra jën ke gé. Vënh ri ke kar ti nĩ, ti kãmur ti.

¹⁷ Kỹ tóg cidade jy ró ên kãmun mũ gé. Ti tãpér vỹ metro tỹ 64 (ke) nĩ. Metro tag vỹ tỹ êprã ke ag kãmun jafã nĩ, hã ra Topẽ tỹ jënẽ jafã vỹ kãmun mũ, êprã ke ag kãmun jafã tỹ.

¹⁸ Ró vỹ pó tỹ tonh tỹ jaspe tỹ han kỹ nỹ. Kỹ cidade vỹ ouro tỹ han kỹ nĩ, hã ra tóg fĩn

êváj nĩ, vidro fĩn êváj ri ke.

¹⁹ Cidade jy ró tóg pó tỹ tonh mág kri han kỹ nĩ. Pó ên to pó tỹ tonh ù tóg nỹtĩ gé, ùn e ag. Pó tỹ tonh mág ù tóg tỹ jaspe nĩ, kỹ ù tóg tỹ safira nĩ, kỹ ù tóg tỹ ágata nĩ, jo ù tóg tỹ esmeralda nĩ,

²⁰ jo ù tóg tỹ sardônio nĩ, jo ù tóg tỹ sárdio nĩ, ù tóg tỹ crisólito nĩ, ù tóg tỹ berilo nĩ, ù tóg tỹ topázio nĩ, ù tóg tỹ crisópraso nĩ, ù tóg tỹ jacinto nĩ, ù tóg tỹ ametista ní gé. 12 (ke) ti nỹtĩ, pó mág ti.

²¹ Kỹ ti jãnkã tỹ 12 (ke) vỹ pérola tỹ hyn han kỹ nỹtĩ. Jãnkã pir vỹ pérola pir nĩ mỹr, ha mẽ. Kỹ êpry mág ên, êmĩn mág ên vỹ ouro tỹ han kỹ sa, hã ra tóg fĩn êváj nĩ, vidro fĩn êváj ri ke.

²² Hã ra sóg Topẽ jo ìn vég tũ nĩ, cidade ên tá. Topẽ vỹ vënh kar kri nĩ, kỹ tóg nén (ũ) kar han ki kanhró nĩ gé. Topẽ hã vỹ cidade ên tá êmã nĩ, cordeiro ti ke gé, hã kỹ tóg tá ag jo ìn tũ nĩ.

²³ Kỹ rã tóg tá tũ nĩ gé, kysã ke gé. Topẽ tỹ jëngrẽ vỹ ki kurã han tĩ, kỹ tóg tá kutyg vãnh nĩ sir. Cordeiro ên vỹ cidade ên tá rã ri ke nĩ.

²⁴ Kỹ vënh kar tóg Topẽ tỹ cidade ki jëngrëg ên tugrĩn êvãnh há han tĩ, povo kar ag. Êprã pã'i kar ag vỹ ãjag tỹ nén (ũ) kar gé kãmũnh mũ, ag tỹ tá vin han jé.

²⁵ Jãnkã vỹ nugnón kỹ nỹtĩ, kurã kar ki. Kutyg tũ nĩn kỹ ag tóg jãnkã nĩgfhnh tũ nĩgfi.

²⁶ Povo kar ag vỹ ãjag tỹ nén (ũ) gé kãmũnh ke mũ, cidade

ên mĩ.

²⁷ Hã ra nén ù kórég vỹ kārānh ke tũ pẽ nĩ. Û tỹ vãnh jykre pāno han mũ ag vỹ rã genh ke tũ nĩ, ùn ón mũ ag ke gé. Ûn jygji tỹ livro ki ránrán kỹ nỹtĩ ên ag hã vỹ ra genh ke mũ. Û tỹ rĩr krỹg ja tũ vég mũ ên ag jygjy vỹ ránrán kỹ nỹtĩ, cordeiro tỹ livro ên ki.

22

¹ Kỹ Topẽ tỹ jẽnẽ jafã tóg inh mỹ goj mág ven mũ. Goj ên vỹ êg rĩnrĩr han tĩ. Kómkóm ke ti tĩ, goj ên ti, pó kupri fĩn êváj tỹ kómkóm ke ên ri ke, goj ti. Goj ên nĩhỹg vỹ Topẽ nĩgja tá nĩ, cordeiro nĩgja ên tá.

² Kỹ tóg cidade kuju mĩ tĩ mũ, êpry mág jagma, êmĩn mág ên jagma, goj ti. Ti fyr tá ka tóg nỹtĩ, ti fyr ù tá ke gé. Ka kanẽ ên vỹ êg rĩnrĩr han tĩ gé. Ên vỹ prỹg pir ki kanẽ tỹ 12 (ke) han tĩ. Kysã kar ki tóg ã kanẽ hyn han tĩ. Ti féj vỹ tỹ vãnh kagta kar nĩ, vãnh kaga kar tỹ tóg hághá' he kãn tĩ.

³ Topẽ tỹ nén ù to jũ vỹ tá nĩnh ke tũ pẽ nĩ, cidade ên tá.

Topẽ nĩgja vỹ cidade ên tá nĩ nĩ, cordeiro nĩgja ên ti, kỹ vãnh kar vỹ ti to: “Topẽ vẽ,” henh ke mũ, Topẽ rãnrãj han tĩ ag kar.

⁴ Topẽ ve jé ag tóg ke mũ, kỹ ti jiji vỹ ag kakã ki rán kỹ nĩnh mũ.

⁵ Tá tóg kutyg vãnh nỹgtĩ, hã kỹ ag tóg tá lampião grug ke tũ nĩ. Rã vỹ tá tũ nĩ gé. Topẽ vỹ ag mỹ tỹ jẽngrẽ han tĩgtĩ, êg pã'i ti. Kỹ tá nỹtĩ ag tóg tỹ pã'i nỹtĩnh ke mũ gé. Ag tỹ tỹ pã'i

nỹtĩnh ke tag vỹ tũ' henh ke tũ nĩ.

Jesus kãtĩg mãn

⁶ Kỹ Topẽ tỹ jẽnẽ jafã ên tóg inh mỹ: “inh vỹ vỹ tỹ ki hã ke nĩ,” he mũ. “Vãnh ó pijé,” he tóg. “Êg jóg tỹ Topẽ vỹ ù tỹ ã vỹ tó tĩ ag mỹ ã kuprĩg jẽnẽ, ti tỹ ag kanhrãn jé. Hã kỹ tóg ã tỹ jẽngrẽ jafã ag kã ù jẽnẽ, ti tỹ ti mỹ rãnrãj tĩ ag mỹ tó jé, nén tỹ kãnhmar kutẽnẽh ke mũ ti,” he tóg, inh mỹ, Topẽ tỹ jẽnẽ jafã ti.

⁷ Jesus vỹ tag tó mũ, ha mẽ. “Ha vé, inh kãtĩg mãn ke nẽ ha. Nén tỹ livro tag ki rán kỹ nĩ tag to jykren há han nĩ, kỹ Topẽ tóg ãjag mỹ vỹ há han ke mũ,” he tóg, Jesus ti.

⁸ Tag kar ve inh, mẽ inh ke gé, inh, hã vỹ: João, he mũ. Isỹ ve kãn kar kỹ sóg ù tỹ inh mỹ tag ven mũ ên krẽm mũg ke mũ, sỹ ti mỹ: “Topẽ vỹ tỹ ã nĩ,” he jé.

⁹ Hã ra tóg inh mỹ: “ke tũg nĩ,” he mũ. “Ã ri ke sóg nĩ, isỹ Topẽ rãnrãj han kỹ. Á régre ag ri ke sóg nĩ, ù tỹ Topẽ vỹ tó tĩ ag ri ke sóg nĩ, ù tỹ livro tag ki nén rán kỹ nĩ mẽg mũ ag ri ke sóg nĩ gé. Topẽ hã mỹ: “Topẽ vỹ tỹ ã nĩ,” hemnĩ,” he tóg, inh mỹ, Topẽ tỹ jẽnẽ jafã ti.

¹⁰ Kỹ Jesus vỹ tag tó mũ gé, ha mẽ. “Livro tag ki nén rán kỹ nĩ tag péju sór tũg nĩ,” he tóg, inh mỹ. “Kakó ti nĩ ha, ãjag tỹ nén tỹ ki rán kỹ nĩ tag venh ke mũ ti.

¹¹ Û tỹ vãnh jykre pāno han mũ ên jé han kỹ nĩ nĩ. Û mỹn hỹn há tĩgtĩ, ti jykre kavéj ti.

Ti jé ã jykre kórég hã mĩ tũg. Ũ tóg vènh jykre kuryj han tĩ. Ti jé to tar nĩ. Ũ ag tóg tỹ Topê tũ nỹtĩ. Ag jé ti to krónh ke tũg,” he tóg, Jesus ti.

12 “Ha vé, inh kãtĩg mãn ke nê ha. Ājag kaja ma sóg kãtĩg ke mũ, ha vemnĩ. Vènh kar vỹ ve kãn ke mũ, ag tỹ nén han mũ kaja ti.

13 Topê vĩ kar han sóg tĩ. Ũn ve vỹ tỹ inh nĩ, ùn tỹ ãgno vỹ tỹ inh nĩ gé. Isỹ nén kar han vén to hã sóg nĩ, kỹ sóg nén kar tỹ tũ' he mũ ra ãgno kã nĩnh ke mũ gé,” he tóg, Jesus ti.

14 “Ũ ag tóg ãjag jykre ku-grynh sór tĩ, hã kỹ ag tóg ãg tỹ ãg kur kygfa ri ke han tĩ. Ĕn ag mỹ tóg vĩ há han ke mũ, Topê ti. Ka kanê tỹ ãg rĩnrĩr han tĩ ãn ko jé ag tóg ke mũ, kỹ ag tóg cidade ãn jãnkã ra genh ke mũ gé.

15 Hã ra ù ag tóg ãn ra genh ke tũ nĩ, hã vỹ: ù tỹ vènh jykre pãno tỹ vènh kavènh tĩ ag, he mũ, kujá ag, he mũ, curandeiro ag, he mũ, ù tỹ ã prũ tũ fag mré nỹgnỹ mũ ag, he mũ, ù fag tỹ ãjag mén tũ ag mré nỹgnỹ mũ fag, he mũ, ù tỹ ù tén mũ ag, he mũ, ù tỹ vènh kãggrá jykre mĩ mũ mũ ag, he mũ, ùn ón mũ ag, he mũ, ù tỹ ù ag lograr he mũ ag, he mũ gé. Ĕn ag vỹ cidade ra genh ke tũ pẽ nĩ,” he tóg, Jesus ti.

16 “Isỹ jẽnê jafã jẽnê inh, inh, hã vỹ: Jesus, he mũ. Ti jẽnê inh, ti tỹ ãjag mỹ ãjag tỹ nén venh ke mũ kar tóg jé, ù tỹ inh vĩ jẽmê jé vènh mãn tĩ ag kar mỹ. Davi krê'krê ag kã ù

ẽn vỹ tỹ inh nĩ. Krĩg mág hã sóg nĩ,” he tóg, Jesus ti.

17 Kỹ Topê kuprĩg vỹ Jesus mỹ: “kur kãtĩg,” he mũ. Ũ tỹ ti ki ge kỹ nỹtĩ kar ag vỹ ti mỹ tag tóg tĩ gé, ag tỹ tỹ ti prũnh ke fi ri ke nỹtĩn kỹ. Ũ tỹ ag tỹ ti jé prẽr mẽg mũ ag jé ti mỹ: “kur kãtĩg,” he kãn.

Kỹ Jesus tóg: “ũ tỹ goj kron sór mũ ãn jé iso kãtĩ,” he mũ, “sỹ ti mỹ goj jun jé, fagrĩnh mỹ. Goj ãn vỹ ti rĩr han ke mũ, ha vemnĩ,” he tóg, Jesus ti.

João tỹ ve ja

18 Vãhã sóg tag tóg sór mũ, inh, hã vỹ: João, he mũ, ha mẽ. Ũ tóg kejẽn isỹ nén rán mũ tag ve kỹ pãte ù rán mãn sór ke mũ gé hẽn ri ke mũn. Ĕn vóg kónãn tãvĩ han jé tóg ke mũ, Topê ti, kỹ tóg sỹ nén ù jagy tóg mũ ãn ve kãn ke mũ, ha mẽ.

19 Kejẽn ù tóg hẽn ri ke mũn isỹ nén rán mũ ù tỹ nén ù tũ han sór mũ. Ĕn tũ mág tỹ tóg tũ' henh ke mũ gé, Topê ti, kỹ tóg ka kanê tỹ ãg rĩnrĩr han mũ ãn konh ke tũ nĩ. Topê tỹ cidade nĩv ãn ra rãnh ke tũ tóg nĩ gé, sỹ cidade kãmén mũ ãn ra.

20 Ũ tỹ inh mỹ tag kar ven mũ ãn vỹ: “inh kãtĩg mãn ke nê ha, sỹ ki hã tóg vè,” he mũ.

Hỹ, kur kãtĩg, ãg Senhor tỹ Jesus’.

21 Ĕg Senhor tỹ Jesus jé ãjag kar tar han. Hã vè.

Ĕg tỹ Topê vĩ rá venh ke

Ĕg tỹ Topê vĩ rá ve kỹ ki kanhrãn kỹ ki krov kỹ ãg hã han ke mũ. Kurã kar ki ãg

tóg to sĩ han ke mũ, kũ ãg tóg
 kãnhmar fĩn rãm ke mũ. Kũ tóg
 há tĩ gé, ãg tũ prỹg kar ki Novo
 Testamento tag fĩn rãm kũ, ãg

tũ tũ vẽnũ kanhrãn há han jé.
 ãg tũ fĩn rãm jé ãg tóg gen kũ
 to kenh mũ, ha vé: